









Digitized by the Internet Archive  
in 2011 with funding from  
University of Toronto

<http://www.archive.org/details/doctorisangelici27thom>

DOCTORIS ANGELICI

DIVI

THOMÆ AQUINATIS

SACRI ORDINIS F. F. PRÆDICATORUM

OPERA OMNIA

---

PARIS. — IMPRIMERIE V. P. LABOUSSE ET C.  
4, RUE NOTRE-DAME-DES-HERMINES, 43

---

DOCTORIS ANGELICI  
DIVI  
**THOMÆ AQUINATIS**

SACRI ORDINIS F. F. PRÆDICATORUM  
**OPERA OMNIA**

SIVE ANTEHAC EXCUSA,  
SIVE ETIAM ANECDOTA; EX EDITIONIBUS VETUSTIS ET DECIMI TERTII SÆCULI CODICIBUS RELIGIOSE CASTIGATA;  
PRO AUTHORITYTIBUS AD FIDEM VULGATÆ VERSIONIS ACCURATIORUMQUE PATROLOGIÆ TEXTUUM,  
NUNC PRIMUM REVOCATA;  
NOTIS HISTORICIS, CRITICIS, PHILOSOPHICIS, THEOLOGICIS, CUNCTAS ILLUSTRANTIBUS CONTROVERSIAS  
OCCASIONE DOGMATUM SANCTI AUTHORIS EXORTAS, SOLLICITE ORNATA,

STUDIO AC LABORE

**STANISLAI EDUARDI FRETTÉ**

Sacerdotis Scholæque Thomisticæ Alumni.

---

**VOLUMEN VIGESIMUM-SEPTIMUM**

---

OPUSCULA VARIA

I



PARISIIS

APUD LUDOVICUM VIVÈS, BIBLIOPOLAM EDITOREM

13, VIA VULGO DICTA DELAMBRE, 13

M DCCC LXXV

1875

THE INSTITUTE FOR POLITICAL STUDIES  
UNIVERSITY OF TORONTO  
TORONTO, CANADA

NOV 27 1981

1527

SANCTI

# THOMÆ AQUINATIS

OPUSCULA THEOLOGICA ET PHILOSOPHICA

TAM CERTA QUAM DUBIA

---

---

## OPUSCULUM I.

COMPENDIUM THEOLOGIÆ

AD FRATREM REGINALDUM SOCIUM SUUM CARISSIMUM.

(EDIT. ROM. I.)

*Quid sit auctoris intentio* <sup>1</sup>.

Æterni Patris verbum sua immensitate universa comprehendens, ut hominem per peccata minoratum in celsitudinem divinæ gloriæ revocaret, breve fieri voluit, nostra brevitate assumpta, non sua deposita majestate. Et ut a cœlestis verbi capessenda doctrina nullus excusabilis redderetur, quod pro <sup>2</sup> studiosis diffuse et dilucide per diversa Scripturæ sanctæ volumina tradiderat, propter occupatos sub brevi summa humanæ salutis doctrinam conclusit. Consistit enim humana salutis in veritatis cognitione, ne per diversos errores intellectus obscuretur humanus; in debiti finis intentione, ne indebitos fines sectando, a vera felicitate deficiat; in justitiæ observatione, ne per vitia diversa sordescat. Cognitionem autem veritatis humanæ salutis necessariam brevibus et

paucis fidei articulis comprehendit. Hinc est quod Apostolus ad Roman. ix, 28, dicit: *Verbum \* abbreviatum faciet Deus super terram*: et x, 8, *hoc quidem est verbum fidei quod prædicamus*. Intentionem humanam brevi oratione rectificavit: in qua dum nos orare docuit, quomodo nostra intentio et spes tendere debet, ostendit. Humanam justitiam quæ in legis observatione consistit, uno præcepto caritatis consummavit. *Plenitudo enim legis est dilectio*. Rom. xiii, 10. Unde Apostolus, I Cor. xiii, 13, in fide, spe et caritate, quasi in quibusdam salutis nostræ compendiosis capitulis, totam præsentis vitæ perfectionem consistere docuit, dicens: *Nunc autem manent fides, spes, caritas*. Unde hæc tria sunt, ut beatus Augustinus (a) dicit, quibus colitur Deus. Ut igitur tibi, fili carissime Reginalde, compendiosam doctrinam de christiana religione tradam, quam sem-

\* *Breviatum... De minus.*

<sup>1</sup> Hunc titulum Parm. omittit.

<sup>2</sup> Cod. S. Gen. — : « propter studiosos. »

(a) Sic Aug., quoad sensum, *De doctrina christ.*, lib. I, c. xxxv.

per præ oculis possis habere; circa hæc tria in præsentī opere tota nostra versatur intentio. Primum de fide, secundo de spe, tertio vero de caritate agemus. Hoc enim et apostolicus ordo habet, et ratio recta requirit. Non enim amor rectus esse potest, nisi <sup>1</sup> primo debitus finis spei statuatur; nec hoc esse potest, si veritatis agnitio desit. Primum igitur necessaria est fides, per quam veritatem cognoscas; secundo spes, per quam in debito fine tua intentio collocetur; tertio necessaria est caritas, per quam tuus affectus totaliter ordinetur.

## TRACTATUS DE FIDE.

### CAPUT I.

#### *Ordo dicendorum* <sup>2</sup>.

Fides autem prælibatio quædam est illius cognitionis quæ <sup>3</sup> in futuro beatos faciet <sup>4</sup>. Unde et Apostolus dicit Heb. xi, 1, quod est *sperandarum substantia rerum*: quasi jam in nobis sperandas res, idest futuram beatitudinem, per modum cuiusdam inchoationis subsistere faciens. Illam autem beatificantem cognitionem circa duo cognita Dominus consistere docuit: scilicet circa Divinitatem Trinitatis, et humanitatem Christi: unde ad Patrem loquens, dicit Joan. xvii, 3: *Hæc est vita æterna, ut cognoscant te Deum verum, et quem misisti Jesum Christum*. Circa hæc ergo duo tota fidei cognitio versatur: scilicet circa Divinitatem Trinitatis, et humanitatem Christi. Nec mirum: quia Christi humanitas via est qua ad Divinitatem pervenitur. Oportet igitur et in via viam cognoscere, per quam possit perveniri ad finem; et in patria Dei gratiarum actio sufficiens non esset, nisi viæ, per quam salvati sunt, cognitionem haberent. Hinc est quod Dominus discipulis dixit Joan. xiv, 4: *Et quo ego vado scitis, et viam scitis*.

Circa Divinitatem vero tria cognosci oportet. Primum quidem essentiæ unitatem, secundo personarum trinitatem, tertio Divinitatis effectus.

<sup>1</sup> Parm. omittit.: « primo. »

<sup>2</sup> Parm. addit.: « circa fidem. »

<sup>3</sup> Parm. addit.: « nos. »

<sup>4</sup> Parm.: « facit. »

### CAPUT II.

#### *Quod Deus sit.*

Circa essentiæ quidem divinæ unitatem primo quidem credendum est Deum esse: quod ratione conspicuum est. Videmus enim omnia quæ moventur ab alio moveri: inferiora quidem per superiora, sicut elementa per corpora cœlestia; et in elementis, quod fortius est movet id quod debilius est; et in corporibus etiam cœlestibus inferiora a superioribus aguntur. Hoc autem in infinitum procedere impossibile est. Cum enim omne quod movetur ab aliquo, sit quasi instrumentum quoddam primi moventis; si primum movens non sit, quæcumque movent, instrumenta erunt. Oportet autem, si in infinitum procedatur in moventibus et motis, primum movens non esse. Igitur omnia infinita moventia et mota erunt instrumenta. Ridiculum est autem etiam apud indoctos, ponere instrumenta moveri, nisi <sup>5</sup> ab aliquo principali agente: simile enim est hoc ac si aliquis circa constitutionem arcæ vel lecti ponat serram vel securim absque carpentario operante. Oportet igitur primum movens esse quod sit omnibus supremum; et hoc dicimus Deum.

### CAPUT III.

#### *Quod Deus est immobilis.*

Ex hoc apparet quod necesse est Deum moventem omnia, immobilem esse. Cum enim sit primum movens, si moveretur, necesse esset se ipsum vel a se ipso, vel ab alio moveri. Ab alio quidem moveri non potest: oporteret enim esse aliud <sup>6</sup> movens prius eo; quod est contra rationem primi moventis. A se ipso autem si movetur, hoc potest esse dupliciter. Vel quod secundum idem sit movens et motum; aut ita quod secundum aliquid sui sit movens, et secundum aliquid motum. Horum quidem primum esse non potest. Cum enim <sup>7</sup> quod movetur, omne,

<sup>5</sup> Parm.: « non. »

<sup>6</sup> Parm.: « aliquid. »

<sup>7</sup> Parm.: « omne quod. »



in tantum hujusmodi, sit in potentia ; quod autem movet, sit in actu ; si secundum idem esset movens et motum, oporteret quod secundum idem esset in potentia et in actu : quod est impossibile. Secundum etiam esse non potest. Si enim esset aliud <sup>1</sup> movens, et alterum motum, non esset ipsum secundum se primum movens, sed ratione suæ partis quæ movet. Quod autem est per se, prius est eo quod non est per se. Non potest igitur primum movens esse, si ratione suæ partis hoc ei conveniat. Oportet igitur primum movens omnino immobile esse.

Ex iis etiam quæ moventur et movent, hoc ipsum considerari potest. Omnis enim motus videtur ab aliquo immobili procedere, quod scilicet non movetur secundum illam speciem motus ; sicut videmus quod alterationes, et generationes, et corruptiones quæ sunt in istis inferioribus, reducuntur sicut in primum movens in corpus cæleste, quod secundum hanc speciem motus non movetur, cum sit ingenerabile et incorruptibile et inalterabile. Illud ergo quod est primum principium omnis motus, oportet esse immobile <sup>2</sup>.

## CAPUT IV.

*Quod Deus est æternus.*

Ex hoc autem apparet ulterius Deum esse æternum. Omne enim quod incipit esse vel desinit, per motum vel per mutationem hoc patitur. Ostensum est autem quod Deus est omnino immobilis. Est ergo æternus.

## CAPUT V.

*Quod Deum esse <sup>3</sup> est necessarium.*

Per hoc autem ostenditur quod Deum esse sit necessarium. Omne enim quod possibile est esse et non esse, est mutabile. Sed Deus est omnino immutabilis, ut ostensum est. Ergo Deum non est possibile esse et non esse. Omne autem quod

est, et non est possibile ipsum non esse, necesse est et <sup>4</sup> ipsum esse : quia necesse esse, et non possibile non esse, idem significant. Ergo Deum esse est necesse.

Item. Omne quod est possibile esse et non esse indiget aliquo alio quod faciat ipsum esse : quia, quantum est in se, se habet ad utrumque. Quod autem facit aliquid esse, est prius eo. Ergo omni quod est possibile esse et non esse, est aliquid prius. Deo autem non est aliquid prius. Ergo non est possibile ipsum esse et non esse, sed necesse est eum esse. Et quia aliqua necessaria sunt quæ suæ necessitatis causam habent, quam oportet eis esse priorem ; Deus, qui est omnium primum, non habet causam suæ necessitatis : unde Deum esse per se ipsum est necesse.

## CAPUT VI.

*Quod Deus semper est.*

Ex his autem manifestum est quod Deus est semper. Omne enim quod necesse est esse, semper est : quia quod non possibile est non esse, impossibile est non esse, et ita nunquam non est. Sed necesse est Deum esse, ut ostensum est. Ergo Deus semper est.

Adhuc. Nihil incipit esse aut desinit nisi per motum vel mutationem. Deus autem omnino est immutabilis, ut probatum est. Impossibile est igitur quod esse inceperit, vel quod esse desinat.

Item. Omne quod non semper fuit, si esse incipiat, indiget aliquo quod sit ei causa essendi : nihil enim se ipsum educit de potentia in actum, vel de non esse in esse. Deo autem nulla potest esse causa essendi, cum sit primum ens ; causa enim prior est causato. Necesse est igitur Deum semper fuisse.

Amplius. Quod convenit alicui non ex aliqua causa extrinseca, convenit ei per se ipsum. Esse autem Deo non convenit ex aliqua causa extrinseca, quia illa causa esset eo prior. Deus igitur habet esse per se ipsum. Sed ea quæ per se sunt, semper sunt, et ex necessitate. Igitur Deus semper est.

<sup>1</sup> Parm. : « aliquod. »

<sup>2</sup> Parm. addit : « omnino. »

<sup>3</sup> Parm. addit : « per se. »

<sup>4</sup> Parm. omittit : « et. »

## CAPUT VII.

*Quod in Deo non est aliqua successio.*

Per hoc autem manifestum est quod in Deo non est aliqua successio; sed ejus esse totum est simul. Successio enim non invenitur nisi in illis quæ sunt aliquando motui subjecta: prius enim et posterius in motu causant temporis successionem. Deus autem nullo modo est motui subjectus, ut ostensum est. Non igitur est in Deo aliqua successio, sed ejus esse est totum simul.

Item. Si alicujus esse non est totum simul, oportet quod ei aliquid deperire possit, et aliquid advenire. Deperit enim illud quod transit, et advenire ei potest illud quod in futurum expectatur. Deo autem nihil deperit nec accrescit, quia immobilis est. Igitur esse ejus est totum simul.

Ex his autem duobus apparet quod proprie est æternus. Illud enim proprie est æternum quod semper est, et ejus esse est totum simul; secundum quod Boetius dicit, *V De consol.* pros. vi, quod « æternitas est interminabilis vitæ tota simul et perfecta possessio. »

## CAPUT VIII.

*Quod<sup>1</sup> in Deo non est compositio.*

Inde etiam apparet quod oportet primum movens simplex esse. Nam in omni compositione oportet esse duo, quæ ad invicem se habeant sicut potentia ad actum. In primo autem movente, si est omnino immobile, impossibile est esse potentiam cum actu; nam unumquodque ex hoc quod est in potentia, mobile est. Impossibile igitur est primum movens compositum esse.

Adhuc. Omni composito necesse est esse aliquid prius: nam componentia naturaliter sunt composito priora. Illud igitur quod omnium entium est primum, impossibile est esse compositum. Videmus etiam in ordine eorum quæ sunt

composita, simpliciora priora esse: nam elementa sunt naturaliter priora corporibus mixtis. Item etiam inter ipsa elementa primum est ignis quod est subtilissimum<sup>2</sup>. Omnibus autem elementis prius est corpus cœleste, quod in majori simplicitate constitutum est, cum ab omni contrarietate sit purum. Relinquitur igitur quod primum entium oportet omnino simplex esse.

## CAPUT IX.

*Quod Deus est sua essentia.*

Sequitur autem ulterius quod Deus sit sua essentia. Essentia enim uniuscujusque rei est illud quod significat definitio ejus. Hoc autem est idem cum re cujus est definitio, nisi per accidens, scilicet definito, <sup>3</sup> accidat aliud quod est præter definitionem ipsius; sicut homini accidit albedo præter id quod est animal rationale et mortale: unde animal rationale et mortale est idem homini<sup>4</sup>, sed non idem albo in quantum est album. In quocumque igitur non est invenire duo quorum unum est per se et aliud per accidens, oportet quod essentia ejus sit omnino idem cum eo. In Deo autem, cum sit simplex, ut ostensum est, non est invenire duo quorum unum sit per se, et aliud per accidens. Oportet igitur quod essentia ejus sit omnino idem quod ipse.

Item. In quocumque essentia non est omnino idem cum re cujus est essentia, est invenire aliquid per modum potentiae, et aliquid per modum actus: nam essentia formaliter se habet ad rem cujus est essentia, sicut humanitas ad hominem. In Deo autem non est invenire potentiam et actum, sed est actus purus. Est igitur ipse sua essentia.

## CAPUT X.

*Quod Dei essentia et ejus esse sit idem<sup>5</sup>.*

Uterius autem necesse est quod Dei essentia non sit aliud quam esse ipsius. In quocumque enim aliud est essentia, et

<sup>1</sup> Parm.: « Deus est simplex. »

<sup>2</sup> Parm.: « simplicissimum. »

<sup>3</sup> Parm.: « in quantum scilicet definito accidit aliquid. »

<sup>4</sup> Parm.: « quod homo; sed non idem homini albo »

<sup>5</sup> Parm.: non est aliud quam suum esse. »

aliud esse ejus, oportet quod aliud sit quod sit, et aliud quo aliquid sit : nam per esse suum de quolibet dicitur quod est, per essentiam vero suam de quolibet dicitur quid sit : unde et diffinitio significans essentiam demonstrat quid est res. In Deo autem non est aliud quod est, et aliud quo aliquid est; cum non sit in eo compositio, ut ostensum est. Non est igitur ibi aliud ejus essentia, quam suum esse.

Item. Ostensum est quod Deus est actus purus absque alicujus potentialitatis permixtione. Oportet igitur quod ejus essentia sit ultimus actus : nam omnis actus qui est circa ultimum, est in potentia ad ultimum actum. Ultimus autem actus est ipsum esse. Cum enim omnis motus sit exitus de potentia in actum, oportet illud esse ultimum actum in quod tendit omnis motus : et cum motus naturalis in hoc tendat quod est naturaliter desideratum, oportet hoc esse ultimum actum quod omnia desiderant. Hoc autem est esse. Oportet igitur quod essentia divina, quæ est actus purus et ultimus, sit ipsum esse.

## CAPUT XI.

*Quod Deus non est in aliquo genere sicut species.*

Hinc autem apparet quod Deus non sit in aliquo genere sicut species. Nam differentia addita generi constituit speciem. Ergo cujuslibet speciei essentia habet aliquid additum supra genus. Sed ipsum esse quod est essentia Dei, nihil in se continet quod sit alteri additum. Deus igitur non est species alicujus generis.

Item. Cum genus contineat differentias potestate, in omni constituto ex genere et differentiis est actus permixtus potentiae. Ostensum est autem Deum esse purum actum absque permixtione potentiae. Non est igitur ejus essentia constituta ex genere et differentiis; et ita non est in genere.

## CAPUT XII.

*Quod<sup>1</sup> Deus non est genus.*

Ulterius autem ostendendum est quod

neque possibile est Deum esse genus. Ex genere enim habetur quid est res, non autem rem esse : nam per differentias specificas constituitur res in proprio esse. Sed hoc quod Deus est, est ipsum esse. Impossibile est ergo quod sit genus.

Item. Omne genus differentiis aliquibus dividitur. Ipsius autem esse non est accipere aliquas differentias : differentiae enim non participant genus nisi per accidens, inquantum species constitutæ per differentias genus participant. Non potest autem esse aliqua differentia quæ non participet esse, quia non ens nullius est differentia. Impossibile est igitur quod Deus sit genus de multis speciebus prædicatum.

## CAPUT XIII.

*Quod Deus non est sicut una<sup>2</sup> species prædicata de multis individuis.*

Neque est possibile quod sit sicut una species de multis individuis prædicata. Individua enim diversa quæ conveniunt in una essentia speciei, distinguuntur per aliqua quæ sunt præter essentiam<sup>3</sup>; sicut homines conveniunt in humanitate, sed distinguuntur ab invicem per id quod est præter rationem humanitatis. Hoc autem in Deo non potest accidere : nam ipse Deus est sua essentia, ut ostensum est. Impossibile est igitur quod Deus sit species quæ de pluribus individuis prædicetur.

Item. Plura individua sub una specie contenta differunt secundum esse, et tamen conveniunt in una essentia speciei<sup>4</sup>. Ubi cumque igitur sunt plura individua sub specie una, oportet quod aliud sit esse, et aliud essentia speciei. In Deo autem idem est esse et essentia, ut ostensum est. Impossibile est igitur quod Deus sit quædam species de pluribus prædicata.

## CAPUT XIV.

*Quod<sup>5</sup> sit unus Deus tantum.*

Hinc etiam apparet quod necesse est unum<sup>6</sup> solum Deum esse. Nam si sint

<sup>1</sup> Parm. : « impossibile est Deum esse genus alicujus. »

<sup>2</sup> Parm. : « non est aliqua. »

<sup>3</sup> Parm. addit : « speciei. »

<sup>4</sup> Parm. omittit : « speciei. »

<sup>5</sup> Parm. : « necesse est dicere Deum esse unum. »

<sup>6</sup> Parm. : « Deum solum esse. »

multi dii, aut æquivoce aut univoce dicuntur. Si æquivoce, hoc non est ad propositum : nihil enim prohibet, quod nos appellamus lapidem, alios appellare Deum. Si autem univoce, oportet quod conveniant vel in genere vel in specie. Ostensum est autem quod Deus non potest esse genus neque species plura sub se continens. Impossibile est igitur esse plures deos.

Item. Illud quo essentia communis individuatur, impossibile est pluribus convenire : unde licet possint esse plures homines, impossibile tamen est hunc hominem esse nisi unum tantum. Si igitur essentia per se ipsam individuatur, et non per aliquid aliud, impossibile est quod pluribus conveniat. Sed essentia divina per se ipsam individuatur, quia in Deo non est aliud essentia et quod est, cum ostensum sit quod Deus sit sua essentia : impossibile est ergo quod sit Deus nisi unus tantum.

Item. Duplex est modus quo aliqua forma potest multiplicari : unus per differentias, sicut forma generalis, ut color in diversas species coloris : alius per subjecta <sup>1</sup>, sicut albedo. Omnis ergo forma quæ non potest multiplicari per differentias, si non sit forma in subjecto existens, impossibile est quod multiplicetur ; sicut albedo, si subsisteret sine subjecto, non esset nisi una tantum. Essentia autem divina est ipsum esse, cujus non est accipere differentias, ut ostensum est. Cum igitur ipsum esse divinum sit quasi forma per se subsistens, eo quod Deus est suum esse ; impossibile est quod essentia divina sit nisi una tantum. Impossibile est igitur esse plures deos.

#### CAPUT XV.

*Quod Deus non est corpus* <sup>2</sup>.

Patet autem ulterius quod impossibile est ipsum Deum esse corpus. Nam in omni corpore compositio aliqua invenitur : omne enim corpus est partes habens. Id igitur quod est omnino simplex, corpus esse non potest.

Item. Nullum corpus invenitur movere nisi per hoc quod ipsum movetur, ut per

omnia inducenti apparet. Si ergo primum movens est omnino immobile, impossibile est ipsum esse corpus.

#### CAPUT XVI.

*Quod Deus non est forma* <sup>3</sup> *corporis, nec aliqua virtus in corpore.*

Neque etiam est possibile ipsum esse formam corporis, aut aliquam virtutem in corpore. Cum enim omne corpus mobile inveniatur, oportet corpore moto, ea quæ sunt in corpore, moveri, saltem per accidens. Primum autem movens non potest nec per se, nec per accidens, moveri ; cum oporteat ipsum omnino esse immobile, ut ostensum est. Impossibile est igitur quod sit forma, vel virtus in corpore.

Item. Oportet omne movens, ad hoc quod moveat, dominium super rem quæ movetur, habere : videmus enim quod quanto magis virtus movens excedit virtutem mobilis, tanto velocior est motus. Illud igitur quod est omnium moventium primum, oportet maxime dominari super res motas. Hoc autem esse non posset, si esset mobili aliquo modo alligatum ; quod esse oporteret, si esset forma ejus, vel virtus. Oportet igitur primum movens neque corpus esse, neque virtutem in corpore, neque formam in corpore. Hinc est quod Anaxagoras posuit intellectum immixtum, ad hoc quod imperet, et omnia moveat.

#### CAPUT XVII.

*Quod Deus est infinitus* <sup>4</sup>.

Hinc etiam considerari potest ipsum esse infinitum, non privative quidem secundum quod infinitum est passio quantitatis, prout scilicet infinitum dicitur quod est natum habere finem ratione sui generis, sed non habet ; sed negative, prout infinitum dicitur quod nullo modo finitur. Nullus enim actus invenitur finiri nisi per potentiam, quæ est vis receptiva : invenimus enim formas limitari secundum potentiam materiæ. Si igitur primum

<sup>1</sup> Parm. : « subjectum. »

<sup>2</sup> Parm. : « impossibile est Deum esse corpus. »

<sup>3</sup> Parm. : « impossibile est esse formam, ... aut virtutem. »

<sup>4</sup> Parm. addit : « secundum essentiam. »

movens est actus absque potentiæ permixtione, quia non est forma alicujus corporis, nec virtus in corpore; necessarium est ipsum infinitum esse.

Hoc etiam ipse ordo, qui in rebus invenitur, demonstrat. Nam quanto aliqua in entibus sunt sublimiora, tanto suo modo majora inveniuntur. Inter elementa enim quæ sunt superiora, majora quantitative inveniuntur, sicut etiam in simplicitate; quod eorum generatio demonstrat, cum multiplicata proportione ignis ex aere generetur, aer ex aqua, aqua autem ex terra. Corpus autem cœleste manifeste apparet totam quantitatem elementorum excedere. Oportet igitur id quod inter omnia entia primum est, et eo non potest esse aliquid altius<sup>1</sup>, infinitæ quantitatis suo modo existat<sup>2</sup>.

Nec mirum, si id quod est simplex, et corporea quantitate caret, infinitum ponatur, et sua immensitate omnem corporis quantitatem excedere: cum intellectus noster, qui est incorporeus et simplex, omnium corporum quantitatem vi suæ cognitionis excedat, et omnia circumplectatur. Multo igitur magis id quod est omnium primum, sua immensitate universa excedit, omnia complectens.

### CAPUT XVIII.

#### *Quod Deus est infinitæ virtutis.*

Hinc etiam apparet Deum infinitæ virtutis esse. Virtus enim consequitur essentiam rei. Nam unumquodque secundum modum quo est, agere potest. Si igitur Deus secundum essentiam infinitus est, oportet quod ejus virtus sit infinita.

Hoc etiam apparet, si quis rerum ordinem diligenter inspiciat. Nam unumquodque quod est in potentia, secundum hoc habet virtutem receptivam et passivam; secundum vero quod actu est, habet virtutem activam. Quod igitur est in potentia tantum, scilicet materia prima, habet virtutem infinitam ad recipiendum, nihil de virtute activa participans; et supra ipsam quanto aliquid formalius est, tanto id abundat in virtute agendi: propter

quod ignis inter omnia elementa est magis<sup>3</sup> activum. Deus igitur, qui est actus purus, nihil potentialitatis permixtum habens, in infinitum abundat in virtute activa super alia.

### CAPUT XIX.

#### *Quod infinitum in Deo non importat aliquam<sup>4</sup> imperfectionem.*

Quamvis autem infinitum quod in quantitativis invenitur, imperfectum sit; tamen quod Deus infinitus dicitur, summam perfectionem in ipso demonstrat. Infinitum enim quod est in quantitativis ad materiam pertinet, prout sine privatur. Imperfectio autem accidit rei secundum quod materia sub privatione invenitur: perfectio autem omnis ex forma est. Cum igitur Deus ex hoc infinitus sit quod tantum forma vel actus est, nullam materiæ vel potentialitatis permixtionem habens, sua infinitas ad summam perfectionem ipsius pertinet.

Hoc etiam ex rebus aliis considerari potest. Nam licet in uno et eodem, quod de imperfecto ad perfectum perducitur, prius sit aliquid imperfectum quam perfectum, sicut prius est puer quam vir; tamen oportet quod omne imperfectum a perfecto trahat originem: non enim oritur puer nisi ex viro, nec semen nisi ex animali vel planta. Illud igitur quod est naturaliter omnibus prius, omnia movens, oportet omnibus perfectius esse.

### CAPUT XX.

#### *Quod<sup>5</sup> omnes perfectiones quæ sunt in rebus originaliter et eminenter sunt in Deo.*

Unde etiam apparet quod omnes perfectiones in quibuscumque rebus inventas, necesse est originaliter et superabundanter in Deo esse. Nam omne quod movet aliquid ad perfectionem,<sup>6</sup> præhabet in se perfectionem quam aliis confert; sicut doctor<sup>7</sup> præhabet in se doctrinam quam aliis tradit. Si igitur Deus<sup>8</sup>, cum sit primum movens, omnia alia moveat

<sup>1</sup> Parm. : « aliud prius. »

<sup>2</sup> Non, ut in Parm. : « existere. »

<sup>3</sup> Parm. : « maxime actionis. »

<sup>4</sup> Parm. omittit : « aliquam. »

<sup>5</sup> Parm. : « in Deo est omnimoda perfectio quæ est in rebus, et eminentius. »

<sup>6</sup> Parm. : « prius habet... ad quam movet. »

<sup>7</sup> Parm. : « Magister prius habet. »

<sup>8</sup> Parm. : « cum igitur Deus sit,... etc. »



in suas perfectiones <sup>1</sup>, necesse est omnes perfectiones rerum in ipso præexistere superabundanter.

Item. Omne quod habet aliquam perfectionem, si alia perfectio ei desit, est limitatum sub aliquo genere vel specie : nam per formam, quæ est perfectio rei, quælibet res in genere, vel specie collocatur. Quod autem est sub specie et genere constitutum, non potest esse infinitæ essentiæ : nam oportet quod ultima differentia per quam in specie ponitur, terminet ejus essentiam : unde et ratio speciem notificans, definitio vel finis dicitur. Si ergo divina essentia infinita est, impossibile est quod alicujus tantum generis vel speciei perfectionem habeat, et aliis prievtur ; sed oportet quod omnium generum vel specierum perfectiones in ipso existant.

#### CAPUT XXI.

*Quod in Deo omnes perfectiones sunt unum secundum rem.*

Si autem colligamus ea quæ superius dicta sunt, manifestum est quod omnes perfectiones in Deo sunt unum secundum rem. Ostensum est enim supra, Deum simplicem esse. Ubi autem est simplicitas, diversitas eorum quæ insunt, esse non potest. Si ergo in Deo sunt omnium perfectiones, impossibile est quod sint diversæ in ipso : relinquitur ergo quod omnes sint unum in eo.

Hoc autem manifestum fit consideranti in virtutibus cognoscitivis. Nam superior vis secundum unum et idem est cognoscitiva omnium quæ ab inferioribus viribus secundum diversa cognoscuntur : omnia enim quæ visus, auditus, et ceteri sensus percipiunt, intellectus una et simplici virtute dijudicat. Simile etiam apparet in scientiis : nam cum inferiores scientiæ secundum diversa genera rerum circa quæ versatur eorum intentio, multiplicentur : una tamen scientia est in eis superior, ad omnia se habens quæ Philosophia prima dicitur. Apparet etiam idem in potestatibus : nam in regia potestate, cum sit una, includuntur omnes potestates quæ per diversa officia sub dominio regni distribuuntur. Sic igitur et

perfectiones, quæ in inferioribus rebus secundum diversitatem rerum multiplicantur, oportet quod in ipso rerum vertice <sup>2</sup> uniantur.

#### CAPUT XXII.

*Quod nullum accidens est <sup>3</sup> in Deo.*

Inde etiam apparet quod in Deo nullum accidens esse potest. Si enim in eo omnes perfectiones sunt unum ; ad perfectionem autem pertinet esse, posse, agere, et omnia hujusmodi ; necesse est omnia in eo idem esse quod ejus essentia. Nullum igitur eorum in eo est accidens.

Item. Impossibile est infinitum esse perfectione, cujus perfectioni aliquid adjici potest. Si autem aliquid est cujus aliqua perfectio sit accidens, cum omne accidens superaddatur essentiæ, oportet quod ejus essentiæ aliqua perfectio adjici possit. Non igitur invenitur in ejus essentia perfectio infinita. Ostensum est autem, Deum secundum suam essentiam infinitæ perfectionis esse. Nulla igitur in eo perfectio accidentaliter esse potest ; sed quicquid in eo est, substantia ejus est.

Hoc etiam facile est concludere ex summa simplicitate illius, et ex hoc quod est actus purus, et ex hoc quod est primum in entibus. Est enim aliquis compositionis modus accidentis ad subjectum. Id etiam quod subjectum est non potest esse actus purus, cum accidens sit quædam forma vel actus subjecti. Semper etiam quod est per se, prius est eo quod est per accidens. Ex quibus omnibus secundum supradicta haberi potest, quod in Deo nihil est quod secundum accidens dicatur.

#### CAPUT XXIII.

*Quod <sup>4</sup> ratio multitudinis nominum quæ dicuntur de Deo non repugnat simplicitati ejus.*

Per hoc autem apparet ratio multitudinis nominum quæ de Deo dicuntur, licet ipse in se sit omnimode simplex. Cum enim intellectus noster essentiam ejus in

<sup>1</sup> Al. : « immoveat suas perfectiones. »

<sup>2</sup> Parm. addit : « scilicet Deo. »

<sup>3</sup> Parm. : « invenitur. »

<sup>4</sup> Parm. : « multitudo nominum. »

se ipsa capere non sufficiat, in ejus cognitionem consurgit ex rebus quæ apud nos sunt, in quibus inveniuntur diversæ perfectiones, quarum omnium radix vel<sup>1</sup> origo in Deo una est, ut ostensum est. Et quia non possumus aliquid nominare nisi secundum quod intelligimus (sunt enim nomina intellectuum signa); Deum non possumus nominare nisi ex perfectionibus in aliis rebus inventis, quarum origo in ipso est: et quia hæ in rebus istis multiplices sunt, oportet multa nomina Deo imponere. Si autem essentiam ejus in se ipsa videremus, non requiretur nominum multitudo, sed esset simplex notitia ejus, sicut est simplex essentia ejus, et hoc in die gloriæ nostræ expectamus, secundum illud Zachar. ult: *In illa die erit Dominus unus, et nomen ejus unum.*

## CAPUT XXIV.

*Quod<sup>2</sup> prædicta nomina dicta de Deo non sunt synonyma.*

Ex his autem tria possumus considerare. Quorum primum est quod diversa nomina, licet idem in Deo secundum rem significant, non tamen sunt synonyma. Ad hoc enim quod nomina aliqua sint synonyma, oportet quod significant eandem rem et eandem intellectus conceptionem repræsentent. Ubi vero significatur eadem res secundum diversas rationes, idest apprehensiones quas habet intellectus de re illa, non sunt nomina synonyma, quia non est penitus significatio eadem, cum nomina immediate significant conceptiones intellectus, quæ sunt rerum similitudines. Et ideo cum diversa nomina dicta de Deo significant diversas conceptiones quas intellectus noster habet de ipso non sunt synonyma, licet omnino eandem rem significant.

## CAPUT XXV.

*Quod per definitiones ipsorum nominum non potest definiri id quod est in Deo.*

Secundum est quod cum intellectus noster secundum nullam earum concep-

tionum quas nomina dicta de Deo significant, divinam essentiam perfecte capiat, impossibile est quod per definitiones horum nominum definiatur id quod est in Deo, sicut quod definitio sapientiæ sit definitio potentiæ divinæ, et similiter in aliis. Quod alio modo etiam est manifestum. Omnis enim definitio ex genere et differentiis constat: id etiam quod proprie definitur, species est. Ostensum est autem quod divina essentia non concluditur sub aliquo genere, nec sub aliqua specie. Unde non potest ejus esse aliqua definitio.

## CAPUT XXVI.

*Qualiter dicta nomina de Deo dicantur<sup>3</sup>.*

Tertium est quod nomina de Deo et aliis rebus dicta, non omnino univoce, nec omnino æquivoce dicuntur. Univoce namque dici non possunt, cum definitio ejus quod de creatura dicitur, non sit definitio ejus quod dicitur de Deo: oportet autem univoce dictorum eandem definitionem esse. Similiter autem nec omnino æquivoce. In his enim quæ sunt a casu æquivoca, idem nomen imponitur uni rei, nullo habito respectu ad rem aliam: unde per unum non potest ratiocinari de alio. Hæc autem nomina quæ dicuntur de Deo et de aliis rebus, attribuuntur Deo secundum aliquem ordinem quem habet ad istas res, in quibus intellectus significata eorum considerat; unde et per alias res ratiocinari de Deo possumus. Non igitur omnino æquivoce dicuntur ista de Deo et de aliis rebus, sicut ea quæ sunt a casu æquivoca. Dicuntur igitur secundum analogiam, idest secundum proportionem ad unum. Ex eo enim quod alias res comparamus ad Deum sicut ad suam primam originem, hujusmodi nomina quæ significant perfectiones aliarum rerum<sup>4</sup> Deo attribuimus. Ex quo patet quod licet quantum ad nominis impositionem hujusmodi nomina per prius de creaturis dicantur, eo quod ex creaturis intellectus nomina imponens ascendit in Deum; tamen secundum rem significatam per nomen, per prius dicuntur de Deo, a quo perfectiones descendunt in alias res.

<sup>1</sup> Parm.: « et. »

<sup>2</sup> Parm.: « licet diversa nomina dicantur de Deo, non tamen sunt. »

<sup>3</sup> Parm.: « quod nomina de Deo et aliis, non omnino univoce, nec æquivoce dicuntur. »

<sup>4</sup> Parm. omittit: « rerum. »

## CAPUT XXVII.

*Quod<sup>1</sup> Deus est intelligens.*

Ulterius autem ostendendum est quod Deus est intelligens. Ostensum est<sup>2</sup> quod in ipso præexistunt omnes perfectiones entium. Inter omnes autem perfectiones entium ipsum intelligere, præcellere videtur, cum res intellectuales sint omnibus aliis potiores. Igitur oportet Deum esse intelligentem.

Item. Ostensum est supra quod Deus est actus purus absque potentialitatis permixtione. Materia autem est ens in potentia. Oportet igitur Deum esse omnino immunem a materia. Immunitas autem a materia est causa intellectualitatis : ejus signum est quod formæ materiales efficiuntur intelligibiles actu per hoc quod abstrahuntur a materia et a materialibus conditionibus. Est igitur Deus intelligens.

Item. Ostensum est Deum esse primum movens. Hoc autem videtur esse proprium intellectus ; nam intellectus omnibus aliis videtur uti quasi instrumentis ad motum : unde et homo, suo intellectu, utitur quasi instrumentis ad motum<sup>3</sup> et animalibus, et plantis, et rebus inanimatis. Oportet igitur Deum, qui est primum movens, esse intelligentem.

## CAPUT XXVIII.

*Quod<sup>4</sup> in Deo non est intellectio nec in potentia, nec in habitu, sed in actu.*

Cum autem in Deo non sit aliquid in potentia, sed in actu tantum, ut ostensum est ; oportet quod Deus non sit intelligens neque in potentia, neque in habitu, sed actu tantum : ex quo patet quod nullam in intelligendo patitur successionem aut vicissitudinem<sup>5</sup>. Cum enim aliquis successive multa intelligit, oportet quod dum unum intelligit actu, alterum intelligat in potentia. Inter ea enim quæ simul sunt, non est aliqua successio. Si igitur Deus nihil intelligit in potentia, absque omni

successione est ejus intelligentia : unde sequitur quod omnia quæcumque intelligit, simul intelligat ; et iterum, quod nihil de novo intelligat ; intellectus enim de novo aliquid intelligens, prius fuit intelligens in potentia. Inde etiam patet quod intellectus ejus non discursive intelligit, ut ex uno in cognitionem alterius deveniat, sicut intellectus noster in<sup>6</sup> ratiocinando facit. Discursus enim talis in intellectu est, dum ex noto pervenimus in cognitionem ignoti, vel ejus quod prius actu non considerabamus : quæ in intellectu divino accidere non possunt.

## CAPUT XXIX.

*Quod Deus non intelligit per aliam speciem quam per essentiam suam.*

Patet etiam ex prædictis, quod Deus non intelligit per aliam speciem quam per essentiam suam.

Omnis enim intellectus intelligens per speciem aliam a se, comparatur ad illam speciem intelligibilem sicut potentia ad actum ; cum species intelligibilis sit perfectio ejus, faciens ipsum intelligentem actu. Si igitur in Deo nihil est in potentia, sed est actus purus ; oportet quod non per aliam speciem, sed per essentiam suam intelligat ; et inde sequitur quod directe et principaliter se ipsum intelligat. Essentia enim rei non ducit proprie et directe in cognitionem alicujus, nisi ejus cujus est essentia : nam per definitionem hominis proprie cognoscitur homo, et per definitionem equi, equus. Si igitur Deus est per essentiam suam intelligens, oportet quod id quod est intellectum ab eo directe et principaliter, sit ipse Deus : et cum ipse sit sua essentia, sequitur quod in eo intelligens et quo intelligit et intellectum sint omnino idem.

## CAPUT XXX.

*Quod Deus est suum intelligere.*

Oportet etiam quod ipse Deus sit suum intelligere. Cum enim intelligere sit actus

<sup>1</sup> Parm. : « oportet Deum esse intelligentem. »

<sup>2</sup> Parm. addit : « enim. » et « quorumlibet. » et « superabundanter. »

<sup>3</sup> Parm. omittit : « ad motum. »

<sup>4</sup> In Cod. S. Gen. : « quod Deus est intelligibilis. »

<sup>5</sup> Parm. omittit : « vicissitudinem. »

<sup>6</sup> Parm. omittit : « in. »



secundus, ut considerare; primus enim actus est intellectus vel scientia; omnis intellectus qui non est suum intelligere, comparatur ad suum intelligere sicut potentia ad actum. Nam semper in ordine potentiarum et actuum quod est prius est potentiale respectu sequentis, et ultimum est completivum, loquendo in uno et eodem, licet in diversis sit e converso: nam movens et agens comparatur ad motum et actum, sicut agens ad potentiam. In Deo autem, cum sit actus purus, non est aliquid quod comparetur ad alterum sicut potentia ad actum. Oportet ergo quod ipse Deus sit suum intelligere.

Item. Eodem modo<sup>1</sup> comparatur intellectus ad intelligere sicut essentia ad esse. Sed Deus est intelligens per essentiam; essentia autem sua est suum esse. Ergo ejus intellectus est suum intelligere; et sic per hoc quod est intelligens, nulla compositio in eo ponitur, cum in eo non sint aliud intellectus, intelligere, et species intelligibilis: et hæc non sunt aliud quam ejus essentia.

## CAPUT XXXI.

*Quod Deus est volens<sup>2</sup>.*

Ulterius autem manifestum est quod necesse est Deus esse volentem. Ipse enim se ipsum intelligit, qui est bonum perfectum, ut ex dictis patet. Bonum autem intellectum ex necessitate diligitur. Hoc autem fit per voluntatem. Necesse est igitur Deum volentem esse.

Item. Ostensum est supra, quod Deus est primum movens. Intellectus autem non utique movet nisi mediante appetitu; appetitus autem sequens intellectum, est voluntas. Oportet igitur Deum esse volentem.

## CAPUT XXXII.

*Quod ipsam Dei voluntatem oportet nihil aliud esse quam ejus intellectum.*

Patet autem quod oportet ipsam Dei voluntatem nihil aliud esse quam ejus intellectum. Bonum enim intellectum, cum

sit objectum voluntatis, movet voluntatem, et est actus et perfectio ejus. In Deo autem non differt movens et motum, actus et potentia, perfectio et perfectibile, ut ex superioribus patet. Oportet igitur voluntatem divinam esse ipsum<sup>3</sup> intellectum. Idem autem est intellectus divinus et essentia divina<sup>4</sup>.

Item. Intra alias perfectiones rerum præcipuæ sunt intellectus et voluntas; cujus signum est quod inveniuntur in rebus nobilioribus. Perfectiones autem omnium rerum sunt in Deo unum, quod est ejus essentia, ut supra ostensum est. Intellectus igitur et voluntas in Deo sunt idem quod ejus essentia.

## CAPUT XXXIII.

*Quod voluntas Dei est ipsum ejus velle.*

Hinc etiam patet quod voluntas divina est ipsum velle Dei. Ostensum est enim, quod voluntas in Deo est idem quod bonum volitum ab ipso. Hoc autem esse non posset, nisi velle esset idem quod voluntas; cum velle insit voluntati ex volito. Est igitur Dei voluntas suum velle.

Item. Voluntas Dei idem est quod ejus intellectus et ejus essentia. Intellectus autem Dei est suum intelligere, et essentia est suum esse. Ergo oportet quod voluntas sit suum velle; et sic patet quod voluntas Dei simplicitati non repugnat.

## CAPUT XXXIV.

*Quod omnia supradicta uno fidei articulo comprehenduntur.*

Ex his autem omnibus quæ prædicta sunt, colligere possumus, quod Deus est unus, simplex, perfectus, infinitus, intelligens et volens. Quæ quidem omnia in *Symbolo* fidei brevi articulo comprehenduntur, cum nos profiteamur credere « in Deum unum omnipotentem. » Cum enim hoc nomen « Deus » a nomine græco quod dicitur « theos, » dictum videatur, quod quidem a « theaste » dicitur, quod est videre vel considerare; in ipso Dei nomine manifestatur<sup>5</sup> quod sit intelligens, et per

<sup>1</sup> Parm.: « quodammodo. »

<sup>2</sup> Parm.: « oportet Deum esse volentem. »

<sup>3</sup> Parm. addit: « bonum. »

<sup>4</sup> Parm. addit: « voluntas igitur Dei non est aliud quam intellectus divinus et essentia ejus. »

<sup>5</sup> Parm.: « patet. »

consequens volens. In hoc autem quod dicimus eum « unum, » excluditur et deorum pluralitas, et omnis compositio: non enim est simpliciter unum nisi quod est simplex. Per hoc autem quod dicimus, « omnipotentem, » ostenditur quod sit infinitæ virtutis, cui nihil subtrahi possit; in quo includitur quod sit et infinitus et perfectus; nam virtus rei perfectionem essentiæ consequitur.

## CAPUT XXXV.

*Quod gentiles philosophi pertingere potuerunt ad considerationem dictorum de Deo*<sup>1</sup>.

Hæc autem quæ in superioribus de Deo tradita sunt, a pluribus quidem gentilium Philosophis subtiliter considerata sunt, quamvis nonnulli eorum circa prædicta erraverint: et qui in iis verum dixerunt, post longam et laboriosam inquisitionem ad veritatem prædictam vix pervenire potuerunt. Sunt autem et alia nobis de Deo tradita in doctrina christianæ religionis, ad quam pervenire non potuerunt, circa quæ secundum christianam fidem ultra humanum sensum instruimur. Est autem hoc: quod cum sit Deus unus et simplex, ut ostensum est, est tamen Deus pater, et Deus filius, et Deus spiritus sanctus, et ii tres non tres dii, sed unus Deus est: quod quidem, quantum possibile nobis est, considerare intendimus.

## CAPUT XXXVI.

*Qualiter in Deo*<sup>2</sup> *ponatur verbum.*

Accipiendum autem est ex his quæ supradicta sunt, quod Deus se ipsum intelligit et diligit: item quod intelligere in ipso et velle non sit aliud quam<sup>3</sup> sua essentia. Quia vero Deus se ipsum intelligit, omne autem intellectum in intelligente est, oportet Deum in se ipso esse intellectum in intelligente. Intellectum autem, prout est in intelligente, est verbum quoddam intellectus: hoc enim exteriori verbo significamus quod interius

in intellectu comprehendimus: sunt enim, secundum Philosophum, voces signa intellectuum. Oportet igitur in Deo ponere verbum ipsius.

## CAPUT XXXVII.

*Quod verbum Dei dicatur conceptio intellectus divini*<sup>4</sup>.

Id autem quod in intellectu continetur, ut interius verbum, ex communi usu loquendi conceptio intellectus dicitur. Nam corporaliter aliquid concipi dicitur quod in utero animalis viventis vivifica virtute formatur, mare agente, et femina patiente, in qua fit conceptio: ita quod ipsum conceptum pertinet ad naturam utriusque, quasi secundum speciem conforme. Quod autem intellectus comprehendit, in intellectu formatur, intelligibili quasi agente, et intellectu quasi patiente: et ipsum quod intellectu comprehenditur, intra intellectum existens, conforme est eum<sup>5</sup> intelligibili movente, cujus quædam similitudo est, et cum intellectu quasi patiente, secundum quod esse intelligibile habet. Unde id quod intellectu comprehenditur, non immerito conceptio intellectus vocatur.

## CAPUT XXXVIII.

*Quomodo*<sup>6</sup> *verbum Dei comparatur ad Deum cujus est verbum.*

In hoc autem considerata est differentia. Nam cum id quod intellectu concipitur, sit similitudo rei intellectæ, ejus speciem repræsentans; quædam proles ipsius esse videtur. Quando igitur intellectus intelligit aliud a se, res intellecta est sicut pater verbi in intellectu concepti; ipse autem intellectus magis gerit similitudinem matris, cujus est ut in ea fiat conceptio. Quando vero intellectus intelligit se ipsum, verbum conceptum comparatur ad intelligentem sicut proles ad patrem. Cum igitur de verbo loquamur secundum quod Deus se ipsum intelligit, oportet quod ipsum verbum comparetur ad Deum, cujus est verbum, sicut filius ad patrem.

<sup>1</sup> Parm.: « hæc omnia a Philosophis posita sunt. »

<sup>2</sup> Parm.: « in divinis. »

<sup>3</sup> Parm.: « ejus esse. »

<sup>4</sup> Parm.: « verbum in divinis conceptio dicitur. »

<sup>5</sup> Parm.: « et intelligibili, ... et intellectui. »

<sup>6</sup> Parm.: « verbum comparatur ad patrem. »

## CAPUT XXXIX.

*Quod<sup>1</sup> supra dicta fides catholica docet.*

Hinc est quod in *Regula* catholicæ fidei, patrem et filium in divinis confiteri docemur, cum dicitur : « Credo in Deum Patrem et Filium ejus. » Et ne aliquis audiens nomen patris et filii, carnalem generationem suspicaretur, secundum quam apud nos pater dicitur et filius ; Joannes Evangelista, cui revelata sunt secreta cœlestia, loco filii ponit verbum, ut generationem intelligibilem cognoscamus.

## CAPUT XL.

*Quod verbum<sup>2</sup> Dei est ejusdem essentia et naturæ cum Patre, et æquale.*

Considerandum est autem quod cum in nobis sit aliud esse naturale et intelligere, oportet quod verbum in nostro intellectu conceptum, quod habet esse intelligibile tantum, alterius naturæ sit quam intellectus noster, qui habet esse naturale. In Deo autem idem est esse et intelligere. Verbum igitur Dei quod est in Deo, cujus verbum est secundum esse intelligibile, idem esse habet cum Deo, cujus est verbum. Et per hoc oportet quod sit ejusdem essentia et naturæ cum ipso, et quod omnia quæcumque de Deo dicuntur, verbo Dei convenient.

## CAPUT XLI.

*Quod catholica fides hæc docet.*

Et inde est quod in *Regula* catholicæ fidei docemur confiteri Filium « consubstantialem Patri : » per quod duo excluduntur. Primo quidem ut non intelligatur Pater et Filius secundum carnalem generationem, quæ fit per aliquam decisionem substantiæ filii a patre, ut sic oporteat Filium non esse Patri consubstantialem. Secundo ut etiam non intelligamus Patrem et Filium secundum generationem intelligibilem ; prout verbum in mente

nostra concipitur, quasi accidentaliter superveniens intellectui, et non de ejus essentia existens.

## CAPUT XLII.

*Quod<sup>3</sup> verbum non dicitur a Patre nec secundum tempus, nec secundum speciem, nec secundum naturam.*

Eorum autem quæ in essentia non differunt, impossibile est esse differentiam secundum speciem, tempus et naturam. Quia ergo verbum Patri est consubstantiale, necesse est quod secundum nihil dictorum a Patre differat.

Et quidem secundum tempus differre non potest. Cum enim hoc verbum in Deo ponatur per hoc quod Deus se ipsum intelligit, sui verbum intelligibile concipiendo, oportet quod si aliquando Dei verbum non fuit, quod tunc Deus se ipsum non intellexerit. Semper autem quando Deus fuit, se intellexit, quia ejus intelligere est ejus esse. Semper ergo et verbum ejus fuit : et ideo in *Regula* catholicæ fidei dicimus Dei Filium<sup>4</sup> « Ex Patre natum ante omnia sæcula. »

Secundum speciem etiam est impossibile verbum Dei a Deo quasi minoratum differre, cum Deus se ipsum non minus intelligat quam sit. Verbum autem perfectam speciem habet : quia id cujus est verbum, perfecte intelligitur. Oportet igitur Dei verbum omnino perfectum secundum speciem Divinitatis esse. Inveniuntur autem quædam quæ ex aliis procedunt, perfectam eorum speciem non consequi, ex quibus procedunt. Uno modo sicut in generationibus æquivocis : a sole enim non generatur sol, sed quoddam animal. Ut ergo talis imperfectio a generatione divina excludatur, confitemur natum « Deum de Deo. » Alio modo quod procedit ex aliquo, differt ab eo propter defectum puritatis ; dum scilicet ab eo quod est in se simplex et purum, per applicationem ad extraneam materiam aliquid producit a prima specie deficiens ; sicut ex domo quæ est in mente artificis, fit domus quæ est in materia ; et a lumine recepto in corpore terminato, fit color ; et ex igne adjuncto aliis ele-

<sup>1</sup> Parm. : « quomodo intelligitur generatio in divinis. »

<sup>2</sup> Parm. : « quod est Filius, idem esse habet

cum Deo Patre, et eandem essentiam. »

<sup>3</sup> Parm. : « in divinis non est differentia verbi. »

<sup>4</sup> Parm. omittit : « Dei filium. »

mentis, fit mixtum; et ex radio per oppositum<sup>1</sup> corporeis opacis, fit umbra. Ut hoc ergo a divina generatione excludatur, additur « lumen de lumine. » Tertio modo quod ex aliquo procedit non consequitur speciem ejus propter defectum veritatis; quia scilicet non vere recipit ejus naturam, sed quamdam ejus similitudinem tantum; sicut imago in speculo vel sculptura, aut etiam similitudo rei in intellectu vel sensu; non enim imago hominis dicitur verus homo, sed similitudo; nec lapis est anima, ut dicit Philosophus, sed species lapidis. Ut igitur hæc a divina generatione excludantur, additur: « Deum verum de Deo vero. »

Secundum naturam etiam impossibile est verbum a Deo differre, cum hoc sit Deo naturale quod se ipsum intelligat. Habet enim omnis intellectus aliqua quæ naturaliter intelligit, sicut intellectus noster<sup>2</sup> naturaliter prima principia. Multo ergo magis Deus, cujus intelligere est suum esse, se ipsum naturaliter intelliget. Verbum ergo ipsius naturaliter ex ipso est non sicut ea quæ præter naturalem originem procedunt, ut a nobis procedunt res artificiales, quas facere dicimur. Quæ vero naturaliter a nobis procedunt, dicimur generare, ut filius. Ne igitur Dei verbum non naturaliter a Deo procedere intelligatur, sed secundum potestatem suæ voluntatis, additur: « Genitum non factum. »

#### CAPUT XLIII.

*Conclusio ex præmissis. <sup>3</sup> quod Filius est consubstantialis Patri.*

Quia ergo, ut ex præmissis patet, omnes prædictæ divinæ generationis conditiones ad hoc pertinent quod filius est patri consubstantialis, ideo post omnia subjungitur quasi summa universorum: « Consubstantialem Patri. »

#### CAPUT XLIV.

*Quod Deus est in se ipso sicut amatum in amante.*

Sicut autem intellectum est in intelligente in quantum intelligitur, ita et amatum esse debet in amante in quantum

amatur. Movetur enim quodammodo amans ab amato quadam intrinseca motione. Unde cum movens contingat id quod movetur, necesse est amatum intrinsecum esse amanti. Deus autem sicut intelligit se ipsum; ita necesse est quod se ipsum amet: bonum enim intellectum secundum se amabile est. Est igitur Deus in se ipso tamquam amatum in amante.

#### CAPUT XLV.

*Quod amor qui est in Deo dicitur spiritus.*

Cum autem intellectum sit in intelligente, et amatum in amante, diversa ratio ejus quod est esse in aliquo utrobique consideranda est. Cum enim intelligere fiat per assimilationem aliquam intelligentis ad id quod intelligitur, necesse est id quod intelligitur in intelligente esse, secundum quod ejus similitudo, in ea consistit. Amatio autem fit secundum quamdam motionem amantis ab amato: amatum enim trahit ad seipsum amantem. Igitur non perficitur amatio in similitudine amati, sicut perficitur intelligere in similitudine intellecti; sed perficitur in attractione amantis ad ipsum amatum. Traductio autem similitudinis principalis fit per generationem univocam, secundum quam in rebus viventibus generans pater, et genitus filius nominatur. In eisdem etiam prima motio fit secundum speciem. Sicut igitur in divinis modus ille quo Deus est in Deo ut intellectum in intelligente, exprimitur per hoc quod dicimus filium, qui est verbum Dei; ita modum quo Deus est in Deo sicut amatum in amante exprimimus per hoc quod ponimus ibi spiritum, qui est amor Dei: et ideo secundum *Regulam* catholicæ fidei credere in Spiritum jubemur.

#### CAPUT XLVI.

*Quod spiritus, qui est in Deo <sup>4</sup> per modum amoris, est sanctus.*

Considerandum est autem, quod cum bonum amatum habeat rationem finis; ex fine autem motus voluntarius bonus vel malus reddatur; necesse est quod amor quo ipsum summum bonum amatur, quod Deus est, eminentem quamdam

<sup>1</sup> Parm.: « oppositionem corporis opaci. »

<sup>2</sup> Parm.: « habet, » omisso: « naturaliter. »

<sup>3</sup> Parm. hæc omittit.

<sup>4</sup> Parm. omittit: « per modum amoris. »

obtineat bonitatem, quæ nomine sanctitatis exprimitur; sive dicatur sanctum quasi purum, secundum Græcos, quia in Deo est purissima bonitas ab omni defectu immunis: sive dicatur sanctum, idest firmum, secundum Latinos, quia in Deo est immutabilis bonitas: propter quod omnia quæ ad Deum ordinantur, sancta dicuntur, sicut templum et vasa templi, et omnia divino cultui mancipata. Convenienter igitur spiritus, quo nobis insinuatur amor quo Deus se amat, Spiritus sanctus nominatur. Unde et *Regula* catholicæ fidei spiritum prædictum nominat sanctum, cum dicitur « Credo in Spiritum sanctum. »

## CAPUT XLVII.

*Quod<sup>1</sup> Spiritus sanctus est consubstantialis Patri et Filio, et subsistens in natura divina.*

Sicut autem intelligere Dei est summum esse, ita et ejus amare. Non igitur Deus amat se ipsum secundum aliquid suæ essentiæ superveniens, sed secundum suam essentiam. Cum igitur amet seipsum secundum hoc quod ipse in se ipso est ut amatum in amante, non est Deus amatus in Deo amante per modum accidentalem, sicut et res amatae sunt in nobis amantibus accidentaliter; sed Deus est in se ipso ut amatum in amante substantialiter. Ipse ergo Spiritus sanctus, quo nobis insinuatur divinus amor, non est aliquid accidentale in Deo, sed est res subsistens in essentia divina, sicut Pater et Filius. Et ideo in *Regula* catholicæ fidei ostenditur coadorandus, et simul glorificandus cum Patre et Filio.

## CAPUT XLVIII.

*Quod Spiritus sanctus a Patre Filioque procedit.*

Est etiam considerandum, quod ipsum intelligere ex virtute intellectus procedit. Secundum autem quod intellectus actu intelligit, est in ipso id quod intelligitur. Hoc igitur quod est intellectum esse in

intelligente, procedit ex virtute intellectiva intellectus, et hoc est verbum ipsius, ut supra dictum est. Similiter etiam id quod amatur est in amante secundum quod amatur actu. Quod autem aliquid actu ametur, procedit et ex virtute amativa amantis, et ex bono amabili actu intellecto. Hoc igitur quod est amatum esse in amante, ex duobus procedit: scilicet ex principio amativo, et ex intelligibili apprehenso, quod est verbum conceptum de amabili. Cum igitur in Deo se ipsum intelligente et amante verbum sit filius; is autem cujus est verbum, sit verbi pater, ut ex dictis patet; necesse est quod Spiritus sanctus, qui pertinet ad amorem, secundum quod Deus in se ipso est ut amatum in amante, ex Patre procedat, et Filio: unde et in *Symbolo* dicitur: « Qui ex Patre Filioque procedit. »

## CAPUT XLIX.

*Quod ternarius divinarum personarum non repugnat unitati divinæ essentiæ<sup>2</sup>.*

Ex omnibus autem quæ dicta sunt colligi oportet, quod in Divinitate quemdam trinarium ponimus, qui tamen unitati et simplicitati essentiæ non repugnat. Oportet enim concedi Deum esse ut existentem in sua natura, et intellectum et amatum a se ipso. Aliter autem hoc accidit in Deo et in nobis. Quia enim in sua natura homo substantia est; intelligere autem et amare ejus non sunt ejus substantia: homo quidem, secundum quod in natura sua consideratur, quædam res subsistens est: secundum autem quod est in suo intellectu, non est res subsistens, sed intentio quædam rei subsistentis; et similiter secundum quod est in se ipso ut amatum in amante. Et sic<sup>3</sup> in homine tria considerari possunt: idest homo in natura sua existens, et homo in intellectu existens, et homo in amore existens; et tamen hi tres non sunt unum, quia intelligere ejus non est ejus esse, similiter autem et amare: et horum trium unus solus est res quædam subsistens, scilicet homo in natura sua existens. In Deo autem idem est esse, intelligere, et amare. Deus ergo in esse suo naturali

<sup>1</sup> Parm.: « Quod amor in divinis non importat accidens. »

<sup>2</sup> Ai.: « Ecclesiæ. » Parm.: « in divinis trinitas... unitati essentiæ. »

<sup>3</sup> Parm.: « Sic ergo... tria quædam. »



existens, et Deus existens in intellectu, et Deus existens in amore suo, unum sunt; unusquisque tamen eorum est subsistens. Et quia res subsistentes in intellectuali natura personas Latini nominare consueverunt, Græci vero hypostases, propter hoc in divinis Latini dicunt tres personas, Græci vero tres hypostases, Patrem scilicet, et Filium, et Spiritum sanctum.

#### CAPUT L.

*Quomodo videtur esse repugnantia trinitatis personarum in divinis.*

Videtur autem ex prædictis repugnantia quædam suboriri. Si enim in Deo ternarius aliquis ponitur; cum omnis numerus divisionem aliquam consequatur, oportebit in Deo aliquam differentiam ponere, per quam tres ab invicem distinguantur: et ita non erit in Deo summa simplicitas. Nam si in aliquo tres conveniunt, et in aliquo differunt, necesse est ibi esse compositionem; quod superioribus repugnat. Rursus si necesse est esse unum solum Deum, ut supra ostensum est; nulla autem res una oritur vel procedit a se ipsa; impossibile videtur quod sit Deus genitus, vel Deus procedens. Falso igitur ponitur in divinis nomen patris et filii, et spiritus procedentis.

#### CAPUT LI.

*Solutio rationis: et quod in divinis non est distinctio nisi secundum relationes.*

Principium autem ad dissolvendum hanc dubitationem, hinc sumere oportet, quia secundum diversitatem naturarum est in diversis rebus diversus modus aliquid ex alio oriendi vel procedendi. In rebus enim vita carentibus, quia non sunt se ipsa moventia, sed solum extrinsecus possunt moveri, oritur unum ex altero quasi exterius alteratum et immutatum; sicut ab igne generatur ignis, et ab aere aer. In rebus vero viventibus, quarum proprietas est ut se ipsas moveant, generatur aliquid in ipso generante, sicut fetus animalium et fructus plantarum. Est autem considerare diversum modum processionis secundum diversas

vires et processiones earundem. Sunt enim quædam vires in eis, quarum operationes non se extendunt nisi ad corpora, secundum quod materialia sunt; sicut patet de viribus animæ vegetabilis, quæ sunt nutritiva et augmentativa et generativa: et secundum hoc genus virium animæ non procedit nisi aliquid corporale corporaliter distinctum, et tamen aliquo modo conjunctum in viventibus ei a quo procedit. Sunt autem quædam vires, quarum operationes etsi corpora non transcendunt, tamen se extendunt ad species corporum, sine materia eas recipiendo, sicut est in omnibus viribus animæ sensitivæ. Est enim sensus susceptivus specierum sine materia, ut Philosophus dicit. Hujusmodi autem vires, licet quodammodo immaterialiter formas rerum suscipiant, non tamen eas suscipiunt absque organo corporali. Si qua igitur processio in hujusmodi viribus animæ invenitur, quod procedit non erit aliquod corporale, vel corporaliter distinctum, vel conjunctum ei a quo procedit, sed incorporaliter et immaterialiter quodammodo, licet non omnino absque adminiculo organi corporalis. Sic enim procedunt in animalibus formationes rerum imaginatarum: quæ quidem sunt in imaginatione, non sicut corpus in corpore, sed quodam spirituali modo: unde et ab Augustino imaginaria visio spiritualis nominatur. Si autem secundum operationem imaginationis procedit aliquid non per modum corporalem, multo fortius hoc accidit per operationem partis intellectivæ, quæ nec etiam in sui operatione indiget organo corporali, sed omnino ejus operatio immaterialis est. Procedit enim verbum secundum operationem intellectus, ut in ipso intellectu dicentis existens, non quasi localiter in eo contentum, nec corporaliter ab eo separatum, sed in ipso quidem existens secundum ordinem originis; et eadem ratio est de processione quæ attenditur secundum operationem voluntatis, prout res amata existit in amante, ut supra dictum est. Licet autem vires intellectivæ et sensitivæ secundum propriam rationem sint nobiliores viribus animæ vegetabilis; non tamen in hominibus aut in aliis animalibus secundum processionem imaginativæ partis, aut sensitivæ, procedit aliquid subsistens in natura speciei ejusdem; sed hoc solum accidit per processionem quæ fit secun-

dum operationem animæ vegetabilis : et hoc ideo est, quia in omnibus compositis ex materia et forma, multiplicatio individuum in eadem specie fit secundum corporum<sup>1</sup> divisionem: unde in hominibus, et aliis animalibus cum ex forma et materia componantur secundum corporalem divisionem, quæ invenitur<sup>2</sup> in processione quæ est secundum operationem animæ vegetabilis, et non in aliis operationibus animæ, multiplicantur individua in<sup>3</sup> eadem specie. In rebus autem quæ non sunt ex materia et forma compositæ, non potest inveniri nisi distinctio formalis tantum. Sed si forma, secundum quam attenditur distinctio, sit substantia rei, oportet quod illa distinctio sit rerum subsistentium quarundam; non autem si forma illa non sit rei subjecta.

Est igitur commune in omni intellectu, ut ex dictis patet, quod oportet id quod in intellectu concipitur, ab intelligente quodammodo procedere, in quantum intelligens est; et sua processione ab ipso quodammodo distinguitur, sicut conceptio intellectus quæ est intentio intellecta, distinguitur ab intellectu intelligente: et similiter oportet quod affectio amantis, per quam amatum est in amante, procedat a voluntate amantis in quantum est amans. Sed hoc proprium habet intellectus divinus quod cum intelligere ejus sit esse ipsius, oportet quod conceptio intellectus, quæ est intentio intellecta, sit substantia ejus; et similiter est de affectione in ipso Deo amante. Relinquitur ergo quod intentio intellectus divini, quæ est verbum ipsius, non distinguitur a producente ipsum in hoc quod est esse secundum substantiam, sed solum in hoc quod est esse secundum rationem processionis unius ex alio: et similiter est de affectione amoris in Deo amante, quæ ad Spiritum sanctum pertinet.

Sic igitur patet quod nihil prohibet verbum Dei quod est Filius esse unum cum Patre secundum substantiam, et tamen distinguitur ab eo secundum relationem processionis, ut dictum est. Unde et manifestum est quod eadem res non oritur, neque procedit a se ipsa: quia Filius, secundum quod a Patre procedit, ab eo

distinguitur: et eadem ratio est de Spiritu sancto per comparisonem ad Patrem et Filium.

## CAPUT LII.

*Quod relationes quibus Pater et Filius et Spiritus sanctus distinguuntur, sunt reales, et non rationis tantum.*

Istæ autem relationes, quibus Pater et Filius et Spiritus sanctus ab invicem distinguuntur, sunt relationes reales et non rationis tantum. Illæ enim relationes sunt rationis tantum quæ non consequuntur ad aliquid quod est in rerum natura, sed ad aliquid quod est in apprehensione tantum; sicut dextrum et sinistrum in lapide non sunt relationes reales, sed rationis tantum, quia non consequuntur aliquam virtutem realem in lapide existentem, sed solum acceptionem apprehendentis lapidem ut sinistrum quia est alicui animali ad sinistram; sed sinistrum et dextrum in animali sunt relationes reales, quia consequuntur virtutes quasdam in determinatis partibus animalis inventas. Cum igitur relationes prædictæ, quibus Pater et Filius et Spiritus sanctus distinguuntur, sint realiter in Deo existentes; oportet quod relationes prædictæ sint relationes reales, non rationis tantum.

## CAPUT LIII.

*Quod hujusmodi relationes non sunt accidentaliter inhærentes.*

Non est autem possibile quod sint accidentaliter inhærentes: tum quia operationes ad quas sequuntur directe relationes, sunt ipsa Dei substantia: tum etiam quia supra ostensum est quod in Deo nulum accidens esse potest. Unde si relationes prædictæ realiter sunt in Deo, oportet quod non sint accidentaliter inhærentes, sed subsistentes.

Quomodo autem id quod est in aliis rebus accidens, in Deo substantialiter esse possit, ex præmissis manifestum est.

<sup>1</sup> Parm.: « materiæ. »

<sup>2</sup> Parm.: « secundum processionem. »

<sup>3</sup> Parm.: « secundum eandem speciem. »

## CAPUT LIV.

*Quod per prædictas relationes in Deo personalis distinctio constituitur.*

Quia ergo in divinis distinctio est per relationes quæ non accidunt, sed sunt subsistentes : rerum autem subsistentium in natura quacumque intellectuali est distinctio personalis ; necesse est quod per prædictas relationes in Deo personalis distinctio constituatur. Pater igitur et Filius et Spiritus sanctus sunt tres personæ, et similiter tres hypostases, quia hypostasis significat aliquid subsistens completum.

## CAPUT LV.

*Quod impossibile est plures personæ esse in divinis quam tres.*

Plures autem in divinis personas tribus esse impossibile est ; cum non sit possibile divinas personas multiplicari per substantiæ divisionem, sed solum per alicujus processionis relationem ; nec cujuscumque processionis, sed talis quæ non terminetur ad aliquod extrinsecum. Nam si terminaretur ad aliquod extrinsecum, non haberet naturam divinam, et sic non posset esse persona aut hypostasis divina. Processio autem in Deo ad exterius non terminata non potest accipi nisi aut secundum operationem intellectus, prout procedit verbum ; aut secundum operationem voluntatis, prout procedit amor, ut ex dictis patet. Non igitur potest esse aliqua persona divina procedens, nisi vel ut verbum quod dicimus filium, vel ut amor quod dicimus spiritum sanctum.

Rursus. Cum Deus omnia uno intuitu per suum intellectum comprehendat, et similiter uno actu voluntatis omnia diligat, impossibile est in Deo esse plura verba aut plures amores. Si igitur Filius procedit ut verbum, et Spiritus sanctus procedit ut amor : impossibile est in Deo esse plures filios, vel plures spiritus sanctos.

Item. Perfectum est extra quod nihil est. Quod igitur extra se aliquid sui gene-

ris patitur, non simpliciter perfectum est : propter quod et ea quæ sunt simpliciter in suis naturis perfecta, numero non multiplicantur, sicut Deus, sol et luna, et hujusmodi. Oportet autem tam Filium quam Spiritum sanctum esse simpliciter perfectum, cum uterque eorum sit Deus, ut ostensum est. Impossibile est igitur esse plures filios, aut plures Spiritus sanctos.

Præterea. Illud per quod aliquid subsistens est hoc aliquid, et ab aliis distinctum, impossibile est quod numero multiplicetur ; eo quod individuum de pluribus dici non potest. Sed filiatione Filius est hæc persona divina in se subsistens et ab aliis distincta, sicut per principia individuantia, Socrates est hæc persona humana. Sicut ergo principia individuantia, quibus Socrates est hic homo, non possunt convenire nisi uni ; ita etiam filiatio in divinis non potest nisi uni convenire. Et simile est de relatione Patris et Spiritus sancti. Impossibile est igitur in divinis esse plures patres, aut plures Filios, aut plures Spiritus sanctos.

Adhuc. Ea quæ sunt unum secundum formam non multiplicantur numero nisi per materiam ; sicut multiplicatur albedo per hoc quod est in pluribus subjectis. In divinis autem non est materia. Quidquid igitur est unum specie et forma in divinis, impossibile est multiplicari secundum numerum. Hujusmodi autem sunt paternitas, et filiatio, et Spiritus sancti processio. Impossibile est igitur in divinis esse plures Patres, aut Filios, aut Spiritus sanctos.

## CAPUT LVI.

*De numero<sup>1</sup> proprietatum quæ conveniunt Patri, et quæ sunt.*

Hujusmodi autem existente numero personarum in divinis, necesse est personarum proprietates, quibus ab invicem distinguuntur, in aliquo numero esse : quarum tres oportet Patri convenire : una qua distinguatur a Filio solo, et hæc est paternitas ; alia qua distinguatur a duobus, scilicet Filio et Spiritu sancto ; et hæc est innascibilitas ; quia

<sup>1</sup> Parm. : « proprietatibus, seu notionibus in

divinis, et quot sunt numero in Patre. »



Pater non est Deus procedens ab alio : Filius autem et Spiritus sanctus ab alio procedunt ; tertia est qua ipse Pater cum Filio a Spiritu sancto distinguitur : et hæc dicitur communis spiratio. Proprietatem autem qua Pater differat a solo Spiritu sancto, non est assignare, eo quod Pater et Filius sunt unum principium Spiritus sancti, ut ostensum est.

## CAPUT LVII.

*De proprietatibus Filii et Spiritus sancti, quæ et quot sunt.*

Filio autem necesse est duas convenire: unam scilicet qua distinguatur a Patre, et hæc est filiatio; aliam qua simul cum Patre distinguatur a Spiritu sancto: quæ est communis spiratio. Non autem est assignare proprietatem qua distinguatur a solo Spiritu sancto: quia, ut jam dictum est, Filius et Pater sunt unum principium Spiritus sancti. Similiter etiam non est assignare proprietatem unam qua Spiritus sanctus et Filius simul distinguantur a Patre. Pater enim ab eis distinguitur una proprietate; scilicet innascibilitate; inquantum est non procedens. Sed quia Filius et Spiritus sanctus non una processione procedunt, sed pluribus; duabus proprietatibus a Patre distinguuntur. Spiritus autem sanctus habet unam proprietatem tantum, qua distinguatur a Patre et Filio; et dicitur processio. Quod autem non possit esse aliqua proprietas qua Spiritus sanctus distinguatur a Filio solo, vel a Patre solo, ex dictis patet.

Sunt igitur quinque quæ personis attribuuntur: scilicet innascibilitas, paternitas, filiatio, spiratio et processio.

## CAPUT LVIII.

*Quod huiusmodi proprietates dicuntur et notiones, et quæ eorum proprietates dicuntur, et quæ etiam relationes<sup>1</sup>.*

Hæc autem quinque notiones personarum dici possunt, eo quod per eas nobis innotescit in divinis distinctio personarum: non tamen hæc quinque possunt dici proprietates, si hoc in proprietatis

ratione observetur, ut proprium esse dicatur quod convenit uni soli: nam communis conspiratio Patri et Filio convenit; sed secundum illum modum quo aliquid dicitur proprium aliquibus per respectum ad aliud, sicut bipes homini et avi per respectum ad quadrupedia, nihil prohibet etiam communem spirationem proprietatem dici. Quia vero in divinis personæ<sup>2</sup> solis relationibus distinguuntur; notiones autem sunt quibus divinarum personarum distinctio innotescit; necesse est notiones aliquammodo ad relationem pertinere. Sed earum quatuor veræ relationes sunt, quibus divinæ personæ ad invicem referuntur; quinta vero notio, scilicet innascibilitas, ad relationem pertinet, sicut relationis negatio: nam negationes ad genus affirmationum reducuntur, et privationes ad genus habituum, sicut non homo ad genus hominis, et non album ad genus albedinis.

Sciendum tamen, quod relationum, quibus personæ ad invicem referuntur, quædam nominatæ sunt, ut paternitas et filiatio, quæ proprie relationem significant; quædam vero innominatæ, illæ scilicet quibus Pater et Filius ad Spiritum sanctum referuntur, et Spiritus sanctus ad eos; sed loco relationum utimur nominibus originum. Manifestum est enim quod communis spiratio et processio originem significant; non autem relationes originem consequentes: quod potest perpendi ex relationibus patris et filii. Generatio enim significat activam originem, quam consequitur paternitatis relatio; nativitas vero significat passivam originem filii, quam consequitur relatio filiationis. Similiter igitur ad communem spirationem sequitur aliqua relatio, et etiam ad processionem; sed quia relationes innominatæ sunt, utimur nominibus actuum pro nominibus relationum.

## CAPUT LIX.

*Non oportet secundum numerum relationum esse numerum personarum in divinis<sup>3</sup>.*

Considerandum autem, quod quamvis relationes subsistentes in divinis sint ip-

<sup>1</sup> Parm.: « quare illæ proprietates dicantur notiones. »

<sup>2</sup> Al.: « personis. »

<sup>3</sup> Parm.: « licet relationes in divinis subsistentes sint quatuor, tamen non sunt nisi tres personæ. »

sæ personæ divinæ, ut supra dictum est; non tamen oportet esse quinque, vel quatuor personas secundum numerum relationum. Numerus enim distinctionem aliquam consequitur. Sicut autem unum est indivisibile vel indivisum, ita pluralitas est divisibile vel divisum. Ad pluralitatem enim personarum requiritur quod relationes vim distinctivam habeant ratione oppositionis; nam formalis distinctio non est nisi per oppositionem. Si ergo prædictæ relationes inspiciantur, paternitas et filiatio oppositionem ad invicem habent relativam, unde non se compatiuntur in eodem supposito: propter hoc oportet quod paternitas et filiatio sint duæ personæ subsistentes. Innascibilitas autem opponitur quidem filiationi,<sup>1</sup> paternitati autem non opponitur. Unde paternitas et innascibilitas possunt uni et eadem personæ convenire. Similiter communis spiratio non opponitur neque paternitati, neque filiationi, nec etiam innascibilitati. Unde nihil prohibet communem spirationem inesse et personæ patris, et personæ filii: propter quod communis spiratio non est persona subsistens seorsum a persona patris et filii. Processio autem oppositionem relativam habet ad communem spirationem. Unde, cum communis spiratio conveniat patri et filio, oportet quod processio sit alia persona a persona patris et filii.

Hinc autem patet quare Deus non dicitur quinus, propter quinarium<sup>2</sup> notionum, sed dicitur trius propter trinarium personarum. Quinque enim notiones non sunt quinque subsistentes res, sed tres personæ sunt tres res subsistentes. Licet autem uni personæ plures notiones aut proprietates conveniant, una tamen sola est quæ personam constituit. Non enim sic constituitur persona proprietatibus quasi ex pluribus constituta; sed eo quod proprietas ipsa relativa subsistens persona est. Si igitur intelligerentur plures proprietates ut seorsum per se subsistentes, essent jam plures personæ, et non una. Oportet igitur intelligi quod, plurimum proprietatum seu notionum uni personæ convenientium, illa quæ procedit secundum ordinem naturæ personam constituit; aliæ<sup>3</sup> non: intelliguntur ut personæ jam constitutæ inhaerentes. Manifestum est autem quod innascibilitas non

potest esse prima notio patris quæ personam ejus constituat: tum quia nihil negatione constituitur: tum quia naturaliter affirmatio negationem præcedit. Communis autem spiratio ordine naturæ præsupponit paternitatem et filiationem, sicut processio amoris processionem verbi. Unde nec communis spiratio potest esse prima notio patris, sed nec filii. Relinquitur ergo quod prima notio patris sit paternitas; filii autem filiatio, spiritus autem sancti sola processio notio est. Relinquitur igitur quod tres sunt notiones constituentes personas: scilicet paternitas, filiatio et processio: et has quidem notiones necesse est proprietates esse. Id enim quod personam constituit, oportet soli illi personæ convenire: principia enim individuationis non possunt pluribus convenire. Dicuntur igitur prædictæ tres notiones personales proprietates, quasi constituentes tres personas modo prædicto. Aliæ vero dicuntur proprietates seu notiones personarum, non autem personales, quia personam non constituunt.

## CAPUT LX.

*Quod remotis per intellectum proprietatibus personalibus, non remanent hypostases.*

Ex hoc autem apparet quod remotis per intellectum proprietatibus personalibus, non remanent hypostases. In resolutione enim quæ fit per intellectum, remota forma, remanet subjectum formæ; sicut remota albedine remanet superficies; qua remota, remanet substantia: ejus forma remota remanet materia prima; sed remoto subjecto nihil remanet. Proprietates autem personales sunt ipsæ personæ<sup>1</sup> subsistentes; nec constituunt personas, quasi præexistentibus suppositis advenientes quia nihil in divinis potest esse distinctum quod absolute dicitur, sed solum quod relativum est. Relinquitur igitur quod proprietatibus remotis personalibus per intellectum, non remanent aliquæ hypostases distinctæ; sed remotis notionibus non personalibus, remanent hypostases distinctæ.

<sup>1</sup> Parm. : « non autem paternitati. »

<sup>2</sup> Parm. addit : « numerum. »

<sup>3</sup> Parm. : « alia vero intelliguntur. »

## CAPUT LXI.

*Quod remotis per intellectum proprietatibus personalibus remaneat essentia divina.*

Si quis autem quærat, utrum remotis per intellectum proprietatibus personalibus remaneat essentia divina, dicendum est quod quodam modo remanet, quodam vero modo non. Est enim duplex resolutio quæ fit per intellectum. Una secundum abstractionem formæ a materia: in qua quidem proceditur ab eo quod formaliter est, ad id quod est materialiter: nam id quod est primum subjectum, ultimo remanet; ultima vero forma primo removetur. Alia vero resolutio est secundum abstractionem universalis a particulari, quæ quodammodo contrario ordine se habet: nam prius removentur conditiones materiales individuantes, ut accipiatur quod commune est. Quamvis autem in divinis non sit materia et forma, neque universale et particulare; est tamen in divinis commune et proprium, et suppositum naturæ communi: personæ enim comparantur ad essentiam, secundum modum intelligendi, sicut supposita propria ad naturam communem. Secundum igitur primum modum resolutionis quæ fit per intellectum, remotis proprietatibus personalibus, quæ sunt ipsæ personæ subsistentes, non remanet natura communis; modo autem secundo remanet.

## CAPUT LXII.

*Qualis sit ordo per intellectum actuum personalium ad proprietates personales, et etiam processionis activæ vel passivæ<sup>1</sup>.*

Potest autem ex dictis manifestum esse, qualis sit ordo secundum intellectum actuum personalium ad proprietates personales. Proprietates enim personales sunt subsistentes personæ: persona autem subsistens in quacumque natura agit communicando suam naturam in virtute suæ naturæ; nam forma speciei est principium generandi simile secundum speciem. Cum igitur actus perso-

nales ad communicationem naturæ divinæ pertineant, oportet quod persona subsistens communique naturam communem virtute ipsius naturæ. Et ex hoc duo possunt concludi. Quorum unum est quod potentia generativa in Patre sit ipsa natura divina: nam potentia quodecumque agendi est principium cuius virtute aliquid agitur. Aliud est quod actus personalis, scilicet generatio, secundum modum intelligendi præsupponit et naturam divinam et proprietatem personalem patris, quæ est ipsa hypostasis Patris; licet huiusmodi proprietas, in quantum relatio est, ex actu consequatur. Unde si in patre attendatur quod subsistens persona est, dici potest, quod quia pater est, generat; si autem attendatur quod relationis est, e converso dicendum videtur, quod quia generat, pater est.

## CAPUT LXIII.

*De diversitate dicti ordinis secundum diversitatem generationis<sup>2</sup>.*

Sciendum est tamen, quod alio modo oportet accipere ordinem generationis activæ ad paternitatem, alio modo generationis passivæ, sive nativitatis, ad filiationem. Generatio enim activa præsupponit ordine naturæ personam generantis; sed generatio passiva, sive nativitas, ordine naturæ præcedit personam genitam, quia persona genita nativitate sua habet ut sit. Sic igitur generatio activa secundum modum intelligendi præsupponit paternitatem, secundum quod est constitutiva personæ patris; nativitas autem non præsupponit filiationem, secundum quod est constitutiva personæ filii; sed secundum intelligendi modum præcedit eam utroque modo, scilicet et secundum quod est constitutiva personæ, et secundum quod est relatio. Et similiter intelligendum est de his quæ pertinent ad processionem Spiritus sancti.

## CAPUT LXIV.

*De differentia actuum notionalium ad proprietates notionales<sup>3</sup>.*

Ex ordine autem assignato inter actus

<sup>1</sup> Parm.: « de ordine actuum. »

<sup>2</sup> Parm.: « quomodo oportet recipere generationem respectu patris, et respectu filii. »

<sup>3</sup> Quomodo actus notionales a personis, non differunt, nisi secundum rationem.

notionales et proprietates notionales, non intendimus quod actus notionales, secundum rem a proprietatibus personalibus differant, sed solum secundum modum intelligendi. Sicut enim intelligere Dei est ipse Deus intelligens, ita et generatio patris est ipse pater generans, licet alio modo significantur. Similiter etiam licet una persona plures notiones habeat, non tamen in ea est aliqua compositio. Innascibilitas enim, cum sit proprietas negativa, nullam compositionem facere potest. Duæ vero relationes quæ sunt in persona patris, scilicet paternitas et communis spiratio, sunt quidem idem secundum rem prout comparantur ad personam patris : sicut enim paternitas est pater, ita et communis spiratio in patre est pater, et in filio est filius. Differunt autem secundum ea ad quæ referuntur : nam paternitate Pater refertur ad Filium, communi spiratione ad Spiritum sanctum ; et similiter Filius filiatione quidem ad Patrem, communi vero spiratione ad Spiritum sanctum.

## CAPUT LXV.

*Quod proprietates relativæ sunt ipsa divina essentia.*

Oportet autem quod ipsæ proprietates relativæ sint ipsa divina essentia. Proprietates enim relativæ sunt ipsæ personæ subsistentes. Persona autem subsistens in divinis non potest esse aliud quam divina essentia : essentia autem divina est ipse Deus, ut supra ostensum est. Unde relinquitur quod proprietates relativæ sint secundum rem idem quod divina essentia.

Item. Quidquid est in aliquo præter essentiam ejus, inest ei accidentaliter. In Deo autem nullum accidens esse potest, ut supra ostensum est. Proprietates igitur relativæ non sunt aliud ab essentia divina secundum rem.

## CAPUT LXVI.

*Quod proprietates divinæ non sunt in personis ut exterius affixæ, et ut accidentia <sup>1</sup>.*

Non autem dicit potest quod propieta-

<sup>1</sup> Parm. : « quod relationes non sunt exterius affixæ, ut Porretani dixerunt. »

tes prædictæ non sint in personis, sed exterius ad eas se habeant, sicut Porretani dixerunt. Relationes enim reales oportet esse in rebus relatis ; quod quidem in creaturis manifestum est : sunt enim relationes reales in eis sicut accidentia in subjectis. Relationes autem istæ quibus personæ distinguuntur in divinis, sunt relationes reales, ut supra ostensum est. Igitur oportet quod sint in personis divinis, non quidem sicut accidentia : nam et alia quæ in creaturis sunt accidentia, ad Deum translata a ratione accidentium cadunt, ut sapientia et justitia, et alia hujusmodi, ut supra ostensum est.

Præterea. In divinis non potest esse distinctio nisi per relationes : nam quæcumque absolute dicuntur, communia sunt. Si igitur relationes exterius se habeant ad personas, nulla in ipsis personis distinctio remanebit. Sunt igitur proprietates relativæ in personis, ita tamen quod sunt ipsæ personæ, et etiam ipsa essentia divina ; sicut sapientia et bonitas dicuntur esse in Deo, et sunt ipse Deus et essentia divina, ut supra ostensum est.

## CAPUT LXVII.

*Quod Deus res produxit <sup>2</sup>.*

His igitur consideratis quæ ad unitatem essentiæ divinæ pertinent et ad personarum trinitatem, restat de effectibus Trinitatis considerandum. Primus autem effectus Dei in rebus est ipsum esse quod omnes alii effectus præsupponunt, et supra quod fundantur. Necesse est autem omne quod aliquo modo est, a Deo esse. In omnibus autem ordinatis hoc communiter invenitur quod id quod est primum et perfectissimum in aliquo ordine, est causa eorum quæ sunt post in ordine illo ; sicut ignis, qui est maxime calidus, est causa caliditatis in reliquis corporibus calidis. Semper enim imperfecta a perfectisveniuntur habere originem, sicut semina ab animalibus et plantis. Ostensum est autem supra quod Deus est primum et perfectissimum ens : unde oportet quod sit causa essendi omnibus quæ esse habent.

Adhuc. Omne quod habet aliquid per

<sup>2</sup> Parm. : « de effectibus divinitatis, et primo de esse. »

participationem, reducitur in id quod habet illud per essentiam, sicut in principium et causam; sicut ferrum ignitum participat igneitate ab eo quod est ignis per essentiam suam. Ostensum est autem supra quod Deus est ipsum suum esse: unde esse convenit ei per suam essentiam; omnibus autem aliis convenit per participationem: non enim alicujus alterius essentia est suum esse, quia esse absolutum et per se subsistens non potest esse nisi unum, ut supra ostensum est. Igitur oportet Deum esse causam existendi omnibus quæ sunt.

## CAPUT LXVIII.

*Quod Deus produxit res ex nihilo<sup>1</sup>.*

Hoc autem ostendit quod Deus in creando res non præexigit materiam ex qua operetur. Nullum enim agens præexigit ad suam actionem id quod per suam actionem producit, sed solum ea præexigit quæ sua actione producere non potest: ædificator enim lapides et ligna ad suam actionem præexigit, quia ea sua actione producere non potest; domum autem producit in agendo, sed non præsupponit. Necesse est autem materiam produci per actionem Dei; cum ostensum sit quod omne quod quolibet modo est, Deum habeat causam existendi. Relinquitur igitur quod Deus in agendo materiam non præsupponit.

Adhuc. Actus naturaliter prior est potentia, unde et per prius competit sibi ratio principii. Omne autem principium quod in creando aliud principium præsupponit, per posterius habet rationem principii. Cum igitur Deus sit principium rerum sicut actus primus, materia autem sicut ens in potentia; inconueniens est quod Deus in agendo materiam præsupponat.

Item. Quanto aliqua causa est magis universalis, tanto effectus ejus est universalior. Nam causæ particulares, effectus universalium causarum ad aliquid determinatum appropriant: quæ quidem determinatio ad effectum universalem comparatur sicut actus ad potentiam. Omnis igitur causa quæ facit aliquid esse

in actu, præsupposito eo quod est in potentia ad actum illum, est causa particularis respectu alicujus universalioris causæ. Hoc autem Deo non competit, cum ipse sit causa prima, ut supra ostensum est. Non igitur præexigit materiam ad suam actionem. Ipsius igitur est producere res in esse ex nihilo, quod est creare: et inde est quod fides catholica eum « Creatorem » confitetur.

## CAPUT LXIX.

*Quod solius Dei est creare<sup>2</sup>.*

Hoc etiam apparet, quod soli Deo convenit esse creatorem. Nam creare illi causæ convenit quæ aliam universaliorem non præsupponit, ut ex dictis patet. Hoc autem soli Deo competit. Solus igitur ipse est creator.

Item. Quanto potentia est magis remota ab actu, tanto oportet esse majorem virtutem per quam reducat in actum. Sed quantacumque distantia potentiæ ad actum detur, semper remanet major distantia, si ipsa potentia subtrahatur. Creare igitur aliquid ex nihilo requirit infinitam virtutem. Sed solus Deus est infinitæ virtutis, cum ipse sit infinitæ essentiæ. Solus igitur Deus potest creare.

## CAPUT LXX.

*Quod causa<sup>3</sup> diversitatis rerum non est ex parte materiæ.*

Manifestum est autem ex præostensis, quod causa diversitatis in rebus non est materiæ diversitas. Ostensum est enim, quod materia non præsupponitur actioni divinæ, qua res in esse producit. Causa autem diversitatis rerum non est ex materia, nisi secundum quod materia ad rerum productionem præexigitur; ut scilicet secundum diversitatem materiæ, diversæ inducantur formæ. Non igitur causa diversitatis in rebus a Deo productis est materia.

Adhuc. Secundum quod res habent esse, ita habent pluralitatem et unitatem: nam unumquodque secundum quod est

<sup>1</sup> Parm.: « quod Deus in creando res, non præsupponit materiam. »

<sup>2</sup> Parm.: « creare soli Deo convenit. »

<sup>3</sup> Parm.: « materiæ diversitas non est causa diversitatis in rebus. »



ens, est etiam unum. Sed non habent esse formæ propter materiam, sed magis materiæ propter formas : nam actus meliôr est potentia ; id autem propter quod aliquid est, oportet melius esse. Neque igitur formæ ideo sunt diversæ ut competant materiis diversis : sed materiæ ideo sunt diversæ, ut competant diversis formis.

## CAPUT LXXI.

*Quæ fuit causa diversitatis <sup>1</sup>.*

Si autem hoc modo se habeant res ad unitatem et multitudinem, sicut se habent ad esse ; totum autem esse rerum dependet a Deo, ut ostensum est ; pluralitatis rerum causam ex Deo esse oportet. Quod quidem qualiter sit, considerandum est.

Necesse est enim quod omne agens agat sibi simile, secundum quod possibile est. Non autem erat possibile quod similitudinem divinæ bonitatis res a Deo productæ consequerentur in ea simplicitate secundum quam invenitur in Deo : unde oportuit quod id quod est unum et simplex, representaretur in rebus causatis diversimode et dissimiliter. Necesse igitur fuit diversitatem esse in rebus a Deo productis, ut divinam perfectionem rerum diversitas secundum suum modum imitaretur.

Item. Unumquodque causatum finitum est : solius enim Dei est essentia infinita, ut supra ostensum est. Quodlibet autem finitum per additionem alterius redditur majus. Melius igitur fuit diversitatem in rebus creatis esse, ut sic plura bona essent, quam quod esset unum tantum genus rerum a Deo productum. Optimi autem est optima adducere. Conveniens igitur fuit Deo quod in rebus diversitatem produceret.

## CAPUT LXXII.

*Quomodo diversitas in rebus constituitur etiam secundum ordinem et gradum nobilitatis <sup>2</sup>.*

Oportuit autem diversitatem in rebus cum ordine constitui <sup>3</sup>, ut scilicet quæ-

dam aliis essent potiora. Hoc enim ad abundantiam divinæ bonitatis pertinet, ut suæ bonitatis similitudinem rebus causatis communicet, quantum possibile est. Deus autem non tantum in se bonus est, sed etiam alia in bonitate excellit, et ea ad bonitatem adducit. Ut igitur perfectior esset rerum creatarum similitudo ad Deum, necessarium fuit, ut quædam res aliis constituerentur meliores, et ut quædam in alia agerent, ea ad perfectionem ducendo. Prima autem diversitas rerum principaliter in diversitate formarum consistit. Formalis autem diversitas secundum contrarietatem est. Dividitur enim genus in diversas species differentiis contrariis. In contrarietate autem ordinem necesse est esse ; nam semper alterum contrariorum perfectius est. Oportet igitur rerum diversitatem cum quodam ordine a Deo esse institutam, ut scilicet quædam sint aliis potiora.

## CAPUT LXXIII.

*Quod ad perfectionem universi necesse est esse aliquas substantias immateriales et incorporales <sup>4</sup>.*

Quia vero unumquodque intantum nobile et perfectum est, in quantum ad divinam similitudinem accedit ; Deus autem est actus purus absque potentiæ permixtione ; necesse est ea quæ sunt suprema in entibus, magis esse in actu, et minus de potentia habere : quæ autem inferiora sunt magis in potentia esse <sup>5</sup>. Hoc autem qualiter sit, considerandum est.

Cum enim Deus sit sempiternus et incommutabilis in suo esse, illa sunt in rebus infima, utpote de similitudine divina minus habentia, quæ sunt generationi et corruptioni subjecta : quæ quandoque sunt, et quandoque non sunt. Et quia esse sequitur formam rei, sunt quidem hujusmodi quando formam habent, desinunt autem esse quando forma privantur. Oportet igitur in eis esse aliquid quod possit quandoque formam habere, quandoque vero forma privari ; quod dicimus materiam. Hujusmodi igitur quæ sunt in rebus infima, oportet esse ex materia et

<sup>1</sup> Parm. : « quomodo Deus diversa produxit, et quomodo pluralitas rerum causata est. »

<sup>2</sup> Parm. : « de diversitate rerum, gradu et ordine. »

<sup>3</sup> Parm. : « institui. »

<sup>4</sup> Parm. : « quomodo res creatæ quædam plus habent de potentia, minus de actu, quædam e converso. »

<sup>5</sup> Al. : « magis potentia esse. »

forma composita. Illa vero quæ sunt suprema in entibus creatis, ad similitudinem divini esse maxime accedunt, nec est in eis potentia ad esse et non esse, sed a Deo per creationem sempiternum esse adepta sunt. Cum autem materia hoc ipsum quod est, sit potentia ad esse quod est per formam; hujusmodi entia in quibus non est potentia ad esse et non esse, non sunt composita ex materia et forma, sed sunt formæ tantum, subsistentes in suo esse quod acceperunt a Deo. Necesse est autem hujusmodi substantias incorporeales incorruptibiles esse. In omnibus enim corruptibilibus est potentia ad non esse. In iis autem non est, ut dictum est. Sunt igitur incorruptibiles.

Item. Nihil corrumpitur nisi per separationem formæ ab ipso, nam esse semper consequitur formam. Hujusmodi autem substantiæ, cum sint formæ subsistentes, non possunt separari a suis formis, et ita esse amittere non possunt. Ergo sunt incorruptibiles.

Sunt autem inter utraque prædictorum quædam media, in quibus etsi non sit potentia ad esse et non esse, est tamen in eis potentia ad ubi. Hujusmodi autem sunt corpora cœlestia: quæ generationi et corruptioni non subjiciuntur, quia in iis contrarietates non inveniuntur; et tamen sunt mutabilia secundum locum: sic autem invenitur in aliquibus materia sicut et motus; est enim motus actus existentis in potentia. Habent igitur hujusmodi corpora materiam non subjectam generationi et corruptioni, sed solum loci mutationi.

#### CAPUT LXXIV.

*Quod hujusmodi substantiæ sunt intellectuales* <sup>1</sup>.

Prædictas autem substantias, quas immateriales diximus, necesse est etiam intellectuales esse. Ex hoc enim aliquid intellectuale est quod immune est a materia: quod ex ipso intelligendi modo percipi potest. Intelligibile enim in actu et intellectus in actu sunt unum. Manifestum est autem aliquid esse actu intelligibile per hoc quod est a materia separatum: nam et de rebus materiali-

<sup>1</sup> Parm.: « quod quædam sunt substantiæ intellectuales, quæ immateriales dicuntur. »

bus intellectualem cognitionem habere non possumus nisi per abstractionem a materia. Unde oportet idem iudicium de intellectu esse; ut scilicet quæ sunt immaterialia, sint intellectua-

lia. Item. Substantiæ immateriales sunt primæ et supremæ in entibus: nam actus naturaliter est prior potentia. Omnibus autem rebus apparet intellectus esse superior: intellectus enim utitur corporalibus quasi instrumentis. Oportet igitur substantias immateriales intellectuales esse.

Adhuc. Quanto aliqua sunt superiora in entibus, tanto magis pertingunt ad similitudinem divinam. Videmus enim res quasdam infimi gradus participare divinam similitudinem quantum ad esse tantum, velut inanimata; quædam autem quantum ad esse et vivere, ut plantæ; quædam autem quantum ad sentire, ut animalia: supremus autem modus est per intellectum, et maxime Deo conveniens. Supremæ igitur creaturæ sunt intellectuales: et quia inter ceteras creaturas magis ad Dei similitudinem accedunt, propter hoc dicuntur ad imaginem Dei constitutæ.

#### CAPUT LXXV.

*Quod hujusmodi <sup>2</sup> substantiæ sunt arbitrio liberæ.*

Per hoc autem ostenditur quod sunt arbitrio liberæ. Intellectus enim non agit aut appetit sine iudicio, sicut inanimata; neque est iudicium intellectus ex naturali impetu, sicut in brutis, sed ex propria apprehensione: quia intellectus et finem cognoscit, et id quod est ad finem, et habitudinem unius ad alterum: et ideo ipse sui iudicii causa esse potest, quo appetat et agat aliquid propter finem. Liberum autem dicimus quod sui causa est. Appetit igitur et agit intellectus libero iudicio, quod est esse liberum arbitrio. Supremæ igitur substantiæ sunt arbitrio liberæ.

Adhuc. Liberum est quod non est obligatum ad aliquid unum determinatum. Appetitus autem substantiæ intellectivæ non est obligatus ad aliquid unum de-

<sup>2</sup> Parm.: « quomodo tales. »

terminatum bonum : sequitur enim apprehensionem intellectus, quæ est de bono universaliter. Igitur appetitus substantiæ intelligentis est liber, utpote communiter se habens ad quodcumque bonum.

### CAPUT LXXVI.

*Invenitur gradus et ordo quantum ad perfectiones operis <sup>1</sup>.*

Sicut autem hæc substantiæ intelligentes quodam gradu aliis substantiis præponuntur, ita etiam ipsas substantias necesse est aliquibus gradibus ab invicem distare. Non enim ab invicem differre possunt materiali differentia, cum materia careant : unde si in eis est pluralitas, necesse est eam per distinctionem formalem causari, quæ diversitatem speciei constituit. In quibuscumque autem est speciei diversitatem accipere, necesse est in eis gradum quemdam et ordinem considerare : cujus ratio est, quia sicut in numeris additio vel subtractio unitatis speciem variat, ita per additionem et subtractionem differentiarum res naturales specie differentes inveniuntur : sicut quod est animatum tantum ab eo differt quod est animatum et sensibile, et quod est animatum et sensibile tantum ab eo quod est animatum, sensibile, et rationale. Necesse est igitur prædictas immateriales substantias secundum quosdam gradus et ordines esse distinctas.

### CAPUT LXXVII.

*Qualiter est in eis ordo et gradus in intelligendo.*

Et quia secundum modum substantiæ rei est modus operationis, necesse est quod superiores earum nobilius intelligant, utpote formas intelligibiles et virtutes magis universales et magis unitas habentes : inferiores autem esse debiliores in intelligendo, et habere formas magis multiplicatas et minus universales.

### CAPUT LXXVIII.

*Quod substantia per quam homo intelligit, est infima in genere substantiarum intellectualium.*

Cum autem non sit in rebus in infinitum procedere ; sicut est invenire supremam in prædictis substantiis, quæ propinquissime accedit ad Deum ; ita necesse est inveniri infimam, quæ maxime appropinquat materiæ corporali : et hoc quidem taliter potest esse manifestum. Intelligere enim homini supra alia animalia convenit. Manifestum est enim quod homo solus universalia considerat, et habitudines rerum, et res immateriales, quæ solum intelligendo percipiuntur. Impossibile est autem quod intelligere sit actus exercitus per organum corporale, sicut visio exercetur per oculum. Necesse est enim quod omne instrumentum virtutis cognoscitivæ careat illo genere rerum quod per ipsum cognoscitur, sicut pupilla caret coloribus ex sua natura : sic enim cognoscuntur colores, in quantum colorum species recipiuntur in pupilla ; recipiens autem oportet esse denudatum ab eo quod recipitur. Intellectus autem cognoscitivus est omnium naturarum sensibilium. Si igitur cognosceret per organum corporale, oporteret illum organum esse denudatum ab omni natura sensibili ; quod est impossibile.

Item. Omnis ratio cognoscitiva eo modo cognoscitur quo species cognita est apud ipsam, nam hæc est sibi principium cognoscendi. Intellectus autem cognoscit res immaterialiter, etiam eas quæ in sua natura sunt materiales, abstrahendo formam universalem a materialibus conditionibus individuantibus. Impossibile est ergo quod species rei cognita sit in intellectu materialiter : ergo non recipitur in organo corporali, nam omne organum corporale est materiale.

Idem etiam apparet ex hoc quod sensus debilitatur et corrumpitur ab excellentibus sensibilibus, sicut auditus a magnis sonis, et visus a rebus valde fulgidis ; quod accedit, quia solvitur organi harmonia. Intellectus autem magis roboratur ex excellentia intelligibilium : nam

<sup>1</sup> Parm. : « quod in eis est... secundum per-

fectionem naturæ. »



qui intelligit altiora intelligibilium, non minus potest intelligere alia, sed magis. Si igitur homo inveniatur intelligens, et intelligere hominis non sit per organum corporale, oportet quod sit aliqua substantia incorporea, per quam homo intelligat. Nam quod per se potest operari sine corpore, etiam ejus substantia non dependet a corpore : omnes enim virtutes et formæ quæ per se subsistere non possunt sine corpore, operationem habere non possunt sine corpore : non enim calor per se calefacit, sed corpus per ealorem. Hæc igitur substantia incorporea per quam homo intelligit, est infima in genere substantiarum intellectualium, et maxime materiæ propinqua.

## CAPUT LXXIX.

*De differentia intellectus et modo intelligendi.*

Cum autem esse intelligibile sit supra esse sensibile, sicut intellectus suprasensum ; ea autem quæ sunt inferiora in entibus, imitantur ut possunt superiora, sicut corpora generabilia et corruptibilia imitantur aliquo modo circulationem cœlestium corporum : necesse est et sensibilia intelligibilibus suo modo assimilari ; et sic ex similitudine sensibilium utcumque possumus devenire in notitiam intelligibilium. Est autem in sensibilibus aliquid quasi supremum quod est actus, scilicet forma : et aliquid infimum quod est potentia tantum, scilicet materia ; et aliquid medium, scilicet compositum ex materia et forma. Sic etiam in esse intelligibili considerandum est : nam supremum intelligibile quod est Deus, est actus purus ; substantiæ vero intellectuales aliæ sunt, habentes aliquid de actu et de potentia secundum esse intelligibile ; infima vero intellectualium substantiarum, per quam homo intelligit, est quasi in potentia tantum in esse intelligibili. Huic etiam attestatur quod homo invenitur a principio potentia tantum intelligens, et postmodum paulatim reducitur in actum ; et inde est quod id per quod homo intelligit, vocatur intellectus possibilis.

## CAPUT LXXX.

*Quod intellectus possibilis in homine accipit formas intelligibiles a rebus sensibilibus.*

Quia vero, ut dictum est, quanto substantia intellectualis est altior, tanto formas intelligibiles universaliores habet ; consequens est ut intellectus humanus, quem possibilem diximus, inter alias intellectuales substantias formas habeat minus universales ; et inde est quod formas intelligibiles a rebus sensibilibus accipit.

Hoc etiam aliter considerandi manifestum esse potest. Oportet enim formam esse proportionatam susceptibili. Sicut igitur intellectus possibilis humanus inter omnes substantias intellectuales propinquior invenitur materiæ corporali, ita necesse est quod ejus formæ intelligibiles rebus materialibus sint maxime propinquæ.

## CAPUT LXXXI.

*Quod homo indiget potentiis sensitivis ad intelligendum.*

Considerandum autem quod formæ in rebus corporeis particulares sunt, et materiale esse habentes ; in intellectu vero universales sunt, et immateriales : quod quidem demonstrat intelligendi modus. Intelligimus enim universaliter et immaterialiter. Modus autem intelligendi speciebus intelligibilibus, quibus intelligimus, necesse est quod respondeat. Oportet igitur, cum de extremo ad extremum non perveniatur nisi per medium, quod formæ a rebus corporeis ad intellectum perveniant per aliqua media. Hujusmodi autem sunt potentiæ sensitivæ, quæ formas rerum materialium recipiunt sine materia : fit enim in oculo species lapidis, sed non materia : recipiuntur tamen in potentiis sensitivis formæ rerum particulariter ; nam potentiis sensitivis non nisi particularia cognoscimus. Necesse igitur fuit hominem, ad hoc quod intelligat, etiam sensus habere. Hujus autem signum est quod cui deficit unus sensus, deficit scientia sensibilium quæ illo sensu comprehenduntur ; sicut cæcus natus de coloribus scientiam habere non potest.

## CAPUT LXXXII.

*Quod necesse est ponere intellectum agentem.*

Inde manifestum fit quod scientia rerum in intellectu nostro non causatur per participationem aut influxum aliquarum formarum actu intelligibilium per se subsistentium, sicut Platonici posuerunt, et alii quidam ipsos sequentes; sed intellectus acquirit eam a rebus sensibilibus, mediantibus sensibus. Sed cum in potentiis sensitivis formæ rerum sint particulares, ut dictum est; non sunt intelligibiles actu, sed potentia tantum. Intellectus enim non nisi universalia intelligit. Quod autem est in potentia, non reducit in actum nisi ab aliquo agente. Oportet igitur quod sit aliquod agens quod species in potentiis sensitivis existentes faciat intelligibiles actu. Hoc autem non potest facere intellectus possibilis: ipse enim magis est in potentia ad intelligibilia quam intelligibilium activus. Necesse est igitur ponere alium intellectum, qui species intelligibiles in potentia faciat intelligibiles actu, sicut lumen facit colores visibiles potentia, esse visibiles actu; et hunc dicimus intellectum agentem: quem ponere non esset necesse, si formæ rerum essent intelligibiles actu, sicut Platonici posuerunt.

Sic igitur ad intelligendum primo necessarius est nobis intellectus possibilis, qui est receptivus specierum intelligibilium; secundo intellectus agens qui facit intelligibilia actu. Cum autem intellectus possibilis jam fuerit per species intelligibiles perfectus, vocatur intellectus in habitu, cum species intelligibiles jam sic habet ut eis possit uti cum voluerit, medio quodam modo inter potentiam puram et actum completum. Cum vero prædictas species in actu completo habuerit, vocatur intellectus in actu. Sic enim actu intelligit res, cum species rei facta fuerit forma intellectus possibilis: propter quod dicitur quod intellectus in actu est intellectum in actu.

## CAPUT LXXXIII.

*Quod anima humana est incorruptibilis.*

Necesse est autem secundum præmissa, intellectum quo homo intelligit, incorruptibilem esse. Unumquodque enim sic operatur secundum quod habet esse. Intellectus autem habet operationem in qua non communicat sibi corpus, ut ostensum est: ex quo patet quod est operans per se ipsum. Ergo est substantia subsistens in suo esse. Ostensum est autem supra quod substantiæ intellectuales sunt incorruptibiles. Ergo intellectus quo homo intelligit, est incorruptibilis.

Adhuc. Proprium subjectum generationis et corruptionis est materia. Intantum igitur unumquodque a corruptione recedit, in quantum recedit a materia: ea enim quæ sunt composita ex materia et forma, sunt per se corruptibilia: formæ autem materiales sunt corruptibiles per accidens, et non per se; formæ autem immateriales, quæ materiæ proportionem excedunt, sunt incorruptibiles omnino. Intellectus autem omnino secundum suam naturam supra materiam elevatur, quod ejus operatio ostendit: non enim intelligimus aliqua nisi per hoc quod ipsa a materia separamus. Est igitur intellectus secundum naturam incorruptibilis.

Item. Corruptio absque contrarietate esse non potest; nihil enim corrumpitur nisi a suo contrario: unde corpora cælestia, in quibus non est contrarietas, sunt incorruptibilia. Sed contrarietas longe est a natura intellectus, in tantum quod ea quæ secundum se sunt contraria, in intellectu contraria non sunt: est enim contrariorum ratio intelligibilis una, quia per unum intelligitur aliud. Impossibile est igitur quod intellectus sit corruptibilis.

## CAPUT LXXXIV.

*Quod non est unus intellectus potentiulis in omnibus<sup>4</sup>.*

Forte autem aliquis dicit quod intellectus quidem incorruptibilis est, sed est

<sup>4</sup> Parm.: « de unitate intellectus possibilis. »

unus in omnibus hominibus; et sic quod post corruptionem omnium hominum remanet, non est nisi unum. Quod autem sit unus tantum intellectus in omnibus, multipliciter adstrui potest.

Primo quidem ex parte intelligibilis. Quia si est alius intellectus in me, alius in te, oportebit quod sit alia species intelligibilis in me, et alia in te, et per consequens aliud intellectum quod ego intelligo, et aliud quod tu. Erit ergo intentio intellecta multiplicata secundum numerum individuorum, et ita non erit universalis, sed individualis. Ex quo videtur sequi quod non sit intellecta in actu, sed in potentia tantum: nam intentiones individuales sunt intelligibiles in potentia, non in actu.

Deinde quia, cum ostensum sit quod intellectus est substantia subsistens in suo esse, substantiæ autem intellectuales plures numero non sint in specie una, ut supra etiam ostensum est; sequitur quod si alius est intellectus in me et alius in te secundum numerum, quod sit etiam alius specie; et sic ego et tu non sumus ejusdem speciei.

Item. Cum in natura speciei omnia individua communicent, oportet poni aliquid præter naturam speciei, secundum quod ab invicem individua distinguuntur. Si igitur in omnibus hominibus est unus intellectus secundum speciem, plures autem secundum numerum; oportet ponere aliquid quod faciat numero differre unum intellectum ab alio. Hoc autem non potest esse aliquid quod sit de substantia intellectus, cum intellectus non sit compositus ex materia et forma. Ex quo sequitur quod omnis differentia quæ accipi posset secundum id quod est de substantia intellectus, sit differentia formalis et diversificans speciem. Relinquitur ergo quod intellectus unius hominis non possit esse alius numero ab intellectu alterius, nisi propter diversitatem corporum. Corruptis ergo corporibus diversis, videtur quod non remaneant plures intellectus, sed unum tantum.

Hoc autem quod impossibile sit, evidenter apparet. Ad quod ostendendum, procedendum est sicut proceditur contra negantes principia, ut ponamus aliquid quod omnino negari non possit. Ponamus igitur quod hic homo, puta Socrates vel Plato, intelligat: quod negare non posset respondens, nisi intelligeret esse negandum. Negando igitur ponit: nam

affirmare et negare intelligentis est. Si autem hic homo intelligit, oportet quod id quo formaliter intelligit, sit forma ejus; quia nihil agit nisi secundum quod est actu. Illud ergo quo agit agens, est actus ejus; sicut calor quo calidum calefacit, est actus ejus. Intellectus igitur quo homo intelligit, est forma hujus hominis, et eadem ratione illius. Impossibile est autem quod forma eadem numero sit diversorum secundum numerum; quia diversorum secundum numerum non est idem esse. Unumquodque autem habet esse per suam formam. Impossibile est igitur quod intellectus quo homo intelligit, sit unus in omnibus.

Hujus autem rationis difficultatem aliqui cognoscentes, conantur invenire viam evadendi. Dicunt enim quod intellectus possibilis, de quo supra est habitum, recipit species intelligibiles, quibus fit in actu. Species autem intelligibiles sunt quodammodo in phantasmatis. In quantum igitur species intelligibilis est in intellectu possibili et in phantasmatis quæ sunt in nobis, intantum intellectus possibilis continuatur et unitur nobiscum, ut sic per ipsum intelligere possimus.

Hæc autem responsio omnino nulla est. Primo quidem, quia species intelligibilis secundum quod est in phantasmatis, est intellecta in potentia tantum; secundum autem quod est in intellectu possibili, est intellecta in actu. Secundum igitur quod est in intellectu possibili non est in phantasmatis, sed magis a phantasmatis abstracta. Nulla ergo remanet unio intellectus possibilis ad nos. Deinde dato quod sit aliqua unio, non tamen sufficeret ad hoc quod faceret nos intelligentes. Per hoc enim quod species alicujus est in intellectu, non sequitur quod se ipsum intelligat, sed quod intelligatur: non enim lapis intelligit, etiam si ejus species sit in intellectu possibili. Neque igitur per hoc quod species phantasmatum quæ sunt in nobis, sunt in intellectu possibili, sequitur quod nos simus intelligentes; sed magis quod nos simus intellecti, vel potius phantasmata quæ sunt in nobis.

Hoc autem evidentius apparet, si quis consideret comparisonem quam facit Aristoteles in III *De anima*, dicens quod intellectus se habet ad phantasmata sicut visus ad colores. Manifestum est autem quod per hoc quod species colorum qui sunt in pariete, sunt in visu, non habet

paries quod videat, sed magis videatur. Neque ergo etiam ex hoc quod species phantasmatum quæ sunt in nobis, fiunt in intellectu, sequitur quod nos simus intelligentes, sed quod simus intellecti. Amplius, si nos per intellectum formaliter intelligimus, oportet quod ipsum intelligere intellectus sit intelligere hominis; sicut eadem est calefactio ignis et caloris. Si igitur idem est intellectus numero in me et in te, sequitur de necessitate quod respectu ejusdem intelligibilis sit idem intelligere meum et tuum, dum scilicet simul aliquid idem intelligimus; quod est impossibile: non enim diversorum operantium potest esse una et eadem numero operatio. Impossibile est igitur quod sit unus intellectus in omnibus. Sequitur ergo si intellectus est incorruptibilis, ut ostensum est, quod destructis corporibus remaneant plures intellectus secundum numerum hominum.

Ea vero quæ in contrarium obijciuntur, facile est solvere.

Prima enim ratio multipliciter deficit. Primo quidem concedimus idem esse intellectum ab omnibus hominibus: dico autem intellectum id quod est intellectus objectum; objectum autem intellectus non est species intelligibilis, sed quidditas rei. Non enim scientiæ intellectuales omnes sunt de speciebus intelligibilibus, sed sunt de naturis rerum; sicut etiam objectum visus est color, non species coloris, quæ est in oculo. Quamvis igitur sint plures intellectus diversorum hominum, non tamen est nisi unum intellectum apud omnes; sicut unum coloratum est quod a diversis insipientibus videtur. Secundo, quia non est necessarium, si aliquid est individuum, quod sit intellectum in potentia et non in actu; sed hoc est verum in illis tantum quæ individuantur per materiam: oportet enim illud quod est intellectum in actu, esse immateriale. Unde substantiæ immateriales, licet sint quædam individua per se existentiæ, sunt tamen intellecta in actu: unde et species intelligibiles, quæ sunt immateriales, licet sint aliæ numero in me et in te, non propter hoc perdunt quin sint intelligibiles actu; sed intellectus intelligens per eas suum objectum reflectitur supra se ipsum intelligendo ipsum suum intelligere, et speciem qua intelligit. Deinde considerandum est quod si ponatur unus intellectus omnium hominum,

adhuc est eadem difficultas; quia adhuc remanet multitudo intellectuum, cum sint plures substantiæ separatæ intelligentes; et ita sequeretur secundum eorum rationem quod intellecta essent secundum numerum diversa, et per consequens individualia, et non intellecta in actu primo. Patet igitur quod præmissa ratio si aliquid necessitatis haberet, auferret pluralitatem intellectuum simpliciter, et non solum in hominibus. Unde cum hæc conclusio sit falsa, manifestum est quod ratio non ex necessitate concludit.

Secunda ratio solvitur facile, si quis consideret differentiam intellectualis animæ ad substantias separatas. Anima enim intellectiva ex natura suæ speciei hoc habet ut uniatur alicui corpori ut forma, unde et in definitione animæ cadit corpus; et propter hoc secundum habitudinem ad diversa corpora diversificantur animæ secundum numerum quod non est in substantiis separatis.

Ex quo etiam patet qualiter tertia ratio sit solvenda. Non enim anima intellectiva ex natura suæ speciei habet corpus partem sui, sed unibilitatem ad ipsum: unde per hoc quod est unibilis diversis corporibus, diversificatur secundum numerum; quod etiam manet in animabus, corporibus destructis: sunt enim unibiles corporibus diversis, licet non actu unitæ.

## CAPUT LXXXV.

### *De intellectu agente; quod non est unus in omnibus.*

Fuerunt autem quidam, qui licet concederent intellectum possibilem diversificari in hominibus, posuerunt tamen intellectum agentem unum respectu omnium esse. Quæ quidem opinio, licet sit tolerabilior quam præmissa, similibus tamen rationibus confutari potest.

Est enim actio intellectus possibilis recipere intellecta et intelligere ea; actio autem intellectus agentis facere intellecta in actu abstrahendo ipsa. Utrumque autem horum huic homini convenit: nam hic homo, ut Socrates vel Plato, et recipit intellecta, et abstrahit, et intelligit abstracta. Oportet igitur quod tam intellectus possibilis quam intellectus agens uniatur huic homini ut forma; et sic

oportet quod uterque multiplicetur numero secundum numerum hominum.

Item. Agens et patiens oportet esse ad invicem proportionata, sicut materia et forma, nam materia fit in actu ab agente; et inde est quod cuilibet potentiæ passivæ respondet potentia activa sui generis; actus enim et potentia unius generis sunt. Intellectus autem agens comparatur ad possibilem sicut potentia activa ad passivam, ut ex dictis patet. Oportet igitur utrumque esse unius generis. Cum igitur intellectus possibilis non sit secundum esse separatus a nobis, sed unitus nobis ut forma, et multiplicetur secundum multitudinem hominum, ut ostensum est; necesse est etiam quod intellectus agens sit aliquid unitum nobis formaliter, et multiplicetur secundum numerum hominum.

#### CAPUT LXXXVI.

*Quod intellectus possibilis et agens fundantur in essentia animæ.*

Cum autem intellectus agens et possibilis nobis formaliter uniantur, necesse est dicere quod in eadem essentia animæ convenient. Omne enim quod alicui unitur formaliter, unitur ei per modum formæ substantialis, aut per modum formæ accidentalis. Si igitur intellectus possibilis et agens uniantur homini per modum formæ substantialis, cum unius rei non sit nisi una forma substantialis, necesse est dicere quod intellectus possibilis et agens convenient in una essentia formæ, quæ est anima. Si vero uniantur homini per modum formæ accidentalis, manifestum est quod neutrum potest esse accidens corpori; et ex hoc quod operationes eorum sunt absque organo corporali, ut supra ostensum est, sequitur quod uterque eorum sit accidens animæ. Non est autem in uno homine nisi una anima. Oportet igitur quod intellectus agens et possibilis in una essentia animæ convenient.

Item. Omnis actio quæ est propria alicui speciei, est a principiis consequentibus formam quæ dat speciem. Intelligere autem est operatio propria humanæ speciei. Oportet igitur quod intellectus agens et possibilis, qui sunt principia hu-

jus operationis, sicut ostensum est, consequantur animam humanam, a qua homo habet speciem. Non autem sic consequuntur eam quasi ab ipsa procedentia in corpus, quia, ut ostensum est, prædicta operatio est sine organo corporali. Cujus autem est potentia, ejus et actio. Relinquitur ergo quod intellectus possibilis et agens convenient in una essentia animæ.

#### CAPUT LXXXVII.

*Qualiter istæ duæ potentiæ communicant<sup>1</sup> in una essentia animæ.*

Considerandum autem relinquitur quomodo hoc possit esse. Videtur enim circa hoc aliqua difficultas suboriri. Intellectus enim possibilis est in potentia ad omnia intelligibilia, intellectus autem agens facit intelligibilia in potentia esse intelligibilia in actu; et sic oportet quod comparatur ad ea sicut actus ad potentiam. Non videtur autem possibile quod idem respectu ejusdem sit in potentia et in actu. Sic igitur impossibile videtur quod in una substantia animæ convenient intellectus possibilis et agens.

Hæc autem dubitatio de facili solvitur, si quis consideret qualiter intellectus possibilis sit in potentia respectu intelligibilium, et qualiter intellectus agens faciat ea esse in actu. Est enim intellectus possibilis in potentia ad intelligibilia secundum quod non habet in sui natura aliquam determinatam formam rerum sensibilium, sicut pupilla est in potentia ad omnes colores. In quantum ergo phantasmata a rebus sensibilibus abstracta sunt similitudines determinatarum rerum sensibilium, comparantur ad intellectum possibilem sicut actus ad potentiam; sed tamen phantasmata sunt in potentia ad aliquid quod anima intellectiva habet in actu, scilicet esse abstractum a materialibus conditionibus; et quantum ad hoc anima intellectiva comparatur ad ipsa ut actus ad potentiam. Non est autem inconveniens quod aliquid respectu ejusdem sit in actu et in potentia secundum diversa: propter hoc enim naturalia corpora agunt et patiuntur ad invicem, quia utrumque est in potentia respectu alterius. Sic

<sup>1</sup> Parm. : « convenient. »



igitur non est inconueniens quod eadem anima intellectiva sit in potentia respectu omnium intelligibilium, prout ponitur in ea intellectus possibilis, et comparetur ad ea ut actus, prout ponitur in ea intellectus agens.

Et hoc manifestius apparebit ex modo quo intellectus facit intelligibilia in actu. Non enim intellectus agens sic facit intelligibilia in actu quasi ab ipso effluant in intellectum possibilem (sic enim non indigeremus phantasmatis et sensu ad intelligendum); sed facit intelligibilia in actu abstrahendo ea a phantasmatis; sicut lumen facit quodammodo colores in actu, non quasi habeat eos apud se, sed in quantum dat eis quodammodo visibilitatem. Sic igitur aestimandum est unam esse animam intellectivam quæ caret naturis rerum sensibilium et potest eas recipere per modum intelligibilem, et quæ phantasmata facit intelligibilia in actu abstrahendo ab eis species intelligibiles. Unde potentia ejus secundum quam est receptiva intelligibilium specierum, dicitur intellectus possibilis: potentia autem ejus secundum quam abstrahit species intelligibiles a phantasmatis, vocatur intellectus agens, qui est quasi quoddam lumen intelligibile quod anima intellectiva participat ad imitationem superiorum substantiarum intellectualium.

#### CAPUT LXXXVIII.

*Quod omnes potentiae in essentia animae radicantur.*

Non solum autem intellectus agens et possibilis in una essentia animae humanae conveniunt; sed etiam omnes aliae potentiae, quæ sunt principia operationum animae. Omnes enim hujusmodi potentiae quodammodo in anima radicantur: quaedam quidem, sicut potentiae vegetativae et sensitivae partis, in anima sunt sicut in principio, in conjuncto autem sicut in subjecto, quia earum operationes conjuncti<sup>1</sup> sunt, et non solum animae: cujus est enim actio, ejus est potentia: quaedam vero sunt in anima sicut in principio et in subjecto, quia earum operationes sunt animae absque organo

corporali; et hujusmodi sunt potentiae intellectivae partis. Non est autem possibile esse plures animas in homine. Oportet igitur quod omnes potentiae ad eandem animam pertineant.

#### CAPUT LXXXIX.

*Quod unica est anima in uno corpore.*

Quod autem impossibile sit esse plures animas in uno corpore, sic probatur. Manifestum est enim animam esse formam substantialem habentis animam, ex hoc quod per animam animatum genus et speciem sortitur. Impossibile est autem plures formas substantiales ejusdem esse rei: forma enim substantialis in hoc differt ab accidentali: quia forma substantialis facit esse hoc aliquid simpliciter; forma autem accidentalis advenit ei quod jam est hoc aliquid, et facit ipsum esse quale vel quantum, aut aliquammodo se habens. Si igitur plures formae substantiales sint unius et ejusdem rei; aut prima earum facit hoc aliquid, aut non. Si non facit hoc aliquid, non est forma substantialis. Si autem facit hoc aliquid; ergo omnes formae consequentes adveniunt ei quod jam est hoc aliquid. Nulla igitur consequentium erit forma substantialis, sed accidentalis.

Sic igitur patet quod impossibile est formas substantiales esse plures unius et ejusdem rei. Neque igitur possibile est plures animas in uno et eodem esse.

Adhuc<sup>2</sup>: patet quod homo dicitur vivens secundum quod habet animam vegetabilem, animal autem secundum quod habet animam sensitivam, homo autem secundum quod habet animam intellectivam. Si igitur sunt tres animae in homine, scilicet vegetabilis, sensibilis et rationalis, sequitur quod homo secundum aliam animam ponatur in genere, et, secundum aliam, speciem sortiatur. Hoc autem est impossibile: sic enim ex genere et differentia non fieret unum simpliciter, sed unum per accidens, vel quasi congregatum, sicut musicum et album: quod non est esse unum simpliciter. Necesse est igitur in homine unam tantum animam esse.

<sup>1</sup> Al.: « conjunctae. »

<sup>2</sup> Hic in Cod. S. Gen. incipit cap. xci, sed erronee.

## CAPUT XC.

*Rationes quæ videntur probare quod in homine sunt plures animæ.*

Videtur autem quædam huic sententiæ adversari.

Primo quidem quia differentia comparatur ad genus ut forma ad materiam. Animal autem est genus hominis, rationale autem est differentia constitutiva ejus. Cum igitur animal sit corpus animatum anima sensitiva, videtur quod corpus animatum anima sensitiva adhuc sit in potentia respectu animæ rationalis; et sic anima rationalis esset anima alia a sensitiva.

Item. Intellectus non habet organum corporale; sensitivæ autem potentiæ et nutritivæ habent organum corporale. Impossibile igitur videtur quod eadem anima sit et intellectiva et sensitiva: quia non potest esse idem separatum et non separatum.

Adhuc. Anima rationalis est incorruptibilis, ut supra ostensum est; vegetabilis autem anima et sensibilis sunt corruptibiles, quia sunt actus corruptibilium organorum. Non est igitur eadem anima vegetabilis et sensibilis et rationalis, cum impossibile sit idem esse corruptibile et incorruptibile.

Præterea. In generatione hominis apparet vita, quæ est per animam vegetabilem, antequam conceptum appareat esse animal per sensum et motum; et prius demonstratur animal esse per motum et sensum quam habeat intellectum. Si igitur est eadem anima per quam conceptum primo vivit vita plantæ, secundo vita animalis, et tertio vita hominis; sequeretur quod vegetabilis, sensibilis et rationalis sint ab exteriori principio, vel etiam intellectiva sit ex virtute quæ est in semine. Utrumque autem horum videtur inconveniens: quia cum operationes animæ vegetabilis et sensibilis non sint sine corpore, nec earum principia sine corpore possunt esse; operatio autem animæ intellectivæ est sine corpore; et sic impossibile videtur quod aliqua virtus in corpore sit ejus causa. Impossibile est igitur quod eadem anima sit vegetabilis, sensibilis et rationalis.

## CAPUT XCI.

*Solutio rationum præmissarum.*

Ad hujusmodi igitur dubitationes tollendas considerandum est quod sicut in numeris species diversificantur per hoc quod una earum super alteram addit; ita etiam in rebus materialibus una species aliam in perfectione excedit. Quidquid enim perfectionis est in corporibus inanimatis, hoc habent plantæ, et adhuc amplius; et rursus quod habent plantæ, habent animalia, et aliquid plus; et sic quousque veniatur ad hominem, qui est perfectissimus inter creaturas. Omne autem quod est imperfectum, se habet ut materia respectu perfectioris: et hoc quidem in diversis manifestum est. Nam elementa sunt materia corporum similium partium; et rursus corpora similium partium sunt materia respectu animalium. Et similiter in uno et eodem considerandum est. Quod enim in rebus naturalibus ad altiorem gradum perfectionis attingit, per suam formam habet quidquid perfectionis convenit inferiori naturæ, et per eandem habet id quod eidem de perfectione superadditur; sicut planta per suam animam habet quod sit substantia, et quod sit corporea, et ulterius quod sit animatum corpus. Animal autem per suam animam habet hæc omnia, et ultra quod sit sentiens; homo autem super hæc omnia habet per suam animam quod sit intelligens. Si igitur in re aliqua consideretur id quod ad inferioris gradus perfectionem pertinet, erit materiale respectu ejus quod pertinet ad perfectionem superioris gradus; puta si consideretur in animali quod habet vitam plantæ, hoc est quodammodo materiale respectu ejus quod pertinet ad vitam sensitivam, quæ est propria animali. Genus autem non est materia, non enim prædicaretur de toto; sed est aliquid a materia sumptum: denominatio enim rei ab eo quod est materiale in ipsa, est genus ejus; et per eundem modum differentia sumitur a forma. Et propter hoc, corpus vivum seu animatum, est genus animalis, sensibile autem differentia constitutiva ipsius; et similiter animal est genus hominis, et rationale differentia constitutiva ejus. Quia igitur forma superioris gradus, habet in se

omnes perfectiones inferioris gradus, non est alia forma secundum rem a qua sumitur genus, et a qua sumitur differentia; sed ab eadem forma, secundum quod habet inferioris gradus perfectionem, sumitur genus; secundum vero quod habet perfectionem superioris gradus, sumitur ab ea differentia.

Et sic patet quod quamvis animal sit genus hominis, et rationale sit differentia constitutiva ejus, non tamen oportet quod sit in homine alia anima sensitiva et alia intellectiva, ut prima ratio objiciebat.

Per eadem autem apparet solutio secundæ rationis. Dictum est enim quod forma superioris speciei comprehendit in se omnes inferiorum graduum perfectiones. Considerandum est autem, quod tantum species materialis est altior, quanto minus fuerit materiæ subjecta; et sic oportet quod quanto aliqua forma est nobilior, tanto magis super materiam elevetur: unde anima humana, quæ est nobilissima materialium formarum, ad summum elevationis gradum pertingit, ut scilicet habeat operationem absque communicatione materiæ corporalis; tamen quia eadem anima inferiorum graduum perfectiones comprehendit, habet nihilominus et operationes in quibus communicat materia corporalis. Manifestum est autem quod operatio procedit a re secundum ejus virtutem. Oportet igitur quod anima humana habeat aliquas vires sive potentias quæ sunt principia operationum quæ exercentur per corpus, et has oportet esse actus aliquarum partium corporis; et hujusmodi sunt potentia vegetativæ et sensitivæ partis. Habet etiam aliquas potentias quæ sunt principia operationum quæ sine corpore exercentur; et hujusmodi sunt intellectivæ partis potentia, quæ non sunt actus aliquorum organorum. Et ideo intellectus tam possibilis quam agens dicitur separatus, quia non habent organa quorum sunt actus, sicut visus et auditus, sed sunt tantum in anima, quæ est corporis forma. Unde non oportet, propter hoc quod intellectus dicitur separatus et caret organo corporali, non autem sensus quod alia sit anima intellectiva et sensitiva in homine.

Ex quo etiam patet quod nec ex hoc cogimur ponere aliam animam intellectivam et aliam sensitivam in homine, quia anima sensitiva est corruptibilis,

intellectiva incorruptibilis, ut alia ratio procedebat. Esse enim incorruptibile competit intellectivæ parti in quantum est separata. Sicut igitur in eadem essentia animæ fundantur potentia quæ sunt separata, ut dictum est, et non separata; ita nihil prohibet quasdam potentiarum animæ simul cum corpore deficere, quasdam autem incorruptibiles esse.

Secundum etiam prædicta patet solutio quartæ objectionis. Nam omnis motus naturalis paulatim ex imperfecto ad perfectum procedit; quod tamen aliter accidit in alteratione et generatione. Nam eadem qualitas suscipit magis et minus: et ideo alteratio, quæ est motus in qualitate, una et continua existens, de potentia ad actum procedit de imperfecto ad perfectum. Forma vero substantialis non recipit magis et minus, quia esse substantiale uniuscujusque est indivisibiliter se habens. Unde naturalis generatio non procedit continue per multa media de imperfecto ad perfectum, sed oportet esse ad singulos gradus perfectionis novam generationem et corruptionem. Sic igitur in generatione hominis conceptum quidem primo vivit vita plantæ per animam vegetabilem; deinde remota hac forma per corruptionem, acquirit quædam alia generatione animam sensibilem, et vivit vita animalis; deinde remota hac anima per corruptionem, introducit forma ultima et completa, quæ est anima rationalis, comprehendens in se quicquid perfectionis in præcedentibus formis erat.

## CAPUT XCH.

### *De productione animæ rationalis, quod non sit ex traductione.*

Hæc autem ultima et completa forma, scilicet anima rationalis, non educitur in esse a virtute quæ est in semine, sed a superiori agente. Virtus enim quæ est in semine, est virtus corporis cujusdam. Anima autem rationalis excedit omnem corporis naturam et virtutem; cum ad ejus intellectualem operationem nullum corpus pertingere possit. Cum igitur nihil agat ultra suam speciem, eo quod agens est nobilius patiente, et faciens facto; impossibile est quod virtus alicujus corporis producat animam rationalem: neque igitur virtus quæ est in semine.



Adhuc. Secundum quod unumquodque habet esse de novo, sic de novo competit ei fieri : nam ejus est fieri cujus est et esse ; ad hoc enim aliquid fit ut sit. Eis igitur quæ secundum se habent esse, competit per se fieri, sicut rebus subsistentibus ; eis autem quæ per se non habent esse, non competit per se fieri, sicut accidentibus, et formis materialibus. Anima autem rationalis secundum se habet esse, quia secundum se habet operationem, ut ex dictis patet. Animæ igitur rationali secundum se competit fieri. Cum igitur non sit composita ex materia et forma, ut supra ostensum est, sequitur quod non possit educi in esse nisi per creationem. Solius autem Dei est creare, ut supra ostensum est. A solo igitur Deo anima rationalis in esse producitur.

Hoc etiam rationabiliter accidit. Videmus enim in artibus ad invicem ordinatis quod suprema ars inducit ultimam formam ; artes autem inferiores disponunt materiam ad ultimam formam. Manifestum est autem quod anima rationalis est ultima et perfectissima forma quam potest consequi materia generabilium et corruptibilium. Convenienter igitur naturalia agentia in inferiora causant præcedentes dispositiones et formas ; supremum vero agens, scilicet Deus, causat ultimam formam, quæ est anima rationalis.

## CAPUT XCIII.

*Quod anima rationalis non est de substantia Dei.*

Non tamen credendum est animam rationalem esse de substantia Dei, secundum quorundam errorem. Ostensum est enim supra quod Deus simplex et indivisibilis est. Non igitur animam rationalem corpori unit quasi eadem a sua substantia separando.

Item. Ostensum est supra quod impossibile est Deum esse formam alicujus corporis. Anima autem rationalis unitur corpori ut forma. Non igitur est de substantia Dei.

Adhuc. Ostensum est supra quod Deus non movetur neque per se neque per accidens ; cujus contrarium in anima rationali apparet ; mutatur enim de ignorantia ad scientiam, et de vitio ad virtutes. Non est igitur de substantia Dei.

## CAPUT XCIV

*Quod illa quæ dicuntur inesse a virtute extrinseca, sunt immediate a Deo.*

Ex his autem quæ supra ostensa sunt, ex necessitate concluditur quod illa quæ non possunt produci in esse nisi per creationem, a Deo immediate sint. Manifestum est autem quod corpora cœlestia non possunt produci in esse nisi per creationem. Non enim potest dici quod ex materia aliqua præjacenti sunt facta, quia sic essent generabilia et corruptibilia, et contrarietati subjecta, quod eis non competit, ut motus eorum declarat : moventur enim circulariter ; motus autem circularis non habet contrarium. Relinquitur igitur quod corpora cœlestia sint immediate in esse a Deo producta. Similiter etiam elementa secundum se tota non sunt ex aliqua materia præjacenti : quia illud quod præexisteret, haberet aliquam formam ; et sic oporteret quod aliquod corpus aliud ab elementis esset prius eis in ordine causæ materialis. Si tamen materia præexistens elementis haberet formam aliam, oporteret quod unum eorum esset aliis prius in eodem ordine, si materia præcedens formam elementi haberet formam aliam. Oportet igitur etiam ipsa elementa immediate esse a Deo producta. Multo igitur magis impossibile est substantias incorporeas et invisibiles ab aliquo alio creari : omnes enim hujusmodi substantiæ immateriales sunt. Non enim potest esse materia nisi dimensionibus subjecta, secundum quam materia distinguitur, ut ex una materia fieri possint. Unde impossibile est quod ex materia præjacenti causentur. Relinquitur igitur quod per creationem solum a Deo producuntur in esse : et propter hoc fides catholica confitetur Deum esse « creatorem cœli et terræ, et omnium visibilium, » nec non etiam « invisibilium. »

## CAPUT XCV.

*Quod Deus non agit naturali necessitate, sed a voluntate.*

Ex hoc autem ostenditur quod Deus res in esse produxerit non naturali necessitate, sed voluntate. Ab uno enim

naturali agente non est immediate nisi unum; agens autem voluntarium diversa producere potest : quod ideo est, quia omne agens agit per suam formam. Forma autem naturalis, per quam naturaliter aliquid agit, unius una est; formæ autem intellectivæ, per quas aliquid voluntate agit, sunt plures. Cum igitur a Deo immediate plura producantur in esse, ut jam ostensum est; manifestum est quod Deus in esse res produxit voluntate, et non naturali necessitate.

Adhuc. Agens per intellectum et voluntatem est prius in ordine agentium agente per necessitatem naturæ : nam agens per voluntatem præstituit sibi finem propter quem agit; agens autem naturale agit propter finem sibi ab alio præstitutum. Manifestum est autem ex præmissis, Deum esse primum agens. Est igitur agens per voluntatem, et non per necessitatem naturæ.

Item. Ostensum est in superioribus, Deum esse infinitæ virtutis. Non igitur determinatur ad hunc effectum vel illum, sed indeterminate se habet ad omnes. Quod autem indeterminate se habet ad diversos effectus, determinatur ad unum producendum per desiderium, vel per determinationem voluntatis; sicut homo qui potest ambulare et non ambulare, quando vult ambulat. Oportet igitur quod effectus a Deo procedant secundum determinationem voluntatis. Non igitur agit per necessitatem naturæ, sed per voluntatem. Inde est quod fides catholica Deum omnipotentem non solum creatorem, sed etiam « factorem » nominat : nam facere proprie est artificis qui per voluntatem operatur. Et quia omne agens voluntarium, per conceptionem sui intellectus agit, quæ verbum ipsius dicitur, ut supra ostensum est; verbum autem Dei filius est : ideo fides catholica confitetur de Filio quod per eum « omnia facta sunt. »

#### CAPUT XCVI.

*Quod Deus in sua actione est immutabilis.*

Ex hoc autem quod voluntate res in esse producit, manifestum est quod absque sui mutatione res de novo in esse producere potest. Hæc est enim differentia inter agens naturale et agens voluntarium : quod agens naturale eodem modo agit quamdiu eodem modo se ha-

bet, eo quod quale est, talia agit; agens autem voluntarium agit qualia vult. Potest autem contingere absque ejus mutatione quod velit nunc agere, et prius non agere. Nihil enim prohibet adesse alicui voluntatem de operando in posterum, etiam quando non operatur, absque sui mutatione. Ita absque Dei mutatione contingere potest quod Deus, quamvis sit æternus, res in esse produxerit non ab æterno.

#### CAPUT XCVII.

*Ratio probans motum ab æterno fuisse, et solutio ejus.*

Videtur autem quod si Deus voluntate æterna et immutabili novum effectum producere possit, tamen oporteat quod novum effectum aliquis motus præcedat. Non enim videmus quod voluntas illud quod vult facere, retardet, nisi propter aliquid quod nunc est et cessat in posterum, vel quod non est, et expectatur futurum; sicut homo in ætate habet voluntatem ut induat se aliquo indumento quod tamen ad præsens induere non vult, sed in futurum, quia nunc est calor, qui cessabit frigore adveniente in posterum. Si igitur Deus ab æterno voluit aliquem effectum producere, et non ab æterno produxit, videtur quod vel aliquid expectaretur futurum quod nondum erat, vel esset aliud auferendum quod tunc erat. Neutrum autem horum sine motu contingere potest. Videtur igitur quod a voluntate præcedente non posset effectus aliquis produci in posterum nisi aliquo motu præcedente : et sic si voluntas Dei fuit æterna de rerum productione, et res non sunt ab æterno productæ, oportet quod earum productionem præcedat motus, et per consequens mobilia : quæ si a Deo producta sunt, et non ab æterno, iterum oportet præexistere alios motus et mobilia usque in infinitum.

Hujus autem objectionis solutio facile potest perpendi, si quis differentiam consideret universalis et particularis agentis. Nam agens particulare habet actionem proportionatam regulæ et mensuræ quam agens universale præstituit : quod quidem in civilibus apparet. Nam legislator proponit legem quasi regulam et mensuram, secundum quam judicari oportet ab aliquo particulari iudice. Tempus autem est mensura actionum qua-

fiunt in tempore. Agens enim particulare habet actionem tempori proportionatam, ut scilicet nunc et non prius agat propter aliquam determinatam rationem. Agens autem universale quod Deus est, hujusmodi mensuram, quæ tempus est, instituit, et secundum suam voluntatem. Inter res igitur productas a Deo etiam tempus est. Sicut igitur talis est uniuscujusque rei quantitas et mensura, qualem Deus ei tribuere voluit; ita et talis est quantitas temporis qualem ei Deus dare voluit: ut scilicet tempus et ea quæ sunt in tempore tunc inciperent quando Deus ea esse voluit. Objectio autem præmissa procedit de agente quod præsupponit tempus et agit in tempore, non autem instituit tempus. Quæstio ergo qua quæritur quare voluntas æterna producit effectum nunc, et non prius, præsupponit tempus præexistens: nam nunc et prius partes sunt temporis. Circa universalem igitur rerum productionem, inter quas etiam consideratur tempus, non est quærendum quare nunc et non prius; sed quare hujus temporis voluit esse mensuram: quod ex divina voluntate dependet, cui indifferens est vel hanc quantitatem vel aliam tempori assignare. Quod quidem et circa quantitatem dimensionem mundi considerari potest. Non enim quæritur quare Deus corporalem mundum in tali situ constituit et non supra, vel subter, vel secundum aliam positionis differentiam, quia non est locus extra mundum; sed hoc ex divina voluntate provenit quod talem quantitatem mundo corporali tribueret, ut nihil ejus esset extra hunc situm secundum quamcumque positionis differentiam. Licet autem ante mundum tempus non fuerit, nec extra mundum sit locus; utimur tamen tali modo loquendi; ut si dicamus quod antequam mundus esset, nihil erat nisi Deus, et quod extra mundum non est aliquid corpus; non intelligentes per ante et extra, tempus aut locum nisi secundum imaginationem tantum.

### CAPUT XCVIII

*Rationes ostendentes quod est necessarium materiam ab æterno creationem mundi præcessisse, et solutiones earum.*

Videtur autem, etsi rerum perfectarum productio ab æterno non fuerit,

quod materiam necesse sit ab æterno fuisse. Omne enim quod habet esse post non esse, mutatur de non esse ad esse. Si igitur res creatæ, ut puta cælum et terra et alia hujusmodi, ab æterno non fuerint, sed inceperunt esse postquam non fuerant, necesse est dicere eas mutatas esse de non esse ad esse. Omnis autem mutatio et motus subjectum aliquod habet: est enim motus actus existentis in potentia; subjectum autem mutationis per quam aliqua res in esse producitur, non est ipsa res producta, hoc enim est terminus motus; non est autem idem motus terminus et subjectum; sed subjectum prædictæ mutationis est id quo res producitur, quod materia dicitur. Videtur ergo, si res in esse productæ sint postquam non fuerant, quod oporteat eis materiam præexistisse: quæ si iterum producta est postquam non fuerat, oportet quod habeat aliam materiam præcedentem. Non autem est procedere in infinitum. Relinquitur igitur quod oporteat devenire ad aliquam materiam æternam, quæ non sit producta postquam non fuerat.

Item. Si mundus incepit postquam non fuerat; antequam mundus esset, aut erat possibile mundum esse vel fieri, aut possibile. Si autem non possibile erat esse vel fieri: ergo ab æquipollenti impossibile erat mundum esse vel fieri. Quod autem impossibile est fieri, necesse est non fieri. Necesse est igitur mundum non esse factum. Quod cum manifeste sit falsum, necesse est dicere quod si mundus incepit esse postquam non fuerat, possibile erat antequam esset, ipsum esse vel fieri. Erat igitur aliquid in potentia ad fieri et esse mundi. Quod autem est in potentia ad fieri et esse alienius, est materia ejus, sicut lignum se habet ad scamnum. Sic igitur videtur quod necesse est materiam semper fuisse, etiam si mundus semper non fuit.

Sed cum ostensum sit supra, quod etiam materia non est nisi a Deo; pari ratione fides catholica non confitetur materiam esse æternam, sicut nec mundum æternum. Oportet enim hoc modo exprimi in ipsis rebus causalitatem divinam, ut res ab eo productæ esse inciperent postquam non fuerant. Hoc enim evidenter et manifeste ostendit eas non a se ipsis esse, sed ab æterno auctore. Non autem præmissis rationibus arcta-

mur ad ponendum æternitatem materiæ : non enim universalis rerum productio proprie mutatio dici potest. In nulla enim mutatione subjectum mutationis per mutationem producitur; quia non est idem subjectum mutationis et terminus, ut dictum est. Cum igitur universalis productio rerum a Deo, quæ creatio dicitur, se extendat ad omnia quæ sunt in re, huiusmodi productio rationem mutationis proprie habere non potest, etiam si res creatæ producantur in esse postquam non fuerant. Esse enim post non esse sufficit ad veram rationem mutationis, nisi supponatur quod subjectum nunc sit sub privatione, et nunc sub forma : unde in quibusdam invenitur hoc post illud, in quibus proprie ratio motus aut mutationis non est, sicut cum dicitur quod ex die fit nox. Sic igitur etsi mundus esse inceperit postquam non fuerat, non oportet quod hoc per aliquam mutationem sit factum, sed per creationem, quæ vere mutatio non est, sed quædam relatio rei creatæ, a creatore secundum suum esse dependentis, cum ordine ad non esse præcedens. In omni enim mutatione oportet esse aliquid idem, aliter et aliter se habens; utpote quod nunc sit sub uno extremo, et postmodum sub alio : quod quidem in creatione secundum rei veritatem non invenitur, sed solum secundum imaginationem; prout imaginamur unam et eandem rem prius non fuisse, et postmodum esse : et sic secundum quamdam similitudinem creatio mutatio dici potest.

Similiter etiam secunda objectio non cogit. Licet enim verum sit dicere quod antequam mundus esset, possibile erat mundum esse vel fieri; non tamen oportet hoc secundum aliquam potentiam dici. Dicitur enim possibile in enuntiabilibus quod significat aliquem modum veritatis : quod scilicet neque est necessarium neque impossibile : unde huiusmodi possibile non secundum aliquam potentiam dicitur, ut Philosophus docet in VII *Metaphysic*. Si autem secundum aliquam potentiam dicitur possibile mundum esse, non est necessarium quod dicatur secundum potentiam passivam, sed secundum potentiam activam : ut quod dicitur quod mundum possibile fuit esse antequam esset, sic intelligatur quod Deus potuit

mundum in esse producere antequam produceret : unde non cogimur ponere materiam præexistisse mundo. Sic ergo fides catholica nihil Deo coæternum ponit, et propter hoc « creatorem et factorem omnium visibilium et invisibilium » confitetur.

### CAPUT XCIX.

*Quod Deus produxit res in esse propter finem* <sup>1</sup>.

Quoniam autem supra ostensum est quod Deus res in esse produxit non per necessitatem naturæ, sed per intellectum et voluntatem; omne autem tale agens agit propter finem, operativi enim intellectus finis principium est : necesse est igitur omnia quæ a Deo sunt facta, propter finem esse.

Adhuc. Productio rerum a Deo optime facta est : optimi enim est optime facere unumquodque. Melius est autem fieri aliquid propter finem quam absque finis intentione : ex fine enim est ratio boni in his quæ fiunt. Sunt igitur res a Deo factæ propter finem.

Hujus etiam signum apparet in his quæ a natura aguntur, quorum nihil in vanum est, sed propter finem unumquodque. Inconveniens autem dicere est magis ordinata esse quæ fiunt a natura quam ipsa institutio naturæ a primo agente; cum totus ordo naturæ exinde derivetur. Manifestum est igitur res a Deo productas esse propter finem.

### CAPUT C.

*Quod ultimus finis omnium est divina bonitas.*

Oportet autem ultimum finem rerum divinam bonitatem esse. Rerum enim factarum ab aliquo agente per voluntatem, ultimus finis est quod est primo et per se volitum ab agente; et propter hoc agit agens omne quod agit. Primum autem volitum divinæ voluntatis est ejus bonitas, ut ex superioribus patet. Necesse est igitur omnium rerum factarum a Deo ultimum finem divinam bonitatem esse.

<sup>1</sup> Parm. : « operatur omnia. »

Item. Finis generationis uniuscujusque rei generatæ est forma ejusdem; hac enim adepta generatio quiescit: unumquodque enim generatum, sive per artem sive per naturam, secundum suam formam similatur aliquo modo agenti; nam omne agens agit aliquid sibi simile: domus enim quæ est in materia, procedit a domo quæ est in mente artificis: in naturalibus etiam homo generat hominem; et si aliquid sit genitum vel factum secundum naturam, quod non sit simile generanti secundum speciem, similatur tamen suis agentibus sicut imperfectum perfecto. Ex hoc enim contingit quod generatum generanti secundum speciem non similatur, quia ad ejus perfectam similitudinem non possit pervenire, sed aliquid eam imperfecte participat; sicut animalia et plantæ quæ generantur ex virtute solis. Omnium igitur quæ fiunt, finis generationis sive perfectionis est forma facientis vel generantis, ut scilicet ad ejus similitudinem perveniatur. Forma autem primi agentis, scilicet Dei, non est aliud quam ejus bonitas. Propter hoc igitur omnia facta sunt ut divinæ bonitati assimilentur.

## CAPUT CI.

*Quod divina assimilatio est causa diversitatis in rebus.*

Ex hoc igitur accipienda est ratio diversitatis et distinctionis in rebus. Quia enim divinam bonitatem perfecte repræsentari impossibile fuit propter distantiam uniuscujusque creaturæ a Deo, necessarium fuit ut repræsentaretur per multa, ut quod deest ex uno, suppleretur ex alio. Nam et in conclusionibus syllogisticis quando per unum medium non sufficienter demonstratur conclusio, oportet media multiplicari ad conclusionis manifestationem, ut in syllogismis dialecticis accidit. Nec tota tamen universitas creaturarum perfecte divinam bonitatem repræsentat per æquiparantiam, sed secundum perfectionem, creaturæ possibilem.

Item. Illud quod inest causæ universali simpliciter et unite, invenitur in effectibus multipliciter et distincte: nobilior

est enim aliquid in causa quam in effectibus. Divina autem bonitas una et simplex principium est et radix totius bonitatis quæ in creaturis invenitur. Necessesse est igitur sic creaturas divinæ bonitati assimilari sicut multa et indistincta assimilantur uni et simplici. Sic igitur multitudo et distinctio provenit in rebus non casualiter aut fortuito, sicut nec rerum productio est a casu vel a fortuna, sed propter finem. Ex eodem enim principio est esse et unitas et multitudo in rebus. Neque enim distinctio rerum causatur ex materia: nam prima rerum institutio est per creationem, quæ materiam non requirit. Similiter quæ solum ex necessitate materiæ proveniunt, casualia esse videntur. Similiter autem neque multitudo in rebus causatur propter ordinem mediorum agentium, puta quod ab uno primo simplici procedere immediate non potuerit nisi unum, distans tamen a primo in simplicitate, ita quod ex eo jam procedere potuerit multitudo, et sic deinceps quanto magis a primo simplici receditur, tanto numerosior multitudo invenitur, ut aliqui posuerunt. Jam enim ostensum est, quod plura sunt, quæ in esse prodire non potuerunt nisi per creationem, quæ solius Dei est, ut supra ostensum est. Unde relinquatur quod ab ipso Deo sunt plura immediate creata. Manifestum est etiam quod secundum hanc positionem, rerum multitudo et distinctio casualis esset, quasi non intenta a primo agente. Est enim multitudo rerum et distinctio ab intellectu divino excogitata et instituta in rebus ad hoc quod diversimode divina bonitas a rebus creatis repræsentetur, et eam secundum diversos gradus diversa participarent, ut sic ex ipso diversarum rerum ordine quædam pulchritudo resultet in rebus, quæ divinam sapientiam commendaret.

## CAPUT CII

*Quod omnis actus et motus cujuslibet creaturæ in divinam bonitatem redit sicut in finem<sup>1</sup>.*

Non solum autem institutionis rerum finis est divina bonitas, sed etiam omnis operationis et motus creaturæ cujuslibet

<sup>1</sup> Parm.: « Quod non solum divina bonitas est causa rerum, sed etiam omnis motus et opera-

tionis. »



necesse est divinam bonitatem finem esse. Unumquodque enim quale est talia agit, sicut calidum calefacit. Quælibet autem res creata secundum suam formam similitudinem quamdam participat divinæ bonitatis, ut ostensum est. Ergo et omnis actio et motus creaturæ ejuslibet in divinam bonitatem ordinatur sicut in finem.

Præterea. Omnis motus et operatio rei ejuslibet in aliquid perfectum tendere videtur. Perfectum autem habet rationem boni : perfectio enim ejuslibet rei est bonitas ejus. Omnis igitur motus et actio rei ejuslibet ad bonum tendit. Bonum autem quodlibet est similitudo quædam summi boni, sicut et ens quodlibet est similitudo primi entis. Igitur motus et actio ejuslibet rei tendit in assimilationem bonitatis divinæ.

Præterea. Si sint multa agentia ordinem habentia, necesse est quod omnium agentium actiones et motus ordinentur in bonum primi agentis sicut in finem ultimum. Cum enim a superiori agente inferiora agentia moveantur, et omne movens moveat ad finem proprium; oportet quod actiones et motus inferiorum agentium tendant in finem primi agentis; sicut in exercitu omnium ordinum actiones ordinantur sicut in ultimum ad victoriam, quæ est finis ducis. Ostensum autem est supra, quod primum movens et agens est Deus; finis autem ejus non est aliud quam sua bonitas, ut etiam supra ostensum est. Necesse est igitur quod omnes actiones et motus quicumque creaturarum sint propter divinam bonitatem, non quidem causandam, neque augendam<sup>1</sup>, sed suo modo acquirendam, participando siquidem<sup>2</sup> aliquam similitudinem ejus.

### CAPUT CIII.

*Quod diversimode creaturæ tendunt in similitudinem divinæ bonitatis.*

Divinæ<sup>3</sup> autem bonitatis similitudinem res creatæ per suas operationes diversimode consequuntur, sicut et diversimode secundum suum esse ipsam repræsentant : unumquodque enim operatur se-

cundum quod est. Quia igitur omnibus creaturis commune est ut divinam bonitatem repræsentent in quantum sunt; ita omnibus commune est ut per operationes suas consequantur divinam similitudinem in conservatione sui esse et communicatione sui esse ad alterum. Unaquæque enim creatura in sua operatione primo quidem se in esse perfecto, secundum quod est possibile, conservare nititur, in quo suo modo tendit in similitudinem divinæ perpetuitatis; secundo vero per suam operationem unaquæque creatura suum esse perfectum alteri communicare conatur secundum suum modum; et per hoc tendit in similitudinem divinæ causalitatis. Sed creatura rationalis per suam operationem tendit in divinam similitudinem singulari quodam modo præ ceteris, sicut et præ ceteris creaturis nobiliter esse habet : esse enim creaturarum ceterarum, cum sit per materiam constrictum, est finitum, ut infinitatem non habeat nec actu, nec potentia. Omnis vero natura rationalis infinitatem habet vel actu vel potentia, secundum quod intellectus continet in se intelligibilia. In nobis igitur intellectualis natura in suo primo esse considerata est in potentia ad sua intelligibilia, quæ cum sint infinita, infinitatem quamdam habent in potentia. Unde intellectus est species specierum; quia non habet tantum speciem determinatam ad unum, ut lapis; sed speciem omnium specierum capacem. Natura vero intellectualis in Deo infinita est in actu, utpote in se præhabens totius entis perfectionem, ut supra ostensum est. Creaturæ vero aliæ intellectuales medio modo se habent inter potentiam et actum. Tendit igitur intellectualis creatura per suam operationem in divinam similitudinem, non in hoc solum quod se in esse conservet, vel suum esse quodammodo communicando multiplicet; sed ut in se habeat actu quod per naturam in potentia habet. Est igitur finis intellectualis creaturæ, quem per suam operationem consequitur, ut intellectus ejus totaliter efficiatur in actu secundum omnia intelligibilia quæ in potentia habet : secundum in hoc enim maxime Deo similis erit.

<sup>1</sup> Al. : « agendam. »

<sup>2</sup> An. : « scilicet. »

<sup>3</sup> Hic in Cod. S. Gen. incipit cap. CIV.

## CAPUT CIV.

*De duplici potentia, cui in rebus respondet duplex intellectus : et quis sit finis intellectualis creaturæ.*

Est autem aliquid in potentia dupliciter : uno modo naturaliter, respectu eorum scilicet quæ per agens naturale possunt reduci in actum ; alio modo respectu eorum quæ reduci non possunt in actum per agens naturale, sed per aliquod aliud agens ; quod quidem in rebus corporalibus apparet. Quod enim ex puero fiat vir, est in potentia naturali, vel quod ex semine fiat animal ; sed quod ex ligno fiat scamnum, vel ex cæco fiat videns, non est in potentia naturali. Sic autem et circa intellectum nostrum accidit. Est enim intellectus noster in potentia naturali respectu quorundam intelligibilium, quæ scilicet reduci possunt in actum per intellectum agentem, qui est principium innatum nobis, ut per ipsum efficiamur intelligentes in actu. Est autem impossibile nos ultimum finem consequi per hoc quod intellectus noster sic reducatur in actum : nam virtus intellectus agentis est, ut phantasmata, quæ sunt intelligibilia in potentia, faciat intelligibilia in actu, ut ex superioribus patet. Phantasmata autem sunt accepta per sensum. Per intellectum igitur agentem intellectus noster in actum reducitur respectu horum intelligibilium tantum in quorum notitiam per sensibilia possumus devenire. Impossibile est autem in tali cognitione ultimum hominis finem consistere. Nam ultimo fine adepto, desiderium naturale quiescit. Quantumcumque autem aliquis proficiat intelligendo secundum prædictum modum cognitionis quo a sensu scientiam percipimus, adhuc remanet naturale desiderium ad alia cognoscenda ; multa enim sunt ad quæ sensus pertinere non potest, de quibus per sensibilia non nisi modicam notitiam accipere possumus, ut forte sciamus de eis quod sint, non autem quid sint, eo quod substantiarum immaterialium quidditates alterius generis sunt a quidditatibus rerum sensibilium, et eas quasi improporcionabiliter transcendent. Circa ea

etiam quæ sub sensum cadunt, multa sunt quorum rationem cognoscere per certitudinem non possumus : sed quorundam quidem nullo, quorundam vero debiliter. Unde semper remanet naturale desiderium respectu perfectioris cognitionis. Impossibile est autem naturale desiderium esse vanum. Consequimur igitur ultimum finem in hoc quod intellectus noster fiat in actu, aliquo sublimiori agente quam sit agens nobis con-naturale, quod quiescere faciat desiderium quod nobis inest naturaliter ad sciendum. Tale est autem in nobis sciendi desiderium, ut cognoscentes effectum, desideremus cognoscere causam ; et in quacumque re cognitis quibuscumque ejus circumstantiis, non quiescit nostrum desiderium, quousque ejus essentiam cognoscamus. Non igitur naturale desiderium sciendi potest quietari in nobis, quousque primam causam cognoscamus, non quocumque modo, sed per ejus essentiam. Prima autem causa Deus est, ut ex superioribus patet. Est igitur finis ultimus intellectualis creaturæ, Deum per essentiam videre.

## CAPUT CV.

*Quomodo intellectus creatus divinam essentiam videre possit<sup>1</sup>.*

Hoc autem quomodo possibile sit, considerandum est. Manifestum est autem quod eum intellectus noster nihil cognoscat nisi per aliquam speciem ejus, impossibile est quod per speciem rei unius cognoscat essentiam alterius ; et quanto magis species per quam cognoscit intellectus, plus distat a re cognita, tanto intellectus noster imperfectiorem cognitionem habet de essentia rei illius ; ut puta, si cognosceret bovem per speciem asini, cognosceret ejus essentiam imperfecte, scilicet quantum ad genus tantum ; magis autem imperfecte si cognosceret per lapidem, quia cognosceret per genus magis remotum ; si autem cognosceret per speciem alicujus rei quæ nulli bovi communicaret in genere, nullo modo essentiam bovis cognosceret. Manifestum est autem ex superioribus, quod nullum creatum communicat cum Deo in genere.

<sup>1</sup> Parm. : « Quomodo finis ultimus intellectualis creaturæ est Deum per essentiam videre, et

quomodo hoc possit. »



Per quamcumque igitur speciem creatam non solum sensibilem, sed intelligibilem, Deus cognosci per essentiam non potest. Ad hoc igitur quod ipse Deus per essentiam cognoscatur, oportet quod ipse Deus fiat forma intellectus ipsum cognoscentis, et jungatur ei non ad unam naturam constituendam, sed sicut species intelligibilis intelligenti. Ipse enim sicut est suum esse, ita est sua veritas, quæ est forma intellectus. Necessè est autem quod omne quod consequitur aliquam formam, consequatur dispositionem aliquam ad formam illam. Intellectus autem noster non est ex ipsa sua natura in ultima dispositione existens respectu formæ illius quæ est veritas, quia sic a principio ipsam assequeretur. Oportet igitur quod cum eam consequitur, aliqua dispositione de novo addita elevetur, quam dicimus gloriæ lumen: quo quidem intellectus noster a Deo perficitur, qui solus secundum suam naturam hanc propriam formam habet: sicut nec dispositio caloris ad formam ignis potest esse nisi ab igne: et de hoc lumine in Psalm. lx, 10, dicitur: *In lumine tuo videbimus lumen.*

#### CAPUT CVI.

*Quomodo naturale desiderium quiescit ex divina visione per essentiam in qua beatitudo consistit.*

Hoc autem fine adepto, necesse est naturale desiderium quietari: quia essentia divina, quæ modo prædicto conjungetur intellectui Deum videntis, est sufficiens principium omnia cognoscendi, et fons totius bonitatis, ut nihil restare possit ad desiderandum. Et hic etiam est perfectissimus modus divinam similitudinem consequendi, ut scilicet ipsum cognoscamus eo modo quo se ipse cognoscit, scilicet per essentiam suam; licet non comprehendamus ipsum sicut ipse se comprehendit: non quod aliquam partem ejus ignoremus, cum partem non habeat; sed quia non ita perfecte ipsum cognoscimus sicut cognoscibilis est; cum virtus intellectus nostri in intelligendo non possit adequari veritati ipsius secundum quam cognoscibilis est, cum ejus claritas seu veritas sit infinita, intellectus au-

tem noster finitus. Intellectus autem ejus infinitus est, sicut et veritas ejus: et ideo ipse tantum se cognoscit quantum cognoscibilis est. Sicut conclusionem demonstrabilem ille comprehendit qui eam per demonstrationem cognoscit, non autem qui cognoscit eam imperfectiori modo, scilicet per rationem probabilem. Et quia ultimum finem hominis dicimus beatitudinem; in hoc consistit hominis felicitas, sive beatitudo, quod Deum videat per essentiam; licet in perfectione beatitudinis multum distet a Deo; cum hanc beatitudinem Deus per suam naturam habeat, homo vero eam consequatur per divini luminis participationem, ut supra dictum est.

#### CAPUT CVII.

*Quod motus in Deum ad beatitudinem consequendam assimilatur motui naturali; et quod beatitudo est in actu intellectus.*

Considerandum est autem, quod cum procedere de potentia in actum vel sit motus, vel sit simile motui; circa processum hujus beatitudinis consequendum similiter se habet sicut in motu vel in mutatione naturali. In motu enim naturali primo quidem consideratur aliqua proprietas per quam proportionatur vel inclinatur mobile ad talem finem, sicut gravitas in terra ad hoc quod feratur deorsum: non enim moveretur aliquid naturaliter ad certum finem, nisi haberet proportionem ad illum. Secundo autem consideratur ipse motus ad finem. Tertio autem ipsa forma vel locus. Quarto autem quies in forma vel in loco. Sic igitur in intellectuali motu ad finem, primum quidem est amor inclinans in finem; secundum autem est desiderium, quod est quasi motus in finem, et operationes ex tali desiderio prevenientes; tertium autem est ipsa forma, quam intellectus consequitur; quartum autem est delectatio consequens, quæ nihil est aliud quam quietatio voluntatis in fine adepto. Sicut igitur<sup>1</sup> naturalis generationis finis est forma, et motus localis locus, non autem quies in forma vel loco; sed hoc est consequens finem; et multo minus motus est finis, vel proportio ad finem: ita ul-

<sup>1</sup> Al.: « sic igitur. »

timus finis creaturæ intellectualis est videre Deum, non autem delectari in ipso ; sed hoc est comitans finem, et quasi perficiens ipsum ; et multo minus desiderium vel amor possunt esse ultimus finis <sup>1</sup>, cum hoc et hoc ante finem habeantur.

## CAPUT CVIII.

*De errore ponentium felicitatem in creaturis.*

Manifestum est ergo quod felicitas falso a quibusdam quæritur, in quibuscumque præter Deum quæritur, sive in voluptatibus corporalibus, quæ sunt et brutis communes ; sive in divitiis, quæ ad conservationem habentium proprie ordinantur, quæ est communis finis omnis entis creati ; sive in potestatibus, quæ ordinantur ad communicandam perfectionem suam aliis, quod etiam diximus omnibus esse commune ; sive in honoribus vel fama, quæ alicui debentur secundum quod finem jam habet, vel ad finem bene dispositus est ; sed nec in cognitione quæcumque rerum etiam supra hominem existentium ; cum in sola divina cognitione desiderium hominis quietetur.

## CAPUT CIX.

*Quod solus Deus est bonus per essentiam, creaturæ vero per participationem.*

Ex præmissis igitur apparet quod diversimode se habent ad bonitatem Deus et creaturæ, secundum duplicem modum bonitatis quæ in creaturis potest considerari. Cum enim bonum habeat rationem perfectionis et finis, secundum duplicem perfectionem et finem creaturæ attenditur duplex ejus bonitas. Attenditur enim quædam creaturæ perfectio secundum quod in sua natura persistit ; et hæc est finis generationis aut factionis ipsius. Alia vero perfectio ipsius attenditur, quam consequitur per suum motum vel operationem ; et hæc est finis motus vel operationis ipsius. Secundum utramque vero creatura deficit a bonitate divina : nam cum forma et esse rei sit bonum et perfectio ipsius secundum quod in sua

natura consideratur, substantia composita neque est sua forma neque suum esse ; substantia vero simplex creata etsi sit ipsa forma, non tamen est suum esse. Deus vero est sua essentia et suum esse, ut supra ostensum est. Similiter etiam omnes creaturæ consequuntur perfectam bonitatem ex fine extrinseco. Perfectio enim bonitatis consistit in adeptione finis ultimi. Finis autem ultimus cujuslibet creaturæ est extra ipsam, qui est divina bonitas, quæ quidem non ordinatur ad ulteriorem finem. Relinquitur igitur quod Deus modis omnibus est sua bonitas, et est essentialiter bonus ; non autem creaturæ simplices, tum <sup>2</sup> quia non sunt suum esse, tum quia ordinantur ad aliquid extrinsecum sicut ad ultimum finem. In substantiis vero compositis manifestum est quod nullo modo sunt sua bonitas. Solus igitur Deus est sua bonitas et essentialiter bonus ; alia vero dicuntur bona secundum participationem aliquam ipsius.

## CAPUT CX.

*Quod Deus non potest suam bonitatem amittere.*

Per hoc autem apparet quod Deus nullo modo potest deficere a bonitate. Quod enim alicui essentialiter inest, non potest ei abesse ; sicut animal non potest ab homine removeri. Neque igitur Deum possibile est non esse bonum. Et ut magis proprio utamur exemplo ; sicut non potest esse quod homo non sit homo, ita non potest esse quod Deus non sit perfecte bonus.

## CAPUT CXI.

*Quod creatura possit deficere a sua bonitate.*

In creaturis autem considerandum est, qualiter possit esse bonitatis defectus. Manifestum est autem quod duobus modis aliqua bonitas inseparabiliter iust creaturæ : uno modo ex hoc quod ipsa bonitas est de essentia ejus ; alio modo ex hoc quod est determinata ad unum. Primo ergo modo in substantiis simplicibus ipsa bonitas, quæ est forma, insepa-

<sup>1</sup> Parm. : « cum etiam hoc... habeatur. »

<sup>2</sup> Al. deest. : « tum. »

rabiliter se habet ad ipsas, cum ipsæ essentialiter sint formæ. Secundo autem modo bonum quod est esse, amittere non possunt. Non enim forma est sicut materia, quæ se habet ad esse et non esse; sed forma consequitur esse, etsi etiam non sit ipsum esse. Unde patet quod substantiæ simplices bonum naturæ in qua subsistunt amittere non possunt, sed immutabiliter se habent in illo. Substantiæ vero compositæ, quia non sunt suæ formæ nec suum esse, bonum naturæ amissibiliter habent, nisi in illis in quibus potentia materiæ non se habet ad diversas formas, neque ad esse et non esse, sicut in corporibus cœlestibus patet.

## CAPUT CXII.

*Quomodo deficiunt a bonitate secundum suas operationes.*

Et quia bonitas creaturæ non solum consideratur secundum quod in sua natura subsistit, sed perfectio bonitatis ipsius est in hoc quod ordinatur ad finem; ad finem autem ordinatur per suam operationem: restat considerare quomodo creaturæ deficiant a sua bonitate secundum suas operationes, quibus ordinantur ad finem. Ubi primo considerandum est, quod de operationibus naturalibus idem est iudicium sicut et de natura, quæ est earum principium: unde quorum natura defectum pati non potest, nec in operationibus eorum naturalibus defectus accidere potest; quorum autem natura defectum pati potest, etiam operationes eorum deficere contingit. Unde in substantiis incorruptilibus, sive incorporeis sive corporeis, nullus defectus naturalis actionis contingere potest: in Angelis enim semper virtus naturalis manet potens ad suas operationes exercendas: similiter motus corporum cœlestium nunquam exorbitare invenitur. In corporibus vero inferioribus multi defectus naturalium actionum contingunt propter corruptiones et defectus in naturis eorum accidentes. Ex defectu enim alienius naturalis principii contingit plantarum sterilitas, monstruositas in generatione animalium, et aliæ hujusmodi inordinationes.

## CAPUT CXIII.

*De duplici principio actionis, et quomodo aut in quibus potest defectus esse.*

Sunt autem quædam actiones quarum principium non est natura, sed voluntas; ejus objectum est bonum, et finis quidem principaliter, secundo autem quod est ad finem. Sic igitur se habet operatio voluntaria ad bonum, sicut se habet naturalis operatio ad formam per quam res agit. Sicut igitur defectus naturalium actionum accidere non potest in illis quæ non patiuntur defectum secundum suas formas, sed solum in corruptilibus, quorum formæ deficere possunt; ita voluntariæ actiones deficere possunt in illis in quibus voluntas potest a fine deficere. Sicubi autem non potest voluntas a fine deficere, manifestum est quod ibi defectus voluntariæ actionis esse non potest. Voluntas autem deficere non potest respectu boni quod est ipsius volentis natura: quælibet enim res suo modo appetit suum esse perfectum, quod est bonum uniuscujusque: respectu boni vero exterioris deficere potest bono sibi connaturali contenta. Cujus igitur volentis natura est ultimus finis voluntatis ipsius, in hoc defectus voluntariæ actionis contingere non potest: hoc autem solius Dei est: nam ejus bonitas, quæ est ultimus finis rerum, est sua natura. Aliorum autem volentium natura non est ultimus finis voluntatis eorum: unde potest in eis defectus voluntariæ actionis contingere per hoc quod voluntas remanet fixa in proprio bono non tendendo ulterius in summum bonum, quod est ultimus finis. In omnibus igitur substantiis intellectualibus creatis potest defectus voluntariæ actionis contingere.

## CAPUT CXIV.

*Quid nomine boni vel mali intelligatur in rebus.*

Est igitur hic considerandum: quod sicut nomine boni intelligitur esse perfectum, ita nomine mali nihil aliud intelligitur quam privatio esse perfecti. Quia

vero privatio proprie accepta, est ejus quod natum est, et quando natum est, et quomodo natum est haberi; manifestum est quod ex hoc aliquid dicitur malum quod caret perfectione quam debet habere: unde homo si visu careat, malum est ei, non autem malum est lapidi, quia non est natus visum habere.

## CAPUT CXV.

*Quod impossibile est esse aliquam naturam malum.*

Impossibile est autem malum esse aliquam naturam. Nam omnis natura vel est actus, vel potentia, aut compositum ex utroque. Quod autem est actus, perfectio est, et boni obtinet rationem; cum id quod est in potentia, appetat naturaliter esse actu: bonum vero est quod omnia appetunt. Unde et compositum ex actu et potentia, inquantum participat bonitatem; potentia autem inquantum ordinatur ad actum, bonitatem habet: cujus signum est quod quanto potentia est capacior actus et perfectionis, tanto magis commendatur. Relinquitur igitur quod nulla natura secundum se sit malum.

Item. Unumquodque secundum hoc completur quod fit in actu, nam actus est perfectio rei. Nullum autem oppositorum completur per admixtionem alterius, sed magis destruitur vel minuitur; et sic neque malum completur per participationem boni. Omnis autem natura completur per hoc quod habet esse in actu: et sic cum esse bonum sit ab omnibus appetibile, omnis natura completur per participationem boni. Nulla igitur natura est malum.

Adhuc. Quælibet natura appetit conservationem sui esse, et fugit destructionem quantum potest. Cum igitur bonum sit quod omnia appetunt, malum vero e contrario quod omnia fugiunt; necesse est dicere, quod esse unamquamque naturam sit bonum secundum se, non esse vero malum. Esse autem malum non est bonum; sed magis non esse malum sub boni comprehenditur ratione. Nulla igitur natura est malum.

## CAPUT CXVI.

*Qualiter bonum et malum sunt differentie entis, et contraria, et genera contrariorum.*

Considerandum igitur restat quomodo bonum et malum dicantur contraria, et contrariorum genera, et differentie aliquas species, scilicet habitus morales, constituentes. Contrariorum enim utrumque est aliqua natura. Non ens enim non potest esse neque genus neque differentia, cum genus prædicetur de re in eo « quod quid, » differentia vero in eo « quod quale quid. »

Sciendum est igitur, quod sicut naturalia consequuntur speciem a forma, ita moralia a fine, qui est voluntatis objectum, a quo omnia moralia dependent. Sicut autem in naturalibus uni formæ adjungitur privatio alterius, puta formæ ignis privatio formæ aeris; ita in moralibus uni fini adjungitur privatio finis alterius. Cum igitur privatio perfectionis debitæ sit malum in naturalibus; formam accipere cui adjungitur privatio formæ debitæ, malum est, non propter formam, sed propter privationem ei adjunctam; sicut igniri malum est ligno: et in moralibus etiam inhærere fini cui adjungitur privatio finis debiti, malum est, non propter finem, sed propter privationem adjunctam; et sic duæ actiones morales, quæ ad contrarios fines ordinantur, secundum bonum et malum differunt; et per consequens contrarii habitus differunt bono et malo quasi differentiis existentibus, et contrarietatem ad invicem habentibus, non propter privationem ex qua dicitur malum, sed propter finem cui privatio adjungitur.

Per hunc etiam modum quidam intelligunt ab Aristotele dictum, quod bonum et malum sunt genera contrariorum, scilicet moralium. Sed si recte attendatur, bonum et malum in genere moralium magis sunt differentie quam species. Unde melius videtur dicendum, quod bonum et malum dicantur genera secundum positionem Pythagoræ, qui omnia reduxit ad bonum et malum sicut ad prima genera: quæ quidem positio habet aliquid veritatis, inquantum omnium contrariorum unum est perfectum, et alterum diminutum; ut patet in albo et ni-

gro, dulci et amaro, et sic de aliis. Semper autem quod perfectum est, pertinet ad rationem boni; quod autem diminutum ad rationem mali.

#### CAPUT CXVII.

*Quod nihil potest esse essentialiter malum, vel summe; sed est corruptio alicujus boni.*

Habito igitur quod malum est privatio perfectionis debitæ, jam manifestum est qualiter malum bonum corrumpit, in quantum scilicet est ejus privatio; sicut et cæcitas dicitur corrumpere visum, quia est ipsa visus privatio, nec tamen totum bonum corrumpit: quia supra dictum est quod non solum forma est bonum, sed etiam potentia ad formam; quæ quidem potentia est subjectum privationis, sicut et formæ. Unde oportet quod subjectum mali sit bonum, non quidem quod est oppositum malo, sed quod est potentia ad ipsum. Ex quo etiam patet quod non quodlibet bonum potest esse subjectum mali, sed solum bonum quod est in potentia respectu alicujus perfectionis qua potest privari: unde in his quæ solum actus sunt, vel in quibus a potentia separari non potest, quantum ad hoc non potest esse malum.

Patet etiam ex hoc, quod non potest esse aliquid quod sit essentialiter malum, cum semper oporteat malum in alio subjecto bono fundari; ac per hæc nihil potest esse summe malum, sicut est summe bonum, quod est essentialiter bonum.

Secundum idem etiam patet quod malum non potest esse desideratum, nec aliquid agere nisi virtute boni adjuncti. Desiderabile enim est perfectio et finis; principium autem actionis est forma. Quia vero uni perfectioni vel formæ adjungitur privatio alterius perfectionis aut formæ, contingit per accidens quod privatio seu malum desideratur, et est alicujus actionis principium, non in quantum est malum, sed propter bonum adjunctum; sicut musicus ædificat non in quantum musicus, sed in quantum domificator.

Ex quo etiam patet quod impossibile est malum esse primum principium, eo quod principium per accidens est posterius eo quod est per se.

#### CAPUT CXVIII.

*Quod malum fundatur in bono sicut in subjecto.*

Si quis autem contra prædicta objicere velit, quod bonum non potest esse subjectum mali, et quod unum oppositorum non sit subjectum alterius, nec unquam in aliis oppositis invenitur quod sint simul; considerare debet, quod alia opposita sunt alicujus generis determinati, bonum autem et malum communia. Nam omne ens, in quantum hujusmodi, bonum est; omnis autem privatio, in quantum talis, est mala. Unde sicut subjectum privationis oportet esse ens, ita et bonum; non autem subjectum privationis oportet esse album, aut dulce, aut videns, quia hæc non dicuntur de ente in quantum hujusmodi; et ideo nigrum non est in albo, nec cæcitas in vidente, sed malum est in bono, sicut et cæcitas est in subjecto visus; sed quod subjectum visus non dicitur videns, hoc est quia videns non est commune omni enti.

#### CAPUT CXIX.

*De duplici genere mali.*

Quia igitur malum est privatio et defectus; defectus autem, ut ex dictis patet, potest contingere in re aliqua non solum secundum quod in natura sua consideratur, sed etiam secundum quod per actionem ordinatur ad finem: consequens est ut malum utroque modo dicatur; scilicet secundum defectum in ipsa re, prout cæcitas est quoddam malum animalis; et secundum defectum in actione prout claudicatio significat actionem cum defectu. Malum igitur actionis ad aliquem finem ordinatæ, ad quem non debito modo se habet, peccatum dicitur tam in voluntariis quam in naturalibus. Peccat enim medicus in actione sua, dum non operatur convenientes ad sanitatem; et natura etiam peccat in sua operatione, dum ad debitam dispositionem et formam rem generatam non perducit, sicut cum accidunt monstra in natura.



## CAPUT CXX.

*De triplici genere actionis, et de malo culpæ.*

Et sciendum quod aliquando est actio in potestate agentis, ut sunt omnes voluntariæ actiones. (Voluntariam autem actionem dico, cujus principium est in agente sciente ea in quibus actio consistit.) Aliquando vero actiones non sunt voluntariæ: cujusmodi sunt actiones violentæ, quarum principium est extra; et actiones naturales, vel quæ per ignorantiam aguntur, quia non procedunt a principio cognitivo. Si igitur in actionibus non voluntariis ordinatis ad finem defectus accidat, peccatum tantum dicitur; si autem in voluntariis, dicitur non solum peccatum, sed culpa: eo quod agens voluntarium, cum sit dominus suæ actionis, vituperio dignus est et pœna. Si vero actiones sunt mixtæ, habentes scilicet aliquid de voluntario et aliquid de involuntario, tanto ibi minoratur culpa, quanto plus de involuntario admiscetur. Quia vero naturalis actio naturam rei consequitur, manifestum est quod in rebus incorruptibilibus, quarum natura transmutari non potest, naturalis actionis peccatum accidere non potest. Voluntas autem intellectualis creaturæ defectum pati potest in voluntaria actione, ut supra ostensum est. Unde relinquitur quod licet carere malo naturæ omnibus incorruptibilibus sit commune, carere tamen ex necessitate suæ naturæ malo culpæ, cujus sola rationalis natura est capax, solius Dei proprium invenitur.

## CAPUT CXXI.

*Quod aliquod malum habet rationem pœnæ, et non culpæ.*

Sicut autem defectus actionis voluntariæ constituit rationem peccati et culpæ, ita defectus cujuslibet boni pro culpa illatus contra voluntatem ejus cui inferitur, pœnæ obtinet rationem. Pœna enim inferitur ut medicina culpæ, et ut ordinativa ejus. Ut medicina quidem, in quantum homo propter pœnam retrahitur a culpa dum ne patiat quod est suæ contrarium voluntati, dimittit agere inordi-

natam actionem, quæ suæ foret placita voluntati. Est etiam ordinativa ipsius, quia per culpam homo transgreditur metas ordinis naturalis, plus suæ voluntati tribuens quam oportet. Unde ad ordinem justitiæ fit reductio per pœnam, per quam subtrahitur aliquid voluntati. Unde patet quod conveniens pœna pro culpa non redditur, nisi plus contrarietur voluntati pœna quam placeat culpa.

## CAPUT CXXII.

*Quod non eodem modo omnis pœna contrariatur voluntati.*

Non eodem autem modo omnis pœna est contra voluntatem. Quædam enim pœna est contra id quod homo actu vult; et hæc pœna maxime sentitur. Quædam vero non contrariatur voluntati in actu, sed in habitu; sicut cum aliquis privatur re aliqua, puta filio, vel possessione, eo ignorante. Unde per hoc non agitur actu aliquid contra ejus voluntatem; esset autem contrarium voluntati, si sciret. Quandoque vero pœna contrariatur voluntati secundum naturam ipsius potentiæ. Voluntas enim naturaliter ordinatur ad bonum. Unde si aliquis privatur virtute, quandoque quidem non est contra actualem voluntatem ejus, quia virtutem forte contemnit, neque contra habitualement, quia forte est dispositus secundum habitum ad volendum contraria virtuti; est tamen contra naturalem rectitudinem voluntatis, qua homo naturaliter appetit virtutem. Ex quo etiam patet quod gradus pœnarum dupliciter mensurari possunt: uno modo secundum quantitatem boni quod per pœnam privatur; alio modo secundum quod magis vel minus est contrarium voluntati; est enim magis contrarium voluntati majori bono privari quam privari minori.

## CAPUT CXXIII.

*Quod omnia reguntur divina providentia.*

Ex prædictis autem manifestum esse potest quod omnia divina providentia gubernantur. Quæcumque enim ordinantur ad finem alicujus agentis, ab illo agente diriguntur in finem; sicut omnes qui sunt in exercitu, ordinantur ad finem

ducis, qui est victoria, et ab eo diriguntur in finem. Supra autem ostensum est quod omnia suis actibus tendunt in finem, divinæ bonitatis. Ab ipso igitur Deo, cuius hic finis proprius est, omnia diriguntur in finem. Hoc autem est providentia alicujus regi et gubernari. Omnia igitur divina providentia reguntur.

Adhuc. Ea quæ deficere possunt, et non semper eodem modo se habent, ordinari inveniuntur ab his quæ semper eodem modo se habent; sicut omnes motus corporum inferiorum, qui defectibiles sunt, ordinem habent secundum invariabilem motum cœlestis, corporis. Omnes vero creaturæ mutabiles et defectibiles sunt: nam in creaturis intellectualibus, quantum ex eorum natura est, defectus voluntariæ actionis inveniri potest; creaturæ vero aliæ motum participant vel secundum generationem et corruptionem, vel secundum locum tantum: solus autem Deus est in quem nullus defectus cadere potest. Relinquitur igitur quod omnia alia ordinantur ab ipso.

Item. Ea quæ sunt per participationem, reducuntur in id quod est per essentiam, sicut in causam: omnia enim ignita suæ ignitionis ignem causam habent aliquo modo. Cum igitur solus Deus per essentiam sit bonus, cetera vero omnia per quamdam participationem complementum obtineant bonitatis, necesse est quod omnia ad complementum bonitatis perducantur a Deo. Hoc autem est regi et gubernari: secundum hoc enim aliqua gubernantur vel reguntur, quod in ordine boni statuuntur. Omnia ergo gubernantur et reguntur a Deo.

#### CAPUT CXXIV.

*Quod Deus per superiores creaturas regit inferiores.*

Secundum hoc autem apparet quod inferiores creaturæ a Deo per superiores reguntur. Secundum hoc enim aliqua creaturæ superiores dicuntur quod in bonitate perfectiores existunt. Ordinem autem boni creaturæ consequuntur a Deo in quantum reguntur ab ipso. Sic igitur superiores creaturæ plus participant de ordine gubernationis divinæ quam inferiores. Quod autem magis participat quamcumque perfectionem, comparatur ad id quod minus ipsam participat, sicut

actus ad potentiam, et agens ad patiens. Superiores igitur creaturæ comparantur ad inferiores in ordine divinæ providentiæ sicut agens ad patiens. Per superiores igitur creaturæ inferiores gubernantur.

Item. Ad divinam bonitatem pertinet quod suam similitudinem communicet creaturis: sic enim propter suam bonitatem Deus omnia dicitur fecisse, ut ex supradictis patet. Ad perfectionem autem divinæ bonitatis pertinet et quod in se bonus sit, et quod alia ad bonitatem reducat. Utrumque igitur creaturæ communicat: et quod in se bona sit, et quod una aliam ad bonum inducat. Sic igitur per quasdam creaturas, alias ad bonum inducit. Has autem oportet esse superiores creaturas: nam quod participat ab aliquo agente similitudinem formæ et actionis, perfectius est eo quod participat similitudinem formæ, et non actionis; sicut luna perfectius recipit lumen a sole, quæ non solum fit lucida, sed etiam illuminat, quam corpora opaca, quæ illuminantur tantum, et non illuminant. Deus igitur per creaturas superiores inferiores gubernat.

Adhuc. Bonum multorum melius est quam bonum unius tantum, et per consequens est magis divinæ bonitatis representativum, quæ est bonum totius universi. Si autem creatura superior, quæ abundantior bonitatem a Deo participat, non cooperaretur ad bonum inferiorum creaturarum, illa abundantia bonitatis esset unius tantum; per hoc autem fit communis multorum quod ad bonum multorum cooperatur. Pertinet igitur hoc ad divinam bonitatem ut Deus per superiores creaturas inferiores regat.

#### CAPUT CXXV.

*Quod inferiores substantiæ intellectuales reguntur per superiores.*

Quia igitur intellectuales creaturæ ceteris creaturis sunt superiores, ut ex præmissis patet, manifestum est quod per creaturas intellectuales omnes aliæ creaturæ gubernantur a Deo. Item, cum inter ipsas creaturas intellectuales quedam aliis sint superiores, per superiores inferiores reguntur a Deo. Unde fit ut homines, qui infimum locum secundum naturæ ordinem in substantiis intellectua-



libus tenent, gubernantur per superiores spiritus, qui ex eo quod divina hominibus nuntiant, Angeli vocantur, idest nuntii. Ipsorum etiam Angelorum inferiores per superiores reguntur, secundum quod in ipsis diversæ hierarchiæ, idest saceri principatus, et in singulis hierarchiis diversi ordines distinguuntur.

## CAPUT CXXVI.

### *De gradu et ordine Angelorum.*

Et quia omnis substantiæ intellectualis operatio, in quantum hujusmodi, ab intellectu procedit, oportet quod secundum diversum intelligentiæ modum diversitas operationis, et prælationis, et ordinis in substantiis intellectualibus inveniatur. Intellectus autem quanto est sublimior seu dignior, tanto magis in altiori et universaliori causa rationes effectuum considerare potest. Superius etiam dictum est quod superior intellectus species intelligibiles universaliores habet. Primus igitur intelligendi modus substantiis intellectualibus conveniens est, ut in ipsa prima causa, scilicet Deo, effectuum rationes participant, et per consequens suorum operum, cum per eas Deus inferiores effectus dispensat: et hoc est proprium primæ hierarchiæ, quæ in tres ordines dividitur secundum tria quæ in qualibet operativa arte considerantur: quorum primum est finis, ex quo rationes operum sumuntur; secundum est rationes operum in mente artificis existentes; tertium est applicationes operum ad effectus. Primi ergo ordinis est in ipso summo bono, prout est ultimus finis, rerum de effectibus edoceri: nude ab ardore amoris « Seraphim » dicuntur, quasi ardentes vel incendentes: amoris enim objectum est bonum. Secundi vero ordinis est effectus Dei in ipsius rationibus intelligibilibus contemplari, prout sunt in Deo: unde « Cherubim » dicuntur a plenitudine scientiæ. Tertii vero ordinis est considerare in ipso Deo, quomodo a creaturis participetur rationibus intelligibilibus ad effectus applicatis: unde ab habendo in se Deum insidentem, « Throni » sunt dicti. Secundus autem intelligendi modus est rationes effectuum prout sunt in causis universalibus considerare; et hoc est proprium secundæ hierarchiæ; quæ etiam in tres ordi-

nes dividitur, secundum tria quæ ad universales causas, et maxime secundum intellectum agentes, pertinent. Quorum primum est præordinare quæ agenda sunt: unde in artificibus supremæ artes præceptivæ sunt, quæ architectonicæ vocantur: et ex hoc primus ordo hierarchiæ hujus dicuntur « Dominationes: » domini enim est præcipere et præordinare. Secundum vero quod in causis universalibus invenitur, est aliquid primo movens ad opus quasi principatum executionis habens; et ex hoc secundus ordo hujus hierarchiæ « Principatus » vocatur, secundum Gregorium, vel « Virtutes » secundum Dionysium, ut virtutes intelligantur ex eo quod primo operari maxime est virtuosum. Tertium autem quod in causis universalibus invenitur, est aliquid impedita executionis removens: unde tertius ordo hujus hierarchiæ est « Potestatum, » quarum officium est omne quod possit obviare executioni divini imperii, coercere; unde et dæmones arcere dicuntur. Tertius vero modus intelligendi est rationes effectuum in ipsis effectibus considerare; et hoc est proprium tertiæ hierarchiæ, quæ immediate nobis præficitur, qui ex effectibus cognitionem de ipsis effectibus accipimus: et hæc etiam tres ordines habet. Quorum infimus « Angeli » dicuntur, ex eo quod hominibus nuntiant ea quæ ad eorum gubernationem pertinent; unde et hominum custodes dicuntur. Supra hunc autem est ordo « Archangelorum, » per quem hominibus ea quæ sunt supra rationem, nuntiantur, sicut mysteria fidei. Supremus autem hujus hierarchiæ ordo secundum Gregorium « Virtutes » dicuntur, ex eo quod ea quæ sunt supra naturam, operantur, in argumentum eorum quæ nobis supra rationem nuntiantur; nude ad virtutes pertinere dicitur miracula facere. Secundum Dionysium vero supremus ordo hujus hierarchiæ, « Principatus » dicitur, ut Principes intelligamus qui singulis gentibus præsent, Angelos qui singulis hominibus, Archangelos qui singularibus hominibus ea quæ sunt ad communem salutem pertinentia denuntiant. Et quia inferior potentia in virtute superioris agit, inferior ordo ea quæ sunt superioris, exerceat, in quantum agit ejus virtute; superiores vero ea quæ sunt inferiorum propria, excellentius habent. Unde omnia sunt in eis quodammodo communia: tamen propria nomina

sortiuntur ex his quæ unicuique secundum se conveniunt. Infimus autem ordo commune nomen sibi retinuit quasi in virtute omnium agens. Et quia superioris est in inferiorem agere; actio vero intellectualis est instruere vel docere; superiores Angeli, in quantum inferiores instruunt, dicuntur eos purgare, illuminare, et perficere. Purgare quidem, in quantum nescientiam remonent; illuminare vero, in quantum suo lumine inferiorum intellectus confortant ad aliquid altius capiendum; perficere vero, in quantum eos ad superioris scientiæ perfectionem perducunt. Nam hæc tria ad assumptionem scientiæ pertinent, ut Dionysius dicit. Nec tamen per hoc removetur quin omnes Angeli, etiam infimi, divinam essentiam videant. Licet enim unusquisque beatorum spirituum Deum per essentiam videat, unus tamen alio perfectius eum videt; ut ex superioribus potest patere. Quanto autem aliqua causa perfectius cognoscitur, tanto plures effectus ejus cognoscuntur in ea. De effectibus igitur divinis quos superiores Angeli cognoscunt in Deo præ aliis, inferiores instruunt; non autem de essentia divina, quam immediate vident omnes.

#### CAPUT CXXVII.

*Quod inferiora corpora per superiora divinitus disponuntur*<sup>1</sup>.

Sicut igitur intellectualium substantiarum una per aliam divinitus gubernatur, inferior scilicet per superiorem; ita etiam inferiora corpora per superiora divinitus disponuntur: unde omnis motus inferiorum a motibus corporum cælestium causatur, et ex virtute cælestium corporum hæc inferiora formas et species consequuntur, sicut et rationes rerum intelligibiles ad inferiores spiritus per superiores deveniunt.

#### CAPUT CXXVIII.

*Quod corpora cælestia non imprimunt directe in intellectum vel voluntatem hominis.*

Cum<sup>2</sup> autem intellectualis substantia in ordine rerum omnibus corporibus

preferatur, non est conveniens secundum prædictum providentiæ ordinem ut per aliquam corporalem substantiam intellectualis quæcumque substantia regatur a Deo. Cum igitur anima humana sit intellectualis substantia, impossibile est, secundum quod est intelligens et volens, ut secundum motus corporum cælestium disponatur. Neque igitur in intellectum humanum neque in voluntatem corpora cælestia directe agere possunt vel imprimere.

Item. Nullum corpus agit nisi per motum. Omne igitur quod ab aliquo corpore patitur, movetur ab eo. Animam autem humanam secundum intellectivam partem, in qua est voluntas, impossibile est motu corporali moveri, cum intellectus non sit actus alicujus organi corporalis. Impossibile igitur est quod anima humana secundum intellectum aut voluntatem a corporibus cælestibus aliquid patiatur.

Adhuc. Ea quæ ex impressione corporum cælestium in istis inferioribus proveniunt, naturalia sunt. Si igitur operationes intellectus et voluntatis ex impressione cælestium provenirent, ex naturali instinctu procederent; et sic homo non differret in suis actibus ab aliis animalibus, quæ naturali instinctu moventur ad suas actiones; et periret liberum arbitrium, et consilium, et electio, et omnia hujusmodi quæ homo præ ceteris animalibus habet.

#### CAPUT CXXIX.

*Quomodo intellectus humanus perficitur mediantibus potentiis sensitivis, et sic indirecte subditur corporibus cælestibus.*

Est autem considerandum quod intellectus humanus a potentiis sensitivis accipit suæ cognitionis originem: unde perturbata phantastica et imaginativa vel memorativa parte animæ, perturbatur cognitio intellectus: et prædictis potentiis bene se habentibus, convenientior fit acceptio intellectus. Similiter etiam immutatio appetitus sensitivi aliquid operatur ad mutationem voluntatis, quæ est appetitus rationis, ex ea parte qua bonum apprehensum est objectum volun-

<sup>1</sup> Parm.: « per superiora corpora, inferiora, non autem intellectus humanus, disponuntur. »

<sup>2</sup> Hic incipit in Cod. S. Gen. cap. cxxix.

tatis. Ex eo enim quod diversimode dispositi sumus secundum concupiscentiam, iram, et timorem, et alias passiones, diversimode nobis aliquid bonum vel malum videtur. Omnes autem potentiæ sensitivæ partis, sive sint apprehensivæ, seu appetitivæ, quarundam corporalium partium actus sunt; quibus immutatis, necesse est per accidens ipsas quoque potentias immutari. Quia igitur immutatio inferiorum corporum subjacet motui cæli, eidem etiam motui potentiæ sensitivarum operationes, licet per accidens, subduntur; et sic indirecte motus cælestis aliquid operatur ad actum intellectus et voluntatis humanæ, in quantum scilicet per passiones voluntas ad aliquid inclinatur. Sed quia voluntas passionibus non subditur ut earum impetum ex necessitate sequatur, sed magis in potestate sua habet reprimere passiones per iudicium rationis; consequens est ut nec etiam impressionibus corporum cælestium voluntas humana subdatur; sed liberum iudicium habet eas sequi et resistere, cum videbitur expedire; quod tantum sapientium est; sequi vero passiones corporales et inclinationes est multorum, qui scilicet sapientia et virtute carent.

### CAPUT CXXX.

*Quod solus Deus movet voluntatem hominis, non res creata.*

Cum autem omne mutabile et multiforme, in aliquod primum immobile et unum reducatur sicut in causam; hominis autem intellectus et voluntas mutabilis et multiformis appareat; necesse est quod in aliquam superiorem causam immobilem et uniformem reducantur. Et quia non reducuntur sicut in causam in corpora cælestia, ut ostensum est, oportet eas reducere in causas altiores. Aliter autem se habet circa intellectum et voluntatem: nam actus intellectus est secundum quod res intellectæ sunt in intellectu; actus autem voluntatis attenditur secundum inclinationem voluntatis ad res volitas. Intellectus igitur natus est perfici ab aliquo exteriori quod comparatur ad ipsum sicut ad potentiam: unde homo ad actum intellectus adjuvari potest a quolibet exteriori, quod est magis perfectum secundum esse intelligibile,

non solum a Deo, sed etiam ab Angelo, et etiam ab homine magis instructo: aliter tamen et aliter. Homo enim adjuvatur ab homine ad intelligendum, per hoc quod unus eorum alteri proponit intelligibile quod non considerabat; non autem ita quod lumen intellectus unius hominis ab altero homine perficiatur; quia utrumque lumen naturale est unius speciei. Sed quia lumen naturale Angeli est secundum naturam sublimius naturali lumine hominis, homo ab Angelo potest juvari ad intelligendum, non solum ex parte objecti quod ei ab Angelo proponitur, sed etiam ex parte luminis quod per lumen Angeli confortatur. Non tamen lumen naturale hominis ab Angelo est, cum natura rationalis animæ, quæ per creationem esse accepit, non nisi a Deo instituta sit. Deus autem ad intelligendum hominem juvat non solum ex parte objecti quod homini proponitur a Deo, vel per additionem luminis; sed etiam per hoc quod lumen naturale hominis, quo intellectualis est, a Deo est; et per hoc etiam quod cum ipse sit veritas prima, a qua omnis alia veritas certitudinem habet, sicut secundæ propositiones a primis in scientiis demonstrativis, nihil intellectui certum fieri potest nisi virtute divina, sicut nec conclusiones fiunt certæ in scientiis nisi secundum virtutem primorum principiorum. Sed cum actus voluntatis sit inclinatio quædam ab interiori ad exterius procedens, et comparetur inclinationibus naturalibus; sicut inclinationes naturales rebus naturalibus solum insunt a causa suæ naturæ, ita actus voluntatis a solo Deo est, qui solus causa est naturæ rationalis voluntatem habentis. Unde patet quod non est contra arbitrii libertatem, si Deus voluntatem hominis movet; sicut non est contra naturam quod Deus in rebus naturalibus operatur; sed tam inclinatio naturalis quam voluntaria a Deo est, utraque proveniens secundum conditionem rei cuius est: sic enim Deus res movet secundum quod competit earum naturæ.

Patet igitur ex prædictis quod in corpus humanum et virtutes ejus corporeas imprimere possunt corpora cælestia, sicut et in alia corpora, non autem in intellectum; sed hoc potest creatura intellectualis: in voluntatem autem solus Deus imprimere potest.

## CAPUT CXXXI.

*Quod Deus omnia gubernat, et quædam movet mediantibus causis secundis.*

Quia vero causæ secundæ non agunt nisi virtute primæ causæ, sicut instrumenta agunt per directionem artis; necesse est quod omnia alia agentia, per quæ Deus ordinem suæ gubernationis adimplet, virtute ipsius Dei agant. Agere igitur cujuslibet ipsorum a Deo causatur, sicut et motus mobilis a motione moventis. Movens autem et motum oportet simul esse. Oportet igitur quod Deus cuilibet agenti adsit interius quasi in ipso agens, dum ipsum ad agendum movet.

Adhuc. Non solum agere agentium secundorum causatur a Deo, sed ipsum eorum esse, sicut in superioribus ostensum est. Non autem sic intelligendum est quod esse rerum causetur a Deo sicut esse domus causatur ab ædificatore, quo remoto adhuc remanet esse domus: ædificator enim non causat esse domus nisi in quantum movet ad esse domus, quæ quidem motio est factio domus; unde directe est causa fieri ipsius domus quod quidem cessat ædificatore remoto; Deus autem est per se causa directe ipsius esse, quasi esse communicans omnibus rebus, sicut sol communicat lumen aeri, et aliis quæ ab ipso illuminantur. Et sicut ad conservationem luminis in aere requiritur perseverans illuminatio solis, ita ad hoc quod res conserventur in esse, requiritur quod Deus esse incessanter tribuat rebus; et sic omnia non solum in quantum esse incipiunt, sed etiam in quantum in esse conservantur, comparantur ad Deum sicut factum ad faciens. Faciens autem et factum oportet esse simul, sicut movens et motum. Oportet igitur Deum adesse omnibus rebus in quantum esse habent. Esse autem est id quod rebus omnibus intimius adest. Igitur oportet Deum in omnibus esse.

Item. Quicumque exequitur suæ providentiæ ordinem per aliquas medias causas, necesse est quod effectus illarum mediarum causarum cognoscat et ordinet; alioquin extra ordinem suæ providentiæ caderent: et tanto perfectior est providentia gubernantis, quanto ejus cognitio et ordinatio magis descendit ad singularia: quia si aliquid singularium a cognitione gubernantis subtrahitur, deter-

minatio ipsius singularis ejus providentiam diffugiet. Ostensum est autem supra quod necesse est omnia divinæ providentiæ subdi; et manifestum est quod divina providentia perfectissima est, quia quicquid de Deo dicitur, secundum maximum convenit ei. Oportet igitur quod ordinatio providentiæ ipsius se extendat usque ad minimos effectus.

## CAPUT CXXXII.

*Quod Deus omnia disponit immediate, nec diminuit suam sapientiam.*

Secundum hoc igitur patet quod licet rerum gubernatio fiat a Deo mediantibus causis secundis, quantum pertinet ad providentiæ executionem; tamen ipsa dispositio seu ordinatio divinæ providentiæ immediate se extendit ad omnia. Non enim sic prima et ultima ordinat ut ultima et singularia aliis disponenda committat: hoc enim apud homines agitur propter debilitatem cognitionis ipsorum, quæ non potest simul vacare pluribus: unde superiores gubernatores disponunt de magnis et minima aliis committunt disponenda; sed Deus simul multa potest cognoscere, ut supra ostensum est; unde non retrahitur ab ordinatione maximorum per hoc quod dispensat minima.

## CAPUT CXXXIII.

*Rationes quæ videntur ostendere quod Deus non habet providentiam de particularibus.*

Posset tamen alicui videri quod singularia non disponantur a Deo. Nullus enim per suam providentiam disponit nisi quæ cognoscit. Deo autem cognitio singularium videri potest deesse, ex hoc quod singularia non intellectu, sed sensu cognoscuntur. In Deo autem, qui omnino incorporeus est, non potest esse sensitiva, sed solum intellectiva cognitio. Potest igitur alicui videri ex hoc quod singularia a divina providentia non ordinantur.

Item. Cum singularia sint infinita, infinitorum autem non possit esse cognitio, infinitum enim ut sic est ignotum: videtur quod singularia divinam cognitionem et providentiam effugiant.

Adhuc. Singularium multa contingentia sunt. Horum autem non potest esse certa scientia. Cum igitur scientiam Dei oporteat esse certissimam; videtur quod singularia non cognoscantur, nec disponentur a Deo.

Præterea. Singularia non omnia simul sunt, quia quibusdam succedentibus alia corrumpuntur. Eorum autem quæ non sunt, non potest esse scientia. Si igitur singularium Deus scientiam habeat, sequitur quod quædam scire incipiat et desinat, ex quo sequitur eum esse mutabilem. Non igitur videtur singularium cognitor et dispositor esse.

#### CAPUT CXXXIV.

##### *Solutio prædictarum rationum.*

Sed hæc facile solvuntur, si quis rei veritatem consideret. Cum enim Deus se ipsum perfecte cognoscat, oportet quod cognoscat omne quod in ipso est quocumque modo. Cum autem ab ipso <sup>1</sup> sit omnis essentia et virtus entis creati: quod autem est ab aliquo, virtute in ipso est: necesse est quod se ipsum cognoscens cognoscat essentiam entis creati, et quidquid in eo virtute est; et sic <sup>2</sup> cognoscit omnia singularia quæ virtute sunt in ipso et in aliis suis causis.

Nec est simile de cognitione intellectus divini et nostri, ut prima ratio procedebat. Nam intellectus noster cognitionem de rebus accipit per species abstractas, quæ sunt similitudines formarum, et non materiæ<sup>3</sup>, nec materialium dispositionum, quæ sunt individuationis principia: unde intellectus noster singularia cognoscere non potest, sed solum universalia. Intellectus autem divinus cognoscit res per essentiam suam, in qua sicut in primo virtute continetur non solum forma, sed etiam materia; et ideo non solum universalium, sed etiam singularium cognitor est.

Similiter etiam non est inconveniens Deum infinita cognoscere, quamvis intellectus noster infinita cognoscere non possit. Intellectus enim noster non potest simul actu plura considerare: et sic si infinita cognosceret, considerando ea,

oporteret quod numeraret infinita unum post unum, quod est contra rationem infiniti; sed virtute et potentia intellectus noster infinita cognoscere potest, puta omnes species numerorum vel proportionum, inquantum habet sufficiens principium ad omnia cognoscenda. Deus autem multa simul cognoscere potest, ut supra ostensum est; et id per quod omnia cognoscit, scilicet sua essentia, sufficiens est principium omnia cognoscendi non solum quæ sunt, sed quæ esse possunt. Sicut igitur <sup>4</sup> intellectus noster potentia et virtute cognoscit infinita, quorum cognitionis principium habet; ita Deus omnia infinita actu considerat.

Manifestum est etiam quod licet singularia corporalia et temporalia non simul sint, tamen simul eorum Deus cognitionem habet: cognoscit enim ea secundum modum sui esse, quod est æternum et sine successione. Sicut igitur materialia immaterialiter, et multa per unum cognoscit; sic et quæ non simul sunt, uno intuitu conspiciunt: et sic non oportet quod ejus cognitioni aliquid addatur vel subtrahatur, per hoc quod singularia cognoscit.

Ex quo etiam manifestum fit quod de contingentibus certam cognitionem habet: quia etiam antequam fiant, intuetur ea prout sunt actu in suo esse, et non solum prout sunt futura et virtute in suis causis, sicut nos aliqua futura cognoscere possumus. Contingentia autem licet prout sunt in suis causis virtute futura existentia, non sunt determinata ad unum, ut de eis certa cognitio haberi possit; tamen prout sunt actu in suo esse, jam sunt determinata ad unum, et potest de eis certa haberi cognitio. Nam Socratem sedere dum sedet, per certitudinem visionis cognoscere possumus. Et similiter per certitudinem Deus cognoscit omnia, quæcumque per totum discursum temporis aguntur, in suo æterno: nam æternitas sua præsentialiter totum temporis decursum attingit, et ultra transcendit; ut sic consideremus Deum in sua æternitate fluxum temporis cognoscere, sicut qui in altitudine speculæ constitutus totum transitum viatorum simul intuetur.

<sup>1</sup> Al.: « ab initio. »

<sup>2</sup> Al.: « etiam sic. »

<sup>3</sup> Al.: « et non materia. »

<sup>4</sup> Al.: « sic igitur. »



## CAPUT CXXXV.

*Quod Deus solus cognoscit singularia futura contingentia.*

Manifestum est autem quod hoc modo futura contingentia cognoscere, prout sunt actu in suo esse, quod est certitudinem de ipsis habere, solius Dei proprium est, cui proprie et vere competit æternitas : unde futurorum prænuntiatio certa ponitur esse Divinitatis signum, secundum illud Isaiaë xlii, 23 : *Annunciate quæ ventura sunt in futurum; et sciemus quia dii estis vos.* Sed cognoscere futura in suis causis etiam aliis competere potest; sed hæc cognitio non est certa, sed conjecturalis magis, nisi circa effectus qui de necessitate ex suis causis sequuntur : et per hunc modum medicus prænunciat infirmitates futuras, et nauta tempestates.

## CAPUT CXXXVI.

*Quod Deus omnibus adest per potentiam, essentiam et præsentiam, et omnia immediate disponit.*

Sic igitur nihil impedit quin Deus etiam singularium effectuum cognitionem habeat, et eos immediate ordinet per se ipsum; licet per causas medias exequatur. Sed etiam in ipsa executione quodammodo immediate se habet ad omnes effectus, in quantum omnes causæ mediæ agunt in virtute causæ primæ, ut quodammodo ipse in omnibus agere videatur : et omnia operæ secundarum causarum ei possunt attribui, sicut artificii attribuitur opus instrumenti : convenientius enim dicitur quod faber facit cultellum quam martellus. Habet etiam se immediate ad omnes effectus, in quantum ipse est per se causa essendi, et omnia ab ipso servantur in esse. Et secundum hos tres immediatos modos dicitur Deus in omnibus esse per essentiam, potentiam et præsentiam. Per essentiam quidem in quantum esse cuiuslibet est quædam participatio divini esse; et sic essentia divina cuiuslibet existenti adest, in quantum habet esse, sicut causa proprio effectui : per potentiam vero, in quantum omnia in virtute ipsius agunt: per præsentiam vero, in quantum ipse immediate omnia ordinat et disponit.

## CAPUT CXXXVII.

*Quod soli Deo convenit miracula facere.*

Quia igitur totus ordo causarum secundarum et virtus earum est a Deo, ipse autem non producit suos effectus per necessitatem, sed liberam voluntatem, ut supra ostensum est; manifestum est quod præter ordinem causarum secundarum agere potest, sicut quod sancti illos qui secundum operationem naturæ sanari non possunt, vel faciat aliqua huiusmodi quæ non sunt secundum ordinem naturalium causarum, sunt tamen secundum ordinem divinæ providentiæ : quia hoc ipsum quod aliquando a Deo fiat præter ordinem naturalium causarum, a Deo dispositum est propter aliquem finem. Cum autem aliqua huiusmodi divinitus fiunt præter ordinem causarum secundarum, talia facta miracula dicuntur : quia mirum est, cum effectus videtur, et causa ignoratur. Cum igitur Deus sit causa simpliciter nobis occulta; cum aliquid ab eo fit præter ordinem causarum secundarum nobis notarum, simpliciter miracula dicuntur. Si autem fiat aliquid ab aliqua alia causa occulta huic vel illi, non est simpliciter miraculum, sed quo ad illum qui causam ignorat : unde contingit quod aliquid apparet mirum uni, quod non est alii mirum, qui causam cognoscit.

Sic autem præter ordinem causarum secundarum operari solius Dei est, qui est huius ordinis institutor, et huic ordini non obligatur; omnia vero huic ordini subduntur. Unde miracula facere, solius Dei est, secundum illud Psalmistæ (Psal. lxxi, 18) : *Qui facit mirabilia magna solus.* Cum igitur ab aliqua creatura miracula fieri videntur, vel non sunt vera miracula, quia fiunt per aliquas virtutes naturalium rerum, licet nobis occultas, sicut est de miraculis demonum, quæ magicis artibus fiunt; vel si sunt vera miracula, impetrantur per aliquem a Deo, ut scilicet talia operetur. Quia igitur huiusmodi miracula solum divinitus fiunt, convenienter in argumentum fidei assumuntur, quæ soli Deo innititur. Quod enim aliquid prolatur ab homine auctoritate divina dicatur, nunquam convenientius ostenditur quam per opera quæ solus Deus facere potest.

Huiusmodi autem miracula, quamvis præter ordinem causarum secundarum



fiant, tamen non sunt simpliciter dicenda contra naturam : quia hoc ipsum naturalis ordo habet ut inferiora actionibus superiorum subdantur : unde quæ in corporibus inferioribus ex impressione cœlestium corporum proveniunt, non dicuntur simpliciter esse contra naturam, licet forte sint quandoque contra naturam particularem hujus vel illius rei, sicut patet de motu aquæ in fluxu et refluxu maris, qui accidit ex lunæ actione. Sic igitur et ea quæ in creaturis accidunt Deo agente, licet videantur esse contra particularem ordinem causarum secundarum, sunt tamen secundum ordinem universalem naturæ. Non igitur miracula sunt contra naturam.

## CAPUT CXXXVIII.

*Quod dicantur esse aliqua casualia et fortuita.*

Quamvis autem omnia etiam minima divinitus dispensentur, ut ostensum est ; nihil tamen prohibet aliqua accidere a casu et fortuna. Contingit enim aliquid respectu inferioris causæ esse fortuitum vel casuale, dum præter ejus intentionem aliquid agitur quod tamen non est fortuitum vel casuale respectu superioris causæ, præter cujus intentionem non agitur ; sicut patet de domino, qui duos servos ad eundem locum mittit, ita quod unus ignoret de alio ; horum concursus casualis est quantum ad utrumque, non autem quantum ad dominum. Sic igitur cum aliqua accidunt præter intentionem causarum secundarum, fortuita sunt vel casualia habito respectu ad illas causas ; et simpliciter casualia dici possunt, quia effectus simpliciter denominantur secundum conditionem proximarum causarum. Si vero habeatur respectus ad Deum, non sunt fortuita, sed provisa.

## CAPUT CXXXIX.

*Utrum fatum sit aliqua natura, et quid sit.*

Ex hoc autem apparet quæ sit ratio fati. Cum enim multi effectus inveniuntur

casualiter provenire secundum considerationem secundarum causarum, quidam hujusmodi effectus in nullam superiorem causam ordinantem eos reducere volunt ; quos totaliter negare fatum necesse est. Quidam vero hos effectus qui videntur casuales et fortuiti, in superiorem causam ordinantem eos reducere voluerunt ; sed corporalium ordinem non transcendentem, attribuerunt ordinationem corporibus primis, scilicet cœlestibus : et hi fatum esse dixerunt vim positionis siderum, ex qua hujusmodi effectus contingere dicebant. Sed quia ostensum est quod intellectus voluntas, et quæ sunt propria principia humanorum actuum, proprie corporibus cœlestibus non subduntur, non potest dici quod ea quæ casualiter vel fortuito in rebus humanis accidere videntur, reducantur in corpora cœlestia sicut in causam ordinantem. Fatum autem non videtur esse nisi in rebus humanis, in quibus est et fortuna : de his enim solent aliqui quærere, futura cognoscere volentes, et de his a divinantibus responderi consuevit : unde et fatum a fando est appellatum : et ideo sic fatum ponere est alienum a fide. Sed quia non solum res naturales, sed etiam res humanæ divinæ providentiæ subduntur, quæ casualiter in rebus humanis accidere videntur, in ordinationem divinæ providentiæ reducere oportet. Et sic necesse est ponere fatum ponentibus divinæ providentiæ omnia subjacere. Fatum enim sic acceptum se habet ad divinam providentiam sicut proprius ejus effectus : est enim explicatio divinæ providentiæ rebus adhibita, secundum quod Boetius dicit IV *De consol.* pros. vi, quod fatum est « dispositio, » idest ordinatio « immobilis rebus mobilibus inhærens <sup>1</sup>. » Sed quia cum infidelibus quantum possumus, nec nomina debemus habere communia, ne a non intelligentibus erroris occasio sumi possit, cautius est fidelibus ut fati nomen reticeant, propter hoc quod fatum convenientius et communius secundum primam acceptionem sumitur. Unde et Augustinus dicit V *De civitate Dei*, c. 1, quod si quis secundo modo fatum esse credat, sententiam teneat et linguam corrigat.

<sup>1</sup> « Fatum est inhærens rebus mobilibus dispositio. »

## CAPUT CXL.

*Quod non omnia sunt ex necessitate.*

Quamvis autem ordo divinæ providentiæ rebus adhibitus certus sit, ratione cuius Boetius dicit quod fatum est « dispositio immobilis rebus mobilibus inhærens; » non tamen propter hoc sequitur omnia de necessitate accidere. Nam effectus necessarii vel contingentes dicuntur secundum conditionem proximarum causarum. Manifestum est enim quod si causa prima fuerit necessaria, et causa secunda fuerit contingens, effectus sequitur contingens; sicut prima causa generationis in rebus corporalibus inferioribus est motus cœlestis corporis; qui licet ex necessitate proveniat, generatio tamen et corruptio in istis inferioribus provenit contingenter, propter hoc quod causæ inferiores contingentes sunt, et deficere possunt. Ostensum est autem quod Deus suæ providentiæ ordinem per causas inferiores exequitur. Erunt igitur aliqui effectus divinæ providentiæ contingentes secundum conditionem inferiorum causarum.

## CAPUT CXLI.

*Quod divina providentia manente, multa sunt contingentia.*

Nec tamen effectuum contingentia vel causarum, certitudinem divinæ providentiæ perturbare potest. Tria enim sunt quæ providentiæ certitudinem præstare videntur: scilicet infallibilitas divinæ præscientiæ, efficacia divinæ voluntatis, et sapientia divinæ dispositionis, quæ vias sufficientes ad effectum consequendum adinvenit: quorum nullum contingentia rerum repugnat. Nam scientia Dei infallibilis est etiam contingentium futurorum, inquantum Deus intuetur in suo æterno futura, prout sunt actu in suo esse, ut supra expositum est. Voluntas etiam Dei, cum sit universalis rerum causa non solum est de hoc quod aliquid fiat, sed ut sic fiat. Hoc igitur ad efficaciam divinæ voluntatis pertinet non solum ut fiat quod Deus vult, sed ut hoc modo fiat quomodo illud fieri vult. Vult autem quædam fieri necessario et quædam contingenter, quia utrumque requi-

ritur ad completum esse universi. Ut igitur utroque modo res provenirent, quibusdam adaptat necessarias causas, quibusdam vero contingentes; ut sic dum quædam fiunt necessario, quædam contingenter, divina voluntas efficaciter impleatur. Manifestum est etiam quod per sapientiam divinæ dispositionis, providentiæ certitudo servatur, contingentia rerum manente. Nam si hoc per providentiam hominis fieri potest ut causæ quæ deficere potest ab effectu, sic ferat auxilium ut interdum indeficienter sequatur effectus, sicut patet in medico sanante, et in vineæ cultore contra sterilitatem vitis adhibendo remedium; multo magis hoc ex sapientia divinæ dispositionis contingit, ut quamvis causæ contingentes deficere possint quantum est de se ab effectu, tamen quibusdam administratis adhibitis indeficienter sequatur effectus quod ejus contingentiam non tollit. Sic ergo patet quod rerum contingentia divinæ providentiæ certitudinem non excludit.

## CAPUT CXLII.

*Quod divinæ providentiæ certitudo non excludit mala a rebus.*

Eodem etiam modo perspicui potest quod divina providentia manente, mala in mundo accidere possunt propter defectum causarum secundarum. Videmus enim in causis ordinatis accidere malum in effectu ex defectu causæ secundæ, qui tamen defectus a causa prima nullo modo causatur; sicut malum claudicationis causatur a curvitate cruris, non autem a virtute animæ motiva: unde quidquid est in claudicatione de motu, refertur in virtutem motivam sicut in causam; quod autem est ibi de obliquitate, non causatur a virtute motiva, sed a cruris curvitate. Et ideo quidquid malum in rebus accidit, quantum ad hoc quod esse vel speciem vel naturam aliquam habet, reducitur in Deum sicut in causam: non enim potest esse malum nisi in bono, ut ex supradictis patet. Quantum vero ad id quod habet de defectu, reducitur in causam inferiorem defectibilem. Et sic licet Deus sit universalis omnium causa, non tamen est causa malorum inquantum sunt mala; sed quidquid boni eis adjungitur, causatur a Deo.

## CAPUT CXLIII.

*Quod non derogat bonitati Dei quod mala permittat.*

Nec tamen hoc divinæ bonitati repugnat quod mala esse permittit in rebus ab eo gubernatis. Primo quidem quia providentiæ non est naturam gubernatorum perdere, sed salvare. Requirit autem hoc perfectio universi ut sint quædam in quibus malum non possit accidere, quædam vero quæ defectum mali pati possint secundum suam naturam. Si igitur malum totaliter excluderetur a rebus, providentia divina non regerentur res secundum earum naturam; quod esset major defectus quam singulares defectus qui tollerentur. Secundo, quia bonum unius non potest accidere sine malo alterius; sicut videmus quod generatio unius non est sine corruptione alterius, et nutrimentum leonis non est sine occisione alterius animalis, et patientia justus non est sine persecutione injusti. Si igitur malum totaliter excluderetur a rebus, sequeretur quod multa etiam bona tollerentur. Non igitur pertinet ad divinam providentiam ut malum totaliter excludatur a rebus; sed ut mala quæ proveniunt, ad aliquod bonum ordinentur. Tertio, quia ex ipsis malis particularibus commendabiliora redduntur bona dum eis comparantur, sicut ex obscuritate nigri magis declaratur claritas albi; et sic per hoc quod permittit mala esse in mundo, divina bonitas magis declaratur in bonis, et sapientia in ordinatione malorum ad bona.

## CAPUT CXLIV.

*Quod Deus specialiter homini providet per gratiam.*

Quia igitur divina providentia rebus singulis secundum earum modum providet; creatura autem rationalis per liberum arbitrium est domina sui actus præ ceteris creaturis; necesse est ut et ei singulari modo provideatur quantum ad duo. Primo quidem quantum ad adjumenta operis, quæ ei dantur a Deo; secundo quantum ad ea quæ pro suis operibus ei redduntur. Creaturis enim

irrationabilibus hæc solum adjumenta dantur divinitus ad agendum quibus naturaliter moventur ad agendum; creaturis vero rationabilibus dantur documenta et præcepta vivendi: non enim præceptum dari competit nisi ei qui est dominus sui actus; quamvis etiam creaturis irrationabilibus præcepta per quandam similitudinem Deus dare dicatur, secundum illud Psal. cXLVIII, 6: *Præceptum posuit et non præteribit*: quod quidem præceptum nihil aliud est quam dispositio divinæ providentiæ movens res naturales ad proprias actiones. Similiter etiam actiones creaturarum rationalium imputantur eis ad culpam vel ad laudem, pro eo quod habent dominium sui actus, non solum hominibus ab homine præside, sed etiam a Deo; cum homines non solum regantur ab homine, sed etiam a Deo. Cujuscumque autem regimini aliquis subditur, ab eo sibi imputatur quod laudabiliter vel culpabiliter agit. Et quia pro bene actis debetur præmium, culpæ vero debetur pœna, ut supra dictum est; creaturæ rationales secundum justitiam divinæ providentiæ et puniuntur pro malis, et præmiantur pro bonis. In creaturis autem irrationabilibus non habet locum pœna nec præmium, sicut nec laudari nec culpari. Quia vero ultimus finis creaturæ rationalis facultatem naturæ ipsius excedit; ea vero quæ sunt ad finem, debent esse fini proportionata secundum rectum providentiæ ordinem; consequens est ut creaturæ rationali etiam adjutoria divinitus conferantur, non solum quæ sunt proportionata naturæ, sed etiam quæ facultatem naturæ excedunt. Unde supra naturalem facultatem rationis imponitur homini divinitus lumen gratiæ, per quod interius perficitur ad virtutem et quantum ad cognitionem, dum elevatur mens hominis per lumen hujusmodi ad cognoscendum ea quæ rationem excedunt, et quantum ad actionem et affectionem, dum per lumen hujusmodi affectus hominis supra creata omnia elevatur ad Deum diligendum, et sperandum in ipso, et ad agendum ea quæ talis amor requirit.

Hujusmodi autem dona, sive auxilia supernaturaliter homini data, gratuita vocantur duplici ratione. Primo quidem quia gratis divinitus dantur: non enim potest in homine aliquid inveniri cui condigne hujusmodi auxilia debeantur, cum hæc facultatem humanæ naturæ excedant.

Secundo vero quia speciali quodammodo per hujusmodi dona homo efficitur Deo gratus. Cum enim dilectio Dei sit causa bonitatis in rebus non a præexistente bonitate provocata, sicut est dilectio nostra; necesse est quod quibus aliquos speciales effectus bonitatis largitur, respectu horum specialis ratio dilectionis divinæ consideretur; unde eos maxime et simpliciter diligere dicitur quibus tales bonitatis affectus largitur per quos ad ultimum finem veniant, quod est ipse, qui est fons bonitatis.

## CAPUT CXLV.

*Quod Deus per dona gratuita remittit peccata, quæ etiam gratiam interinunt.*

Et quia peccata contingunt ex hoc quod actiones deficiunt a recto ordine ad finem; ad finem autem ordinatur homo non solum per naturalia auxilia, sed per gratuita; necesse est quod peccata hominum non solum naturalibus auxiliis, sed etiam gratuitis contrariantur. Contraria autem se invicem expellunt. Unde sicut per peccata hujusmodi auxilia gratuita ab homine tolluntur, ita per gratuita dona peccata homine remittuntur: alioquin malitia hominis in peccando plus posset dum removet gratiam divinam, quam divina bonitas ad removendum peccata per gratiæ dona.

Item. Deus rebus providet secundum earum modum. Hic autem est modus mutabilium rerum, ut in eis contraria alternari possint, sicut generatio et corruptio in materia corporali, et album et nigrum in corpore colorato. Homo autem est mutabilis secundum voluntatem quamdiu in hac vita vivit. Sic igitur divinitus gratuita dona homini dantur, ut ea possit per peccatum amittere: et sic peccata perpetrat, ut ea per gratuita dona remitti possint.

Præterea. In iis quæ supra naturam aguntur, possibile et impossibile attenditur secundum potentiam divinam, non secundum potentiam naturalem: quod enim cæcus illuminari possit vel mortuus resurgere, non est naturalis potentiæ, sed divinæ. Dona autem gratuita sunt supernaturalia. Quod igitur ea aliquis consequi possit, ad divinam potentiam pertinet.

Dicere igitur quod aliquis post peccatum gratuita dona consequi non possit est divinæ potentiæ derogare. Gratuita autem dona simul cum peccato esse non possunt; cum per gratuita dona homo ordinetur ad finem, a quo per peccatum avertitur. Dicere igitur peccata irremissibilia<sup>1</sup> esse, divinæ potentiæ contrariatur.

## CAPUT CXLVI.

*Quod peccata non sunt irremissibilia.*

Si quis autem dicat peccata irremissibilia esse non propter divinam impotentiam, sed quia hoc habet divina justitia ut qui cadit a gratia, ulterius non revertatur ad ipsam; hoc patet esse falsum. Non enim hoc habet ordo divinæ justitiæ quod quamdiu aliquis est in via, sibi detur quod pertinet ad terminum viæ. Immobiliter autem se habere vel in bono vel in malo pertinet ad terminum viæ: immobilitas enim et quies est terminus motus; tota autem præsens vita est status viæ, quod demonstrat mutabilitas hominis et quantum ad corpus et quantum ad animam. Non igitur hoc habet divina justitia ut homo post peccatum immobiliter maneat in eo.

Adhuc. Ex divinis beneficiis periculum homini non irrogatur, et præcipue ex maximis. Esset autem periculosum homini mutabilem vitam agenti gratiam accipere, si post gratiam peccare posset, et iterum redire ad gratiam non posset; præsertim enim peccata quæ gratiam præcedunt, remittantur per gratiam, quæ interdum majora sunt his quæ post gratiam susceptam homo committit. Non est igitur dicendum quod peccata hominis irremissibilia sint, sive ante sive post committantur.

## CAPUT CXLVII.

*Quod solus Deus potest remittere peccata.*

Peccata vero remittere solus Deus potest. Culpa enim contra aliquem commissa ille solus remittere potest contra quem committitur. Peccata enim imputantur homini ad culpam non solum ab ho-

<sup>1</sup> Parm.: « non esse. »

mine, sed etiam a Deo, ut supra dictum est. Sic autem nunc agimus de peccatis, prout imputantur homini a Deo Deus igitur solus peccata remittere potest.

Adhuc. Cum per peccata homo deordinetur ab ultimo fine, remitti non possunt, nisi homo reordinetur in finem. Hoc autem fit per gratuita dona quæ sunt solum a Deo, cum excedant facultatem naturæ. Solus igitur Deus potest peccata remittere.

Item. Peccatum homini imputatur ad culpam, in quantum voluntarium. Voluntatem autem immutare solus Deus potest. Solus igitur ipse vere potest remittere peccata.

### CAPUT CXLVIII.

*De quibusdam articulis fidei qui sumuntur penes effectus divinæ gubernationis.*

Illic est igitur secundus Dei effectus, gubernatio rerum, et specialiter creaturarum rationalium, quibus et gratiam tribuit, et peccata remittit: qui quidem effectus in Symbolo fidei tangitur et quantum ad hoc quod omnia in finem divinæ bonitatis ordinantur, per hoc quod Spiritum sanctum profiteamur Deum, nam Deo est proprium ad finem suos subditos ordinare; et quantum ad hoc quod omnia movet, per hoc quod dicit, « Et vivificantem. » Sicut enim motus qui est ab anima in corpus est vita corporis; ita motus quo universum movetur a Deo, est quasi quædam vita universi. Et quia tota ratio divinæ gubernationis a bonitate divina sumitur, quæ Spiritui sancto appropriatur, qui procedit ut amor, convenienter effectus divinæ providentiæ circa personam Spiritus sancti ponuntur. Quantum autem ad effectum supernaturalis cognitionis, quam per fidem in hominibus Deus facit, dicitur: « Sanctam Ecclesiam catholicam: » nam Ecclesia congregatio fidelium est. Quantum vero ad gratiam quam hominibus communicat, dicitur, « Sanctorum communionem. » Quantum vero ad remissionem culpæ dicitur, « Peccatorum remisisonem. »

### CAPUT CXLIX.

*Quod omnia sunt facta propter hominem.*

Cum autem omnia, sicut ostensum est, in divinam bonitatem ordinentur sicut

in finem: eorum autem quæ ad hunc finem ordinantur, quædam aliis propinquiora sunt fini, quæ plenius divinam bonitatem participant: consequens est ut ea quæ sunt inferiora in rebus creatis, quæ minus de bonitate divina participant, ordinentur quodammodo sicut in fines in entia superiora. In omni enim ordine finium, quæ sunt propinquiora ultimo fini, sunt etiam fines eorum quæ sunt magis remota; sicut potio medicinæ est propter purgationem, purgatio autem propter maciem, macies autem propter sanitatem; et sic macies finis est quodammodo purgationis, sicut etiam potionis purgatio. Et hoc rationabiliter accidit. Sicut enim in ordine causarum agentium virtus primi agentis pervenit ad ultimos effectus per medias causas; ita in ordine finium, quæ sunt magis remota a fine, pertingunt ad ultimum finem mediantibus his quæ sunt magis propinqua fini: sicut potio non ordinatur ad sanitatem nisi per purgationem. Unde et in ordine universi inferiora consequuntur præcipue ultimum finem in quantum ordinantur ad superiora.

Hoc etiam manifeste apparet ipsum rerum ordinem consideranti. Cum enim ea quæ naturaliter fiunt, sicut nata sunt agi, sic agantur; videmus autem imperfectiora cedere ad usum nobiliorum, utpote quod plantæ nutriuntur ex terra, animalia ex plantis, hæc autem ad usum hominis cedunt: consequens est ut inanimata sint propter animata, et plantæ propter animalia, et hæc propter hominem. Cum autem ostensum sit quod natura intellectualis sit superior corporali, consequens est ut tota natura corporalis ad intellectualem ordinetur. Inter naturas autem intellectuales, quæ maxime corpori est vicina, est anima rationalis, quæ est hominis forma. Igitur quodammodo propter hominem, in quantum est rationale animal, tota natura corporalis esse videtur. Ex consummatione igitur hominis consummatio totius naturæ corporalis quodammodo dependet.

### CAPITULUM CL.

*Quis est ultimus finis hominis.*

Consummatio autem hominis est in adeptione ultimi finis, qui est perfecta beatitudo sive felicitas, quæ consistit in



divina visione, ut supra ostensum est. Visionem autem divinam consequitur immutabilitas intellectus et voluntatis. Intellectus quidem : quia cum perventum fuerit ad primam causam in qua omnia cognosci possunt, inquisitio intellectus cessat. Mobilitas autem voluntatis cessat, quia adepto fine ultimo, in quo est plenitudo totius bonitatis, nihil est quod desiderandum restet. Ex hoc autem voluntas mutatur quia desiderat aliquid quod nondum habet. Manifestum est igitur quod ultima consummatio hominis in perfecta quietatione vel immobilitate consistit et quantum ad intellectum, et quantum ad voluntatem.

### CAPUT CLI.

*Quomodo homo ad æternitatem pervenit ut ad consummationem.*

Ostensum est autem in præmissis, quod æternitatis ratio ex immobilitate consequitur. Sicut enim ex motu causatur tempus, in quo prius et posterius invenitur; ita oportet quod remoto motu cesset prius et posterius; et sic æternitatis ratio relinquatur, quæ est tota simul. In ultima igitur sua consummatione homo æternitatem vitæ consequitur non solum quantum ad hoc quod immortaliter secundum animam vivat, quod habet anima rationalis ex sua natura, ut supra ostensum est; sed etiam ad hoc quod ad perfectam immobilitatem perduatur.

### CAPUT CLII.

*Quomodo ad perfectam beatitudinem animæ rationalis oportet eam corpori reuniri.*

Considerandum est autem, quod non potest esse omnimoda immobilitas voluntatis, nisi naturale desiderium totaliter impleatur. Quæcumque autem nata sunt uniri secundum naturam suam, naturaliter sibi uniri appetunt : unumquodque enim appetit id quod est sibi conveniens suam naturam. Cum igitur anima humana naturaliter corpori uniat, ut supra ostensum est; naturale ei desiderium inest ad corporis unionem. Non poterit igitur esse perfecta quietatio voluntatis, nisi iterato anima corpori con-

jungatur : quod est hominem a morte resurgere.

Item. Finalis perfectio requirit perfectionem primam. Prima autem perfectio uniuscujusque rei est ut sit perfectum in sua natura; finalis vero perfectio consistit in consecutione ultimi finis. Ad hoc igitur quod anima humana omnimode perficiatur in fine, necesse est quod sit perfecta in sua natura : quod non potest esse nisi sit corpori unita. Natura enim animæ est ut sit pars hominis ut forma. Nulla autem pars perfecta est in sua natura nisi sit in suo toto. Requiritur igitur ad ultimam hominis beatitudinem ut anima rursus corpori uniat.

Adhuc. Quod est per accidens et contra naturam non potest esse sempiternum. Necesse est autem hoc quod est animam a corpore separatam esse, per accidens esse et contra naturam, si hoc per se et naturaliter inest animæ ut corpori uniat. Non igitur anima erit in perpetuum a corpore separata. Cum igitur ejus substantia sit incorruptibilis, ut supra ostensum est, relinquatur quod sit iterata corpori unienda.

### CAPUT CLIII.

*Quomodo separatio animæ a corpore sit secundum naturam, et quomodo contra naturam.*

Videtur autem animam a corpore separari non esse per accidens, sed secundum naturam. Corpus enim hominis ex contrariis compositum est. Omne autem hujusmodi naturaliter corruptibile est. Corpus igitur humanum est naturaliter corruptibile. Corrupto autem corpore est necesse animam separatam remanere, si anima immortalis est, ut supra ostensum est. Videtur igitur animam a corpore separari esse secundum naturam. Considerandum est ergo, quomodo sit secundum naturam, et quomodo contra naturam. Ostensum est enim supra quod anima rationalis præter modum aliarum formarum excedit totius corporalis materiæ facultatem : quod ejus operatio intellectualis demonstrat, quam sine corpore habet. Ad hoc igitur quod materia corporalis convenienter et aptata fuerit, necesse fuit quod aliqua dispositio corpori superadderetur, per quam fieret conveniens materia talis formæ. Et sicut



hæc forma a solo Deo exit in esse per creationem, ita illa dispositio naturam corpoream excedens, a solo Deo corpori humano attributa fuit, quæ videlicet ipsum corpus incorruptum conservaret, ut sic perpetuitati animæ conveniret. Et hæc quidem dispositio in corpore hominis mansit, quamdiu anima hominis Deo adhæsit. Aversa autem anima hominis per peccatum a Deo, convenienter et corpus humanum illam supernaturalem dispositionem perdidit per quam immobiliter animæ subdebatur; et sic homo necessitatem moriendi incurrit. Si igitur ad naturam corporis respiciatur, mors naturalis est; si vero ad naturam animæ, et ad dispositionem quæ propter animam supernaturaliter humano corpori a principio indita fuit, est per accidens et contra naturam; cum naturale sit animæ corpori esse unitam.

## CAPUT CLIV.

*Quod anima omnino idem corpus resumet, et non alterius naturæ.*

Cum autem anima corpori uniatur ut forma, unicuique autem formæ propria materia respondeat, necesse est quod corpus cui iterato anima uniatur sit ejusdem rationis et speciei cum corpore quod deponit per mortem. Non enim resumet anima in resurrectione corpus cæleste vel aereum, vel corpus alicujus alterius animalis, ut quidam fabulantur; sed corpus humanum ex carnibus et ossibus compositum, organicum, eisdem organis ex quibus nunc consistit.

Rursus. Sicut eidem formæ secundum speciem debetur eadem materia secundum speciem; ita eidem formæ secundum numerum debetur eadem materia secundum numerum: sicut enim anima bovis non potest esse anima corporis equi, ita anima hujus non potest esse anima alterius bovis. Oportet igitur quod cum eadem numero anima rationalis remaneat quod corpori eidem numero in resurrectione rursus uniatur.

## CAPUT CLV.

*Resurrectio corporum futura non erit naturalis, sed miraculosa<sup>1</sup>.*

Ea vero quæ secundum substantiam corrumpuntur, non reilerantur eadem numero secundum operationem naturæ, sed solum secundum speciem: non enim eadem numero nubes est ex qua pluvia generatur, et quæ iterum ex pluviente aqua et rursus evaporante generatur. Cum igitur corpus humanum, per mortem substantialiter corrumpatur, non potest operatione naturæ idem numero reparari. Cum igitur hoc exigit resurrectionis ratio, ut ostensum est; consequens est quod resurrectio hominum non fiet per actionem naturæ, ut quidam posuerunt, post multa annorum circula redeuntibus corporibus ad eundem situm, rursus eodem numero homines redire; sed resurgentium reparatio sola virtute divina fiet.

Item. Manifestum est quod sensus privati restitui non possunt per operationem naturæ, nec aliquid eorum quæ solum per generationem accipiuntur, eo quod non sit possibile idem numero pluries generari. Si autem aliquid hujusmodi restituatur alicui, puta oculus erutus, aut manus abscissa, hoc erit virtute divina, quæ supra naturæ ordinem operatur, ut supra ostensum est. Cum igitur per mortem omnes hominis sensus et omnia membra depereant; impossibile est hominem mortuum rursus reparari ad vitam nisi operatione divina.

CAPUT CLVI<sup>2</sup>.

*Quomodo poterit corpus idem numero reparari.*

Ex hoc autem quod resurrectionem ponimus divina virtute futuram, de facili videri potest quomodo corpus idem numero reparetur. Cum enim supra ostensum sit quod omnia, etiam minima, sub divina providentia continentur; manifestum est quod materia hujus humani

<sup>1</sup> Parm. : « quod resumet idem numero corpus sola Dei virtute. »

<sup>2</sup> Hic incipit in Cod. S. Gen. cap. CLVI.

corporis, quamcumque formam post mortem hominis accipiat, non effugit neque virtutem neque cognitionem divinam : quæ quidem materia eadem numero manet, inquantum intelligitur sub dimensionibus existens, secundum quas hæc materia dici potest, et est individuationis principium. Hæc igitur materia eadem manente, et ex ea virtute divina corpore reparato humano, nec non et anima rationali, quæ cum sit incorruptibilis, eadem manet eidem corpori unita, consequens fit ut homo idem numero reparetur. Nec potest identitas secundum numerum impediri, ut quidam objiciunt, per hoc quod non sit humanitas eadem numero. Nam humanitas, quæ dicitur forma totius, secundum quosdam nihil est aliud quam forma partis, quæ est anima ; quæ quidem dicitur forma corporis secundum quod dat speciem toti. Quod si verum est, manifestum est humanitatem eandem numero remanere, cum anima rationalis eadem numero maneat. Sed quia humanitas est quam significat definitio hominis, sicut et essentia cujuslibet rei est quam significat sua definitio ; definitio autem hominis non solum significat formam, sed etiam materiam, cum in definitione rerum materialium necesse sit materiam poni : convenientius secundum alios dicitur quod in ratione humanitatis et anima et corpus includatur, aliter tamen quam in definitione hominis. Nam in ratione humanitatis includuntur essentialia principia hominis sola cum præcisione aliorum. Cum enim humanitas dicatur quia homo est homo, manifestum est quod omnia de quibus non est verum dicere de eis quod homo sit homo, ab humanitate præciduntur. Cum vero homo dicatur qui humanitatem habet ; per hoc vero quod humanitatem habet, non excluditur quin alia habeat, puta albedinem, aut aliquid hujusmodi ; hoc nomen « homo » significat sua essentialia principia, non tamen cum præcisione aliorum, licet alia non includantur actu in ejus ratione, sed potentia tantum : unde « homo » significat per modum totius ; « humanitas » vero per modum partis, nec de homine prædicatur. In Socrate vero aut Platone includitur hæc materia et hæc forma ; ut sicut est ratio hominis ex hoc quod componitur ex anima et corpore, ita si So-

crates definiretur, ratio ejus esset quod esset compositus ex iis carnibus et iis ossibus et hac anima. Cum igitur humanitas non sit aliqua alia forma præter animam et corpus, sed sit aliquid compositum ex utroque, manifestum est quod eodem corpore reparato, et eadem anima remanente, eadem numero humanitas erit. Neque etiam prædicta identitas secundum numerum impeditur ex hoc quod corporeitas non redeat eadem numero, cum corrupto corpore corrumpatur. Nam si per corporeitatem intelligatur forma substantialis, per quam aliquid in genere substantiæ corporeæ ordinatur ; cum non sit unius nisi una forma substantialis, talis corporeitas non est aliud quam anima. Nam hoc animal per hanc animam non solum est animal, sed animatum corpus, et corpus, et etiam hoc aliquid<sup>1</sup> in genere substantiæ existens : alioquin anima adveneret corpori existenti in actu, et sic esset forma accidentalis. Subjectum enim substantialis formæ non est actu hoc aliquid, sed potentia tantum : unde cum accipit formam substantialem, non dicitur tantum generari secundum quid hoc aut illud, sicut dicitur in formis accidentalibus ; sed dicitur simpliciter generari, quasi simpliciter esse accipiens : et sic corporeitas accepta eadem numero manet, rationali anima eadem existente. Si vero corporeitatis nomine forma quædam intelligatur, a qua denominatur corpus, quod ponitur in genere quantitatis, sic est quædam forma accidentalis, cum nihil aliud significet quam trinam dimensionem. Unde licet non eadem numero redeat, identitas subjecti non impeditur, ad quam sufficit unitas essentialium principiorum. Eadem ratio est de omnibus accidentibus, quorum diversitas identitatem secundum numerum non tollit. Unde cum unio sit quædam relatio, ac per hoc sit accidens, ejus diversitas secundum numerum non tollit identitatem subjecti : similiter nec diversitas potentiarum secundum numerum animæ sensitivæ et vegetativæ : si tamen corrumpi ponantur : sunt enim in genere accidentis potentiæ naturales conjuncti existentes ; nec a sensu sumitur sensibile secundum quod est differentia constitutiva animalis, sed ab ipsa substantia animæ sensitivæ, quæ in homine est eadem secundum substantiam cum rationali.

<sup>1</sup> Al. : « et etiam homo aliquid etc. »

## CAPUT CLVII.

*Quod non resurgemus ad eundem modum vivendi.*

Quamvis autem homines iidem numero resurgent, non tamen eundem modum vivendi habebunt. Nunc enim corruptibilem vitam habent, tunc vero incorruptibilem. Si enim natura in generatione hominis perpetuum esse intendit, multo magis Deus in hominis reparatione. Quod enim natura perpetuum esse intendat, habet ex hoc quod a Deo movetur. Non autem in reparatione hominis resurgentis attenditur perpetuum esse speciei, quia hoc per continuam generationem poterat obtineri. Relinquitur igitur quod intendatur perpetuum esse individui. Homines igitur resurgentes in perpetuum vivent.

Præterea. Si homines resurgentes moriantur, animæ a corporibus separatæ non in perpetuum absque corpore remanebunt : hoc enim est contra naturam animæ, ut supra dictum est. Oportebit igitur ut iterato resurgant ; et hoc idem continget, si post secundam resurrectionem iterum moriantur. Sic igitur in infinitum mors et vita circulariter circa eundem hominem reiterabuntur ; quod videtur esse vanum. Convenientius est igitur ut stetur in primo ; scilicet ut in prima resurrectione homines immortales resurgant. Nec tamen mortalitatis ablatio diversitatem vel secundum speciem vel secundum numerum inducet. Mortale enim secundum propriam rationem differentia specifica hominis esse non potest, cum passionem quamdam designet ; sed ponitur loco differentię hominis, ut per hoc quod dicitur mortale, designetur natura hominis, quod scilicet est ex contrariis compositus ; sicut per hoc quod dicitur rationale, designatur propria forma ejus : res enim materiales non possunt sine materia definiiri. Non autem aufertur mortalitas per ablationem proprię materię : non enim resumet anima corpus cœleste vel aereum, ut supra habitum est, sed corpus humanum ex contrariis compositum. Incorruptibilitas tamen adveniet ex virtute divina, per quam anima supra corpus usque ad hoc domi-

nabitur quod corrumpi non possit. Tamdiu enim res conservatur in esse, quamdiu forma supra materiam dominatur.

## CAPUT CLVIII.

*Quod post resurrectionem usus cibi et generationis cessabunt.*

Quia vero subtracto fine removeri oportet ea quæ sunt ad finem, oportet quod remota mortalitate a resurgentibus, etiam ea subtrahantur quæ ad statum vitæ mortalis ordinantur. Hujusmodi autem sunt cibi et potus, qui ad hoc sunt necessarii ut mortalis vita sustentetur ; dum id quod per calorem naturalem resolvitur, per cibos restauratur. Non igitur post resurrectionem erit usus cibi vel potus. Similiter etiam nec vestimentorum : cum vestimenta ad hoc homini necessaria sint ne corpus ab exterioribus corrumpatur per calorem vel frigus. Similiter etiam necesse est venereorum usum cessare, cum ad generationem animalium ordinetur : generatio autem mortali vitæ deservit, ut quod secundum individuum conservari non potest, conservetur saltem in specie. Cum igitur homines iidem numero in perpetuum conservabuntur, generatio in eis locum non habebit, unde nec venereorum usus.

Rursus. Cum semen sit superfluum alimenti, cessante usu ciborum necesse est etiam ut venereorum usus cesset. Non autem potest convenienter dici, quod propter solam delectationem remaneat usus cibi, et potus, et venereorum. Nihil enim inordinatum in illo finali statu erit : quia tunc omnia suo modo perfectam consummationem accipient. Inordinatio autem perfectioni opponitur. Et cum reparatio hominum per resurrectionem sit immediate a Deo, non poterit in illo statu aliqua inordinatio esse : quia *Quæ a Deo sunt, ordinata sunt*\*, ut dicitur Rom. xiii, 1. Est autem hoc inordinatum ut usus cibi et venereorum propter solam delectationem quæratur ; unde et nunc apud homines vitiosum reputatur. Non igitur propter solam delectationem in resurgentibus<sup>1</sup> usus cibi et potus et venereorum esse poterit.

\* *Quæ sunt, a Deo ordinatæ sunt.*

<sup>1</sup> Al. : « non resurgentibus. »

## CAPUT CLIX.

*Quod tamen omnia membra resurgent.*

Quamvis autem usus talium resurgentibus desit, non tamen eis deerunt membra ad usus tales, quia sine iis corpus resurgentis integrum non esset. Conveniens est autem ut in reparatione hominis resurgentis, quæ erit immediate a Deo, cujus perfecta sunt opera, natura integre reparetur. Erunt ergo hujusmodi membra in resurgentibus propter integritatem naturæ conservandam, et non propter actus quibus deputantur.

Item. Si in illo statu homines pro actibus quos nunc agunt, pœnam vel præmium consequuntur, ut postea manifestabitur; conveniens est ut eadem membra homines habeant quibus peccato vel justitiæ deservierunt in hac vita; ut in quibus peccaverunt vel meruerunt, puniantur vel præmientur.

Similiter<sup>1</sup> autem conveniens est ut omnes naturales defectus a corporibus resurgentium auferantur. Per omnes enim hujusmodi defectus integritati naturæ derogatur. Si igitur conveniens est ut in resurrectione natura humana integraliter reparetur a Deo, consequens est ut etiam hujusmodi defectus tollantur.

Præterea. Hujusmodi defectus ex defectu virtutis naturalis, quæ fuit generationis humanæ principium, provenerunt. In resurrectione autem non erit virtus agens nisi divina, in quam defectus non cadit. Non igitur hujusmodi defectus, qui sunt in hominibus generatis, erunt in hominibus per resurrectionem reparatis.

## CAPUT CLX.

*Quod resurgent solum quæ sunt de veritate naturæ.*

Quod autem est dictum de integritate resurgentium, referri oportet ad id quod est de veritate humanæ naturæ. Quod enim de veritate humanæ naturæ non est, in resurgentibus non resumetur; alioquin oporteret immoderatam esse

magnitudinem resurgentium, si quicquid ex cibis in carnem et sanguinem est conversum, in resurgentibus resumetur. Veritas autem uniuscujusque naturæ secundum suam speciem et formam attenditur. Partes igitur hominis quæ secundum speciem et formam attenduntur, omnes integraliter in resurgentibus erunt, non solum partes organicæ, sed etiam partes consimiles, ut caro, nervus et hujusmodi, ex quibus membra organica componuntur. Non autem totum quicquid naturaliter fuit sub iis partibus, resumetur; sed quantum sufficiens erit ad speciem partium integrandam. Nec tamen propter hoc homo idem numero aut integer non erit, si totum quicquid in eo materialiter fuit, non resurget. Manifestum est enim in statu hujus vitæ quod a principio usque ad finem homo idem numero manet; id tamen quod materialiter in eo est sub specie partium, non idem manet, sed paulatim fluit et refluit, ac si idem ignis conservaretur consumptis et appositis lignis; et est integer homo, quando species et quantitas speciei debita conservatur.

## CAPUT CLXI.

*Quod Deus omnia supplebit in corpore reformato, aut quicquid deficit de materia.*

Sicut autem non totum quod materialiter fuit in corpore hominis, ad reparationem corporis resurgentis Deus resumet; ita etiam si quid materialiter deficit, Deus supplebit. Si enim hoc officio naturæ fieri potest ut puero qui non habet debitam quantitatem, ex aliena materia per assumptionem cibi et potus tantum addatur quod ei sufficiat ad perfectam quantitatem habendam, nec propter hoc desinit esse idem numero qui fuit: multo magis hoc virtute divina fieri potest ut suppleatur minus habentibus de extrinseca materia quod eis in hac vita deficit ad integritatem membrorum naturalium, vel debitæ quantitatis. Sic igitur licet aliqui in hac vita aliquibus membris caruerint, vel perfectam quantitatem nondum attigerint, in quantacumque quantitate defuncti, virtute divina in re-

<sup>1</sup> Hic incipit in Parm. cap. CLXI.

surrectione perfectionem debitam consequentur et membrorum et quantitatis.

### CAPUT CLXII.

*Solutio ad quædam quæ obijci possent.*

Ex hoc autem solvi potest quod quidam contra resurrectionem hanc obijciunt. Dicunt enim possibile esse quod aliquis homo carnibus humanis vescatur, et ulterius sic nutritus filium generet, qui simili cibo utatur. Si igitur nutrimentum convertitur in substantiam carnis, videtur quod sit impossibile integraliter utrumque resurgere, cum carnes unius conversæ sunt in carnes alterius : et quod difficilius videtur, si semen est ex nutrimenti superfluo, ut Philosophi tradunt, sequitur quod semen unde natus est filius, sit sumptum ex carnibus alterius : et ita impossibile videtur puerum ex tali semine genitum resurgere, si homines quorum carnes pater ipsius et ipse comederant, integraliter resurgunt.

Sed hæc communi resurrectioni non repugnant. Dictum est enim supra quod non est necessarium quicquid materialiter fuit in aliquo homine, in ipso resurgente resumî, sed tantum quantum sufficit ad modum debitæ quantitatis servandum. Dictum est etiam quod si alicui aliquid defuit de materia ad quantitatem perfectam, supplebitur divina virtute. Considerandum est insuper quod aliquid materialiter in corpore hominis existens secundum diversos gradus ad veritatem naturæ humanæ invenitur pertinere<sup>1</sup>. Nam primo et principaliter quod a parentibus sumitur, sub veritate humanæ speciei tamquam purissimum perficitur ex virtute formativa; secundario autem quod ex cibus generatum est, necessarium ad debitam quantitatem membrorum, quia semper admixtio extranei debilitat virtutem rei : unde et finaliter necesse est augmentum deficere, et corpus senescere et dissolvi, sicut et vinum per admixtionem aquæ tandem redditur aquosum. Ulterius autem ex cibus aliquæ superfluitates in corpore hominis generantur; quarum quædam sunt necessariae ad aliquem usum, ut semen ad generationem, et capilli ad tegumentum et or-

natum; quædam vero omnino ad nihil, ut quæ expelluntur per sudorem et varias egestionem, vel interius retinentur in gravamen naturæ. Hoc igitur in communi resurrectione secundum divinam providentiam attendetur : quod si idem numero materialiter in diversis hominibus fuit, in illo resurget in quo principalior gradum obtinuit. Si autem in duobus extitit secundum unum et eundem modum, resurget in eo in quo primo fuit, in alio vero supplebitur ex divina virtute. Et sic patet quod carnes hominis comestæ ab aliquo, non resurgent in comedente, sed in eo cujus prius fuerunt; resurgent tamen in eo qui ex tali semine generatus est, quantum ad id quod in eis fuit de humido nutrimentali; aliud vero resurget in primo, Deo unicuique supplente quod deest.

### CAPUT CLXIII.

*Quod resurrectio mortuorum in articulis fidei exprimitur.*

Ad hanc igitur fidem resurrectionis confitentiam, in Symbolo Apostolorum positum est : « Carnis resurrectionem. » Nec sine ratione additum est, « Carnis : » quia fuerunt quidam etiam tempore Apostolorum, qui carnis resurrectionem negabant, solam spiritualem resurrectionem confitentes, per quam homo a morte peccati resurget : unde Apostolus, II ad Timoth. II, 18, dicit de quibusdam : *Qui a veritate exciderunt, dicentes resurrectionem jam factam, et subvertent quorundam fidem* : ad quorum removendum errorem, ut resurrectio futura crederetur, dicitur in Symbolo Patrum : « Expecto resurrectionem mortuorum. »

### CAPUT CLXIV.

*Qualis erit resurgentium operatio.*

Oportet autem considerare ulterius qualis sit operatio resurgentium. Necesse enim est cujuslibet viventis esse aliquam operationem cui principaliter intendit, et in hoc dicitur vita ejus consistere : sicut qui voluptatibus principaliter vacant,

<sup>1</sup> Al. : « pervenitur invenire. »



dicuntur vitam voluptuosam agere; qui vero contemplationi, contemplativam: qui vero civitatibus gubernandis, civilem. Ostensum est autem quod resurgentibus neque ciborum neque venereorum aderit usus, ad quem omnia corporalia exercitia ordinari videntur. Subtractis autem corporalibus exercitiis remanent spirituales operationes, in quibus ultimum hominis finem consistere diximus: quem quidem finem adipisci resurgentibus competit a statu corruptionis et mutabilitatis liberatis, ut ostensum est. Non autem in quibuscumque spiritualibus actibus ultimus finis hominis consistit, sed in hoc quod Deus per essentiam videatur, ut supra ostensum est. Deus autem æternus est: unde oportet quod intellectus æternitati conjungatur. Sicut igitur qui voluptati vacant, voluptuosam vitam agere dicuntur, ita qui divina potiuntur visione, æternam obtinent vitam, secundum illud Joan. xvii, 3: *Hæc est vita æterna, ut cognoscant te Deum verum, et quem misisti Jesum Christum.*

## CAPUT CLXV.

*Quod Deus per essentiam videbitur, non per similitudinem.*

Videbitur autem Deus per essentiam ab intellectu creato, non per aliquam sui similitudinem, qua in intellectu præsentem, res intellecta possit distare, sicut lapis per similitudinem suam præsentem est oculo, per substantiam vero absens; sed, sicut supra ostensum est, ipsa Dei essentia intellectui creato conjungitur quodammodo, ut Deus per essentiam videri possit. Sicut igitur in ultimo fine videbitur quod prius de Deo credebatur, ita quod sperabatur ut distans tenebitur ut præsentem; et hoc comprehensio nominatur, secundum illud Apostoli Philip. iii, 12: *Sequor autem, si quo modo comprehendam: quod non est intelligendum secundum quod comprehensio inclusionem importat, sed secundum quod importat præsentialitatem et attentionem quamdam ejus quod dicitur comprehendendi.*

(a) Ex S. Augustino.

## CAPUT CLXVI.

*Quod videre Deum est summa perfectio et delectatio.*

Rursus considerandum est quod ex apprehensione convenientis, delectatio generatur, sicut visus delectatur in pulchris coloribus, et gustus in suavis saporibus. Sed hæc quidem delectatio sensuum potest impediri propter organi indispositionem: nam « oculis ægris odiosa est lux, quæ puris est amabilis (a). » Sed quia intellectus non intelligit per organum corporale, ut supra ostensum est; delectationi quæ est in consideratione veritatis, nulla tristitia contrariatur. Potest tamen per accidens ex consideratione intellectus tristitia sequi, in quantum id quod intelligitur, apprehenditur ut nocivum; ut sic delectatio quidem adsit intellectui de cognitione veritatis, tristitia autem in voluntate sequatur de re quæ cognoscitur, non in quantum cognoscitur, sed in quantum suo actu nocet. Deus autem hoc ipsum quod est, veritas est. Non potest igitur intellectus Deum videns, in ejus visione non delectari.

Iterum. Deus est ipsa bonitas, quæ est ratio dilectionis: unde necesse est ipsam diligere ab omnibus apprehendentibus ipsam. Licet enim aliquid quod bonum est, possit non diligere, vel etiam odio haberi; hoc non est in quantum apprehenditur ut bonum, sed in quantum apprehenditur ut nocivum. In visione igitur Dei, qui est ipsa bonitas et veritas, oportet sicut comprehensionem, ita dilectionem, seu delectabilem fruitionem adesse, secundum illud Isaïæ ult., 14: *Videbitis, et gaudebit cor vestrum.*

## CAPUT CLXVII.

*Quod omnia videntia Deum confirmata sunt in bono.*

Ex hoc autem apparet quod anima videns Deum vel quæcumque alia spiritualis creatura habet voluntatem confirmatam in ipso, ut ad contrarium de cetero non flectatur. Cum enim objectum voluntatis sit bonum, impossibile est voluntatem inclinari in aliquid nisi sub aliqua ratione boni. Possibile est autem



in quocumque particulari bono aliquid deficere, quod ipsi cognoscenti relinquatur in alio quærendum : unde non oportet voluntatem videntis quodcumque bonum particulare in illo solo consistere, ut extra ejus ordinem non divertat. Sed in Deo, qui est bonum universale et ipsa bonitas, nihil boni deest quod alibi quæri possit, ut supra ostensum est. Quicumque igitur Dei essentiam videt, non posset voluntatem ab eo divertere, quin in omnia secundum rationem ipsius tendat.

Est etiam hoc videre per simile in intelligibilibus. Intellectus enim noster potest dubitando hac atque illac divertere, quousque ad primum principium perveniatur, in quo necesse est intellectum firmari. Quia igitur finis in appetibilibus est sicut principium in intelligibilibus, potest quidem voluntas ad contraria flecti quousque ad cognitionem vel fruitionem ultimi finis veniatur, in qua necesse est ipsam firmari. Esset etiam contra rationem perfectæ felicitatis, si homo in contrarium converti posset : non enim totaliter excluderetur timor de amittendo, et sic non esset totaliter desiderium quietatum : unde Apocalypsis iii, 12, dicitur de beato : *Foras non egredietur amplius.*

### CAPUT CLXVIII.

*Quod corpora erunt omnino obedientia animæ.*

Quia vero corpus est propter animam, sicut materia propter formam, et organum propter artificem; animæ vitam prædictam consecutæ tale corpus in resurrectione adjungetur divinitus, quale competat beatitudini animæ : quæ enim propter finem sunt, disponi oportet secundum exigentiam finis. Animæ autem ad summum operationis intellectualis pertingenti non convenit corpus habere per quod aliquando impediatur aut retardetur. Corpus autem humanum ratione suæ corruptibilitatis impedit animam et retardat, ut nec continuæ contemplationi insistere valeat, neque ad summum contemplationis pervenire : unde per abstractionem a sensibus corporis homines aptiores ad divina quædam capienda redduntur. Nam prophetiæ revelationes dormientibus, vel in aliquo

excessu mentis existentibus, manifestantur, secundum illud Num. xii, 16 : *Si quis fuerit inter vos Propheta Domini, in visione apparebo ei, vel per somnium loquar ad eum* \*. Corpora igitur resurgentium beatorum non erunt corruptibilia et animam retardantia, ut nunc; sed magis incorruptibilia, et totaliter obedientia ipsi animæ, ut in nullo ei resistant.

### CAPUT CLXIX.

*De dotibus corporum glorificatorum.*

Ex hoc autem perspicui potest, qualis sit dispositio corporum beatorum. Anima enim est corporis forma et motor. In quantum est forma, non solum est principium corporis quantum ad esse substantiale, sed etiam quantum ad propria accidentia, quæ causantur in subjecto ex unione formæ ad materiam. Quanto autem forma fuerit fortior, tanto impressio formæ in materia minus potest impediri a quocumque exteriori agente; sicut patet in igne, cujus forma, quæ dicitur esse nobilissima inter elementares formas, hoc confert igni ut non de facili transmutetur a sua naturali dispositione patiendi ab aliquo agente. Quia igitur anima beata in summo nobilitatis et virtutis erit, utpote rerum primo principio conjuncta, confert corpori sibi divinitus unito, primo quidem esse substantiale nobilissimo modo, totaliter ipsum sub se continendo, unde subtile et spirituale erit; dabit etiam sibi qualitatem nobilissimam, scilicet gloriam claritatis; et propter virtutem animæ a nullo agente a sua dispositione poterit transmutari, quod est ipsum impassibile esse; et quia obediet totaliter animæ, ut instrumentum motori, agile reddetur. Erunt igitur hæc quatuor conditiones corporum beatorum : subtilitas, claritas, impassibilitas et agilitas. Unde Apostolus I ad Corinthi. xv, 42, dicit : *Corpus quod per mortem seminatur in corruptione, surget in incorruptione* quantum ad impassibilitatem; 43 : *seminatur in ignobilitate, surget in gloria*, quantum ad claritatem; 43 : *seminatur in infirmitate, surget in virtute*, quantum ad agilitatem; 44 : *seminatur corpus animale, surget corpus spirituale*, quantum ad subtilitatem.

## CAPUT CLXX.

*Quod homo tunc innovabitur, et omnis creatura corporalis.*

Manifestum est autem quod ea quæ sunt ad finem, disponuntur secundum exigentiam finis : unde si id propter quod sunt aliqua, varietur secundum perfectum et imperfectum, ea quæ ad ipsum ordinantur, diversimode disponi oportet, ut ei deserviant secundum utrumque statum : cibus enim et vestimentum aliter præparantur puero, et aliter viro. Ostensum est autem supra, quod creatura corporalis ordinatur ad rationalem naturam quasi ad finem. Oportet igitur quod homine accipiente ultimam perfectionem per resurrectionem, creatura corporalis diversum statum accipiat : et secundum hoc dicitur innovari mundus, homine resurgente, secundum illud, Apoc. xxi, 1 : *Vidi cælum novum et terram novam*; et Isaiaë lxy, 17; *Ecce ego creo cælos novos et terram novam.*

## CAPUT CLXXI.

*Quæ creaturæ innovabuntur, et quæ manebunt.*

Considerandum tamen est, quod diversa genera creaturarum corporalium secundum diversam rationem ad hominem ordinantur. Manifestum est enim quod plantæ et animalia deserviunt homini in auxilium infirmitatis ipsius, dum ex eis habet victum et vestitum et vehiculum et hujusmodi, quibus infirmitas humana sustentatur. In statu tamen ultimo per resurrectionem tolletur ab homine omnis infirmitas talis : neque enim indigebunt ulterius homines cibus ad vescendum, cum sint incorruptibiles, ut supra ostensum est; neque vestimentis ad operiendum, utpote qui claritate gloriæ vestientur; neque animalibus ad vehiculum, quibus agilitas adierit; neque aliquibus remediis ad sanitatem conservandam, utpote qui impassibiles erunt. Igitur hujusmodi corporeas creaturas, scilicet plantas et animalia et alia hujusmodi corpora mixta, conveniens est in statu illius ultimæ consummationis

non remanere. Quatuor vero elementa, scilicet ignis, aer et aqua et terra, ordinantur ad hominem non solum quantum ad usum corporalis vitæ, sed etiam quantum ad constitutionem corporis ejus : nam corpus humanum ex elementis constitutum est. Sic igitur essentialem ordinem habent elementa ad corpus humanum. Unde homine consummato in corpore et anima, conveniens est ut etiam elementa remaneant, sed in meliorem dispositionem mutata. Corpora vero cælestia quoniam ad sui substantiam neque in usu corruptibilis vitæ ab homine assumuntur, neque corporis humani substantiam intrans; deserviunt tamen homini in quantum ex eorum specie et magnitudine excellentiam sui Creatoris demonstrant : unde frequenter in Scripturis homo movetur ad considerandum cælestia corpora, ut ex eis adducatur in reverentiam divinam, ut patet Isai. xl, 26 : *Levate in excelsum oculos vestros, et videte quis creavit hæc.* Et quamvis in statu perfectionis illius homo ex creaturis sensibilibus in Dei notitiam non adducatur, cum Deum videat in se ipso; tamen delectabile est et jucundum etiam cognoscenti causam, considerare qualiter ejus similitudo resplescat in effectu; unde et sanctis cedet ad gaudium considerare refulgentiam divinæ bonitatis in corporibus, et præcipue in cælestibus, quæ aliis præminere videntur. Habent etiam corpora cælestia essentialem quodammodo ordinem ad corpus humanum secundum rationem causæ agentis, sicut elementa rationem causæ materialis. Homo enim generat hominem, et sol : unde et hæc ratione convenit etiam corpora cælestia remanere.

Non solum ex comparatione ad hominem, sed etiam ex prædictis corporearum creaturarum naturis idem apparet. Quod enim secundum nihil sui est incorruptibile, non debet remanere in illo incorruptionis statu. Corpora quidem cælestia incorruptibilia sunt secundum totum et partem; elementa vero secundum totum, sed non secundum partem; homo vero secundum partem, scilicet animam rationalem, sed non secundum totum, quia compositum per mortem dissolvitur; animalia vero et plantæ et omnia corpora mixta neque secundum totum neque secundum partem incorruptibilia sunt. Convenienter igitur in illo ultimo incorruptionis statu remanebunt quidem

homines et elementa et corpora cœlestia, non autem alia animalia, neque plantæ, aut corpora mixta.

Rationabiliter etiam idem apparet ex ratione universi. Cum enim homo pars sit universi corporei, in ultima hominis consummatione necesse est universum corporeum remanere; non enim videtur esse pars perfecta, si fuerit sine toto. Universum autem corporeum remanere non potest nisi partes essentielles ejus remaneant. Sunt autem partes ejus essentielles corpora cœlestia et elementa, utpote ex quibus tota mundi machina consistit; cetera vero ad integritatem corporei universi pertinere non videntur, sed magis ad quemdam ornatum et decorem ipsius, qui competit statui mutabilitatis, secundum quod ex corpore cœlesti ut agente, et elementis ut materialibus, generantur animalia et plantæ et corpora mineralia. In statu autem ultimæ consummationis alius ornatu elementis attribuetur qui deceat incorruptionis statum. Remanebunt igitur in illo statu homines, elementa et corpora cœlestia, non autem animalia et plantæ et corpora mineralia.

## CAPUT CLXXII.

### *Quod corpora cœlestia cessabunt a motu.*

Sed cum corpora cœlestia continue moveri videantur, potest alicui videri quod si eorum substantia maneat, tunc et in illo consummationis statu moveantur. Et quidem si ea ratione motus corporibus cœlestibus adesset qua ratione adest elementis, rationabilis esset sermo. Motus enim elementalis gravibus vel levibus adest propter eorum perfectionem consequendam: tendunt enim suo motu naturali in proprium locum sibi convenientem, ubi melius est eis esse: unde in illo ultimo consummationis statu unumquodque elementum et quæcumque pars ejus in suo proprio loco erit. Sed hoc de motu corporum cœlestium dici non potest, cum corpus cœleste nullo loco obtento quiescat; sed sicut naturaliter movetur ad quodcumque ubi, ita et naturaliter discedat ab eo. Sic ergo non deperit aliquid a corporibus cœlestibus, si motus eis auferatur, ex quo motus eis non inest ut ipsa perficiantur. Ridiculum etiam est dicere, quod sicut corpus leve

per suam naturam movetur sursum, ita corpus cœleste per suam naturam circulariter moveatur sicut per activum principium. Manifestum est enim quod natura semper intendit ad unum: unde illud quod ex sui ratione unitati repugnat, non potest esse finis ultimus naturæ. Motus autem unitati repugnat, inquantum id quod movetur, alio et alio modo se habet dum movetur. Natura igitur non producit motum propter se ipsum, sed causat motum intendens terminum motus, sicut natura levis intendit locum sursum in ascensu, et sic de aliis. Cum igitur circularis cœlestis corporis motus non sit ad aliquod ubi determinatum, non potest dici quod motus circularis corporis principium activum sit natura, sicut est principium motus gravium et levium. Unde manente eadem natura corporum cœlestium, nihil prohibet ipsa quiescere, licet ignem impossibile est quiescere extra proprium locum existentem, dummodo remaneat eadem natura ipsius. Dicitur tamen motus cœlestis corporis naturalis, non propter principium activum motus, sed propter ipsum mobile, quod habet aptitudinem ut sic moveatur. Relinquitur ergo quod motus corporis cœlestis sit ab aliquo intellectu.

Sed cum intellectus non moveat nisi ex intentione finis, considerare oportet quis sit finis motus corporum cœlestium. Non autem potest dici quod ipse motus sit finis: motus enim cum sit via ad perfectionem, non habet rationem finis, sed magis ejus quod est ad finem. Similiter etiam non potest dici quod renovatio sit terminus motus cœlestis corporis, ut scilicet propter hoc cœleste corpus moveatur, ut omne ubi ad quod est in potentia, adipiscatur in actu: quia hoc infinitum est; infinitum autem repugnat rationi finis. Oportet igitur hinc considerare finem motus cœli. Manifestum est enim quod omne corpus motum ab intellectu est instrumentum ipsius. Finis autem motus instrumenti est forma a principali agente concepta, quæ per motum instrumenti in actum reducit. Forma autem divini intellectus, quam per motum cœli complet, est perfectio rerum per viam generationis et corruptionis. Generationis autem et corruptionis ultimus finis est nobilissima forma, quæ est anima humana: cujus ultimus finis est vita æterna, ut supra ostensum est. Est igitur ultimus finis motus cœli multiplicatio

hominum producendorum ad vitam æternam. Hæc autem multitudo non potest esse infinita: nam intentio cujuslibet intellectus stat in aliquo finito. Completo igitur numero hominum ad vitam æternam producendorum, et eis in vita æterna constitutis, motus cœli cessabit, sicut motus cujuslibet instrumenti cessat postquam fuerit opus perfectum. Cessante autem motu cœli cessabit per consequens motus in inferioribus corporibus, nisi solum motus qui erit ab anima in hominibus: et sic totum universum corporeum habebit aliam dispositionem et formam, secundum illud I Corinth. vii, 31: *Præterit figura hujus mundi.*

### CAPUT CLXXIII.

*De præmio hominis secundum ejus opera, et miseria.*

Considerandum est autem, quod si est determinata via perveniendi ad aliquem finem, illum consequi non possunt qui per contrariam viam incedunt, aut a via recta deficiunt: non enim sanatur æger, si contrariis utatur, quæ medicus prohibet; nisi forte per accidens. Est autem determinata via perveniendi ad felicitatem: per virtutem scilicet. Non enim consequitur aliquid finem suum, nisi quod sibi proprium est bene operando: neque enim planta fructum faceret, si naturalis operationis modus non servaretur in ipsa; neque cursor perveniret ab bravium, aut miles ad palmam, nisi uterque secundum proprium officium operaretur. Recte autem operari hominem propriam operationem est operari ipsum secundum virtutem: nam virtus uniuscujusque rei est quæ bonum facit habentem, et opus ejus bonum reddit, ut dicitur II *Ethic.* Cum igitur ultimus finis hominis sit vita æterna, de qua dictum est; non omnes ad eam perveniunt, sed soli qui secundum virtutem operantur.

Præterea. Est ostensum supra, sub divina providentia contineri non solum naturalia, sed etiam res humanas, non in universali tantum, sed etiam in singulari. Ad eum autem qui singularium hominum curam habet, pertinet præmia virtuti reddere et pœnas peccato: quia pœna est

medicina culpæ et ordinativa ipsius, ut supra habitum est. Virtutis autem præmium felicitas est, quæ ex bonitate divina homini datur. Pertinet ergo ad Deum his qui contra virtutem agunt, non felicitatem, sed contrarium in pœnam reddere, scilicet extremam miseriam.

### CAPUT CLXXIV.

*Quod præmium hominis est post hanc vitam, et similiter miseria.*

Considerare autem oportet, quod contrariorum contrarii sunt effectus. Operationi autem secundum virtutem contraria est operatio secundum malitiam. Oportet igitur quod miseria, ad quam per operationem malitiæ pervenitur, contraria sit felicitati, quam meretur operatio virtutis. Contraria autem sunt unius generis. Cum igitur felicitas ultima, ad quam pervenitur per operationem virtutis, non sit aliquid bonum hujus vitæ, sed post hanc vitam, ut ex supra dictis patet; consequens est ut ultima miseria, ad quam malitia perducit, sit aliquod malum post hanc vitam.

Præterea. Omnia bona vel mala hujus vitæ inveniuntur ad aliquid ordinari. Bona enim exteriora, et etiam bona corporalia organice deserviunt ad virtutem, quæ est directe via perveniendi ad beatitudinem apud eos qui prædictis rebus bene utuntur; sicut et apud eos qui male eis utuntur, sunt instrumenta malitiæ, per quam ad miseriam pervenitur et similiter mala his opposita, utputa infirmitas, paupertas et hujusmodi, quibusdam sunt ad profectum virtutis, aliis autem ad malitiæ augmentum, secundum quod eis diversimode utuntur. Quod autem ordinatur ad aliud non est<sup>1</sup> ultimum præmium vel pœna. Non igitur ultima felicitas, neque ultima miseria in bonis vel malis hujus vitæ consistit.

### CAPUT CLXXV.

*In quo consistat illa extrema miseria quantum ad pœnam damni<sup>2</sup>*

Quia igitur miseria, ad quam ducit malitia, contrariatur felicitati, ad quam

<sup>1</sup> Parm. addit: « non est ultimus finis, quia. »

<sup>2</sup> Parm.: « in quo est miseria hominis quantum ad pœnam damni. »

ducit virtus : oportet ea quæ ad miseriam pertinent sumere per oppositum eorum quæ de felicitate sunt dicta. Dictum est autem superius, quod ultima hominis felicitas, quantum ad intellectum quidem, consistit in plena Dei visione ; quantum ad affectum vero in hoc quod voluntas hominis in prima bonitate sit immobiliter firmata. Erit igitur extrema miseria hominis in hoc quod intellectus totaliter divino lumine privetur, et affectus a Dei bonitate obstinate avertatur : et hæc est præcipua miseria damnatorum, quæ vocatur pœna damni.

## CAPUT CLXXVI.

*Quod illi qui sunt in illa extrema miseria non privantur cognitione naturali, nec dilectione*<sup>1</sup>.

Considerandum tamen est quod, ut ex supradictis patet, malum non potest totaliter excludere bonum, cum omne malum in aliquo bono fundetur. Miseria igitur quamvis felicitati, quæ ab omni malo erit immunis, opponatur, oportet tamen quod in bono naturæ fundetur. Bonum autem intellectualis naturæ in hoc consistit quod intellectus respiciat verum, et voluntas tendat in bonum. Omne autem verum et omne bonum derivatur a primo et summo bono, quod Deus est. Unde oportet quod intellectus hominis in illa extrema miseria constituti, aliquam Dei cognitionem habeat, et aliquam Dei dilectionem secundum scilicet quod est principium naturalium perfectionum, quæ est naturalis dilectio, non autem secundum quod in se ipso est, neque secundum quod est principium virtutum, seu etiam gratiarum, et quorumcumque bonorum quibus intellectualis natura ab ipso perficitur, quæ est perfectio virtutis et gloriæ.

## CAPUT CLXXVII.

*Quod iidem non carent libero arbitrio*<sup>2</sup>.

Nec tamen homines in tali miseria constituti, libero arbitrio carent, quamvis habeant voluntatem immobiliter firmatam in malo ; sicut nec beati, licet habeant voluntatem firmatam in bono. Libertas

enim arbitrii proprie ad electionem se extendit : electio autem est eorum quæ sunt ad finem : ultimus autem finis naturaliter appetitur ab unoquoque : unde omnes homines ex hoc quod sunt intellectuales, appetunt naturaliter felicitatem tamquam ultimum finem, et adeo immobiliter, quod nullus potest velle fieri miser. Nec hoc libertati repugnat arbitrii, quæ non se extendit nisi ad ea quæ sunt ad finem. Quod autem in hoc particulari hic homo ultimam suam felicitatem, ille autem in illo ponat, non convenit huic aut illi in quantum est homo, cum in tali æstimatione et appetitu homines differant : sed unicuique hoc competit secundum quod est in se aliqualis. Dico autem aliqualem, secundum aliquam passionem vel habitum : unde si transmutetur, aliud ei optimum videbitur. Et hoc maxime patet in his qui ex passione appetunt aliquid ut optimum ; cessante autem passione, ut iræ, vel concupiscentiæ, non similiter judicant illud bonum, ut prius. Habitus autem permanentiores sunt, unde firmiter perseverant in his quæ ex habitu prosequuntur. Tamen quamdiu habitus mutari potest, etiam appetitus et æstimatio hominis de ultimo fine mutatur. Hoc autem convenit tantum hominibus in hac vita, in qua sunt in statu mutabilitatis : anima enim post hanc vitam intransmutabilis est secundum alterationem, quia hujusmodi transmutatio non competit ei nisi per accidens secundum aliquam transmutationem factam circa corpus. Resumpto vero corpore non sequetur ipsa mutatio corporis, sed potius e converso. Nunc enim anima infunditur corpori seminato, et ideo convenienter transmutationes corporis sequitur ; tunc vero corpus unietur animæ præexistenti, unde totaliter sequetur ejus condiciones. Anima igitur quemcumque finem sibi ultimum præstituisse invenitur in statu mortis, in eo fine perpetuo permanebit, appetens illud ut optimum, sive sit bonum sive sit malum, secundum illud Eccle. xi, 3 : *Si ceciderit lignum ad austrum, aut ad aquilonem, in quocumque loco ceciderit, ibi erit.* Sic igitur post hanc vitam qui boni in morteveniuntur, habebunt perpetuo voluntatem firmatam in bono ; qui autem mali tuncveniuntur, erunt perpetuo obstinati in malo.

<sup>1</sup> Hic incipit in Cod. S. Gen. cap. CLXXVI.

<sup>2</sup> Hic incipit in Cod. S. Gen. cap. CLXXVII.



## CAPUT CLXXVIII.

*Quod peccata mortalia non dimittuntur post hanc vitam, sed bene venialia.*

Ex hoc autem considerari potest, quod peccata mortalia post hanc vitam non dimittuntur; venialia vero dimittuntur. Nam peccata mortalia sunt per aversionem a fine ultimo, circa quem homo immobiliter firmatur post mortem, ut dictum est; peccata vero venialia non respiciunt ultimum finem, sed viam ad finem ultimum.

## CAPUT CLXXIX.

*Quod mali dolent se peccata commisisse quia perdididerunt quod elegerant, et tamen habent voluntatem obstinatam in malo*<sup>1</sup>.

Sed si voluntas malorum post mortem obstinate firmatur in malo, semper appetent ut optimum quod prius appetierunt. Non ergo dolebunt se peccasse: nullus enim dolet se persecutum esse quod aestimat esse optimum.

Sed sciendum est, quod damnati ad ultimam miseriam, ea quæ appetierant ut optima, habere post mortem non poterunt: non enim ibi dabitur luxuriosis facultas luxuriandi, aut invidis facultas offendendi et impediendi alios: et idem est de singulis vitiis. Cognoscent autem, eos qui secundum virtutem vixerunt, se obtinere quod appetierant ut optimum. Dolent ergo mali quia peccata commiserunt, non propter hoc quia peccata eis displiceant, quia etiam tunc mallent peccata illa committere, si facultas daretur, quam Deum habere; sed propter hoc quod illud quod elegerunt, habere non possunt, et illud quod respuerunt, possent habere. Sic igitur et voluntas eorum perpetuo manebit obstinata in malo, et tamen gravissime dolebunt de culpa commissa, et de gloria amissa: et hic dolor vocatur remorsus conscientiae, qui metaphorice in Scripturis vermis nominatur, secundum illud Isaiaë ult. 24: *Vermis eorum non morietur.*

## CAPUT CLXXX.

*Quod corpora damnatorum erunt passibilia et tamen integra, et sine dotibus.*

Sicut autem in sanctis beatitudo animæ quodammodo ad corpora derivatur, ut supra dictum est; ita etiam miseria animæ derivabitur ad corpora damnatorum: hoc tamen observato, quod sicut miseria bonum naturæ non excludit ab anima, ita nec etiam a corpore. Erunt igitur corpora damnatorum integra in sui natura, non tamen illas condiciones habebunt quæ pertinent ad gloriam beatorum: non enim erunt subtilia et impassibilia; sed magis in sua grossitie et passibilitate remanebunt, et augebuntur in eis: non erunt agilia, sed vix ab anima portabilia: non erunt clara, sed obscura, ut obscuritas animæ in corporibus demonstretur, secundum illud Isaiaë xiii, 8: *Facies combustæ vultus eorum.*

## CAPUT CLXXXI.

*Quod corpora damnatorum, licet passibilia, erunt tamen incorruptibilia.*

Sciendum tamen est, quod licet damnatorum corpora passibilia sint futura, non tamen corrumpentur; quamvis hoc esse videatur contra rationem eorum quæ nunc experimur; nam passio magis facta abjicit a substantia. Erit tamen tunc duplex ratio quare passio in perpetuum continuata passibilia corpora nec corrumpet. Prima quidem quia cessante motu cæli, ut supra dictum est, necesse est omnem mutationem naturæ cessare. Non igitur aliquod alterari poterit alteratione naturæ, sed solum alteratione animæ. Dico autem alterationem naturæ, sicut cum aliquid ex calido fit frigidum, vel qualiterenque variatur secundum naturale esse qualitatum. Alterationem autem animæ dico, sicut cum aliquid recipit qualitatem non secundum esse ipsius spirituale, sicut pupilla non recipit formam coloris ut sit colorata, sed uti colorem sentiat. Sic igitur et corpora damnatorum patientur ab igne, vel a quo-

<sup>1</sup> Hic incipit in Cod. S. Gen. cap. CLXXIX.



cumque alio corporeo, non ut alterentur ad speciem vel qualitatem ignis, sed ut sentiant excellentias qualitatum ejus : et hoc erit afflictivum, inquantum hujusmodi excellentiæ contrariantur harmoniæ, in qua consistit et delectatur sensus<sup>1</sup> non tamen erit corruptivum, quia spiritalis receptio formarum naturam corporis non transmutat, nisi forte per accidens. Secunda ratio erit ex parte animæ, ad cujus perpetuitatem corpus trahetur divina virtute : unde anima damnati, inquantum est forma et natura talis corporis, dabit ei esse perpetuum ; non tamen dabit ei ut pati non possit, propter suam imperfectionem. Sic igitur semper patientur<sup>2</sup> illa corpora, non tamen corrumpentur.

## CAPUT CLXXXII.

*Quod pœna damnatorum est in malis ante resurrectionem.*

Sic igitur secundum prædicta patet quod tam felicitas quam miseria principaliter consistit in anima ; secundo autem et per quamdam derivationem in corpore. Non igitur felicitas vel miseria animæ dependet ex felicitate vel miseria corporis, sed magis e converso. Cum igitur post mortem animæ remaneant ante resurrectionem corporum, quædam quidem cum merito beatitudinis, quædam autem cum merito miseriæ ; manifestum est quod etiam ante resurrectionem, animæ quorundam prædicta felicitate fruuntur, secundum illud Apostoli II Corinth. v, 1 : *Scimus quoniam si terrestris domus nostra hujus habitationis dissolvatur quod ædificationem ex Deo habemus domum non manufactam, sed æternam in cœlis* : et infra 8 : *Audemus autem, et bonam voluntatem habemus magis peregrinari a corpore, et præsentem esse ad Dominum*. Quorundam vero animæ in miseria vivent, secundum illud Luc, xvi, 22 : *Mortuus est dives, et sepultus in inferno*.

<sup>1</sup> Al. : « consistit et delectatur sensus. »  
Parm. : « in qua consistit delectatio sensus. »

## CAPUT CLXXXIII.

*Quod pœna damnatorum est in malis tam spiritualibus, quam corporalibus.*

Considerandum tamen est quod sanctorum animarum felicitas, in solis bonis spiritualibus erit ; pœna vero animarum damnatarum ante resurrectionem non solum erit in malis spiritualibus, ut aliqui putaverunt, sed etiam pœnas corporeas sustinebunt. Cujus diversitatis ratio est : quia animæ sanctorum dum in hoc mundo fuerunt corporibus unitæ, suum ordinem servaverunt, se rebus corporalibus non subjiciendo, sed soli Deo, in cujus fruitione tota eorum felicitas consistit, non autem in aliquibus corporalibus bonis ; malorum autem animæ, naturæ ordine non servato, se per affectum rebus corporalibus subdiderunt, divina et spiritalia contemnent. Unde consequens est ut puniantur non solum ex privatione spiritalium honorum, sed etiam per hoc quod rebus corporalibus subdantur. Et ideo si qua in Scripturis sacris inveniuntur quæ sanctis animabus corporalium bonorum retributionem promittant, mystice sunt exponenda, secundum quod in prædictis Scripturis spiritalia sub corporalium similitudine designari solent. Quæ vero animabus damnatorum prænuntiant pœnas corporeas, utpote quod ab igne inferni cruciabantur, sunt secundum litteram intelligenda.

## CAPUT CLXXXIV.

*Utrum anima possit pati ab igne corporeo.*

Ne autem alicui absurdum videatur, animam a corpore separatam ab igne corporeo pati, considerandum est, non esse contra naturam spiritualis substantiæ alligari corpori. Hoc enim et per naturam fit, sicut patet in unione animæ ad corpus, et per magicas artes, per quas aliquis spiritus imaginibus aut annulis, aut aliquibus hujusmodi alligatur. Hoc igitur ex divina virtute fieri potest ut aliquæ spirituales substantiæ, quamvis secundum suam naturam sint super omnia corporalia elevata, aliquibus cor-

<sup>2</sup> Parm. : « patientur » « corrumpuntur. »

poribus alligentur, utputa igni infernali; non ita quod ipsum vivificent <sup>1</sup>, sed quod eo quodammodo adstringantur: et hoc ipsum consideratum <sup>2</sup> a spirituali substantia, quod scilicet creaturæ infimæ quodammodo subditur, ei est afflictivum. Inquantum igitur hujusmodi consideratio est spiritualis substantiæ afflictiva, verificatur quod dicitur, quod anima » eo ipso quod se aspicit cremari crematur (a); » et iterum quod ille ignis spiritualis sit: nam immediatum affligens est ignis apprehensus ut alligans. Inquantum vero ignis cui alligatur, corporeus est, sic verificatur quod dicitur a Gregorio, quod « anima non solum videndo, sed etiam experiendo ignem patitur ». Et quia ignis ille non ex sua natura, sed ex virtute divina habet quod spiritualement substantiam alligare possit, convenienter dicitur a quibusdam, quod ignis ille agit in animam ut instrumentum divinæ justitiæ vindicantis, non quidem ita quod agat in spiritualement substantiam, sicut agit in corpora calefaciendo, desiccando, dissolvendo, sed alligando, ut dictum est. Et quia proximum afflictivum spiritualis substantiæ <sup>3</sup>, est apprehensio ignis alligantis in pœnam, manifeste perpendi potest, quod afflictio non cessat, etiam si ad horam dispensative contingat spiritualement substantiam igne non ligari; sicut aliquis qui esset ad perpetua vincula damnatus, ex hoc continuam afflictionem non minus sentiret, etiam si ad horam a vinculis solveretur.

#### CAPUT CLXXXV.

*Quod post hanc vitam sunt quædam purgatoriarum pœnarum non æternarum, ad implendas penitentias de mortalibus non impletas in vita.*

Licet autem aliquæ animæ statim cum a corporibus absolvuntur, beatitudinem æternam consequantur, ut dictum est; aliquæ tamen ab hac consecutione retardantur ad tempus. Contingit enim quandoque aliquos pro peccatis commissis, de quibus tamen finaliter pœnitent, pœnitentiam non implevisse in hac vita. Et quia ordo divinæ justitiæ habet ut pro

culpæ pœnæ reddantur, oportet dicere, quod post hanc vitam animæ pœnam exsolvent quam in hoc mundo non exsolvent; non autem ita quod ad ultimam miseriam damnatorum deveniant, cum per pœnitentiam ad statum caritatis sint reductæ, per quam Deo sicut ultimo fini adhæserunt, per quod vitam æternam meruerunt: unde relinquitur post hanc vitam esse quasdam purgatorias pœnas, quibus pœnitentiæ implentur non impletæ.

#### CAPUT CLXXXVI.

*Quod sunt aliquæ pœnæ purgatoriæ etiam venialium.*

Similiter etiam contingit aliquos ex hac vita decedere sine peccato mortali, sed tamen cum peccato veniali, per quod ab ultimo fine non avertuntur, licet circa ea quæ sunt ad finem, indebite inhærendo peccaverint: quæ quidem peccata in quibusdam viris perfectis ex fervore caritatis purgantur, in aliis autem oportet per aliquam pœnam hujusmodi peccata purgari: quia ad vitam æternam consequendam non perducitur nisi qui ab omni peccato et defectu fuerit immunis. Oportet igitur ponere purgatorias pœnas post hanc vitam. Habent autem istæ pœnæ quod sint purgatoriæ ex conditione eorum qui eas patiuntur, in quibus est caritas per quam voluntatem suam divinæ voluntati conformant, ex cujus caritatis virtute pœnæ quas patiuntur, eis ad purgationem prosunt: unde in iis qui sine caritate sunt, sicut in damnatis, pœnæ non purgant, sed semper imperfectio peccati remanet, et ideo semper pœna durat.

#### CAPUT CLXXXVII.

*Utrum æternam pœnam pati repugnet justitiæ divinæ, cum culpa fuerit temporalis.*

Non autem est contra rationem divinæ justitiæ ut aliquis pœnam perpetuam patiatur, quia nec secundum leges huma-

<sup>1</sup> Al.: « unificent. »

<sup>2</sup> Sic Cod. S. Gen. — Parm.: « considerandum » sed in notula: forte: « consideratum. »

<sup>3</sup> Al.: « afflictivum, et spiritualis substantiæ, etc. »

(a) Ex *Dialog.* S. Gregorii magni.

nas hoc exigitur ut pœna commensuretur culpæ in tempore. Nam pro peccato adulterii vel homicidii, quod in tempore brevi committitur, lex humana infert quandoque perpetuum exilium, aut etiam mortem, per quæ aliquis in perpetuum a societate civitatis excluditur : et quod exilium non in perpetuum duret, hoc per accidens contingit, quia vita hominis non est perpetua ; sed intentio iudicis ad hoc esse videtur ut eum, sicut potest, perpetuo puniat. Unde etiam non est injustum, si pro momentaneo peccato et temporali Deus æternam pœnam infert.

Similiter etiam considerandum est quod peccatori pœna æterna infertur, quem de peccato non pœnitet, etsic in ipso usque ad mortem perdurat. Et quia in suo æterno peccat, rationabiliter a Deo in æternum punitur. Habet etiam et quodlibet peccatum contra Deum commissum quamdam infinitatem ex parte Dei, contra quem committitur. Manifestum est enim quod quanto major persona est contra quam peccatur, tanto peccatum est gravius ; sicut qui dat alapam militi, gravius reputatur quam si daret rustico, et adhuc multo gravius si principi vel regi. Et sic cum Deus sit infinite magnus, offensa contra ipsum commissa est quodammodo infinita : unde et aliquo modo pœna infinita ei debetur. Non autem potest esse pœna infinita intensive, quia nihil creatum sic infinitum esse potest. Unde relinquitur quod peccato mortali debetur pœna infinita duratione.

Item. Ei qui corrigi potest, pœna temporalis infertur ad ejus correctionem vel purgationem. Si igitur aliquis a peccato corrigi non potest, sed voluntas ejus obstinate firmata est in peccato, sicut supra de damnatis dictum est, ejus pœna terminari non debet.

#### CAPUT CLXXXVIII.

*Quod prædicta conveniunt etiam aliis spiritualibus substantiis, sicut animabus.*

Quia vero homo in natura intellectuali cum Angelis convenit, in quibus etiam potest esse peccatum, sicut et in hominibus, ut supra dictum est, quæcumque

dicta sunt de pœna vel gloria animarum, intelligenda etiam sunt de gloria bonorum et pœna malorum Angelorum. Hoc tamen solum inter homines et Angelos differt, quod confirmationem voluntatis in bono et obstinationem in malo, animæ quidem humanæ habent cum a corpore separantur, sicut supra dictum est ; Angeli vero quando primo cum voluntate deliberata sibi finem præstituerunt vel Deum vel aliquid creatum, et ex tunc beati vel miseri facti sunt. In animabus enim humanis mutabilitas esse potest non solum ex libertate voluntatis, sed etiam ex mutabilitate corporis ; in Angelis vero ex sola libertate arbitrii. Et ideo Angeli ex prima electione immutabilitatem consequuntur ; animæ vero non nisi cum fuerint a corporibus exutæ.

#### CAPUT CLXXXIX<sup>1</sup>.

*Secundum quid gloria sanctorum vita æterna dicitur.*

Ad ostendendum igitur remunerationem bonorum, in Symbolo fidei dicitur, « Vitam æternam : » quæ quidem non est intelligenda æterna solum propter durationem, sed magis propter æternitatis fruitionem. Sed quia circa hoc etiam alia multa credenda occurrunt quæ dicta sunt de pœnis damnatorum et de finali statu mundi ; ut omnia hic comprehenderentur, in Symbolo Patrum positum est : « Vitam futuri sæculi : » futurum enim sæculum omnia hujusmodi comprehendit.

#### CAPUT CXC.

*Secundus<sup>2</sup> tractatus : de fide in quantum ad humanitatem Christi.*

Quia vero, sicut in principio dictum est, christiana fides circa duo præcipue versatur, scilicet circa Divinitatem Trinitatis, et circa humanitatem Christi ; præmissis his quæ ad Divinitatem pertinent et effectus ejus, considerandum restat de his quæ pertinent ad humanitatem Christi. Et quia, ut dicit Apostolus, I ad Timoth. 1, 15 : *Christus Jesus venit in*

<sup>1</sup> Hic incipit in Cod. S. Gen. cap. CLXXXIX, sed in Cod. 1060 Mazar. legitur: Incipit secunda pars Summæ editæ a fratre Thoma de Aquino, S. se-

cundus tractatus etc., Proœmium.

<sup>2</sup> Parm. omittit : « secundus tractatus.. in quantum. »

*hunc mundum peccatores salvos facere ; præmittendum videtur quomodo humanum genus in peccatum incidit, ut sic evidentius agnoscat quomodo per Christi humanitatem homines a peccatis liberantur.*

### CAPUT CXCI.

*De præceptis dati primo homini, et ejus perfectione in primo statu.*

Sicut <sup>4</sup> supra dictum est, homo in sui conditione taliter institutus fuit a Deo, ut corpus omnino esset animæ subjectum : rursumque inter partes animæ, inferiores vires rationi absque repugnantia subicerentur, et ipsa ratio hominis esset Deo subjecta. Ex hoc autem quod corpus erat animæ subjectum, contingebat quod nulla passio in corpore posset accidere quæ dominio animæ super corpus repugnaret : unde nec mors nec infirmitas in homine locum habebat. Ex subjectione vero inferiorum virium ad rationem erat in homine omnimoda mentis tranquillitas, quia ratio humana nullis inordinatis passionibus turbabatur. Ex hoc vero quod voluntas hominis erat Deo subjecta, homo referebat omnia in Deum sicut in ultimum finem, in quo ejus justitia et innocentia consistebat. Horum autem trium ultimum erat causa aliorum. Non enim hoc erat ex natura corporis, si ejus componentia considerentur quod in eo dissolutio sive quæcumque passio vitæ repugnans locum non haberet, cum esset ex contrariis elementis compositum. Similiter etiam non erat ex natura animæ quod vires etiam sensibiles absque repugnantia rationi subicerentur ; cum vires sensibiles naturaliter moveantur in ea quæ sunt delectabilia secundum sensum, quæ multotiens rectæ rationi repugnant. Erat igitur hoc ex virtute superiori, scilicet Dei, qui sicut animam rationabilem corpori conjunxit, omnem proportionem corporis et corporearum virtutum, ejusmodi sunt vires sensibiles, transcendentes : ita dedit animæ rationali virtutem ut supra conditionem corporis ipsum continere posset et vires sensibiles ; secundum quod rationali animæ competeat. Ut igitur ratio inferiora

sub se firmiter contineret, oportebat quod ipsa firmiter sub Deo contineretur, a quo virtutem prædictam habebat supra conditionem naturæ. Fuit ergo homo sic institutus ut nisi ratio ejus subduceretur a Deo, neque corpus ejus subduci poterat a nutu animæ, neque vires sensibiles a rectitudine rationis : unde quædam immortalis vita et impassibilis erat ; quia scilicet nec mori nec pati poterat, si non peccaret. Peccare vero poterat voluntate ejus nondum confirmata per adeptionem ultimi finis ; et sub hoc eventu poterat mori et pati. Et in hoc differt impassibilitas et immortalitas quam primus homo habuit, ab ea quam in resurrectione sancti habebunt, qui nunquam poterunt nec pati nec mori, voluntate eorum omnino confirmata in Deum, sicut supra dictum est. Differebat etiam quo ad aliud : quia post resurrectionem homines nec cibis nec venereis utentur ; primus autem homo sic conditus fuit ut necesse haberet vitam cibis sustentare, et ei incumberet generationi operam dare, ut genus humanum multiplicaretur ex uno. Unde duo præcepta accepit in sui conditione. Ad primum pertinet quod ei dictum est Gen. 1, 16 : « *De \* omni ligno quod* <sup>Et</sup> *est in paradiso, comedes ;* » ad secundum <sup>com</sup> quod ei dictum est ibid. 1, 28 : *Crescite et multiplicamini, et replete terram.*

### CAPUT CXCI.

*Quod ille perfectus status nominabatur originalis justitia ; et de loco in quo homo positus est.*

Hic autem hominis tam ordinatus status, originalis justitia nominatur, per quam et ipse suo superiori subditus erat, et ei omnia inferiora subiciebantur, secundum quod de eo dictum est Gen. 1, 26 : *Et præsit piscibus maris et volatilibus cæli* : et inter partes ejus etiam inferior absque repugnantia superiori subdebatur. Qui quidem status primo homini fuit concessus non ut cuidam personæ singulari, sed ut primo humanæ naturæ principio ; ita quod per ipsum simul cum natura humana traduceretur in posteros. Et quia unicuique debetur locus secundum convenientiam suæ conditio-

<sup>4</sup> Hic incipit cap. 1 in Cod. 1060 Mazar.

nis, homo sic ordinate institutus positus est in loco temperatissimo et delicioso, ut non solum interiorum molestiarum, sed etiam aliorum exteriorum omnis ei vexatio tolleretur.

## CAPUT CXCVIII.

*De ligno scientiæ boni et mali, et primo hominis præcepto.*

Quia vero prædictus status homini ex hoc dependebat quod humana voluntas Deo subiceretur; ut homo statim a principio assuefieret ad Dei voluntatem sequendam, proposuit Deus homini quædam præcepta, ut scilicet ex omnibus aliis lignis paradisi vesceretur, prohibens sub mortis comminatione ne de ligno scientiæ boni et mali vesceretur : cujus quidem ligni esus non ideo prohibitus est quia secundum se malus esset, sed ut homo saltem in hoc modico aliquid observaret ea sola ratione quia esset a Deo præceptum : unde prædicti ligni esus factus est malus, quia prohibitus. Dicebatur autem lignum illud scientiæ boni et mali; non quia haberet virtutem scientiæ causativam, sed propter eventum sequentem ; quia scilicet homo per ejus usum experimento didicit quid intersit inter obedientiæ bonum et inobedientiæ malum.

## CAPUT CXCVI.

*De seductione diaboli ad Evam.*

Diabolus igitur, qui jam peccaverat, videns hominem taliter institutum ut ad perpetuam felicitatem pervenire posset, a qua ipse deciderat, et nihilominus posset peccare ; conatus est a rectitudine justitiæ abducere, aggrediens hominem ex parte debiliori, tentans feminam, in qua minus vigeat sapientiæ donum vel lumen : et ut in transgressionem præcepti facilius inclinaret, exclusit mendaciter metum mortis, et ei illa promisit quæ homo naturaliter appetit, scilicet vitationem ignorantiam, dicens (Gen., iii, 5) : *Aperientur oculi vestri* : et excellentiam dignitatis, dicens : *Scientes bonum et malum*. Homo enim ex parte intellectus naturaliter fugit ignorantiam, et scientiam appetit; ex parte vero voluntatis, quæ naturaliter libera est, appetit celsitudinem

et perfectionem, ut nulli, vel quanto paucioribus potest, subdatur.

## CAPUT CXCV.

*Quid fuit inductivum mulieris.*

Mulier igitur repromissam celsitudinem simul, et perfectionem scientiæ concupivit. Accessit etiam ad hoc pulchritudo et suavitas fructus, alliciens ad edendum ; et sic metu mortis contempto, præceptum Dei transgressa est, de vetito ligno edendo : et sic ejus peccatum multiplex invenitur. Primo quidem superbiæ, qua inordinate excellentiam appetiit. Secundo curiositatis, qua scientiam ultra terminos sibi præfixos concupivit. Tertio gulæ, qua suavitate cibi permota est ad edendum. Quarto infidelitatis, per falsam æstimationem de Deo, dum credidit verbis diaboli contra Deum loquentis. Quinto inobedientiæ, præceptum Dei transgrediendo.

## CAPUT CXCVI.

*Quomodo pervenit peccatum ad virum.*

Ex persuasione autem mulieris peccatum usque ad virum pervenit, qui tamen, ut Apostolus dicit I Thimot., ii, 14, *non est seductus*, ut mulier, in hoc scilicet quod crederet verbis diaboli contra Deum loquentis. Non enim in ejus mente cadere poterat, Deum mendaciter aliquid comminatum esse, neque inutiliter a re utili prohibuisse. Allectus tamen fuit promissione diaboli, excellentiam et scientiam indebite appetendo. Ex quibus cum voluntas ejus a rectitudine justitiæ discessisset, uxori suæ morem gerere volens, in transgressionem divini præcepti eam secutus est, edendo de fructu ligni vetiti.

## CAPUT CXCVII.

*De effectu sequente culpam quantum ad rebellionem virium inferiorum rationi.*

Quia igitur dicti status tam ordinata integritas tota causabatur ex subjectione humanæ voluntatis ad Deum, consequens fuit ut subducta humana voluntate a subjectione divina, deperiret illa perfecta



subjectio inferiorum virium ad rationem, et corporis ad animam : unde consecutum est ut homo sentiret in inferiori appetitu sensibili, concupiscentiæ et iræ et ceterarum passionum inordinatos motus non secundum ordinem rationis, sed magis ei repugnantes, et eam plerumque obnubilantes, et quasi perturbantes : et hæc est repugnantia carnis ad spiritum, de qua Scriptura loquitur. Nam quia appetitus sensitivus, sicut et ceteræ sensitivæ vires, per instrumentum corporeum operatur, ratio autem absque aliquo organo corporali ; convenienter quod ad appetitum sensitivum pertinet carni imputatur ; quod vero ad rationem, spiritui, secundum quod spirituales substantiæ dici solent quæ sunt a corporibus separata.

## CAPUT CXCVIII.

*Quomodo fuit poena illata quantum ad necessitatem moriendi.*

Consecutum est etiam, ut in corpore sentiretur corruptionis defectus, ac per hoc homo incurreret necessitatem moriendi, quasi animatum non valens corpus in perpetuum continere, vitam ei præbendo : unde homo factus est passibilis et mortalis, non solum quasi potens pati et mori ut antea, sed quasi necessitatem habens ad patiendum et moriendum.

## CAPUT CXCIX.

*De aliis defectibus qui consequuntur in intellectu et voluntate.*

Consecuti sunt in homine per consequens multi alii defectus. Abundantibus enim in appetitu inferiori inordinatis motibus<sup>1</sup> passionum, simul etiam et in ratione deficiente lumine sapientiæ, quo divinitus illustrabatur voluntas dum erat Deo subjecta, per consequens affectum suum rebus sensibilibus subdidit, in quibus aberrans<sup>2</sup> a Deo multipliciter peccavit, et ulterius immundis spiritibus se subdidit per quos credidit in hujusmodi rebus agendis et acquirendis<sup>3</sup> sibi auxilium præstari ; et sic in humano genere idololatria et diversa peccatorum genera

processerunt : et quo magis in his homo corruptus fuit, et amplius a cognitione et desiderio bonorum spiritualium et divinarum recessit.

## CAPUT CC.

*Quomodo isti defectus derivati sunt ad posteros.*

Et quia prædictum originalis justitiæ bonum sic humano generi in primo parente divinitus attributum fuit, ut tamen per ipsum derivaretur in posteros ; remota autem causa removetur effectus ; consequens fuit ut primo homine prædicto bono per proprium peccatum privato, omnes posteri privarentur ; et sic de cetero, scilicet post peccatum primi parentis, omnes absque originali justitiâ et eum defectibus consequentibus sunt exorti. Nec hoc est contra ordinem justitiæ, quasi Deo puniente in filiis quod primus parens deliquit : quia ista poena non est nisi subtractio eorum quæ supernaturaliter primo homini divinitus sunt concessa, per ipsum in alios derivanda : unde aliis non debebantur, nisi quatenus per primum parentem in eos erant transitura : sicut si rex det feudum militi, transiturum per ipsum ad hæredes ; si miles contra regem peccat, ut feudum mereatur amittere ; non potest postmodum ad ejus heredes devenire : unde juste privantur posteri per culpam parentis.

## CAPUT CCI.

*Utrum defectus originalis justitiæ habeat rationem culpæ in posteris.*

Sed remanet quæstio magis urgens : utrum defectus originalis justitiæ in his qui ex primo parente prodierunt, rationem culpæ possit habere. Hoc enim ad rationem culpæ pertinere videtur, sicut supra dictum est, ut malum quod culpabile dicitur, sit in potestate ejus cui imputatur in culpam. Nullus enim culpatur de eo quod non est in eo facere vel non facere. Non est autem in potestate ejus qui nascitur, ut eum originali justitiâ

<sup>1</sup> Parm. : « moribus. »

<sup>2</sup> Parm. : « oberrans. »

<sup>3</sup> Parm. : « agendis acquirendis, » et in notula : forte : « agendis et acquirendis. »



nascatur, vel sine ea : unde videtur quod talis defectus rationem culpæ habere non possit.

Sed hæc quæstio de facili solvitur, si distinguatur inter personam et naturam. Sicut enim in una persona multa sunt membra, ita in una humana natura multæ sunt personæ, ut participatione speciei multi homines intelligantur quasi unus homo, ut Porphyrius dicit. Est autem hoc advertendum in peccato unius hominis quod diversis membris diversa peccata exercentur ; nec requiritur ad rationem culpæ quod singula peccata sint voluntaria voluntate membrorum quibus exercentur, sed voluntate ejus quod est in homine principale, scilicet intellectivæ partis. Non enim potest manus non percutere, aut pes non ambulare, voluntate jubente. Per hunc igitur modum defectus originalis justitiæ est peccatum naturæ, inquantum derivatur ex inordinata voluntate primi principii in natura humana, scilicet primi parentis ; et sic est voluntarium habito respectu ad naturam, voluntate scilicet primi principii naturæ ; et sic transit in omnes qui ab ipso naturam humanam accipiunt, quasi in quædam membra ipsius : et propter hoc dicitur originale peccatum, quia per originem a primo parente in posteros derivatur : unde cum alia peccata, scilicet actualia, immediate respiciant personam peccantem : hoc peccatum directe respicit naturam. Nam primus parens suo peccato infecit naturam, et natura infecta inficit personam filiorum, qui ipsam a primo parente suseipiunt.

## CAPUT CCII

*Quod non omnia peccata traducuntur in posteros.*

Nec tamen oportet quod omnia peccata alia vel primi parentis, vel etiam ceterorum, traducantur in posteros : quia primum peccatum primi parentis sustulit donum totum quod supernaturaliter erat collatum in humana natura personæ primi parentis ; et sic dicitur corrupisse vel infecisse naturam : unde peccata consequentia non inveniunt aliquid hujusmodi quod possint subtrahere a tota natura

humana : sed auferunt ab homine aut diminuunt aliquod bonum particulare, scilicet personale ; nec corrumpunt naturam, nisi inquantum pertinet ad hanc vel illam personam. Homo autem non generat sibi similem in persona, sed in natura : et ideo non traducitur a parente in posteros peccatum quod vitiat personam, sed primum peccatum quod vitiauit naturam.

## CAPUT CCIII.

*Quod meritum singulare Adæ vel cujuscumque hominis non fuit sufficiens ad totam naturam reparandam<sup>1</sup>.*

Quamvis autem peccatum primi parentis totam humanam naturam infecerit, non tamen potuit per ejus pœnitentiam vel quodcumque ejus meritum tota natura reparari. Manifestum est enim quod pœnitentia Adæ, vel quodcumque aliud ejus meritum, fuit actus singularis personæ ; actus autem alicujus individui non potest in totam naturam speciei. Causæ enim quæ possunt in totam speciem, sunt causæ æquivocæ, et non univocæ. Sol enim est causa generationis in tota specie humana, sed homo est causa generationis hujus hominis. Singulare ergo meritum Adæ, vel cujuscumque puri hominis, sufficiens esse non poterat ad totam naturam reintegrandam. Quod autem per actum singularem primi hominis tota natura est vitiata, per accidens est consecutum, inquantum eo privato innocentie statu, per ipsum in alios derivari non potuit.

## CAPUT CCIV.

*Quod non potuit primus homo redire ad pristinam innocentiam per gratiam.*

Et<sup>2</sup> quamvis per pœnitentiam redierit ad gratiam, non tamen redire potuit ad pristinam innocentiam, cui divinitus prædictum originalis justitiæ donum concessum erat. Similiter etiam manifestum est quod prædictum originalis justitiæ status fuit quoddam speciale donum gratiæ : gratia autem meritis non acquiritur, sed gratis a Deo datur. Sicut igitur primus

<sup>1</sup> Parm. : « non profuit posterius ad reparationem. »

<sup>2</sup> Hic incipit in Cod. S. Gen. cap. ccciv.

homo a principio originalem justitiam non ex merito habuit, sed ex divino dono; ita etiam, et multo minus post peccatum eam mereri potuit pœnitendo, vel quodcumque aliud opus agendo.

## CAPUT CCV.

*De reparatione humanæ naturæ per Christum.*

Oportebat autem quod humana natura prædicto modo infecta, ex divina providentia repararetur. Non enim poterat ad perfectam beatitudinem pervenire, nisi tali infectione remota: quia beatitudo cum sit perfectum bonum, nullum defectum patitur, et maxime defectum peccati, quod aliquo modo virtuti opponitur, quæ est via in ipsam, ut dictum est. Et sic cum homo propter beatitudinem factus sit, quia ipsa est ultimus ejus finis, sequeretur quod opus Dei in tam nobili creatura frustraretur: quod reputat inconveniens Psalmista, cum dicit, Psal. LXXXVIII, 48: *Numquid enim vane constituisti omnes filios hominum?* Sic igitur oportebat humanam naturam reparari.

Præterea. Bonitas divina excedit potentiam creaturæ ad bonum. Patet autem ex supra dictis quod talis est hominis conditio quamdiu in hac mortali vita vivit, quod sicut nec confirmatur in bono immobiliter, ita nec immobiliter obstinatur in malo. Pertinet igitur hoc ad conditionem humanæ naturæ ut ab infectione peccati possit purgari. Non fuit igitur conveniens quod divina bonitas hanc potentiam totaliter dimitteret vacuam; quod fuisset, si ei reparationis remedium non procurasset.

## CAPUT CCVI.

*Quod hominis reparatio per solum Deum fieri poterat<sup>1</sup>.*

Ostensum est autem quod neque per Adam, neque per aliquem alium hominem purum poterat reparari: tum quia nullus singularis homo præminebat toti naturæ: tum quia nullus purus homo potest esse gratiæ causa. Eadem ergo ratione

nec per Angelum potuit reparari: quia nec Angelus potest esse gratiæ causa, nec etiam præmium hominis quantum ad ultimam beatitudinem perfectam, ad quam oportebat hominem revocari, quia in ea sunt pares. Relinquitur igitur quod per solum Deum talis reparatio fieri poterat.

## CAPUT CCVII.

*Quod necessarium fuit Deum incarnari<sup>2</sup>.*

Sed si Deus hominem sola sua voluntate et virtute reparasset, non servaretur divinæ justitiæ ordo, secundum quam exigitur satisfactio pro peccato. In Deo autem satisfactio non cadit, sicut nec meritum: hoc enim est sub alio existentis. Sic igitur neque Deo competeat satisfacere pro peccato totius naturæ humanæ, nec purus homo poterat; ut ostensum est. Conveniens igitur fuit Deum hominem fieri, ut sic unus et idem esset qui et reparare et satisfacere posset. Et hanc causam divinæ incarnationis assignat Apostolus, I Tim. 1, 15: *Christus Jesus venit in hunc mundum peccatores salvos facere.*

## CAPUT CCVIII.

*De aliis causis incarnationis Filii Dei.*

Sunt tamen et aliæ rationes incarnationis divinæ. Quia enim homo a spiritualibus recesserat, et totum se rebus corporalibus dederat, ex quibus in Deum per seipsum redire non poterat; divina sapientia, quæ hominem fecerat, per naturam corpoream assumptam hominem in corporalibus jacentem visitavit, ut per sui corporis mysteria eum ad spiritualia revocaret. Fuit etiam necessarium humano generi ut Deus homo fieret, ad demonstrandum naturæ humanæ dignitatem, ut sic homo neque dæmonibus subderetur, neque corporalibus rebus. Simul etiam per hoc quod Deus homo fieri voluit, manifeste ostendit immensitatem sui amoris, ut ex hoc jam homines Deo subderentur non propter metum mortis, quam primus homo contempsit, sed per carita-

<sup>1</sup> Parm: « Quod per solum Deum incarnatum debuit natura reparari. »

<sup>2</sup> Hic incipit in Cod. S. Gen. cap. ccvii.

tis affectum. Datur etiam per hoc homini quoddam exemplum illius beatæ unionis qua intellectus creatus increato spiritui intelligendo unietur. Non enim restat incredibile quin intellectus creaturæ Deo uniri possit, ejus essentiam videndo, ex quo Deus homini unitus est, naturam ejus assumendo. Perficitur etiam per hoc quodammodo totius operis divini unitas; dum homo, qui est ultimo creatus, circulo quodam in suum redit principium, ipsi rerum principio per opus incarnationis unitus.

## CAPUT CCIX.

*De errore Photini circa incarnationem Filii Dei.*

Hoc autem divinæ incarnationis mysterium Photinus, quantum in se est, evacuavit. Nam Ebionem et Cerinthum et Paulum Samosatenum sequens, Dominum Jesum Christum fuisse purum hominem asseruit, nec ante Mariam Virginem extitisse, sed quod per beatæ vitæ meritum, et patientiam mortis, gloriam Divinitatis promeruit; ut sic Deus diceretur non per naturam, sed per adoptionis gratiam. Sic igitur non esset facta unio Dei et hominis; sed homo esset per gratiam deificatus; quod non singulare est Christo, sed commune omnibus sanctis; quamvis in hac gratia aliqui excellentiores aliis habeantur.

Hic autem error auctoritatibus divinæ Scripturæ contradicit. Dicitur enim Joan. 1, 1 : *In principio erat Verbum*; et postea subdit : *Verbum caro factum est*. Verbum ergo quod *erat in principio apud Deum*, carnem assumpsit; non autem homo, qui ante fuerat, per gratiam adoptionis deificatus. Item Dominus dicit Joan. vi, 38 : *Descendi de cælo non ut faciam voluntatem meam, sed voluntatem ejus qui misit me*. Secundum autem Photini errorem non conveniret Christo descendisse, sed solum ascendisse; cum tamen Apostolus dicat, Ephes. iv, 9 : *Quod autem ascendit, quid est nisi quia et descendit primum in inferiores partes terræ?* Ex quo manifeste datur intelligi quod in Christo non haberet locum ascensio, nisi descensio præcessisset.

## CAPUT CCX.

*Error Nestorii circa incarnationem, et ejus improbatio.*

Hoc igitur volens declinare Nestorius, partim quidem a Photini errore discessit, quia posuit Christum Filium Dei non solum per adoptionis gratiam, sed per naturam divinam, in qua Patri extitit coæternus; partim vero cum Photino concordat, dicens Filium Dei non sic esse unitum homini ut una persona fieret Dei et hominis, sed per solam inhabitationem in ipso; et sic homo ille, sicut secundum Photinum per solam gratiam Deus dicitur, sic et secundum Nestorium Dei Filius dicitur, non quia ipse vere sit Deus, sed propter Filii Dei inhabitationem in ipso, quæ est per gratiam.

Hic autem error auctoritati sacræ Scripturæ repugnat. Hanc enim unionem Dei et hominis Apostolus exinanitionem nominat, dicens, Philip. 11, 6, de Filio Dei : *Qui cum in forma Dei esset, non rapinam arbitratus est esse se æqualem Deo; sed semetipsum exinanivit, formam servi accipiens*. Non est autem exinanitio Dei quod creaturam rationalem inhabitet per gratiam : alioquin et Pater et Spiritus sanctus exinanirentur, quia et ipsi creaturam rationalem per gratiam inhabitant, dicente Domino de se et de Patre, Joan. xiv, 23 : *Ad eum veniemus, et mansionem apud eum faciemus* : et Apostolo de Spiritu sancto, I Cor. 111, 16 : *Spiritus Dei habitat in vobis*. Item non conveniret homini illi voces Divinitatis emittere, si personaliter Deus non esset. Præsumptuosissime ergo dixisset Jonn. x, 30 : *Ego et Pater unum sumus* et ibid. viii, 58 : *Antequam Abraham fieret, ego sum*. Ego enim personam loquentis demonstrat : homo autem erat qui loquebatur. Est igitur persona eadem Dei et hominis. Ad hos ergo errores excludendos, in Symbolo tam Apostolorum quam Patrum, facta mentione de persona Filii, subditur. « Qui conceptus est de Spiritu sancto, natus, passus, mortuus et resurrexit. » Non enim ea quæ sunt hominis, de Filio Dei prædicarentur, nisi eadem esset persona Filii Dei et hominis : quia quæ uni personæ conveniunt, non ex hoc ipso de altera prædicantur; sicut quæ conveniunt Paulo, non ex hoc ipso prædicantur de Petro.

## CAPUT CCXI.

*De errore Arii circa incarnationem,  
et improbatio ejus.*

Ut ergo unitatem Dei et hominis confiterentur, quidam hæretici in partem contrariam diverterunt, dicentes, Dei et hominis esse unam non solum personam, sed etiam naturam. Cujus quidem erroris principium fuit ab Ario, qui ut ea quæ in Scripturis dicuntur de Christo, quibus ostenditur minor Patre, non nisi ad ipsum Dei Filium possent referri secundum assumentem naturam, posuit in Christo non aliam animam esse quam Dei Verbum quod dixit corpori Christi fuisse pro anima : ut sic cum dicit Joan. xiv, 28 : *Pater major me est*, vel cum orasse legitur, aut tristatus, ad ipsam naturam Filii Dei sit referendum. Hoc autem posito, sequitur quod unio Filii Dei ad hominem facta sit non solum in persona, sed etiam in natura. Manifestum est enim quod ex anima et corpore constituitur unitas humanæ naturæ.

Et hujus quidem positionis falsitas quantum ad id quod Filium minorem Patre asserit, supra est declaratum, eum ostendimus Filium Patri æqualem. Quantum vero ad id quod dicit, Verbum Dei in Christo fuisse pro anima, hujus erroris ex præmissis falsitas ostendi potest. Ostensum est enim supra animam corpori uniri ut formam : Deum autem impossibile est formam corporis esse, sicut supra ostensum est. Et ne forte Arius hoc diceret de summo Deo Patre intelligendum, idem et de Angelis ostendi potest, quod secundum naturam corpori non possunt uniri per modum formæ, cum sint secundum naturam suam a corporibus separati. Multo igitur minus Filius Dei, per quem facti sunt Angeli, ut etiam Arius confitetur, corporis forma esse non potest.

Præterea. Filius Dei etiam si sit creatura, ut Arius mentitur, tamen secundum ipsum in beatitudine præcedit omnes spiritus creatos. Est autem tanta Angelorum beatitudo, quod tristitiam habere non possunt : non enim esset vera et plena felicitas, si aliquid eorum votis deficeret : est enim de ratione beatitudinis ut sit finale et perfectum bonum to-

taliter appetitum quietans. Multo igitur minus Dei Filius tristari potest aut timere secundum suam naturam. Legitur autem tristatus, cum dicitur (Marc. xiv, 33), *Cœpit Jesus pavere et tædere, et mæstus esse* : et ipse etiam suam tristitiam profitetur, dicens (ibid, 34 : *Tristis est anima mea usque ad mortem*. Manifestum est autem tristitiam non esse corporis, sed alicujus apprehensivæ substantiæ. Oportet igitur præter Verbum et corpus in Christo aliam fuisse substantiam quæ tristitiam pati posset ; et hanc dicimus animam.

Rursus. Si Christus assumpsit quæ nostra sunt, ut nos a peccatis mundaret ; magis autem necessarium erat nobis mundari secundum animam, a qua origo peccati processerat, et quæ est subjectum peccati : non igitur corpus assumpsit sine anima, sed quasi principalius animam, et corpus cum anima.

## CAPUT CCXII

*De errore Apollinaris circa incarnationem,  
et improbatio ejus.*

Ex quo etiam excluditur error Apollinaris, qui primo quidem Arium secutus, in Christo non aliam animam esse posuit quam Dei Verbum. Sed quia non sequeretur Arium in hoc quod Filium Dei diceret creaturam ; multa autem dicuntur de Christo quæ nec corpori attribui possunt, nec Creatori convenire, ut tristitia, timor et hujusmodi, coactus tandem fuit ponere quidem aliquam animam in Christo, quæ corpus sensificaret, et quæ harum passionum posset esse subjectum, quæ tamen ratione et intellectu carebat : ipsum autem Verbum homini Christo pro intellectu et ratione fuisse.

Hoc autem multipliciter falsum esse ostenditur. Primo quidem, quia hoc est contra naturæ rationem ut anima non rationalis sit forma hominis, cum tamen formam corporis habeat. Nihil autem monstruosum et innaturale in Christi incarnatione fuisse putandum est. Secundo, quia fuisset contra incarnationis finem, qui est reparatio humanæ naturæ : quæ quidem principalius indiget<sup>1</sup> reparari

<sup>1</sup> In Cod. S. Gen. « incipit. »

quantum ad intellectivam partem, quæ particeps peccati esse potest. Unde præcipue conveniens fuit ut intellectivam hominis partem assumeret. Dicitur etiam Christus admiratus fuisse: admirari autem non est nisi animæ rationalis; Deo vero omnino convenire non potest. Sicut igitur tristitia cogit in Christo ponere animam sensitivam, sic admiratio cogit ponere in Christo partem animæ intellectivam.

## CAPUT CCXIII.

*De errore Eutycheti sponentis unionem in natura.*

Hos autem quantum ad aliquid Eutyches secutus est. Posuit enim unam naturam fuisse Dei et hominis post incarnationem; non tamen posuit quod Christo deesset vel anima vel intellectus, vel aliquid eorum quæ ad integritatem spectant naturæ.

Sed et hujus opinionis falsitas manifeste apparet. Divina enim natura in se perfecta, et incommutabilis est. Natura enim quæ in se perfecta est cum altera non potest in unam naturam convenire, nisi vel ipsa convertatur in alteram, sicut cibus in cibatum; vel alterum convertatur in ipsum, sicut in ignem ligna; vel utrumque transmutetur in tertium, sicut elementa in corpus mixtum. Hæc autem omnia removet divina immutabilitas. Non enim immutabile est neque quod in alterum convertitur, neque in quod alterum converti potest. Cum ergo natura divina in se sit perfecta, nullo modo potest esse quod simul cum aliqua natura in unam naturam conveniat.

Rursum. Si quis rerum ordinem consideret, additio majoris perfectionis variat naturæ speciem: alterius enim speciei est quod est et vivit ut planta, quam quod est tantum. Quod autem est et vivit et sentit, ut animal, est alterius speciei quam quod est et vivit tantum, ut planta. Item quod est, vivit, sentit et intelligit, ut homo, est alterius speciei quam quod est, vivit et sentit tantum, ut animal brutum. Si igitur illa una natura quæ ponitur esse Christi, supra hæc omnia habuit quod divinum est, consequens est quod illa natura alterius fuerit speciei a natura humana; sicut natura humana a natura bruti animalis. Neque

Christus igitur fuit homo ejusdem speciei; quod falsum esse ostenditur ex hoc quod ab hominibus secundum carnem progenitus fuit, sicut Matthæus ostendit in principio Evangelii sui dicens: *Liber generationis Jesu Christi filii David, filii Abraham.*

## CAPUT CCXIV.

*Contra errorem Manichæi dicentis, Christum non habuisse verum corpus, sed phantasticum.*

Sicut autem Photinus evacuavit Incarnationis mysterium, divinam naturam a Christo auferendo, sic Manichæus auferendo humanam. Quia enim ponebat totam creaturam corpoream a diabolo fuisse creatam, nec erat conveniens ut boni Dei Filius assumeret diaboli creaturam; ideo posuit Christum non habuisse veram carnem, sed phantasticam tantum; et omnia quæ in Evangelio de Christo narrantur ad humanam naturam pertinentia, in phantasia, et non in veritate facta fuisse asserebat.

Hæc autem positio manifeste sacræ Scripturæ contradicit, Christum asserit de Virgine natum, circumcisum, esurisse, comedisse et alia pertulisse quæ pertinent ad humanæ carnis naturam. Falsa igitur esset Evangeliorum scriptura, hæc narrans de Christo.

Rursus. Ipse Christus de se dicit (Joan. xvii, 37): *In hoc natus sum, et ad hoc veni in mundum, ut testimonium perhibeam veritati.* Non fuisset autem veritatis testis, sed magis falsitatis, si in se demonstrasset quod non erat; præsertim, cum prædixerit se passurum quæ sine vera carne pati non potuisset, scilicet quod traderetur in manus hominum, quod conspueretur, flagellaretur, crucifigeretur. Dicere ego Christum veram carnem non habuisse, nec hujusmodi in veritate, sed solum in phantasia eum fuisse perpesum, est Christo imponere falsitatem.

Adhuc. Veram opinionem a cordibus hominum remove, est hominis fallacis. Christus autem hanc opinionem a cordibus discipulorum removet. Cum enim post resurrectionem discipulis apparuit qui eum spiritum vel phantasma esse existimabant, ad hujusmodi suspicionem de cordibus eorum tollendam, dixit (Luc. xxvi, 9): *Palpate, et videte, quia spiritus*



*carnem et ossa non habet, sicut me videtis habere* : et in alio loco, cum supra mare ambularet, existimantibus eum discipulis esse phantasma, et ob hoc eis in timore constitutis, Dominus dicit (ibid. 36) : *Ego sum, nolite timere*. Si igitur hæc opinio vera est, necesse est dicere Christum fuisse fallacem. Christus autem veritas est ut ipse de se dicit. Hæc igitur opinio est falsa.

## CAPUT CCXV.

*Quod Christum verum corpus habuit, non de cælo, contra Valentinum.*

Valentinus etsi verum corpus Christum habuisse confiteretur, dicebat tamen eum carnem non assumpsisse de Virgine ; sed attulisse corpus de cælo formatum quod transivit per Virginem, nihil ex ea accipiens, sicut aqua transit per canalem.

Hoc etiam veritati Scripturæ contradicit. Dicit enim Apostolus, Rom. 1, 3 : *Qui factus est ei ex semine David secundum carnem* : et ad Gal. iv, 4, dicit : *Misit Deus Filium suum unigenitum factum ex muliere*. Matthæus autem 1, 16, dicit : *Et, Jacob genuit Joseph virum Mariæ, de qua natus est Jesus, qui vocatur Christus* : et postmodum eam ejus matrem nominat subdens : *Cum esset desponsata mater ejus Maria Joseph*. Hæc autem vera non essent, si Christus de Virgine carnem non assumpsisset. Falsum est igitur quod corpus cæleste attulerit.

Sed quod Apostolus I ad Corinth. xv, 47, dicit : *Secundus homo de cælo cælestis* : intelligendum est quod de cælo descendit secundum Divinitatem, non autem secundum substantiam corporis.

Adhuc. Nulla ratio esset quare corpus de cælo afferens Dei Filius, uterum Virginis introisset, si ex ea nil assumeret ; sed magis videtur esse fictio quædam, dum ex utero matris egrediens demonstraret se ab ea accepisse carnem quam non acceperat. Cum igitur omnis falsitas a Christo sit aliena, simpliciter confitendum est quod Christus sic processit ex utero Virginis quod ex ea carnem accepit.

## CAPUT CCXVI.

*Quæ sit sententia fidei circa incarnationem.*

Ex præmissis igitur colligere possumus quod in Christo secundum veritatem catholicæ fidei fuit verum corpus nostræ naturæ, vera anima rationalis, et simul cum hoc perfecta Deitas. Hæc autem tres substantiæ in unam personam conveniunt, non autem in unam naturam.

Ad cujus etiam veritatis expositionem aliqui per quasdam vias erroneas processerunt. Considerantes enim quidam quod omne quod advenit alicui post esse completum, accidentaliter ei adjungitur, ut homini vestis, posuerunt quod humanitas accidentali unione fuerit in persona Filii Divinitati conjuncta ; ita scilicet quod natura assumpta se haberet ad personam Filii Dei sicut vestis ad hominem. Ad cujus confirmationem inducebant quod Apostolus dicit ad Philip. (cap. ii, 7,) de Christo, quod *habitu inventus est ut homo*. Rursus considerabant quod ex unione animæ et corporis efficitur individuum quoddam rationalis naturæ, quod nominatur persona. Si igitur anima in Christo fuisset corpori unita, videre non poterant quin sequeretur quod ex tali unione constitueretur persona. Sequeretur ergo in Christo duas esse personas : scilicet personam assumptam, et personam assumptam : in homine enim induto non sunt duæ personæ, quia indumentum rationem personæ non habet. Si autem vestis esset persona, sequeretur in homine vestito duas esse personas.

Ad hoc igitur excludendum, posuerunt quidam animam Christi unitam nunquam fuisse corpori, sed quod persona Filii Dei animam et corpus separatim assumpsit. Sed hæc opinio dum unum inconveniens vitare nititur, incidit in majus. Sequitur enim ex necessitate quod Christus non fuerit verus homo. Veritas enim humanæ naturæ requirit animæ et corporis unionem : nam homo est qui ex utroque componitur. Sequeretur etiam quod Christi non fuerit vera caro, nec aliquod membrum ejus habuit veritatem. Remota enim anima non est oculus, aut manus, aut caro et os, nisi

æquivoce, sicut pictus aut lapideus. Sequeretur etiam quod Christus vere mortuus non fuerit. Mors enim est privatio vitæ. Manifestum est enim quod Divinitatis vita per mortem privari non potuit; corpus autem vivum esse non potuit, si ei anima conjuncta non fuit. Sequeretur etiam ulterius quod Christi corpus sentire non potuit: non enim sentit corpus nisi per animam sibi conjunctam. Adhuc autem hæc opinio in errorem Nestorii relabatur, quem tamen declinare intendit. In hoc enim erravit Nestorius quod posuit Verbum Dei homini Christo fuisse unitum secundum inhabitationem gratiæ, ita quod Verbum Dei fuerit in illo homine sicut in templo suo. Nihil autem refert dicere, quantum ad propositum pertinet, quod Verbum est in homine sicut in templo, et quod natura humana Verbo adveniat ut vestimentum vestito: nisi quod in tantum hæc opinio est deterior, quia Christum verum hominem confiteri non potest. Est igitur hæc opinio non immerito condemnata. Adhuc autem homo vestitus non potest esse persona vestis aut indumenti, nec aliquo modo dici potest quod sit in specie indumenti. Si igitur Filius Dei humanam naturam ut vestimentum assumpsit, nullo modo dici poterit persona humanæ naturæ, nec etiam dici poterit quod Filius Dei sit ejusdem speciei cum aliis hominibus; de quo tamen Apostolus dicit (Philip. II, 7) quod est *in similitudinem hominum factus*. Unde patet hanc opinionem esse totaliter evitandam.

#### CAPUT CCXVII.

##### *Quod in ipso non sunt duo supposita.*

Alii vero prædicta inconvenientia vitare volentes, posuerunt quidem in Christo animam corpori fuisse unitam, et ex tali unione quemdam hominem constitutum fuisse, quem dicunt a Filio Dei in unitatem personæ assumptum, ratione cujus assumptionis illum hominem dicunt esse Filium Dei, et Filium Dei dicunt esse illum hominem. Et quia assumptionem prædictam personæ dicunt esse terminatam, confitentur quidem in Christo unam personam Dei et hominis; sed quia hic homo, quem ex anima et corpore constitutum dicunt, est quoddam suppositum vel hypostasis humanæ naturæ, ponunt in Christo duo supposita et

duas hypostases; unum naturæ humanæ, creatum et temporale; aliud divinæ naturæ, increatum et æternum. Hæc autem positio licet ab errore Nestorii verbo tenus recedere videatur, tamen si quis eam interius perscrutetur, in idem cum Nestorio labitur.

Manifestum est enim quod persona nihil aliud est quam substantia individua rationalis naturæ; humana autem natura rationalis est: unde et ex hoc ipso quod ponitur in Christo aliqua hypostasis vel suppositum naturæ humanæ temporale et creatum, ponitur etiam aliqua persona in Christo, temporalis creata: hoc enim est quod nomine suppositi vel hypostasis significatur, scilicet individua substantia. Ponentes ergo in Christo duo supposita vel duas hypostases, si quod dicunt, intelligunt, necesse habent ponere duas personas. Item. Quæcumque supposito differunt, ita se habent quod ea quæ sunt propria unius, alteri convenire non possunt. Si ergo non est idem suppositum Filius Dei et filius hominis, sequitur quod ea quæ sunt filii hominis, non possunt attribui Filio Dei, nec e converso. Non ergo poterit dici Deus crucifixus, aut natus ex Virgine: quod est Nestorianæ impietatis.

Si quis autem ad hæc dicere velit, quod ea quæ sunt hominis illius, Filio Dei attribuantur, et e converso, propter unitatem personæ, quamvis sint diversa supposita; hoc omnino stare non potest. Manifestum est enim quod suppositum æternum Filii Dei non est aliud quam ipsa ejus persona. Quæcumque igitur dicuntur de Filio Dei ratione suæ personæ, dicerentur de ipso ratione sui suppositi. Sed ea quæ sunt hominis, non dicuntur de eo ratione suppositi: quia ponitur Filius Dei a filio hominis supposito differre. Neque igitur ratione personæ de Filio Dei dici poterunt quæ sunt propria filii hominis, ut nasci de Virgine, mori, et similia.

Adhuc. Si de supposito aliquo temporali Dei nomen prædicetur, hoc erit recens et novum. Sed omne quod recenter et de novo dicitur Deus, non est Deus, nisi quia factum est Deus. Quod autem est factum Deus, non est naturaliter Deus, sed per adoptionem solum. Sequitur ergo quod ille homo non fuerit vere et naturaliter Deus, sed solum per adoptionem: quod etiam ad errorem Nestorii pertinet.

## CAPUT CCXVIII.

*Quod in Christo est unum tantum suppositum et est una tantum persona, et una hypostasis.*

Sic igitur oportet dicere, quod in Christo non solum sit una persona Dei et hominis, sed etiam unum suppositum et una hypostasis; natura autem non una, sed duæ.

Ad cujus evidentiam considerare oportet, quod hæc nomina « persona, hypostasis et suppositum, » integrum quoddam designant. Non enim potest dici quod manus aut caro aut quæcumque aliarum partium sit persona vel hypostasis aut suppositum; sed hoc totum, quod est hic homo. Ea vero nomina quæ sunt communia individuis substantiarum et accidentium, ut « individuum et singulare, » possunt et toti et partibus aptari. Nam partes cum accidentibus aliquid habent commune: scilicet quod non per se existunt, sed aliis insunt, licet secundum modum diversum. Potest igitur dici quod manus Socratis et Platonis est quoddam individuum, vel singulare quoddam, licet non sit hypostasis vel suppositum vel persona.

Est etiam considerandum ulterius, quod aliquorum conjunctio per se considerata, quandoque quidem facit aliquod integrum, quæ in alio propter additionem alterius non constituit aliquod integrum: sicut in lapide commixtio quatuor elementorum facit aliquod integrum: unde illud quod est ex elementis constitutum, in lapide potest dici suppositum vel hypostasis, quod est hic lapis; non autem persona, quia non est hypostasis naturæ rationalis. Compositio autem elementorum in animali non constituit aliquod integrum, sed constituit partem, scilicet corpus: quia necesse est aliquid aliud advenire ad completionem animalis, scilicet animam: unde compositio elementorum in animali non constituit suppositum vel hypostasim; sed hoc animal totum est hypostasis vel suppositum. Non tamen propter hoc minus est efficax in animali elementorum compositio quam in lapide, sed multo amplius, quia est or-

dinata ad rem nobiliorem. Sic igitur in aliis hominibus unio animæ et corporis constituit hypostasim et suppositum, quia nihil aliud est præter hæc duo. In Domino autem Jesu Christo præter animam et corpus advenit tertia substantia, scilicet Divinitas. Non ergo est seorsum suppositum vel hypostasis, sicut nec persona, id quod est ex corpore et anima constitutum; sed suppositum, hypostasis vel persona est id quod constat ex tribus substantiis, corpore scilicet et anima et Divinitate: et sic in Christo sicut est una tantum persona, ita unum suppositum et una hypostasis. Alia autem ratione advenit anima corpori, et Divinitas utrique. Nam anima advenit corpori ut forma ejus existens: unde his duobus constituitur una natura, quæ dicitur humana natura. Divinitas autem non advenit animæ et corpori per modum formæ, neque per modum partis: hoc enim est contra rationem divinæ perfectionis. Unde ex Divinitate et anima et corpore non constituitur una natura; sed ipsa natura divina in se ipsa integra et pura existens sibi quodam modo incomprehensibili et ineffabili humanam naturam ex anima et corpore constitutam assumpsit; quod ex infinita virtute ejus processit. Videmus enim quod quanto aliquid agens est majoris virtutis, tanto magis sibi applicat aliquod instrumentum ad aliquod opus perficiendum. Sicut igitur virtus divina propter sui infinitatem est infinita et incomprehensibilis; ita modus quo sibi univit humanam naturam Christus, quasi organum quoddam ad humanæ salutis effectum, est nobis ineffabilis, et excedens omnem aliam unionem Dei ad creaturam.

## CAPUT CCXIX.

*Quod persona Filii Dei in Christo est persona filii hominis, et quod in Christo non est alia persona nisi æterna, et quod de Christo possunt dici quæ sunt dictæ naturæ et quæ sunt humanæ<sup>1</sup>.*

Et quia, sicut jam diximus, persona, hypostasis et suppositum designant aliquid integrum; si divina natura in Christo est ut pars, et non ut aliquid integrum,

<sup>1</sup> Hic incipit in Cod. S. Gen. cap. CCXIX

sicut anima in compositione hominis; una persona Christi non se teneret tantum ex parte naturæ divinæ, sed esset quoddam constitutum ex tribus, sicut et in homine persona, hypostasis et suppositum est quod ex anima et corpore constituitur. Sed quia divina natura est aliquid integrum, quod sibi assumpsit, per quamdam ineffabilem unionem, humanam naturam; persona se tenet ex parte divinæ naturæ, et similiter hypostasis et suppositum; anima vero et corpus trahuntur ad personalitatem personæ divinæ, ut sit persona Filii Dei, sicut etiam persona filii hominis et hypostasis et suppositum. Potest autem hujusmodi exemplum aliquale in creaturis inveniri. Subjectum enim et accidens non sic uniuntur ut ex eis aliquod tertium constituatur: unde subjectum in tali unione non se habet ut pars, sed est integrum quoddam, quod est persona, hypostasis et suppositum. Accidens autem trahitur ad personalitatem subjecti, ut sit persona eadem hominis et albi, et similiter eadem hypostasis et idem suppositum. Sic igitur secundum similitudinem quamdam persona, hypostasis et suppositum Filii Dei est persona, hypostasis et suppositum humanæ naturæ in Christo. Unde quidam propter hujusmodi similitudinem dicere præsumperunt, quod humana natura in Christo degenerat in accidens, et quod accidentaliter Dei Filio uniretur, veritatem a similitudine non discernentes.

Patet igitur ex præmissis quod in Christo non est alia persona nisi æterna, quæ est persona Filii Dei; nec alia hypostasis aut suppositum: unde cum dicitur: Hic homo, demonstrato Christo, importatur suppositum æternum. Nec tamen propter hoc æquivoce dicitur hoc nomen « homo » de Christo et de aliis hominibus. Æquivocatio enim non attenditur secundum diversitatem suppositionis, sed secundum diversitatem significationis. Nomen autem hominis attributum Petro et Christo idem significat, scilicet naturam humanam; sed non idem supponit; quia hic supponit suppositum æternum Filii Dei, ibi autem suppositum creatum. Quia vero de unoquoque supposito alicujus naturæ possunt dici ea quæ competunt illi naturæ cujus est suppositum; idem autem est suppositum in Christo humanæ et divinæ naturæ, manifestum est quod de hoc supposito utriusque naturæ, sive sup-

ponatur per nomen significans divinam naturam aut personam, sive humanam, possunt dici indifferenter et quæ sunt divinæ, et quæ sunt humanæ naturæ; ut puta, si dicamus, quod Filius Dei est æternus, et quod Filius Dei est natus de Virgine: et similiter dicere possumus, quod hic homo est Deus, et creavit stellas, et est natus, mortuus et sepultus. Quod autem prædicatur de aliquo supposito, prædicatur de eo secundum aliquam formam vel materiam; sicut Socrates est albus secundum albedinem, et est rationalis secundum animam. Dictum est autem supra, quod in Christo sunt duæ naturæ et unum suppositum. Si ergo referatur ad suppositum, indifferenter sunt prædicanda de Christo humana et divina. Est tamen discernendum secundum quid utrumque dicatur: quia divina dicuntur de Christo secundum divinam naturam, humana vero secundum humanam.

#### CAPUT CCXX.

*De his quæ dicuntur in Christo unum vel multa.*

Quia igitur in Christo est una persona et duæ naturæ; ex horum convenientia considerandum est, quid in Christo unum dici debeat, et quid multa. Quæcumque enim secundum naturæ diversitatem multiplicantur, necesse est quod in Christo plura esse confiteamur. Inter quæ primo considerandum est, quod cum per generationem sive per nativitatem natura recipiatur, necesse est quod sicut in Christo sunt duæ naturæ, ita etiam oportet duas esse generationes sive nativitates: una æterna, secundum quam accepit naturam divinam a Patre; alia temporalis, secundum quam accepit humanam naturam a matre. Similiter etiam quæcumque Deo et homini convenienter attribuuntur ad naturam pertinentia, necesse est plura dicere in Christo. Attribuitur autem Deo intellectus et voluntas et horum perfectiones; puta scientia seu sapientia, et caritas, sive justitia, quæ homini etiam attribuuntur ad humanam naturam pertinentia. Nam voluntas et intellectus sunt partes animæ; horum autem perfectiones sunt sapientia et justitia et hujusmodi. Necesse est ergo in Christo ponere duos intellectus, humanum scilicet et divinum, et similiter duas voluntates, duplicem etiam

scientiam sive caritatem, creatam scilicet et increatam. Ea vero quæ ad suppositum sive hypostasim pertinent, unum tantum in Christo confiteri oportet : unde si esse accipiatur secundum quod unum esse est unius suppositi, videtur dicendum quod in Christo sit tantum unum esse. Manifestum est enim quod partes divisæ singulæ proprium esse habent; secundum autem quod in toto considerantur, non habent suum esse, sed omnes sunt per esse totius. Si ergo consideremus ipsum Christum ut quoddam integrum suppositum duarum naturarum, ejus erit unum tantum esse, sicut et unum suppositum.

Quia vero operationes suppositorum sunt, visum est aliquibus quod sicut in Christo non est nisi unum suppositum, ita non esset nisi una operatio. Sed non recte consideraverunt : nam in quolibet individuo reperiuntur multæ operationes, si sunt plura operationum principia; sicut in homine alia est operatio intelligendi, alia sentiendi, propter differentiam sensus et intellectus; et sicut in igne alia est operatio calefactionis, alia ascensionis, propter differentiam caloris et levitatis. Natura autem comparatur ad operationem ut ejus principium. Non ergo est una operatio in Christo propter unum suppositum, sed duæ propter duas naturas; sicut e converso in sancta Trinitate est una operatio trium personarum propter unam naturam. Participat tamen operatio humanitatis in Christo aliquid de operatione virtutis divinæ. Omnium enim eorum quæ conveniunt in unum suppositum, ei quod principaliter est, cetera instrumentaliter deserviunt, sicut ceteræ partes hominis sunt instrumenta intellectus. Sic igitur in Christo humanitas quasi quoddam organum Divinitatis censetur. Patet autem quod instrumentum agit in virtute principalis agentis. Unde in actione instrumenti non solum invenitur virtus instrumenti, sed etiam principalis agentis; sicut per actionem securis fit arca, in quantum securis dirigitur ab artifice. Ita ergo et operatio humanæ naturæ in Christo quamdam vim ex Deitate habeat supra virtutem humanam. Quod enim tangeret leprosum, humanitatis actio fuit; sed quod tactus ille curaret a lepra, ex virtute Di-

vinitatis procedebat : et per hunc modum omnes ejus actiones et passiones humanæ virtute Divinitatis salutare fuerunt : et ideo Dionysius vocat humanam Christi operationem theandricam, idest deivirilem <sup>1</sup>, quia scilicet sic procedebat ex humanitate, quod tamen in ea vigeret <sup>2</sup> Divinitatis virtus.

Vertitur etiam a quibusdam in dubium de filiatione, an sit una tantum in Christo propter unitatem suppositi, vel duæ propter dualitatem nativitatis. Videtur autem quod sint duæ: quia multiplicata causa, multiplicatur effectus; est autem causa filiationis nativitas. Cum igitur sint duæ nativitates Christi, consequens videtur quod etiam sint duæ filiationes. Nec obstat quod filiatio est relatio personalis, idest personam constituens : hoc enim verum est de filiatione divina; filiatio vero humana non constituit personam, sed accedit personæ constitutæ. Similiter etiam non obstat quod unus homo una filiatione refertur ad patrem et matrem, quia eadem nativitate nascitur ab utroque parente. Ubi autem est eadem causa relationis, relatio est una realiter, quamvis multiplicentur respectus. Nihil enim prohibet aliquid habere respectum ad alterum absque hoc quod realiter insit ei relatio, sicut scibile refertur ad scientiam relatione in eo non existente : ita etiam nihil prohibet quod una realis relatio plures respectus habeat. Nam sicut relatio ex causa sua habet quod sit res quædam, ita etiam quod sit una vel multiplex; et sic cum Christus non eadem nativitate nascatur ex patre et matre. duæ filiationes reales in eo esse videntur propter duas nativitates. Sed est aliud quod obviat propter quod non possunt esse plures filiationes reales in Christo. Non enim omne quod nascitur ex aliquo, filius ejus dici potest, sed solum completum suppositum. Manus enim alicujus hominis non dicitur filia, nec pes filius; sed totum singulare quod est Petrus vel Joannes. Proprium igitur subjectum filiationis est ipsum suppositum. Ostensum est autem supra quod in Christo non est aliud suppositum quam increatum, cui non potest ex tempore aliqua realis relatio advenire; sed, sicut supra diximus, omnis relatio Dei ad creaturam est secundum rationem tantum. Oportet igitur

<sup>1</sup> Al. : « Dei virtutem. »

<sup>2</sup> Parm. : « vigeat. »



quod filiatio, qua suppositum æternum Filii refertur ad Virginem matrem, non sit realis relatio, sed respectus rationis tantum. Nec propter hoc impeditur: quin Christus sit vere et realiter filius Virginis matris, quia realiter ab ea natus est; sicut etiam Deus vere et realiter est dominus creaturæ, quia habet realem potentiam coercendi creaturam; et tamen domini relatio solum secundum rationem Deo attribuitur. Si autem in Christo essent plura supposita, ut quidam posuerunt, nihil prohibet ponere in Christo duas filiationes, quia filiationi temporali subiceretur suppositum creatum.

## CAPUT CCXXI.

*Quod oportuit Christum esse perfectum in gratia, et sapientia veritatis.*

Quia vero, sicut jam dictum est, humanitas Christi se habet ad Divinitatem ejus quasi quoddam organum ejus, organorum autem dispositio et qualitas pensatur præcipue quidem ex fine, et etiam ex decencia, instrumento utentis; secundum hos modos consequens est ut consideremus qualitatem humanæ naturæ a Verbo Dei assumptæ. Finis autem assumptionis humanæ naturæ a Verbo Dei, est salus et reparatio humanæ naturæ. Talem igitur oportuit esse Christum secundum humanam naturam ut convenienter esse possit auctor humanæ salutis. Salus autem humana consistit in fruitione divina, per quam homo beatus efficitur: et ideo oportuit Christum secundum humanam naturam fuisse perfecte Deo fruentem. Principium enim in unoquoque genere oportet esse perfectum. Fructio autem divina secundum duo existit, secundum voluntatem quidem Deo perfecte per amorem inhærentem; secundum intellectum autem perfecte Deum cognoscentem. Perfecta autem inhæsiō voluntatis ad Deum est per amorem et per gratiam, per quam homo justificatur, secundum illud Rom. III, 24: *Justificati gratis per gratiam ejus*. Ex hoc enim homo justus est quod Deo per amorem inhæret. Perfecta autem cognitio Dei est per lumen sapientiæ, quæ est cognitio divinæ veritatis. Oportuit igitur Verbum Dei incarnatum perfectum in gratia et in sapientia veritatis existere: unde Joan. I, 14, dicitur: *Verbum caro factum est, et habi-*

*tavit in nobis: et vidimus gloriam ejus, gloriam quasi unigeniti a Patre, plenum gratiæ et veritatis.*

## CAPUT CCXXII.

*De plenitudine gratiæ Christi.*

Primo autem videndum est de plenitudine gratiæ ipsius. Circa quod considerandum est quod nomen gratiæ a duobus assumi potest. Uno modo ex eo quod est gratum esse: dicimus enim aliquem alicujus habere gratiam quia est ei gratus. Alio modo ex eo quod est gratis dari: dicitur enim aliquis alicui gratiam facere, quando ei aliquod beneficium gratis confert. Nec istæ duæ acceptiones gratiæ penitus separatæ sunt. Ex eo enim aliquid alteri gratis datur, quia is cui datur, gratus est danti vel simpliciter vel secundum quid. Simpliciter quidem, quando ad hoc recipiens gratus est danti, ut eum sibi jungat secundum aliquem modum. Hos enim quos gratos habemus, nobis pro posse attrahimus secundum quantitatem et modum quo nobis grati existunt. Secundum quid autem, quando ad hoc recipiens gratus est danti, ut aliquid ab eo recipiat, non autem ad hoc ut assumatur ab ipso. Unde patet quod omnis qui habet gratiam, aliquid habet gratis datum; non autem omnis qui habet aliquid gratis datum, gratus danti existit: et ideo duplex gratia distingui solet: una scilicet quæ solum gratis est data, alia quæ etiam gratum facit. Gratis autem dari dicitur quod nequaquam est debitum. Dupliciter autem aliquid debitum existit: uno quidem modo secundum naturam, alio modo secundum operationem. Secundum naturam quidem debitum est rei quod ordo naturalis illius rei exposcit, sicut debitum est homini quod habeat rationem et manus et pedes: secundum operationem autem, sicut merces operanti debetur. Illa ergo dona sunt hominibus divinitus gratis data quæ et ordinem naturæ excedunt, et meritis non acquiruntur; quamvis et ea quæ pro meritis divinitus dantur, interdum gratiæ nomen vel rationem non amittant: tum quia principium merendi fuit a gratia: tum etiam quia superabundantius dantur quam merita humana requirant, sicut dicitur Rom. VI, 23: *Gratia Dei vita æterna*. Illiusmodi autem donorum quæ-

dam quidem et naturæ humanæ facultatem excedunt, et meritis non redduntur; nec tamen ex hoc ipso quod homo ea habet, redditur Deo gratus; sicut donum prophetiæ, miraculorum operationis, scientiæ et doctrinæ, vel si qua alia divinitus conferuntur. Per hæc enim et huiusmodi homo non coniungitur Deo, nisi forte per similitudinem quamdam, prout aliquid de ejus bonitate participat; per quem modum omnia Deo simulantur. Quædam vero hominem Deo gratum reddunt et ei coniungunt: et huiusmodi dona non solum gratiæ dicuntur ex eo quod gratis dantur, sed etiam ex eo quod hominem faciant Deo gratum.

Conjunctio autem hominis ad Deum est duplex. Una quidem per affectionem, et hæc est per caritatem: quæ quodammodo facit per affectionem hominem unum cum Deo, secundum illud I Corinth. vi, 17: *Qui adhæret Deo, unus spiritus est.* Per hoc etiam Deus hominem inhabitat, secundum illud Joan. xiv, 23: *Si quis diligit me, sermonem meum servabit, et Pater meus diliget eum, et ad eum veniemus, et mansionem apud eum faciemus.* Facit etiam hominem esse in Deo, secundum illud I Joan. iv, 16: *Qui manet in caritate, in Deo manet et Deus in eo.* Ille igitur per acceptum donum gratuitum efficitur Deo gratus qui usque ad hoc perducitur quod per caritatis amorem unus spiritus fiat cum Deo quod ipse in Deo sit, et Deus in eo: unde Apostolus dicit I Corinth. xiii, quod sine caritate cetera dona hominibus non prosunt: quia gratum Deo facere non possunt, nisi caritas adsit. Hæc autem gratia est omnium sanctorum communis. Unde hanc gratiam homo Christus discipulis orando impetrans, dicit, Joan. xvii, 21: *Ut sint unum,* scilicet per connexionem amoris, *sicut et nos unum sumus.* Alia vero conjunctio est hominis ad Deum non solum per affectum aut inhabitationem, sed etiam per unitatem hypostasis seu personæ, ut scilicet una et eadem hypostasis seu persona, sit Deus et homo. Et hæc quidem conjunctio hominis ad Deum est propria Jesu Christi: de qua conjunctione plura jam dicta sunt. Hæc etiam est hominis Christi gratia singularis quod est Deo unitus in unitate personæ: et ideo gratis datum est, quia et naturæ facultatem excedit, et hoc donum merita nulla præcedunt. Sed et gratissimum Deo facit, ita quod de ipso singulariter dicatur:

*Hic est Filius meus dilectus in quo mihi complacui,* Matth. iii, 17.

Hoc tamen interesse videtur inter utramque gratiam: quod gratia quidem per quam homo Deo unitur per affectum, aliquid habituale existit in anima: quia cum per actum amoris sit conjunctio ista, actus autem perfecti procedunt ab habitu; consequens est ut ad istum perfectissimum habitum, quo anima Deo coniungitur per amorem, aliqua habitualis gratia animæ infundatur. Esse autem personale vel hypostaticum, non est per aliquem habitum, sed per naturas, quarum sunt hypostases vel personæ. Unio igitur humanæ naturæ ad Deum in unitate personæ non fit per aliquam habituales gratiam, sed per ipsarum naturarum conjunctionem in persona una. In quantum autem creatura aliqua magis ad Deum accedit, intantum de bonitate ejus magis participat, et abundantioribus donis ex ejus influenza repletur; sicut et ignis calorem magis participat qui ei magis appropinquat. Nullus autem modus esse aut excogitari potest, quo aliqua creatura propinquius Deo adhæreat, quam quod ei in unitate personæ coniungatur. Ex ipsa igitur unione naturæ humanæ ad Deum in unitate personæ, consequens est ut anima Christi donis gratiarum habitualibus præ ceteris fuerit plena; et sic habitualis gratia in Christo non est dispositio ad unionem, sed magis unionis effectus: quod ex ipso modo loquendi, quo Evangelista unitur in verbis præmissis, manifeste apparet, cum dicit: *Vidimus eum quasi unigenitum a Patre, plenum gratiæ et veritatis.* Est autem unigenitus a Patre homo Christus, in quantum Verbum caro factum est. Ex hoc ergo quod Verbum caro factum est, hoc effectum est ut esset plenum gratiæ et veritatis. In his autem quæ aliqua bonitate replentur vel perfectione, illud magis plenum esse invenitur ex quo etiam in alia redundat, sicut plenius lucet quod illuminare potest alia. Quia igitur homo Christus summam plenitudinem gratiæ obtinuit quasi unigenitus a Patre, consequens fuit ut ab ipso in alios redundaret, ita quod Filius Dei factus homo, homines faceret deos et filios Dei, secundum illud Apostoli ad Galat. iv, 4: *Misit Deus Filium suum factum ex muliere: factum sub lege, ut eos qui sub lege erant redimeret, ut adoptionem filiorum reciperemus.* Ex hoc autem quod a Christo ad

alios gratia et veritas derivantur, convenit ei ut sit caput Ecclesiæ. Nam a capite ad alia membra, quæ sunt ei conformia in natura, quodammodo sensus et motus derivatur: sic a Christo et gratia et veritas ad alios homines derivantur: unde ad Ephes. I, 22: *Et ipsum dedit caput supra omnem Ecclesiam, quæ est corpus ejus.* Dici etiam potest caput non solum hominum, sed etiam Angelorum; quantum ad excellentiam et influentiam, licet non quantum ad conformitatem naturæ secundum eandem speciem. Unde ante prædicta verba Apostolus præmittit quod Deus « *constituit illum,* » scilicet Christum, *ad dexteram suam in cælestibus supra omnem Principatum, Potestatem et Virtutem et Dominationem.*

Sic igitur secundum præmissa triplex gratia consuevit assignari in Christo. Primo quidem gratia unionis secundum quod humana natura nullis meritis præcedentibus hoc donum accepit ut uniretur Dei Filio in persona. Secundo gratia singularis, qua anima Christi præ ceteris fuit gratia et veritate repleta. Tertio gratia capitis, secundum quod ab ipso in alios gratia redundat: quæ tria Evangelista (Joannes, cap. I) congruo ordine prosequitur. Nam quantum ad gratiam unionis dicit: *Verbum caro factum est:* quantum ad gratiam singularem dicit: *Vidimus eum quasi unigenitum a Patre, plenum gratiæ et veritatis:* quantum ad gratiam capitis subdit: *Et de plenitudine ejus nos omnes accepimus.*

### CAPUT CCXXIII.

#### *De infinitate gratiæ Christi.*

Est autem proprium Christi quod ejus gratia sit infinita; quia secundum testimonium Joannis Baptistæ, *non ad mensuram dat Deus spiritum* homini Christo, ut dicitur Joan. III, 34; aliis autem datur spiritus ad mensuram, secundum illud ad Ephes. IV, 7: *Unicuique nostrum data est gratia secundum mensuram donationis Christi.* Et quidem si hoc referatur ad gratiam unionis, nullam dubitationem habet quod dicitur. Nam aliis quidem sanctis datum est deos aut filios Dei esse per participationem ex influenza alicujus

doni: quod quia creatum est, necesse est ipsum, sicut et ceteras creaturas, esse finitum: sed Christo secundum humanam naturam datum est ut sit Dei Filius non per participationem, sed per naturam. Naturalis autem divinitas est infinita. Ex ipsa igitur unione accepit donum infinitum; unde gratia unionis absque omni dubitatione est infinita.

Sed de gratia habituali dubium esse potest, an sit infinita. Cum enim hujusmodi gratia sit etiam donum creatum, confiteri oportet quod habeat essentiam finitam. Potest tamen dici infinita triplici ratione. Primo quidem ex parte recipientis. Manifestum est enim uniuscujusque naturæ creatæ capacitatem esse finitam: quia etsi infinitum bonum recipere possit cognoscendo et fruendo, non tamen ipsum recipit infinite. Est igitur cujuslibet creaturæ secundum suam speciem et naturam determinata capacitatis mensura; quæ tamen divinæ potestati non præjudicat quin possit aliam creaturam majoris capacitatis facere. Sed jam non esset ejusdem naturæ secundum speciem; sicut si ternario addatur unitas, jam erit alia species numeri. Quando igitur alicui non tantum datur de bonitate divina quanta est capacitas naturalis speciei suæ, videtur ei secundum aliquam mensuram donatum. Cum vero tota naturalis capacitas impletur, non videtur ei secundum mensuram donatum; quia etsi sit mensura ex parte recipientis, non tamen est mensura ex parte dantis, qui totum est paratus dare; sicut si<sup>1</sup> aliquis vas ad fluvium deferens, absque mensura invenit aquam præparatam, quamvis ipse cum mensura accipiat propter vasis determinatam quantitatem. Sic igitur gratia Christi habitualis finita quidem est secundum essentiam, sed infinite et non secundum mensuram dari dicitur: quia tantum datur, quantum natura creata potest esse capax. Secundo vero ex parte ipsius doni recepti. Considerandum enim est, quod nihil prohibet aliquid secundum essentiam finitum esse, quod tamen secundum rationem alicujus formæ infinitum existit. Infinitum enim secundum essentiam est quod habet totam essendi plenitudinem: quod quidem soli Deo convenit, qui est ipsum esse. Si autem ponatur esse aliqua forma specialis non in

<sup>1</sup> Parm.: « sicut aliquis. »

subjecto existens, puta albedo vel calor, non quidem haberet essentiam infinitam, quia essentia ejus esset limitata ad genus vel speciem; sed tamen plenitudinem illius speciei possideret: unde secundum rationem speciei, absque termino vel mensura esset habens quicquid ad illam speciem pertinere potest. Si autem in aliquo subjecto recipiatur albedo vel calor, non habet semper totum quicquid pertinet ad rationem hujus formæ de necessitate et semper; sed solum quando sic perfecte habetur sicut perfecte haberi potest; ita scilicet quod modus habendi adæquet rei habitæ potestatem. Sic igitur gratia Christi habitualis finita quidem fuit secundum essentiam; sed tamen dicitur absque termino et mensura fuisse, quia quicquid ad rationem gratiæ poterat pertinere, totum Christus accepit. Alii autem non totum accipiunt, sed unus sic, alius autem sic: *divisiones enim gratiarum sunt*, ut dicitur I ad Corinth. xii, 4. Tertio autem ex parte causæ. In causa enim quodammodo habetur effectus. Cuiuscumque ergo adest causa infinitæ virtutis ad influendum habet quod influitur absque mensura, et quodammodo infinite: puta si quis haberet fontem qui aquas in infinitum effluere posset, aquam absque mensura et infinite quodammodo diceretur habere. Sic igitur anima Christi infinitam et absque mensura gratiam habet ex hoc ipso quod habet Verbum sibi unitum quod est totius emanationis creaturarum indeficiens et infinitum principium.

Ex hoc autem quod gratia singularis animæ Christi est modis prædictis infinita, evidenter colligitur quod gratia ipsius secundum quod est Ecclesiæ caput, est etiam infinita. Ex hoc enim quod habet, effundit: unde quia absque mensura spiritus dona accepit, habet virtutem absque mensura effundendi: quod ad gratiam capitis pertinet: ut scilicet sua gratia non solum sufficiat ad salutem hominum aliquorum, sed etiam totius mundi, secundum illud I Joan. ii, 2. *Et ipse est propitiatio pro peccatis nostris, et non solum pro nostris, sed etiam pro totius mundi.* Adde autem et potest plurimum mundorum, si essent.

## CAPUT CCXXIV.

*De plenitudine sapientiæ Christi.*

Oportet autem consequenter dicere de plenitudine sapientiæ Christi. Ubi primo considerandum occurrit quod cum in Christo sint duæ naturæ, divina scilicet, et humana: quicquid ad utramque naturam pertinet, necesse est quod geminetur in Christo, ut supra dictum est. Sapientia autem et divinæ naturæ convenit et humanæ. Dicitur enim de Deo Job. ix, 4, *Sapientis corde est, et fortis robore.* Sed etiam homines interdum Scriptura sapientes appellat seu secundum sapientiam mundanam, secundum illud Jer. ix, 23: *Non gloriatur sapiens in sapientia sua: sive secundum sapientiam divinam, secundum illud Matth. xxiii, 24: Ecce ego mitto ad vos Prophetas et sapientes et scribas.* Ergo oportet confiteri duas esse in Christo sapientias secundum duas naturas; sapientiam scilicet increatam, quæ ei competit secundum quod est Deus; et sapientiam creatam, quæ ei competit secundum quod est homo. Et secundum quidem quod Deus est et Verbum Dei, est genita sapientia Patris, secundum illud I ad Corinth. i, 24: *Christum Dei virtutem et Dei sapientiam.* Nihil enim est aliud Verbum interius uniuscujusque intelligentis nisi conceptio sapientiæ ejus. Et quia Verbum Dei supra diximus esse perfectum et unitum, necesse est quod Dei Verbum sit perfecta conceptio sapientiæ Dei Patris: ut scilicet quicquid in sapientia Dei Patris continetur per modum ingeniti, totum in Verbo contineatur per modum geniti et concepti. Et inde est quod dicitur Coloss. i, 3, quod in ipso, scilicet Christo, *sunt omnes thesauri [sapientiæ et scientiæ absconditi].*

Hominis autem Christi est duplex cognitio. Una quidem deiformis; secundum quod Deum per essentiam videt, et alia videt in Deo, sicut et ipse Deus intelligendo se ipsum, intelligit omnia alia: per quam visionem et ipse Deus beatus est, et omnis creatura rationalis perfecte Deo fruens. Quia igitur Christum dicimus esse humanæ salutis auctorem, necesse est dicere quod talis cognitio sic animæ Christi conveniat ut decet auctorem. Principium autem et immobile esse oportet, et virtute præstantissimum. Conve-



niens igitur fuit ut illa Dei visio in qua beatitudo hominum et salus æterna consistit, excellentius præ ceteris Christo conveniat, et tamquam immobili principio. Hæc autem differentia invenitur mobilium ad immobilia : quod mobilia propriam perfectionem non a principio habent, in quantum mobilia sunt, sed eam per successionem temporis assequuntur : immobilia vero, in quantum huiusmodi, semper obtinent suas perfectiones ex quo esse incipiunt. Conveniens igitur fuit Christum humanæ salutis auctorem ab ipso suæ incarnationis principio plenam Dei visionem possedissee, non autem per temporis successionem pervenisse ad ipsam, ut sancti alii perveniunt. Conveniens etiam fuit ut præ ceteris creaturis illa anima divina visione beatificaretur quæ Deo propinquius conjungebatur : in qua quidem visione gradus attenditur secundum quod aliqui aliis clarius Deum vident, qui est omnium rerum causa. Quanto autem aliqua causa plenius cognoscitur, tanto in ipsa plures ejus effectus perspicui possunt. Non enim magis cognoscitur causa, nisi virtus ejus plenius cognoscatur ; cujus virtutis cognitio sine cognitione effectuum esse non potest : nam quantitas virtutis secundum effectus mensurari solet. Et inde est quod eorum qui essentiam Dei vident, aliqui plures effectus vel rationes divinorum operum in ipso Deo inspiciunt, quam alii qui minus clare vident : et secundum hoc inferiores Angeli a superioribus instruuntur, ut supra jam diximus. Anima igitur Christi summam perfectionem divinæ visionis obtinens inter creaturas ceteras, omnia divina opera et rationes ipsorum, quæcumque sunt, erunt vel fuerunt, in ipso Deo plene intuetur, ut non solum homines, sed etiam supremos Angelorum illuminet : et ideo Apostolus dicit ad Colossens. ii, 3, quod in ipso *sunt omnes thesauri sapientiæ et scientiæ Dei absconditi* : et ad Hebr. iv 13, quod *omnia nuda et aperta sunt oculis ejus*. Non tamen anima Christi ad comprehensionem Divinitatis pertingere potest. Nam, ut supra dictum est, illud cognoscendo comprehenditur quod tantum cognoscitur quantum cognoscibile est. Unumquodque enim cognoscibile est in quantum est ens et verum ; esse autem divinum est infinitum, similiter et veritas ejus. Infinite igitur Deus cognoscibilis est. Nulla autem creatura infinite cognoscere potest, etsi in-

finitum sit quod cognoscit. Nulla igitur creatura Deum videndo comprehendere potest. Est autem anima Christi creatura, et quicquid in Christo ad humanam naturam tantum pertinet, creatum est : alioquin non erit in Christo alia natura humanitatis a natura Divinitatis, quæ sola increata est. Hypostasis autem Dei Verbi, sive persona, increata est, quæ una est in duabus naturis : ratione cujus Christum non dicimus creaturam, loquendo simpliciter, quia nomine Christi importatur hypostasis ; dicimus tamen animam Christi vel corpus Christi esse creaturam. Anima igitur Christi Deum non comprehendit, sed Christus Deum comprehendit sua sapientia increata ; secundum quem modum Dominus dicit Matth. xi, 27 : *Nemo novit filium nisi Pater, neque Patrem quis novit nisi Filius*, de comprehensionis ejus notitia loquens.

Est autem considerandum quod ejusdem rationis est comprehendere essentiam alicujus rei, et virtutem ipsius : unumquodque enim potest agere in quantum est ens actu. Si igitur anima Christi essentiam Divinitatis comprehendere non valet, ut ostensum est, impossibile est ut divinam virtutem comprehendat. Comprenderet autem, si cognosceret quidquid Deus facere potest, et quibus rationibus effectus producere possit. Hoc autem est impossibile. Non igitur anima Christi cognoscit quidquid Deus facere potest, vel quibus rationibus possit operari.

Sed quia Christus etiam secundum quod homo, omni creaturæ a Deo Patre præpositus est, conveniens est ut omnium quæ a Deo qualitercumque facta sunt, in ipsius divinæ essentiæ visione plenam cognitionem percipiat : et secundum hoc anima Christi omnisciens dicitur, quia plenam notitiam habet omnium quæ sunt, erunt, vel fuerunt. Aliarum vero creaturarum Deum videntium quædam plenius et quædam minus plene prædictorum effectuum in ipsa Dei visione cognitionem percipiunt.

Præter hanc autem rerum cognitionem, qua res ab intellectu creato cognoscuntur ipsius divinæ essentiæ visione, sunt alii modi cognitionis, quibus a creaturis habetur rerum cognitio. Nam Angeli præter cognitionem matutinam, qua res in Verbo cognoscunt, habent cognitionem vespertinam, qua cognoscunt res in propriis naturis. Huiusmodi



autem cognitio aliter competit hominibus secundum naturam suam, atque aliter Angelis. Nam homines secundum naturam ordinem, intelligibilem rerum veritatem a sensibilibus colligunt, ut Dionysius dicit; ita scilicet quod species intelligibiles in eorum intellectibus actione intellectus agentis a phantasmatibus abstrahuntur; Angeli vero per influxum divini luminis rerum scientiam acquirunt: ut scilicet sicut a Deo res in esse procedunt, ita etiam in intellectu angelico a Deo rerum rationes sive similitudines imprimantur. In utrisque autem, tam hominibus quam Angelis, supra rerum cognitionem quæ competit eis secundum naturam, invenitur quædam supernaturalis cognitio mysteriorum divinorum, de quibus et Angeli illuminantur ab Angelis, et homines etiam de his prophetica revelatione instruuntur.

Et quia nulla perfectio creaturis exhibita, animæ Christi, quæ est creaturarum excellentissima, deneganda est, convenienter præter cognitionem qua Dei essentiam videt et omnia in ipsa, triplex alia cognitio est ei attribuenda. Una quidem experimentalis, sicut aliis hominibus, in quantum aliqua per sensus cognovit, ut competit humanæ naturæ. Alia vero divinitus infusa, ad cognoscenda omnia illa ad quæ naturalis cognitio hominis se extendit vel extendere potest. Conveniens enim fuit ut humana natura a Dei Verbo assumpta in nullo a perfectione deficeret, utpote per quam tota humana natura restauranda esset. Est autem imperfectum omne quod in potentia existit, antequam reducat in actum. Intellectus autem humanus est in potentia ad intelligibilia quæ naturaliter homo intelligere potest. Omnium igitur horum scientiam divinitus anima Christi per species influxas accepit, per hoc quod tota potentia intellectus humani fuit reducta ad actum. Sed quia Christus secundum humanam naturam non solum fuit reparator naturæ, sed et gratiæ propagator, affuit ei etiam tertia cognitio, qua plenissime cognovit quidquid ad mysteria gratiæ potest pertinere, quæ naturalem hominis cognitionem excedunt, sed cognoscuntur ab hominibus per donum sapientiæ, vel per spiritum prophetiæ. Nam ad hujusmodi cognoscenda est in potentia intellectus humanus, licet ab altiori agente reducat in actum. Nam ad naturalia cognoscenda

reducitur in actum per lumen intellectus agentis; horum autem cognitionem consequitur per lumen divinum.

Patet igitur ex prædictis quod anima Christi summum cognitionis gradum inter ceteras creaturas obtinuit quantum ad Dei visionem, qua Dei essentia videtur, et alia in ipsa; etiam similiter quantum ad cognitionem mysteriorum gratiæ: nec non quantum ad cognitionem naturalium scibilium: unde in nulla harum trium cognitionum Christus proficere potuit. Sed manifestum est quod res sensibiles per temporis successionem magis ac magis sensibus corporis experiendo cognovit: et ideo solum quantum ad cognitionem experimentalem Christus potuit proficere, secundum illud Luc. II, 52: *Puer proficiebat sapientia et ætate*: quamvis posset et hoc aliter intelligi, ut profectus sapientiæ Christi dicatur non quo ipse fit sapientior, sed quod sapientia proficiebat in aliis, quia scilicet per ejus sapientiam magis ac magis instruebantur. Quod dispensative factum est, ut se aliis hominibus conformem ostenderet; ne, si in puerili ætate perfectam sapientiam demonstrasset, incarnationis mysterium phantasticum videretur.

## CAPUT CCXXV.

### *De materia corporis Christi.*

Secundum præmissa igitur evidenter apparet qualis debuit esse corporis Christi formatio. Poterat siquidem Deus corpus Christi ex limo terræ formare, vel ex quacumque materia, sicut formavit corpus primi parentis; sed hoc humanæ restorationi, propter quam Filius Dei, ut diximus, carnem assumpsit, congruum non fuisset. Non enim sufficienter natura humani generis ex primo parente derivata, quæ sananda erat, in pristinum honorem restituta esset, si aliunde corpus assumeret diaboli victor et mortis triumphator, sub quibus humanum genus captivum tenebatur propter peccatum primi parentis. Dei autem perfecta sunt opera, et ad perfectum perducit quod reparare intendit, ut etiam plus adjiciat quam fuerat subtractum, secundum illud Apostoli Rom. v. *Gratia Dei per Christum amplius abundavit quam delictum Adæ*. Conveniens igitur fuit ut Dei Filius corpus assumeret de natura propagatum ab Adam.

Adhuc. Incarnationis mysterium hominibus proficuum per fidem redditur. Nisi enim homines crederent Dei filium esse qui homo videbatur, non sequerentur eum homines ut salutis auctorem: quod Judæis accidit, qui ex incarnationis mysterio propter incredulitatem, damnationem potius quam salutem sunt consecuti. Ut ergo hoc ineffabile mysterium facilius crederetur, Filius Dei sic omnia dispensavit ut se verum hominem esse ostenderet: quod non ita videretur, si aliunde naturam sui corporis acciperet quam ex natura humana. Conveniens igitur fuit ut corpus a primo parente propagatum assumeret.

Item. Filius Dei homo factus humano generi salutem adhibuit, non solum conferendo gratiæ remedium, sed etiam præbendo exemplum, quod repudiari non potest. Alterius enim hominis et doctrina et vita in dubium verti potest propter defectum humanæ cognitionis et veritatis. Sed sicut quod Filius Dei docet, indubitanter creditur verum; ita quod operatur, creditur indubitanter bonum. Oportuit autem ut in eo exemplum acciperemus et gloriæ quam speramus, et virtutis qua ipsam meremur: utrumque enim exemplum minus efficax esset, si aliunde naturam corporis assumpisset quam unde alii homines assumunt. Si cui enim persuaderetur quod toleraret passionem, sicut Christus sustinuit, et quod speraret se resurrecturum, sicut Christus resurrexit; posset excusationem prætere ex diversa corporis conditione. Ut igitur exemplum Christi efficacius esset, conveniens fuit ut non aliunde corporis naturam assumeret quam de natura quæ a primo parente propagatur.

#### CAPUT CCXXVI.

*De formatione corporis Christi, quod non est ex semine.*

— Non tamen fuit conveniens ut eodem modo formaretur corpus Christi in humana natura, sicut formantur aliorum hominum corpora. Cum enim ad hoc naturam assumeret ut ipsam a peccato mundaret, oportebat ut tali modo assumeret quod nullum contagium peccati incurreret. Homines autem peccatum ori-

ginale incurrunt ex hoc quod generantur per virtutem activam humanam, quæ est in virili semine; quod est secundum seminalem rationem in Adam peccante præextitisse. Sicut enim primus homo originalem justitiam transfudisset in posteros simul cum transfusione naturæ, ita etiam originalem culpam transfudit transfundendo naturam, quod est per virtutem activam virilis seminis. Oportuit igitur absque virili semine, Christi formari corpus.

Item. Virtus activa virilis seminis naturaliter agit; et ideo homo qui ex virili semine generatur, non subito perducitur ad perfectum, sed determinatis processibus. Omnia enim naturalia per determinata media ad determinatos fines procedunt. Oportebat autem corpus Christi in ipsa assumptione perfectum esse, et anima rationali informatum; quia corpus est assumptibile a Dei Verbo in quantum est animæ rationali unitum, licet non esset perfectum secundum debitam quantitatem. Non ergo corpus Christi formari debuit per virilis seminis virtutem.

#### CAPUT CCXXVII.

*De causa formationis corporis Christi.*

Cum autem corporis humani formatio naturaliter sit ex virili semine, quocumque alio modo corpus Christi formatum fuerit, supra naturam fuit talis formatio. Solus autem Deus institutor naturæ est, qui supernaturaliter in rebus naturalibus operatur, ut supra dictum est. Unde relinquitur quod solus Deus illud corpus miraculose formavit ex materia humanæ naturæ. Sed cum omnis Dei operatio in creatura sit tribus personis communis, tamen per quamdam convenientiam formatio corporis Christi attribuitur Spiritui sancto: est enim Spiritus sanctus amor Patris et Filii, quo se invicem et nos diligunt. Deus autem, ut Apostolus ad Ephesios II, dicit, *propter nimiam caritatem suam quam dilexit nos, Filium suum incarnari constituit.* Convenienter igitur carnis formatio Spiritui sancto attribuitur.

Item. Spiritus sanctus omnium gratiarum est auctor, cum sit primum in quo

<sup>1</sup> Parm.: « quæ. »

omnia dona gratis donantur. Hoc autem fuit superabundantis gratiæ ut humana natura in unitatem divinæ personæ assumeretur, ut ex supradictis patet. Ad demonstrandum igitur hujusmodi gratiam, formatio corporis Christi Spiritui sancto attribuitur.

Convenienter etiam hoc dicitur secundum similitudinem humani verbi et spiritus. Verbum enim humanum in corde existens, similitudinem gerit æterni Verbi secundum quod existit in Patre. Sicut autem humanum verbum vocem assumit, ut sensibilibus hominibus innotescat; ita et Verbum Dei carnem assumpsit, ut visibilibus hominibus appareret. Vox autem humana per hominis spiritum formatur. Unde et caro Verbi Dei per Spiritum Verbi formari debuit.

#### CAPUT CCXXVII.

*Expositio articuli in Symbolo positi de conceptione et nativitate Christi.*

Ad excludendum igitur errorem Ebionis et Cerinthi, qui corpus Christi ex virili semine formatum dixerunt, dicitur in Symbolo Apostolorum: « Qui conceptus est de Spiritu sancto: » loco ejus in Symbolo Patrum dicitur: « Et incarnatus est de Spiritu sancto: » ut non phantasticum corpus secundum Manichæos, sed veram carnem assumpsisse credatur. Additum est autem in Symbolo Patrum, « Propter nos homines, » ad excludendum Origenis errorem, qui posuit virtute passionis Christi etiam demones liberandos. Additum est etiam in eodem, « Propter nostram salutem, » ut mysterium incarnationis Christi sufficiens ad humanam salutem ostendatur, contra hæresim Nazaræorum, qui fidem Christi sine operibus legis ad salutem humanam non sufficere putabant: Additum etiam est, « Descendit de cælis. » Ad excludendum errorem Photini, qui Christum purum hominem asserbat, dicens eum ex Maria sumpsisse initium, ut magis per bonæ vitæ meritum in terris habens principium ad cælum ascenderet, quam cælestem habens originem assumendo carnem descendisset ad terram. Additur etiam, « Et homo factus est, » ad excludendum errorem Nestorii, secundum ejus positionem Filius Dei, de quo Symbolum loquitur, magis inhabitator hominis quam homo esse diceretur.

#### CAPUT CCXXIX.

*Quod conveniens fuit Christum nasci ex virgine.*

Cum autem ostensum sit quod de materia humanæ naturæ conveniebat Filium Dei carnem assumere; materiam autem in humana generatione ministrat femina; conveniens fuit ut Christus de femina carnem assumeret, secundum illud Apostoli ad Galat, iv, 4: *Misit Deus Filium suum factum ex muliere.* Femina autem indiget viri commixtione, ad hoc quod materia quam ipsa ministrat, formetur in corpus humanum. Formatio autem corporis Christi fieri non debuit per virtutem virilis seminis, ut supra jam dictum est. Unde absque commixtione virilis seminis illa femina concepit ex qua Filius Dei carnem assumpsit. Tanto autem aliquis magis spiritualibus donis repletur, quanto magis a carnalibus separatur. Nam per spiritualia homo sursum trahitur, per carnalia vero deorsum. Cum autem formatio corporis Christi fieri debuerit per Spiritum sanctum, oportuit illam feminam de qua Christus corpus assumpsit, maxime spiritualibus donis repleri, ut per Spiritum sanctum non solum anima fecundaretur virtutibus, sed etiam venter prole divina. Unde oportuit non solum mentem ejus esse immunem a peccato, sed etiam corpus ejus ab omni corruptela carnalis concupiscentiæ elongari. Unde non solum ad concipiendum Christum virilem commixtionem non est experta, sed nec ante, nec postea. Hoc etiam conveniebat ei qui nascebatur ex ipsa. Ad hoc enim Dei Filius veniebat in mundum carne assumpta, ut nos ad resurrectionis statum promoveret, in quo *neque nubent neque nubentur, sed erunt homines sicut Angeli in cælo.* Unde et continentiae et integritatis doctrinam introduxit, ut in fidelium vita resplendeat aliquantulum gloriæ futuræ imago. Conveniens ergo fuit ut etiam in suo ortu vitæ integritatem commendaret nascendo ex virgine: et ideo in Symbolo Apostolorum dicitur: « Natus ex Virgine Maria. » In symbolo autem Patrum ex virgine Maria dicitur incarnatus: per quod Valentini error excluditur, ceterorumque,

qui corpus Christi dixerunt aut esse phantasticum, aut esse alterius naturæ, et non esse ex corpore virginis sumptum atque formatum.

## CAPUT CCXXX.

*Quod beata Virgo sit mater Christi.*

Error autem Nestorii ex hoc excluditur, qui beatam Mariam matrem Dei confiteri nolebat. In utroque autem Symbolo dicitur, Filius Dei est natus vel incarnatus ex Virgine Maria. Femina autem ex qua aliquis homo nascitur, mater illius dicitur ex eo quod materiam ministrat humano conceptui. Unde beata Virgo Maria, quæ materiam ministravit conceptui Filii Dei, vera mater Filii Dei dicenda est. Non enim refert ad rationem matris, quacumque virtute materia ministrata ab ipsa formetur. Non igitur minus mater est quæ materiam ministravit Spiritu sancto formandam, quam quæ materiam ministrat formandam virtute virilis seminis. Si quis autem dicere velit beatam Virginem Dei matrem non debere dici, quia non est ex ea assumpta Divinitas, sed caro sola, sicut dicebat Nestorius, manifeste vocem suam ignorat. Non enim ex hoc aliqua dicitur alicujus mater, quia totum quod in ipso est, ex ea sumatur. Homo enim constat ex anima et corpore; magisque est homo id quod est secundum animam quam id quod est secundum corpus. Anima autem nullius hominis a matre sumitur; sed vel a Deo immediate creatur, ut veritas habet; vel si esset ex traductione ut quidam posuerunt, non sumeretur a matre, sed magis a patre; quia in generatione ceterorum animalium, secundum Philosophorum doctrinam, masculus dat animam, femina vero corpus. Sicut igitur ejuslibet hominis mater aliqua femina dicitur ex hoc quod ab ea corpus ejus assumitur; ita Dei mater beata Virgo Maria dici debet, si ex ea assumptum est corpus Dei. Oportet autem dicere, quod sit corpus Dei, si assumitur in unitatem personæ Filii Dei, qui est verus Deus. Confitentibus igitur humanam naturam esse assumptam a Filio Dei in unitatem personæ, necesse esse dicere, quod beata Virgo Maria sit mater Dei. Sed quia Nestorius negabat unam personam esse Dei et hominis Jesu Christi, ideo ex consequenti negabat Virginem Mariam esse Dei matrem.

## CAPUT CCXXXI.

*Quod Spiritus sanctus non sit pater Christi.*

Licet autem Filius Dei dicatur de Spiritu sancto et ex Maria Virgine incarnatus et conceptus, non tamen dicendum est quod Spiritus sanctus sit pater hominis Christi, licet beata Virgo ejus mater dicatur. Primo quidem, quia in beata Maria Virgine invenitur totum quod pertinet ad matris rationem. Materiam enim ministravit Christi conceptui Spiritu sancto formandam, ut requirit matris ratio. Sed ex parte Spiritus sancti non invenitur totum quod ad rationem patris exigitur. Est enim de ratione patris ut ex sua natura filium sibi connaturalem producat. Unde si fuerit aliquod agens quod faciat aliquid non ex sua substantia, nec producat ipsum in similitudinem suæ naturæ, pater ejus dici non poterit. Non enim dicimus quod homo sit pater eorum quæ facit per artem, nisi forte secundum metaphoram. Spiritus autem sanctus est quidem Christo connaturalis secundum divinam naturam, secundum quam pater Christi non est, sed magis ab ipso procedens; secundum autem naturam humanam non est Christo connaturalis: est enim alia natura humana et divina in Christo, ut supra dictum est. Neque in naturam humanam est versum aliquid de natura divina, ut supra dictum est. Relinquitur ergo quod Spiritus sanctus pater hominis Christi dici non possit.

Item. In unoquoque filio id quod est principalius in ipso, est a patre; quod autem secundarium, a matre. In aliis enim animalibus anima est a patre, corpus vero a matre; in homine autem etsi anima rationalis a patre non sit, sed a Deo creata, virtus tamen paterni seminis dispositive operatur ad formam. Id autem quod principalius est in Christo, est persona Verbi, quæ nullo modo est a Spiritu sancto. Relinquitur ergo quod Spiritus sanctus pater Christi dici non possit.

## CAPUT CCXXXII.

*De sanctificatione matris Christi.*

Quia igitur, ut ex prædictis apparet, beata Virgo Maria mater Filii Dei facta

est, de Spiritu sancto concipiens, decuit ut excellentissima puritate mundaretur, per quam congrueret tanto ministerio<sup>1</sup>: et ideo credendum est eam ab omni labe actualis peccati immunem fuisse non tantum mortalis, sed etiam venialis: quod nulli sanctorum convenire potest post Christum, cum dicatur I Joan. 1, 8: *Si dixerimus quoniam peccatum non habemus, ipsi nos seducimus, et veritas in nobis non est.* Sed de beata Virgine matre Dei intelligi potest quod Cant. iv, 7, dicitur: « Tota pulchra es, amica mea, et macula non est in te. » Nec solum a peccato actuali immunis fuit, sed etiam ab originali, speciali privilegio mundata. Oportuit siquidem quod cum peccato originali conciperetur, utpote quæ ex utriusque sexus commixtione concepta fuit. Hoc enim privilegium sibi soli servabatur ut virgo conciperet Filium Dei. Commixtio autem sexus, quæ sine libidine esse non potest post peccatum primi parentis, transmittit peccatum originale in prolem. Similiter etiam quia si cum peccato originali concepta non fuisset, non indigeret per Christum redimi; et sic non esset Christus universalis hominum redemptor: quod derogat dignitati Christi. Est ergo tenendum, quod cum peccato originali concepta fuit, sed ab eo quodam speciali modo, ut dictum est<sup>2</sup>, purgata fuit. Quidam enim a peccato originali purgantur post nativitatem ex utero, sicut qui in baptismo sanctificantur. Quidam autem quodam privilegio gratiæ etiam in maternis uteris sanctificati leguntur, sicut de Jeremia dicitur Jerem. 1, 5: *Priusquam te formarem in utero, novi te, et antequam exires de vulva, sanctificavi te;* et de Joanne Baptista Angelus dicit Luc. 1, 43: *Spiritu sancto replebitur adhuc ex utero matris suæ.* Quod autem præstitum est Christi præcursori et prophetæ, non debet credi denegatum esse matri ipsius: et ideo creditur in utero sanctificata, ante scilicet quam ex utero nasceretur. Non autem<sup>3</sup> sanctificatio præcessit infusionem animæ. Sic enim nunquam fuisset peccato originali subjecta, et redemptione non indignisset. Non enim subjectum peccati esse potest nisi creatura rationalis<sup>4</sup>. Similiter etiam gratia sanctificationis per prius in anima radicitur, nec ad

corpus potest pervenire nisi per animam: unde post infusionem animæ credendum est eam sanctificatam fuisse.

Ejus autem sanctificatio amplior fuit quam aliorum in utero sanctificatorum. Alii namque sanctificati in utero sunt quidem a peccato originali mundati, non tamen est eis præstitum ut postea non possent peccare, saltem venialiter. Sed beata Virgo Maria tanta abundantia gratiæ sanctificata fuit, ut deinceps ab omni peccato conservaretur immunis non solum mortali, sed etiam veniali. Et quia veniale peccatum interdum ex surreptione contingit, ex hoc scilicet quod aliquis inordinatus concupiscentiæ motus, insurgit, aut alterius passionis, præveniens rationem, ratione cujus primi motus dicuntur esse peccata; consequens est quod beata Virgo Maria nunquam peccavit venialiter, eo quod inordinatos passionum motus non sensit. Contingunt autem hujusmodi motus inordinati ex hoc quod appetitus sensitivus, qui est harum passionum subjectum, non sic subicitur rationi quin interdum ad aliquid præter ordinationem rationis moveatur, et quandoque contra rationem, in quo consistit motus peccati. Sic igitur fuit in beata Virgine appetitus sensitivus rationi subjectus per virtutem gratiæ ipsum sanctificantis, quod nunquam contra rationem movebatur, sed secundum ordinem rationis; poterat tamen habere aliquos motus subitos non ordinatos ratione.

In Domino autem Jesu Christo aliquid amplius fuit. Sic enim inferior appetitus in eo rationi subiciebatur ut ad nihil moveretur nisi secundum ordinem rationis, secundum scilicet quod ratio ordinabat, vel permittebat appetitum inferiorem moveri proprio motu. Hoc autem videtur ad integritatem primi status pertinuisse ut inferiores vires totaliter rationi subderentur: quæ quidem subjectio per peccatum primi parentis est sublata non solum in ipso, sed etiam in aliis qui ab eo contrahunt peccatum originale, in quibus etiam postquam a peccato mundantur per gratiæ sacramentum, remanet rebellio vel inobedientia inferiorum virium ad rationem, quæ dicitur fomes peccati, quæ in Christo nullatenus fuit secundum prædicta.

<sup>1</sup> Parm.: « Filio. »

<sup>2</sup> Parm. omittit: « ut dictum est. »

<sup>3</sup> Parm. addit: « talis. »

<sup>4</sup> Cod 1060 non habet: « non enim subjectum peccati esse potest nisi creatura rationalis. »



Sed quia in beata Virgine Maria non erant inferiores vires totaliter rationi subjectæ, ut scilicet nullum motum haberent a ratione non præordinatum: et tamen sic cohibebantur per virtutem gratiæ ut nullo modo contra rationem moverentur; propter hoc solet dici, quod in beata Virgine post sanctificationem remansit quidem fomes peccati secundum substantiam, sed ligatus.

## CAPUT CCXXXIII.

*De perpetua virginitate matris Christi.*

Si autem per primam sanctificationem sic fuit contra omnem motum peccati munita, multo magis in ea excrevit<sup>1</sup> gratia, fomesque peccati in ea est debilitatus, vel etiam totaliter sublatus, Spiritu sancto in ipsa secundum verbum Angeli superveniente, ad corpus Christi ex ea formandum. Unde postquam facta est sacrarium Spiritus sancti et habitaculum Filii Dei, nefas est credere non solum aliquem motum peccati in ea fuisse, sed nec etiam carnalis concupiscentiæ delectationem eam fuisse expertam. Et ideo abominandus error est Helvidii, qui etiamsi asserat Christum ex virgine conceptum et natum, dixit tamen eam postmodum ex Joseph alios filios genuisse.

Nec hoc ejus suffragatur errori quod Matthæi 1, 25, dicitur, quod non *cognovit eam Joseph, scilicet Mariam, donec peperit filium suum primogenitum*; quasi postquam peperit Christum, eam cognoverit: quia *donec* in hoc loco non significat tempus finitum, sed indeterminatum. Est enim consuetudo sacræ Scripturæ ut usque tunc specialiter asserat aliquid factum vel non factum, quosque in dubium poterat venire; sicut dicitur in Psal. cix, 1: *Sede a dextris meis, donec ponam inimicos tuos scabellum pedum tuorum*. Dubium enim esse poterat an Christus sederet ad dexteram Dei, quamdiu non viderentur ei inimici esse subjecti; quod postquam innotuerit, nullus remanebit dubitandi locus. Similiter etiam dubium esse poterat, an ante partum Filii Dei Joseph Mariam cognoverit: unde hoc Evangelista remove curavit, quasi indubitabile relinquens quia post partum non fuit cognita.

<sup>1</sup> Al. : « exercuit. »

Nec etiam ei suffragatur quod Christus dicitur ejus primogenitus, quasi post ipsum alios genuerit filios. Solet enim in Scriptura primogenitus dici ante quem nullus genitus, etiamsi post ipsum nullus sequatur, sicut patet de primogenitis qui secundum legem sanctificabantur Domino, et sacerdotibus offerebantur.

Nec etiam ei suffragatur quod in Evangelio aliqui dicuntur fratres Christi fuisse, quasi mater ejus alios habuerit filios. Solet enim Scriptura fratres dicere omnes qui sunt ejusdem cognationis, sicut Abraham Loth suum fratrem nominavit, cum tamen esset nepos ejus. Et secundum hoc nepotes Mariæ, et alii ejus consanguinei, fratres Christi dicuntur, et etiam consanguinei Joseph, qui pater Christi putabatur.

Et ideo in *Symbolo* dicitur: « Qui natus est de virgine Maria: » quæ quidem virgo dicitur absolute, quia et ante partum, et in partu, et post partum virgo permansit. Et quidem quod ante partum et post partum ejus virginitati derogatum non fuerit, satis jam dictum est. Sed nec in partu ejus virginitas fuit violata. Corpus enim Christi, quod ad discipulos januis clausis intravit, potuit eadem potestate de utero clauso matris exire. Non enim decebat ut integritatem nascendo tolleretur, qui ad hoc nascebatur ut corrupta in integrum reformaretur.

## CAPUT CCXXXIV.

*De defectibus assumptis a Christo.*

Sicut autem conveniens fuit ut Filius Dei naturam assumens humanam propter humanam salutem, in natura assumpta salutis humanæ finem ostenderet per gratiæ et sapientiæ perfectionem; ita etiam conveniens fuit quod in humana natura assumpta a Dei Verbo conditiones aliquæ existerent quæ congruerent decentissimo liberationis modo humani generis. Fuit autem congruentissimus modus ut homo, qui per injustitiam perierat, per justitiam repararetur. Exigit autem hoc justitiæ ordo ut qui pænæ aliquis peccando factus est debitor, per solutionem pænæ liberetur. Quia vero quæ per amicos facimus aut patimur, aequaliter nos ipsi facere aut pati vide-

mur, eo quod amor est mutua virtus ex duobus se amantibus quodammodo faciens unum; non discordat a justitia ordine, si aliquis liberetur, amico ejus satisfaciente pro ipso. Per peccatum autem primi parentis perditio in totum humanum genus devenerat; nec alicujus hominis pœna sufficere poterat, ut totum genus humanum liberaret: non enim erat condigna satisfactio æquivalens, ut uno homine puro satisfaciente omnes homines liberarentur: similiter etiam nec sufficiebat secundum justitiam ut Angelus ex amore humani generis pro ipso satisfaceret; Angelus enim non habet dignitatem infinitam, ut satisfactio ejus pro infinitis et infinitorum peccatis sufficere posset. Solus autem Deus est infinitæ dignitatis, qui carne assumpta pro homine sufficienter satisfacere poterat, ut supra jam diximus. Talem igitur oportuit ut humanam naturam assumeret in qua pati posset pro homine ea quæ homo peccando meruit ut pateretur, ad satisfaciendum pro homine. Non autem omnis pœna quam peccando incurrit, est ad satisfaciendum idonea. Provenit enim peccatum hominis ex hoc quod a Deo avertitur conversus ad commutabilia bona. Punitur autem homo pro peccato in utrisque: nam et privatur gratia, et ceteris donis, quibus Deo conjungitur; et meretur etiam pati molestiam et defectum in eo propter quod est a Deo aversus. Ille igitur ordo satisfactionis requirit ut per pœnas quas peccator in bonis commutabilibus patitur, revocetur ad Deum. Huic autem revocationi contrariæ sunt illæ pœnæ quibus homo separatur a Deo. Nullus igitur per hoc Deo satisfacit quod privatur gratia, vel quod ignorat Deum, vel quod habet inordinatam animam, quamvis hoc sit pœna peccati; sed per hoc quod in se ipso aliquem dolorem sentit, et in exterioribus rebus damnus. Non igitur Christus illos defectus assumere debuit quibus homo separatur a Deo, licet sint pœna peccati, sicut privatio gratiæ, ignorantia, et hujusmodi; per hoc enim minus idoneus ad satisfaciendum redderetur; quin immo ad hoc quod esset auctor humanæ salutis, requirebatur ut plenitudinem gratiæ et sapientiæ possideret, sicut jam dictum est. Sed quia homo per peccatum in hoc positus erat ut necessitatem moriendi haberet, et ut secundum corpus et animam esset passibilis, hujusmodi defectus Christus suscipere voluit, ut mor-

tem pro hominibus patiendo genus humanum redimeret.

Est tamen attendendum quod hujusmodi defectus sunt Christo et nobis communes; alia tamen ratione inveniuntur in Christo et in nobis. Hujusmodi enim defectus, ut dictum est, pœna sunt primi peccati. Quia igitur non per vitiatam originem culpam originalem contrahimus, per consequens hos defectus dicimur contractos habere. Christus autem ex sua origine nullam maculam peccati contraxit, hos autem defectus ex sua voluntate accepit: unde dici non debet quod habuit hos defectus contractos, sed magis assumptos: illud enim contrahitur quod cum alio ex necessitate trahitur. Christus autem potuit assumere humanam naturam sine hujusmodi defectibus, sicut sine culpæ fœditate assumpsit: et hoc rationis ordo poscere videbatur ut qui fuit immunis a culpa, esset immunis a pœna. Et sic patet quod nulla necessitate neque vitiatæ originis, neque justitiæ, hujusmodi defectus fuerunt in eo: unde relinquitur quod non contracti, sed voluntarie assumpti fuerunt in eo.

Quia vero corpus nostrum prædictis defectibus subjacet in pœnam peccati, nam ante peccatum ab his eramus immunes; convenienter Christus, in quantum hujusmodi defectus in sua carne assumpsit, dicitur similitudinem peccati gessisse, secundum illud Apostoli ad Roman. viii, 3: *Deus misit Filium suum in similitudinem carnis peccati*. Unde et ipsa Christi passibilitas vel passio ab Apostolo peccatum nominatur, cum subditur: *et de peccato damnavit peccatum in carne*, et Rom. vi, 10: *Quod mortuus est peccato, mortuus est semel*. Et quod est mirabilius, hac etiam ratione dicit Apostolus ad Galat. iii, 13, quod est *factus pro nobis maledictum*. Hac etiam ratione dicitur simplam nostram necessitatem assumpsisse, scilicet pœnæ, ut duplam nostram consumeret, scilicet culpæ et pœnæ.

Est autem considerandum ulterius quod defectus pœnales in corpore duplices inveniuntur. Quidam communes omnibus, ut esuries, sitis, lassitudo post laborem, dolor, mors et hujusmodi. Quidam vero non sunt omnibus communes, sed quorundam hominum proprii, ut cæcitas, lepra, febris, membrorum mutilatio, et hujusmodi. Horum autem defectuum hæc est differentia: quia de-

fectus communes in nobis ab alio traduntur, scilicet ex primo parente, qui eos pro peccato incurrit; defectus autem proprii ex particularibus causis in singulis hominibus innascuntur. Christus autem ex se ipso nullam causam defectus habebat nec ex anima, quæ erat gratia et sapientia, plena, et verbo Dei unita; nec ex corpore quod erat optime organizatum et dispositum, omnipotenti virtute Spiritus sancti compactum: sed sua voluntate dispensative ad nostram salutem procurandam, aliquos defectus suscepit. Illos igitur suscipere debuit qui ab alio derivantur ad alios, scilicet communes; non proprios, qui in singulis ex causis propriis innascuntur. Similiter etiam quia principaliter venerat ad restaurandum humanam naturam, illos defectus suscipere debuit qui in tota natura inveniebantur. Patet etiam secundum prædicta quod, ut Damascenus dicit, Christus assumpsit defectus nostros indetractabiles, idest quibus detrahi non potest. Si enim defectum scientiæ vel gratiæ suscepisset, aut etiam lepram, aut cæcitatem, aut aliquid hujusmodi: hoc ad derogationem dignitatis Christi pertinere videretur, et esset hominibus detrahendi occasio, quæ nulla datur ex defectibus totius naturæ.

## CAPUT CCXXXV.

*Quare Christus mori voluit.*

Manifestum igitur est secundum prædicta quod Christus aliquos defectus nostros suscepit non ex necessitate, sed propter aliquem finem, scilicet propter salutem nostram. Omnis autem potentia et habitus sive habilis ordinatur ad actum sicut ad finem: unde passibilitas ad satisfaciendum vel merendum non sufficit sine passione in actu. Non enim aliquis dicitur bonus vel malus ex eo quod potest talia agere, sed ex eo quod agit: nec laus et vituperium debentur potentiæ, sed actui. Unde et Christus non solum passibilitatem nostram suscepit ut nos salvaret, sed etiam ut pro peccatis nostris satisfaceret, voluit pati. Passus est autem pro nobis ea quæ ut nos pateremur ex peccato primi parentis meruimus: quorum præcipuum est mors, ad quam omnes aliæ passiones humanæ ordinantur sicut ad ultimum. *Stipendia*

enim « *peccati mors* » est, ut Apostolus dicit ad Rom. VI, 23. Unde et Christus pro peccatis nostris voluit mortem pati, ut dum pœnam nobis debitam ipse sine culpa susciperet, nos a reatu mortis liberaret; sicut aliquis debito pœnæ liberaretur, alio pro eo pœnam sustinente. Mori etiam voluit, ut non solum mors ejus esset nobis satisfactionis remedium, sed etiam salutis sacramentum ut ad similitudinem; mortis ejus nos carnali vitæ moriamur, in spiritualem translati, secundum illud I Petri III, 8: *Christus semel pro peccatis nostris mortuus est justus pro injustis, ut nos offerret Deo, mortificatos quidem carne, vivificatos autem spiritu.* Mori etiam voluit, ut nobis mors ejus esset perfectæ virtutis exemplum. Quantum ad caritatem quidem, quia *majorem caritatem nemo habet quam ut animam suam ponat quis pro amicis suis*, ut dicitur Joan. xv, 13: Tanto enim quisque magis amare ostenditur, quanto plura et graviora pro amico pati non refugit. Omnium autem humanorum malorum gravius est mors, per quam tollitur vita humana: unde nullum magis signum dilectionis esse potest quam quod homo pro amico vero se morti exponat. Quantum ad fortitudinem vero, quæ propter adversa a justitia non recedit, quia maxime ad fortitudinem pertinere videtur ut etiam nec timore mortis aliquis a virtute recedat: unde dicit Apostolus Hebr. XII, 14, de passione Christo loquens: *Ut per mortem destrueret eum qui habebat mortis imperium, idest diabolum, et liberaret eos qui timore mortis per totam vitam obnoxii erant servituti.* Dum enim pro veritate mori non recusavit, exclusit timorem moriendi, propter quem homines servituti peccati plerumque subduntur. Quantum ad patientiam vero, quæ in adversis tristitiam hominem absorbere non sinit; sed quanto sunt majora adversa, tanto magis in his relucet patientiæ virtus: unde in maximo malorum quod est mors, perfectæ patientiæ datur exemplum, si absque mentis turbatione sustineatur; quod de Christo Propheta prædixit dicens, Isai. LIII, 7: *Tamquam agnus coram tondente se obmutescet, et non aperiet os suum.* Quantum ad obedientiam vero, quia tanto laudabilior est obedientia, quanto in difficilioribus quis obedit: omnium autem difficillimum est mors. Unde ad perfectam obedientiam Christi commen-

dandam, dicit Apostolus ad Philippen. II, 8, quod *factus est obediens Patri usque ad mortem.*

### CAPUT CCXXXVI.

#### *De morte crucis.*

Ex eisdem autem causis apparet quare mortem crucis voluit pati. Primo quidem quia hoc convenit quantum ad remedium satisfactionis : convenienter enim homo punitur per ea in quibus peccavit : *per quæ enim peccat quis, per hæc et torquetur*, ut dicitur Sapientiæ, XI, 17 : Peccatum autem hominis primum fuit per hoc quod pomum arboris ligni scientiæ boni et mali contra præceptum Dei comedit : loco cujus Christus se ligno affigi permisit, ut exsolveret quæ non rapuit, sicut de eo Psalmista dicit in Psal. LVIII. Convenit etiam quantum ad sacramentum. Voluit enim Christus ostendere sua morte, ut sic moreremur vita carnali quod spiritus noster in superna elevaretur : unde et ipse dicit Joan. XII, 32 : *Ego si exaltatus fuero a terra, omnia traham ad me ipsum.* Convenit etiam quantum ad exemplum perfectæ virtutis. Homines enim quandoque non minus refugiunt vituperabile genus mortis quam mortis acerbiter : unde ad perfectionem virtutis pertinere videtur ut propter bonum virtutis etiam aliquis vituperabilem mortem non refugiat pati. Unde Apostolus ad commendandam perfectam obedientiam Christi, cum dixisset de eo quod *factus est obediens usque ad mortem*, subdidit : *Mortem autem crucis* : quæ quidem mors turpissima videbatur, secundum illud Sapientiæ II, 20 : *Morte turpissima condemnemus eum.*

### CAPUT CCXXXVII.

#### *De morte Christi.*

Cum autem in Christo conveniant in unam personam tres substantiæ, scilicet corpus, anima, et Divinitas Verbi, quarum duæ, scilicet anima et corpus, unitæ sunt in unam naturam; in morte quidem Christi separata est unio corporis et animæ : aliter enim corpus vere mortuum non fuisset : mors enim corporis nihil est aliud quam separatio animæ ab ipso.

Neutrum tamen separatum est a Dei Verbo quantum ad unionem personæ. Ex unione autem animæ et corporis resultat humanitas : unde separata anima a corpore Christi per mortem, in triduo mortis homo dici non potuit. Dictum est autem supra quod propter unionem in persona humana ad Dei Verbum, quicquid dicitur de homine Christo, potest et convenienter de Dei Filio prædicari. Unde cum in morte manserit unio personalis Filii Dei tam ad animam quam ad corpus Christi, quicquid de utroque eorum dicitur, poterat de Dei Filio prædicari. Unde et in *Symbolo* dicitur de Filio Dei quod « sepultus est, » propter hoc quod corpus sibi unitum in sepulcro jacuit, et quod « descendit ad inferos, » anima descendente.

Est etiam considerandum quod masculinum genus designat personam, neutrum vero naturam : unde in Trinitate dicimus quod Filius est alius a Patre, non aliud. Secundum hoc ergo in triduo mortis Christus fuit totus in sepulcro, totus in inferno, totus in cælo, propter personam, quæ unita erat et carni in sepulcro jacenti, et animæ infernum expolianti, et subsistebat in natura divina in cælo regnante; sed non potest dici quod totum in sepulcro aut in inferno fuerit, quia non tota humana natura, sed pars in sepulcro aut in inferno fuit.

### CAPUT CCXXXVIII.

#### *Quod mors Christi fuit voluntaria.*

Fuit igitur mors Christi nostræ morti conformis quantum ad id quod est de ratione mortis, quod est animam a corpore separari; sed quantum ad aliquid mors Christi a nostra morte differens fuit. Nos enim morimur quasi morti subjecti ex necessitate vel naturæ, vel alicujus violentiæ nobis illatæ; Christus autem mortuus est non necessitate, sed potestate, et propria voluntate : unde ipse dicebat, Joan. X, 18 : *Potestatem habeo ponendi animam meam, et iterum sumendi eam.*

Hujus autem differentiæ ratio est, quia naturalia voluntati nostræ non subjacent; conjunctio autem animæ ad corpus est naturalis : unde voluntati nostræ nos subjacet quod anima corpori unita remaneat, vel quod a corpore separetur; sed oportet hoc ex virtute alicujus agentis



provenire. Quicquid autem in Christo secundum humanam naturam erat naturale, totum ejus voluntati subiacebat propter Divinitatis virtutem, cui subjacet tota natura. Erat igitur in potestate Christi ut quamdiu vellet, anima ejus corpori unita remaneret, et statim cum vellet, separaretur ab ipso. Hujusmodi autem divinæ virtutis indicium Centurio cruci Christi assistens sensit, dum eum vidit clamantem expirare : per quod manifeste ostendebatur quod non sicut ceteri homines ex defectu naturæ moriebatur ; non enim possunt homines cum clamore spiritum emittere, cum in illo mortis articulo vix etiam possint palpitando linguam movere : unde quod Christus clamans expiravit, in eo divinam manifestavit virtutem : et propter hoc centurio dicit Matth. xxvii, 54 : *Vere Filius Dei erat iste.*

Non tamen dicendum est quod Judæi non occiderint Christum, vel quod Christus ipse se occiderit. Ille enim dicitur aliquem occidere qui ei causam mortis inducit ; non tamen mors sequitur nisi causa mortis naturam vincat, quæ vitam conservat. Erat autem in potestate Christi ut natura causæ corrumpenti cederet, vel resisteret quantum ipse vellet : ideo et ipse Christus voluntarie mortuus fuit, et tamen Judæi occiderunt eum.

## CAPUT CCXXXIX.

### *De passione Christi quantum ad corpus.*

Non solum autem Christus mortem pati voluit ; sed et alia quæ ex peccato primi parentis in posteros proveniunt ; ut dum pœnam peccati integraliter susciperet, nos perfecte a peccato satisfaciendo liberaret. Horum autem quædam præcedunt mortem, quædam mortem subsequuntur. Præcedunt quidem mortem corporis passiones tam naturales, ut fames, sitis, lassitudo et hujusmodi, quam etiam violentæ, ut vulneratio, flagellatio et similia : quæ omnia Christus pati voluit tamquam provenientia ex peccato. Si enim homo non peccasset, nec famis, aut sitis, aut lassitudinis, vel frigoris afflictionem sensisset, non ab exterioribus pertulisset violentam passionem. Has tamen passiones alia ratione Christus pertulit quam alii homines patiantur : in aliis enim hominibus non

est aliquid quod iis passionibus repugnare possit ; in Christo autem erat unde iis passionibus resisteretur, non solum virtus divina increata, sed etiam animæ beatitudo, ejus tanta vis est, ut Augustinus dicit, ut ejus beatitudo suo modo redundet in corpus : unde post resurrectionem ex hoc ipso quod anima glorificata erit per visionem Dei, et apertam et plenam fruitionem, corpus gloriosæ animæ unitum gloriosum reddetur, impassibile et immortale. Cum igitur anima Christi perfecta visione Dei frueretur, quantum est ex virtute hujus visionis, consequens erat ut corpus impassibile et immortale redderetur per redundantiam gloriæ ab anima in corpus ; sed dispensative factum est ut anima, Dei visione fruente, simul corpus pateretur, nulla redundantia gloriæ ab anima in corpus facta. Suberat enim, ut dictum est, quod erat naturale Christo secundum humanam naturam, ejus voluntati : unde poterat naturalem redundantiam a superioribus partibus ad inferiores pro suo libito impedire, ut sineret unamquamque partem pati aut agere quod sibi proprium esset absque alterius partis impedimento : quod in aliis hominibus esse non potest.

Inde etiam est quod in passione Christus maximum corporis dolorem sustinuit, quia corporalis dolor in nullo mitigabatur per superius gaudium rationis, sicut nec e converso dolor corporis rationis gaudium impediabat.

Hinc etiam apparet quod solus Christus viator et comprehensor fuit. Sic enim divina visione fruebatur (quod ad comprehensorem pertinet) ut tamen corpus passionibus subjectum remaneret, quod pertinet ad viatorem. Et quia proprium est viatoris ut per bona quæ ex caritate agit, mereatur vel sibi vel aliis ; inde est quod Christus quamvis comprehensor esset, meruit tamen per ea quæ fecit et passus est, et sibi et nobis. Sibi quidem non gloriam animæ, quam a principio suæ conceptionis habuerat, sed gloriam corporis, ad quam patiando pervenit : nobis etiam suæ singulæ passiones et operationes fuerunt proficuæ ad salutem, non solum per modum exempli, sed etiam per modum meriti ; in quantum propter abundantiam caritatis et gratiæ nobis potuit gratiam promereri, ut sic de plenitudine capitis membra acciperent. Erat siquidem quælibet passio ejus, quantum-



cumque minima, sufficiens ad redimendum humanum genus, si consideretur dignitas patientis. Quanto enim aliqua passio in personam digniorem infertur, tanto videtur major injuria : puta si quis percutiat principem quam si percutiat quemdam de populo. Cum igitur Christus sit dignitatis infinitæ, quælibet passio ejus habet infinitam existimationem, ut sic sufficeret ad infinitorum peccatorum abolitionem. Non tamen fuit per quamlibet consummata humani generis redemptio, sed per mortem : quam propter rationes supra positas ad hoc pati voluit, ut genus humanum redimeret a peccatis. In emptione enim qualibet non solum requiritur quantitas valoris, sed deputatio pretii ad emendum.

#### CAPUT CCXL.

##### *De passibilitate animæ Christi.*

Quia vero anima est forma corporis, consequens est ut patiente corpore, et anima quodammodo patiatur ; unde pro statu illo quo Christus corpus passibile habuit, etiam anima ejus passibilis fuit. Est autem considerandum quod duplex est animæ passio. Una quidem ex parte corporis ; alia vero ex parte objecti : quod in una aliqua potentiarum considerari potest. Sic enim se habet anima ad corpus sicut pars animæ ad partem corporis. Potentia autem visiva patitur quidem ab objecto, sicut cum ab excellenti fulgido visus obtunditur ; ex parte vero organi, sicut cum læsa pupilla hebetatur visus. Si igitur consideretur passio animæ Christi ex parte corporis, sic tota anima patiebatur corpore patiente : est enim anima forma corporis secundum suam essentiam ; in essentia vero animæ omnes potentiæ radicanur : unde relinquitur quod corpore patiente quælibet potentia animæ quodammodo pateretur. Si vero consideretur animæ passio ex parte objecti, non omnis potentia animæ patiebatur, secundum quod passio proprie sumpta nocumentum importat : non enim ex parte objecti cujuslibet potentiæ poterat aliquid esse nocivum : jam enim supra dictum est quod anima Christi perfecta Dei visione fruebatur. Superior igitur ratio animæ Christi, quæ rebus æternis contemplantis et consulendis inhæret, nihil habebat adversum aut re-

pugnans, ex quo aliqua nocumentum passio in ea locum haberet : potentiæ vero sensitivæ, quarum objecta sunt res corporeæ, habere poterant aliquod nocumentum ex corporis passione : unde sensibilis dolor in Christo fuit corpore patiente. Et quia læsio corporis sicut a sensu sentitur noxia, ita etiam interior imaginatio eam ut nocivam apprehendit, inde sequitur interior tristitia etiam cum dolor in corpore non sentitur : et hanc passionem tristitiæ dicimus in anima Christi fuisse. Non solum autem imaginatio, sed etiam ratio inferior nociva corporis apprehendit : et ideo etiam ex apprehensione inferioris rationis, quæ circa temporalia versatur, poterat passio tristitiæ habere locum in Christo : in quantum scilicet mortem et aliam corporis læsionem inferior ratio apprehendebat ut noxiam, et appetitui naturali contrariam. Contingit autem ex amore, qui facit duos homines quasi unum, ut aliquis tristitiam patiatur non solum ex iis quæ per imaginationem vel per inferiorem rationem apprehendit ut sibi noxia, sed etiam ex iis quæ apprehendit ut noxia aliis quos amat : unde ex hoc tristitiam Christus patiebatur, secundum quod aliis, quos ex caritate amabat, periculum imminere cognoscebat culpæ vel pœnæ : unde non solum sibi, sed etiam aliis doluit. Et quamvis dilectio proximi ad superiorem rationem quodammodo pertineat, in quantum proximus ex caritate diligitur propter Deum ; superior tamen ratio in Christo de proximorum defectibus tristitiam habere non potuit, sicut in nobis habere potest. Quia enim ratio superior Christi plena Dei visione fruebatur, hoc modo apprehendebat quidquid ad aliorum defectus pertinet, secundum quod in divina sapientia continetur, secundum quam decenter ordinatum existit et quod aliquis peccare permittatur, et quod pro peccato puniatur. Et ideo nec anima Christi, nec aliquis beatus Deum videns, ex defectibus proximorum tristitiam pati potest. Secus autem est in viatoribus, qui ad rationem sapientiæ videndam non attingunt : hi enim etiam secundum rationem superiorem de defectibus aliorum tristantur, dum ad honorem Dei et exaltationem fidei pertinere existimant quod aliqui salventur, qui tamen damnantur. Sic igitur de eisdem de quibus dolebat secundum sensum, imaginationem et rationem in-

feriorem, secundum superiorem gaudebat, inquantum ea ad ordinem divinæ sapientiæ referebat. Et quia referre aliquid ad alterum est proprium opus rationis, ideo solet dici quod mortem ratio Christi refugiebat quidem, si consideretur ut natura, quia scilicet naturaliter est mors odibilis : volebat tamen eam pati, si consideretur ut ratio.

Sicut autem in Christo fuit tristitia, ita etiam et aliæ passiones quæ ex tristitia oriuntur, ut timor, ira et hujusmodi. Ex iis enim quæ tristitiam præsentia ingerunt, timor in nobis causatur, dum futura mala existimantur ; et dum aliquo lædente contristati sumus, contra eum irascimur. Hæ tamen passiones aliter fuerunt in Christo quam in nobis. In nobis enim plerumque iudicium rationis præveniunt, interdum modum rationis excedunt. In Christo nunquam præveniebant iudicium rationis, nec modum a ratione taxatum excedebant : sed tantum movebatur inferior appetitus, qui est subjectus passioni, quantum ratio ordinabat eum debere moveri. Poterat igitur contingere quod secundum inferiorem partem anima Christi refugiebat aliquid quod secundum superiorem optabat ; non tamen erat contrarietas appetituum in ipso, vel rebellio carnis ad spiritum, quæ in nobis contingit ex hoc quod appetitus inferior iudicium et modum rationis transcendit. Sed in Christo movebatur secundum iudicium rationis, inquantum permittebat unicuique inferiorum virium moveri proprio motu, secundum quod ipsum decebat.

Iis igitur consideratis manifestum est quod superior ratio Christi tota quidem fruebatur et gaudebat per comparisonem ad suum objectum (non enim ex hac parte aliquid ei occurrere poterat quod esset tristitiæ causa) ; sed etiam tota patiebatur ex parte subjecti, ut supra dictum est. Nec illa fruitio minuebat passionem, nec passio impediabat fruitionem : cum non fieret redundantia ex una potentia in aliam, sed quælibet potentiarum permetteretur agere quod sibi proprium erat, sicut jam supra dictum est.

#### CAPUT CCXLI.

##### *De oratione Christi.*

Quia vero oratio est desiderii expositiva, ex diversitate appetituum ratio sumi

potest orationis quam Christus imminente passione proposuit dicens, Matth. xxvi, 39 : *Pater mi, si possibile est, transeat a me calix iste : verumtamen non sicut ego volo, sed sicut tu.* In hoc enim quod dixit, *Transeat a me calix iste*, motum inferioris appetitus et naturalis designat, quo naturaliter quilibet mortem refugit, et appetit vitam. In hoc autem quod dicit, *Verumtamen non sicut ego volo, sed sicut tu vis*, exprimit motum superioris rationis omnia considerantis prout sub ordinatione divinæ sapientiæ continentur. Ad quod etiam pertinet quod dicit, *Si non potest* ; hoc solum fieri posse demonstrans quod secundum ordinem divinæ voluntatis procedit. Et quamvis calix passionis non transivit ab eo quin ipsum biberit, non tamen dici debet quod ejus oratio exaudita non fuerit : nam secundum Apostolum ad Hebr. v, 7, in omnibus *exauditus est pro sua reverentia.* Cum enim oratio, ut dictum est, sit desiderii expositiva, illud simpliciter oramus quod simpliciter volumus : unde et desiderium justorum, orationis vim obtinet apud Deum, secundum illud Psalm. ix, 17 : *Desiderium pauperum exaudivit Dominus.* Illud autem simpliciter volumus quod secundum rationem superiorem appetimus ad quam solam pertinet consentire in opus. Illud autem simpliciter oravit Christus ut Patris voluntas fieret, quia hoc simpliciter voluit ; non autem quod calix ab eo transiret ; quia nec hoc simpliciter voluit, sed secundum inferiorem rationem, ut dictum est.

#### CAPUT CCXLII.

##### *De sepultura Christi.*

Consequuntur autem hominem ex peccato post mortem alii defectus et ex parte corporis, et ex parte animæ. Ex parte corporis quidem quod corpus redditur terræ, ex qua sumptum est. Illic autem defectus corporis in nobis quidem secundum duo attenditur : scilicet secundum positionem, et secundum resolutionem. Secundum positionem quidem, inquantum corpus mortuum sub terra ponitur sepultum ; secundum resolutionem vero, inquantum corpus in elementa solvitur, ex quibus est compactum. Horum autem defectuum primum quidem Christum pati voluit, ut scilicet corpus

ejus sub terra poneretur; alium autem defectum passus non fuit, ut scilicet corpus ejus in terram resolveretur : unde de ipso Psal. xv, 10, dicit : *Non dabis sanctum tuum videre corruptionem*, idest corporis putrefactionem. Hujus autem ratio est, quia corpus Christi materiam sumpsit de natura humana, sed formatio ejus non fuit virtute humana, sed virtute Spiritus sancti : et ideo propter substantiam materiæ subterraneum locum, qui corporibus mortuis deputari consuevit, voluit pati : locus enim corporibus debetur secundum materiam prædominantis elementi : sed dissolutionem corporis per Spiritum sanctum fabricati pati non voluit, quia quantum ad hoc ab aliis hominibus differebat.

#### CAPUT CCXLIII.

##### *De descensu Christi ad inferos.*

Ex parte vero animæ sequitur in hominibus ex peccato post mortem, ut ad infernum descendant non solum quantum ad locum, sed etiam quantum ad pœnam. Sicut autem corpus Christi fuit quidem sub terra secundum locum, non autem secundum communem resolutionis defectum; ita et anima Christi descendit quidem ad inferos secundum locum, non autem ut ibi pœnam subiret, sed magis ut alios a pœna absolveret, qui propter peccatum primi parentis illic detinebantur, pro quo plene jam satisfecerat mortem patiendo : unde post mortem nihil patiendum restabat, sed absque omni pœnæ passione localiter ad infernum descendit, ut se vivorum et mortuorum liberatorem ostenderet. Ex hoc etiam dicitur quod solus inter mortuos fuit liber, quia anima ejus in inferno non subjacuit pœnæ, nec corpus ejus corruptioni in sepulcro. Quamvis autem Christus descendens ad inferos, eos liberavit qui pro peccato primi parentis ibi tenebantur, illos tamen reliquit qui pro peccatis propriis ibidem pœnis erant addicti : et ideo dicitur momordisse infernum, non absorbuisse, quia scilicet partem liberavit, et partem dimisit. Illos igitur Christi defectus *Symbolum* fidei tangit, cum dicit : « Passus sub Pontio Pilato, crucifixus, mortuus et sepultus, descendit ad inferos. »

#### CAPUT CCXLIV.

##### *De resurrectione, et tempore resurrectionis Christi.*

Quia ergo per Christum humanum genus liberatum est a malis quæ ex peccato primi parentis derivata erant, oportuit quod sicut ipse mala nostra sustinuit ut ab eis nos liberaret, ita etiam reparatio humanæ per ipsum factæ in eo primitiæ apparerent; ut utroque modo Christus proponeretur nobis in signum salutis, dum ex ejus passione consideramus quid pro peccato incurrimus, et quod nobis patiendum est ut a peccato liberemur, et per ejus exaltationem consideramus quid nobis per ipsum sperandum proponitur. Superata igitur morte, quæ ex peccato primi parentis provenerat, primus ad immortalam vitam resurrexit : ut sicut, Adam peccante, primo mortalis vita apparuit, ita Christo pro peccato satisfaciente, primo immortalis vita in Christo appareret. Redierant quidem ad vitam alii ante Christum vel ab eo vel a Prophetis suscitati, tamen iterum morituri; sed *Christus resurgens ex mortuis, jam non moritur* : unde quia primus necessitatem moriendi evasit, dicitur princeps mortuorum et *primitiæ dormientium*; scilicet quia primus a somno mortis excusso. Ejus autem resurrectio non tardari debuit, nec statim post mortem esse. Si enim statim post mortem rediisset ad vitam, mortis veritas comprobata non fuisset : si vero diu resurrectio tardaretur, signum superatæ mortis in eo non appareret, nec hominibus daretur spes ut per ipsum liberarentur a morte. Unde resurrectionem usque ad tertium diem distulit, quia hoc tempus sufficiens videbatur ad mortis veritatem comprobendam, nec erat nimis prolixum ad spem liberationis tollendam. Nam si amplius dilata fuisset, jam fidelium spes dubitationem pateretur; unde et quasi deficiente jam spe quidam dicebant tertia die, Lucae ult. 21 : *Nos sperabamus quod ipse redempturus esset Israel*. Non tamen per tres integros dies Christus mortuus remansit; dicitur tamen tribus diebus et tribus noctibus in corde terræ fuisse illo modo locutionis quo pars pro toto poni solet. Cum enim ex die et nocte unus dies naturalis constituatur,

quacumque parte diei vel noctis computata Christus fuit in morte, tota illa dicitur in morte fuisse. Secundum autem Scripturæ consuetudinem nox cum sequenti die computatur, eo quod Hebræi tempora secundum Lunæ observant, quæ de sero incipit apparere. Fuit autem Christus in sepulcro ultima parte sextæ feriæ quæ si cum nocte præcedenti computetur, erit quasi dies unus naturalis. Nocte vero sequente sextam feriam cum integra die sabbati fuit in sepulcro, et sic sunt duo dies. Jacuit etiam mortuus in sequenti nocte, quæ præcedit diem dominicum in qua resurrexit, vel media nocte secundum Gregorium, vel diliculo secundum alios : unde si computetur vel tota nox, vel pars ejus cum sequenti die dominico, erit tertius dies naturalis. Nec vacat a mysterio quod tertia die resurgere voluit : ut per hoc manifestetur quod ex virtute totius Trinitatis resurrexit : unde et quandoque dicitur Pater eum resuscitasse, quandoque autem quod ipse propria virtute resurrexit : quod non est contrarium, cum eadem sit divina virtus Patris et Filii et Spiritus sancti ; et etiam ut ostenderetur quod reparatio vitæ non fuit facta prima die sæculi, idest sub lege naturali, nec secunda die, idest sub lege mosaica, sed tertia die, idest tempore gratiæ. Habet etiam rationem quod Christus una die integra et duabus noctibus integris jacuit in sepulcro : quia Christus una vetustate quam suscepit scilicet pœnæ, duas nostras vetustates consumpsit, scilicet culpæ et pœnæ, quæ per duas noctes significantur.

#### CAPUT CCXLV.

##### *De qualitate Christi resurgentis.*

Non solum autem Christus recuperavit humano generi quod Adam peccando amiserat ; sed etiam hoc ad quod Adam merendo pervenire potuisset : multo enim major fuit Christi efficacia ad merendum quam hominis ante peccatum. Incurrit siquidem Adam peccando necessitatem moriendi, amissa facultate qua mori non poterat, si non peccaret. Christus autem non solum necessitatem moriendi exclusit, sed etiam necessitatem non moriendi acquisivit : unde corpus Christi post resurrectionem factum est impassibile et immortale, non quidem sicut

primi hominis, potens non mori ; sed omnino non potens mori quod in futurum de nobis ipsis expectamus. Et quia anima Christi ante mortem passibilis erat secundum passionem corporis, consequens est ut corpore impassibili facto, etiam anima impassibilis redderetur. Et quia jam impletum erat humanæ redemptionis mysterium, propter quod dispensative continebatur fruitionis gloria in superiori animæ parte, ne fieret redundantia ad inferiores partes et ad ipsum corpus, sed permetteretur unumquodque aut agere aut pati quod sibi proprium erat ; consequens fuit ut jam per redundantiam gloriæ a superiori animæ parte totaliter corpus glorificaretur, et inferiores vires : et inde est quod cum ante passionem Christus esset comprehensor propter fruitionem animæ, et viator propter corporis passibilitatem ; jam post resurrectionem, viator ultra non fuit, sed solum comprehensor.

#### CAPUT CCXLVI.

##### *Quomodo convenientibus argumentis Christi resurrectio demonstratur.*

Et quia, ut dictum est, Christus resurrectionem anticipavit, ut ejus resurrectio argumentum nobis spei existeret, ut nos etiam resurgere speraremus ; oportuit ad spem resurrectionis suadendam, ut ejus resurrectio, nec non et resurgentis qualitas, congruentibus indiciis manifestaretur. Non autem omnibus indifferenter suam resurrectionem manifestavit ; sicut humanitatem et passionem ; sed solum *testibus præordinatis a Deo*, scilicet discipulis, quos elegerat ad procurandum humanam salutem. Nam status resurrectionis, ut dictum est, pertinet ad gloriam comprehensoris, cujus cognitio non debetur omnibus, sed iis tantum qui se dignos efficiunt. Manifestavit autem eis Christus et veritatem resurrectionis, et gloriam resurgentis.

Veritatem quidem resurrectionis, ostendendo quod idem ipse qui mortuus fuerat, resurrexit et quantum ad naturam, et quantum ad suppositum. Quantum ad naturam quidem, quia se verum corpus humanum habere demonstravit, dum ipsum palpandum et videndum discipulis præbuit, quibus dicit Luc. ult. 39 : *Palpate et videte, quia spiritus carnem et ossa*



*non habet, sicut me videtis habere.* Manifestavit etiam exercendo actus qui naturæ humanæ conveniunt, cum discipulis suis manducans et bibens, et cum eis multotiens loquens et ambulans, qui sunt actus hominis viventis : quamvis illa comestio necessitatis non fuerit : non enim incorruptibilia resurgentium corpora ulterius cibo indigebunt, cum in eis nulla fiat deperditio, quam oportet per cibum restaurari : unde et cibus a Christo assumptus non cessit in corporis ejus nutrimentum, sed fuit resolutum in præjacentem materiam. Verumtamen ex hoc ipso quod comedit et bibit, se verum hominem demonstravit. Quantum vero ad suppositum, ostendit se esse eundem qui mortuus fuerat, per hoc quod indicia suæ mortis eis in suo corpore demonstravit, scilicet vulnerum cicatrices : unde dicit Thomæ, Joan. xx, 27 : *Infer digitum tuum huc et vade manus meas, et affer manum tuam, et mitte in latus meum.* Luc. ult. 39, dixit : *Videte manus meas et pedes meos, quia ego ipse sum* ; quamvis hoc etiam dispensationis fuerit quod cicatrices vulnerum in suo corpore reservavit, ut per eas resurrectionis veritas probaretur : corpori enim incorruptibili resurgenti debetur omnis integritas ; licet etiam dici possit, quod in Martyribus quædam indicia præcedentium vulnerum apparebunt cum quodam decore in testimonium virtutis. Ostendit etiam se esse idem suppositum, et ex modo loquendi, et ex aliis consuetis operibus, ex quibus homines recognoscuntur : unde et discipuli recognoverunt eum in *fractione panis.* Luc. ult. ; et ipse in Galilæa aperte se eis demonstravit ubi eum eis erat solitus conversari.

Gloriam vero resurgentis manifestavit dum *januis clausis* ad eos intravit, Joan. xx, et dum *ab oculis eorum evanuit.* Luc. ult. Hoc enim pertinet ad gloriam resurgentis, ut in potestate habeat apparere oculo glorioso quando vult, vel non apparere quando voluerit. Quia tamen resurrectionis fides difficultatem habebat, propterea per plura indicia tam veritatem resurrectionis, quam gloriam resurgentis corporis demonstravit. Nam si inusitatam conditionem glorificati corporis tota-

liter demonstrasset, fidei resurrectionis præjudicium attulisset, quia immensitas gloriæ opinionem excussisset ejusdem naturæ. Hoc etiam non solum visibilibus signis, sed etiam intelligibilibus documentis manifestavit, dum *aperuit eorum sensum ut Scripturas intelligent* et per Scripturas Prophetarum se resurrecturum ostendit.

## CAPUT CCXLVII.

### *De duplici vita reparata in homine per Christum.*

Sicut autem Christus sua morte mortem nostram destruxit, ita sua resurrectione vitam nostram reparavit. Est autem hominis duplex mors et duplex vita. Una quidem mors est corporis per separationem ab anima ; alia per separationem a Deo. Christus autem, in quo secunda mors locum non habuit, per primam mortem quam subiit, scilicet corporalem, utramque in nobis mortem destruxit, scilicet corporalem et spiritualem. Similiter etiam per oppositum intelligitur duplex vita : una quidem corporis ab anima, quæ dicitur vita naturæ : alia a Deo, quæ dicitur vita justitiæ, vel vita gratiæ : et hæc est per fidem, per quam Deus inhabitat in nobis, secundum illud Habacuc, ii, 4 : *Justus autem meus in fide sua vivet* : et secundum hoc duplex est resurrectio : una corporalis, qua anima iterato conjungitur corpori ; alia spiritualis, qua iterum conjungitur Deo. Et hæc quidem secunda resurrectio locum in Christo non habuit, quia nunquam ejus anima fuit per peccatum separata a Deo. Per resurrectionem igitur suam corporalem utriusque resurrectionis, scilicet corporalis et spiritualis, nobis est causa. Considerandum tamen est, quod, ut dicit Augustinus *Super Joannem*, (a) Verbum Dei resuscitat animas, sed Verbum caro factum resuscitat corpora. Animam enim vivificare solius Dei est. Quia tamen caro est Divinitatis ejus instrumentum ; instrumentum autem agit in virtute causa principalis ; utraque resurrectio nostra, et corporalis et spiritualis, in corpora-

(a) « Animas suscitavit Deus per Christum Filium Dei : corpora suscitavit Deus per eundem Christum filium hominis. » Ex Tract. XIX, n. 15. — « Resurgant nunc in mente per Verbum Dei Fi-

lium Dei ; resurgant tunc in carne per Verbum Dei carnem factum, filium hominis. » Ex eodem Tract. n. 16.



lem Christi resurrectionem refertur ut in causam. Omnia enim quæ in Christi carne facta sunt, nobis salutaria fuerunt virtute Divinitatis unitæ : unde et Apostolus resurrectionem Christi causam nostræ spiritualis resurrectionis ostendens, dicit ad Rom. iv, 25, quod *traditus est propter delicta nostra, et resurrexit propter justificationem nostram*. Quod autem Christi resurrectio nostræ corporalis resurrectionis sit causa, ostendit I ad Cor. xv, 12 : *Si autem Christus prædicatur quod resurrexit, quomodo quidam dicunt in vobis quoniam resurrectio mortuorum non est?* Pulchre autem Apostolus peccatorum remissionem Christi attribuit morti, justificationem vero nostram resurrectioni ; ut designetur conformitas et similitudo effectus ad causam. Nam sicut peccatum deponitur cum remittitur, ita Christus moriendo deposuit passibilem vitam, in qua erat similitudo peccati. Cum autem aliquis justificatur, novam vitam adipiscitur : ita Christus resurgendo novitatem gloriæ consecutus est. Sic igitur mors Christi est causa remissionis peccati nostri et effectiva instrumentaliter, et exemplaris sacramentaliter, et meritoria. Resurrectio autem Christi fuit causa resurrectionis nostræ effectiva quidem instrumentaliter et exemplaris sacramentaliter, non autem meritoria : tum quia Christus jam non erat viator, ut sibi mereri competeret : tum quia claritas resurrectionis fuit præmium passionis, ut per Apostolum patet Philipp. ii.

Sic igitur manifestum est quod Christus potest dici primogenitus resurgentium ex mortuis, non solum ordine temporis, quia primus resurrexit secundum prædicta ; sed etiam ordine causæ, quia resurrectio ejus est causa resurrectionis aliorum ; et in ordine dignitatis, quia præcunctis gloriosior resurrexit. Hanc igitur fidem resurrectionis Christi Symbolum fidei continet dicens : « Tertia die resurrexit a mortuis : »

#### CAPUT CCXLVIII.

*De duplici præmio humiliationis, scilicet resurrectione et ascensione.*

Quia vero secundum Apostolum exaltatio Christi præmium fuit humiliationis ipsius, consequens fuit ut duplici ejus humiliationi duplex exaltatio responde-

ret. Humiliaverat namque se primo secundum mortis passionem in carne passibili quam assumpserat ; secundo quantum ad locum, corpore posito in sepulcro, et anima ad inferos descendente. Primæ igitur humiliationi respondet exaltatio resurrectionis, in qua a morte ad vitam rediit immortalem : secundæ humiliationi respondet exaltatio ascensionis : unde Apostolus dicit, Ephes. iv, 10 : *Qui descendit, ipse est et qui ascendit super omnes cælos*. Sicut autem de Filio Dei dicitur quod est natus, passus et sepultus, et quia resurrexit, non tamen secundum naturam divinam, sed secundum humanam : ita et de Dei Filio dicitur quod ascendit in cælum, non tamen secundum naturam divinam, sed secundum humanam. Nam secundum divinam naturam nunquam a cælo discessit, semper ubique existens. Unde ipse dicit, Joan. iii, 13 : *Nemo ascendit in cælum, nisi qui descendit de cælo, Filius hominis qui est in cælo*. Per quod datur intelligi, quod sic de cælo descendisse dicitur naturam assumendo terrenam, quod tamen in cælo semper permansit. Ex quo etiam considerandum est, quod solus Christus propria virtute cælos ascendit. Locus enim ille debebatur ei qui de cælo descenderat ratione suæ originis. Alii vero per se ipsos ascendere non possunt, sed per Christi virtutem, ejus membra effecti. Et sicut ascendere in cælum convenit Filio Dei secundum humanam naturam, ita additur alterum quod convenit ei secundum naturam divinam, scilicet quod sedeat ad dexteram Patris. Non enim ibi cogitanda est dextera, vel sessio corporalis ; sed quia dextera est potior pars animalis, datur per hoc intelligi quod Filius consideret Patri non in aliquo minoratus ab ipso secundum divinam naturam, sed omnino in ejus æqualitate existens. Potest tamen et hoc ipsum attribui Filio Dei secundum humanam naturam : ut secundum divinam naturam intelligamus Filium in ipso Patre esse secundum essentiæ unitatem, cum quo habet unam sedem regni, idest potestatem eandem. Sed quia solent regibus aliqui assidere, quibus scilicet aliquid de regia potestate communicant : ille autem potissimus in regno esse videtur quem rex ad dexteram suam ponit ; merito Filius Dei etiam secundum humanam naturam dicitur ad dexteram Patris sedere, quasi super omnem creaturam in dignitate cælestis regni exaltatus. Utro-

que igitur modo sedere ad dexteram est proprium Christi : unde Apostolus ad Heb. 1, 13, dicit : *Ad quem autem Angelorum dixit aliquando: Sede a dextris meis?* Hanc igitur Christi ascensionem confitemur in *Symbolo*; dicentes : « Ascendit in cœlum, sedet ad dexteram Dei Patris. »

### CAPUT CCXLIX.

#### *Quod Christus secundum naturam humanam iudicabit.*

Ex his quæ dicta sunt, manifeste colligitur quod per Christi passionem et mortem, resurrectionis atque ascensionis gloriam, a peccato et morte liberati sumus, et justitiam et immortalitatis gloriam, hanc in re, illam in spe, adepti. Hæc autem quæ prædiximus, scilicet passio, mors et resurrectio, et etiam ascensio, sunt in Christo completa secundum humanam naturam. Consequenter igitur oportet dici, quod secundum ea quæ in humana natura Christus vel passus est vel fecit, nos a malis tam spiritualibus quam corporalibus liberando, ad spiritualia et æterna bona promovit. Est autem consequens ut qui aliquibus aliqua bona acquirit, eadem ipsis dispenset. Dispensatio autem bonorum in multos requirit iudicium, ut unusquisque secundum suum gradum accipiat. Convenienter igitur Christus secundum humanam naturam, secundum quam mysteria humanæ salutis implevit, iudex constituitur a Deo super homines, quod salvavit: unde dicitur Joan. v, 27 : *Potestatem dedit ei iudicium facere*, scilicet Pater Filio, *quia filius hominis est*. Quamvis et hoc habeat aliam rationem. Est enim conveniens ut iudicem videant iudicandi: Deum autem, apud quem iudicis auctoritas residet, in sua natura videre est præmium, quod per iudicium redditur. Oportuit igitur quod Deus iudex, non in natura propria, sed in natura assumpta ab hominibus videretur qui iudicandi sunt, tam bonis quam malis. Multi enim si Deum in natura Divinitatis viderent, jam præmium reportarent, quo se reddiderunt, indignos. Est etiam conveniens exaltationis præmium humiliationi Christi respondens, qui usque ad hoc humiliari voluit ut sub homine iudice iudicaretur injuste; unde ad hanc humiliationem exprimendam signanter in *Symbolo* cum sub Pontio Pilato passum

fatemur. Hoc igitur exaltationis præmium debebatur ei ut ipse secundum humanam naturam iudex a Deo omnium hominum mortuorum et vivorum constitueretur, secundum illud Job, xxxvi, 17 : *Causa tua quasi impii iudicata est: causam iudiciumque recipies*. Et quia potestas iudiciaria ad Christi exaltationem pertinet, sicut et resurrectionis gloria; Christus in iudicio apparebit non in humilitate, quæ pertinebat ad meritum, sed in forma gloriosa ad præmium pertinente: unde dicitur in Evangelio (Luc. xxi, 27), quod *videbunt filium hominis venientem in nube cum potestate magna et majestate*. Visio autem claritatis ipsius electis quidem, qui eum dilexerunt, erit ad gaudium, quibus Isa. xxxiii, 17, promittit : *Regem in decore videbunt*: impiis autem erit ad confusionem et luctum, quia iudicantis gloria et potestas, damnationem timentibus, tristitiam et metum inducit: unde dicitur Isa. xxvi, 11 : *Videant et confundantur zelantes populi, et ignis hostes tuos devoret*. Et quamvis in forma gloriosa se ostendat, apparebunt tamen in eo indicia passionis non cum defectu sed cum decore et gloria, ut ex his visis et electi recipiant gaudium, qui per passionem Christi se liberatos recognoscent, et peccatores tristitiam, qui tantum beneficium contempserunt: unde dicitur Apoc. 1, 7 : *Videbit eum omnis oculus, et qui eum pupugerunt; et plangent se super eum omnes tribus terræ*.

### CAPUT CCL

#### *Quod ipse omne iudicium dedit Filio suo, qui horam scit iudicii.*

Et quia *Pater omne iudicium dedit Filio*, ut dicitur Joan. v, 22, nunc autem humana vita justo Dei iudicio dispensatur, ipse enim est qui *iudicat omnem carnem*, ut Abraham dixit Gen. xviii, 25; non est dubitandum etiam hoc iudicium, quo in mundo reguntur homines, ad Christi potestatem iudiciariam pertinere: unde etiam ad ipsum introducuntur in Psal. cix, 1, verba Patris dicentis : *Sede a dextris meis, donec ponam inimicos tuos scabellum pedum tuorum*. Assidet enim a dextris Dei secundum humanam naturam, in quantum ab eo recipit iudiciariam potestatem: quam quidem etiam nunc exercet antequam manifesto appareat

quod omnes inimici pedibus ejus subjecti sint : unde et ipse statim post resurrectionem dixit, Matth. ult. 18 : *Data est mihi omnis potestas in cælo et in terra.*

Est autem et aliud Dei judicium, quo unicuique in exitu mortis suæ retribuitur quantum ad animam secundum quod meruit. Justi autem dissoluti cum Christo manent, ut Paulus desiderat ; peccatores autem mortui in inferno sepeliuntur. Non enim putandum est hanc discretionem absque Dei judicio fieri, aut hoc judicium ad Christi potestatem judiciariam non pertinere : præsertim cum ipse discipulis suis dicat, Joan. xiv, 3 : *Si abiero et præparavero vobis locum, iterum veniam, et accipiam vos ad me ipsum, ut ubi ego sum, et vos sitis.* Quod quidem tolli nihil est aliud quam dissolvi, ut cum Christo esse possimus : quia *quamdiu sumus in hoc corpore peregrinamur a Domino*, ut dicitur II Cor. v, 6.

Sed quia retributio hominis non solum consistit in bonis animæ, sed etiam in bonis corporis, iterato per resurrectionem ab anima resumendi, omnisque retributio requirit judicium ; oportet et aliud judicium esse, quo retribuatur hominibus secundum ea quæ gesserunt non solum in anima, verum etiam in corpore. Et hoc etiam judicium Christo debetur : ut sicut ipse pro nobis mortuus resurrexit in gloria, et cælos ascendit, ita etiam ipsa sua virtute faciat resurgere corpora humilitatis nostræ configurata corpori claritatis suæ, ut ea in cælum transferat, quo ipse præcessit ascendens, et *pandens iter ante nos*, ut fuerat per Michæam prædictum. Resurrectio autem omnium simul fiet in fine sæculi hujus, ut supra jam diximus : unde hoc judicium, commune et finale judicium erit, ad quod faciendum Christus creditur secundo venturus cum gloria.

Sed quia in Psal. xxxv, 7, dicitur : *Judicia Domini abyssus multa* : et Apostolus dicit ad Rom. xi, 33 : *Quam incomprehensibilia sunt judicia ejus !* in singulis præmissorum judiciorum est aliquod profundum et incomprehensibile humanæ cognitioni. In primo enim Dei judicio, quo præsens vita hominum dispensatur, tempus quidem judicii manifestum est hominibus, sed retributionum ratio latet, præsertim quia bonis plerumque mala in hoc mundo eveniunt, et malis bona. In aliis autem duobus Dei judiciis retributionum quidem ratio in

evidenti erit, sed tempus manet occultum, quia et mortis suæ tempus homo ignorat, secundum illud Eccle. ix, 12 : *Nescit homo finem suum* : et finem hujus sæculi nemo scire potest. Non enim præscimus futura, nisi quorum comprehendimus causas. Causa autem finis mundi est Dei voluntas, quæ est nobis ignota : unde nec finis mundi ab aliqua creatura præsciri potest, sed a solo Deo secundum illud Matth. xxiv, 36 : *De die autem illa et hora nemo scit, neque Angeli cælorum, nisi Pater solus.*

Sed quia in Marco legitur, « *neque Filius,* » sumpserunt aliqui errandi materiam dicentes Filium Patre minorem, quia ea ignorat quæ Pater novit. Posset autem hoc evitari ut diceretur, quod Filius hæc ignorat secundum humanam naturam assumptam, non autem secundum divinam, secundum quam unam sapientiam habet cum Patre, vel ut expressius dicatur, est ipsa sapientia in corde concepta. Sed hoc inconveniens videtur ut Filius etiam secundum naturam assumptam, divinum ignoret judicium, cum ejus anima, Evangelista testante, plena sit Dei *gratia et veritate*, ut supra dictum est. Nec etiam videtur habere rationem, ut cum Christus potestatem judicandi acceperit, *quia filius hominis est*, tempus sui judicii secundum humanam naturam ignoret. Non enim omne judicium Pater ei dedisset, si determinandi temporis sui adventus esset ei subtractum judicium. Est ergo hoc intelligendum secundum usitatum modum loquendi in Scripturis, prout dicitur tunc Deus aliquid scire quando illius rei notitiam præbet, sicut dixit ad Abraham, Genes. xxii, 12 : *Nunc cognovi quod timeas Dominum* ; non quod tunc inciperet noscere qui omnia ab æterno cognoscit ; sed quia ejus devotionem per illud factum ostenderat. Sic igitur et filius dicitur diem judicii ignorare, quia notitiam discipulis non dedit, sed eis respondit, Act. 1, 7 : *Non est vestrum nosse tempora vel momenta, quæ Pater posuit in sua potestate.* Pater autem isto modo non ignorat, quia saltem Filio hujus rei notitiam dedit per generationem æternam. Quidam tamen brevius se expediunt, dicentes hoc esse intelligendum de filio adoptivo. Ideo autem voluit Dominus tempus futuri judicii esse occultum, ut homines sollicite vigilarent, ne forte tempore judicii imparati inveniantur : propter quod etiam voluit tempus mortis uniuscujusque esse ignotum.

Talis enim in iudicio unusquisque comparebit, qualis hinc per mortem exierit : unde Dominus dixit Matth. xxiv, 42 : *Vigilate, quia nescitis qua hora Dominus vester venturus sit.*

### CAPUT CCLI.

*Utrum omnes iudicabuntur, an non.*

Sic igitur secundum prædicta patet quod Christus habet iudiciariam potestatem super vivos et mortuos. Exercet enim iudicium et in eos qui in præsentis sæculo vivunt, et in eos qui ex hoc sæculo transeunt moriendo. In finali autem iudicio iudicabit simul vivos et mortuos : sive per vivos intelligantur justi qui per gratiam vivunt, per mortuos autem peccatores, qui a gratia exciderunt; sive per vivos intelligantur *qui* in adventu Domini *vivi reperientur*, per mortuos autem qui antea decesserunt. Hoc autem non est hic intelligendum, quod aliqui sic vivi iudicentur quod nunquam senserint corporis mortem, sicut aliqui posuerunt. Manifeste enim Apostolus dicit I Cor. xv, 51 : *Omnes quidem resurgemus* : et alia *Littera* habet : « Omnes quidem dormiemus, » id est moriemur : sive ut in aliquibus libris habetur, « non omnes quidem dormiemus, » ut Hieronymus dicit in *Epistola ad Minerium*, de resurrectione carnis : quod prædictæ sententiæ firmitatem non tollit. Nam paulo ante præmiserat Apostolus : *Sicut in Adam omnes moriuntur, ita et omnes in Christo vivificabuntur* : et sic illud quod dicitur, « Non omnes dormiemus, » non potest referri ad mortem corporis, quæ in omnes transivit per peccatum primi parentis, ut dicitur Rom. v; sed exponendum est de dormitione peccati, de qua dicitur Ephes. v, 14 : *Surge qui dormis, et exurge, a mortuis; et illuminabit te Christus.* Distinguentur ergo qui in adventu Domini reperientur, ab his qui ante decesserunt, non quia ipsi nunquam moriantur, sed quia in ipso raptu quo rapiuntur *in nubibus obviam Christo in æra moriuntur*, et statim resurgent, ut Augustinus dicit.

Considerandum tamen est, quod ad iudicium tria concurrere videntur. Primo quidem quod aliquis præsentetur; se-

cundo quod ejus merita discutiantur; tertio quod sententiam accipiat. Quantum igitur ad primum, omnes boni et mali a primo homine usque ad ultimum iudicio Christi subduntur : quia, ut dicitur II ad Cor. v, 10, *omnes nos manifestari oportet ante tribunal Christi* : a quorum generalitate non excluduntur etiam parvuli, qui vel sine baptismo vel cum baptismo decesserunt, ut *Glossa* dicit ibidem. Quantum vero ad secundum scilicet ad discussionem meritorum, non omnes iudicabuntur, nec boni nec mali. Non enim est necessaria iudicii discussio, nisi bona malis permisceantur; ubi vero est bonum absque commixtione mali, vel malum absque commixtione boni, ibi discussio locum non habet. Bonorum igitur quidam sunt qui totaliter bona temporalia contempserunt, soli Deo vacantes, et his quæ sunt Dei. Quia ergo peccatum committitur per hoc quod spreto incommutabili bono bonis commutabilibus adhæretur, nulla videtur esse in his commixtio boni et mali : non quod absque peccato vivant, cum ex eorum dicatur persona I Joan. 1, 8 : *Si dixerimus quoniam peccatum non habemus, ipsi nos seducimus* : sed quia in eis sunt levia quædam peccata, quæ per fervorem caritatis quodammodo consumuntur, ut nihil esse videantur : unde hi in iudicio non iudicabuntur per meritorum discussionem. Qui vero terrenam vitam agentes, rebus sæcularibus intendentes utuntur eis non quidem contra Deum, sed eis plus debito inhaerentes, habent aliquid mali bono fidei et caritatis admixtum, secundum aliquam notabilem quantitatem, ut non de facili apparere possit quid in eis prævaleat : unde tales iudicabuntur etiam quantum ad discussionem meritorum. Similiter etiam ex parte malorum notandum est, quod principium accedendi ad Deum est fides, secundum illud Heb. xi, 6 : *Credere oportet accedentem ad Deum.* Qui ergo fidem non habet, nihil boni invenitur in eo, cuius ad mala permixtio faciat ejus dubiam damnationem; et ideo condemnabitur absque meritorum discussione. Qui vero fidem habet et caritatem non habet, nec bona opera, habet quidem aliquid unde Deo conjungitur. Unde necessaria est meritorum discussio, ut evidenter appareat quid in isto<sup>1</sup> præponderet, utrum bonum

<sup>1</sup> Al. : « in Christo. »



vel malum: unde talis cum discussione meritorum damnabitur; sicut rex terrenus civem peccantem cum audientia damnat, hostem vero absque omni audientia punit. Quantum vero ad tertium, scilicet sententiæ prolationem, omnes judicabuntur, quia omnes ex ipsius sententia vel gloriam vel pœnam reportabunt: unde dicitur II Corinth. v, 10: *Ut referat unusquisque propria corporis, prout gessit, sive bonum, sive malum.*

## CAPUT CCLII.

*Quod non erit examinatio in iudicio quia ignoret; et de modo et loco.*

Non est autem existimandum, quod discussio iudicii erit necessaria ut iudex informetur, sicut contingit in humanis iudiciis, cum omnia sint *nuda et aperta oculis ejus*, ut dicitur Hebr. iv, 13. Sed ad hoc est necessaria prædicta discussio, ut unicuique innotescat de se ipso et de aliis, quomodo sint digni pœna vel gloria; ut sic boni in omnibus de Dei justitia gaudeant et mali contra se ipsos irascantur. Nec est æstimandum quod hujusmodi discussio meritorum verbo tenus fiat. Immensum enim tempus requireretur ad enarrandum singulorum excogitata, dicta et facta bona vel mala: unde Lactantius deceptus fuit, ut poneret diem iudicii mille annis duraturum; quamvis nec hoc tempus sufficere videatur, cum ad unius hominis iudicium modo prædicto complendum plures dies requirerentur. Fiet ergo virtute divina ut statim unicuique occurrant bona vel mala omnia quæcumque fecit, pro quibus est præmiandus vel puniendus; et non soli unicuique de se ipso, sed etiam unicuique de aliis. Ubi ergo intantum bona excedunt, quod mala nullius videntur esse momenti, aut e converso; nulla esse concertatio videbitur honorum ad mala secundum existimationem humanam, et propter hoc sine discussione præmiari vel puniri dicuntur.

In illo autem iudicio licet omnes Christo assistant, different tamen boni a malis non solum quantum ad causam meritoriam, sed etiam loco segregabuntur ab eis. Nam mali, qui terrena dili-

gentes a Christo recesserunt, remanebunt in terra; boni vero, qui Christo adhæserunt, obviam Christo occurrent in aera sublevati, ut Christo conformentur, non solum configurati gloriæ claritatis ejus, sed in loco consociati, secundum illud Matth. xxiv, 28: *Ubi-cumque fuerit corpus, illuc congregabuntur et aquilæ*: per quas significantur sancti. Signanter autem loco corporis in Hebræo « joatham<sup>1</sup> » dicitur secundum Hieronymum, quod « cadaver » significat, ad commemorandum Christi passionem, per quam Christus et potestatem judicariam promeruit, et homines conformati passioni ejus ad societatem gloriæ illius assumuntur, secundum illud Apostoli: *Si compatimur et conregnabimus*: II Tim. ii, 12. Et inde est quod circa locum dominicæ passionis creditur Christus ad iudicium descensurus, secundum illud Joel. iii, 2: *Congregabo omnes gentes, et deducam eas in vallem Josaphat, et disceptabo cum eis ibi*: quæ subjacet monti Oliveti, unde Christus ascendit. Inde etiam est quod veniente Domino ad iudicium, signum crucis et alia passionis indicia demonstrabuntur, secundum illud Matth. xxiv, 30: *Et tunc apparebit signum filii hominis in cælo*: ut impii videntes in quem confixerunt, doleant et crucientur; et ii qui redempti sunt, gaudeant de gloria redemptoris. Et sicut Christus a dextris Dei sedere dicitur secundum humanam naturam, in quantum est ad bona potissima Patris sublimatus, ita justi in iudicio a dextris ejus dicuntur insistere; quasi honorabilissimum apud eum locum habentes.

## CAPUT CCLIII.

*Quod sancti judicabunt.*

Non solum autem Christus in illo iudicio judicabit, sed etiam alii. Quorum quidam judicabunt sola comparatione, scilicet boni minus bonos, aut mali magis malos, secundum illud Matth. xii, 41: *Viri Ninivitæ surgent in iudicio cum generatione ista, et condemnabunt eam*. Quidam vero judicabunt per sententiæ approbationem; et sic omnes justi judicabunt, secundum illud Sap. iii, 8: *Ju-*

<sup>1</sup> Al.: « iotham. » Forte: « ptoma. » In XXVII.

Cod. 1060 Mazar.: « iathon. »



*dicabunt sancti nationes.* Quidam vero judicabunt, quasi judiciariam potestatem accipientes a Christo, secundum illud Psal. cXLIX, 6: *Gladii ancipites in manibus eorum.* Hanc autem ultimam judiciariam potestatem Dominus Apostolis repromisit Matth. XIX, 28, dicens: *Vos qui secuti estis me, in regeneratione cum sederit filius hominis in sede majestatis suæ, sedebitis et vos super sedes duodecim, judicantes duodecim tribus Israel.* Non est autem judicandum, quod soli Judæi, qui ad duodecim tribus Israel pertinent, per Apostolos judicentur; sed per duodecim tribus Israel omnes fideles intelliguntur, qui in fidem Patriarcharum sunt assumpti. Nam infideles non judicantur, sed jam judicati sunt. Similiter etiam non soli duodecim Apostoli qui tunc erant cum Christo judicabunt; nam neque Judas judicabit, nec Paulus, qui plus aliis laboravit, carebit judiciaria potestate, præsertim cum ipse dicat I Corinth. VI, 3: *Nescitis quod angelos judicabimus?* sed ad illos proprie hæc dignitas pertinet qui relictis omnibus Christum sunt secuti: hoc enim promissum est Petro quærenti et dicenti Matth. XIX, 27: *Ecce nos reliquimus omnia, et secuti sumus te: quid ergo erit nobis?* Unde Job xxxvi, 6: *Judicium pauperibus tribuet* \* et hoc rationabiliter: ut enim dictum est, discussio erit de actibus hominum qui terrenis rebus bene vel male sunt usi. Requiritur autem ad rectitudinem judicii ut animus judicis sit liber ab iis de quibus habet judicare: et ideo per hoc quod aliqui habent animum suum a rebus terrenis totaliter abstractum, dignitatem judiciariam merentur. Facit etiam ad meritum hujus dignitatis præceptorum divinorum annuntiatio: unde Matth. xxv, Christus cum Angelis ad judicandum dicitur esse venturus, per quos prædicatores intelliguntur, ut Augustinus in lib. *De penitentia* dicit. Decet enim ut illi discutiant actus hominum circa observantiam divinorum præceptorum qui præcepta vitæ annuntiaverunt. Judicabunt autem prædicti in quantum cooperabuntur ad hoc quod unicuique appareat causa salvationis et damnationis tam sui quam aliorum, eo modo quo superiores Angeli inferiores, vel etiam homines illuminare dicuntur. Hanc igitur judiciariam potestatem confitemur in Christo in Symbolo Apostolorum, dicentes: « Inde venturus est judicare vivos et mortuos.

## CAPUT CCLIV.

*Quomodo distinguuntur articuli de prædictis.*

His igitur consideratis, quæ pertinent ad fidei christianæ veritatem, sciendum est, quod omnia præmissa ad certos articulos reducuntur. Secundum quosdam quidem ad duodecim, secundum alios autem ad quatuordecim. Cum enim fides sit de iis quæ sunt incomprehensibilia rationi; ubi aliquid novum occurrit rationi incomprehensibile, ibi oportet esse novum articulum. Est igitur unus articulus pertinens ad Divinitatis unitatem: quamvis enim Deum esse unum ratione probetur, tamen eum sic præesse immediate omnibus, vel singulariter sic colendum, subjacet fidei. De tribus autem personis ponuntur tres articuli. De tribus autem effectibus Dei, scilicet creationis, quæ pertinet ad naturam, justificationis, quæ pertinet ad gratiam, remunerationis, quæ pertinet ad gloriam, ponuntur tres alii: et sic de Divinitate in universo ponuntur septem articuli. Circa humanitatem vero Christi ponuntur septem alii; ut primus sit de incarnatione et conceptione: secundus de nativitate, quæ habet specialem difficultatem propter exitum a clauso Virginis utero; tertius de morte et passione et sepultura: quartus de descensu ad inferos: quinque de resurrectione: sextus de ascensione: septimus de adventu ad judicium: et sic in universo sunt quatuordecim articuli.

Alii vero satis rationabiliter fidem trium personarum sub uno articulo comprehendunt, eo quod non potest credi Pater quin credatur et Filius et amor nectens utrumque, qui est Spiritus sanctus; sed distinguunt articulum resurrectionis ab articulo remunerationis: et sic duo articuli sunt de Deo, unus de unitate, et alius de trinitate; quatuor de effectibus, unus de creatione, alius de justificatione, tertius vero de communi resurrectione, quartus de remuneratione. Similiter circa fidem humanitatis Christi, conceptionem et nativitatem sub uno articulo comprehendunt, sicut passionem et mortem. Sic igitur in universo, secundum istam computationem sunt duodecim articuli. Et hæc de fide sufficiant.

## PARS SECUNDA

IN QUA OSTENDITUR QUOD AD PERFECTIONEM CHRISTIANÆ VITÆ NECESSARIA EST  
VIRTUS SPEI.

### CAPUT I.

Quia secundum principis Apostolorum sententiam admonemur ut non solum rationem reddamus de fide, sed etiam de ea quæ in nobis est spe, post præmissa, in quibus fidei christianæ sententiam breviter prosecuti sumus, restat ut de iis quæ ad spem pertinent, compendiosam tibi expositionem faciamus. Est autem considerandum, quod in aliqua cognitione desiderium hominis requiescere potest, cum homo naturaliter scire desideret veritatem, qua cognita ejus desiderium quietatur. Sed in cognitione fidei desiderium hominis non quiescit: fides enim imperfecta est cognitio, ea enim creduntur quæ non videntur: unde Apostolus eam vocat *argumentum non apparentium*, ad Hebr. xi. Habita igitur fide, adhuc remanet animæ motus ad aliud, scilicet ad videndum perfecte veritatem quam credit, et assequendum ea per quæ ad veritatem hujusmodi poterit introduci. Sed quia inter cetera fidei documenta unum esse diximus ut credatur Deus providentiam de rebus humanis habere, insurgit ex hoc in animo erudentis motus spei, ut scilicet bona quæ naturaliter desiderat, ut edoctus ex fide, per ejus auxilium consequatur. Unde post fidem ad perfectionem christianæ vitæ spes necessaria est, sicut supra jam diximus.

### CAPUT II.

*Quod hominibus convenienter indicitur oratio, per quam obtineant quæ a Deo sperant; et de diversitate orationis ad Deum et ad hominem.*

Quia vero secundum divinæ providentiæ ordinem unicuique attribuitur modus

pervenienti ad finem secundum convenientiam suæ naturæ, est etiam hominibus concessus congruus modus obtinendi quæ sperat a Deo secundum humanæ conditionis tenorem. Habet enim hoc humana conditio ut aliquis interponat deprecationem ad obtinendum ab aliquo, præsertim superiori, quod per eum se sperat adipisci: et ideo indicta est hominibus oratio per quam homines a Deo obtineant quod ab ipso consequi sperant.

Aliter tamen necessaria est oratio ad obtinendum aliquid ab homine, aliter a Deo. Interponitur enim ad hominem primum quidem, ut desiderium orantis et necessitas exprimatur: secundo ut deprecanti animus ad concedendum flectatur: sed hæc in oratione quæ ad Deum funditur, locum non habent. Non enim in orando intendimus necessitates nostras aut desideria Deo manifestare, qui omnium est cognitor: unde et Psalm. xxxvii, 10, dicit ei: *Domine, ante te omne desiderium meum*; et in Evangelio dicitur Matth. vi, 32: *Scit Pater vester quia his omnibus indigetis*. Nec etiam divina voluntas verbis humanis flectitur ad volendum quod prius noluerat: quia, ut dicitur Num. xxiii, 19: *non est Deus quasi homo ut mentiatur, nec ut filius hominis, ut mutetur: nec pœnitentia flectitur*, ut dicitur I Reg. xv. Sed oratio ad obtinendum a Deo est homini necessaria propter se ipsum qui orat; ut scilicet ipsemet suos defectus consideret, et animum suum flectat ad ferventer<sup>1</sup> et pie desiderandum quod orando sperat obtinere: per hoc enim ad recipiendum idoneus redditur.

Est autem et alia differentia consideranda orationis quæ ad Deum et hominem fit. Nam ad orationem quæ fit ad hominem, præexigitur familiaritas, per quam sibi deprecandi aditus pateat; sed

<sup>1</sup> Al.: « fluenter. »

ipsa oratio quæ ad Deum emittitur, familiares nos Deo facit, dum mens nostra elevatur ad ipsum, et quodam spirituali affectu Deo colloquitur, in spiritu et veritate ipsum adorans; et sic familiaris effectus orando aditum sibi parat ut iterum fiducialius oret: unde dicitur in Psalm. xvi, 6: *Ego clamavi*, scilicet fiducialiter orando, *quoniam exaudisti me Deus*: quasi per primam orationem in familiaritatem receptus, secundo fiducialius clamet: et propter hoc in oratione divina assiduitas vel petitionum frequentia non est importuna, sed reputatur Deo accepta; *oportet enim semper orare et non deficere*, ut dicitur Luc. xviii 1. Unde et Dominus ad petendum invitat, dicens Matth. vii, 7, *Petite, et dabitur vobis... pulsate, et aperietur vobis*. In oratione vero quæ ad hominem fit, petitionum assiduitas redditur importuna.

### CAPUT III.

*Quod conveniens fuit ad consummationem spei, ut nobis forma orandi traderetur a Christo.*

Quia igitur ad salutem nostram post fidem etiam spes requiritur, opportunum fuit ut Salvator noster sicut auctor et consummator nobis factus est fidei reservando<sup>1</sup> cœlestia sacramenta; ita etiam nos in spem vivam induceret, nobis formam orandi tradens, per quam maxime spes nostra in Deum erigitur, dum ab ipso Deo edocemur quid ab ipso petendum sit. Non enim ad petendum induceret nisi proponeret exaudire: nullusque ab alio petit nisi de quo sperat, et ea ipse petit quæ sperat. Sic igitur dum nos docet a Deo aliqua petere, in Deo nos sperare admonet, et quid ab ipso sperare debeamus ostendit per ea quæ petenda esse demonstrat. Sic igitur prosequentes ea quæ in oratione dominica continentur, demonstrabimus quicquid ad spem christianorum pertinere potest: scilicet in quo spem ponere debeamus, et propter quam causam, et quæ ab eo sperare debeamus. Spes quidem nostra debet esse in Deo, quem etiam orare debemus, secundum illud Psalm. lxi, 9; *Sperate in eo*, scilicet Deo, *omnis congregatio populi; effundite coram illo, scilicet orando, corda vestra.*

### CAPUT IV.

*Causa quare quæ speramus, debemus ab ipso Deo orando petere.*

Causa autem quare in eo sperandum est hæc præcipua est, quia pertinemus ad ipsum sicut effectus ad causam. Nihil autem in vanum operatur, sed propter aliquem finem certum. Pertinet igitur ad unumquodque agens sic effectum producere ut ei non desint per quæ possit pervenire ad finem: et inde est quod in his quæ naturalibus agentibus fiunt, natura deficere in necessariis non invenitur, sed attribuit unicuique generato quæ sunt ad consistentiam sui esse, et ad perficiendum operationem qua pertingat ad finem; nisi forte hoc impediatur per defectum agentis, qui sit insufficiens ad hæc exhibenda. Agens autem per intellectum non solum in ipsa effectus productione ea confert suo effectui quæ sunt necessaria ad finem intentum, sed etiam opere jam perfecto disponit de usu ipsius, qui est operis finis; sicut faber non solum cultellum fabricat, sed etiam disponit de incisione ipsius. Homo autem a Deo est productus ut artificiatum ab artifice: unde dicitur Isai. lxiiv, 8: « *Et nunc, Domine, fitor noster es tu, nos vero lutum*: » et ideo sicut vas fictile, si sensum haberet, sperare de figulo posset ut bene disponderetur; ita etiam homo debet habere spem de Deo, ut recte gubernetur ab eo: unde dicitur Jer. xviii, 7: « *Sicut lutum in manu figuli, sic vos, domus Israel, in manu mea.* »

Hæc autem fiducia quam homo habet de Deo, debet esse certissima. Dictum enim est, quod agens a recta sui operis dispositione non recedit nisi propter aliquem ejus defectum. In Deo autem nullus defectus cadere potest neque ignorantia, quia *omnia nuda et aperta sunt oculis ejus*, ut dicitur Hebr. iv, 12: neque impotentia, quia: *non est abbreviata manus ejus ut salvare non possit*, ut dicitur Isa. lix, 1; neque iterum defectus bonæ voluntatis, quia *bonus est Dominus sperantibus in eum, animæ quærenti illum*, ut dicitur Thren. iii, 28. Et ideo spes qua aliquis de Deo confidit, sperantem non confundit, ut dicitur Rom. v.

Est autem considerandum ulterius,

<sup>1</sup> Al.: « reservando. »

quod etsi respectu omnium creaturarum providentia dispositionis invigilet, speciali tamen ratione curam habet de rationabilibus; quæ scilicet dignitate imaginis ipsius sunt insignitæ, et ad eum cognoscendum et amandum possunt pertingere, et suorum actuum dominium habent, ut boni et mali discretionem habentes: unde competit eis fiduciam habere de Deo, non solum ut conserventur in esse secundum conditionem suæ naturæ, quod competit ceteris creaturis: sed etiam ut recedendo a malo et operando bonum, aliquid promereantur ab ipso: unde in Psal. xxxv, 7, dicitur: *Homines et jumenta salvabis*, inquantum scilicet hominibus simul cum irrationabilibus creaturis confert ea quæ pertinent ad subsidium vitæ; sed postea subdit: *Filii autem hominum in tegmine alarum tuarum sperabunt*, quasi speciali quadam cura protecti ab ipso.

Ulterius autem considerare oportet, quod perfectione quacumque accedente, superadditur facultas aliquid faciendi vel adipiscendi; sicut aer illuminatus a sole facultatem habet ut possit esse medium visionis, et aqua calefacta ab igne facultatem habet decoquendi, et hoc sperare posset si sensum haberet. Homini autem supra animæ naturam additur perfectio gratiæ, per quam efficitur divinæ consors naturæ, ut dicitur II Pet. 1: unde et secundum hoc dicimur regenerari in filios Dei, secundum illud Joan. 1, 12: *Dedit eis potestatem filios Dei fieri*. Filii autem effecti convenienter possunt hereditatem sperare, secundum illud Rom. viii, 17: *Si filii et heredes*. Et ideo secundum hanc spiritualem regenerationem competit homini quamdam altiorem spem de Deo habere, hereditatis scilicet æternæ consequendæ, secundum illud I Pet. 1, 3: *Regeneravit nos in spem vivam per resurrectionem Christi ex mortuis, in hereditatem incorruptibilem et incontaminatam et immarcescibilem, conservatam in cælis*. Et quia per spiritum adoptionis quem accepimus, clamamus *Abba, pater*, ut dicitur Rom. viii, 15, ideo Dominus ut ex hac spe nobis esse orandum ostenderet, suam orationem a Patris invocatione inchoavit dicens, *Pater*. Similiter etiam ex hoc quod dicitur, *Pater*, præparatur hominis affectus ad pure orandum, et ad

obtinendum quod sperat. Debent etiam filii imitatores parentum existere: unde qui patrem Deum confitetur debet conari ut Dei imitator existat, vitando scilicet illa quæ Deo dissimilem reddunt, et his insistendo quæ nos Deo assimilant: unde dicitur Jer. iii, 19: *Patrem vocabis me, et post me ingredi non cessabis*. Si ergo (ut Gregorius Nyssenus dicit) ad res mundanas intuitum dirigis, aut humanam gloriam ambis, aut sordes passibilis appetitus: quomodo qui corrupta vivis vita, pacem vocas incorruptibilitatis genitorem<sup>1</sup>?

## CAPUT V.

*Quod Deus, a quo orando sperata petimus, debet vocari ab orante Pater noster, et non meus.*

Inter alia vero præcipue qui se Dei filium recognoscit, debet in caritate Dominum imitari, secundum illud Ephes. v, 1: *Estote imitatores Dei sicut filii carissimi, et ambulate in dilectione*. Dei autem dilectio non privata est, sed communis ad omnes: diligit enim *omnia quæ sunt*, ut dicitur Sap. xi, 3: et specialiter homines, secundum illud Deut. xxxiii 3: *Dilexit populos*. Et ideo, ut Cyprianus dicit, « publica est nobis et communis oratio; et quando oramus, non pro uno tantum, sed pro populo toto oramus, quia totus populus unum sumus. » Pro se igitur orare (ut Chrysostomus dicit) « necessitas cogit, pro altero autem caritas fraternitatis hortatur. » Et ideo non dicimus, Pater meus, sed *Pater noster*.

Simul etiam considerandum est quod si spes nostrâ principaliter divino auxilio innitatur, ad invicem tamen juvamus ut facilius obtineamus quod petimus: unde dicitur II, Cor. 1, 2: *Eripiet nos adjuvantibus et vobis in oratione pro nobis*: unde et Jac. v, 16, dicitur: *Orate pro invicem ut salvemini*. Ut enim dicit Ambrosius, « multi minimi, dum congregantur et unanimes fiunt, fiunt magni: » et multorum preces impossibile est ut non impetrent, secundum illud Matth. xviii, 19: *Si duo ex vobis consenserint super terram de omni re quacumque*

<sup>1</sup> Cod. S. Gen.: « gestorem. »

*petierint, fiet illis a Patre meo qui in cœlis est.* Et ideo non singulariter orationem porrigimus, sed quasi ex unanimi consensu dicimus, *Pater noster.*

Considerandum est etiam quod spes nostra est ad Deum per Christum, secundum illud Rom. v, 1 : *Justificati ex fide pacem habeamus ad Deum per Dominum nostrum Jesum Christum, per quem habemus accessum per fidem in gratiam istam, in qua stamus, et gloriamur in spe gloriæ filiorum Dei.* Per ipsum enim qui est unigenitus Dei filius naturalis, efficimur filii adoptivi : quia, ut dicitur Gal. iv, 4, *misit Deus Filium suum... ut adoptionem filiorum recipere-mus.* Tali igitur tenore Deum Patrem profiteri debemus, ut privilegio unigeniti non derogetur : unde Augustinus (a) dicit : « Noli tibi aliquid specialiter vindicare. Solius Christi specialiter est pater, nobis omnibus in communi pater est, quia illum solum genuit, nos creavit. » Et ideo dicitur, « Pater noster. »

## CAPUT VI.

*Ubi ostenditur Dei patris nostri, quem oramus, potestas ad sperata concedendum, per hoc quod dicitur, Qui es in cœlis.*

Solet autem contingere spei defectus propter impotentiam ejus a quo auxilium esset sperandum. Non enim sufficit ad spei fiduciam quod ille cui spes innitur, voluntatem habeat adjuvandi, nisi adsit potestas. Satis autem voluntatis divinæ promptitudinem ad juvandum exprimimus patrem eum profitendo. Sed ne de excellentia potestatis ejus dubitetur, subditur : *Qui es in cœlis.* Non enim esse in cœlis dicitur sicut a cœlis contentus, sed sicut cœlos sua virtute comprehendens, secundum illud Eccli. xxiv, 8 : *Gyrum cœli circūivi sola :* quinimmo super totam cœlorum magnitudinem virtus ejus elevata est, secundum illud Psal. viii, 3 : *Elevata est magnificentia tua super cœlos Deus.* Et ideo ad spei fiduciam confirmandam, virtutem ejus profite-mur, quæ cœlos sustinet et transcendit.

Per hoc etiam impedimentum quoddam orationis excluditur. Sunt enim aliqui

qui res humanas fatali necessitati siderum subdunt, contra illud quod dicitur Jer. x, 2 : *A signis cœli nolite metuere quæ gentes timent.* Secundum autem hunc errorem tollitur orationis fructus : nam si necessitati siderum vita nostra subicitur, non potest circa hoc aliquid immutari. Frustra igitur orando peteremus vel aliqua bona consequi, vel liberari a malis. Ut igitur nec hoc orantium fiducia obsit, dicimus : *Qui es in cœlis,* idest tamquam motor et moderator eorum. Et sic per virtutem cœlestium corporum auxilium quod a Deo speramus, impediri non potest.

Sed etiam ad hoc quod oratio sit efficeax apud Deum, oportet ut ea petat homo quæ dignum est expectare a Deo. Dicitur enim quibusdam, Jac. iv, 3 : *Petitis et non accipitis, eo quod male petatis.* Illa enim male petuntur quæ terrena sapientia suggerit, non cœlestis. Et ideo Chrysostomus dicit : Cum dicimus, *Qui es in cœlis,* non Deum ibi concludimus, sed a terra abducitur orantis animus, et excelsis regionibus affigitur.

Est autem et aliud orationis sive fiducia impedimentum quod orans habet de Deo : scilicet si putet aliquis humanam vitam a divina providentia esse remotam, secundum quod ex persona impiorum dicitur Job. xxii, 14 : *Nubes latibulum ejus, nec nostra considerat, et circa cardines cœli perambulat :* et Ezech. viii, 12 : *Non videt Dominus nos ; dereliquit Dominus terram.* Contrarium autem apostolus Paulus Atheniensibus prædicans ostendit dicens Act. : xvii, 27 : *Non longe est ab unoquoque nostrum : in ipso enim vivimus, movemur et sumus :* quia scilicet per ipsum nostrum esse conservatur, vita gubernatur, motus dirigitur, secundum illud Sap. xiv, 3 : *Tua autem, Pater, providentia ab initio cuncta gubernat :* intantum quod nec ejus providentiæ minima animalia subtrahuntur, secundum illud Matth. ix, 19 : *Nonne duo passeressesse veneunt et unus ex illis non cadet super terram sine Paire vestro ? Vestri autem capilli omnes numerati sunt.* Intantum tamen excellentiori modo sub cura divina homines ponuntur, ut horum comparatione dicat Apostolus I Cor. ix, 9 : *Non est cura Deo de bobus ; non quod omnino eorum curam non habeat ; sed*

(a) Non Augustinus, sed alius auctor, et legitur hæc verba in *Serm. LXXXIV, inter Suppositi-*

*tios S. Augustini Sermones, § 1.*



quia nec sic eorum curam habet ut hominum, quos punit aut remunerat pro bonis aut malis, et eos ad aeternitatem præordinat: unde et post præmissa verba Dominus subdit: *Vestri autem capilli capitis omnes numerati sunt*, tamquam totum quod est hominis, sit in resurrectione reparandum. Et ex hoc omnis diffidentia a nobis debet excludi: unde et ibidem subdit: *Nolite ergo timere. Multis passeribus pluris estis vos*. Et propter hoc, ut supra dictum est, in Psalm. xxxv, 8, dicitur: *Filii hominum in tegmine alarum tuarum sperabunt*. Et quamvis propter specialem curam omnibus hominibus Deus dicatur propinquus esse, specialissime tamen dicitur esse propinquus bonis qui ei fide et dilectione appropinquare nituntur, secundum illud Jac. iv, 8: *Appropinquate Deo, et appropinquabit vobis*: unde in Psal. cxliv, 18, dicitur: *Prope est Dominus omnibus invocantibus eum, omnibus invocantibus eum in veritate*. Nec solum eis appropinquat, sed etiam eos per gratiam inhabitat, secundum illud Jer. xiv, 9: *Tu in nobis es, Domine*. Et ideo ad sanctorum spem augendam dicitur: *Qui es in cælis*, idest in sanctis, ut Augustinus exponit. Tantum enim, ut ipse dicit, spiritualiter interesse videtur inter justos et peccatores, quantum corporaliter inter cælum et terram. Hujus rei significandæ gratia orantes ad orientem convertimur, unde cælum surgit. Ex quo etiam spes sanctis augetur et orandi fiducia non solum ex propinquitate divina, sed etiam ex dignitate quam sunt consecuti a Deo, qui eos per Christum cælos fecit, secundum illud Isa. li, 16: *Ut plantes cælos, et fundes terram*. Qui enim eos cælos fecit, bona eis cælestia non negabit<sup>1</sup>.

## CAPUT VII.

*Qualia sint quæ sunt a Deo speranda; et de ratione spei.*

His præmissis, ex quibus homines spem de Deo concipiunt, oportet considerare quæ sunt ea quæ a Deo sperare debemus. Ubi considerandum est quod spes desiderium præsupponit: unde ad hoc quod aliquid sit sperandum, primo

requiritur quod sit desideratum. Quæ enim non desiderantur, sperari non dicuntur, sed timeri vel etiam despici. Secundo oportet quod id quod speratur, possibile esse æstimetur ad consequendum; et hoc<sup>2</sup> spes supra desiderium addit: potest enim homo desiderare etiam ea quæ non æstimat se posse adipisci: sed horum spes esse non potest. Tertio requiritur quod id quod sperandum est, sit aliquid arduum: nam ea quæ parva sunt, magis despiciamus quam speremus; vel si ea desideramus, quasi in promptu ea habentes, non videmur ea sperare quasi futura, sed habere quasi præsentia.

Ulterius autem considerandum est quod arduorum quæ quis se sperat adepturum, quædam aliquis se sperat adipisci per alium, quædam vero per se ipsum. Inter quæ hoc differre videtur: quod ad ea obtinenda quæ per se homo consequi sperat, conatum propriæ virtutis adhibet: ad ea vero obtinenda quæ se ab alio consequi sperat, interponit petitionem: et si quidem ab homine illud se adipisci sperat, vocatur simplex petitio; si autem sperat illud obtinere a Deo, vocatur oratio, quæ, ut Damascenus dicit, est « petitio decentium a Deo. » Non autem ad virtutem spei pertinet spes quam habet aliquis de se ipso, nec etiam quam habet de alio homine; sed solum spes quam habet de Deo: unde dicitur Jerem. xvii, 5: *Maledictus homo qui confidit in homine, et ponit carnem brachium suum*: et post subditur: *Benedictus homo \* qui confidit in Domino, et erit Dominus fiducia ejus*. Sic igitur ea quæ Dominus in sua oratione petenda esse docuit, ostenduntur homini esse considerata possibilis, et tamen ardua; ut ad ea non humana virtute, sed divino auxilio perveniatur.

## CAPUT VIII.

*De prima petitione, in qua docemur desiderare quod cognitio Dei quæ est in nobis inchoata, perficiatur; et quod hoc si possibile.*

Oportet igitur considerare desiderii ordinem ex caritate procedentem, ut se-

<sup>1</sup> Parm.: « denegabit. »

<sup>2</sup> Al.: « et hæc spes. »

cundum hoc etiam sperandorum et petendorum a Deo ordo accipi possit. Habet autem hoc ordo caritatis ut Deus super omnia diligatur; et ideo primum desiderium nostrum movet caritas ad ea quæ sunt Dei. Sed cum desiderium sit boni futuri; Deo autem, secundum quod in se consideratur, nihil in futurum adveniat, sed æternaliter eodem modo se habeat; desiderium nostrum non potest ferri ad ea quæ Dei sunt prout in se ipsis considerantur; ut scilicet Deus aliqua bona obtineat quæ non habet. Sic autem ad ipsa fertur nostra dilectio, ut ea tamquam existentia amemus. Potest tamen hoc desiderari de Deo ut in opinione et reverentia omnium magnificetur, qui in se ipso semper magnus existit. Hoc autem non est tamquam impossibile reputandum. Cum enim ad hoc factus<sup>1</sup> sit homo, ut magnitudinem divinam cognoscat; si ad eam percipiendam pervenire non possit, videretur in vanum constitutus esse, contra id quod in Psal. xxxvii, 48, dicitur: *Numquid enim vane constituisti omnes filios hominum?* Esset quoque inane naturæ desiderium, quo omnes naturaliter desiderant aliquid cognoscere de divinis: unde nullus est qui Dei cognitione totaliter privetur, secundum illud Job xxxvi, 25: *Omnes homines vident eum.* Est tamen hoc arduum, ut omnem facultatem humanam excedat, secundum illud Job xxxvi, 26: *Ecce Deus magnus, vincens scientiam nostram.* Unde cognitio divinæ magnitudinis et bonitatis hominibus provenire non potest nisi per gratiam revelationis divinæ, secundum illud Matth. xi, 27: *Nemo novit Filium nisi Pater, neque Patrem quis novit nisi Filius, et cui voluerit Filius revelare.* Unde Augustinus super Joannem dicit: Deum nullus cognoscit, si non se indicat ipse qui novit. Indicat se quippe Deus aequaliter hominibus naturali quadam cognitione cognoscendum per hoc quod hominibus lumen rationis infundit, et creaturas visibiles condidit, in quibus bonitatis et sapientiæ ipsius aequaliter relucent vestigia, secundum illud Rom. i, 19: *Quod notum est Dei, id est quod cognoscibile est de Deo per naturalem rationem, manifestum est illis, scilicet gentilibus hominibus: Deus enim illis revelavit, scilicet per lumen rationis, et per creaturas quas con-*

didit: unde subdit: *Invisibilia enim ipsius a creatura mundi per ea quæ facta sunt, intellecta conspiciuntur, sempiterna quoque ejus virtus et Divinitas.* Ista tamen cognitio imperfecta est, quia nec ipsa creatura perfecte<sup>2</sup> ab homine conspici potest, et etiam creatura deficit a perfecta Dei representatione, quia virtus hujus causæ in infinitum excedit effectum: unde dicitur Job xi, 7: *Forsitan vestigia Dei comprehendes, et usque ad perfectum Omnipotentem reperies?* et Job xxxvi, 25, postquam dixit: *omnes homines vident eum:* subdit: *Unusquisque intuetur procul.*

Ex hujus autem cognitionis imperfectione consecutum est ut homines a veritate discedentes diversimode circa cognitionem Dei errarent, intantum quod sicut Apostolus dicit Roman. i, 21, quidam *evanuerunt in cogitationibus suis, et obscuratum est insipiens cor eorum: dicentes enim se esse sapientes, stulti facti sunt, et mutaverunt gloriam incorruptibilis Dei in similitudinem corruptibilis hominis, et volucrum et quadrupedum et serpentium.* Et ideo ut ab hoc errore homines Deus revocaret, expressius notitiam suam hominibus dedit in veteri lege, per quam homines ad cultum unius Dei revocantur, secundum illud Deuter. vi, 4: *Audi Israel, Dominus Deus tuus unus est.* Sed hæc de Deo cognitio erat figurarum obscuritatibus implicita, et infra unius Judaicæ gentis terminos clausa, secundum illud Psalm. lxxv, 1: *Notus in Judæa Deus, in Israel magnum nomen ejus.* Ut ergo toti humano generi vera Dei cognitio proveniret, Verbum suæ virtutis unigenitum Deus Pater misit in mundum, ut per eum totus mundus ad veram cognitionem divini nominis perveniret: et hoc quidem ipse Dominus facere inchoavit in suis discipulis, secundum illud Joan. xvii, 6: *Manifestavi nomen tuum hominibus quos dedisti mihi de mundo.* Nec in hoc terminabatur ejus intentio ut illi soli Deitatis haberent notitiam, sed ut per eos divulgaretur in mundum universum: unde postea subdit: *Ut mundus credat quia tu me misisti.* Quod quidem per Apostolos et successores eorum continue agit, dum ad Dei notitiam per eos homines adducuntur, quousque per totum mundum nomen Dei sanctum et celebre habeatur,

<sup>1</sup> Al.: « effectus. »

<sup>2</sup> Al.: « perfecta. »

sicut prædictum est Malach. 1, 11 : *Ab ortu solis usque ad occasum magnum est nomen meum in gentibus, et in omni loco sacrificatur et offertur nomini meo oblatio munda.* Ut igitur id quod inchoatum est, ad consummationem perveniat, petimus dicentes : *Sanctificetur nomen tuum* « Quod, » ut Augustinus dicit, lib. II *De serm. Dom. in mont.* c. v. § 19, « non sic petitur quasi non sit sanctum Dei nomen, sed ut sanctum habeatur ab hominibus; idest, ita innotescat Deus, ut non æstimetur aliquid sanctius. » Inter alia vero indicia quibus sanctitas Dei manifestatur hominibus, evidentissimum signum est sanctitas hominum, qui ex divina inhabitatione sanctificantur. Ut enim Gregorius Nyssenus dicit, « quis est tam bestialis, qui videns in credentibus vitam puram, non glorificet nomen invocatum in tali vita? » secundum illud quod Apostolus dicit I Cor. xiv, 24 : *Si omnes prophetent, intret autem quis infidelis vel idiota, convincitur ab omnibus;* et postea subdit : *Et ita cadens in faciem, adorabit Deum, pronuntians quod vere Deus in vobis sit.* Et ideo, sicut Chrysostomus dicit, in hoc quod dicit, *Sanctificetur nomen tuum*, rogare etiam jubet orantem per nostram glorificari vitam; ac si dicat : Itā fac nos vivere, ut per nos te universi glorificent. Sic autem per nos Deus sanctificatur in mentibus aliorum, in quantum nos sanctificamur per ipsum : unde dicendo, *Sanctificetur nomen tuum*, optamus, sicut Cyprianus, ut nomen ejus sanctificetur in nobis. Quia enim Christus dicit, *Sancti estote, quia ergo sanctus sum.* Levit. xi, 44 : id petimus ut qui in baptismo sanctificati sumus, in eo quod esse cœpimus perseveremus. Quotidie etiam deprecamur ut sanctificemur, ut qui quotidie delinquimus, delicta nostra sanctificatione assidua purgemus. Ideo autem hæc petitio primo ponitur, quia, sicut Chrysostomus dicit, « digna est Deum deprecantis oratio nihil ante Patris gloriam petere, sed omnia laudi ejus postponere. »

## CAPUT IX.

*Secunda petitio, ut participes gloriæ nos faciat.*

Post desiderium autem et petitionem divinæ gloriæ, consequens est ut homo appetat et requirat particeps gloriæ divinæ fieri : et ideo secunda petitio ponitur : *Adveniat regnum tuum.* Circa quam, sicut et in præmissa petitione, oportet primo considerare quod regnum Dei convenienter desideretur. Secundo vero quod ad id adipiscendum homo possit pervenire. Tertio vero quod ad illud pertingere non possit propria virtute, sed solo auxilio divinæ gratiæ. Et sic quarto considerandum est, quomodo regnum Dei advenire potest<sup>2</sup>.

Est igitur circa primum considerandum quod unicuique ei naturaliter appetibile est proprium bonum : unde et bonum convenienter definiunt esse quod omnia appetunt. Proprium autem bonum uniuscujusque rei est id quo res illa perficitur : dicimus enim unamquamque rem bonam, ex eo quod propriam perfectionem attingit. Intantum vero bonitate caret, in quantum a<sup>3</sup> propria perfectione deficit ; unde consequens est ut unaquæque res suam perfectionem appetat, unde et homo naturaliter appetit perfici : et cum multi sint gradus perfectionis humanæ, illud præcipue et principaliter in ejus appetitum naturaliter cadit quod ad ultimam ejus perfectionem spectat. Hoc autem bonum hoc indicio cognoscitur quod naturale desiderium hominis in eo quiescit. Cum enim naturale desiderium hominis non tendat nisi in bonum proprium quod in aliqua perfectione consistit ; consequens est quod quamdiu aliquid<sup>4</sup> ad desiderandum rectat, nondum pervenit homo ad ultimam perfectionem suam. Dupliciter autem adhuc restat aliquid desiderandum. Uno modo, quando id quod desideratur, propter aliquid aliud quæritur : unde oportet quod<sup>5</sup> eo obtento adhuc desiderium non quiescat,

<sup>1</sup> « Ut non existiment. »

<sup>2</sup> Parm. : « petamus. »

<sup>3</sup> Parm. : « in quantum propria perfectione caret. »

<sup>4</sup> Parm. : « aliquid desiderandum. » Al. : « desideratum. »

<sup>5</sup> Hic litteris rubris in Cod. S. Gen. : « Dubitatur istud quod sequitur usque ad principium alterius libri utrum sit fratris Thomæ de Aquino, ord. Prædicatorum. » Porro liber alter in Cod. S. Gen. est *contra impugnantes Dei cultum et religionem.*

sed feratur in aliud. Alio modo, quando non sufficit ad obtinendum id quod homo desiderat; sicut modicus cibus non sufficit ad sustentationem naturæ, unde naturale appetitum non satiat. Illud ergo bonum quod homo primo et principaliter desiderat, tale debet esse ut non quæratur propter aliud, et sufficiat homini. Hoc autem bonum communiter felicitas nominatur, in quantum est bonum hominis principale: per hoc enim aliquos felices esse dicimus quod eis credimus bene esse. Vocatur etiam beatitudo, in quantum excellentiam designat. Potest et pax vocari, in quantum quietat: nam quies appetitus pax interior esse videtur: unde in Psal. cXLVII, 3, dicitur: *Qui posuit fines tuos pacem.*

Sic igitur apparet quod in corporalibus bonis, hominis felicitas vel beatitudo esse non potest. Primo quidem, quia non sunt propter se quæsita, sed naturaliter propter aliud desiderantur: conveniunt enim homini ratione sui corporis; corpus autem hominis ordinatur ad animam sicut ad finem: tum quia corpus est instrumentum animæ moventis, omne autem instrumentum est propter artem quæ utitur eo; tum etiam quia corpus comparatur ad animam sicut materia ad formam. Forma autem est finis materiæ, sicut et actus potentiæ. Ex quo consequens est ut neque in divitiis, neque in honoribus, neque in sanitate aut pulchritudine, neque in rebus aliquibus huiusmodi ultima hominis felicitas consistat. Secundo, quia impossibile est ut corporalia bona sufficiant homini; quod multipliciter apparet. Uno quidem modo, quia cum in homine sit duplex vis appetitiva, scilicet intellectiva et sensitiva, et per consequens desiderium duplex; desiderium intellectivi appetitus principaliter in bona intelligibilia tendit, ad quæ bona corporalia non attingunt. Alio modo quia bona corporalia tamquam infima in rerum ordine, non collectam sed dispersam recipiunt bonitatem, ita scilicet ut hoc habeat hanc bonitatis rationem, puta delectationem, illud aliam, puta corporis salubritatem, et sic de aliis. Unde in nullo eorum appetitus humanus, quia naturaliter in bonum universale tendit, sufficientiam potest invenire. Sed neque in multis eorum, quantumcumque multiplicentur, quia deficiunt ab infinitate universalis boni: unde dicitur Eccl. v, 9: quod *avarus non implebitur pecunia.*

Tertio quia cum homo apprehendat per intellectum bonum universale quod neque loco neque tempore circumscribitur, consequens est quod appetitus humanus bonum desideret secundum convenientiam ad apprehensionem intellectus quod tempore non circumscribatur: unde naturale est homini ut perpetuam stabilitatem desideret: quæ quidem non potest inveniri in corporalibus rebus, quæ sunt corruptioni et multiplici subjecta variationi: unde conveniens est quod in corporalibus bonis appetitus humanus non inveniat sufficientiam quam requirit. Sic igitur in eis non potest esse ultima felicitas hominis.

Sed quia vires sensitivæ corporeas operationes habent, utpote per organa corporea operantes, quæ circa corporalia operantur; consequens est quod neque in operationibus sensitivæ partis ultima hominis felicitas consistat, puta in quibuscumque delectationibus carnis. Habet etiam intellectus humanus aliquam circa corporalia operationem, dum et corpora cognoscit homo per speculativum intellectum, et res corporales dispensat per practicum. Et sic consequens fit quod nec in propria ipsa operatione intellectus speculativi vel practici quæ corporalibus rebus intendit, ultima hominis felicitas, et perfectio possit poni.

Similiter etiam nec operatione intellectus humani qua in se ipsam anima reflectitur, duplici ratione. Primo quidem quia anima secundum se considerata non est beata; alioquin non oporteret eam operari propter beatitudinem acquirendam. Non igitur beatitudinem acquirit ex hoc solo quod sibi intendit. Secundo, quia felicitas est ultima perfectio hominis, ut supra dictum est. Cum autem perfectio animæ in propria operatione ejus consistat, consequens est ut ultima perfectio ejus attendatur secundum optimam ejus operationem, quæ quidem est secundum optimum objectum, nam operationes secundum objecta specificantur. Non autem anima est optimum in quod sua operatio tendere potest. Intelligit enim aliquid esse melius se: unde impossibile est quod ultima beatitudo hominis consistat in operatione qua sibi intendit vel quibuscumque aliis superioribus substantiis, dummodo eis sit aliquid melius, in quod humanæ animæ operatio tendere possit. Tendit autem operatio hominis in quodcumque bonum, quia



universale bonum est quod homo desiderat, cum per intellectum universale bonum apprehendat : unde ad quemcumque gradum se porrigit bonum, aequaliter extenditur operatio intellectus humani, et per consequens voluntatis. Bonum autem summe invenitur in Deo, qui per essentiam suam bonus est, et omnis bonitatis principium : unde consequens est ut ultima hominis perfectio et finale bonum ipsius sit in hoc quod Deo inhæret, secundum illud Psal. LXXI, 27 : *Mihi adhærerere Deo bonum est.*

Hoc etiam manifeste apparet, si quis ad ceterarum rerum participationem inspiciat. Omnes enim singulares homines hujus prædicationis recipiunt veritatem, per hoc quod ipsam essentiam speciei participant. Nullus autem eorum ex hoc dicitur homo quod similitudinem participet alterius hominis, sed ex eo solo quod participat essentiam speciei; ad quam tamen participandam unus inducit alium per viam generationis, pater scilicet filium. Beatitudo autem, sive felicitas, nihil est aliud quam bonum perfectum. Oportet igitur per solam participationem divinæ beatitudinis, quæ est bonitas hominis, omnes beatitudinis participes esse beatos, quamvis unus per alium ad tendendum ab beatitudinem adjuvetur. Unde Augustinus dicit in libro *De vera religione*, c. XLV, § 110, quod « neque nos videndo Angelos <sup>1</sup> beati sumus, sed videndo veritatem, qua <sup>2</sup> ipsos diligimus, et his congratulamur. »

Contingit autem humanam mentem ferri in Deum dupliciter : uno modo per se, alio modo per aliud. Per se quidem, puta cum in se ipso videtur, et per se ipsum amatur. Per aliud autem, cum ex creaturis ipsius, animus elevatur in Deum, secundum illud Rom. 1 : *Invisibilia Dei per ea quæ facta sunt, intellecta conspiciuntur.* Non est autem possibile ut perfecta beatitudo consistat in hoc quod aliquis per aliud in Deum tendit. Primo quidem, quia cum beatitudo significet omnium humanorum actuum finem, non potest vera beatitudo et perfecta consistere in eo quod habet rationem non quidem termini, sed magis mutationis in finem. Quod autem Deus per aliud agnoscatur et ametur, quodam humanæ mentis motu agitur, in quantum per unum in

aliud devenitur. Non est ergo in hoc vera et perfecta beatitudo. Secundo, quia si in hoc quod mens humana Deo inhæreat, ejus beatitudo consistat, consequens est ut perfecta beatitudo perfectam inhæSIONEM ad Deum requirat. Non autem est possibile ut per aliquam creaturam mens humana Deo perfecte inhæreat neque per cognitionem, neque per amorem. Quælibet enim forma creata in infinitum deficiens est a repræsentatione divinæ essentiæ. Sicut ergo non est possibile ut per formam inferioris ordinis cognoscantur ea quæ sunt superioris ordinis, puta per corpus spiritualis substantia, vel per elementum corpus cœleste; ita multo minus possibile est ut per aliquam formam creatam Dei essentia cognoscatur. Sed sicut per considerationem inferiorum corporum superiorum naturas negative percipimus, puta quod non sunt gravia neque levia, et per corporum considerationem negative de Angelis concipimus quod sunt immateriales vel incorporei; ita etiam per creaturas de Deo non cognoscimus quid est, sed potius quid non est. Similiter etiam quæcumque creaturæ bonitas quoddam minimum est respectu bonitatis divinæ, quæ est bonitas infinita : unde bonitates in rebus provenientes a Deo, sunt Dei beneficia, non sublevant mentem usque ad perfectum Dei amorem. Non est igitur possibile quod vera et perfecta beatitudo consistat in hoc quod mens Deo per aliud inhæreat. Tertio, quia secundum rectum ordinem minus nota, per ea quæ sunt magis nota, cognoscuntur; et similiter ea quæ sunt minus bona per ea quæ sunt magis bona amantur. Quia igitur Deus <sup>3</sup> est prima veritas et summa bonitas, secundum se summe cognoscibilis et amabilis est; hoc naturalis ordo habet ut omnia cognoscantur et amentur per ipsum. Si igitur oportet alicujus mentem in Dei cognitionem et amorem per creaturas perducere, hoc ex ejus imperfectione contingit. Nondum ergo consecutus est perfectam beatitudinem, quæ omnem imperfectionem excludit.

Relinquitur ergo quod perfecta beatitudo sit in hoc quod mens Deo per se inhæreat cognoscendo et amando. Et quia regis est subditos disponere et gubernare, illud in homine regere dicitur se-

<sup>1</sup> Parm. : « Angelis. »

<sup>2</sup> « Qua etiam ipsos diligimus angelos. »

<sup>3</sup> Parm. : « Deus qui est. »



cundum quod cetera disponuntur : unde Apostolus monet Rom. vi, 12 : *Non regnet peccatum in vestro mortali corpore*. Quia igitur ad perfectam beatitudinem requiritur ut ipse Deus per se cognoscatur et ametur, ut per eum animus feratur ad alia, vere et perfecte in bonis Deus regnat : unde dicitur Isa. XLIX, 10 : *Miserator eorum reget eos, et ad fontes aquarum potabit eos*, scilicet per ipsum in quibuscumque potissimis bonis reficientur.

Est enim considerandum, quod cum intellectus per aliquam speciem seu formam intelligat omne quod novit, sicut etiam visus exterior per formam lapidis lapidem videt ; non est possibile quod intellectus Deum in sua essentia videat per aliquam creatam speciem seu formam quasi divinam essentiam representantem. Videmus enim quod per speciem inferioris ordinis rerum non potest representari res superioris ordinis quantum ad suam essentiam : unde fit quod per nullam speciem corporalem potest intelligi spiritualis substantia quantum ad suam essentiam. Cum igitur Deus supergrediatur totum creaturæ ordinem, multo magis quam spiritualis substantia excedat ordinem corporalium rerum ; impossibile est quod per aliquam speciem corporalem Deus secundum suam essentiam videatur.

Hoc etiam manifeste apparet, si quis consideret quid sit res aliqua per suam essentiam videre. Non enim essentiam hominis videt qui aliquid eorum quæ essentialiter homini conveniunt, apprehendit, sicut nec cognoscit essentiam hominis qui cognoscit animal absque rationali. Quidquid autem de Deo dicitur, essentialiter convenit ei. Non est autem possibile quod una creata species representet Deum quantum ad omnia quæ de Deo dicuntur. Nam in intellectu creato alia est species per quam apprehendit vitam et sapientiam et justitiam, et omnia alia hujusmodi, quæ sunt Dei essentia. Non est igitur possibile quod intellectus creatus informetur aliqua una specie sic representante divinam essentiam, quod Deus in ea per suam essentiam possit videri. Si autem per multas, deficiet unitas, quæ idem est quod Dei essentia. Non est igitur possibile quod intellectus creatus elevari possit ad videndum Deum in se ipso per suam essentiam aliqua una specie creata, vel etiam pluribus. Relinquitur ergo quod oportet, ad hoc quod

Deus per suam essentiam videatur ab intellectu creato, quod ipsa divina essentia per se ipsam, non per aliam speciem videatur ; et hoc per quamdam unionem intellectus creati ad Deum. Unde Dionysius dicit, I capite *De divinis nomin.*, quod « quando beatissimum consequemur finem, Dei apparitione, adimpleti erimus per quamdam superintellectualem cognitionem ad Deum. » Est autem hoc singulare divinæ essentiæ ut ei possit intellectus uniri absque omni similitudine, quia et ipsa divina essentia est ejus esse, quod nulli alii formæ competit. Unde oportet quod omnis forma sit in intellectu : et ideo si aliqua forma, quæ per se existens non potest esse informativa intellectus, puta substantia Angeli, cognosci debeat in intellectu alterius, oportet quod hoc fiat per aliquam ejus similitudinem intellectum informantem : quod non requiritur in divina essentia, quæ est suum esse. Sic igitur per ipsam Dei visionem mens beata fit in intelligendo unum cum Deo. Oportet igitur intelligens et intellectum esse quodammodo unum : et ideo Deo regnante in sanctis, et ipsi etiam Deo conregnabunt : et ideo ex eorum persona dicitur Apocal. v, 10 : *Fecisti nos Deo nostro regnum et sacerdotes, et regnabimus super terram*. Dicitur enim hoc regnum quo Deus regnat in sanctis et sancti cum Deo, regnum cælorum, secundum illud Matth. iii, 2 : *Pœnitentiam agite appropinquavit enim regnum cælorum* : eo modo loquendi quo esse in cælo Deo attribuitur, non quia corporalibus cælis contineatur, sed ut per hoc designetur Dei eminentia super omnem creaturam, sicut cæli eminent super omnem aliam creaturam corpoream, secundum illud Psal. cxii, 4 : *Excelsus super omnes gentes Dominus, et super cælos gloria ejus*. Sic igitur et beatitudo sanctorum dicitur, non quia eorum remuneratio sit in corporalibus cælis, sed in contemplatione supercœlestis naturæ ; unde et de Angelis dicitur Matth. xviii, 10 : *Angeli eorum in cælis semper vident faciem Patris mei qui in cælis est*. Unde et Augustinus in libro I *De sermone Domini in monte*, c. v, § 15, dicit, exponens illud quod dicitur Matth. vii : *Mercēs vestra copiosa est in cælis* : « Non hic cælos dici puto superiores partes hujus visibilis mundi : non enim mercēs nostra in rebus volubilibus collocanda est : sed in cælis dictum puto in spiritualibus firmamentis, ubi habitat

sempiterna justitia.» Dicitur etiam et hoc finale bonum, quod in Deo consistit vita æterna eo modo loquendi quo actio animæ vivificantis dicitur vita: unde tot modi vitæ distinguuntur, quod sunt genera animæ actionum, inter quas suprema est operatio intellectus; et secundum Philosophum actio intellectus est vita. Et quia actus ex objecto speciem accipit, inde est quod visio Divinitatis vita æterna nominatur, secundum illud Joannis, xvii, 3: *Hæc est vita æterna ut cognoscant te solum Deum verum.* Hoc etiam finale bonum comprehensio nominatur, secundum illud Philip. iii, 12: *Sequor autem, si quo modo comprehendam.* Quod quidem non dicitur eo modo loquendi quo comprehensio inclusionem importat: quod enim ab alio includitur, totum et totaliter ab eo continetur. Non est autem possibile quod intellectus creatus Dei essentiam totaliter videat, ita scilicet quod attingat ad completum et perfectum modum visionis divinæ, ut scilicet Deum videat quantum visibilis est: est enim Deus visibilis secundum suæ veritatis claritatem, quæ infinita est, unde infinite visibilis est; quod convenire intellectui creato non potest, cujus est finita virtus in intelligendo. Solus igitur Deus per infinitam virtutem sui intellectus se infinite intelligens, totaliter se intelligendo comprehendit se ipsum. Repromittitur autem sanctis comprehensio prout comprehensionis nomen importat quamdam tentionem. Cum enim aliquis insequitur aliquem, dicitur comprehendere eum, quando potuerit eum manu tenere. Sic igitur *quamdiu sumus in corpore*, ut dicitur II Cor. v, 6, *peregrinamur a Domino; per fidem enim ambulamus et non per speciem*; et ita in eum tendimus ut in aliquid distans. Sed quando per speciem videbimus, præsentialem eum in nobismetipsis tenebimus: unde Cantic. iii, 4, sponsa quærens quem diligit anima sua, tandem vero eum inveniens dicit: *Tenui eum, nec dimittam.* Habet autem prædictum finale bonum perpetuum et plenum gaudium: unde Dominus dicit Joan. xvi, 24: *Petite et accipietis, ut gaudium vestrum plenum sit.* Non potest autem esse plenum gaudium de aliqua creatura, sed de solo Deo, in quo est tota plenitudo bonitatis: unde et Dominus dicit servo fideli, Matth. xxv, 21: *Intra in gaudium domini tui*, ut scilicet de domino tuo gaudeas, secundum

illud Job xxii, 26: *Super Omnipotentem deliciis afflues.* Et quia Deus præcipue de se ipso gaudet, dicitur servus fidelis intrare in gaudium domini sui, scilicet in quantum intrat ad gaudium quo dominus ejus gaudet, secundum quod alibi Dominus discipulis, Luc. xxii, 29, promittit dicens: *Ego dispono vobis, sicut disposuit mihi Pater meus regnum, ut edatis et bibatis super mensam meam in regno meo*: non quod in illo finali bono corporalibus cibis sancti utantur, incorruptibiles jam effecti; sed per mensam significatur refectio gaudii quod habet Deus de se ipso, et sancti de eo. Oportet ergo plenitudinem gaudii attendi non solum secundum rem de qua gaudetur, sed secundum dispositionem gaudentis: ut scilicet rem de qua gaudet, præsentem habeat, et totus affectus gaudentis per amorem feratur in gaudii causam. Jam autem ostensum est, quod per visionem divinæ essentiæ mens creata præsentialem tenet Deum: ipsa etiam visio totaliter effectum accendit ad divinum amorem. Si enim unumquodque est amabile in quantum est pulchrum et bonum, secundum Dionysium *De divinis nominibus* cap. iv, impossibile est quod Deus, qui est ipsa essentia pulchritudinis et bonitatis, absque amore videatur. Et ideo ex perfecta ejus visione sequitur perfectus amor: unde et Gregorius dicit *Super Ezech*: « Amoris ignis qui hic ardere inchoat, cum ipsum quam amat viderit, in amore ipsius amplius ignescit. » Tanto autem majus est gaudium de aliquo præsentialem habito, quanto magis amatur: unde sequitur quod illud gaudium sit plenum non tantum ex parte rei de qua gaudetur, sed etiam ex parte gaudentis. Et hoc gaudium est humanæ beatitudinis consummativum: unde et Augustinus dicit X *Confessionum*, c. xxiii, § 33, quod « beatitudo est gaudium de veritate. »

Est autem ulterius considerandum, quod quia Deus est ipsa essentia bonitatis, per consequens ipse bonum est omnis boni: unde eo viso omne bonum videtur, secundum quod Dominus dicit Moysi, Exod. xxxiii, 19: *Ego ostendam tibi omne bonum.* Per consequens igitur eo habito omne bonum habetur, secundum illud Sapient. vii, 11: *Venerunt mihi omnia bona pariter cum illa.* Sic igitur in illo finali bono, videndo Deum, habebimus omnium bonorum plenam suffi-

cientiam : unde et fidei servo repromittit Dominus, Matth. xxiv, 47 : quod *super omnia bona sua constituet eum.*

Quia vero malum bono opponitur, necesse est ut ad præsentiam omnis boni malum universaliter excludatur. Non est enim participatio justitiæ cum iniquitate, nec *societas luci ad tenebras*, ut dicitur II Corinth. vi, 14. Sic igitur in illo finali bono non solum aderit perfecta sufficientia habentibus omne bonum, sed etiam aderit plena quies et securitas per immunitatem omnis mali, secundum illud Proverb. i, 33 : *Qui me audiet, absque terrore requiescet, et abundantia perfruetur, terrore malorum sublato.*

Ex hoc autem ulterius sequitur quod sit ibi futura omnimoda pax. Non enim impeditur pax hominis nisi vel per interiorem desideriorum inquietudinem, dum desiderat habere quæ nondum habet, vel per aliquorum malorum molestiam, quæ vel patitur vel pati timet. Ibi autem nihil timetur : cessabit enim inquietudo desiderii propter plenitudinem omnis boni : cessabit etiam omnis molestia exterior per absentiam omnis mali : unde relinquitur quod ibi sit perfecta pacis tranquillitas. Hinc est quod dicitur Isa. xxxii, 18 : *Sedebit populus meus in pulchritudine pacis*, per quod pacis perfectio designatur : et ad ostendendum causam pacis subditur : *Et in tabernaculis fiduciæ*, quæ scilicet erit subtracto timore malorum : *in requie opulenta*, quæ pertinet ad affluentiam omnis boni. Illius autem finalis boni perfectio in perpetuum durabit. Non enim poterit deficere per defectum honorum quibus homo fructur, quia sunt æterna et incorruptibilia : unde dicitur Isaia, xxxiii, 20 : *Oculi tui videbunt Jerusalem, civitatem opulentam, tabernaculum quod nequaquam transferri poterit* : et postmodum subditur causa : *quia solummodo ibi erit magnificus Dominus Deus noster.* Tota enim illius status perfectio erit in fruitione divinæ æternitatis. Consimiliter etiam non poterit ille status deficere per corruptionem ibidem existentium : quia vel sunt naturaliter incorruptibiles, sicut Angeli, vel in incorruptionem transferentur, sicut homines : *oportet enim corruptibile hoc induere incorruptionem*, ut dicitur I Corinth. xv, 53 : Unde et Apocal. iii, 12, dicitur : *Qui vicerit, faciam illum columnam in*

*templo Dei mei, et foras non egredietur amplius.* Nec etiam poterit ille status deficere per hoc quod voluntas hominis fastidiendo se avertat quia quanto Deus, qui est bonitatis essentia, magis videtur, tanto necesse est ut magis ametur : unde et magis ejus fruitio desiderabitur, secundum illud Eccli. xxiv, 29 : *Qui edunt me, adhuc esurient ; et qui bibunt me, adhuc sitient.* Propter quod et de Angelis Deum videntibus dicitur I Petri i, 12 : *In quem desiderant Angeli prospicere.* Similiter etiam non deficient ille status per hostis alicujus impugnationem, quia cessabit ibi omnis mali molestia, secundum illud Isa. xxxv, 9 : *Non erit ibi leo, idest diabolus impugnans, et mala bestia, idest malus homo, non ascendet per eam, nec invenietur ibi* : unde et Dominus dicit Joan. x, 28, de ovibus suis, quod *non peribunt in æternum*, et quod *non rapiet eas quisquam de manu sua.* Sed nec finiri poterit ille status per hoc quod a Deo aliqui inde excludantur. Non enim aliquis ab illo statu repellatur propter culpam, quæ omnino non erit, ubi deerit omne malum : unde dicitur Isa. lx, 21 : *Populus tuus omnes justi* : neque etiam propter promotionem ad melius bonum, sicut in hoc mundo Deus interdum etiam justis spirituales consolationes subtrahit, et alia sua beneficia, ut avidius quærant, et suum defectum recognoscant : quia status ille non est emendationis aut profectus, sed perfectionis finalis : et ideo Dominus dicit Joan. vi, 37 : *Eum qui venit ad me, non ejiciam foras.* Habebit igitur status ille omnium prædictorem bonorum perpetuitatem, secundum illud Psalm. v, 12 : *In æternum exultabunt, et habitabis in eis.* Est igitur prædictum regnum beatitudo perfecta, utpote immutabilem omnis boni sufficientiam habens. Et quia beatitudo naturaliter desideratur ab hominibus, consequens est quod regnum Dei ab omnibus desideretur.

## CAPUT XI.

*Quod regnum obtineri est possibile.*

Oportet autem ulterius ostendere quod homo ad illud regnum pervenire possit : alioquin frustra speraretur et peteretur<sup>1</sup>. Primo autem apparet hoc homini<sup>2</sup> esse

<sup>1</sup> Parm : « speraret et peteretur. »

<sup>2</sup> Parm. omittit : « homini. »

possibile ex promissione divina : dicit enim Dominus, Luc. XII, 32 : *Nolite timere pusillus grex, quia complacuit Patri vestro dare vobis regnum.* Est autem divinum beneplacitum efficax ad implendum omne quod disponit, secundum illud

Isa. XLVI, 10 : *Consilium meum stabit, et omnis voluntas mea fiet. Voluntati enim ejus quis resistit?* ut dicitur ad Roman. IX, 19. Secundo ostenditur hoc esse possibile ex evidenti exemplo; multo enim difficilius fuit <sup>1</sup>.

<sup>1</sup> Parm. omittit : « multo enim difficilius fuit. »

*Hucusque compilavit S. Thomas de Aquino brevem compilationem Theologiæ.*

---

# OPUSCULUM II.

## DE RATIONIBUS FIDEI <sup>1</sup>

AD CANTOREM ANTIOCHENUM

(EDIT. ROM. III.)

### CAPUT I.

*Quæ sit auctoris intentio <sup>2</sup>.*

Beatus Petrus Apostolus, qui promissionem accepit a Domino ut super ejus confessione fundaretur Ecclesia, contra quam portæ inferorum prævalere non possent; ut contra hujusmodi portas inferorum, Ecclesiæ sibi commissæ fides inviolata persisteret, fideles Christi alloquitur dicens, I Pet. III, 13 : *Dominum Christum sanctificate in cordibus vestris, scilicet per fidei firmitatem : quo fundamento in corde collocato, contra omnes impugnationes, aut irrisiones infidelium tuti esse poterimus : unde etiam subdit : Parati ad satisfactionem omni poscenti vos rationem de ea quæ in vobis est spe.* Fides autem christiana principaliter consistit in confessione sanctæ Trinitatis, et specialiter gloriatur in cruce Domini nostri Jesu Christi. Nam *verbum crucis*, ut Paulus dicit I Corinth. I, 18, *etsi peremptibus stultitia sit, his tamen qui salvi fiunt, idest nobis, virtus Dei est.* Spes etiam nostra in duobus consistit : scilicet in eo quod expectatur post mortem, et in auxilio Dei, quo in hac vita juvamus ad futuram beatitudinem per opera liberi arbitrii promerendam. Hæc ergo sunt quæ, ut tu asseris, ab infidelibus impugnantur et irridentur. Irrident enim Saraceni, ut tu dicis quod Christum Dei Filium dicimus, cum Deus uxorem non habeat; et reputant nos insanos quod tres personas confitemur in Deo, etiam per hoc existimantes non tres deos profiteri. Irrident etiam quod Christum Dei

Filium pro salute humani generis dicimus crucifixum : quia si Deus omnipotens potuit absque Filii sui passione genus humanum salvare, potuit sic instituere hominem ut peccare non posset. Improperant etiam Christianis quod in altari comedunt Deum suum, et quod corpus Christi, si esset ita magnum sicut mons, jam deberet esse consumptum. Circa statum vero animarum post mortem asseris errare Græcos et Armenos, dicentes quod animæ post mortem usque ad diem judicii nec puniuntur, nec præmiantur, sed sunt quasi in sequestro, quia nec pœnam nec præmium debent habere sine corpore. Et in sui erroris assertionem inducunt quod Dominus in Evangelio dicit (Joan. XIV, 2) : *In domo Patris mei mansiones multæ sunt.* Circa meritum vero quod ex libero arbitrio dependet, asseris tam Saracenos quam nationes alias necessitatem actibus humanis imponere ex præscientia vel ordinatione divina, dicentes quod homo non potest mori, nec etiam peccare, nisi sicut Deus ordinavit de homine; et quod quælibet persona suam eventum habet scriptum in fronte. Super quibus petis rationes morales et philosophicas, quas Saraceni recipiunt. Frustra enim videtur auctoritates inducere contra eos qui auctoritates non recipiunt. Tuæ igitur petitioni, quæ ex pio desiderio videtur procedere, ut sis, juxta apostolicam doctrinam, paratus *ad satisfactionem omni poscenti te rationem*, satisfacere volens, aliqua facilia, secundum quod materia patietur, super præmissis tibi exponam, quæ tamen alibi diffusius pertractavi.

<sup>1</sup> Parm. : « Declaratio quorundam articulo- rum contra Græcos, Armenos, et Saracenos. »

<sup>2</sup> Parm. omittit hunc titulum.



## CAPUT II.

*Qualiter sit disputandum contra infideles.*

De hoc tamen primo admonere te volo quod in disputationibus contra infideles de articulis fidei, non ad hoc conari debes, ut fidem rationibus necessariis probes. Hoc enim sublimitati fidei derogaret, cujus veritas non solum humanas mentes, sed etiam Angelorum excedit; a nobis autem creduntur quasi ab ipso Deo revelata. Quia tamen quod a summa veritate procedit, falsum esse non potest, nec necessaria ratione impugnari valet quod falsum non est, fides nostra necessariis rationibus sicut probari non potest, quia humanam mentem excedit, ita improbari necessaria ratione non potest propter sui veritatem. Ad hoc igitur debet tendere christiani disputatoris intentio in articulis fidei, non ut fidem probet, sed ut fidem defendat: unde et beatus Petrus non dixit: *Parati semper ad probationem, sed ad satisfactionem*, ut scilicet rationabiliter ostendatur non esse falsum quod fides catholica confitetur.

## CAPUT III.

*Qualiter in divinis sit accipienda generatio.*

Primum igitur considerandum est derisibilem esse irrisionem qua nos irrident quod ponimus Christum Filium Dei vivi, quasi Deus uxorem habuerit. Cum enim carnales sint, non possunt nisi ea quæ sunt carnis et sanguinis, cogitare. Quilibet enim sapiens considerare potest quod non est idem generationis modus in omnibus rebus; sed in unaquaque re invenitur generatio secundum proprietatem suæ naturæ. In animalibus quidem per maris et feminæ commixtionem; in plantis vero per pullulationem, seu generationem, atque in aliis aliter. Deus autem non est carnalis naturæ, ut feminam requirat, cui commisceatur ad prolis generationem; sed est spiritualis naturæ, sive intellectualis, immo magis supra omnem intellectum<sup>1</sup>. Est ergo in eo

accipienda generatio secundum quod convenit intellectuali naturæ. Et quamvis intellectus noster ab intellectu divino deficiat, non possumus tamen aliter loqui de intellectu divino nisi secundum similitudinem eorum quæ in intellectu nostro invenimus. Est autem intellectus noster aliquando quidem in potentia intelligens, aliquando in actu. Quandoque autem actu intelligit, quoddam intelligibile format, quod est quædam proles ipsius, unde et mentis conceptus nominatur. Et hoc quidem est quod voce exteriori significatur: unde sicut vox significans, verbum exterius dicitur, ita interior mentis conceptus verbo exteriori significatum, dicitur verbum intellectus, seu mentis. Hic autem mentis nostræ conceptus non est ipsa mentis nostræ essentia, sed est quoddam accidens ei, quia nec ipsum intelligere nostrum est ipsum esse intellectus, alioquin numquam intellectus esset quin actu intelligeret. Verbum igitur nostri intellectus secundum quamdam similitudinem dici potest vel conceptus vel proles; et præcipue cum intellectus se ipsum intelligit, in quantum scilicet est quædam similitudo intellectus procedens ab intellectuali ejus virtute; sicut et filius habet similitudinem patris, procedens ab ejus generativa virtute. Non tamen proprie verbum nostri intellectus potest dici proles vel filius, quia non est ejusdem naturæ cujus est intellectus noster. Non autem omne quod procedit ab aliquo, etiamsi sit ei simile, dicitur filius: alioquin imago sui, quam aliquis pingit, proprie filius diceretur. Sed ad hoc quod sit filius, requiritur quod procedens ab altero similitudinem habeat ejus a quo procedit, et sit ejusdem naturæ cum eo. Quia vero in Deo non est aliud intelligere quam suum esse, consequenter neque verbum quod in intellectu ejus concipitur, est aliquod accidens aut aliquid alienum ab ejus natura; sed ex hoc ipso quod verbum est, habet rationem procedentis ab altero, et ut similitudo ejus cujus est verbum: hoc enim in verbo nostro reperitur.

Sed istud verbum Dei habet ulterius quod non sit aliquod accidens, neque aliqua pars Dei, qui est simplex, neque aliquid alienum a divina natura, sed

<sup>1</sup> Parm.: « super omnem intellectualem. »

quoddam completum subsistens in natura divina habens rationem ab altero procedentis : sine hoc enim verbum intelligi non potest. Hoc autem secundum humanæ locutionis consuetudinem nominatur filius quod procedit ab alio in similitudinem ejus, subsistens in eadem natura cum ipso. Secundum igitur quod divina verbis humanis nominari possunt, verbum intellectus divini filium Dei nominamus; Deum vero, cujus est verbum, nominamus Patrem; processum verbi dicimus esse generationem filii immaterialem, non autem carnalem, sicut carnales homines suspicantur.

Est autem aliud in quo excedit prædicta filii Dei generatio omnem generationem humanam; sive materialem, secundum quam homo ex nomine nascitur; sive intelligibilem, secundum quam verbum accipitur in mente humana. In utraque enim illud quod per generationem procedit, invenitur posterius tempore eo a quo procedit. Pater enim non generat statim a principio sui esse, sed oportet quod de imperfecto ad statum perfectum veniat, in quo generare possit. Nec iterum statim ut generationi operam dat, filius nascitur; quia carnalis generatio in quadam mutatione consistit et successione : secundum intellectum etiam non statim a principio homo est aptus ad intelligibiles conceptus formandos, sed postquam ad statum perfectionis venit : unde non semper actu intelligit, sed potentia est intelligens tantum, et post fit intelligens actu, et iterum desinit actu intelligere, et remanet intelligens in potentia vel habitu tantum. Sic ergo verbum homine posterius invenitur tempore, et desinit aliquando esse antequam homo. Impossibile est autem ista duo Deo convenire, in quo neque imperfectio neque mutatio locum habet, neque etiam exitus de potentia ad actum, cum sit actus purus et primus. Verbum ergo Dei cœternum est ipsi Deo.

Est autem et aliud in quo verbum nostrum differt a divino. Intellectus enim noster non simul intelligit omnia, neque unico actu, sed pluribus et diversis; et ideo verba intellectus nostri sunt multa; sed Deus omnia simul intelligit, et unico actu, quia ejus intelligere non potest esse nisi unum, cum sit suum esse : unde sequitur quod in Deo sit unum verbum tantum.

Ulterius est consideranda alia diffe-

rentia : quod scilicet verbum intellectus nostri non adæquat intellectus virtutem; quia cum aliquid mente concipimus, adhuc possumus alia multa concipere : unde verbum nostri intellectus imperfectum est, et in eo potest compositio accidere, dum ex multis imperfectis fit unum verbum perfectius, sicut cum intellectus concipit aliquam enuntiationem, seu definitionem alicujus rei. Sed verbum divinum adæquat virtutem Dei, quia per suam essentiam se ipsum intelligit et omnia alia : unde quanta est essentia, tantum est verbum quod concipit per essentiam suam, se et omnia alia intelligendo. Est ergo perfectum simplex, et æquale Deo : et hoc verbum Dei filium nominamus ratione jam dicta, quod ejusdem naturæ cum patre, et patri cœternum, unigenitum, et perfectum confitemur.

#### CAPUT IV.

##### *Qualiter in divinis sit accipienda processio Spiritus sancti a Patre et Filio.*

Est autem considerandum ulterius, quod omnem cognitionem sequitur aliqua appetitiva operatio. Inter omnes autem appetitivas operationes invenitur amor esse principium : quo sublato, neque gaudium erit, si adipiscitur aliquis quod non amat; neque tristitia, si impediatur ab eo quod amat; si videlicet amor tollatur; et per consequens tolluntur omnes appetitivæ operationes, quæ quodammodo ad tristitiam et gaudium referuntur. Cum igitur in Deo sit perfecta cognitio, oportet etiam in eo ponere perfectum amorem : in quo quidem processus secundum appetitivam operationem exprimitur, sicut in verbo per operationem intellectus.

Est autem attendenda differentia quædam inter intellectualem operationem et appetitivam : nam operatio intellectus, et omnis omnino cognitiva operatio completur per hoc quod cognoscibilia in cognoscente quodammodo existunt, scilicet sensibilia in sensu, et intelligibilia in intellectu; operatio autem appetitiva completur secundum quemdam ordinem vel motum appetentis ad res appetitui objectas. Ea vero quæ habent occultum principium sui motus, spiritus nomen accipiunt : sic enim venti spiritus di-

cuntur, quia eorum principium non apparet. Respiratio etiam arteriarum, qui est motus ab intrinseco principio procedens, spiritus nomen accepit: unde convenienter, secundum quod divina humanis significari possunt, ipse divinus amor procedens spiritus nomen accepit.

Sed in nobis amor ex duplici causa procedit: quandoque quidem ex corporea et materiali natura: qui est amor immundus, quia per eum puritas mentis turbatur; quandoque autem ex ipsa proprietate naturæ spiritualis, sicut cum amamus intelligibilia bona et quæ rationi conveniunt; et hic est amor purus. In Deo autem amor materialis locum non habet. Convenienter igitur amorem ipsius non solum spiritum, sed spiritum sanctum vocamus; ut per hoc quod dicitur sanctus, ejus puritas exprimat.

Manifestum est autem quod nihil amare possumus intelligibili et sancto amore nisi quod actu per intellectum concipimus. Conceptio autem intellectus est verbum: unde oportet quod amor a verbo oriatur. Verbum autem Dei dicimus esse filium. Ex quo patet Spiritum sanctum esse a Filio. Sicut autem divinum intelligere est ejus esse, ita etiam amare Dei est ejus esse: et sicut Deus semper actu intelligit, ita etiam se amat, et omnia amat suam bonitatem amando. Sicut ergo Dei Filius, qui est verbum Dei, subsistens est in natura divina, et coæternus Patri, atque perfectus et unicus; ita etiam hæc omnia de Spiritu sancto confiteri oportet. Ex hoc autem colligere possumus quod cum omne quod subsistit in natura intelligente, apud nos persona dicatur, apud Græcos autem hypostasis; necesse est dicere, quod verbum Dei, quod Filium nominamus, sit quædam hypostasis seu persona; et idem de Spiritu sancto dici oportet. Nulli autem est dubium quin Deus, a quo verbum et amor procedit, sit res subsistens, ut etiam dici possit hypostasis vel persona. Et per hunc modum convenienter ponimus in divinis tres personas; scilicet personam Patris, personam Filii et personam Spiritus sancti. Has autem tres personas vel hypostases non dicimus esse per essentiam diversas: quia, ut dictum est, sicut intelligere et amare Dei est ejus esse, ita verbum et amor ejus sunt ipsa essentia Dei. Quicquid autem de Deo absolute dicitur, non est aliud quam Dei essentia.

Non enim est Deus magnus vel potens vel bonus accidentaliter, sed per essentiam suam: et tres personas vel hypostases non dicimus in divinis distinctas per aliquid absolutum, sed per solas relationes, quæ ex processione verbi et amoris proveniunt. Et quia processionem verbi nominamus generationem, ex generatione autem proveniunt relationes paternitatis et filiationis; personam Filii a persona Patris distinguere dicimus solummodo paternitate et filiatione: omnia communiter et indifferenter de utroque prædicantes. Sicut enim dicimus Patrem verum Deum, omnipotentem, æternum, et quæcumque similiter dicuntur, sic et Filium: et eadem ratio est de Spiritu sancto. Quia ergo Pater et Filius et Spiritus sanctus non distinguuntur in natura Divinitatis, sed in relationibus solum; convenienter tres personas non dicimus tres deos, sed unum verum Deum et perfectum profiteamur. In hominibus autem ideo tres personæ tres homines dicuntur, et non unus homo, quia natura humanitatis, quæ communis est, differenter convenit eis secundum materialem divisionem, quæ omnino in Deo locum non habet. Unde in tribus sunt tres humanitates numero differentes, et sola ratio humanitatis in eis communis invenitur. In tribus autem divinis personis non tres divinitates numero differentes, sed unam simplicem Deitatem necesse est esse; cum non sit alia essentia verbi et amoris in Deo ab essentia Dei; et sic non tres deos, sed unum Deum confitemur, propter unam simplicem Deitatem in tribus personis.

## CAPUT V.

### *Quæ fuit causa incarnationis Filii Dei.*

Ex simili autem cæcitate irrident christianam fidem, quia Christum confitemur Dei Filium mortuum esse, tanti mysterii profunditatem non intelligentes. Et ne mors Filii Dei perverse intelligatur, prius aliquid de Filii Dei incarnatione dicere oportet. Non enim dicimus Filium Dei morti subjectum fuisse secundum naturam divinam, in qua est æqualis Patri, quæ est fontalis omnium vita; sed secundum naturam nostram, quam assumpsit in unitatem personæ.

Ad incarnationis ergo divinæ myste-

rium aliqualiter considerandum, oportet advertere quod omne per intellectum agens, per conceptionem sui intellectus quam dicimus verbum, operatur, ut patet in ædificatore, et quolibet artifice, qui secundum formam quam mente concepit, exterius operatur. Quia ergo Dei Filius est ipsum Dei verbum, consequens est ut Deus omnia per Filium fecerit. Unaquæque autem res per eadem fit et reparatur: si enim domus collapsa sit, per formam artis reparatur, per quam a principio condita fuit. Inter creaturas autem a Deo conditas per verbum suum, primum gradum tenet creatura rationalis, intantum quod omnes aliæ creaturæ ei subserviunt, et ad ipsam ordinari videntur; et hoc rationabiliter, quia rationalis creatura dominium habet sui actus per arbitrii libertatem, ceteræ vero creaturæ non ex iudicio libero agunt, sed quadam vi naturæ moventur ad agendum. Ubique autem quod est liberum, præminet ei quod est servum, et servi ad liberorum famulatum ordinantur, et a liberis gubernantur. Lapsus ergo rationalis creaturæ secundum veram æstimationem magis æstimandum est quam cujuscumque irrationalis creaturæ defectus. Nec est dubium quin apud Dei iudicium res secundum veram æstimationem judicentur. Hoc ergo conveniens est divinæ sapientiæ ut præcipue lapsum rationalis creaturæ repareret, magis etiam quam si eolum collaberetur, vel quicquid aliud in rebus corporeis posset accidere. Est autem duplex creatura rationalis seu intellectualis: una a corpore separata, quam Angelum dicimus; alia corpori juncta, quæ est anima hominis. In utraque autem lapsus accidere potuit propter arbitrii libertatem. Dico autem creaturæ rationalis lapsum non ut ab esse deficiat, sed secundum quod deficit a rectitudine voluntatis. Lapsus enim seu defectus præcipue attenditur secundum id quo operatur; sicut artificem errare dicimus, si in arte deficiat qua debet operari; et rem naturalem deficientem dicimus et collapsam, si corrumpatur virtus ejus naturalis per quam agit; puta si in planta vis germinandi deficiat, aut in terra vis fructificandi. Id autem

per quod operatur rationalis creatura, est voluntas, in qua consistit libertas arbitrii. Lapsus ergo rationalis creaturæ est secundum quod deficit a rectitudine voluntatis: quod fit per peccatum. Defectum ergo peccati, qui nihil est aliud quem perversitas voluntatis, præcipue Deo convenit remove; et hoc per verbum suum, quo universam condidit creaturam. Et<sup>1</sup> Angelorum quidem peccatum remedium habere non potuit, quia secundum immutabilitatem suæ naturæ impœnitibiles<sup>2</sup> sunt ab eo in quod semel convertuntur. Homines autem secundum conditionem suæ naturæ habent mutabilem voluntatem, ut non solum diverso possint eligere vel bona<sup>3</sup> vel mala; sed etiam postquam unum elegerunt, possunt ab illo resipiscere, et ad aliud converti: et hæc volubilitas voluntatis in homine manet, quamdiu corpori unitur varietati subjecto. Cum autem anima a corpore fuerit separata, eandem immutabilitatem voluntatis habebit quam naturaliter Angelus habet: unde et post mortem anima impœnitibilis est, nec potest de bono ad malum converti, nec de malo ad bonum. Sic ergo ad Dei bonitatem pertinuit ut per filium suum naturam humanam collapsam repareret. Modus autem reparationis talis esse debuit quod et naturæ reparandæ conveniret, et morbo. Naturæ dico reparandæ: quia cum homo sit rationalis naturæ, libero arbitrio præditus, non ex necessitate exterioris virtutis, sed per<sup>4</sup> propriam voluntatem ad statum rectitudinis revocandus fuit. Morbo etiam, quia cum morbus in perversitate voluntatis consisteret, oportuit<sup>5</sup> reparationem fieri per hoc quod voluntas ad rectitudinem reduceretur. Voluntatis autem humane rectitudo consistit in ordinatione amoris, qui est principalis affectio. Ordinatus autem amor est ut Deum super omnia diligamus quasi summum bonum, et ut in ipsum referamus omnia quæ amamus tamquam in ultimum finem, et ut in aliis amandis servetur debitus ordo, ut scilicet corporalia spiritualibus postponamus. Ad provocandum autem nostrum amorem in Deum nihil magis valere potuit quam quod verbum Dei, per quod

<sup>1</sup> Parm. : « angelorum autem. »

<sup>2</sup> Al. : « impœnitibilem. »

<sup>3</sup> Al. deest : « vel bona. »

<sup>4</sup> Parm. : « secundum. »

<sup>5</sup> Parm. omittit : « reparationem fieri, per hoc. » Al. : « morbus perversitate voluntatis consideret. »

omnia facta sunt, ad reparationem naturæ nostræ eam assumeret, ut idem esset et Deus et homo. Primo quidem, quia ex hoc maxime demonstratur quantum Deus diligat hominem quod pro ejus salute homo fieri voluit; nec est aliquid quod ad amandum magis provocet quam quod aliquis se cognoscat amari. Deinde quod homo habens intellectum et affectum ad corporalia depressum, ad ea quæ supra se sunt, de facili elevari non poterat. Facile autem est homini cuilibet ut alium hominem diligat et cognoscat; sed considerare divinam altitudinem, et in eam ferri per debitum amoris affectum, non est omnium hominum, sed eorum qui per Dei auxilium cum magno studio et labore a corporalibus ad spiritualia sublevantur. Ut ergo omnibus pateret via ad Deum, voluit Deus homo fieri, ut etiam parvuli Deum cognoscere et amare possent quasi similem sibi; et sic per id quod capere possunt, paulatim proficerent ad perfectum. Per hoc etiam quod Deus factus est homo, spes datur homini ut pervenire possit ad perfectæ beatitudinis participationem, quam solus Deus naturaliter habet. Homo enim suam infirmitatem cognoscens, si ei promitteretur quod ad beatitudinem perveniret, cujus vix Angeli sunt capaces, quæ scilicet in visione Dei et fruitione consistit, vix hoc sperare posset, nisi ex alia parte sibi dignitas naturæ humanæ ostenderetur, quam tanti æstimat Deus, ut pro ejus salute fieri homo voluerit. Et sic per hoc quod Deus factus est homo, spem nobis dedit ut etiam homo posset pervenire ad hoc quod uniretur Deo per beatam fruitionem. Valet etiam homini suæ cognitio dignitatis ex hoc quod Deus humanam naturam assumpsit ad hoc quod affectum suum nulli creaturæ subjiceret: neque dæmones aut quascumque creaturas colendo per idololatriam; neque corporalibus creaturis se subdendo per inordinatum affectum. Indignum enim est ut cum homo sit tantæ dignitatis secundum æstimationem divinam, et ita Deo propinquus sit ut Deus homo fieri voluerit, quod homo rebus inferioribus Deo inordinate se subjiciat <sup>1</sup>.

## CAPUT VI.

*Qualiter debet intelligi hoc quod dicitur:  
Deus factus est homo.*

Cum autem dicimus, Deum hominem fieri, nemo existimet hoc sic accipiendum esse ut Deus convertatur in hominem, sicut aer fit ignis cum in ignem convertitur. Immutabilis est enim Dei natura: corpora autem sunt quæ invicem convertuntur. Spiritualis autem natura in naturam corpoream non convertitur, sed potest ei aliquid uniri propter efficaciam suæ virtutis, sicut anima unitur corpori, et licet humana natura ex anima constet et corpore, anima autem non corporeæ, sed spiritualis naturæ sit, omnis tamen creatura spiritualis deficit a simplicitate divina multo amplius quam corporea creatura a simplicitate spiritualis naturæ. Sicut ergo spiritualis natura unitur corpori per efficaciam suæ virtutis, ita et Deus potest uniri tam spirituali quam corporali: et secundum hunc modum dicimus Deum naturæ humanæ fuisse unitum.

Est autem attendendum, quod unumquodque maxime videtur esse illud quod invenitur in eo esse principium; omnia autem alia videntur ei quod est principium, adhærere, et ab eo quodammodo assumi, in quantum id quod est principium, aliis utitur secundum suam dispositionem: quod quidem patet non solum in ordinatione civili, in qua principes civitatis quasi tota civitas esse videntur, et aliis utuntur secundum suam dispositionem, ut sibi adhærentibus membris; sed etiam in adunatione naturali. Licet enim homo naturaliter constet ex anima et corpore, principalius tamen videtur homo esse anima quam corpus, quod animæ adhæret, et quo anima utitur ad operationes animæ convenientes. Sic ergo et in unione Dei ad creaturam non trahitur Deitas ad humanam naturam, sed humana natura a Deo assumitur, non quidem ut convertatur in Deum, sed ut Deo adhæreat: et sunt quodammodo anima et corpus sic assumpta, anima et corpus ipsius Dei, sicut partes corporis assumptæ ab anima sunt quodammodo ipsius animæ membra.

Est tamen in hoc aliqua differentia attendenda. Nam anima licet sit perfec-

<sup>1</sup> Cod. S. Gen.: « subdat. »



tior corpore, non tamen totam perfectionem in se possidet humanæ naturæ: unde corpus sic ei advenit ut ex corpore et anima una compleatur humana natura, cujus quædam partes sunt anima et corpus. Sed Dens ita est in natura sua perfectus ut plenitudini naturæ ipsius nihil adjici possit: unde cum natura divina non potest sic uniri alteri naturæ ut ex utraque una constituatur natura communis: sic enim natura divina pars esset illius naturæ communis; quod repugnat perfectioni divinæ naturæ, nam omnis pars imperfecta est. Deus ergo Dei verbum sic humanam naturam assumpsit, quæ ex anima constat et corpore, ut tamen nec altera transiret in alteram, nec ex duabus una natura conflaretur; sed post unionem duæ naturæ distinctæ remanerent quantum ad proprietates naturarum.

Est autem rursus considerandum, quod cum spiritualis natura corporea uniat per spiritualem virtutem; quanto fuerit major virtus spiritualis naturæ, tanto perfectius et firmiter sibi naturam inferiorem assumit. Est autem virtus Dei infinita, cui omnis creatura subicitur, et unaquaque utitur pro suo arbitrio: non autem eis uteretur, nisi aliquo modo per efficaciam suæ virtutis uniretur eis. Tanto autem alicui naturæ perfectius unitur, quanto in ea magis suam virtutem exercet. Inter omnes siquidem creaturas virtutem suam exercet quantum ad hoc quod omnibus esse largitur, et ad proprias operationes movet; et secundum hoc quodam communi modo in omnibus rebus dicitur esse. Sed specialiori quodam modo virtutem suam exercet in mentibus sanctis, quas non solum in esse conservat et ad operandum movet, sicut alias creaturas, sed etiam eas convertit ad se cognoscendum et amandum: unde etiam sic in sanctis mentibus specialiter dicitur habitare, et mentes sanctæ Deo plenæ esse dicuntur. Quia ergo secundum quantitatem virtutis quam Dens exercet in creaturam, magis et minus dicitur creaturæ uniri; patet quod cum efficacia divinæ virtutis humano intellectu comprehendi non possit, sublimiori modo Deus potest creaturæ uniri quam intellectus humanus capere possit. Quodam ergo incomprehensibili et ineffabili modo dicimus Deum unitum esse humanæ naturæ in Christo non solum per inhabitationem, sicut in aliis Sanctis,

sed quodam modo singulari, ita quod humana natura esset quædam Filii Dei natura; ut Filius Dei, qui ab æterno habet naturam divinam a Patre, ex tempore per assumptionem mirabilem habeat humanam naturam ex genere nostro; et sic quælibet partes humanæ naturæ ipsius Filii Dei, dici possunt Deus: et quicquid agit vel patitur quælibet pars naturæ humanæ in Filio Dei, potest attribui unigenito Dei verbo. Unde non inconvenienter dicimus animam et corpus esse Filii Dei, sed et oculos et manus; et quod Filius Dei corporaliter videat per oculi visionem, et audit per auris auditum, et sic de aliis quæ partibus animæ vel corporis convenire possunt.

Hujus autem admirabilis unionis nullum convenientius exemplum inveniri potest quam unio corporis et animæ rationalis. Est etiam non inconveniens exemplum de hoc quod verbum nostrum in corde manet absconditum, et sensibile fit per assumptionem vocis et scripturæ. Sed tamen hæc exempla a prædicta unionis repræsentatione deficiunt, sicut et cetera exempla humana a rebus divinis. Nam neque Deitas sic unitur humanæ naturæ ut sit pars alienius naturæ; neque sic unitur humanæ naturæ ut solum significetur per eam, sicut verbum cordis significatur per vocem aut scripturam; sed sic ut veraciter filius Dei habeat naturam humanam, et homo dicatur.

Patet ergo quod non dicimus Deum unitum esse naturæ corporeæ ut sit virtus in corpore ad modum materialium et corporalium virtutum: quia nec intellectus animæ corpori unitæ sic est virtus in corpore. Multo minus ergo Dei verbum, quod ineffabiliter et sublimiori modo sibi naturam humanam assumpsit. Patet etiam secundum præmissa, quod Filius Dei et divinam naturam habet, et humanam; unam ab æterno, aliam ex tempore per assumptionem.

Contingit autem ab eodem plura haberi secundum diversos modos; in quibus tamen omnibus semper quod est principaliter habere dicitur: quod autem minus principale, haberi. Habet enim totum multas partes, ut homo manus et pedes; non autem dicimus e converso, quod manus vel pedes habeant hominem. Habet etiam unum subjectum multa accidentia, sicut pomum colorem et odorem, non e converso. Habet etiam homo aliqua exteriora, sicut possessiones et ves-

tes, non e converso. In solis autem illis quæ sunt partes alicujus unius essentialis, aliquando aliquid dicitur habere et haberi ut anima corpus, et corpus animam. Et similiter inquantum vir et uxor in matrimonio conjunguntur, dicitur vir habere uxorem, et uxor virum. Et similiter in his quæ per relationem uniuntur, sicut dicimus, quod pater habet filium et filius patrem. Si ergo sic uniretur Deus humanæ naturæ sicut anima corpori, ut ex his constitueretur una natura communis, posset dici, quod Deus habet naturam humanam, et humana natura habet Deum, sicut anima habet corpus, et e converso. Sed quia ex divina et humana natura non potest constitui una natura propter perfectionem divinæ, ut dictum est, ut tamen in prædicta unione principaliter est quod est ex parte Dei, manifeste consequitur quod ex parte Dei accipi oportet id quod habet naturam. Illud autem quod per aliquam naturam dicitur esse, dicitur esse suppositum vel hypostasis naturæ illius; sicut quod habet naturam equi, dicitur esse hypostasis vel suppositum naturæ equinæ. Et si sit natura intellectualis quæ habetur, talis hypostasis dicitur persona; sicut dicimus Petrum esse personam qui naturam humanam habet, quæ est intellectualis natura. Cum ergo Filius Dei, unigenitum Dei verbum, per assumptionem habeat humanam naturam ut dictum est; sequitur quod sit hypostasis vel suppositum vel persona humanæ naturæ: et cum ab æterno habeat divinam naturam, non per modum compositionis, sed simplicis identitatis; dicitur etiam hypostasis vel persona divinæ naturæ, secundum tamen quod divina verbis humanis exprimi possunt. Ipsum ergo unigenitum Dei verbum est hypostasis vel persona duarum naturarum, divinæ scilicet, et humanæ, in duabus naturis subsistens.

Si quis autem objiciat quod humana natura etiam in Christo non sit accidens, sed substantia quædam, non autem universalis, sed particularis, quæ hypostasis dicitur; videtur consequi quod ipsa humana natura in Christo hypostasis quædam sit præter hypostasim Dei verbi, et sic in Christo erunt duæ hypostases. Considerare debet qui sic objicit quod non omnis substantia particularis hypostasis dicitur, sed solum illa quæ ab aliquo principali non habetur. Manus enim hominis substantia est quædam

particularis, non tamen potest dici hypostasis, nec persona, quia habetur a principali quod est homo: alioquin in quovis homine essent tot hypostases vel personæ, quot membra vel partes. Humana ergo natura in Christo non est accidens, sed substantia, non universalis, sed particularis; nec tamen hypostasis dici potest, quia assumitur a principali, scilicet a Dei verbo. Sic ergo Christus est unus propter personæ vel hypostasis unitatem, nec potest dici esse duo; sed proprie dicitur quod habet duas naturas. Et licet divina natura prædicetur de hypostasi Christi, quæ est hypostasis verbi Dei quod est ejus essentia; tamen humana natura non potest prædicari de eo in abstracto, sicut nec de aliquo habente humanam naturam. Sicut enim non possumus dicere quod Petrus est humana natura, sed quod est homo, inquantum habet humanam naturam; ita nec possumus dicere quod Dei verbum sit humana natura, sed quod habet humanam naturam assumptam, et ex hoc dicitur homo. Utraque ergo natura prædicatur de verbo Dei; sed una in concreto tantum, scilicet humana, ut cum dicimus, Filius Dei est homo; divina vero natura et in abstracto et in concreto dici potest: ut quod verbum Dei est divina essentia vel natura, et quod est Deus. Cum autem Deus sit habens divinam naturam, et homo sit habens humanam naturam; per hæc duo nomina significantur duæ naturæ habitæ, sed unus habens utramque. Et cum habens naturam sit hypostasis; sicut in nomine Dei intelligitur hypostasis verbi Dei, ita in nomine hominis intelligitur verbum Dei, secundum quod attribuitur Christo.

Et sic patet quod per hoc quod dicimus Deum Christum et hominem, non dicimus eum esse duo, sed unum in duabus naturis. Quia vero ea quæ conveniunt naturæ, attribui possunt hypostasi illius naturæ; hypostasis autem tam humanæ naturæ quam divinæ includitur tam in homine significante divinam naturam, quam in homine significante humanam quod est eadem hypostasis habens utramque naturam; consequens est ut tam humana quam divina prædicentur de illa hypostasi, seu secundum quod includitur in nomine significante divinam naturam, seu secundum quod includitur in nomine significante humanam. Possumus enim dicere quod Deus verbum

Dei est conceptus et natus de Virgine, passus, mortuus et sepultus; attribuentes hypostasi Verbi humana propter humanam naturam: et e converso possumus dicere quod homo ille est unum cum Patre, et quod est ab æterno, et quod creavit mundum, propter divinam naturam.

In his ergo tam diversis de Christo prædicandis distinctio invenitur, si consideretur secundum quod ista de Christo dicuntur: quædam enim dicuntur secundum humanam naturam, quædam secundum divinam. Si autem consideretur de quo dicuntur, indistincte proferuntur; quia eadem est hypostasis de qua et divina et humana dicuntur: ut si dicam quod idem est homo qui videt et audit, sed non secundum idem: videt enim secundum oculos, et audit secundum aures. Idem etiam est pomum quod videtur et odoratur; sed hoc quidem colore, illud autem odore. Ratione cujus dicere possumus quod videns audit, et audiens videt, et visum odoratur, et odoratum videtur. Et similiter dicere possumus quod Deus nascitur de Virgine propter humanam naturam, et homo ille est æternus, propter divinam naturam<sup>1</sup>.

## CAPUT VII.

*Qualiter sit accipiendum quod dicitur verbum Dei passum<sup>2</sup> et mortuum, et quod ex iis multum inconueniens sequitur.*

Ex consideratione ergo præmissorum satis apparere potest, jam nihil inconueniens sequi ex eo quod dictum est quod unigenitum Dei verbum passum et mortuum confitemur. Non enim hæc ei attribuimus secundum naturam divinam, sed secundum humanam, quam pro nostra salute in unitatem personæ assumpsit.

Si quis autem obieciat quod Deus, cum sit omnipotens, alio modo poterat humanum genus salvare quam per unigeniti sui mortem; considerare debet qui hoc obiecit quod in factis Dei considerandum est quid conuenienter fieri potuit, etiam si alio modo illud Deus facere potuisset; alioquin omnia ejus opera si-

milis ratio irritabit. Si enim consideretur quare Deus fecerit cælum tantæ quantitatis, et quare condiderit in tali numero stellas; sapienter cogitanti occurret secundum quod sic conuenienter fieri potuit, licet aliter facere potuerit. Dico autem hæc secundum quod credimus totam naturæ dispositionem et humanos actus divinæ providentiæ esse subjectos. Hac enim credulitate sublata, omnis Divinitatis cultus excluditur. Suscepimus autem præsentem disputationem ad eos qui se Dei cultores dicunt, seu sint Saraceni, seu Christiani, seu Judæi. Ad eos autem qui omnia ex necessitate provenire dicunt a Deo operosius a nobis alibi disputatum est. Si aliquis ergo conuenientiam passionis et mortis Christi pia intentione consideret, tantam scientiæ profunditatem inveniet, ut semper aliqua cogitanti plura et majora semper occurrant, ita quod experiri possit verum esse quod Apostolus dicit I Cor. 1, 13: *Nos predicamus Christum crucifixum, Judæis quidem scandalum, gentibus vero stultitiam; ipsis autem vocatis Judæis atque Græcis Christum Dei virtutem et Dei sapientiam*: et iterum: *Quod stultum est Dei, sapientius est omnibus hominibus*.

Primo ergo considerandum occurrit quod Christus humanam naturam assumpsit ad lapsum hominis reparandum, ut diximus. Ea ergo oportuit Christum pati et agere secundum humanam naturam, per quæ remedium adhiberi posset contra peccatum. Peccatum autem hominis in hoc consistit quod corporalibus adhærendo, spiritualia bona prætermittat. Hoc ergo decuit Dei Filium in assumptâ hominis natura ostendere per ea quæ fecit et passus est, ut homines temporalia bona vel mala pro nihilo ducerent, ne ab eorum inordinato affectu impediti, spiritualibus minus dediti essent. Unde Christus pauperes parentes elegit, et tamen virtute perfectos, ne quis de sola carnis nobilitate et parentum divitiis gloriatur. Pauperem vitam gessit, ut divitias doceret contemnere. Privatus absque dignitate vixit, ut homines ab inordinato harum appetitu revoceret. Laborem, sitim, famem et corporis flagella sustinuit, ne homines voluptatibus et deliciis intenti, propter asperitates hujus vitæ retraherentur a bono virtutis.

<sup>1</sup> Parm. omittit: « naturam. »

<sup>2</sup> Parm. omittit: « et quod ex iis nullum inconueniens sequitur. »

Ad extremum sustinuit mortem, ne propter mortis timorem aliquis veritatem desereret. Et ne aliquis pro veritate vituperabilem mortem timeret, exprobratissimum genus mortis elegit, scilicet crucis. Sic quoque conveniens fuit filium Dei hominem factum mortem pati, ut sui exemplo homines provocaret ad virtutem, ut sic verum sit quod Petrus dicit, I Pet. II, 21 : *Christus passus est pro nobis, vobis relinquens exemplum ut sequamini vestigia ejus*. Deinde, quia hominibus ad salutem necessaria est non solum conversatio recta, per quam vitantur peccata; sed etiam cognitio veritatis, per quam vitantur errores; ad reparationem humani generis necessarium fuit ut unigenitum Dei verbum naturam humanam assumens, in certa veritatis cognitione firmaret veritatem. Veritati autem quæ docetur per hominem, non omnino firma credulitas adhiberetur, quia homo decipere potest; sed a solo Deo absque omni dubitatione veritatis cognitio confirmatur. Sic ergo oportuit Dei Filium hominem factum doctrinam divinæ veritatis hominibus proponere, ut ostenderet hanc divinitus, non humanitus esse : et hoc ostendit in miraculorum multitudine. Operanti enim ea quæ solus Deus facere potest, puta mortuos suscitando, cæcos illuminando etc., credendum erat ut per Deum loqueretur. Sed quia miracula ejus, qui præsentem aderant, videre potuerunt; ne a posteris crederentur conficta, contra hoc divina sapientia remedium exhibuit per Christi infirmitatem. Si enim vixisset dives, potens, et in magna dignitate constitutus, credi potuisset quod doctrina ejus et miracula favore hominum et potestate humana fuissent recepta. Et ideo, ut palam fieret opus divinæ virtutis, omnia abjecta et infima in mundo elegit, pauperem matrem et vitam inopem, discipulos et nuntios idiotas, reprobari et condemnari usque ad mortem a magnatibus mundi; ut manifeste appareret quod susceptio miraculorum, ejusque doctrinæ, non humanæ potentiæ, sed divinæ attribuenda sit. Unde et in his quæ fecit vel passus est, simul conjungebantur et humana infirmitas et divina potestas. In nativitate enim pannis involutus in præsepio ponitur; sed ab Angelis collaudatur, et a Magis stella duce adoratur. Tentatur a diabolo; sed ei ministratur ab Angelis. Vivit inops et mendicus; sed mortuos

suscitat, et cæcos illuminat. Moritur affixus patibulo, annumeratur latronibus; sed in ejus morte sol obscuratur, terra tremit, franguntur lapides, aperiuntur monumenta, et mortuorum corpora suscitantur. Si quis ergo ex talibus initiis tantum fructum videat consecutum, scilicet conversionem fere totius mundi ad Christum, et ulterius alia signa quærat ad credendum; durior lapide censi potest, cum in morte ejus et petra scissæ sint. Hinc est quod Apostolus, I Corinth. I, 18, dicit : *Verbum crucis pereuntibus stultitia est : his autem qui salvi fiunt, idest nobis, virtus Dei est*.

Est autem circa hoc, aliud considerandum : quod secundum eandem rationem providentiæ, qua in se ipso Dei Filius homo factus, infirma pati voluit, etiam suos discipulos, quos humanæ salutis ministros instituit, voluit in mundo esse abjectos. Unde non elegit litteratos et nobiles, sed illiteratos et ignobiles, pauperes scilicet piscatores; et eos mittens ad salutem hominum procurandam, jussit paupertatem servare, et persecutiones et opprobria pati, et mortem etiam pro veritate subire; ne eorum prædicatio ad aliquod terrenum commodum composita videretur; et ne salus mundi adscriberetur humanæ sapientiæ aut virtuti, sed solum divinæ. Unde nec in eis deficit virtus divina mirabilia operans, qui tamen secundum mundum videbantur abjecti. Hoc autem necessarium erat reparationi humanæ, ut homines discernerent de se ipsis superbe confiderent, sed de Deo. Hoc enim ad perfectionem humanæ justitiæ requiritur ut homo totaliter se Deo subjiciat, a quo etiam omnia bona consequi speret adipiscenda, et adepta recognoscat. Ad bona igitur præsentia hujus mundi contemnenda, et adversa quælibet toleranda usque ad mortem, nullo modo melius ejus discipuli potuerunt institui quam per passionem et mortem Christi : unde et ipse eis dicebat Joan. xv, 20 : *Si me persecuti sunt, et vos persequentur*.

Deinde considerandum est quod hoc habet ordo justitiæ ut pro peccato pœna infligatur. Apparet enim in humanis judiciis quod ea quæ injuste facta sunt, ad justitiam reducuntur, dum judex ab eo qui aliena capiens, plus habet quam debeat, subtrahit quod plus habet, et dat ei qui minus habebat. Quicumque autem peccat, plus suæ voluntati indul-



get quam debeat; ut enim voluntatem suam impleat, transgreditur ordinem rationis et legis divinæ. Ad hoc igitur quod ad justitiæ ordinem reducat, oportet quod voluntati subtrahatur de eo quod vult : quod fit dum punitur vel per subtractionem honorum quæ vellet habere, vel per illationem malorum quæ pati recusat. Hæc ergo reintegratio justitiæ per pœnam quandoque fit per voluntatem ejus qui punitur, dum ipsemet sibimet pœnam imponit, ut ad justitiam redeat; quandoque vero fit eo invito; et tunc quidem ipse ad justitiam non reducit, sed in eo impletur justitia. Erat autem totum humanum genus peccato subiectum. Ad hoc ergo quod ad statum justitiæ reduceretur, oportebat invenire pœnam quam homo sibi ipsi assumeret ad implendum divinæ justitiæ ordinem. Nullus autem homo purus tantus esse poterat qui posset satisfacere sufficienter Deo, pœnam voluntariam aliquam assumendo, etiam pro peccato proprio, nedum pro peccato universorum. Cum enim homo peccat, legem Dei transgreditur; et sic quantum est in se, injuriam Deo facit, qui est majestatis infinitæ. Tanto autem est major injuria, quanto major est is in quem committitur : patet enim quod major injuria reputatur, si quis percutiat militem, quam si rusticum; et adhuc major, si regem vel principem. Habet ergo peccatum contra legem Dei commissum quodammodo injuriam infinitam.

Sed rursus considerandum est quod secundum dignitatem satisfaciens etiam satisfactio ponderatur. Unum enim verbum deprecatorium a rege prolatum pro satisfactione injuriæ, major satisfactio reputatur quam si eo inferior vel genua flecteret, vel aliam quamvis humiliatorem ostenderet ad satisfaciendum passo injuriam. Nullus autem homo purus erat infinitæ dignitatis, ejus satisfactio posset esse condigna contra Dei injuriam. Oportuit igitur ut esset aliquis homo infinitæ dignitatis qui pœnam subiret pro omnibus, et sic condigne satisfaceret pro totius mundi peccatis. Ad hoc ergo unigenitum Dei verbum, verus Deus et Dei Filius naturam humanam assumpsit, et in ea mortem pati voluit, ut totum genus humanum pro peccato satisfa-

ciendo purgaret : unde et Petrus dicit, I Petr. III, 18 : *Christus semel pro peccatis nostris mortuus est, justus pro injustis etc.*

Non ergo, ut opinantur, conveniens fuit quod Deus sine satisfactione sua humana peccata purgaret, neque etiam quod hominem non permetteret cadere in peccatum. Primum enim repugnaret ordini justitiæ, secundum ordinem naturæ humanæ, per quam homo factus est suæ voluntatis liber, potens bonum vel malum eligere. Providentiæ autem est rerum naturam et ordinem non destruere, sed salvare. In hoc ergo maxime Dei sapientia apparuit quod ordinem rerum servavit tam justitiæ quam naturæ; et tamen misericorditer providit homini salutis remedium per Filii sui incarnationem et mortem.

## CAPUT VIII.

*Qualiter sit accipiendum quod fideles sumunt <sup>1</sup> corpus Christi <sup>2</sup>; et quod ex hoc nullum inconveniens sequitur.*

Quia ergo per passionem et mortem Christi homines a peccato purgantur, ut hujus tam immensi beneficii jugis in nobis maneret memoria, Filius Dei passione appropinquante, suæ passionis et mortis memoriam fidelibus suis reliquit jugiter recolendam, suum corpus et sanguinem tradens discipulis sub speciebus panis et vini, quod usque nunc in memoriam illius venerandæ passionis ubique terrarum frequentat Ecclesia.

Quam vane autem hoc sacramentum irrideant infideles, quilibet etiam parum in christiana religione instructus de facili potest attendere. Non enim dicimus quod corpus Christi dilaceretur in partes, et quod sic divisum a fidelibus sub sacramento sumatur, ut oporteat quandoque illud deficere, etiamsi magnitudinem montis haberet, ut dicunt; sed dicimus per conversionem panis in corpus Christi ipsum corpus Christi in sacramento Ecclesiæ esse et a fidelibus manducari. Ex quo ergo corpus Christi non dividitur, sed in ipsum aliquid convertitur, nulla necessitas est ut per manducationem fidelium quantitati ejus aliquid subtrahatur.

Si quis autem infidelis velit dicere hanc

<sup>1</sup> Parm. : « accipiunt. »

<sup>2</sup> Parm. omittit : « et quod ex hoc nullum inconveniens sequitur. »



conversionem impossibilem esse, consideret, <sup>1</sup> si Deum omnipotentem confitetur, quod cum per virtutem naturæ possit una res converti ad <sup>2</sup> aliam quantum ad formam, sicut quod aer in ignem convertitur, dum materia quæ prius erat subjecta formæ aeris, postea formæ ignis subicitur, multo magis <sup>3</sup> virtus omnipotentis Dei, quæ totam rei substantiam in esse producit, non solum transmutando secundum formam, ut facit natura, poterit hoc totum in illud totum convertere, ut sic panis in corpus Christi convertatur, et vinum in sanguinem.

Si autem huic conversioni aliquis velit repugnare per id quod sensu <sup>4</sup> apparet, nam nihil secundum sensum immutatur: in Sacramento altaris <sup>5</sup> consideret, quod ejusmodi est <sup>6</sup>, sic nobis divina proponi ut ad nos sub tegumento visibilibus rerum deveniant. Ut ergo Christi corpus et sanguis spiritualis et divina reffectio haberetur, et non quasi cibus et potus communis, non sub propria carnis et sanguinis nobis traduntur specie <sup>7</sup>, sed sub specie panis et vini ne esset etiam <sup>8</sup> horribile carnem humanam comedere et sanguinem humanum potare <sup>9</sup>. Non tamen hoc fieri <sup>10</sup> sic dicimus quasi species illæ quæ sensibus apparent in sacramento altaris <sup>11</sup> sint solum in phantasia videntium, sicut solet esse in præstigiis artium magicarum, quia veritatis sacramentum nulla fictio decet; sed Deus, qui est substantiæ et accidentis creator, potest accidentia sensibilia conservare in esse, subjectis <sup>12</sup> in aliud transmutatis. Potest enim effectus causarum secundarum per sui omnipotentiam absque causis secundis et producere et in esse servare.

Si <sup>13</sup> vero Dei omnipotentiam non confitetur, contra talem in hoc opere disputationem non assumimus, sed contra Saracenos, et alios qui Dei omnipotentiam confitentur. Alia vero hujus mysteria sacramenti non sunt hic magis discutienda, quia infidelibus secreta fidei pandi non debent.

## CAPUT IX.

*Quod <sup>14</sup> est specialis locus ubi animæ purgantur antequam vadant ad Paradisum.*

Nunc restat considerare de oppositione <sup>15</sup> quorundam dicentium, purgatorium non esse post mortem; ad quam quidem positionem <sup>16</sup> ut homines aliqui devenirent, contigisse videtur quod in pluribus aliis contigit <sup>17</sup> multis. Deum enim aliqui <sup>18</sup> errores aliquos incaute vitare voluerunt, inciderant in errores contrarios. Sic Arius dum vitare voluit errorem Sabellii confundentis sanctæ Trinitatis personas, incidit in errorem contrarium, ut divideret Deitatis essentiam. Similiter Eutyches dum vitare voluit errorem Nestorii dividens in Christo personam Dei et hominis, contrarium errorem instituit, ut confiteretur, unam esse Dei et hominis naturam. Sic igitur et <sup>19</sup> aliqui dum vitare volunt Origenis errorem ponentis omnes pœnas post mortem purgatorias esse, in contrarium prolabantur errorem ut dicant nullam pœnam post mortem purgatoriam esse. Saucta vero catholica et apostolica Ecclesia inter errores contrarios media cauto <sup>20</sup> passu incedit. Sicut enim distinguit personas in Trinitate contra Sabellium, et tamen in errorem Arii non declinat, sed unam tantum confitetur personarum essentiam; in incarnationis vero mysterio e converso naturas distinguit contra Eutychem, nec tamen cum Nestorio personam separat: sic et in statu animarum post mortem pœnas quasdam purgatorias confitetur eorum dumtaxat qui de hoc sæculo absque peccato mortali cum caritate et <sup>21</sup> gratia recedunt; nec tamen <sup>22</sup> cum Origene omnes pœnas purgatorias confitetur; sed qui cum peccato mortali decedunt, cum diabolo et Angelis ejus æterno confitetur supplicio cruciandos.

<sup>1</sup> Parm.: « Dei omnipotentiam. Confitetur quidem quod. »

<sup>2</sup> Parm.: « in. »

<sup>3</sup> Parm.: « multo magis ergo. »

<sup>4</sup> Parm.: « sensui. »

<sup>5</sup> Parm. omittit: « in sacramento altaris. »

<sup>6</sup> Parm. omittit: « quod ejusmodi est. »

<sup>7</sup> Parm. omittit: « non sub propria carnis et sanguinis nobis traduntur specie, sed. »

<sup>8</sup> Parm.: « sumitur, ut non sit. »

<sup>9</sup> Parm.: « sanguinem bibere. »

<sup>10</sup> Parm. omittit: « sic. »

<sup>11</sup> Parm.: omittit: « altaris. »

<sup>12</sup> Parm.: « tamen in aliud mutatis. »

<sup>13</sup> Parm. addit: « quis. »

<sup>14</sup> Parm.: « quod est... sint beatæ. »

<sup>15</sup> Parm.: « opinione. »

<sup>16</sup> Parm. omittit: « positionem. »

<sup>17</sup> Parm.: « contingit. » Omisso: « multis. »

<sup>18</sup> Parm.: « enim aliquos errores vitare. »

<sup>19</sup> Parm.: « Sic etiam dum aliqui. »

<sup>20</sup> Parm.: « lento. »

<sup>21</sup> Parm.: « caritatis gratia decedunt. »

<sup>22</sup> Parm. omittit: « tamen. »

Ad veritatis ergo assertionem primo considerandum est, quod illi qui in peccato mortali decedunt, statim ad inferna supplicia rapiuntur; quod aperte ex Evangelio probatur: dicitur enim Luc. xvi, 22, ex ore Domini, quod *mortuus est dives epulo, et sepultus in inferno*: et de cruciatu ejus ex ipsius confessione apparet, dum dicit: *Quia crucior in hac flamma*. Job quoque de impiis dicit Job. xxi, 13: *Ducunt in bonis dies suos, et in puncto ad inferna descendunt*. Item Job xxii, 17: *Qui dicebant Deo: Recede a nobis etc.* Non solum autem impii pro peccatis propriis, sed etiam justii ante passionem Christi pro peccato primi parentis in morte ad inferos descendebant: unde Jacob dicebat Genes. xxxvii, 35: *Descendam ad filium meum lugens in infernum*. Unde ipse Christus moriens ad inferna descendit, ut in Symbolo continetur, sicut ante per Prophetam prædictum fuerat: *Non derelinques animam meam in inferno*: Psal. xv, 20: quod Petrus in Actibus de Christo exponit. Licet Christus alio modo ad inferna descenderit, non quasi peccato obnoxius; sed solus inter mortuos liber, ad hoc descendit ut expolians principatus et potestates captivam duceret captivitatem, sicut per Zachariam fuerat prædictum, Zach. ix, 11: *Tu autem emisisti in sanguine testamenti tui<sup>1</sup> duxisti<sup>2</sup> vincitos de lacu, in quo non est aqua.*

Sed quia miserationes Dei sunt super omnia opera ejus, credendum est multo magis, quod illi qui sine macula moriuntur, statim æternæ retributionis mercedem recipiant. Et hoc quidem evidentibus auctoritatibus maxime probatur. Dicit enim Apostolus II ad Corinth. v, 1, cum mentionem de tribulationibus Sanctorum fecisset: *Scimus enim, inquit, quod si terrestris domus nostra hujus habitationis dissolvatur, quod ædificationem ex Deo habemus, domum non manufactam, sed æternam in cœlis*. Ex quibus verbis prima facie inspectis hoc videtur elici posse, quod, dissoluto mortali corpore, homo cœlesti gloria induatur. Sed ut hic sensus evidentior fiat, sequentia pertractemus. Quia enim duo proposuerat, scilicet dissolutionem habitationis terrenæ et adoptionem domus cœlestis, ostendit quomodo desiderium hominis se habet ad utrumque, cum quadam expositione utriusque,

Unde primo subjungit de desiderio cœlestis domus: et dicit, quia *ingemiscimus in hoc quod a nostro desiderio retardati cupimus superindui habitationem cœlestem*: per quod etiam videtur intelligere, quod illa domus cœlestis quam supra dixerat, non est aliquid ab homine separatum, sed aliquid homini inhærens. Non enim dicitur homo induere domum, sed vestimentum; sed dicitur aliquis inhabitare domum. Cum ergo hæc duo conjungit dicens *superindui habitationem*, ostendit quod id quod est primo desideratum, est aliquid inhærens, quia induitur, et est aliquid continens et excedens, quia inhabitatur. Quid autem sit illud desideratum, patebit ex sequentibus. Sed quia non simpliciter dixerat indui, sed *superindui*, rationem sui dicti exponit, subdens: *Si tamen vestiti, non nudi inveniamur*; quasi dicat: Si anima sic indueretur habitatione cœlesti quod non exueretur habitatione terrena, adeptio illius habitationis esset superinduitio. Sed quia oportet quod exuatur habitatione terrena ad hoc quod induatur cœlesti, non potest dici superinduitio<sup>2</sup>, sed induitio simplex. Posset ergo aliquis ab Apostolo quærere: Quare ergo dixisti: *Superindui cupientes*? Ad quod respondet dicens: *Nam et qui sumus in tabernaculo isto*, id est qui induimur terreno habitaculo quasi transitorio, non domo quasi permanente, *ingemiscimus gravati quasi aliquo accidente contra desiderium nostrum, eo quod secundum naturale desiderium nostrum volumus expoliari quasi tabernaculo terreno, sed supervestiri cœlesti, ut absorbeatur quod mortale est, a vita*, id est ut ad vitam immortalem sine mortis gustu transeat. Posset autem iterum aliquis<sup>3</sup> Apostolo dicere: non quia rationabile apparet quod volumus expoliari terrena inhabitatione, quæ est nobis connaturalis, et unde hoc nobis quod habitationem cœlestem indui cupiamus. Ad hoc respondet subdens: *Qui autem in nobis efficit hoc ipsum, ut desideremus cœlestia, Deus est*. Et quomodo in nobis hoc efficiat, ostendit subdens: *Qui dedit nobis pignus spiritus*. Per spiritum enim sanctum, quem accepimus a Deo, sumus de cœlesti habitatione adipiscenda certi et solliciti, sicut per pignus de debito recuperando. Ex hac ergo certitudine in desiderium cœlestis habita-

<sup>1</sup> Parm.: « emisisti. »

<sup>2</sup> Parm.: « superinduitio simpliciter. »

<sup>3</sup> Parm.: « quærere ab apostolo. — Rationabiliter... nolumus... naturalis, et sic nec quod. »

tionis elevamur. Sic ergo in nobis duo sunt desideria: unum naturæ de terrena inhabitatione non deserenda; aliud gratiæ de cœlesti habitatione consequenda. Sed hæc duo desideria impleri non possunt; quia ad cœlestem habitationem pervenire non possumus, nisi terram deseramus. Unde cum quadam fiducia firma et audacia desiderium gratiæ præferimus desiderio naturæ, ut velimus terrenam habitationem deserere, et ad cœlestem pervenire: et hoc est quod subdit: *Audentes ergo semper, et scientes, quoniam dum sumus in hoc corpore, peregrinamur a Domino; per fidem enim ambulamus, et non per speciem. Audemus autem, et bonam voluntatem habemus magis peregrinari a corpore, et præsentem esse ad Dominum.* Aperitur ergo quod ipsum corpus corruptibile supra nominavit terrestrem domum hujus habitationis, et tabernaculum; quod quidem corpus est animæ quasi quoddam indumentum. Aperitur etiam quid supra dixerit *domum non manufactam, sed æternam in cœlis*: quia ipsum Deum, homines induunt, vel etiam inhabitant, dum ei præsentem existunt per speciem, id est videndo eum sicuti est, peregrinantur<sup>1</sup> autem ab ipso dum per fidem tenent quod nondum vident. Desiderant ergo Sancti peregrinari a corpore, ut eorum animæ per mortem a corporibus separentur, ad hoc quod sic peregrinantes a corpore, sint præsentem ad Dominum.

Patet ergo quod Sanctorum animæ a corporibus absolutæ ad cœlestem habitationem perveniunt Deum videntes. Non ergo sanctorum animarum differtur gloria, quæ in Dei visione consistit, usque ad diem judicii, quo corpora resument. Hoc etiam apparet per dictum Apostoli ad Philip. 1, 23, ubi dicit: *Cupio dissolvi, et esse cum Christo.* Vanum enim hoc desiderium esset, si corpore dissoluto adhuc Paulus cum Christo non esset, quem tamen constat esse in cœlis. Manifeste etiam Dominus latroni in cruce confitenti dixit, Luc. xxiii, 43: *Hodie mecum eris in paradiso*, per paradisi gloriae fruitionem designans. Unde non est credendum,

quod suos fideles Christus remunerare differat, quantum ad gloriam animarum, usque ad corporum resurrectionem<sup>2</sup>. Quod ergo Dominus dicit, *In domo Patris mei mansiones multæ sunt*, ad differentias refertur præmiorum, quibus Sancti in cœlesti beatitudinem remunerantur a Deo, non ejus<sup>3</sup> extra domum, sed in ipsa domo.

His autem visis, consequens videtur<sup>4</sup> purgatorium animarum esse post mortem. Ex multis enim sacræ Scripturæ auctoritatibus manifeste habetur quod ad illam cœlestem gloriam nullus pervenire potest cum macula. Dicitur enim de divinæ sapientiæ participatione, Sap. vii, 25, quod<sup>5</sup> est emanatio quædam charitatis omnipotentis Dei sincera, et ideo *nihil inquinatum incurrit in eam*. Consistit autem cœlestis felicitas in sapientiæ participatione perfecta, qua per speciem Deum videmus. Oportet igitur omnino sine macula esse eos qui ad illam beatitudinem<sup>6</sup> perducuntur. Idem habetur<sup>7</sup> expressius in Isa. xxxv, 3: *Via sancta vocabitur: non transibit per eam pollutus*; et Apoc. xxi, 27: *Non intrabit in eam aliquid inquinatum*. Contingit autem aliquos in hora mortis aliquibus peccatorum maculis inquinari, propter quæ tamen æternam inferni damnationem non merentur; sicut sunt venialia peccata, ut verbum otiosum et alia<sup>8</sup> hujusmodi. Non ergo ad cœlestem beatitudinem quia talibus inquinati decedunt, possunt pervenire statim post mortem; pervenirent autem, ut probatum est, si tales maculæ in eis non essent. Ad minus ergo post mortem dilationem gloriæ patientur propter venialia<sup>9</sup> peccata. Nulla autem est ratio quare magis hanc pœnam quam aliam animas pati post mortem concedant; præsertim cum carentia visionis divinæ et separatio a Deo, major sit pœna etiam existentibus in inferno, quam ignis supplicium. Patiuntur<sup>10</sup> ergo animæ decedentium cum venialibus purgatorium ignem post mortem.

Si quis autem dicat, hæc peccata venialia remanere purganda per ignem conflagrationis mundi, qui faciem præcedet judicis; hoc cum præmissis stare non potest. Ostensum est enim, quod

<sup>1</sup> Parm.: « sicut est, peregrinatur ab eo. »

<sup>2</sup> Parm.: « resurrectionem. »

<sup>3</sup> Parm. omittit: « ejus. »

<sup>4</sup> Parm.: « est. »

<sup>5</sup> Parm. omittit: « est emanatio quædam claritatis omnipotentis Dei sincera, et ideo. »

<sup>6</sup> Parm.: « beatitudinem. »

<sup>7</sup> Parm.: « Hoc etiam... expositis. »

<sup>8</sup> Parm. omittit: « alia. »

<sup>9</sup> Parm. omittit: « peccata. »

<sup>10</sup> Parm.: « quod ibi patiuntur. Ergo. »

Sanctorum animæ, in quibus nulla est macula, statim corpore dissoluto cœlestem habitationem adipiscuntur; nec potest dici quod animæ cum peccatis venialibus decedentium antequam ab eis purgentur <sup>1</sup>, perveniant ad gloriam, ut est ostensum. Differtur ergo eorum gloria propter venialia usque ad diem iudicii: quod omnino improbable videtur <sup>2</sup> ut scilicet pro levibus peccatis tantam pœnam patiatur aliquis in gloriæ dilatione. Amplius, contingit aliquos ante mortem perficere non potuisse pœnitentiam debitam pro peccatis, de quibus pœnituerunt; nec est divinæ justitiæ conveniens quod pœnam <sup>3</sup> illam ulterius non exsolvant: sic enim melioris conditionis essent qui cito morte præoccuparentur, quam qui diutinam pœnitentiam in hac vita perficiunt. Patiuntur ergo post mortem hanc pœnam. Non autem in inferno, in quo homines pro mortalibus patiuntur, cum jam per pœnitentiam sint mortalia peccata <sup>4</sup> dimissa. Nec etiam esset conveniens ut pro exsolutione hujus pœnæ usque ad diem iudicii eis gloria debita differretur. Oportet ergo ponere aliquas pœnas temporales et purgatorias post hanc vitam ante diem iudicii.

Huic etiam concordat Ecclesiæ ritus ab Apostolis introductus. Orat enim tota Ecclesia pro fidelibus defunctis. Patet autem quod non orat pro his qui sunt in inferno, ubi nulla est redemptio; neque pro his qui cœlestem gloriam sunt adepti, qui jam pervenerunt ad finem. Relinquitur ergo quod sunt aliqua pœnæ temporales et purgatoriæ post hanc vitam, pro quarum remissione orat Ecclesia. Hinc etiam Apostolus dicit, I Corinth. iii, 13: *Uniuscujusque opus quale sit, ignis probabit. Si cujus opus manserit, quod superædificavit, mercedem accipiet; si cujus opus arserit, detrimentum patietur; ipse autem salvus erit, sic tamen quasi per ignem.* Non autem potest hoc intelligi de igne inferni, quia qui illum ignem patiuntur, non salvantur. Oportet ergo quod intelligatur de aliquo igne purgante.

Et quia potest aliquis dicere hoc esse intelligendum de igne qui præcedet fa-

ciem iudicis, præcipue quia præmittitur: *Dies Domini declarabit*: dies autem Domini intelligitur dies ultimi adventus ejus ad iudicium universale totius mundi, sicut Apostolus dicit I Thessal. v, 2: *Dies Domini sicut fur in nocte, ita veniet*: ideo attendendum est, quod sicut dies iudicii dicitur dies Domini, quia est dies adventus ejus ad iudicium universale totius mundi; ita dies cujuscumque dicitur dies Domini, quia ad unumquemque in morte venire dicitur Christus remuneraturus vel condemnaturus. Unde quantum ad remunerationem bonorum dicit ad discipulos, Joan. xiv, 3: *Si abiero, et præparavero vobis locum, iterum veniam, et accipiam vos ad me ipsum.* Quantum vero ad damnationem malorum dicitur Apoc. ii, 5: *Age pœnitentiam, et prima opera fac: sin autem, venio tibi, et movebo candelabrum tuum de loco suo.* Dies ergo Domini quoad universale iudicium in igne revelabitur, qui faciem iudicis præcedet, quo reprobi ad iudicium trahentur, et justi qui vivi reperientur, purgabuntur; sed et dies Domini, quo unumquemque in sua morte iudicat, in igne revelatur, qui purgat bonos, et impios condemnat.

Sic ergo patet quod purgatorium est post mortem.

## CAPUT X.

*Quod divina prædestinatio humanis actibus necessitatem non imponat, et <sup>5</sup> qualiter in hac quæstione procedendum sit.*

Nunc ultimo considerandum restat <sup>6</sup> an propter ordinationem seu prædestinationem divinam humanis actibus necessitas imponatur. In qua quæstione sic caute procedendum est, ut veritas defendatur, et falsitatis <sup>7</sup> error vitetur.

Erroneum enim est dicere, quod actus humani et eventus, præscientiæ et ordinationi divinæ non subsint. Nec minus est erroneum dicere, quod præscientia vel ordinatione divina humanis actibus necessitas injungatur: tolleretur enim libertas arbitrii consiliandi opportunitas,

<sup>1</sup> Parm. omittit: « decedentium, antequam ab eis purgentur. »

<sup>2</sup> Parm.: « est. »

<sup>3</sup> Parm. omittit: « pœnam. »

<sup>4</sup> Parm. omittit: « peccata. »

<sup>5</sup> Parm. omittit: « et qualiter in hac quæstione procedendum sit. »

<sup>6</sup> Parm.: « est. »

<sup>7</sup> Parm.: « falsitas, seu error. » Sed minus bene. Errorem etenim falsitatis ab aliis S. Thomas discernit erroribus. »



legum utilitas, sollicitudo bene agendi <sup>1</sup>, et præmiorum et pœnarum justitia.

Est ergo considerandum quod Deus aliter habet scientiam de rebus quam homo. Homo enim subiectus est tempori; et ideo res temporaliter cognoscit, quædam respiciens ut præsentia, quædam ut præterita recolens, et quædam prævidens ut futura. Sed Deus est superior temporis discursu, et esse suum est æternum: unde et ejus cognitio non est temporalis, sed æterna: comparatur autem æternitas ad tempus sicut indivisibile ad continuum. In tempore enim invenitur diversitas quædam partium secundum prius et posterius succedentium, sicut in linea inveniuntur diversæ partes secundum situm ad invicem ordinatæ: sed æternitas prius et posterius non habet, quia res æternæ mutatione carent: et sic æternitas est tota simul, sicut et punctum partibus caret secundum situm distinctis. Punctum autem dupliciter ad lineam comparari potest: uno quidem modo sicut intra lineam comprehensum, seu sit in principio lineæ, seu in medio, seu in fine; alio modo ut extra lineam existens. Punctum ergo intra lineam existens non potest omnibus partibus lineæ adesse, sed in diversis partibus lineæ oportet diversa puncta signari: punctum vero quod extra lineam est, nihil prohibet æqualiter omnes lineæ partes respicere; ut patet in circulo, cujus centrum cum sit indivisibile, respicit omnes circumferentiæ partes, et omnes quodammodo sibi sunt præsentis, licet non una earum alteri. Puncto autem incluso in linea similatur instans, quod est terminus temporis; quod quidem non adest omnibus partibus temporis, sed in diversis partibus temporis diversa instantia significantur. Puncto vero quod est extra lineam, scilicet centro, quodammodo similatur æternitas: quæ cum sit simplex et indivisibilis, totum decursum temporis comprehendit, et quælibet pars temporis est ei æqualiter præsens, licet partium temporis una sequatur aliam. Sic igitur Deus, qui de æternitatis excelso omnia respicit, super totum temporis decursum et omnia quæ geruntur in tempore, præsentia liter intuetur. Sicut ergo cum video Socratem sedere, infallibilis est et certa mea cognitio, nulla tamen ex hoc Socrati necessitas sedendi

imponitur; ita Deus omnia quæ sunt nobis præterita vel futura vel præsentia, quasi præsentia inspiciens, infallibiliter et certitudinaliter cognoscit, ita tamen quod contingentibus nulla necessitas imponitur existendi. Hujus autem exemplum accipi potest, si comparemus decursum temporis ad transitum viæ. Si quis enim sit in via per quam transeunt multi, videt quidem eos qui sunt ante se; qui vero post ipsum veniant <sup>2</sup>, per certitudinem scire non potest. Sed si quis sit in aliquo excelso loco, unde totam viam aspicere possit; simul videt omnes qui transeunt per viam. Sic ergo homo qui est in tempore, non potest totum cursum temporis simul videre, sed videt ea solum quæ coram assistunt, præsentia scilicet, et de præteritis aliqua; sed ea quæ ventura sunt, per certitudinem scire non potest. Deus autem de excelso suæ æternitatis per certitudinem videt quasi præsentia omnia quæ per totum temporis decursum aguntur, absque hoc quod rebus contingentibus necessitas imponatur.

Sicut autem divina scientia contingentibus necessitatem non imponit, sic nec ejus ordinatio, qua provide ordinat universa. Sic enim ordinat res sicut agit res: non enim ejus ordinatio causatur, sed quod per sapientiam ordinat, exequitur per virtutem. In actione autem divinæ virtutis hoc considerare oportet, quod operatur in omnibus et movet singula ad suos actus secundum modum uniuscujusque; ita quod quædam ex motione divina ex necessitate suas actiones perficiunt, ut patet in motibus cœlestium corporum; quædam vero contingenter, quæ interdum a propria actione deficiunt, ut patet in actionibus corruptibilium: arbor enim quandoque a fructificando impeditur, et animal a generando. Sic ergo divina sapientia de rebus ordinat, ut ordinata proveniant secundum modum propriarum causarum. Est autem hic modus naturalis homini ut libere agat, non coactus; (quia <sup>3</sup> rationales potestates ad opposita se habent.) Sic igitur Deus ordinat de actibus humanis, ut actus humani necessitati non subdantur, sed proveniant ex arbitrii libertate.

Hæc igitur quæ sunt ad præsens, visa sunt de propositis quæstionibus conscribenda; quæ tamen alibi diligentius pertractata sunt.

<sup>1</sup> Parm.: « operandi. »

<sup>2</sup> Parm.: « transeunt. »

<sup>3</sup> Desunt hæc in Cod. S. Gen.



# OPUSCULUM III.

## IN DUO PRÆCEPTA CARITATIS ET IN DECEM LEGIS PRÆCEPTA, EXPOSITIO <sup>1</sup>.

(EDIT. ROM. IV.)

### CAPUT I.

*Quod lex amoris fuit necessaria homini,  
ut daretur differens a lege timoris.*

Tria sunt hominī necessaria ad salutem : scilicet scientia credendorum, scientia desiderandorum, et scientia operandorum. Primum docetur in *Symbolo*, ubi traditur scientia de articulis fidei; secundum in oratione dominica; tertium autem in lege. Nunc autem de scientia operandorum intendimus : ad quam tractandam quadruplex lex invenitur. Prima dicitur lex naturæ; et hæc nihil aliud est nisi lumen intellectus insitum nobis a Deo, per quod cognoscimus quid agendum et quid vitandum. Hoc lumen et hanc legem dedit Deus homini in creatione. Sed multi credunt excusari per ignorantiam, si hanc legem non observant : sed contra eos dicit Propheta in Psal. XLVI : *Multi dicunt : Quis ostendit nobis bona?* quasi ignorent quid sit operandum. Sed ipse ibidem respondet : *Signatum est super nos lumen vultus tui, Domine*, lumen scilicet intellectus, per quod nota sunt nobis agenda : nullus enim ignorat quod illud quod nollet sibi fieri, non faciat alteri, et cetera talia. Sed licet Deus in creatione dederit homini hanc legem, scilicet naturæ, diabolus tamen in homine superseminavit aliam legem, scilicet concupiscentiæ. Quousque enim in primo homine anima fuit sub-

ditā Deo, servando divina præcepta, etiam caro fuit subdita in omnibus animæ vel rationi. Sed postquam diabolus per suggestionem retraxit hominem ab observantia divinorum præceptorum, ita etiam caro fuit inobediens rationi; et inde accidit quod licet homo velit bonum secundum rationem, tamen ex concupiscentia ad contrarium inclinatur : et hoc est quod Apostolus dicit Rom. VII, 23 : *Video autem aliam legem in membris meis, repugnantem legi mentis meæ* : et inde est quod frequenter lex concupiscentiæ legem naturæ et ordinem rationis corrumpit. Et ideo subdit Apostolus ibid. : *Captivantem me in lege peccati, quæ est in membris meis*. Quia ergo lex naturæ per legem concupiscentiæ destructa erat, oportebat quod homo reduceretur ad opera virtutis, et retraheretur a vitiis : ad quæ necessaria erat lex scripturæ. Sed sciendum quod homo retrahitur a malo et inducitur ad bonum ex duobus. Primo, timore : primum enim propter quod aliquis maxime incipit peccatum vitare, est consideratio pœnæ inferni, et extremi iudicii : et ideo dicitur Eccli. I, 16 : *Initium sapientiæ timor Domini* : et ibidem 27 : *Timor Domini expellit peccatum*. Licet enim ille qui ex timore non peccat, non sit justus : inde tamen incipit justificatio. Hoc ergo modo retrahitur homo a malo et inducitur ad bonum per legem Moysi, quam quidam irritantes, morte puniebantur. Hebr. X, 28 : *Irritam quis faciens legem Moysi, sine ulla miseratione duobus vel tribus testibus moritur*. Sed quia mo-

<sup>1</sup> Opusculum illud in cap. cum titulis suis cod.

S. Gen. dividit. — Hæc divisio deest in Parm.

III  
 dus iste est insufficiens, et lex quæ data erat per Moysen, hoc modo, scilicet per timorem, retrahebat a malis, insufficiens fuit : licet enim coercuerit manum, non coercerat animum : ideo est alius modus retrahendi a malo et inducendi ad bonum, modus scilicet amoris ; et hoc modo fuit data lex Christi, scilicet lex evangelica, quæ est lex amoris.

Sed considerandum est quod inter legem timoris et legem amoris triplex differentia invenitur : et primo, quia lex timoris facit suos observatores servos, lex vero amoris facit liberos : qui enim operatur solum ex timore, operatur per modum servi ; qui vero ex amore, per modum liberi vel filii. Unde Apostolus II Corinth. III, 17 : *Ubi Spiritus Domini, ibi libertas* ; quia scilicet tales ex amore ut filii operantur. Secunda differentia est quia observatores primæ legis ad bona temporalia introducebantur : Isa. I, 19, *Si volueritis et audieritis me, bona terræ comedetis* : sed observatores secundæ legis, in bona cœlestia introducuntur : Matth. XIX, 17 : *Si vis ad vitam ingredi, serva mandata* : et ibid. III, 2 : *Pœnitentiam agite : appropinquavit enim regnum cœlorum*. Tertia differentia est, quia prima gravis : Act. XV, 10 : *Cur tentatis imponere jugum super cervicem nostram, quod neque nos neque patres nostri portare potuerunt?* secunda autem levis : Matth. XI, 30 : *Jugum enim meum suave est, et onus meum leve* : Apostolus Rom. VIII, 15 : *Non accepistis spiritum servitutis iterum in timore, sed accepistis spiritum adoptionis filiorum*.

## CAPUT II.

*Quod lex charitatis debet esse regula omnium actionum.*

Sicut <sup>1</sup> jam prædictum est, quadruplex lex invenitur : et prima quidem lex naturæ, quam Deus in creatione infudit ; secunda lex concupiscentiæ : tertia lex scripturæ ; quarta est lex caritatis et gratiæ, quæ est lex Christi. Sed manifestum est quod non omnes possunt scientiæ insudare ; et propterea a Christo data est lex brevis, ut ab omnibus posset sciri, et nullus propter ignorantiam possit ab ejus

observantia excusari : et hæc est lex divini amoris. Apostolus Rom. IX, 28 : *Verbum brevium faciet Dominus super terram*.

Sed sciendum quod hæc lex debet esse regula omnium actuum humanorum. Sicut enim videmus in artificialibus quod unumquodque opus tunc bonum et rectum dicitur quando regulæ coæquatur ; sic etiam quodlibet humanum opus rectum est et virtuosum quando regulæ divinæ dilectionis concordat ; quando vero discordat ab hac regula, non est bonum nec rectum aut perfectum. Ad hoc autem quod actus humani boni reddantur, oportet quod regulæ divinæ dilectionis concordent.

Sed sciendum quod hæc lex, scilicet divini amoris, quatuor efficit in homine valde desiderabilia. Primo causat in eo spiritualem vitam. Manifestum est enim quod naturaliter amatum est in amante ; et ideo qui Deum diligit, ipsum in se habet : I Joan. IV, 16 : *Qui manet in caritate, in Deo manet, et Deus in eo*. Natura etiam amoris est quod amantem in amatum transformat : unde si vilia diligimus et caduca, viles et instabiles efficimur : Oseæ IX, 10 : *Facti sunt abominabiles sicut ea quæ dilexerunt*. Si autem Deum diligimus, divini efficimur : quia, ut dicitur I Corinth. VI, 17 : *qui adhæret Domino, unus spiritus est*. Sed sicut Augustinus dicit, « sicut anima est vita corporis, ita Deus est vita animæ, » et hoc manifestum est. Tunc enim dicimus corpus per animam vivere quando habet operationes proprias vitæ, et quando operatur et movetur ; anima vero recedente, corpus nec operatur nec movetur. Sic etiam tunc anima operatur virtuose et perfecte quando per caritatem operatur, per quam habitat Deus in ea ; absque caritate vero non operatur : I Joan. II, 14, *Qui non diligit, manet in morte*.

## CAPUT III.

*Quæ bona facit charitas.*

Considerandum est autem quod si quis habet omnia dona Spiritus sancti absque caritate, non habet vitam. Sive enim sit gratia linguarum, sive sit donum

<sup>1</sup> Parm. addit : « ergo. »

fidei, vel quicquid sit aliud, sine caritate vita non tribuunt. Si enim corpus mortuum induatur auro et lapidibus pretiosis; nihilominus mortuum manet. Hoc est ergo primum quod efficit caritas. Secundum quod facit caritas, est divinorum mandatorum observantia. Gregorius : « Nunquam est Dei amor otiosus : operatur enim magna si est; si vero operari renuit, amor non est. » Unde manifestum signum caritatis est promptitudo implendi divina præcepta. Videmus enim amantem propter amatum magna et difficilia operari. Joan. xiv, 23 : *Si quis diligit me, sermonem meum servabit.* Sed considerandum quod qui mandatum et legem divinæ dilectionis servat, totam legem implet. Est autem duplex modus divinorum mandatorum. Quædam enim sunt affirmativa : et hæc quidem implet caritas; quia plenitudo legis quæ consistit in mandatis, est dilectio, qua mandata servantur. Quædam vero sunt prohibitoria; hæc etiam implet caritas, quia *non agit perperam*, ut dicit Apostolus I Corinth. xiii, 4. Tertium quod facit caritas, est, quia est præsidium contra adversa : habenti enim caritatem nulla adversa nocent, sed in utilia convertuntur : Rom. viii, 28 : *Diligentibus Deum omnia cooperantur in bonum* : immo etiam adversa et difficilia suavia videntur amanti; sicut et apud nos manifeste videmus. Quartum vero est quod ad felicitatem<sup>4</sup> perducit : solum enim caritatem habentibus æterna beatitudo promittitur : omnia enim absque caritate insufficientia sunt. II Tim. iv, 8 : *In reliquo reposita est mihi corona justitiæ, quam reddet mihi in illa die justus iudex : non solum autem mihi, sed et his qui diligunt adventum ejus.* Et sciendum quod solum secundum differentiam caritatis est differentia beatitudinis et non secundum aliquam aliam virtutem. Multi enim magis abstinentes fuerunt quam Apostoli; sed ipsi in beatitudine omnes alios excellunt propter excellentiam caritatis : ipsi enim fuerunt *primitias spiritus habentes*, sicut dicit Apostolus Rom. viii, 23. Unde differentia beatitudinis est ex differentia caritatis. Et sic patent quatuor quæ in nobis efficit caritas.

Sed præter illa quædam alia efficit quæ prætermittenda non sunt. Primo enim

efficit peccatorum remissionem; et hoc manifeste videmus ex nobis. Si enim aliquis aliquem offendit, et ipsum postea intime diligit, propter dilectionem sibi offensam laxat : sic et Deus diligentibus se peccata dimittit. I Pet. iv, 8 : *Caritas operit multitudinem peccatorum.* Et bene dicit, *Operit*, quia scilicet a Deo non videntur ut puniat. Sed licet dicat quod operit multitudinem, tamen Salomou dicit, Proverb. x, 12, quod *universa delicta operit caritas* : et hoc maxime manifestat Magdalenæ exemplum, Lucæ, vii, 47 : *Dimissa sunt ei peccata multa* : et causa subditur : *quoniam dilexit multum.*

Sed forte dicet aliquis : Sufficit ergo caritas ad delenda peccata, et non est necessaria pœnitentia. Sed considerandum quod nullus vere diligit qui non vere pœnitet. Manifestum est enim quod quanto magis aliquem diligimus, tanto magis dolemus si ipsum offendimus; et hic est unus caritatis effectus.

Item causat cordis illuminationem : sicut enim dicit Job xxxvii, 19 : *omnes involvimur tenebris.* Frequenter enim nescimus quid agendum vel desiderandum; sed caritas docet omnia necessaria ad salutem : ideo dicitur I Joan. ii, 27 : *Uctio ejus docet vos de omnibus.* Et hoc ideo est, quia ubi caritas, ibi Spiritus sanctus, qui novit omnia, qui deducit nos in viam rectam, sicut dicitur in Psalm. cxlii : ideo dicitur Eccl. ii, 10 : *Qui timetis Deum, diligite illum; et illuminabuntur corda vestra*, scilicet ad sciendum necessaria ad salutem. Item perficit in homine perfectam lætitiã : nullus enim vere gaudium habet, nisi existens in caritate. Quicumque enim aliquod desiderat, non gaudet nec lætatur nec quietatur donec illud adipiscatur. Et accidit in rebus temporalibus quod non habitum appetatur et habitum despicitur et tædium generat; sed non sic est in spiritualibus; immo qui Deum diligit, habet ipsum : et ideo animus diligentis et desiderantis quietatur in eo. *Qui enim manet in caritate, in Deo manet, et Deus in eo*, ut dicitur I Joan. iv, 16. Item efficit pacem perfectam. Accidit enim in rebus temporalibus quod frequenter desiderantur; sed ipsis habitis adhuc animus desiderantis non quiescit; immo uno habito, aliud appetit. Isa. lvi, 20 : *Cor autem impii quasi mare*

<sup>4</sup> Al. : « ad facilitatem. »

*fervens quod quiescere non potest* : item ibid 20 : *Non est pax impiis, dicit Dominus*. Sed non sic accidit in caritate circa Deum : qui enim diligit Deum, pacem perfectam habet. Ps. cxviii, 165 : *Pax multa diligentibus legem tuam, et non est illis scandalum*. Et hoc ideo est, quia solus Deus sufficit ad implendum desiderium nostrum : *Deus enim major est corde nostro*, sicut dicit Apostolus : et ideo dicit Augustinus in I *Confessionum*, c. 1, § 1 : « Fecisti nos Domine ad te, et inquietum est cor nostrum, donec requiescant in te. » Psalm. cii, 5 : *Qui replet in bonis desiderium tuum*. Item facit caritas hominem magnæ dignitatis. Omnes enim creaturæ ipsi divinæ majestati serviunt (omnia enim ab ipsa sunt facta) sicut artificialia subserviunt artifice ; sed caritas de servo facit liberum et amicum : unde ait Dominus Apostolis, Joan. xv, 25 : *Jam non dicam vos servos, sed amicos*.

Sed numquid Paulus non servus ; sed et alii Apostoli, qui se servos scribunt ? Sed sciendum, quod duplex est servitus. Prima est timoris ; et hæc est pœnosa, et non meritoria : si enim aliquis a peccato abstinet solum timore pœnæ, non meretur ex hoc, sed adhuc est servus. Secunda est amoris : si enim quis operatur non timore justitiæ sed amore divino, non sicut servus operatur, sed sicut liber, quia voluntarie : et ideo dicit : *Jam non dicam vos servos*. Et quare ? Ad hoc respondet Apostolus Rom viii, 15 : *Non accepistis spiritum servitutis iterum in timore ; sed accepistis spiritum adoptionis filiorum*. Timor enim non est in caritate, sicut dicitur I Joan. iv, 18 ; habet enim pœnam ; sed caritas facit non solum liberos, sed etiam filios, *ut scilicet filii Dei nominemur et simus*, ut dicitur I Joan. iii, 3. Tunc enim extraneus efficitur alicujus filius adoptivus, quando acquirit sibi jus in hereditate illius ; sic et caritas acquirit jus in hereditate Dei, quæ est vita æterna : quia, ut dicitur Rom, viii, 16 : *Ipse Spiritus testimonium reddit spiritui nostro quod sumus filii Dei*. Si autem filii, et heredes quidem Dei, coheredes autem Christi. Sap. v, 5 : *Ecce quomodo computati sunt inter filios Dei*.

## CAPUT IV.

*Quod laborandum est ad habendam caritatem, et quæ sunt etiam ad acquirendum necessaria*.

Ex jam dictis patent utilitates caritatis. Postquam igitur tam utilis est, studiose laborandum est ad acquirendam eam et retinendam. Sed sciendum quod nullus a se caritatem habere potest, immo solius Dei est donum : unde Joannes dicit I Joan. vi, 10 : *Non quasi nos dilexerimus Deum, sed quoniam ipse prior dilexit nos* : quia videlicet non propterea ipse nos diligit quia nos prius dilexerimus eum ; sed hoc ipsum quod diligimus eum, causatur in nobis ex dilectione ipsius. Considerandum etiam quod licet omnia dona sint a Patre luminum, istud tamen donum, scilicet caritatis, omnia alia dona superexcellit : omnia enim alia sine caritate et Spiritu sancto habentur, cum caritate vero necessario Spiritus sanctus habetur. Apostolus Rom. v, 5 : *Caritas Dei diffusa est in cordibus nostris per Spiritum sanctum, qui datus est nobis*. Sive enim sit donum linguarum, sive scientiæ, sive prophetiæ, absque gratia et Spiritu sancto habentur.

Sed licet caritas sit donum divinum, ad ipsam tamen habendam requiritur dispositio ex parte nostra. Et ideo sciendum quod duo specialiter ad acquirendam caritatem necessaria sunt, et duo ad augmentum caritatis jam acquisitæ. Ad acquirendam igitur caritatem primum est diligens divini verbi auditio ; et hoc manifestum est satis ex his quæ sunt apud nos. Audientes enim bona de aliquo, in ejus dilectionem accendimur : sic et Dei verba audientes, accendimur in amorem ipsius. Psalm. cxviii, 140 : *Igitur eloquium tuum vehementer, et servus tuus dilexit illud*. Item Psalm. civ, 20 : *Eloquium Domini inflammavit eum*. Et propterea illi duo discipuli divino amore æstuantes dicebant, Lucæ xxiv, 32 : *Nonne cor nostrum ardens erat in nobis dum loqueretur in via, et aperiret nobis Scripturas ?* Unde et Act. x, legitur quod prædicante Petro, Spiritus sanctus in auditores divini verbi cecidit. Et hoc frequenter accidit in prædicationibus quod qui duro corde accedunt, propter verbum prædicationis ad divinum amo-



rem accenduntur. Secundum est bonorum continua cogitatio Psalm. xxxviii, 4 : *Concaluit cor meum intra me*. Si ergo vis divinum amorem consequi, mediteris bona. Durus enim nimis esset qui divina beneficia quæ consecutus est, pericula etiam quæ evasit, et beatitudinem quæ sibi a Deo repromittitur, cogitans, ad divinum amorem non accenderetur : unde Augustinus : « Durus est animus hominis qui etsi dilectionem nolit impendere, saltem non velit rependere. » Et universaliter, sicut cogitationes malæ destruunt caritatem, ita bonæ eam acquirunt, nutriunt et conservant : unde jubemur Isa. i, 16 ; *Auferte malum cogitationum vestrarum ab oculis meis*. Sap. i, 3 : *Perversæ cogitationes separant a Deo*. Sunt autem et duo quæ habitam caritatem augment. Primum est cordis separatio a terrenis. Cor enim perfecte in diversa ferri non potest : unde nullus valet Deum et mundum diligere : et ideo quanto magis ab amore terrenorum noster animus elongatur, tanto magis firmatur in dilectione divina. Unde Augustinus dicit in lib. LXXXIII, *Quæst* : Q. xxxvi, § 1. « Caritatis venenum est spes adipiscendorum aut retinendorum temporalium ; nutrimentum ejus est imminutio cupiditatis ; perfectio, nulla cupiditas : quia *radix omnium malorum est cupiditas*. » I ad Timoth. vi, 10. Quisquis igitur caritatem nutrire vult, instet minuendis cupiditatibus. Est autem cupiditas amor adipiscendi aut obtinendi temporalia. Hujus imminuendæ initium est Deum timere, qui solus timeri sine amore non potest. Et propter hoc ordinatæ fuerunt religiones, in quibus et per quas a mundanis et corruptibilibus animus trahitur, et erigitur ad divina : quod signatur II Machab. i, 22, ubi dicitur : *Refulsit sol, qui prius erat in nubilo*. Sol, idest intellectus humanus, est in nubilo, quando deditus est terrenis, sed refulget, quando a terrenorum amore elongatur et retrahitur. Tunc enim splendet, et tunc divinus amor in eo crescit. Secundum est firma patientia in adversis. Manifestum est enim quod quando gravia pro eo quem diligimus, sustinemus, amor ipse non destruitur, immo crescit. Cantic. viii, 7 : *Aquæ multæ*, (idest tribulationes multæ) *non potuerunt extinguere caritatem*. Et

ideo sancti viri qui adversitates pro Deo sustinent, magis in ejus dilectione firman-  
tur ; sicut artifex illud artificium magis diligit in quo plus laboravit. Et inde est quod fideles quanto plures afflictiones pro Deo sustinent, tanto magis elevantur in amore ipsius, Genes. vii, 17 : *Multipliatæ sunt aquæ* (idest tribulationes) *et elevaverunt arcam in sublime*, idest Ecclesiam, vel animam viri justii.

#### CAPUT V<sup>1</sup>.

##### *Quæ requiruntur ad implendum præceptum de dilectione Dei.*

Interrogatus Christus ante passionem, a legisperitis quod esset maximum et primum mandatum, dixit, Matth. xxii, 37 : *Diliges Dominum Deum tuum ex toto corde tuo, et in tota mente tua ; hoc est maximum et primum mandatum*. Ut vere istud est majus et nobilius et utilius inter omnia mandata, sicut satis manifestum est : in hoc enim omnia mandata implentur. Sed ad hoc quod istud præceptum dilectionis possit perfecte impleri : quatuor requiruntur. Primum est divinorum beneficiorum rememoratio : quia omnia quæ habemus, sive corpus, sive exteriora, habemus, a Deo : et ideo oportet quod sibi de omnibus serviamus, et eum diligamus corde perfecto. Nimis enim ingratus est qui cogitans alicujus beneficia eum non diligit. Hæc recogitans David dicebat, I Paralip. xxix, 14 : *Tua sunt omnia : quæ de manu tua accepimus, delimus tibi*. Et ideo in ejus laudem dicitur Eccli. xlvii 10 : *De omni corde suo laudavit Dominum et dilexit Deum qui fecit illum*. Secundum est divinæ excellentiæ consideratio. *Deus enim major est corde nostro*, I Joan. iii, 20 : unde si toto corde et viribus ei serviamus, adhuc non sufficimus. Eccli. xliii, 32 : *Glorificantes Dominum quantumcumque potueritis, supervalebit adhuc . . . Benedicentes Dominum exaltate illum quantum potestis : major est enim omni laude*. Tertium est mundanorum et terrenorum abdicatio. Magnam enim injuriam Deo qui aliquid ei adæquat. Isa. xl, 18 : *Cui similem fecistis Deum ?* Tunc autem alia Deo adæquamus, quando

<sup>1</sup> Hic Parm. habet quemdam titulum : de di-

lectione Dei. »



res temporales et corruptibiles simul cum Deo diligimus. Sed hoc est omnino impossibile : propterea dicitur Isa. xxviii, 20 : *Coangustatum est stratum, ita ut alter decidat; et pallium breve utrumque operire non potest.* Ubi cor hominis assimilatur strato arcto et pallio brevi. Cor enim humanum arctum est in respectu ad Deum : unde quando alia ab eo in corde tuo recipis, ipsum expellis : ipse enim non patitur consortem in anima, sicut nec vir in uxore : et ideo dicit ipse Exod. xx, 5 : *Ego sum Deus tuus zelotes.* Nihil enim vult quod diligamus quantum eum, aut præter eum. Quartum est omnimoda peccatorum vitatio. Nullus enim potest diligere Deum in peccato existens. Matth. vi, 24 : *Non potestis Deo servire et mammonæ.* Unde si in peccato existis, Deum non diligis. Sed ille diligebat qui dicebat, Isa. xxxviii, 3 : *Memento quomodo ambulaverim coram te in veritate et in corde perfecto.* Præterea dicebat Elias III, Reg. xviii, 21 : *Quousque claudicatis in duas partes?* Sicut claudicans, nunc huc nunc illuc inclinatur ; sic et peccator nunc peccat, nunc Deum quærere nititur. Et ideo Dominus dicit Joelis ii, 12 : *Convertimini ad me in toto corde vestro.*

Sed contra istud præceptum duo genera hominum peccant. Illi scilicet homines, qui vitando unum peccatum, utputa luxuriam, aliud committunt, ut usuram. Sed nihilominus damnantur : quia *qui offendit in uno, factus est omnium reus*, ut dicitur Jac. ii, 10. Item sunt aliqui qui confitentur quædam, quædam non, vel quantum ad diversos confessionem dividunt. Sed isti non merentur, immo peccant in hoc, quia Deum decipere intendunt, et quia divisionem in sacramento committunt. Quantum ad primum dicit quidam : *Impium est a Deo dimidiam sperare veniam.* Quantum ad secundum, Psal. lxi, 9 : *Effundite coram illo corda vestra :* quia videlicet omnia sunt in confessione revelanda.

## CAPUT VI.

*Quis modus sit divinæ dilectionis, et quæ ei dare debemus.*

Jam ostensum est quod homo se Deo dare tenetur ; nunc considerandum est quid homo de se Deo dare debeat : debet

enim homo Deo dare quatuor : scilicet cor, animam, mentem et fortitudinem : et ideo dicitur Matth. xxii, 37 : *Diliges Dominum Deum tuum ex toto corde tuo, ex tota anima tua, et ex tota mente tua, et ex tota virtute,* idest fortitudine tua. Sciendum est autem, quod per cor intelligitur hic intentio. Est autem intentio tantæ virtutis quod omnia opera ad se trahit : unde quæcumque bona mala intentione facta, in mala convertuntur. Lucæ xi, 34 : *Si oculus tuus (idest intentio) nequam fuerit, totum corpus tenebrosum erit ;* idest congeries bonorum operum tuorum tenebrosa erit. Et propterea in omni opere nostro intentio ponenda est in Deo. Apostolus I Corinth. x, 31 : *Sive ergo manducatis, sive bibitis, vel aliud quid facitis, omnia in gloriam Dei facite.* Sed bona intentio non sufficit ; immo oportet quod adsit bona voluntas, quæ per animam significatur. Frequenter enim aliquis bona intentione operatur, sed inutiliter, cum bona voluntas desit ; ut si quis furetur ut pascat pauperem, est quidem recta intentio, sed deest rectitudo debitæ voluntatis : unde nullum malum bona intentione factum excusatur. Rom. iii, 8 : *Qui dicunt, Faciamus mala ut veniant bona : quorum damnatio justa est.* Tunc autem adest bona voluntas intentioni, quando ipsa voluntas voluntati divinæ concordat ; quod quotidie postulamus dicentes : *Fiat voluntas tua sicut in cælo et in terra ;* et Psal. xxxix, 9. *Ut facerem voluntatem tuam, Deus meus, volui.* Et propter hoc dicit, *In tota anima tua.* Anima enim in Scriptura frequenter pro voluntate accipitur, ut Hebr. x, 38 : *Quod si subtraxerit se, non placebit animæ meæ.* idest voluntati meæ. Sed aliquando est bona intentio et bona voluntas, sed in intellectu quandoque aliquod peccatum habetur ; et ideo totus intellectus dandus est Deo. Apostolus II Corinth. x, 5 : *In captivitatem redigentes omnem intellectum in obsequium Christi.* Multi enim in opere non peccant, sed tamen volunt ipsa peccata cogitare frequenter ; contra quos dicitur Isa. i, 16 : *Auferte malum cogitationum vestrarum.* Sunt etiam multi qui in sua sapientia confidentes, nolunt fidei assentire, et tales non dant mentem Deo. Contra hos dicitur Proverb. iii, 5 : *Ne in-nitaris prudentiæ tuæ.* Sed istud non sufficit ; immo totam virtutem et fortitudinem Deo dare oportet. Psalm. lvm, 10 : *Fortitudinem meam ad te custodiam.* Ali-

qui enim sunt qui fortitudinem suam tri-  
luunt ad peccandum, et in hoc suam po-  
tentiam manifestant; contra quos dicitur  
Isai. v, 22 : *Væ qui potentes estis ad biben-  
dum vinum, et viri fortes ad miscendam  
ebrietatem.* Aliqui ostendunt potentiam  
suam vel virtutem in nocendo proximis,  
deberent eam ostendere in subveniendo  
ipsa. Prov. xxiv, 11 : *Erue eos qui ducun-  
tur ad mortem; et qui trahuntur ad inter-  
itum, liberare ne cesses.* Igitur ad diligen-  
dum Deum danda sunt ista Deo : scilicet  
intentio, voluntas, mens, et <sup>1</sup> fortitudo.

## CAPUX VII.

*Quæ et quod ad dilectionem proximi nos  
inducunt<sup>2</sup>.*

Interrogatus Christus quod esset maxi-  
mum mandatum, uni interrogationi duas  
responsiones dedit. Et prima fuit : *Diliges  
Dominum Deum tuum* : de quo dictum  
est; secunda vero fuit : *Et proximum  
tuum sicut teipsum.* Ubi considerandum  
est, quod qui hoc servat, totam legem  
implet. Apostolus, Rom. xii, 10 : *Pleni-  
tudo legis est dilectio.* Sed sciendum, quod  
ad dilectionem proximi quatuor nos indu-  
cunt. Primo divinus amor : quia sicut di-  
citur I Joan. iv, 20 : *Si quis dixerit quon-  
iam diligo Deum, et fratrem suum  
oderit, mendax est.* Qui enim dicit se di-  
ligere aliquem, et filium ejus vel ejus  
membra odio habet, mentitur. Omnes  
autem fideles filii et membra Christi su-  
mus. Apostolus, I Corinth. xii, 27 : *Vos  
estis corpus Christi, et membra de mem-  
bro.* Et ideo qui odit proximum, non dili-  
git Deum. Secundum est divinum præcep-  
tum. Christus enim in recessu suo inter  
omnia alia præcepta, hoc præceptum dis-  
cipulis præcipue commendavit dicens,  
Joan. xv, 12 : *Hoc est præceptum meum,  
ut diligatis invicem sicut dilexi vos.* Nul-  
lus enim præcepta divina servat qui  
proximum odit unde istud est signum  
observantiæ divinæ legis, dilectio proxi-  
mi : unde Dominus, Joan. xiii, 35 : *In  
hoc cognoscent omnes quia discipuli  
mei estis, si dilectionem habueritis ad  
invicem.* Non dicit in suscitatione mor-  
tuorum, non in aliquo evidenti signo;  
sed hoc est signum, *si dilectionem ha-*

*bueritis ad invicem.* Et hoc beatus Joanes  
recte considerabat : unde dicebat I  
Joan. iii, 14 : *Nos scimus quoniam trans-  
lati sumus de morte ad vitam.* Et quare?  
*Quoniam diligimus fratres. Qui non dili-  
git, manet in morte.* Tertium est naturæ  
communicatio : sicut enim dicitur Eccli.  
xiii, 19, *omne animal diligit simile sibi.*  
Unde cum omnes homines sint similes  
in natura, invicem se diligere debent; et  
ideo odire proximum non solum est con-  
tra divinam legem, sed etiam contra le-  
gem naturæ. Quantum utilitatis consecutio :  
omnia enim alterius alii sunt utilia  
per caritatem : hæc enim est quæ unit  
Ecclesiam, omnia communia facit. Psalm.  
cxviii, 63 : *Particeps ego sum omnium  
timentium te, et custodientium mandata  
tua.*

## CAPUT VIII.

*De modo dilectionis proximi.*

*Diliges proximum tuum sicut teipsum.*  
Istud est secundum præceptum legis, et  
est de dilectione proximi. Quantum au-  
tem proximum diligere debeamus, jam  
dictum est; et dicendum restat de modo  
dilectionis : qui quidem innuitur cum  
dicitur, *Sicut teipsum.* Circa quod ver-  
bum quinque considerare possumus,  
quæ in dilectione proximi servare debe-  
mus. Primum est quia debemus eum  
diligere vere sicut nos : quod facimus,  
si propter seipsum ipsum diligimus, non  
propter nos. Ideo notandum, quod tri-  
plex est amor; quorum duo non sunt  
veri, tertius autem verus. Primus est  
qui est propter utile. Eccli, vi, 10 : *Est  
amicus socius mensæ, et non permanebit  
in die necessitatis.* Sed certe iste non est  
verus amor : deficit enim deficiente uti-  
litate; et nunc nolumus bonum proximo,  
sed potius bonum utilitatis volumus  
nobis. Est et alius amor qui est propter  
delectabile; et hic etiam non est verus,  
quia deficiente delectabili deficit : et ideo  
nolumus bonum propter hoc principaliter  
proximo, sed potius bonum suum nobis  
volumus. Tertius est amor qui est propter  
virtutem; et iste solus est verus. Tunc  
enim non diligimus proximum propter  
bonum nostrum, sed propter suum. Se-

<sup>1</sup> Parm. omittit : « et. »

<sup>2</sup> Hic Parm. habet quemdam titulum : « de di-  
lectione proximi. »

cundum est quod debemus diligere ordinatæ : ut scilicet non diligamus eum supra Deum vel quantum Deum, sed juxta sicut teipsum debes diligere. Cantic. II, 4 : *Ordinavit in me caritatem.* Hunc ordinem docuit Dominus Matth. X, 37, dicens : *Qui amat patrem aut matrem plus quam me, non est me dignus ; et qui amat filium aut filiam super me, non est me dignus.* Tertium est quod debemus eum diligere efficaciter. Non enim te solum diligis, sed etiam procuras studiose tibi bona, et vitas mala. Sic quoque debes facere proximo. Joan. III, 18 : *Non diligamus Verbo nequelingua, sed opere et veritate.* Sed certe illi pessimi sunt qui ore diligunt et corde nocent ; de quibus Psalm. XXVII, 3 : *Loquuntur pacem cum proximo suo, mala autem in cordibus eorum.* Apostolus, Rom. XII, 9 : *Dilectio sine simulatione.* Quartum, quod debemus eum diligere perseveranter, sicut et te perseveranter diligis. Prov. XVII, 17 : *Omni tempore diligit qui amicus est, et frater in angustiis comprobatur :* scilicet tam tempore adversitatis quam prosperitatis ; immo tunc, scilicet tempore adversitatis, maxime probatur amicus, ut dicitur ibidem.

Sed sciendum, quod duo sunt quæ juvant ad amicitiam conservandam. Primum est patientia : *vir enim iracundus suscitatur rixas,* ut dicitur Proverb. XXVI, 24. Secundum est humilitas, quæ causat primum, scilicet patientiam : Prov. XIII, 10 *Inter superbos semper jurgia sunt.* Qui enim considerat magna de se, et despicit alium, non potest defectus illius pati.

Quintum est quod eum debemus diligere juste et sancte, ut scilicet eum non diligamus ad peccandum, quia nec te sic debes diligere, cum Deum ex hoc amittas : unde Joan. XV, 9 : *Manete in dilectione mea :* de qua dilectione dicitur Eccli. XXIV, 24 : *Ego mater pulchræ dilectionis.*

## CAPUT IX.

*Quod debemus etiam diligere inimicos.*

*Diliges proximum tuum sicut teipsum.* Hoc præceptum Judæi et Pharisæi male intelligebant, credentes quod Deus præciperet diligendos amicos, et odiendos inimicos ; et ideo per proximos intelligebant tantum amicos. Hunc autem in-

tellectum intendit Christus reprobare, dicens Matth. V, 44 : *Diligite inimicos vestros, benefacite his qui oderunt vos.*

Sciendum autem, quod quicumque odit fratrem suum, non est in statu salutis : I Joan. II, 2 : *Qui odit fratrem suum, in tenebris est.* Est autem ostendendum, quod etiam in hoc invenitur quædam contrarietas : nam sancti aliquos oderunt : Psalm. CXXXVIII, 22 : *Perfecto odio oderam illos :* et in Evangelio Lucæ XIV, 26 : *Si quis non odit patrem suum et matrem et uxorem et filios et fratres et sorores, adhuc autem et animam suam, non potest meus esse discipulus.* Et ideo sciendum ; quod in omnibus factis nostris factum Christi debet esse nobis exemplum. Deus enim diligit et odit. Quia in quolibet homine duo sunt consideranda : scilicet natura et vitium. Natura quidem in hominibus diligi debet, vitium vero odiri. Unde si quis vellet hominem esse in inferno, odiret naturam ; si quis vero vellet ipsum esse bonum odiret peccatum, quod semper odiendum est. Psalm. V, 7 : *Odisti omnes qui operantur iniquitatem.* Sapient. XI, 25 : *Diligis Domine omnia quæ sunt, et nihil odisti eorum quæ fecisti.* Ecce ergo quod Deus diligit et odit : diligit naturam et odit vitium.

Sciendum etiam, quod homo aliquando sine peccato potest malum facere : quando scilicet sic facit malum ut velit bonum : quia et Deus sic facit. Sicut cum homo infirmatur, convertitur ad bonum, qui in sanitate erat malus : item in adversitate aliquis convertitur et est bonus, qui in prosperitate erat malus, juxta illud Isai. XXVIII, 19 : *Vexatio intellectum dabit auditui.* Item si desideras malum tyranni destruentis Ecclesiam, in quantum desideras bonum Ecclesiæ per destructionem tyranni : unde II Machab. I, 47 : *Per omnia benedictus Deus, qui tradidit impios.* Et hoc omnes debent velle non solum voluntate, sed etiam opere. Non enim est peccatum suspendere juste malos : ministri enim Dei sunt tales, secundum Apostolum, Roman. XIII, et servant isti dilectionem : quia pœna fit aliquando propter castigationem, aliquando propter bonum melius et divinius. Est enim majus bonum unius civitatis quam vita unius hominis.

Sed sciendum, quod non sufficit non velle malum, sed oportet velle bonum ; scilicet emendationem suam, et vitam æternam. Duobus enim modis qui vult

bonum alterius. Uno modo generaliter, in quantum est creatura Dei, et participabilis vitæ æternæ; alio modo specialiter, in quantum est amicus vel socius. A generali autem dilectione nullus excluditur: debet enim quilibet pro quolibet orare, et cuilibet in necessitate ultima subvenire. Sed non teneris cum quolibet habere familiaritatem, nisi peteret veniam: quia tunc esset amicus; et si refutares, haberes odio amicum: unde Matth. vi, 14, dicitur: *Si dimiseritis hominibus peccata eorum, dimittet et Pater vester cælestis delicta vestra; si autem non dimiseritis hominibus, nec Pater vester dimittet vobis peccata vestra.* Et in *Oratione dominica* quæ ponitur Matth. vi, dicitur: *Dimitte nobis debita nostra, sicut et nos dimittimus debitoribus nostris.*

## CAPUT X.

*Quæ ad attrahendum inimicum ad nos, nos inducunt.*

*Diliges proximum tuum sicut te ipsum.* Dictum est, quod tu peccas, si non pareis veniam postulanti; et quod perfectionis est, si tu eum ad te revocas, licet non tenearis. Sed ad hoc ut eum trahas ad te, multæ rationes inducunt. Prima est propriæ dignitatis conservatio: diversæ enim dignitates diversa signa habent. Nullus autem propriæ dignitatis signa dimittere debet. Inter omnes autem dignitates major est quod quis sit filius Dei. Hujus autem dignitatis signum est, si diligis inimicum: Matth. v, 44: *Diligite inimicos vestros, ut sitis filii Patris vestri qui in cælis est.* Si enim diligis amicum, non est hoc signum filiationis divinæ nam publicani et ethnici hoc faciunt, ut dicitur Matth. v. Secunda est victoriæ acquisitio: omnes enim hoc naturaliter desiderant. Oportet ergo quod vel trahas eum qui te offendit ad dilectionem bonitate tua, et tunc vincis; vel quod alius trahat te ad odium, et tunc perdis. Roman. xii, 21: *Noli vinci a malo, sed vince in bono malum.* Tertia est multiplicis utilitatis consecutio. Acquiris enim ex hoc amicos: Roman. xii, 20: *Si esurierit inimicus tuus, cibum illum; si sitit, potum da illi: hoc enim faciens,*

*carbones ignis congeres super caput ejus,* Augustinus: Nulla major provocatio ad amorem, quam prævenire amando. Nullus enim est ita durus, qui etsi dilectionem nolit impendere, nolit tamen respondere: quia, ut dicitur Eccli. vi, 15: *amico fidei nulla comparatio.* Prov. xvi, 7: *Cum placuerint Domino viæ hominis, inimicos quoque ejus convertet ad pacem.* Quarta est, quia ex hoc preces tuæ facilius exaudiuntur: unde super illud Jerem. xv: *Si steterint Moyses et Samuel coram me,* dicit Gregorius, quod fecit potius de istis mentionem, quia rogaverunt pro inimicis. Similiter Christus ait Lucæ xxiii, 34: *Pater dimitte illis.* Item beatus Stephanus orando pro inimicis magnam utilitatem fecit Ecclesiæ, quia Paulum convertit. Quinta est peccati evasio, quam maxime desiderare debemus. Aliquando enim peccamus, nec Deum quærimus: et Deus trahit nos ad se vel infirmitate, vel aliquo hujusmodi. Osee ii, 6: *Sepiam viam tuam spinis.* Sic fuit tractus beatus Paulus. Psalm. cxxviii, 176: *Erravi sicut ovis quæ periit.* *Quære servum tuum, Domine.* Cant. i, 3: *Trahe me post te.* Hoc autem consequimur, si inimicum ad nos trahimus, primo remittentes: quia, ut dicitur Luc. vi, 38: *Eadem mensura qua mensi fueritis, remetietur vobis:* et ibidem 37, *Dimittite et dimittemini:* et Matth. v, 7: *Beati misericordes, quoniam ipsi misericordiam consequentur.* Nulla est enim major misericordia quam offendenti<sup>1</sup> ignoscere.

## CAPUT XI.

*Quod antiqui diversimode errabant contra primum præceptum de adorando Deo<sup>2</sup>.*

*Non habebis deos alienos.* Exod. xx, 3. Sicut jam dictum est, tota lex Christi dependet a caritate. Caritas autem pendet ex duobus præceptis; quorum unum est de dilectione Dei, reliquum de dilectione proximi et de istis duobus jam dictum est; nunc autem sciendum quod Deus dando legem Moysi, dedit decem præcepta in duabus tabulis lapideis scripta: quorum tria in prima tabula scripta pertinent ad amorem Dei, septem vero

<sup>1</sup> Parm.: « dimittere. »

<sup>2</sup> Parm.: « de primo præcepto legis. »



scripta in secunda tabula pertinent ad amorem proximi; et ideo tota lex fundatur in duobus præceptis.

Primum autem quod pertinet ad amorem Dei est, *Non habebis deos alienos*: et ad hujus intellectum sciendum est, quod antiqui multipliciter hoc præceptum transgrediebantur. Quidam enim colebant dæmonia. Psalm. xcvi, 5: *Omnes dii gentium dæmonia*. Hoc autem est maximum omnium peccatorum, et horribile. Nunc quoque multi transgrediuntur hoc præceptum, omnes scilicet qui divinatio- nibus et sortilegiis intendunt. Hæc enim, secundum Augustinum, fieri non possunt quin aliquod pactum cum diabolo contrahatur. I Corinth. x, 20: *Nolo vos fieri socios dæmoniorum*: et iterum ibidem 21, *Non potestis mensæ Domini participes esse, et mensæ dæmoniorum*. Alii colebant cælestia corpora, credentes astra esse deos: Sap. xiii, 2: *Solem et lunam rectores orbis terrarum deos putaverunt*: et ideo Moyses prohibuit Judæis, quod non levarent oculos, nec adorarent solem et lunam et stellas. Deut. iv, 19: *Custodite sollicite animas vestras, ne forte elevatis oculis ad cælum videas solem et lunam et omnia astra cæli, et errore deceptus adores ea, et colas quæ creavit Dominus Deus tuus in ministerium cunctis gentibus*. Idem dicitur Deut. v. Contra hoc præceptum peccant Astrologi, qui dicunt hæc esse animarum rectores; cum tamen propter hominem facta sint, cujus solus Deus rector est. Alii vero colebant inferiora elementa. Sapient. xiii, 2: *Aut ignem aut spiritum deos putaverunt*. In quorum errorem inciderunt homines qui inferioribus male utuntur, nimis ea diligentes. Apostolus Ephes. v, 5: *Aut avarus, quod est idolorum servitus*. Alii errantes colebant homines, vel aves, vel alios, vel seipsos; quod quidem contingit ex tribus. Primo ex carnalitate: Sapient. xiv, 15: *Acerbo luctu dolens pater rapti cito sibi filii, fecit imaginem, et illum qui tunc quasi homo mortuus fuerat, nunc tamquam Deum colere cæpit, et constituit inter servos suos sacra et sacrificia*. Secundo ex adulatione; etenim <sup>1</sup> quidam aliquos quos non potuerunt honorare in præsentia, curaverunt in absentia honorare, faciendo scilicet eorum imagines, et colendo loco

eorum: Sapient. xiv, 17: *Quem honorare volebant, fecerunt ut illum qui aberat, tamquam præsentem colerent*. Tales sunt quicumque diligunt et venerantur homines plusquam Deum. Matth. x, 37: *Qui diligit patrem aut matrem plusquam me, non est me dignus*. Psalm. cxlv, 3: *Nolite confidere in principibus, neque in filiis hominum, in quibus non est salus*. Tertio ex præsumptione: quidam enim ex præsumptione fecerunt se vocari deos, sicut patet Judith. iii, de Nabuchodonosor. Ezech. xxviii, 2: *Elevatum est cor tuum, et dixisti, Deus ego sum*. Et hoc faciunt qui plus suo sensui quam Dei præceptis credunt: isti enim se pro diis colunt: sequentes enim delectationes carnis, corpus suum pro Deo colunt. Apostolus Ph. iii, 19: *Quorum Deus venter est*. Ab his ergo omnibus cavere oportet.

## CAPUT XII.

*Quæ inducunt nos ad adorandum Deum unum.*

« *Non habebis deos alienos coram me.* » Sicut dictum est, primum præceptum legis est hoc, quo prohibemur non colere nisi unum Deum: et ad hoc etiam induemur quinque rationibus. Prima sumitur ex Dei dignitate, quæ si auferatur, fit Deo injuria, sicut potest videri ex consuetudine hominum. Cuilibet enim dignitati debetur reverentia: unde proditor regis est qui aufert quod exhibere teneretur: et hoc quidam Deo faciunt: Roman. i, 23: « *Mutaverunt gloriam incorruptibilis Dei in similitudinem imaginis corruptibilis hominis*: et hoc summe Deo displicet: Isa. xlii, 8: *Gloriam meam alteri non dabo, et laudem meam sculptilibus*. Et considerandum, quod hæc Dei dignitas est, scilicet quod anima sciat: unde Deus dicitur a videndo, hoc enim est unum signum deitatis. Isa. xli, 23: *Annuntiate quæ ventura sunt in futurum, et sciemus quia dii estis vos*. Hebr. iv, 13: *Omnia nuda et aperta sunt oculis ejus*. Hanc autem dignitatem auferunt divinatores: contra quos dicit Isa. vii, 19: *Numquid non populus a Deo suo requireret visionem pro vivis et mortuis*. Secunda ratio sumitur ex ejus largitate.

<sup>1</sup> Al.: « enim. »



Omne enim bonum habemus a Deo; et hoc etiam ad dignitatem Dei pertinet quod factor et dator est omnium bonorum: Psalm. ciii, 28: *Aperiente te manum tuam, omnia implebuntur bonitate*: et hoc importatur in hoc nomine Deus, quod dicitur a distributione, idest dator rerum, quia omnia replet sua bonitate. Nimis ergo ingratus es, si ab illo tibi collatum non recognoseis; immo facis tibi alium Deum, sicut filii Israel educti de Ægypto fecerunt idolum. Oseæ ii, 5: *Vadam post amatores meos*. Hoc etiam fit quando quis in alio quam in Deo spem ponit, hoc est quando adiutorium ab alio petit. Psalm. xxxix, 5: *Beatus vir cujus est nomen Domini spes ejus*. Apostolus ad Galat. iv, 9: *Cum cognoveritis Deum, quomodo convertimini iterum ad infirma et egena elementa? Dies observatis et menses, et tempora et annos*. Tertia ratio sumitur ex promissi firmitate. Abrenuntiavimus enim diabolo, et fidem promissimus soli Deo: unde non debemus ipsam infringere. Hebr. x, 28: *Irritam quis faciens legem Moysi, sine ulla miseratione duobus vel tribus moritur: quanto magis putatis deteriora mereri supplicia qui Filium Dei conculcaverit, et sanguinem testamenti pollutum duxerit, in quo sanctificatus est, et Spiritui gratiæ contumeliam fecerit?* Roman. vii, 3: *Vivente viro vocabitur adultera, si fuerit cum alia viro*: et talis debet comburi. Væ ergo peccatori ingredienti terram duabus viis, et claudicantibus in duas partes. Quarta ratio est ex dominii diabolici gravitate. Jerem. xvi, 13: *Servietis diis alienis die ac nocte, qui non dabunt vobis requiem*. Non enim quiescit in uno peccato, sed potius nititur ad aliud ducere. *Qui facit peccatum, servus est peccati*: Joan. viii, 24; ideo non de facili quis egreditur de peccato. Gregorius: « Peccatum quod per pœnitentiam non diluitur, mox suo pondere in aliud trahit. » Contrarium est de dominio divino: quia præcepta ejus gravia non sunt; Matth. xi, 30: *Jugum enim meum suave est, et onus meum leve*. Satis enim reputatur quis facere, si tantum facit pro Deo quantum fecit pro peccato. Roman. vi, 19: *Sicut exhibuistis membra vestra servire immunditiæ et iniquitati ad iniquitatem; ita nunc exhibete membra vestra servire justitiæ in sanctificationem*. Sed de servis diaboli dicitur Sapient. v, 7: *Lassati sumus in via iniquitatis et perditionis, et ambulavimus vias difficiles*:

et Jerem. ix, 5: *Ut inique agerent, laboraverunt*. Quinta est ex præmii sive muneris immensitate. In nulla enim lege talia promittuntur præmia sicut in lege Christi. Saracenis enim promittuntur fluvii lactis et mellis, Judæis terra promissionis; sed Christianis Angelorum gloria: Matth. xxii, 30: *Erunt sicut Angeli Dei in cælo*. Hoc considerans Petrus ait Joan. vi, 69: *Domine, ad quem ibimus? Verba vitæ æternæ habes*.

### CAPUT XIII.

*De secundo præcepto et quot modis dicitur vanum.*

*Non assumes nomen Domini Dei tui in vanum*. Exod. xx, 7. Hoc est secundum præceptum legis: et sicut non est nisi unus Deus quem debemus colere, ita non est nisi unus quem debemus maxime venerari: et primo quantum ad nomen: unde *non assumes nomen Domini Dei tui in vanum*. Sciendum quod vanum dicitur tripliciter. Aliquando enim dicitur falsum: Psalm. xi, 3: *Vana locuti sunt unusquisque ad proximum suum*. Assumis ergo nomen Dei in vanum, quando assumis illud ad confirmationem falsitatis. Zach. viii, 17: *Juramentum mendax ne diligatis*; Ibidem xiii, 3: *Non vives, quia locutus es mendacium in nomine Domini*. Talis autem facit injuriam Deo, sibi ipsi, et omnibus hominibus. Deo quidem, quia cum jurare per Deum nihil aliud sit nisi invocare ejus testimonium: cum juras falsum, aut credis Deum nescire verum, et sic ponis ignorantiam in Deo, cum tamen *omnia nuda et aperta sint oculis ejus*, ut dicitur ad Hebr. iv, aut quod diligit mendacium, cum tamen cdiat ipsum: Psal. v, 7: *Perdes omnes qui loquuntur mendacium*: aut derogas potentiæ, quasi non possit de eo punire. Item facit injuriam sibi ipsi: obligat enim se judicio Dei. Nihil est autem aliud dicere: *Per Deum ita est, nisi: Quod Deus puniat me, si non est ita*. Item injuriatur aliis hominibus. Nulla enim inter aliquos societas durare potest, nisi credant sibi invicem. Dubia autem juramenti confirmantur. Hebr. vi, 16: *Omnis controversiæ finis ad confirmationem est juramentum*. Injuriatur ergo Deo, crudelis est sibi, et noxius est hominibus. Aliquando dicitur vanum, inutile: Psalm. xciii, 11: *Domini*

*nus scit cogitationes hominum, quoniam vanæ sunt* : et ideo confirmando vanitatem assumitur nomen Dei in vanum. In veteri enim lege prohibitum fuit ut non juraretur falsum : Deuter. v, 11 : *Non usurpabis nomen Dei tui frustra* : sed Christus prohibuit non nisi in necessitate jurare ; et ideo dicitur Matth. v, 33 : *Audistis quia dictum est antiquis : Non jurabis. Ego autem dico vobis : Nolite jurare omnino.* Et hujus ratio est, quia in nulla parte ita fragiles sumus sicut in lingua : quia eam *nullus domare potuit*, sicut dicitur Jacob. iii, 8 et ideo de levi posset homo dejerare. Matth. v, 37 : *Sit sermo vester : Est est, non non* ; et iterum vers. 34 : *Ego autem dico vobis : Nolite jurare omnino.*

Et, nota quod juramentum est sicut medicina, quæ non semper accipitur, sed in necessitate : et ideo, ut dicitur Matth. v, 37, *quod his amplius est, a malo est.* Eccl. xxiii, 9 : *Jurationi non assuescas os tuum : multi enim casus in illa. Nominatio vero Dei non sit assidua in ore tuo, et nominibus sanctorum ne admiscearis : quoniam non eris immunis ab eis.*

Aliquando autem dicitur vanum, peccatum vel injustitia. Psalm. iv, 3 : *Filii hominum usquequo gravi corde? Ut quid diligitis vanitatem?* Qui ergo jurat pro peccato faciendo, assumit nomen Dei sui in vanum. Justitiæ vero partes sunt facere bonum, et dimittere malum. Si ergo juras facere furtum, vel aliud hujusmodi, hoc contra justitiam est : et quamvis non sit servandum hoc juramentum, tamen sic jurans perjurus est. Talis fuit Herodes contra Joannem, Marc. vi. Similiter contra justitiam facit qui jurat non facere bonum, sicut non intrare Ecclesiam vel religionem : et hoc etiam juramentum non est servandum, et tamen perjurus est jurans. Non est ergo jurandum de falso, non de inutili, non etiam de injustitia : et ideo dicitur Jerem. iv, 2 : *Et jurabis, Vivit Dominus, in veritate et in judicio et in justitia.* Vanum dicitur aliquando fatuum : Sap. xiii, 1 : *Vani sunt omnes homines in quibus non est scientia Dei.* Qui ergo accipiunt nomen Dei stulte, sicut blasphemi, assumunt nomen Dei in vanum. Levit. xxiv, 16 : *Qui blasphemaverit nomen Domini, morte morietur.*

*Non assumes nomen Domini Dei tui in vanum.* Sciendum quod nomen Dei sumitur ad sex. Primo quidem ad dicti

confirmationem sicut in juramento ; et in hoc confitemur quod prima veritas non est nisi in Deo. In hoc autem fit reverentia Deo : unde in lege præcipitur Deuter. vi quod non juretur nisi per Deum. Contrarium faciunt qui aliter jurant. Exod. xxiii, 13 : *Non jurabis per nomina deorum exterorum.* Et quamvis aliquando juretur per creaturas, tamen sciendum quod in omnibus his non juratur nisi per Deum. Cum enim juras per animam tuam vel caput tuum, idem est quod eam obligare pœnæ infligendæ a Deo. Apostolus II Corinth. i, 23 : *Testem Deum invoco in animam meam.* Item cum juras per Evangelium, juras per Deum, qui dedit Evangelium : et ideo peccant qui jurant per Deum de facili, aut per Evangelium. Secundo sumitur ad sanctificationem. Baptismus enim sanctificat. Apostolus I Corinth. vi, 11 : *Sed abluti estis, sed sanctificati estis, sed justificati estis in nomine Domini nostri Jesu Christi.* Hoc autem non habet virtutem nisi in invocatione Trinitatis. Jerem. xiv, 9 : *Tu autem in nobis es, Domine, et nomen sanctum tuum invocatum est super nos.* Tertio sumitur ad adversarii expulsionem : unde ante baptismum abrenuntiatur diabolo : Isa. vi, 1 : *Tantummodo invocetur nomen tuum super nos, aufert opprobrium nostrum.* Et ideo si redis ad peccata, nomen Dei sumitur in vanum. Quarto sumitur ad ejusdem nominis confessionem. Apostolus Rom. x, 14 : *Quomodo invocabunt in quem non crediderunt?* et iterum vers., 13 : *Omnis enim quicumque invocaverit nomen Domini salvus erit.* Confitemur autem primo ore ad manifestandum gloriam Dei : Isa. xliii, 7 : *Omnis qui invocat nomen meum, in gloriam meam creavi eum.* Ergo si dicis aliquid contra gloriam Dei, assumis nomen Dei in vanum. Confitemur secundo opere, cum ea operamur quæ gloriam Dei manifestant : Matth. v, 16 : *Videant opera vestra bona, et glorificent Patrem vestrum qui in cœlis est.* Contrarium faciunt quidam, de quibus dicit Apostolus Roman. ii, 24 : *Nomen Dei per vos blasphematur inter Gentes.* Quinto assumitur ad defensionem : Proverb. xviii, 10 : *Turris fortissima nomen Domini : ad ipsam currit justus, et exaltabitur.* Mach. ult., 17 : *In nomine meo dæmonia ejicient.* Actuum iv, 12 : *Non est aliud nomen sub cœlo datum hominibus, in quo oporteat nos salvos fieri.* Sexto sumitur ad operis

completionem : Apostolus Coloss. III, 17 : *Omne quodcumque facitis in verbo, aut in opere, omnia in nomine Domini nostri Jesu Christi facite.* Psalm. CXXIII, 8 : *Adjutorium nostrum in nomine Domini.* Sed quia aliquando aliquis indiscrete accipit <sup>1</sup>, sicut accipit in voto quod non adimpletur, tunc etiam in vanum nomen Domini assumitur. Unde Eccl. V, 3 : *Si quid vovisti Deo, ne moreris reddere.* Psalm <sup>2</sup>. LXXV, 12 : *Vovete et reddite Domino Deo vestro omnes qui in circuitu ejus affertis munera. Displicet enim ei infidelis et stulta promissio :* Eccl. V, 3.

#### CAPUT XIV.

*De tertio præcepto, et propter quæ datum fuit a deo.*

*Memento ut diem sabbati sanctifices.* Exod. XX, 8. Hoc est tertium mandatum legis, et convenienter. Primo enim debemus Deum venerari corde : unde præcipitur quod non colatur nisi unus Deus : unde *non habebis deos alienos coram me.* Secundo ore : unde *non assumes nomen Domini Dei tui in vanum.* Tertio opere : et hoc est *Memento ut diem sabbati sanctifices.* Voluit enim ut esset certus dies in quo intenderent homines ad servitium Dei. Habetur autem hoc præceptum quinque rationibus. Primo enim datum fuit ad destructionem erroris : prævidit enim Spiritus sanctus quod futuri erant aliqui dicturi mundum semper fuisse. II Petr. III, 3 : *Venient in novissimis diebus in deceptione illusores juxta proprias concupiscentias ambulantes, dicentes : ubi est promissio aut adventus ejus? Ex quo enim patres dormierunt, omnia sic perseverant ab initio creaturæ. Latet enim eos hoc volentes quod cæli erant prius et terra de aqua, et per aquam consistens Dei verbo.* Voluit ergo Deus ut custodiretur unus dies in memoriam quod Deus omnia creaverat in sex diebus, et in septimo quievit a novis creaturis condendis : et hanc rationem ponit Dominus in lege, dicens : *Memento ut diem sabbati sanctifices.* Sed Judæi in memoriam primæ creationis colebant sabbatum ; Christus autem veniens fecit novam creationem. Per primam enim homo terrenus, per se-

cundam homo cœlestis effectus est. Galat. VI, 15 : *In Christo Jesu neque circumcisio aliquid valet neque præputium, sed nova creatura :* et hæc nova creatura est per gratiam, quæ incepit in resurrectione. Roman. VI, 4 : *Quomodo Christus surrexit a mortuis per gloriam Patris, ita et nos in novitate vitæ ambulemus. Si enim complantati facti sumus similitudini mortis ejus, simul et resurrectionis erimus.* Et quia resurrectio facta est in Dominica, ideo celebramus illum diem, sicut Judæi sabbatum propter primam creationem. Secundo datum fuit ad instructionem fidei Redemptoris. Caro enim Christi in sepulero corrupta non fuit : unde dicit Psalm. X, 9 : *Caro mea requiescat in spe :* item ibidem 10 : *Non dabis sanctum tuum videre corruptionem ;* unde voluit : sabbatum observari, ut sicut sacrificia significabant mortem Christi, ita quies sabbati requiem carnis ejus. Sed nos ista sacrificia non servamus, quia adveniente re et veritate, debet cessare figura, sicut adveniente sole cessat umbra ; servamus tamen in veneratione Virginis gloriosæ, in qua remansit tota fide tali die in morte Christi. Tertio datum fuit ad roborandum sive figurandum veritatem promissionis. Promittitur enim nobis quies : Isa. XIV, 3 : *Et erit in die illa cum requiem dederit tibi Deus a labore tuo et a concussione tua et a servitute dura qua ante servisti :* item ibid. XXXII, 18 : *Sedebit populus meus in pulchritudine pacis et in tabernaculis fiduciæ et in requie opulenta.*

Et nota quod expectamus requiem de tribus : de labore præsentis vitæ, de tentationum concussione, et de diaboli servitute. Hanc Christus repromisit venientibus ad se, dicens Matth. XI, 28 : *Venite ad me omnes qui laboratis et onerati estis ; et ego reficiam vos. Tollite jugum meum super vos, et discite a me, quia mitis sum et humilis corde ; et invenietis requiem animabus vestris : jugum enim meum suave est, et onus meum leve.* Invenimus autem quod Dominus operatus est sex diebus, et in septimo quievit : quia primo oportet facere opera perfecta : Eccl. I, 35 : *Modicum laboravi, et inveni mihi multam requiem.* Plus enim incomparabiliter excedit tempus æternitatis totum tempus præsens, quam mille anni diem unum.

<sup>1</sup> Parm. : « incipit. »

<sup>2</sup> Cod. S. Genov. non habet : « Psalm. LXXV, 12 : vovete et reddite, etc.

Quarto datum fuit hoc præceptum ad inflammationem amoris. Sap. ix, 15 : *Corpus quod corrumpitur, aggravat animam* : et ideo homo semper ad terrena inferius tendit, nisi conetur erigere se ab eis : et ideo oportet habere certum tempus ad hoc : unde aliqui toto tempore hoc faciunt : Psalm. xxiii, 2 : *Benedicam Dominum in omni tempore, semper laus ejus in ore meo* : Apostolus I Thessal. v, 17 : *Sine intermissione orate* : et hi continue sabbatum habent. Aliqui hoc faciunt in aliqua parte temporis : Psalm. cxviii, 164 : *Septies in die laudem dixi tibi*. Alii, ne omnino alienarentur a Deo, oportuit quod haberent aliquem diem determinatum, ne nimis tepescat in eis amor Dei. Isa. lviii, 13 : *Si vocaveris sabbatum delicatum... tunc delectaberis super Domino*. Job. xxii, 26 : *Tunc super Omnipotentem deliciis afflues, et elevabis ad Deum faciem tuam*. Non enim ad ludendum ordinatur talis dies, sed ad laudandum et orandum Dominum Deum. Unde Augustinus dicit quod minus malum est tali die arare, quam ludere. Quinto datum fuit ad opera pietatis respectu subjectorum. Aliqui enim crudeles sibi et suis, non cessant continue operari propter lucrum; et hoc habent Judæi maxime, quia avarissimi sunt. Denter. v, 12 : *Observa diem sabbati... ut requiescat servus tuus et ancilla tua, sicut et tu* : et post : *Non facies in eo quidquam operis tu et filius et filia servus et ancilla, bos et asinus et omne jumentum tuum, ut requiescat servus et ancilla tua sicut et tu*. Propter prædicta ergo hoc præceptum datum fuit <sup>1</sup>.

## CAPUT XV.

*A quibus sabbato et die festa abstinere debemus.*

*Memento ut diem sabbati sanctifices.* Dictum est quod sicut Judæi celebrant sabbatum, sic nos Christiani Dominicam, et alia principalia festa. Videamus ergo quomodo ista servare debemus. Et sciendum quod non dicit, Custodi sabbatum, sed *memento ut diem sabbati sanctifices*. Sanctum autem accipitur duobus modis. Aliquando enim est sanctum idem quod purum. Apostolus, I Corinth. vi, 15 : *Sed*

*abluti estis, sed sanctificati estis*. Aliquando dicitur sanctum res consecrata ad cultum Dei, ut locus, tempus, vestes et vasa sacra. Istis ergo duobus modis debemus festa celebrare; quia et pure, et mancipando se divino servitio. In isto ergo præcepto duo considerantur. Primo quidem in festo quid cavendum sit; secundo quid faciendum. Debemus autem cavere tria. Primo corporalem operam : Jerem. xvii, 22 : *Sanctificabis sabbatum, ut non facias in eo opus servile* : unde et in lege dicitur, Levit. xxiii, 25 : *Omne opus servile non facietis in eo*. Opus autem servile est opus corporale : nam opus liberum est animæ, sicut intelligere et hujusmodi; ad quod opus homo constringi non potest.

Sed sciendum quod opera corporalia possunt fieri in sabbato propter quatuor. Primo propter necessitatem : unde Dominus excusavit discipulos evellentes spicas in sabbato, ut dicitur Matth. xii. Secundo propter Ecclesiæ utilitatem : unde dicitur in Evangelio ibid., quod sacerdotes faciebant omnia quæ erant necessaria in templo in die sabbati. Tertio propter proximi utilitatem : unde Dominus curavit in die sabbati habentem manum aridam, et confutavit Judæos reprehendentes eum, ponens exemplum de ove, ibid. Quarto propter superioris auctoritatem : unde Dominus præcepit Judæis ut circumciderent in die sabbati, ut dicitur Joan. vii.

Secundo <sup>2</sup> debemus cavere culpam : Jerem. xvii, 21 : *Custodite animas vestras, et nolite portare pondera in die sabbati*. Onus autem animæ vel pondus malum est peccatum : Psalm. xxxvii, 5 : *Sicut onus grave gravatæ sunt super me*. Peccatum autem opus servile est : quia, ut dicitur Joan. viii, 34, *Qui facit peccatum, servus est peccati*. Unde cum dicitur, *Omne opus servile non facietis in eo*, potest intelligi de peccato : et ideo contra præceptum hoc facit quis, quando in sabbato peccat : quia operando et peccando Deus offenditur. Isa, i, 13 : *Sabbatum et festivitates alias non feram*. Et quare? *Quia iniqui sunt cætus vestri. Calendas vestras et solemnitates vestras odovit anima mea : facta sunt mihi molesta*. Tertio <sup>3</sup> debemus cavere negligentiam : Eccl. xxxiii, 29 : *Multam malitiam docuit otiositas*. Hiero-

<sup>1</sup> Parm. : « prædictum mandatum. »

<sup>2</sup> Al. : quinto debemus etc. »

<sup>3</sup> Al. : « sexto. »



nymus *ad Rusticum*: Semper aliquid boni operis facito, ut te diabolus inveniat occupatum: Et ideo non est bonum custodire nisi principalia festa, si in alis debeat homo esse otiosus. Psalm. xcviij, 3: *Honor regis iudicium diligit*, scilicet discretionem. Unde I Machab. ii, dicitur quod Judæi quidam occultati erant, et inimici irruerunt super eos, qui credentes quod se non possent in sabbato defendere, victi et occisi sunt. Ita accidit multis qui otiosi sunt in festis. Thren. i, 7: *Viderunt eam hostes, et deriserunt sabbata ejus*. Sed tales debent facere sicut illi Judæi fecerunt: unde I Machab. ii, 41, dicitur: *Quicumque venerit ad nos in bello in die sabbatorum, pugnemus adversus eum*.

### CAPUT XVI.

*In quibus sabbatum et festum debent occupari.*

*Memento ut diem sabbati sanctifices.* Sicut dictum est, homo diem festum debet sanctificare: et dictum est quod sanctum dicitur duobus modis: quia et quod mundum est, et quod Deo consecratum est. Item dictum est a quibus tali die abstinere debemus; nunc dicendum est in quibus occupari debemus: et sunt tria. Primo in faciendis sacrificiis: unde Num. xxviii, dicitur quod Deus præcepit quod quolibet die unus agnus mane, et alius vespere debeat offerri; sed in sabbato debent duplicari: et significat quod in sabbato debemus offerre Deo sacrificium, et de omnibus quæ habemus. I Paralip. xxix, 14: *Tua sunt omnia, et quæ de manibus tuis accepimus, dedimus tibi*. Unde primo debemus ultro offerre animam nostram, dolendo de peccatis. Psalm. l, 19: *Sacrificium Deo spiritus contribulatus*: et orando pro beneficiis. Psalm. cxl, 2: *Dirigatur, Domine, oratio mea, sicut incensum in conspectu tuo*. Factus est enim dies festus ad habendam spiritualem lætitiã, quam facit oratio: unde et tali die multiplicari debent preces. Secundo corpus nostrum affligere, et hoc jejunando, Roman. xii, 1: *Obsecro vos per misericordiam Dei, ut exhibeatis membra vestra hostiam viventem Deo,*

*sanctam*. Laudando <sup>1</sup>. Psalm. xlix, 23: *Sacrificium laudis honorificabit me*: unde in tali die cantus multiplicantur. Tertio res tuas sacrificare, et hoc dando eleemosynas. Hebr. xiii, 10: *Beneficentiæ autem et communionis nolite oblivisci: talibus enim hostiis promeretur Deus*: et hoc in duplo magis quam in aliis diebus, quia tunc est communis lætitiã. II Esdr <sup>2</sup>. viii, 10: *Mittite partes his qui non paraverunt sibi, quia sanctus dies Domini est*. Secundo in verborum Dei studiis, sicut et Judæi faciunt hodie. Act. xiii, 27: *Voces Prophetarum quæ per omne sabbatum leguntur*: unde et Christiani, quorum justitiã debet esse perfectior, debent tali die convenire ad prædicationes et ad officium Ecclesiæ. Joan. viii, 47: *Qui est ex Deo, verba Dei audit*. Item loqui utilia. Apostolus Ephes. iv, 29: *Omnis sermo malus ex ore vestro non procedat: sed si quis bonus, ad ædificationem*. Ista enim duo utilia sunt animæ peccatoris, quia immutant cor ejus in melius. Jerem. xxiii, 29: *Verba mea sunt quasi ignis ardens, dicit Dominus, et quasi malleus conterens petram*. Contrarium autem accidit etiam in perfectis <sup>3</sup> non loquentibus utilia, vel audientibus. Apostolus I Cor. xv, 33: *Corrumpunt bonos mores colloquia mala. Evigilate justi, et nolite peccare*; et Psal. cxviii, 41: *In corde meo abscondi eloquia tua*. Eloquium enim et instruit ignorantem; Psalm. eodem cv: *Lucerna pedibus meis verbum tuum*: et inflammat tepescentem. Psalm. civ, 19: *Eloquium Domini inflammavit eum*. Tertio in divinorum exercitiis. Hoc autem perfectorum est. Psalm. xxxiii, 9: *Vacate et videte quoniam suavis est Dominus*: et hoc propter quietem animæ. Sicut enim corpus fatigatum quietem desiderat, ita et anima. Locus autem animæ Deus est; Psalm. xxx, 3: *Esto mihi in Deum protectorem, et in locum refugii*. Hebr. iv, 9: *Itaque relinquatur sabbatismus populo Dei: qui enim ingressus est in requiem ejus, etiam ipse requievit ab operibus suis, sicut a suis Deus*. Sapient. viii, 16: *Intrans in domum meam, quiescat eum illa*. Sed antequam ad hanc quietem perveniat anima, oportet tres quietes præcedere. Prima ab inquietudine peccati. Isa. lvii, 20: *Cor autem impij quasi mare fervens quod quiescere non potest*.

<sup>1</sup> Al.: « sanctam Ecclesiam laudando. »

<sup>2</sup> Parm.: « Nehem. viii, 10 »

<sup>3</sup> Al.: « imperfectis. »



Secunda a passionibus carnis; quia caro concupiscit adversus spiritum, spiritus autem adversus carnem, ut dicitur Galat. v. Tertia ab occupationibus mundi. Lucæ x, 41 : *Martha, Martha, sollicita es, et turbaris erga plurima.* Et tunc post hæc anima libere quiescit in Deo. Isa. LVIII, 14 : *Si vocaveris sabbatum delicatum, tunc delectaberis super Domino.* Propterea sancti omnia dimiserunt; quia hæc est *pretiosa margarita, quam qui invenit homo abscondit, et præ gaudio illius vadit, et vendit universa quæ habet, et emit eam,* ut dicitur Matth. XIII. Hæc enim requies vita æterna, et delectatio æterna est. Psalm. CXXXI, 14 : *Hæc requies mea in sæculum sæculi : hic habitabo, quoniam elegi eam : ad quam nos perducatur etc.*

## CAPUT XVII.

*De quarto præcepto; propter quæ tenemur parentes diligere.*

*Honora patrem tuum et matrem tuam, ut sis longævus super terram quam Dominus Deus tuus dabit tibi.* Exod. xx, 12. Perfectio hominis consistit in dilectione Dei et proximi : et ad dilectionem Dei pertinent tria præcepta quæ scripta fuerunt in prima tabula; ad dilectionem vero proximi septem quæ sunt in secunda tabula. Sed, sicut dicitur I Joan. III, non debemus diligere *verbo neque lingua, sed opere et veritate.* Homo enim sic diligens debet duo facere : scilicet fugere malum, et facere bonum : unde quædam sunt in præceptis inducentia ad bonum, alia autem sunt prohibentia facere malum. Et sciendum quod cavere a malo faciendo est in potentia nostra; sed facere cuilibet bonum non possumus : et ideo dicit beatus Augustinus, quod nos omnes debemus diligere, sed non omnibus tenemur benefacere. Sed inter omnes debemus benefacere conjunctis nobis : quia, *si quis suorum, et maxime domesticorum, curam non habet, infidelis est :* I ad Timoth. v, 8. Inter omnes autem propinquos sunt nobis propinquiore pater et mater; et ideo dicit Ambrosius : Primo debemus diligere Deum, secundo patrem et matrem : et hoc est quod dicit : *Ho-*

*nora patrem tuum et matrem tuam.* Et hujusmodi rationem reddit Philosophus, qui dicit quod ex magno beneficio recepto ab eis non possumus eis respondere ex æquali : et ideo bene potest pater offensus expellere filium, sed non e converso. Dant autem parentes filio tria. Primo stabilimentum quo ad esse; Eccli. VII, 29 : *Honora patrem tuum, et gemitus matris tuæ non obliviscaris. Memento quoniam nisi per illos natus non fuisses.* Secundo nutrimentum sive fulcimentum quo ad necessaria vitæ. Nudus enim intrat filius in hunc mundum, ut dicitur Job<sup>1</sup> I, 21, sed a parentibus sustentatur. Tertio documentum, Hebr. XII, 9 : *Patres quidem carnis nostræ erulitores habuimus.* Eccli. VII, 2 ; *Filii tibi sunt? Erudi illos.* Et debent parentes dare duo documenta filiis, et cito : quia, ut dicitur Proverb. XXII, 6 : *Adolescens juxta viam suam, etiam cum senuerit, non recedet ab ea :* et Thren. III, 27 : *Bonum est viro cum portaverit jugum ab adolescentia sua :* et sunt illa quæ docuit Tobias filium suum, Tobie IV, scilicet timorem Domini, et abstinere ab omni peccato : et hoc est contra illos qui delectantur in malitiis filiorum. Sed, sicut dicitur Sapient. IV, 6 : *Ex iniquis omnes filii qui nascuntur, testes sunt nequitie adversus parentes :* unde Deus punit peccatum in filio, ut dicitur Exod. XX. Igitur filii a parentibus habent esse, nutrimentum et disciplinam : et quia esse habemus ab eis, debemus eos magis revereri quam dominos, a quibus solum res, præterquam Deum, a quo habemus animam. Eccli. III, 8 : *Qui timet Dominum, honorat parentes, et quasi dominis serviet his qui se genuerunt, in opere et sermone, et omni patientia.* *Honora patrem tuum et matrem tuam, ut superveniat tibi benedictio a Deo.* Et in hoc etiam honoras teipsum : quia, sicut dicitur Eccli. III, 13, *gloria hominis ex honore patris sui, et dedecus filii pater sine honore.* Item quia dant nobis nutrimentum in pueritia, et nos debemus eis dare in senectute. Eccli. III, 14 : *Fili, suscipe senectam patris sui, et non contristes eum in vita illius; et si defecerit sensu, veniam da; et ne spernas eum in tua virtute.... Quam malæ famæ est qui derelinquit patrem! et est maledictus a Deo qui exasperat matrem.* Ad confusionem illo-

<sup>1</sup> Parm. erronee : « Joan I. »

rum qui contra faciunt, ponit Cassiodorus in *Epistolis*, lib. II, quod ciconiæ cum parentes earum pennas senio cogente laxaverunt, nec ad proprios cibos idonei possunt inveniri, plumis suis genitorum membra foveutes, escis corpora laxa reficiunt, et pia vicissitudine juvenes reddunt quod a parentibus parvuli susceperunt. Item tertio quia docuerunt nos, debemus eis obedire. Coloss. III, 20 : *Filii obedite parentibus vestris per omnia, nisi scilicet in his quæ sunt contra Deum.* Hieronymus ad *Heliodorum* : Solum pietatis genus in hac re esse crudelem. Lucæ XIV, 26 : *Si quis non odit patrem suum et matrem.... non potest meus esse discipulis. Deus enim verior pater est.* Deuter. XXXII, 32 : *Numquid non ipse est pater tuus, qui possedit et fecit et creavit te?*

### CAPUT XVIII.

*Quæ bona acquirimus propter honorem parentum.*

*Honora patrem tuum et matrem tuam.* Inter omnia præcepta huic tantum adjungitur : *Ut sis longævus super terram* : et ratio hujus est, ne credatur non deberi præmium honorantibus parentes, quia est naturale. Sed sciendum, quod honorantibus parentes quinque desiderabilia promittuntur. Et primum est gratia in præsentem, et gloria in futuro, quæ maxime desiderantur. Eccli. III, 9 : *Honora patrem tuum, ut superveniat tibi benedictio a Deo, et benedictio illius in novissimo maneat.* Contrarium debetur maledicentibus, et etiam in lege maledicuntur a Deo, ut dicitur Deuter. XXVII. Et Lucæ XVI, 10, dicitur : *Qui in modico iniquus est, et in majori iniquus est.* Sed vita naturalis quasi nihil est in comparatione ad vitam gratiæ. Si ergo non recognoscis beneficium vitæ naturalis quam habes a parentibus, indignus es vita gratiæ quæ major est, et per consequens vita gloriæ, quæ maxima est. Secundum desiderabile est vita : unde *ut sis longævus super terram.* Dicitur Eccli. III, 7 : *Qui honorat patrem suum, vita vivet longiore.* Et nota, quod vita longa est quando est plena : quæ non mensuratur tempore, sed actione, secundum Philosophum. Tunc autem plena est vita quando est virtuosa : et ideo vir-

tuosus et sanctus diu vivit, quamvis citomoriatur corporaliter : ideo dicitur Sapient. IV, 13 : *Consummatus in brevi, explevit tempora multa : placita enim erat Deo anima illius.* Optime autem mercatur ille qui tantum facit una die quantum alius in uno anno. Et nota, quod aliquando accidit quod longior vita causa est mortis corporalis et spiritualis, sicut accidit Judæ. Præmium ergo est vita corporalis. Sed contrarium, scilicet mortem, acquirunt illi qui injuriantur parentibus. Habemus enim ab eis vitam, sicut milites a rege feudum ; et ideo sicut dignum est quod illi amittant pro proditione feudum, ita isti propter injuriam illatam parentibus vitam, Proverb. XXX, 17 : *Oculum qui subsannat patrem, et qui despicit partum matris suæ, suffodiant eum corvi de torrentibus et comedant eum filii aquilæ.* Per filios aquilæ intelliguntur reges et principes, per corvos officiales : et si aliquando non puniuntur corporaliter, mortem tamen spiritualem effugere non possunt. Propterea pater non debet potestatem multam dare filiis : Eccli. XXXIII, 21 : *Deum adhuc superes, et aspiras, non im-* <sup>Non mutab</sup> *mutet te omnis caro* : item ibid. 20 : *Filio, mulieri, fratri et amico non des potestatem super te in vita tua, et ne dederis illis possessionem in vita tua, ne forte pœniteat te.* Tertium est habere filios sibi gratos et acceptos. Naturaliter enim pater thesaurizat filiis, sed non e converso. Eccli. III, 6 : *Qui honorat patrem suum, jucundabitur in filiis.* Matth. VII, 2 : *In qua mensura mensi fueritis, remetietur vobis.* Quartum est habere famam laudabilem : Eccli. III, 13 : *Gloria hominis ex honore patris sui* : et iterum 18, *Quam malæ famæ est qui derelinquit patrem!* Quintum est habere divitias : Eccli. III, 11 : *Benedictio patris firmat domos filiorum ; maledictio autem matris eradicat fundamenta.*

### CAPUT XIX.

*Quot modis dicitur aliquis Pater.*

*Honora patrem tuum et matrem tuam.* Notandum, quod non solum dicitur aliquis pater ratione carnalis generationis ; sed quibusdam aliis rationibus aliqui dicuntur patres, et cuilibet eorum debetur aliqua reverentia. Dicuntur enim patres Apostoli et alii sancti propter <sup>1</sup> doc-

<sup>1</sup> Parm. : « per. »

trinam et exemplum fidei. Apostolus I Corinth. iv, 15 : *Nam si decem millia pædagogorum habeatis in Christo, sed non multos patres : nam in Christo Jesu per Evangelium ego vos genui.* Et ideo dicitur Eccli. XLIV, 1 : *Laudemus viros gloriosos et parentes nostros in generatione sua : laudemus autem non ore, sed imitatione ; et hoc fit, si non invenitur in nobis contrarium ejus quod laudamus.* Hebr. XIII, 7 : *Mementote præpositorum vestrorum... quorum intuentes exitum conversationis, imitamini fidem.* Dicuntur etiam prælati patres ; et isti venerandi sunt, sunt enim Dei ministri : Luc. x, 16 : *Qui vos audit, me audit ; et qui vos spernit, me spernit :* et ideo debemus eos honorare obediendo : Apostolus Heb. XIII, 17 : *Obedite præpositis vestris, et subjacete eis :* et decimas præbendo : Proverb. III, 9 : *Honora Dominum de tua substantia, et de primitiis frugum tuarum da pauperibus.* Item reges et principes : IV Reg. v, 13 : *Pater, etsi rem grandem dixisset tibi Propheta, certe facere debueras :* qui dicuntur patres, quia debent intendere bonum populi. Et istos honoramus per subjectionem : Rom. XIII, 1 : *Omnis anima postestatibus sublimioribus subdita sit.* Et hoc non solum timore, sed amore ; nec solum propter rationem, sed etiam propter conscientiam. Et ratio hujus est, quia, secundum Apostolum *ibidem :* *omnis potestas a Deo est ;* et ideo reddendum est debitum : *quia cui tributum, tributum ; cui vectigal vectigal, cui timorem, timorem, cui honorem, honorem ;* Rom. XIII, 7. Proverb. XXIV, 12 : *Time Dominum, filii mei, et regem.* Item benefactores : Eccli. IV, 10 : *Esto pupillis misericors ut pater :* est enim proprium patris <sup>1</sup> benefacere filiis : et ideo tenemur reddere vicem in benefaciendo : Eccli. XXXI, 19 : *Gratiam fidei-jussoris ne obliviscaris :* ingratis enim accidit illud Sap. XVI, 29 : *Ingrati spes tamquam hibernalis glacies tabescet.* Item <sup>2</sup> senes Deuteron. XXXII, 7 : *Interroga patrem tuum, et annuntiabit tibi ; majores tuos, et dicent tibi :* Lev. XIX, 32 : *Coram cano capite consurge, et honora personam senis :* Eccli. XXXII, 13 : *In medio magnatorum loqui non præsumas, et ubi sunt senes non multum loquaris :* *ibid.* 9, <sup>3</sup> : *Audi tacens ; et pro reverentia accedet tibi bona*

*gratia.* Omnes igitur isti venerandi sunt : quia omnes portant quodammodo similitudinem Patris qui in cœlis est : et de istis dicitur Luc. x, 16 : *Qui vos spernit, me spernit.*

deest  
una  
collatio

## CAPUT XX.

*De quinto præcepto : quos prohibemur occidere et quot modis quis occidit.*

*Non occides.* Exod. xx, 13. In lege divina, per quam ordinamur ad dilectionem Dei et proximi, præcipitur non solum facere bonum, sed etiam declinare a malo. Inter alia autem majus malum quod possit fieri proximo, est occidere eum ; et hoc prohibetur cum dicitur : *Non occides.*

Circa quod præceptum tripliciter est erratum. Quidam enim dixerunt, quod non licet occidere etiam bruta animalia. Sed hoc falsum est, quia non est peccatum uti illis quæ sunt subdita hominis potestati. Est etiam naturalis ordo quod plantæ sint in nutrimentum animalium, et quædam animalia in nutrimentum aliorum, et omnia in nutrimentum hominum. Genes. IX, 3 : *Quasi olera virentia tradidi vobis omnia.* Philosophus etiam dicit in *Politica*, quod venatio est sicut justum bellum. Apostolus I Corinth. x, 45 : *Omne quod in macello venit, manducate nihil interrogantes propter conscientiam.* Ergo *non occides homines.* Quidam dixerunt hic prohibitum esse homicidium hominis omnino : unde homicidas dicunt esse judices sæculares, qui condemnant secundum leges aliquos : contra quos dicit Augustinus, quod Deus per hoc præceptum non abstulit sibi potestatem occidendi : unde Deuteron. XXXII, 39 : *Ego occidam, et vivere faciam.* Est ergo licitum illis qui mandato Dei occidunt, quia tunc Deus facit. Omnes enim lex mandatum Dei est. Proverb. VIII, 15 : *Per me reges regnant, et legum conditores justa decernunt :* et Apostolus Roman. XIII, 4 : *Si malum feceris, time : non enim sine causa gladium portat, Dei enim minister est.* Moysi quoque dicitur Exod. XXII, 18 : *Maleficos non patieris vivere.* Id enim quod licitum est et ministris ejus, per mandatum ipsius. Constat autem quod Deus non peccat, cum sit auctor legum, infligendo mortem

<sup>1</sup> Al. omittuntur sequentia usque ad indicem : « Eccl. »

<sup>2</sup> Parm. : « item ætate. »

<sup>3</sup> Cod. S. Genov. omittit quæ sequuntur usque ad finem capituli. »

propter peccatum : Roman. vi, 13 : *Stipendia peccati mors* : ergo nec minister ejus. Est ergo sensus ; *Non occides* propria auctoritate. Alii vero dixerunt quod per hoc quod dicitur, *Non occides*, prohibetur non occidere alium ; unde dicebant, quod licitum erat occidere seipsum. Sic enim invenitur de Samsone Judic. xvi, et de Catone, et de quibusdam virginibus quæ se in flammis injecerunt, sicut recitat Augustinus I *De civi. Dei*. Sed ad hoc respondet Augustinus ibidem, dicens e. xx : « Qui se occidit, hominem utique occidit. » Si ergo hominem non licet occidere, nisi auctoritate Dei : ergo nec seipsum, nisi vel auctoritate Dei, vel instinctu Spiritus sancti, sicut dicitur de Samsone. Ergo *non occides*.

Sciendum est etiam quod hominem occidere contingit multipliciter. Primo manu : Isa. 1, 15 : *Manus vestræ sanguine plenæ sunt* : quod quidem est non solum contra caritatem qua præcipitur ut diligas proximum sicut teipsum : I Joan. iii, 15 : *Omnis homicida non habet vitam æternam in se manentem* : verum etiam contra naturam : quia, ut dicitur Eccli. xiii, 29, *omne animal diligit sibi simile*. Unde Exod. xxi, 12 : *Qui percusserit hominem volens occidere, morte moriatur*. Et hic quidem crudelior est lupo, de quo dicitur in IV *Animalium*, quod si lupo detur caro lupi, non comedit. Item ore ; et hoc fit dando consilium alicui contra aliquem, provocando, accusando et detrahendo : Psal. lvi, 5 : *Filii hominum, dentes eorum arma et sagittæ, et lingua eorum gladius acutus*. Tertio adjutorio : Proverb. 1, 15 : *Fili mi, ne ambules cum eis... pedes enim illorum ad malum currunt, et festinant ut effundant sanguinem*. Item consensu : Rom. 1, 32 : *Digni sunt morte non solum qui ea faciunt, sed etiam qui consentiunt facientibus*. Consentis autem quodammodo, quando potes impedire : Proverb. xxiv, 2 : *Erue eos qui ducuntur ad mortem* : et iterum si vires suppetunt, sed dimittis negligentia vel avaritia. Ambrosius : « Pæce fame morientem : si non pavisti<sup>1</sup>, occidisti. »

Et sciendum quod aliqui occidunt solum corpus, de quo dictum est ; alii animam, auferendo vitam gratiæ, trahendo scilicet ad peccatum mortale : Joan. viii, 44 : *Ille homicida erat ab initio*, inquan-

tum scilicet traxit ad peccatum : alii autem utrumque, et hoc dupliciter. Primo in destructione prægnantium : occidunt enim pueri in corpore et in anima. Secundo interficiendo seipsum.

## CAPUT XXI.

*Propter quæ prohibemur irasci et occidere.*

*Non occides*. Christus dat in Evangelio, Matth. v, quamdam doctrinam, quæ est, quod justitia nostra debet esse major justitia legis : unde docet perfectius servari mandata legis a Christianis quam Judæi servaverunt, et ratio hujus est, quia majori labore acquiritur major merces. II Corinth. ix, 6 : *Qui parce seminat, parce et metet*. In lege enim promittebantur temporalia et terrena : Isa. 1, 19 : *Si voveritis et audieritis me, bona terræ comedetis* : sed in lege nostra promittuntur cœlestia et æterna : ergo justitia, quæ est observantia mandatorum, debet abundare, cum major expectetur merces. Inter alia autem præcepta facit mentionem de isto, dicens Matth. v, 21 : *Audistis quod dictum est antiquis : Non occides. Ego autem dico vobis, quia omnis qui irascitur fratri suo, reus erit iudicio*, id est pœna quam lex adjudicavit. Exod. xxi, 14, ubi dicitur : *Si quis per industriam occiderit proximum suum, et per insidias, ab altari meo avelles eum, ut moriatur*. Debet autem quilibet quinque modis ab ira cavere. Primo ne cito provocetur : Jacob. 1, 19 : *Sit omnis homo velox ad audiendum, tardus autem ad loquendum, et tardus ad iram*. Et ratio est, quia ira peccatum est, et punitur a Deo.

Sed numquid omnis ira est contraria virtuti? Circa hoc duplex est opinio. Stoici enim dixerunt quod nulla passio cadit in sapientem ; immo volebant quod vera virtus esset in quiete mentis. Peripatetici autem dixerunt, quod ira cadit in sapientem, sed moderata : et est opinio verior. Et patet primo auctoritate, quia in Evangeliiis invenimus istas passiones Christo attributas, in quo fuit fontalis plenitudo sapientiæ. Secundo patet ratione : nam si omnes passiones virtuti contrarientur, essent aliquæ potentiæ animæ quæ essent frustra, immo quæ

<sup>1</sup> Parm. : « paveris. »



essent homini in nocumentum, quia non haberent aliquos actus convenientes ; et sic irascibilis et concupiscibilis frustra datæ essent homini. Et ideo dicendum est, quod aliquando ira est virtus <sup>1</sup>, aliquando non. Accipitur enim ira tripliciter. Primo prout est in solo iudicio rationis absque commotione animi ; et ista non dicitur proprie ira, sed iudicium. Sic enim Dominus puniens malos, iratus dicitur Mich. vii, 9 : *Iram Domini portabo, quoniam peccavi ei.* Secundo accipitur prout est passio ; et ista est in appetitu sensitivo ; et est duplex : quia aliquando ordinatur ratione et continetur sub terminis rationis, quando scilicet quis irascitur quando debet et quantum debet et pro quo debet, et huiusmodi : et tunc est actus virtutis, et dicitur ira per zelum. Unde Philosophus dicit, quod mansuetudo non est nullo modo irasci. Ista ergo ira non est peccatum. Est et tertia ira quæ refugit iudicium rationis, et ista semper est peccatum ; sed aliquando veniale, aliquando est mortale : et hoc distinguitur ex eo quod ad iram incitat, quod aliquando est veniale, aliquando est mortale. Mortale duplex : vel ex genere, vel ex circumstantiis. Homicidium autem videtur esse actus peccati mortalis ex suo genere, quia directe ordinatur contra præceptum divinum : et ideo consensus in homicidium est peccatum mortale ex genere : quia si actus est mortalis, et consensus in actus erit mortalis. Aliquando autem peccatum mortale est ex genere, sed tamen motus non est peccatum mortale, quia est sine consensu ; sicut si ascendit motus concupiscentiæ ad fornicandum, et non consentitur, non est peccatum mortale ; similiter ira : est enim motus ad injuriam illatam vindicandam : hæc enim est proprie ira. Si ergo iste motus est taliter in passione, ita quod ratio deducatur, tunc est peccatum mortale ; si autem usque ad consensum non pervertitur ratio ; tunc est peccatum veniale. Si autem motus non sit ex genere peccatum mortale, tunc etsi consensus adhibeatur, non est peccatum mortale. Quod ergo dicit, « *Qui irascitur fratri suo, reus erit iudicio,* » intelligendum est de motu tendente in nocumentum, qui motus est peccatum mortale, ita quod sit ibi consensus. Eccl. ult.,

14 : *Cuncta quæ fiunt adducet Deus in iudicium pro omni errato, sive bonum sive malum.* Secunda ratio quare debemus non provocari cito ad iram, est, quia omnis homo diligit libertatem et odit servitutem. Non est autem iracundus dominus sui ipsius : Proverb. xxvii, 4 : *Impetum concitati spiritus ferre quis poterit?* et ibidem 3 : *Grave saxum et onerosa arena ; sed ira stulti utroque gravior.* Secundo cavere debet ne diu in ira permaneat : Psalm. iv, 5 : *Irascimini, et nolite peccare* : Ephes. iv, 26 : *Sol non occidat super iracundiam vestram.* Et rationem hujus assignat in Evangelio Dominus, dicens Matth. v, 25 : *Esto consentiens adversario tuo cito dum es in via cum eo, ne forte tradat te ministro, et in carcerem mittaris. Amen dico tibi, non exies inde donec reddas novissimum quadrantem.* Tertio cavere debet ne in ira procedat. Primo in corde, quod fit quando pervenit ad odium. Est enim differentia inter iram et odium, quia ira subita est, odium vero diuturnum ; et ideo est mortale peccatum : I Joannis, iii, 15 : *Qui odit fratrem suum, homicida est* : et ratio hujus est, quia et se interficit spoliando se caritate, et alium. Augustinus in *Regula* : « Lites aut nullas habeatis, aut quam celerrime finiatis, ne ira crescat in odium, et trabem faciat de festuca, et animam faciat homicidam. » Proverb. xv, 18 : *Vir iracundus provocat rixas.* Genes. xlix, 7 : *Maledictus furor eorum quia pertinax, et indignatio eorum quia dura.* Quarto cavere debet ne procedat in verbo : Proverb. xii, 16 : *Fatuus statim indicat iram suam.* Et potest indicare duobus modis ; injuriando scilicet, et superbe loquendo. Quantum ad primum dicit Dominus Matth. v, 22 : *Qui dixerit fratri suo, Fatue, reus erit gehennæ ignis. Qui autem dixerit, Racha, reus erit concilio.* Proverb. xv, 1 : *Responsio mollis frangit iram, sermo durus suscitatur furorem.* Quinto cavere debet ne procedat in opere. In omni enim opere nostro duo debemus observare, scilicet facere justitiam et misericordiam ; et ira utrumque impedit : *Ira enim viri justitiam Dei non operatur,* ut dicitur Jacob. i, 20 : quamvis enim velit, tamen non potest. Unde Philosophus quidam dixit cuidam qui eum offenderat : « Punirem te, nisi essem iratus. » Pro-

<sup>1</sup> Al. : « vis. »



verb. xxvii, 4 : *Ira non habet misericordiam, nec erumpens furor.* Genes. xlix, 6 : *In furore suo occiderunt virum.* Et propter hoc Christus non solum docuit nos cavere ab homicidio, sed ab ira. Bonus enim medicus non tantum tollit malum quod apparet, sed etiam radicem removet infirmitatis, ne scilicet recidivet : et ideo vult nos abstinere a principiis peccatorum, et ita ab ira, quæ est principium homicidii.

### CAPUT XXII.

*De sexto præcepto : quæ mala committuntur adulterio.*

*Non mœchaberis.* Exod. xx, 14. — Post prohibitionem homicidii prohibetur adulterium : et congrue, quia vir et uxor sunt quasi unum corpus, *Erunt, inquit Dominus Genes. ii, 24, duo in carne una.* Et ideo post injuriam quæ infertur personæ, nulla major est quam illa quæ infertur conjunctæ. Prohibetur autem adulterium uxori, et viro. Sed prius dicendum est de uxoris adulterio, quia majus peccatum videtur committere. Committit autem tria peccata gravia uxor mœchando, quæ insinuantur Eccl. xiii, 33 : *Mulier omnis relinquens virum suum... primo in lege Altissimi incredibilis fuit, secundo virum suum dereliquit, tertio adulterio fornicata est, et ex alio viro filios statuit sibi.* Primo ergo peccat per incredulitatem, quia legi incredibilis fit : Dominus enim prohibuit adulterium. Item facit contra Dei ordinationem, Matth. xix, 6 : *Quod Deus conjunxit, homo non separet.* Item contra Ecclesiæ statuta, vel sacramentum : fit enim matrimonium in facie Ecclesiæ ; et ideo adducitur Deus quasi in testem et fidejussorem de servanda fide : Malach. ii, 14 : *Dominus testificatus est inter te et uxorem pubertatis tuæ, quam tu desperasti.* Ergo peccatur contra legem, contra statutum et contra sacramentum Dei. Secundo peccat per perditionem, quia derelinquit virum. Apostolus I Corinth. vii, 4 : *Mulier sui corporis potestatem non habet, sed vir :* ideo etiam nec castitatem servare potest sine consensu viri : et ideo si mœchatur, proditionem committit, dum seipsam alteri tradit, sicut servus dans se alteri domino. Prov. ii, 17 :

*Reliquit ducem pubertatis suæ, et pacti Dei sui oblita est.* Tertio per furti commissionem, quia ex alieno viro constituit sibi filios ; et hoc maximum furtum est, quia totam hereditatem dat alienis filiis. Et nota, quod ista deberet studere quod filii intrarent religionem, vel aliquid aliud facerent, ita quod in bonis viri non succederent. Est ergo mulier mœchans, sacrilega, proditrix, furatrix. Viri vero peccant non minus quam uxores, licet sibi quandoque blandiantur quod patet ex tribus. Primo ex æqualitate quam habet, nam *vir sui corporis potestatem non habet, sed mulier,* ut dicitur I Corinth. vii, 4, et ideo neuter potest aliquid facere sine alterius consensu quantum ad matrimonium. Et ad hoc significandum Deus non de pede vel capite, sed de costa mulierem formavit. Et ideo matrimonium nunquam statum perfectum habuit, nisi in lege Christi : quia Judæus unus plures habebat uxores, sed uxor non plures viros ; et ideo non erat æqualitas. Secundo ex viri fortitudine, quia propria passio mulierum est concupiscentia : I Petri, iii, 7 : *Viri similiter cohabitantes secundum scientiam, quasi infirmiori vasculo muliebri impartientes honorem.* Et ideo si petis ab uxore quod tu non vis servare<sup>1</sup>, frangis fidem. Tertio ex ejus auctoritate, quia *vir est caput mulieris :* unde *mulieres non debent loqui in Ecclesia, sed domi viros interrogare, ut dicitur I Corinth. xiv.* Est ergo vir doctor mulieris ; et ideo Deus præceptum dedit viro. Magis autem peccat sacerdos quam laicus, et Episcopus quam sacerdos, si non servant quæ debent, quia docere alios ad ipsos pertinet. A simili si vir mœchatur, frangit fidem non servando ea quæ debet. Sed tamen uxores attendant ad id quod Christus dicit Matth. xxiii, 3 : *Omnia quæcumque dixerint vobis, servate et facite ; secundum opera vero eorum nolite facere.*

### CAPUT XXIII.

*Propter quæ vitanda sunt fornicatio et adulterium.*

*Non mœchaberis.* Sicut dictum est, Deus tam viris quam mulieribus prohibuit

<sup>1</sup> Al. : « non potes : » item : « non vis te servare. »

adulterium. Sed sciendum, quod licet aliqui credant adulterium esse peccatum, tamen non credunt simplicem fornicationem esse peccatum mortale : contra quos Apostolus Hebr. xiii, 4 : *Fornicatores et adulteros judicabit Deus* : I Corinth. vi, 9 : *Nolite errare : neque fornicariū, neque adulteri, neque molles, neque masculorum concubitores regnum Dei possidebunt*. A regno autem Dei non excluditur aliquis nisi per peccatum mortale. Ergo est peccatum mortale.

Sed forte dices : Non est ratio quare sit peccatum mortale ; cum non detur corpus uxoris, sicut in adulterio. Dico quod si non detur corpus uxoris, datur tamen corpus Christi, quod sibi datum fuit, et consecratum in baptismo. Si ergo nullus debet facere injuriam uxori, multo magis nec Christo. I Corinth. vi, 15 : *Nescitis quoniam corpora vestra membra sunt Christi? Tollens ergo membra Christi, faciam membra meretricis? Absit*. Est ergo hæresis dicere fornicationem simplicem non esse peccatum mortale.

Et ideo sciendum, quod in isto præcepto, *Non mæchaberis*, prohibetur non solum adulterium, sed omnis carnalis corruptio, præter eam quæ est matrimonii. Ulterius autem sciendum quod alii dicunt commixtionem viri et uxoris non esse sine peccato ; quod est hæreticum. Apostolus Hebr. xiii, 4 : *Sit honorabile connubium in omnibus, et torus immaculatus*. Talis autem conjunctio aliquando non solum sine peccato est, sed etiam est ad meritum vitæ æternæ habentibus caritatem ; aliquando est cum peccato veniali, aliquando cum mortali. Quando enim est cum intentione procreandæ prolis, tunc est opus virtutis ; quando autem cum intentione reddendi debitum, tunc est etiam opus justitiæ ; quando autem est causa exercendæ libidinis, tunc est cum veniali, quando scilicet non excedit limites matrimonii. Quando autem excedit, ut scilicet si posset, extenderet se ad aliam, tunc est mortale.

Sciendum autem quod adulterium et fornicatio prohibentur propter multa. Primo enim perimit animam. Proverb. vi, 32 : *Qui adulter est, propter cordis inopiam perdet animam suam*. Et dicit, *Propter cordis inopiam* quod est quando caro dominatur spiritui. Secundo privat vita : talis enim secundum legem debet mori, ut dicitur Levit. xx, et Deut. xxii. Et quod aliquando non puniatur corporaliter, est

in malum suum ; quia pœna corporalis, quæ cum patientia toleratur, est in remissionem peccatorum : punietur tamen postea in vita futura. Tertio consumit substantiam suam : unde Luc. xv, de filio prodigo dicitur quod dissipavit substantiam suam vivendo luxuriose. Eccli. ix, 6 : *Ne des fornicariis animam tuam in ullo, ne perdas te et hæreditatem tuam*. Quarto vilificat prolem. Sapient. iii, 16 : *Filii adulterorum in \* consummatione erunt, et ab iniquo toro semen exterminabitur ; et si quidem longæ vitæ erunt, in nihilum computabuntur, et sine honore*. I Corinth. vii, 14 : *Alioquin filii vestri immundi essent, nunc autem sancti sunt*. Nunquam etiam habent honorem in Ecclesia, si clerici sine dedecore haberi possunt. Quinto privat honore, et specialiter mulieres. Eccli. ix, 10 : *Omnis mulier quæ est fornicaria, quasi stercus in via conculcabitur* : et de viro dicitur Proverb. vi, 32 : *Turpitudinem et ignominiam congregat sibi, et opprobrium illius non deletur*. Gregorius etiam dicit quod peccata carnalia sunt majoris infamiæ et minoris culpæ quam spiritualia. Et ratio hujus est, quia est commune cum bestiis. Psalm. xlviii, 21 : *Homo, cum in honore esset, non intellexit : comparatus est jumentis insipientibus, et similis factus est illis*.

## CAPUT XXIV.

*De septimo præcepto ; quot modis committitur furtum.*

*Non furtum facies*. Exod. xx, 15. Dominus prohibuit principaliter in lege sua injuriam proximi : et primo injuriam in propriam personam, ibi, *Non occides* ; secundo in persona conjuncta, ibi, *Non mæchaberis* ; tertio in rebus, hic, *Non furtum facies*. Et sciendum quod in hoc præcepto prohibetur omne male ablatum. Committitur enim furtum multis modis. Primo occulte accipiendo. Matth. xxiv, 43 : *Si sciret paterfamilias qua hora fur venturus esset : et hoc vituperabile est, quia est proditio quædam*. Eccli. v, 17 : *Super furem enim est confusio*. Secundo violenter auferendo : et hæc est major injuria. Job. xxiv, 9 : *Vim fecerunt deprædantes pupillos*. Inter istos sunt mali principes et reges. Sophon. iii, 3 : *Principes ejus in medio ejus quasi leones ru-*

*gientes; iudices ejus lupi vespere, non relinquebant in mane.* Isti enim faciunt, contra intentionem Domini volentis justum regnum, et dicentis Proverb. viii, 15 : *Per me reges regnant, et legum conditores justa decernunt.* Et aliquando talia faciunt per modum furti, aliquando per violentiam. Isa. i, 23 : *Principes tui infideles, socii furum : omnes diligunt munera, sequuntur retributionem.* Aliquando condendo leges, et statuendo ad lucrandum tantum. Isa. x, 1 : *Væ qui condunt leges iniquas;* et Augustinus dicit quod omnis mala dominatio furtum est : unde dicit : « Quid regna, nisi latrocinia? » Tertio mercedem non solvendo. Levit. xix, 13 : *Non morabitur opus mercenarii apud te usque mane :* et hoc intelligitur quod homo cuilibet dare debet quod suum est, sive principi, sive praelato, sive clerico etc. Roman. xiii, 7 : *Reddite omnibus debita : cui tributum, tributum : cui vectigal, vectigal.* Tenemur enim regibus custodientibus pacem nostram dare mercedem. Quarto fraudem in mercationibus committendo : unde dicitur Deuter. xxv, 13 : *Non habebis in sæculo diversa pondera :* et Levit. xix, 35 : *Nolite facere iniquum aliquid in iudicio, in regula, in pondere, in mensura. Statera justa, et æqua sint pondera, justus modius, æquisque sextarius.* Prov. xx, 23 : *Abominatio est apud Deum pondus et pondus : statera dolosa non est bona.* Hoc est etiam contra caupones, qui miscent aquam vino. In hoc etiam prohibetur usura. Psalm. xiv, 1 : *Quis habitavit in tabernaculo tuo, aut quis requiescet in monte sancto tuo?* et post. 5 : *Qui pecuniam suam non dedit ad usuram.* Hoc est etiam contra campsores, qui multas falsitates committunt, et contra venditores pannorum et aliarum rerum.

Sed dices forsitan : Quare non possum dare pecuniam sicut equum vel domum? Dicendum quod in illis est peccatum quæ his venduntur. In domo autem sunt duo; scilicet substantia et usus. Aliud autem est habere domum, et aliud uti domo : unde separatim possum usum vendere sine domus venditione; et ita in omnibus hujusmodi. Unde si aliqua sunt quæ consistant in ipso usu tantum, et usus eorum est distractio, non potest fieri id quod de domo. Denariis enim utimur distrahendo, et frumento consumendo : et ideo si usum vendis, bis vendis. Quinto dignitates emendo, sive temporales, sive

spirituales. De primo Job. xx, 15 : *Divitias quas devoravit, evomet, et de ventre illius extrahet eas Deus.* Omnes enim tyranni, qui vi tenent regna vel provinciam vel feudum, fures sunt, et omnes tenentur ad restitutionem. De secundo Joan. x, 1 : *Amen amen dico vobis : qui non intrat per ostium in ovile ovium, sed ascendit aliunde, ille fur est et latro :* et ideo simoniaci fures sunt.

## CAPUT XXV.

*Propter quæ vitandum est furtum.*

*Non furtum facies.* Hoc præceptum, sicut dictum est, prohibet omne male ablatum : et debent nos inducere multæ rationes ad hoc cavendum. Prima sumitur ex gravitate : assimilatur enim hoc peccatum homicidio. Eccli. xxxiv, 25 : *Panis egentium, vita pauperis est : qui defraudat illum, vir sanguinis est :* et iterum ibidem 27 : *Qui effundit sanguinem, et qui fraudem facit mercenario, fratres sunt.* Secunda ex periculi qualitate : nullum enim peccatum est ita periculosum. Nullum enim peccatum remittitur sine satisfactione et pœnitentia. De omnibus cito pœnitet quis ; sicut patet de homicidio, cessante ira ; ita et de fornicatione, cessante passione concupiscentiæ, et sic de aliis. De hoc autem peccato licet aliquando pœniteat quis, non tamen de facili satisfacit ; et maxime cum non solum teneatur ad id quod accepit, sed etiam de damno quod fecit patrono ex hoc ; et cum hoc etiam tenetur facere pœnitentiam de peccato. Ideo dicitur Habac. ii, 6 : *Væ ei qui multiplicat non sua. Usquequo et aggravat contra se densum lutum?* Densum lutum dicit quod non de facili homo egreditur. Tertio ex talium inutilitate : non enim sunt utilia, neque spiritualiter. Prov. x, 2 : *Nil proderunt thesauri impietatis :* divitiæ enim spiritualiter prosunt ad eleemosynas et sacrificia. Proverb. xiii, 8 : *Redemptio animæ viri divitiarum suarum :* sed de non propriis dicitur Isai. lxi, 8 : *Ego Dominus diligens iudicium, et odio habens rapinam in holocaustum.* Eccli. xxxiv, 24 : *Qui offert sacrificium ex substantia pauperum, quasi qui victimat filium in conspectu patris sui.* Nec temporaliter, quia parum durant. Habac. ii, 9 : *Væ qui congregat avaritiam in malum domui suæ... et liberari se pu-*

*tat de manu mali.* Proverb. xxviii, 8 : *Qui coacervat divitias usuris et fenore, liberali in pauperis congregat eas.* Proverb. xiii, 22 : *Custoditur justo substantia peccatoris.* Quarto ex nocuementi singularitate : faciunt enim perdere alia : sunt enim sicut ignis aliis commixtus. Job xv, 34 : *Ignis devorabit tabernacula eorum qui munera libenter accipiunt.* Scias insuper quod talis non solum suam amittit animam, sed etiam filiorum, quia illi tenentur reddere.

## CAPUT XXVI.

*De octavo præcepto ; quot modis quis loquatur contra proximum.*

*Non loquaris contra proximum tuum falsum testimonium.* Exod. xx, 16. Prohibuit jam Dominus quod nullus injurietur proximo suo opere ; nunc autem præcipit quod non injurietur verbo ; et hoc est : *Non loquaris contra proximum tuum falsum testimonium.* Hoc autem potest esse dupliciter : vel in judicio, vel in communi locutione. In judicio autem tribus modis, secundum quod tres personæ possunt facere contra hoc præceptum. Prima persona, scilicet accusantis falso. Lev. xix, 16 : *Non eris criminator, nec susurro in populis.* Et nota quod sicut non debes dicere falsum, ita non debes tacere verum. Matth. xviii, 15 : *Si peccaverit in te frater tuus, vade, et corripe eum.* Item persona testificantis mentiendo. Proverb. xix, 5 : *Testis falsus non erit impunitus* : hoc enim præceptum includit omnia præcedentia : quia aliquando talis est homicida, aliquando fur, etc. Debent autem isti puniri pœna, de qua dicitur Deut. xix, 18 : *Cum diligentissime perscrutantes invenerint falsum testem dixisse contra fratrem suum mendacium, reddent ei sicut fratri suo facere cogitavit... Non misereberis ejus, sed animam (idest vitam) pro anima, oculum pro oculo, dentem pro dente, manum pro manu, pedem pro pede exiges* : et Proverb. xxv, 18 : *Jaculum et gladius et sagitta acuta homo qui loquitur contra proximum suum falsum testimonium.* Item persona judicis male sententiando. Lev. xix, 15 : *Non injuste judicabis. Non consideres personam pauperis, nec honores vultum*

*potentis. Juste judica proximo tuo.* In communi locutione peccant aliquando contra hoc præceptum quinque genera hominum. Scilicet detractores. Roman. i, 30 : *Detractores Deo odibiles.* Dicit enim, *Deo odibiles*, quia nihil est ita carum homini sicut fama. Eccl. vii, 2 : *Melius est nomen bonum quam unguenta pretiosa.* Prov. xxii, 1 : *Melius est nomen bonum quam divitiæ multæ.* Detractores autem auferunt hoc. Eccl. x, 11 : *Si mordeat serpens in silentio, nihil eo minus habet qui occulte detrahit.* Unde si famam non restituant, salvari non possunt. Item qui detractores libenter audit : Eccl. xxviii, 28 : *Sepi aures tuas spinis, et linguam nequam noli audire, et ori facito ostia, et seras auribus tuis.* Non debet autem homo tales libenter audire : quinimmo debet detrahenti ostendere vultum tristem et torvum. Proverb. xxv, 23 : *Ventus aquilo dissipat pluvias, et facies tristis linguam detrahentem.* Item susurratores, qui scilicet recitant quidquid audiunt. Proverb. vi, 16 : *Sex sunt quæ odit Dominus, et septimum detestatur anima ejus : scilicet eum qui seminat inter fratres discordias* : Eccl. xxiii, 15 : *Susurro et bilinguis maledictus ; multos enim turbavit pacem habentes, et multa quæ sequuntur.* Item blanditores, idest adultores. Psalm. x, 3 : *Laudatur peccator in desiderijs animæ suæ, et iniquus benedicitur.* Isa. iii, 12 : *Popule meus, qui beatum te dicunt, ipsi te decipiunt.* Psalm. cxi, 5 : *Corripiet me justus in misericordia, et increpabit me ; oleum autem peccatoris non impinguet caput meum.* Item murmuratores ; et hoc maxime abundat in subditis. I Corinth. x, 10 : *Neque murmuraveritis.* Sapient. i, 11 : *Custodite vos a murmuratione, quæ nihil prodest.* Proverb. xxv, 15 : *Patientia lenietur Princeps, et lingua mollis constringet duritiem.*

## CAPUT XXVII.

*Propter quæ debemus nolle mentiri.*

*Non loquaris contra proximum tuum falsum testimonium.* In hac prohibitione prohibetur omne mendacium. Eccl. vii, 14 : *Noli velle mentiri omne mendacium ; assiduitas enim illius non est bona : et*

<sup>1</sup> Parm. : « paleis. »



hoc propter quatuor. Primo propter diaboli assimilationem : talis enim efficitur diaboli filius : nam homo ex verbis suis cognoscitur de qua regione et patria sit : *nam et loquela tua manifestum te facit*, ut dicitur Matth. xxvi, 73. Item homines quidam sunt de genere diaboli, et dicuntur diaboli filii, qui scilicet loquuntur mendacium : quia diabolus *mendax est, et pater ejus*, ut dicitur Joan. viii. Ipse enim mentitus est Gen. iii, 4 : *Nequaquam mariemini*. Quidam vero filii Dei, qui scilicet veritatem loquuntur, quia Deus veritas est. Secundo propter societatis dissolutionem. Homines enim simul vivunt : quod esse non posset, si simul verum non dicerent. Apostolus Ephes. iv, 25 : *Deponentes mendacium, loquimini veritatem unusquisque cum proximo suo, quoniam sumus invicem membra*. Tertio propter famæ amissionem : qui enim assuescit mendaciis, non creditur sibi, etiam si verum dicat : Eccl. xxxiv, 4 : *Ab immundo quid mundabitur : et a mendace quid verum dicetur?* Quarto propter animæ perditionem : occidit enim homo mendax animam suam : Sapient. i, 11 : *Os quod mentitur, occidit animam*, Psal. v, 7 : *Perdes omnes qui loquuntur mendacium*. Unde patet quod est peccatum mortale. Unde advertas, quia ipsorum mendaciorum quoddam est mortale, quoddam veniale. Mortale autem est mentiri in his quæ sunt fidei; quod pertinet ad præclaros magistros et prædicatores : et hoc est gravius omnibus aliis speciebus mendacii : II Petr. ii, 1 : *In vobis erunt magistri mendaces, qui introducent sectas perditionis*. Et aliqui aliquando talia dicunt, ut videantur scire : Isa. lvii, 4 : *Super quem lusistis, super quem dilatastis os, et ejecistis linguam? Numquid non vos filii scelesti, semen mendax?* Item aliquando mentiuntur aliqui in damnum proximi : Coloss. iii, 9 : *Nolite mentiri invicem*. Et hæc duo mendacia mortalia sunt. Aliqui autem mentiuntur pro seipsis; et hoc multipliciter. Aliquando ex humilitate; et hoc in confessione quandoque : de quo ait Augustinus : « Sicut cavendum est ne homo taceat quod fecit, ita ne dicat quod non fecit. » Job. xiii, 7 : *Numquid Deus indiget vestro mendacio?* Eccl. xix, 23 : *Est qui nequiter se humiliat, et interiora ejus plena sunt dolo; et est justus qui se nimium submittit a multa humilitate*. Aliqui ex verecundia, levitate, cum scilicet quis credit verum dicere, et dicit falsum :

et hoc advertens verecundatur retractare : Eccl. iv, 30 : *Non contradicas verbo veritatis ullo modo, et de mendacio ineruditionis confundere*. Aliqui ex utilitate, quando volunt aliquid adipisci, vel ab aliquo evadere : Isa. xxviii, 15 : *Posuimus mendacium spem nostram, et mendacio protecti sumus*. Proverb. x, 4 : *Qui nititur mendaciis, hic pascit ventos*. Aliqui propter alterius commodum, quando scilicet volunt aliquem a morte vel periculo vel damno aliquo liberare : et hoc cavendum est, sicut dicit Augustinus. Eccl. iv, 26 : *Non accipias faciem adversus faciem tuam, nec adversus animam tuam mendacium*. Aliqui propter ludum : et hoc cavendum, ne propter consuetudinem ducat ad mortale. Sapient. iv, 12 : *Fascinatio nugacitatis obscurat bona*.

### CAPUT XXVIII.

*De nono præcepto; propter quæ non debemus concupiscere aliena.*

*Non concupisces rem proximi tui.* Exod. xx, 17. Hæc est differentia inter legem divinam et mundanam : quia lex mundana judicat facta et dicta; divina autem non hæc tantum, sed etiam cogitata. Et ratio hujus est, quia illa est per homines, qui judicant ea quæ apparent exterius; sed divina est a Deo, qui exterius interiusque conspiciat : Psalm. lxxii, 25 : *Deus cordis mei*. I Reg. xvi, 7 : *Homo videt quæ foris sunt, Deus autem intuetur cor*. Dictum est autem de præceptis quæ pertinent ad dicta et facta; nunc ergo dicendum est de cogitatis. Nam apud Deum voluntas pro facto reputatur : unde *non concupisces*; idest, non solum non auferas facto, sed *nec etiam rem proximi tui concupisces*; et hoc propter multa. Primo propter concupiscentiæ infinitatem : concupiscentia enim quid infinitum est. Quilibet autem sapiens debet intendere finem aliquem, immo nullus debet ire per viam infinitam. Eccl. v, 9 : *Avarus non implebitur pecunia*. Isa. v, 8 : *Væ qui conjungitis domum ad domum, et agrum agro copulatis*. Et quod concupiscentia nunquam satiatur, ratio est, quia cor hominis factum est ad recipiendum Deum. Unde Augustinus in lib. I Confess. c. 1, § 1 : « Fecisti nos Domine ad te, et inquietum est cor nostrum donec requiescat in te ». Id ergo quod minus Deo



est, ipsum implere non potest: Psalm. cii, 5 : *Qui replet in bonis desiderium tuum.* Secundo quia aufert quietem, quæ multum est delectabilis : semper enim cupidi solliciti sunt acquirere non habita, et habita custodire : Eccl. v, 11 : *Saturitas divitis non sinit eum dormire* : Matth. vi, 21 : *Ubi est thesaurus tuus, ibi est et cor tuum.* Et ideo Christus Luc. viii, divitias spinis assimilavit, ut dicit Gregorius. Tertio quia causat in divitiis inutilitatem : facit enim divitias esse non utiles nec sibi, nec aliis : non enim utuntur eis nisi conservando. Eccl. xiv, 3 : *Viro cupido et tenaci sine ratione est substantia.* Quarto, quia tollit justitiæ æquitatem. Exod. xxiii, 8 : *Ne accipias munera, quæ etiam excæcant prudentes, et subvertunt verba justorum.* Eccl. xxxi, 5 : *Qui autem diligit, non justificabitur.* Quinto, quia necat caritatem <sup>1</sup> proximi : quia, secundum Augustinum, quanto magis habet quis de caritate, tanto minus de cupiditate, et e converso : Eccl. vii, 20 : *Neque fratrem carissimum auro spreveris* : et caritatem Dei : quia sicut *nemo potest duobus dominis servire*, ita neque *Deo et mammonæ*, ut dicitur Matth. vi. Sexto, quia producit omnem iniquitatem : est enim *radix omnium malorum*, secundum Apostolum, ut dicitur I Timoth. vi. Et ideo si in corde radicata est, et homicidium et furtum et omnia mala operatur : et ideo dicit Apostolus, I Timoth. vi, 9 : *Qui volunt divites fieri, incidunt in tentationem et in laqueum diaboli, et desideria multa inutilia et nociva, quæ mergunt homines in interitum et perditionem : radix enim omnium malorum est cupiditas.* Et nota, quod cupiditas tunc est peccatum mortale, quando sine ratione concupiscitur res proximi : sed quando rationabiliter, veniale.

## CAPUT XXIX.

*De decimo præcepto; quot modis regnat concupiscentia carnis, et per quæ vincitur.*

*Non desiderabis uxorem proximi tui.* Exod. xx, 17. Beatus Joannes in I Canonica sua, ii capite, vers. 16, dicit, quod *omne quod est in mundo, concupiscentia*

*carnis est, et concupiscentia oculorum, et superbia vitæ* : unde omne desiderabile in his tribus consistit ; sed duo ex istis intelliguntur prohibita per hoc præceptum. *Non concupisces domum proximi tui.* In domo enim intelligitur et altitudo, per quam avaritia designatur ; Psalm. cxii, 3 : *Gloria et divitiæ in domo ejus.* Qui ergo desiderat domum, desiderat dignitates. Et ideo post hoc præceptum, *Non concupisces domum proximi tui*, ponitur aliud, per quod prohibetur carnis concupiscentia. *Non, inquit, desiderabis uxorem proximi tui.*

Et est sciendum, quod post peccatum, propter corruptionem nullus evadit concupiscentiam præter Christum et Virginem gloriosam. Et quodcumque concupiscentia adest, adest vel cum veniali, vel cum mortali, quando scilicet dominatur. Apostolus Roman. vi, 12 : *Non regnet peccatum in vestro mortali corpore* : et non dixit, *Non sit* : quia, sicut ipse dicit Rom. vii, 18 : *Scio quod non habitat in me, idest in carne mea, bonum.* Regnat autem peccatum in carne, quando primo in corde regnat concupiscentia, consentiendo : et ideo subdit Apostolus : *Ut scilicet obediatis concupiscentiis carnis.* Matth. v, 28 : *Qui viderit mulierem ad concupiscendum eam, jam mæchatus est eam in corde suo.* Voluntas enim apud Deum pro facto reputatur. Secundo quando dominatur in ore, conceptum exprimendo. Matth. xii, 34 : *Ex abundantia enim cordis os loquitur.* Ephes. iv, 29 : *Omnis sermo malus ex ore vestro non procedat.* Et ideo non est sine peccato componere cantiones vanas, etiam secundum Philosophos ; quia et Poetæ fingentes carmina amatoria debebant expelli ex civitatibus. Tertio quando egreditur in opere, membris concupiscentiæ serviendo. Rom. vi, 19 : *Sicut exhibuistis membra vestra servire iniquitati ad iniquitatem.* Isti ergo sunt gradus concupiscentiæ.

Et sciendum, quod in fugiendo istud peccatum oportet multum laborare, cum sit intrinsicum : difficilius enim vincitur inimicus familiaris. Vincitur autem quatuor modis. Primo occasiones exteriores fugiendo, ut puta malam societatem, et omnia inducentia occasionaliter ad hoc peccatum. Eccl. ix, 5 : *Virginem ne*

<sup>1</sup> Al. : « Dei et proximi. »

*conspicias, ne forte scandalizeris in decore illius . . . . Noli circumspicere in vicis civitatis, nec oberraveris in plateis illius. Averte faciem tuam a muliere compta, et ne circumspicias speciem alienam. Propter speciem mulieris multi perierunt, et ex hoc concupiscentia quasi ignis exardescit.* Prov. vi, 27 : *Numquid potest homo abscondere ignem in sinu suo, ut vestimenta illius non ardeant?* Et ideo præceptum fuit Lot ut fugeret ab omni circa regione, Gen. xix. Secundo cogitationibus aditum non præbendo, quia occasio sunt excitandæ concupiscentiæ : et hoc faciendum est per carnis afflictionem : I Cor. ix, 27 : *Castigo corpus meum et in servitutum redigo.* Tertio orationibus insistendo : quia *nisi Dominus custodierit civitatem, frustra vigilat qui custodit eam* : Psalm. cxxvi, 1. Sapient. viii, 21 : *Scivi quoniam aliter non possum esse continens, nisi Deus det* : Matth. xvii, 20 : *Hoc genus dæmoniorum non ejicitur nisi per orationem et jejunium.* Si enim duo pugnarent, et velles unum juvare, alterum vero non : oportet primo auxilium dare, secundo vero subtrahere. Inter spiritum autem et carnem est prælium continuum : unde oportet, si vis quod spiritus vincat, quod des ei auxilium, et hoc fit per orationem ; carni vero subtrahas, et hoc fit per jejunium ; nam caro per jejunium debilitatur. Quarto licitis occupationibus insistendo : Eccli. xxxiii, 29 : *Multam malitiam docuit*

*otiositas* : Ezech. xvi, 49 : *Hæc fuit iniquitas Sodomæ, superbia, saturitas panis, et abundantia, et otium.* Hieronymus : *Semper aliquid boni facito, ut te diabolus inveniat occupatum.* Inter omnes autem occupationes melior est studium Scripturarum. Hieronymus *ad Paulinum* : *Ama studia Scripturarum, et carnis vitia non amabis.*

Hæc ergo sunt <sup>1</sup> decem verba, de quibus dicit Dominus Matth. xix, 17 : *Si vis ad vitam ingredi, serva mandata.* Duæ enim sunt radices principales omnium mandatorum, scilicet dilectio Dei et proximi. Diligenti autem Deum tria necesse est facere : scilicet quod non habeat alium Deum, et quantum ad hoc dicit : *Non coles deos alienos.* Secundo quod honoret eum ; et quantum ad hoc dicit : *Non assumes nomen Dei tui in vanum.* Tertio quod libenter quiescat in eo ; et quantum ad hoc dicit : *Memento ut diem sabbati sanctifices.* Diligentem autem proximum oportet quod primo faciat ei honorem debitum : unde dicit : *Honora patrem tuum.* Secundo quod abstineat a faciendo ei malum ; et hoc vel facto : unde dicit, *Non occides,* quod est in persona propria ; *non adulterabis,* quod est in persona conjuncta ; *non furtum facies,* quod est in rebus exterioribus. Item dicto, ibi, *Non falsum testimonium dices* : vel corde ; et quantum ad hoc dicit : *Non concupisces rem proximi tui, et non desiderabis uxorem proximi tui.*

<sup>1</sup> Al. : « super decem verba. »

# OPUSCULUM IV.

## DE ARTICULIS FIDEI ET ECCLESIAE SACRAMENTIS

AD ARCHIEPISCOPUM PANORMITANUM.

(EDIT. ROM. VII.)

### TRACTATUS PRIMUS.

#### DE ARTICULIS FIDEI.

Postulavit<sup>2</sup> a me vestra dilectio ut de articulis fidei et Ecclesiae sacramentis aliqua vobis compendiose pro memoriali transcriberem, cum dubitationibus quæ circa hæc moveri possunt<sup>3</sup>. Verum cum omne Theologorum studium versetur circa dubietates contingentes articulos fidei et Ecclesiae sacramenta, si ad plenum vestrae petitioni satisfacere vellem, oporteret totius Theologiae comprehendere summatim difficiles quæstiones<sup>4</sup>: quod quantum sit operosum, advertit vestra prudentia. Unde ad præsens vobis sufficiat, si articulos fidei et Ecclesiae sacramenta breviter vobis distinguam, et qui errores sunt circa quemlibet eorum vitandi. In primis igitur nos<sup>5</sup> scire oportet, quod tota fides christiana circa divinitatem et humanitatem Christi versatur. Unde Christus voce Joannis loquens ait, Joan. XIV, 1: *Creditis in Deum, et in me credite*. Circa utrumque autem horum a quibusdam sex, a quibusdam septem articuli distinguuntur: et sic omnes articuli secundum quosdam duodecim, secundum quosdam quatuordecim esse dicuntur. Primo igitur sex articulos sic distinguunt circa fidem divinitatis. Sunt enim circa divinitatem tria consideranda: scilicet unitas divinæ essentiae, trinitas

personarum, et effectus divinæ virtutis.

Primus igitur articulus est ut credamus essentiae divinæ unitatem, secundum illud Dent. VI, 4: *Audi Israel: Dominus Deus tuus, Deus unus est*. Contra hunc autem articulum plures errores vitandi occurrunt. Primo quidem quorundam Gentilium sive Paganorum, ponentium plures deos; contra quos dicitur Exod. XX, 3: *Non habebis deos alienos coram me*. Secundus est error Manichæorum, qui ponunt duo principia esse: unum a quo sunt omnia bona, aliud a quo sunt omnia mala: contra quos dicitur Isa. XLV, 6: *Ego Dominus: non est alter formans lucem, et creans tenebras, faciens pacem, et creans malum*: quia ipse secundum suam justitiam infligit malum poenæ, cum esse conspicit in sua creatura malum culpæ. Tertius est error Anthropomorphitarum ponentium unum Deum, sed dicentium eum corporeum, et ad modum humani corporis formatum: contra quos dicitur Joan. IV, 24: *Spiritus est Deus*: et Isa. XL, 18: *Cui similem fecistis Deum; aut quam imaginem ponetis ei?* Quartus est error Epicureorum ponentium quod Deus non habet providentiam et scientiam de rebus humanis: contra quos dicitur I Petr. ult., 7: *Omni sollicitudinem projicientes in eum, quoniam ipsi cura est de vobis*. Quintus error est quorundam Gentilium Philosophorum dicentium Deum non esse omnipotentem, sed quod solum potest ea

<sup>1</sup> Parm.: « in articulos fidei et sacramenta Ecclesiae expositio. »

<sup>2</sup> Parm.: « Postulat. » Sed tempore Ptolomæi Lucensis opusculum istud, eo teste, sic incipie-

bat: « Postulavit. »

<sup>3</sup> Parm.: « possent. »

<sup>4</sup> Parm.: « difficultates. »

<sup>5</sup> Parm.: « vos. »

quæ naturaliter fiunt : contra quos dicitur in Psalm. cxiii, 3 : *Omnia quæcumque voluit, Dominus fecit.* Omnes igitur hi derogant unitati divinæ essentiæ vel perfectioni : unde contra omnes ponitur in *Symbolo* : « Credo in unum Deum Patrem omnipotentem. »

Secundus articulus est quod sunt tres personæ divinæ in una essentia, secundum illud Joan. ult. : *Tres sunt qui testimonium dant in cælo, Pater, Verbum et Spiritus sanctus : et hi tres unum sunt.* Contra hunc autem articulum sunt plures errores. Primus fuit Sabellii, qui posuit unam essentiam, sed trinitatem personarum negavit, dicens quod una persona quandoque dicitur Pater, quandoque Filius, quandoque Spiritus sanctus. Secundus est error Arii, qui posuit tres personas, sed negavit unitatem essentiæ, dicens Filium esse alterius substantiæ a Patre, et esse creaturam, et minorem Patre, et sibi non coæqualem, nec coæternum, sed quod incepit esse postquam non fuerat : et contra hos duos errores dicit Dominus, Joan. x, 30 : *Ego et Pater unum sumus*, quia, ut dicit Augustinus « quod dicit Unum, liberat te ab Ario; quod dicit Sumus, pluraliter, liberat te a Sabellio. » Tertius est error Enoimii, qui posuit Filium dissimilem Patri : contra quem dicitur Coloss. 1, 15 : *Qui est imago Dei invisibilis.* Quartus est error Macedonii, qui posuit Spiritum sanctum esse creaturam : contra quem dicitur II Corinth. iii, 17 : *Dominus autem Spiritus est.* Quintus est error Græcorum, qui dicunt Spiritum sanctum procedere a Patre, sed non a Filio : contra quos dicitur Joan. xvi, 26 : *Paraclytus autem Spiritus sanctus, quem mittet Pater in nomine meo : quia scilicet eum mittit Pater tamquam spiritum Filii, et a Filio procedentem : et Joan. xvi, 14, dicitur : Ille me clarificabit, quia de meo accipiet : et contra omnes hos errores in *Symbolo* dicitur : « Credo in Deum Patrem... et in Filium ejus unigenitum, non factum, consubstantialem Patri... et in Spiritum sanctum Dominum et vivificantem qui ex Patre Filioque procedit. »*

Alii vero quatuor articuli divinitatis pertinent ad effectus divinæ virtutis : quorum primus, qui est tertius, pertinet ad creationem rerum in esse naturæ, secundum illud Psalm. cxlviii, 5 : *Dixit et facta sunt.* Contra hunc articulum primo quidem erravit Democritus et Epi-

curus, ponentes quod nec materia mundi nec ipsa mundi compositio est a Deo; sed quod mundus est casu factus per concursum corporum indivisibilium, quæ rerum principia æstimabant : contra quos dicitur in Psal. xxxii, 6 : *Verbo Domini cæli firmati sunt* : idest secundum rationem æternam, non autem casu. Secundus est error Platonis et Anaxagoræ, qui posuerunt mundum factum a Deo, sed ex materia præjacenti : contra quos dicitur in Psalm. clxviii, 5 : *Mandavit, et creata sunt*, idest ex nihilo facta. Tertius est error Aristotelis, qui posuit mundum a Deo factum non esse, sed ab æterno fuisse : contra quod dicitur Genes. 1, 1 : *In principio creavit Deus cælum et terram.* Quartus est error Manichæorum, qui posuerunt Deum factorem invisibilium, sed visibilia a diabolo facta; contra quos dicitur Hebr. xi, 3 : *Fide intelligimus aptata esse sæcula Verbo Dei, ut ex invisibilibus visibilia fierent.* Quintus est error Simonis Magi et Menandri ejus discipuli, et multorum aliorum hæreticorum eos sequentium, qui creationem mundi non Deo, sed Angelis attribuunt : contra quos dicit Paulus Act. xvii, 24 : *Deus qui fecit mundum, et omnia quæ in eo sunt.* Sextus est error eorum qui posuerunt, Deum per seipsum non gubernare mundum, sed per quasdam potestates sibi subjectas; contra quos dicitur Job xxxiv, 13 : *Quem constituit alium super terram, aut quem posuit super orbem quem fabricatus est?* Et contra hos errores dicitur in *Symbolo* : « Factorem vel creatorem cœli et terræ, visibilium omnium et invisibilium. »

Quartus articulus pertinet ad effectum gratiæ, per quam vivificatur Ecclesia a Deo, secundum illud Roman. iii, 24 : *Justificati gratis per gratiam ipsius*, scilicet Dei : et sub articulo isto comprehenduntur omnia sacramenta Ecclesiæ, et quæcumque pertinent ad Ecclesiæ unitatem, et dona Spiritus sancti, et justitia hominum. Et quia de sacramentis Ecclesiæ posterius est tractandum, de his interim supersedeamus, et alios errores contra hunc articulum exponamus : quorum primus est Cerinthi et Ebionis; et etiam Nazareorum, qui dixerunt gratiam Christi non sufficienter ad salutem operari, nisi aliquis circumcisionem et alia legis mandata custodiat : contra quos dicitur Roman. iii, 28 : *Arbitramur justificari hominum per fidem sine operibus*

*legis.* Secundus est error Donatistarum, qui posuerunt gratiam Christi solum in Africa remansisse, quia scilicet totus alius mundus communicabat Cæciliano Carthaginensi Episcopo, quem ipsi condemnauerunt; et in hoc negabant unitatem Ecclesiæ : contra quos dicitur ad Coloss. III, 11 : *In Christo Jesu non est Gentilis et Judæus, circumcisio et præputium, Barbarus et Scythæ, servus et liber; sed omnia in omnibus Christus.* Tertius est error Pelagianorum, qui quidem primo negaverunt peccatum originale esse in parvulis, contra id quod dicit Apostolus ad Roman. V, 12 : *Per unum hominem peccatum in hunc mundum intravit, et per peccatum mors; ita et in omnes homines mors pertransiit, in quo omnes peccaverunt* : et in Psalm. L, 7, dicitur : *Ecce in iniquitatibus conceptus sum.* Secundo dicunt quod principium boni operis inest homini a seipso, sed consummatio est a Deo, contra id quod dicit Apostolus Philipp. II, 13 : *Deus est qui operatur in vobis et velle et perficere pro bonavoluntate.* Tertio dicunt, gratiam dari homini secundum sua merita, contra id quod dicitur Rom. XI, 6 : *Si autem gratia, jam non ex operibus : alioquin gratia jam non esset gratia.* Quartus error est Origenis, qui posuit omnes animas creatas cum Angelis simul, et pro diversitate eorum quæ ibi egerunt, quosdam homines vocari a Deo per gratiam, quosdam vero in infidelitate relinqui, contra quod dicit Apostolus ad Rom. IX, 11 : *Cum nondum nati essent, aut aliquid boni egissent aut mali (ut secundum electionem propositum Dei maneret) non ex operibus, sed ex vocante dictum est ei, quia major serviet minori.* Quintus error est Cataphrigarum, idest Montani, Priscæ, et Maximillæ qui dicunt Prophetas quasi arreptitios fuisse, et quod non prophetaverunt per Spiritum sanctum : contra quos dicitur II Petr. I, 21 : *Non enim voluntate humana allata est aliquando prophetia; sed Spiritu sancto inspirati locuti sunt sancti Dei homines.* Sextus est error Cerdonis, qui primo dixit Deum legis et Prophetarum non esse Patrem Christi, nec bonum Deum esse, sed injustum : Patrem vero Christi bonum esse; quem etiam Manichæi secuti sunt, legem re-

probantes : contra quos dicitur Roman. VII, 12 : *Lex quidem sancta, et mandatum sanctum et justum et bonum* : et ibid. I, 2, dicitur : *Quod ante promiserat per Prophetas suos in Scripturis sanctis de Filio suo.* Septimus error est eorum qui quædam quæ ad perfectionem vitæ pertinent, asserunt esse ad necessitatem salutis. Quorum quidam fuerunt qui se arrogantissime Apostolos (a) vocaverunt, qui nullam spem putant habere salutis eos qui conjugibus utuntur, et propria possident. Alii vero, scilicet Tatiani, non vescuntur carnibus, et eas omnino abominantur, secundum illud Apostoli I ad Timoth. IV, 4 : *In novissimis temporibus discedent quidam a fide, attendentes spiritibus erroris, et doctrinis dæmoniorum, in hypocrisi loquentium mendacium et cauteriatam habentium suam conscientiam, prohibentium nubere, et abstinere a cibis, quos Deus creavit ad percipiendum cum gratiarum actione fidelibus, et his qui cognoverunt veritatem.* Dicunt enim quod promissio de adventu Spiritus sancti non fuit in Apostolis completa, sed in eis; contra illud quod dicitur Act. II. Euty-chiani etiam dicunt homines non posse salvari nisi continue orent, propter illud quod Dominus dicit Luc. XVII, 1 : *Oportet semper orare, et non deficere* : quod sic accipitur, secundum Augustinum, ut nullum diem prætermittant circa orandi opera. Alii vero qui Passalonitæ<sup>1</sup> dicuntur, intantum silentio student, ut naribus et labiis digitum apponant : Passalos enim Græce dicitur palus, et ranchos nasus. Quidam etiam dicunt quod homines non possunt salvari nisi semper nudis pedibus ambulent : contra quos omnes dicit Apostolus I Corinth. X, 22 : *Omnia mihi licent, sed non omnia expediunt* : ex quibus datur intelligi quod licet aliqua a sanctis viris assumantur tamquam expedientia, non tamen propter hoc opposita redduntur illicita. Octavus error est eorum qui dicunt e contrario, opera perfectionis non esse præferenda communi vitæ fidelium; sicut Jovinianus posuit quod virginitas non præfertur conjugio, contra illud quod dicitur I Corinth. VII, 38 : *Qui matrimonio jungit virginem suam bene facit; et qui non jungit melius facit* : et sicut Vi-

<sup>1</sup> Al. : Passalorichitæ. » et : « Passaloenitæ. »  
(a) Apostolici qui se isto nomine arrogantissime vocaverunt, eo quod in sua communione non re-

ciperent utentes conjugibus, et res proprias possidentes. — Hæc Guido. —



gilantius, qui æquavit statum divitiarum possidentium statui paupertatis propter Christum assumptæ : contra quem dicit Dominus Matth. xix, 21 : *Si vis perfectus esse, vade, et vende omnia quæ habes, et da pauperibus, et habebis thesaurum in cælo; et veni, sequere me.* Nonus error est negantium liberum arbitrium, sicut quidam negavit, dicens animas quæ sunt malæ creationis, non posse non peccare : contra quos dicitur I Joan. ii, 1 : *Hæc scribo vobis ut non peccetis.* Decimus error est Priscianistarum<sup>2</sup>, et etiam Mathematicorum<sup>3</sup> dicentium homines fatalibus stellis obligatos, ita scilicet quod eorum opera sunt necessitati stellarum subjecta : contra quos dicitur Jerem. x, 2 : *A signis cæli nolite metuere quæ timeant Gentes.* Undecimus error est dicentium quod homines Dei gratiam et caritatem habentes, peccare non possunt; ita quod asserunt eos qui aliquando peccaverunt, nunquam caritatem habuisse : contra quos dicitur Apocal. ii, 4 : *Caritatem tuam primam reliquisti : memor esto itaque unde excideris.* Duodecimus error est eorum qui ea quæ ab Ecclesia Dei universaliter sunt statuta, dicunt non esse observanda, sicut Ariani, qui dicunt, statuta jejunia non esse solemniter celebranda, sed cum quis voluerit, jejuset, ne videatur esse sub lege; et sicut (a) Tesseradecathitæ<sup>4</sup>, idest Quartodecumani, qui dicunt quartadecima luna pascha esse celebrandum, quocumque die septimanæ occurreret; et eadem ratio est de quibuscumque ab Ecclesia statutis. Et contra omnes istos errores in *Symbolo Apostolorum* dicitur : « Sanctam Ecclesiam catholicam, sanctorum communionem, remissionem peccatorum : » et in *Symbolo patrum* dicitur : Qui locutus est per Prophetas, et unam sanctam catholicam et apostolicam Ecclesiam. Confiteor unum baptisma in remissionem peccatorum.

Quintus articulus est de resurrectione mortuorum, de quo dicitur I Corinth. xv, 51 : *Omnes quidem resurgemus* : contra quem etiam sunt plures errores : quorum primus est error Valentini, qui carnis resurrectionem negavit, quem etiam plures hæretici sunt secuti : contra quem dicitur I Corinth. xv, 42 : *Si Christus*

*prædicatur quod resurrexit a mortuis; quomodo quidam dicunt in vobis, quoniam resurrectio mortuorum non est?* Secundus est error Hymenæi et Phileti, contra quos dicit Apostolus II Timoth. ii, quod *a veritate exciderunt, dicentes resurrectionem jam factam, vel quia non credebant nisi resurrectionem spiritualem, vel quia non credebant alios resurrecturos, nisi illos qui cum Christo resurrexerunt.* Tertius est error quorundam modernorum, qui dicunt resurrectionem futuram, non tamen eorundem corporum, sed quod animæ resument quædam corpora cælestia : contra quos Apostolus dicit I Corinth. xv, 53 : *Oportet corruptibile hoc induere incorruptionem, et mortale hoc induere immortalitatem.* Quartus est error Eutychiei Patriarchæ Constantinopolitani, qui posuit corpora nostra in resurrectione aeri vel vento similari quod Gregorius narrat in XIV *Moralium* : contra quem est quod Dominus post resurrectionem suam corpus suum discipulis palandum præbuit, dicens, Luc. ult. 39 : *Palpate, et videte : cum tamen Apostolus dicat, Philip. iii, 21 : quod reformabit corpus humilitatis nostræ configuratum corpori claritatis suæ.* Quintus error est dicentium quod corpora humana in resurrectione vertentur in spiritum : contra quos dicitur Luc. ult. 39 : *Spiritus carnem et ossa non habet, sicut me videtis habere.* Sextus error est Cerinthi, qui mille annos post resurrectionem in terreno regno fabulatur futuros, in quibus homines carnales ventris ac libidinis voluptates habebunt : contra quem dicitur Matth. xxii, 30 : *In resurrectione neque nubent neque nubentur.* Quidam dixerunt etiam quod post resurrectionem mortuorum, in eodem statu in quo nunc est, mundus manebit; contra quos dicitur Apoc. xxi, 1 : *Vide cælum novum et terram novam* : et Apostolus dicit Roman. viii, 1, quod *ipsa creatura liberabitur a servitute corruptionis in libertatem gloriæ filiorum Dei.* Et contra omnes hos errores dicitur : « Carnis resurrectionem; » et in alio *Symbolo* : « Expecto resurrectionem mortuorum. »

Sextus articulus pertinet ad ultimum effectum divinitatis, qui est remuneratio

<sup>1</sup> Al. omittitur : « non. »

<sup>2</sup> Al. : « Psalmistarum. » et in Cod. 1060 : « Priscillianistarum. »

<sup>3</sup> In Cod. 1060 : « Manichæarum. »

<sup>4</sup> Al. : « Tesserarechochitæ. » et in Cod. 1060 : « Ixeracochitæ. »

(a) Apud Guidonem : « Thassarissarum. »

bonorum et punitio malorum, secundum illud Psalm. LXI, 12 : *Tu reddes unicuique juxta opera sua* : et circa hunc etiam fuerunt multi errores : quorum primus est dicentium quod anima moritur cum corpore, sicut Arabici<sup>1</sup> asserunt (*a*), vel etiam post modicum intervallum, sicut Zeno dixit, ut recitatur in lib. *De ecclesiasticis dogmatibus* : contra quod est quod Apostolus dicit Philip. I, 23 : *Desiderium habens dissolvi, et esse cum Christo*; et Apocal. VI, 9 : *Vidi subtus altare Dei animas interfectorum propter verbum Dei*. Secundus error est Origenis, qui posuit homines et dæmones damnatos iterum posse purgari, et redire in gloriam; et Angelos sanctos et homines beatos iterum posse deduci ad mala : quod est contra auctoritatem Domini, Matth. XXV, 46 : *Ibunt hi in supplicium æternum; justi autem in vitam æternam*. Tertius est error dicentium omnes pœnas malorum et omnia præmia bonorum futuras esse æquales; contra quorum primum dicitur I Corinth. XV, 41 : *Stella a stella differt in claritate : sic et resurrectio mortuorum* : contra secundum quod dicitur Matth. XI, 12 : *Tyro et Sidoni remissius erit in die judicii quam vobis*. Quartus error est dicentium, animas malorum non statim post mortem descendere ad infernum, nec aliquas sanctorum animas paradysum intrare ante diem judicii : contra quos dicitur Luc. XVI, 22, quod *mortuus est dives, et sepultus est in inferno*; et II Corinth. V, 1, dicitur : *Scimus enim quoniam si terrestris domus nostra hujus habitationis dissolvatur, quod ædificationem ex Deo habemus domum non manu factam, sed æternam in cælis*. Quintus est error dicentium non esse purgatorium animarum post mortem, eorum scilicet qui in caritate decesserunt, sed aliquid purgabile habent : contra quos dicitur I Corinth. III, 12 : *Si quis ædificaverit supra fundamentum, (scilicet fidei per dilectionem operantis) lignum, fenum, stipulam... detrimentum patietur, ipse autem salvus erit; sic tamen quasi per ignem* : et contra hos errores dicitur in *Symbolo*, « vitam æternam. Amen. »

Alii vero qui septem articulos circa fidem Divinitatis assignant, eos sic dis-

tinguunt, ut primus sit de essentiæ unitate; secundus de persona Patris; tertius de persona Filii; quartus de persona Spiritus sancti; quintus de effectu creationis; sextus de effectu justificationis; septimus de effectu remunerationis, in<sup>2</sup> quo comprehendunt resurrectionem et vitam æternam. Et sic dum prædictorum sex articulorum secundum dividunt in tres, quintum vero et sextum compingunt in unum, fiunt secundum eos septem articuli. Nec refert quantum ad veritatem fidei vel errorum vitiationem, qualiter distinguantur.

Nunc restat considerare articulos qui pertinent ad humanitatem Christi : circa quam etiam sex articulos distinguunt : quorum primus est circa conceptionem et nativitatem Christi, secundum quod dicitur Isa. VII, et introducit Matth. I, 23 : *Ecce Virgo concipiet, et pariet filium, et vocabitur nomen ejus Emmanuel* : et circa hunc multi fuerunt errores : quorum primus fuit dicentium Christum fuisse purum hominem, et quod non semper fuit, sed a Maria sumpsit exordium : et iste est error Carpocratis et Cerinthi et Ebionis et Pauli Samosatani et Photini : contra quos dicitur Rom. IX, 5 : *Ex quibus est Christus secundum carnem, qui est super omnia Deus benedictus in sæcula*. Secundus error est Manichæorum dicentium quod Christus non habuit verum corpus, sed phantasticum : contra quod est quod Dominus, Luc. ult., reprehendit errorem discipulorum suorum, qui conturbati et perterriti existimabant se spiritum videre; et Matth. XIV, 26 : *Videntes eum supra mare ambulantem, turbati sunt dicentes, quia phantasma est, et præ timore clamaverunt* : quorum opinionem Dominus removit, dicens, vers. 27 : *Habete fiduciam, ego sum, nolite timere*. Tertius error est Valentini, qui dicit Christum cœleste corpus attulisse, nihilque de Virgine assumpsisse, sed per ipsam tamquam per rivum aut fistulam sine ulla de illa assumpta carne transiisse : contra quod dicitur Galat. IV, 4 : *Misit Deus Filium suum factum ex muliere*. Quartus est error Apollinaris qui dixit, aliquid Verbi in carnem fuisse conversum aut transmutatum; non autem carnem de Mariæ carne

<sup>1</sup> Al. : « Araps. » Parm. : « Arabs. »

<sup>2</sup> Parm. : « sub. »

(a) Arabici sic dicti sunt quia in Arabia exorti.

Errant enim quia dicunt animam rationalem cum corpore mori. — Hæc Guido. —

susceptam. Propter illud enim quod dicitur Joan. 1, 14: *Verbum caro factum est*, intelligit quod Verbum sit in carnem conversum: contra quod statim ibidem subditur: *Et habitavit in nobis*. Non autem in nostra natura integre habitasset, si fuisset in carnem conversum. Unde intelligendum est: *Verbum caro factum est*; id est, Verbum factum est homo. Sic enim frequenter caro sumitur in Scripturis, secundum illud Isa. xl, 5: *Videbit omnis caro pariter quod os Domini locutum est*. Quintus error est Arii, qui posuit Christum humanam animam non habuisse, sed Verbum fuisse loco animæ: contra quod dicitur Joan. x, 17: *Ego pono animam meam, et iterum sumam eam. Nemo tollit eam a me, sed ego pono eam a meipso*. Sextus error est Apollinaris, qui eum prædicto testimonio et aliis convinceretur humanam animam Christum habuisse, posuit quod Christus non habuit intellectum humanum, sed Verbum Dei fuit ei loco intellectus: contra quod est quod Dominus se hominem esse confitetur. Joan. viii, 40: *Quæritis me interficere, hominem qui veritatem locutus sum vobis*. Non autem fuisset homo, si anima rationali caruisset. Septimus est error Eutycheis qui posuit in Christo unam naturam compositam ex divinitate et humanitate: contra quod Apostolus dicit, Phil. ii, 6: *Qui cum in forma Dei esset, non rapinam arbitratus est esse se æqualem Deo; sed semetipsum exinanivit, formam servi accipiens, in similitudinem hominum factus, et habitu inventus ut homo*: manifeste distinguens in eo duas naturas, divinam et humanam. Octavus error est Monothelitarum, ponentium in Christo unam scientiam, operationem et voluntatem: contra quos Dominus dicit Matth. xxvi, 39: *Non sicut ego volo, sed sicut tu*. Ubi manifeste in Christo ponitur alia voluntas humana, alia divina, quæ est communis Patri et Filio. Nonus error est Nestorii, qui posuit Christum, Deum perfectum, et hominem perfectum: et tamen aliam dixit esse personam Dei, aliam hominis; et quod non est facta unio Dei et hominis in una persona Christi, sed solum secundum gratiæ inhabitationem: ita quod negat beatam Virginem esse matrem Dei, sed dicit eam esse matrem hominis Christi: contra quod dicitur Luc. 1,

35: *Quod nascetur ex te Sanctum, vocabitur Filius Dei*. Decimus error est Carpocratis, qui hominem Christum de utroque natum putasse perhibetur: contra quod dicitur Matth. 1, 18: *Antequam convenirent, inventa est in utero habens de Spiritu sancto*. Undecimus error est Helvidii dicentis quod postquam beata Virgo peperit Filium Christum, ex Joseph plures filios genuit: contra quod dicitur Ezech. xliv, 2: *Porta hæc clausa erit, et non aperietur, et vir non transibit per eam: quoniam Dominus Deus Israel ingressus est per eam, eritque clausa Principi*. Et contra omnes hos errores in *Symbolo Apostolorum* dicitur: « Conceptus est de Spiritu sancto, natus ex Maria Virgine: » et in *Symbolo patrum*: « Qui propter nos homines et propter nostram salutem descendit de cælis, et incarnatus est de Spiritu sancto ex Maria Virgine, et homo factus est. »

Secundus articulus est de passione et morte Christi, secundum quod ipse Dominus prædixit, Matth. xx, 18: *Ecce ascendimus Hierosolimam, et Filius hominis tradetur principibus sacerdotum et scribis: et condemnabunt eum morte, et tradent eum Gentibus ad illudendum et flagellandum et crucifigendum*. Et circa hunc articulum primus quidem est error Manichæorum, qui, sicut corpus Christi esse phantasticum asserunt, passionem Christi non in veritate, sed in phantasia esse arbitrantur: contra quod dicitur Isa. liii, 4: *Vere languores nostros ipse tulit, et dolores nostros ipse portavit*: et iterum, 7, *Tamquam oris ad occasionem ductus est*: quod etiam inducitur Act. viii. Secundus est error Galani<sup>1</sup>, qui in Christo unam naturam posuit, sed incorporalem et immortalem: contra quod dicitur I Petr. iii, 18: *Christus semel pro peccatis nostris mortuus est*. Et contra hos errores ponitur in *Symbolo*: « Crucifixus, mortuus et sepultus. »

Tertius articulus est de resurrectione Christi, secundum quod ipse dicit Matth. xx, 19, « Tertia die resurget. » Et circa hunc articulum primo quidem erravit Cerinthus, asserens Christum non surrexisse, sed resurrecturum esse: contra quod dicitur I Corinth. xv, 4: *Resurrexit tertia die secundum scripturas*. Secundus error est qui imponitur Origeni, quod sit

<sup>1</sup> Al.: « Gaiani. »

iterum pro salute hominum et dæmonum passurus : contra quod dicitur Rom. vi, 9 : *Christus resurgens ex mortuis, jam non moritur; mors illi ultra non dominabitur. Quod enim mortuus est peccato, mortuus est semel; quod autem vivit, vivit Deo.* Et contra hos errores dicitur in *Symbolo* : « Tertia die resurrexit a mortuis. »

Quartus articulus est de descensu ad inferos : credimus enim animam Christi descendisse ad inferos, corpore jacente in sepulchro. Ephes. iv, 9 : *Descendit primum in inferiores partes terræ.* Unde in *Symbolo* dicitur : « Descendit ad inferos; » quod est contra quosdam, qui posuerunt ipsum Christum non descendisse per seipsum ad inferos, cum tamen Petrus dicat Act. ii, quod non est derelictus in inferno.

Quintus articulus est de ascensione Christi in cælum : de quo ipse dicit Joan. xx, 17 : *Ascendo ad Patrem meum et Patrem vestrum, Deum meum et Deum vestrum.* Circa quam errant Seleuciani, qui negant Salvatorem in carne sedere ad dexteram Dei Patris, sed quod eam exiit et in sole posuit. Circa quod dicitur Marc. ult., 19 : *Dominus quidem Jesus postquam locutus est eis, ascendit in cælum, et sedet a dextris Dei.* Unde in *Symbolo* dicitur : « Ascendit in cælum, sedet ad dexteram Patris. »

Sextus articulus est de adventu ad iudicium, de quo Dominus dicit Matth. xxv, 31 : *Cum venerit Filius hominis in majestate sua, et omnes Angeli ejus cum eo, tunc sedebit super sedem majestatis suæ* et Petrus dicit Actuum x, 42 : *Hic est qui constitutus est a Deo iudex vivorum et mortuorum, sive eorum qui jam mortui sunt, et eorum qui in adventu Christi vivi inventientur.* Et circa hoc aliqui errant, de quibus dicitur II Petr. iii, 3 : *Venient in novissimis diebus in deceptione illusores, juxta proprias concupiscentias dicentes : Ubi est re promissio aut adventus ejus?* Contra quos dicitur Job xix, 29 : *Fugite a facie gladii, quoniam ultor iniquitatum gladius est, et scitote esse iudicium.* Unde in *Symbolo* dicitur : « Qui venturus est iudicare vivos et mortuos. » Illi autem qui septem articulos humanitatis esse ponunt, distinguunt primum articulum in duos, ponentes scilicet sub alio articulo conceptionem Christi, et sub alio ejus nativitatem.

## TRACTATUS II.

## DE ECCLESIE SACRAMENTIS.

Nunc restat considerandum de Ecclesiæ sacramentis : quæ tamen omnia comprehenduntur sub uno articulo, quia ad effectum gratiæ pertinent. Sed quia specialem de sacramentis fecistis questionem, de his seorsum agendum est.

Est primo igitur sciendum, quod sicut Augustinus dicit in X lib. *De civit. Dei*, c. v, « sacramentum est sacrum signum, » vel sacræ rei signum. Fuerunt autem in veteri lege quædam sacramenta, idest sacræ rei signa, sicut agnus paschalis, et alia sacramenta legalia : quæ quidem solum significabant Christi gratiam, non tamen eam causabant. Unde Apostolus Galat. iv, vocat ea *egena et infirma elementa* : *egena* quidem, quia gratiam non continebant; et *infirma*, quia gratiam conferre non poterant. Sacramenta vero novæ legis continent et conferunt gratiam. In eis enim virtus Christi sub tegumento rerum visibilium secretius operatur salutem, ut dicit Augustinus. Et ideo sacramentum novæ legis est invisibilis gratiæ visibilis forma, ut ejus similitudinem gerat et causa existat. Sicut ablutio quæ fit in aqua baptismatis repræsentat interiorem mundationem quæ fit a peccatis per virtutem baptismi. Sunt autem sacramenta legis novæ septem : scilicet Baptismus, Confirmatio, Eucharistia, Pœnitentia, extrema Unctio, Ordo et Matrimonium : quorum prima quinque ordinantur ad perfectionem unius hominis in seipso : sed alia duo, scilicet Ordo et Matrimonium, ordinantur ad perfectionem et multiplicationem totius Ecclesiæ. Vita enim spiritualis conformatur vitæ corporali. In vita autem corporali perficitur homo primo per generationem, qua nascitur in hoc mundo ; secundo per augmentum, quo perducitur ad quantitatem et virtutem perfectam; tertio per cibum, quo sustentatur hominis vita et virtutes. Et hæc quidem sufficerent, si nunquam eum infirmari contingeret ; sed quia frequenter homo infirmatur, quarto indiget sanatione. Sic est in vita spirituali. Primo enim indiget homo regeneratione, quæ fit per Baptismum, secundum illud Joan. iii, 5 : *Nisi quis renatus fuerit ex aqua et Spiritu sancto, non potest introire*



*in regnum Dei.* Secundo oportet quod homo accipiat perfectam virtutem quasi quoddam spirituale augmentum, scilicet per sacramentum Confirmationis ad similitudinem Apostolorum, quos Spiritus sanctus in eos veniens confirmavit. Unde Dominus dixit eis, Luc. ult., 49 : *Vos sedete in civitate (Jerusalem) quoadusque induamini virtute ex alto.* Tertio oportet quod homo spiritualiter nutriatur per Eucharistiae sacramentum, secundum illud Joan. vi, 54 : *Nisi manducaveritis carnem Filii hominis et biberitis ejus sanguinem, non habebitis vitam in vobis.* Quarto oportet quod homo sanetur spiritualiter per sacramentum poenitentiae, secundum illud Psalm. xl, 5 : *Sana, Domine, animam meam, quia peccavi tibi.* Quinto spiritualiter simul et corporaliter per sacramentum extremae Unctionis sanatur, secundum illud Jac. ult., 14 : *Infirmatur aliquis in vobis? inducat presbyteros Ecclesiae, et orent super eum, ungentes eum oleo in nomine Domini : et oratio fidei salvabit infirmum, et alleviabit eum Dominus ; et si in peccatis sit, dimittentur ei.* Quantum autem ad communem Ecclesiae utilitatem ordinantur duo sacramenta, scilicet Ordo et Matrimonium. Nam per ordinem Ecclesia gubernatur et multiplicatur spiritualiter, et per Matrimonium multiplicatur corporaliter.

Est autem considerandum quod praedicta septem sacramenta quaedam habent communia, et quaedam propria. Commune quidem est omnibus sacramentis quod conferant gratiam, sicut dictum est. Commune etiam est omnibus, quod sacramentum consistit in verbis et rebus corporalibus, sicut in Christo, qui est sacramentorum auctor, est Verbum caro factum. Et sicut caro Christi sanctificata est, et virtutem sanctificandi habet per Verbum sibi unitum ; ita et res sacramentorum sanctificantur, et vim sanctificandi habent per verba quae in his proferuntur. Unde Augustinus dicit *Super Joan. Tract. lx, § 3* : « Accedit verbum ad elementum, et fit sacramentum. » Unde verba quibus sanctificantur sacramenta, dicuntur sacramentorum formae ; res autem sanctificatae dicuntur sacramentorum materia : sicut aqua est materia Baptismi et chrisma confirmationis. Requiritur etiam in quolibet sacramento persona ministri conferentis sacramentum cum intentione conferendi et faciendi quod facit Ecclesia : quorum trium si aliquid desit,

idest si non sit debita forma verborum, et si non sit materia, et si minister sacramenti non intendit sacramentum conferre, non perficitur sacramentum. Impeditur etiam effectus sacramenti per culpam recipientis ; puta, si fictus accedat, et non corde parato ad suscipiendum sacramentum. Talis enim licet sacramentum suscipiat, effectum tamen sacramenti, idest gratiam Spiritus sancti, non recipit : quia, ut dicitur Sap. i, 5 : *Spiritus sanctus disciplinae effugiet fictum.* E contrario autem sunt alii qui nunquam recipiunt sacramentum, qui tamen effectum sacramenti suscipiunt propter devotionem quam habent ad sacramentum, quod habent in voto, sive desiderio.

Sunt autem et quaedam propria sacramentis quibusdam. Nam quaedam horum imprimunt characterem, idest spirituale quoddam signum distinctivum a ceteris, sicut in sacramento Ordinis vel sacramento Baptismi, et in sacramento Confirmationis : et talia sacramenta nunquam iterantur super eandem personam. Nunquam enim ille qui est baptizatus, debet ulterius baptizari ; neque confirmatus, iterum confirmari ; neque ordinatus, iterum ordinari : quia character, qui in hujusmodi sacramentis imprimitur, indelebilis est. In aliis vero sacramentis non imprimitur character suscipienti ea ; et ideo possunt iterari quantum ad personam suscipientem, non tamen quantum ad materiam. Potest enim unus homo frequenter poenitere, frequenter Eucharistiam sumere, frequenter extremam Unctionem suscipere, frequenter Matrimonium contrahere ; non tamen eadem hostia debet frequenter consecrari, nec idem oleum infirmorum debet frequenter benedici. Est etiam alia differentia : quia quaedam sacramenta sunt de necessitate salutis, sicut Baptismus et Poenitentia, quibus non existentibus, non potest homo salvari. Alia vero sacramenta non sunt de necessitate salutis, quia sine eis potest esse salus, nisi propter contemptum sacramenti.

His visis in communi circa Ecclesiae sacramenta, oportet quaedam in speciali de singulis dicere. Primo igitur circa Baptismum sciendum est quod materia Baptismi est aqua vera et naturalis, nec differt utrum sit frigida vel calefacta. In aquis autem artificialibus, sicut est aqua rosacea, et aliis hujusmodi, non potest baptizari. Forma autem Baptismi est ista :



« Ego te baptizo in nomine Patris et Filii et Spiritus sancti. » Minister hujus sacramenti proprius est Sacerdos, cui ex officio competit baptizare. In articulo tamen necessitatis, non solum diaconus, sed etiam laicus et mulier, immo paganus et hæreticus potest baptizare, dummodo servet formam Ecclesiæ, et intendat facere quod facit Ecclesia. Si vero extra articulum necessitatis aliquis a talibus baptizetur, recipit quidem sacramentum, et non debet iterum baptizari; non tamen recipit gratiam sacramenti, quia ficti deputantur, utpote contra statutum Ecclesiæ sacramentum accipientes (a). Effectus autem Baptismi est remissio culpæ originalis et actualis, et etiam totius culpæ et pænæ; ita quod baptizatis non est aliqua satisfactio injungenda pro peccatis præteritis; sed statim morientes post baptismum introducuntur ad gloriam Dei. Unde effectus Baptismi ponitur apertura januæ paradisi.

Circa hoc sacramentum fuerunt aliqui errores. Primus quidem fuit Solentianorum<sup>1</sup>, qui baptismum in aqua non recipiunt, sed solum baptismum spirituales: contra quos dixit Dominus, Joan. iii, 5: *Nisi quis renatus fuerit ex aqua et Spiritu sancto, non potest introire in regnum Dei.* Secundus error fuit Donatarum rebaptizantium eos qui sunt baptizati a catholicis: contra quos dicitur Ephes. iv, 5: *Una fides, unum baptisma.* Est autem alter error eorum: nam dicunt, quod homo in peccato existens, non potest baptizare: contra quos dicitur Joan. i, 33: *Super quem videris Spiritum descendentem et manentem, hic est qui baptizat,* scilicet Christus. Unde non nocet homini malus minister nec in hoc nec in aliis sacramentis: quia Christus est bonus qui merito suæ passionis perficit sacramentum. Quartus error est Pelagianorum, qui dicunt pueros baptizari, ut regeneratione adoptati admittantur ad regnum Dei, de bono in melius translatis, non ista regeneratione aliquo malo obligationis veteris absoluti.

Secundum sacramentum est Confirmationis; ejus materia est chrisma confectum ex oleo, quod significat nitorem conscientiæ, et balsamo, quod significat odorem bonæ famæ, per Episcopum bene-

dicto. Forma autem hujus sacramenti est talis. « Consigno te signo crucis, et confirmo te chrismate salutis; in nomine Patris et Filii et Spiritus sancti. Amen. » Minister autem hujus sacramenti est solum Episcopus. Non enim licet Sacerdoti confirmandos *Chrismate* in fronte inungere. Effectus autem hujus sacramenti est quod in eo datur Spiritus sanctus ad robur, sicut datus est Apostolis in die Pentecostes, ut scilicet Christianus audacter confiteatur nomen Christi. Et ideo confirmandus in fronte ungitur, in qua est sedes verecundiæ; ut scilicet nomen Christi confiteri non erubescat, et præcipue crucem ejus, quæ est Judæis scandalum, Gentilibus autem stultitia: et propter hoc etiam signo crucis signantur.

Circa hoc sacramentum est error quorundam Græcorum dicentium, quod Sacerdotes<sup>2</sup> simplices hoc sacramentum possunt conferre: contra quos dicitur Act. viii, quod Apostoli miserunt Petrum et Joannem Apostolos, qui imponebant manus super eos qui baptizati erant a Philippo diacono, et accipiebant Spiritum sanctum. Episcopi autem sunt in Ecclesia loco Apostolorum, et loco illius manus impositionis datur in Ecclesia confirmatio.

Tertium sacramentum est Eucharistia, ejus materia est panis triticeus, et vinum de vite, modica aqua permixtum, ita quod aqua transeat in vinum: nam aqua significat populum, qui incorporatur Christo. De alio autem pane quam tritici, et alio vino, non potest hoc confici sacramentum. Forma autem hujus sacramenti sunt ipsa verba Christi dicentis: *Hoc est corpus meum; et Hic est calix sanguinis mei, novi et æterni testamenti, mysterium fidei, qui pro vobis et pro multis effundetur in remissionem peccatorum:* quia Sacerdos in persona Christi loquens, hoc conficit sacramentum. Minister autem sacramenti hujus est Sacerdos, neque aliquis alius potest corpus Christi conficere. Effectus autem<sup>3</sup> hujus sacramenti duplex est: quorum primus consistit in ipsa consecratione sacramenti: nam virtute prædictorum verborum panis convertitur in corpus Christi, et vinum in sanguinem; ita tamen quod totus Christus continetur sub speciebus panis, quæ remanent sine subjecto, et totus Christus continetur sub

<sup>1</sup> Al.: « Silencianorum. »

<sup>2</sup> Parm.: « Sacerdos simplex. . potest. »

<sup>3</sup> Parm. omittit: « autem » et « Sacramenti. »

(a) Hic agitur, ut patet, de adultis statutum Ecclesiæ scilicet violantibus.

speciebus vini : et sub qualibet parte hostiæ consecratæ, vini consecrati, separatione facta, est totus Christus. Alius vero effectus hujus sacramenti, quem in anima digne sumentis facit, est adunatio hominis ad Christum, sicut ipse dicit Joan. v, 57 : *Qui manducat meam carnem et bibit meum sanguinem, in me manet, et ego in eo.* Et quia per gratiam homo Christo incorporatur et membris ejus unitur, consequens<sup>4</sup> est quod per<sup>2</sup> hoc sacramentum in<sup>3</sup> sumentibus digne gratia angeatur. Sic igitur in hoc sacramento est aliquid quod est sacramentum tantum, scilicet ipsa species panis et vini ; est aliquid quod est res et sacramentum, scilicet corpus Christi verum ; et aliquid quod est res tantum, scilicet unitas corporis mystici, idest Ecclesiæ, quam hoc sacramentum et significat et causat.

Fuerunt autem circa hoc sacramentum multi errores. Quorum primus est eorum qui dicunt, quod in hoc sacramento non est verum corpus Christi, sed tantum significative. Auctor erroris ejus dicitur fuisse Berengarius, contra quem dicitur Joan. vi, 56 : *Caro mea vere est cibus, et sanguis meus vere est potus.* Secundus est error<sup>5</sup> Artotrytarum (*a*), qui offerunt in sacramento hoc panem et caseum, dicentes a primis hominibus oblationes de frugibus terræ, et ovium celebratas fuisse : contra quod est quod Dominus hujus sacramenti institutor, panem et vinum discipulis suis dedit. Tertius est error Cataphrygarum et<sup>6</sup> Pepusianorum (*b*), qui de infantis sanguine, quem de toto ejus corpore minutis punctiomm vulueribus extorquent, quasi eucharistiam suam conficere perhibentur, immisceentes tamen<sup>6</sup> eum farinae, panemque inde fa-

cientes (*c*) : quod magis est simile sacrificiis dæmonum, quam sacrificiis Christi, secundum illud Psalm. cv, 38 : *Effuderunt sanguinem innocentem... quem sacrificaverunt sculptilibus Chanaan.* Quartus est error Aquariorum ; (*d*) qui aquam solam in sacrificiis offerunt, cum tamen Proverb. ix, 5, dicatur ex ore Sapientiæ, qui est Christus : *Bibite vinum quod miscui vobis.* Quintus est error Ophitarum, qui serpentem Christum esse æstimantes, habent unum colubrum assuetum panes lingua lambere, atque ita eis veluteucharistiam sanctificare. Sextus est error<sup>7</sup> Pepusianorum, (*e*), qui tantum dant mulieribus principatum, ut sacerdotio quoque apud eos honorentur. Septimus est error Pauperum de Lugduno, qui dicunt quemlibet justum hominem posse conficere hoc sacramentum. Contra quos errores est quod Dominus Apostolis suis potestatem tradidit hoc sacramentum celebrandi ; unde solum illi qui quadam successione ab Apostolis acceperunt hanc potestatem, possunt hoc sacramentum conficere. Octavus est error quorundam qui dicuntur<sup>8</sup> Adamiani (*f*), qui imitantes nuditatem Adæ, nudi itaque<sup>9</sup> mares feminaeque conveniunt, nudi lectiones audiunt, nudi orant, sacramenta nudi celebrant : contra quos dicitur I Corinth. xiv, 40 : *Omnia honeste et secundum ordinem fiant in vobis.*

Quartum sacramentum est pœnitentia, ejus quasi materia sunt actus pœnitentis, qui dicuntur tres pœnitentiæ partes. Quarum prima est cordis contritio, ad quam pertinet quod homo doleat de peccato commisso, et proponat se de cetero non peccaturum. Secunda pars est oris confessio, ad quam pertinet ut peccator omnia peccata, quorum memoriam habet,

Pepuza Christum specie feminae revelatum. Unde ab hac Quintilliani etiam nuncupantur. Faciunt et ipsi de sanguine infantis quod Cathaphrygæ supra facere diximus. Nam et ab eis perlubentur exorti. Denique alii hanc Pepuzam non esse civitatem, sed villam dicunt fuisse Montani et prophetissarum ejus Priscæ et Maximillæ. — Hæc Guido.

(*c*) Qui puer si mortuus fuerit habetur apud eos pro martyre ; si autem vivit, pro magno sacerdote habetur. — Hæc Guido. —

(*d*) Dicebant quod sola aqua in calice pro materia sanguinis Christi in sacramento alteris sit ponenda. Hæc Guido.

(*e*) Hæc a Guidone iisdem verbis de Pepusianis asseruntur.

(*f*) Adamiani insuper nuptias damnant.

<sup>1</sup> Parm. : « dignum. »

<sup>2</sup> Parm. omittit : « per »

<sup>3</sup> Parm. omittit : « in. »

<sup>4</sup> Al. : « Artodinitarum. »

<sup>5</sup> Al. : « Præputianorum. » et in Cod. 1060 « Peputiarum. »

<sup>6</sup> Parm. omittit : « tamen. »

<sup>7</sup> Al. : « Præputianorum. »

<sup>8</sup> Al. : « Adamiani. »

<sup>9</sup> Parm. omittit : « itaque.

(*a*) Artotritæ : istis oblatio eorum hoc nomen dedit. Offerunt enim panem et caseum... et oblationem Deo offerendam de pane et caseo limitabantur. — Alias Artoleritæ. — Hæc ex Guidone.

(*b*) Pepusiani a loco quodam nominati sunt, quam civitatem desertam dicit Epiphanius. Dicunt Quintillæ et Priscillæ in eadem civitate

suo Sacerdoti confiteatur integraliter, non dividens ea diversis Sacerdotibus. Tertia pars est satisfactio pro peccatis secundum arbitrium Sacerdotis : quæ quidem præcipue fit per jejunium et orationem et eleemosynam. Forma autem hujus sacramenti sunt verba absolutionis quæ Sacerdos profert, cum dicit : « Ego te absolvo. » Minister hujus sacramenti est Sacerdos habens auctoritatem absolvendi vel ordinariam, vel commissione superioris. Effectus hujus sacramenti est absolutio a peccato.

Est autem contra hoc sacramentum error Novatianorum, qui dicunt, hominem post Baptismum peccantem non posse per Pœnitentiam veniam consequi: contra quos dicitur Apoc. 11, 5 : *Memor esto unde excideris, et age pœnitentiam, et prima opera fac.*

Quintum sacramentum est extremæ Unctionis : ejus materia est oleum olivæ per Episcopum benedictum. Hoc autem sacramentum non debet dari nisi infirmis, quando timetur de periculo mortis ; qui debent inungi in locis quinque sensuum, videlicet in oculis propter visum, in auribus propter auditum, in naribus propter odoratum, in ore propter gustum vel locutionem, in manibus propter tactum, in pedibus propter gressum. Quidam autem inungunt in renibus ; propter delectationem quæ in renibus viget<sup>1</sup>. Forma autem hujus sacramenti est ista : « Per istam unctionem et suam piissimam misericordiam indulgeat tibi Dominus quidquid deliquisti per visum ; » et similiter in aliis. Minister hujus sacramenti est Sacerdos. Effectus autem hujus sacramenti est sanatio mentis et corporis.

Contra hoc sacramentum est error (a) Elæonitarum<sup>2</sup>, qui feruntur suos morientes novo modo quasi redimere per oleum et balsamum et aquam, et invocationibus quas Hebraicis verbis dicunt super capita eorum : quod est contra formam a Jacobo traditam, ut supra dictum est.

Sextum est sacramentum Ordinis. Sunt autem septem ordines : scilicet Presbyteratus, Diaconatus, Subdiaconatus, Acolythatus, Exorcistæ, Lectoris et Ostiarii. Clericatus autem non est ordo, sed quædam professio vitæ dantium se divino ministerio. Episcopatus autem magis est

dignitas quam ordo. Materia autem hujus sacramenti est illud materiale, per ejus traditionem confertur ordo : sicut Presbyteratus traditur per collationem calicis ; et quilibet Ordo traditur per collationem illius rei quæ præcipue pertinet ad ministerium illius ordinis. Forma autem hujus sacramenti est talis : « Accipe potestatem offerendi sacrificium in Ecclesia pro vivis et mortuis ; » et idem est dicendum in consimilibus ordinibus. Minister hujus sacramenti est Episcopus qui confert ordines. Effectus autem hujus sacramenti est augmentum gratiæ ad hoc quod aliquis sit idoneus minister Christi.

Contra hoc sacramentum fuit error Arii, qui dicebat presbyterum ab Episcopo non debere discerni.

Septimum sacramentum est Matrimonium, quod est signum conjunctionis Christi et Ecclesiæ. Causa autem efficiens Matrimonii est mutuus consensus per verba de præsentibus expressus. Est autem triplex bonum Matrimonii : quorum primum est proles suscipienda et educanda ad cultum Dei ; secundum est fides quam unus conjugum alteri debet servare ; tertium est sacramentum, idest indivisibilitas Matrimonii, propter hoc quod significat indivisibilem conjunctionem Christi et Ecclesiæ.

Est autem circa hoc sacramentum multiplex error. Primus quidem est Tatianorum, qui nuptias damnant : contra quos est quod dicitur I Corinth. vii, 28 : *Si nupserit virgo, non peccavit.* Secundus est error Joviniani, qui nuptias æquavit virginitati : de quo supra dictum est. Tertius est error Nicolaitarum, qui indifferenter mutuis uxoribus utuntur. Fuerunt etiam multi alii hæretici turpia quaedam docentes et exercentes, contra id quod dicitur Hebr. ult., 4 : *Sit honorabile connubium in omnibus, et torus immaculatus.*

Horum autem virtute sacramentorum homo perducitur ad futuram gloriam, quæ consistet in septem dotibus : tribus animæ, et quatuor corporis. Prima dos animæ est visio Dei per essentiam, secundum illud I Joan. iii, 2 : *Videbimus eum sicuti est.* Secunda est comprehensio, qua scilicet Deum comprehendemus, quasi meritorum mercedem : I Cor. ix, 24 :

<sup>1</sup> Parm. : « ubi viget libido. »

<sup>2</sup> Al. : « Indionitarum. » et in Cod. 1060 : « Eraclonitarum. »

(a) Heracleonitæ feruntur mortuos suos quasi

novo modo redimere, scilicet per oleum, balsamum, aquam, et invocationes quas Hebraicis verbis dicunt super capita eorum. — Hæc Guido in *Summa sua* contra Hæreses.

*Sic currite ut comprehendatis.* Tertia est fruitio, qua in Deo delectabimur, secundum illud Job xxii, 26 : *Tunc super omnipotentem deliciis afflues, et elevabis ad Deum faciem tuam.* Prima autem dos corporis est impassibilitas, secundum illud I Corinth. xv, 53 : *Oportet corruptibile hoc induere incorruptionem.* Secunda est claritas, secundum illud Matth. xiii, 43 : *Fulgebunt justi sicut sol in regno Pa-*

*tris eorum.* Tertia est agilitas, per quam celeriter adesse poterunt ubi volent. Sap. iii, 7 : *Tamquam scintillæ in arundineto discurrent.* Quarta est subtilitas per quam poterunt quæcumque voluerint, penetrare, secundum illud I Corinth. xv, 44 : *Seminatur corpus animale, surget corpus spirituale.* Ad quam nos perducatur<sup>1</sup> qui vivit et regnat per omnia sæcula sæculorum. Amen.

<sup>1</sup> Cod. San. Vict. : « Perducatur ipse benedictus trinus et unus Deus, etc — Explicet de Sacra-

mentis et dotibus secundum fratrem Thomam. »

# OPUSCULUM V.

EXPOSITIO ORATIONIS DOMINICÆ SECUNDUM FRATREM THOMAM <sup>1</sup>.

(EDIT. ROM. VII.)

*Pater noster qui es in cœlis.* Inter alias orationes oratio dominica principalior invenitur. Habet enim quinque excellentias <sup>2</sup>, quæ in oratione requiruntur. Debet enim esse oratio segura, recta, ordinata, devota et humilis. Secura quidem, ut *cum fiducia adeamus ad thronum gratiæ ejus*, ut dicitur Heb. iv, 16. In fide etiam non deficiens : dicitur enim Jac. i, 6 : *Postulet autem in fide, nihil hæsitans.* Rationabiliter autem hæc oratio est securissima : est enim ab advocato nostro formata, qui est sapientissimus petitor, *in quo sunt omnes thesauri sapientiæ*, ut dicitur ad Coloss. ii, de quo dicitur Joan. i : *Advocatum habemus apud Patrem, Jesum Christum justum*; unde dicit Cyprianus in lib. *De oratione dominica* : « Cum Christum habeamus advocatum apud Patrem pro peccatis nostris, quando pro delictis nostris petimus, advocati nostri verba proponamus. » Ulterius autem <sup>3</sup> securior apparet ex hoc quod ipse <sup>4</sup> qui docuit nos orare, orationem exaudit cum Patre, secundum illud Psalm. xc, 15 : *Clamabit ad me, et ego exaudiam eum.* Unde dicit Cyprianus : « Amica, familiaris et devota oratio, Dominum de suo rogare. » Unde ab hac oratione nunquam sine fructu receditur : nam per eam venialia dimittuntur, ut dicit Augustinus. Debet etiam esse oratio nostra recta, ut petat orans a Deo quæ sibi conveniunt. Nam Damascenus dicit III lib. *Orth. fid.* c. xxiv : « Oratio est petitio decentium a Deo. » Multoties enim non exauditur oratio, quia indecentia postu-

lantur. Jac. iv, 3 : *Petitis et non accipitis, eo quod male petatis.* Scire autem quid sit petendum, difficillimum est, cum difficillimum sit scire quid sit desiderandum. Ea enim quæ licite petuntur in oratione, licite desiderantur : et ideo Apostolus dicit ad Rom. viii, 26 : *Nam quid oremus sicut oportet, nescimus ; ipse autem spiritus postulat pro nobis gemitibus inenarrabilibus* <sup>5</sup>. Ipse autem Christus Spiritus sancti dator est <sup>6</sup> : nam ipsius est docere quid nos orare oporteat ; propter quod discipuli dixerunt ei Luc. xi, 1 : *Domine, doce nos orare.* Ea ergo quæ ipse orare docuit, rectissime postulantur : unde Augustinus *Ad Probam*, Epist. CXXX, c. xii, « Quæcumque autem verba <sup>7</sup> dicamus, nihil aliud dicimus quam quod in ista oratione dominica positum est, si recte et congruenter oramus. » Debet etiam esse oratio ordinata sicut desiderium, cum oratio sit desiderii interpres. Est autem hic debitus ordo, ut spiritualia carnalibus, cœlestia terrenis desiderando et orando præferamus, secundum illud Matth. vi, 33 : *Primum quærite regnum Dei et justitiam ejus ; et hæc omnia adjicientur vobis.* Hoc Dominus in hac oratione servare docuit : in qua primo petuntur cœlestia, et postmodum terrena. Debet etiam oratio esse devota, quia pinguedo devotionis facit sacrificium orationis esse Deo acceptum, secundum illud Ps. lxxii, 5 : *In nomine tuo levabo manus meas : sicut adipe et pinguedine repleatur anima mea.* Devotio autem plerumque propter prolixitatem orationis

<sup>1</sup> Parm. : « In orationem dominicam, videlicet Pater noster, expositio. »

<sup>2</sup> Parm. : « excellentia. »

<sup>3</sup> Parm. omittit : « autem. »

<sup>4</sup> Parm. : « qui orationem exaudit cum Patre

docuit nos orare, secundum, etc. »

<sup>5</sup> Parm. omittit : « ipse autem spiritus postulat pro nobis gemitibus inenarrabilibus. »

<sup>6</sup> Parm. : « doctor est. »

<sup>7</sup> Parm. : « quælibet alia verba. »



obtunditur<sup>1</sup> : unde Dominus superfluum orationis prolixitatem docuit vitare, dicens Matth. vi, 7 : *Orantes autem nolite multum loqui.* Et Augustinus dicit *Ad Probam*, c. x, § 50 : Absit ab oratione multa locutio ; sed non desit multa<sup>2</sup> provocatio, si fervens perseveret intentio. Unde Dominus hanc orationem brevem instituit. Consurgit autem devotio ex caritate, quæ est amor Dei et proximi : quorum uterque<sup>3</sup> in hac oratione ostenditur. Nam ad insinuandum divinum amorem, vocamus eum patrem : ad insinuandum autem amorem proximi, communiter pro omnibus oramus dicentes, *Pater noster, et dimitte nobis debita nostra* : ad quod proximorum dilectio nos inducit<sup>4</sup>. Debet etiam oratio esse humilis, secundum illud Psalm. ci, 18 : *Respexit in orationem humilium* : et Luc. xviii, de pharisæo et publicano : et Judith. ix, 16 : *Humilium et mansuetorum semper tibi placuit deprecatio.* Quæ quidem humilitas in hac oratione servatur : nam vera humilitas est quando aliquis nihil ex suis viribus præsumit, sed totum ex divina virtute impetrandum expectat.

Nota insuper, quod tria bona facit oratio. Prima enim est efficax et utile remedium contra mala. Liberat enim a peccatis commissis. Psalm. xxxi, 5 : *Tu remisisti impietatem peccati mei : pro hac orabit ad te omnis sanctus in tempore opportuno*. Sed latro in cruce oravit, et remissionem obtinuit : quia, *hodie mecum eris in paradiso.* Luc. xxiii, 43 : Sic publicanus oravit, et *justificatus descendit in domum suam.* Luc. xviii, 14. Liberat etiam a timore peccatorum supervenientium, et perturbationibus<sup>5</sup> et tristitiis. Jac. ult. 13 : *Tristatur quis in vobis? Oret æquo animo.* Liberat etiam a persecutionibus et inimicis. Psal. cviii, 4 : *Pro eo ut me diligere, detrahebant mihi : ego autem orabam.* Secundo est efficax, et utilis ad omnia desideria obtinenda. Marc. xi, 24 : *Omnia quæcumque orantes petitis credite quia accipietis, et fiet vobis*<sup>7</sup>. Non exaudimur autem, vel quia non per-

severamus<sup>8</sup> : *Oportet enim semper orare, et nunquam deficere.* Luc. xviii, 1, vel quia non petimus id quod magis expedit ad salutem. Augustinus : « Bonus Dominus, qui sæpe non tribuit quod volumus, ut tribuat quod malleamus. » Exemplum<sup>9</sup> de Paulo, qui ter petiit a se removeri stimulum, et non est exauditus. II Corinth. xii. Tertio est utilis, quia facit nos familiares Deo. Psalm. cxl, 2 : *Dirigatur oratio mea sicut incensum in conspectu tuo.*

#### *Præambulum ad petitiones*<sup>10</sup>.

<sup>11</sup> *Pater.* Nota hic duo, quomodo scilicet pater sit, et quid debemus ei, quia pater noster<sup>12</sup> est. Circa primum nota quod ipse dicitur pater noster<sup>13</sup>, ratione specialis creationis, quia creavit nos ad imaginem et similitudinem suam quam aliis creaturis inferioribus non impressit. Dent. xxxii, 6 : *Ipsa est pater tuus, qui fecit et creavit te.* Item ratione gubernationis : quamquam enim alia<sup>14</sup> gubernet, nos tamen gubernat ut dominos, alia vero<sup>15</sup> ut servos. Sap. xiv, 3 : *Tua, pater, providentia cuncta gubernat* ; et ibid. xii, 18. *Et cum magna reverentia disponis nos.* Item ratione adoptionis : quia aliis creaturis dedit quasi munusculam, nobis autem hereditatem : et hoc quia filii : sed *si filii et heredes.* Apostolus Roman. viii, 15 : *Non accepistis Spiritum servitutis in timore, sed spiritum adoptionis filiorum, in quo clamamus, Abba pater.* Debemus autem nos ei tria. Primo honorem. Mal. i, 6 : *Si ego pater, ubi est honor meus?* qui consistit in tribus. In laudis datione quo ad Deum. Psalm. cxix, 23 : *Sacrificium laudis honorificabit me* ; quæ non solum debet esse in ore, sed etiam in corde. Isa. xxix, 13 : *Populus hic labiis me honorat ; cor autem eorum longe est a me.* In corporis puritate quo ad seipsum. I Corinth. vi, 20 : *Glorificate et portate Deum in corpore vestro.* In iudicii æquitate quo ad proximum. Psalm. cxviii, 3 : *Honor regis iudicium diligit.*

<sup>1</sup> Al. : « retunditur. »

<sup>2</sup> « Multa precatio, si fervens perseverat. »

<sup>3</sup> Parm. : « utrumque. »

<sup>4</sup> Parm. : « nos induit. »

<sup>5</sup> Parm. : « in tempore opportuno. »

<sup>6</sup> Parm. : « a tribulationibus. »

<sup>7</sup> Parm. : « et fiet vobis. »

<sup>8</sup> Parm. : « Et si non exaudimur, hoc est quia

non instanter petimus. »

<sup>9</sup> Parm. : « Et hoc reperitur. »

<sup>10</sup> Titulus ille deest in Parm.

<sup>11</sup> Parm. addit : « dicit ergo. »

<sup>12</sup> Parm. : « noster. »

<sup>13</sup> Parm. : « dicitur autem pater. »

<sup>14</sup> Parm. : « omnia. »

<sup>15</sup> Parm. : « vero. »

Secundo debemus ei imitationem, quia pater est. Jerem. III, 19 : *Patrem vocabis me, et post me ingredi non cessabis* : quæ imitatio <sup>1</sup> perficitur in tribus. In dilectione. Ephes. V, 1 : *Estote imitatores Dei, sicut filii carissimi, et ambulante in dilectione* : et hæc <sup>2</sup> oportet esse in corde ut <sup>3</sup>, sic dilectio non sit simulata <sup>4</sup>. *Estote misericordes*. Luc. VI, 36 : et hoc debet esse in opere. In perfectione <sup>5</sup> : Math. V, 48 : *Estote perfecti, sicut et pater vester cælestis perfectus est*. In miseratione : Luc. VI, 36 : *Estote misericordes*. Tertio debemus ei obedientiam et subjectionem <sup>6</sup>. Hebr. XII, 9 : *Multo magis obtemperabimus patri spirituum* : et hoc propter tria. Primo propter dominium : ipse enim est Dominus. Exod. XXIV, 7 : *Omnia quæ locutus est Dominus, faciemus, et erimus obedientes*. Secundo propter exemplum : quia verus Filius factus est Patri obediens usque ad mortem, ut dicitur Philipp. II. Tertio propter utilitatem et <sup>7</sup> commodum : II Reg. VI, 21 : *Ludam et vilior fiam plus quam fratres, eroque humilis in conspectu Domini* <sup>8</sup> qui elegit me. Quarto debemus ei patientiam in castigationibus. Proverb. III, 11 : *Disciplinam Domini, filii mi, ne abjicias, nec deficies, cum ab eo corripieris. Quem enim diligit Dominus, corripit, et quasi Pater in filio complacet sibi*.

*Noster*. Ex hoc autem ostenditur quod duo debemus proximis. Primo amorem, quia fratres nostri sunt, nam omnes homines <sup>9</sup> sunt filii Dei : I Joan. IV, 20 : *Qui non diligit fratrem suum quem videt, Deum, quem non videt, quomodo potest diligere?* Secundo <sup>10</sup> reverentiam, quia filii Dei sunt. Malach. II, 10 : *Nonne unus est* <sup>11</sup> *pater omnium nostrum?* Rom. XII, 10 : *Honore invicem prævenientes*. Et hoc propter fructum, quia <sup>12</sup> *ipse factus est omnibus obtemperantibus sibi causa salutis æternæ*, Hebr. V, 9.

### De præ eminentia Dei <sup>13</sup>.

*Qui es in cælis*. Inter cetera qua:

oranti sunt necessaria, fiducia plurimum valet. Jac. I, 6 : *Postulet autem in fide, nihil hæsitans*. Unde Dominus nos orare docens, ea præmittit ex quibus in nobis fiducia generetur : scilicet ex benignitate patris : unde *Pater noster* dicit, secundum illud Luc. XI, 13 : *Si vos, cum sitis mali, nostis bona data dare filiis vestris; quanto magis pater vester cælestis de cælo dabit spiritum bonum petentibus se?* Et ex magnitudine potestatis : unde dicit, *Qui es in cælis*. Unde Psal. CXXII, 1 : *Ad te levavi oculos meos qui habitas in cælis*. Potest autem hoc quod dicitur « in cælis » <sup>14</sup> ad tria pertinere. Primo quidem ad orantis præparationem : quia dicitur Eccli. XVIII, 23 : *Ante orationem præpara animam tuam* : ut intelligatur, *In cælis*, hoc est in cælesti gloria, secundum illud Matth. V, 2 : *Merceres vestra copiosa est in cælis*. Et hæc præparatio debet esse per cælestium imitationem, quia filius debet imitari patrem. Unde dicitur I Corinth. XV, 49 : *Sicut portavimus imaginem terreni, portemus et imaginem cælestis*. Item per cælestium contemplationem : quia homines solent frequentius cogitationem dirigere ubi habent patrem et alia quæ diligunt, secundum illud Matth. VI, 21 : *Ubi est thesaurus tuus, ibi est et cor tuum*. Unde dicebat Apostolus Philip. III, 20 : *Nostra conversatio in cælis est*. Et per cælestium intensionem, ut ab eo qui in cælis est, non nisi cælestia quæramus, secundum illud Coloss. III, 1 : *Quæ sursum sunt quærite, ubi Christus est*. Secundo potest pertinere quod dicitur, *Qui es in cælis*, ad audientis facilitatem, quia propinquus est nobis; ut intelligatur, *Qui es in cælis* idest in sanctis, in quibus Deus habitat, secundum illud Jerem. XIV, 9 : *Tu in nobis es Domine*. Sancti enim cæli dicuntur, secundum illud Psalm. XVIII, 2 : *Cæli enarrant gloriam Dei*. Habitat autem Deus in sanctis per fidem. Ephes. III, 17 : *Habitare Christum per fidem in cordibus vestris*. Per dilectionem. I Joan. IV, 16 : *Qui manet in caritate, in Deo manet, et Deus in eo*. Per mandatorum imple-

<sup>1</sup> Parm. omittit : « imitatio. »

<sup>2</sup> Parm. : « hoc. »

<sup>3</sup> Parm. omittit : « ut sic dilectio non sit simulata. »

<sup>4</sup> Parm. : « in corde. In miseratione : dilectio enim debet esse cum miseratione. Luc. VI, 36. in perfectione. »

<sup>5</sup> Parm. addit : « quia dilectio et misratio debet esse perfecta. »

<sup>6</sup> Parm. omittit : « et subjectionem. »

<sup>7</sup> Parm. omittit : « utilitatem et. »

<sup>8</sup> Parm. omittit : « et vilior fiam plus quam fratres eroque humilis in conspectu Domini. »

<sup>9</sup> Parm. omittit : « homines. »

<sup>10</sup> Parm. : « item. »

<sup>11</sup> Parm. : « numquid non pater unus. »

<sup>12</sup> Cod. S. Genovef. non habet. « Ipse factus est, etc. »

<sup>13</sup> Hic titulus deest in Parm.

<sup>14</sup> Parm. omittit : « quod dicitur in cælis. »

tionem. Joan. xiv, 23 : *Si quis diligit me, sermonem meum servabit; et Pater meus diliget eum, et ad eum veniemus, et mansionem apud eum faciemus.* Tertio potest pertinere quod dicitur *Qui es in cœlis*, ad efficaciam exaudientis: ut per cœlos, corporeos cœlos intelligamus: non quod Deus corporalibus cœlis includatur, secundum illud III Reg. vii, 27 : *Cœlum et cœli cœlorum te capere non possunt*: sed ut significetur quod Deus est perspicax in consideratione, utpote qui de alto videt. Psalm. ci, 20 : *Prospexit de excelso sancto suo*: et quod sublimis est in potestate, secundum illud Psalm. cii, 19 : *Dominus in cœlo paravit sedem suam*: et quod stabilis est in æternitate, secundum illud Psalm. ci, 13 : *Tu autem in æternum permanes*, item 28 : *Et anni tui non deficient.* Unde et de Christo dicitur Psalm. lxxxviii, 30 : *Thronus ejus sicut dies cœli.* Et Philosophus dicit in I *De cœlo*, quod propter incorruptionem cœli, omnes posuerunt cœlum esse locum spirituum. Per hoc ergo quod dicitur, *Qui es in cœlis*, datur nobis fiducia orandi, quantum ad tria. Quantum ad potestatem ejus a quo petitur et quantum ad familiaritatem, et quantum ad congruitatem petitionis. Potestas enim ejus a quo petitur, insinuat, si per cœlos intelligantur cœli corporei: et quamvis<sup>1</sup> ipse locis corporalibus non comprehendatur, cum scriptum sit Jer. xxiii, 24 : *Cœlum et terram ego impleo*: tamen dicitur esse in cœlis corporeis ad insinuandum duo: scilicet potentie ejus virtutem, et sublimitatem nature. Primum quidem est contra illos qui dicunt omnia ex fato cœlestium corporum ex necessitate provenire<sup>2</sup>: secundum quam opinionem inutile esset aliquid a Deo orando petere. Sed hoc stultum est, cum Deus in cœlis sic esse dicatur ut cœlorum Dominus et stellarum, secundum illud Psalm. cii, 19 : *Dominus in cœlo paravit sedem suam.* Secundum vero contra illos est qui in orando ali-

quas sibi corporeas phantasias de Deo proponunt et fingunt: ideo dicitur esse in cœlis, ut per id quod in sensibilibus rebus est altissimum, ostendatur divina sublimitas omnia<sup>3</sup> excedens, etiam hominum desiderium et intellectum: unde quidquid cogitari, vel desiderari potest, est minus quam Deus. Propter quod dicitur in Job. xxxvi, 26 : *Ecce Deus magnus vincens scientiam nostram.* Psalm. cxii, 4 : *Excelsus super omnes gentes Dominus.* Isa. xl, 18 : *Cui similem fecistis Deum?* Familiaritas autem Dei ostenditur<sup>4</sup>, ad nos<sup>5</sup> secundum quod per cœlos sancti accipiuntur. Quidam<sup>6</sup> enim dixerunt propter altitudinem suam quod humana non curabat<sup>7</sup>, secundum illud Job. xxii, 14 : *Circa cardines cœli perambulavit, et nostra non considerat*, et contra hos, oportet<sup>8</sup> dicere<sup>9</sup> et ostendere quod ipse sit intimior intimo nostro. Et hoc assertit fiduciam orantibus quantum ad duo. Primo quantum ad propinquitatem Dei, secundum illud Psalm. cxliv, 18 : *Prope est Dominus omnibus invocantibus eum.* Unde Math. vi, 6 : *Tu autem cum oraveris intra in cubiculum*, scilicet cordis tui<sup>10</sup>. Secundo quantum<sup>11</sup> ad patrociniū aliorum sanctorum in quibus Deus habitat: nam ex hoc surgit fiducia impetrandi quod volumus per eorum merita. Job. v, 1 : *Ad aliquem sanctorum converte.* Jac. v, 15 : *Orate pro invicem ut salveamini.* Idoneitas<sup>12</sup> sive congruitas orationis ostenditur, ex hoc quod per cœlos intelliguntur spiritualia bona et æterna, in quibus est beatitudo. Et hoc<sup>13</sup> propter duo: Primo, quia per hoc excitatur nostrum desiderium ad cœlestia: tendere enim debet illic desiderium nostrum ubi patrem habemus, quia illic est hereditas nostra. Coloss. iii, 1 : *Quæ sursum sunt quarite.* I Petr. i, 4 : *In hereditatem immarcescibilem, conservatam in cœlis.* Secundo, quia ex hoc informamur, ut vita nostra<sup>14</sup> sit cœlestis, secundum quam sumus conformes patri cœlesti, secundum

<sup>1</sup> Deest in Cod. S. Gen. « et quamvis...provenire. »

<sup>2</sup> Parm. : « accidere. »

<sup>3</sup> Al. : deest : « omnia. »

<sup>4</sup> Parm. omittit : « ad nos. »

<sup>5</sup> Parm. : « si per. »

<sup>6</sup> Parm. : « quia enim propter ejus altitudinem aliqui dixerunt... curat. »

<sup>7</sup> Parm. omittit : « secundum illud Job, etc. »

<sup>8</sup> Parm. : « curat, oportet. »

<sup>9</sup> Parm. : « considerare quia nobis est vicinus, immo intimus; quia dicitur esse in cœlis, id est in sanctis, qui cœli dicuntur secundum illud

Psalm. xvii, 2 : « cœli enarrant gloriam Dei. Jerem. xiv, 9 : « Tu in nobis Domine. » Hoc enim assertit. »

<sup>10</sup> Parm. omittit : « tui. »

<sup>11</sup> Parm. : « quia per patrociniū... possumus impetrare quod petimus, secundum illud ». »

<sup>12</sup> Parm. : « Idoneitatem etiam et congruitatem accipit oratio ex hoc quod dicitur esse in cœlis, secundum quod per cœlos spiritualia bona et æterna intelliguntur. »

<sup>13</sup> Parm. omittit : « et hoc. »

<sup>14</sup> Parm. : « ut sit vita cœlestis, ut simus. »

illud I Corinth. xv, 48 : *Qualis cœlestis, tales et cœlestes*. Et hæc dno faciunt idoneum ad petendum, scilicet desiderium cœleste, et vita cœlestis : ex quibus oratio congrue <sup>1</sup> fit.

PETITIO I<sup>2</sup>.

## PETITIO II.

*Adveniat regnum tuum.* <sup>3</sup> Spiritus sanctus facit nos recte amare, desiderare et petere; et efficit in nobis primo timorem, per quem timorem <sup>4</sup> quærimus quod nomen Dei magnificetur et <sup>5</sup> sanctificetur. Aliud donum efficit, quod est <sup>6</sup> donum

<sup>1</sup> Parm. : « congrua. »

<sup>2</sup> Nec Cod. S. Genovef. nec Cod. Vict. habent commentarium istud primæ petitionis, et expresse in Cod. S. Vict. legitur : « *sanctificetur nomen tuum*. De hoc non fuit notatum. » Et mox litteris rubeis :

## PRIMA PETITIO DEFICIT.

Sanctificetur nomen tuum. Hæc est prima petitio, in qua petitur ut nomen ejus in nobis manifestetur et declaretur. Est autem nomen Dei primo mirabile, quia in omnibus creaturis mirabilia operatur : Unde Dominus in Evangelio Marc. ult. 17 : *In nomine meo dæmonia ejicient, linguæ loquentur novis, serpentes tollent : et si mortiferum quid biberint, non eis nocebit*. Secundo est amabile. Act. iv, 12 : *Non est aliud nomen datum sub cœlo in quo oporteat nos salvos fieri*. Salus autem est ab omnibus diligenda. Exemplum de Beato Ignatio, qui intantum nomen Christi dilexit, quod cum Trajanus requireret ab eo ut nomen Christi negaret, respondit quod de ore ejus removeri non posset ; et cum ille minaretur sibi caput abscindere, et Christum de ejus ore remove, dixit : « Et si de ore abstuleris, nunquam tamen de corde eripere poteris : hoc enim nomen cordi meo inscriptum habeo, et ideo ab ejus invocatione cessare non valeo. Quod audiens Trajanus, et probari cupiens, servi Dei abscisso capite, cor ejus extrahi jussit, et inventum est habens nomen Christi in se scriptum litteris aureis(a). Posuerat enim super cor suum hoc nomen quasi signaculum. Tertio est venerabile. Apostolus Philip. ii 10 : *Ut in nomine Jesu omne genu flectatur, cœlestium, terrestrium et infernorum*. Cœlestium quantum ad Angelos et beatos ; terrestrium quantum ad mundanos, qui hoc faciunt ex amore adipiscendæ gloriæ vel timore fugiendæ pœnæ ; et infernorum quo ad damnatos, qui hoc faciunt ex timore. Quarto inexplicabile, quia a narratione ejus deliciunt omnes linguæ : et ideo explicatur aliquando per creaturas : unde dicitur lapis ratione firmitatis : Matth. xvi, 18 : *Super hæc petram ædificabo Ecclesiam meam*. Item ignis ratione purificationis : quia sicut ignis metallâ purificat, ita Deus purificat corda peccatorum : unde Deuter. iv, 24 : *Deus tuus ignis consumens*

pietatis : et est proprie pietas, dulcis et devotus affectus ad patrem, et ad omnem hominem in miseria constitutum. Cum ergo Deus sit pater noster, ut patet, non solum debemus eum revereri et timere, sed etiam ad eum habere debemus dulcem et pium affectum. Illic autem affectus facit nos petere quod adveniat regnum Dei. Tit. ii, 12 : *Pie et juste vivamus in hoc sæculo, expectantes beatam spem et adventum gloriæ magni Dei*.

Posset autem quæri cum <sup>7</sup> regnum Dei semper fuerit, quare <sup>8</sup> petimus quod veniat. Dicendum <sup>9</sup> est quod hoc potest tripliciter intelligi. Primo quia aliquando rex habet jus regni solum, seu domini :

*est*. Item lux ratione illuminationis : quia sicut lux illuminat tenebras ita nomen Dei illuminat tenebras mentis. Psalm. xvii, 29 : *Deus meus, illumina tenebras meas*. Unde istud nomen petimus manifestari, ut cognoscatur, et teneatur sanctum. Sanctum autem tripliciter dicitur. Sanctum enim idem est quod firmum : unde omnes beati qui in cœlo sunt, sancti dicuntur, quia sunt æterna felicitate firmati. In mundo non possunt esse sancti, quia sunt continue mobiles. Augustinus : « *Defluxi, Domine, a te, et erravi nimis : devius factus sum a stabilitate tua*. » Secundo sanctum idem est quod non terrenum : unde sancti qui in cœlo sunt, nullum habent affectum terrenum : unde Apostolus Philip. iii, 8 : *Omnia arbitratus sum ut stercora ut Christum lucrifaciam*. Per terram autem designantur peccatores. Primo ratione germinis : terra enim si non colitur, spinas et tribulos germinat ; sic anima peccatoris, nisi colatur per gratiam, non germinat nisi tribulos et punctiones peccatorum. Gen. iii, 18 : *Spinæ et tribulos germinabit tibi*. Secundo ratione caliginis : terra enim caliginosa est et opaca, sic etiam peccator caliginosus et opacus est. Gen. i, 2 : *Tenebræ erant super faciem abyssi*. Tertio ratione conditionis, terra enim est elementum siccum, quod spargitur nisi contineatur ab aquæ humiditate : nam Deus posuit terram super aquam, juxta illud Psalm. cxxxv, 6 : *Qui firmavit terram super aquas* : quia ex humiditate aquæ continetur ariditas vel siccitas terræ ; sic peccator animam habet siccam et aridam, juxta illud Psalm. cxlii 9 : *Anima mea sicut terra sine aqua tibi*. Item tertio dicitur sanctum, idest sanguine tinctum ; unde sancti qui sunt in cœlo, sancti dicuntur, eo quod sunt sanguine tincti, juxta illud Apoc. vii, 14 : *Isti sunt qui venerunt ex magna tribulatione, et laverunt stolas suas in sanguine agni*. Item ibid. i, 5 : *Lavit nos a peccatis nostris in sanguine suo*.

<sup>5</sup> Parm. addit : « sicut dictum est. »

<sup>2</sup> Parm. omittit : « timorem. »

<sup>3</sup> Parm. omittit : « magnificetur et. »

<sup>6</sup> Parm. omittit : « efficit, quod est. »

<sup>7</sup> Parm. : « quæri : Regnum. »

<sup>8</sup> Parm. : « ergo. »

<sup>9</sup> Parm. : « et ideo. »

(a) Hujus cor cum minutatim divisum esset, nomen Domini Jesu Christi litteris aureis inscriptum, ut legitur, in singulis partibus

inventum est. » Vinc. Bellov. Spec. Histor. t. X, c. viii

et tamen nondum dominium ipsius regni est declaratum, quia nondum homines regni sunt ei subjecti, Tunc <sup>1</sup> ergo apparerebunt primo ejus regnum seu dominium, quando homines regni erunt sibi subjecti. Deus autem ex se et sua natura est Dominus omnium : et Christus secundum quod Deus, et etiam secundum quod homo, habet a Deo quod sit Dominus omnium. Dan. vii, 14 : *Dedit ei potestatem et honorem et regnum.* Oportet ergo quod sibi sint omnia subjecta. Hoc autem nondum est, sed erit in fine I Corinth. xv, 25 : *Oportet illum regnare, donec ponat omnes inimicos sub pedibus ejus.* Et ideo petimus et dicimus : *Adveniat regnum tuum* : et hoc quantum ad tria : scilicet ut justi convertantur, peccatores puniantur, et mors destruat. Nam homines dupliciter subiciuntur Christo : aut voluntarii, aut inviti. Cum enim voluntas Dei sit ita efficax quod oporteat penitus illam compleri, et Deus velit quod omnia subiciantur Christo : alterum duorum erit necessarium : ut scilicet aut homo faciat voluntatem Dei subiciendo se mandatis ejus, et hoc facient justi ; aut quod <sup>2</sup> Deus faciat de omnibus voluntatem suam puniendo eos, quod facit de <sup>3</sup> peccatoribus et inimicis suis ; et hoc erit in fine mundi. Ps. cix, 1 : *Donec ponam inimicos tuos scabellum pedum tuorum.* Et ideo est delectabile petere sanctis <sup>4</sup> quod adveniat regnum Dei, scilicet quod ipsi totaliter subiciantur ei ; sed peccatoribus est horribile, quia nihil aliud est querere quod adveniat regnum Dei, nisi quod de voluntate Dei subiciantur ponis. Amos v, 18 : *Væ desiderantibus diem Domini.* Sed et ex hoc destruitur mors. Cum enim Christus sit vita, non potest in regno ejus esse mors, quæ est vitæ contraria : ideo dicitur I Corinth. xv, 26 : *Novissime autem inimica destructur mors* : Isaï., xxv, 8 : *præcipitabit <sup>5</sup> Dominus mortem in æternum.* » Et hoc erit in resurrectione. Philip., iii, 21 : *Reformabit corpus humilitatis nostræ, configuratum corpori claritatis suæ.* Secundo regnum cælorum dicitur gloria paradisi.

Sempiternum.

Nec mirum : nam regnum nihil aliud dicitur nisi regimen. Ibi autem est optimum regimen ubi nihil invenitur contra voluntatem regentis. Voluntas autem Dei est salus hominum, quia *vult homines salvos fieri* ; et hoc potissime erit in paradiso, ubi nihil erit salutem hominum repugnans. Matth. xiii, 41 : *\* Aufer <sup>6</sup> de <sup>7</sup> Collig* *regno ejus omnia scandala.* In mundo autem isto sunt multa contra salutem hominum. Cum ergo petimus : *Adveniat regnum tuum*, oramus ut simus participes regni cælestis et gloriæ paradisi. Quod quidem regnum est valde desiderabile <sup>7</sup> propter tria : primum propter summam justitiam quæ est in eo. Isa. lx, 21 : *Populus tuus omnes justi.* Hic enim mali sunt mixti bonis ; sed ibi nullus malus erit, et nullus peccator. Item propter perfectissimam libertatem. Hic enim non est libertas, quamquam omnes naturaliter desiderent eam ; sed ibi erit omnimoda libertas contra omnem servitatem. Rom. viii, 21 : *Ipsa creatura liberabitur a corruptione.* Et non solum erunt homines ibi <sup>8</sup> liberi, sed erunt reges ; Apoc. v, 10 : *Fecisti nos Deo nostro regnum.* Cujus ratio est, quia omnes erunt ejusdem voluntatis cum Deo, et Deus volet quidquid sancti volent, et sancti quidquid Deus voluerit : unde cum voluntate Dei fiet voluntas eorum : et ideo omnes regnabunt, quia omnium voluntas fiet, et Dominus erit corona omnium. Isa. xxviii, 5 : *In die illa erit Dominus exercituum corona gloriæ, et sertum exultationis residuum populi sui.* Item propter mirabilem affluentiam : Isa. lxiv, 4 : *Oculus non vidit, Deus, absque te, quæ præparasti expectantibus te* : Psalm. cii, 5 : *Qui replet in bonis desiderium tuum.*

Et nota quod homo inveniet omnia in solo Deo excellentius et perfectius omni eo quod in mundo queritur. Si delectationem queris ; summam invenies in Deo <sup>9</sup> ; Joan : *Videbitis et gaudebit cor vestrum etc. Latitia sempiterna super capita eorum* ; Si durationem <sup>10</sup> est æternitas : « justis autem in vitam æternam. » si divitias, ibi omnem sufficientiam invenies, propter quam sunt divitiæ, et sic de aliis. Au-

<sup>1</sup> Cod. S. Genov. non habet : « Tunc ergo, etc... Deus. »

<sup>2</sup> Parm. omittit : « quod. »

<sup>3</sup> Parm. : « et hoc faciet. »

<sup>4</sup> Parm. : « sanctis est datum querere. »

<sup>5</sup> Parm. omittit : « præcipitabit. »

<sup>6</sup> Parm. : « auferentur. »

<sup>7</sup> Parm. : « desiderandum. »

<sup>8</sup> Parm. : « erunt ibi omnes. »

<sup>9</sup> Parm. : « textus Scripturæ sacræ hic allegatos. »

<sup>10</sup> Parm. omittit : « si durationem, est æternitas : justis autem in vitam æternam. »



gustinus <sup>1</sup> : « Quidquid est quod sanete possit desiderare anima tua, totum erit ibi Deus. »

Tertio <sup>2</sup> intelligitur *adveniat regnum tuum*, idest tu, Deus, regna in corde nostro, et posside ipsum, ita scilicet, quod peccatum vel diabolus non habeat ibi locum, cum non regnet peccatum in nostro mortali corpore. Tunc enim regnat peccatum in homine, quando est indispositus, et statim sequitur et prosequitur appetitum. Per hanc autem petitionem pervenimus ad beatitudinem, de qua dicitur Matth. v, 4 : *Beati mites* : nam secundum primam expositionem, ex quo homo desiderat quod Deus sit Dominus omnium, non vindicat se de injuria sibi illata, sed reservat eam Deo. Nam si vindicares te, non quæreres quod adveniret regnum Dei <sup>3</sup>. Secundum vero secundam expositionem, si tu expectas regnum ejus, idest gloriam paradisi, non debes curare si perdis res mundanas. Item secundum tertiam expositionem, si tu petis quod Deus regnet in te et Christus; cum ipse fuerit mitissimus, et tu debes esse mitis. Matth. xi, 29 : *Discite a me, quia mitis sum* <sup>4</sup>.

### PETITIO III.

*Fiat voluntas tua sicut in cælo, et in terra.* Tertium donum quod efficit in nobis Spiritus sanctus, dicitur donum scientiæ. Ipse enim Spiritus sanctus, non solum efficit in nobis <sup>5</sup> donum timoris et donum pietatis, quæ est dulcis affectus ad Deum, ut dictum est, sed etiam facit hominem sapientem : et hoc petebat David in Psalm. cxviii, 66, dicens : *Bonitatem et disciplinam et scientiam doce me.* Et hæc est scientia qua homo bene vivit, quam docuit nos Spiritus sanctus. Inter alia autem quæ faciunt ad scientiam et sapientiam hominis,

potissima sapientia est quod homo non innitatur sensui suo. Proverb. iii, 5 : *Ne innitaris prudentiæ tuæ.* Nam illi qui præsumunt de sensu suo, ita quod non credunt aliis, sed sibi tantum, semper inveniuntur et judicantur stulti. Proverb. xxvi, 12 : *Vidisti hominem sapientem sibi videri? Magis illo spem <sup>6</sup> habebit insipiens.* Quod autem homo non credat sapientiæ suæ <sup>7</sup>, procedit ex humilitate : unde et locus sapientiæ est humilitas <sup>8</sup>. Superbi autem sibi ipsis <sup>9</sup> credunt. Docet ergo hoc Spiritus sanctus per donum sapientiæ, <sup>10</sup> ut scilicet non faciamus voluntatem nostram, sed voluntatem Dei. Et ideo propter hoc donum petimus a Deo ut fiat voluntas sua sicut in cælo et in terra; et in hoc apparet donum scientiæ. Unde hoc modo dicitur Deo, *Fiat voluntas tua*, sicut si esset unus infirmus, et vellet aliquid a medico <sup>11</sup>, vellet tamen non præcise, sed de voluntate medici; alias si tantum de voluntate sua vellet, esset stultus. Sic nos a Deo nihil petere debemus nisi quod fiat de nobis voluntas sua, idest ut voluntas sua compleatur in nobis. Tunc enim est rectum cor hominis quando concordat cum voluntate divina. Hoc Christus fecit Joan. vi, 38 : *Descendi de cælo, non ut faciam voluntatem meam, sed ejus qui misit me.* Christus enim, secundum quod Deus, eandem voluntatem habet cum Patre; sed, secundum quod homo, habet alteram <sup>12</sup> voluntatem a Patre : et secundum hanc dicit se non facere voluntatem suam, sed Patris; et ideo docet nos orare et petere : *Fiat voluntas tua.*

Sed quid est quod dicitur? Nonne in Ps. cxiii, 3, dicitur : *Omnia quæcumque voluit fecit?* Si omnia facit quæ vult in cælo et in terra, quid est hoc quod dicit : *Fiat voluntas tua sicut in cælo, et in terra?*

<sup>1</sup> Parm. : « Augustinus, in *Confes.* : « anima cum fornicatur abs te, quærit extra te, quæ pura et limpidâ non invenit, nisi cum redit ad te. »

<sup>2</sup> Tertio modo, quia aliquando in mundo isto regnat peccatum; et hoc est quando homo est ita dispositus quod statim sequitur et prosequitur appetitum peccati. Apostolus Roman. vi, 12 : *Non ergo regnet peccatum in vestro mortali corpore* : sed debet Deus <sup>1</sup> regnare in corde tuo : Isa. vii, 7 : *Sion, regnabit Deus tuus* : et hoc est quando paratus est obedire Deo, et servare omnia mandata sua. Cum ergo petimus quod veniat regnum, oramus quod non regnet in nobis pec-

catum, sed Deus.

<sup>3</sup> Parm. : « ejus. »

<sup>4</sup> Parm. addit : « Hebr. x, 34. Rapinam bonorum vestrorum cum gaudio suscepistis. »

<sup>5</sup> Parm. : « bonis. »

<sup>6</sup> Al. : « speciem. »

<sup>7</sup> Parm. : « sensui suo. »

<sup>8</sup> Parm. : « humilitatis est sapientia. »

<sup>9</sup> Parm. addit : « nimis. »

<sup>10</sup> Parm. : « scientiæ. »

<sup>11</sup> Parm. : « non præcise vult. »

<sup>12</sup> Parm. : « aliam. »

Ad hoc sciendum est quod Deus tria vult de nobis, et nos petimus quod hæc impleantur. Primum quidem quod Deus vult de nobis, est quod nos habeamus vitam æternam. Quicumque enim facit aliquid propter aliquem finem, vult de illa re illud propter quid<sup>1</sup> fecit eam. Deus autem fecit hominem, sed non pro nihilo : quia, sicut dicitur in Psalm. lxxxviii, 48 : *Numquid vane constituisti omnes filios hominum?* Fecit ergo homines propter aliquid, sed non propter voluptates, quia et bruta habent eas, sed ut habeamus vitam æternam. Vult ergo Dominus ut homo habeat vitam æternam. Quando vero aliquid consequitur illud ad quod factum est, dicitur quod salvatur; quando vero non consequitur, dicitur quod res illa perditur<sup>2</sup>. Cum ergo homo<sup>3</sup> consequitur vitam æternam, dicitur quod<sup>4</sup> salvatur; et hoc vult Dominus, Joan. vi, 40 : *Hæc est voluntas Patris mei qui misit me, ut omnis qui videt Filium et credit in eum habeat vitam æternam.* Hæc autem voluntas jam completa est in Angelis et in sanctis qui sunt in patria, quia vident Deum et cognoscunt, et fruuntur eo; sed nos desideramus quod sicut voluntas Dei completa est in beatis qui sunt in cælis, ita compleatur in nobis qui sumus in terra : et hoc petimus cum oramus : *Fiat voluntas tua* in nobis qui sumus in terra, sicut in sanctis qui sunt in cælo. Alia voluntas Dei de nobis est ut servemus mandata ejus. Quando enim aliquis desiderat aliquid, non solum vult illud quod desiderat, sed omnia per quæ venit ad illud; sicut medicus, ut consequatur sanitatem, vult etiam dietam et medicinam et hujusmodi. Quia ergo per observationem mandatorum pervenimus ad vitam æternam, Deus vult quod mandata observemus<sup>5</sup> : *Rationabile obsequium vestrum... ut probetis quæ sit voluntas Dei bona, beneplacens et perfecta.* Rom. xii, 4. Bona, quia utilis. Isa. xlii, 17 : *Ego Dominus docens te utilia.* Beneplacens amanti; et si aliis non sit grata<sup>6</sup>, Psalm. xcvi, 2 : *Lux orta est justo, et rectis corde lætitia.* Perfecta, quia honesta : Matth. v, 48 : *Estote perfecti, sicut et Pater vester cæles-*

*tis perfectus est.* Sic ergo cum dicimus. *Fiat voluntas tua*, oramus ut impleamus mandata Dei. Hæc autem voluntas Dei fit in justis, sed in peccatoribus nondum fit. Justi autem designantur per cælum, peccatores autem per terram. Petimus ergo ut fiat voluntas Dei ita *in terra*, idest in peccatoribus, *sicut in cælo*, idest in justis.

Notandum autem quod ex modo loquendi datur nobis doctrina. Non enim dicit, *Fac*, nec etiam *Faciamus*; sed dicit, *Fiat voluntas tua* : quia ad vitam æternam duo sunt necessaria; scilicet gratia Dei et voluntas hominis : et licet Deus fecerit hominem sine homine, non tamen justificat eum sine eo. Augustinus *Super Joan.* : « Qui creavit te sine te, non justificabit<sup>7</sup> te sine te : » quia vult quod homo cooperetur vel<sup>8</sup> saltem non impediatur. Zach. ii, 3 : *Convertimini ad me, et ego convertar ad vos.* Apostolus I Corinth. xv, 10 : *Gratia Dei sum id quod sum, et gratia ejus in me vacua non fuit.* Non ergo præsumas de te, sed confidas de gratia Dei : nec negligas, sed adhibeas studium tuum : et ideo non dicit, *Faciamus*, ne videretur quod nihil ad hoc<sup>9</sup> faceret gratia Dei; nec dicit, *Fac*, ne videatur quod nihil faceret voluntas et conatus noster; sed dicit, *Fiat per gratiam Dei*, adhibito studio et conatu nostro.

Tertium quod vult Deus de nobis, est ut restituatur homo ad statum et dignitatem in qua creatus fuit primus homo; quæ tanta fuit ut spiritus et anima nullam repugnantiam sentiret a carne et sensualitate. Quamdiu enim anima subjecta fuit Deo, caro ita subjecta fuit spiritui ut nullam corruptionem mortis seu infirmitatis et aliarum passionum sentiret; sed ex quo spiritus et anima, quæ erat media inter Deum et carnem, rebellavit Deo per peccatum, tunc corpus rebellavit animæ, et tunc mortem et infirmitates sentire cepit, et continuam rebellionem sensualitatis ad spiritum. Rom. vii, 23 : *Video aliam legem in membris meis, repugnantem legi mentis meæ;* et Galat. v, 17 : *Caro concupiscit adversus spiritum, spiritus autem adversus carnem.* Sic est continua pugna inter carnem et spiritum, et

<sup>1</sup> Parm. : « pro quo facit. »

<sup>2</sup> Parm. addit : « Deus autem fecit hominem propter vitam æternam. »

<sup>3</sup> Parm. omittit : « homo. »

<sup>4</sup> Parm. omittit : « dicitur quod. »

<sup>5</sup> Parm. : « Deus autem vult ut habeamus vitam æternam. Matth. xix, 17 : « Si vis ad vitam ingredi,

serva mandata. » Vult ergo ut servemus mandata. »

<sup>6</sup> Parm. addit : « amanti tamen est delectabilis. »

<sup>7</sup> Al. : « salvavit te. »

<sup>8</sup> Parm. omittit : « vel saltem non impediatur. »

<sup>9</sup> Parm. omittit : « ad hoc. »

homo continue deterioratur per peccatum. Est ergo voluntas Dei ut homo restituatur ad statum primum, ut scilicet nihil sit in carne repugnans<sup>1</sup> spiritui : I Thessal. iv, 3 : *Hæc est voluntas Dei, sanctificatio vestra. Ut<sup>2</sup> sciat unusquisque vas suum possidere.* Hæc autem voluntas Dei non potest impleri in vita ista, sed complebitur in resurrectione sanctorum, quando resurgent corpora glorificata eorum<sup>3</sup>. I Corinth. xv, 43 : *Seminatur corpus animale, surget spirituale<sup>4</sup>.* Fit autem<sup>5</sup> voluntas Dei in justis quantum ad spiritum per justitiam et perfectam vitam<sup>6</sup>. Et ideo cum dicimus, *Fiat voluntas tua*, oramus ut etiam fiat in carne<sup>7</sup>; ut sit sensus : *Fiat voluntas tua ita in terra*, idest in carne nostra, *sicut fit in cælo*, idest in spiritu nostro<sup>8</sup>; unde per cælum accipimus spiritum, per terram autem, carnem. Per hanc autem petitionem pervenimus ad beatitudinem luctus, de qua Matth. v, 5 : *Beati qui lugent, quoniam ipsi consolabuntur*; et hoc secundum quamlibet trium expositionum. Nam secundum primam desideramus vitam æternam : unde per ejus dilectionem inducimur ad luctum : Psalm. cxix, 5 : *Heu mihi, quia incolatus meus prolongatus est.* Et hoc desiderium sanctorum est ita vehemens quod propter hoc desiderant mortem, quæ secundum se fugienda est : II Corinth. v, 8 : *Audemus, et bonam voluntatem habemus magis peregrinari a corpore, et præsentem esse ad Deum.* Item secundum secundam expositionem, illi qui servant mandata, sunt in luctu : quia licet sint dulcia animæ, tamen carni sunt amara, quæ continue maceratur : Psalm. cxxv, 6 : *Euntes ibant et flebant, quantum ad carnem : venientes autem venient cum exultatione*, quantum ad animam. Item secundum tertiam expositionem, ex pugna quæ continue est inter carnem et spiritum, provenit luctus. Non enim potest fieri quin anima saucietur<sup>9</sup> per venialia a carne : et ideo ut expietur, est in luctu : Psalm. vi, 7 : *Lavabo per singulas noctes*, idest obscuritates pec-

cati, *lectum meum*, idest conscientiam meam. Et qui sic plorant, perveniunt ad patriam, ad quam nos perducatur Deus.

## PETITIO IV.

*Panem nostrum quotidianum da nobis hodie.* Multoties accidit quod aliquis ex magna scientia et sapientia efficitur pavidus<sup>10</sup>; et ideo cum<sup>11</sup> sensu necessaria fortitudo cordis, ne deficiat in necessitatibus. Isa. ix, 29 : *Qui dat lasso virtutem, et his qui non sunt, fortitudinem et robur multiplicat.* Hanc autem fortitudinem Spiritus sanctus dat : Ezech. xi, 2 : *Ingressus est in me spiritus, et statuit me super pedes meos.* Est autem hæc fortitudo quam Spiritus sanctus dat, ut cor hominis non deficiat timore rerum necessariarum, sed credat firmiter quod omnia<sup>12</sup> ei necessaria ministrabuntur sibi a Deo. Et ideo Spiritus sanctus, qui hanc fortitudinem dat, docet nos petere a Deo : *Panem nostrum quotidianum da nobis hodie* : unde spiritus fortitudinis dicitur.

Sciendum est autem, quod in tribus præcedentibus petitionibus petuntur spiritualia, quæ hic inchoantur in hoc mundo, sed non perficiuntur nisi in vita æterna. Cum enim petimus quod sanctificetur nomen Dei, petimus quod cognoscatur sanctitas Dei; cum vero petimus quod adveniat regnum Dei, petimus quod simus participes regni Dei<sup>13</sup>; cum autem oramus quod fiat voluntas Dei, petimus quod compleatur voluntas ejus in nobis : quæ omnia etsi inchoentur in hoc mundo, non tamen possunt haberi perfecte nisi in vita æterna : et ideo necessarium fuit aliqua petere necessaria quæ perfecte possent haberi in vita ista<sup>14</sup> : et inde est quod Spiritus sanctus docuit petere necessaria in vita præsentem, quæ perfecte hic habentur : simul etiam ut ostendat quod etiam temporalia providentur nobis a Deo : et hoc est quod di-

<sup>1</sup> Parm. : « contrarium. »

<sup>2</sup> Hunc textum Parm. omittit.

<sup>3</sup> Parm. addit : « et erunt incorruptibilia et nobilissima. »

<sup>4</sup> Parm. : « in ignobilitate, surget in gloria. »

<sup>5</sup> Parm. : « est tamen. »

<sup>6</sup> Parm. : « et scientiam et vitam. »

<sup>7</sup> Parm. addit : « nam hoc modo per cælum accipimus spiritum, per terram carnem. »

<sup>8</sup> Parm. : « spiritu nostro per justitiam. Per hanc. »

<sup>9</sup> Parm. addit : « ad minus. »

<sup>10</sup> Parm. : « timidus. »

<sup>11</sup> Parm. : « et ideo est ei necessaria. »

<sup>12</sup> Parm. : « quæ sunt ei necessaria, ministrantur. »

<sup>13</sup> Parm. : « vitæ æternæ. »

<sup>14</sup> Parm. : « præsentem. »

cit : *Panem nostrum quotidianum da nobis hodie* : in quibus quidem verbis docuit nos vitare quinque peccata quæ consueverunt contingere ex desiderio rerum temporalium. Primum peccatum est quod homo per immoderatum appetitum petit ea quæ statum et conditionem ejus excedunt, non contentus his quæ decent eum : sicut si desiderat vestes, non vult eas ut miles, si est miles, sed sicut comes ; non ut clericus, si est clericus, sed sicut Episcopus : et hoc vitium retrahit homines a spiritualibus, inquantum nimis inhæret eorum desiderium temporalibus. Hoc autem vitium docuit nos vitare Dominus, docens nos petere temporalia <sup>1</sup> necessaria ad præsentem vitam secundum conditionem uniuscujusque ; quæ omnia sub nomine panis intelliguntur. Unde non docuit delicata petere, non diversa, non exquisita, sed panem, sine quo vita hominis duci non potest, qui <sup>2</sup> omnibus communis est Eccl. xxix, 28 : *Initium vitæ hominis panis et aqua* : Apostolus I Thimoth. vi, 8 : *Habentes alimenta et quibus tegamur, his contenti simus*. Secundum vitium est quod aliqui in acquisitione rerum temporalium alios molestant et defraudant. Et hoc vitium est adeo periculosum quod bona ablata etiam cum difficultate restituntur <sup>3</sup> « Non enim dimittitur peccatum, nisi restituatur ablatum » secundum Augustinum. *Comederunt panem iniquitatis* <sup>4</sup>. Prov. iv, Quod quidem vitium docuit nos vitare, docens nos petere panem nostrum, non alienum. Raptores enim non comedunt panem suum, sed alienum. Tertium est superflua sollicitudo. Aliqui enim sunt qui nunquam sunt contenti de eo quod habent, sed semper plus volunt ; quod quidem immoderatum est, quia desiderium debet moderari secundum necessitatem. Proverb. xxx, 8 : *Divitias et paupertatem ne dederis mihi ; sed tantum victui meo tribue necessaria*. Et hoc monuit nos vitare, dicens : *Panem nostrum quotidianum*, idest unius diei, vel unius temporis. Quartum vitium est immoderata voracitas. Sunt enim aliqui qui tantum volunt consumere uno die quod sufficeret pluribus

diebus ; et isti petunt non panem quotidianum, sed decem dierum ; et ex hoc quod nimis expendunt, contingit quod omnia consumunt. Proverb. xxiii, 21 : *Vacantes potibus, et dantes symbola, consumuntur*. Eccl. xix, 1 : *Operarius ebrius non locupletabitur*. Quintum vitium est ingratitude. Nam <sup>5</sup> aliquis ex divitiis superbit, et non recognoscit a Deo ea quæ habet, et <sup>6</sup> hoc est valde malum quia omnia quæ habemus, sive spiritualia, sive temporalia, a Deo sunt. I Paral. xxix, 14 : *Omnia tua sunt, quæ de manu tua accepimus*. Ideo ad removendum hoc vitium, dicit : *Da nobis*, <sup>7</sup> ut sciamus quod omnia nostra a Deo sunt.

Sed de hoc habemus unum documentum : quia aliquando aliquis habet multas divitias, et ex eis nullam utilitatem consequitur, sed damnum spirituale et temporale : nam aliqui propter divitias perierunt. Eccl. vi, 1, 2. *Est et aliud malum quod vidi sub sole, et quidem frequens apud homines. Vir cui dedit Deus divitias et substantiam et honorem, et nihil deest minime suæ ex omnibus quæ desiderat : nec tribuit ei potestatem Deus ut comedat ex eo, sed homo extraneus vorabit illud. Item ibid. 5, 12 : Divitiæ congregatæ in malum domini sui. Debemus ergo petere ut divitiæ nostræ sint nobis ad utilitatem : et hoc petimus cum dicimus : *da nobis* ; idest, fac divitias nobis utiles. Job xx, 14 : *Panis ejus in utero illius vertetur in fel aspidum intrinsecus. Divitias quas devoravit, evomet ; et de ventre illius extrahet eas Deus*.*

Aliud vitium est in rebus mundi, scilicet superflua sollicitudo. Nam aliqui sunt qui hodie sollicitantur de rebus temporalibus quæ erunt usque ad unum annum : et qui se exercent circa hoc <sup>8</sup>, nunquam quiescunt. Matth. vi, 34 : *Nolite solliciti esse, dicentes : Quid manducabimus, aut quid bibemus, aut quo operiemur ?* Et ideo Dominus docet nos petere quod hodie detur nobis panis noster, idest ea quæ sunt nobis necessaria ad præsens tempus.

Invenitur <sup>9</sup> etiam alius duplex panis : scilicet sacramentalis, et panis verbi Dei. Petimus ergo panem nostrum sacramentalem, qui quotidie in Ecclesia conficitur ;

<sup>1</sup> Parm. : « panem tantum, idest. »

<sup>2</sup> Parm. : « quia. »

<sup>3</sup> Parm. : « est difficile... restitui. »

<sup>4</sup> Hunc textum Parm. omittit.

<sup>5</sup> Parm. addit : « cum. »

<sup>6</sup> Parm. omittit : « et. »

<sup>7</sup> Parm. addit : « et panem nostrum. »

<sup>8</sup> Parm. « qui hoc habent. »

<sup>9</sup> Parm. : « quidem. »

ut sicut illud accipimus in sacramento, ita detur nobis ad salutem. Joan. vi, 51 : *Ego sum panis vivus qui de cælo descendi.* I Corinth. xi, 29 : *Qui manducat et bibit indigne, judicium sibi manducat et bibit.* Item alius panis est verbum Dei. Matth. iv, 4 : *Non in solo pane vivit homo, sed in omni verbo quod procedit de ore Dei.* Petimus ergo ut det nobis panem, idest verbum suum. Ex hoc autem provenit homini beatitudo quæ est fames justitiæ. Nam postquam spiritualia habentur, magis desiderantur; et ex hoc desiderio provenit fames, et ex fame satietas vitæ æternæ, ad quam nos perducatur <sup>1</sup>.

## PETITIO V.

*Et dimitte nobis debita nostra, sicut et nos dimittimus debitoribus nostris.* Inveniuntur aliqui magnæ sapientiæ et fortitudinis; et qui nimis <sup>2</sup> confidunt de virtute sua, et <sup>3</sup> non agunt sapienter quæ agunt, nec perducunt quod intendunt ad complementum. Prov. xx, 18 : *Cogitationes consiliis roborantur.* Sed notandum quod Spiritus sanctus, qui dat fortitudinem, dat etiam consilium. Nam omne bonum consilium de salute hominum est a Spiritu sancto. Tunc autem consilium est homini necessarium quando indiget <sup>4</sup>. Sicut autem homo indiget consilio medicorum quando <sup>5</sup> corporaliter infirmatur, et tunc petit consilium, cum aliquis infirmatur; ita homo cum spiritualiter infirmatur per peccatum, debet quærere consilium, quo <sup>6</sup> sanetur. Consilium autem peccatori necessarium ostenditur Daniel. iv, 24, cum dicitur : *Consilium meum placeat tibi, rex. Peccata tua elemosynis redime.* Optimum ergo consilium contra peccata est elemosyna et misericordia; et ideo Spiritus sanctus docet peccatores petere et orare : *Dimitte nobis debita nostra.* Debemus autem Deo illud quod auferimus de jure suo. Jus autem Dei est ut faciamus voluntatem suam, præferendo eam voluntati nostræ: Auferimus ergo Deo jus suum, cum præferimus voluntatem nostram voluntati suæ; et hoc est peccatum. Peccata ergo

sunt debita nostra. Est ergo consilium Spiritus sancti ut petamus a Deo veniam peccatorum; et ideo dicimus, *Dimitte nobis debita nostra.*

Possumus autem in his verbis tria considerare. Primum est quare fit hæc petitio; secundum quando impleatur; tertium est quid requiratur ut impleatur ex parte nostra.

Circa primum sciendum quod ex hac petitione possumus duo colligere, quæ necessaria sunt hominibus in vita ista. Unum est quod homo semper sit in timore et humilitate. Aliqui enim fuerunt ita præsumptuosi quod dicerent quod homo poterat vivere in mundo isto ita quod ex se poterat vitare peccata. Sed hoc nulli datum est, nisi soli Christo, qui habuit spiritum non ad mensuram, et beatæ Virgini, quæ fuit plena gratiæ, in qua nullum peccatum fuit, ut <sup>7</sup> dicit Augustinus, *De natura et gratia*, c. xxxvi. Cum de peccatis agitur, nullam de ea vult fieri mentionem. Sed de aliis sanctis nulli concessum est quin ad minus veniale peccatum commiserit <sup>8</sup>. I Joan. i, 8 : *Si dixerimus quoniam peccatum non habemus, ipsi nos seducimus, et veritas in nobis non est* : et hoc etiam probatur per petitionem istam. Constat enim quod omnibus hominibus etiam sanctis, convenit dicere *Pater noster*, in quo dicitur : *Dimitte nobis debita nostra.* Ergo omnes recognoscunt et confitentur se debitores, et per consequens peccatores <sup>9</sup>. Si ergo peccator es, debes timere et humiliari. Aliud est quod semper vivamus in spe : quia licet simus peccatores, non debemus desperare, ne desperatio ducat nos ad majora et diversa peccata, sicut dicit Apostolus Ephes. iv, 19 : *Qui desperantes, semetipsos tradiderunt impudiciæ, in operationem immunditiæ omnis.* Ergo multum est utile quod semper speremus : quia quantumcumque homo sit peccator, debet sperare quod Deus, si perfecte convertatur <sup>10</sup>, dimittet ei. Hæc autem spes firmatur in nobis cum petimus : *Dimitte nobis debita nostra.*

Sed hanc spem abstulerunt Joviniani <sup>11</sup>, qui dixerunt quod qui semel peccat post

<sup>1</sup> Parm. omittit : « ad quam nos perducatur. »

<sup>2</sup> Parm. : « et quia nimis. »

<sup>3</sup> Parm. omittit : « et. »

<sup>4</sup> Parm. : « est in tribulatione. »

<sup>5</sup> Parm. : « sicut consilium medicorum cum aliquis infirmatur, unde et homo. »

<sup>6</sup> Parm. : « ut. »

<sup>7</sup> Parm. : « sicut... « de qua (scilicet Virgine)... nullam volo. »

<sup>8</sup> Parm. : « incurreret. »

<sup>9</sup> Parm. : « peccatores vel debitores. »

<sup>10</sup> Parm. : addit : « conteratur et. »

<sup>11</sup> Parm. : « Novatiani... peccabant... consequentur. »



baptismum, nunquam consequetur misericordiam. Hoc autem non est verum, <sup>1</sup> cum Christus dicat Matth. xviii, 32 : *Omne debitum dimisi tibi, quoniam rogasti me.* In quocumque <sup>2</sup> peccato es potes consequi misericordiam, si rogas cum pœnitentia peccati. Sic igitur ex hac petitione consurgit timor et spes : quia omnes peccatores contriti et confessi <sup>3</sup>, misericordiam consequentur ; et ideo necessaria fuit hæc petitio.

Circa secundum sciendum est quod in peccato sunt duo : scilicet culpa qua offenditur Deus, et pœna quæ debetur pro culpa : sed culpa remittitur in contritione, quæ est cum proposito confitendi et satisfaciendi. Psalm. xxxi, 5 : *Dixi : Confitebor adversum me iniquitatem meam Domino : et tu remisisti impietatem peccati mei.* Non est igitur desperandum, ex quo ad remissionem culpæ sufficit contritio cum proposito confitendi.

Sed forte quis dicet : Ex quo dimittitur peccatum contritione, ad quid necessarius est sacerdos ? Ad hoc dicendum est quod Deus in contritione dimittit culpam, et pœna æterna commutatur in temporalem ; sed nihilominus manet adhuc obligatus ad pœnam temporalem. Unde si decederet sine confessione, non contempta tamen, sed præventus <sup>4</sup> morte. iret ad purgatorium, cuius pœna, sicut dicit Augustinus, est maxima. Quando ergo confiteris, sacerdos absolvit te de hac pœna vi <sup>5</sup> clavium, cui subderis in confessione : et dixit Christus Apostolis, Joan. xx, 22 : *Accipite Spiritum sanctum : quorum remiseritis peccata remittuntur eis ; et quorum retinueritis, retenta sunt.* Unde quando semel confitetur quis, dimittitur ei aliquid de pœna hujusmodi, et similiter quando iterum confitetur : et posset toties confiteri quod tota sibi dimitteretur. Invenerunt autem successores Apostolorum alium modum remissionis hujus pœnæ : scilicet beneficia indulgentiarum quæ esistenti in caritate tantum valent <sup>6</sup> quantum pronuntiantur. Quod autem Papa hoc possit, satis patet. Nam multi sancti multa bona fecerunt, et tamen isti non peccaverunt, ad minus mortaliter ;

et hæc bona fecerunt in utilitatem Ecclesiæ. Similiter meritum Christi et Beatæ Virginis sunt sicut in thesauro. Unde summus Pontifex, et illi quibus ipse committit, possunt hujusmodi thesaurum <sup>7</sup>, prout <sup>8</sup> necesse fuerit, dispensare. Sic ergo dimittuntur peccata quantum ad culpam in contritione, sed quantum ad pœnam in confessione, et per indulgentias.

Circa tertium sciendum quod ex parte nostra requiritur ut nos dimittamus proximis nostris offensas factas nobis : unde dicitur : *Sicut et nos dimittimus debitoribus nostris* : aliter Deus non dimitteret nobis. Eccli. xxviii, 3 : *Homo homini servat iram, et a Deo quaerit* <sup>9</sup> *Reservat* *medelam.* Luc. vi, 37 : *Dimitte et dimittimini.* Et ideo solummodo in ista petitione ponitur contritio, cum dicitur : *Sicut et nos dimittimus debitoribus nostris.* Si ergo non dimittis, non dimittetur tibi.

Sed posses dicere : Ego dicam præcedentia, scilicet *dimitte nobis* : sed *sicut et nos dimittimus debitoribus nostris* tacebo. Ergo Christum decipere quaeris ? Sed certe non decipis. Nam Christus qui hanc orationem fecit, bene recordatur ejus : unde non potest decipi. Ergo si dicis ore, adimpleas corde.

Sed quaeritur utrum ille qui non proponit dimittere proximo suo, debeat dicere : *Sicut et nos dimittimus debitoribus nostris.* Et dicendum quod oportet dicere, quia non mittitur oratio in persona sui, sed in persona <sup>9</sup> Ecclesiæ, quæ non decipit : et ideo ponitur ipsa petitio in plurali.

Sed sciendum quod duobus modis dimittitur. Unus est perfectorum, ut scilicet offensus requirat offendentem. Psalm. xxxiii, 15 : *Inquire pacem.* Alius est communiter omnium, ad quem tenentur omnes, ut scilicet petenti veniam dimittat offensus <sup>10</sup>. Eccli. xxviii, 2 : *Relinque proximo tuo nocenti te, et tunc deprecanti tibi peccata solventur.* Ex hoc sequitur alia beatitudo : *Beati misericordes* : misericordia enim facit nos misereri proximo nostro.

<sup>1</sup> Parm. : « Si verum dixit Christus dicendo. »

<sup>2</sup> Parm. : « in quacumque ergo die petes, poteris. »

<sup>3</sup> Parm. : « confitentes... consequuntur. »

<sup>4</sup> Parm. : « præventa. »

<sup>5</sup> Parm. : « in clavium virtute, cui te subjeceris. »

<sup>6</sup> Parm. addit : « quantum sonant, et. »

<sup>7</sup> Parm. : « merita. »

<sup>8</sup> Parm. : « ubi necesse est. »

<sup>9</sup> Parm. : « videtur quod non, quia mentitur, dicendum quod non mentitur, quia non orat in persona sua. »

<sup>10</sup> Parm. : « tribuat. »

## PETITIO VI.

*Et ne nos inducas in tentationem.* — Sunt aliqui qui peccaverunt <sup>1</sup>, tamen desiderant veniam consequi de peccatis : unde et confitentur et pœnitent ; sed <sup>2</sup> non adhibent totum studium quod deberent, ut iterato in peccata non ruant : quod quidem non est conveniens, ut scilicet ex una parte ploret quis peccata, dum pœnitet, ex alia unde ploret accumulet, dum peccat : et propter hoc dicitur Isai. 1, 16 : *Lavamini, mundi estote, auferte malum cogitationum vestrarum ab oculis meis, quiescite agere perverse.* Et ideo, sicut supra dictum est, Christus in præcedenti docuit nos petere veniam peccatorum ; in hac vero docet nos petere ut possimus vitare peccata, ut scilicet non inducamur in tentationem per quam labamur in peccata, cum dixit : *Et ne nos inducas in tentationem.*

Circa quod tria quærentur. Primo quid sit tentatio ; secundo qualiter homo tentatur, et a quo ; tertio vero quomodo liberatur in tentatione <sup>3</sup>.

Circa primum sciendum est quod tentare nihil aliud est quam experiri seu probare : unde tentare hominem est probare virtutem ejus. Experitur autem seu probatur virtus hominis dupliciter, secundum quod duo exigit hominis virtus. Unum pertinet ad bene operandum, scilicet quod bene operetur ; aliud est quod caveat a malo. Psalm. xxxiii, 15 : *Declina a malo, et fac bonum.* Probatur ergo virtus hominis quandoque quantum ad hoc quod bene facit, quandoque vero quantum ad hoc quod cesset a malo. Quantum ad primum probatur homo utrum inveniatur promptus ad bonum <sup>4</sup>. Tunc enim est virtus <sup>5</sup> hominis magna quando promptus invenitur ad bonum : et hoc modo Deus probat aliquando hominem ; non quod lateat eum virtus hominis, sed ut eam omnes cognoscant, et detur omnibus in exemplum. Sic tentavit Deus Abraham, Gen. xxii, et Job. Et ideo Deus sæpe immittit tribulationes justis, ut dum patienter sustinent, appareat virtus eorum, et in virtute proficiant. Deut. xiii, 3 : *Tentat vos Dominus*

*Deus vester, ut palam fiat utrum diligatis eum, an non.* Sic ergo Deus tentat provocando ad bonum.

Quantum ad secundum probatur virtus hominis per inductionem ad malum : et si bene resistit, et non consentit, tunc virtus hominis magna est ; si vero homo succumbit tentationi, tunc virtus hominis nulla est. Hoc autem modo nullus tentatur a Deo : quia, sicut dicitur Jac. 1, 13 : *Deus intentator malorum est : ipse autem neminem tentat.* Sed tentatur homo a propria carne, a diabolo, et a mundo. A carne dupliciter. Primo quia caro instigat ad malum : caro enim semper quærit delectationes suas, scilicet carnales, in quibus est sæpe peccatum. Qui enim immoratur delectationibus carnalibus, negligit spiritualia. Jac. 1, 14 : *Unusquisque tentatur a concupiscentiasua.* Secundo tentat caro retrahendo a bono. Nam spiritus, quantum est de se, semper delectaretur in spiritualibus bonis ; sed caro aggravans impedit spiritum. Sap. ix, 15 : *Corpus quod corrumpitur, aggravat animam.* Rom. vii, 22 : *Condelector legi Dei secundum interiorem hominem ; video autem aliam legem in membris meis repugnantem legi mentis meæ, et captivantem me in lege peccati, quæ est in membris meis.* Sed hæc tentatio, scilicet carnis, est valde gravis, quia inimicus noster, scilicet caro, conjunctus est nobis : et, sicut dicit Boetius <sup>6</sup>, « nulla pestis efficacior est ad nocendum quam familiaris inimicus : » et ideo contra eam vigilandum est. Matth. xxvi, 41 : *Vigilate et orate, ne intretis in tentationem.* Diabolus fortissime tentat. Nam postquam conculcatur caro, insurgit alius, scilicet diabolus, contra quem est nobis magna colluctatio. Apostolus, Ephes. vi, 12 : *Non est nobis colluctatio adversus carnem et sanguinem, sed adversus principes et potestates, adversus mundi rectores tenebrarum harum.* Unde et signanter dicitur tentator. I Thessal. iii, 5 : *Ne forte tentaverit vos is qui tentat.* In tentatione autem sua callidissime procedit. Ipse enim, sicut bonus dux exercitus qui obsidet aliquod castrum, considerat infirma ejus quem impugnare vult, et ex illa parte unde magis est homo debilis,

<sup>1</sup> Parm. « licet peccaverint. »

<sup>2</sup> Parm. addit : « tamen. »

<sup>3</sup> Al. : « a tentatione. »

<sup>4</sup> Parm. addit : « ut ad jejunandum et hujusmodi. »

<sup>5</sup> Parm. : « virtus tua... inveniris. »

<sup>6</sup> Al. : « Gregorius. »

tentat eum. Et ideo tentat de illis vitiis ad quæ homines conculcata carne magis proni sunt, ut de ira, de superbia, et de aliis spiritualibus vitiis. I Pet. v, 8 : *Adversarius vester diabolus tamquam leo rugiens circuit quærens quem devoret.* Facit autem duo diabolus dum tentat : quia non statim proponit illi quem tentat, malum aliquod apparens, sed aliquid quod habeat speciem boni, ut saltem in ipso principio per illud removeat eum aliquantulum a proposito suo principali, quia postmodum facilius inducit ipsum ad peccandum, quando illum vel modicum avertit. Apostolus II Corinth. xi, 14 : *Ipse Satanas transfiguratur se in Angelum lucis.* Deinde postquam induxit eum ad peccandum, sic alligat eum ut non permittat eum a peccatis resurgere. Job xi, 12 : *Nervi testiculorum ejus perplexi sunt.* Sic ergo duo facit diabolus : quia decipit, et deceptum detinet in peccato. Sed mundus dupliciter tentat. Primo per nimium et immoderatum desiderium rerum temporalium, Apostolus, I Timoth. vi, 10 : *Radix omnium malorum est cupiditas.* Secundo per persecutores et tyrannos terrendo. Job xxxvii, 19 : *Nos quippe involvitur tenebris.* II Timoth. iii, 12 : *Omnes qui pie volunt vivere in Christo Jesu, persecutionem patientur.* Matth. x, 28 : *Nolite timere eos qui occidunt corpus.*

Sic ergo patet quid est tentatio, et qualiter tentatur homo, et a quo. Sequitur videre qualiter homo liberatur. Circa quod sciendum est, quod Christus docet nos rogare non ut non <sup>1</sup> tentemur, sed ut non inducamur in tentationem. Nam si homo vincit tentationem, meretur coronam ; et ideo dicitur Jacob. 1, 2 : *Omne gaudium existimate, fratres, cum in tentationes varias incideritis.* Eccli. ii, 1 : *Fili, accedens ad servitutem Dei... præpara animam tuam ad tentationem.* Item Jac. 1, 12 : *Beatus vir qui suffert tentationem : quoniam cum probatus fuerit, accipiet coronam vitæ.* Et ideo docet petere ut non inducamur in tentationem per consensum. I Cor. x, 13 : *Tentatio vos non apprehendat nisi humana.* Nam tentari humanum est, sed consentire diabolicum.

Sed numquid Deus inducit ad malum <sup>2</sup> non. Quid est ergo quod dicit : *Et ne nos inducas in tentationem?* Dicendum <sup>3</sup>, quod Deus dicitur inducere ad malum permittendo, in quantum scilicet propter multa peccata subtrahit homini gratiam suam, qua sublata homo labitur in peccatum : et ideo cantamus in Psalm. lxx, 9 : *Cum defecerit virtus mea, ne derelinquas me, Domine.* Tegit <sup>4</sup> autem hominem ne inducatur in tentationem primo <sup>5</sup> per fervorem caritatis : quia quælibet caritas quantumcumque parva, potest resistere cuilibet peccato. Cantic. viii, 7 : *Aquæ multæ non potuerunt extinguere caritatem.* Secundo <sup>6</sup> per lumen intellectus, quo instruit nos de agendis : omnis <sup>7</sup> enim malus est ignorans, sicut dicitur in *Ethicis.* Psalm. xxxi, 8 : *Intellectum tibi dabo, et instruam te.* Hoc autem petebat David, qui dicebat, Psal. xii, 5 : *Illumina oculos meos, ne unquam obdormiam in morte; nequando dicat inimicus meus: Prævalui adversus eum.* Hoc autem habemus per donum intellectus, <sup>8</sup> quia cum non assentimur tentationi, servamus cor mundum, de quo Matth. v, 8 : *Beati mundo corde, quoniam ipsi Deum videbunt* : ideo ex hoc pervenimus ad visionem Dei, ad quam nos perducat.

#### PETITIO VII.

*Sed libera nos a malo. Amen.* — Supra docuit nos Dominus petere veniam peccatorum, et quomodo possumus vitare tentationes : hic vero docet petere præservationem a malis ; et hæc petitio est generalis contra omnia mala ; scilicet peccata, infirmitates, adversitates <sup>9</sup> et afflictiones, sicut dicit Augustinus. Sed quia de peccato et tentatione dictum est, dicendum est de aliis malis, scilicet adversitatibus et afflictionibus omnibus hujus mundi, a quibus Deus liberat quadrupliciter. Primo ne superveniat afflictio ; sed hoc raro contingit : quoniam sancti in mundo isto affliguntur quia, ut dicitur II Tim. iii, 12 : *Omnes qui pie volunt vivere in Christo Jesu, persecutionem patientur.* Sed tamen alicui Deus concedit aliquando ut non affligatur a

<sup>1</sup> Al. omittitur : « non. »

<sup>2</sup> Parm. : « malum, quia dicit. »

<sup>3</sup> Parm. : « dico. »

<sup>4</sup> Parm. : « regit. »

<sup>5</sup> Parm. omittit : « primo. »

<sup>6</sup> Parm. : « item. »

<sup>7</sup> Parm. : « quia sicut dicit Philosophus, omnis peccans. »

<sup>8</sup> Parm. : « intellectus, et quia. »

<sup>9</sup> Parm. omittit : « adversitates. »

malo ; quando scilicet cognoscit eum impotentem, et non posse resistere ; sicut medicus infirmo debili non dat fortes<sup>1</sup> medicinas. Apoc. III, 8 : *Ecce dedi coram te ostium apertum, quod nemo potest claudere, quia modicam habes virtutem.* In patria autem erit generale hoc, quia nullus affligetur ibi. Job v, 19 : *In sex tribulationibus, scilicet presentis vitæ, quæ per sex ætates distinguitur, liberabit te ; et in septima non tanget te malum.* Apoc. VII, 16 : *Non esurient neque sitient amplius.* Secundo liberat quando in afflictionibus consolatur : nam nisi Deus consolaretur, non posset homo subsistere : II Corinth. I, 8 : *Supra modum gravati sumus supra virtutem nostram ;* et ibid. VII, 6 : *Sed qui consolatur humiles, consolatus est nos Deus.* Psal. XCIII, 19 : *Secundum multitudinem dolorum meorum in corde meo consolationes tuæ lætificaverunt animam meam.* Tertio quia afflictis tot bona facit quod tradunt mala oblivioni. Tob. III, 22 : *Post tempestatem tranquillum facis.* Sic ergo afflictiones et tribulationes hujus mundi non sunt timendæ, quia facile tolerantur et propter consolationem admixtam, et propter brevitate. Apostolus II Corinth. IV, 17 : *Id quod in presenti est momentaneum et leve tribulationis nostræ, supra modum in sublimitate æternæ gloriæ pondus operatur in nobis ;* quia ex his pervenitur ad vitam æternam. Quarto quia tentatio et tribulatio convertitur in bonum : et ideo non dicit, *Libera nos a tribulatione, sed a malo* : quia tribulationes sunt sanctis ad coronam ; et inde est quod Apostolus<sup>2</sup> gloriatur de tribulationibus ; Roman. V, 3 : *Non solum autem, sed et gloriamur in tribulationibus, scientes quod tribulatio patientiam operatur.* Tob. III, 13 : *In tempore tribulationis peccata dimittis.* Liberat ergo Deus hominem tunc a malo<sup>3</sup> tribulationis, quando eam in bonum quod ordinat est signum maxime sapientiæ, quia sapientis est malum ordinare in bonum ; et hoc fit per patientiam, quæ habetur in tribulationibus. Ceteræ vero virtutes bonis utuntur, sed patientia malis ; et ideo solum in malis, idest in tribulationibus<sup>4</sup>, est necessaria : Pro-

verb. XIX, 11 : « *Doctrina viri per patientiam noscitur* : et ideo Spiritus sanctus per donum sapientiæ facit nos petere : et per hoc pervenimus ad beatitudinem ad quam ordinat pax, quia per patientiam pacem habemus et in tempore prospero et in adverso : ideo pacifici dicuntur filii Dei, qui sunt similes Deo, quia sicut Deo nihil nocere potest, ita nec eis, quia nec prospera, nec adversa, et ideo *beati pacifici, quoniam filii Dei vocabuntur* ; Matth. v, 9. Amen est confirmatio universalis omnium petitionum.

*Conclusio universalis omnium petitionum, vel recapitulatio brevis et utilis.*

*Pater noster.* Ut in summa exponatur, sciendum est quod in oratione dominica continentur omnia quæ desiderantur, et omnia quæ fugiuntur. Inter omnia autem desiderabilia illud plus desideratur quod plus amatur, et hoc est Deus : et ideo primo petis gloriam Dei, cum dicis : *Sanctificetur nomen tuum.* A Deo autem desideranda sunt tria, quæ pertinent ad te. Primum est quod pervenias ad vitam æternam ; et hoc petis cum dicis : *Adveniat regnum tuum.* Secundum est quod facias voluntatem Dei et justitiam ; et hoc petis cum dicis : *Fiat voluntas tua sicut in cælo et in terra.* Tertium est ut habeas necessaria ad vitam ; et hoc petis cum dicis : *Panem nostrum quotidianum da nobis hodie.* Et de his tribus dicit Dominus, Matth. VI, 33 : *Primum quaerite regnum Dei, quantum ad primum : et justitiam ejus, quantum ad secundum : et hæc omnia adjicientur vobis, quantum ad tertium.* Illa autem quæ vitanda sunt et fugienda, sunt illa quæ contrariantur bono. Bonum autem quod primo desiderabile est, est quadruplex, ut dictum est. Et primum est gloria Dei, et huic nullum malum est contrarium<sup>5</sup> quia et de bono et de malo resultat gloria Dei, de malo in quantum punit, et de bono in quantum remunerat, Job. XXXV, 6 : *Quid enim nocebis, si nequam fueris* \*. Secundum bonum est vita æterna ; et huic contrariatur peccatum, quia per peccatum perdi-

<sup>1</sup> Parm. : « violentas. »

<sup>2</sup> Parm. : « quod gloriantur. »

<sup>3</sup> Parm. : « a malo et tribulationibus, eas in bonum convertendo. »

<sup>4</sup> Parm. : « adversitatibus. »

<sup>5</sup> Parm. : « contrarium. Job. xxxv, 6 : « Si peccaveris quid ei nocebis... si juste egeris, quod donabis ei. » Nam et de malo... et de bono in quantum remunerat, resultat gloria Dei.

tur : et ideo ad hoc removendum dicimus : *Dimitte nobis debita nostra, sicut et nos dimittimus debitoribus nostris.* Tertium bonum est justitia et bona opera; et huic contrariatur tentatio, quia tentationes impediunt nos a bono operando :

et ad hoc removendum petimus : *Et ne nos inducas in tentationem.* Quartum bonum sunt bona necessaria; et huic contrariantur adversitates et tribulationes; et ad hoc removendum petimus : *Sed libera nos a malo. Amen.*

---



# OPUSCULUM VI.

## EXPOSITIO DE AVE MARIA <sup>1</sup>.

(EDIT. ROM. VIII.)

### CAPUT I <sup>2</sup>.

*Quod B. Virgo excedit plenitudine gratiæ, familiaritate divina, et puritate, Angelos et archangelos secundum quid.*

*Ave Maria gratia plena, Dominus tecum.* — Ista <sup>3</sup> salutatio triplicem partem habet. Unam partem fecit Angelus, scilicet *Ave gratia plena, Dominus tecum, benedicta tu in mulieribus.* Aliam partem fecit Elisabeth mater Joannis Baptistæ, scilicet *Benedictus fructus ventris tui.* Tertiam partem addidit Ecclesia, scilicet *Maria* : nam Angelus non dixit, *Ave Maria*, sed *Ave gratia plena.* Et hoc nomen, scilicet *Maria*, secundum suam interpretationem convenit dictis Angeli, sicut patebit.

Est ergo circa primum considerandum, quod antiquitus erat valde magnum quod Angeli apparerent hominibus ; et <sup>4</sup> quod homines facerent eis reverentiam, habebant pro maxima laude. Unde et ad laudem Abrahæ legitur <sup>5</sup>, quod recepit Angelos hospitio, et exhibuit eis reverentiam. Quod autem Angelus faceret homini reverentiam, nunquam fuit auditum, nisi postquam salutavit Beatam Virginem, reverenter dicens, *Ave.* Quod autem antiquitus non reverebatur hominem Angelus, sed homo Angelum, ratio est, quia Angelus erat major homine ; et hoc quantum ad tria. Primo quantum ad dignitatem : ratio est, nam

Angelus est naturæ spiritualis Psalm. ciii, 4 : *Qui facit Angelos suos spiritus* : homo vero est naturæ corruptibilis : unde dicebat Abraham Gen. xviii, 27 : *Loquar ad Dominum meum, cum sim pulvis et cinis.* Non ergo erat decens ut spiritualis et incorruptibilis creatura reverentiam exhiberet corruptibili, scilicet homini. Secundo quantum ad familiaritatem ad Deum. Nam Angelus est Deo familiaris, utpote Deo <sup>6</sup> assistens. Daniel. vii, 10 : *Millia millium ministrabant ei, et decies millies centena millia assistebant ei.* Homo vero est quasi extraneus, et elongatus a Deo per peccatum. Psalm. liv, 8 : *Elongavi fugiens.* Ideo decens <sup>7</sup> est ut homo reveretur Angelum, utpote propinquum et familiarem regis. Tertio præminebat propter plenitudinem splendoris gratiæ divini : Angeli enim participant ipsum lumen divinum in summa plenitudine. Job. xxv, 3 : *Numquid est numerus militum ejus, et super quem non surget lumen ejus?* Et ideo semper apparet cum lumine. Sed homines, etsi aliquid participent de ipso lumine gratiæ, parum tamen, et in obscuritate quadam. Non ergo decens erat ut homini reverentiam exhiberet, quousque aliquis inveniretur in humana natura qui in his tribus excederet Angelos ; et hæc fuit Beata Virgo. Et ideo ad designandum quod in his tribus excedebat eum, voluit ei Angelus reverentiam exhibere : unde dixit, *Ave.* Unde Beata Virgo excessit Angelos in iis tribus.

Et primo in plenitudine gratiæ, quæ

<sup>1</sup> Parm. : « in salutationem angelicam, vulgo ave Maria expositio. »

<sup>2</sup> Hunc titulum Parm. omittit.

<sup>3</sup> Parm. : « in salutatione ista continentur tria. »

<sup>4</sup> Parm. : « vel. »

<sup>5</sup> Parm. : « scribitur. »

<sup>6</sup> Parm. omittit : « Deo. »

<sup>7</sup> Parm. : « conveniens. »

magis est in Beata Virgine quam in aliquo Angelo ; et ideo ad insinuandum hoc, Angelus ei reverentiam exhibuit, dicens, *Gratia plena* ; quasi diceret : Ideo exhibeo tibi reverentiam, quia me excellis in plenitudine gratiæ. Dicitur autem Beata Virgo plena gratia quantum ad tria. Primo quantum ad animam, in qua habuit omnem plenitudinem gratiæ. Nam gratia Dei datur ad duo : scilicet ad bonum operandum, et ad vitandum malum ; et quantum ad ista duo perfectissimam gratiam habuit Beata Virgo ; nam ipsa omne peccatum vitavit magis quam alius sanctus, præter<sup>1</sup> Christum. Peccatum enim aut est originale, et de isto fuit mundata in utero ; aut mortale aut veniale, et de istis libera fuit. Unde Cantic. iv, 7 : *Tota pulchra es, amica mea, et macula non est in te.* Augustinus in libro *De natura et gratia*, c. xxxvi : « Excepta sancta Virgine Maria, si omnes (a) sancti et sanctæ<sup>2</sup> cum hic viverent, interrogati fuissent utrum sine peccato essent, omnes una voce clamassent : *Si dixerimus quia peccatum non habemus, ipsi non seducimus, et veritas in nobis non est.* Excepta, inquam, hac sancta Virgine, de qua propter honorem Domini, cum de peccato agitur, nullam prorsus volo questionem habere. Scimus enim quod ei plus gratiæ collatum fuerit ad peccatum ex omni parte vincendum quæ illum concipere et parere meruit quem constat nullum habuisse peccatum. » Sed Christus excellit Beatam Virginem in hoc quod sine originali conceptus et natus fuit. Beata autem Virgo in originali concepta, sed non nata. Ipsa etiam omnium virtutum opera exercuit, alii autem sancti specialia quædam : quia alius fuit humilis, alius castus, alius misericors ; et ideo ipsi dantur in exemplum specialium virtutum, sicut beatus Nicolaus in exemplum misericordiæ etc. Sed Beata Virgo in exemplum omnium virtutum : quia in ea reperis exemplum humilitatis : Luc. 1, 38 : *Ecce ancilla Domini* ; et post, vers. 48 : *Resperit humilitatem ancillæ suæ* : virginittatis<sup>3</sup>, quoniam virum non co-

gnosco, vers. 34, et omnium virtutum ; ut satis patet. Sic ergo plena est<sup>4</sup> gratia Beata Virgo et quantum ad puritatem et quantum ad virtutem, et quantum ad mali vitationem. Secundo plena fuit gratia quantum ad refluentiam<sup>5</sup> animæ ad carnem vel ad corpus. Nam magnum est in sanctis habere tantum de gratia quod sanctificet animam ; sed anima Beatæ Virginis ita fuit plena quod ex ea refudit gratiam in carnem, ut de ipsa conciperet Filium Dei : et ideo dicit Hugo de Victore : « Quia in corde ejus amor Spiritus sancti singulariter ardebat, ideo in carne ejus mirabilia faciebat, intantum quod de ea nasceretur Deus et homo. » Lucæ 1, 33 : *Quod enim nascetur ex te Sanctum, vocabitur Filius Dei.* Tertio quantum ad refusionem in omnes homines. Magnum enim est in quolibet sancto, quando habet tantum de gratia quod sufficit sibi<sup>6</sup> ad salutem<sup>7</sup>, sed majus quando habet tantum quod sufficit sibi ad salutem multorum ; sed quando haberet tantum quod sufficeret sibi<sup>8</sup> ad salutem omnium hominum de mundo, hoc esset maximum : et hoc est in Christo, et in Beata Virgine. Nam in omni periculo potes salutem obtinere ab ipsa Virgine gloriosa. Unde Cantic. iv, 4 : *Mille clypei*, idest remedia contra pericula, *pendent ex ea.* Item in omni opere virtutis potes eam habere in adiutorium ; et ideo dicit ipsa Eccli. xxiv, 25 : *In me omnis spes vitæ et virtutis.* Sic ergo plena est gratia, et excedit Angelos in plenitudine gratiæ ; et propter hoc convenienter vocatur Maria quæ interpretatur illuminata in se ; unde Isa. lvm, 11 : *Implebit splendoribus animam tuam* ; et super<sup>9</sup> illuminatrix in alios, quantum ad totum mundum ; et ideo assimilatur soli et lunæ.

Secundo excellit Angelos in familiaritate divina ; et ideo hoc designans Angelus dixit : *Dominus tecum* ; quasi dicat : ideo exhibeo tibi reverentiam, quia tu familiarior es Deo quam ego, nam *Dominus est tecum*, *Dominus*, inquit, Pater cum Filio et Spiritu Sancto ; quod nullus Angelus, nec aliqua creatura habuit. Luc.

<sup>1</sup> Parm. : « aliquis... post. »

<sup>2</sup> Al. : « sancti et sanctæ congregarentur. »

<sup>3</sup> Parm. : « castitatis. »

<sup>4</sup> Parm. : « plena est... et quantum ad mali vitationem. »

<sup>5</sup> Parm. : « redundantiam. »

<sup>6</sup> Parm. omittit : « sibi. »

<sup>7</sup> Parm. omittit : « sed majus quando habet

tantum quod sufficit sibi ad salutem. »

<sup>8</sup> Parm. omittit : « sibi. »

<sup>9</sup> Parm. : « illuminatrix. »

(a) « Illos sanctos et sanctas... congregare possemus, et interrogare... nos ipsos decipimus... cum de peccatis agitur... haberi volo questionem. Unde enim scimus quid ei plus... »

1, 35 : *Quod enim nascetur ex te Sanctum, vocabitur Filius Dei.* Dominus Filius in utero. Isa. XII, 6 : *Exulta et lauda habitatio Sion, quia magnus in medio tui Sanctus Israel.* Aliter est ergo Dominus cum Beata Virgine quam cum Angelo : quia cum ea ut filius, cum Angelo ut Dominus. Dominus Spiritus sanctus, sicut in templo ; unde dicitur : « Templum Domini, sacrarium Spiritus sancti, » quia concepit ex Spiritu sancto : Luc. 1, 35 : *Spiritus sanctus superveniet in te.* Sic ergo familiarior cum Deo est Beata Virgo quam Angelus : quia cum ipsa Dominus Pater, Dominus Filius, Dominus Spiritus sanctus, scilicet tota Trinitas Et ideo cantatur de ea : « Totius Trinitatis nobile triclinium. » Hoc autem verbum, *Dominus tecum*, est nobilius verbum quod sibi dici possit. Merito ergo Angelus reveretur Beatam Virginem, quia mater Domini, et ideo Domina est. Unde convenit ei hoc nomen Maria quod Syra lingua interpretatur Domina.

Tertio excedit Angelos quantum ad puritatem : quia Beata Virgo non solum erat pura in se, sed etiam procuravit puritatem aliis. Ipsa enim purissima fuit et quantum ad culpam, quia ipsa Virgo nec originale <sup>1</sup>, nec veniale, nec mortale nec veniale peccatum incurrit. Item quantum ad pœnam. Tres enim maledictiones datæ sunt hominibus propter peccatum. Prima data est mulieri, scilicet quod cum corruptione conciperet, cum gravamine portaret, et in dolore pareret. Sed ab hac immunis fuit Beata Virgo : quia sine corruptione concepit, in solatio portavit, et in gaudio peperit Salvatorem : Isa. xxxv, 2 : *Germinans germinabit exultabunda et laudans.* Secunda data est homini, scilicet quod in sudore vultus vesceretur pane suo. Ab hac immunis fuit Beata Virgo : quia, ut dicit Apostolus I Corinth. vii, virgines solutæ sunt a cura cujus mundi, et soli Deo vacant. Tertia fuit communis viris et mulieribus, scilicet ut in pulverem reverterentur. Et ab hac immunis fuit Beata Virgo : quia cum corpore assumpta est in cœlum : credimus enim quod post mortem resuscitata fuerit, et portata in cœlum. Psalm. cxxxI, 8 : *Surge Domine in requiem tuam ; tu, et arca sanctificationis tuæ.* Sic ergo

immunis fuit ab omni maledictione, et ideo benedicta in mulieribus : quia ipsa sola maledictionem sustulit, et benedictionem portavit, et januam paradisi aperuit ; et ideo convenit ei nomen *Maria*, quæ interpretatur stella maris : quia sicut per stellam maris navigantes diriguntur ad portum, ita Christiani diriguntur per Mariam ad gloriam ad quam nos <sup>2</sup> perducat, etc.

## CAPUT II.

*Quot modis fructus ventris Virginis sit benedictus* <sup>3</sup>.

*Benedictus fructus ventri tui.* Peccator aliquando quærit in aliquo quod non potest consequi, sed consequitur illud justus : Proverb. xiii, 22 : *Custoditur justo substantia peccatoris.* Sic Eva quæsivit fructum, et <sup>4</sup> illa non invenit omnia quod voluit. Beata autem Virgo in fructu suo invenit omnia quæ desideravit Eva. Nam Eva in fructu suo tria desideravit. Primo id quod falso promisit ei diabolus, scilicet quod essent *sicut Dii scientes bonum et malum.* *Eritis* (inquit ille mendax) *sicut dii*, sicut dicitur Gen. iii, 5. Et mentitus est, quia *mendax est, et pater ejus.* Nam Eva propter esum fructus non est facta similis Deo, sed magis <sup>5</sup> dissimilis : quia peccando recessit a Deo salutari suo, unde et expulsa est de paradiso. Sed hoc invenit Beata Virgo et omnes Christiani in fructu ventris sui : quia per Christum conjungimur et assimilamur Deo. I Joan. iii, 2 : *Cum apparuerit, similes ei erimus, quoniam videbimus eum sicuti est.* Secundo in fructu suo Eva desideravit delectationem, quia bonus ad edendum : sed non invenit, quia statim cognovit se nudam, et habuit dolorem. Sed in fructu Virginis suavitatem invenimus et salutem. Joan. vi, 55 : *Qui manducat meam carnem, habet vitam æternam.* Tertio fructus Evæ erat pulcher aspectu ; sed pulchrior Virginis, in quem desiderant Angeli prospicere. Psalm. xliv, 3 : *Speciosus forma præ filiis hominum* : et hoc est, quia est splendor paternæ gloriæ. Non ergo potuit invenire Eva in fructu suo quod nec quilibet peccator in pecca-

<sup>1</sup> Parm. omittit : « originale. »

<sup>2</sup> Parm. omittit : « ad quam nos perducat. »

<sup>3</sup> Hanc titulum Parm. omittit.

<sup>4</sup> Parm. : « et in illo non invenit quæ desideravit. »

<sup>5</sup> Parm. omittit : « magis. »

tis. Et ideo quæ desideramus, quæramus in fructu Virginis. Est autem hic fructus benedictus a Deo, quia sic replevit eum omni gratia quod pervenit ad nos <sup>1</sup> Ephes. 1, 3 : *Benedictus Deus et Pater Domini nostri Jesu Christi, qui benedixit nos in omni benedictione spiritali in Christo* : ab Angelis, exhibendo ei reverentiam <sup>2</sup>. Apocal. VII, 12 : *Benedictio et claritas et*

*sapientia et gratiarum actio, honor et virtus et fortitudo Deo nostro* : ab hominibus : Apostolus Philip. II, 2 : *Omnis lingua confiteatur, quia Dominus Jesus Christus in gloria est Dei Patris*. Ps. CXVII, 26 : *Benedictus qui venit in nomine Domini*. Sic ergo est Virgo benedicta; sed et magis benedictus fructus ejus.

<sup>1</sup> Parm. addit : « exhibendo ei reverentiam. »

<sup>2</sup> Parm. omittit : « exhibendo ei reverentiam. »

# OPUSCULUM VII.

IN SYMBOLUM APOSTOLORUM SCILICET « CREDO IN DEUM » EXPOSITIO.

(EDIT. ROM. VI.)

## CAPUT I<sup>1</sup>.

*Fides quæ bona facit quare tenetur  
credere quæ non videmus.*

« Credo in unum Deum. » Primum quod est necessarium Christiano cuilibet<sup>2</sup>, est fides, sine qua nullus dicitur vere Christianus<sup>3</sup>. Fides autem facit quatuor bona. Primum est quod per fidem anima conjungitur Deo : nam per fidem anima facit quoddam matrimonium cum Deo : Oseæ II, 20 : *Sponsabo te mihi in fide*. Et inde est quod quando homo baptizatur, primo confitetur fidem, cum dicitur ei, « Credis in Deum? » quia baptismus est primum sacramentum fidei. Et ideo dicit Dominus, Marc. ult., 16 : *Qui crediderit et baptizatus fuerit, salvus erit*. Baptismus enim sine fide non prodest. Et ideo sciendum est quod nullus est acceptus Deo sine fide : Hebr. XI, 6 : *Sine fide impossibile est placere Deo*. Et ideo dicit Augustinus super illud Rom. XIV, 23 : *Omne quod non est ex fide, peccatum est* : « Ubi non est æternæ et incommutabilis veritatis agnitio, falsa est virtus etiam in optimis moribus. » Secundo, quia per fidem inchoatur in nobis vita æterna : nam vita æterna nihil aliud est quam cognoscere Deum : unde dicit Dominus, Joan. XVII, 3 : *Hæc est vita æterna, ut cognoscant te solum verum Deum*. Hæc autem cognitio Dei incipit

hic per fidem in nobis<sup>4</sup>, sed perficietur<sup>5</sup> in vita æterna<sup>6</sup> in qua cognoscemus eum sicuti est : et ideo dicitur Hebr. XI, 1 : *Fides est substantia sperandarum rerum*. Nullus ergo potest pervenire ad beatitudinem, quæ est vera cognitio Dei, nisi per fidem hic<sup>7</sup> primo cognoscat Deum. Joan. XX, 29 : *Beati qui non viderunt et crediderunt*. Tertio, quia fides dirigit vitam præsentem : nam ad hoc quod homo bene vivat, oportet quod sciat necessaria ad bene vivendum : et si deberet omnia necessaria ad bene vivendum per studium addiscere, vel non posset pervenire, vel post longum tempus posset scire<sup>8</sup>. Fides autem docet omnia necessaria ad bene vivendum. Ipsa enim docet quod est unus Deus, qui est remunerator bonorum et punitor malorum ; et quod est alia vita, et hujusmodi : quibus satis allicimur ad bonum, et vitamus malum. Hebr. X, 38 (a) : *Justus meus ex fide vivit*. Et hoc patet, quia nullus philosophorum ante adventum Christi cum toto conatu suo potuit tantum scire de Deo<sup>9</sup> et de necessariis ad vitam æternam, quantum post adventum Christi scit una vetula per fidem : et ideo dicitur Isa. XI, 9 : *Repleta est terra scientia Domini*. Quarto, quia fides est qua vincimus tentationes : Hebr. XI, 33 : *Sancti per fidem vicerunt regna*. Et hoc patet, quia omnis tentatio vel est a diabolo, vel a mundo, vel a carne. Diabolus enim tentat ut non obedias Deo, nec subjiaris ei. Et hoc per fidem removetur : nam per fidem cognos-

<sup>1</sup> Divisio in capitula cum titulis in Parm. deest.

<sup>2</sup> Parm. omittit : « cuilibet. »

<sup>3</sup> Parm. : « fidelis. »

<sup>4</sup> Parm. omittit : « nobis. »

<sup>5</sup> Parm. : « perficitur. »

<sup>6</sup> Parm. : « futura. »

<sup>7</sup> Parm. : « nisi primo cognoscat per fidem. »

<sup>8</sup> Parm. omittit : « posset scire. »

<sup>9</sup> Al. deest : « æternam » et etiam : « de necessariis ad vitam æternam. »

(a) Parm. : « Habac. II, 4. « In fide sua vivet. »



cimus quod ipse est Dominus omnium, et ideo sibi est obediendum. I Pet. v, 8 : *Adversarius vester diabolus circuit quærens quem devoret : cui resistite fortes in fide.* Mundus autem tentat vel alliciendo prosperis, vel terrendo adversis. Sed hæc vincimus per fidem, quæ facit nos credere aliam vitam meliorem ista quia docet nos credere alia majora, bona et mala <sup>1</sup>, et ideo prospera mundi hujus despiciamus, et non formidamus adversa : I Joan. v, 4 : *Hæc est victoria quæ vincit mundum, fides nostra* <sup>2</sup>. Caro vero tentat inducendo nos ad delectationes vitæ præsentis momentaneas et caducas <sup>3</sup>. Sed fides ostendit nobis quod per has, si eis indebite adhæremus, æternas delectationes amittimus. Ephes. iv, 16 : *In omnibus sumentes scutum fidei.* Sic ergo patet quod multum est utile habere fidem.

Sed dicit aliquis : Stultum est credere quod non videtur, nec sunt credenda quæ non videntur. Respondeo dicendum quod hoc dubium primo tollit imperfectio intellectus nostri : nam si homo posset perfecte per se cognoscere omnia visibilia et invisibilia, stultum esset credere quæ non videmus ; sed cognitio nostra est adeo debilis quod nullus philosophus potuit unquam perfecte investigare naturam unius muscæ : unde legitur quod unus philosophus fuit triginta annis in solitudine, ut cognosceret naturam apis. Si ergo intellectus noster est ita debilis, nonne stultum est nolle credere de Deo, nisi illa tantum quæ homo potest cognoscere per se ? Et ideo contra hoc dicitur Job, xxxvi, 26 : *Ecce Deus magnus, vincens scientiam nostram.* Hoc Helvidius <sup>4</sup>. Secundo potest responderi, quia dato quod aliquis magister aliquid diceret in sua scientia, et aliquis rusticus diceret non esse sicut magister doceret, eo quod ipse non intelligeret, multum reputaretur stultus ille rusticus. Constat autem quod intellectus Angeli excedit magis intellectum optimi philosophi, quam intellectus optimi philosophi intellectum rus-

tici. Et ideo stultus est philosophus si nolit credere ea quæ Angeli dicunt ; et multo magis si nolit credere ea quæ Deus dicit. Et contra hoc dicitur Eccli. iii, 25 : *Plurima supra sensum hominum ostensa sunt tibi.* Tertio responderi potest, quia <sup>5</sup> si homo nollet credere nisi ea quæ certe cognosceret <sup>6</sup> non posset vivere in hoc mundo. Quomodo enim aliquis vivere posset nisi crederet alicui ? Quomodo enim posset scire quod <sup>7</sup> talis esset pater suus ? Et ideo est necesse quod homo credat alicui de iis quæ perfecte non potest scire per se. Sed nulli est credendum sicut Deo ita recte <sup>8</sup>, et ideo illi qui non credunt dictis fidei, non sunt sapientes, sed stulti et superbi, sicut dicit Apostolus I ad Tim. vi, 4 : *Superbus est, nihil sciens.* Propterea dicebat II Tim. i, 12 : *Scio cui credidi et certus sum.* Eccli. ii, 8 : *Qui timetis Deum, credite illi et non evacuabitur merces vestra* <sup>9</sup>. Quare potest etiam responderi, quia Deus probat quod ea quæ docet fides, sunt vera. Si enim rex mitteret litteras cum sigillo suo sigillatas, nullus auderet dicere quod illæ litteræ non processissent de regis voluntate. Constat autem quod omnia quæ sancti crediderunt et tradiderunt nobis de fide Christi, signata sunt sigillo Dei : quod sigillum est <sup>10</sup> illa opera quæ nulla pura creatura facere potest : et hæc sunt miracula, quibus Christus confirmavit dicta Apostolorum et sanctorum.

Si dicas quod miracula nullus vidit fieri : Respondeo ad hoc. Constat <sup>11</sup> quod totus mundus colebat idola, et fidem Christi persequabatur, sicut Imperatorum et Regum <sup>12</sup> historia tradunt ; sed modo omnes conversi sunt ad Christum <sup>13</sup>, sapientes et magnates, per prædicationem pauperum et paucorum prædicantium Christum. Aut ergo hoc est miraculose factum, aut non. Si miraculose, habes propositum. Si non, dico quod non potuit esse majus miraculum quam quod mundus totus sine miraculis converteretur <sup>14</sup>.

Certius ergo credendum est his quæ vestra. »

<sup>1</sup> Parm. omittit : « quia docet nos credere alia majora bona et mala. »

<sup>2</sup> Parm. addit : « et etiam quia docet, nos credere alia majora mala, scilicet inferni. »

<sup>3</sup> Parm. omittit : « et caducas. »

<sup>4</sup> Parm. omittit : « Hoc Helvidius. »

<sup>5</sup> Al. : « tertia ratio est, quia etc. »

<sup>6</sup> Parm. : « cognosceret, certe non posset. »

<sup>7</sup> Parm. : « etiam crederet quod talis. »

<sup>8</sup> Parm. omittit : « ita recte. »

<sup>9</sup> Parm. omittit : « et non evacuabitur merces

vestra. »

<sup>10</sup> Parm. : « ostendunt. » <sup>11</sup> Parm. addit : « enim. »

<sup>12</sup> Parm. « sicut Paganorum etiam. »

<sup>13</sup> Parm. : « ad Christum, et sapientes et nobiles, et divites ; et potentes, et magni ad prædicationem simplicium et pauperum. »

<sup>14</sup> Parm. : « non ergo quærimus aliud. »

« Sic ergo nullus debet dubitare de fide, sed credere ea quæ fidei sunt magis quam ea quæ videt : quia visus hominis potest decipi, sed scientia Dei nunquam fallitur. « Credo in unum etc. »

fidei sunt quam his quæ videntur : quia scientia Dei nunquam fallitur, sed visus hominis aliquando decipitur.

## CAPUT II.

*De primo articulo fidei : quod Deus unus provisor est omnium, et quot modis circa veritatem Dei antiqui erraverunt.*

*Credo in unum Deum.* Inter omnia quæ debent credere fideles, hoc est primum quod debent credere, scilicet quod sit Deus unus. Considerandum autem, quid significet hoc nomen « Deus : » quod quidem nihil est aliud dictum <sup>1</sup> quam gubernator et provisor rerum omnium. Ille igitur credit Deum esse qui credit omnes res mundi hujus gubernari et provideri ab aliquo <sup>2</sup>. Qui autem credit quod omnia proveniant a casu, hic non credit Deum esse. Nullus autem invenitur adeo stultus qui non credat quod res naturales gubernentur, provideantur, et disponantur a Deo <sup>3</sup>; cum in quodam ordine et certis temporibus procedant. Videmus enim solem et lunam et stellas, et alias res naturales omnes servare determinatum cursum; quod non contingeret, si a casu essent : unde si aliquis esset qui non crederet Deum esse, stultus esset. Psalm. XIII, 1 : *Dixit insipiens in corde suo : Non est Deus.* Sunt autem aliqui qui licet credant Deum gubernatorem <sup>4</sup>, et disponere res naturales; non tamen esse Deum hominum <sup>5</sup> actuum provisorum; et illi sunt qui credunt actus humanos non disponi a Deo. Cujus ratio est, quia vident in mundo isto bonos affligi, et malos prosperari : quod videtur tollere providentiam divinam circa homines : unde in persona eorum dicitur Job. XXII, 14 : *Circa cardines cæli perambulat, nec nostra considerat.* Hoc autem est valde stultum. Nam istis accidit, sicut si aliquis nesciens medicinam, videret medicum propinantem uni infirmo aquam, alteri vinum, secundum scilicet quod ars medicinæ dictat : crederet quod hoc fiat a casu, cum nesciat artem medicinæ, quæ

ex certa <sup>6</sup> causa hoc facit, scilicet quod isti <sup>7</sup> aqua, alii vinum propinatur. Sic est de Deo. Deus enim ex <sup>8</sup> certa sua providentia et dispositione scit ea quæ sunt hominibus necessaria; et sic quosdam bonos affligit, et quosdam malos in prosperitate dimittit. Unde qui credit hoc provenire a casu, est et reputatur insipiens : quia ideo <sup>9</sup> contingit ei hoc, quia nescit artem et causas dispositionis divinæ. Job. XI, 6 <sup>10</sup> : *Respondens Sophar Naamathites dixit : utinam Deus loqueretur tecum, et aperiret labia sua tibi, et \* ostenderet tibi secreta sapientiæ suæ, et quod multiplex sit \* lex ejus; et intelligeres quod multo minora exigaris a Deo quam meretur iniquitas.* Et ideo firmiter credendum est quod Deus gubernat et disponit non solum res naturales, sed etiam actus humanos. Psalm. XCIII, 7 : *Et dixerunt, Non videbit Dominus, nec intelliget Deus Jacob. Intelligite insipientes in populo, et stulti aliquando sapite. Qui plantavit aurem, non audiet; aut qui finxit oculum, non considerat?... Dominus scit cogitationes hominum.* Omnia ergo videt, et cogitationes, et occulta voluntatis. Unde et hominibus specialiter imponitur necessitas bene faciendi, quia omnia <sup>11</sup> cogitata, dicta, et facta hominum divino conspectui sunt manifesta, Apostolus Hebr. IV, 13 : *Omnia nuda sunt et aperta oculis ejus.* Est autem credendum quod hic Deus qui omnia disponit et regit, sit unus Deus tantum. Cujus ratio est, quia illa dispositio rerum humanarum est bene disposita, in qua multitudo invenitur disponi et gubernari per unum. Nam multitudo præsentium inducit sæpe dissensionem in subditis : unde cum divinum regimen præeminet regimini humano, manifestum est quod regnum mundi non est per multos deos, sed per unum tantum. Sunt autem quatuor, ex quibus homines inducti sunt ad ponendum plures deos. Primum est imbecillitas intellectus humani. Nam homines imbecillis intellectus non valentes corporalia transcendere, non crediderunt aliquid esse ultra naturam corporum sensibilium; et ideo inter corpora illa po-

\* ut  
\* esset

<sup>1</sup> Parm. omittit : « dictum. »

<sup>2</sup> Parm. : « ab illo. »

<sup>3</sup> Parm. omittit : « a Deo. »

<sup>4</sup> Parm. : « gubernare, et disponere. »

<sup>5</sup> Parm. : « non tamen credunt Deum esse humanorum actuum provisorum; qui scilicet credunt. »

<sup>6</sup> Parm. : « justa. »

<sup>7</sup> Parm. : « isti dat vinum, illi vero aquam. »

<sup>8</sup> Parm. : « ex justa causa et. »

<sup>9</sup> Parm. : « quia non contingit hoc nisi. »

<sup>10</sup> Parm. : « Job. XI, 6 : utinam, ostenderet tibi secreta sapientiæ, et quod multiplex esset lex ejus. »

<sup>11</sup> Parm. : « omnia quæ cogitant et faciunt, divino. »

suerunt præeminere et disponere mundum, quæ pulchriora et digniora inter ea videbantur; et eis attribuebant et impendebant divinum cultum: et hujusmodi sunt corpora cœlestia, scilicet sol et luna et stellæ. Sed istis accidit sicut alicui eunti ad curiam regis, qui volens videre regem, credit quemcumque bene indutum vel in officio constitutum, regem esse: de quibus dicitur Sap. xiii, 2 et 3. *Solem et lunam, aut gyrum stellarum, rectores orbis terrarum deos putaverunt*<sup>1</sup>. *Sciant quanto his dominator eorum speciosior est*<sup>2</sup>. Isa. li, 6: *Levate in excelsum oculos vestros, et videte sub terra deorsum: quia cœli sicut fumus liquescent, et terra sicut vestimentum atteretur, et habitatores ejus sicut hæc interibunt; salus autem mea in sæmpiternum erit, et justitia mea non deficiet*. Secundo provenit ex adulatione hominum: nam aliqui volentes adulari dominis et regibus, honorem Deo debitum eis exhibuerunt, obediendo eis, et subjiendo se eis: unde et aliqui<sup>3</sup> post mortem fecerunt eos deos, et aliqui in vita dixerunt eis esse deos. *Judith v, 29: Scit omnis gens, quomodo Nabuchodonosor deus terræ est, et præter ipsam alius non est*. Tertio provenit ex carnali affectu ad filios et consanguineos: nam aliqui propter nimium amorem quem ad suos habebant, faciebant statuas eorum post<sup>4</sup> mortem, et sic ex hoc processum est quod illis statuis divinum cultum impendebant: de quibus dicitur Sap. xiv, 21: *Quoniam aut affectui aut regibus deservientes homines, incommunicabile nomen lapidibus et lignis imposuerunt*. Quarto ex malitia diaboli. Ipse enim ab initio voluit æquiparari Deo: unde ipse ait, Isa. xiv, 14: *Ascendam super altitudinem nubium, et ero similis altissimo*. Et hanc voluntatem nondum deposuit; et ideo totus conatus suus in hoc existit ut faciat se ab hominibus adorari, et sacrificia sibi offerri: non quod delectetur in cane vel cato qui ei offerretur; sed delectatur in hoc quod ei impenditur reverentia sicut Deo: unde et Christo dixit, Matth. iv, 9: *Hæc omnia tibi dabo, si ca-*

*dens adoraveris me*. Inde est etiam quod intrantes idola, dabant responsa, ut scilicet venerarentur ut dii. Psalm. cxv, 5: *Omnes dii Gentium dæmonia*. Apostolus, I Corinth. x, 20: *Sed quæ immolant Gentes, dæmoniis immolant, et non Deo*. Licet autem hæc sint multum<sup>6</sup> horribilia, sunt tamen aliquando et multi qui frequenter incidunt in istas quatuor causas. Et licet non corde<sup>7</sup>, tamen factis ostendunt se credere plures deos. Nam qui credunt quod corpora cœlestia possunt in voluntatem hominis imprimere, et qui in factis suis certa accipiunt tempora secundum<sup>8</sup> Alfarabium ponunt corpora cœlestia esse deos, et aliis dominari; facientes astrolabia. Jerem. x, 2: *A signis cœli nolite metuere quæ timent Gentes, quia leges populorum vanæ sunt*. Item omnes illi qui obediunt dominis temporalibus<sup>9</sup> plusquam Deo in illis in quibus non debent, constituunt eos deos suos. Act. v, 29: *Obedire oportet Deo magis quam hominibus*. Item omnes<sup>10</sup> illi qui diligunt filios aut consanguineos plusquam Deum, ostendunt factis suis plures esse deos. Vel etiam illi qui diligunt escam plusquam Deum: de quibus Apostolus Phil. iii, 19: *Quorum deus venter est*. Item omnes illi qui insistunt veneficiis et incantationibus credunt dæmones esse deos: cujus ratio est, quia petunt a dæmonibus id quod solus Deus dare potest; scilicet revelationem alicujus rei occulta, et veritatem futurorum. Est ergo primo credendum quod Deus est unus tantum. Rogemus ergo Dominum.

### CAPUT III.

*De secundo articulo: quos errores circa creationem ritare debemus, et quæ bona consideratio creationis facit.*

*Patrem (a) omnipotentem, creatorem cœli et terræ*. Sicut dictum est, primum quod credere debemus, est quod sit unus solus Deus; secundum est quod iste Deus sit creator et factor cœli et

<sup>1</sup> Al.: « solem et lunam rectores orbis terrarum deos putaverunt. » Secundo provenit etc. aliis omissis.

<sup>2</sup> Parm. omittit: « sciant quanto his dominator eorum speciosior est. »

<sup>3</sup> Parm.: « aliquos post... fecerunt deos, alios etiam. »

<sup>4</sup> Parm.: « post eorum. »

<sup>5</sup> Parm.: « ponam sedem meam ab aquilone, in cœlum conscendam, et ero similis Altissimo. »

<sup>6</sup> Parm. omittit: « multum. »

<sup>7</sup> Parm.: « ore aut corde. »

<sup>8</sup> Parm. omittit: « secundum Alfarabium. »

<sup>9</sup> Parm.: « regibus... vel in illis. »

<sup>10</sup> Parm. omittit: « omnes. »

(a) Hic articulus Petro attribuitur.

terræ, visibilium et invisibilium. Et ut rationes subtiles dimittantur ad præsens, quodam rudi exemplo manifestatur propositum, quod scilicet omnia sunt a Deo creata et facta. Constat enim quod si aliquis intraret domum aliquam, et in ipsius domus introitu sentiret calorem, postmodum vadens interius sentiret majorem calorem, et sic deinceps, crederet ignem esse interius, etiam si ipsum ignem non videret qui causaret dictos calores: sic quoque contingit consideranti res hujus mundi. Nam ipse invenit res omnes secundum diversos gradus pulchritudinis et nobilitatis esse dispositas; et quanto magis appropinquant Deo, tanto pulchriora et nobiliora<sup>4</sup> invenit. Unde corpora cœlestia pulchriora et nobiliora sunt quam corpora inferiora, et invisibilia visibilibus: et ideo credendum est quod omnia hæc sunt ab uno Deo, qui dat suum esse singulis rebus, et nobilitatem. Sapient. xiii, 4: *Vani sunt autem omnes homines in quibus non subest scientia Dei, et de his quæ videntur bona, non potuerunt intelligere eum qui est, neque operibus attendentes, agnoverunt quis esset artifex*: et infra 5: *A magnitudine enim speciei et creaturæ cognoscibiliter poterit Creator horum videri*. Sic ergo pro certo debet nobis constare quod omnia quæ sunt in mundo, a Deo sunt.

Circa hoc autem debemus vitare tres errores. Primus est error Manichæorum, qui dicunt quod omnia visibilia creata sunt a diabolo; et ideo Deo solum attribuunt creationem invisibilium: et causa hujus erroris est, quia ipsi<sup>2</sup> dicunt esse summum malum sicut et summum bonum, et omnia quæ sunt a malo sunt mala, et omnia quæ sunt a bono sunt bona. Unde nescientes discernere quid sit malum et quid bonum, crediderunt quod omnia illa quæ sunt aliquo modo mala, simpliciter essent mala; sicut ignis, quia urit, dicitur ab eis simpliciter malus; et aqua, quia suffocat; et sic de aliis. Unde, quia nihil istorum sensibilium est simpliciter bonum, sed aliquo modo malum et deficiens, dixerunt, quod visibilia omnia non sunt facta a Deo bono, sed a malo. Contra hos ponit Augustinus tale

exemplum. Si aliquis intraret domum fabri, et inveniret instrumenta ad quæ impingeret, et læderent eum, et ex hoc reputaret illum fabrum malum, quia talia habet<sup>3</sup> et fecit instrumenta, stultus esset dicendus,<sup>4</sup> cum faber ea teneat ad opus suum: ita stultum est dicere, quod per hoc creaturæ sint malæ, quia sunt in aliquo nocivæ; nam quod uni est nocivum, alteri est utile. Hic autem error est contra fidem Ecclesiæ; et ideo ad hunc removendum, dicitur: « Factorem visibilium omnium et invisibilium. » Genes. 1, 4: *In principio creavit Deus cœlum et terram*. Joan. 1, 3: *Omnia per ipsum facta sunt*. Secundus est error ponentium mundum ab æterno: secundum quem modum loquitur Petrus dicens II Pet. iii, 4: *Ex quo patres dormierunt, omnia sic perseverant ab initio creaturæ*: Et isti ducti sunt ad hanc positionem, quia nescierunt considerare principium mundi. Unde, sicut Rabbi Moyses dicit, istis contingit sicut puero, qui si statim cum nascitur, poneretur in insula, et nunquam videret mulierem prægnantem, nec puerum nasci<sup>5</sup>; et diceretur isti puero, quando jam esset proventus<sup>6</sup> qualiter homo concipitur, portatur in utero, et nascitur; nullo crederet modo<sup>7</sup> et impossibile sibi videretur quod homo posset esse in utero matris. Sic isti considerantes statum mundi præsentem, non credunt quod inceperit. Quod est contra fidem Ecclesiæ: et ideo ad hoc removendum dicitur: « Factorem cœli et terræ. » Si enim fuerunt facta, constat quod non semper fuerunt; et ideo dicitur in Psalm. cxlvi, 5: *Dixit et facta sunt*. Tertius est error ponentium, Deum fecisse mundum ex præjacenti materia: et ad hoc ducti sunt, quia voluerunt metiri potentiam Dei secundum potentiam nostram: et ideo, quia homo nihil potest facere nisi ex præjacenti materia, crediderunt quod eodem modo et Deus: unde dixerunt, quod in productione rerum habuit materiam præjacentem. Sed hoc non est verum: nam homo ideo nihil potest facere sine præjacenti materia, quia est factor particularis, et non potest inducere nisi hanc formam in determinata materia ab aliquo alio præsuppo-

<sup>1</sup> Parm.: « meliora. »

<sup>2</sup> Parm.: « Deum asserunt summum bonum, sicut et verum est, et omnia quæ a bono sunt bona esse. »

<sup>3</sup> Parm.: « tenet talia. »

<sup>4</sup> Parm. omittit: « dicendus. »

<sup>5</sup> Al. deest: « nasci. »

<sup>6</sup> Parm.: « quando magnus esset. »

<sup>7</sup> Parm.: « nulli crederet sibi dicenti, quia. »



sita. Cujus ratio est, quia virtus sua est determinata ad formam tantum; et ideo non potest esse causa nisi hujus. Deus autem est universalis causa omnium rerum, et non solum creat formam, sed etiam materiam; unde et de nihilo omnia fecit: et ideo ad removendum hunc errorem dicitur: «Creatorem cœli et terræ.» In hoc enim differunt creare et facere, quia creare est de nihilo aliquid facere: facere autem est de aliquo aliquid facere. Si ergo ex nihilo fecit, credendum est quod iterum posset omnia facere, si destruerentur: unde potest cæcum illuminare, mortuum suscitare, et cetera opera miraculosa facere. Sap. xii, 18: *Subest enim tibi, cum volueris posse.*

Ex hujusmodi autem consideratione homo dirigitur ad quinque. Primo ad cognitionem divinæ majestatis: nam factor præeminet factis: unde quia Deus est factor omnium rerum, constat eum eminentiorem omnibus rebus. Sap. xiii, 3: *Quorum si specie delectati deos putaverunt, sciant quanto his dominator eorum speciosior est... Aut si virtutem et opera eorum mirati sunt, intelligant ab illis quomodo qui hæc fecit, fortior est illis.* Et inde est quod quidquid potest intelligi et prædicari, <sup>1</sup> minus est ipso Deo Job. xxxvi, 26: *Ecce Deus magnus, vincens scientiam nostram.* Secundo ex hoc dirigitur ad gratiarum actionem: quia enim Deus est creator omnium rerum, certum est quod quidquid sumus et quidquid habemus a Deo est. Apostolus I Corinth. iv, 7: *Quid habes quod non accepisti?* Psalm. xxiii, 1: *Domini est terra et plenitudo ejus, orbis terrarum, et universi qui habitant in eo.* Et ideo debemus ei reddere gratiarum actiones: Psalm. cxv, 12: *Quid retribuam Domino pro omnibus quæ retribuit mihi?* Tertio inducitur ad patientiam in adversis. Nam licet omnis creatura sit a Deo, et ex hoc sit bona secundum suam naturam; tamen si in aliquo noceat, et inferat nobis pœnam, debemus credere quod illa pœna sit a Deo; non tamen culpa: quia nullum malum est a Deo, nisi quod ordinatur ad bonum: et ideo si omnis pœna quam homo suffert, est a Deo, debet patienter sus-

tinere <sup>2</sup> quia est a Deo, et ordinatur ad bonum. Nam <sup>3</sup> purgat peccata, humiliat reos, provocat bonos ad amorem Dei. Job. ii, 10: *Si bona suscepimus de manu Domini, mala quare non sustineamus?* Quarto inducimur ad recte utendum rebus creatis: nam creaturis debemus uti ad hoc ad quod factæ sunt a Deo. Sunt autem factæ ad duo: scilicet ad gloriam Dei, quia *Universa propter semetipsum* (id est ad gloriam suam) *operatus est Dominus*, ut dicitur Proverb. xvi, 4: et ad utilitatem nostram Deuteron. iv, 19: *Quæ fecit Dominus Deus tuus in ministerium cunctis gentibus.* Debemus ergo uti <sup>4</sup> rebus ad gloriam Dei, ut scilicet in hoc placeamus Deo; et ad utilitatem nostram, ut scilicet ipsis utendo, non committamus peccatum. I Paralip. xxix, 14: *Tua sunt omnia, et quæ de manu tua accepimus dedimus tibi.* Quidquid ergo habes, si <sup>5</sup> sapientiam, si divitias, si pulchritudinem, totum debes referre, et uti eo ad gloriam Dei. Quinto dirigimur <sup>6</sup> ex hoc ad considerationem magnitudinis et dignitatis humanæ. Deus enim omnia fecit propter hominem, sicut dicitur in Psalm. viii, 8: *Omnia subiecisti sub pedibus ejus;* et homo magis est similis Deo inter creaturas post Angelos: unde dicitur Genes. i, 26: *Fuciamus hominem ad imaginem et similitudinem nostram.* Hoc quidem non dixit de cœlo sive de stellis, sed de homine: non autem quantum ad corpus, sed quantum ad animam, quæ est liberam voluntatem habens et incorruptibilis, in quo magis assimilatur Deo quam ceteræ creaturæ. Debemus ergo considerare hominem post Angelos digniorem esse ceteris creaturis, et nullo modo dignitatem nostram diminuere per <sup>7</sup> peccata et per inordinatum appetitum rerum corporali-um, quæ viliores sunt nobis, et ad servitium nostrum factæ; sed eo modo debemus nos habere ad ipsos quo <sup>8</sup> Deus fecit nos. Deus enim fecit hominem ut præesset omnibus quæ sunt in terra, et ut subsit Deo. Debemus ergo dominari et præesse rebus, Deo autem subesse, obedire, ac servire: et ex hoc pervenimus in fruitionem Dei: quod nobis præstare <sup>9</sup> etc.

<sup>1</sup> Parm.: «vel cogitari.»

<sup>2</sup> Parm. omittit: «quia est a Deo, et ordinatur ad bonum.»

<sup>3</sup> Parm.: «nam pœnæ purgant, etc.»

<sup>4</sup> Parm.: «sive scientiam, sive pulchritudinem.»

<sup>5</sup> Parm.: «ducimus ex hoc in cognitionem dignitatis.»

<sup>6</sup> Parm.: «propter.»

<sup>7</sup> Parm. omittit: «ad ipsas.»

<sup>8</sup> Supple.: «dignetur,» vel quid simile. Cod. S. Vict. in Dei, ad quam, etc.»



## CAPUT IV.

*De tertio articulo; quibus modis circa Incarnationem erratum; est de natura verbi.*

*Et in Jesum Christum, Filium ejus unicum Dominum nostrum (a).* Non solum est necesse Christianis unum Deum credere, et hunc esse creatorem cœli et terræ et omnium; sed etiam necesse est ut credant quod Deus est Pater, et quod Christus sit verus Filius Dei. Hoc autem, sicut dicit beatus Petrus in *Canonica* sua II cap. 1, non est fabulosum, sed certum et probatum per verbum Dei in monte: unde dicit ibidem 16: *Non enim doctas fabulas secuti, notam fecimus vobis Domini nostri Jesu Christi virtutem et præsentiam; sed speculatores facti illius magnitudinis. Accipiens enim a Deo Patre honorem et gloriam, voce delapsa ad eum hujusmodi a magnifica gloria: Hic est Filius meus dilectus, in quo mihi complacui: ipsum audite. Et hanc vocem nos audivimus de cœlo allatam, cum essemus cum ipso in monte sancto.* Ipse etiam Christus Jesus in pluribus locis vocat Deum Patrem suum, et se dicit Filium Dei: et Apostoli et sancti patres posuerunt inter articulos fidei quod Christus est Filius Dei, dicentes: « Et in Jesum Christum Filium ejus, » scilicet Dei: supple, credo.

Sed aliqui hæretici fuerunt qui hoc perverse crediderunt. Photinus enim dicit quod Christus non est aliter Filius Dei quam boni viri, qui bene vivendo merentur dici filii Dei per adoptionem, faciendo Dei voluntatem; et ita Christus qui bene vixit et fecit Dei voluntatem, meruit dici filius Dei: et voluit quod Christus non fuerit ante Beatam Virginem, sed tunc incepit quando ex ea conceptus est. Et sic in duobus erravit. Primo in hoc quod non dixit eum verum Filium Dei secundum naturam; secundo quod dixit eum secundum totum suum esse ex tempore incepisse; cum fides nostra teneat quod Filius sit Dei per naturam, et quod ab æterno sit: et de his habemus expressas auctoritates contra eum in sacra Scriptura. Nam contra primum dicitur quod sit non Filius solum, sed etiam unigenitus. Joan. I, 18: *Unigenitus qui est in sinu*

*Patris, ipse enarravit.* Contra secundum, Joan. VIII, 58: *Antequam Abraham fieret, ego sum.* Constat autem quod Abraham ante Beatam Virginem fuit: et ideo sancti patres addiderunt in alio *Symbolo* contra primum, « Filium Dei unigenitum; » contra secundum, « Et ex Patre natum ante omnia sæcula. » Sabellius vero licet diceret quod Christus fuit ante Beatam Virginem, dixit tamen quod non est alia persona Patris, alia Filii, sed ipse Pater est incarnatus; et ideo eadem est persona Patris et Filii. Sed hoc est erroneum, quia aufert trinitatem personarum: et contra hoc est auctoritas Joan. VIII, 16: *Solus non sum; sed ego, et qui misit me, Pater.* Constat autem nullum a se mitti. Sic ergo mentitur Sabellius: et ideo in *Symbolo patrum* additur: « Deum de Deo, lumen de lumine; » idest, Deum Filium de Deo Patre, et Filium qui est lumen de lumine Patre esse, credere debemus. Arius autem licet diceret quod Christus fuerit ante Beatam Virginem, et quod alia fuerit persona Patris, alia Filii, tamen tria attribuit Christo. Primum est quod Dei Filius fuit creatura: secundum est quod non ab æterno, sed ex tempore factus sit a Deo nobilissima creaturarum: tertium est quod non fuerit unius naturæ Deus Filius cum Deo Patre, et sic quod non fuerit verus Deus. Sed hoc similiter est erroneum, et contra auctoritates sacræ Scripturæ; dicitur enim Joan. X, 30: *Ego et Pater unum sumus.* Scilicet in natura; et ideo sicut Pater fuit semper, ita et Filius; et sicut Pater est verus Deus, ita et Filius. Ubi ergo dicitur ab Ario Christum fuisse creaturam, e contra dicitur in *Symbolo* a patribus, « Deum verum de Deo vero: » ubi autem dicitur eum non fuisse ab æterno, sed ex tempore, e contra in *Symbolo* dicitur, « Genitum, non factum: » contra illud vero quod dicitur eum non esse ejusdem substantiæ cum Patre, additur in *Symbolo*, « Consubstantiali Patri. » Patet ergo quod credere debemus, quod Christus Unigenitus Dei est, et vere Filius Dei, et quod semper fuerit cum Patre, et quod alia est persona Filii, alia Patris, et quod unius est naturæ cum Patre. Sed hoc credimus hic per fidem, cognoscemus autem in vita æterna per perfectam visionem; et ideo ad consolationem nostram dicemus aliquid de his.

(a) Joanni attribuitur.

Sciendum est igitur, quod diversa diversum modum generationis habent. Generatio autem Dei alia est quam generatio aliarum rerum : unde non possumus attingere ad generationem Dei, nisi per generationem ejus quod in creaturis magis accedit ad similitudinem Dei. Nihil est autem Deo ita simile sicut anima hominis, ut dictum est. Modus autem generationis in anima est quia homo cogitat per animam suam aliquid, quod vocatur conceptio intellectus ; et hujusmodi conceptio oritur ex anima, sicut ex patre, et vocatur verbum intellectus, sive hominis. Anima igitur cogitando generat verbum suum. Sic et Filius Dei nihil est aliud quam Verbum Dei ; non sicut verbum exterius prolatum, quia illud transit, sed sicut verbum interius conceptum : et ideo ipsum Verbum Dei est unius naturæ cum Deo, et æquale Deo. Unde et beatus Joannes de Verbo Dei loquens, tres hæreses destruxit. Primo hæresim Photini, quæ tacta est, cum dicit cap. 1, 1 : *In principio erat Verbum* ; secundo Sabellii, cum dicit : *Et Verbum erat apud Deum* ; tertio Arii, cum dicit, *Et Deus erat Verbum*. Verbum autem aliter est in nobis, et aliter in Deo. In nobis enim verbum nostrum est accidens ; sed in Deo Verbum Dei est idem quod ipse Deus, cum nihil sit in Deo quod non sit essentia Dei. Nullus autem potest dicere quod Deus non habeat Verbum, quia contingeret Deum esse insipientissimum : et ideo sicut fuit semper Deus, ita et Verbum ejus. Sicut autem artifex facit omnia per formam quam præcogitavit in corde suo, quod est verbum ejus ; ita et Deus omnia facit Verbo suo, sicut per artem suam. Joan. 1, 3 : *Omnia per ipsum facta sunt*. Si ergo Verbum Dei est Filius Dei, et omnia Dei verba sunt similitudo quadam istius Verbi ; debemus primo libenter audire verba Dei : hoc est enim signum quod diligamus Deum, si verba illius libenter audimus. Secundo debemus credere verbis Dei, quia ex hoc Verbum Dei habitat in nobis, idest Christus, qui est Verbum Dei. Apostolus Ephes, III, 17 : *Habitare Christum per fidem in cordibus vestris*. Joan. V, 38 : *Verbum Dei non habetis in vobis manens*. Tertio oportet quod Verbum Dei in nobis manens continue

meditemur : quia non solum oportet credere, sed meditari ; aliter non prodesset : et hujusmodi meditatio valet multum contra peccatum : Psalm. cxviii, 11 : *In corde meo abscondi eloquia tua, ut non peccem tibi* : et iterum de viro justo dicitur Psalm, 1, 2 : *In lege ejus meditabitur die ac nocte*. Unde de Beata Virgine dicitur Luc. II, 51, quod *conservabat omnia verba hæc conferens in cordo suo*. Quarto oportet quod homo verbum Dei communicet aliis, cum<sup>4</sup> enim cor hominis est plenum verbis Dei, tunc debet in alios effundere commendo, prædicando, et informando<sup>2</sup>. Apostolus, Ephes. IV, 29 : *Omnis sermo malus ex ore vestro non procedat, sed si quis bonus ad ædificationem*. Idem Colos. III, 16 : *Verbum Christi habitat in vobis abundanter, in omni sapientia, docentes et commoventes vosmetipsos*. Idem II Tim. IV, 2 : *Prædica verbum, insta opportune, importune, argue, obsecra, increpa in omni patientia et doctrina*. Ultimo verbum Dei debet executioni mandari. Jac. I, 22 : *Estote factores verbi, et non auditores tantum, fallentes vosmetipsos*. Ista quinque servavit per ordinem Beata Maria in generatione Verbi Dei ex se. Primo enim audivit : *Spiritus sanctus superveniet in te* : Luc. II, 35 ; secundo consensit per fidem : *Ecce ancilla Domini* : ibid. 38 ; tertio tenuit et portavit in utero ; quarto protulit et peperit eum ; quinto nutrit et lactavit eum ; unde Ecclesia cantat : « *Ipsam regem Angelorum sola Virgo lactabat ubere de celo pleno* ».

## CAPUT V.

*De articulo quarto : quot modis erratum est circa nativitatem Christi, et quæ bona ex ea nobis proveniunt (a).*

*Qui conceptus est de Spiritu sancto, natus ex Maria Virgine*. Non solum est necessarium credere Christiano Filium Dei, ut ostensum est ; sed etiam oportet credere incarnationem ejus. Et ideo beatus Joannes postquam dixerat multa subtilia et ardua, consequenter insinuat nobis ejus incarnationem, cum dicit Joan. I, 14 : *Et Verbum caro factum est*. Et ut de hoc aliquid capere possimus, duo

<sup>4</sup> Parm. omittit : « cum enim cor hominis plenum est verbis Dei, tunc debet in alios effundere. »

<sup>2</sup> Parm. : « inflammando. »

(a) Jacobo Zebedei attribuitur.

exempla ponam in medium. Constat quod Filio Dei nihil est ita simile sicut verbum in corde nostro conceptum, non prolatum. Nullus autem cognoscit verbum dum est in corde hominis, nisi ille qui concipit; sed tunc primo cognoscitur cum profertur. Sic Verbum Dei dum erat in corde Patris non cognosebatur nisi a Patre tantum : sed carne indutum, sicut verbum voce, tunc primo manifestatum et cognitum est. Baruch III, 38 : *Post hoc in terris visus est, et cum hominibus conversatus est.* Aliud exemplum est, quia licet verbum prolatum cognoscatur per auditum, tamen non videtur nec tangitur; sed cum scribitur in charta, tunc videtur et tangitur. Sic et Verbum Dei et visibile et tangibile factum est, cum in carne nostra fuit quasi scriptum : et sicut charta in qua verbum regis scriptum est, dicitur verbum regis; ita homo cui conjunctum est Verbum Dei in una hypostasi, dicitur Filius Dei. Isa. VIII, 1 : *Sume tibi librum grandem, et scribe in eo stylo hominis :* et ideo sacri Apostoli dixerunt « Qui conceptus est de Spiritu sancto, natus ex Maria Virgine.

In quo quidem multi erraverunt : unde et sancti patres in alio *Symbolo* in synodo Nicæna multa addiderunt, per quæ nunc omnes errores destruuntur. Origenes enim dixit, quod Christus est natus, et etiam venit in mundum, ut etiam salvaret dæmones : unde dixit dæmones omnes esse salvandos in fine mundi. Sed hoc est contra sacram Scripturam : dicit enim Matth. XXV, 41 : *Discedite a me maledicti in ignem æternum, qui paratus est diabolo et angelis ejus :* et ideo ad hoc removendum additur : « Qui propter nos homines ( non propter dæmones ) et propter nostram salutem : » in quo quidem magis apparet amor Dei ad nos. Photinus vero voluit quod Christus natus esset de Beata Virgine ; sed addidit quod esset purus homo, qui bene vivendo et faciendo voluntatem Dei, meruit filius Dei fieri, sicut et alii sancti : contra quod dicitur Joan. VI, 38 : *Descendi de cælo, non ut faciam voluntatem meam, sed voluntatem ejus qui misit me.* Constat autem quod non descendisset nisi ibi fuisset ; et si fuisset purus homo non fuisset in cælo : et ideo ad hoc removendum additur : « Descendit de cælis. » Manichæus vero dixit, quod licet

Filius Dei fuerit semper, et descenderit de cælo, tamen non habuit veram carnem, sed apparentem. Sed hoc est falsum : non enim decebat doctorem veritatis aliquam falsitatem habere : et ideo sicut ostendit veram carnem, sic habuit : unde dixit Luc. XXIV, 29 : *Palpate, et videte, quia spiritus carnem et ossa non habet, sicut me videtis habere :* et ideo ad hoc removendum addiderunt : « Et incarnatus est. » Ebion vero, qui fuit genere Judæus, dixit quod Christus natus est de Beata Virgine sed ex commixtione viri<sup>1</sup> et feminae. Sed hoc est falsum, quia Angelus dixit Matth. 1, 20 : *Quod enim in ea natum est de Spiritu sancto est ;* et ideo sancti patres ad hoc removendum addiderunt : « De Spiritu sancto. » Valentinus autem licet confiteretur quod Christus conceptus fuerit de Spiritu sancto, voluit tamen quod Spiritus sanctus portaverit unum corpus cæleste, et posuerit in Beata Virgine et hoc fuit corpus Christi : unde nihil aliud operata est Beata Virgo, nisi quod fuit locus ejus : unde dixit quod illud corpus transivit per Beatam Virginem sicut per aquæductum. Sed hic<sup>2</sup> est magnus error, nam Angelus dixit ei, Luc. 1, 35 : *Quod enim ex te nascetur Sanctum, vocabitur Filius Dei ;* et Apostolus Galat. IV, 4 : *At ubi venit plenitudo temporis, misit Deum Filium suum factum ex muliere.* Et ideo addiderunt : « Natus ex Maria Virgine. » Arius vero et Apollinarius dixerunt, quod licet Christus fuerit Verbum Dei, et natus ex Maria Virgine, tamen non habuit animam, sed loco animæ fuit ibi divinitas. Sed hoc est contra Scripturam ; quia Christus dixit, Joan. XII, 27 : *Nunc anima mea turbata est :* et iterum Matth. XXVI, 28 : *Tristis est anima mea usque ad mortem.* Et ideo sancti patres ad hoc removendum addiderunt : « Et homo factus est. » Homo enim ex anima et corpore consistit : unde verissime habuit omnia quæ<sup>3</sup> verus homo habuit præter peccatum. In hoc autem quod dicitur homo factus, destruuntur omnes errores superius positi, et omnes alii qui dici possent ; et præcipue error Eutychetis, qui dixit commixtionem factam, scilicet ex divina natura et humana factam unam naturam Christi, quæ nec Deus pure est, nec purus homo. Sed est falsum, quia tunc non esset homo ; et est etiam con-

<sup>1</sup> Parm. : « viri, et ex virili semine. »

<sup>2</sup> Parm. : « hoc est falsum. »

<sup>3</sup> Parm. : « quæ homo habere potest. »

tra hoc quod dicitur, quod « homo factus est. » Destruitur etiam error Nestorii, qui dixit Filium Dei unitum esse homini solum per inhabitationem. Sed hoc est falsum, quia tunc non esset homo, sed in homine : et quod sit homo, patet per Apostolum Philip. II, 7 : *Et habitu inventus ut homo*, Joan. VIII, 40 : *Quid queritis me interficere, hominem, qui veritatem vobis locutus sum, quam audivi a Deo?*

Possumus autem sumere ex his aliqua ad eruditionem. Primo enim confirmatur fides nostra. Si enim aliquis diceret aliqua de aliqua terra remota, et ipse non fuisset ibi, non crederetur ei sicut si ibi fuisset. Antequam ergo veniret Christus in mundum, Patriarchæ et Prophetae et Joannes Baptista dixerunt aliqua de Deo; sed tamen non ita crediderunt eis homines sicut Christo, qui fuit cum Deo, immo unum cum ipso : unde multum firma est fides nostra ab ipso Christo nobis tradita. Joan. I, 18 : *Deum nemo vidit unquam : unigenitus Filius qui est in sinu Patris, ipse enarravit.* Et inde est quod multa fidei secreta sunt manifesta nobis post adventum Christi, quæ ante occulta erant. Secundo ex iis elevatur spes nostra. Constat enim quod Dei Filius non pro parvo ad nos venit, sumens carnem nostram, sed pro magna utilitate nostra; unde fecit quoddam commercium, scilicet quod assumpsit corpus animatum, et de Virgine nasci dignatus est, ut nobis largiretur suam deitatem; et sic factus est homo, ut hominem faceret Deum. Roman. V, 2 : *Per quem habemus accessum per fidem in gratiam istam, in qua stamus et gloriamur in spe gloriæ filiorum Dei.* Tertio ex hoc accenditur caritas. Nullum enim est tam evidens divinæ caritatis indicium quam quod Deus creator omnium factus est creatura, Dominus noster factus est frater noster; Filius Dei factus est filius hominis. Joan. III, 16 : *Sic Deus dilexit mundum ut Filium suum unigenitum daret.* Et ideo ex hujus consideratione amor reaccendi debet et inflammari ad Deum. Quarto inducimur ad servandam puram animam nostram. In tantum enim natura nostra fuit nobilitata et exaltata ex conjunctione ad Deum, quod fuit ad consortium divinæ personæ suscepta : unde Angelus post incarnationem noluit sustinere quod beatus Joannes

adoraret eum, quod ante sustinuerat etiam a maximis Patriarchis. Ideo homo hujus exaltationem recolens et attendens, debet dedignari vilificare se et naturam suam per peccatum : ideo dicit beatus Petrus II Petri I, 4 : *Per quem maxima et pretiosa nobis promissa donavit, ut per hæc efficiamur divinæ consortes naturæ, fugientes ejus quæ in mundo est concupiscentiæ corruptionem.* Quinto ex his inflammatur desiderium nostrum ad perveniendum ad Christum. Si enim aliquis rex esset frater alicujus, et esset remotus ab eo, desideraret ille cujus frater esset rex, ad eum venire, et apud eum esse et manere : unde cum Christus sit frater noster, debemus desiderare esse cum eo et conjungi ei : Matth. XXIV, 28 : *Ubi-cumque fuerit corpus, illuc congregabuntur et aquilæ*; et Apostolus desiderium habebat dissolvi et esse cum Christo : quod quidem desiderium crescit in nobis considerando incarnationem ejus. Rogemus Dominum, etc.

## CAPUT VI.

*De articulo quinto : quæ bona proveniunt nobis per mortem Christi.*

*Passus sub Pontio Pilato, crucifixus, mortuus et sepultus (a).* Sicut necessarium est Christiano quod credat incarnationem Filii Dei, ita necessarium est quod credat passionem ejus et mortem : quia sicut dicit Gregorius, « nihil nobis nasci profuit, nisi redimi profuisset. » Hoc autem, scilicet quod Christus pro nobis est mortuus, ita est arduum quod vix potest intellectus noster capere; immo nullo modo cadit in intellectum nostro. Et hoc est quod dicit Apostolus Act. XII, 41 : *Opus operor ego in diebus vestris, opus quod non creditis, si quis enarraverit vobis*; et Habac. I, 5 : *Opus factum est in diebus vestris quod nemo credet cum narrabitur.* Tanta est enim gratia Dei et amor ad nos quod plus ipse fecit nobis quam suos possumus credere vel capere<sup>4</sup>. Sic tamen debemus credere quod Christus ita sustinuerit mortem quod Deitas mortua non sit; sed quod humana natura in ipso mortua sit. Non enim mortuus est secundum quod Deus erat, sed secundum quod homo :

<sup>4</sup> Parm. : « quam possumus intelligere. »

(a) Andreae attribuitur.

et hoc patet per duo <sup>1</sup> exempla. Unum est in nobis. Constat enim quod cum homo moritur, in separatione animæ a corpore non moritur anima, sed ipsum corpus, seu caro. Sic et in morte Christi non est mortua Divinitas, sed natura humana.

Sed si Judæi non occiderunt Divinitatem, videtur quod non magis peccaverunt quam si occidissent unum alium hominem. Ad hoc est dicendum quod dato quod rex esset indutus una veste, si quis inquinaret vestem illam, tantum reatum incurreret ac si ipsum regem inquinasset. Judæi <sup>2</sup> autem licet non possent Deum interficere, tamen humanam naturam a Christo assumptam occidentes, sunt tantum puniti ac si ipsam Divinitatem occidissent. Aliud exemplum <sup>3</sup> : sicut dictum est superius, Filius Dei est Verbum Dei, et Verbum Dei incarnatum est sicut verbum regis scriptum in charta. Si igitur aliquis dilaniaret chartam regis, pro tanto haberetur ac si dilaniaret verbum regis. Et ideo tanto habetur peccatum Judæorum ac si occidissent Verbum Dei.

Sed quæ necessitas ut Verbum Dei pateretur pro nobis? Magna : et potest colligi duplex necessitas. Una est ad remedium contra peccata, alia est ad exemplum quantum ad agenda. Ad remedium quidem, quia contra omnia mala quæ incurrimus per peccatum, invenimus remedium per passionem Christi. Incurrimus autem quinque mala <sup>4</sup> per peccatum. Primo maculam : homo enim cum peccat, deturpat animam suam : quia sicut virtus animæ est pulchritudo ejus, ita peccatum est macula ejus. Baruch iii, 10 : *Quid est, Israel, quod in terra inimicorum es... coinquinatus es cum mortuis?* Sed hoc removet passio Christi : nam Christus sua passione fecit balneum de sanguine suo, quo peccatores lavaret. Apoc. 1, 5 : *Lavit nos a peccatis in sanguine suo.* Lavatur autem anima sanguine Christi in baptismo, quia ex Christi sanguine virtutem habet regenerativam : et ideo cum aliquis se inquinat per peccatum, facit Christo injuriam, et magis peccat quam ante. Hebr. x, 28 : *Irritam quis faciens legem Moysi, sine ulla miseratione duobus vel*

*tribus testibus moritur; quanto magis putatis deteriora mereri supplicia qui Filium Dei conculcaverit, et sanguinem testamenti pollutum duxerit?* Secundo incurrimus offensam Dei. Nam sicut homo <sup>5</sup> carnalis diligit carnalem pulchritudinem, ita Deus spiritualem quæ est pulchritudo animæ. Quando ergo anima per peccatum inquinatur, Deus offenditur, et odio habet peccatorem. Sapient. xiv, 9 : *Odio sunt Deo impius et impietas ejus.* Sed Christi passio hoc removet, qui Deo Patri satisfacit pro peccato, pro quo ipse homo satisfacere non poterat; cujus caritas fuit major et obedientia quam peccatum primi hominis et prævaricatio. Rom. v, 10 : *Cum inimici essemus Deo, reconciliati sumus Deo per mortem Filii ejus.* Tertio incurrimus infirmitatem. Nam homo semel peccando credit postmodum a peccato posse continere; sed totum contrarium accidit : quia per primum peccatum debilitatur et fit pronior ad peccandum; et peccatum magis dominatur homini, et homo, quantum de se est, ponit se in tali statu ut non surgat, sicut qui in puteum se proiecit, nisi divina virtute relevetur <sup>6</sup>. Unde postquam homo peccavit, natura nostra fuit debilitata et corrupta; et tunc homo fuit pronior ad peccandum. Sed Christus hanc infirmitatem et debilitatem diminuit, licet non totam deleverit; tamen ita est homo ex Christi passione confortatus, et peccatum debilitatum, quod non tantum dominatur ei; et potest homo conari adjutus gratia Dei, quæ confertur in sacramentis, quæ ex Christi passione efficaciam habent, ita quod potest resilire a peccatis. Apostolus Rom. vi, 6 : *Vetus homo noster simul crucifixus est, ut destruat corpus peccati.* Nam ante passionem Christi pauci inventi sunt sine peccato mortali viventes; sed post sine peccato mortali multi vixerunt et vivunt. Quarto incurrimus reatum pœnæ : hoc enim exigit justitia Dei, ut quicumque peccat, puniatur. Pœna autem pensatur ex culpa. Unde cum culpa peccati mortalis sit infinita, utpote contra bonum infinitum, scilicet Deum cujus præcepta peccator contemnit; pœna debita peccato mortali est infinita. Sed Christus per suam passionem abstulit nobis pœnam hanc, et sustinuit ipse. I

<sup>1</sup> Parm. : « tria. »

<sup>2</sup> Parm. : « ideo Judæi. »

<sup>3</sup> Parm. : « item. »

<sup>4</sup> Parm. omittit : « per peccatum. »

<sup>5</sup> Parm. omittit : « homo. »

<sup>6</sup> Parm. omittit : « relevetur. »



Petr. II, 24 : *Peccata nostra* idest pœnam peccati, *pertulit in corpore suo*. Nam passio Christi fuit tantæ virtutis quod sufficit ad expiandum omnia peccata totius mundi, etiã si essent centum millia. Et inde est quod baptizati ab omnibus peccatis laxantur : inde est etiam quod sacerdos peccata dimittit : inde est etiam quod quicumque magis passioni Christi se conformat et ad ipsam afficitur<sup>1</sup>, majorem consequitur veniam, et plus meretur de gratia. Quinto incurrimus exilium regni : Nam qui offendunt reges, exulare coguntur a regno : sic et homo propter peccatum expellitur de paradiso. Inde est quod Adam statim post peccatum est ejectus de paradiso, et clausa est janna paradisi. Sed Christus sua passione jannam illam aperuit, et ad regnum exules revocavit. Aperto enim latere Christi, aperta est janna paradisi ; et fuso sanguine ejus, deleta est macula, placatus est Deus, ablata est debilitas, expiata est pœna, exules revocantur ad regnum : et inde est quod statim latroni dicitur Luc. xxiii, 43 : *Hodie mecum eris in paradiso*. Hoc non est dictum olim : non enim dictum fuit alicui, non Adæ, non Abrahamæ, non David : sed hodie, scilicet quando aperta est janua, latro veniam petit et invenit. Hebr. x, 19 : *Habentes fiduciam in introitu sanctorum in sanguine Christi*. Sic ergo patet utilitas ex parte remedii. Sed non minor est utilitas vel necessitas<sup>2</sup> quantum ad exemplum. Nam, sicut dicit beatus Augustinus, passio Christi sufficit ad informandum totaliter vitam nostram. Quicumque enim vult perfecte vivere, nihil aliud faciat nisi quod contemnat quæ Christus in cruce contempsit, et appetat quæ Christus appetiit. Nullum enim exemplum virtutis abest a cruce. Si enim quæras exemplum caritatis, *majorem caritatem nemo habet ut animam suam ponat quis pro amicis suis*, Joan. xv, 1 ; et hoc in cruce fecit Christus. Et ideo si pro nobis animam suam dedit, non debet nobis esse grave quæcumque mala sustinere pro ipso. Psalm. cxv, 12 : *Quid retribuam Domino pro omnibus quæ retribuit mihi?* Si quæris exemplum pa-

tientiæ, excellentissima in cruce invenitur. Patientia enim ex duobus magna ostenditur : aut cum quis magna patienter suffert, aut cum ea suffert quæ vitare posset, et non vitat. Christus autem magna in cruce pertulit. Thren. I, 12. *O vos omnes qui transitis per viam, attendite, et videte si est dolor sicut dolor meus ;* et patienter, quia, *cum pateretur, non comminabatur*, I Petr. II, 23 ; et Isai. LIII, 7 : *Sicut ovis ad occisionem ducetur, et quasi agnus coram tondente se obmutescet*. Item vitare potuit, et non vitavit. Matth. xxvi, 53 : *An putas quia non possum rogare Patrem meum, et exhibebit mihi modo plusquam duodecim legiones Angelorum?* Patientia<sup>3</sup> igitur Christi in cruce fuit maxima. Hebr. xii, 1 : *Per patientiam curramus ad propositum nobis certamen, aspicientes in auctorem fidei et consummatorem Jesum, qui, proposito sibi gaudio sustinuit crucem confusione contempta*. Si quæris exemplum humilitatis, respice crucifixum : nam Deus judicari voluit sub Pontio Pilato, et mori. Job xxxvi, 17 : *Causa tua quasi impij judicata est*. Vere impij : quia, *morte turpissima condemnatus eum*, Sap. II, 20. Dominus pro servo, et vita Angelorum pro homine mori voluit. Philip. II, 8 : *Factus est obediens usque ad mortem*. Si quæris exemplum obedientiæ, sequere eum qui factus est obediens Patri usque ad mortem. Rom. v, 19 : *Sicut per inobedientiam unius hominis peccatores constituti sunt multi : ita per unius obedientiam, justi constituentur multi*. Si quæris exemplum contemnendi terrena, sequere eum qui est Rex regum et Dominus dominantium, in quo sunt thesauri sapientiæ : in cruce tamen nudatum, illusum, consputum, cæsum, spinis coronatum, et felle et aceto potatum, et mortuum. Falso enim afficeris<sup>4</sup> ad vestes, et ad divitias : *diviserunt sibi vestimenta mea*, Psalm. xxi, 19 : falso ad honores, quia ego ludibria et verbera expertus sum : falso ad dignitates, quia *plectentes coronam de spinis imposuerunt capiti meo* : falso ad delicias quia *in siti mea putaverunt me aceto*<sup>5</sup>.

<sup>1</sup> Parm. omittit : « et ad ipsam afficitur. »

<sup>2</sup> Parm. omittit : « vel necessitas. »

<sup>3</sup> Parm. : « magna est ergo Christi patientia in cruce. »

<sup>4</sup> Parm. : « igitur non afficiaris... non,... non etc. »

<sup>5</sup> Textus sequens Aug. a Parm. editus in Codd. deest : « Augustinus super illud Hebræor. xii : Qui proposito sibi gaudio sustinuit crucem, confusione contempta : « Omnia bona terrena contempsit homo Christus Jesus ut contemnenda monstraret. »

## CAPUT VII.

*De sexto articulo : propter quæ Christus voluit secundum animam ad inferos descendere, et quæ bona nobis inde proveniunt.*

*Descendit ad inferos (a).* Sicut dictum est, mors Christi fuit in separatione animæ a corpore, sicut et aliorum hominum; sed Divinitas ita insolubiliter juncta fuit homini Christo quod licet anima et corpus separarentur ab invicem, ipsa tamen Deitas perfectissime semper et animæ et corpori affuit; et ideo in sepulcro cum corpore fuit Filius Dei, et ad inferos cum anima descendit. Sunt autem quatuor rationes quare Christus cum anima ad infernum descendit. Prima ut sustineret totam pœnam peccati, ut sic totam culpam expiaret. Pœna autem peccati hominis non solum erat mors corporis, sed etiam erat pœna in anima : quia et peccatum erat quantum ad animam<sup>1</sup>. Et ideo post mortem descendebant omnes, etiam sancti patres, ante Christi adventum ad infernum. Ut ergo Christus<sup>2</sup> perfecte sustineret perfectam pœnam peccatoribus debitam, voluit non solum mori, sed etiam secundum animam ad infernum descendere. Sed<sup>3</sup> aliter Christus descendit ad inferos, et aliter antiqui Patres; nam antiqui Patres cum necessitate, et sic violenter adducti sunt et detenti. Christus vero cum potestate et voluntate propria. Unde Psalm. LXXXVII, 5 : *Æstimatus sum cum descendentibus in lacum : factus sum sicut homo sine adjutorio inter mortuos liber.* Alii enim erant ibi ut servi, sed Christus ut liber. Secunda ratio est ut perfecte subveniret suis amicis omnibus. Habebat enim amicos suos non solum in mundo, sed etiam in inferno. In hoc enim sunt aliqui amici Christi in quantum habent caritatem; in inferno autem multi erant qui cum caritate et fide venturi decesserant; sicut Abraham, Isaac, Jacob, Moyses, David et alii justii et perfecti viri. Et quia Chris-

tus suos visitaverat in mundo, et eis subvenerat per mortem suam, voluit etiam visitare suos qui erant in inferno, et subvenire eis<sup>4</sup> Eccli. xxiv, 45 : *Penetrabo omnes inferiores partes terræ, et inspiciam omnes dormientes, et illuminabo omnes sperantes in Domino.* Tertia vero ratio est ut perfecte de diabolo triumpharet. Tunc enim perfecte triumphat aliquis de aliquo, quando non solum vincit eum in campo, sed etiam invadit eum usque in domum propriam, et aufert ei sedem regni<sup>5</sup>. Christus autem triumphaverat contra diabolum, et in cruce vicerat eum : unde ait Joan. xii, 31 : *Nunc judicium est mundi, nunc princeps hujus mundi (scilicet diabolus) ejicietur foras.* Et ideo ut perfecte triumpharet, voluit auferre sedem regni sui, et ligare eum in domo sua quæ est infernus. Et ideo descendit illuc, et diripuit omnia sua, et ligavit eum, et abstulit ei prædam suam. Coloss. ii, 15 : *Expolians principatus et potestates, traduxit confidenter, palam triumphans illos in semetipso.* Similiter etiam quia potestatem et possessionem acceperat Christus cœli et terræ, voluit etiam possessionem accipere inferni, ut sic, secundum Apostolum ad Philip. ii, 10 : *In nomine Jesu omne genu flectatur, cœlestium, terrestrium et infernorum.* Marc. ult. 17 : *In nomine meo dæmonia ejicient.* Quarta ratio et ultima est ut liberaret sanctos qui erant in inferno : Christus enim sicut voluit pati mortem ut liberaret viventes a morte; ita etiam voluit descendere ad infernum, ut liberaret eos qui erant ibi. Zach. ix, 11 : *Tu quoque in sanguine testamenti tui emisisti vinctos tuos de lacu, in quo non est aqua.* Osee xiii, 14 : *Ero mors tua, o mors; ero morsus tuus, inferne.* Licet enim mortem totaliter destruxerit Christus, infernum tamen non omnino destruxit, sed momordit; quia scilicet non omnes liberavit de inferno sed illos tantum qui erant sine peccato mortali, scilicet<sup>6</sup> sine peccato originali, a quo quantum ad personam liberati erant per circumcisionem : et<sup>7</sup> sine actuali vel ante circumcissionem, qui

<sup>1</sup> Parm. addit : « quia etiam ipsa anima puniebatur quantum ad carentiam visionis divinæ, pro qua abolenda nondum satisfactum erat. »

<sup>2</sup> Parm. : « Christus sustineret totam. »

<sup>3</sup> Parm. omittit : « Sed aliter Christus descendit ad inferos, et aliter antiqui Patres; nam antiqui Patres cum necessitate, et sic violenter ad-

ducti sunt et detenti; Christus vero cum potestate et voluntate propria. »

<sup>4</sup> Parm. addit : « descendendo ad eos. »

<sup>5</sup> Parm. addit : « et domum suam. »

<sup>6</sup> Parm. : « et similiter. »

<sup>7</sup> Parm. omittit : « et sine actuali. »

(a) Philippo attribuitur.

salvati erant in fide parentum fidelium, quantum ad eos qui non habebant usum rationis; vel per sacrificia, et in fide Christi venturi, quantum ad adultos<sup>1</sup>; sed erant ibi propter peccatum originale Adæ, a quo quantum ad naturam non potuerunt liberari nisi per Christum. Et ideo dimisit ibi<sup>2</sup> illos qui descenderunt cum peccato mortali, et pueros non baptizatos<sup>3</sup>; et ideo dicit: *Ero morsus tuus, inferne*. Sic ergo patet quod Christus descendit ad inferos, et propter quod.

Ex iis ad instructionem nostram possumus accipere quatuor. Primo spem firmam de Deo. Nam quantumcumque homo sit in afflictione, semper tamen debet sperare de Dei adiutorio, et in eo confidere. Nihil enim ita grave invenitur sicut esse in inferno. Si ergo Christus illos qui erant in inferno liberavit, multum debet quilibet, si est amicus Dei, confidere ut liberetur ab eo a quacumque angustia. Sap. x, 13: *Hæc (scilicet sapientia) venditum justum non dereliquit... descenditque cum illo in foveam, et in vinculis non dereliquit eum*. Et quia specialiter Deus juvat servos suos, multum debet esse securus ille qui servit Deo. Eccli. xxxiv, 16: *Qui timet Deum, nihil trepidabit, et non pavebit, quoniam ipse est spes ejus*. Secundo debemus concipere timorem, et propellere præsumptionem. Nam licet Christus passus sit pro peccatoribus, et ad infernum descenderit; non tamen liberavit omnes, sed illos tantum qui sine peccato mortali erant, ut dictum est. Illos vero qui in mortali decesserant, dimisit. Et ideo nullus qui eum peccato mortali illuc descendit, speret veniam. Sed tantum in inferno erit quantum sancti patres in paradiso, scilicet in æternum. Matth. xxv, 46: *Ibunt hi in supplicium æternum, justi autem in vitam æternam*. Tertio debemus habere sollicitudinem. Nam Christus descendit ad inferos pro salute nostra, et nos frequenter debemus solliciti esse illuc descendere, considerando scilicet pœnas illas, sicut faciebat ille sanctus Ezechias. dicens, Isai. xxxviii, 18: *Ego dixi: In dimidio dierum meorum vulum ad portas inferi*. Nam qui ibi frequenter per cogitationem descendit in vita, non des-

cendit de facili in morte: quia hujusmodi consideratio impedit<sup>4</sup> a peccato, et retrahit ab eodem. Videmus enim quod homines hujus mundi cavent sibi a maleficiis propter temporalem pœnam: quantum ergo magis debent sibi cavere propter pœnam inferni, quæ major est et quantum ad diurnitatem, et quantum ad acerbiteriam, et quantum ad multipliciteriam? Eccli. vii, 40: *Memorare novissima tua, et in æternum non peccabis*. Quarto provenit nobis ex hoc exemplum dilectionis. Christus enim descendit ad inferos, ut liberaret suos; et ideo debemus illuc descendere, ut subveniamus nostris. Ipsi enim nihil possunt; et ideo debemus eis subvenire qui sunt in purgatorio. Nimis esset durus qui non subveniret caro suo qui esset in carcere terreno: multo ergo magis est durus qui non subvenit amico qui est in purgatorio; cum nulla sit comparatio pœnarum mundi ad illas: Job xix, 21: *Miseremini mei, miseremini mei, saltem vos amici mei, quia manus Domini tetigit me*. II Machab. vii, 46: *Sanctu et salubris est cogitatio pro defunctis exorare ut a peccatis solvantur*. Subvenitur autem eis præcipue per tria, sicut dicit Augustinus: scilicet per missas, orationes et eleemosynas. Gregorius addit quartum, scilicet jejunium. Nec est mirum: quia etiam in mundo isto potest amicus satisfacere pro amico. Intelligendum est tamen hoc de illis qui sunt in purgatorio. Rogemus, etc.

## CAPUT VIII.

*De septimo articulo: Qualiter resurrectio Christi differt a resurrectione aliorum et quomodo per eam instruamur.*

*Tertia die resurrexit a mortuis (a)*. Duo sunt homini necessaria ad cognoscendum: scilicet gloria Dei, et pœna inferni. Nam per gloriam allecti<sup>5</sup>, et per pœnas territi, cavent sibi homines, et retrahuntur a peccatis. Sed hæc sunt valde difficilia homini ad cognoscendum. Unde de gloria dicitur Sapient. ix, 16: *Quæ in cœlis sunt quis investigabit?* Et

<sup>1</sup> Deest in cod. vel ante... adultos.

<sup>2</sup> Al. deest: « ibi. »

<sup>3</sup> Parm.: « incircumcisos pueros. » sume « baptizatos » pro: « lavatos, ablutos. »

<sup>4</sup> Parm.: « retrahit a peccato, » omisso: « impedita peccata. »

<sup>5</sup> Al.: « electi. »

(a) Thomæ attribuitur.

hoc quidem difficile est terrenis, quia, ut dicitur Joan. iii, 31 : *Qui de terra est, de terra loquitur* : sed non est difficile spiritualibus : quia *qui de cœlo venit, super omnes est*, ut dicitur ibidem. Et ideo Deus de cœlo descendit, et incarnatus est, ut doceret nos cœlestia. Erat etiam difficile cognoscere pœnas inferni. Sap. ii, 4 : *Non est qui agnitus sit reversus ab inferis*; et hoc dicitur in persona impiorum. Et hoc non potest modo dici : quia sicut descendit de cœlo ut doceret cœlestia, ita resurrexit ab inferis ut nos de inferis edoceret. Et ideo necesse est ut credamus quod non solum homo factus est, et mortuus, sed quod resurrexit a mortuis. Et ideo dicitur : « Tertia die resurrexit a mortuis. » Invenimus quod multi surrexerunt a mortuis, sicut Lazarus, et filius viduæ, et filia Archisynagogi. Sed resurrectio Christi differt a resurrectione istorum et aliorum in quatuor. Primo quantum ad causam resurrectionis : quia alii qui surrexerunt, non surrexerunt sua virtute, sed vel Christi, vel ad preces alicujus sancti; Christus vero resurrexit propria virtute, quia non solum erat homo, sed etiam Deus, et Divinitas Verbi nunquam separata fuit nec ab anima nec a corpore; et ideo corpus animam, et anima corpus, cum voluit resumpsit. I Joan. x, 48 : *Potestatem habeo ponendi animam meam, et potestatem habeo iterum sumendi eam*. Et licet mortuus fuerit, hoc non fuit ex infirmitate nec ex necessitate, sed virtute, quia sponte : et hoc patet, quia cum emisit spiritum, clamavit voce magna : quod alii morientes nequeunt, quia ex infirmitate moriuntur. Unde Centurio dixit Matth. xxvii, 54 : *Vere Filius Dei erat iste*. Et ideo sicut sua virtute posuit animam suam, ita sua virtute recepit eam : et ideo dicitur, quia « resurrexit, » et non quod fuerit suscitatus, quasi ab alio. Psal. iii, 6 : *Ego dormivi, soporatus sum, et exurrexi*. Nec est hoc contrarium ei quod dicitur Act. ii, 32 : *Hunc Jesum resuscitavit Deus* : nam et Pater resuscitavit eum, et Filius : quia eadem est virtus Patris et Filii. Secundo differt quantum ad vitam ad quam resurrexit : quia Christus ad vitam gloriosam et incorruptibilem : Apostolus Rom. vi, 4 : *Christus re-*

*surrexit a mortuis per gloriam Patris* : alii vero ad eandem vitam quam prius habuerant, sicut patet de Lazaro et de aliis. Tertio differt quantum ad fructum et efficaciam : quia virtute resurrectionis Christi resurgunt omnes Matth. xxviii, 52 : *Multa corpora sanctorum quæ dormierant, surrexerunt*. Apostolus I Corinth. xv, 20 : *Christus resurrexit a mortuis, primitiæ dormientium*. Sed vide quod Christus per passionem pervenit ad gloriam. Luc. xxiv, 26 : *Nomme sic oportuit pati Christum, et ita intrare in gloriam suam?* ut doceat nos qualiter ad gloriam pervenire possimus : Act. xiv, 24 : *Per multas tribulationes oportet nos intrare in regnum Dei*. Quarto differt quantum ad tempus : quia resurrectio aliorum differtur usque ad finem mundi <sup>1</sup> sed Christus resurrexit tertia die : ejus ratio est, quia resurrectio, et mors, et natiuitas Christi fuit propter nostram salutem, et ideo tunc voluit resurgere quando salus nostra perficeretur. Unde si statim resurrexisset, non fuisset creditum quod fuisset mortuus : item si multum distulisset, discipuli non remansissent in fide, et sic nulla utilitas fuisset in passione sua. Psalm. xxix, 10 : *Quæ utilitas in sanguine meo, dum descendo in corruptionem?* Et ideo die tertia resurrexit, ut crederetur mortuus, et ut discipuli fidem non amitterent.

Possimus autem ex his quatuor ad nostram eruditionem accipere. Primo ut studeamus resurgere spiritualiter a morte animæ, quam incurrimus per peccatum, ad vitam justitiæ, quæ habetur per pœnitentiam. Apostolus Ephes. v, 14 : *Surge qui dormis, et exurge a mortuis; et illuminabit te Christus*. Et hæc est resurrectio prima. Apocal. xx, 6 : *Beatus qui habet partem in resurrectione prima*. Secundo quod non differamus resurgere usque ad mortem, sed cito : quia Christus resurrexit tertia die. Eccl. v, 8 : *Ne tardes converti ad Dominum, et ne differas de die in diem* : quia non poteris cogitare quæ pertinent ad salutem infirmitate gravatus ; et quia etiam perdis partem omnium bonorum quæ fiunt in Ecclesia, et multa mala incurris ex perseverantia in peccato. Diabolus etiam quanto diutius possidet, tanto difficiliter dimittit, ut dicit

<sup>1</sup> Parm. addit : « nisi aliquibus ex privilegio ante concedatur, ut Beatæ Virgini, et ut pie creditur, beato Joanni Evangelistæ. » Et de facto S.

Thomas non tam facile admisisset resurrectionem B. Joannis Evangelistæ, de qua traditio firmitate caret.

Beda. Tertio ut resurgamus ad vitam incorruptibilem; ut scilicet non iterum moriamur, idest in tali proposito quod ultra non peccemus. Rom. vi, 9: *Christus resurgens ex mortuis, jam non moritur; mors illi ultra non dominabitur; et infra 11: Ita et vos existimate vos mortuos quidem esse peccato, viventes autem Deo in Christo Jesu. Non ergo regnet peccatum in vestro mortali corpore, ut obediatis concupiscentiis ejus; sed neque exhibeatis membra vestra arma iniquitatis peccato; sed exhibete vos Deo tanquam ex mortuis viventes.* Quarto ut resurgamus ad vitam novam et gloriosam; ut scilicet vitemus omnia quæ prius fuerant occasiones et causa mortis et peccati. Roman. vi, 4: *Quomodo Christus resurrexit a mortuis per gloriam Patris, ita et nos in novitate vitæ ambulemus.* Et hæc nova vita est vita justitiæ, quæ innovat animam, et perducit ad vitam gloriæ, ad quam etc.

#### CAPUT IX.

*De octavo articulo: Qualiter ascensio Christi sublimis, rationalis, et utilis.*

*Ascendit ad cælos, sedet ad dexteram Dei Patris Omnipotentis (a).* Post Christi resurrectionem oportet credere ejus ascensionem, qua in cælum ascendit die quadragesima: et ideo dicit: « Ascendit ad cælos. » Circa quod debes notare tria. Primo scilicet quod fuit sublimis, rationalis, et utilis. Sublimis quidem fuit, quia ascendit ad cælos. Et hoc tripliciter exponitur. Primo super omnes cælos corporeos. Apostolus Ephes. iv, 10: *Ascendit super omnes cælos.* Et hoc primo incipit in Christo: nam antea corpus terrenum non erat nisi in terra, intantum ut etiam Adam fuerit in paradiso terrestri. Secundo ascendit super omnes cælos spirituales, scilicet naturas spirituales. Ephes. i, 20: *Constituens Jesum ad dexteram suam in cælestibus super omnem Principatum et Potestatem et Virtutem et Dominationem, et omne nomen quod nominatur non solum in hoc sæculo, sed etiam in futuro; et omnia subjecit sub pedibus ejus.* Tertio ascendit usque ad sedem Patris. Dan. vii, 13:

*Ecce cum nubibus cæli quasi Filius hominis veniebat, et usque ad antiquum dierum pervenit: et Marc. ult. 19: Et Dominus quidem Jesus, postquam locutus est eis, assumptus est in cælum, et sedet a dextris Dei.* Non autem accipitur in Deo dextera corporaliter, sed metaphoricè: quia inquantum Deus, dicitur sedere ad dexteram Patris, idest ad æqualitatem Patris; inquantum homo, sedet ad dexteram Patris; idest in potioribus bonis. Hoc autem affectavit diabolus. Isa. xiv, 13: *In cælum conscendam, super astra Dei exaltabo solium meum: sedebo in monte testamenti, in lateribus aquilonis: ascendam super altitudinem nubium, similis ero Altissimo.* Sed non pervenit nisi Christus: ideo dicitur: « Ascendit in cælum, sedet ad dexteram Patris. » Psalm. cix, 1: *Dixit Dominus Domino meo: Sede a dextris meis.* Secundo Christi ascensio fuit rationalis, quia ad cælos: et hoc propter tria. Primo quia cælum debebatur Christo ex sua natura. Naturale enim est ut unumquodque revertatur unde trahit originem. Principium autem originis Christi est a Deo, qui est super omnia. Joan. xvi, 28: *Exivi a Patre, et veni in mundum: iterum relinquo mundum, et vado ad Patrem.* Joan. iii, 13: *Nemo ascendit in cælum, nisi qui descendit de cælo, Filius hominis qui est in cælo.* Et licet sancti in cælum ascendant, non tamen sicut Christus, quia Christus sua virtute, sancti vero tracti a Christo. Cant. 1, 3: *Trahe me post te.* Vel potest dici quia nemo ascendit in cælum nisi Christus: quia sancti non ascendunt nisi inquantum sunt membra Christi, qui est caput Ecclesiæ, Matth. xxiv, 28: *Ubi cumque fuerit corpus, illuc congregabuntur et aquilæ.* Secundo debebatur Christo cælum ex sua victoria. Nam Christus est in mundum missus ad pugnandum contra diabolum, et vicit eum; et ideo meruit exaltari super omnia. Apocal. iii, 21: *Ego vici, et sedi cum Patre meo in throno ejus.* Tertio ex sui humilitate. Nulla enim humilitas est ita magna sicut humilitas Christi, qui cum esset Deus, voluit fieri homo, et cum esset Dominus, voluit formam servi accipere, factus obediens usque ad mortem ut dicitur Phil. ii, et descendit usque ad infernum: et ideo meruit exaltari usque ad cælum ad sedem Dei: nam humilitas

(a) Bartholomeo adscribitur.



via est ad exaltationem : Luc. xiv, 11 : *Qui se humiliat, exaltabitur* : Ephes. iv, 10 : *Qui descendit, ipse est et qui ascendit super omnes cœlos*. Tertio Christi ascensio fuit utilis ; et hoc quantum ad tria. Primo quantum ad ductum : nam ad hoc ascendit ut nos duceret <sup>1</sup> : nos enim nesciebamus viam, sed ipse ostendit. Mich. ii, 13 : *Ascendit, iter pandens ante eos* : et ut nos securos redderet de possessione regni cœlestis. Joan. xiv, 2 : *Vado parare vobis locum*. Secundo quantum ad securitatem : ad hoc enim ascendit ut interpellaret pro nobis. Hebr. vii, 25 : *Accedens per semetipsum ad Deum, semper vivens ad interpellandum pro nobis*. I Joan. ii, 1 : *Advocatum habemus apud Patrem Jesum Christum*. Tertio ut ad se corda nostra traheret. Matth. vi, 21 : *Ubi est thesaurus tuus, ibi est et cor tuum* : ut contemnamus temporalia. Apostolus Coloss. iii, 1 : *Si consurrexistis cum Christo, quæ sursum sunt quærite ubi Christus est in dextera Dei sedens ; quæ sursum sunt sapite, non quæ super terram*.

## CAPUT X.

*De nono articulo : quæ consideranda circa judicem, judicium et judicandos, et quæ remedia habent.*

*Inde venturus est judicare vivos et mortuos (a)*. Ad officium regis et Domini spectat judicare. Proverb. xx, 8 : *Rex qui sedet in solio judicii, dissipat omne malum intuitu suo*. Quia ergo Christus ascendit in cœlum, et sedet ad dexteram Dei sicut Dominus omnium, manifestum est quod spectat ad eum judicium : et ideo in regula catholicæ fidei confitemur quod « venturus est judicare vivos et mortuos. » Hoc etiam dixerunt Angeli Actor. i, 11 : *Hic Jesus, qui assumptus est a vobis in cœlum, sic veniet quemadmodum vidistis eum euntem in cœlum*. Sunt autem tria consideranda de hoc judicio. Primum est forma judicii ; secundum timor judicii <sup>2</sup> ; tertium præparatio ad judicium. Quo ad formam judicii tria concurrunt : scilicet quis sit judex, qui judicandi, et de quibus sit. Christus autem est judex.

<sup>1</sup> Al. additur : « sicut resurrexit ut nos resurgere faceret, ita ascendit ut nos duceret. »

<sup>2</sup> Parm. : « secundum est quod judicium hoc est timendum ; tertium est qualiter præparemus

Act. x, 42 : *Ipse est qui constitutus est a Deo judex vivorum et mortuorum* : sive accipiamus per mortuos peccatores, et per vivos recte viventes ; sive per vivos ad litteram illos qui tunc vivent, et per mortuos omnes qui mortui sunt. Est autem judex non solum in quantum Deus, sed etiam in quantum homo : et hoc propter tria. Primo quia necessarium est ut judicandi judicem videant. Divinitas autem est ita delectabilis quod nullus potest sine gaudio eam videre : et ideo nullus damnatus poterit eam videre, quia tunc gauderet. Et ideo necesse est ut appareat in forma hominis, ut ab omnibus videatur. Joan. v, 27 : *Potestatem dedit ei judicium facere, quia Filius hominis est*. Secundo quia ipse meruit hoc officium, secundum quod homo ; ipse enim secundum quod homo, fuit injuste judicatus, et ex hoc Deus fecit eum judicem totius mundi. Job. xxxvi, 17 : *Causa tua quasi impii judicata est : causam judiciumque recipies*. Tertio ut cesset desperatio ab hominibus <sup>3</sup>, si ab homine judicantur. Si enim solus Deus judicaret, homines terri desperarent Luc. xxi, 27 : *Videbunt Filium hominis venientem in nube*. Judicandi vero sunt omnes qui sunt, fuerunt et erunt. Apostolus, II Corinth. v, 10 : *Omnes nos manifestari oportet ante tribunal Christi, ut referat unusquisque propria corporis, prout gessit, sive bonum sive malum*. Est autem, sicut dicit Gregorius, quadruplex differentia inter judicandos. Aut enim judicandi sunt boni, aut mali. Malorum autem quidam condemnabuntur, sed non judicabuntur ; sicut infideles ; quorum facta non discutientur, quia *qui non credit jam judicatus est*, ut dicitur Joan. iii, 18. Quidam vero condemnabuntur et judicabuntur, sicut fideles, qui decesserunt eum peccato mortali. Apostolus Rom. vi, 23 : *Stipendia peccati mors*, non enim excludentur a judicio propter fidem quam habuerunt. Bonorum etiam quidam salvabuntur et non judicabuntur, pauperes scilicet spiritu propter Deum ; quinimmo alios judicabunt. Matth. xix, 28 : *Vos qui secuti estis me, in regeneratione, cum sederit Filius hominis in sede majestatis suæ, sedebitis et vos super sedes duodecim judicantes duodecim tribus Is-*

nos ad hoc judicium. »

<sup>3</sup> Al. : « ut esset desperatio ab omnibus. »

(a) Matthæo adscribitur.

*rael* : quod quidem non solum intelligitur de discipulis, sed etiam de omnibus pauperibus; alias Paulus, qui plus aliis laboravit, non esset de numero illorum : et ideo intelligendum est etiam de omnibus sequentibus Apostolos, et de apostolicis viris. Ideo Apostolus, I Corinth. vi, 3 : *An nescitis quoniam angelos judicabimus?* Isa. iii, 14 : *Dominus ad judicium veniet cum senibus populi sui et principibus ejus.* Quidam autem salvabuntur et judicabuntur, scilicet morientes in justitia. Licet enim in justitia decesserint, in occupatione tamen temporalium in aliquo lapsi sunt; et ideo judicabuntur sed salvabuntur; judicabuntur autem de omnibus factis bonis et malis. Eccl. xi, 9 : *Ambula in viis cordis tui, et scito quod pro omnibus his adducet te Deus in judicium.* Eccl. xii, 14 : *Omnia quæ fiunt, adducet Deus in judicium pro omni errato, sive bonum sive malum sit.* De verbis etiam otiosis. Matth. xii, 36 : *Omne verbum otiosum quod locuti fuerint homines, reddent rationem de eo in judicium.* De cogitationibus. Sap. i, 9 : *In cogitationibus impij interrogatio erit.* Et sic patet forma judicii.

Est autem judicium illud timendum propter quatuor. Primo propter judicis sapientiam; scit enim omnia, et cogitationes et locutiones et operationes : quoniam *omnia nuda et aperta sunt oculis ejus*, ut dicitur Hebr. iv, 13. Proverb. xvi, 2 : *Omnes viæ hominum patent oculis ejus.* Ipse etiam scit verba nostra. Sapient. 10 : *Auris zeli<sup>1</sup> audit omnia.* Item cogitationes nostras. Jerem. xvii, 9 : *Pravum est cor hominis et inscrutabile : quis cognoscet illud? Ego Dominus scrutans corda et probans renes, qui do unicuique juxta viam suam, et juxta fructum adinventum suarum.* Ibi erunt testes infallibiles, scilicet propriæ hominum conscientiæ. Apostolus Rom. ii, 15 : *Testimonium reddente illis conscientia ipsorum, et inter se invicem cogitationibus accusantibus, aut etiam defendentibus in die cum judicabit Deus occulta hominum.* Secundo propter judicis potentiam, quia omnipotens est in se. Isa. xl, 10 : *Ecce Dominus Deus in fortitudine veniet.* Item omnipotens est in aliis, quia omnis creatura erit cum eo. Sap. v, 24 : *Pugnabit cum illo orbis terrarum con-*

*tra insensatos* : et ideo dicebat Job. x, 7 : *Cum sit nemo qui de manu tua possit eruere.* Psalm. cxxxviii, 8 : *Si ascendero in cælum, tu illic es; si descendero in infernum, ades.* Tertio propter judicis<sup>2</sup> inflexibilem justitiam. Nunc enim est tempus misericordiæ; sed tempus futurum erit solum tempus justitiæ : et ideo nunc est tempus nostrum, sed tunc erit solum tempus Dei. Psalm. lxxiv, 3 : *Cum accipero tempus, ego justitias judicabo.* Proverb. vi, 34 : *Zelus et furor viri non parcat in die vindictæ, nec acquiescet cujusquam precibus, nec suscipiet pro redemptione dona plurima.* Quarto propter judicis iram. Aliter enim apparebit justis, quia dulcis et delectabilis. Isa. xxxiii, 10 : *Regem in decore videbunt* : aliter malis, quia iratus et crudelis, intantum ut dicant montibus : *Cadite super nos, et abscondite nos ab ira Agni*, ut dicitur Apoc. vi, 16. Hæc autem ira non dicit in Deo commotionem animi, sed effectum iræ, pœnam scilicet peccatoribus inflictam, scilicet æternalem<sup>3</sup>. Origenes : « Quam angustæ erunt peccatoribus viæ in judicio ! Desuper erit judex iratus etc. »

Contra autem hunc timorem debemus quatuor habere remedia. Primum est bona operatio. Apostolus Rom. xiii, 3 : *Vis non timere potestatem? Bonum fac, et habebis laudem ex illa.* Secundum est confessio et pœnitentia de commissis : in qua tria debent esse : scilicet dolor in cogitatione, pudor in confessione, et acerbitas in satisfactione : quæ quidem expiant pœnam æternam. Tertium est elemosyna, quæ omnia mundat. Luc. xvi, 9 : *Facite vobis amicos de mammona iniquitatis, ut cum defeceritis, recipiant vos in æterna tabernacula.* Quartum est caritas, scilicet amor Dei et proximi : quæ quidem *caritas operit multitudinem peccatorum*, ut dicitur I Petr. iv, et Proverb. x.

## CAPUT XI.

### *De Spiritu sancto.*

*Credo in Spiritum sanctum (a).* — Sicut dictum est, Verbum Dei est Filius Dei, sicut verbum hominis dicitur conceptio

<sup>1</sup> Al. : « cœli. »

<sup>2</sup> Al. : « operis. »

<sup>3</sup> Al. : « In Lugdunensi editione an. 1562, omit-

tur hæc Origenis sententia, quæ deest in Cod. Mazar. 1060. »

(a) Jacobo Alphæi adscribitur.

mentis <sup>1</sup>. Sed quandoque homo habet verbum mortuum, scilicet quando homo cogitat quæ debet facere, sed tamen voluntas faciendi non adest ei; sicut quando homo credit et non operatur, *fides* ejus dicitur *mortua*, ut dicitur Jac. II. Verbum autem Dei est vivum. Heb. IV, 12 : *Vivus est sermo Dei* : et ideo necesse est quod Deus habeat secum voluntatem et amorem : unde Augustinus in lib. : *De Trin.*, « Verbum quod insinuare intendimus, cum amore notitia est. » Sicut autem Verbum Dei est Filius Dei, ita amor Dei est Spiritus sanctus. Et inde est quod tunc homo habet Spiritum sanctum, quando diligit Deum. Apostolus Rom. V, 5 : *Caritas Dei diffusa est in cordibus nostris per Spiritum sanctum, qui datus est nobis*. Sicut <sup>2</sup> autem Spiritus Dei nihil aliud est quam amor quo Deus se diligit et nos; ita in nobis est Spiritus sanctus quando diligimus Deum et proximum.

Fuerunt autem aliqui qui male sentientes de Spiritu sancto, dixerunt <sup>3</sup> quod erat creatura, et quod erat minor Patre et Filio, et quod erat servus et minister Dei. Et ideo sancti ad removendum hos errores addiderunt quinque verba in alio *Symbolo* de Spiritu sancto. Primum est, quod licet sint alii spiritus, scilicet Angeli, sunt tamen ministri Dei, secundum illud Apostoli Hebr. I, 14 : *Omnes sunt administratorii Spiritus* : sed Spiritus sanctus Dominus est : Joan. IV, 24 : *Spiritus est Deus*; et Apostolus, II Corinth. III, 17 : *Dominus autem Spiritus est* : et inde est quod *ubi est Spiritus Domini, ibi est libertas*, ut dicitur II Corinth. III. Cujus ratio est, quia facit diligere Deum, et auferit amorem mundi : et ideo dicitur : « In Spiritum sanctum Dominum. » Secundum est quia in hoc est vita animæ quod conjungitur Deo, cum ipse Deus sit vita animæ, sicut anima vita corporis. Deo autem conjungit Spiritus sanctus per amorem, quia ipse est amor Dei, et ideo vivificat. Joan. VI, 64 : *Spiritus est qui vivificat* : unde dicitur, « Et vivificantem. »

<sup>1</sup> Parm. : « est conceptio intellectus. »

<sup>2</sup> Parm. omittit : « Sicut autem spiritus... Deum et proximum. »

<sup>3</sup> In edit Romana an. 1570, et Venetis 1587, apud heredem Hieronymi Scoti, et 1593, apud Nicolinum habetur tantum : « dixerunt quod erat servus, et minister Dei. »

<sup>4</sup> Al. : « et de hoc. »

<sup>5</sup> Joan. IV, 23 : « Veri adoratores adorabunt Patrem in spiritu et veritate. » Matth. ult. 19,

Tertium est quod Spiritus sanctus est ejusdem substantiæ cum Patre et Filio : quia sicut Filius est Verbum Patris, ita Spiritus sanctus est amor Patris et Filii; et ideo procedit ab utroque : et sicut Verbum Dei est ejusdem substantiæ cum Patre, ita et amor cum Patre et Filio. Et ideo dicitur : « Qui ex Patre Filioque procedit. » Unde <sup>4</sup> et per hoc patet quod non est creatura. Quartum est quod est æqualis Patri et Filio quantum ad cultum <sup>5</sup>. Eph. *Nos autem qui sumus vera circumcisio*, Phil. II. *Nos sumus circumcisio qui Spiritu Deo servimus*, tamen græci libri, et antiquiores libri latini habent : *Qui Spiritui Deo servimus*, et ipso græco apparet quod de servitute latriæ intelligitur quæ soli Deo debetur; est igitur Spiritus sanctus verus Deus, cui latria debetur; ideo <sup>6</sup> dicitur : « Qui cum Patre et Filio simul adoratur. » Quintum, per quod manifestatur quod sit æqualis Deo, est quia sancti et Prophetæ Spiritu sancto inspirati <sup>7</sup> locuti sunt a Deo. Constat autem quod si Spiritus non esset Deus, non diceretur quod Prophetæ fuerint locuti de Deo per ipsum <sup>8</sup>. Sed Petrus dicit *Epist.* II, cap. I, 21, quod *Spiritu sancto inspirati locuti sunt sancti Dei homines*. Isa. XLVIII, 16 : *Dominus Deus misit me, et Spiritus ejus*. Unde hic dicitur : « Qui locutus est per Prophetas. »

Per hoc autem destruuntur duo errores : error scilicet Manichæorum, qui dixerunt quod vetus testamentum non erat a Deo : quod falsum est, quia per Prophetas locutus est Spiritus sanctus. Item error Priscillæ et Montani, qui dixerunt quod Prophetæ non sunt locuti a Spiritu sancto, sed quasi amentes.

Provenit autem nobis multiplex fructus a Spiritu sancto. Primo quia purgat a peccatis. Cujus ratio est, quia ejusdem est reficere cujus est constituere. Anima autem creatur per Spiritum sanctum, quia omnia per ipsum facit Deus : Deus enim diligendo suam bonitatem creavit <sup>9</sup> omnia. Sapient. XI, 25 : *Diligis omnia*

« Doce omnes gentes, baptizantes eos in nomine Patris et Filii et Spiritus sancti. »

<sup>6</sup> Illic Parm. textui a S. Thoma allegato textum alterum substituit; nec bene; nam ex authentica allegatione conjici posset Thomam Græci idiomatis non penitus forsitan fuisse ignarum.

<sup>7</sup> Parm. omittit : « Spiritu sancto inspirati. »

<sup>8</sup> Parm. : « ab eo. »

<sup>9</sup> Parm. : « causat. »

quæ sunt, et nihil odisti eorum quæ fecisti. Dionysius in iv cap. *De divinis nominibus*. « Divinus amor non permisit eum sine germinè esse. » Oportet ergo quod corda hominum per peccatum destructi reficiantur a Spiritu sancto. Psalm. ciii, 30 : *Emitte Spiritum tuum et creabuntur, et renovabis faciem terræ*. Nec mirum si Spiritus purgat, quia omnia peccata dimittuntur per amorem : Luc. vii, 47 : *Dimissa sunt ei peccata multa, quoniam dilexit multum*. Proverb. x, 12 : *Universa delicta operit caritas*; item I Pet. iv, 8 : *Caritas operit multitudinem peccatorum*. Secundo illuminat intellectum, quia omnia quæ scimus, Spiritu sancto scimus. Joan. xiv, 26 : *Paraclytus autem Spiritus sanctus, quem mittet Pater in nomine meo, ille vos docebit omnia, et suggeret vobis omnia quæcumque dixerò vobis*. Item I Joan. xi, 27 : *Unctio docebit vos de omnibus*. Tertio juvat, et quodammodo cogit servare mandata. Nullus enim posset servare mandata Dei, nisi amaret Deum : Joan. xiv, 23 : *Si quis diligit me, sermonem meum servabit*. Spiritus ergo <sup>1</sup> sanctus facit amare Deum. Ezech. xxxvi, 26 : *Dabo vobis cor novum, et spiritum novum ponam in medio vestri; et auferam cor lapideum de carne vestra : et dabo vobis cor carneum, et spiritum meum ponam in medio vestri; et faciam ut in præceptis meis ambuletis, et iudicia mea custodiatis et operemini*. Quarto confirmat spem vitæ æternæ, quia est sicut pignus hereditatis illius. Apostolus Ephes. i, 13 : *Signati estis Spiritu promissionis sancto, qui est pignus hereditatis nostræ*. Est enim quasi arrha vitæ æternæ. Cujus ratio est, quia ex hoc debetur vita æterna homini, in quantum efficitur filius Dei; et hoc fit per hoc quod fit similis Christo; assimilatur autem aliquis Christo per hoc quod habet Spiritum Christi, qui est Spiritus sanctus. Apostolus Rom. viii, 15 : *Non enim accepistis spiritum servitutis iterum in timore; sed accepistis Spiritum adoptionis filiorum, in quo clamamus, Abba, pater. Ipse enim Spiritus testimonium reddit spiritui nostro quod sumus filii Dei*; et Gal. iv, 6 : *Quoniam autem estis filii Dei, misit Deus Spiritum Filii sui in corda vestra, clamantem, Abba, pater*. Quinto consulit <sup>2</sup> quæ sit voluntas

Dei. Apoc. ii, 7 : *Qui habet aures audiendi, audiat quid Spiritus dicat Ecclesiis*. Isai. i, 4 : *Audiam eum quasi magistrum*.

## CAPUT XII.

*De undecimo articulo. Quod Ecclesia est una, sancta, catholica, id est universalis, firma.*

*Sanctam Ecclesiam catholicam* (a).—Sicut videmus quod in uno homine est una anima et unum corpus, et tamen sunt diversa membra ipsius; ita Ecclesia catholica est unum corpus, et habet diversa membra. Anima autem quæ hoc corpus vivificat, est Spiritus sanctus. Et ideo post fidem de Spiritu sancto, jubemur credere sanctam Ecclesiam catholicam : unde additur in *Symbolo* : « sanctam Ecclesiam catholicam. »

Circa quod sciendum est, quod Ecclesia est idem quod congregatio. Unde Ecclesia sancta idem est quod congregatio fidelium; et quilibet Christianus est sicut membrum ipsius Ecclesiæ, de qua dicitur Eccli. ult. 31. *Appropiate ad me indocti, et congregate vos in domum disciplinæ*. Hæc autem Ecclesia sancta habet quatuor condiciones : quia est una, quia est sancta, quia est catholica, id est universalis, et quia est fortis et firma.

Quantum ad primum sciendum est, quod licet diversi hæretici diversas sectas adinvenerint, non tamen pertinent ad Ecclesiam, quia sunt divisi in partes : sed Ecclesia est una. Cant. vi, 8 : *Una est columba mea, perfecta mea*. Causatur autem unitas Ecclesiæ ex tribus. Primo ex unitate fidei : omnes enim Christiani qui sunt de corpore Ecclesiæ, idem credunt : I Corinth. i, 10 : *Idipsum dicatis omnes, et non sint in vobis schismata* : et Ephes. iv, 10 : *Unus Deus, una fides, unum baptisma*. Secundo ex unitate spei, quia omnes firmati sunt in una spe perveniendi ad vitam æternam : et ideo dicit Apostolus Ephes. iv, 4 : *Unum corpus et unus spiritus, sicut vocati estis in una spe vocationis vestræ*. Tertio ex unitate caritatis, quia omnes connectuntur in amore Dei, et ad invicem in amore

<sup>1</sup> Parm. : « autem. »

<sup>2</sup> Parm. : « in dubiis, et docet nos. »

(a) Simoni adscribitur.

mutuo. Joan. xvii, 22 : *Claritatem quam dedisti mihi, dedi eis, ut sint unum, sicut et nos unum sumus.* Manifestatur autem hujusmodi amor si verus est, quando membra pro se invicem sunt sollicita, et quando invicem compatiuntur<sup>1</sup>. Cor. xii. : *Non sit schisma in corpore; sed idipsum invicem sollicita sint membra; et si quid patitur unum, etc.* : quia quilibet de gratia sibi collata a Deo, debet proximo servire : unde nullus debet contemnere, nec pati ab ista Ecclesia abjici et expelli; quia non est nisi una Ecclesia in qua homines salventur, sicut extra arcam Noe nullus salvari potuit.

Circa secundum sciendum, quod est etiam alia congregatio, sed malignantium : Psalm. xxv, 5 : *Odium ecclesiam malignantium.* Sed hæc est mala, Ecclesia vero Christi est sancta : Apostolus I Corinth. iii, 17 : *Templum Dei sanctum est, quod estis vos* : unde dicitur : « Sanctam Ecclesiam. » Sanctificantur autem fideles hujus congregationis ex tribus<sup>2</sup> quæ inveniuntur in ea, vel fiunt in Ecclesia materialiter quando consecratur : primo ex lotione, quia sicut Ecclesia cum consecratur<sup>3</sup> lavatur, ita et fideles loti sunt sanguine Christi Apocal. i, 5 : *Dilexit nos, et lavit nos a peccatis nostris in sanguine suo*; Hebr. xiii, 12 : *Jesus, ut sanctificaret per suum sanguinem populum, extra portam passus est.* Secundo ex inunctione : quia sicut Ecclesia inungitur, sic et fideles spirituali inunctione unguuntur, ut sanctificentur : alias non essent Christiani : Christus enim idem est quod unctus. Hæc autem unctio est gratia Spiritus sancti. II Corinth. i, 21 : *Qui unxit nos, Deus*; et I Corinth. vi, 11 : *Sanctificati estis in nomine Domini nostri Jesu Christi.* Tertio ex inhabitatione<sup>4</sup>, nam ubicumque Deus inhabitat, locus ille sanctus est : unde Genes. xxviii, 16 : *Vere locus iste sanctus est* : et Psalm. xcii, 5 : *Domum tuam decet sanctitudo, Domine.* Quarto potest addi ex invocatione. Jerem. xiv, 9 : *Tu autem in nobis es, Domine, et nomen tuum invocatum est super nos.* Cavendum est ergo ne post talem sanctificationem polluamus animam nostram,

quæ templum Dei est, per peccatum. Apostolus I Corinth. iii, 17 : <sup>5</sup> *Nescitis quia templum Dei estis, et spiritus habitat in vobis. Siquis autem templum Dei violaverit, disperdet illum Dominus.*

Circa tertium sciendum est, quod Ecclesia est catholica, idest universalis, primo quantum ad locum, quia est per totum mundum, contra Donatistas. Nam<sup>6</sup> Ecclesia est congregatio fidelium; fideles autem sunt per totum mundum; ergo et Ecclesia. Rom. i, 8 : *Fides vestra annuntiatur in universo mundo*; Marc. ult. 15 : *Euntes in mundum universum, prædicate Evangelium omni creaturæ.* Antiquitus<sup>7</sup> enim Deus erat notus tantum in Judæa, nunc autem per totum mundum. Habet autem hæc Ecclesia tres partes. Una est in terra, alia est in cælo, tertia est in purgatorio. Secundo est universalis quantum ad conditionem hominum, quia nullus abjicitur, nec dominus, nec servus, nec masculus, nec femina : Gal. iii, 28 : *Non est masculus, neque femina.* Tertio est universalis quantum ad tempus. Nam aliqui dixerunt, quod Ecclesia debet durare usque ad certum tempus. Sed hoc est falsum : quia hæc Ecclesia incepit a tempore Abel, et durabit usque ad finem sæculi : Matth. ult., ult. : *Ecce ego vobiscum sum omnibus diebus usque ad consummationem sæculi* : sed post consummationem sæculi remanebit in cælo.

Circa quartum sciendum est, quod Ecclesia est firma. Domus autem dicitur firma, primo si habet bona fundamenta. Fundamentum autem Ecclesiæ principale est Christus. Apostolus I Corinth. iii, 11 : *Fundamentum aliud nemo potest ponere præter id quod positum est, quod est Christus Jesus.* Secundarium vero fundamentum sunt Apostoli, et eorum doctrina; et ideo firma est : unde in Apoc. xxi, 14 : dicitur, quod civitas habebat *duodecim fundamenta*, et erant ibi scripta *nomina duodecim Apostolorum.* Et inde est quod dicitur Ecclesia apostolica. Exiunde etiam est quod ad significandum firmitatem hujus Ecclesiæ B. Petrus dicitur est vertex. Secundo apparet firmitas

<sup>1</sup> Parm. : « Ephes. iv, 15 : « in caritate crescimus in illo per omnia qui est caput Christus : ex quo totum corpus connexum et compactum per omnem juncturam subministrationis secundum operationem in mensuram uniuscujusque membri, augmentum corporis facit in ædificationem sui in caritate. »

<sup>2</sup> Parm. : « ex tribus. Primo. »

<sup>3</sup> Parm. addit : « materialiter. »

<sup>4</sup> Parm. addit : « Trinitatis. »

<sup>5</sup> Parm. omittit : « nescitis quia... siquis autem. »

<sup>6</sup> Parm. omittit : « nam Ecclesia... et ecclesia.

<sup>7</sup> Parm. : « unde antiquitus. »



domus, si concussa <sup>1</sup> non cadat. Ecclesia autem nunquam potuit <sup>2</sup> destrui: nec a persecutoribus; immo persecutionibus durantibus magis crevit, et qui eam persequerentur, et quos ipsa persequeretur, deficiebant: Matth. xxi, 44: *Qui ceciderit super lapidem istum, confringetur; super quem vero ceciderit, conteret eum*: nec ab erroribus; immo quanto magis errores supervenerunt, tanto magis veritas manifestata est: II Tim. iii, 8: <sup>3</sup> *Quemadmodum Iannes et Mambres restiterunt magis, ita et hi resistunt veritati. Homines mente corrupti, reprobi circa fidem; sed ultra non proficient; Insipientia <sup>4</sup> enim illorum manifesta erit omnibus, sicut et illorum fuit*; <sup>5</sup> nec a tentationibus demonum: Ecclesia enim est sicut turris, ad quam fugit quicumque pugnat contra diabolum: Proverb. xviii, 10: *Turris fortissima nomen Domini*. Et ideo diabolus principaliter conatur ad destructionem ejus; sed non prevaleat, quia Dominus dixit Matth. xvi, 19: *Et portæ inferi non prevalebunt adversus eam*; quasi dicat: Bellabunt adversum te, sed non prevalebunt. Et inde est quod sola Ecclesia Petri (in cujus partem venit tota Italia, dum discipuli mitterentur ad prædicandum) semper fuit firma in fide: et cum in aliis partibus vel nulla fides sit, vel sit commixta multis erroribus, Ecclesia tamen Petri et fide viget, et ab erroribus munda est. Nec mirum: quia Dominus dixit Petro Luc. xxii, 32: *Ego rogavi pro te, Petre, ut non deficiat fides tua*.

### CAPUT XIII.

*De articulo duodecimo: qualiter septem sacramenta sunt necessaria.*

*Sanctorum communionem, remissionem peccatorum (a)*. Sicut in corpore naturali operatio unius membri cedit in bonum totius corporis, ita in corpore spirituali, scilicet Ecclesia. Et quia omnes fideles sunt unum corpus, bonum unius alteri communicatur. Apostolus Rom. xii, 5: *Singuli autem alter alterius membra*. Unde et inter alia credenda quæ tradiderunt

Apostoli, est quod communicatio bonorum sit in Ecclesia; et hoc est quod dicitur, « Sanctorum communionem. » Inter alia vero membra Ecclesiæ, principale membrum est Christus, quia est caput. Ephes. i, 22: *Ipsam dedit caput super omnem Ecclesiam, quæ est corpus ipsius*. Bonum ergo Christi communicatur omnibus Christianis, sicut virtus capitis omnibus membris; et hæc communicatio fit per sacramenta Ecclesiæ, in quibus operatur virtus passionis Christi, quæ operatur ad conferendam gratiam in remissionem peccatorum. Hujusmodi autem sacramenta Ecclesiæ sunt septem. Primum est baptismus, qui est regeneratio quædam spiritualis. Sicut enim vita carnalis non potest haberi nisi homo carnaliter nascatur: ita vita spiritualis, vel gratiæ, non potest haberi nisi homo renascatur spiritualiter. Hæc autem generatio fit per baptismum: Joan. iii, 5: *Nisi quis renatus fuerit ex aqua et Spiritu sancto, non potest introire in regnum Dei*. Et est sciendum quod sicut homo non nascitur nisi semel, sic et semel tantum baptizatur: unde et sancti addiderunt: « Confiteor unum baptisma. » Virtus autem baptismi est quod purgat ab omnibus peccatis et quantum ad culpam et quantum ad penam: et inde est quod nulla penitentia imponitur baptizatis, quantumcumque fuerint peccatores; et si statim moriantur post baptismum, immediate evolvant in vitam æternam. Inde est etiam quod licet soli sacerdotes ex officio baptizent, ex necessitate tamen cuilibet licet baptizare, servata tamen forma baptismi quæ est. « Ego te baptizo in nomine Patris et Filii et Spiritus sancti. » Sumit autem hoc sacramentum virtutem a passione Christi: Rom. vi, 3: *Quicumque baptizati sumus in Christo Jesu, in morte ipsius baptizati sumus*. Et inde est quod sicut Christus fuit tribus diebus in sepulchro, ita fit trina immersio in aqua. Secundum sacramentum est confirmatio. Sicut enim in illis qui corporaliter nascuntur, necessariæ sunt vires ad operandum; ita spiritualiter renatis necessarium est robur Spiritus sancti <sup>5</sup> quod datur in hoc sacramento. Unde et Apostoli ad hoc quod essent fortes, recepe-

<sup>1</sup> Parm.: « conquassata. »

<sup>2</sup> Parm.: « potest destrui. »

<sup>3</sup> Parm. omittit: « quemadmodum... et illorum fuit. »

<sup>4</sup> Parm.: « insipientia, etc. »

<sup>5</sup> Parm. omittit: « quod datur in hoc sacramento. »

(a) Judæ Jacobi adscribitur.

runt Spiritum sanctum post ascensionem Christi : Luc. xxiv, 49 : *Vos autem sedete in civitate, quousque induamini virtute ex alto.* Unde<sup>1</sup> maxima plenitudo gratiæ Spiritus sancti confertur in sacramento confirmationis : et ideo illi qui habent curam puerorum, debent multum esse solliciti quod confirmentur, quia in confirmatione confertur magna gratia. Et si decedat, majorem habet gloriam confirmatus quam non confirmatus, quia hic habuit plus de gratia. Tertium sacramentum est eucharistia. Sicut enim in vita corporali, postquam homo natus est et vires sumpsit, necessarius est ei cibus, ut conservetur et sustentetur ; ita in via spirituali post habitum robor necessarius est ei cibus spiritualis, qui est corpus Christi. Joan. vi, 54 : *Nisi manducaveritis carnem Filii hominis et biberitis ejus sanguinem, non habebitis vitam in vobis.* Et ideo secundum ordinationem Ecclesiæ quilibet Christianus semel in anno debet recipere corpus Christi, digne tamen et munde : quia, ut dicitur I Corinth. xi, 29, *qui manducat et bibit indigne* scilicet cum conscientia peccati mortalis de quo non est confessus, nec proponit confiteri<sup>2</sup>, vel non proponit abstinere, iudicium sibi manducat et bibit. Quartum sacramentum est pœnitentia. Contingit enim in vita corporali quod quandoque quis infirmatur, et nisi habeat medicinam, moritur ; et ita in vita spirituali quis infirmatur per peccatum : unde necessaria est medicina ad recuperandam sanitatem ; et hæc est gratia quæ confertur in pœnitentiæ sacramento. Psalm. cii, 3 : *Qui propitiatur omnibus iniquitatibus tuis, qui sanat omnes infirmitates tuas.* In pœnitentia autem tria debent esse : contritio, quæ est dolor de peccato cum proposito abstinendi ; confessio peccatorum cum integritate ; et satisfactio quæ est per bona opera. Quintum sacramentum est extrema unctio. In hac enim vita sunt multa quæ impediunt, propter quæ homo non potest perfecte consequi purgationem a peccatis. Et quia nullus potest intrare vitam æternam nisi sit bene purgatus, necessarium fuit aliud sacramentum quo homo purgaretur a peccatis, et liberaretur ab infirmitate, et præpararetur ad introitum regni cœlestis ; et hoc est sacramentum extremæ unctio-

nis. Sed quod non semper curet corporaliter, hoc est quia forte vivere non expedit saluti animæ. Jac. v, 14 : *Infirmatur quis in vobis ? Inducat presbyteros Ecclesiæ, et orent super eum, ungentes eum oleo in nomine Domini : et oratio fidei salvabit infirmum, et alleviabit eum Dominus ; et si in peccatis sit, remittentur ei.* Sic ergo patet quod per quinque sacramenta quæ prædicta sunt, habetur perfectio vitæ. Sed quia necessarium est quod hujusmodi sacramenta conferantur per determinatos ministros, ideo fuit necessarium sacramentum ordinis, cujus ministerio hujusmodi sacramenta dispensarentur (a). Nec est attendenda ad hoc eorum vita, si aliquando ad mala declinant ; sed virtus Christi, per quam ipsa sacramenta efficaciam habent, quorum ipsi dispensatores sunt : Apostolus I Corinth. iv, 1 : *Sic nos existimet homo ut ministros Christi, et dispensatores mysteriorum Dei :* et hoc est sextum sacramentum, scilicet ordinis. Septimum sacramentum est matrimonium, in quo si munde vivunt homines salvantur, et possunt sine peccato mortali vivere. Et interdum declinant conjugati ad venialia, quando eorum concupiscentia non fertur extra bona matrimonii ; et si efferatur extra, tunc declinant ad mortale. Per hæc autem septem sacramenta consequimur peccatorum remissionem : et ideo hic statim subditur, « Remissionem peccatorum. » Per hoc etiam datum est Apostolis dimittere peccata : et ideo credendum est quod ministri Ecclesiæ, ad quos derivata est hujusmodi potestas ab Apostolis, et ad Apostolos a Christo, in Ecclesia habeant potestatem ligandi atque solvendi, et quod in Ecclesia sit plena potestas dimittendi peccata,<sup>3</sup> licet gradatim, scilicet a Papa in alios prælatos.

Sciendum est etiam quod non solum virtus passionis Christi communicatur nobis, sed etiam meritum vitæ Christi ; et quidquid boni fecerunt omnes sancti, communicatur in caritate existentibus, quia omnes unum sunt : Psalm. cxviii, 63 : *Particeps ego sum omnium timentium te.* Et inde est quod qui in caritate vivit, particeps est omnis boni quod fit in toto mundo ; sed tamen specialius illi pro quibus specialius fit aliquod bonum :

<sup>1</sup> Parm. : « Hoc autem robor confertur. »

<sup>2</sup> Parm. omittit : « nec proponit confiteri. »

<sup>3</sup> Parm. : « sed. »

(a) Nota quod S. Thomas dicit sacramenta hujusmodi per ordinatos dispensari, antequam de matrimonio loquatur.

nam unus potest satisfacere pro alio, sicut patet in beneficiis, ad quæ plures congregationes admittunt aliquos. Sic ergo per hanc communionem consequimur duo : unum<sup>1</sup> scilicet quod meritum Christi communicatur omnibus ; aliud quod bonum unius communicatur alteri, unde excommunicati, per hoc quod sunt extra Ecclesiam, perdunt partem omnium bonorum quæ fiunt in Ecclesia<sup>2</sup> quod est majus damnum quam damnum alicujus rei temporalis. Est etiam<sup>3</sup> periculum : quia<sup>4</sup> per hujusmodi suffragia impeditur diabolus ne possit nos tentare : unde quando quis excluditur ab hujusmodi suffragiis, diabolus facilius vincit eum. Et inde est quod in primitiva Ecclesia, cum aliquis excommunicabatur, statim diabolus vexabat eum corporaliter. Rogemus Dominum, etc.

#### CAPUT XIV.

*De articulo decimo tertio quantum ad resurrectionis utilitatem, resurgentium omnium qualitatem.*

*Carnis resurrectionem (a).* Spiritus sanctus non solum sanctificat Ecclesiam quantum ad animam, sed virtute ejus resurgent corpora nostra. Rom. iv, 24 : *Qui suscitavit Jesum Christum Dominum nostrum a mortuis ;* et I Corinth. xv, 21 : *Quoniam quidem per hominem mors, et per hominem resurrectio mortuorum.* Et ideo credimus secundum fidem nostram, resurrectionem mortuorum futuram.

Circa quam quatuor consideranda occurrunt. Primum est utilitas, quæ ex fide resurrectionis provenit ; secundus est qualitas resurgentium, quantum ad omnes in generali ; tertium quantum ad bonos ; quartum quantum ad malos in speciali.

Circa primum sciendum, quod ad quatuor est nobis utilis fides et spes resurrectionis. Primo ad tollendum tristitias quas ex mortuis concipimus. Impossibile est enim quod homo non doleat de morte consanguinei vel amici sui<sup>5</sup> ; sed per hoc quod sperat eum resurrecturum, multum temperatur dolor mortis. I Thess.

iv, 12 : *Nolumus vos ignorare, fratres, de dormientibus, ut non contristemini, sicut et ceteri qui spem non habent.* Secundo ad auferendum<sup>6</sup> timorem mortis : nam si homo post mortem non speraret aliam vitam meliorem ; sine dubio mors esset valde timenda, et potius deberet homo quæcumque mala facere, quam incurrere mortem. Sed quia credimus esse aliam vitam meliorem, ad quam pervenimus post mortem, constat quod nullus debet mortem timere, nec timore mortis aliqua mala facere. Hebr. ii, 14 : *Ut per mortem destrueret eum qui habebat mortis imperium, idest diabolus ; et liberaret eos qui timore mortis per totam vitam obnoxii erant servituti.* Tertio reddit sollicitos et studiosos ad bene operandum. Si enim vita hominis esset tantum ista in qua vivimus, non inesset homini magnum studium ad bene operandum : quia quidquid faceret, parvum esset, cum ejus desiderium non sit ad bonum determinatum secundum certum tempus, sed ad aternitatem. Sed quia credimus quod per hæc quæ hic facimus, recipiemus bona æterna in resurrectione, ideo studemus bona operari. I Corinth. xv, 19 : *Si in hac vita tantum in Christo sperantes sumus, miserabiliores sumus omnibus hominibus.* Quarto retrahit a malo. Sicut enim spes præmii allicit ad bonum operandum, ita timor pænæ, quam credimus malis reservari, retrahit a malo. Joan. v, 29 : *Et procedent qui bona fecerunt, in resurrectionem vitæ ; qui vero mala egerunt, in resurrectionem judicii.*

Circa secundum sciendum est, quod quantum ad omnes quadruplex conditio attendi potest in resurrectione. Prima est quantum ad identitatem corporum resurgentium : quia idem corpus quod nunc est, et quantum ad carnem et quantum ad ossa resurget ; licet aliqui dixerint quod non<sup>6</sup> hoc corpus quod nunc corrumpitur, <sup>7</sup> resurget ; quod est contra Apostolum. Ait enim I Corinth. xv, 55 : *Oportet corruptibile hoc induere incorruptionem ;* et quia sacra Scriptura dicit, quod virtute Dei idem corpus ad vitam resurget. Job. xix, 26 : *Rursum circumdabor pelle mea, et in carne mea videbo*

<sup>1</sup> Parm. omittit : « in Ecclesia. »

<sup>2</sup> Parm. : « aliud periculum. »

<sup>3</sup> Parm. : « quia constat quod. »

<sup>4</sup> Parm. : « ad mortem cari sui. »

<sup>5</sup> Parm. : « aufert. »

<sup>6</sup> Parm. omittit : « non. »

<sup>7</sup> Parm. : « non resurget. »

(a) Matthiæ adscribitur.

*Deum.* Secunda conditio erit quantum ad qualitatem, quia corpora resurgentia erunt alterius qualitatis quam nunc sint: quia et quantum ad beatos, et quantum ad malos, corpora erunt incorruptibilia, quia boni erunt semper in gloria, et mali semper in pœna eorum. I Corinth. xv, 53: *Oportet corruptibile hoc induere incorruptionem, et mortale hoc induere immortalitatem.* Et quia corpus erit incorruptibile et immortale, non erit usus ciborum et venereorum. Matth. xxii, 30: *In resurrectione neque nubent neque nubentur; sed erunt sicut Angeli Dei in cœlo.* Et hoc est contra Judæos et Sarracenos. Job vii, 10: *Non revertetur ultra in domum suam.* Tertia conditio est quantum ad integritatem, quia omnes et boni et mali resurgent cum omni integritate quæ ad perfectionem hominis pertinet; non enim erit ibi cæcus vel claudus, nec aliquis defectus. Apostolus I Corinth. xv, 52: *Mortui resurgent incorrupti,* idest impassibiles quantum ad corruptiones præsentis. Quarta conditio est quantum ad ætatem, quia omnes resurgent in ætate perfecta, idest triginta trium vel duorum annorum. Cujus ratio est, quia qui nondum pervenerunt ad hoc, non habent ætatem perfectam, et senes hanc jam amiserunt: et ideo juvenibus et pueris addetur quod deest, senibus vero restituetur. Ephes. iv, 13: *Donec occurramus omnes in virum perfectum, in mensuram ætatis plenitudinis Christi.*

Circa tertium sciendum est, quod quantum ad bonos erit specialis gloria, quia sancti habebunt corpora glorificata: in quibus erit quadruplex conditio. Prima est claritas: Matth. xiii, 43: *Fulgebunt justi sicut sol in regno Patris eorum.* Secunda est impassibilitas; I Corinth. xv, 43: *Seminatur in ignobilitate, surget in gloria:* Apoc. xxi, 4: *Absterget Deus omnem lacrymam ab oculis eorum; et mors ultra non erit, neque luctus, neque clamor, neque dolor erit ultra, quia prima abierunt.* Tertia est agilitas: Sap. iii, 7: *Fulgebunt justi, et sicut scintillæ in arundinetis discurrent.* Quarta est subtilitas: I Corinth. xv, 44: *Seminatur corpus animale, surget corpus spiritale:* non quod omnino sit spiritus, sed quia erit totaliter spiritui subjectum.

Circa quartum sciendum, quod damna-

torum conditio contraria erit conditioni beatorum, quia erit<sup>2</sup> eis conditio pœna æterna: in qua est quadruplex mala conditio. Nam corporum eorum sunt obscura: Isa. xlii, 8: *Facies combustæ vultus eorum.* Item passibilia, licet nunquam corrumpantur; quia semper in igne ardebunt, et nunquam consummabuntur: Isa. lxxvi, 24: *Vermis eorum non morietur, et ignis eorum non extinguetur.* Item erunt gravia: anima enim erit ibi quasi catenata: Psalm. cxlix, 8: *Ad alligandos reges eorum in compedibus.* Item erunt quodammodo carnalia et anima et corpus. Joel. i, 17: *Computruerunt jumenta in stercore suo.* Rogemus Dominum.

## CAPUT XV.

*De articulo quarto decimo: quæ bona erunt in vita æterna.*

*Vitam æternam. Amen.* Convenienter in fine omnium desideriorum nostrorum, scilicet in vita æterna, finis datur credendis in *Symbolo*, cum dicitur: « Vitam æternam. Amen; » contra quod dicunt illi qui ponunt animam interire cum corpore. Si enim hoc esset verum, homo esset ejusdem conditionis cum brutis: et istis convenit illud Psalm. xlviii, 21: *Homo, cum in honore esset, non intellexit; comparatus est jumentis insipientibus, et similis factus est illis.* Anima enim humana assimilatur Deo in immortalitate, ex parte autem sensualitatis assimilatur bestiis. Cum ergo credit quis quod anima moriatur cum corpore, recedit a Dei similitudine, et bestiis comparatur: contra quos dicitur Sap. ii, 22: *Neque mercedem speraverunt justitiæ, nec judicaverunt honorem animarum sanctarum: quoniam Deus creavit hominem inexterminabilem, et ad imaginem similitudinis suæ fecit illum.*

Est autem primo considerandum in hoc articulo, quæ vita sit vita æterna: circa quod sciendum quod in vita æterna primum est quod homo conjungitur Deo. Nam ipse Deus est præmium et finis omnium laborum nostrorum: Gen. xv, 1: *Ego protector tuus sum, et merces tua magna nimis.* Consistit autem hæc conjunctio in perfecta visione: I Corinth. xiii, 12:

<sup>1</sup> Al.: « neque erunt ultra quæ primo abierunt. »

<sup>2</sup> Parm.: « in eis pœna. »

*Videmus nunc per speculum in ænigmate tunc autem facie ad faciem.* Secundo <sup>1</sup> in ferventissimo amore, quanto enim aliquid melius cognoscitur, tanto perfectius amatur. Isai : xxxiii, *Vivit Dominus cujus ignis est in Sion, et caminus ejus in Jerusalem.* Tertio <sup>2</sup> in summa laude : Augustinus in XXII *De civit. Dei.* c. xxx : « Videbimus, amabimus, et laudabimus. » Isa. li, 2 : *Gaudium et lætitia invenietur in ea, gratiarum actio, et vox laudis.* Secundo <sup>3</sup> est in ea plena et perfecta satietas desiderii ; nam ibi habebit quilibet beatus ultra desiderata et sperata. Cujus ratio est, quia nullus potest in vita ista implere desiderium suum, nec unquam aliquod creatum satiat desiderium hominis : Deus enim solus satiat et in infinitum excedit : et inde est quod non invenitur <sup>4</sup> satietas nisi in Deo. Augustinus in I *Conf.* : « Fecisti nos, Domine, ad te, et inquietum est cor nostrum donec requiescat in te. » Et quia sancti in patria perfecte habebunt Deum, manifestum est quod satiabitur desiderium eorum, et adhuc gloria excedet. Et ideo dicit Dominus, Matth. xxv, 21 : *Intra in gaudium Domini tui.* Augustinus : « Totum gaudium non intrabit in gaudentes, sed toti gaudentes intrabunt in gaudium. » Psalm. xvi, 15 : *Satiabor cum apparuerit gloria tua :* et iterum cu, 5 : *Qui replet in bonis desiderium tuum.* Quidquid enim delectabile est, totum est ibi superabundanter. Si enim appetantur delectationes, ibi erit summa et perfectissima delectatio, quia de summo bono, scilicet Deo : Job. xxii, 26 : *Tunc super*

*Omnipotentem deliciis afflues :* Psalm. xv, 11 : *Delectationes in dextera tua usque in finem.* Item si appetuntur honores, ibi erit omnis honor. Homines præcipue desiderant esse reges, quantum ad laicos, et Episcopi, quantum ad clericos : et utrumque erit ibi : Apoc. v, 16 : *Fecisti nos Deo nostro regnum et sacerdotes :* Sap. v, 5 : *Ecce quomodo computati sunt inter filios Dei.* Item si scientia appetitur, ibi erit perfectissima : quia omnes naturas rerum et omnem veritatem, et quidquid volumus, sciemus, et quidquid volumus habere, habebimus <sup>5</sup> in vita æterna. Sap. vii, 11 : *Venerunt mihi omnia bona pariter cum illa.* Proverb. x, 24 : Tertio <sup>6</sup> est ibi perfectissima securitas : nam in mundo isto non est <sup>7</sup> securitas plena, quia quanto quis habet plura et majorem <sup>8</sup> familiam, tanto plus <sup>9</sup> timet et pluribus indiget ; sed in vita æterna nulla est tristitia, nullus labor, nullus timor. Proverb. i, 33 : *Sedebit populus meus in pulchritudine pacis. Abundantia perfruetur, malorum timore sublato.* Quarto <sup>10</sup> commoda omnium bonorum societas, quæ societas <sup>11</sup> est maxime delectabilis <sup>12</sup> bonis ; sic ergo sancti habebunt omnia bona hæc et alia ineffabilia, et quilibet diliget alium sicut seipsum ; et ideo gaudebit de bono alterius sicut de suo. Quo fit ut tantum augeatur lætitia et gaudium minus, quantum est gaudium omnium. Psalm. lxxxvi, 7 : *Sicut lætantium omnium habitatio est in te.*

Ita ergo <sup>13</sup> habebunt perfecti qui erunt in vita æterna. Mali <sup>14</sup> vero, qui erunt in morte æterna, non minus habebunt de

<sup>1</sup> Parm. omittit : « secundo in ferventissimo... ejus in Jerusalem. »

<sup>2</sup> Parm. : « item consistit in summa laude. »

<sup>3</sup> Parm. : « imperfecta satietate est. »

<sup>4</sup> Parm. : « non quiescit. »

<sup>5</sup> Parm. : « ibi cum ipsa. »

<sup>6</sup> Parm. : « tertio consistit in perfecta. »

<sup>7</sup> Parm. : « perfecta securitas. »

<sup>8</sup> Parm. : « et magis eminent. »

<sup>9</sup> Parm. : « tanto plura timet. »

<sup>10</sup> Parm. : « consistit in omnium beatorum jucunda societate. »

<sup>11</sup> Parm. : « erit. »

<sup>12</sup> Parm. : « delectabilis, quia quilibet habebit omnia bona cum omnibus beatis ; nam quilibet, etc. . »

<sup>13</sup> Parm. : « Hæc autem quæ dicta sunt, et multa ineffabilia habebunt sancti qui erunt in patria. »

<sup>14</sup> Hæc ex Cod. S. Gen. :

« E converso damnati ultra quod excogitari possit cruciabuntur. Exageratur autem eorum pœna primo ex separatione Dei et omnium bo-

norum ; et hæc est pœna damni quæ major est quam pœna sensus ; Matth. ii : « Ligatis manus, mittite eum, etc. » Matth. : « Discedite a me maledicti. » Isai : « Tollatur impius ne videat gloriam Dei. » Plus dolebunt quia a tali separabuntur societate, quam quia æterno cruciabuntur supplicio. Mali enim tenebris peccatorum interiorum obscurati qui in hac vita vineulis mandatorum Dei ligari non voluerunt, sed pedibus, id est affectionibus, animi, et pedibus corporis ad malum eueurrerunt, et manus ad illicita extendebant, ligati cum demonibus in inferno patientur tenebras exteriores. Secundo ex remorse conscientie. Sap. x : « Venient in cogitatione peccatorum suorum — Et dicent tunc quid nobis profuit superbia, aut quid divitiarum jactantia? » nam cum ingenti delectatione recogitabunt quæ cum magna delectatione gesserunt, ut stimulus memoriae pungat ad pœnam quem oculus nequitie stimularit ad culpam. Tertio ex immensitate pœnæ sensibilis ; nam ignis gehennæ semper ardebit, et nunquam lucebit, semper uret et nunquam comburet, semper afficiet, et nunquam deliciet ;



dolore et pœna quam boni de gaudio et gloria. Exageratur autem pœna eorum primo ex separatione Dei et omnium bonorum : et hæc est pœna damni, quæ respondet aversioni : quæ pœna major est quam pœna sensus. Matth. xxv, 30 : *Inutilem servum ejicite in tenebras exteriores.* In vita enim ista mali habent tenebras interiores, scilicet peccati ; sed tunc habebunt etiam exteriores. Secundo ex remorsu conscientiæ. Psal. XLIX, 21 : *Arguam te et statuam contra faciem tuam.* Sap. v, 3 : *Præ angustia spiritus gementes.* Et tamen hæc pœnitentia et gemitus erit inutilis, quia non propter odium mali, sed propter timorem <sup>1</sup> et enormitatem pœnæ. Tertio ex immensitate pœnæ sensibilis, scilicet ignis inferni, qui animam et corpus cruciabit : quæ est acerbissima pœnarum, sicut dicunt sancti : et erunt sicut semper morientes, et nunquam morituri <sup>2</sup> : unde dicitur mors æterna, quia

sicut moriens est in acerbitate pœnarum, sic et illi qui sunt in inferno. Psal. XLVIII, 15 : *Sicut oves in inferno positi sunt : mors depascet eos.* Quarto ex desperatione salutis. Nam si eis daretur spes liberationis a pœnis, eorum pœna mitigaretur ; sed cum subtrahitur eis omnis spes, pœna efficitur gravissima. Isa. LXVI, 24 : *Vermis eorum non morietur, et ignis eorum non extinguetur.* Sic ergo patet differentia inter bene operari et male : quia bona opera ducunt ad vitam, mala autem trahunt ad mortem ; et propter hoc homines deberent frequenter reducere hæc ad memoriam, quia ex hoc provocarentur ad bonum et retraherentur a malo : unde et signanter in fine omnium ponitur. « Vitam æternam, » ut semper magis memoriæ imprimatur <sup>3</sup> ad quam vitam nos perducatur Dominus Jesus Christus, Deus benedictus in sæcula sæculorum. Amen.

Ibi erit summa tenebrarum obscuritas, immensa pœnarum acerbitas, infinita miserorum æternitas. Quarto ex desperatione liberationis. Prov. ii, mortuo homine, nulla erit ibi ultra spes, et certe ad magnam pertinet justitiam judicantis, ut nunquam careant in Gehenna supplicio, qui nunquam in vita voluerunt carere peccato. De istis multimodis pœnis tangitur in his versibus.

Anima, gelu, vermes, fetor, tubæque flagelia.  
Dæmonis aspectus, scelerum confusio, oæsus,  
Inde stupor, fletus, horror, depressio, luctus,  
Stridor, clamor, nulla salutis spes, ululatus,  
Est locus indignus ubi non extinguitur ignis,  
Nec qui torquetur, nec qui torquet morietur.  
Ordo nullus, fumus ibi, perpetua pœna,  
Atque fumes, gemitus, sitis est et potus amarus,  
Anxietas, major dolor est amissio regni.

<sup>1</sup> Parm. : « dolorem. »

<sup>2</sup> Parm. addit : « mortui nec. »

<sup>3</sup> Cod. Mazar. in 1060 addit : « In summa vero scien-  
dum e t quod secundum quosdam sunt xu articuli

fidei ; sex de divinitate, scilicet quod unus Deus in essentia, et ideo dicit : « credo in unum Deum ; » et trinus in personis : « in Patrem, et filium, et Spiritum sanctum ; » qui creator est omnium ; unde : « creatorem ; » et quod ab eo sit omnis gratia et remissio omnium peccatorum : « Sanctorum communionem, remissionem peccatorum... » et resuscitabit corpora nostra : « carnis resurrectionem ; » et quod dabit « vitam æternam, amen. » Item sex de humanitate Christi scilicet quod conceptus et natus de beata Virgine opere Spiritus sancti ibi : « qui conceptus est de Spiritu sancto, natus de Maria Virgine. » Et quod mortuus et passus ibi : « passus sub Pontio Pilato, crucifixus, mortuus, et sepultus est ; » et quod descendit ad inferos : « descendit ad inferos ; » et quod resurrexit tertia die, ibi « tertia die resurrexit a mortuis, » et quod ascendit in cælum, ibi : « ascendit ad cælos ; » et quod venturus est ad iudicium : « inde venturus est iudicare vivos et mortuos. » — Rogemus Dominum, etc. » Similia in Cod. S. Vict. inveniuntur.

# OPUSCULUM VIII.

## EXPLANATIO DUBIORUM DE DICTIS CUJUSDAM EDITA

A FR. THOMA DE AQUINO <sup>1</sup>.

(EDIT. ROM. IX.)

### QUÆSTIO I.

Primo considerandum est quod ratio cujuslibet est quam significat nomen ejus, sicut ratio lapidis est quam significat nomen ejus. Nomina autem sunt signa intellectualium conceptionum : unde ratio uniuscujusque rei significata per nomen, est conceptio intellectus, quam significat nomen. Hæc autem conceptio intellectus est quidem in intellectu sicut in subjecto, in re autem intellecta sicut in representato : nam conceptiones intellectuum sunt similitudines quadam rerum intellectarum. Si autem conceptio intellectus non assimilaretur rei, falsa esset conceptio de re illa, sicut si intelligeret esse lapidem quod non est lapis. Ratio igitur lapidis est quidem in intellectu sicut in subjecto, in lapide autem sicut in eo quod causat veritatem in conceptione intellectus intelligentis lapidem talem esse. Cum igitur intellectus rem aliquam comprehendit, una conceptione perfecte illam rem representat; et sic diversas conceptiones contingit esse diversarum rerum. Intellectus autem noster Deum comprehendere non potest,

nec ipsum in essentia sua videre in statu viæ, sed aliquo modo ex rebus creatis ipsum cognoscit. Diversæ autem perfectiones rerum creatarum, puta sapientia, voluntas, et hujusmodi, representant quidem imperfecte divinam perfectionem : ex hoc enim quod aliqua creatura est sapiens, aliquo modo accedit ad divinam similitudinem : similiter ex hoc quod est potens, et ex hoc quod est volens; ita tamen quod quicquid perfectionis seu nobilitatis competit creaturæ <sup>2</sup> secundum hæc diversa, eminentius competit Deo secundum simplicem essentiam suam. Et similiter intellectus noster ex rebus creatis scientiam accipiens per diversas conceptiones assimilatur uni divinæ essentiae, licet imperfecte. Sic igitur bonitas, sapientia, et potentia, et si quid aliud hujusmodi de Deo dicimus, differunt ratione propter diversas conceptiones intellectus nostri, sed sunt idem re, quia essentia divina est una et eadem, quam intellectus noster diversis conceptionibus representat; sicut etiam diversæ res representant essentiam divinam diversis formis. Sic igitur sane intelligi potest quod primo ponitur : « Quia omnis perfectio est in Deo verissime, cum alia sit sapientiæ, alia bonitatis verissima ratio,

<sup>1</sup> Sic Cod. S. Viet. — In Parm. : Responsio ad Fr. Joannem Vercellensem Generalem Mag. ordinis Prædicatorum de articulis centum et octo sumptis ex opere Petri de Taranasia.

<sup>2</sup> Sic Codd. — Parm. : « creaturæ, etiam Deo competit, qui est creaturarum causa effectiva æquivoca. Sed tamen hæc diversa. »

oportet quod hæc in Deo differant ratione; quia vero modo simpliciter in ipso sunt, sunt idem (*a*) re. » Calumniose autem contra hæc objicitur quod ipsa differentia sapientiae et bonitatis in Deo sit, et non solum in intellectu creato. Non enim hæc intellexit scribens, sed quod in Deo, id est cum de Deo dicuntur, differunt ratione, id est secundum diversas conceptiones intellectus nostri, quæ unam divinam essentiam repræsentent, licet imperfecte. Patet enim jam ex dictis quod ratio de qua mentio fit, est quidem in intellectu sicut in subjecto, in essentia autem divina sicut in repræsentato. Item quod secundo objicitur quod ratio bonitatis divinæ includit in se sapientiam, quia bonitas divina est sapientia, non valet: quia bonitas divina est divina sapientia ex hoc quod est divina, non ex hoc quod est bonitas: neque ex hoc quod est sapientia, est bonitas. Hoc autem pertinet ad rationem bonitatis et sapientiae, scilicet quod competit bonitati in quantum est bonitas, et sapientiae in quantum sapientia. Unde patet quod etiam tertium non valet: non enim pertinet ad rationem bonitatis et sapientiae quod huic vel illi convenit in quantum est divina, sed quod competit bonitati in quantum est bonitas, et sapientiae in quantum est sapientia, ut dictum est.

### QUÆSTIO II.

Ex præmissis etiam patet quod sanum intellectum habere potest quod secundo ponitur, scilicet: « Ratio qua differunt divina attributa, partim fundatur super rem, partim super intellectum (*b*). » Oportet tamen quod aliter et aliter fundetur super utrumque. Nam rationes quibus attributa differunt, fundantur in intellectu nostro, quia sunt in eo sicut in subjecto. Fundantur autem super rem, quia sunt similitudines quædam repræsentantes essentiam divinam suo modo: sic enim dicitur ratio lapidis fundari super rem, in quantum conceptio intellectus repræsentat lapidem. Quod autem in contrarium objicitur, scilicet id quod omnino unum est, non est diversitatis fundamentum,

<sup>1</sup> Petrus de Tarant.: « quod præstat fundamentum et causam sui esse. »

<sup>2</sup> Parm. omittit: « cum recedat ab unitate; infinitas vero intensiva perfectionis est. »

<sup>3</sup> Parm. addit: « saltem in creaturis. »

patet esse falsum ex præmissis: nam eadem divina essentia a diversis repræsentatur et in intellectu et in natura. Sic autem intellexit scribens, rationes diversorum attributorum fundari super essentiam divinam, sicut super repræsentatum per diversas conceptiones intellectus nostri, quas nomina diversa significant.

### QUÆSTIO III.

Ex eisdem etiam patet hoc quod tertio ponitur sanum habere intellectum: « Diversitas rationis potentiae, sapientiae et bonitatis fundatur in intellectu sicut in subjecto, in Deo sicut in objecto <sup>1</sup> quod præstat causam et fulcimentum suæ veritati (*c*). » Ut tamen intelligatur quod præstat fulcimentum veritati, in quantum repræsentatur per unamquamque conceptionem intellectus nostri intelligentis hujusmodi attributa: non autem quantum ad hoc quod ipsa diversitas attributorum repræsentet aliquam diversitatem in Deo, ut in contrarium objicitur. Hæc enim diversitas conceptionum seu rationum non provenit ex diversitate Dei, sed ex defectu intellectus nostri, qui rem unam perfecte non potest intelligere nisi per multa, qui intelligit attributa secundum quod perfectio invenitur in rebus creatis.

### QUÆSTIO IV.

Quod vero quarto ponitur: « In Deo non est infinitas extensiva, sed intensiva, » non sic est in scripto ibi: sic enim est scriptum. « Quod objicitur de infinita emanatione: Respondeo. Infinitas extensiva imperfectionis, est cum <sup>2</sup> recedat ab unitate; infinitas vero intensiva perfectionis est cum accedat ad unitatem. Prima ergo Deo non convenit, sed secunda (*d*). » Patet enim quod loquitur de infinitate emanationis. Emanatio autem extensionem habere potest secundum numerum <sup>3</sup>, licet Deus habere non possit extensionem secundum quantitatem dimensionem. Intensiva autem di-

(*a*) Petr. de Tarantasia Sup. I. Sent. d. 11, q. 11, q. a. 11.

(*b*) Pet. de Tarant. Sup. I. Sent. d. 11, q. 1, a. 111

(*c*) Petr. de Tar. Sup. I, d. 11, q. 1, a. 111.

(*d*) Pet. de Tarant. I, d. 11, q. 11, a. 11.

citur infinitas emanationis, etsi non proprie, eo tamen modo loquendi quo dicitur, Deus intensus in bonitate, quia est summe bonus. Emanatio autem divina non est extensive infinita, quia non est infinitus numerus personarum emanantium, licet emanatio divina sit æterna, ut objiciens proponit.

#### QUÆSTIO V.

Quod vero quinto ponitur : « In Deo producere personas non est de ratione perfectionis, sed in creaturis esset (*a*), » simpliciter intellectum falsum est; nisi addatur quod non est de ratione perfectionis absolutæ, vel ad se dictæ : et hoc videtur ipse intelligere per ea quæ subdit, licet non bene exprimat: subdit enim : « quia dicit tantum quid, non ad aliquid » sic producere personam, in creatura.

#### QUÆSTIO VI.

Quod vero sexto ponitur, « Relatio in divinis comparata ad essentiam, ratio sola est; comparata ad objectum cuius est, sic res quædam est (*b*) : » sic intelligitur : quia relatio comparata ad essentiam, differt solum ratione ab ea; ab opposita autem relatione differt realiter : unde postea subdit : « ipsa enim relatio, scilicet per comparisonem ad essentiam, idem est quod ipsa, re <sup>1</sup>, sed differt ratione : » non autem intelligitur quod relatio sit solum ratio, cui non respondeat res aliqua, ut objiciens calumniatur.

#### QUÆSTIO VII.

Quod vero septimo ponitur, « Lux est qualitas agentis universalis, idest cœli, » intelligitur universalis in genere naturalium agentium, et non simpliciter, ut objiciens intellexit : lux enim etsi sit in aere, est tamen in eo a corpore cœlesti, sicut calor in aqua ab igne. Sicut igitur calor est propria qualitas ignis,

licet sit in aliis corporibus ab igne, ita lux potest dici propria qualitas cœli, licet sit in aliis corporibus causata a cœlo.

#### QUÆSTIO VIII.

Quod vero octavo ponitur, « Quia in hoc nomine Deus, tam res quam modus significandi idem est cum persona, ideo potest hoc nomen Deus supponere pro persona (*c*) : » non sic intelligitur quod modus significandi sit idem cum persona, ut objiciens intellexit : sed quod modus significandi in hoc nomine Deus, est idem modo significandi personæ, quantum ad hoc quod utrumque significat in concreto.

#### QUÆSTIO IX.

Quod vero nono dicitur, « Generatio divina non terminatur ad relationem, sed ad hypostasim quæ est subjecta (*d*), » verum est si intelligatur de substantia prout significat suppositum, non autem si intelligatur de substantia quæ est essentia vel natura. Nec valet quod objicitur in contrarium : Relatio in divinis est hypostasis : ergo si terminatur ad hypostasim, terminatur ad relationem; sicut non valet : Essentia divina est hypostasis, ergo generatio divina terminatur ad essentiam : sicut enim essentia divina non generatur, ita nec filiatio, sed Filius.

#### QUÆSTIO X.

Quod vero decimo ponitur, « Quamvis concedatur cum aliqua improprietate, natura de natura, lux de luce, substantia de substantia, Deus de Deo, non tamen communiter conceditur hæc <sup>2</sup>, Essentia de essentia (*e*) » male dictum est quantum ad hoc quod dicitur, quod Deus de Deo improprie dicatur. Est enim hæc propria, Deus de Deo, sicut et hæc, Deus genuit Deum, ut objiciens dicit, et ut ipsemet in quarta distinctione determinat; unde arbitror ex errore scriptoris accidisse.

<sup>1</sup> Parm. erronee : « quod ipsa res. »

<sup>2</sup> Petrus de Tarant. : « hæc ita communiter. »

(*a*) Pet. de Tarant. ubi sup.

(*b*) Pet. de Tarant. ubi sup. a. ult.

(*c*) P. de Tarant. I, n. v, q. iv, a. 1 : « Per prius

pro natura, et ex consequenti pro persona, propter identitatem rei et modi significandi. »

(*d*) Pet. de Tarant. I, n. vi, q. ii, a. i.

(*e*) P. de T. I, n. vi, q. ii, a. ii.

## QUÆSTIO XI.

Quod vero undecimo proponitur, « Et si eadem sit natura in Patre et Filio et Spiritu Sancto, non tamen eodem modo se habens, (a) » dubium sensum habet. Si enim intelligat modum essentialem expresse, falsum est: puta si diceret, quod melius aut perfectius essentia sit in uno quam in alio; si autem intelligat modum relativum, secundum quod Hugo de Sancto Victore, in lib. *De Trin.*, cuilibet personæ attribuit quemdam essendi modum, sic verum est quod dicitur: quia licet essentia non referatur ut sit generans vel genita, sicut objiciens dicit; est tamen essentia per generationem accepta vel communicata. Essentia igitur divina est in Patre ut non accepta ab alio; in Filio ut accepta per generationem; in Spiritu Sancto ut accepta per processionem.

## QUÆSTIO XII.

Quod vero duodecimo ponitur, « Productio a natura et a voluntate potest intelligi tripliciter: aut a natura solum, aut a voluntate solum, aut a natura et voluntate simul: primo modo procedit Filius, secundo modo creatura, tertio modo procedit Spiritus Sanctus (b): » quantum ad id quod objiciens contra opponit, non magnam difficultatem habet. Sic enim potest dici Filius a natura et Spiritus Sanctus a natura et voluntate procedere, sicut dicitur Filius esse natura de natura, sapientia de sapientia, licet Pater et Filius sint una sapientia; sed magis videtur esse calumniosa ista distinctio, ex qua videtur relinqui Spiritus Sanctus quasi medio modo se habens inter Filium et creaturam. Sicut igitur Deus Pater Filium non voluntate, sed natura produxit, ita de Spiritu Sancto sentiendum est: quod enim Deus producit voluntate, creatura est, ut Hilarius probat in lib. *De syn.* Dicitur tamen quod Spiritus sanctus procedit per modum voluntatis, quia procedit ut amor, sicut et Fi-

lius procedit per modum intellectus, inquantum procedit ut Verbum: sicut tamen Verbum procedit naturaliter a Deo dicente, ita et amor similiter a Deo amante.

## QUÆSTIO XIII.

Quod autem decimo tertio ponitur, « Generare non est actus naturæ ut communis est, sed ut conjuncta cum proprietate suppositi generantis (c), » quantum ad id quod objiciens tangit, non multum videtur calumniabile, quia conjunctio potest referri ad intellectum vel locutionem nostram, ut puta cum dicimus: Essentia et paternitas sunt in Patre; non autem ad compositionem rei. Sed magis posset calumniari ex hoc quod dicitur generatio esse actus naturæ in Patre, si intelligeretur esse actus naturæ, ut generantis: debet enim intelligi esse actus naturæ ut quo generans generat: natura enim non generat, sed Pater naturaliter generat Filium.

## QUÆSTIO XIV.

Quod vero decimo quarto ponitur, « Potentiæ idem cum essentia<sup>1</sup>, ex parte operationum, scilicet creationis et generationis quæ diversæ<sup>2</sup> sunt, et secundum prius et posterius<sup>3</sup> habent distinctionem (d) »: sanum habet intellectum. Quamvis enim potentia creandi et generandi sit divina essentia, ut objiciens tangit: tamen importat respectum quem non importat essentia: et quantum ad hunc respectum distinguitur potentia, licet non distinguatur essentia: similiter etiam licet creationis actio sit Deus et divina essentia, tamen connotat effectum secundum quem distinguitur creatio a generatione, non autem secundum ipsam essentiam actionis, prout est ipsa essentia divina.

## QUÆSTIO XV.

Quod autem decimo quinto ponitur, « Sicut æternum prius est temporali, ita

<sup>1</sup> Parm.: « potentiæ enim ex parte » et omittit: « idem cum essentia. »

<sup>2</sup> Parm.: « diversa sunt. »

<sup>3</sup> Parm.: « secundum quod prius et posterius se habent, habent. »

(a) P. de T. I, d. VII, q. I, a. III.

(b) P. de T. I, d. VII, q. I, a. V.

(c) P. de T. I, d. VII, q. II, a. II.

(d) P. de T. I, d. VII, q. III, a. I.



ordo <sup>1</sup> æternum prius est ordine ad temporale; unde potentiæ ordinatio ad actum æternum generandi prior est ordinatione <sup>2</sup> ejus ad actum temporalem creandi (*a*): » non habet calumniam: quia actus creandi dicitur temporalis quantum ad effectum connotatum: ratione cujus non conceditur quod Deus ab æterno creet, licet actio ejus sit æterna, quæ est divina essentia. Æternum etiam licet non habeat ordinem ad aliquid temporale ut ad finem, habet tamen ordinem ad aliquid temporale, ut principium ad effectum: Deus enim qui est æternus, est principium et finis omnis creaturæ.

### QUÆSTIO XVI.

Quod vero decimo sexto ponitur, « Esse potest dupliciter accipi, simpliciter et absolute, et sic non est Deo proprium: vel cum præcisione, idest nullo addito, et sic est Deo proprium (*b*), » calumniatur objiciens non intelligens quod dicitur. Non enim hic accipitur absolute, secundum quod absolutum dicitur quod non dependet ab alio; sed absolute, idest universaliter. Similiter, quod dicitur cum præcisione, idest nullo addito, non bene intellexit. Intellexit enim scribens, quod esse cui nihil additur, sed est esse purum subsistens, est proprium Deo; non autem intellexit quod esse prout sine additione proponitur, sit proprium Deo.

### QUÆSTIO XVII.

Quod vero decimo septimo ponitur, « Veritates rerum comparatæ ad subjectum diversæ sunt, sed secundum quod comparantur ad intellectum divinum, una est omnium veritas (*c*), » verissimum est; tamen illa una veritas non est veritas creata, ut objiciens intellexit, sed veritas increata.

### QUÆSTIO XVIII.

Quod vero decimo octavo ponitur, « Ratio creandi, ut est in creaturis, est

<sup>1</sup> Parm.: « ita aliquid æternum prius est secundum ordinem ad temporale. »

<sup>2</sup> Parm.: « ordine. »

<sup>3</sup> Parm. omittit: « male est. »

<sup>4</sup> Parm.: « ab alio. »

(*a*) P. de T. I, d. vii, q. iii, a. i.

invariabilis, et dicitur æterna a carentia variationis (*d*), » non recte impugnat objiciens. Licet enim omnis creatura de non esse in esse producta sit, et pro tanto sit aliquo modo variabilis; tamen et definitiones et propositiones aliquæ dicuntur invariabiles propter necessarium ordinem unius termini ad alium; sicut Socrates variabilis est, et similiter cursus ejus et motus: et tamen hoc est invariabile: Si currit movetur. Hæc tamen invariabilitas non facit propositionem æternam, nisi secundum quod est in intellectu æterno, scilicet divino.

### QUÆSTIO XIX.

Quod autem decimo nono ponitur, « Decima compositio est ex corpore heterogeneo et anima vegetabili; undecima ex corpore hujusmodi et anima vegetabili et sensibili, ut animal; duodecima ex his et anima rationali (*e*), » male et improprie <sup>3</sup> dictum est, ut objiciens tangit, quia dat intelligere per copulam, quod anima rationalis sit aliud a vegetabili et sensibili; sed credo quod retulit copulam ad rationale tantum, non ad substantiam animæ. Unde melius staret, si diceret: ex his, et rationali, sicut dixit supra: ex anima vegetabili et sensibili.

### QUÆSTIO XX.

Quod vero vigesimo ponitur, « Essentia divina non est ab aliquo <sup>4</sup> in se, sed in persona Filii: » duplicem habet intellectum. Si enim intelligatur quod essentia divina in Filio existens, sit ab alio; falsum est sicut objiciens impugnat; si vero intelligatur quod essentia divina est in Filio ab alio, idest a Patre, verum est: a Patre enim est, quod essentia divina sit in Filio.

### QUÆSTIO XXI.

Quod autem vigesimo primo ponitur, « Essentia est principium actuum notio-

(*b*) P. de T. I, d. viii, q. i, a. i.

(*c*) P. de T. I, d. viii, q. ii, a. ii.

(*d*) P. de T. I, d. viii, q. iii, a. ii.

(*e*) P. de T. I, d. viii, q. v, a. i. Et hæc sufficientiant ut constet questiones illas ex operibus P. de T. fuisse extractas.

nalium prout est conjuncta cum proprietatibus personalibus : » non habet calumniam ex hoc quod dicit essentiam esse conjunctam proprietatibus eo modo quo supra expositum est. Habere autem calumniam magis videtur ex hoc quod dicitur : *Essentia est principium actuum notionalium* : est enim falsum, si intelligatur essentia esse principium hujusmodi actuum ut generans vel spirans ; sed si intelligatur esse principium actuum notionalium ut quo, consonat dictis Magistri, in VII *Dist.* primi lib. ; ubi dicit, quod potentia generandi est divina essentia ; potentia autem generandi est principium generationis ut quo generans generat.

#### QUÆSTIO XXII.

Quod autem vigesimo secundo ponitur, « *Aliorum attributorum a natura et voluntate, principalitas non est ratione agentis, sed exemplaris tantum ; unde respectu rei alterius essentia est, non respectu rei substantialis* : » hoc accipere voluit scribens, ex hoc quod Philosophus distinguit in II *Physic.*, duo principia agentia, dicens, eorum quæ fiunt, alia fiunt a natura, alia a proposito vel voluntate. Potentia autem et virtus non distinguuntur ab his duobus, eo quod communiter se habent ad utrumque : est enim potentia et virtus et naturalis, et rationalis, sive voluntaria : similiter etiam intellectus in agendo non distinguitur a voluntate, quia intellectus non movet nisi mediante voluntate ; procedit tamen in divinis aliquid per modum intellectus, scilicet Verbum, sicut et Spiritus sanctus per modum voluntatis, ut amor.

#### QUÆSTIO XXIII.

Quod vero vigesimo tertio ponitur, « *Filius procedit ut Verbum, et ars qua potest Pater omnia producere ; Spiritus Sanctus ut amor, quo amor vult ea producere,* » multiplicem habet intellectum. Potest enim intelligi, quod Pater Filio potest, et Spiritu sancto velit ; et sic falsum est, ut obijciens impugnat. Potest

etiam intelligi, quod Pater possit producere Filio et velit producere Spiritu sancto ; et sic verum est : nam Pater omnia producit per Filium et Spiritum sanctum ; et quod facit, manifestum est quod potest et vult. Potest ergo et vult omnia producere per Filium et Spiritum sanctum <sup>1</sup>.

#### QUÆSTIO XXIV.

Quod autem vigesimo quarto ponitur, « *Spiritus sanctus procedit ut ratio volendi, creatura ut volitum* : » si intelligatur, Spiritus sanctus esse ratio volendi ex parte volentis ; falsum est, ut obijciens tangit ; quia non est Patri ratio volendi quod non est ei ratio essendi. Si autem intelligatur ex parte voliti, verum est quod scribitur : finis enim est ratio volendi ea quæ sunt ad finem. Nullus autem dubitat Spiritum sanctum esse causam productionis creaturarum, sicut Patrem et Filium.

#### QUÆSTIO XXV.

Quod vero vigesimo quinto ponitur, « *Spiritus sanctus procedit a Patre et Filio ut sunt plures agentes, sed tamen ut unum in principio quo agunt,* » recte potest intelligi. Nec est simile de processu creaturæ, et Spiritus sancti : quia Spiritus sanctus requirit secundum rationem suæ processione in his a quibus procedit, distinctionem : procedit etiam ut nexus duorum : quod de creatura dici non potest. Nec oportet quod effectus sit simplicior causa, si Spiritus sanctus procedit a pluribus secundum quod sunt plures aliquo modo : quia similitudo effectus ad causam agentem vel dissimilitudo attenditur secundum formam qua agens agit : Pater autem et Filius spirant potentia spirativa, quæ est natura divina, quæ est una in utroque. Non tamen hæc dicuntur pro tanto quod in divinis sit causa et causatum, vel agens et factum ; sed hoc modo hæc dicuntur secundum quod loquimur de divinis modo humano. Nec etiam oportet quod si procedit a pluribus in quantum sunt plures, quod non procedat totaliter ab uno ; sed quod non procedat ab uno sine respectu ad alterum.

<sup>1</sup> Parm. omittit : « et Spiritum sanctum. »

## QUÆSTIO XXVI.

Quod autem vigesimo sexto ponitur, « Quamvis Spiritus procedat ab eis ut sunt plures secundum numerum agentium, non tamen secundum formam eos plurificantem, » eandem habet rationem sicut præcedens.

## QUÆSTIO XXVII.

Quod vero vigesimo septimo ponitur, « Non sequitur quod sit magis auctor, sed quod alio modo auctor<sup>1</sup>, quia et mediate et immediate; » si absolutum modum intelligit, falsum est. Si autem intelligat modum relativum; quantum ad aliquid verum est, et quantum ad aliquid falsum: quia relatio qua Filius est principium Spiritus sancti, est communis Patri et Filio: unde quantum ad hanc, idem est modus relativus; sed relatio qua Filius est a Patre propria est ei. Secundum hunc igitur modum potest dici, quod Filius alio modo est auctor Spiritus sancti quam Pater; in quantum Filius hoc habet ab alio, non autem Pater. Et similiter potest dici de omnibus quæ conveniunt Patri et Filio; quia omnia Filius habet a Patre, et Pater a nullo.

## QUÆSTIO XXVIII.

Quod vero vigesimo octavo ponitur, « Deus generans est nomen essentielle tractum ad personale, sicut potentia conjuncta actui notionali est notionalis: » sanum intellectum habet. Nec est simile de essentia et potentia, ut objicitur: quia essentia non importat aliquam habitudinem principii, sicut potentia: secundum rationem cujus habitudinis dicitur potentia generandi, id est quæ est generationis principium.

## QUÆSTIO XXIX.

Quod vigesimo nono ponitur, « Spiritus sanctus procedit a duobus, Filius ab uno, unde videtur magis procedere, »

omnino falsum est; nisi faciat vim in hoc quod dicitur, « videtur: » ut intelligatur, « videtur, » quasi sophisticum, quod non est.

## QUÆSTIO XXX.

Quod vero trigesimo ponitur, « Alia ratio est, quia procedit spiritus Sanctus ab uno in alterum, ideo videtur magis habere de ratione processione: » simpliciter male dicitur, nisi etiam fiat vis in hoc quod dicitur, « videtur. »

## QUÆSTIO XXXI.

Quod autem trigesimo primo dicitur, « Uno modo dicitur temporale quod subjacet variationi temporali, et hoc modo illud per quod elevamur supra tempus, non est temporale, sive in tempore: sic vero est gratia: » hoc videtur accipi ex eo quod Augustinus dicit, quod in quantum aliquid æternum mente sapimus, non in hoc mundo sumus: quod quidem verum est ex parte objecti in quod elevamur, quod est supra mundum et supra tempus; sed ex parte nostri qui elevamur, cum simus temporales, et in mundo, gratia temporalis est.

## QUÆSTIO XXXII.

Quod vero trigesimo secundo ponitur, « Datio aliquando importat communicationem solam, aliquando etiam emanationem, aliquando translationem; primo modo potest dici quælibet persona dare seipsam, secundo modo, una persona aliam, tertio modo quælibet persona donum creatum: » sane dicitur; non sane autem diceretur, si diceret, quod secundo modo quælibet persona dat quæcumque aliam, ut objiciens intellexit.

## QUÆSTIO XXXIII.

Quod autem trigesimo tertio ponitur, « Sancti novi testamenti magis sunt dispositi ad recipiendam gratiam quam Sancti veteris testamenti, propter impe-

<sup>1</sup> Parm. omittit: « sed quod alio modo auctor. »

dimentum peccati Adæ remotum ; » sane dicitur : quia etsi circumcisio a peccato originali purgaret in veteri lege, ut objiciens dicit; non tamen tanta copia gratiæ conferebatur sicut in baptismo, nec erat solutum pretium pro redemptione totius humani generis.

## QUÆSTIO XXXIV.

Quod vero trigesimo quarto ponitur, « Non aliud <sup>1</sup> esse animæ quam quod dat corpori oportet » verum est <sup>2</sup>. Si anima enim est forma corporis, forma autem et materia sunt unum secundum esse, quod non esset verum, si aliud esset esse formæ, et aliud esset esse quod dat materiæ. Nec propter hoc sequitur quod anima habeat esse corruptibile sicut corpus : quia illud esse corpus potest amittere, non autem anima : et propter hoc remanet anima habens esse a corpore separata.

## QUÆSTIO XXXV.

Quod vero trigesimo quinto ponitur, « Non fiebat missio visibilis in veteri testamento : » quod verum est, sed decipitur objiciens, quia non distinguit inter apparitiones et missiones : non enim omnis apparitio est missio visibilis, sed solum illa quæ fit ad declarandum <sup>3</sup> processum copiosum gratiæ in aliquo.

## QUÆSTIO XXXVI.

Quod vero trigesimo sexto dicitur, « In fine Ecclesiæ non erit tempus propagationis spiritualis ad multiplicationem fidelium ; » hoc potest verum esse, si intelligatur quantum ad tempus Antichristi : non quin illo tempore aliqui ad Ecclesiam convertantur, ut Augustinus dicit XX *De civ. Dei*; sed quia propter tribulationes non multi convertentur.

## QUÆSTIO XXXVII.

Quod vero trigesimo septimo ponitur, « Omne agere est a forma inhærente agenti ; » si intelligatur inhærente acci-

dentaliter, ut objiciens intellexit, falsum est ; si intelligatur inhærente, idest existente in agente quocumque modo, verum est : dicimus enim formam substantialem esse in igne, et deitatem in Deo.

## QUÆSTIO XXXVIII.

Quod vero trigesimo octavo dicitur, hoc falsum est, scilicet, quod « Deus non agit in anima, nisi per novum influxum ; » nam novus influxus <sup>4</sup> potest provenire in anima, sed nova dispositione recipientis, sicut nova illuminatio in aere ex nova dispositione aeris. Manifestum est enim, quod Deus in anima agit non solum causando in ea aliquem habitum, puta gratiæ vel virtutis, sed etiam inclinando liberum arbitrium ad hoc vel ad illud ; quod non proprie dicitur influere, sed magis movere ad actum.

## QUÆSTIO XXXIX.

Quod vero trigesimo nono ponitur, « In spiritualibus additum non recedit a simplicitate, » verum est, si intelligatur de additione quæ est per modum intentionis ; sicut illud quod est melius, dicitur addere in bonitate supra illud quod est minus bonum ; non est autem verum, si intelligatur de additione rei ad rem, vel speciei ad speciem : nam intellectus minus est simplex, qui habet plures species intelligibiles.

## QUÆSTIO XL.

Quod vero quadragesimo ponitur, « Filio convenit dari actu non aptitudine, » credo inconvenienter dici.

## QUÆSTIO XLI.

Quod vero quadragesimo primo ponitur « Verbum increatum <sup>5</sup> non est ratio proferendi alia verba, » simpliciter falsum est.

## QUÆSTIO XLII.

Quod vero quadragesimo secundo ponitur, « Quamvis idem sit finis utriusque,

<sup>1</sup> Parm. : « non aliud est esse. »

<sup>2</sup> Parm. : « oportet verum esse. »

<sup>3</sup> Parm. : « decorandum. »

<sup>4</sup> Parm. : « effectus... pervenire. »

<sup>5</sup> Cod. S. Vict. : « incarnatum. »

tamen alter est ordo utriusque ad illum finem, quia Spiritus sanctus ordinatur ad illum per modum efficientis, » inconvenienter dicitur, si per finem intelligatur illud propter quod est aliud : nam Spiritus sanctus non est propter aliquem effectum creatum ; si vero finis accipitur pro termino, sicut punctum dicitur finis lineæ, sic potest dici aliquis effectus creatus finis ad quem terminatur operatio personæ increatæ.

#### QUÆSTIO XLIII.

Quod vero quadragesimo tertio ponitur, « Quod procedit ab aliquo in aliud sicut in objectum, non dicitur respectu ejus procedere ut donum, » non habet aliquam necessariam rationem.

#### QUÆSTIO XLIV.

Quod vero quadragesimo quarto ponitur, « Æquale potest accipi dupliciter ; ut dicat solam relationem, aut ut cum relatione importat motum ad illam ; primo modo dicitur Pater æqualis Filio, secundo Filius æqualis Patri, » non est calumniabile quantum ad id quod obijciens tangit. Æqualitas enim solam relationem significat, præsupponit tamen unitatem. Quantum ad hoc tamen non videtur bene dictum, quod æquale quandoque importat motum ad æqualitatem : hujusmodi enim motum non significat æquale sive æqualitas, sed adæquatio. Dato tamen quod hujusmodi motum significaret, non sequitur inconveniens, ex eo quod dicit Filium hoc modo esse æqualem Patri : nam licet in Filio non sit motus ad æqualitatem, accipit tamen a Patre unde est ei æqualis : et ipsa acceptio quantum ad hoc idem facit in Filio quod motus ad æqualitatem in creatura.

#### QUÆSTIO XLV.

Quod vero quadragesimo quinto dicitur, « Filius dicitur æquari Patri secundum quod æquari quasi motum dicit ad quantitatem eandem quam consequitur relatio, » sanum habet intellectum : nam licet in Filio non sit motus, tamen

generatio habet aliquid simile motui quantum ad hoc quod accipere, sicut dicit Basilius, est commune Filio et creaturæ.

#### QUÆSTIO XLVI.

Quod vero quadragesimo sexto dicitur, « Una persona non habet esse in seipsa, » falsum est secundum quod dicitur Deus esse in seipso : quod exponitur magis negative quam affirmative, quia scilicet non indiget alio in quo sit, eo modo loquendi quo dicitur Pater esse a seipso, quia non ab alio.

#### QUÆSTIO XLVII.

Quod vero quadragesimo septimo dicitur, « Actus existendi triplex est : quidam omnino impermixtus, ut esse divinum ; alius semper potentiæ permixtus, tale est rerum generabilium, tertius modo medio se habens : est enim potentiæ permixtus in quantum est ab alio ; partim vero non, in quantum est simplex et simul totus completus, et tale est esse Angeli, » sanum potest habere intellectum. Non enim scribens intendit excludere ab esse angelico quaslibet<sup>1</sup> potentias, sed potentiam quæ est transmutabilis quæ est in rebus corruptibilibus.

#### QUÆSTIO XLVIII.

Quod vero quadragesimo octavo ponitur, « Posse et agere rerum æternarum non est totum simul, sed successive : non tamen continue, sed intereise : » verum est de actionibus secundum suam naturam : habent enim actiones successivas : unde Augustinus dicit, quod Deus « movet creaturam spiritualem per tempus, » et per tempus moveri est per actiones moveri ; sed actiones Angelorum, secundum quas fruuntur Verbo, sunt sine successione et secundum eas sunt in participatione æternitatis. Posse etiam Angeli dicitur intereism non quantum ad essentiam potentiæ, sed secundum quod posse dividitur contra agere, quia Angelus quandoque potest agere aliquid, quandoque agit.

<sup>1</sup> Cod. S. Vict. : « quamlibet potestatem. »



## QUÆSTIO XLIX.

Quod vero quadragesimo nono ponitur, « Materia a Deo distinguitur imperfecta distinctione, quamvis Deus ab ipsa distinguatur distinctione perfecta, » non satis proprie dicitur, licet sustineri possit. Proprie autem diceretur, quod materia prima distinguitur a Deo per aliquem<sup>4</sup> intellectum.

## QUÆSTIO L.

Quod vero quinquagesimo ponitur, « Ordo alicujus dicitur dupliciter vel ut subjecti quod ordinatur, vel ut rationis secundum quam ordo attenditur; primo modo non est in divinis ordo naturæ, sed secundo modo : » potest recte et non recte intelligi. Ordo enim non est nisi aliquorum distinctorum convenientium in aliquo : quæ enim in nullo conveniunt, nullum habent ordinem ad invicem. Ratio igitur ordinis potest accipi in divinis personis vel ex parte distinctionis personarum : et sic ratio ordinis non est natura, sed relatio; vel ex parte convenientiæ, et sic natura est ratio ordinis : propter hoc enim dicitur ordo naturæ in divinis personis, quia natura divina communicatur Filio a Patre, et ab utroque Spiritui sancto.

## QUÆSTIO LI.

Quod vero quinquagesimo primo ponitur, « Essentia in Deo una est re, sed habet multitudinem attributorum differentium in Deo sola ratione, in seipsis vero re, secundum naturas et rationes proprias : » falsum est, et improprie dictum, secundum quod sonant verba. Contradicit enim sibi ipsi, si striete verba discutiantur. Primo enim dicit, quod attributa quæ habet essentia divina in se, in Deo differunt sola ratione, et quod in seipsis differunt re : idem est enim haberi in essentia divina et esse in Deo. Hæc autem falsitas contingit non ex malo intellectu scribentis, sed quia nimis

truncate scripsit. Poterat sic bene dici : Essentia divina est una re, cui multa attribuuntur quæ in Deo differunt sola ratione; in rebus autem creatis re, secundum naturas et rationes proprias.

## QUÆSTIO LII.

Quod vero quinquagesimo secundo ponitur, « Ipsum suppositum divinum a natura generali habet rationem per se subsistendi, a natura speciali habet rationem intelligendi, a forma singulari rationem distinguendi, » male exceptum est. Addit enim exceptor, « divinum, » de suo. In scripto autem sic habetur : Ipsum autem suppositum a natura generali etc. et loquitur de supposito creato : unde parum supra dixerat : animal significat substantiam cum proprietate generali, homo cum proprietate speciali, Paulus cum individuali. Si vero intelligeretur de supposito divino, esset simpliciter male dictum, quia in divinis non est genus et species.

## QUÆSTIO LIII.

Quod vero quinquagesimo tertio ponitur, « Hypostasis in intellectu suo claudit et naturas communes, et proprietatem, non ita quod unum horum insit alteri, sed ita quod utrumque sibi, » bene dictum est; sed nimis calumniose ab objiciente reprehenditur : dicuntur enim proprietates inesse personis, sicut et esse in personis : et similiter essentia divina est in Patre, et est Pater. Per hunc autem modum omnia quæ de Deo dicuntur, reprobari possent, cum nihil de Deo verbis nostris proprie dici possit.

## QUÆSTIO LIV.

Quod vero quinquagesimo quarto ponitur, « Deus Pater in eadem specie, scilicet seipso sive essentia sua, se et omnia intelligit, ideo eandem speciem, idest Filium, ad se et ad omnia proferenda de se gignit : » improprie dictum est, sicut et si diceretur : Deus Pater de

<sup>4</sup> Parm. : « per aliquod imperfectum. »

se gignit sapientias ; esset autem proprie dictum, si diceret, Filium de se gignit sapientias : quod est eadem species . Proferre autem accipitur <sup>1</sup> pro dicere : unde convenientius diceretur : Deus Pater gignit de se Filium ad se et omnia dicenda : Pater enim se et omnia alia dicit Verbo suo, quod est Filius. Objiciens autem male exponit proferre, idest producere.

#### QUÆSTIO LV.

Quod vero quinquagesimo quinto ponitur, « Filius magis convenit cum Patre quam Spiritus in exterioribus, » in *Scripto* additur : idest in habitudine spirativa, scilicet communi spiratione, hoc acceptum videtur a Richardo de Sancto Victore, I lib. *De Trin.* Sed non videtur convenienter dici : quia neque in divinis dicitur aliquid interius et exterius proprie loquendo, neque Filius convenit magis cum Patre quam Spiritus sanctus, licet in pluribus relationibus cum eo conveniat.

#### QUÆSTIO LVI.

Quod vero quinquagesimo sexto ponitur, « Pater et Filius non sunt idem principium Spiritus sancti ; » licet a multis hoc dicatur propter articulum quem habet pronomen <sup>2</sup> inclusum, ratione cujus videtur ad personam pertinere ; tamen hoc videtur multum non cogere, quin possit concedi, quod Pater et Filius sint idem principium, sicut et unum : utimur enim pronomibus communiter et pro essentia et pro persona.

#### QUÆSTIO LVII.

Quod vero quinquagesimo septimo ponitur, « Loquendo de specie naturæ et de specie cognitionis, dicitur Filius species Patris, secundum quod nominativus construitur cum genitivo in ratione causæ efficientis, non in ratione causæ formalis : » non habet calumniam ex hoc quod objiciens tangit : non enim sequitur quod Filius sit causa efficiens Patris, vel e converso ; sed constructio est secundum habitudinem talis causæ secundum modum loquendi quo Grammatici utuntur. Vult autem hoc accipere, quod

Filius sit species Patris ex hoc quod Hilarius dicit : Species est in imagine. Augustinus autem speciem interpretatur pulchritudinem. Et licet Hilarius non dicat quod Filius sit species Patris ; potest tamen hoc modo intelligi, species vel pulchritudo Patris, sicut dicitur splendor Patris.

#### QUÆSTIO LVIII.

Quod vero quinquagesimo octavo ponitur, « Aliquid potest significari terminus actionis dupliciter, secundum rem, aliquid secundum rationem : primo modo terminus spirandi amorem respectu Patris est Filius, secundo modo Pater respectu sui ipsius : » nimis obscure dictum est. Hic tamen videtur esse sensus. Quia enim terminus actionis principaliter distinguitur ab agente ubi est realis distinctio, terminum actionis ab agente dixit esse terminum secundum rem : et sic est realis distinctio inter Patrem et Filium : ubi autem non est realis distinctio, dixit esse terminum secundum rationem : sicut in Patre cum diligit seipsum, distinguitur amans et amatum ratione tantum. Non autem ex hoc sequitur quod Pater aliter diligit se, aliter Filium, ut objiciens tangit ; sed sequitur, quod se diligit ut eundem, et Filium ut alium.

#### QUÆSTIO LIX.

Quod vero quinquagesimo nono ponitur, « Loquendo de amore essentiali, Spiritus sanctus se diligit seipso, loquendo de amore notionali, non : » credo falsum esse ; quia cum amor notionalis nihil aliud sit quam Spiritus sanctus ; sicut hæc est vera : Spiritus sanctus se diligit seipso, ita hæc vera : Spiritus sanctus diligit se amore notionali ; nisi forte dicatur, quod diligere notionaliter sumptum est spirare amorem : et sic diligere nullo modo convenit Spiritui sancto.

#### QUÆSTIO LX.

Quod vero sexagesimo ponitur, « Licet Spiritus sanctus non diligit se vel alte-

<sup>1</sup> Parm. : « accidit. »

<sup>2</sup> Al. : « propositum. »

ram personam notionaliter seipso, tamen diligit creaturam et personaliter et essentialiter seipso : » credo simpliciter esse falsum secundum prædicta.

#### QUÆSTIO LXI.

Quod vero sexagesimo primo ponitur cum dicitur : « Omnia in Verbo dicit Pater, non Verbum dicendi principium, sed terminus : » intelligendum est ex parte dicentis ; non <sup>1</sup> enim Verbum est principium Patri, quod dicatur ; sed dicitur a Patre ut principium aliorum quæ dicuntur per hoc Verbum : et sic cessat omnis objectio.

#### QUÆSTIO LXII.

Quod vero sexagesimo secundo ponitur, « Filius respectu alicujus actus paterni non potest esse principium, sed terminus, » eundem habet intellectum : etsi enim sit principium spirandi et creandi, non tamen est principium quo Pater spiraret vel crearet.

#### QUÆSTIO LXIII.

Quod vero sexagesimo tertio dicitur, « Non potest dici æternitas de æternitate : » male dictum est quantum ad duo : primo, quia ea ratione potest dici æternitas de æternitate, sicut sapientia de sapientia, vel natura de natura : secundo quia æternitas non repugnat rationi originis, quia et Filius et Spiritus Sanctus sunt æterni.

#### QUÆSTIO LXIV.

Quod vero sexagesimo quarto ponitur, « Persona non distinguitur seipsa, sed sua proprietate, » falsum est : nam personæ seipsis et proprietatibus distinguuntur.

#### QUÆSTIO LXV.

Quod vero sexagesimo quinto ponitur, « Solus Christus habet perfectionem co-

gnitionis in genere creaturæ, » verum est secundum aliquem modum perfectionis ; unde non obstat quod Beatorum cognitio est perfecta : nam multiplex est modus perfectionis.

#### QUÆSTIO LXVI.

Quod vero sexagesimo sexto ponitur, « Ideæ habent pluralitatem ex parte connotati propter respectum pluralitatem, et ille respectus æternus est : » verum est, sed respectus ille est intellectus a Deo. Deus enim ab æterno sicut intellexit multitudinem creaturarum, ita intellexit multitudinem respectuum, qui sunt inter ipsum et creaturas : et hoc sufficit ad pluralitatem idearum, quæ nihil aliud sunt quam rationes rerum, prout sunt intellectæ a Deo : et sic neque oportet essentiam divinam plurificari, neque oportet esse aliquam relationem realem æternam propter proprietates personales, ut objicitur.

#### QUÆSTIO LXVII.

Quod vero sexagesimo septimo ponitur, « Pluralitas idearum est in Deo secundum rationem, non tamen intellectus humani, vel angelici, sed divini, » patet ex præcedenti quomodo verum est : non tamen sequitur quod aliqua realis distinctio ex ideis sit in Deo, sed quod plura intelligantur ab ipso.

#### QUÆSTIO LXVIII.

Quod vero sexagesimo octavo ponitur, « Licet <sup>2</sup> secundum aliud, in instanti eodem secundum rem est Angelus in utroque termino, tamen multiplicato secundum rationem : » hoc simpliciter falsum est ; sed hoc dicit non asserendo, sed opinionem recitando.

#### QUÆSTIO LXIX.

Quod vero sexagesimo nono ponitur, « Scientia de eo quæ est per speciem alienam non est assimilatio cum rebus

<sup>1</sup> Al. : « sic. »

<sup>2</sup> Parm. : « vel. »

scitis, sed scientia per speciem propriam : » obscure dictum est, et male ab objiciente intellectum : non enim loquitur de specie qua Deus sciens scit<sup>1</sup>, sed de specie qua scitum scitur : quæ enim habent formam, sciuntur per proprias formas, sicut homo scitur ex hoc quod cognoscitur humanitas ejus ; quæ vero non habent formam, sicut privationes, cognoscuntur per opposita. Cognoscere enim cæcitatem, est cognoscere defectum visus.

#### QUÆSTIO LXX.

Quod vero septuagesimo ponitur, « Malum scitur a Deo per speciem alienam, non per propriam, unde quasi per accidens, non per se, » qualiter intelligendum sit, patet ex immediate præcedenti : tamen quod dicit per accidens non per se, non usquequaque bene dicitur : non enim cæcitas per accidens cognoscitur, cum cognoscitur esse privatio visus.

#### QUÆSTIO LXXI.

Quod vero septuagesimo primo ponitur, « Est actio Dei interior et exterior ; exterior cessat cessante objecto : » si intelligat quod Deus agat aliqua actione exteriori, quæ non sit sua essentia, omnino falsum est ; si vero actio Dei dicatur exterior non ratione sui ipsius, sed ratione objecti, sic sustineri potest.

#### QUÆSTIO LXXII.

Quod vero septuagesimo secundo ponitur, « Creare objectum suum ponit in tempore, et ideo actus est temporalis, et subjacens legibus temporalibus, et potest non esse antequam sit : » non est bene dictum de actione, sed de objecto tantum.

#### QUÆSTIO LXXIII.

Quod vero septuagesimo tertio ponitur, « Quædam dicuntur subjacere divinæ providentiæ ut facta, quædam ut fienda ;

mala ut jam facta, bona ut fienda : » obscure dictum est, et hunc habet sensum : quia per divinam providentiam ordinatur ut bona fiant, non autem ut mala fiant ; sed jam facta ordinantur ad aliquod bonum secundum æternam Dei providentiam ; unde cessat objectio objicientis.

#### QUÆSTIO LXXIV.

Quod vero septuagesimo quarto ponitur, « Prædestinatio est causa salutis<sup>2</sup> prima, liberum arbitrium proxima ; effectus vero magis sequitur conditionem causæ proximæ, ut patet in generatione inferiorum ex motu necessario superiorum : » quantum ad aliquid verum est, scilicet quantum ad contingentiam et necessitatem : quia si causa prima est necessaria, et secunda contingens, sequitur effectus contingens : sed non debuit proponi communiter. Quod vero objiciens calumniatur, quod Deus est magis causa proxima quam liberum arbitrium, omnino frivolum est : est enim Deus causa proxima secundum efficaciam actionis, et non secundum ordinem enunciationis<sup>3</sup> causarum.

#### QUÆSTIO LXXV.

Quod vero septuagesimo quinto ponitur, « Deus mera voluntate dat gratiam rationabiliter bene usuro, et non dat male usuro : » falsum est, si universaliter intelligatur, ut sit sensus quod nunquam dat male usuro ; si vero particulariter intelligatur, ut scilicet quandoque det male usuro, et quandoque non det, verum est.

#### QUÆSTIO LXXVI.

Quod vero septuagesimo sexto ponitur, « Divina potentia ab actu exteriori nullam recipit multipliciter, sed ab actu interiori potest recipere multipliciter aliquam : prout enim differunt actus notionales et essentielles interiores, sic differt potentia actui notionali et essentiali conjuncta : » diminute exceptum est. Proponitur enim primo quod divina po-

<sup>1</sup> Al. : « sit. »

<sup>2</sup> Cod. S. Vict. : « sanctitatis. »

<sup>3</sup> Parm. : « enumerationis. »

tentia una tantum est, si in sua radice consideretur, quæ est divina essentia; si autem consideretur divina potentia prout conjuncta actibus interioribus essentialibus et notionalibus, sic habet differentiam secundum modum quo dicitur differre in Deo absolutum et relatum <sup>1</sup>, vel essentialia vel notionalia. Potentia enim generandi ratione actus est notionalis, potentia intelligendi, essentialis: sed potentia creandi et gubernandi vel quicumque alius effectus adjungatur, est essentialis: et sic ex præcedentibus et sequentibus patet intentionem scribentis absque calumnia esse.

### QUÆSTIO LXXVII.

Quod vero septuagesimo septimo ponitur, « Quantitas virtutis non est idem quod quantitas potentiæ, sed universalior, quia quantitas virtutis attenditur sive in essendo, sive in operando, sive in durando, quantitas vero potentiæ in operando tantum: » bene diceretur, si adderetur quantitas potentiæ activæ; alias diminute dictum est.

### QUÆSTIO LXXVIII.

Quod vero septuagesimo octavo ponitur, « Infinitas potentiæ tota attenditur penes respectum ad possibilea <sup>2</sup>, infinitas autem essentiæ non solum attenditur penes esse hoc et non illud, sed penes esse in hoc et in altero quolibet ente, et <sup>3</sup> etiam in infinitis si essent infinita. » vel male, vel defective dicitur: si enim diceret sic: Infinitas potentiæ in quantum est potentia, tota attenditur penes respectum ad possibilea, posset sustineri: quia potentia importat respectum ad possibilea. Quod autem dicitur de infinitate essentiæ, non bene explanatur: non enim infinitas divinæ essentiæ est ex hoc quod Deus potest in infinitis, sed infinita est.

### QUÆSTIO LXXIX.

Quod vero septuagesimo nono ponitur, « Deus non est quidquid sibi est, in-

telligitur de his quæ sibi sunt secundum modum intelligendi, ut finitus, comprehensibilis: » addendum est secundum quemdam modum intelligendi: quod enim dicitur, Deus esse sibi finitus vel comprehensibilis, non eodem modo dicitur sicut res aliæ dicuntur finitæ et comprehensibiles, sed quodam speciali modo, ut intelligatur magis negative dictum quam affirmative: dicitur enim sibi comprehensibilis, quia suum intellectum non excedit; finitus vero, quia non est sibi ignotus vel impertransibilis secundum intellectum; sed bonus et sapiens dicitur affirmative.

### QUÆSTIO LXXX.

Quod vero octuagesimo ponitur, « Ille actus, scilicet generatio, est de Dei substantia, et ideo est ei essentialia esse infinitum; sed productio creaturarum est ex nihilo et ideo est illi essentialia finitum: » obscure dictum est quod dicit productionem creaturarum esse ex nihilo: et non sic est intelligendum, quasi ipsa actio productionis sit ex nihilo, sed productum; eo modo loquendi, quo diceretur quod operatio cultelli est ex ferro: similiter quod dicit productionem creaturarum esse aliquod finitum, intelligit ex parte producti, et non ex parte actionis: Deus enim actione infinita producit effectum finitum.

### QUÆSTIO LXXXI.

Quod vero octuagesimo primo ponitur, « Non est simile de omnipotentia, et de omniscientia; quia posse pertinet ad actionem, scire ad receptionem: in creatura vero non potest esse potentia activa infinita, sed passiva potest, quæ potest reduci in actum, secundum quod unitur agenti infinito: » obscure et defective dictum est: nam posse pertinet et ad actionem et ad receptionem. Addendum igitur fuit quod posse potentiæ activæ <sup>4</sup> ad actionem. Item non omne scire pertinet ad receptionem, sed scire intellectus possibilis humani: scire autem intellectus divini non est per receptionem. Quod

<sup>1</sup> Cod. Vict.: « et relatum essentialia et reale. »

<sup>2</sup> Cod. Vict.: « et est infinitas, si essent infinita. »

<sup>5</sup> Parm. hic et infra: « possibilea. »

<sup>4</sup> Supple: « pertinet, » sive aliquid simile.



vero dicitur quod in creatura potest esse potentia passiva infinita, non habet calumniam. Ut enim supra jam dictum est, potentia importat respectum ad possibile : unde potentia passiva creaturæ dicitur infinita, secundum quod ad infinita se habet : sicut potentia materiæ primæ se habet ad infinitas formas et figuras, et continuum est divisibile in infinitum : et similiter intellectus possibilis se habet ad infinitas species intelligibiles. Nec propter hoc sequitur quod aliquid creatum sit infinitum simpliciter, sed infinitum in potentia tantum. Hæc autem potentia passiva infinita in rebus naturalibus non reducitur in actum tota simul, sed successive ; sed potentia passiva animæ Christi ad intelligendum reducitur tota in actum, quia scit omnia scibilia ad quæ intellectus humanus est in potentia naturali, quæ sunt infinita ; et hoc habet ex unione Verbi quod est agens infinitum.

#### QUÆSTIO LXXXII.

Quod vero octuagesimo secundo ponitur, « Quod aliquis non possit quidquid aliquando potuit, potest esse dupliciter, aut quia non habet omnes potestates quas aliquando habuit, aut quia factum est impossibile quod aliquando fuit possibile : hoc secundo modo Deus non potest quicquid potuit, quia non est possibile Deo quicquid fuit possibile : quod enim actu præsens est aut præteritum, perdit rationem possibilis, » hoc omnino calumniam non habet : non enim Deus potest facere id quod est præsens simul cum est non esse, aut id quod præteritum est non esse præteritum. Ex magna autem ignorantia calumniantis procedit quod contra hoc objicit quia Deus potest id quod in nihilum cedit idem numero facere, et quod eadem caro numero resurgat, quamvis aliquid ejus in nihilum cesserit : quia ut hoc ei sine quæstione concedatur, non propter hoc sequitur quod id quod est præteritum non sit præteritum. Quamvis enim Deus faceret id quod in nihilum cedit iterum esse, non tamen faceret quod in nihilum non cessisset.

#### QUÆSTIO LXXXIII.

Quod vero octuagesimo tertio ponitur, « Quamvis primo malum non præcesserit meritum de condigno, præcessit tamen de congruo, scilicet non converti ad suum creatorem, » non bene dictum est : nam primum malum est prima culpa ; prima autem culpa non est pœna, unde nullum meritum habet. Si autem intelligit de primo malo pœnæ, sic oportet quod præcesserit ipsum meritum de condigno.

#### QUÆSTIO LXXXIV.

Quod vero octuagesimo quarto ponitur, « Mala esse futura in tempore, fuit verum ab æterno per accidens, non per se, scilicet per speciem sui oppositi, et quod est bona fieri ; » non proprie dictum est : nam licet malum cognoscatur per aliud, hoc tamen non est ei per accidens, sed per se, ut supra dictum est. Et licet bono æterno non opponatur malum proprie loquendo, tamen bonum creatum cui opponitur malum, fuit intellectum ab æterno ; et sic malum fieri potuit per speciem sui oppositi ab æterno intellecti. Nec sequitur plura esse ab æterno, ut objiciens dicit ; sed sequitur plura esse intellecta ab æterno : omnia enim temporalia sunt intellecta ab æterno.

#### QUÆSTIO LXXXV.

Quod vero octuagesimo quinto ponitur, « Licet mala futura esse sit verum ab æterno veritate æterna, non tamen fuit veritas æterna, quia non est verum per se, sed per accidens ; » male dicitur : omne enim verum ab æterno, in quantum est verum, est veritas æterna, licet res cui competit esse scitam vere ab æterno non sit æterna divina veritas <sup>1</sup>.

#### QUÆSTIO LXXXVI.

Quod vero octuagesimo sexto ponitur, « Innocentem interfici non est secundum se malum ; » hoc falsum est, si intelligatur interfici ab homine, prout verba so-

<sup>1</sup> Parm. : « æterna ut divina veritas. »

nant; sed interfici a Deo, qui occidit et vivere facit omnes qui vivunt et moriuntur tam innocentes quam nocentes, justum est: nisi forte dicatur, quod innocentes non occiduntur a Deo, quia mors est pœna peccati originalis, sicut objiciens tangit: unde nulla instantia est de parvulis Sodomorum.

#### QUÆSTIO LXXXVII.

Quod vero octuagesimo septimo ponitur, « Ad conformitatem voluntatis divinæ in actu non tenetur quis nisi habita caritate; » falsum est: quia quilibet tenetur habere rectum cor; quod non potest esse nisi <sup>1</sup> sit Deo conforme.

#### QUÆSTIO LXXXVIII ET LXXXIX.

Quod vero octuagesimo octavo, ponitur, « Qui actu cogitat articulos, tenetur credere: » et quod octuagesimo nono ponitur, « Qui actu cogitat divinam bonitatem, tenetur diligere; » falsum est, si universaliter intelligatur: non enim peccat quicumque cogitans articulos fidei non movetur actu fidei, et quicumque cogitans Dei bonitatem non movetur actu caritatis: quia aliquando speculative tantum potest aliquis considerare, ut in disputationibus accidit; et tamen non movetur aliquo actu voluntatis ad id quod speculatur.

#### QUÆSTIO XC.

Quod nonagesimo ponitur, « Voluntatem nostram conformare voluntati divinæ non tenemur in eo quod ignotum est; » universaliter verum est in his quæ ignorare possumus absque peccato; unde cessat calumnia objicientis.

#### QUÆSTIO XCI.

Quod vero nonagesimo primo ponitur, « Modus productionis alicujus ex aliquo triplex est: de sua natura, aut de aliena, aut de nulla, » improprie dicitur: quia productio alicujus de nulla natura, non est productio alicujus de aliquo; nisi

aliquid accipiatur valde communiter, secundum quod etiam nihil dicitur aliquid, et non ens dicitur ens, ut Philosophus dicit.

#### QUÆSTIO XCII.

Quod vero nonagesimo secundo ponitur, « Mutatio accipitur stricte et proprie, quæ habet duo extrema, a quorum uno tendit in alterum manente eodem subjecto, et sic accipitur mutatio naturaliter: » bene dictum est, si per extrema intelligat terminos, et per hoc quod dicit « naturaliter » intelligatur; idest, in scientia naturali: hoc enim quod hic dicitur, commune est tam mutationi naturali quam violentæ. Nec est instantia quam ponit objiciens, quod in generatione et corruptione non sunt duo extrema, sed termini generationis et corruptionis sunt privatio et forma, non autem duæ formæ.

#### QUÆSTIO XCIII.

Quod vero nonagesimo tertio ponitur, « In relationibus quæ sunt secundum intellectum non est inconveniens abire in infinitum; » omnino verum est secundum potentiam; sed secundum actum non contingit esse relationes infinitas in intellectu nostro: possum enim intelligere relationem ad subjectum, et relationem ipsius relationis, et sic in infinitum.

#### QUÆSTIO XCIV.

Quod vero nonagesimo quarto dicitur, « Fieri est passio, cum habeat materiam subjectum; sed creatio relatio tantum est, et non passio, » verum est, si fieri et passio accipiantur sicut in scientia naturali: passio enim est alicujus subjecti patientis, et fieri naturale est subjecto; creatio autem alio modo dicitur fieri et passio.

#### QUÆSTIO XCV.

Quod vero nonagesimo quinto ponitur, « Creatio passio in creatura est, et est accidens ejus, et posterius ea naturaliter

<sup>1</sup> Parm. omittit: « sit. »

secundum rem ; » verum est quod creatio secundum rem nihil ponit in creato nisi relationem tantum, a quo habet esse, quæ est quoddam accidens : et hæc quidem relatio quantum ad aliud esse quod habet in subjecto, accidens quoddam est et posterius subjecto ; sed in quantum est terminus actionis divinæ creantis habet quamdam rationem prioritatis <sup>1</sup>.

#### QUÆSTIO XCVI.

Quod vero nonagesimo sexto ponitur, « Per generationem non possunt fieri nisi quæ habent ante se simile suæ speciei, » non est verum in qualibet generatione, sed solum in generatione univoca.

#### QUÆSTIO XCVII.

Quod vero nonagesimo septimo ponitur, « Opinio Moysi fuit quod mundus non esset æternus ; » non satis reverenter dictum est : nisi forte dicatur per comparisonem ad opiniones aliorum : ut si diceretur, opinio Aristotelis talis fuit, sed opinio Moysi talis, ad designandum excellentiam hujus super alios.

#### QUÆSTIO XCVIII.

Quod vero nonagesimo octavo ponitur, « Sol qui est agens improporcionatus effectum communem in inferioribus facit : » non est verum si simpliciter accipiatur, sed solum secundum nos : sicut dicitur quod terra per comparisonem ad primum eolum obtinet locum conjuncti, et non habet proportionem ad ipsum, scilicet secundum aspectum nostrum.

#### QUÆSTIO XCIX.

Quod vero nonagesimo nono ponitur, « Creatura consequitur bonitatem Creatoris non in seipsa, sed in participativa similitudine, verum est : loquitur enim de creatura quantum ad esse, non quantum ad operationem, qua creatura rationalis fruitur ipso Deo : et sic cessat objectio.

#### QUÆSTIO C.

Quod vero centesimo ponitur, « Res dicuntur creaturæ in principio temporis quod mensurat primi mobilis motum, non sicut in mensurante creationem, sed sicut in adjacente ; » verum est si intelligatur, sicut in adjacente, idest simul existente ; non autem si intelligatur, sicut in adjacente, idest inhærente accidentaliter.

#### QUÆSTIO CI.

Quod vero centesimo primo ponitur. « Infinitum actu nihil præter Deum esse potest, sed infinitum actu pro aliqua conditione infinitatis potest esse. Illud autem infinitum actu est secundum quid, et non simpliciter ; » quia a parte post, non a parte ante. Hoc dictum est, quia si habet successionem, tunc non est totum in actu : si non habet successionem, tunc non est infinitum, sed quoddam simpliciter indefectibile.

#### QUÆSTIO CII.

Quod vero centesimo secundo ponitur, « In ævo secundum se non est fuisse neque futurum esse ; » verum est ; sed ævum non mensurat operationes Angeli quæ sunt successivæ, sed solum esse ipsius quod est uniforme ; et sic cessat objectio de Deo, qui non novit fuisse nec futurum esse, neque secundum operationem, et de confirmatione, vel culpa Angeli quæ pertinent ad operationes.

#### QUÆSTIO CIII.

Quod vero centesimo tertio ponitur, « Nihil ens unum potest esse in diversis, sed aliquod unum ens in potentia potest ; » sic intelligendum est : Nihil ens actu creatum potest esse in diversis naturaliter : non enim hæc est falsa, Cæcus non potest videre, licet Deus miraculose posset ei dare visum : et sic cessant objectiones. Materia autem prima una existens

<sup>1</sup> Al. : « proprietatis. »

in se considerata non per unitatem formæ, sed per carentiam omnis formæ est in potentia ad hoc quod sit in diversis, licet secundum quod est in diversis non sit una, sed multiplex.

#### QUÆSTIO CIV.

Quod vero centesimo quarto ponitur, « Materia secundum essentiam una est multiplicata in singulis, » improprie dictum est; proprie autem diceretur, materia secundum essentiam una, est multiplicata in singulis, vel magis in singula.

#### QUÆSTIO CV.

Quod vero centesimo quinto ponitur, « Infinitum simplex potest agere multa, finitum simplex non nisi unum; » verum est si bene intelligatur, ut scilicet accipiatur unum in genere vel specie, secundum quod exigit virtus simplex; ut si diceretur, quod auditus non potest cognoscere nisi unum, scilicet sonum.

#### QUÆSTIO CVI.

Quod vero centesimo sexto ponitur. « Quamvis in creatione animæ nova materia secundum esse creetur; tamen per essentiam materiæ præexistenti unitur et conjungitur, sicut punctus puncto; » nec bene nec intelligibiliter dicitur.

#### QUÆSTIO CVII.

Quod vero centesimo septimo ponitur, « Duplex est potentia : quædam determinata quæ agit per modum naturæ; quædam indeterminata, quæ agit per modum voluntatis; penes primum accipitur triplex potentia imaginis; penes secundum libertas arbitrii, » non bene dictum est : quia quæ ad liberum arbitrium pertinent, etiam ad voluntatem pertinent quæ est pars imaginis.

#### QUÆSTIO CVIII.

Quod vero centesimo octavo ponitur, « Animæ individuantur per materias corporum, quamvis ab eis separatæ retineant individuationem, sicut cera in impressione sigilli; » potest et bene et male intelligi : si enim intelligatur quod animæ individuantur per corpora, quasi corpora sint causa totalis individuationis animarum, falsum est; si vero intelligatur esse aliquantulum corpora causa individuationis animarum, verum est : unumquodque enim secundum quod habet esse, habet unitatem et individuationem. Sicut igitur corpus non est tota causa animæ, sed anima secundum suam rationem aliquem ordinem ad corpus habet, cum de ratione animæ sit, quod sit unibilis corpori; ita corpus non est tota causa individuationis hujus animæ; sed de ratione hujus animæ est quod sit unibilis huic corpori, et hæc remanet in anima etiam corpore destructo.

# OPUSCULUM IX.

## RESPONSIO AD MAGISTRUM JOANNEM DE VERCELLIS

### DE ARTICULIS XLII.

(EDIT. ROM. X.)

Reverendo in Christo Patri Fratri Joanni, Magistro Ordinis Fratrum Prædicatorum, Frater Thomas de Aquino cum debita reverentia se ipsum ad obedientiam promptam<sup>1</sup>. Paternitatis vestræ litteras feria quarta ante Pascha recepi, dum Missarum solemnia agerentur, multos articulos interclusa schedula continentes, quibus singulis mihi respondendum mandabatis, responsionis forma taxata : an scilicet Sancti sint illius sententiæ vel opinionis quam continet articulus. Et si Sancti sint vel non illius sententiæ vel opinionis quam articulus continet, sim<sup>2</sup> an ego, illius opinionis vel sententiæ. Et si non sim, an tolerabiliter dici possit. Quibus articulis statim sequenti die secundum formam a vobis traditam, prætermittis aliis occupationibus, secundum quod mihi occurrit, respondere curavi. Fuisset tamen mihi facilius respondere, si vobis scribere placuisset rationes, quibus dicti articuli vel asseruntur vel impugnantur. Sic enim potuissim magis ad intentionem dubitantium respondere. Nihilominus tamen, quantum percipere potui, in singulis ad id quod dubitationem facit, respondere curavi; hoc tamen in principio protestans, quod plures horum articulorum ad fidei doctrinam non pertinent, sed magis ad philosophorum dogmata. Multum autem nocet talia quæ ad pietatis doctrinam non spectant, vel asserere vel negare quasi pertinentia ad sacram doctrinam. Dicit enim Augustinus in V *Confess.* cap. v, § 9 : « Cum audio Christianum

aliquem ista, » scilicet quæ philosophi de cælo aut stellis, et de solis et lunæ motibus dixerunt, « nescientem, et aliud pro alio sentientem, patienter intueor opinantem hominem : nec illi obesse video, cum de te, Domine creator omnium nostrum, non credat indigna, si forte situs et habitus creaturæ corporalis ignoret ; obest autem, si hæc ad ipsam pietatis doctrinam pertinere arbitretur, et pertinacius affirmare audeat quod ignorat. » Quod autem obsit, manifestat Augustinus in I *Super Genesim ad litteram*, cap. xix, § 39. « Turpe est, » inquit, « nimis et perniciosum, ac maxime cavendum, ut Christianum de his rebus quasi secundum christianas litteras loquentem ita delirare quilibet infidelis audiat, ut, quemadmodum dicitur, toto cælo errare conspiciens risum tenere vix possit. Et non tam molestum est quod errans homo videatur<sup>3</sup>; sed quod auctores nostri ab eis qui foris sunt, talia sensisse creduntur; et cum magno eorum exitio de quorum salute satagimus, tamquam indocti reprehenduntur, atque respuuntur. » Unde mihi videtur tutius esse ut hujusmodi<sup>4</sup> quæ philosophi communiter<sup>5</sup> senserunt, et nostræ fidei non repugnant, nec sic esse asserenda ut dogmata fidei, et si<sup>6</sup> aliquando sub nomine philosophorum introduceantur; nec sic esse neganda tamquam fidei contraria; ne sapientibus hujus mundi contemnendi doctrinam fidei, occasio præbeatur.

Primus articulus in schedula proposi-

<sup>1</sup> Parm. : « promptum. » — Cod. Viet. : « præparatum. »

<sup>2</sup> Parm. omittit : « sim. » sed in notula dicit :  
supple : « sim. »

<sup>3</sup> « Deridetur. »

<sup>4</sup> Parm. : « hæc. »

<sup>5</sup> Al. : « communes. » Parm. : « communius. »

<sup>6</sup> Parm. : « licet. »



tus, est, an Deus moveat aliquod corpus immediate.

Ad quod respondendum videtur, quod ordo communis divinitus institutus hoc habet, ut corporalis creatura ab ipso moveatur spiritu mediante. Dicit enim Augustinus in III *De Trinit.* cap. IV : « Quomodo corpora grossiora <sup>1</sup> et inferiora per subtiliora et superiora quodam ordine reguntur, ita omnia corpora per spiritum vitæ <sup>2</sup> rationalem ; » et VIII *Super Genes. ad litteram* cap. XXII, dicit « Deus <sup>3</sup> spiritualem creaturam corporali præposuit. » Neque tamen divina potentia est huic ordini alligata, quin possit quandoque præter ordinem causarum secundarum aliquid agere, cum sibi placuerit ; sicut patet in operibus miraculosis. Dicit enim Augustinus, XXVI *Contra Faustum* c. III : « Appellamus naturam cognitum nobis cursum solitum naturæ, contra quem Deus cum aliquid facit, magna vel mirabilia nominantur. »

Secundus articulus est, an omnia quæ moventur naturaliter, moveantur ministerio Angelorum movente <sup>4</sup> corpora cœlestia.

Tertius articulus est, an Angeli sint motores corporum cœlestium.

His duobus articulis simul respondendum <sup>5</sup>. Videtur quod secundus dependet ex tertio, tertius autem articulus dependet ex primo. Si enim corpora reguntur a Deo mediante spiritali creatura ; ad ipsum autem opus regiminis divini pertinet motio corporum, ut Augustinus dicit VIII *Super Genes. ad litteram*, c. XX ; consequens est quod Deus per spiritualem creaturam moveat cœlestia corpora. Et ibidem expresse dicit Augustinus : « Sicut per tempus et locum movet corpus, ipse <sup>6</sup> tamen per tempus non est conditus spiritus ; ita per tempus movet conditum spiritum ipse tamen nec per tempus nec per locum motus conditor spiritus. » Esse quidem animata corpora cœlestia Damascenus negat in II libro cap. VI, licet hoc Augustinus sub dubio relinquat in II *Super Genes. ad litteram* cap. XVIII. Sed cœlestia corpora a spiritali creatura moveri, a nemine Sancto-

rum vel philosophorum negatum legisse me memini. Hoc igitur supposito quod Angeli moveant cœlestia corpora, hoc in dubium nulli sapienti vertitur quin omnes motus naturales inferiorum corporum ex motu cœlestis corporis cœsentur ; quod et ratione a philosophis est probatum, et experimento apparet <sup>7</sup>, et auctoritatibus Sanctorum confirmatur : quia, ut dictum est, Augustinus in III *De Trinit.* dicit, quod « corpora grossiora in inferiora per subtiliora et superiora quodam ordine reguntur : » et Dionysius dicit, IV capit. *De divinis nominibus*, quod « solis radius ad generationem sensibilium corporum confert, et ad vitam ipsam movet, et nutrit, et auget et perficit. » Unde consequens est quod omnia quæ naturaliter moventur, moveantur ministerio Angelorum movente <sup>8</sup> corpora cœlestia.

Quartus articulus est, an infallibiliter sit probatum, Angelos esse motores corporum cœlestium apud aliquos.

Quintus articulus est, an infallibiliter sit probatum, Angelos esse motores cœlestium corporum, supposito Deum non esse immediatum motorem illorum corporum.

Quibus <sup>9</sup> respondeo, quod philosophi tam platonici quam peripatetici hoc probare conati sunt rationibus quas efficaces reputaverunt : et eorum rationes fundantur super prædicto rerum ordine, quod scilicet Deus inferiora per superiora regit, ut etiam sancti Doctores tradunt. Quod autem corpora cœlestia a sola natura sua moveantur, sicut <sup>10</sup> corpora graviora et leviora, est omnino impossibile : unde nisi moveantur a Deo immediate, consequens est quod vel sint animata cœlestia corpora, et moveantur a propriis animabus ; vel quod moveantur ab Angelis, quod melius dicitur. Fuerunt tamen aliqui philosophi, qui posuerunt corpus primum cœlestium corporum moveri a Deo, non mediante alia intelligentia, sed mediante anima propria ; alia vero cœlestia corpora moveri mediantibus intelligentiis et animabus.

Sextus articulus est an omnia inferiora naturaliter in esse producta per viam

<sup>1</sup> Al. : « crassiora. »

<sup>2</sup> « Et Spiritus vitæ irrationalis per Spiritum vitæ rationalem. »

<sup>3</sup> « Subdit creaturam corporalem creaturæ spiritali. »

<sup>4</sup> Parm. : « moventium. »

<sup>5</sup> Parm. : « respondendum videtur, quia... :

tertius ex primo. »

<sup>6</sup> « Ipse tantum per tempus motus conditus Spiritus. »

<sup>7</sup> Parm. : « patet. »

<sup>8</sup> Parm. : « moventium. »

<sup>9</sup> Parm. : « his. »

<sup>10</sup> Parm. : « sicut gravia et leviora. »

motus, regantur per Angelos mediantibus motibus corporum cœlestium.

Septimus articulus est, an omnia inferiora quæ naturaliter in esse producuntur, fiant per Angelos mediantibus motibus corporum cœlestium, secundum quod facere attribuitur causis naturalibus; id est educantur de potentia in actum.

Horum etiam responsio dependet ex præmissis. Si enim corpora cœlestia per suum motum sunt causa<sup>1</sup> naturalium corporum, consequens est quod si Angeli sunt causa motus cœli, sunt etiam causa generationis et corruptionis et omnium motuum naturalium inferiorum corporum: unde et Gregorius in IV *Dialogorum* dicit, quod « in hoc mundo visibili nihil nisi per creaturam invisibilem disponi potest. » Et ut breviter dicam, omnes prædicti articuli vel parum vel nihil faciunt ad doctrinam fidei, sed sunt penitus physici<sup>2</sup>.

Octavus articulus est, an ordine naturæ faber posset movere manum ad aliquid operandum sine angelico ministerio movente corpora cœlestia.

Huic videtur per distinctionem respondendum. Quod enim aliquis non posset movere manum, potest contingere<sup>3</sup> dupliciter. Uno modo ex defectu animæ moventis, ut scilicet animæ deficiat potentia motiva corporis; et sub hoc intellectu falsum est quod dicitur: nam anima fabri movet manum per liberum arbitrium, quod non subiacet neque cœlestibus corporibus, neque Angelis, sed soli Deo. Alio modo potest intelligi ex defectu corporalis membri; sicut homo qui habet manum ligatam vel aridam, non potest eam movere: et hoc modo, cessante motu cœli, organum corporis non posset ab anima moveri, quia non remaneret vivum; quia corpora cœlestia ad vitam movent inferiora corpora, ut patet ex auctoritate Dionysii supra inducta. Si tamen divina virtute præter naturæ ordinem corpus hominis vivum remaneret cessante motu cœli, et conservaretur in dispositione illa qua est mobile ab anima, posset homo per liberum arbitrium quamlibet partem movere<sup>4</sup>.

Nonus articulus est, an omnia beneficia exteriora naturaliter de potentia ad ac-

tum reducta habeamus per Angelos moventes corpora cœlestia.

Dico, quod hujus etiam responsio dependet ex præmissis. Naturaliter enim de potentia ad actum deduci, nihil est aliud quam naturaliter moveri. Si ergo omnis motus naturalis inferiorum corporum causatur a motu superiorum corporum; consequens est quod hujusmodi beneficia proveniant ex ministerio Angelorum moventium cœlestia corpora.

Decimus articulus est, an propter prædicta beneficia quæ habemus per Angelos, eos revereri debeamus.

Ad hoc plana est responsio: quia non debemus eos revereri reverentia latræ ut auctores dictorum beneficiorum, sed ut ministros reverentia dulciæ, quia propter hæc beneficia debemus eos diligere. Dicit enim Augustinus in I de *Doct. christiana*, c. xxvii, §. 33: « In<sup>5</sup> præcepto quo debemus diligere proximum, et sancti Angeli continentur, a quibus tanta nobis officia impenduntur misericordiæ. »

Undecimus articulus est, an Angeli moventes corpora cœlestia, mediantibus motibus corporum cœlestium sint factores omnium corporum humanorum naturaliter in esse productorum, secundum quod facere attribuitur causis naturalibus, id est sint de potentia in actum eductores.

Duodecimus articulus est, an Angeli moventes cœlestia corpora, mediantibus motibus cœlestium corporum sint factores etiam omnium animalium irrationalium quæ moventur vel vivunt tam in mari quam in terra, naturaliter in esse productorum.

Tertius decimus, an etiam omnium terræ nascentium eodem modo.

Quartus decimus, an etiam omnium metallorum etc.

Ad omnes istos articulos est una responsio. Quia cum corpora cœlestia sint causa generationis inferiorum corporum, ut patet per auctoritatem Dionysii supra inductam, consequens est quod Angeli moventes cœlestia corpora sint etiam hujus generationis causa: unde Augustinus in libro LXXXIII *Questionum* dicit, quod unaquæque res visibilis in hoc

<sup>1</sup> Parm.: « causa generationis et corruptionis, et omnium motuum naturalium inferiorum. »

<sup>2</sup> Vel: « philosophici. »

<sup>3</sup> Parm.: « esse. »

<sup>4</sup> Parm.: « movere corporis. »

<sup>5</sup> Manifestum est hoc præcepto quo jubemur... etiam sanctos Angelos contineri. »

mundo habet angelicam potestatem sibi præpositam.

Quintus decimus articulus est, an Angelus habeat virtutem infinitam inferius.

Ad quod dicendum, quod hoc potest capi dupliciter. Uno modo quod virtus Angeli non sit comprehensibilis ab aliquo inferiorum; et hoc modo inducitur in libro *De causis*, et a philosophis Platoniceis: et Dionysius dicit, vi cap. *Cælestis hierarchiæ*: « Quot quidem sunt et quales supercælestium substantiarum ornatus, et qualiter secundum ipsas hierarchiæ perficiuntur, solam manifeste scire dico deificam ipsarum hierarchiam; præterea ipsas cognovisse proprias virtutes et illuminationes, et ipsorum sanctam et supermundanam bonam ordinationem. » Impossible est enim nos scire supercælestium mentium ministeria. Hoc enim dicitur esse unicuique infinitum quod est ei incomprehensibile. Alio modo potest sic intelligi quod habeat infinitam virtutem supra ea quæ infra ipsum sunt; et hoc est falsum et erroneum. Posset etiam dici virtus Angeli infinita inferius, quia non est finita <sup>1</sup> per aliquam materiam corporalem in qua recipiatur, sicut sunt finitæ virtutes formarum materialium. Est tamen simpliciter finita virtus Angeli secundum mensuram suæ essentiæ, quæ finita est.

Sextus decimus articulus est, an Angelus possit movere totam molem terræ, et usque ad globum lunæ, licet nunquam moverit vel moturus sit.

Videtur mihi dicendum, quod naturali sua virtute hoc non potest; quia nulla virtus creaturæ potest immutare ordinem principalium partium universi, ad quem pertinet quod terra sit in medio locata. Videtur tamen mihi contrarium posse tolerari absque fidei periculo, si tamen referat intentionem suam ad ponderis quantitatem, non ad prædictum ordinem universi. Certum est enim quod naturali sua virtute Angelus potest alicujus ponderis terram movere; sed usque ad quanti ponderis quantitatem movere possit, non potest a nobis determinari <sup>2</sup>.

Decimus septimus articulus est, an

Angeli moventes orbes sint de ordine <sup>3</sup> virtutum.

Videtur mihi quod satis probabiliter hoc dici possit: nec video quid inconveniens inde sequatur, cum et Origenes exponens illud Matth. xxiv: *Virtutes cælorum commovebuntur*, dicat « quod conveniens est cælorum rationabiles virtutes pati stuporem remotas a primis functionibus suis. » Hoc <sup>4</sup> tamen omnino rendum non videtur.

Decimus octavus articulus est, an illud Eccl. 1, 6: *In circuitu pergit spiritus*, sic possit exponi: Spiritus, puta angelicus, pergit in circuitu cæli, et pergendo cælum movere facit in circuitu.

Non video quare hæc expositio sustineri non possit; præsertim cum dicat Augustinus in I *Super Gen. ad litteram*, cap. xx, § 40, quod ideo multis exitibus verba Scripturæ exponuntur, ut se ab irrisione cohibeant litteris sæcularibus inflati.

Decimus nonus articulus est, an si motus cæli cessaret, ordine naturæ omne ferrum in elementa in instanti resolveretur.

Vigesimus articulus est, an similiter esset de omni elemento corruptibile.

Vigesimus primus articulus est, an similiter totus mundus quantum ad corruptibile.

Vigesimus secundus articulus est, an si non esset lux <sup>5</sup> stellarum, ordine naturæ omnes homines corruptibiles morerentur in instanti.

Vigesimus tertius articulus est, an similiter omnia animalia irrationalia.

Ad omnia ista est eadem responsio. Ut enim dictum est, superiora corpora per suum motum et radios <sup>6</sup> sunt causa generationis et corruptionis et vitæ corporalis in inferioribus corporibus. Non est ergo dubium quin remota tali causa removeatur effectus: præsertim cum valde consonum fidei videatur, secundum quam ponimus, quod transcunte figura hujus mundi, et motu cæli cessante per voluntatem Dei, sola elementa innovata remanebunt, et homines immortales effecti erunt virtute di-

<sup>1</sup> Al.: « infinita, » et mox: « infinitæ. »

<sup>2</sup> Nec cod. S. Genov. nec cod. Vict. habent quod sequitur in Parm.: « si autem quæritur de motu circulari, per quem dictus ordo non variatur, videtur quod naturaliter terra quiescat, ut vult Philosophus in lib. *De cælo*.

<sup>3</sup> Parm.: « numero. »

<sup>4</sup> Nec cod. S. Genov., nec cod. Vict. habent: « Hoc tamen omnino asserendum non videtur. »

<sup>5</sup> Parm.: « lex. »

<sup>6</sup> Parm.: « lumen. »

vina. Sed si fiat vis in hoc quod dicitur, « in instanti, » dicitur quod licet talis resolutio non sit in instanti, cum sit motus, principium tamen ejus in instanti esse potest.

Vigesimus quartus articulus est, an post diem judicii omnia corpora sanctorum erunt incorruptibilia per naturam, sive naturaliter, quia cessabit motus cœli, qui est causa corruptionis.

Vigesimus quintus articulus, an similiter corpora damnatorum.

Ad hoc videtur dicendum, quod cum dicitur aliquid incorruptibile esse per naturam, significatur naturam esse incorruptionis causam; cum præpositio « per » causam designet. Est autem duplex causa; scilicet per se, et per accidens. Per se quidem causa alicujus est quod directe est illius causa per suam virtutem, sicut aqua est causa infrigidandi; per accidens autem est causa alicujus, quod indirecte causat illud, puta removendo causam contrariam; sicut removens ignem de domo est causa infrigidationis ejus. Cum ergo dicitur cessante motu cœli corpus hominis esse incorruptibile per naturam, si ly « per » dicit causæ per se, falsum est: non enim ad hoc se extendit virtus naturæ creatæ, ut causare possit incorruptionem corporis ex contrariis compositi. Si autem dicit causam per accidens, sic aliquo modo verum est quod dicitur; quia subtracta causa universalis corruptionis naturalis, subtrahitur corruptio. In hoc etiam sensu melius diceretur negative quam privative: puta si sic diceretur: Cessante motu cœli, corpus hominis, si divina virtute remaneat, non erit corruptibile per naturam. Verum, quia semper id quod est per se potius est eo quod est per accidens; potius videtur dicendum, quod erit corruptibile per naturam, sed incorruptibile per gratiam, vel justitiam<sup>1</sup>. Vel si contrarium dicatur, debet dici cum determinatione sanum sensum exprimente.

Vigesimus sextus articulus est, an damnati in suis corporibus in inferno sentiant pœnas ignis per apprehensionem et receptionem speciei ignis per modum afflictivum et læsivum.

Ad hoc dicendum est, quod cum secundum fidem dicamus quod<sup>2</sup> corpora damnatorum in inferno afflictionem ex igne patiantur, nec tamen<sup>3</sup> consumantur. secundum illud Augustini, XXI *De civit. Dei*, c. 11: « Humana corpora non solum nunquam morte » dissolventur, « sed in æternorum quoque ignium » durabunt « tormentis: » necesse est in eis ponere id quod afflictionem facit, idest receptionem speciei sensibilis. Oportet etiam removere id quod consummare posset, scilicet transmutationem naturæ corporum ipsorum<sup>4</sup>. Unde non video quid calumniæ habeat articulus.

Vigesimus septimus articulus est, an sententia Christi in judicio erit corporalis, vel spiritualis.

Dicitur, quod licet utrumque esse possit, probabilius tamen videtur quod sit spiritualis, quia et alia quæ tunc, spiritualiter divina virtute agentur. Ut enim dicit Augustinus, XX *De civit. Dei*, c. xiv, divina virtute « fiet ut cuique opera sua vel bona vel mala, euncta in memoriam revocentur, et mentis intuitu mira celeritate cernantur, ut accuset vel excuset scientia conscientiam, atque ita simul omnes et singuli judicentur. »

Vigesimus octavus articulus est an Christus non<sup>5</sup> venit tollere nisi peccatum originale principaliter, seu principalius inter omnia peccata quæ tollere venit.

Ad quod dicendum, quod Christus, quantum est in se, venit tollere omnia peccata. Donum enim Christi, ut Apostolus dicit Rom. v, 15, excedit peccatum Adæ: nam judicium<sup>6</sup> ex uno in condemnationem; gratia autem ex multis delictis in justificationem. Tanto autem principalius contra aliquod peccatum venit, quanto est majus. Peccatum autem quod originaliter contrahitur, licet sit minus gravitate et reatu pœnæ, est tamen maximum communitate, secundum illud Apostoli Rom. v, 12: *In quo omnes peccaverunt*. Et quantum ad hoc potest dici, quod Christus principaliter venit tollere originale: unde super illud Joan. 1, 29: *Ecce qui tollit peccatum mundi*, dicit Glossa: Peccatum mundi dicitur peccatum originale, quod est commune toti<sup>7</sup> mundo.

<sup>1</sup> Al. deest: « sed incorruptibile... justitiam. »

<sup>2</sup> Parm. omittit: « quod. »

<sup>3</sup> Parm.: « nec tempus consumi. »

<sup>4</sup> Parm.: « corporum. Nec. »

<sup>5</sup> Parm. omittit: « non. »

<sup>6</sup> Sic cod. Vict. — Parm.: « nam unum tantum. »

<sup>7</sup> Al.: « totius mundi. »

Vigesimusnonus articulus est, an nomina sanctorum digito Dei scripta sint in cœlis ad honorem eorum.

Videtur mihi non esse verum. Si tamen dicatur quod sic, nullum est periculum.

Trigesimus articulus est, an nomina impiorum in inferno existentium, digito Dei scripta sint in terra ad vituperium eorum.

Non hoc verum puto, si corporaliter intelligatur. In nullo tamen fides obsistit, ut mihi videtur.

Trigesimus primus articulus est, an infernus sit in centro vel circa centrum terræ.

Ad hoc dicendum videtur quod locus inferni sit infra terram : unde Augustinus in libro *Retractationum* II, cap. xxiv, dicit : « De inferis magis, ut videtur <sup>1</sup>, dicere debuissim quod sub terris sint, quam rationem reddere cur sub terris esse dicantur. » Ubi tamen sit infernus, an circa centrum terræ, vel circa superficiem, nihil arbitror ad doctrinam fidei pertinere : et superfluum est de talibus sollicitari asserendo vel improbando.

Trigesimus secundus articulus est, an liceat disputare an anima Christi sit ex traduce, determinando quod verum est.

Hic articulus dubie positus est. Si enim intelligatur quod liceat disputare et determinare hoc esse verum quod anima Christi sit ex traduce; erroneum est, quia nullius hominis anima est ex traduce : multo ergo minus anima Christi, cujus etiam corpus est virtute Spiritus sancti formatum. Si autem intelligatur quod liceat disputare an anima Christi sit ex traduce, et circa hoc determinare illud quod veraciter fides catholica docet, scilicet quod non; non video quare hoc non liceat; cum tota die <sup>2</sup> in scholis Magistrorum disputetur et de Trinitate et de aliis articulis fidei, non propter dubitationem, sed propter veritatis intellectum <sup>3</sup> et confirmationem. Posset tamen hoc per accidens in aliquo casu esse malum : puta si coram simplicibus et paratis ad errandum talia disputarentur.

Trigesimus tertius articulus est, an illud verbum Philosophi *De animalibus* lib. XVI, cap. vi, scilicet : « Corpus spermatis, cum quo exit spiritus, qui est

virtus principii animæ, qui est separatus a corpore, et est res divina; et talis dicitur intellectus : » sic possit vel debeat exponi, id est : « Ille spiritus seu virtus formativa dicitur intellectus per similitudinem, quia sicut intellectus operatur sine organo, ita illa virtus. »

Dicitur quod illam auctoritatem Philosophi hoc modo exponit Commentator ejus *Meteororum* VII. Nec dicitur res divina quia sit per essentiam Deus; sed per quamdam similitudinis participationem; sicut quodlibet magnum et admirabile solet dici divinum. Nec video quid pertineat ad doctrinam fidei, qualiter Philosophi verba exponantur.

Trigesimus quartus articulus est, an aliquid de substantia cœli intret compositionem corporis naturaliter compositi ex quatuor elementis per effectum suæ virtutis.

Trigesimus quintus articulus est, an aliquid de substantia cœli intret compositionem corporis vivi et animati.

Dicitur quod cum aliquid dicitur de substantia cœli, si hæc præpositio « de » designet causam materialem; sic credo esse falsum, non tamen periculosum, nec contra fidem. Si autem designet habitudinem causæ efficientis; sic puto non solum esse verum, sed necessarium, ut patet per auctoritatem Dionysii supra inductam : et hic sensus determinatur per hoc quod dicitur, « per effectum suæ virtutis. »

Trigesimus sextus articulus est, an corpora sanctorum glorificata lucebunt plus quam sol, et sol septuplum quam nunc, et corpora sanctorum septies magis sole <sup>4</sup>.

Dicitur ad primum quod Chrysostomus exponens illud Matth. XIII : *Tunc justi fulgebunt sicut sol in regno Patris eorum*, dicit : Non quia ita solum sicut sol, sed quia hoc sidere nihil lucidius scimus. Alia vero quæ sequuntur, non occurrit quare tute dici non possint; præsertim cum in innovatione mundi certum sit secundum catholicam doctrinam quod tota creatura corporalis meliorabitur, quæ *revelationem filiorum Dei expectat*, ut dicitur Rom. VIII, 19. Hieronymus etiam dicit super illud Matth. XXIV : *Sol obscurabitur, et luna non dabit lumen suum* : « Non

<sup>1</sup> « Magis mihi videor dicere debuisse. »

<sup>2</sup> Parm. : « quotidie. »

<sup>3</sup> Parm. addit : « et manifestationem. »

<sup>4</sup> Parm. : « septuplum quam tunc sol. »



hoc diminutione luminis accidet, cum solem legamus septuplum luminis habiturum; sed comparatione veræ lucis, omnia visui apparebunt tenebrosa.»

Trigesimus septimus articulus est, an Angeli quos vidit Maria Magdalena circa sepulcrum Domini post ejus resurrectionem, lacrymabili voce consolati sint eam.

Ad hoc mihi dicendum videtur quod ea quæ in apparitionem Angelorum contingunt, ad quamdam significationem sunt referenda, non ad proprietatem substantiæ ipsorum, ut patet per Dionysium, ult. cap. *Cæl hierarh.*; unde sicut in Scripturis sacris aliqua per similitudinem leguntur de Deo ad iram vel tristitiam vel aliquid humanum pertinentia; ita etiam nihil prohibet in apparitionibus Angelorum aliquid tale propter aliquam significationem demonstrari. Et licet Angelis resurrectionis nuntiis magis congruant signa gaudii propter rem nuntiatam, nihil tamen prohibet quin aliqua doloris signa ostenderent, ut tales se mulieri flenti ostenderent, qualem se ipsam interius exhibebat, sicut Gregorius dicit de Domino apparente duobus discipulis in effigie peregrini.

Trigesimus octavus articulus est, an homo posset videre oculo mentis omnia quæ aguntur in corde hominis habentia impressionem exterius in corpore, si haberet visum acutum ut diabolus.

De hoc ita dicit Augustinus in libro *De divinatione dæmonum*: «Hominum dispositiones non solum voce prolatas, sed et cogitatione conceptas dæmones<sup>1</sup> cum signa quædam ex animo exprimuntur in corpore, tota facilitate perdiscunt»: et in libro II *Retractationum*, c. xxx dicit: «Pervenire ista ad notitiam dæmonum, per nonnulla experimenta compertum est. Sed utrum signa quædam dentur ex corpore cogitantium, illis sensibilia, nos autem latentia; an<sup>2</sup> autem alia in speciali cognoscant? aut difficillime potest ab hominibus, aut omnino non potest inveniri.» Ex quibus patet quod dæmones cogitationes cordium cognoscere possunt quæ per aliquos corporis motus manifestantur. Nec est mirum, cum etiam subtiles medici per pulsum deprehendant interiores animæ passio-

nes; et dicitur Eccl. xix, *Ex visu cognoscitur vir, et ab occursu faciei cognoscitur sensatus.*

Trigesimus nonus articulus est, an licet<sup>3</sup> ascendendo immediate Mars sit supra Solem quantum ad situm, tamen sit immediate supra Lunam quantum ad dominium<sup>4</sup> in prima hora Martis.

Ad hoc dicendum videtur quod si dominium Martis et Lunæ referatur ad liberum arbitrium, est erroneum. Si autem referatur ad corporales et naturales res, nulla sequitur absurditas in fidei doctrina. Dicit enim Augustinus, V, *De civ. Dei*, c. vi, «Non usquequaque absurde<sup>5</sup> dici potest ad solam corporum differentiam afflatus quosdam valere sidereos;» immo etiam hoc verum est secundum ordinem dierum: nam cum planetis septem horæ secundum astrologos deputentur, cum vigintiquatuor horæ sint naturalis diei, consequens est ut prima feria in vigesima secunda hora diei Luna dominium habeat, sicut et in prima ejusdem: unde reincipiendo a Saturno, vigesimatertia hora ei deputabitur, et vigesimaquarta Jovi, prima diei sequentis Marti deputabitur. Sed hoc nihil ad doctrinam fidei pertinet nec asserere nec improbare.

Quadragesimus articulus est, an in inferno erit fletus corporalis quantum ad lacrymarum resolutionem.

Puto quod non erit: quia cum fletus ille sit infinitus, et nihil corporibus damnatorum adjiciatur per nutrimentum, sequeretur quod aliquando per fletum corpora resolverentur et consumerentur; quod est contra fidem.

Quadragesimus primus articulus est an in inferno erit corporalis vermis.

Hoc Augustinus sub dubio relinquit, XXI, *De civ. Dei*, licet in XX ejusdem dicat hoc probabilius videri quod ignis referatur ad corpus, vermis tropice ad animam: quod mihi probabilius videtur.

Quadragesimus secundus articulus est, an sciri possit distantia superficiæ terræ ab ejus centro.

Videtur quod sic, secundum tamen illum modum<sup>6</sup> qui habetur in demonstrationibus astrologicis, quæ ita non sunt certæ sicut demonstrationes geometricæ vel arithmeticæ.

<sup>1</sup> Parm.: «consignant; quæ cum ex anima.»

<sup>2</sup> «An alia vi et ea spiritali.»

<sup>3</sup> Cod. Viet.: «sicut in ascendendo.»

<sup>4</sup> Cod. Viet.: «ad dominium in hora mortis.»

<sup>5</sup> «Dici posset ad solas... differentias.»

<sup>6</sup> Parm.: «secundum tamen modum demonstrationis astrologicæ, non geometricæ,»

Hæc sunt, Pater reverende, quæ<sup>1</sup> mihi respondenda occurrunt ad præsens articulis a vobis transmissis, quamvis plures eorum sint præter limites theologicæ facultatis. Sed ex vestra injunctioe factum est mihi debitum quod principii officii professio nullatenus requirebat.

<sup>1</sup> Parm. : « quæ pro nunc occurrunt, licet plura sint extra theologiæ limites requisita. »

---

# OPUSCULUM X.

## RESPONSIO DE ARTICULIS XXXVI AD LECTOREM VENETUM

(EDIT. ROM. XI.)

Lectis vestris litteris, in eis inveni articuloꝝ multitudinem numerosam, super quibus a me vobis responderi infra quatrimum vestra caritas postulabat.

Et licet essem in aliis plurimum occupatus, ne tamen deessem vestrae dilectionis obsequio, dilatis parumper aliis quibus me intendere oportebat, quaestioꝝ a vobis propositis proposui per singula respondere.

### ARTICULUS I.

Primus ergo articulus est, an Angeli sint motores caelorum.

Super quo duxi <sup>1</sup> taliter respondendum quod hoc non solum a Philosophis est multipliciter probatum, verum etiam a sanctis Doctoribus evidenter asseritur. Dicit enim Augustinus in V *De trinitate*, quod « sicut corpora grossiora et inferiora per subtiliora et superiora quodam ordine reguntur, ita omnia corpora per spiritum vitae rationalem. » In libro etiam LXXXIII *Quaestionum* dicit quod « unaquaeque res visibilis in hoc mundo habet angelicam potestatem sibi praepositam. » Gregorius etiam dicit in IV *Dial.*, quod « in hoc mundo visibili nihil nisi per creaturam invisibilem disponi potest. »

### ARTICULUS II.

Secundus articulus est, an aliqui existimaverunt semper infallibiliter hoc esse probatum.

Ad hoc respondeo quod libri Philosophorum hujusmodi probationibus abundant. quas ipsi demonstrationes putant : mihi igitur <sup>2</sup> videtur quod demonstrative probari possit quod ab aliquo intellectu corpora caelestia moveantur, vel a Deo immediate, vel mediantibus Angelis ; sed quod mediantibus Angelis ea moveat, magis congruit rerum ordini, quem Dionysius infallibilem asserit ; ut inferiora a Deo per media secundum cursum communem administrantur.

### ARTICULUS III.

Tertius articulus est, an Angeli moveant caelos suo imperio, potestate eis a Deo tradita.

Super quo quid dubium esse possit, plane non video. Non enim aestimo aliquem dubitare quin omne quod Angeli faciunt, operentur potestate eis a Deo tradita. Si vero hoc vertatur in dubium quod dicitur eos movere caelestia corpora suo imperio, irrationabilis dubitatio videtur. Non enim possunt movere aliquod corpus per contactum quantitatis, cum sint incorporei, sed per contactum virtutis. Nihil autem in Angelis altius quam eorum intellectus, cum et ipsi a Dionysio intellectus vel mentes nominentur : unde eorum motiones a virtute intellectus procedunt. Ipsa autem conceptio intellectus, secundum quod habet efficaciam aliquid transmutandi, imperium nominatur : unde si movent, nullo modo nisi per imperium movere possunt.

<sup>1</sup> Parm. : « dixi. »

<sup>2</sup> Parm. : « etiam. »

## ARTICULUS IV.

Quartus articulus est, an Angeli moventes cœlos sint de ordine Virtutum.

Hoc quidem et mihi videtur: præcipue si ordo Virtutum dicatur medius ordo secundæ hierarchiæ, ut vult Dionysius. Hic enim ordo tenet primum locum inter exequentes exteriora ministeria: unde Dionysius viii cap. *Cœlestis hierar.* dicit quod « nomen Virtutum ostendit divinam quamdam et inconcussam fortitudinem ad omnes deiformes operationes. » Nihil autem in exterioribus ministeriis majus esse videtur quam dispositio causarum universalium: unde maxime videtur administratio cœlestium corporum ad ordinem Virtutum pertinere. Unde Origenes exponens illud Matth. xxiv, 29: *Virtutes cœlorum commovebuntur*, dicit quod conveniens est cœlorum rationabiles virtutes pati stuporem, remotas scilicet a primis functionibus suis. Hoc tamen omnino asserendum non videtur.

## ARTICULUS V.

Quintus articulus est, an Angelus suo imperio potest movere totam molem terræ usque ad globum lunæ.

Istud mihi asserendum non videtur. Virtutes enim creaturarum se extendunt ad naturales effectus: et ideo Angeli corpora cœlestia movere possunt secundum motus convenientes naturis eorum; aliis autem motibus ea movere non possent secundum propriam virtutem, sed hoc divinitus miraculose fieri posset. Posset autem fieri non solum virtute Angeli, sed etiam virtute hominis quod aliqua pars terræ per violentiam sursum feratur: sed quod totum unum elementum extra suum ordinem naturalem ponatur, non credo subjacere angelicæ potestati: et quod virtus Angeli sit infinita inferius, non est sic intelligendum: quod non determinetur ad determinatos effectus, sed quia in suis effectibus producendis non patitur lassitudinem aut defectum.

## ARTICULUS VI.

Sextus articulus est, an id quod dicitur Ecl. i, 6: *In circuitu pergīt spiritus*, pos-

XXVII.

sit sane ita exponi: Spiritus angelicus pergīt in circuitu: scilicet per operationem, qua movet cœlum secundum circumulum.

Non video quare non possit sane exponi, cum hæc sententia vera sit secundum prædicta, et iste modus exponendi a consuetudine sacræ Scripturæ non discrepet; sicut Roman. viii, dicitur quod *spiritus interpellat*, idest interpellare facit.

## ARTICULUS VII.

Septimus articulus est, an Angelus habeat virtutem infinitam inferius.

Hoc potest et bene et male intelligi. Si enim sic intelligatur quod Angelus habeat infinitam virtutem supra ea quæ infra ipsum sunt; est falsus et erroneus intellectus: sic enim posset creare aliquid infra se, et quodlibet convertere; quod patet esse falsum. Est ergo sic intelligendum quod virtus Angeli consequitur naturam ipsius. Sicut ergo finitum et infinitum invenitur in natura ejus, ita et in virtute. Habet autem Angelus finitam naturam secundum operationem ad suum superius quod est Deus, qui est ens et bonum infinitum, cujus similitudo in Angelo participatur finite; cum tamen Angelus non habeat formam in materia, non limitatur vel contrahitur per aliquam naturam, sicut formæ materiales. Unde et virtus Angeli finita est secundum quod extenditur ad determinatos effectus, prout participat finite similitudinem primæ causæ; est tamen infinita quantum ad hoc quod non contrahitur virtus ejus ad agendum secundum exigentiam materiæ vel organi corporalis, sicut formæ materiales et corporeæ. Est etiam infinita duratione ex parte post, quia in perpetuum durat natura ejus, et ejus duratio nullo modo temporis periodo mensuratur.

## ARTICULUS VIII.

Octavus articulus est, an Angeli sunt causa omnium quæ naturaliter generantur et corrumpuntur in hoc mundo.

Hoc ex necessitate sequitur, si sunt causa motus cœli, qui est causa generationis et corruptionis in istis inferioribus corporibus, ut Dionysius dicit iv cap. *De div. nom.* Quod enim est causa causæ, est causa causati.

## ARTICULUS IX.

Nonus articulus est, an Angeli sunt factores omnium corporum naturaliter compositorum, sive humanorum, sive aliorum : quia causare est aliquid ex aliquo facere.

Dicitur quod hoc potest habere calumniam, eo quod verbo faciendi ut plurimum utimur in operibus artis, et non in operibus naturæ : non enim consuevit dicitur quod pater facit filium : unde et secundum hunc modum loquendi Philosophus in VI *Ethic.*, dicit quod ars est recta ratio factibilium ; et secundum hoc inconsuevit dicitur quod Angeli vel corpora cœlestia faciant corpora humana, vel alia corpora composita naturaliter generata. Illud enim videmur facere quod in potestate nostra est quale futurum sit ; ejusmodi sunt opera artis. Opera autem naturæ non subsunt arbitrio naturalium causarum, sed consequuntur necessitatem ordinis naturalis subjectam arbitrio Dei constituentis naturam : unde facere effectus naturales magis solet attribui Deo. Invenitur tamen verbum faciendi attributum etiam causis naturalibus, secundum quod consuevit dici quod omne agens facit sibi simile ; prout ignis dicitur calefacere, quod nihil est aliud quam facere calidum : et secundum hunc modum loquendi dici potest quod corpora cœlestia et etiam Angeli faciunt corpora inferiora. Sed in talibus magis sequendus est usus loquendi : quia secundum Philosophum nominibus utendum est ut plures ; licet vanum videatur de nominibus contendere, ubi constat de rebus.

## ARTICULUS X.

Decimus articulus est, an faber naturaliter possit movere manum ad malleum, vel ad aliud naturaliter operandum sine Angelis moventibus corpora cœlestia.

Hoc non habet explicitam veritatem. Manifestum est enim quod omnia corpora mixta conservantur in esse per motum cœlestium corporum, ex hoc quod certa periodo cœlestis motus generantur et corrumpuntur, et similiter secundum elongationem vel appropinquationem ali-

quorum corporum cœlestium. Est ergo verum quod cessante motu cœli, cessarent corpora fabrorum et martellorum. Si autem supernaturali virtute et fabri et martelli remanerent, oportet dicere quod fabrorum corpora eandem haberent habitudinem ad animas eorum quam nunc. Nec obstat, si dicitur quod aer non esset divisibilis, quia non esset corruptibilis per cessantem motum cœli. Licet enim hoc sit, suam tamen naturam non perdet, secundum quam est facile divisibilis ratione humiditatis et subtilitatis, ita etiam ut instrumentum vocalis laudis esse possit.

## ARTICULUS XI.

Undecimus articulus est, an cessantibus motionibus cœlestium corporum omne corpus elementatum corruptibile in elementa solveretur in momento.

Hoc quidem aliquo modo intellectum credo esse verum, et aliquo modo esse falsum. Necessesse est enim quod motus cœli, sicut et quilibet motus, cesset in momento : quia ultimum instans temporis respondet ultimo instanti motus. Si ergo intelligatur corruptionem istorum corporum, vel resolutionem in elementa esse in instanti, quantum ad suum principium, verum est ; si quantum ad suum terminum, falsum est. Corpora enim cœlestia causant et conservant, sive movent : unde et resolutio quæ ex corruptione talis causæ accidit, oportet quod sit per motum. Nullius autem motus terminus et principium potest esse in momento ; sed omnis motus eget aliquo tempore. Secus autem est de subtractione conservationis Dei : quia enim ipse est causa essendi rebus, immobiliter operans, sicut in momento res in esse produxit creando, et non in tempore ; ita ejus operatione cessante, res in momento esse desinerent, et non per aliquem motum.

## ARTICULUS XII.

Duodecimus articulus est, quod post opera sex dierum nullum corpus Deus moverit immediate.

Hoc<sup>1</sup> verum est quantum ad illas motiones quæ per creaturam fieri possunt.

<sup>1</sup> Parm : « videtur quod non, quantum ad motus qui per creaturam fieri possunt. Sed miracula ut mortui suscitatio, cæci illuminatio, et

similia, fiunt immediate a Deo ; licet quantum ad aliquos effectus conjunctos non desit ministerium Angelorum.



Sunt enim aliquæ corporis motiones quæ nullo modo per creaturam fieri possunt, sicut quod corpora mortua reviviscant, quod cœli illuminentur et similia; et tales corporum transmutationes Deus immediate operatur, licet quantum ad aliquos effectus conjunctos non desit ministerium Angelorum.

## ARTICULUS XIII.

Tertiusdecimus articulus est, an Deus possit aut velit movere corpus immediate.

Iste articulus implicite proponitur. Ex una enim parte videtur quod Deus sua virtute et altissima voluntate potest omne corpus movere immediate; quod non video quin repugnet ei quod dicitur, quod non potest corpus movere : nisi forte hoc quod dicitur, « Non potest movere immediate, » referatur ad hoc quod subditur : « Ita quod movere, quod est divisibile et mensuratum tempore, sit actio divina, quæ est ejus essentia simplicissima : » hoc enim Deus nec facere potest, nec vult. Sed cum dicitur quod Deus aliquod corpus movet, per hoc verbum « movet » non importatur actio divisibilis et tempore mensurata, sed actio simplex, quæ est sua essentia : nam non solus Deus, sed etiam quilibet intellectus movet per imperium, ut supra dictum est. Imperium autem intellectus nihil est aliud quam conceptio effectus ordinata ad implendum voluntatem. Velle autem et intelligere Dei non est aliud quam ejus essentia : unde sicut actio qua Deus creavit res, ita et actio qua Deus immediate potest movere corpus, nihil est aliud quam ejus intelligere et ejus velle.

## ARTICULUS XIV.

Decimusquartus articulus est, an si nulla essent lumina stellarum, et nullus esset metus cœlestium corporum, omnia animalia corruptibilia in momento morerentur.

De hoc quid mihi videtur, supra dictum est. Mors enim est per separationem animæ a corpore; quod non fit nisi per

aliquam mutationem corporis a sua naturali dispositione, quæ non potest esse in instanti tota, licet ejus causa et principium possit esse in instanti.

## ARTICULUS XV.

Decimusquintus articulus est, an Deus miracula faciat ministerio Angelorum.

Hoc puto verum esse; ita tamen quod non in omnibus miraculis operatio Angelorum se potest extendere ad principales effectus.

## ARTICULUS XVI.

Decimussextus articulus<sup>1</sup> est, quod Deus non tantum aliqua miracula sed et omnia miracula faciat ministerio Angelorum visibili vel invisibili.

Hoc puto etiam verum quantum ad aliquod Angelorum ministerium; ita tamen quod Angelorum ministerium non extendatur ad omnia quæ fiunt in miraculo<sup>2</sup>, sicut in prædictis exemplis patet, et in formatione corporis Christi ex Virgine.

## ARTICULUS XVII.

Decimusseptimus articulus est, an Divinitas in Christo faceret miracula auctoritate, et humanitas ministerio.

Dicendum quod sic. Nam Divinitas operabatur per humanitatem sicut per organum, ut dicit Damascenus. Eadem autem in operando est ratio organi et ministri; quia utrumque movet per hoc quod est aliquid ab alio motum.

## ARTICULUS XVIII.

Decimusoctavus articulus est, an omnia miracula quæ fiunt ab aliqua creatura ministerio, fiant auctoritate Dei, id est per virtutem ejus, sine qua nihil potest fieri.

Dicitur quod verum est, si de veris miraculis intelligant; et dico vera miracula, quæ nulla naturali virtute alicujus

<sup>1</sup> Parm. : « an Deus aliqua miracula faciat. »

<sup>2</sup> Parm. : « hoc patet etiam in. »

creaturæ fieri possunt. Sunt tamen aliqua non simpliciter miracula, sed quo ad aliquos, qui eorum causas ignorant; sicut quædam arte humana facta, miracula ignorantibus artem videntur, et multo magis arte angelica: et talia possunt fieri virtute alicujus creaturæ, licet non exclusa virtute divina.

## ARTICULUS XIX.

Decimus nonus articulus est, an post diem judicii corpora sanctorum erunt incorruptibilia tribus modis; scilicet per divinam justitiam, item per gloriam, item per naturam, sive naturaliter.

Hoc quidem quantum ad duo prima calumniam habere non potest; quantum ad tertium posset habere calumniam, si intelligatur quod ad incorruptionem humani corporis sola natura sufficiat, quasi incorruptio humani corporis ex natura causetur sicut ab agente. Non enim ad hoc se extendit virtus alicujus naturæ creatæ ut rebus corruptibilibus incorruptionem possit conferre. Dictum est etiam supra quod secundum ordinem naturæ corpora humana et omnia corpora mixta cessante motu cœli dissoluta corrumpentur. Immortalitas ergo humanorum corporum post resurrectionem non erit ex virtute naturæ, sed ex virtute divina, per quam corpora humana conservantur in esse. Sed verum est quod naturalis causa corruptionis, quæ est motus cœli, subtracta erit. Motus enim cœli sicut est causa generationis et conservationis mixtorum corporum, ita etiam est causa corruptionis eorum. Supposita ergo conservatione humanorum corporum per virtutem divinam, non erit aliqua causa agens ad corruptionem. Et secundum hoc aliquo modo posset sustineri quod illa incorruptio esset per naturam: quia scilicet causa naturalis corruptionis subtracta erit; eo modo loquendi quo dici posset, quod submersio navis est per gubernatorem, quia per ejus absentiam navis periclitatur.

## ARTICULUS XX.

Vigesimus articulus est, an post diem judicii corpora damnatorum erunt incorruptibilia duobus modis; scilicet per divinam justitiam, item per naturam, sive naturaliter.

Hoc habet eandem responsionem cum præcedenti.

## ARTICULUS XXI.

Vigesimus primus articulus est, an corpora damnatorum, cum erunt in inferno, erunt passibilia, et patientur ab igne inferni, quia recipient speciem ignis inferni per modum afflictivi vel læsivi.

Hoc non video quam calumniam habere possit. Si enim impassibilitas ponitur communiter de corpore gloriosi, consequens est quod corpora non gloriosa passibilia erunt. Quod autem speciem ignis per modum afflictivi in se recipiunt, hoc negari non potest nisi ab eo qui negat hujusmodi corpora ignem inferni sentire. Necesse est enim speciem sensibilis fieri in sensu ad hoc quod sequatur afflictio.

## ARTICULUS XXII.

Vigesimus secundus articulus est, an possit disputari in scholis, an anima Christi et omnes aliæ animæ rationales sint ex traduce.

Non video cur hoc non liceat; nisi forte in casu, si ex hoc apud aliquos scandalum oriretur; sicut aliquando contingit quod aliqui simpliciter audientes de his quæ sunt fidei, disputari in scholis, credunt ea ratione de his disputari, quasi dubitaretur de fidei veritate. Sed in tali casu posset disputans ad hanc opinionem amputandam protestari quod disputaret non propter disputationem de veritate, sed propter inquirendam veritatis rationem.

## ARTICULUS XXIII.

Vigesimus tertius articulus est, an Christus principaliter non venerit tollere nisi originale peccatum.

Ad quod dicendum est quod Christus venit principaliter ad introducendum homines in vitam æternam, sicut dicit ipse, Joan. x, 10: *Ego veni ut vitam habeant*: unde omne impedimentum vitæ æternæ venit remove, et ideo ex consequenti venit tollere omne peccatum. Sed sicut bonum commune est melius

quam bonum particulare unius hominis, ita malum commune multorum est pejus : unde principalius venit tollere peccatum originale quod totam naturam humanam infecerat, quam singulorum particularia peccata : unde super illud Joan. 1, 29 : *Ecce qui tollit peccatum <sup>1</sup> mundi*, dicit *Glossa*. « Peccatum mundi dicitur originale peccatum quod est commune totius mundi : » et infra : « Quod originale peccatum, et singulorum quoque superaddita Christus relaxat. » Melius ergo dicendum videtur affirmative quod Christus venit principalius tollere originale peccatum quam alia, quam negative ; sicut si ponitur quod Christus principaliter non venit tollere nisi originale peccatum : nam etiam tollere actualia peccata pertinet ad principalem Christi intentionem, qua venit mundum salvare, secundum illud Luc. v, 32 : *Non veni vocare justos, sed peccatores ad pœnitentiam*.

## ARTICULUS XXIV.

Vigesimus quartus articulus est, an infernus sit in centro, vel circa centrum terræ.

Circa quod nihil mihi videtur temere asserendum, præcipue cum Augustinus neminem arbitretur scire ubi sit. Non tamen æstimo quod sit in centro terræ, quia ille est locus, quo naturaliter feruntur gravia : nec videtur intentionem naturæ frustrari, ut communiter dicitur : quod sequeretur, si ad centrum corpora gravia non pervenirent. Et <sup>2</sup> iterum si naturaliter terra circa centrum esset concava, non posset assignari naturalis causa quæ totum pondus terræ sustineret, ne perveniret ad centrum. Si autem dicitur hoc esse miraculose, nulla subesse videtur miraculi ratio. Præparatio enim inferni ab initio mundi fuit, secundum illud Isai. xxx, 33 : *Parata <sup>3</sup> est ab heri Tophet*, secundum expositionem *Glossæ*. In prima autem rerum institutione non est considerandum quid Deus possit facere, sed quid natura rerum habeat ut sic fiat <sup>3</sup>, sicut dicit Augustinus II *Super Genes. ad litteram*. d. 1, § 2. Non

autem dicitur Christus descendisse ad infimas partes terræ, sed ad inferiores ; ad cujus veritatem sufficit qualitercumque inferiores nobis dicantur.

## ARTICULUS XXV.

Vigesimus quintus articulus est, an possit sciri distantia a superficie terræ usque ad infernum, supposito infernum esse in centro vel circa centrum terræ.

Puto sciri posse distantiam a superficie terræ usque ad centrum, non tamen usque in infernum : quia non credo ab homine sciri posse ubi sit infernus.

## ARTICULUS XXVI.

Vigesimus sextus articulus est, an « Corpus spermatis, cum quo exit spiritus, qui est virtus principii animæ, est separatum a corpore, et est divina, et talis dicitur intellectus : » sic potest vel debet exponi : « idest ille spiritus, sive virtus formativa dicitur intellectus per similitudinem, quia sicut intellectus operatur sine organo, ita et illa virtus. »

Hanc expositionem Commentator (*a*) ponit in VII *Metaph.* super illud, « Ergo sicut supra dictum est quod in substantiis est principium etc. » : et sunt hæc ejus verba. Ideo dicit Aristoteles in libro *De animalibus* quod « virtutes quæ sunt in seminibus, sunt similes intellectui, scilicet quia agunt actione intellectus, et quod istæ virtutes assimilantur intellectui in hoc quod non agunt per instrumentum corporale. »

## ARTICULUS XXVII.

Vigesimus septimus articulus est, an opinari possit sine periculo, quod post communem resurrectionem luna magis lucebit quam nunc sol, sol autem in septuplum quam modo luceat : corpora vero beatorum septies magis sole.

Nullum periculum hic video quin opinari possit, si assertio desit, quæ posset ad præsumptionem imputari.

<sup>1</sup> Al. : « peccata. »

<sup>2</sup> Parm. : « si etiam... quæ tantum pondus sustineret. Si autem. »

<sup>3</sup> « Nunc quemadmodum Deus instituerit natu-

ras rerum secundum scripturas ejus nos convenit quærere, non quid in eis vel ex eis ad miraculum potentiæ suæ velit operari. »

(*a*) Averroes.

## ARTICULUS XXVIII.

Vigesimooctavus articulus est, an aliquid dicatur venire ad compositionem alterius duobus modis. Uno modo per essentiam suam per modum principii materialis et formalis : et sic nullo modo aliquid de natura corporis cœlestis venit in compositionem corporis humani, vel aliorum corporum mixtorum. Secundo modo venit ad compositionem alterius aliquid per effectum suæ virtutis : et hoc modo natura corporis cœlestis venit ad compositionem corporis humani et omnium corporum mixtorum.

Hoc est ex necessitate verum : quia corpora cœlestia sunt causa generationis et corruptionis in istis inferioribus, ut Dionysius dicit.

## ARTICULUS XXIX ET XXX.

Vigesimusnonus et trigesimus articulus continent, an Angeli non doleant, nec lacrymentur, sed ad modum dolentium vel lacrymantium se habeant.

Hoc est ex necessitate verum : et est sententia Augustini, qui dicit in IX *De civit. Dei*, c. vi : « Sancti Angeli puniunt sine ira quos accipiunt aeterna Dei lege puniendos, et miseris sine miseræ compassionem subveniunt, et periclitantibus quos diligunt, sine timore opitulantur ; et tamen istarum nomina passionum per consuetudinem<sup>1</sup> humanæ locutionis etiam in eos usurpantur propter quamdam operum similitudinem, non propter affectionum infirmitatem<sup>2</sup>. »

## ARTICULUS XXXI.

Trigesimusprimus articulus est, an, facta transubstantiatione substantiæ panis in substantiam corporis Christi miraculose in sacramento altaris, substantia corporis Christi naturaliter sine miraculo in hoc sacramento est sub<sup>3</sup> dimensionibus hostiæ, quæ remanserunt, eo quod substantia ex hoc quod est substantia,

non prohibetur esse in magna et parva dimensione.

Credo hoc esse falsum. Sicut enim non quidem naturaliter, sed miraculose substantia panis in substantiam corporis Christi convertitur ; ita etiam miraculose sub dimensionibus conservatur, et non naturaliter. Utenim dicit Augustinus, VIII *Super Genes. ad litteram*, c. xxvi, Deus eo modo conservat res quo eas operatur. Non enim est sicut ædificator, qui operatur tantum ad constructionem domus, et postea eam dimittit ; sed Deus circa rem continue operatur conservans eam in esse, secundum illud Joan. VII, 17 : *Pater meus usque modo operatur*. Quod autem inducitur pro ratione, quod substantia, ex eo quod est substantia, non prohibetur esse in magna et parva dimensione, non est sic intelligendum, quod de ratione cujuslibet substantiæ sit quod possit esse in magna vel parva dimensione ; sed contrarium non est de ratione substantiæ ut sic ; sicut non est de ratione animalis quod sit rationale ; non tamen est de ratione ejus quod sit sine ratione. Si ergo esset de ratione substantiæ quod non prohiberetur esse in magna vel parva dimensione, sequeretur quod substantia corporis Christi secundum suam naturam haberet ut esset æqualis sub magna vel parva dimensione. Sed quia hoc non est de ratione substantiæ, quod possit esse in magna vel parva dimensione, nec tamen est contra rationem substantiæ, patet quod ponere substantiam corporis Christi in magna vel parva dimensione, non implicat contradictionem, sicut implicat contradictionem si aliquid attribuitur alicui quod repugnat ejus rationi. Ad hoc ergo inducitur illa ratio ut excludatur contradictio, non ad hoc ut ostendatur esse naturale.

## ARTICULUS XXXII.

Trigesimussecundus articulus est, quod propriæ<sup>4</sup> dimensiones corporis Christi et dimensiones panis, quæ remanserunt, non sunt æquales.

Istud est manifeste verum, et contrarium dicere est hæreticum : sequeretur

addit : « qua interim de sanctis angelis quæstione dilata. »

<sup>3</sup> Parm. : « sine dimensionibus. »

<sup>4</sup> Parm. : « proprie. »

<sup>1</sup> « consuetudine. »

<sup>2</sup> Non sic ibi S. Augustinus ; sed dicit : « Quæri potest utrum puniant... subveniant... opitulentur... et nomina in eos usurpentur ; » moxque

enim quod sub una parva particula hostiæ non esset totum corpus Christi.

## ARTICULUS XXXIII.

Trigesimustertius articulus est, an corpus Christi in sacramento sit in loco.

Dicitur, quod est in loco altaris, vel in Ecclesia ; sed hoc verum est quod corpus Christi non est in sacramento ut in loco : non enim comparatur ad sacramentum ut locatum ad locum, quia non commensuratur ei secundum proprias dimensiones.

## ARTICULUS XXXIV.

Trigesimusquartus articulus est, an corpus Christi in hoc sacramento moveatur ad motum hostiæ.

Verum est quod non movetur sicut corpora moventur per se vel per accidens in loco : quia nec eo modo est in illo loco in quo est sacramentum, sicut corpora sunt in loco per se vel per accidens, cum aliam habeat comparisonem ad dimensiones sacramentales quam corpus ad dimensiones proprias secundum quas movetur per se, et ad vehiculum, secundum quod movetur per accidens. Sed eo modo quo convenit corpori Christi esse in loco ratione dimensionum sacramentalium, convenit sibi moveri in loco.

## ARTICULUS XXXV.

Trigesimusquintus articulus est, an species sacramentales sine subjecto remanentes possint naturaliter agere, immutari et corrumpi, sicut prius.

Quantum ad aliquid verum est, et quantum ad aliquid non. Nihil enim potest agere vel pati nisi præsupposito suo esse. Quod autem in esse conserventur absque subjecto, miraculosum est ; et quantum ad hoc actio consequens miraculosa est, et similiter passio ; secundum quod dimensio miraculose subsistens, miraculose habet officium subjecti, cujus est agere et pati.

<sup>1</sup> « Cum signa quædam ex animo » Hæc autem lectio retinenda est, ut patet per textum ex libro *Retractationum* allegatum : « sed utrum signa quædam dentur. »

## ARTICULUS XXXVI.

Trigesimussextus articulus est, an omnes cogitationes cordis quæ habent imagines in phantasia vel quas comitantur aliquæ passionibus in corpore, demones scire possint.

Hoc puto verum esse de illis cogitationibus quas comitantur aliqui motus corporales quicumque : et hoc etiam Augustinus dicit in libro *De divinatione dæmonum* c. v. « Hominum, » inquit, « dispositiones demones non solum voce prolatas, verum etiam cogitatione conceptas <sup>1</sup> consignant : quæ dum ex animo exprimuntur in corpore, tota facilitate perdiscunt : » et de hoc verbo in libro *Retractationum* c. xxx, faciens mentionem, sic dicit : « Dixi hoc audaciore asseveratione quam debui : nam pervenire ista ad notitiam dæmonum, per nonnulla etiam experimenta compertum est. Sed utrum signa quædam dentur ex corpore cogitantium illis sensibilia, nos autem latentia, aut alia vi spirituali cognoscant, aut difficillime potest ab hominibus, aut omnino non potest inveniri. » Sed si spirituali vi cogitationes cognoscant, multo magis motus corporales, ex quibus etiam homines interdum interiores dispositiones cognoscunt : unde secundum non excludit primum, sed amplius dicit. Solas autem species in phantasia existentes non reputo sufficientes ad hoc quod demones humanas cogitationes cognoscere possint ; quia homo virtute rationis et liberi arbitrii potest una specie in vi imaginativa conservata multipliciter uti ad diversas cogitationes, vel totaliter actu non uti.

Hæc sunt, carissime, quæ ad articulos a vobis transmissos respondeo diffusius quam petistis : non enim absolute responderi poterat ad ea quæ diversum sensum continere poterant ; præsertim cum non scripseritis quid contra hujusmodi articulos objiceretur. Sic enim potuisset et absolutius et certius responderi. Valeat caritas vestra <sup>2</sup> diu, et pro hoc labore mihi orationum suffragia rependatis.

<sup>2</sup> Cod. Viet. : « per tempora longiora. »



# OPUSCULUM XI.

## RESPONSIO DE VI ARTICULIS AD LECTOREM BISUNTINUM.

(EDIT. ROM. XII.)

Carissimo sibi in Christo Fratri Gerardo Bisuntino Ordinis Fratrum Prædicatorum, Frater Thomas de Aquino ejusdem Ordinis cum fraterna dilectione salutem.

Recepi <sup>4</sup> litteras vestras quosdam articulos continentes, super quibus vobis per me responderi petebatis. Et licet in pluribus essem occupatus, tamen ne vestræ caritatis petitioni deessem, quam cito facultas se obtulit, vobis rescribere curavi.

### QUÆSTIO I, II ET III.

Prima ergo quæstio fuit, an stella quæ Magis apparuit, haberet figuram crucis. Secunda, an haberet figuram hominis. Tertia an haberet figuram crucifixi.

His simul respondeo quod Chrysostomus (Auctor operis imperfecti) quædam similia narrat *Super Matth.*, non quasi asserendo, sed potius quasi ab aliis dictum recitando. Et quia pro certo non habetur, non reputo hoc esse prædicandum; præsertim quia non videtur probabile quod sacri Doctores, ut Augustinus, Leo Papa, Gregorius et alii in suis sermonibus tacuissent, si aliquod robur auctoritatis haberet. Non enim decet prædicatorem veritatis ad fabulas ignotas divertere. Si autem ab aliquo sit prædicatum, non arbitror esse necessarium quod revocetur, nisi forte ex hoc populo scandalum sit exortum: et tunc non deberet ut erroneum reprobari, sed ut incertum exponi.

<sup>4</sup> Parm. : « percepi. »

### QUÆSTIO IV.

Quarta quæstio, an parvulæ manus pueri Jesu nati creaverint stellas.

Ad quod respondeo quod locutio hæc non est propria. Nam parvulæ manus sunt manus humanitatis, quarum non est creare. Sed quia unus et idem Christus est in divina et humana natura perfectus, potest hujusmodi locutio sane exponi, ut dicatur: Manus parvulæ istius pueri creaverunt stellas; idest, iste puer habens manus parvulas, creavit stellas. Tali enim modo loquendi ad quamdam unionis expressionem aliquando Doctores utuntur, sicut in quibusdam cantatur Ecclesiis: « Manus quæ nos plasmaverunt, clavis confixæ sunt. » Non tamen hæc sunt extendenda, vel prædicanda populo. Sed tamen si prædicatum sit, non arbitror revocandum; nisi super hoc error aut scandalum oriatur, in quo casu oporteret sanæ locutionis sensum exponi. Non sunt autem in talibus, quantum fieri potest, simplicium animi sollicitandi.

### QUÆSTIO V.

Quinta quæstio est, an ex quo Simeon dixit beatæ Virgini; *Tuam ipsius animam pertransibit gladius*, quolibet die naturali usque ad resurrectionem Christi septies illud recoleret pia Virgo cum dolore vehementi.

Ad hoc etiam respondeo quod istud eadem facilitate contemnitur qua dicitur, cum nullius auctoritatis robore fulciatur.

Nec æstimo hujusmodi frivola esse prædicanda, ubi tanta suppetit copia prædicandi ea quæ sunt certissimæ veritatis. Neque tamen oportet quod revocetur, si prædicatum fuerit, nisi ex hoc scandalum fuisset exortum.

### QUÆSTIO VI.

Sexta quæstio est, an circumstantias peccati trahentes in alterum genus, non notabiliter aggravantes, teneatur homo confiteri etiam innotescendo personam cum qua peccaverit.

Ah hoc respondendum videtur, quod omnino debet has homo confiteri : non enim homo confitetur peccatum suum nisi speciem confiteatur peccati, quæ cognosci non potest nisi per circumstantias trahentes in aliud genus, ex quibus peccatum specificatur. Circumstantias vero aggravantes, quæ in aliud genus peccati non trahunt, non tenetur homo confiteri, sicut nec peccata venialia ; licet sit laudabile quod homo ea confiteatur. Eadem enim ratio videtur esse de hujusmodi circumstantiis, et de venialibus peccatis. Circumstantiæ autem dicuntur in aliud genus trahere quæ specialem repugnantiam important ad aliquod præceptorum divinæ legis ; sicut furtum simplex repugnat huic præcepto, *Non furtum facies* ; si autem furtum in loco sacro committatur, habet jam repugnantiam ad aliud præceptum, quod est de veneratione sacrorum, et sic additur nova species peccati : unde consequens est quod addat aliam repugnantiam ad legem Dei ; et ideo novam deformitatem peccati mortalis habebit, quod ex necessitate confiteri tenebitur. Sic igitur

hujusmodi circumstantias aggravantes, quæ non trahunt in aliud genus peccati, non credo quod aliquis teneatur confiteri.

De expressione autem personæ cum qua aliquis peccavit, videtur mihi quod non sit in confessione facienda, quando potest vitari. Primo quidem, quia prodere crimen alterius et lædere famam est peccatum ; quod maxime vitandum est in confessione, per quam quis quærit præterita peccata delere. Secundo, quia a Domino, Matth. xviii, est forma denuntiandi peccatum proximi descripta, contra quam agere non licet. Tertio, quia in confessione est credendum peccatori confitenti et pro se et contra se ; sed contra alium nullo modo est ei credendum ; alioquin daretur multis occasio fictæ confessionis et fraudulentæ infamationis. Et ideo si potest speciem peccati confiteri non innotescendo personam cum qua peccavit, peccat eam exprimendo, nisi forte salvato correctionis ordine, quem Dominus statuit. Si vero speciem peccati exprimere non possit nisi exprimendo personam cum qua peccavit, puta si cum sorore concubuit ; necesse est ut exprimendo peccati speciem, exprimat personam. Sed si fieri potest, debet quærere talem confessorem, qui personam sororis penitus non cognoscat.

Quod autem dixi, circumstantias aggravantes quæ non trahunt in aliud genus peccati, non esse de necessitate confitendas, non est referendum ad numerum, quem aliquis confiteri tenetur, si potest ; quia jam non est unum peccatum, sed multa.

Hæc sunt, frater carissime, quæ ad præsens mihi occurrunt quæstionibus a vobis propositis respondenda : pro quo mihi, si placet, orationum suffragia impendatis <sup>1</sup>.

<sup>1</sup> Cod. S. Vict. : « rependatis. »

# OPUSCULUM XII.

## DE DIFFERENTIA VERBI DIVINI ET HUMANI.

(EDIT. ROM. VIII.)

Ad intellectum hujus nominis quod dicitur « verbum, » sciendum est secundum Philosophum quod ea quæ sunt in voce, sunt signa earum quæ sunt in anima passionum. Consuetum autem est in Scripturis quod res significatæ sortiuntur vocabula signorum, et e contrario; sicut illud: *Petra autem erat Christus*. De necessitate ergo sequitur quod illud intrinsicum animæ nostræ quod significatur voce exteriori cum verbo nostro, verbum vocetur. Utrum autem prius conveniat nomen verbi rei exteriori voce prolata, vel ipsi conceptui animæ interiori, nihil refert ad præsens. Planum tamen est quod illud quod significatur interius in anima existens, prius est quam ipsum verbum voce prolatum, utpote causæ ejus existens. Si vero volumus scire quid est interius verbum in anima nostra, videamus quid significet verbum quod exteriori voce profertur.

In intellectu autem tria sunt: scilicet ipsa potentia intellectus; species rei intellectæ, quæ est forma ejus, se habens ad ipsum intellectum sicut species coloris ad pupillam; et intelligere quod est operatio intellectus. Nullum vero istorum significatur verbo exteriori voce prolato: nam hoc nomen « lapis » non significat substantiam intellectus, quia hoc non intendit dicere nominans; nec significat speciem qua intellectus intelligit, cum nec sit hæc intentio nominantis; nec etiam significat ipsum intelligere, cum intelligere non sit actio progrediens ab intelligente, sed in ipso manens. Verbum autem interius conceptum per modum egredientis se habet; quod testatur verbum exterius vocale quod est ejus signum: illud enim egreditur a dicente vocaliter

ad extra. Illud ergo proprie dicitur verbum interius, quod intelligens intelligendo format. Intellectus autem duo format secundum duas ejus operationes: nam secundum operationem suam quæ dicitur indivisibilem intelligentia, format definitionem; secundum vero operationem qua componit et dividit, format enuntiationem, vel aliquid tale: et ideo illud sic formatum et expressum per operationem intellectus vel definientis vel enuntiantis, exteriori verbo significat. Unde dicit Philosophus, IV *Metaphysicæ*: « Ratio quam significat nomen est « definitio. » Istud ergo sic formatum et expressum in anima dicitur verbum interius; et ideo comparatur ad intellectum non sicut quo intellectus intelligit, sed sicut in quo intelligit; quia in isto sic expresso et formato videt naturam rei intellectæ. Ex his ergo duo possumus de verbo accipere: scilicet quod verbum est semper aliquid procedens ab intellectu, et in intellectu existens; et quod verbum est ratio et similitudo rei intellectæ. Et si quidem eadem res sit intelligens et intellecta: tunc verbum est ratio et similitudo intellectus a quo procedit. Si autem aliud sit intellectus et intellectum; tunc verbum non est ratio intelligentis, sed rei intellectæ: sicut conceptio quam habet aliquis de lapide est similitudo lapidis tantum. Sed quando intellectus intelligit se, tunc tale verbum est ratio et similitudo intellectus. Et ideo Augustinus ponit similitudinem Trinitatis in anima, secundum quod mens intelligit se ipsam, non autem secundum quod intelligit alia.

Patet ergo quod in qualibet re intellectuali cui competit intelligere, necesse est ponere verbum: de ratione enim in-

telligendi est quod intellectus intelligendo aliquid formet : talis autem formatio dicitur verbum. Natura vero intellectualis est natura humana, angelica et divina. Et ideo est verbum humanum : unde in Psalm. XIII, 1 : *Dixit insipiens in corde suo : Non est Deus* etc. Est et verbum Angeli : Zachar. 1 : *Dixit Angelus* etc. Est verbum divinum : Genes. 1 : *Dixit Deus* etc. De quo Joan. 1, 1 : *In principio erat Verbum*, etc. Constat quod non dixit hoc de verbo humano nec angelico, quia utrumque istorum factum est, cum verbum non præcedat dicentem ; hoc autem verbum, de quo Joannes loquitur, non est factum, sed *omnia per ipsum facta sunt*. Oportet ergo hoc de verbo divino intelligi.

Et sciendum est quod verbum Dei, de quo loquitur Joannes, tres habet differentias ad verbum nostrum. Prima est secundum Augustinum, quia verbum nostrum est prius formabile quam formatum : nam cum volo concipere rationem lapidis, oportet quod ad ipsum verbum ratiocinando perveniam ; et sic est in omnibus aliis quæ a nobis intelliguntur ; nisi forte in primis principiis, quæ cum sint naturaliter nota, absque discursu rationis statim intelliguntur seu cognoscuntur. Quamdiu ergo intellectus ratiocinando discurret, huc illucque jactatur, necdum formatio perfecta est, nisi quando ipsam rationem rei perfecte conceperit ; et tunc primo habet rationem verbi : et inde est quod in anima nostra est etiam cogitatio, per quam significatur ipse discursus inquisitionis ; et verbum quod est jam formatum per perfectam contemplationem veritatis : ideo perfecta contemplatio veritatis dicitur verbum. Sic ergo verbum nostrum prius est in potentia quam in actu ; sed verbum divinum semper est in actu ; et ideo nomen cogitationis verbo Dei proprie non convenit. Dicit enim Augustinus XV *De Trinitate*, c. XVI : « Ita dicitur illud Verbum Dei, ut <sup>1</sup> cogitando non dicatur ; ne quid quasi volubile in Deo credatur. » Et illud quod Anselmus dicit quod « dicere summo Patri nihil aliud est quam cogitando intueri, » improprie dictum est. Secunda differentia est verbi nostri ad divinum, quia nostrum est imperfectum, sed verbi Dei est perfectissimum : quia nos non possumus omnia quæ sunt in anima nostra, uno verbo ex-

primere ; et ideo oportet quod sint plura verba imperfecta, per quæ divisim exprimamus omnia quæ in scientia nostra sunt ; in Deo autem non est sic. Cum enim ipse intelligat et se ipsum, et quidquid intelligit, per essentiam suam ; uno actu unicum verbum divinum expressivum est totius quod in Deo est ; non solum Patris, sed etiam creaturarum ; aliter esset imperfectum. Unde dicit Augustinus XV *De Trinitate*, c. XIV : « Si aliquid minus esset in verbo quam in scientia continetur dicentis, esset verbum. » (a) Sed constat quod divinum verbum est perfectissimum. Ergo est tantum unum : unde Job XXXIII, 1 : *Semel loquitur Deus*. Tertia differentia est quod verbum nostrum non est ejusdem naturæ nobiscum ; sed verbum divinum est ejusdem naturæ cum Deo, et subsistens in natura divina. Nam ratio intellectiva quam intellectus noster de aliqua re format, habet esse in anima intelligibili tantum ; intelligere autem animæ non est idem cum esse naturali animæ, quia anima non est sua operatio : et ideo verbum quod format intellectus noster, non est de essentia animæ, sed est accidens ei. In Deo autem idem est intelligere et esse ; et ideo verbum quod format intellectus divinus, non est aliquod accidens, sed pertinens ad naturam ejus ; unde oportet quod sit subsistens, quia quidquid est in natura Dei, est Deus : unde dicit Damascenus, quod « Dei verbum subsistens est, et in hypostasi ens ; reliqua vero verba, » nostra scilicet, « virtutes sunt animæ. »

Ex præmissis ergo tenendum est quod proprie loquendo verbum semper dicitur personaliter in divinis, cum non importet nisi quid expressum ab intelligente. Patet etiam quod verbum in divinis est similitudo ejus a quo procedit, et quod est coæternum ei a quo procedit, cum non fuerit prius formabile quam formatum, sed semper in actu : et quod sit æquale Patri, cum sit perfectum, et totius esse Patris expressivum : et quod sit coessentialiale et consubstantialiale Patri, cum sit subsistens in natura ejus. Patet etiam quod cum in qualibet natura id quod procedit habens similitudinem et naturam ejus a quo procedit, vocetur filius ; et hoc fit in verbo quod in Deo dicatur Filius, et productio ejus dicitur generatio.

<sup>1</sup> « Dei cogitatio non dicatur. »

(a) Sensus est S. Augustini in hoc loco.

# OPUSCULUM XIII.

## TRACTATUS DE VERBO<sup>1</sup>.

(EDIT. ROM. XV.)

### CAPUT I.

#### *Quid sit Verbum*<sup>2</sup>.

Quoniam circa naturam verbi intellectus, sine quo imago Trinitatis non invenitur in homine expressa, multiplex difficultas et prolixitas nimia animum involvit; ideo summatim ejus naturam tradere intendimus, insuper et difficultates ipsum tangentes simul manifestare.

Sciendum est igitur primo quod verbum cum re dicta per verbum convenientiam habet majorem in natura sua quam cum dicente, licet in dicente sit ut in subjecto. Unumquodque enim ab illo naturam sortitur a quo speciem accipit et nomen sortitur; cum species sit tota natura rei. Verbum autem speciem accipit a re dicta, et non a dicente, nisi forte quando dicit se: sicut verbum lapidis differt specie a verbo asini; verbum etiam dictum a diversis de eadem re, idem specie est. Et hujus ratio est, quia effectus quilibet magis convenit cum principio quo agens agit, quam cum agente, cui solum assimilatur ratione ipsius principii: hoc enim est quod communicatur effectui per actionem agentis. Similitudo autem rei dictæ est principium quo verbum efficitur<sup>3</sup>, quæ etiam in verbo reperitur a dicente sibi communicata: et ideo ipsum verbum quandoque dicitur similitudo rei, quandoque vero verbum rei, ubicumque illa similitudo exprimi-

tur, sive in parte imaginativa, sicut phantasma Carthaginis est verbum Carthaginis, secundum Augustinum; sive in intellectu nostro, ubi perfecta ratio verbi invenitur quod ad imaginem pertinet. In verbis enim quæ in imaginativa fiunt, non est ratio verbi expressa. Aliud namque est in ea unde similitudo exprimitur, et aliud in quo terminatur. Exprimitur enim a sensu, et terminatur in ipsa phantasia, cum phantasia sit motus factus a sensu secundum actum, secundum Philosophum in III *De anima*. Sed supra intellectum nihil est in quo ab ipso aliquid exprimitur; et ideo non est aliud quod exprimit ab eo in quo exprimitur; sicut nec in Deo aliud est Pater exprimens, et aliud in quo recipitur expressum. Sed adhuc in intellectu nostro est defectus; quia aliud est quod exprimit, aliud ipsum verbum expressum; quod in Deo non invenitur: et ideo verbum Dei est Deus, intellectus autem noster verbum suum non est, neque etiam est suum dicere quod est proxima causa verbi. Nascitur enim verbum nostrum ex notitia alienjus habiti apud memoriam nostram, quæ nihil aliud est in hoc loco quam ipsa receptibilitas animæ nostræ, in qua etiam tenet se, secundum Augustinum, etiam cum se non discernit, sed alia quæ ab extra acquirit. Primus ergo processus in cognitione verbi est cum intellectus accipit a memoria quod ab ea sibi offertur, non eam spolians quasi in ea nihil relinquens, sed similitudinem habiti in se assumens; et hoc est simile illi quod in memoria habetur: et ideo

<sup>1</sup> Parm.: « de natura verbi intellectus. »

<sup>2</sup> Desunt in Parm. cap. et tituli.

<sup>3</sup> Parm. addit: « rei. »



vocatur aliquando illud quod ab intellectu accipitur, verbum memoriæ; sed adhuc non habet perfectam rationem verbi; haberet tamen, si intellectus solum reciperet a memoria exprimente. Sed cum memoria non habeat actum aliquem, sed loco actus solum tenet libere quasi parata capienti a se; intellectus vero in lumine suo capit ab<sup>1</sup> ea; et ideo<sup>2</sup> adhuc perfectam rationem verbi non habet. In divinis vero Pater, cui respondet memoria in ratione ordinis, complete generat, quia Pater id quod habet, non solum tenet ut memoria apud nos, sed quia est suppositum completum cuius est agere, ideo generat Filium. Non enim in generatione ista præsupponitur aliquid quasi a Patre accipiens, et aliud quasi acceptum: sic apud nos intellectus accipit a memoria, et præsupponitur generationi: ibi vero Filius generatur a Patre, sicut si totus intellectus noster esset a nostra memoria, et non similitudo ista vel illa. Cum ergo intellectus informatus specie natus sit agere; terminus autem cujuslibet actionis est ejus objectum; objectum autem suum est quidditas aliqua, cujus specie informatur, quæ non est principium operationis vel actionis nisi ex propria ratione illius cuius est species; objectum autem non adest ipsi animæ illa specie informatæ, cum objectum sit extra in sua natura: actio autem animæ non est ab extra, quia intelligere est motus ad animam, tum ex natura speciei quæ in talem quidditatem ducit, tum ex natura intellectus, cujus actio non est ad extra: prima autem actio ejus per speciem est formatio sui objecti, quo formato intelligit, simul tamen tempore ipse format, et formatum est, et simul intelligit, quia ista non sunt motus de potentia ad actum, quia jam factus est intellectus in actu per speciem, sed processus perfectus de actu in actum, ubi non requiritur aliqua species motus. Et quia, ut dictum est, hujusmodi objectum in ipsa anima formatur, et non extra; ideo erit in anima ut in subjecto; est enim similitudo rei extra. Quod autem est in anima ut in subjecto, efficitur in ea ut habitus. De perfecta autem ratione habitus est, quando actui conjungitur. In hoc enim natura perficitur per lumen naturale intellectus, involvens

speciem intelligibilem in quo et sub quo intelligatur. Idem enim lumen quod intellectus possibilis recipit cum specie ab agente, per actionem intellectus informati tali specie diffunditur, cum objectum formatur, et manet cum objecto formato; et hoc habet plenam rationem verbi, cum in eo quidditas rei intelligatur. Sicut in principio actionis intellectus et species non sunt duo, sed unum est ipse intellectus et species illustrata; ita unum in fine relinquitur, similitudo scilicet perfecta, genita et expressa ab intellectu: et hoc totum expressum est verbum, et est totum rei dictæ expressivum, et totum in quo res exprimitur, et hoc intellectum principale, quia res non intelligitur nisi in eo. Est enim tamquam speculum in quo res cernitur, sed non excedens id quod in eo cernitur. Efficitur enim opere naturæ ut in eo aliquid cernatur: natura autem non agit aliquid superflue, et ideo non excedit speculum hoc, idest id quod in eo videtur. Verbum igitur cordis est ultimum quod potest intellectus in se operari. Ad ipsum enim in quo quidditas rei recipitur; immo quia ipsemet est quidditatis similitudo, terminatur intelligere. Sic enim habet rationem objecti intellectus. Ut vero est per intellectum expressum, ei conjungitur dicere; et sic ipsum idem verbum est effectus actus intellectus; qui est formativus objecti, ei ipsius dicere. Sed in hoc reperitur differentia quædam: quod enim intelligitur, potest esse in intellectu et manere in intellectu non intellectum actu; quod autem dicitur, potest esse dictum, sed non potest manere dictum, nisi cum actu dicitur: unde in intellectu potest manere species objecti in habitu. Illud enim dico quod formatum est, sed manet id in quo formatum est sine lumine, in quo actu aliquid intelligitur. Inde est quod verbum non est sine intelligere in actu, licet ipsum intellectum nudum in habitu manere possit. Habitus hic dicitur non ipsa potentia memorativa tantum, quæ præcedit intellectum: immo ipse intellectus est natus retinere suum objectum, propter tamen naturam memoriæ, quæ prior est. Unumquodque enim prius salvatur in suo posteriori; et ideo ipsa perfectio objecti habetur in ipso habitu intellectus, ut dictum est; et

<sup>1</sup> Parm. omittit: « ab. »

<sup>2</sup> Parm. omittit: « et ideo. »

ibi posita est perfectio verbi superius. Ex his manifestum est qualiter apud nos deficit a repræsentatione Filii in divinis ; quia scilicet ipsa intelligentia nostra non est educta de mēmoīa nostra, a qua tamen principium et rationem agendi habet : quæ si esset de memoria totaliter educta, ipsa esset verbum memoriæ suæ : unde non diceret se, nec exprimeret nisi dictatum et expressum a memoria sua : quia aliter falso diceret et exprimeret se : sicut verbum in divinis non dicit se gignendo et exprimendo, sed dicit se genitum et expressum. Rursum manifestum est quare verbum proprie dicitur personaliter tantum. Verbum enim nostrum semper est in continuo fieri, quia perfectum esse suum est in fieri ; sed hoc non est imperfectum, quasi totum simul non existens, sicut est de aliis quæ sunt in fieri, quæ etiam semper sunt imperfecta ; immo verbum in principio sui est perfectum, quia conceptio perfecte formata est ; nihilominus esse ejus perfectum servatur eodem modo quo gignebatur. Non enim transit formatio verbi ipso formato, sed cum actu intelligitur, continue formatur verbum, quia semper est ut in fieri, et ut in egrediendo ab aliquo, scilicet a dicente ; et hoc cum personarum processionibus convenit. Intelligere vero, ut in quiete accipitur, et essentielle est in divinis, dicere vero, sicut et verbum, personaliter dicitur.

## CAPUT II.

Nunc restat videre, utrum verbum gignatur per reflexionem actus intellectus vel per actum rectum. Ad cujus evidentiam considerandum est quod verbum quod est expressivum rei quæ intelligitur, non est reflexum ; nec actio qua formatur verbum quod est expressivum quidditatis rei quæ concipitur, non est reflexa ; alioquin omne intelligere esset reflexum, quia semper cum actu intelligitur aliquid, verbum formatur. Unde manifestum est quod intellectus infra se ipsum actionem rectam exercere potest, et hæc semper est actio sua propria, quæ terminatur ad objectum factum in se et a se. Unum enim constituitur ex intellectu et specie, quæ est principium actionis suæ, et hujus est agere : nude species hæc est prima qua agitur, non autem ad quam : non enim intellectus

noster inspiciens hanc speciem tamquam exemplar sibi simile, aliquid facit quasi verbum ejus. Sic enim non fieret unum ex intellectu et specie, cum intellectus non intelligat nisi factus unum aliquid cum specie, sed in ipsa specie formatus agit tamquam aliquo sui ; ipsam tamen non excedens. Species autem sic accepta semper ducit in objectum primum. Unde manifestum est quod ipsum verbum intellectus perficitur per actum rectum ; tamen, quia non mittit ad aliquid aliud conceptiones suas, sicut facit sensus ; hinc est quod potest super actus suos reflecti cum vult quod non potest sensus : non enim utitur medio corpore, cujus non est percipere quod in eo fit. Sed cum sit unum agens, cum quo et species ipsa efficitur unum spiritualiter in participando vitam ejus, percipit actum suum cum vult, complete quod non potest sensus : non enim indiget anima, ad hoc quod a se intelligatur, specie illa, sed ad hoc ut intelligat : de se namque habet ut intelligatur, sed non quod intelligat. Intelligit enim se sicut alia, secundum Philosophum : hoc autem est per speciem, quia alia sic intelliguntur. Sensus autem indiget organo ad hoc ut agat ; organum autem non redit supra se, unde non est reflexio in sensu.

Considerandum tamen est quod generatio verbi videtur propinquissima cognitioni reflexæ : unde multi putaverunt eam reflexam. Cum enim anima informatam specie format verbum in se, non format ipsum in aliquo sui, non informatam specie quasi aliquid sui extendat a se non informatum specie prima, ut in eo verbum primum formetur, et ipsum esset informatum verbo in eo formato : sic enim videretur extendi quasi in rectum, et sic per actum rectum formaretur verbum : sed in se specie prima formata, eo quod formata est, actu gignitur verbum, et non in aliquo sui nudo : unde videtur hæc gignitio simillima reflexæ.

Sed sciendum est quod cum reflexio fiat redeundo super idem ; hic autem non sit reditio super speciem, nec super intellectum formatum specie, quia non percipiuntur quando verbum formatur ; gignitio verbi non est reflexa. Non enim generatur verbum ipsum per actum intellectus, nec ejus similitudo, nec etiam similitudo illius speciei qua intellectus informatur, quasi verbum esset ejus expressivum, sed similitudo rei. Illius enim

similitudo generatur quod in sua similitudine cognoscitur. Est tamen ipsum verbum similitudo illius speciei tamquam ejus quo factum est sibi simillimum. Similitudo vero rei est ut ad quod formatur, et tamquam ad ejus exemplar. Nec propter hoc oportet ipsum formantem prius rem intueri, et post ad eam verbum seu imaginem ipsam in se formare : quia habere speciem rei apud se, est sibi loco aspectus exemplaris. Artifices namque intuentes sua exemplaria, nihil aliud acquirunt nisi ipsas species exemplarium. Hæc autem species quam habet intellectus, advenit sibi a re quam ipse non est intuitus, sed sensus. Et quia est rei similitudo, est principium generationis hujus : unde in intellectu potest esse generatio per rectum, cum nihil ejus generatur. Directe igitur a specie ipsa itur in ipsum verbum, cum non percipitur ejus subjectum, sed res cujus est illa similitudo. Huic etiam similitudini tanto intimius est verbum, quanto perfectius genitum est. Ideo verbum intelligentis intimum est principio intellecto, ex quo et specie fit unum, nec tamen informatur subjectum simul diversis accidentibus ejusdem speciei, quia impossibile est eandem superficiem simul duabus albedinibus informari : hoc enim est impossibile, quando utrumque accidens est in ratione ejus quo aliquid fieri habet. Verbum autem est in quo aliquid intelligitur, sicut lux est in qua perficitur cognitio, sicut species coloris in visu exteriori; et forte similis si lux ex specie coloris generaretur, sicut ibi fit verbum ex specie : exteriora enim deficiunt a repræsentatione interiorum. Et propter hoc licet utrumque sit accidens, species scilicet, et verbum ex specie genitum, quia utrumque est in anima ut in subjecto; verbum tamen magis transit in similitudinem substantiæ quam species ipsa. Quia enim intellectus nititur in quidditatem rei venire, ideo in specie prædicta est virtus quidditatis substantiæ spiritualiter, per quam quidditas spiritualiter recte formatur, sicut in calore est virtus formæ ignis, per quam attingitur in generatione ad formam substantialem ignis, quod accidens per se non attingeret : unde verbum quod est ultimum quod potest fieri intra per speciem, magis accedit <sup>1</sup>

ad ipsam rem repræsentandam, quam nuda species rei. Quia igitur res intelligibilis eo ipso intelligitur quo intellectus formatur sua specie actu; prius natura est informari quam intelligere, sed non tempore : ideo videtur verbum quod sequitur speciem rei, similiter sequi intelligere ejus. Hoc autem non esset, si per speciem rei tenderet intellectus in ipsam rem ut in se, sicut visus videt colorem extra se existentem, et tunc formaret verbum in se re prius intellecta. Sed quia intellectus accipiens speciem a re per sensus, non ducitur per ipsam in rem ut est in sui natura, sed ut in se est, quia ipse facit in se objectum quod est in eo intellectum; objectum autem naturaliter prius est actione potentiæ circa objectum : ideo verbum quod est intra ipsum intellectum, prius est ipso intelligere ad ipsum terminato. Aliud enim est hoc a quo accipitur species, scilicet res ipsa, et aliud ad quod terminatur actio intellectus, scilicet similitudo rei formata ab intellectu.

Ex dictis manifestum est quomodo attenditur prioritas unius eorum ad alterum. Prius enim natura est intellectus informatus specie, quæ est primum sufficiens intelligendi, quam gignatur verbum : et ideo intelligere in radice prius est verbo, et verbum est terminus actionis intellectus. Sed quia objectum non habetur nisi in verbo, ut dictum est; objectum autem prius est quam quælibet actio ad eum terminata; ideo verbum prius est quam intelligere. Et hoc totum ideo contingit, quia non terminatur actio intellectus ad rem extra, a qua acquirit speciem ut in se est. Si enim species nata esset ducere intellectum ad rem ut in se est, ut species coloris ducit in colorem, omnibus modis præcederet intelligere verbum. Unde manifestum est quod verbum non est quod sequitur intellectum immediate post rationem intellectus : sic enim simpliciter præcederet verbum actum intellectus, qui est intelligere; sed verbum sequitur immediate intellectum in actu per speciem, a qua procedit verbum ut actus ex actu, et non ut actus ex potentia : unde verbum posterius est actu intelligendi a parte intellectus; et sic verbum sequitur ad intelligere non in se, sed in sua radice, ut dictum est. Si

<sup>1</sup> Al. : « accidit. »

vero intellectus a verbo acciperet speciem prius quam intelligeret ipsum verbum, et rem in verbo, impossibile foret per illud intelligere, vel verbum formare per ejus principium, sicut impossibile est intellectum facere rem extra, a qua speciem trahit. Ex dictis facile est scire quare intellectus non dicit se, quando format verbum secundum rem. Anima enim quasi transformata est in rem per speciem, qua agit quidquid agit : unde cum ea informatus est actu, verbum producit, in quo rem illam dicit cujus speciem habet, et non se. Cum vero nititur se apprehendere, quia non est cognoscibilis, nisi sicut alia per speciem aliorum; quia non indiget specie ut intelligat (hoc enim potest de se) non habet in se, ut intelligens est, speciem qua formetur verbum sui, sed accipit a se intelligibilem speciem non sui, sed rei qua necessario informatur ut intelligatur, ut dictum est. Cum igitur illa specie informatur, statim se intelligit; et hoc est per reflexionem, quia hæc species prius accepta a re quam a se informata est intelligibilis. Nec oportet prius formare verbum quam intelligere; sed cum intellexerit, format verbum sui; et ideo intelligere non tempore, sed natura præcedere necesse est, cum se ipsum intelligit : non enim cum se intelligit, facit totum objectum, sed aliquid circa ipsum : induit enim se, et hoc est verbum sui, cum se intelligit : non enim est aliud a quo accipitur species, ab eo ad quod

terminatur, sed idem. Sed quia ista est species rei, et non genita de essentia nuda, formatum verbum de anima per speciem rei non est purum verbum animæ, sed rei dictæ. Si vero nudatam ab omni re se apprehenderet, et similia sui in se gigneret, hoc ejus verbum esset purum, nihil extraneum habens admixtum. Tale est verbum Dei quod idem est in natura cum Patre dicente ipsum verbum. Verbum tamen animæ tali modo se dicentis foret accidens, et pro tanto diversæ naturæ foret ab anima, cum accidens sui foret, et a se et de se factum : ipsa enim substantiam facere non potest. Deus autem nihil diversitatis in sua natura habet; ideo verbum suum Deus, virtus et substantia vera est. Deus autem quia omnia unico intuitu videt, uno verbo omnia dicit; nos vero multa verba habemus propter impotentiam intellectus nostri in intelligendo : et horum quædam oriuntur ex aliis, sicut verbum conclusionis ex principiis; quædam vero non, sicut in rebus quæ non habent connexionem ad invicem, ut patet de lapide et ligno; quædam statim offeruntur intelligenti, quædam etiam cum majori, quædam cum minori <sup>1</sup> discursu. Ideo verba nostra quædam plus, quædam minus habent de cognitione, et quædam citius et quædam tardius formantur, sicut scire quarumdam conclusionum tardius et difficilius, quarumdam vero facilius et citius acquiruntur. Et hæc de verbo dicta sufficiant.

<sup>1</sup> Al. : « cum diviniore. » Parm. : « breviori. »

# OPUSCULUM XIV.

## DE SUBSTANTIIS SEPARATIS, SEU DE ANGELORUM NATURA

AD FRATREM REGINALDUM SOCIUM SUUM CARISSIMUM.

(EDIT. ROM. XVI.)

Quia sacris Angelorum solemnibus interesse non possumus, non debet nobis devotionis tempus transire in vacuum; sed quod psallendi officio subtrahitur, scribendi studio compensetur. Intendentes igitur sanctorum Angelorum excellentiam utcumque depromere, incipiendum videtur ab his quæ de Angelis antiquitus humana conjectura æstimavit; ut si quid invenerimus fidei consonum, accipiamus; quæ vero doctrinæ repugnant catholicæ, refutemus.

### CAPUT I.

#### *De opinionibus antiquorum philosophorum.*

Primi quidem igitur philosophantium de rerum naturis sola corpora esse æstimaverunt, ponentes prima principia aliqua corporea elementa, aut plura aut unum. Et si unum, aut aquam, ut Thales Milesius: aut aerem, ut Diogenes: aut ignem, ut Anaximander<sup>1</sup>; aut vaporem, ut Heraclitus. Et si plura; aut finita, sicut Empedocles quatuor elementa, et cum his duo moventia, amicitiam et litem; aut infinita, sicut Democritus et Anaxagoras: quorum uterque posuit infinitas partes minimas esse omnium rerum principia; nisi quod Democritus eas posuit genere similes, differre autem solum figura et ordine et posi-

tione; Anaxagoras autem diversarum rerum quæ sunt similium partium, infinitas partes minimas prima rerum principia æstimavit. Et quia omnibus inditum fuit animo ut illud divinum æstimarent quod esset primum rerum principium, prout quisquis alicui eorum corporum auctoritatem attribuebat primi principii, eidem etiam divinitatis nomen et dignitatem attribuendam censebat. Quæ quidem ideo dicta sunt, quia his omnibus et eorum sequacibus nullas substantias incorporeas esse videbatur, quas Angelos nominamus. Sed Epicurei ex Democriti doctrinis originem sumentes, deos quosdam ponebant, corporeos quidem utpote humana figura figuratos; quos dicebant esse penitus otiosos, nihil curantes, ut sic perpetuis voluptatibus fruenter possent esse beati. Unde hæc opinio intantum invaluit ut usque ad Judæos Dei cultores perveniret, quorum Sadducæi dicebant non esse Angelum neque spiritum.

Huic autem opinioni triplici via restiterunt antiqui Philosophi. Primo namque Anaxagoras, etsi cum ceteris philosophis naturalibus naturalia principia corporalia poneret, posuit tamen primus inter philosophos quoddam incorporale principium, idest intellectum. Cum enim, secundum suam positionem, omnia corporalia in omnibus mixta essent, non videbatur quod ab invicem corpora distinguere potuissent, nisi fuisset aliquod distinctionis principium quod ipsum secun-

<sup>1</sup> Parm. : « Ephasius. »



dum se penitus esset immixtum, et nihil cum natura corporali habens commune. Sed ejus opinio etsi in veritate præcesserit, quia solum materialem naturam ponebant, invenitur tamen a veritate deficere in duobus. Primo quidem quia, ut ex ejus positione apparet, non posuit nisi unum intellectum separatum, qui hunc mundum effecerat, commixta distinguendo. Cum autem Deo attribuamus mundi institutionem, secundum hoc et de substantiis incorporalibus, quas Angelos dicimus, quæ sunt infra Deum et supra naturas corporeas, ex ejus opinione nihil habere poterimus. Secundo, quia etiam circa intellectum, quem unum ponebant immixtum, in hoc videtur deficere, quod ejus virtutem et dignitatem non sufficienter expressit. Cum enim existimaret intellectum, quem posuit separatum, non ut universale essendi principium, sed solum principium distinctivum, non ponebat quod corpora invicem commixta esse haberent ab intellectu separato, sed solum quod ab eo distinctionem sortirentur.

Unde Plato sufficientiori via processit ad opinionem primorum Naturalium evacuandam. Cum enim apud antiquos Naturales poneretur ab omnibus certam rerum veritatem sciri non posse, tum propter rerum corporalium continuum fluxum, tum propter deceptionem sensuum, quibus corpora cognoscuntur; posuit naturas quasdam a materia fluxibilibus rerum separatas, in quibus esset veritas fixa; et sic eis inhærendo anima nostra veritatem cognosceret. Unde secundum hoc intellectus veritatem cognoscens aliquid seorsum apprehendit præter naturam sensibilibus rerum; et sic existimavit esse aliqua a sensibilibus separata. Intellectus autem noster duplici abstractione utitur circa intelligentiam veritatis. Una quidem secundum quod apprehendit numeros mathematicos et magnitudines et figuras mathematicas sine materiæ sensibilis intellectu: non enim intelligendo binarium aut trinarium, aut lineam et superficiem, aut triangulum et quadratum, simul in nostra apprehensione aliquid cadit quod pertineat ad calidum vel frigidum, aut aliquid hujusmodi, quod sensu percipi possit. Alia vero abstractione utitur intellectus noster intelligendo aliquid universale absque consideratione alienjus particularis; puta, cum intelligimus hominem, nihil intelli-

gentes de Socrate vel Platone aut alio quocumque; et idem apparet in aliis. Unde Plato duo genera rerum a sensibilibus abstracta ponebat; scilicet mathematica, et universalia, quæ species seu ideas nominabat. Inter quæ tamen hæc differentia videbatur: quod in mathematicis apprehendere possumus plura unius speciei, puta duas lineas æquales, vel duos triangulos æquiláteros et æquales; quod in speciebus omnino esse non potest; sed homo in universali acceptus, secundum speciem est unus tantum. Sic igitur mathematica ponebat media inter species seu ideas et sensibilia: quæ quidem cum sensibilibus conveniunt in hoc quod plura sub eadem specie continentur; cum speciebus autem in hoc quod sunt a materia sensibili separata. In ipsis etiam speciebus ordinem quemdam ponebat: quia secundum quod aliquid erat simplicius in intellectu, secundum hoc prius erat in ordine rerum. Id autem quod primo est in intellectu, est unum et bonum: nihil enim intelligit qui non intelligit unum et bonum. Unum autem et bonum consequuntur se: unde ipsam primam ideam unius, quod nominabat secundum se unum et secundum se bonum, primum rerum principium esse ponebat, et hunc summum Deum esse dicebat. Sub hoc autem uno diversos ordinés participantium et participatorum instituebat in substantiis a materia separatis: quos quidem omnes ordines secundos deos esse dicebat, quasi quasdam unitates secundas post primam simplicem unitatem. Rursus, quia omnes aliæ species participant uno, ita etiam oportet quod intellectus, ad hoc quod intelligat, participet eorum speciebus. Ideo sicut sub summo Deo, qui est unitas prima, simplex et imparticipata, sunt aliæ rerum species quasi unitates secundæ et dii secundi; ita sub ordine harum specierum seu unitatum ponebat ordinem intellectuum separatorum, qui participant supradictas species ad hoc quod sint intelligentes in actu: inter quos tanto unusquisque est superior, quanto propinquior est primo intellectui, qui plenam habet participationem specierum, sicut et in diis seu unitatibus tanto unusquisque est superior, quanto perfectius participat unitatem primam. Separando autem intellectum a diis, non excludebat quin dii essent intelligentes; sed volebat quod superintellectualiter in-

telligerent, non quidem quasi participant aliquas species, sed per se ipsos; ita tamen quod nullus eorum esset bonus et unus nisi per participationem primi unius et boni. Rursus, quia animas quasdam intelligentes videmus; non autem hoc convenit animæ ex eo quod est anima (alioquin sequeretur quod omnis anima esset intelligens, et quod anima secundum totum id quod est, esset intellectus) ponebat ulterius, quod sub ordine intellectuum separatorum esset ordo animarum; quarum quædam, superiores videlicet, participant intellectuali virtute, infimæ vero ab hac virtute deficient. Rursus, quia corpora videntur non per se moveri nisi sint animata, hoc ipsum quod est per se moveri, ponebat corporibus accidere in quantum participabant animam: nam illa corpora quæ ab animæ participatione deficient, non moventur nisi ab alio. Unde ponebat animabus proprium esse quod se ipsas moverent secundum se ipsas.

Sic igitur sub ordine animarum ponebat ordinem corporum; ita tamen quod supremum corporum, scilicet primum cælum, quod primo motu movetur, participat motum a suprema anima, et sic deinceps usque ad infimum cœlestium corporum. Sub his autem ponebant Platonici et alia immortalia corpora, quæ perpetuo animas participant, scilicet aerea vel ætherea. Horum autem quædam ponebant a terrenis corporibus esse penitus absoluta, quæ dicebant esse corpora dæmonum; quædam vero terrenis corporibus indita, quod pertinet ad animas hominum. Non enim ponebant, hoc corpus terrenum humanum, quod palpamus et videmus, immediate participare animam; sed esse aliud interius corpus animæ incorruptibile et perpetuum, sicut et ipsa incorruptibilis est; ita quod anima cum sic perpetuo invisibili corpore est in hoc corpore grossiori non sicut forma in materia, sed sicut nauta in navi. Et sicut hominum quosdam dicebant esse bonos, quosdam autem malos, ita et dæmonum. Animas autem cœlestes et intellectus separatos et deos omnes dicebant esse bonos.

Sic igitur patet quod inter nos et summum Deum quatuor ordines ponebant: scilicet deorum secundorum, intellectuum

separatorum, animarum cœlestium, et dæmonum bonorum seu malorum. Quæ si vera essent, omnes huiusmodi medii ordines apud nos Angelorum animæ censerentur: nam et dæmones in sacra Scriptura Angeli nominantur, Matth. xxii. Ipsæ etiam animæ cœlestium corporum, si tamen sint animata, inter Angelos sunt connumerandæ, ut Augustinus definit in *Enchyridione*, c. LVIII (a).

## CAPUT II.

### *Opinio Aristotelis et Avicennæ de numero substantiarum separatorum.*

Hujus autem positionis radix invenitur efficaciam non habere. Non enim necesse est ut ea quæ intellectus separatim intelligit, separatim esse habeant in rerum natura: unde nec universalis oportet separata ponere et subsistentia præter singularia: neque etiam mathematica præter sensibilia: quia universalis sunt essentiæ ipsorum particularium, et mathematica terminationes quædam sensibilibus corporum. Et ideo Aristoteles manifestiori et certiori via processit ad investigandum substantias a materia separatas, scilicet per viam motus. Primo quidem constituens et ratione et exemplis, omne scilicet quod movetur, ab alio moveri; et si aliquid a se ipso moveri dicatur, hoc non est secundum idem, sed secundum diversas sui partes; ita quod scilicet una pars ejus sit movens, et alia mota. Et cum non sit procedere in infinitum in moventibus et motis, quia remoto primo movente, esset consequens etiam alia removeri; oportet deveniri ad aliquod primum movens immobile, et aliquod primum mobile, quod movetur a se ipso, modo quo dictum est: semper enim quod per se ipsum est, est prius et causa ejus quod per aliud. Rursus constituere intendit motus æternitatem, et quod nulla virtus movere potest tempore infinito, nisi infinita fuerit; itemque quod nulla virtus in magnitudine sit virtus infinita. Ex quibus concludit, quod virtus primi motoris non est virtus corporis alicujus: unde oportet primum motorem esse incorporeum, et absque magnitudine. Item cum in genere mobi-

(a) « Sed ne illud quidem certum habeo, utrum ad eandem societatem pertineant sol et luna, et

cuncta sidera. »

lium inveniatur appetibile, sicut movens non motum; appetens autem sicut movens motum; concludit ulterius, quod primum movens immobile est sicut bonum quoddam appetibile; et quod primum movens se ipsum est primum mobile, quod movetur per appetitum ipsius.

Est autem considerandum ulterius quod in ordine appetituum et appetibilium primum est quod est secundum intellectum: nam appetitus intellectivus appetit id quod est secundum se bonum; appetitus autem sensitivus non potest attingere ad appetendum quod est secundum se bonum, sed solum ad appetendum id quod videtur bonum. Bonum enim simpliciter et absolute non cadit sub apprehensione sensus, sed solius intellectus. Unde relinquitur quod primum mobile appetit primum movens appetitu intellectuali. Ex quo potest concludi quod primum mobile sit appetens et intelligens. Et cum nihil moveatur nisi corpus, potest concludi quod primum mobile sit corpus animatum anima intellectuali. Non autem solum primum mobile quod est primum cælum, movetur motu æterno, sed etiam omnes inferiores orbis cælestium corporum: unde et unumquodque cælestium corporum animatum est propria anima, et unumquodque habet suum appetibile separatum quod est proprius finis sui motus.

Sic igitur sunt multæ substantiæ separatae nullis penitus unitæ corporibus. Sunt autem multæ intellectuales substantiæ cælestibus corporibus unitæ. Harum autem numerum Aristoteles investigare conatur secundum numerum motuum cælestium corporum. Quidam autem de ejus sectatoribus, scilicet Avicenna, numerum earum assignat non quidem secundum numerum motuum, sed magis secundum numerum planetarum, et aliorum superiorum corporum; scilicet orbis stellati et orbis qui est sine stellis. Multi enim motus ordinari videntur ad motum unius stellæ; et sicut omnia alia corpora cælestia sub uno primo cælo continentur, ejus motu omnia revolvuntur; ita etiam sub prima substantia separata, quæ est unus Deus, omnes aliæ substantiæ separatae ordinantur, et sic sub anima primi cæli omnes cælorum animæ.

<sup>1</sup> Parm.: « Cremophontem »

(a) Cfr. S. August. X *De civit. Dei*. c. xi, allegat Porphyrus, in hac *Epistola ad Anebontem*, quemdam Chæremone talium sacrorum peritum;

Sub corporibus autem cælestibus secundum Aristotelem ponuntur animata sola corpora animalium et plantarum. Non enim posuit quod aliquod simplex elementare corpus possit esse animatum, quia corpus simplex non potest esse conveniens organum tactus, qui sensus est de necessitate cujuslibet animalis: et sic inter nos et corpora cælestia nullum intermedium corpus animatum ponebat.

Sic igitur secundum Aristotelis positionem, inter nos et summum Deum non ponitur nisi duplex ordo intellectualium substantiarum: scilicet substantiæ separatae, quæ sunt fines motuum cælestium corporum; et animæ orbium, quæ sunt moventes per appetitum et desiderium.

Hæc autem Aristotelis positio certior quidem videtur, eo quod non multum recedit ab his quæ sunt manifesta secundum sensum; tamen minus sufficiens videtur quam Platonis positio.

Primo quidem, quia multa secundum sensus apparent quorum ratio reddi non potest secundum ea quæ ab Aristotele traduntur. Apparet enim in hominibus qui a dæmonibus opprimuntur, et in magorum operibus aliqua fieri non posse nisi per aliquam intellectualem substantiam.

Tentaverunt igitur quidam sectatorum Aristotelis, ut patet in *Epistola Porphyræ ad Anebontem*<sup>1</sup> *Ægyptium* (a), horum causas reducere in virtutem cælestium corporum, quasi sub quibusdam certis constellationibus magorum opera effectus quosdam insolitos et mirabiles assequantur, quos ex stellarum impressionibus esse dicunt; sicut quod arreptitii interdum aliqua futura prænuntiant, ad quorum eventum fit quædam dispositio in natura per cælestia corpora. Sed manifeste sunt in talibus quædam opera quæ nullo modo possunt in causam corporalem reduci: sicut quod arreptitii interdum de scientiis quas ignorant, litteraliter loquuntur, cum sint simplices idiotæ; et qui vix villam unde nati sunt, exierunt, alienæ gentis vulgare polite loquuntur. Dicuntur etiam in magorum operibus quædam imagines fieri, responsa dantes, et se moventes: quæ nullo modo per aliquam causam corporalem perfici possunt. Hujusmodi autem effectuum causam plane quis poterit se-

de Cremophonte autem nulla mentio fit. — Forsitan ex Chæremone illo sacrorum perito cæremoniæ nomen suum traxerunt.

cundum Platonicos assignare, nisi dicantur hæc per dæmones procurari?

Secundo, quia inconueniens videtur immateriales substantias ad numerum corporalium substantiarum coarctari. Non enim ea quæ sunt superiora in entibus, sunt propter ea quæ sunt inferiora, sed potius e contrario: id enim propter quod aliquid est, nobilius est. Rationem autem finis non sufficienter aliquis accipere potest ex his quæ sunt ad finem, sed potius a contrario. Unde magnitudinem et virtutem superiorum rerum non sufficienter aliquis accipere potest ex inferiorum rerum consideratione: quod manifeste apparet in rerum corporalium ordine. Non enim potest cœlestium corporum magnitudo et numerus accipi ex elementarium corporum dispositione, quæ quasi nihil sunt in comparatione ad illa. Plus autem excedunt immateriales substantiæ substantias corporales, quam corpora cœlestia excedant elementaria corpora. Unde numerus et virtus et dispositio immaterialium substantiarum ex numero cœlestium motuum sufficienter apprehendi non potest.

Et ut hoc specialius manifestetur, ipsum processum probationis Aristotelis assumamus. Assumit enim quod nullus motus esse potest in cœlo nisi ordinatus ad alicujus stellæ delationem: quod satis probabilitatem habet. Omnes enim substantiæ orbium esse videntur propter astra, quæ sunt nobiliora inter cœlestia corpora, et manifestiorem effectum habentia. Ulterius autem assumit quod omnes substantiæ superiores, impassibiles et immateriales, sunt fines, cum sint secundum se optima: et hoc quidem rationabiliter dicitur. Nam bonum habet rationem finis: unde illa quæ sunt per se optima in entibus, sunt fines aliorum. Sed quod concludit, hunc esse numerum immaterialium substantiarum qui est cœlestium motuum, non sequitur ex necessitate. Est enim finis proximus et remotus. Non est autem necessarium quod proximus finis supremi cœli sit suprema substantia immaterialis, quæ est summus Deus; sed magis probabile est ut inter primam immaterialem substantiam et corpus cœleste sint multi ordines immaterialium substantiarum, quarum inferior ordinetur ad superiorem sicut ad finem, et ad infima

earum ordinetur corpus cœleste sicut ad finem proximum. Oportet enim unamquamque rem esse comproporcionatam quodammodo suo proximo fini. Unde propter distantiam maximam primæ immaterialis substantiæ ad substantiam corpoream quæcumque, non est probabile quod corporalis substantia ordinetur ad supremam substantiam sicut ad proximum finem. Unde etiam Avicenna posuit causam primam non esse immediatum finem alicujus cœlestium motuum, sed quamdam intelligentiam primam: et idem etiam potest dici de inferioribus motibus cœlestium corporum; et ideo non est necessarium quod non sint plures immateriales substantiæ quam sit numerus cœlestium motuum. Et hoc præsentens Aristoteles non induxit hoc quasi necessarium, sed quasi probabiliter dictum. Sic enim dicit antequam prædictam rationem assignet, enumeratis cœlestibus motibus, quare substantias et principia immobilia et sensibilia tot rationabile est suscipere: « Necessarium enim dimittatur fortioribus dicere: » non enim reputabat se sufficientem ad hoc quod in talibus aliquid ex necessitate concluderet.

Potest etiam alicui videri prædictum processum Aristotelis ad substantias immateriales ponendas inconuenientem esse eo quod procedit ex sempiternitate motus, quæ fidei veritati repugnat. Sed si quis diligenter attendat rationem ejus processus, non tollitur æternitate motus sublata. Nam sicut ex æternitate motus concluditur motoris infinita potentia; ita hoc idem concludi potest ex motus uniformitate. Motor enim qui semper movere non potest, necesse est quod quandoque citius, quandoque tardius moveat, secundum quod paulatim virtus ejus deficit movendo. In motibus autem cœlestibus invenitur omnimoda uniformitas: unde concludi potest, quod motori primi motus insit virtus ad semper movendum; et sic idem sequitur.

### CAPUT III <sup>1</sup>.

*In quo conveniat et differat <sup>2</sup> opinio  
Platonis et Aristotelis.*

His igitur visis, de facili accipere possumus in quo conveniant et in quo diffe-

<sup>1</sup> Capit. III et IV. Parm. Unicum in Cod. cap. efficiunt.

<sup>2</sup> Parm. omittit: « et differat. »



rant positiones Aristotelis et Platonis circa immateriales substantias.

Primo quidem conveniunt in modo existendi ipsarum. Posuit enim Plato inferiores omnes substantias immateriales esse unum et bonum per participationes primi, quod est secundum se unum et bonum. Omne autem participans aliquid, accipit id quod participat, ab eo a quo participat : et quantum ad hoc, id a quo participat, est causa ipsius ; sicut aer habet lumen participatum a sole, qui est causa illuminationis ipsius. Sic igitur secundum Platonem summus Deus causa est omnibus immaterialibus substantiis, quod unaquæque earum et unum sit, et bonum sit. Et hoc etiam Aristoteles posuit : quia, ut dicit, necesse est ut id quod est maxime ens, et maxime verum, sit causa essendi et veritatis omnibus aliis.

Secundo autem conveniunt quantum ad conditionem naturæ ipsarum : quia uterque posuit omnes hujusmodi substantias penitus esse a materia immunes ; non tamen esse eas immunes a compositione potentiæ et actus : nam omne participans ens, oportet esse compositum ex potentia et actu. Id enim quod recipitur ut participatum, oportet esse actum ipsius substantiæ participantis ; et sic, cum omnes substantiæ præter supremam, quæ est per se unum et per se bonum, sint participantes secundum Platonem, necesse est quod omnes sint compositæ ex potentia et actu ; quod etiam necesse est dicere secundum sententiam Aristotelis. Ponit enim quod ratio veri et boni attribuitur actui : unde illud quod est primum verum et primum bonum, oportet esse actum purum ; quæcumque vero ab hoc deficiunt, oportet aliquam permutationem potentiæ habere.

Tertio vero conveniunt in ratione providentiæ. Posuit enim Plato, quod summus Deus, qui hoc quod est ipsum unum, est et ipsum bonum, ex primæva ratione bonitatis proprium habet ut inferioribus omnibus provideat : et unumquodque inferiorum, in quantum participat bonitatem primi boni, etiam providet his quæ post se sunt, non solum ejusdem ordinis, sed etiam diversorum ; et secundum hoc, primus intellectus separatus providet toti ordini separatorum intellectuum, et quilibet superior suo inferiori, totusque ordo separatorum intellectuum providet ordini animarum et inferioribus ordi-

nibus. Rursumque idem observari putat in ipsis animalibus, ut supremæ quidem cœlorum animæ provideant omnibus inferioribus animabus, et toti generationi inferiorum corporum : itemque superiores animæ inferioribus, scilicet animæ dæmonum animabus hominum. Ponebant enim Platonici, dæmones esse mediatores inter nos et superiores substantias. Ab hac etiam providentiæ ratione Aristoteles non discordat. Ponit enim unum bonum separatum omnibus providentem, sicut unum imperatorem vel dominum, sub quo sunt diversi rerum ordines ; ita scilicet quod superiores rerum perfectæ providentiæ ordinem consequuntur, unde nullus defectus in eis invenitur. Inferiores enim entium, qui minus perfecte providentiæ ordinem recipere possunt, multis defectibus subjacent ; sicut etiam in domo, liberi, qui perfecte participant regimen patrisfamilias, in paucis vel nullis deficiunt : servorum autem actiones in pluribus inveniuntur deficere. Unde in inferioribus corporibus defectus proveniunt naturalis ordinis, qui in superioribus corporibus nunquam deficere invenitur. Similiter etiam humanæ animæ plerumque deficiunt ab intelligentia veritatis et a recto appetitu veri boni ; quod in superioribus animabus vel intellectibus non invenitur. Propter quod etiam Plato posuit, dæmonum esse quosdam bonos, quosdam malos, sicut et homines ; deos vero et intellectus et cœlorum animas omnino absque malitia esse.

Secundum igitur hæc tria circa substantias separatas invenitur opinio Aristotelis cum Platonis opinione concordare.

Sunt autem alia quibus differunt. Primo quidem, ut supra dictum est, Plato supra cœlorum animas duplicem ordinem immaterialium substantiarum posuit, scilicet intellectus et deos ; quos deos dicebat esse species intelligibiles separatas, quarum participatione intellectus intelligunt. Aristoteles vero universalialia separata non ponens, unum solum ordinem rerum posuit supra cœlorum animas, in quorum etiam ordine primum summum Deum sicut et Plato summum Deum primum esse posuit in ordine specierum, quasi summus Deus sit prima idea unius et boni. Hunc autem ordinem Aristoteles posuit utrumque habere ; ut scilicet esset intelligens et intellectum ; ita scilicet, quod summus Deus intelligeret non participatione alicujus superioris, quod esset



ejus perfectio : sed per essentiam suam : et idem æstimavit esse dicendum in ceteris bonis separatis substantiis sub summo Deo ordinatis : nisi quod, inquantum a simplicitate primi deficiunt et summa perfectione ipsius, eorum intelligere perfici potest per superiorum substantiarum participationem. Sic igitur secundum Aristotelem hujusmodi substantiæ quæ sunt fines cœlestium motuum, sunt et intellectus intelligentes et intelligibiles species : non autem ita quod sint species vel naturæ sensibilium substantiarum, sicut Platonici posuerunt, sed omnino altiores.

Secundo vero, quia Plato non coarctavit numerum intellectuum separatorum numero cœlestium motuum : non enim ex hac causa movebatur ad ponendum intellectus separatos, sed ipsam naturam rerum secundum se considerans : Aristoteles vero a sensibilibus recedere nolens, ex sola consideratione motuum, ut supra dictum est, pervenit ad ponendum intellectuales substantias separatas ; et ideo earum numerum coarctavit cœlestibus motibus.

Tertio autem, quia Aristoteles non posuit aliquas animas medias inter cœlorum animas et animas hominum, sicut posuit Plato : unde de dæmonibus nullam invenitur nec ipse nec ejus sequaces fecisse mentionem.

Hæc igitur sunt quæ de opinionibus Platonis et Aristotelis circa substantias separatas ex diversis scripturis collegimus.

#### CAPUT IV.

##### *De errore Avicebron circa immaterialitatem angelorum*<sup>1</sup>.

Eorum vero qui post secuti sunt, aliqui ab eorum positionibus recedentes, in deterius erraverunt. Primo namque Avicebron in lib. *Fontis vitæ*, alterius conditionis substantias separatas posuit esse. Æstimavit enim omnes substantias sub Deo constitutas ex materia et forma compositas esse : quod ab opinione tam Platonis quam Aristotelis discordat : qui quidem dupliciter deceptus fuisse videtur. Primo quidem, quia æstimavit quod secundum

intelligibilem compositionem, quæ in rerum generibus invenitur, prout scilicet ex genere et differentia constituitur species, esset in rebus ipsius compositio realis intelligenda : ut scilicet uniuscujusque rei in genere existentis genus sit materia, differentia vero forma. Secundo, quia æstimavit quod esse in potentia vel esse substitutum vel esse recipiens secundum unam rationem in omnibus diceretur : quibus duabus positionibus innixus, quadam resolutoria via processit investigando compositiones rerum usque ad intellectuales substantias.

Primo enim inspexit in artificialibus, quod componuntur ex forma artificiali et materia, quæ est aliqua res naturalis ; puta ferrum aut lignum ; quæ se habet ad formam artificialem ut potentia ad actum. Rursus consideravit quod hujusmodi naturalia corpora particularia composita erant ex elementis. Unde posuit quod quatuor elementa comparantur ad formas particulares naturales, puta lapidis aut ferri, sicut materia ad formam et potentia ad actum. Iterum consideravit quod quatuor elementa conveniunt in hoc quod quodlibet eorum est corpus ; differunt autem secundum contrarias qualitates. Unde tertio posuit quod ipsum corpus est materia elementorum, quam vocavit materiam universalem ; et quod formæ hujus materiæ sunt qualitates elementorum.

Secundo, quia videbat quod corpus cœleste convenit cum elementis in corporeitate, differt vero ab eis in hoc quod non est susceptivum contrariarum qualitatum ; posuit quarto ordine materiam corporis cœlestis, quæ etiam comparatur ad formam cœlestis corporis sicut potentia ad actum ; et sic posuit quatuor ordines materiæ corporalis.

Rursus, quia vidit quod omne corpus significat substantiam quamdam longam, latam et spissam ; æstimavit quod corporis, inquantum est corpus hujusmodi, tres dimensiones sint sicut forma, et substantia, quæ subicitur quantitati et aliis generibus accidentium, est materia corporis inquantum est corpus. Sic igitur substantia quæ sustinet novem prædicamenta, ut etiam dicit, est prima spiritualis materia. Et sicut posuit in materia corporali universali, quam dixit esse corpus, quoddam superius quod non est susceptivum con-

<sup>1</sup> Parm. : « de substantiarum separatorum es-

sentia secundum Avicebron. »

trariarum qualitatum, scilicet materiam cœlestis corporis; et aliquid inferius, quod est susceptivum contrariarum qualitatum, quam credidit esse numerum quatuor elementorum; ita etiam in ipsa substantia posuit quiddam superius, quod non est susceptivum quantitatis, quod posuit esse substantiam separatam: et quoddam inferius quod est susceptivum quantitatis, quam posuit esse materiam corpoream corporum.

Rursus ipsas substantias separatas vel spirituales componi posuit ex materia et forma; et hoc probavit pluribus rationibus. Primo quidem, quia existimavit quod nisi substantiæ spirituales essent compositæ ex materia et forma, nulla posset inter eas esse diversitas. Si enim non sunt compositæ ex materia et forma; aut sunt materia tantum, aut sunt forma tantum. Si sunt materia tantum, non potest esse quod sint multæ substantiæ spirituales, quia materia est una et eadem de se, et diversificatur per formas. Similiter etiam si substantia spiritualis sit forma tantum, non poterit assignari unde substantiæ spirituales sint diversæ. Quia si dicas quod sint diversæ secundum perfectionem et imperfectionem, sequeretur quod substantia spiritualis sit subjectum perfectionis et imperfectionis. Sed esse subjectum pertinet ad rationem materiæ, non autem ad rationem formæ. Unde relinquitur quod vel non sunt plures substantiæ spirituales, vel sunt compositæ ex materia et forma. Secunda ratio ejus est, quia intellectus spiritualitatis est præter intellectum corporeitatis<sup>1</sup>; et ita substantia corporalis et spiritualis habent aliquid in quo differunt, et habent aliquid in quo conveniunt, quia utrumque est substantia. Ergo sicut in substantia corporali, substantia est tamquam materia sustentans corporeitatem, ita in substantia spirituali, substantia est quasi materia sustentans spiritualitatem; et secundum quod materia plus vel minus participat de forma spiritualitatis, secundum hoc substantiæ spirituales sunt superiores vel inferiores; sicut et aer quanto est subtilior, tanto plus participat de claritate. Tertia ratio ejus est, quia esse communiter invenitur in substantiis spiritualibus et corporalibus tam superioribus quam inferioribus. Illud ergo quod

est consequens ad esse in substantiis corporalibus, erit consequens ad esse in substantiis spiritualibus. Sed in substantiis corporalibus invenitur triplex ordo: scilicet corpus spissum, quod est corpus elementorum; et corpus subtile, quod est corpus cœleste; et iterum materia et forma corporis. Ergo etiam in substantia spirituali invenitur substantia spiritualis inferior, puta quæ conjungitur corpori; et superior, quæ non est conjuncta corpori: et iterum materia et forma, ex quibus substantia spiritualis componitur. Quarta ratio ejus est, quod omnis substantia creata oportet quod distinguatur a creatore. Sed creator est unum tantum. Oportet igitur quod omnis substantia creata non sit unum tantum, sed composita ex duobus: quorum necesse est ut unum sit forma, et aliud materia; quia ex duabus materiis non potest aliquid fieri, nec ex duabus formis. Quinta ratio est, quod omnis substantia spiritualis creata est finita. Res autem non est finita nisi per suam formam; quia res quæ non habet formam per quam fiat unum, est infinita. Omnis igitur substantia spiritualis creata est composita ex materia et forma.

## CAPUT V<sup>1</sup>.

### *De reprobatione erroris<sup>2</sup>.*

Hæc autem quæ dicta sunt, in pluribus manifestam improbabilitatem continent.

Primo namque, quia ab inferioribus ad suprema entium resolvendo, ascendit in principia materialia; quod omnino rationi repugnat. Comparatur enim materia ad formam sicut potentia ad actum. Manifestum est autem quod potentia est minus ens quam actus: non enim dicitur potentia ens nisi secundum ordinem ad actum: unde non simpliciter dicimus esse quæ sunt in potentia, sed solum quæ sunt in actu. Quanto igitur magis resolvendo descenditur ad principia materialia, tanto minus invenitur de ratione entis. Suprema autem in entibus oportet esse maxime entia: nam et in unoquoque genere suprema quæ sunt aliorum principia, esse maxime dicuntur, sicut ignis est calidus maxime. Unde et Plato investigando suprema entium, processit resol-

<sup>1</sup> Caput illud et sequens unicum in Cod. cap. efficiunt.

<sup>2</sup> Parm.: « reprobatio opinionis Avicbron quantum ad modum ponendum. »

vendo in principia formalia, ut sic supra dictum est. Inconvenientissime igitur hic per contrariam viam processit in principia materialia resolvendo.

Secundo, quia, quantum ex suis dietis apparet, in antiquorum quodammodo naturalium opinionem rediit, qui posuerunt quod omnia essent unum ens, dum ponebant substantiam rerum omnium non esse aliud quam materiam: quam non ponebant esse aliquid in potentia tantum, sicut Plato et Aristoteles, sed esse aliquid ens actu. Nisi quod antiqui naturales nihil aliud præter corpora esse æstimantes, hanc materiam communem et substantiam omnium, aliquod corpus esse dicebant; puta aut ignem, aut aerem, aut aliquid medium. Sed iste non solum in corporibus materiam rerum existimans comprehendere, istud unum quod posuit esse primam materiam communem et substantiam omnium, dixit esse substantiam non corpoream. Et quod simili modo posuerit hanc universalem materiam, quam dicit esse substantiam omnium, sicut naturales hoc ponebant de aliquo uno corporum, manifestum est ex hoc quod eorum quæ conveniunt in genere, ponit genus esse materiam; differentias vero, quibus species differunt, ponit esse formas. Dicit enim, quod omnium materialium est materia communis ipsum corpus: rursumque omnium substantiarum tam corporalium quam spiritualium est communis materia substantia ipsa. Unde apparet quod similis est habitudo generis ad differentias, sicut subjecti ad proprias passiones; ut scilicet substantia hoc modo dividatur per spiritualem et corporalem, et corpus per cæleste et elementare, sicut numerus per par et impar, aut animal per sanum et ægrum: quorum numerus est subjectum paris et imparis sicut propriarum passionum, et animal sani et ægri, et tam subjecto quam passionibus de speciebus omnibus prædicatis. Sic igitur si substantia quæ prædicatur de omnibus, compararetur ad spiritualem et corporalem sicut materia et subjectum<sup>1</sup>, eorum, sequeretur quod adveniunt substantiæ per modum accidentalium passionum; et similiter in omnibus aliis consequentibus: quod ipse expresse concedit. Ponit enim omnes formas secundum se consideratas accidentia esse; dicit

tamen substantiales esse per comparisonem ad aliquas res in quarum definitionibus cadunt, sicut albedo est de ratione hominis albi. Sed hæc positio tollit quidem veritatem materiæ primæ. Quia si de ratione materiæ est quod sit in potentia, oportet quod prima materia sit omnino in potentia: unde nec de aliquo existentium actu prædicatur, sicut nec pars de toto. Tollit etiam logicæ principia, auferens veram rationem generis et speciei et substantialis differentiæ, dum omnia in modum accidentalium prædicationis convertit. Tollit etiam naturalis philosophiæ fundamenta, auferens veram generationem et corruptionem a rebus, sicut et antiqui ponentes unum materiale principium. Neque enim simpliciter aliquid generari dicitur, nisi quia simpliciter de non ente fit ens. Nihil autem fit quod prius erat. Si igitur aliquid fit quod prius erat in actu, quod est simpliciter esse; sequeretur, quod non simpliciter fiat ens hoc quod prius non erat: unde secundum quid generabitur, et non simpliciter. Tollit demum, ut finaliter concludam, prædicta positio etiam philosophiæ prima principia, auferens unitatem a singulis rebus, et per consequens veram entitatem simul, et rerum diversitatem. Si enim alicui existenti in actu superveniat alius actu, non erit totum unum per se, sed solum per accidens: eo quod duo actus vel formæ secundum se diversæ sunt, conveniunt autem solum in subjecto; esse autem unum per unitatem subjecti, est esse unum per accidens: seu duæ formæ sint non ordinatæ<sup>2</sup>, ad invicem, ut album et musicum, quæ sunt unum per accidens: dicimus enim quod album et musicum sunt unum per accidens, quia insunt uni subjecto: sive etiam formæ vel actus sint ad invicem ordinatæ, sicut color et superficies: non enim est simpliciter unum superficiatum et coloratum, etsi quodammodo coloratum per se de superficiato prædicetur; non quia superficiatum significet essentiam colorati, sicut genus significat essentiam speciei; sed ea ratione qua subjectum ponitur in definitione accidentis; alioquin non prædicaretur coloratum de superficiato per se, sed hoc de illo. Solo autem hoc modo species est unum simpliciter, in quantum vere id quod est homo, animal est: non

<sup>1</sup> Al.: « sicut materia est, et subjectum etc. »

<sup>2</sup> Al.: « inordinate. »

quia animal subjiciatur formæ hominis ; sed quia ipsa forma significata per hunc terminum « animal, » aliquando est forma hominis, non differens nisi sicut determinatum ab indeterminato. Si enim aliud sit animal et aliud bipes, non erit per se unum animal bipes, quod est homo, unde nec erit per se ens ; et per consequens sequeretur quod quæcumque in genere conveniunt, non differant nisi accidentali differentia ; et omnia erunt unum secundum substantiam, quæ est genus et subjectum omnium substantiarum ; sicut si superficiem una pars sit alba et alia nigra, totum est una superficies. Propter quod et antiqui ponentes unam materiam, quæ erat substantia omnium, de omnibus prædicata, ponebant omnia esse unum. Et hæc etiam inconvenientia sequuntur ponentes ordinem diversarum formarum substantialium in uno et eodem.

Tertio, secundum prædictæ positionis processum, necesse est procedere in causis materialibus in infinitum, ita quod nunquam sit devenire ad primam materiam. In omnibus enim quæ in aliquo conveniunt et in aliquo differunt, id in quo conveniunt, accipitur ut materia ; id vero in quo differunt, accipitur ut forma, ut ex præmissis patet. Si ergo una est materia communis omnium, ad hoc quod diversas formas recipiat, oportet quod nobiliorem formam in subtiliori et altiori materia recipiat, ignobiliorem vero in inferiori materia et grossiori ; puta formam spiritualitatis in subtiliori materia, formam vero corporeitatis in inferiori, ut ipse dicit. Præexistit ergo in materia differentia subtilitatis et grossitiei ante formam spiritualitatis et corporeitatis. Oportet igitur quod iterum ante grossitiem et subtilitatem præexistat in materia aliqua alia differentia, per quam una materia sit exceptiva unius, et alia alterius ; et eadem quæstio redibit de illis aliis præexistentibus, et sic in infinitum. Quandocumque enim deveniretur ad materiam totaliter uniformem, secundum principia positionis prædictæ oporteret quod non reciperet nisi unam formam, et æqualiter per totum : et iterum materia illi formæ substrata, non reciperet consequenter nisi unam formam, et uniformiter per totum ; et ita descendendo usque ad infima, nulla diversitas in rebus inveniri posset.

Quarto, quia antiquis naturalibus ponentibus primam materiam communem

substantiam omnium, possibile erat ex ea diversas res instituire, attribuendo diversis partibus ejus formas diversas. Poterat enim in illa communi materia, cum corporalis esset, intelligi divisio secundum quantitatem. Remota autem divisione quæ est secundum quantitatem, non remanet nisi divisio secundum formam vel secundum materiam. Si igitur ponatur universalis materia, quæ est communis omnium substantia, non habens in sui ratione quantitatem ; ejus divisio non potest intelligi nisi vel secundum formam, vel secundum materiam ipsam. Cum autem dicitur quod materia incorporea communis partim recipit formam hanc, et partim recipit formam illam ; divisio materiæ præsupponitur diversitati formarum in materia receptarum. Non igitur illa divisio potest secundum has formas intelligi. Si ergo intelligatur secundum formas aliquas, oportet quod intelligatur secundum formas priores ; quas neutra materia per totum recipit. Unde oportet iterum in materia præintelligere divisionem vel distinctionem quæcumque. Erit igitur et hæc secundum alias formas in infinitum, vel oportet devenire ad hoc quod prima divisio sit secundum ipsam materiam. Non est autem divisio secundum materiam nisi quia materia secundum se ipsam distinguitur, non propter diversam dispositionem vel formam aut quantitatem : quia hoc esset distingui materiam secundum quantitatem aut formam seu dispositionem. Oportet igitur quod finaliter deveniatur ad hoc quod non sit una omnium materia, sed sint multæ et distinctæ secundum se ipsas. Materiæ autem proprium est in potentia esse. Hanc igitur materiæ distinctionem accipere oportet, non secundum quod est vestita diversis formis aut dispositionibus (hoc enim est præter essentiam materiæ), sed secundum distinctionem potentiæ respectu diversitatis formarum. Cum enim potentia id quod est, ad actum dicatur ; necesse est ut potentia distinguatur secundum id quod potentia dicitur. Dico autem primo ad aliquid primo potentiam dici ; sicut potentiam visivam ad colorem, non autem ad album aut nigrum, quia eadem est susceptiva utriusque : et similiter superficies est susceptiva albi et nigri secundum unam potentiam, quæ primo dicitur respectu coloris.

Unde patet falsum esse principium

quod supponebat <sup>1</sup>, dicens potentiam et receptionem in omnibus eodem modo inveniri.

Ex hac autem ratione ulterius concludi potest, quod spiritualis et corporalis substantia: non potest esse una materia. Nam si est una materia et communis utrorumque, oportet in ipsa distinctionem præintelligi ante differentiam formarum, scilicet spiritualitatis et corporeitatis: quæ quidem non potest esse secundum quantitatis divisionem in substantiis spiritualibus, in quibus quantitatis dimensiones non inveniuntur. Unde relinquitur quod ista distinctio sit vel secundum formas seu dispositiones, vel secundum ipsam materiam: et cum non possit esse secundum formas et dispositiones in infinitum, oportet tandem redire ad hoc quod sit distinctio in materia secundum se ipsam. Erit igitur omnino alia materia spiritualium et corporaliū substantiarum.

Item cum recipere sit proprium materiæ in quantum huiusmodi, si sit eadem materia spiritualium et corporaliū substantiarum, oportet quod in utrisque sit idem receptionis modus. Materia autem corporaliū rerum suscipit formam particulariter, id est non secundum communem rationem formæ. Nec hoc habet materia corporalis in quantum dimensionibus subicitur aut formæ corporali; quia etiam ipsam formam corporalem individualiter materia corporalis recipit. Unde manifestum fit quod hoc convenit tali materiæ: quæ quia est infima, debilissimo modo recipit formam: fit enim receptio secundum recipientis naturam. Et per hoc maxime deficit a completa ratione formæ, quæ est secundum totalitatem ipsius particularitatis ipsam recipientis. Manifestum est autem quod omnis substantia intellectualis recipit formam intellectam secundum suam totalitatem; alioquin eam in sua totalitate intelligere non valet: sic enim intellectus intelligit rem secundum quod forma ejus in ipso existit. Relinquitur igitur quod materia, si qua sit in spiritualibus substantiis, non est eadem cum materia corporaliū rerum, sed multo altior et sublimior, utpote recipiens formam secundum ejus totalitatem.

Adhuc ultra procedentibus manifestum

fit quod tanto aliquid in entibus est altius, quanto magis habet de ratione essendi. Manifestum est autem quod cum ens per potentiam et actum dividatur, actus est potentia <sup>2</sup> perfectior, et magis habet de ratione essendi: non enim simpliciter esse dicimus quod est in potentia, sed solum quod est in actu. Oportet igitur id quod semper est superius in entibus, magis accedere ad actum; quod autem est in entibus infimum, propinquius esse potentia. Quia igitur materia spiritualium substantiarum non potest esse eadem cum corporaliū materia, sed longe distat ab ea utpote altior, ut ostensum est; necesse est ut longe distet a corporaliū materia, secundum differentiam potentia et actus. Corporaliū autem materia est potentia pura, secundum sententiam Aristotelis et Platonis. Relinquitur igitur quod materia substantiarum spiritualium non sit potentia pura, sed sit aliquid ens actu, potentia existens. Non autem sic dico ens actu, quasi ex potentia et actu compositum; quia vel esset procedere in infinitum, vel oportet venire ad aliquid quod esset ens in potentia tantum: quod cum sit ultimum in entibus, et per consequens non potest recipere nisi debiliter et particulariter: non potest esse prima materia spiritualis et intellectualis substantia. Relinquitur ergo quod si spiritualis substantia materia sit ens actu, quod sit actus vel forma subsistens; sicut et materia corporaliū rerum ita dicitur ens in potentia, quia est ipsa potentia formis subjecta. Ubi cumque autem ponitur materia ens actu, nihil differt dicere materiam et substantiam rei. Sic enim antiqui naturales, qui ponebant primam materiam corporaliū rerum esse aliquid ens actu, dicebant materiam esse omnium rerum substantiam, per modum quo artificialium substantia nihil est aliud quam eorum materia. Sic igitur si materia spiritualium substantiarum non potest esse aliquid ens in potentia tantum, sed est aliquid ens actu, ipsa spiritualium rerum materia est eorum substantia. Et secundum hoc nihil differt ponere materiam in substantiis spiritualibus, et ponere substantias spirituales simplices, non compositas ex materia et forma.

Amplius, cum actus naturaliter sit

<sup>1</sup> Al.: « supponebatur.

<sup>2</sup> Al.: « quia actus in potentia etc. »



prior potentia et forma quam materia; potentia quidem dependet in suo esse ab actu, et materia a forma; forma autem in suo esse non dependet a materia secundum propriam rationem actus: non enim priora naturaliter a posterioribus dependent. Si igitur aliquæ sint formæ quæ sine materia esse non possunt; hoc non convenit eis ex hoc quod sunt formæ, sed ex hoc quod sunt tales formæ, scilicet imperfectæ, quæ per se sustentari non possunt, sed indigent materiæ fundamento.

Sed dicunt: In omni genere in quo invenitur aliquid imperfectum, invenitur etiam aliquid perfectum secundum naturam illius generis; puta, si est ignis in materia aliena, a qua ignis secundum suam rationem non dependet, necesse est esse ignem non sustentatum in materia aliena. Sunt igitur supra formas in materiis receptas, aliquæ formæ per se subsistentes, quæ sunt spirituales substantiæ ex materia et forma non compositæ. Hoc etiam apparet in infimis substantiarum spiritualium, scilicet animabus, si quis eas ponit corporibus uniri ut formas. Impossibile est enim id quod ex materia et forma compositum est, esse alicujus corporis formam. Et similiter impossibile est id quod est materia alicujus, esse actum ejusdem. Nulla igitur pars ejus quod est alicujus forma, potest esse in materia, quæ est potentia pura, non actus.

## CAPUT VI.

### *De solutione rationum Avicbron* <sup>1</sup>.

His igitur visis, facile est rationes dissolvere in contrarium adductas.

Prima enim ratio concludere videbatur quod non posset esse diversitas in spiritualibus substantiis, si non essent ex materia et forma compositæ. Quæ quidem ratio in utraque parte suæ deductionis deficiebat. Neque enim oportet quod ea quæ sunt materiæ tantum, sint absque diversitate; neque etiam hoc oportet de substantiis quæ sunt formæ tantum. Dicitur enim quod quia materia secundum id quod est, est in potentia ens, necesse est ut secundum potentiæ diver-

sitatem sint diversæ materiæ. Nec aliud dicimus materiam substantiam quam ipsam potentiam quæ est in genere substantiæ. Nam genus substantiæ, sicut et alia genera, dividitur per potentiam et actum: et secundum hoc nihil prohibet aliquas substantias quæ sunt in potentia tantum, esse diversas, secundum quod ad diversa genera actuum ordinantur: per quem modum cœlestium corporum materia a materia elementorum distinguitur. Nam materia cœlestium corporum est in potentia ad actum perfectum, idest ad formam quæ complet totam possibilitatem materiæ, ut jam non remaneat potentia ad alias formas. Materia autem elementorum est potentia ad formam incompletam, quæ totam terminare non potest materiæ potentiam. Sed supra has materias, est <sup>2</sup> spiritualis materia, idest ipsa substantia spiritualis, quæ recipit formam secundum suam totalitatem, inferioribus materiis formam particulariter recipientibus.

Similiter etiam non tenet deductio ex parte formarum. Manifestum est enim, si res compositæ ex materia et forma secundum formas differunt, quod ipsæ formæ secundum se ipsas differunt et diversæ sunt. Sed si dicatur quod diversarum rerum non sunt formæ diversæ nisi propter materiæ diversitatem: sicut diversi colores ex una solis illustratione causantur in aere secundum differentiam spissitudinis et raritatis illius: unde necesse est quod ante colorum diversitatem præintelligatur in aere diversitas puritatis et spissitudinis: et sic etiam necesse erit quod in materia ante unam formam intelligatur alia forma, sicut etiam in corporibus ante colorem intelligatur superficies. Invenitur igitur in formis diversitas secundum quemdam ordinem perfectionis et imperfectionis. Nam quæ materiæ est propinquior, imperfectior est, et quasi in potentia respectu supervenientis formæ. Sic igitur nihil prohibet in spiritualibus substantiis ponere multitudinem, quamvis sint formæ tantum, ex hoc quod una earum alia perfectior est; ita quod imperfectior est in potentia respectu perfectioris, usque ad primam earum, quæ est actus tantum, quæ Deus est; ut sic omnes inferiores spirituales substantiæ,

<sup>1</sup> Parm. 4 « solutio rationum Avicbron opinionis. »

<sup>2</sup> Al.: « spiriteria. »

et materiæ possint dici secundum hoc quod sunt in potentia, et formæ secundum hoc quod sunt actu.

Unde patet frivolum esse quod contra hoc objicit, concludens, si spiritualis substantia secundum perfectionem et imperfectionem differt quod oportet ipsam esse perfectionis substitutum: et sic cum substitutum pertineat ad rationem materiæ, oportet substantiam spiritualem habere materiam. In quo quidem dupliciter fallitur. Primo quidem, quia æstimat perfectionem et imperfectionem esse quasdam formas supervenientes, vel accidentia quæ subsistere indigeant: quod quidem manifeste falsum est. Est enim quædam rei perfectio secundum suam speciem substituta, quæ comparatur ad rem sicut accidens ad substitutum, vel sicut forma ad materiam, sed ipsa propriam speciem rei designat. Sicut enim in numeris unus est major alio secundum propriam speciem (unde inæquales numeri secundum speciem differunt); ita in formis tam materialibus quam a materia separatis una est perfectior alia secundum rationem propriæ naturæ; in quantum scilicet propria ratio speciei in tali gradu perfectionis consistit. Secundo, quia esse subjectum non consequitur solam materiam quæ est pars substantiæ, sed universaliter consequitur omnem potentiam. Omne enim quod se habet ad alterum ut potentia ad actum, ei natum est subjici; et per hunc etiam modum spiritualis substantia, quamvis non habeat materiam partem sui, ipsa tamen prout est ens secundum aliquid in potentia, potest subjici intelligibilibus speciebus.

Ex hoc etiam solutio secundæ rationis apparet. Cum enim dicimus aliquam substantiam corporalem esse vel spiritualem, non comparamus spiritualitatem vel corporeitatem ad substantiam sicut formas ad materiam, vel accidentia ad subjectum; sed sicut differentias ad genus: ita quod sola substantia spiritualis non per aliquod additum substantiæ suæ est spiritualis, sed per suam substantiam; sicut et substantia corporalis non per aliquod additum substantiæ est corporalis, sed secundum propriam substantiam. Non enim est alia forma per quam species differentiæ prædicationem suscipit, ab ea per quam suscipit prædicationem generis, ut dictum est. Unde, non oportet quod spiritualitati spiritualis sub-

stantiæ subjiatur aliquid sicut materia vel substitutum.

Tertia vero ratio efficaciam non habet. Cum enim ens non univoce de omnibus prædicetur, non est requirendus idem modus essendi in omnibus quæ esse dicuntur; sed quædam perfectius, quædam imperfectius esse participant. Accidentia enim entia dicuntur, non quia in se ipsis esse habeant; sed quia esse eorum est in hoc quod insunt substantiæ. Rursumque substantiis omnibus non est idem modus essendi. Illæ enim substantiæ quæ perfectissime esse participant, non habent in se ipsis aliquid quod sit ens in potentia solum: unde immateriales substantiæ esse dicuntur. Sub his sunt substantiæ quæ etiam in se ipsis hujusmodi materiam habent, quæ secundum sui essentiam est ens in potentia tantum; tota tamen earum potentialitas completur per formam, ut in eis non remaneat potentia ad aliam formam, unde et incorruptibiles sunt, sicut cœlestia corpora, quæ necesse est ex materia et forma composita esse. Manifestum est enim ea in actu existere; alioquin motui subjecta esse non possent, aut sensui subjacere, aut alicujus actionis esse principium. Nullum autem eorum est forma tantum: quia si essent formæ absque materia, essent substantiæ intelligibiles actu simul et intelligentes secundum se ipsas: quod esse non potest, cum intelligere actus corporis esse non possit, ut probatur in libro *De anima*. Relinquitur ergo quod sunt quidem ex materia et forma composita: sed sicut illud corpus ita est huic magnitudini et figuræ determinatæ subjectum quod tamen non est in potentia ad aliam magnitudinem vel figuram: ita cœlestium corporum materia est huic formæ subjecta quod non est in potentia ad aliam formam. Sub his vero substantiis est tertius substantiarum gradus; scilicet corruptibilium corporum, quæ in se ipsis hujusmodi materiam habent, quæ est ens in potentia tantum; nec tamen tota potentialitas hujusmodi materiæ completur per formam unam cui subji- citur, quia remanet adhuc in potentia ad alias formas. Et secundum hanc diversitatem materiæ invenitur in corporibus subtilius et grossius prout cœlestia corpora sunt subtiliora et magis formalia quam elementaria. Et quia forma proportionatur materiæ, consequens est quod cœlestia corpora habeant nobiliorem for-

mam et magis perfectam, utpote totam potentialitatem materiæ adimplentem. In substantiis igitur superioribus, quibus est omnino potentia materiæ aliena, invenitur quidem differentia majoris et minoris subtilitatis secundum differentiam perfectionis formarum, non tamen in eis est compositio materiæ et formæ.

Quarta vero ratio efficaciam non habet. Non enim oportet ut si substantiæ spirituales materia carent quod ideo non distinguantur; sublata enim potentialitate materiæ, remanet in eis potentia quædam, inquantum non sunt ipsum esse, sed esse participant. Nihil autem per se subsistens, quod sit ipsum esse, poterit esse nisi unum solum; sicut nec aliqua forma, si separata consideretur, potest esse nisi una. Inde est enim quod ea quæ sunt diversa numero, sunt unum specie, quia natura speciei secundum se considerata est una. Sicut igitur est una secundum considerationem, dum per se consideratur; ita esset una secundum esse, si per se subsisteret vel existeret. Eademque ratio est de genere per comparisonem ad species, quousque perveniatur ad ipsum esse quod est communissimum. Ipsum igitur esse per se subsistens est unum tantum. Impossibile est igitur quod præter ipsum sit aliquid subsistens quod sit esse tantum: omne autem quod est, esse habet. Est igitur in quocumque, præter primum, et ipsum esse, tamquam actus; et substantia rei habens esse, tamquam rei potentia receptiva hujus actus quod est esse. Potest autem quis dicere: Id quod participat esse secundum se, carens est illo; sicut superficies, quæ nata est participare colorem, secundum se considerata, est non color et non colorata. Similiter igitur id quod participat esse, oportet esse non ens. Quod autem est in potentia ejus, est participativum ipsius; non autem secundum se est ens. Sequitur ergo quod habeat materiam, quia ipsius esse receptiva est materia, ut supra dictum est. Sic igitur omne quod est post primum ens, quod est ipsum esse, cum sit participative ens, habet materiam.

Sed considerandum est, quod ea quæ a primo ente esse participant, non participant esse secundum universalem modum essendi, secundum quod est in primo principio; sed particulariter secundum quemdam determinatum essendi modum qui convenit huic generi vel huic

speciei. Unaquæque autem res adaptatur ad unum determinatum modum essendi secundum modum suæ substantiæ. Modus autem uniuscujusque substantiæ compositæ ex materia et forma, est secundum formam, per quam pertinet ad determinatam speciem. Sic igitur res composita ex materia et forma, per suam formam fit participativa ipsius esse a Deo secundum quemdam proprium modum. Invenitur igitur in substantia composita ex materia et forma duplex ordo: unus quidem ipsius materiæ ad formam; alius autem ipsius rei jam compositæ ad esse participatum. Non enim est esse rei neque forma ejus neque materia ipsius; sed aliquid adveniens rei per formam. Sic igitur in rebus ex materia et forma compositis, materia quidem secundum se considerata, secundum modum suæ essentiæ habet esse in potentia, et hoc ipsum est ei ex aliqua participatione primi entis; caret vero secundum se considerata, forma, per quam participat esse in actu secundum proprium modum. Ipsa vero res composita in sui essentia considerata, jam habet formam esse; sed participat esse proprium sibi per formam suam. Quia igitur materia recipit esse determinatum actuale per formam, et non e converso; nihil prohibet esse aliquam formam quæ recipiat esse in se ipsa, non in aliquo subjecto: non enim causa dependet ab effectu, sed potius e converso. Ipsa igitur forma sic per se subsistens, esse participat in se ipsa, sicut forma materialis in subjecto. Si igitur per hoc quod dico, « non ens, » removeatur solum esse in actu; ipsa forma secundum se considerata, est non ens, sed esse participans. Si autem « non ens » removeat non solum ipsum esse in actu, sed etiam actum seu formam, per quam aliquid participat esse; sic materia est non ens, forma vero subsistens non est non ens, sed est actus, quæ est forma participativa ultimi actus, qui est esse. Patet igitur in quo differt potentia quæ est in substantiis spiritualibus, a potentia quæ est in materia. Nam potentia substantiæ spiritualis attenditur solum secundum ordinem ipsius ad esse; potentia vero materiæ secundum ordinem et ad formam et ad esse. Si quis autem utrumque materiam esse dicat, manifestum est quod æquivoce materiam nominabit.

Quintæ vero rationis solutio jam ex dictis apparet. Quia enim substantia spi-

ritualis esse participat non secundum suæ communitatis infinitatem, sicut est in primo principio, sed secundum proprium modum suæ essentiæ, manifestum est quod esse ejus non est infinitum, sed finitum. Quia tamen ipsa forma non est participata in materia, ex hac parte non finitur per modum quo finiuntur formæ in materia existentes.

Sic igitur apparet gradus quidam infinitatis in rebus. Nam materiales substantiæ finitæ quidem sunt dupliciter; scilicet ex parte formæ, quæ in materia recipitur, et ex parte ipsius esse, quod participat secundum proprium modum, quasi superius et inferius finita existens. Substantia vero spiritualis est quidem finita superius, inquantum a primo principio participat esse secundum proprium modum; est autem aliquo modo infinita inferius, inquantum non participatur in subjecto. Primum vero principium, quod Deus est, est omnibus modis infinitum.

## CAPUT VII.

### *De errore ponentium angelos non creatos, et ejus improbatione*<sup>1</sup>.

Sicut autem prædicta positio circa conditionem spiritualium substantiarum a sententia Platonis et Aristotelis deviat, eis immaterialitatis simplicitatem aufere; ita et circa modum existendi ipsarum aliqui a veritate deviasse inveniuntur, auferentes earum originem a primo et summo auctore: in quo inveniuntur diversi homines tripliciter errasse. Quidam enim posuerunt prædictas substantias omnino causam sui esse non habere. Quidam posuerunt eas quidem essendi causam habere, non tamen immediate omnes eas procedere a summo et primo principio, sed quadam serie ordinis inferiores earum a superioribus essendi originem habere. Alii vero confitentur omnes quidem hujusmodi substantias immediate essendi habere originem a primo principio; sed in ceteris quæ de eis dicuntur, puta quod sunt viventes, intelligentes et alia hujusmodi, superiores inferioribus causas existere.

Primum quidem igitur spirituales substantias omnino incausatas esse existi-

mant, hujus opinionem sumentes ex his quæ secundum materiam causantur, utentes communi suppositione naturali philosophorum pro principio, ex nihilo nihil fieri. Hoc autem videtur fieri quod habet causam sui esse. Quidquid igitur sui esse causam habet, oportet illud ex alio fieri. Hoc autem ex quo aliquid fit, est materia. Si igitur spirituales substantiæ materiam non habent, consequens videtur eas omnino causam sui esse non habere.

Rursus. Fieri, moveri quoddam est, vel mutari. Mutationis autem omnis et motus subjectum aliquod esse oportet; est enim motus actus existentis in potentia. Oportet igitur omni ei quod fit subjectum, aliquid præexistere. Spirituales igitur substantiæ, si immateriales sunt, factæ esse non possunt.

Item. In qualibet factione cum pervenitur ad factum esse ultimum, non remanet aliquid fieri; sicut nec post ultimum motum esse, remanet moveri. Videmus autem in his quæ generantur, quod unumquodque eorum tunc factum esse dicitur quasi terminata factione, quando accipit formam: est enim forma generationis terminus. Adepta igitur forma, non restat aliquid fiendum. Habens igitur formam non fit ens secundum suam formam. Si igitur aliquid sit secundum se forma, hoc non fit ens. Spirituales autem substantiæ sunt quædam formæ subsistentes, ut ex præmissis manifestum est. Non igitur spirituales substantiæ sui esse causam habent, quasi ab alio factæ.

Posset aliquis ad hoc argumentari ex opinionibus Aristotelis et Platonis, qui hujusmodi substantias ponunt esse sempiternas. Nullum autem sempiternum videtur esse factum, quia ens fit ex non ente, sicut album ex non albo; unde videtur consequens ut quod fit, prius non fuerit. Sic igitur consequens est, si spirituales substantiæ sunt sempiternæ, quod non sint factæ, nec habeant sui esse principium et causam.

Sed si quis diligenter consideret, ab eadem radice inveniet hunc opinionem procedere, et prædictam, quæ materiam spiritualibus substantiis adhibet. Processit enim supradicta opinio ex hoc quidem quod spirituales substantias ejusdem ra-

<sup>1</sup> Parm.: « opiniones dicentium substantias immateriales causam sui esse non habere, et

earum reprobatio. »



tionis esse existimavit cum materialibus substantiis, quæ sensu percipiuntur : quod est eorum qui imaginationem transcendere non valent. Sic et ista opinio ex hoc videtur procedere quod elevari non potest intellectus ad intuendum alium modum causandi quam istum qui convenit materialibus rebus. Paulatim enim humana ingenia processisse videntur ad investigandam rerum originem. Primo namque in sola exteriori mutatione, rerum originem consistere homines æstimaverunt. Dico autem exteriorem originem, quæ fit secundum accidentales transmutationes. Primi enim philosophantes de naturis, fieri rerum statuerunt non esse aliud quam alterari ; ita quod id quod est rerum substantia, quam materiam nominabant, sit principium primum penitus non causatum. Non enim distinctionem substantiæ et accidentis intellectu transcendere poterant. Alii vero aliquantulum ulterius procedentes, etiam ipsarum substantiarum originem investigaverunt, ponentes aliquas substantias causam sui esse habere. Sed quia nihil præter corpora mente percipere poterant, resolvebant quidem substantias in aliqua principia, sed corporalia, ponentes ex quibusdam corporibus congregatis alia fieri, ac si rerum origo in sola congregatione et segregatione consisteret. Posteriores vero philosophi ulterius processerunt, resolventes sensibiles substantias in partes essentialiæ, quæ sunt materia et forma : et sic fieri rerum naturalium in quadam transmutatione posuerunt, secundum quod materia alternatim diversis formis subjicitur. Sed ultra hunc modum fieri necesse est, secundum sententiam Platonis et Aristotelis, ponere alium altiorem. Cum enim necesse sit primum principium simplicissimum esse, necesse est quod non hoc modo esse ponatur quasi esse participans, sed quasi ipsum esse existens. Quia vero esse subsistens non potest esse nisi unum, sicut supra habitum est, necesse est omnia alia quæ sub ipso sunt, sic esse quasi esse participantia. Oportet igitur communem quamdam resolutionem in omnibus hujusmodi fieri, secundum quod unumquodque eorum intellectu resolvitur in id quod est, et in suum esse. Oportet igitur supra modum fieri quo aliquid fit, forma materiæ adveniente, præintelligere aliam rerum originem, secundum quod esse attribuitur toti uni-

versitati rerum a primo ente, quod est suum esse.

Rursus. In omni causarum ordine necesse est universalem causam particulari præexistere. Nam causæ particulares non agunt nisi in universalium causarum virtute. Manifestum est autem quod omnis causa per motum aliquid faciens, particularis causa est, habet enim particularem effectum ; est enim omnis motus ex hoc determinato in illud determinatum, omnisque mutatio motus cujusdam terminus est. Oportet igitur supra modum fieri quo aliquid fit per mutationem vel motum, esse aliquem modum fieri seu originem rerum absque omni mutatione vel motu per influentiam essendi.

Item. Necesse est quod per accidens est, in id reduci quod per se est. In omni autem factione quæ fit per motum vel mutationem, fit quidem hoc vel illud ens per se ; ens autem communiter sumptum per accidens fit : non enim fit ex non ente, sed ex non ente hoc ; ut si canis ex equo fiat, ut Aristotelis exemplo utamur, fit quidem canis per se ; non autem fit animal per se, sed per accidens, quia animal erat prius. Oportet igitur originem quamdam in rebus considerari, secundum quam ipsum esse communiter sumptum per se attribuitur rebus, quod omnem mutationem et motum transcendat.

Adhuc. Si quis ordinem rerum consideret semper inveniet id quod est maximum, causam esse eorum quæ sunt post ipsum ; sicut ignis, qui est calidissimus, causa est caliditatis in ceteris elementatis corporibus. Primum autem principium, quod Deum dicimus, est maxime ens. Non enim est ire in infinitum in rerum ordine, sed ad aliquid summum devenire, quod melius est esse unum quam plura. Quod autem in universo melius est, necesse est, esse, quia universum dependet ex essentia bonitatis ejus. Necesse est igitur primum ens esse causam essendi omnibus.

His autem visis, facile est solvere rationes.

Quod enim antiqui naturales quasi principium supposuerunt, ex nihilo nihil fieri ex hoc processit quia solum ad particularem fieri modum pervenire poterunt, qui est per mutationem vel motum.

De quo etiam fieri modo secunda ratio procedebat. In his enim quæ fiunt per mutationem vel motum, subjectum



factioni præsupponitur ; sed in supremo modo fiendi, qui est per essendi influxum, nullum subjectum factioni præsupponitur ; quia hoc ipsum est subjectum fieri secundum hunc factionis modum, quod est subjectum esse participare per influentiam superioris entis.

Similiter etiam tertia ratio de hoc modo fiendi procedit qui est per mutationem et motum. Cum enim ad formam perventum fuerit, nihil de motu restabit. Oportet enim intelligere quod per formam res generata esse participet ab universali essendi principio. Non enim causæ agentes ad determinatas formas sunt causæ essendi nisi in quantum agunt in virtute primi et universalis principii essendi.

Quarta etiam ratio eodem modo procedit de his quæ fiunt per motum vel mutationem, in quibus necesse est ut non esse præcedat esse eorum quæ fiunt, quia eorum esse est terminus mutationis vel motus. In his autem quæ fiunt absque mutatione vel motu per simplicem emanationem seu influxum, potest intelligi aliquid esse factum præter hoc quod quandoque non fuerit. Sublata enim mutatione vel motu non invenitur in actione influentis principii, prioris et posterioris successio. Unde necesse est ut sic se habeat effectus per influxum causatus ad causam influentem quamdiu agit, sicut in rebus quæ per motum fiunt, se habet effectus ad causam agentem in termino actionis cum motu existentibus. Tunc autem effectus jam est. Necesse est igitur ut in his quæ absque motu fiunt, simul cum agentis influxu sit ipse effectus productus. Si autem actio influentis sine motu extiterit, non accedit agenti dispositio ut postmodum possit agere, cum prius non potuerit ; quia jam hæc mutatio quædam esset. Potuit igitur semper agere influendo ; unde et effectus productus intelligi potest semper fuisse. Et hoc quidem aliquo modo apparet in corporalibus rebus. Ad præsentiam enim corporis illuminantis producitur lumen in aere absque aliqua aeris transmutatione præcedente : unde si <sup>1</sup> corpus illuminans aeri præsens semper fuisset, semper ab ipso aer lumen haberet. Sed expressius <sup>2</sup> hoc videtur in intellectualibus rebus, quæ

sunt magis remotæ a motu. Est enim principiorum veritas causa veritatis in conclusionibus semper veris. Sunt enim quædam necessaria quæ causam suæ necessitatis habent, ut etiam Aristoteles dicit in II *Metaphysicæ*, et in IV *Physicorum*. Non ergo æstimandum est quod Plato et Aristoteles, propter hoc quod posuerunt substantias materiales, seu etiam cœlestia corpora semper fuisse, eis subtraxerint causam essendi. Non enim in hoc a sententia catholicæ fidei deviat, quod hujusmodi posuerunt ea semper fuisse, cujus contrarium fides catholica tenet. Non enim est necessarium, quamvis origo sit ab immobili principio absque motu, quod eorum esse sit sempiternum. A quolibet enim agente procedit effectus secundum modum sui esse. Esse autem primi principii est ejus intelligere et velle. Procedit igitur universitas rerum a primo principio sicut ab intelligente et volente. Intelligentis autem et volentis est producere aliquid non quidem ex necessitate, sicut ipsum est, sed sicut vult et etiam intelligit. In intellectu autem primi intelligentis comprehenditur omnis modus essendi, et omnis mensura quantitatis et durationis. Sicut igitur non eundem modum essendi rebus indidit quo ipsum existit, corporumque quantitatem sub determinata mensura conclusit, cum in ejus potestate, sicut et in intellectu, omnes mensuræ contineantur ; ita etiam dedit rebus talem durationis mensuram qualem voluit, non qualem ipsum habet. Sicut igitur corporum quantitas sub tali determinata mensura concluditur, non quia actio primi principii ad hanc mensuram quantitatis determinetur, sed quia talis mensura quantitatis sequitur in effectu, qualem intellectus primæ causæ præscripsit, ita etiam ex actione primi agentis consequitur determinata durationis mensura ex intellectu divino eam præscribente : non quasi ipse subjaceat successivæ durationi, ut nunc velit aut agat aliquid quod prius noluerit ; sed quia tota rerum duratio sub ejus intellectu et virtute concluditur, ut determinet rebus ab æterno mensuram durationis quam velit.

<sup>1</sup> Al. : « semper corpus. »

<sup>2</sup> Parm. : « expressive » et in notula : « expressius. »

## CAPUT VIII.

*De errore ponentium angelos creatores, et eorum improbatione*<sup>1</sup>.

Hæc<sup>2</sup> igitur et hujusmodi alii considerantes asserunt quidem omnia essendi originem trahere a primo et summo rerum principio, quem dicimus Deum; non tamen immediate, sed ordine quodam. Cum enim primum rerum principium sit penitus unum et simplex, non æstimaverunt quod ab eo procederet nisi unum. Quod quidem etsi ceteris rebus inferioribus simplicius sit, et magis unum; deficit tamen a primi simplicitate, inquantum ipsum non est suum esse, sed est substantia habens esse: et hanc nominant intelligentiam primam, a qua quidem jam dicunt plura posse procedere. Nam secundum quod convertitur ad intelligendum suum simplex et primum principium, dicunt, quod ab ea procedit intelligentia secunda: prout vero se ipsam intelligit, secundum id quod est intellectualitatis in ea, producit animam primi orbis; prout vero intelligit se ipsam quantum ad id quod est in ea de potentia, procedit ab eo corpus primum: et sic per ordinem usque ad ultima corporum hunc processum a primo principio determinant. Et hæc est positio Avicennæ, quæ etiam videtur supponi in libro *De causis*. Hæc autem positio etiam primo aspectu reprobabilis videtur. Bonum enim universi potius esse quam bonum cujusque particularis naturæ invenitur. Destruit autem rationem boni in particularibus effectibus naturæ vel artis, si quis perfectionem effectus non attribuat intentioni agentis, cum eadem sit ratio boni et finis: et ideo Aristoteles reprobavit antiquorum naturalium opinionem, qui posuerunt formas rerum quæ naturaliter generantur, et alia naturalia bona non esse intenta a natura, sed provenire ex necessitate materiæ. Multo igitur magis inconveniens est ut bonum universi non proveniat ex intentione universalis agentis, sed quadam necessitate ordinis rerum. Si autem bonum universi, quod in distinctione et ordine consistit partium, ex intentione primi et universalis agentis procedit, necesse est quod ipsa

distinctio et ordo partium universi etiam in intellectu primi principii præexistat. Et quia res procedunt ab eo sicut ab intellectivo principio quod agit secundum formas conceptas, non oportet ponere quod a primo principio, etsi in essentia sua sit simplex, procedat unum tantum: et quod ab illo secundum modum suæ compositionis et virtutis procedant plura, et sic inde. Hoc enim esset distinctionem et ordinem talem in rebus esse non ex intentione primi agentis, sed ex quadam rerum necessitate. Potest tamen dici, quod rerum distinctio et ordo procedit quidem ex intentione primi principii, cujus intentio est non solum ad producendum primum causatum, sed ad producendum totum universum; tamen quodam ordine, ut ipse immediate producat primum causatum, quo mediante alia per ordinem producat in esse. Sed cum sit duplex modus productionis rerum: unus quidem secundum mutationem et motum; alius autem absque mutatione et motu, ut supra jam diximus: in eo quidem productionis modo, qui per motum est, hoc manifeste videmus accidere quod a primo principio alia procedunt mediantibus causis secundis: videmus enim et plantas et animalia produci in esse per motum secundum virtutes superiorum causarum ordinarum usque ad primum principium. Sed in eo modo producendi qui est absque motu, per simplicem influxum ipsius esse, hoc accidere impossibile est. Secundum enim hunc productionis modum, quod in esse producitur, non solum fit per se hoc ens, sed etiam per se fit ens simpliciter, ut dictum est. Oportet autem effectus proportionaliter causis respondere: ut scilicet effectus particularis causæ particulari respondeat; effectus autem universalis universali causæ. Sicut igitur cum per motum aliquid fit per se hoc ens, effectus hujusmodi in particularem causam reducitur, quæ ad determinatam formam movet: ita etiam cum simpliciter fit ens, et per se et non per accidens, oportet hunc effectum reduci in universalem essendi causam. Hoc autem est primum principium, quod Deus est. Præter igitur illum modum producendi qui est per mutationem vel motum, est alius modus quo res producuntur in esse a primo principio

<sup>1</sup> Parm.: « Opinio Avicennæ de fluxu rerum principio, cum sua reprobatione. »

<sup>2</sup> Parm.: « hoc. »

non mediantibus causis secundis, sed eo productionis modo qui fit absque motu, qui creatio nominatur, et qui in solum Deum refertur ut in auctorem. Solo autem hoc modo produci possunt in esse immateriales substantiæ, et cœlestia corpora, et corporum quorumcunque materia ante formam esse non potuit, sicut dictum est de materia cœlestium corporum, quæ non est in potentia ad aliam formam. Relinquitur igitur quod omnes immateriales substantiæ et cœlestia corpora, quæ per motum produci non possunt in esse, solum Deum sui esse habeant auctorem. Non ergo id quod est prius in eis, est posterioribus causa essendi.

Adhuc. Quanto aliqua causa est superior, tanto est universalior, et virtus ejus ad plura se extendit. Sed id quod primum invenitur in unoquoque ente, maxime est commune omnibus: quæcumque enim superadduntur, contrahunt id quod prius inveniunt: nam quod posterius in re intelligitur, comparatur ad prius ut actus ad potentiam. Per actum autem potentia determinatur. Sic igitur oportet ut id quod primum subsistit in unoquoque, sit effectus supremæ virtutis: quanto autem aliquod est posterius<sup>1</sup>, tanto reducatur ad inferioris causæ virtutem. Oportet igitur quod id quod primum subsistit in unoquoque, sicut in corporalibus materia, et in immaterialibus substantiis quod potentiale est, sit proprius effectus primæ virtutis, et universalis effectus agentis. Impossibile est igitur quod ab aliquibus causis secundis aliqua producantur in esse non præsupposito aliquo effectu superioris agentis; et sic nullum agens post primum rem totam in esse producit, quod est producere ens simpliciter per se, et non per accidens, quod est creare, ut dictum est.

Item. Alicujus naturæ vel formæ duplex causa invenitur: una quidem quæ est per se et simpliciter causa talis naturæ vel formæ; alia vero quæ est causa hujus naturæ vel formæ in hoc. Cujus quidem distinctionis necessitas apparet, si quis causas consideret eorum quæ generantur. Cum enim equus generatur, equus generans est quidem causa quod natura equi in hoc esse incipiat; non tamen est per se causa naturæ equinæ. Quod enim est per se alicujus causa na-

turæ secundum speciem, oportet quod sit causa ejus in omnibus habentibus illam speciem. Cum igitur equus generans habeat eandem naturam secundum speciem, oporteret quod esset sui ipsius causa; quod esse non potest. Relinquitur igitur quod oporteret super omnes participantem naturam equinam esse aliquam universalem causam totius speciei: quam quidem causam Platonici posuerunt speciem separatam a materia, ad modum quo omnium artificialium principium est forma artis, non in materia existens. Secundum Aristotelem autem hanc universalem causam oportet ponere in aliquo cœlestium corporum: unde et ipse has duas causas distinguens, dixit, quod homo generat hominem, et sol. Cum autem aliquid per motum causatur, natura communis alicui præexistenti advenit per formam materiæ advenientem, vel subjecto. Potest igitur sic per motum esse alicujus causa id quod particulariter naturam illam habet, ut homo hominis, aut equus equi; cum vero non per motum causatur, talis productio est ipsius naturæ secundum se ipsam. Oportet igitur quod reducatur in id quod est per se causa illius naturæ, non autem in aliquid quod particulariter naturam participet. Assimilatur enim talis productio processui vel causalitati, qui in intelligibilibus invenitur, in quibus natura rei secundum se ipsam non dependet nisi a primo sicut natura senarii; et ejus ratio non dependet a ternario vel binario, sed ab ipsa unitate. Non enim sex secundum primam rationem speciei sunt bis tria, sed sex solum. Alioquin oporteret unius rei multas substantias esse. Sic igitur cum esse alicujus causatur absque motu, ejus causalitas attribui non potest alicui particularium entium, quod participat esse; sed oportet quod reducatur in ipsam universalem et primam causam essendi, scilicet Deum, qui est ipsum esse.

Amplius. Quanto aliqua potentia magis distat ab actu, majori virtute indiget ad hoc quod in actum reducatur: majori enim virtute ignis opus est ad resolvendum lapidem quod ceram. Sed nullius potentiæ ad aliquam potentiam quantumcumque indispositam et remotam, nulla est comparatio aut proportio: non entis enim ad ens nulla est proportio. Virtus

<sup>1</sup> Al. : « aliquod ad posterius. »

igitur quæ ex nulla potentia præexistente aliquem effectum producit, in infinitum excedit virtutem quæ producit effectum ex aliqua potentia quantumcumque remota. Infinita autem virtus aliorum quidem potest esse secundum quid; sed simpliciter respectu totius esse infinita virtus non est nisi primi agentis, quod est suum esse; et per hoc est modis omnibus infinitum, ut supra dictum est. Sola igitur virtus primi agentis potest effectum producere nulla potentia præsupposita. Talem autem oportet esse productionem omnium ingenerabilium et incorruptibilium, quæ absque motu producuntur. Oportet igitur omnia hujusmodi a solo Deo esse producta. Sic igitur impossibile est ut immateriales substantiæ a Deo procedant in esse secundum ordinem quem dicta positio assignabat.

### CAPUT IX.

#### *De opinione Platonis de ideis, et ejus improbatione*<sup>1</sup>.

Illis autem rationibus moti Platonici posuerunt quidem omnium immaterialium substantiarum et universaliter omnium existentium Deum esse immediate causam essendi secundum prædictum productionis modum, qui est absque mutatione vel motu; posuerunt tamen secundum alias participationes bonitatis divinæ ordinem quemdam causalitatis in prædictis substantiis. Ut enim supra dictum est, posuerunt abstracta principia secundum ordinem intelligibilium conceptionum: ut scilicet sicut unum et ens sunt communissima, et primo cadunt in intellectu, sub hoc autem est vita, sub qua iterum est intellectus, et sic inde; ita etiam primum et supremum inter separata est id quod est ipsum unum, et hoc est primum principium, quod est Deus, de quo jam dictum est, quod est suum esse. Sub hoc autem posuit aliud principium separatum, quod est vita; et iterum aliud, quod est intellectus. Si igitur sit aliqua immaterialis substantia quæ sit intelligens, vivens et ens, erit quidem ens per participationem primi principii, quod est ipsum esse; erit quidem vivens per participationem alterius

principii separati, quod est vita; et erit intelligens per participationem alterius separati principii, quod est ipse intellectus: sicut si ponatur quod homo sit animal per participationem hujus principii separati quod est animal; sit autem bipes per participationem secundi principii, quod est bipes.

Hæc autem positio quantum ad aliquid quidem veritatem habere potest; simpliciter autem vera esse non potest. Eorum enim quæ accidentaliter alicui adveniunt, nihil prohibet id quidem quod est prius, ab aliqua universaliori causa procedere; quod vero est posterius ab aliquo posteriori principio; sicut animalia et plantæ calidum quidem et frigidum ab elementis participant secundum determinatum complexionis modum ad speciem propriam pertinentem, quem modum obtinent ex virtute seminali, per quam generantur. Nec est inconveniens quod ab aliquo principio aliquid sit quantum vel album, seu calidum; sed in his quæ substantialiter prædicantur, hoc contingere penitus impossibile est. Nam omnia quæ substantialiter de aliquo prædicantur sunt per se et simpliciter unum. Unus autem effectus non reducitur in plura prima principia secundum eandem rationem principii, quia effectus non potest esse causa simpliciter, vel simplicior prima causa. Unde et Aristoteles hac ratione utitur contra Platonicos: quod si esset aliud animal, et aliud bipes in principiiis separatis, non esset simpliciter unum animal bipes. Si igitur in immaterialibus substantiis aliud esset id quod est esse et aliud quod est vivere, et aliud quod est intellectivum esse; ita quod vivens adveniret enti, vel intelligens viventi, sicut accidens subjecto, vel forma materiæ, haberet rationem quod dicitur. Videmus enim aliquid esse causam accidentis quod non est causa subjecti, et aliquid esse causam substantialis formæ quod non est causa materiæ. Sed in immaterialibus substantiis id<sup>2</sup> ipsum esse eorum est ipsum vivere eorum. Nec est in eis aliud vivere quam intellectivum esse: unde a nullo alio habent quod vivant et intellectiva sint, quam a quo habent quod sint. Si igitur omnes immateriales substantiæ a Deo habent immediate quod sint, ab eo immediate habent

<sup>1</sup> Parm.: « opinio Platoniorum de effluxu rerum a primo principio, cum reprobatione. »

<sup>2</sup> Parm.: « ad » et in notula: « forte omitendum « ad »



quod vivant et intellectivæ sint. Si quid autem advenit eis supra eorum essentiam, puta intelligibiles species, vel aliquid hujusmodi; quantum ad talia potest Platonicorum opinio procedere; ut scilicet hujusmodi in inferioribus immaterialium substantiarum inveniantur ordine quodam a superioribus derivata.

### CAPUT X.

*De errore ponentium omnes substantias spirituales æquales, et ejus improbatio*<sup>1</sup>.

Sicut autem prædictæ positiones immaterialium substantiarum ordinem considerantes, non immediate, sed ordine quodam processum a primo principio tradiderunt; ita aliqui e converso volentes salvare immediatum earum processum a principio, totaliter ab eis naturæ ordinem sustulerunt; cujus positionis auctor invenitur Origenes fuisse. Consideravit enim quod ab uno justo auctore res diversæ et inæquales non possent procedere, nisi aliqua diversitate præcedente. Nulla autem diversitas præcedere potuit primam productionem rerum a Deo, quæ nihil præsupponit: unde ponebat omnes res a Deo primo productas, esse æquales. Unde, quia corpora incorporalibus substantiis æquari non possunt, posuit, in prima rerum productione corpora non fuisse; sed postmodum rebus a Deo productis diversitas intervenit ex diversitate motuum voluntatis immaterialium substantiarum, quæ ex sua natura habent arbitrii libertatem. Quædam igitur earum in principium ordinato motu voluntatis conversæ, in melius profecerunt, et hoc diversimode secundum voluntarii motus diversitatem. Unde et inter eas quædam sunt aliis superiores effectæ. Aliæ vero inordinato motu voluntatis a suo principio sunt aversæ: et hæc in deterius defecerunt quædam plus, quædam minus; ita ut hæc fuerit corporum producendorum occasio, ut eis immateriales substantiæ ab ordine boni aversæ alligarentur quasi usque ad inferiorem naturam prolapsæ. Unde et totam diversitatem corporum dicebat procedere ex diversitate inordinationis voluntarii motus immate-

rialis substantiæ; et quæ minus a Deo aversæ fuerant, nobilioribus corporibus alligarentur, quæ autem magis, ignobilioribus.

Hujus autem positionis ratio vana est, et ipsa positio impossibilis: cujus quidem impossibilitatis ratio accipi potest ex his quæ jam diximus. Dictum est enim supra, spirituales substantias immateriales esse. Si igitur in eis sit aliqua diversitas, oportet quod hoc sit secundum formalem differentiam. In his autem quæ formali differentia differunt, æqualitas inveniri non potest. Oportet enim omnem formalem differentiam ad primam oppositionem reduci, quæ est privationis ad formam. Unde omnium formaliter differentium natura unius imperfecta existens respectu alterius se habet ad ipsum secundum habitudinem privationis ad formam. Hoc autem in diversitate specierum nobis notarum apparet. Sic igitur specierum differentiam in animalibus et plantis et metallis et elementis invenimus secundum ordinem naturæ procedere, ut palatim ab imperfectiori ad perfectissimum natura consurgat: quod etiam apparet in speciebus colorum et saporum et aliorum sensibilium qualitatum. In his vero quæ materialiter differunt, eadem formam habentibus, nihil prohibet æqualitatem inveniri. Possunt enim subjecta diversa eadem formam participare aut secundum æqualitatem, aut secundum excessum et defectum. Sic igitur possibile esset spirituales substantias omnes æquales esse, si solum secundum materiam differrent, eadem formam secundum speciem habentes. Et forte tales eas esse Origenes opinabatur, non multum discernens inter naturas spirituales et corporales. Quia vero spirituales substantiæ immateriales sunt, necesse est in eis ordinem naturæ esse.

Adhuc. Secundum hanc positionem necesse est spirituales substantias aut imperfectas esse, aut superfluas esse. Non enim inveniuntur multa æqualia in uno gradu naturæ nisi propter imperfectionem cujuslibet eorum, vel propter permanendi necessitatem; ut quæ numero permanere non possunt, multiplicata permaneant; sicut inveniuntur in corruptibilibus rebus multa individua æqualia secundum naturam speciei: aut

<sup>1</sup> Parm.: « opinio Origenis et ejus reprobatio. »



propter necessitatem alicujus operationis, ad quam virtus unius non sufficit, sed oportet aggregari virtutem multorum quasi ad unam perfectam virtutem constituendam, ut patet in multitudine bellatorum, et in multitudine trahentium navim. Illa vero quorum est virtus perfecta, quæ sunt permanentia in ordine suæ naturæ, non multiplicantur secundum numerum in æqualitate ejusdem speciei. Est enim unus sol tantum, qui sufficit ad semper permanendum ad omnes effectus producendos qui sibi conveniunt secundum modum suæ naturæ : et idem apparet in ceteris cœlestibus corporibus. Substantiæ autem spirituales sunt multo perfectiores corporibus etiam cœlestibus. Non igitur in eis inveniuntur multæ in eodem gradu naturæ : una enim sufficiente aliæ superfluerent.

Item. Prædicta positio universitati rerum producendarum a Deo subtrahit boni perfectionem. Uniuscujusque enim effectus perfectio in hoc consistit quod suæ causæ assimiletur : quod enim secundum naturam generatur, tunc perfectum est quando contingit ad similitudinem generantis; artificialia etiam per hoc perfecta redduntur quod artis formam consequuntur. In primo autem principio non solum consideratur quod ipsum est bonum et ens et unum, sed etiam quod hoc eminentius præ ceteris habet, et alia ad sui bonitatem participandam adducit. Requirit igitur assimilatio perfecta universitatis a Deo productæ non solum quod unumquodque sit bonum et ens, sed et unum superemineat alteri, et unum moveat alterum ad suum finem : unde et bonum universi est bonum ordinis, sicut bonum exercitus. Hoc igitur bonum universitati rerum subtrahit prædicta positio, omnimodam æqualitatem in rerum productione constituens.

Amplius. Inconveniens est id quod est optimum in universo, attribueri casui. Nam id quod est optimum, maximam habet rationem finis intenti. Optimum autem in rerum universitate est bonum ordinis : hoc enim est bonum commune, cetera vero sunt singularia bona. Hunc autem ordinem qui in rebus nunc invenitur, prædicta positio attribuit casui, secundum scilicet quod accidit unam immaterialium substantiarum sic moveri

secundum voluntatem, et aliam aliter. Est igitur prædicta positio omnino abjicienda.

Ratio etiam positionis manifeste continet vanitatem. Non enim est eadem ratio justitiæ in constitutione alicujus totius ex pluribus partibus et diversis, et in distributione alicujus communis per singularia. Quia enim aliquod totum perfectum fit, secundum hoc diversas partes et inæquales ad ejus compositionem conducit. Si enim omnes essent æquales, jam non esset totum perfectum : quod patet tam in toto naturali, quam in toto civili. Non enim esset corpus hominis perfectum, nisi membra diversa et inæqualis dignitatis haberet; neque esset civitas perfecta, nisi inæquales conditiones et officia diversa in civitate existent. In distributione vero attenditur bonum uniuscujusque; et ideo diversis diversa assignantur secundum diversitatem in eis præcedentem, secundum quam competunt eis diversa. In prima igitur rerum productione Deus diversa et inæqualia in esse produxit, attendens ad id quod requirit perfectio universi, non ad aliquam diversitatem in rebus præexistentem; sed hoc attendit in remuneratione finalis judicii, unicuique retribuens secundum quod meruit.

## CAPUT XI.

*De errore dicentium Deum et angelos non habere singularium cognitionem*<sup>1</sup>.

Non solum autem in substantia et ordine spiritualium substantiarum aliqui erraverunt, ad modum inferiorum rerum de eis existimantes; sed hoc etiam quibusdam accidit circa signationem et providentiam earundem. Dum enim spiritualium substantiarum intelligentiam et operationem ad modum humanæ intelligentiæ, et operationis dijudicare voluerunt, posuerunt Deum, et alias substantias immateriales singularium cognitionem non habere, nec inferiorum, et præcipue humanorum actuum providentiam gerere. Quia enim in nobis singularium quidem sensus est, intellectus autem propter sui immaterialitatem non singularium, sed universalium est; con-

probatio. •

<sup>1</sup> Parm. : « opinio auferentium rerum providentiam a Deo et substantiis separatis, et ejus re-

sequens esse existimarunt ut intellectus substantiarum spiritualium, qui sunt multo simpliciores nostro intellectu, singularia cognoscere non possint. Non est autem in substantiis spiritualibus, cum sint omnino incorporeæ, aliquis sensus, ejus operatio sine corpore esse non potest : unde videtur eis impossibile quod spirituales substantiæ aliquam de singularibus notitiam habeant.

Adhuc. In majorem insaniam inde procedentes, æstimant Deum nihil nisi se ipsum intellectu cognoscere. Sic enim videmus in nobis quod intellectum est intelligentis perfectio et actus : per hoc enim intellectus fit actu intelligens. Nihil autem aliud Deo est nobilius quod possit esse ejus perfectio. Unde ex necessitate consequi arbitrantur quod nihil aliud sit a Deo intellectum nisi ejus esse.

Amplius. Ea quæ ex alicujus providentia procedunt, casualia esse non possunt. Si igitur omnia quæ in hoc mundo accidunt, ex divina providentia procedunt, nihil in rebus erit fortuitum et casuale.

Item. Utuntur ratione Aristotelis in VI *Metaphys.*, probantis quod si omnem effectum ponamus habere causam per se, et quod qualibet causa posita necesse sit effectum poni, sequeretur quod omnia futura ex necessitate contingerent : quia erit inducere quemlibet effectum futurum in aliquam præcedentem causam, et illam in aliam, et sic inde quousque veniatur ad causam quæ jam est vel quæ fuit. Hæc autem jam posita est, ex quo in præsentibus vel in præterito fuit. Si igitur posita causa necesse est effectum poni, ex necessitate consequuntur omnes futuri effectus. Sed si omnia quæ in mundo sunt, providentiæ subduntur; omnium causa non solum est præsens vel præterita, sed ab æterno præcessit. Non est autem possibile quin ea posita effectus sequantur : non enim cassatur divina providentia neque per ignorantiam neque per impotentiam providentis, in quem nullus cadit defectus. Sequeretur igitur omnia ex necessitate procedere.

Adhuc. Si Deus est ipsum bonum, oportet quod ordo providentiæ ejus secundum rationem boni procedat. Aut igitur inefficax est divina providentia, aut universaliter malum a rebus excludit.

Videmus autem in singularibus generalium et corruptibilium multa mala contingere; et præcipue inter homines, in quibus præter naturalia mala, quæ sunt naturales defectus et corruptiones communes eis et aliis corruptibilibus rebus, superadduntur insuper mala vitiorum et inordinatorum eventuum; puta, cum justis multoties multa mala veniunt, injustis autem bona. Propter hoc igitur aliqui æstimaverunt divinam providentiam se extendere usque ad substantias immateriales et incorruptibilia, et cœlestia corpora, in quibus nullum malum videbant : inferiora autem providentiæ subdi dicebant divinæ vel aliarum spiritualium substantiarum quantum ad genera, non autem quantum ad individua.

## CAPUT XII.

### *Quomodo ostenditur Deum habere omnem cognitionem*<sup>1</sup>.

Et quia ea quæ prædicta sunt, communi opinioni hominum repugnant, non solum plebis, sed etiam sapientum; certis rationibus ostendendum est prædicta veritatem non habere, et rationes præmissas non hoc concludere quod intendunt : et primo quidem quantum ad divinam cognitionem; secundo quantum ad ejus providentiam.

Oportet autem ex necessitate hoc firmiter tenere quod Deus omnium cognoscibilium quocumque tempore vel a quocumque cognoscente, certissimam cognitionem habeat : ut enim supra habitum est, Dei substantia est ipsum ejus esse. Non est autem in eo aliud esse, atque aliud intelligere : sic enim non esset perfecte simplex, unde nec simpliciter primum. Oportet igitur quod sicut ejus substantia est suum esse, ita etiam ejus substantia sit suum intelligere, seu intelligentia, ut etiam Philosophus concludit in XII *Metaphysicæ*. Sicut igitur ejus substantia est ipsum esse separatum, ita et ejus substantia est ipsum intelligere separatum. Si autem sit aliqua forma separata, nihil quod ad rationem illius formæ pertinere posset, ei deesset; sicut si albedo separata esset, nihil quod

<sup>1</sup> Hæc divisio cap. ex Cod. non ex Parm. est.

sub ratione albedinis comprehenditur, ei deficeret. Cujuslibet autem cognoscibilis, cognitio sub universali ratione cognitionis continetur. Oportet igitur Deo nullius cognoscibilis cognitionem deesse. Cognitio autem cuiuslibet cognoscentis est secundum modum substantiæ ejus, sicut et quælibet operatio est secundum modum operantis. Multo igitur magis divina cognitio, quæ est ejus substantia, est secundum modum esse ipsius. Esse autem ejus est unum, simplex, fixum et æternum. Sequitur ergo quod Deus uno simplici intuitu æternam et fixam de omnibus notitiam habeat. Adhuc autem id quod abstractum est, non potest esse nisi unum in unaquaque natura. Si enim albedo posset esse abstracta, sola una esset albedo, quæ abstracta esset; omnes autem aliæ albedines essent eam participantem. Sic igitur sicut sola Dei substantia est ipsum abstractum esse, ita sola ejus substantia est ipsum intelligere omnino abstractum. Omnia igitur alia sicut habent esse participatum, ita participative intelligunt, seu qualitercumque cognoscunt. Omne autem quod convenit alicui per participationem, perfectius invenitur in eo quod est tale per essentiam, a quo alia derivantur. Oportet igitur Deum omnium, a quibuscumque cognoscuntur, cognitionem habere. Unde et Philosophus pro inconvenienti habet ut aliquid a nobis cognitum, sit Deo ignotum; ut patet in I *De anima*, et in III *Metaphysicæ*.

Item. Si Deus se ipsum cognoscit, oportet quod perfecte cognoscat se : præsertim quia si ejus intelligere est ejus substantia, necesse est ut quidquid est in ejus substantia, ipsius cognitione comprehendatur. Cujuscumque autem rei perfecte substantia cognoscitur, necesse etiam est ut virtus perfecte cognoscatur. Cognoscit igitur perfecte suam virtutem. Oportet igitur quod cognoscat omnia ad quæ sua virtus extenditur. Sua autem virtus extenditur ad omne quod est quocumque modo in rebus vel esse potest, sive sit proprium, sive commune, sive immediate ab eo productum, sive mediantibus causis secundis : quia causæ primæ virtus magis imprimat in effectum quam virtus causæ secundæ. Oportet igitur Deum cognitionem habere de omnibus quæ sunt quocumque modo in rebus.

Amplius. Sicut causa est quodammodo

in effectu per sui similitudinem participatam, ita omnis effectus est in sua causa excellentiori modo secundum virtutem ipsius. In causa igitur prima omnium, quæ Deus est, oportet omnia eminentius existere ex natura quam etiam in seipsis. Quod autem est in aliquo, oportet quod in eo sit secundum modum substantiæ ejus : substantia autem Dei est ipsum intelligere ejus. Oportet igitur omnia quæ quocumque modo sunt in rebus, in Deo intelligibiliter existere secundum eminentiam substantiæ ejus. Necesse est igitur Deum perfectissime omnia cognoscere.

Sed occasionem errandi sumpserunt ex demonstratione Aristotelis in XII *Metaphysicæ*. Oportet autem ostendere quod Philosophi intentionem non assequuntur. Sciendum est igitur quod secundum Platonicos, ordo intelligibilium præexistebat ordini intellectuum, ita quod intellectus participando intelligibile fieret intelligens actu, ut supra jam diximus. Et per hunc modum etiam Aristoteles ostenderat prius in eodem libro, quod supra intellectum et appetitum intellectualem quo cælum movetur, est quoddam intelligibile participatum ab ipso intellectu cælum movente, sic dicens : « Susceptivum intelligibilis et substantiæ et intellectus agit ut agens; » quasi dicat, actu intelligit secundum quod habet jam participatum suum intelligibile superius : et ex hoc ulterius concludit quod illud intelligibile sit magis divinum. Et interpositis quibusdam, movet quæstionem de intellectu hujus divinissimi, cujus participatione motor cæli est intelligens actu. Quia si illud divinissimum non intelligit, non erit insigne aliquid, sed se habebit ut dormiens. Si autem intelligit, erit primo dubitatio quomodo intelligit. Quia si intelligit participando aliquid aliud superius, sicut per participationem ejus inferior intellectus intelligit; sequetur quod erit aliquid aliud principale respectu ipsius; quia ex quo per participationem alterius intelligit, non est intelligens per suam essentiam, ita quod sua substantia sit suum intelligere; sed magis sua substantia erit in potentia respectu intelligentiæ : sic enim se habet substantia cuiuslibet participantis ad id quod per participationem obtinet : et ita ulterius sequetur quod illud divinissimum non erit optima substantia; quod est contra positum. Movet etiam conse-

quenter aliam dubitationem de eo quod intelligitur ab optima substantia. Sive enim detur quod substantia prima sit ipsum ejus intelligere, sive substantia ejus sit intellectus qui comparatur ad intelligere ut potentia; dubium erit quid sit illud quod intelligit prima substantia. Aut enim intelligit se ipsum, aut aliquid diversum a se. Et si detur quod aliquid diversum a se intelligat, erit ulterius dubitabile, utrum semper idem intelligat, aut quandoque unum, quandoque aliud. Et quia posset aliquis dicere quod nihil differt quid intelligat, movet super hoc dubitationem, utrum aliquid differat vel nihil in quocumque intelligente intelligere aliquid bonum, vel intelligere quodcumque contingens. Et respondet satisfaciens huic dubitationi quod de quibusdam absurdum est intelligere : cujus potest esse sensus duplex. Vel quia absurdum est intelligere de quibusdam, utrum ea intelligere sit ita bonum sicut quædam alia, cum quædam respectu aliorum sint vel multo priora, vel multo meliora. Alius autem sensus est, quia videmus quod intelligere quædam in actu, apud nos videtur esse absurdum : unde et alia *Littera* habet : « Aut inconveniens meditari de quibusdam. » Habito igitur quod melius est intelligere aliquid bonum, quam intelligere minus bonum, concludit quod id quod intelligit prima substantia, est optimum, et quod intelligendo non mutatur, ut nunc intelligat unum nunc aliud : et hoc probat dupliciter. Primo quidem, quia cum intelligat id quod est nobilissimum, ut dictum est; sequeretur, si mutaretur ad aliud intelligibile, quod mutatio esset in aliquid indignius. Secundo, quia talis vicissitudo intelligibilium jam est motus quidam. Primum autem principium oportet esse omnibus modis immobile. Deinde redit ad determinandam primam quæstionem, an scilicet Dei substantia sit suum intelligere, et an esse Dei sit suum intelligere : quod sic dupliciter probatur. Primo quidem probat quod si prima substantia non est suum intelligere, sed est sicut potentia, adhuc sit probabile quod continue intelligere esset ei laboriosum. Hoc autem dicit esse probabile ex eo quod in nobis sic accidit. Sed quia in nobis potest accidere non ex natura intellectus, sed ex viribus inferioribus, quibus utimur in intelligendo; ideo non dixit esse hoc necessarium in omnibus.

Si tamen hoc probabile accipiatur ut verum, sequetur quod continue intelligere sit laboriosum primæ substantiæ, et ita non poterit semper intelligere; quod est contra præmissa. Secundo probat per hoc, quia si substantia sua non esset suum intelligere, sequetur quod aliquid aliud erit dignius quam ejus intellectus; scilicet res intellecta, per ejus participationem fit intelligens. Quodcumque enim substantia intelligentis non est suum intelligere, oportet quod substantia intellectus nobilitetur et perficiatur per hoc quod actu intelligit aliquid intelligibile, etiam si illud sit indignissimum. Omne autem per quod aliquid fit actu, nobilius est. Unde sequetur quod aliquid indignissimum intelligibile sit dignius quam intellectus qui non est intelligens per suam essentiam. Quare negandum est hoc : scilicet quod aliquid intellectum aliud ab ipso sit perfectio intellectus divini : quia ad perfectionem ipsius intelligere pertinet nobilitas ipsius intellecti : quod patet ex hoc quod in nobis, in quibus differt substantia cognoscentis a cognitione actuali, dignius est quædam non videre quam videre. Et ita, si sic sit in Deo quod ejus intellectus non sit sua intelligentia, et aliquid aliud intelligat; non erit sua intelligentia optima, quia non erit optimi intelligibilis. Relinquitur ergo quod se ipsum intelligat, cum ipse sit nobilissimum entium. Patet igitur prædicta verba Philosophi diligenter consideranti quod non est intentio ejus excludere a Deo simpliciter aliarum rerum cognitionem; sed quod non intelligit alia a se quasi participando ea, ut per ea fiat intelligens; sicut fit in quocumque intellectu cujus substantia non est suum intelligere. Intelligit autem omnia alia a se intelligendo se ipsum, in quantum ipsius esse est universale et fontale principium omnis esse, et suum intelligere quædam universalis radix intelligendi, omnem intelligentiam comprehendens. Inferiores vero intellectus separati, quos Angelos dicimus, intelligunt quidem se ipsos singuli per suam essentiam, alia vero intelligunt secundum Platonicas positiones, per participationem formarum intelligibilium separatarum, quas deos vocabat, ut supra dictum est; secundum Aristotelem vero partim per species, partim quidem per suam essentiam, partim vero per participationem formarum intelligibilium separata-



rum ipsius primi intelligibilis quod est Deus, a quo et esse et intelligere participant.

### CAPUT XIII.

*Quomodo <sup>1</sup> ostenditur Dei providentiam se extendere ad omnia.*

Sicut autem divinam cognitionem necesse est secundum præmissa usque ad minima rerum se extendere ita necesse est sub divinæ providentiæ cura universa concludere. Invenitur enim in rebus omnibus bonum esse in ordine quodam, secundum quod res sibi invicem subserviunt et ordinantur ad finem. Necesse est autem, sicut omne esse derivatur a primo ente, quod est ipsum esse; ita omne bonum derivetur a primo bono, quod est ipsa bonitas. Oportet igitur singulorum ordinem a prima et pura veritate derivari: a qua quidem aliquid derivatur secundum quod in eo est, per intelligibilem scilicet modum. In hoc autem ratio providentiæ consistit quod ab aliquo intelligente, statuatur ordo in rebus quæ ejus providentiæ subsunt. Necesse est igitur omnia divinæ providentiæ subjacere.

Adhuc. Primum movens immobile, quod Deus est, omnium motionum principium est, sicut et primum ens est omnis esse principium. In causis autem per se ordinatis tanto aliquid magis est causa, quanto in ordine causarum prior est; cum ipsa aliis conferat quod causæ sint. Deus igitur secundum hoc omnium motionum vehementius causa est quam etiam singulares causæ moventes. Non est autem alicujus causa Deus, nisi sit intelligens; cum sua substantia sit suum intelligere, ut per supra posita Aristotelis verba patet. Unumquodque autem agit per modum suæ substantiæ. Deus igitur per suum intellectum omnia movet ad proprios fines. Hoc autem providere est. Omnia igitur divinæ providentiæ subsunt.

Amplius. Si sunt res in universo dispositæ sicut optimum est eas esse, eo quod omnia ex summa bonitate dependent; melius est autem aliqua esse ordinata per se quam per accidens ordinentur: est igitur totius universi ordo non

per accidens, sed per se. Hoc autem requiritur ad hoc quod aliqua per se ordinentur, quod primi intentio feratur usque ad ultimum: si enim primum moveret secundum, et ejus intentio ulterius non feratur, secundum vero tertium moveat; hoc erit præter intentionem primi moventis. Erit igitur talis ordo per accidens. Oportet igitur quod primi moventis et ordinantis intentio, scilicet Dei, non solum usque ad quædam entium procedat, sed usque ad ultima. Omnia igitur ejus providentiæ subsunt.

Item. Quod causæ et effectui convenit, eminentius invenitur in causa quam in effectu; a causa enim in effectum derivatur. Quicquid igitur in inferioribus causis existens, primæ omnium causæ attribuitur, excellentissime convenit ei. Oportet igitur aliquam providentiam attribuere Deo; alioquin universum casu ageretur. Oportet ergo divinam providentiam perfectissimam esse.

Sunt autem in providentia duo consideranda: scilicet dispositio, et dispositorum executio: in quibus quodammodo diversa ratio perfectionis invenitur. Nam in dispositione tanto perfectior est providentia, quanto providens magis singula mente considerare et ordinare potest: unde et omnes operativæ artes tanto perfectius habentur, quanto quisque singula potest magis conjectari. Circa executionem vero tanto videtur esse providentia perfectior, quanto providens per plura media et diversa agentia universalius movet. Divina igitur providentia habet dispositionem intelligibilem omnium et singulorum; exequitur vero disposita per plurimas et varias causas: interquas spirituales substantiæ, quas Angelos dicimus, primæ causæ propinquiores existentes, universalius divinam providentiam exequuntur. Sunt igitur Angeli universales executores divinæ providentiæ: unde et signanter Angeli, id est nuntii, nominantur: nuntiorum enim est exequi ea quæ a domino disponuntur.

### CAPUT XIV.

*Solutio rationum prædictarum <sup>2</sup>.*

His igitur visis, facile est jam ad objectiones supra positas respondere.

<sup>1</sup> Parm.: « Quod divina providentia ad minima se extendit. »

<sup>2</sup> Parm.: « pro prædicta opinione. »



Non est enim verum quod prima ratio prætendebat, intellectum Dei et Angelorum singularia non posse cognoscere, si intellectus humanus ea cognoscere non potest. Et ut ejus differentiæ evidentius appareat ratio, considerandum est, quod cognitionis ordo est secundum proportionem ordinis qui invenitur in rebus secundum esse ipsarum. In hoc enim perfectio et veritas cognitionis existit, quod rerum cognitarum similitudinem habeat. In rebus autem talis ordo invenitur quod superiora in entibus universaliter esse et bonitatem habent; non quidem ita quod obtineant esse et bonitatem solum secundum rationem communem, prout universale dicitur quod de pluribus prædicatur; sed quia quicquid in inferioribus invenitur, in superioribus eminentius existit: et hoc ex virtute operativa quæ est in rebus apparet. Nam inferiora in entibus habent contractas seu determinatas virtutes effectivas ad determinatos effectus; superiora vero habent virtutes universaliter ad multos effectus se extendentes; et tamen virtus superior etiam in particularibus effectibus plus operatur quam inferior: et hoc maxime in corporibus apparet. Nam in inferioribus corporibus ignis quidem per suum calorem calefacit, et semen hujus animalis vel planta, ita determinate producit individuum hujus speciei, quod non producit alterius speciei individuum: ex quo patet quod virtus universalis in superioribus entibus dicitur non ex hoc quod non se extendat ad particulares effectus, sed quia se extendit ad plures effectus quam virtus inferior: et superior in singulis eorum vehementius operatur. Per hunc igitur modum quanto virtus cognoscitiva est altior, tanto est universalior: non quidem sic quod cognoscat solum universalem naturam: sicut enim quanto esset superior, tanto esset imperfectior: cognoscere enim aliquid solum in universali, est cognoscere imperfecte, et medio modo inter potentiam et actum. Sed ob hoc superior cognitio universalior dicitur quia ad plura se extendit, et singula magis cognoscit. In ordine autem cognoscitivarum virtutum est virtus sensitiva inferior; et ideo non potest cognoscere singula nisi per species proprias singulorum. Et quia individuationis principium est materia in rebus materialibus, inde

est quod per species individuales in organo corporeis receptas, vis sensitiva singularia cognoscit. Inter cognitiones autem intellectuales cognitio intellectus humani est infima: unde species intelligibiles in intellectu humano recipiuntur secundum debilissimum modum intellectualis cognitionis, ita quod earum virtute intellectus humanus cognoscere non potest res nisi secundum universalem naturam generis vel speciei: ad quam repræsentandam in sola sui universalitate sunt determinatæ et quodammodo contractæ ex hoc ipso quod a singularium phantasmatis abstrahuntur; et sic homo singularia quidem cognoscit per sensum, universaliter vero per intellectum. Sed superiores<sup>1</sup> intellectus sunt universalioris virtutis in cognoscendo, ut scilicet per intelligibilem speciem utrumque cognoscant, universale et singulare.

Secunda etiam ratio efficaciam non habet<sup>2</sup>. Cum enim dicitur quod intellectum est perfectio intelligentis, hoc quidem veritatem habet secundum speciem intelligibilem, quæ est forma intellectus in quantum est actu intelligens: non enim natura lapidis, quæ est materialis, est perfectio intellectus humani, sed species intelligibilis abstracta a phantasmatis, per quam intellectus intelligit lapidis naturam. Oportet autem quod cum omnis forma derivata ab aliquo agente procedat; agens autem sit honorabilius patiente, seu recipiente; quod omne illud agens, a quo intellectus intelligibilem habet formam, sit perfectius intellectu; sicut in intellectu humano apparet, quod intellectus agens est nobilior intellectu passibili, qui recipit species intelligibiles actu ab intellectu agente factas; non autem ipsæ res naturales cognitæ, sunt intellectu passibili nobiliores. Superiores autem intellectus Angelorum species intelligibiles participant vel ab ideis secundum Platonicos, vel a prima substantia, quæ Deus est, secundum quod consequens est ad positiones Aristotelis, et sicut se rei veritas habent. Species autem intelligibilis intellectus divini, per quam omnia cognoscit, non est aliud quam ejus substantia, quæ est suum intelligere, ut supra probatum est per verba Philosophi. Unde relinquitur quod intellectu divino nihil aliud sit altius, per quod perficiatur; sed ab ipso

<sup>1</sup> Al.: « res. »

<sup>2</sup> Al.: « non haberet. »

intellectu divino tamquam ab altiori proveniunt species intelligibiles ad intellectus Angelorum; ad intellectum autem humanum a sensibilibus rebus per actionem intellectus agentis.

Tertiam vero rationem solvere facile est. Nihil enim prohibet aliquid esse fortuitum et casuale, dum refertur ad inferioris agentis intentionem, quod tamen secundum superioris agentis intentionem est ordinatum; sicut patet si aliquis insidiosè aliquem mittat ad locum ubi sciat esse latrones vel hostes, quorum occursum est casualis ei qui mittitur, utpote præter intentionem ejus existens; non est autem casualis ei qui hoc præcogitavit. Sic igitur nihil prohibet aliqua fortuito vel casualiter agi secundum ea quæ pertinent ad humanam cognitionem, quæ tamen sunt secundum divinam providentiam ordinata.

Quartæ vero rationis solutionem ex hoc accipere possumus quod necessarius consecutionis ordo effectus ad causam accipiendus est secundum rationem causæ. Non enim omnis causa eadem ratione producit effectum; sed causa naturalis per formam naturalem, per quam est actu: unde oportet quod agens naturale, quale ipsum est, tale producat et alterum. Agens autem rationale producit effectum secundum rationem formæ intellectæ, quam intendit in esse deducere: et ideo agens per intellectum tale aliquid producit, quale intelligit in esse producendum, nisi virtus activa deficiat. Necesse est autem ut cujuscumque virtuti subicitur productio generis alicujus, ad illius etiam virtutem pertineat producere illius generis differentias proprias; sicut si ad aliquem pertineret constituere triangulum, ad eum etiam pertinet constituere triangulum æquilaterum vel isoselem. Necessarium autem et possibile sunt propriæ differentiæ entis. Unde ad Deum, cujus virtus est proprie productiva entis, pertinet secundum suam præcognitionem attribuere rebus a se productis vel necessitatem vel possibilitatem essendi. Concedendum est igitur, quod divina providentia ab æterno præexistens, causa est omnium effectuum qui secundum ipsam fiunt, et qui immutabili dispositione ab ipsa procedunt. Nec tamen sic omnes procedunt ut necessarii sint; sed sicut ejus providentia disponit ut tales effectus fiant, ita etiam disponit ut effectus quidam sint

necessarii, ad quos causas proprias ex necessitate agentes ordinavit; quidam vero contingentes, ad quos causas proprias contingentes ordinavit.

Ex his autem apparet quintæ rationis solutio. Sicut enim a Deo, cujus esse est per se et summe necessarium, procedunt contingentes effectus propter propriarum causarum conditionem; ita etiam ab eo qui est summum bonum, procedunt aliqui effectus qui quidem in eo quod a Deo sunt, boni sunt; incidunt tamen in eis aliqui defectus propter conditionem suarum causarum, propter quas mali dicuntur. Et secundum hoc ipsum bonum est quod a Deo tales defectus permittantur evenire in rebus: tum quia est conveniens rerum ordini, in quo bonum universi existit, ut effectus sequantur secundum conditionem causarum: tum etiam quia ex malo unius provenit bonum alterius, sicut in rebus naturalibus corruptio unius est alterius generatio, et in moralibus ex persecutione tyranni sequitur patientia justus: unde per divinam providentiam non decuit totaliter mala impediri.

## CAPUT XV.

### *Error Manichæorum circa prædicta, et ejus improbatio.*

Omnes autem prædictos errores, Manichæorum error transcendit, qui in omnibus prædictis articulis graviter erraverunt.

Primo namque rerum originem non in unum, sed in duo creationis principia reduxerunt: quorum unum dicebant esse auctorem bonorum, aliam vero auctorem malorum.

Secundo erraverunt circa conditionem naturæ ipsorum. Posuerunt enim utrumque principium corporale: auctorem quidem bonorum dicentes esse quamdam lucem corpoream infinitam vim intelligendi habentem; auctorem vero malorum dixerunt esse quasdam corporales tenebras infinitas.

Tertio vero erraverunt per consequens in rerum gubernatione, constituentes omnia non sub uno principatu, sed sub contrariis.

Hæc autem quæ prædicta sunt expressam continent falsitatem, ut potest videri per singula.

Primo namque penitus irrationabile est ut malorum ponatur esse aliquod primum principium, quasi contrarium summo bono. Nihil enim potest esse activum nisi in quantum est ens actu, quia unumquodque tale alterum agit, quale ipsum est : rursusque ex hoc aliquid agitur quod actu sit. Unumquodque autem ex hoc bonum dicimus quod actum et perfectionem propriam consequitur; malum autem ex hoc quod debito actu et perfectione privatur, sicut vita est corporis bonum. Vivit enim corpus secundum animam, quæ est perfectio et actus ipsius; unde et mors malum corporis dicitur, per quam corpus anima privatur. Nihil igitur agit neque agitur nisi in quantum bonum est. In quantum vero unumquodque malum est, in tantum deficit in hoc quod perfecte agatur vel agat; sicut domum malam fieri dicimus, si ad debitam perfectionem non perducat; et ædificatorem malum dicimus, si in arte ædificandi deficiat. Neque igitur malum, in quantum hujusmodi, principium activum habet, neque principium activum esse potest, sed consequitur ex defectu alicujus agentis.

Secundo vero impossibile est corpus aliquod intellectum esse, aut vim intellectivam habere. Intellectus enim neque corpus est, neque corporis actus; alioquin non esset omnium cognoscitivus, ut improbat Philosophus in III *De anima*. Si igitur primum principium confitentur vim intellectivam habere, quod sentiunt omnes qui de Deo loquuntur, impossibile est primum principium esse aliquid corporale.

Tertio vero manifestum est quod bonum habet finis rationem : hoc enim bonum dicimus in quod appetitus tendit. Omnis autem gubernatio est secundum ordinem in aliquem finem, secundum cujus rationem ea quæ sunt ad finem, ordinantur in ipsum. Omnis igitur gubernatio est secundum rationem boni. Non potest igitur esse nec gubernatio nec principatus aliquis seu regimen malum in quantum est malum. Frustra igitur osuerunt duo regna vel<sup>1</sup> principatus, unum bonorum, aliud autem malorum.

Videtur autem hic error provenisse, sicut et alii supradicti, ex eo quod quæ

circa particulares causas consideraverunt, conati sunt in universalem rerum causam transferre. Viderunt enim particulares effectus contrarios ex contrariis particularibus causis procedere, sicut quod ignis calefacit, aqua vero infrigidat : unde crediderunt quod hic processus a contrariis effectibus in contrarias causas non deficiat usque ad prima rerum principia. Et quia omnia contraria contineri videntur sub bono et malo, in quantum contrariorum semper unum est deficiens, ut nigrum et amarum; aliud vero perfectum, ut dulce et album : ideo æstimaverunt quod prima omnium activa principia sint bonum et malum.

Sed manifeste defecerunt in considerando contrariorum naturam. Non enim contraria omnino diversa sunt, sed secundum aliquid quidem conveniunt, secundum aliquid autem differunt. Conveniunt enim in genere, differunt autem secundum differentias specificas. Sicut igitur contrariorum sunt contrariæ causæ propriæ, secundum quod specificis differentiis differunt; ita eorum oportet esse unam causam communem totius generis, in quo conveniunt. Causa autem communis prior et superior est propriis causis particularibus. Quanto enim est aliqua causa superior, tanto virtus ejus major est, et ad plura se extendens. Relinquitur igitur contraria non esse prima rerum activa principia, sed omnium esse unam primam causam activam.

## CAPUT XVI.

*Quid secundum fidem catholicam sit tenendum de origine Angelorum* <sup>2</sup>.

Quia igitur ostensum est quid de substantiis spiritualibus præcipue philosophi Plato et Aristoteles senserunt quantum ad earum originem, conditionem naturæ, distinctionis et gubernationis ordinem, et in quo ab eis alii errantes dissenserunt; restat ostendere quid de singulis habeat christianæ religionis assertio. Ad quod ostendendum utemur præcipue Dionysii documentis, qui super alios ea quæ ad spirituales substantias pertinent, excellentius tradidit.

Primum quidem igitur circa spiritualium substantiarum originem firmissime

<sup>1</sup> Parm. : « principia ejus. »

<sup>2</sup> Parm. : « quod omnes substantiæ separatæ sint a Deo productæ. »

docet christiana traditio, omnes spirituales substantias, sicut et ceteras creaturas, a Deo esse productas : et hoc quidem canonicæ Scripturæ auctoritate probatur. In Psalm. enim cXLVIII, 2, dicitur : *Laudate cum omnes Angeli ejus, laudate eum omnes virtutes ejus* : et enumeratis aliis creaturis subditur : *Quia ipse dixit, et facta sunt : ipse mandavit, et creata sunt*. Sed et Dionysius, iv capit. *Cœlestis hierarchiæ* hanc originem subtiliter explicat, dicens : « Primum illud dicere verum est, quod bonitate universali super essentialis Divinitas, eorum quæ sunt, essentias substituens, ad esse adjunxit ; » et post pauca subdit, quod « ipsæ cœlestes substantiæ sunt primo et multipliciter in participatione Dei factæ ; » et in iv capit. *De divinis nominibus*, dicit, quod « propter divinæ bonitatis radios substiterunt intelligibiles et intellectuales omnes substantiæ et virtutes et operationes. Propter istos sunt et vivunt, et vitam habent indeficientem. » Quod autem a Deo immediate productæ sint omnes spirituales substantiæ, et non solum supremæ, expressit in v capit. *De divinis nominibus* : « Sanctissimæ, inquit, et providentissimæ virtutes existentes, et sicut in vestibulis supersubstantialis Trinitatis collocatæ, ab ipsa et in ipsa et esse et deiformiter esse habent, et post illas subjectæ, » idest inferiores supremis, « subjecte » idest inferiori modo, esse habent a Deo, « et extremæ, idest infimo modo, sicut ad Angelos, sicut ad nos autem supermundane. » Per quod dat intelligere, quod omnes spiritualium substantiarum ordines ex divina dispositione instituuntur, non ex hoc quod una earum causetur ab alia. Et hoc expressius in iv capit. *Cœlestis hierarchiæ* : « Sane est, » inquit, « omnium causæ et super omnia bonitatis proprium ad communionem suam ea quæ sunt vocare ; sicut unicuique eorum quæ sunt, ex propria definitur analogia : unamquamque enim rem constituit in ordine qui competit suæ naturæ. »

Similiter etiam christianæ religioni repugnat quod spirituales substantiæ ab alio et alio principio habeant bonitatem et esse et vitam, et alia hujusmodi quæ pertinent ad earum perfectionem. Nam in canonica Scriptura uni et eidem Deo attribuitur essentia bonitatis, et quod sit ipsum esse. Unde dicitur Matthæi xix, 17 : *Unus est bonus, Deus*, Quod autem

sit ipsum esse, patet : nam Exodi iii, 14, quærenti Moysi quod esset nomen Dei, respondit Dominus : *Ego sum qui sum* : et similiter quod sit ipsa viventium vita : unde dicitur Deuter. xxx, 20 : *Ipse est enim vita tua*. Et hanc quidem veritatem expresse Dionysius tradit v capit. *De divinis nominibus*, dicens, quod « sacra doctrina non aliud esse bonum dicit, et aliud existens, et aliud vitam aut sapientiam ; neque multas causas, et aliorum alias productivas Deitates excedentes et subjectas. » In quo removet opinionem Platoniorum, qui ponebant quod ipsa essentia bonitatis erat summus Deus, sub quo erat alius Deus, qui est ipsum esse, et sic de aliis, ut supra dictum est. Subdit autem : « Sed unius, » scilicet Deitatis, dicit « esse omnes bonos processus, » quia scilicet et esse, et vivere, et omnia alia hujusmodi a summa Deitate procedunt in res. Hoc etiam diffusius explicat in ii capit. *De divinis nominibus*, dicens : « Non enim substantiam quamdam divinam aut angelicam dicimus per se esse, quod est causa quod sint omnia. Solum enim quod sint existentia, et ipsum esse supersubstantiale, » scilicet summi Dei, « est et principium et substantia et causa. » Principium quidem effectivum, substantia autem quasi forma exemplaris, causa autem finalis. Subdit autem : « Neque vitæ generativam aliam Deitatem dicimus, præter superdivinam vitam, omnium quæcumque vivunt, et ipsius per se vitæ causam, » quæ scilicet formaliter viventibus inhæret : « neque colligendo dicimus principales existentium et causativas substantias et personas, quas deos existentium, et creatores per se facientes dixerunt. » Ad hanc etiam positionem excludendam signanter Dionysius « ab essentiali Dei bonitate » quam Platonicus summum Deum exponebant, dicit : « in substantiis spiritualibus procedere quod sunt et vivunt et intelligunt : et omnia alia hujusmodi ad earum perfectionem pertinentia ab ea sortiuntur. » Et idem etiam replicat in singulis capitulis, ostendens quod ab esse divino habent quod sunt, et a vita divina habent quod vivunt, et sic de ceteris.

Est autem christianæ doctrinæ contrarium, ut sic dicantur spirituales substantiæ a summa Deitate originem trahere quod fuerint ab æterno, sicut Platonicus et Peripateticus posuerunt ; sed hoc habet assertio catholicæ fidei quod cœperunt



esse postquam prius non fuerant ; unde dicitur Isaiaë XL, 26 : *Levate in excelsum oculos vestros, et videte quis creavit hæc, scilicet superiora omnia : et ne intelligeretur de corporalibus solum, subdit : Qui educit in numero militiam cæli.* Solet autem sacra Scriptura nominare militiam cæli spiritualium substantiarum cœlestem exercitum propter earum ordinem et virtutem in exequendo voluntatem divinam : unde dicitur Lucaë II, 13, quod *facta est cum Angelo multitudo cœlestis militiæ.* Datur igitur intelligi, non solum corpora, sed etiam spirituales substantias per creationem de non esse in esse fuisse eductas, secundum illud Rom. IV, 17 : *Vocat ea quæ non sunt, tamquam ea quæ sunt.* Unde et Dionysius dicit, X capit. *De divinis nominibus*, quod « non omnino et absolute ingenita et vere æterna ubique sacra Scriptura nominat æterna ; sed incorruptibilia et immortalia, et existentia eodem modo, » scilicet nominat æterna ; sicut quando dicit Psalm. XXIII, 7 : *Elevamini portæ æternales,* et similia quod maxime videtur de spiritualibus substantiis dictum : et postea subdit : « Oportet igitur non simpliciter coæterna Deo, qui est ante ævum, arbitrari æterna dicta. » Sed sacra Scriptura in Genesi loquens de principio creationis rerum, de spiritualium substantiarum productione expressam mentionem non facit, ne populo rudi, quibus lex proponebatur, idololatriæ daretur occasio, si plures spirituales substantias super omnes corporeas creaturas introduceret sermo divinus.

Non potest etiam ex Scripturis canonicis expresse haberi, quando creati fuerint Angeli. Quod enim post corporalia creati non fuerint, ratio manifestat, quia non fuit decens ut perfectiora posteriora crearentur ; et etiam ex auctoritate sacræ Scripturæ expresse colligitur : dicitur enim Job. XXXVII, 7 : *Cum me laudarent simul astra matutina, et jubilarent omnes filii Dei ;* per quos spirituales substantiæ intelliguntur. Arguit autem sic Augustinus, IX *De civ. Dei*, cap. IX : « Jam ergo erant Angeli quando facta sunt sidera ; facta sunt autem quarto die. Numquidnam ergo tertio die factos esse Angelos dicimus ? Absit. In promptu est enim quid illo die factum sit, ab aquis utique terra discreta. Numquidnam se-

cundo ? Ne hoc quidem : tunc enim firmiter factum est. » Et postea subicit : « Nimirum ergo si ad <sup>1</sup> ista opera Dei pertinent Angeli, ipsi <sup>2</sup> sunt illa lux quæ diei nomen accepit. » Sic igitur secundum sententiam Augustini simul cum corporalibus creata est spiritualis creatura, quæ significatur nomine cæli, cum in Gen. dicitur : *In principio fecit Deus cælum et terram.* Formatio autem ejus et perfectio significatur in lucis productione, ut multipliciter prosequitur in lib. *Super Genesim ad litteram.* Sed, ut Damascenus dicit in III lib., quidam aiunt quod ante omnem creationem, scilicet corporalis creaturæ, geniti sunt Angeli : quia, ut Gregorius Theologus dicit, primum excogitavit angelicas virtutes et cœlestes, et excogitatio ejus opus fuit. Et huic sententiæ ipse Damascenus consentit. Sed et Hieronymus prædicti Gregorii Nazianzeni discipulus eandem sententiam sequitur : dicit enim super *Epistolam ad Titum* : « Sex millia necdum nostri temporis implentur annorum ; et quantas prius æternitates, quanta tempora, quantas sæculorum origines fuisse arbitrandum est, in quibus Angeli, Throni et Dominationes, ceterique ordines servierunt Deo absque temporum vicibus atque mensuris, et Deo jubente substiterunt ? » Neutrum horum æstimo esse sanæ doctrinæ contrarium : quia nimis præsumptuosum videretur asserere tantos Ecclesiæ Doctores a sana doctrina pietatis deviasse. Nam sententia Augustini magis videtur competere sententiæ eorum qui ponunt in rerum productione non fuisse temporis ordinem secundum numerum dierum senarium, quos Scriptura commemorat ; sed illos sex dies refert Augustinus ad intelligentiam angelicam sex rerum generibus præsentatam. Sententia vero Gregorii Nazianzeni, Hieronymi et Damasceni convenientior est secundum eorum positionem qui ponunt in rerum productione successionem temporis secundum sex dies prædictos. Si enim creaturæ non fuerunt omnes simul productæ, satis probabile est creaturas spirituales omnia corpora præcessisse.

Si vero quærat ubi creati sunt Angeli, manifestum est quod quæstio ista locum non habet, si creata est spiritualis substantia ante omnem creaturam cor-

<sup>1</sup> « Ad istorum dierum opera. »

<sup>2</sup> Ita Augustinus. Al. : « ipsi enim. »



poream, cum locus sit aliquid corporale ; nisi forte pro loco accipiamus spiritua-lem claritatem qua illustrantur a Deo. Unde Basilius dicit in II *Hexamer.* : « Arbitramur quod si fuit quidpiam ante institutionem sensibilis hujus et corruptibilis mundi, profecto in luce fuit. Neque enim dignitas Angelorum, nec omnium cœlestium militiæ, vel si quid est nominatum, aut etiam inappellabile, aut aliquid rationalis virtus, vel ministrator spiritus degere posset in tenebris ; sed in luce et lætitia decentem sibi habitum possidebat : de qua re neminem puto contradicendum. » Si vero simul cum corporali creatura creati fuerunt Angeli, quæstio locum potest habere, eo tamen modo quo Angelis competit esse in loco, de quo infra dicitur. Et secundum hoc quidam dixerunt, in quodam supremo cœlo splendido Angelos esse creatos quod empyreum nominant, idest igneum, non ab ardore sed a splendore : et de hoc cœlo Strabus et Beda exponunt quod dicitur in principio Gen. : *Creavit Deus cœlum et terram* : quamvis hæc expositio ab Augustino et aliis antiquioribus Ecclesiæ Doctoribus non tangatur.

#### CAPUT XVII.

##### *Quid<sup>1</sup> tenendum sit de conditione Angelorum.*

Deinde considerare oportet quid de conditione spiritualium substantiarum secundum catholicæ doctrinæ sententiam sit tenendum.

Fuerunt igitur quidam qui Angelos putaverunt corporeos esse, vel ex materia et forma esse compositos : quod quidem sensisse videtur Origenes in I *Periarchon*, ubi dicit : « Solius Dei, idest Patris, et Filii et Spiritus sancti, naturæ id proprium est ut sine materiali substantia, et absque ulla corporeæ adjectionis societate intelligatur existere. » Et ad hoc quidem quod Angelos corporeos ponerent, movere potuerunt eos verba Scripturæ quæ attribunt quædam corporalia Angelis, cum eos etiam in loco corporali esse pronuntiet : secundum illud Matthæi xviii, 10 : *Angeli eorum in cœlis semper vident faciem Patris mei, qui in cœlis est* : et eos moveri asserat, secundum illud Isaïæ vi, 6 : *Vo-*

*lavit ad me unus de Seraphim* : et quod est amplius, figura corporali describat, sicut ibidem de Seraphim dicitur : *Sex alæ uni, et sex alæ alteri* : et de Gabriele dicitur Danielis x, 5 : *Ecce vir unus vestitus lineis, et renes ejus accincti auro obrizo ; et corpus ejus quasi chrysolitus* : et adhuc alia ad organum corporis pertinentia ibidem subduntur.

Quidam autem de Angelis dicunt quod etsi non sint corporei, est tamen in eis compositio formæ et materiæ : quod ex quibus rationibus accipere velint, supra jam diximus.

Sed quod Angeli incorporei sint, canonicæ Scripturæ auctoritate probatur, quæ eos spiritus nominat. Dicitur enim in Psalm. ciii, 4 : *Qui facit Angelos suos spiritus* : et Apostolus dicit ad Hebræos i, 14, de Angelis loquens : *Omnes sunt administratorii spiritus, in ministerium missi propter eos qui hereditatem capiunt salutis*. Consuevit autem Scriptura nomine spiritus aliquid incorporeum designare, secundum illud Joan. iv, 24 : *Spiritus est Deus ; et eos qui adorant eum, in spiritu et veritate oportet adorare* : et Isai. xxxi, 3 : *Ægyptus, homo, et non Deus ; et equi eorum caro, et non spiritus*. Sic igitur consequens est, secundum sacræ Scripturæ sententiam, Angelos incorporeos esse. Si quis autem diligenter velit verba sacræ Scripturæ inspicere, ex eisdem accipere poterit eos immateriales esse : nominat enim eos sacra Scriptura quasdam virtutes. Dicitur enim in Psalm. ciii, 20 : *Benedicite Domino omnes Angeli ejus* ; et postea subditur : *Benedicite Domino omnes virtutes ejus* ; et Matth. xxiv, 29, dicitur : *Virtutes cœlorum movebuntur* : quod de sanctis Angelis omnes Doctores exponunt. Quod autem materiale est, non est virtus, sed habet virtutem ; sicut non est essentia, sed habens essentiam ; sequitur enim essentiam virtus. Non est autem homo sua humanitas, neque sua essentia, neque sua virtus. Similiter autem neque aliud ex materia et forma compositum. Relinquitur igitur secundum intentionem Scripturæ Angelos immateriales esse. Utrumque autem horum expresso Dionysii verbis astruitur, qui in iv cap. *De div. nom.* de Angelis loquens dicit quod « intellectuales substantiæ ab universa corruptione, morte et materia

<sup>1</sup> Parm. : « de conditione substantiarum spi-

ritualium. »

mundæ existunt, et sicut incorporales et immateriales intelliguntur. » In I etiam capite *Cœlestis hierarch.*, dicit quod divina dispositio immateriales Angelorum hierarchias materialibus figuris variis tradidit; » et in II cap. ejusdem libri quærit, quare « sacros doctores ad corporalem formationem incorporaliū, scilicet Angelorum, venientes non figuraverunt ea pretiosissimis figuris, sed immaterialibus substantiis, et deiformibus simplicitatibus terrenas figuras imposuerunt. » Ex quibus patet omnibus hanc fuisse Dionysii sententiam quod Angeli sunt immateriales et simplices substantiæ. Quod etiam ex hoc patet quod frequenter eos nominat cœlestes intellectus, seu divinas mentes. Intellectus autem et mens aliquid incorporeum et immateriale est, ut Philosophus probat in III *De anima*. Augustinus etiam in II *Super Gen. ad litteram*, c. VIII, dicit quod « primo die quo lux facta est, conditio spiritualis et intellectualis creaturæ lucis appellatione intimitur, in qua natura intelliguntur omnes sancti Angeli atque Virtutes (a). » Damascenus etiam dicit, quod Angelus est « substantia intellectualis et incorporea. » Sed dubium facit quod postea subdit: « Incorporeus autem et immaterialis dicitur quantum ad nos: omne enim comparatum ad Deum, grossum et materiale invenitur. » Quod ad hoc inducitur ut non æstimetur Angelus propter suam incorporeitatem et immaterialitatem divinam simplicitatem æquare. Corporales vero figuræ seu formæ quæ in Scriptura sacra interdum Angelis attribuuntur, per quamdam similitudinem sunt intelligendæ: quia, sicut dicit Dionysius in I cap. *Cœl. hierar.*: « non est possibile nostræ menti ad immaterialem illam sursum excitari cœlestium hierarchiarum et imitationem et contemplationem, nisi secundum se materiali manuductione utatur: » sicut et de ipso Domino multa corporalia in Scripturis per quamdam similitudinem dicuntur: unde xv cap. *Cœl. hierar.*, Dionysius exponit quid spirituale significetur in Angelis per omnes hujusmodi corporales figuras. Nec solum hujusmodi formas corporeas per similitudinem de Angelis asserit, sed dicit etiam quæ pertinent ad amotionem sensitivi appetitus;

ut per hoc detur intelligi, quod non solum Angeli non sunt corpora, sed etiam non sunt spiritus corporibus uniti, qui sensificando percipiunt, ut sic in eis inveniuntur operationes animæ sensitivæ. Dicit enim in II cap. *Cœl. hier.*, quod « furor irrationabilis ex passi motu gignitur; sed in Angelis altero modo oportet irascibile intelligere, declarans, ut æstimo, virilem ipsorum rationabilitatem. » Alia *Littera* habet sic: « Sed in Angelis furibundum demonstrat virilem ipsorum rationabilitatem. » Et similiter dicit quod concupiscentia in eis significat amorem divinum. Cui consonat id quod Augustinus dicit in IX *De civit. Dei*, c. v, quod sancti Angeli sine ira puniunt quos accipiunt æterna Dei lege puniendos; et miseris sine miseræ compassione subveniunt, periclitantibus, et eis quos diligunt, absque timore opitulantur; et tamen istarum nomina passionum consuetudo locutionis humanæ etiam in eos usurpat propter quamdam operum similitudinem, non propter affectionum infirmitatem (b). » Quod autem Angeli dicuntur esse in cœlis, aut in aliquibus corporalibus locis, non est intelligendum quod sint in eis corporali modo, scilicet per contactum dimensionis quantitatis; sed modo spirituali per quemdam contactum virtutis. Proprius autem locus Angelorum est spiritualis, secundum quod Dionysius dicit, v cap. *De divinis nominibus*, quod « supremæ spirituales substantiæ sunt in vestibulis Trinitatis collocatæ; » et Basilius dicit in II *Hexameron* quod « sunt in luce, et in lætitia spirituali habitant; » et Gregorius Nysenus (Nemesius) dicit in lib. *De homine* quod « intelligibilia in intelligibilibus locis sunt, aut in se ipsis aut in superjacentibus intelligibilibus. Cum igitur in corpore dicitur intellectuale aliquid localiter esse, non ut in loco corporeo dicitur esse sed ut in habitudine, et in eo quod adest, ut dicimus Deum esse in nobis; » et post pauca subdit: « Cum igitur in habitudine fuerit intelligibile aliquid vel loci alicujus, vel rei ut in loco existentis; abusive dicimus illic id esse propter actum ejus qui est illic, locum pro habitudine suscipientes. Cum enim deberemus dicere, Illic agit, dicimus, Illic est. » Et hoc sequens Damascenus

(a) Non sic S. Augustinus, sed modo interrogativo: « An demonstratur... appellatione intimari. »

(b) S. Augustinus quærit utrum hæc ita sint, solutionemque quæstionis differt.

dixit quod « Angelus ubi operatur, ibi est. » Augustinus etiam VII *Super Gen. ad litteram*, c. xx, dicit quod « spiritus creator movet conditum spiritum per tempus sine loco ; movet » autem « corpus per tempus et locum. »

Ex quibus omnibus datur intelligi substantias spirituales non esse in loco corporaliter, sed quodam modo spirituali. Et quia eodem modo competit alicui moveri in loco, et esse in loco ; per consequens neque corporali modo Angeli moventur in loco ; sed motus eorum qui exprimitur in Scripturis, si referatur ad locum corporalem, est accipiendus secundum successionem virtualis contactus ad loca diversa ; vel est accipiendus secundum mysticam intelligentiam, sicut Dionysius, iv cap. *De divin. nomin.* dicit quod « moveri dicuntur divinae mentes circulariter quidem unitae illuminationibus pulchri et boni ; in directum autem quando procedunt ad subjectorum providentiam ; oblique vero quando providentes minus habentibus ingressibiliter manent circa Deum. »

Ex his igitur manifestum est quid circa conditionem spiritualium substantiarum, idest Angelorum, sacri Doctores tradiderint, asserentes eos incorporeos et immateriales esse.

## CAPUT XVIII.

### *Quid tenendum sit de distinctione Angelorum* <sup>1</sup>.

Oportet autem consequenter considerare quid secundum sacram doctrinam de distinctione spirituum sit tenendum : ubi et primum considerandum occurrit de differentia bonorum et malorum. Est enim apud multos receptum, esse quosdam spiritus bonos, quosdam vero malos : quod auctoritate sacrae Scripturae comprobatur. De bonis enim spiritibus dicitur Hebr. i, 14 : *Omnes sunt administratorii spiritus, in ministerium missi, propter eos qui hereditatem capiunt salutis.* De malis autem spiritibus dicitur, Matthaei, xii, 43 : *Cum immundus spiritus exierit ab homine, ambulat per loca arida quaerens requiem, et non invenit : et postea subditur : Tunc vadit, et assumit*

*septem alios spiritus nequiores se.* Et quamvis, ut Augustinus narrat in IX *De civ. Dei*, quidam posuerint et bonos et malos spiritus deos esse, et similiter bonos et malos daemones nominari ; quidam tamen melius deos non nisi bonos asserunt, quos nos Angelos dicimus, daemones autem secundum communem usum loquendi non nisi in malo accipiunt : quod ut dicit, rationabiliter accidit. Daemones enim in graeco a scientia nominantur quae sine caritate, secundum sententiam Apostoli, per superbiam inflat.

Sed causa malitiae daemonum non eadem ab omnibus assignatur. Quidam enim eos asserunt naturaliter malos tamquam a malo productos principio, et sic etiam quod ipsorum natura sit mala ; quod ad Manichaeorum errorem pertinet, ut patet ex dictis. Sed hunc errorem efficacissime Dionysius improbat, iv capit. *De divinis nominibus*, dicens : « Neque daemones natura mali sunt. » Quod probat primo quidem, quia si naturaliter mali essent, simul oporteret dicere quod neque essent producti ex bono principio, neque inter existentia computarentur : quia malum non est natura aliqua, nec si esset aliqua natura, causaretur a bono principio. Secundo, quia si sunt naturaliter mali, aut sibi ipsis, et sic se ipsos corrumpent quod est impossibile ; malum enim rationem corruptivi habet. Si vero sunt mali aliis, oporteret quod ea quibus sunt mali, corrumpent. Quod autem est naturaliter tale, est omnibus tale, et omnino tale. Sequeretur ergo quod omnia, et omnino corrumpentur : quod est impossibile : tum quia quaedam sunt incorruptibilia, quae corrumpi non possunt : tum quia ea quae etiam corrumpuntur, non totaliter corrumpuntur. Non igitur ipsa natura daemonum est mala. Tertio, quia si essent naturaliter mali, non essent a Deo facti, quia bonum bona producit et subsistere facit : et hoc est impossibile, secundum illud quod supra probatum est, scilicet quod oportet omnium Deum esse principium. Quarto, quia si daemones semper eodem modo se habent, non sunt mali : quod enim est semper idem, boni est proprium. Si autem non semper sunt mali, non sunt natura mali. Quinto, quia non sunt omnino

<sup>1</sup> Parm. : « de distinctione spirituum angelo-

rum. »

expertes boni, secundum quod sunt, et vivunt, et intelligunt, et aliquod bonum desiderant.

Fuerunt autem alii ponentes dæmones naturaliter malos, non quia eorum natura sit mala; sed quia habent quamdam inclinationem naturalem ad malum, sicut Augustinus, X *De civitate Dei*, cap. xi, introducit Porphyrium dicentem in *Epistola ad Anebontem*, « quosdam opinari esse quoddam » spirituum « genus, cui exaudire sit proprium, natura fallax, omniforme, multimodum, simulans deos et dæmones, et ipsas animas defunctorum. » Quæ quidem opinio veritatem habere non potest, si ponamus dæmones incorporeos esse, et intellectus quosdam separatos. Cum enim omnia natura bona sint, impossibile est quod natura aliqua habeat inclinationem ad malum, nisi sub ratione particularis boni. Nihil enim prohibet aliquid quod est particulariter bonum alicui naturæ, intantum dici malum, inquantum repugnat perfectioni nobilioris naturæ; sicut furiosum esse, quoddam bonum est cani quod tamen malum est homini rationem habenti. Possibile tamen est in homine secundum sensibilem et corporalem naturam, in qua cum brutis communicat, esse quamdam inclinationem ad furorem, qui est homini malum. Sed hoc de intellectuali natura dici non potest, quia intellectus ordinem habet ad bonum commune. Unde dici non potest, in dæmonibus inveniri naturalem inclinationem ad malum, si sunt pure intellectuales non habentes admixtionem corporeæ naturæ.

Sciendum est ergo quod Platonici posuerunt, ut etiam supra dictum est, dæmones esse animalia quædam corporea, habentia intellectum: et inquantum habent corpoream et sensitivam naturam, sunt variis animæ passionibus substituti, sicut et homines, ex quibus inclinantur ad malum. Unde Apuleius in libro *De Deo Socratis* definiens dæmones, dixit, eos esse « genere animalia, animo passiva, mente rationalia, corpore aerea, tempore æterna: » et sicut ipse dicit, subjecta est mens dæmonum passionibus libidinum, formidinum, irarum, atque hujusmodi ceteris. Sic ergo dæmones etiam loco discernuntur a diis, quos Angelos dicimus; aerea loca dæmonibus attribuentes, ætherea vero Angelis, sive diis. Hanc autem positionem quantum ad aliquid alicui Ecclesiæ Doctores sequun-

tur. Augustinus enim III *Super Genes. ad litteram*, c. x, videtur dicere, vel sub dubio relinquere quod dæmones aerea sunt animalia, quoniam corporum aereorum natura vigent: et propterea a morte non dissolvuntur, quia prævalet in eis elementum quod tam ad faciendum quam ad patiendum est aptum, scilicet aer. Et hoc idem pluribus aliis locis dicit. Sed et Dionysius videtur in dæmonibus ponere ea quæ ad sensibilem animam pertinent: dicit enim iv cap. *De div. nomin.*, quod « est in dæmonibus malum, furor irrationabilis, demens concupiscentia et phantasia proterva. » Manifestum est autem phantasiam et concupiscentiam et iram sive furorem, non ad intellectum, sed ad sensitivam partem animæ pertinere. Sed et quantum ad locum quidam cum eis consenserunt, putantes, dæmones non cœlestes vel supercœlestes Angelos fuisse, ut Augustinus narrat in III *Super Gen. ad litteram*. Sed et Damascenus in suo libro *De fid. orthod.*, dæmones dicit ex his angelicis virtutibus fuisse qui terrestri ordini præerant. Sed et Apostolus ad Ephes. vi, nominat diabolum *principem potestatis aeris hujus*.

Sed occurrit hic aliud consideratione dignum. Cum enim unicuique speciei sit attributa natura secundum convenientiam suæ formæ, non videtur esse possibile quod in tota aliqua specie sit naturalis inclinatio ad id quod est malum illius speciei secundum rationem propriæ formæ; sicut non omnibus hominibus inest naturalis inclinatio ad immoderantiam concupiscentiæ sive iræ. Sic igitur non est possibile omnes dæmones habere naturalem inclinationem ad fallaciam et ad alia mala, etiam si omnes essent unius speciei. Multo ergo minus, si singuli essent in singulis speciebus; quamvis, si sint corporei, nihil impedire videatur plures sub una specie contineri; poterit enim secundum diversitatem materiæ diversitas individuorum unius speciei causari. Oportebit igitur dicere quod non omnes natura, nec semper, fuerunt mali; sed aliqui eorum mali esse inceperint proprio arbitrio passionum inclinationem sequentes. Unde Dionysius dicit quod « aversio, » scilicet a Deo, « est ipsis dæmonibus malum, et quasi mentium excessus, quia per superbiam ultra se ipsos sunt elati; » et postea subdit quædam ad pœnam pertinentia; sicut « non consecutio finis ultimi, » et « imperfectio »



per carentiam debitæ perfectionis, et « impotentia consequendi quod naturaliter desiderant, et infirmitas virtutis conservantis naturalem in eis ordinem revocantem a malo. » Augustinus etiam dicit in III *Super Genes. ad litteram*, c. x, quod transgressores Angeli ante transgressionem suam (a) fuerunt in superiori parte aeris propinqua cælo cum principe suo nunc diabolo, tunc Archangelo, indistincte exprimens per transgressionem quamdam eos esse malos factos. Sed et Damascenus dicit in II libro *De fid. orth.*, quod « diabolus non natura malus factus est, sed bonus existens, et in bono genitus, liberi sui arbitrii electione versutus. » Hoc insuper et Origenes in II *Periarchon*, et Augustinus in II *De civitate Dei*, auctoritatibus sacræ Scripturæ confirmant, inducentes id quod habetur Isa. xiv, 12, dictum diabolo sub similitudine regis Babylonis : *Quomodo cecidisti de cælo Lucifer, qui mane oriebaris?* et Ezechielis xxviii, 12, ad eum dicitur in persona regis Tyri : *Tu signaculum similitudinis, plenus sapientia, perfectus decore, in deliciis paradisi Dei fuisti :* et postea subditur : *Perfectus in viis tuis a die conditionis tuæ, donec inventa est iniquitas in te.* Voluit Augustinus in his verbis dici id quod dicitur Joanni viii, 44 : *Ille homicida erat ab initio, et in veritate non stetit*, et etiam id quod in canonica Joannis I cap. iii, 8, dicitur quod *diabolus ab initio peccat*, referens hoc ad initium quo incepit peccare, vel ad initium conditionis humanæ, quo deceptum hominem spiritualiter occidit. Huic autem sententiæ consonare videtur Platonicorum opinio, qui dæmonum quosdam bonos, quosdam malos dicunt, quasi eos proprio arbitrio bonos vel malos factos. Unde et Plotinus ulterius procedens dixit animas hominum dæmones esse, et ex hominibus fieri Lares, si meriti boni sunt, Lemures autem mali, seu Larvas. Manes autem eos <sup>1</sup> dicit, si incertum est honorum eos seu malorum esse meritorum; sicut Augustinus introducit IX *De civitate Dei*. Qui quidem quantum ad hoc præmissis sanctorum assertioni concordat quod pro

meritis bonis vel malis aliquos dæmones bonos vel malos esse asserunt; quamvis non sit nostræ consuetudinis quos bonos spiritus dæmones, sed Angelorum nomine nominemus. Quantum vero ad hoc quod dixit, animas hominum mortuorum fieri dæmones, est erronea positio. Unde Chrysostomus dicit *Homil. xxviii, sup. Matth.*, exponens id quod habetur Matthæi viii, 28 : « Duo habentes dæmones exeuntes de monumentis : » « Per hoc (inquit) quod subditur, « de monumentis exeuntes, » perniciosum dogma imponere volebant quod animæ morientium dæmones fiant. Unde et multi aruspicum occidunt pueros, ut animam eorum cooperantem habeant. Propter quod et dæmoniaci clamant, quoniam anima illius ego sum. Non est autem anima defuncti quæ clamat, sed dæmon hoc fingit, ut decipiat audientes; si enim in (b) alterius corpus animam mortui possibile esset intrare, multo magis in corpus suum. Sed neque habet rationem, iniqua passam animam cooperari iniqua sibi facienti: vel hominem posse virtutem incorpoream in aliam transmutare substantiam, scilicet animam in substantiam dæmonis. Neque enim in corporibus hoc machinari quis potest, ut in hominis corpus faciat asini corpus. Neque enim rationabile est animam a corpore separatam hic jam oberare. *Iustorum enim animæ in manu Dei sunt.* Sap. iii, 3. Unde et quæ puerorum <sup>2</sup>, neque enim malæ sunt; sed et quæ peccatorum sunt, confestim hinc abducuntur. Et hoc manifestum est ex Lazaro et divite. » Nec tamen putandum est Plotinum in hoc a Platonicorum opinione deviasse, ponentium dæmones esse aerea corpora quod animas hominum post mortem fieri existimabat; quia etiam animæ hominum secundum Platonicorum opinionem, præter ista corpora corruptibilia habent quædam ætherea corpora, quibus semper etiam post sensibilibus corporum dissolutionem quasi incorruptilibus uniuntur. Unde Proclus dixit in *Libro divinurum coelementationum*: « Omnis anima participabilis corpore, utitur primo perpetuo, et habente hypostasim ingene-

<sup>1</sup> Al. : « deos. »

<sup>2</sup> Ita Chrysostomus loc. cit. Al. : « pravorum » forte pro « parvorum vel « parvulorum » irrepserat.

(a) S. Augustinus non dicit : « fuerunt, » sed : « si fuerunt. »

(b) S. Chrysostomus : « si in dæmonis ουσίαν. » juxta Edition. L. Vivès; sed juxta Morellium : « si in alterius corpus. »



rabilem et incorruptibilem. » Et sic animæ a corporibus separatæ secundum eos aerea animalia esse non desinunt.

Sed secundum aliorum Sanctorum sententiam, demones quos malos esse dicimus, non solum fuerunt de inferiori Angelorum ordine, sed etiam de superioribus ordinibus, quos incorporeos et immateriales esse ostendimus, ita quod inter eos unus est qui summus omnium fuit. Unde Gregorius in quadam homilia, exponens illud Ezech. xxviii : *Omnis lapis pretiosus operimentum tuum*, dicit quod princeps malorum angelorum in aliorum angelorum comparatione ceteris clarior fuit. Et in hoc consentire videtur illis qui deorum quosdam bonos, quosdam malos esse asserebant, secundum quod dii Angeli nominantur. Unde et Job. iv, 18, dicitur : *Ecce qui serviunt ei, non sunt stabiles; et in Angelis suis reperit pravitatem.*

Sed hoc multas difficultates habet. In substantia enim incorporea et intellectuali nullus appetitus esse videtur nisi intellectivus, qui quidem est simpliciter boni, ut per Philosophum patet in XII *Metaphysicæ*. Nullus autem efficitur malus ex hoc quod ejus intellectus simpliciter tendit in hoc quod est simpliciter bonum, sed ex hoc quod tendit in aliquid quod est secundum quid bonum, ac si esset simpliciter bonum. Non ergo videtur esse possibile quod proprio appetitu aliqua incorporea et intellectualis substantia mala efficiatur.

Rursus. Appetitus esse non potest nisi boni, vel apparentis boni, bonum enim est quod omnia appetunt. Ex hoc autem quod aliquis verum bonum appetit, non efficitur malus. Oportet igitur in omni eo qui per proprium appetitum malus efficitur quod appetat apparens bonum tamquam vere bonum. Hoc autem non potest esse nisi in suo judicio fallatur : quod non videtur posse contingere in substantia incorporea intellectuali, quæ falsæ apprehensionis capax, ut videtur, esse non potest. Nam et in nobis quando intelligimus vere aliquid, falsitas esse non potest. Unde Augustinus dicit in lib. LXXXIII *Quæstionum*, q. xxxiii, quod « omnis qui fallitur, id in quo fallitur, non intelligit. » Unde et circa ea quæ proprie intellectu capimus, sicut circa prima principia, nullus decipi potest. Impossibile igitur videtur quod aliqua in-

corporea et intellectualis substantia per proprium appetitum mala fiat.

Adhuc. In substantia quæ est intellectualis naturæ, a corpore separata, necesse est quod sit operatio a tempore absoluta. Potentia enim uniuscujusque rei ex ejus operatione deprehenditur : operatio vero recognoscitur ex objecto. Intelligibile autem, inquantum hujusmodi, neque est hic, neque unum numero, sed abstractum sicut, a loci dimensionibus, ita et a temporum successione. Ipsa igitur intellectualis operatio, si per se consideretur, oportet quod sicut est abstracta ab omni corporali dimensione, ita etiam excedat omnem successione temporalem. Et si alicui intellectuali operationi continuum vel tempus adjungatur, hoc non est nisi per accidens, sicut in nobis accidit, inquantum intellectus noster a phantasmatis abstrahit intelligibiles species, quas etiam in eis considerat. Quod in substantia incorporea et intellectuali locum habere non potest. Relinquitur igitur quod hujusmodi substantiæ operatio, et per consequens substantia, omnino sit extra omnem temporalem successione. Unde Proclus dicit quod « omnis intellectus in æternitate substantiam habet, et materiam et operationem : » et in lib. *De causis* dicitur quod intelligentia parificatur æternitati. Quidquid igitur substantiis illis incorporeis et intellectualibus convenit, semper et absque successione convenit illis. Aut igitur semper fuerunt malæ quod est contra præmissa; aut nequaquam malæ fieri potuerunt.

Amplius. Cum Deus sit ipsa essentia bonitatis, ut Dionysius dicit in 1 capite *De div. nom.*, necesse est quod tanto aliqua sint perfectius in participatione bonitatis firmata, quanto sunt Deo propinquiora. Manifestum est autem substantias incorporeas supra omnia corpora esse. Sed aliqua corpora, scilicet cœlestia, non sunt susceptiva alicujus inordinationis vel mali. Ergo multo minus illæ supercœlestes substantiæ inordinationis et mali capaces esse non potuerunt. Unde et Dionysius dicit, iv cap. *Cœl. hierar.*, quod « cœlestium substantiarum ornatu super solem existentia, et irrationabiliter viventia, et ea quæ secundum nos sunt rationabilia, et participatione divinæ traditionis sunt facti, et copiosiores ad Deum habent communionem, attentim manentes,

et semper ad superius, sicut est fas, in fortitudine divini et indeclinabilis amoris extenti. » Hoc igitur videtur ordo rerum habere ut sicut inferiora corpora inordinationi et malo possunt esse subjecta, non autem cœlestia corpora; ita etiam intellectus corporibus inferioribus uniti possunt subjici malo, non autem illæ supercœlestes substantiæ. Et hoc secuti esse videntur qui posuerunt dæmones quos malos esse dicimus, ex inferiori ordine et corporeos esse.

---

# OPUSCULUM XV.

## DE UNITATE INTELLECTUS CONTRA AVERROISTAS <sup>1</sup>.

(EDIT. ROM. XVI.)

### CAPUT I.

*Quæ sit auctoris intentio.*

Sicut omnes homines naturaliter scire desiderant veritatem, ita naturale desiderium inest hominibus fugiendi errores, et eos, cum facultas affuerit, confutandi. Inter alios autem errores indecentior videtur esse error quo circa intellectum erratur, per quem nati sumus devitatis erroribus cognoscere veritatem. Inolevit siquidem jamdudum circa intellectum error apud multos ex dictis Averrois sumens exordium, qui asserere nititur, intellectum quem Aristoteles possibilem vocat, ipse autem inconvenienti nomine materialem <sup>2</sup>, esse quamdam substantiam secundum esse a corpore separatam, et aliquo modo uniri ei ut formam; et ulterius quod intellectus possibilis sit unus omnium. Contra quem jam pridem multa conscripsimus. Sed quia errantium impudentia non cessat veritati reniti, propositum nostræ intentionis est iterato contra eundem errorem conscribere alia, quibus manifeste prædictus error confutaretur.

Nec id nunc agendum est ut positionem prædictam ostendamus erroneam; quia repugnet veritati fidei christianæ: hoc enim cuique satis in promptu apparere potest. Subtracta enim ab omnibus diversitate intellectus, qui solus inter partes animæ incorruptibilis et immortalis apparet, sequitur post mortem nihil de animabus hominum remanere nisi uni-

tatem intellectus; et sic tollitur retributio præmiorum et pœnarum, et diversitas eorundem. Intendimus autem ostendere positionem prædictam non minus contra philosophiæ principia esse quam contra fidei documenta. Et quia quibusdam in hac materia verba Latinorum non sapiunt, sed Peripateticorum verba sectari se dicunt, quorum libros in hac materia nunquam viderunt, nisi Aristotelis, qui fuit sectæ Peripateticæ institutor; ostendemus positionem prædictam ejus verbis et sententiæ repugnare omnino.

### CAPUT II.

*Quod anima intellectiva sit actus et forma corporis, et quod aliquid animæ est intellectus.*

Accipienda est ergo prima definitio animæ quam Aristoteles in II *De anima* ponit, dicens quod anima est « actus primus corporis physici organici. » Et ne forte aliquis diceret hanc definitionem non omni animæ competere, propter hoc quod supra sub conditione dixerat, « Sed oportet aliquid commune in omni anima dicere, » quod intelligunt sic dictum, quasi hoc esse non possit, accipienda sunt verba ejus sequentia: dicit enim: « Universaliter quidem dictum est, quid sit anima. Substantia enim est quæ secundum rationem; hoc autem est quod quid erat hujus corporis, idest forma substantialis corporis physici organici. » Et ne forte dicatur ab hac universalitate partem intellectivam excludi, hoc remove-

<sup>1</sup> Cod. S. Gen. opusculum illud in capitula distribuit, quæ habent unumquodque suum titulum. Hæc autem divisio quam restituimus deest in

Parm.

<sup>2</sup> Al.: « immaterialem. »

tur per id quod postea dicit : « Quod quidem igitur non sit anima separabilis a corpore, aut pars quædam ipsius partibilis apta nata est, non immanifestum est; quarumdam enim partium actus est ipsa. At vero secundum quasdam nihil prohibet, propter id quod nullius corporis sunt actus; » quod non potest intelligi nisi de his quæ ad partem intellectivam pertinent, puta intellectus et voluntas. Ex quo manifeste ostenditur, illius animæ quam supra universaliter definierat, dicens eam esse corporis actum, quasdam partes esse, quæ sunt quarumdam partium corporis actus : quasdam autem nullius corporis actus esse. Aliud est enim animam esse actum corporis, et aliud partem ejus esse corporis actum, ut infra manifestabitur. Unde et in hoc eodem capitulo manifestat animam esse actum corporis, per hoc quod aliquæ partes ejus sunt corporis actus, cum dicit : « Considerare oportet in partibus quod dictum est, » scilicet in toto. Adhuc autem manifestius ex sequentibus apparet, quo modo sub hac generalitate definitionis intellectus includitur, per ea quæ sequuntur. Nam cum supra satis probaverit animam esse actum corporis, quia separata anima non est vivens in actu; quia tamen aliquid potest dici actuale ad præsentiam alicujus, non solum si sit forma, sed etiam si sit motor; sicut combustibile ad præsentiam comburentis actu comburitur, et quodlibet mobile ad præsentiam moventis actu movetur; posset alieni venire in dubium, utrum corpus sic vivat actu ad præsentiam animæ, sicut mobile movetur ad præsentiam motoris, an sicut materia est in actu ad præsentiam formæ: et præcipue quia Plato posuit animam non uniri corpori ut formam, sed magis ut motorem et rectorem, ut patet per Plotinum et Gregorium Nyssenum: quos in id induco, quia non fuerunt latini, sed græci. Hanc igitur dubitationem insinuat Philosophus, cum post præmissa subjungit: « Amplius autem immanifestum, si sit corporis actus anima, sicut nauta navis. » Quia igitur post præmissa adhuc hoc dubium remanebat, ideo subdit: « Figuraliter quidem igitur sic determinetur et describatur de anima, » quia scilicet nondum ad liquidum demonstraverat veritatem. Ad hanc igitur dubitationem tollendam, consequenter procedit ad manifestandum id quod est secundum se et secundum rationem certius, per ea quæ

sunt minus certa secundum se, sed magis certa quo ad nos, id est per effectus animæ, qui sunt actus ipsius. Unde statim distinguit opera animæ, dicens quod animatum distinguitur ab inanimato in vivendo, et quod multa sunt quæ pertinent ad vitam, scilicet intellectus, sensus et motus et status secundum locum, et motus secundum nutrimentum et augmentum, ita quod cuicumque inest aliquod horum, dicitur vivere. Etiam ostenso quomodo ista se habeant ad invicem, id est qualiter unum sine altero horum dicitur vivere, et qualiter unum istorum sine altero possit esse, concludit in hoc quod anima sit omnium prædictorum principium, et quod anima determinatur per suas partes vegetativo, sensitivo et intellectivo et motivo, et quod hæc omnia contingit in uno et eodem inveniri, sicut in homine. Et quia Plato posuit diversas esse animas in homine, secundum quas diversæ operationes vitæ ei convenient, consequenter dubitationem movet, utrum unumquodque horum sit anima per se, vel sit aliqua pars animæ: et si sint partes unius animæ, utrum differant solum secundum rationem, aut etiam differant loco, id est organo. Et subjungit, quod « de quibusdam hoc difficile non videtur, sed quædam sunt quæ dubitationem habent. » Ostendit enim consequenter, quod manifestum est de his quæ pertinent ad animam vegetabilem, et de his quæ pertinent ad animam sensibilem, per hoc quod plantæ et animalia quædam decisa vivunt, et in qualibet parte omnes operationes animæ, quæ sunt in toto, apparent. Sed de quibus dubitationem habeat, ostendit cum dicit; quod « de intellectu et potentia perspectiva nihil adhuc manifestum est: » quod non dicit volens ostendere quod intellectus non sit animæ, ut Commentator perverse exponit, et sectatores ipsius; manifeste enim hoc non sequitur ad hoc quod supra dixerat: « Quædam enim dubitationem habent. » Unde intelligendum est: nihil adhuc manifestum est, an intellectus sit anima, vel pars animæ; et si pars animæ, utrum separata loco, vel ratione tantum. Et quamvis dicat hoc adhuc non esse manifestum, tamen quid circa hoc prima fronte appareat, manifestat subdens: « Sed videtur genus alterum animæ esse: » quod non est intelligendum, sicut Commentator et sectatores ejus perverse exponunt, ideo dictum esse,

quia intellectus æquivoce dicatur de anima, vel quod prædicta definitio sibi non possit adaptari; sed qualiter sit hoc intelligendum, apparet ex eo quod subditur: « Et hoc solum contingere separari sicut perpetuum a corruptibili. » In hoc ergo est alterum genus, quia intellectus noster in hoc videtur esse quoddam perpetuum, aliæ autem partes animæ corruptibiles. Et quia corruptibile et perpetuum non videntur in unam substantiam convenire posse, videtur quod hoc solum de partibus animæ, scilicet intellectum, contingat separari, non quidem a corpore, ut Commentator perverse exponit, sed ab aliis partibus animæ; nec in unam substantiam animæ communicat. Et quod sic sit intelligendum, patet ex eo quod subditur: « Reliquæ autem partes animæ manifestum est. ex his quod non separabiles sunt, scilicet a substantia animæ, ratione, vel loco. » De hoc enim supra quæsitum est, et hoc ex supradictis probatum est. Et quod non intelligatur de separabilitate a corpore, sed de separabilitate potentiarum ab invicem, patet per hoc quod subditur: « Ratione autem quod alteræ sint ad invicem manifestum est. Sensitivo enim alterum esse et opinativo manifestum est. » Et sic manifeste ostendit quod hic determinate respondet quæstioni supra motæ. Supra enim quæsitum est, utrum una pars animæ ab alia separata sit ratione solum, aut etiam loco. Hic dimissa quæstione ista quantum ad intellectum, de quo hic nihil determinat, dicit de aliis partibus animæ manifestum esse quod non sunt separabiles, scilicet loco, sed sunt alteræ ratione. Hoc ergo habito quod anima determinatur vegetativo, sensitivo et intellectivo et motivo, vult ostendere quod quantum ad omnes istas partes anima unitur corpori non sicut nauta navi, sed sicut forma materiæ. Et sic certificatum erit quid sit anima in communi, quod supra figuraliter tantum dictum est.

Hoc autem probat per operationes animæ sic. Manifestum est enim quod illud quo primo operatur aliquod, est forma operantis, sicut dicimur scire anima et scire scientia, per prius autem scientia quam anima: quia per animam non scimus nisi in quantum habet scientiam:

et similiter etiam sanari dicitur corpore et sanitate, sed per prius sanitate. Et sic patet scientiam esse formam animæ, et sanitatem corporis. Et hoc procedit sic. « Anima est primum quo vivimus, quod dicit propter vegetativum; « quo sentimus, » propter sensitivum, et movemur, propter motivum; « et intelligimus, » propter intellectum: et concludit: « Quia ratio quædam utique erit, et species; sed non ut materia et subiectum. » Manifeste ergo quod supra dixerat animam esse actum corporis physici, hic concludit non solum de vegetativo, sensitivo et motivo, sed etiam intellectivo. Fuit ergo sententia Aristotelis, quod illud quo intelligimus, sit forma corporis physici.

Sed ne aliquis dicat, quod id quo intelligimus, non dicit hic intellectum possibilem, sed aliquid aliud; manifeste hoc excluditur per illud quod Aristoteles in III *De anima* dicit, de intellectu possibili loquens: « Dico autem intellectum, quo opinatur et intelligit anima. »

Sed antequam ad verba Aristotelis, quæ sunt in III *De anima*, accedamus, adhuc amplius circa verba ipsius in II *De anima* immoremur, ut ex collatione verborum ejus ad invicem appareat quæ fuerit ejus sententia de anima. Cum enim animam in communi definiisset, incipit distinguere potentias ejus, et dicit, quod « potentia animæ sunt vegetativum, sensitivum, appetitivum et motivum secundum locum, et intellectivum. » Et quod intellectivum sit intellectus, patet per id quod postea subdit, divisionem explanans: « Alterius autem intellectivum, et intellectus, ut hominibus. » Vult ergo quod intellectus est potentia animæ, quæ est actus corporis. Et quod hujus animæ potentiam dixerit intellectum, et iterum quod supra definitio animæ sit omnibus prædictis partibus communis, patet per id quod concludit: « Manifestum igitur est quoniam eodem modo una utique erit ratio animæ et figuræ: neque enim ibi figura est præter triangulum, et figuras, et quæ consequenter fiunt; neque hæc anima præter prædictas est. » Non est ergo quærenda alia anima præter prædictas, quibus communis est animæ definitio supra posita. Neque plus de intellectu mentionem <sup>1</sup>

<sup>1</sup> Sic Cod. S. Gen. — Parm.: « intentionem. » sed in notula: an « mentionem. »



facit Aristoteles in hoc secundo; nisi quod postmodum subdit, quod « ultimam », ostendit, « et minimam esse ratiocinationem et intellectum, » quia scilicet in paucioribus est, ut per sequentia apparet.

Sed quia magna differentia est quantum ad modum operandi inter intellectum et imaginationem, subdit quod de speculativo intellectu altera ratio est. Reservat enim hoc inquirendum usque ad tertium. Et ne quis dicat, sicut Averroes perverse exponit, quod ideo dicit Aristoteles quod de intellectu speculativo est alia ratio, quia intellectus neque est anima, neque pars animæ; statim hoc excluditur in principio tertio ubi resumit de intellectu tractatum: dicit enim: « De parte autem animæ qua cognoscit anima et sapit. » Nec debet aliquis dicere, quod hoc dicatur solum secundum quod intellectus possibilis dividitur contra agentem, sicut aliqui somniant. Hoc enim dictum est antequam Aristoteles probet intellectum possibilem et agentem: unde intellectum dicit hic partem in communi, secundum quod continet et agentem et possibilem, sicut supra in secundo manifeste distinxit intellectum contra alias partes animæ, ut jam dictum est.

Est autem consideranda mirabilis diligentia et ordo in processu Aristotelis. Ab his enim incipit in tertio tractatu de intellectu, quæ in secundo reliquerat indeterminata circa intellectum. Duo autem supra reliquerat indeterminata circa intellectum. Primo quidem utrum intellectus ab aliis partibus animæ separatur ratione solum, aut etiam loco: quod quidem indeterminatum dimisit cum dixit: « De intellectu autem et perspectiva potentia nihil adhuc manifestum est. » Et hanc positionem primo resumit, cum dicit: « Sive separabili existente, » scilicet ab aliis animæ partibus, « sive non separabili secundum magnitudinem, sed secundum rationem. » Pro eodem enim accipit hic « separabile secundum magnitudinem, » pro quo supra dixerat « separabile loco. » Secundo indeterminatum reliquerat de differentia intellectus ad alias animæ partes, cum postmodum dicit: « De speculativo autem intellectu altera ratio est: » et hoc statim quaerit, cum dicit: « Considerandum quam habet differentiam. » Talem enim intendit assignare quæ possit stare cum utroque præmissorum; sive sit separabilis anima

magnitudine seu loco ab aliis partibus, sive non: quod ipse modus loquendi satis indicat. Considerandum enim dicit, quod habet intellectus differentiam ad alias animæ partes, sive sit separabilis ab eis magnitudine, seu loco, idest subiecto, sive non, sed ratione tantum. Unde manifestum est quod non intendit hanc differentiam ostendere, quod sit substantia a corpore separata secundum esse (hoc enim non posset salvari cum utroque prædictorum); sed intendit assignare differentiam quantum ad modum operandi: unde subdit: « Et quomodo sit quidem intelligere ipsum. »

Sic igitur per ea quæ ex verbis Aristotelis accipere possumus, usque huc manifestum est quod ipse voluit intellectum esse partem animæ, quæ est actus corporis physici.

Sed quia ex quibusdam verbis consequentibus Averroes accipere voluit intentionem Aristotelis fuisse, quod intellectus non sit anima quæ est actus corporis, aut pars talis animæ; ideo etiam diligentius verba sequentia consideranda sunt. Statim igitur post quaestionem motam de differentia intellectus et sensus inquit secundum quid intellectus sit similis sensui, et secundum quid ab eo differat. Duo enim supra de sensu terminaverat: scilicet quod sensus est in potentia ad sensibilia, et quod sensus patitur et corrumpitur ab excellentiis sensibilibus. Hoc ergo est quod quaerit Aristoteles dicens: « Si igitur est intelligere sicut sentire, aut pati aliquid utique erit ab intelligibili, ut scilicet sic corrumpatur intellectus ab excellenti intelligibili, sicut sensus ab excellenti sensibili, aut aliquid hujusmodi aliorum: » idest, an intelligere est aliquid hujus simile, scilicet ei quod est sentire, alterum tamen quantum ad hoc, scilicet quod non sit passibile? Huic igitur quaestioni statim respondet; et concludit non ex præcedentibus, sed ex sequentibus, quæ tamen ex præcedentibus manifestantur, quod hanc partem animæ oportet esse impassibilem, ut non corrumpatur, sicut sensus. Est tamen quædam alia passio ejus, secundum quod intelligere communi modo pati dicitur. In hoc ergo differt a sensu. Sed consequenter ostendit in quo cum sensu conveniat, quia scilicet oportet hujusmodi partem esse susceptivam speciei intelligibilis, et quod sit in potentia ad hujusmodi speciem, et quod

non sit hoc in actu secundum suam naturam, sicut et de sensu supradictum est, quod est in potentia ad sensibilia, et non in actu. Et ex hoc concludit quod oportet se sic habere intellectum ad intelligibilia sicut sensus ad sensibilia. Hoc autem induxit ad excludendum opinionem Empedoclis, et aliorum antiquorum, qui posuerunt quod cognoscens est de natura cogniti, utpote quod terram terra cognoscimus, aqua aquam. Aristoteles autem supra ostendit hoc non esse verum in sensu : quia sensitivum non est actu, sed potentia, ea quæ sentit : et idem hic dicit de intellectu. Est autem differentia inter sensum et intellectum : quia sensus non est cognoscitivus omnium, sed visus coloris tantum, auditus sonorum, et sic de aliis ; intellectus autem est simpliciter cognoscitivus omnium. Dicebant autem antiqui philosophi existimantes quod cognoscens deberet habere naturam cogniti, quod animam, ad hoc quod cognoscat omnia, necesse est ex principiis omnium esse commixtam. Quia vero Aristoteles jam probavit de intellectu per similitudinem sensus, quod non est actu id quod cognoscit, sed potentia tantum, concludit e contrario, quod necesse est intellectum, quia cognoscit omnia, esse immixtum, idest non compositum ex omnibus, sicut Empedocles ponebat. Et ad hoc inducit testimonium Anaxagoræ, non tamen de hoc eodem intellectu loquentis, sed de intellectu qui movet omnia. Sicut ergo Anaxagoras dixit illum intellectum esse immixtum, ut imperet movendo et segregando ; sic nos possumus dicere de intellectu humano, quod oportet eum esse immixtum ad hoc ut cognoscat omnia : et hoc probat consequenter : et habetur sic sequens *Littera* in græco. « Intus enim apparens, prohibet extraneum, et obstruit : quod potest intelligi ex simili in visu. » Si enim esset aliquis color intrinsecus pupillæ, ille color interior prohiberet videri extraneum colorem, et quodammodo obstrueret oculum ne videret alia. Similiter si aliqua natura rerum quas intellectus cognoscit, puta terra, vel aqua, aut calidum et frigidum et aliquid hujusmodi, esset intrinseca intellectui, illa natura intrinseca intellectui impediret ipsum, et quodammodo obstrueret ne alia cognosceret. Quia ergo omnia cognoscit, concludit, quod non contingit ipsum habere aliquam na-

turam determinatam ex naturis sensibilibus, quas cognoscit ; sed hanc solam naturam habet, quod sit possibilis, idest in potentia ad ea quæ intelliguntur quantum est de sua natura, sed fit actu illa dum ea intelligit in actu ; sicut sensus in actu fit sensibile in actu, ut supra in secundo dixerat. Concludit ergo quod intellectus antequam intelligat in actu, nihil est actu eorum quæ sunt : quod est contrarium his quæ antiqui dicebant, scilicet quod est actu omnia. Et quia fecerat mentionem de dicto Anaxagoræ loquentis de intellectu qui imperat omnibus, ne crederetur de hoc intellectu hoc conclusisse, utitur tali modo loquendi : « Vacatur itaque animæ intellectus : dico autem intellectum, quo opinatur et intelligit anima, nihil esse actu eorum quæ sunt ante intelligere. » Ex quo duo apparent. Primo quidem quod non loquitur hic de intellectu qui sit aliqua substantia separata, sed de intellectu quem supra dixit potentiam et partem animæ, quo anima intelligit. Secundo quod supra probavit scilicet quod intellectus non habet naturam aliquam determinatam in actu. Nondum autem probavit quod non sit virtus in corpore, ut Averroes dicit ; sed hoc statim concludit ex præmissis : nam sequitur : « Unde neque misceri est rationabile ipsum corpori. » Et hoc secundum probat per primum quod supra probavit, scilicet quod intellectus non habet aliquam in actu de naturis rerum sensibilibus. Ex quo patet quod non miscetur corpori : quia si misceretur corpori, haberet aliquam de naturis corporeis : et hoc est quod subdit : « Qualis enim utique fiet aliquis, aut calidus aut frigidus si organum aliquid erit, sicut sensitivo? » Sensus enim proportionatur suo organo, et trahitur quodammodo ad suam naturam. Unde etiam secundum immutationem organi immutatur operatio sensus. Sic ergo intelligitur istud non misceri corpori, quia non habet organum sicut sensus. Et quod intellectus animæ non habet organum, manifestat per dictum quorundam, qui dixerunt, quod anima est locus specierum, accipientes large locum pro omni receptivo, more Platonico ; nisi quod esse specierum locum non convenit toti animæ, sed solum intellectivæ. Sensitiva enim pars non recipit in se species, sed in organo ; pars autem intellectiva non recipit eas in or-

gano, sed tantum in se ipsa : item non sic est locus specierum quod habeat eas in actu : sed in potentia tantum. Quia igitur jam ostendit quid conveniat intellectui ex similitudine sensus, redit ad primum quod dixerat, quod oportet partem intellectivam esse passibilem ; et sic admirabili subtilitate ex ipsa similitudine sensus concludit dissimilitudinem. Ostendit ergo consequenter, quod non similiter sit passibilis sensus et intellectus, per hoc quod sensus corrumpitur ab excellenti sensibili, non autem intellectus ab excellenti intelligibili. Et hujus causam assignat ex supra probatis, quia sensitivum non est sine corpore, sed intellectus est separatus. Hoc autem ultimum verbum maxime assumunt ad sui erroris fulcimentum, volentes per hoc dicere, quod intellectus neque sit anima, neque pars animæ, sed quædam substantia separata ; sed cito obliviscuntur ejus quod paulo supra Aristoteles dixit. Sicut enim hic dicitur quod sensitivum non est sine corpore, et intellectus est separatus, sicut supra dixit, quod intellectus fieret qualis, aut calidus aut frigidus, si aliquod organum erit ei, sicut sensitivo. Ea igitur ratione hic dicit quod sensitivum non est sine corpore, intellectus autem est separatus, quia sensus habet organum, non autem intellectus.

Manifestissime igitur apparet absque omni dubitatione ex verbis Aristotelis hanc fuisse ejus sententiam de intellectu possibili quod intellectus sit aliquid animæ, quæ est actus corporis ; ita tamen quod intellectus animæ non habeat aliquod organum corporale, sicut habent ceteræ potentie animæ.

Quomodo autem hoc esse possit quod anima sit forma corporis, et aliqua virtus animæ non sit corporis virtus, non difficile est intelligere, si quis etiam in aliis rebus consideret. Videmus enim in multis quod aliqua forma est actus corporis ex elementis commixti, et tamen habet aliquam virtutem quæ non est virtus alienius elementi, sed competit tali formæ ex alio principio, puta corpore celesti ; sicut quod magnes habet virtutem attrahendi ferrum, et jaspis restringendi sanguinem ; et paulatim videmus quod formæ quæ sunt nobiliores, habent aliquas virtutes magis ac magis supergredientes materiam. Unde ultima formarum, quæ est anima humana, habet virtutem totaliter supergredientem ma-

teriam corporalem, scilicet intellectum. Sic ergo intellectus separatus est, quia non est virtus in corpore, sed est virtus in anima, anima autem est actus corporis. Nec dicimus quod anima, in qua est intellectus, sic excedat materiam corporalem quod non habeat esse in corpore ; sed quod intellectus, quem Aristoteles dicit potentiam animæ, non est actus corporis. Neque enim anima est actus corporis mediis suis potentiis, sed anima per se ipsam est actus corporis dans esse corpori specificum ; aliquæ autem potentie ejus sunt actus partium quarundam corporis perficientes ipsas ad aliquas operationes. Sic ergo potentia, quæ est intellectus, nullius partium corporis actus est, quia ejus operatio non fit per organum corporale. Et ne alicui videatur quod hoc ex nostro sensu dicamus præter Aristotelis intentionem, inducenda sunt verba Aristotelis expresse hoc dicentis. Quærit enim in II *Physicorum*, usque ad quantum oporteat cognoscere speciem, et quod quid est ; non enim omnem formam considerare pertinet ad *Physicum* : et solvit subdens : « Aut quemadmodum Medicus nervum, et faber æs usquequo, » id est usque ad aliquem terminum : et usque ad quem terminum ostendit, subdens : « Cujus enim causa unumquodque ; » quasi dicat : Intantum medicus considerat nervum, inquantum pertinet ad sanitatem, propter quam nervum medicus considerat ; et similiter faber æs propter artificium : et quia physicus considerat formam inquantum est in materia, sic enim est forma corporis mobilis ; similiter accipiendum est quod naturalis intantum considerat formam, inquantum est in materia. Terminus ergo considerationis physici de formis, est in formis quæ sunt in materia quodam modo, et alio modo non sunt in materia ; istæ enim formæ sunt in confinio formarum separatarum et immaterialium : unde subdit : « Et circa hoc » scilicet est consideratio naturalis, de formis quæ sunt separatae quidem, species autem in materia. » Quæ autem sint istæ formæ, ostendit subdens : « Homo enim hominem generat ex materia et sol. » Forma ergo hominis est in materia, et est separata. In materia quidem secundum esse quod dat corpori, sic enim est causa generationis ; separata autem secundum virtutem quæ est propria homini, scilicet secundum intellectum. Non est ergo im-

possibile quod aliqua forma sit in materia et virtus ejus sit separata, sicut expositum est de intellectu.

### CAPUT III.

*Rationes probantium intellectum nihil animæ esse, et earum solutiones.*

Adhuc autem alio modo procedunt ad ostendendum quod sententia fuerit Aristotelis quod intellectus non sit in anima, vel pars animæ, quæ unitur corpori ut forma. Dicit enim Aristoteles in pluribus locis, intellectum esse perpetuum et incorruptibilem, sicut patet in II *De anima*, ubi dixit : « Hoc solum contingere separari sicut perpetuum a corruptibili » et in I ubi dixit quod « intellectus videtur esse substantia quædam, et non corrumpi : » et in III, ubi dixit : « Separatus autem est solum hoc quod vere est; et hoc solum immortale et perpetuum est. » Quamvis hoc ultimum quidam non exponant de intellectu possibili, sed de intellectu agente. Ex quibus apparet quod Aristoteles voluit intellectum esse aliquid incorruptibile. Videtur autem quod nihil incorruptibile possit esse forma corporis corruptibilis : non enim est accidentale formæ, sed per se ei convenit esse in materia; alioquin ex materia et forma fieret unum per accidens. Nihil autem potest esse sine eo quod inest ei per se. Ergo forma corporis non potest esse sine corpore. Sic ergo corpus sit corruptibile, necesse sequeretur formam corporis corruptibilem esse. Præterea, formæ separatae a materia, et formæ quæ sunt in materia, non sunt eadem specie, ut probatur in VII *Metaph.* Multo ergo minus una et eadem forma numero potest nunc esse sine corpore, et esse nunc in corpore. Destructo ergo corpore, vel destruitur forma corporis, vel transit ad aliud corpus. Si ergo intellectus est forma corporis, videtur ex necessitate sequi quod intellectus sit corruptibilis.

Est autem sciendum quod ratio hæc plurimos movit. Nam Gregorius Nysenus imponit Aristoteli e contrario quod quia ponit animam esse formam corporis, posuerit eam esse corruptibilem. Quidam vero posuerunt propter hoc, animam transire de corpore in corpus. Quidam etiam posuerunt quod anima haberet corpus quoddam incorrupti-

bile, a quo nunquam separaretur. Et ideo ostendendum est per verba Aristotelis quod sic posuit intellectivam animam esse formam corporis quod tamen posuit eam incorruptibilem. In XI enim *Metaphysicæ*, postquam ostendebat quod formæ non sunt ante materias, quia quando sanatur homo tunc est sanitas, et figura æneæ sphaeræ simul est cum figura ænea; consequenter inquit, utrum aliqua forma remaneat post materiam; et dicit sic, secundum intellectum Boetii : « Si vero aliquid posterius remaneat, scilicet præter materiam, considerandum est : in quibusdam enim nihil prohibet, ut si anima hujusmodi est, non omnis, sed intellectus : omnium enim impossibile est fortasse. » Patet ergo quod anima, quæ est forma quantum ad intellectivam partem, dicit nihil prohibere remanere post corpus, et tamen ante corpus non fuisse. Cum enim absolute dixisset quod causæ moventes sunt ante, non autem causæ formales, non quæsivit utrum aliqua forma esset ante materiam, sed utrum aliqua forma remaneret post materiam : et dicit hoc nihil prohibere de forma quæ est anima, quantum ad intellectivam partem.

Cum igitur secundum præmissa Aristotelis verba, hæc forma quæ est anima, post corpus remaneat, non tota, sed intellectus; considerandum restat, quare magis anima secundum partem intellectivam post corpus remaneat quam secundum alias partes, et quam aliæ formæ post suas materias. Cujus quidem rationem ex ipsis Aristotelis verbis assumere oportet. Dicit enim in III *De anima* : « Separatum autem est solum hoc quod vere est; et hoc solum immortale et perpetuum est. » Ilanc igitur rationem assignare videtur, quia hoc solum immortale et perpetuum esse videtur, hoc solum est separatum.

Sed de quo intellectu hic loquatur, dubium esse potest; quibusdam dicentibus quod loquitur de intellectu possibili; quibusdam quod de agente : quorum utrumque apparet esse falsum, si diligenter verba Aristotelis considerentur. Nam de utroque dixerat Aristoteles, « ipsum separatum. » Restat igitur quod intelligatur de tota intellectiva parte; quæ quidem separata dicitur quia non est ei aliquod organum, sicut ex verbis Aristotelis patet. Dixerat autem Aristoteles in I *De anima*, quod si est aliquid



animæ operum aut passionum proprium ipsius, contingit utique ipsam separari; si vero nullum est proprium ipsius, non utique erit separabilis. Cujus quidem communis ratio talis est: Quia enim unumquodque operatur in quantum est ens, eo modo unicuique competit operari quo sibi convenit esse. Formæ igitur quæ nullam operationem habent sine conjunctione suæ materiæ, ipsæ non operantur, sed compositum est quod operatur per formam. Unde hujusmodi formæ ipsæ quidem proprie loquendo non sunt, sed eis aliquid est. Sicut enim calor non calefacit, sed calidum; ita etiam calor non calidum est per se proprie loquendo, sed calidum est per calorem. Propter quod Aristoteles dicit in X *Metaphysicæ*, quod de accidentibus non vere dicitur quod sunt entia, sed magis quod sunt entis. Et similis ratio est de formis substantialibus quæ nullam operationem habent absque communicatione materiæ, hoc excepto quod hujus formæ est principium essendi substantialiter. Forma igitur quæ habet operationem secundum aliquam sui potentiam vel virtutem absque communicatione suæ materiæ, ipsa est quæ habet esse: nec est per esse compositi tantum, sicut aliæ formæ, sed magis compositum est per esse ejus. Et ideo destructo composito destruitur illa forma quæ est per esse compositi: non autem oportet quod destruat ad compositi destructionem illa forma per cuius esse est compositum, et non ipsa per esse compositi.

Si quis autem contra hoc objiciat quod Aristoteles dicit in I *De anima*, quod « intelligere et amare et odire non sunt illius passionibus, » id est animæ, « sed hujus habentis illud, secundum quod illud habet: quare et hoc corrupto neque memoratur, neque amat: non enim illius erant, sed communis, ut dictum est: » patet responsio per dictum Themistii, hoc exponentis, qui dicit: « Nunc dubitanti magis quam docenti assimilatur Aristoteles. » Nondum enim destruxerat opinionem dicentium non differre intellectum et sensum: unde in toto illo capitulo loquitur de intellectu sicut de sensu. Quod patet præcipue ubi probat intellectum esse incorruptibilem, per exemplum sensus, qui non corrumpitur ex senectute. Unde et per totum sub conditione et sub dubio loquitur sicut inquirens, semper conjungens ea quæ sunt

intellectus, his quæ sunt sensus; quod præcipue apparet ex eo quod in principio solutionis dicit: « Si enim et quam maxime gaudere aut dolere aut intelligere motus sunt, et unumquodque moveri aliquid. » Si quis autem pertinaciter dicere vellet quod Aristoteles loquitur ibi determinando; adhuc restat responsio, quia intelligere dicitur esse actus conjuncti non per se, sed per accidens; in quantum scilicet ejus objectum quod est phantasma, est in organo corporali; non quod iste actus per organum corporale exerceatur.

Si quis autem quærat ulterius: Si intellectus sine phantasmate non intelligit, quomodo ergo habebit operationem intellectualem, postquam fuerit anima a corpore separata? scire debet qui hæc objicit quod istam quæstionem solvere non pertinet ad naturalem. Unde Aristoteles in II *Physicorum* dicit, de anima loquens: « Quomodo autem separabilis hæc se habeat, et quid sit, Philosophiæ primæ opus est determinare. Estimandum est enim quod alterum modum intelligendi habebit anima separata quam habeat conjuncta, » similem scilicet aliis substantiis separatis. Unde non sine causa Aristoteles quærit in III *De anima*, utrum intellectus non separatus a magnitudine intelligat aliquid separatum. Per quod dat intelligere quod aliquid poterit intelligere separatus quod non potest non separatus. In quibus etiam verbis valde notandum est quod supra utrumque intellectum, scilicet possibilem et agentem, dixit separatum, hic tamen dicit eum non separatum. Est enim separatus, in quantum non est actus organi; non separatus vero, in quantum pars sive potentia animæ quæ est actus corporis, sicut supra dictum est. Hujusmodi autem quæstiones certissime colligi potest Aristotelem solvisse in his libris quos patet eum scripsisse de substantiis separatis, ex his quæ dicit in principio XII *Metaphysicæ*; quos etiam libros vidimus numero XIV, licet nondum translatos in linguam nostram.

Secundum hoc igitur patet quod rationes in contrarium necessitatem non habent.

Essentiale est enim animæ quod corpori uniatur; sed hoc impeditur per accidens non ex parte sua, sed ex parte corporis quod corrumpitur: sicut per se competit levi esse sursum, et hoc est



levi esse ut sit sursum, ut Aristoteles dicit in VIII *Physicorum*; contingit tamen propter aliquod impedimentum quod non sit sursum.

Ex hoc etiam patet solutio alterius rationis. Sicut enim quod habet naturam ut sit sursum, et quod non habet naturam ut sit sursum, specie differunt; et tamen idem numero et specie est quod habet naturam ut sit sursum, licet quandoque sit sursum et quandoque non sit sursum propter aliquod impedimentum, ita differunt specie duæ formæ, quarum una habet naturam ut uniatur corpori, alia vero non; sed tamen unum et idem numero et specie esse potest habens naturam ut uniatur corpori, licet quandoque actu sit unitum, quandoque non actu unitum propter aliquod impedimentum.

Adhuc autem ad sui erroris fulcimentum assumunt quod Aristoteles dicit in libro *De generatione animalium*, scilicet intellectum solum de foris advenire, et divinum esse solum. Nulla autem forma quæ est actus materiæ, advēnit materiæ de foris, sed educitur de potentia materiæ. Intellectus igitur non est forma corporis.

Objiciunt etiam quod omnis forma corporis mixti causatur ex elementis; unde si intellectus esset forma corporis humani, non esset ab extrinseco, sed esset ab elementis causatus.

Objiciunt ulterius contra hoc, quia sequeretur quod etiam vegetativum et sensitivum esset ab extrinseco; quod est contra Aristotelem; præcipue si esset una substantia animæ, cujus potentiæ essent vegetativum et sensitivum et intellectivum; cum intellectus sit ab extrinseco secundum Aristotelem.

Horum autem solutio in promptu apparet secundum præmissa.

Cum enim dicitur quod omnis forma educitur de potentia materiæ, educi de potentia materiæ est duobus modis: primo modo formam dependere a materia secundum esse et operari; alio modo, præexistere formæ. Si enim hoc nihil aliud sit quam materiam præexistere, considerandum videtur quid sit formam de potentia materiæ educi. Si enim hoc nihil aliud sit quam materiam præexistere in potentia ad formam, nihil prohibet sic dicere materiam corporalem præexistere in potentia ad animam intellectivam. Unde Aristoteles in libro *De generatione animalium* dicit: « Animam igitur vege-

tabilem in seminibus et conceptibus, » scilicet nondum separatis, « haberi potentia, statuendum est, non actu, priusquam eo modo conceptus, qui jam separantur, eibum trahant, et officio ejus animæ fungantur. Principio enim hæc omnia vita stirpis vivere videntur. » De anima quoque sensuali pari modo dicendum est, atque etiam de intellectuali: omnes enim potentia prius haberi quam actu necesse est, ut nunquam secundum eam rationem sit in potentia secundum quam rationem convenit sibi esse actu. Jam enim ostensum est quod aliis formis quæ non habent operationem aliquam absque communicatione materiæ, convenit sic esse actu ut magis ipsæ sint quibus composita sunt, et quodammodo compositis coexistentes, quam ipsæ suum esse habeant: unde sicut totum esse earum est in coneretione ad materiam, ita totaliter educi dicuntur de potentia materiæ. Anima autem intellectiva, cum habeat operationem sine corpore: non est esse suum solum in coneretione ad materiam: unde non potest dici quod est a principio extrinseco. Et hoc ex verbis Aristotelis apparet: « Relinquitur autem intellectum solum de foris advenire, et divinum esse solum; » et causam assignat dicens: « Nihil enim ipsius operationi communicat corporalis operatio. »

Miror autem unde secunda objectio processerit: scilicet quod si intellectiva anima esset forma corporis mixti, causaretur ex commixtione elementorum, cum nulla anima ex commixtione elementorum causetur. Dicit enim Aristoteles immediate post verba præmissa: « Sed enim omnis animæ sive virtus sive potentia corpus aliud participare videtur; idque magis divinum quam ea quæ elementa appellantur; verum prout nobilitate ignobilitateve animæ inter se differunt, ita et natura ejus corporis differt. Inest enim in semine omnium quod facit ut fecunda sint semina, videlicet quod calor vocatur: idque non ignis, non talis facultas aliqua est, sed spiritus qui in semine spumosoque corpore continetur, et natura quæ in eo spiritu est, proportionem respondens elemento stellarum. » Ergo ex mixtione elementorum nedum intellectus, sed nec anima vegetativa producitur.

Quod vero tertio objicitur quod sequeretur sensitivum et vegetativum esse

ab extrinseco, non est ad propositum. Jam enim patet ex verbis Aristotelis quod ipse hoc indeterminatum reliquit, utrum intellectus differat ab aliis partibus animæ subjecto et loco, ut Plato dixit, vel ratione tantum. Si vero detur quod sint idem subjecto, sicut verius est; nec ad hoc inconueniens sequitur. Dicit enim Aristoteles in II *De anima* quod « similiter se habent ei quod de figuris, et quæ secundum animam sunt. » Semper enim in eo quod est consequenter, est potentia quod prius est in figuris et in animatis; ut in tetragono quidem trigonum est, in sensitivo autem vegetativum; similiter autem idem subjecto est etiam intellectivum; quod ipse sub dubio reliquit. Similiter dicendum esset quod vegetativum et sensitivum sunt in intellectivo, ut trigonum et tetragonum in pentagono. Est autem tetragonum quidem a trigono simpliciter alia figura secundum speciem, non autem a trigono quod est potentia in ipso, sicut nec quaternarius a ternario qui est pars ipsius, sed a ternario qui est seorsum existens. Et si contingeret diversas figuras a diversis agentibus produci, trigonum quidem seorsum a tetragono existens haberet aliam causam producentem quam tetragonum, sicut et habet aliam speciem: sed trigonum quod inest tetragono, haberet eandem causam producentem. Sic igitur vegetativum quidem seorsum a

sensitivo existens, alia specie animæ est, et aliam causam productivam habet; eadem tamen causa productiva est sensitivi, et vegetativi quod inest sensitivo. Si ergo sic dicatur quod vegetativum et sensitivum quod inest intellectivo, est a causa extrinseca, a qua est intellectivum, nullum inconueniens sequitur. Non enim inconueniens est affectum superioris agentis habere virtutem quam habet effectus inferioris agentis, et adhuc amplius: unde etiam anima intellectiva, quamvis sit ab exteriori agente, habet tamen virtutes quas habent anima vegetativa et sensitiva, quæ sunt ab interioribus agentibus.

Sic igitur diligenter consideratis fere omnibus verbis Aristotelis quæ de intellectu humano dixit, apparet eum hujus fuisse sententiæ quod anima humana sit actus corporis, et quod ejus pars sive potentia sit intellectus possibilis.

#### CAPUT IV.

##### *Quid circa hoc senserunt Peripatetici.*

Nunc autem considerare oportet quid alii Peripatetici de hoc ipso senserunt: et accipiamus primo verba Themistii in *Commento de anima*, ubi sic <sup>1</sup> dicit: « <sup>2</sup> Intellectus iste, quem dicimus in potentia, magis est animæ connaturalis,

<sup>1</sup> Parm. restituere voluit textum Themistii talem qualem a S. Thoma introducitur; sed non bene rem confecit, ut infra videbitur.

<sup>2</sup> Paraphrasticam Hermolai Barbari translationem Themistii contra fidem omnium codicum in-  
vexit in Opusculum S. Thomæ Editor, quicumque is fuerit. Vetere versione, qua usus est Aquinas, restituta, ad marginem rejiciamus Barbari translationem. Vide Admonitionem præviam cap. II, num. 1: « Duas ergo differentias esse humani animi necesse est, intellectum potentiam, et intellectum agentem. Hic priorem illum quasi adortus amplexusque primum quasi educit in lumen e tenebris, et in actu constituit; deinde habitum in eo quemdam efformat, in quo universales rerum notiones, et scientiæ collocantur. Nam quemadmodum neque rude saxum, neque impositum æs, quorum alterum domus potentia est, alterum statua, aut hoc accipere formam domus potest, aut illud statuæ, nisi ars materias illas quæ ad domum et statuam comparatæ sunt, fingat, et formam artificiosam imponat, atque ita demum consistat domus et statua; ita intellectum potentiam ab altero intellectu perfici oportet: qui quod ipse perfectus est, et in actu semper, nulli potentiam affinis consorsve, præparationem illam intellectui ad intelligendum adjunctam, ad instar artis excitet, excolatque habitum, et scien-

tiam rerum absolvat. Atque hic intellectus separatus et impatibilis impermixtusque est. Intellectus autem potestatis, quamvis eadem fere qua intellectus agens, dignitate auctoritateque polleat; quia tamen aliquando conjunctior, additiorque humanæ animæ est, videtur societate hac nobilitati suæ nonnihil dispendii detrimentique facere. Quemadmodum itaque lumen cum ad oculos et colores accedit, (Al. cum oculos et colores accipit, item accedit,) non modo visui, sed coloribus etiam actum præbet; ita intellectus agens cum intellectu potentiam agit, non solum intellectui actum ministrat, sed et res quæ potentia intellectæ sunt, facit ut in eo intellectæ sint actu: atque hæc sunt formæ materiales, et notiones communes de singularibus sensibus collectæ. » Et post pauca subdit: « Qualis est ergo artis ad suam materiam comparatio, talis est intellectus agentis ad intellectum potentiam probanda. Item hic omnia facit, ille lit omnia. Ex quo sequitur ut in nostra potestate sit intelligere, et speculari cum volumus: quia intellectus agens non quemadmodum ars seorsum a sua materia est, sed totus intellectui potentiam immersusque habetur. Pinge excussorem in aere aut in ferro esse, non extrinsecus: nonne pervadet penetrabitque in materiam universam? Eodem modo intellectus agens intellectui potestatis

scilicet quam agens. Dico autem, non omni<sup>4</sup> animæ, sed solum humanæ. Et sicut lumen potentia visui, et potentia coloribus adveniens, actu quidem visum facit, et actu colores; ita et intellectus iste qui actu, non solum ipsum actu intellectum fecit<sup>2</sup>, sed et potentia intellectiva ipse instituit. » Et post pauca concludit: « Quam igitur rationem habet ars ad materiam, hanc et intellectus factivus ad eum qui in potentia. Propter quod etiam in verbis<sup>3</sup> est intelligere, quando

assistens, unus cum illo redditur, propterea quod una res est, quæ ex materia et forma consistit; et tamen permixtio hæc rationes duas habet. » Et quibusdam interpositis subdit: « Nos igitur utriusque intellectus copulatio sumus. Si ergo ita habent omnia quæ ex actu et potentia conciliantur, ut in his aliud sit ipsa res, aliud essentia; sequitur ut aliud ego sim, aliud essentia mea: ita ut ego sim is qui ex actu et potestate constituor, essentia mea sit solus actus tantum. Quamobrem eadem quæ considero, hæc etiam scribo, et litteris mando. Scribit vero intellectus qui ex potestate componitur: scribit, inquam, non tamen quatenus ex potestate constat, sed quatenus intellectus agens est, quia illinc quasi omnis actio derivatur et ducitur. » Et post pauca adhuc manifestius subdit: « Ut ergo redeamus unde discessimus, quemadmodum aliud est animal, aliud suum animali esse; et quemadmodum suum animali esse ab ipsa dependet animalis anima: ita aliud ego sum, aliud mihi esse, et mea essentia. Hæc autem ab anima provenit non quidem sensuali, quippe quæ tamquam materia intellectus potentiæ habeatur; neque item ab ipso intellectu potentiæ, ut qui pro materia intellectus agentis sit. Restat igitur ut ab intellectu agente tantum essentia mea proficisci ac pendere dicatur. Solus enim intellectus agens proprie et maxime censendus est forma, immo vero forma formarum; inferiora autem cetera modo subjectorum loco, modo formarum habentur. Sane ordo naturæ et processus hic est, ut respectu inferiorum superioribus vice formarum utatur, respectu superiorum inferioribus loco materiæ. Summam vero et supremam formarum intellectum agentem constituit, quæ simul atque progressa est, receptui canit, in eoque finem quasi extremam manum imponit, utpote quæ nullam formam superiorem aut nobiliorem haberet, cui loco materiæ subjiceret intellectum agentem. Quamobrem nos proprie animus et intellectus sumus. » Et postea reprobans quorundam opinionem dicit: « Cum enim statuisset Aristoteles, in omni natura alterum pro materia haberi, alterum pro forma movente perficienteque, Necessesse, inquit, est easdem differentias in anima reperiri, et talem aliquem intellectum adesse qui pars animæ rationalis præstantissima sit. » Et post pauca etiam subdit: « Ex ejusdem verbis illud subinde colligi confirmarique cupio Aristotelem opinatum fuisse intellectum agentem aut aliquid nostri esse, aut plane ipsos. »

<sup>1</sup> Parm. omittit: « omni. »

<sup>2</sup> Parm.: « facit actu sed etiam potentia intel-

volumus. Non enim est aliquis<sup>4</sup> materiæ exterioris<sup>5</sup>, sed in<sup>6</sup> tota potentia intellectui, qui vestitur factivus. Ac si utique ædificator lignis, et ærarius æri<sup>7</sup> non ab extrinseco existeret, per totum autem ipsum penetrare potens erit. Sic enim<sup>8</sup> et qui secundum<sup>9</sup> actum intellectus, intellectui potentia superveniens, unum<sup>10</sup> cum ipso. » Et post pauca concludit: « Nos<sup>11</sup> igitur sumus aut qui potentia intellectus, aut qui actu (a).

Patet igitur ex præmissis verbis The-

ligibilia, actu intelligibilia iste constituit. »

<sup>5</sup> Parm.: « in prompta nobis. »

<sup>4</sup> Parm.: « ars. »

<sup>5</sup> Parm.: « inferioris. »

<sup>6</sup> Parm.: « inexistent. »

<sup>7</sup> Parm. omittit: « ærarius æri. »

<sup>8</sup> Parm.: « etiam. »

<sup>9</sup> Parm.: « scilicet actu. »

<sup>10</sup> Parm.: « facit. »

<sup>11</sup> Parm.: « nos igitur sumus, ut quod potentia; intellectus autem, qui actu. »

(a) Textus Themistii juxta Cod. S. Gen.

« Intellectus iste quem nos dicimus in potentia magis est animæ connaturalis, scilicet quam agens. Dico autem non omni animæ, sed solum humanæ. Et sicut lumen potentia visui, et potentia coloribus adveniens, actu quidem visum facit, et actu colores, ita et intellectus iste qui actu non solum ipsum actu intellectum fecit, sed et potentia intellectiva<sup>1</sup> ipse instituit, » et post pauca concludit: « Quam igitur rationem habet ars ad materiam, hanc et intellectus factivus ad eum qui in potentia, propter quod et in verbis est intelligere quando volumus. Non enim est aliquis materiæ exterioris, sed investitur tota potentia intellectui qui factivus, ac si utique ædificator lignis et ærarius æri non ab extrinseco existeret per totum, aut ipsum penetrare potens erit. Sic enim et qui secundum actum intellectus intellectui potentia superveniens unum fit cum ipso. » Et post pauca concludit: « Nos igitur sumus aut qui potentia intellectus aut qui actu. Sic quidem in compositis omnibus ex eo quod potentia et ex eo quod actu, aliud est hic, aliud est huic: aliud utique erit ego, et aliud mihi esse. Et ego quidem est compositus intellectus ex potentia et actu. Mihi autem esse ex eo quod actu est: qualiter et quæ meditor et quæ scribo, scribit quidem intellectus compositus ex potentia et actu. Scribit autem, non qua potentia, sed qua actu: operari enim inde demonstratur. » Et post pauca adhuc manifestius sic: « Sicut igitur aliud quid est animal, et aliud animali esse. Animali autem esse est ab anima animalis. Sic et aliud qui ego, et aliud esse mihi. Esse igitur mihi ab anima: et hoc non omni. Non enim a sensitiva, mihi. Igitur erat phantasiæ; neque rursus a phantastica, mihi enim erat potentia intellectus. Materia enim est factivi. A solo igitur factivo est mihi esse. » Et post pauca subdit: « adhuc progressa natura cessavit. Tanquam nihil habens alterum honoratius cui faceret ipsum subjectum. Nos itaque sumus activus intellectus. » Et postea reprobans quorundam opinionem, dicit cum

gibilia ipso instituit. »

mistii quod non solum intellectum possibilem, sed etiam agentem partem animæ humanæ esse dicit, et Aristotelem hoc sensisse, et iterum quod hoc est id quod est, non ex anima sensitiva, ut quidam mentiuntur, sed ex parte intellectiva et principaliori. Et Theophrasti quidem libros non vidi, sed ejus verba introduxit Themistius in *Commento de anima*, quæ sunt talia, sic dicens: Melius<sup>1</sup> est autem Theophrasti proponere dicta de intellectu potentia, et de eo qui actu. De eo igitur, qui potentia, hæc ait: intellectus autem qualiter a foris existens, et tamquam superpositus, tamen connaturalis? Et quia natura ipsius habet quidem naturaliter esse secundum actum, potentia autem<sup>2</sup> omnia, bene finit et superius. Non enim sic accipiendum est ut neque sit ipse: hoc litigiosum est enim, sed ut subjectam<sup>3</sup> quamdam potentiam, sicut etiam in materialibus; sed<sup>4</sup> hoc a formis. Igitur non ut adjectum, sed ut in prima generatione comprehendens ponendum. Hoc a formis, non ut objectum, sed ut ipsam comprehendens generationem, omnino ponendum. » Sic igitur Theophrastus cum quæsiisset duo: primo quidem quomodo intellectus possibilis sit ab extrinseco, et tamen nobis connaturalis; et secundo, quæ sit natura intellectus possibilis: respondit primo ad secundum, quod est in potentia omnia, non quidem sicut nihil existens, sed sicut sensus ad sensibilia: et ex hoc concludit responsionem primæ quæstionis, quod non intelligitur sic esse ab extrinseco quasi aliquid adjectum accidentaliter, vel tempore procedente; sed a prima generatione, sicut continens et comprehendens naturam humanam.

prædixisset secundum Aristotelem, in omni natura hoc quidem materiam esse habet, hoc autem quod materiam movet aut perficit necesse ait, et in anima existere has differentias, et esse aliquem hunc talem intellectum in omnia fieri, hunc talem in omnia facere; in anima enim ait talem intellectum, et animæ humanæ velut quamdam partem honoratissimam. « Et post pauca dicit: « Ex eadem *Littera* hoc convenit confirmare quod putat, scilicet Aristoteles, aut nostri aliquid esse activum intellectum, aut nos. »

<sup>1</sup> Al. ex paraphrasi Hermolai Barbari: « Plane facturum hoc loco me operæ pretium arbitror, si verba Theophrasti de intellectu potestatis et agente prætexuero. De intellectu itaque potestatis hæc dicit: Cum intellectus, inquit, homini extrinsecus accedat, cumque tamquam appositus invectusque sit, quæritur quemadmodum congenitus nobis dicatur, demum quænam confirma-

Quod autem Alexander intellectum possibilem posuerit esse formam corporis, et etiam ipse Averroes confitetur; quamvis, ut arbitror, perverse verba Alexandri acceperit, sicut et verba Themistii præter ejus intellectum assumit. Nam quod dixit, Alexandrum dixisse intellectum possibilem non esse aliud quam præparationem quæ est in natura humana ad intellectum agentem et ad intelligibilia; hanc præparationem nihil aliud intellexit quam potentiam intellectivam quæ est in anima ad intelligibilia; et ideo dixit eam non esse virtutem in corpore, quia talis potentia non habet corporale organum; et non ex ea ratione, ut Averroes impugnat, secundum quod nulla præparatio est virtus in corpore.

Et ut a Græcis ad Arabes transeamus; primo manifestum est quod Avicenna posuit intellectum virtutem animæ, quæ est forma corporis: dicit enim sic in suo libro *De anima*: « intellectus activus, idest practicus, eget corpore et virtutibus corporalibus ad omnes actiones suas. Contemplativus autem intellectus eget corpore et virtutibus ejus, sed nec semper nec omnino. Sufficit enim ipse sibi per se ipsum. Nihil autem horum est anima humana; sed anima est id quod habet has virtutes, et, sicut postea declarabimus, est substantia solitaria per se, quæ habet aptitudinem ad actiones: quarum quædam sunt quæ non perficiuntur nisi per instrumenta, et per usum eorum ullo modo; quædam vero sunt quibus non sunt necessaria instrumenta aliquo modo. » Item in prima parte dicit quod « anima humana est perfectio prima corporis naturalis instrumentalis, secundum quod attribuitur ei agere actionis elec-

tio, (s. constitutio) naturæ ejus sit. Certe id quod dicitur, nihil actu esse intellectum, sed potestate omnia, recte hactenus dicitur, quatenus et in sensu; non tamen usque eo ad unum resecanda res est, neque tam nihil actus probandus, ut neque ipsemet sit. Calumnia hæc esset, et oratio contentioni cavilloque proxima. Sed ita intelligendum ut in animo talis quædam sui generis potentia sit pro subjecto formarum ac gremio, qualis in rebus materialibus facultas illa est, quæ constitutioni earum et concrecioni substernitur. Porro quod dicitur mentem extrinsecus accedere, non ita statuendum est, ut qui vere appositus invectusque habeatur; sed ut qui statim ab ortu quasi comprehendere nos complectique solet. »

<sup>2</sup> In Cod. S. G.: « sicut et sensus. »

<sup>3</sup> Parm. omittit: « subjectam. »

<sup>4</sup> Parm. omittit: « Sed hoc a formis... generatione comprehendens ponendum. »



tivæ deliberationis, et adinvenire meditando, et secundum hoc quod apprehendit universalialia. » Sed verum est quod postea dicit et probat. « Et anima humana secundum id quod est sibi proprium, scilicet secundum vim intellectivam, non sic se habet ad corpus ut forma, nec eget ut sibi præparetur organum. » Deinde subjungenda sunt verba Algazelis sic dicentis : « Cum commixtio elementorum fuerit pulchrioris et perfectioris æqualitatis, qua nihil possit inveniri subtilius et pulchrius, tunc fiet apta ad recipiendum a datore formarum formam pulchriorem aliis formis, quæ est anima hominis. » Hujus vero animæ humanæ duæ sunt virtutes, una operans, et altera sciens, quam vocat intellectum, ut ex consequentibus patet. Et postea multis argumentis probat, quod operatio intellectus non fit per organum corporale. Hoc autem præmisimus, non quasi volentes ex philosophorum auctoritatibus reprobare supra positum errorem ; sed ut ostendamus quod non solum Latini, quorum verba quibusdam non sapiunt, sed et Græci et Arabes hoc senserunt, quod intellectus sit pars vel potentia sive virtus animæ, quæ est corporis forma. Unde miror ex quibus Peripateticis hunc errorem se assumpsisse gloriantur ; nisi forte quia minus volunt cum ceteris Peripateticis recte sapere, quam cum Averroë aberrare, qui non tam fuit Peripateticus, quam Peripateticæ philosophiæ depravator.

#### CAPUT V.

##### *In quo ostenditur per rationes quid tenendum.*

Ostenso igitur ex verbis Aristotelis et aliorum sequentium ipsum, quod intellectus est potentia animæ quæ est corporis forma, licet ipsa potentia quæ est intellectus, non sit alicujus organi actus, quia nihil ipsius operationi communicat corporalis operatio ut Aristoteles dicit ; inquirendum est per rationes quid circa hoc sentire sit necesse. Et quia secundum doctrinam Aristotelis oportet ex actibus principia actuum considerare ; ex ipso actu quidem proprio intellectus, qui est intelligere, primo hoc considerandum videtur : in quo nullam firmiorem rationem habere possumus ea quam Aristo-

teles ponit, et sic argumentatur. Anima est principium quo vivimus et intelligimus. Ergo et ratio quædam et species corporis cujusdam. Et adeo huic rationi innititur quod eam dicit esse demonstrationem : nam in principio capituli sic dicit : « Non enim solum quod quid est oportet diffinitivam rationem ostendere, sicut plures terminorum dicunt, sed et causam inesse et demonstrare ; » et ponit exemplum : « sicut demonstratur quid est tetragonismus, » idest quadratum, per inventionem mediæ lineæ proportionalis. » Virtus autem hujus demonstrationis et insolubilitas apparet : quia quicumque ab hac via divertere voluerit, necesse habet inconveniens dicere. Manifestum est enim quod hic homo singularis intelligit : nunquam enim de intellectu quæreremus, nisi intelligeremus : nec cum quærimus de intellectu, de alio principio quærimus quam de eo quo nos intelligimus. Unde et Aristoteles dicit : « dico autem intellectum quo intelligit anima. » Concludit autem sic Aristoteles : « Quod si aliquid est primum principium quo intelligimus : oportet illud esse formam corporis : » quia ipse prius manifestavit, quod illud quo primo aliquid operatur, est forma. Et patet hoc per operationem, quia unumquodque agit in quantum est actu. Est autem unumquodque actu per formam. Unde oportet illud quo primo aliquid agit, esse formam. »

Si autem dicas, quod principium hujus actus qui est intelligere, quod nominamus intellectum, non sit forma ; oportet te invenire modum quo actio illius principii sit actio hujus hominis : quod diversimode quidam conati sunt dicere : quorum unus, scilicet Averroës, ponens hujusmodi principium intelligendi quod dicitur intellectus possibilis, non esse animam nec partem animæ nisi æquivoce, sed potius quod sit substantia quædam separata ; dixit, quod illius intelligere substantiæ separatæ est intelligere mei vel illius, in quantum intellectus ille possibilis copulatur mihi vel tibi per phantasmata quæ sunt in me vel in te. Quod sic fieri dicebat. Species enim intelligibilis, quæ fit unum cum intellectu possibili, cum sit forma et actus ejus, habet duo subjecta : unum ipsa phantasmata, aliud intellectus possibilis continuatur nobis per formam suam mediantibus phantasmatis ; et sic dum intellectus possibilis intelligit, hic homo intelligit.



Quod autem hoc nihil sit, patet tripliciter. Primo quidem quod sic continuatio intellectus ad hominem non esset secundum primam ejus generationem, ut Theophrastus dicit, et Aristoteles innuit in II *Phys.*, ubi dicit, quod terminus naturalis considerationis de formis est ad formam secundum quam homo ab homine generatur, et a sole. Manifestum est autem quod terminus considerationis naturalis est intellectus. Secundum autem dictum Averrois, intellectus non continuatur homini secundum suam generationem, sed secundum operationem sensus, in quantum est sentiens in actu. Phantasma enim est motus factus a sensu secundum actum ut dicitur in III libro *De anima*. Secundo vero, quia ista conjunctio non esset secundum aliquid unum, sed secundum diversa. Manifestum est enim quod species intelligibilis, secundum quod est in phantasmatis, est intellecta in potentia; in intellectu autem possibili est secundum quod est intellecta in actu, abstracta a phantasmatis. Si ergo species intelligibilis non est forma intellectus possibilis nisi secundum quod est abstracta a phantasmatis, sequitur quod per speciem intelligibilem non continuatur intellectus phantasmatis, sed magis ab eis est separatus: nisi forte dicatur, quod intellectus possibilis continuatur phantasmatis, sicut speculatum continuatur homini cujus species resultat in speculo. Talis autem continuatio manifestum est quod non sufficit ad continuationem actus: manifestum est enim quod actio speculi, quæ est repræsentare, non propter hoc potest attribui; homini unde nec actio intellectus possibilis propter prædictam copulationem posset attribui huic homini qui est Socrates, ut hic homo intelligeret. Tertio, quia dato quod una et eadem species numero esset forma intellectus possibilis, et esset simul in phantasmatis; nec adhuc talis copulatio sufficeret ad hoc quod hic homo intelligeret. Manifestum est enim quod per speciem intelligibilem aliquid intelligitur, sed per potentiam intellectivam aliquis intelligit; sicut etiam per speciem sensibilem aliquid sentitur, per potentiam autem sensitivam aliquis sentit: unde paries, in quo est color, ejus species sensibilis in actu est in visu, videtur, non videt; animal autem habens potentiam visivam, in qua est talis species, videt. Talis autem est prædicta copulatio intellectus possi-

bilis ad hominem, in quo sunt phantasmata, quorum species sunt in intellectu possibili, qualis est copulatio parietis, in quo est color, ad visum, in quo est species sui coloris. Sicut igitur paries non videt, sed videtur ejus color; ita sequeretur quod homo non intelligeret, sed quod ejus phantasmata intelligerentur ab intellectu possibili. Impossibile est ergo salvari quod hic homo intelligat, secundum positionem Averrois.

Quidam vero videntes quod secundum viam Averrois sustineri non potest quod hic homo intelligat, in aliam divertunt viam; et dicunt quod intellectus unitur corpori ut motor; et sic in quantum ex corpore et intellectu fit unum sicut ex movente et moto, intellectus est pars hujus hominis: et ideo operatio intellectus attribuitur huic homini, sicut operatio oculi, quæ est videre, attribuitur huic homini. Quærendum est autem ab eo qui hoc ponit, primo quid sit hoc singulare quod est Socrates: utrum Socrates sit solus intellectus, qui est motor, aut sit motum ab ipso quod est corpus, animatum tamen anima vegetativa et sensitiva; aut sit compositum ex utroque. Et quantum ex sua positione videtur, hoc tertium accipiet, scilicet quod Socrates sit aliquid compositum ex utroque.

Procedamus ergo contra eos per rationem Aristotelis in VIII *Metaphysic.*, dicentis: « Cum enim quæcumque partes habent, et non ut acervus, quod totum, sed aliquid inest totum præter partes, est alia causa: quoniam in corporibus iis quidem tactus causa est unum essendi; aliis vero viscositas, aut aliqua passio altera. Talis vero definitio ratio est una, non conjunctione, quemadmodum ilias, sed unius esse. Quid igitur est quod facit hominem unum, et propter quid unum sed non multa, puta animal et bipes, aliterque, et si est, ut aiunt quidam, ipsum aliquid animal, et ipsum bipes? Quare namque non illa ipsa homo est, et erunt secundum participationem homines, et hominis non unius, sed duorum, scilicet animalis, non bipedis: et totaliter utique non erit homo unum, et plura animal et bipes? Palam itaque quia sic quidem acceptantibus consueverunt definire et dicere: Non contingit reddere et solvere dubitationem. Si autem est, ut diximus hoc quidem materia, illud vero forma; et hoc quidem potentia, illud

vero actu; non adhuc dubitatio videbitur esse. »

Sed si tu dicas quod Socrates non est unum quid simpliciter, sed unum quid aggregatione motoris et moti; sequuntur multa inconvenientia. Primo quidem, quia si unumquodque est similiter unum et ens, sequetur quod Socrates non sit aliquid, et quod non sit in specie nec in genere, et ulterius quod non habeat aliquam actionem, quia actio non est nisi entis. Unde non dicimus quod intelligere nautæ sit intelligere hujus totius quod est nauta et navis, sed nautæ tantum; et similiter intelligere non erit actus Socratis, sed intellectus tantum utentis corpore Socratis. In solo enim toto quod est aliquid unum et ens, actio partis est actio totius. Et si quis aliter loquitur, improprie loquitur. Et si tu dicas quod hoc modo cælum intelligit per motorem suum, est assumptio difficilioris materiæ. Per intellectum enim humanum oportet nos devenire ad cognoscendum intellectus superiores, et non e converso. Si vero dicatur quod hoc individuum quod est Socrates, est corpus animatum anima vegetativa et sensitiva, ut videtur sequi secundum eos qui ponunt quod hic homo non constituitur in specie per intellectum, sed per animam sensitivam nobilitatam ex aliqua instructione intellectus possibilis; tunc intellectus non se habet ad Socratem nisi sicut movens ad motum. Sed secundum hoc, actio intellectus quæ est intelligere, nullo modo poterit attribui Socrati: quod multipliciter apparet.

Primo quidem per hoc quod dicit Philosophus in II *Metaphysic.*, quod « quorum diversum est aliquod opus præter actionem, actio est in eo quod fit, ut ædificatio in ædificato, et contextio in contexto: similiter autem et in aliis, et totaliter ut motus in moto. Quorum vero non est aliud aliquod opus præter actionem, in eis existit actio, ut visio in vidente, et speculatio in speculante, » Sic ergo etsi intellectus ponatur uniri Socrati ut movens, nihil proficit ad hoc quod intelligere sit in Socrate, nec quod Socrates intelligat: quia intelligere est actio quæ est in intellectu tantum. Ex quo etiam patet falsum esse quod dicunt quod intellectus non est actus corporis, sed ipsum intelligere. Non enim potest esse alicujus actus intelligere, cujus non sit actus intellectus:

quia intelligere non nisi in intellectu est, sicut nec visio nisi in visu: unde nec visio potest esse alicujus nisi illius cujus actus est visus. Secundo, quia actio moventis propria non attribuitur instrumento aut moto; sed magis e converso actio instrumenti attribuitur principali moventi; non enim potest dici quod serra disponat de artificio; potest tamen dici quod artifex secat quod est opus serræ. Propria autem operatio ipsius intellectus est intelligere: unde, dato etiam quod intelligere esset actio transiens in alterum, sicut movere, non sequeretur quod intelligere conveniret Socrati, si intellectus uniatur ei solum ut motor. Tertio, quia in his quorum actiones in alterum transeunt, opposito modo attribuuntur actiones moventibus et motis. Secundum ædificationem enim ædificator dicitur ædificare, ædificium vero ædificari. Si ergo intelligere esset actio in alterum transiens, sicut movere; adhuc non esset dicendum quod Socrates intelligeret ad hoc quod intellectus uniretur ei ut motor; sed magis quod intellectus intelligeret, et Socrates intelligeretur; aut forte quod intellectus intelligendo moveret Socratem, et Socrates moveretur. Contingit tamen quandoque quod actio moventis traducitur in rem motam, puta cum ipsum motum movet ex eo quod movetur, ut calefactum calefacit. Posset ergo aliquis sic dicere quod motum ab intellectu, qui intelligendo movet, ex hoc ipso quod movetur intelligit.

Huic autem dicto Aristoteles resistit in II *De anima*, unde principium hujus rationis assumpsimus. Cum enim dixisset quod id quo primo scimus et sanamur, est forma, scilicet scientia et sanitas, subjungit: « Videntur enim in patiente et disposito activorum inesse actus: » quod exponens Themistius dicit: « Nam etsi ab aliis aliquando scientia et sanitas est, puta a docente et medico; tamen in patiente et disposito facientium inexistere actus ostendimus prius in his quæ de natura. » Est ergo intentio Aristotelis, et evidenter est verum quod quando motum movet, et habet actionem moventis, oportet quod insit ei actus aliquis a movente, qui hujusmodi actionem habeat: et hoc est principium quo agit, et est actus et forma ejus, sicut si aliquid est calefactum, calefacit per calorem, qui inest ei a calefaciente. Detur ergo quod intellectus moveat animam Socra-

tis vel illustrando, vel quocumque modo; hoc quod est relictum ab impressione intellectus in Socrate, est primum quo Socrates intelligit. Id autem quo Socrates primo intelligit, sicut sensu sentit, Aristoteles probavit esse in potentia omnia, et per hoc non habere naturam determinatam, nisi hanc quod sit possibilis, et per consequens quod non misceatur corpori, sed sit separatus. Dato ergo quod sit aliquis intellectus separatus movens Socratem, tamen adhuc oportet quod ille intellectus possibilis, de quo Aristoteles loquitur, sit in anima Socratis, sicut et sensus, qui est in potentia ad omnia sensibilia, quo Socrates sentit. Si autem dicatur quod hoc individuum quod est Socrates, non est aliquid compositum ex intellectu et corpore animato, neque est corpus animatum tantum, sed est solum intellectus; hæc jam erit opinio Platonis, qui, ut Gregorius Nyssenus refert, propter hanc difficultatem non vult hominem ex anima et corpore esse, sed animam corpore utentem, et velut indutam corpore. Sed et Plotinus, ut Macrobius refert, ipsam animam hominem esse testatur, sic dicens: « Qui videtur, non ipse verus homo est, sed ille a quo regitur quod videtur. Sic cum morte animalis discedit animatio, cadit corpus a regente viduatum; et hoc est quod videtur in homine mortale. Anima vero, quæ est verus homo, est ab omni mortalitatis conditione aliena. » Qui quidem Plotinus nunc de magnis Commentatoribus ponitur inter Commentatores Aristotelis, ut Simplicius refert in commento *Prædicatorum*. Hæc autem sententia nec a verbis Aristotelis videtur discordare. Dicit enim in IX *Ethic.* quod « boni hominis est bonum elaborare etiam sui ipsius gratia: intellectus enim gratia unusquisque esse videtur. » Quod quidem non dicit propter hoc quod homo sit solus intellectus, sed quia id quod est in homine principalius, est intellectus: unde et in sequentibus dicit quod « quemadmodum civitas principalissimum maxime videtur, et omnis alia constitutio, sic et homo; » unde subjungit, « quod unusquisque homo vel est hic, » scilicet intellectus, « vel maxime. » Et per hunc modum arbitror et Themistium in verbis supra positis, et Plotinum in verbis nunc inductis dixisse quod homo est anima vel intellectus. Quod enim homo non sit intellectus tantum vel anima tan-

tum, multipliciter probatur. Primo quidem ab ipso Gregorio Nysseno, qui inducta opinione Platonis, subdit: « Habet autem hic sermo difficile vel indissolubile quid. Qualiter enim unum esse potest indumento anima? Non enim unum est tunica cum induto. » Secundo, quia Aristoteles in VII *Metaph.*, probat quod homo et equus et similia, non sunt solum forma, sed totum quoddam ex forma et materia, ut universale; singulare vero ex ultima materia et forma, ut Socrates. Jam est et in aliis similiter. Et hoc probavit per hoc quod nulla pars corporis potest definiri sine parte aliqua animæ; et recedente anima, nec oculus nec caro dicitur nisi æquivoce: quod non esset, si homo aut Socrates esset tantum intellectus aut anima. Tertio sequeretur quod cum intellectus non moveat nisi per voluntatem, ut probatur in III *De anima*, nec esset subjectum voluntati quod retineret hoc corpus cum vellet, et abjiceret cum vellet: quod manifeste patet esse falsum. Sic igitur patet quod intellectus non unitur Socrati solum ut motor; et quod etiam si hoc esset, nihil proficeret ad hoc quod Socrates intelligeret. Qui ergo hanc positionem defendere volunt, aut confiteantur se nihil intelligere, et indignos esse cum quibus aliqui disputent: aut confiteantur quod Aristoteles concludit, scilicet quod id quo primo intelligimus est species et forma.

Potest etiam hoc concludi ex hoc quod hic homo in aliqua specie collocatur. Speciem autem nunquam sortitur aliquid nisi ex forma. Id igitur per quod hic homo speciem sortitur, est forma. Unumquodque autem ab eo speciem sortitur quod est principium propriæ operationis speciei. Propria autem operatio hominis, in quantum est homo, est intelligere: per hoc enim differt ab aliis animalibus; et ideo in hac operatione Aristoteles felicitatem ultimam constituit. Principium autem quo intelligimus, est intellectus, ut Aristoteles dicit. Oportet igitur ipsum uniri corpori ut formam: non quidem ita quod ipsa intellectiva potentia sit alienius organi actus; sed quia est virtus animæ, quæ est actus corporis physici organici.

Adhuc. Secundum istorum positionem destruantur moralis Philosophiæ principia: subtrahitur enim quidquid est in nobis. Non enim est aliquid in nobis nisi per voluntatem; unde et hoc ipsum vo-

luntarium dicitur quod in nobis est. Voluntas autem in intellectu est, ut patet per dictum Aristotelem in III *De anima*; et per hoc quod in substantiis separatis est intellectus et voluntas; et per hoc etiam quod contingit per voluntatem aliquid in universali amare vel odire, sicut odimus latronum genus, ut Aristoteles dicit in sua *Rhetorica*. Si igitur intellectus non est aliquid hujus hominis, vel non est vere unum cum eo, sed unitur ei solum per phantasmata, vel sicut motor; non erit in hoc homine voluntas, sed in intellectu separato: et ita hic homo non erit dominus sui actus, nec aliquis ejus actus erit laudabilis vel vituperabilis: quod est divellere principia moralis philosophiæ. Quod cum sit absurdum, et vitæ humanæ contrarium (non enim esset necesse consiliari, nec leges ferre) sequitur quod intellectus sic uniatur nobis ut vere ex eo et nobis fiat unum: quod vere non potest esse nisi eo modo quo dictum est, ut sit etiam potentia animæ, quæ unitur nobis ut forma. Relinquitur igitur hic absque omni dubitatione tenendum non<sup>1</sup> propter revelationem fidei, ut dicunt; sed quia hoc subtrahere est niti contra manifeste apparentia.

Rationes vero quas in contrarium adducunt, non difficile est solvere. Dicunt enim quod ex hac positione sequitur quod intellectus sit forma materialis, et non sit denudata ab omnibus naturis rerum sensibilium; et per consequens quidquid recipitur in intellectu, recipitur sicut in materia individualiter, et non universaliter. Et ulterius, quia si est forma materialis quod non est intellecta in actu, et ita intellectus non poterit se intelligere; quod est manifeste falsum; nulla enim forma materialis est intellecta in actu. Horum autem solutio apparet ex his quæ præmissa sunt. Non enim dicimus animam humanam esse formam corporis secundum intellectivam potentiam, quæ secundum doctrinam Aristotelis nullius organi actus est, unde remanet quod anima quantum ad intellectivam potentiam sit immaterialis, et immaterialiter recipiens, et se ipsam intelligens. Unde et Aristoteles signanter dicit de anima quod est locus specierum, non tota, sed intellectus.

Si autem contra hoc objiciatur quod

potentia animæ non potest esse immaterialior aut simplicior quam ejus essentia: optime procederet, si essentia animæ humanæ sic esset forma materiæ, quod non per esse suum esset, sed per esse compositi, sicut est de aliis formis, quæ secundum se nec esse nec operationem habent præter communicationem materiæ, quæ propter hoc immersæ materiæ dicuntur. Anima autem humana, quia secundum suum esse est forma, cui aliquando communicat materia non totaliter comprehendens ipsam, eo quod major est dignitas hujus formæ quam capacitas materiæ; nihil prohibet quin habeat aliquam operationem vel virtutem, ad quam materia non attingit.

Consideret autem qui hoc dicit quod si hoc intellectivum principium, quo nos intelligimus, esset secundum esse separatum et distinctum ab anima, quæ est corporis nostri forma, esset secundum se intelligens et intellectum; nec quandoque intelligeret, quandoque non: neque etiam indigeret ut se ipsum cognosceret per intelligibilia et per actus, sed per essentiam suam, sicut aliæ substantiæ separatae: neque etiam esset conveniens quod ad intelligendum indigeret phantasmatis nostris. Non enim invenitur in rerum ordine quod superiores substantiæ ad suas principales perfectiones indigeant inferioribus substantiis, sicut nec corpora cœlestia formantur aut perficiuntur ad suas operationes ex corporibus inferioribus. Magnam igitur improbitatem continet sermo dicentis quod intellectus sit quoddam principium secundum substantiam separatum, et tamen quod per species a phantasmatis acceptas perficiatur, et fiat actu intelligens.

## CAPUT VI.

*Ubi ostenditur quod intellectus possibilis non est unus omnibus.*

His igitur consideratis quantum ad id quod ponunt, intellectum non esse animam, quæ est nostri corporis forma, neque partem ipsius, sed aliquid secundum substantiam separatum; considerandum restat de hoc quod dicunt, intellectum possibilem esse unum in omnibus. Forte

<sup>1</sup> Parm. omittit: « non, » et dicit in notula: Forte: « sic absque dubitatione tenendum non

solum propter etc. »



enim de agente hoc dicere, aliquam rationem haberet, et multi philosophi hoc posuerunt : nihil enim videtur inconueniens sequi, si ab uno agente multa perficiantur, quemadmodum ab uno sole perficiuntur omnes potentiae visivæ animalium ad videndum; quamvis etiam hoc non sit secundum intentionem Aristotelis, qui ponit intellectum agentem esse aliquid in anima, unde comparat ipsum lumini. Plato autem ponens intellectum unum separatum, comparavit ipsum soli, ut Themistius dicit : est enim unus sol, sed plura lumina diffusa a sole ad videndum. Sed quidquid sit de intellectu agente, dicere intellectum possibilem esse unum omnium hominum, multipliciter impossibile apparet.

Primo quidem, quia si intellectus possibilis est quo intelligimus, necesse est dicere quod homo singularis intelligens vel sit ipse intellectus, vel intellectus formaliter ei inhæreat, non quidem ita quod sit forma corporis, sed quia est virtus animæ, quæ est forma corporis.

Si quis autem dicat quod hic homo singularis est ipse intellectus, consequens est quod hic homo singularis non sit alius ab illo homine singulari; et quod omnes homines sint unus homo, non quidem participatione speciei, sed secundum unum individuum. Si vero intellectus inest nobis formaliter, sicut jam dictum est, sequitur quod diversorum corporum sunt diversæ animæ. Sicut enim homo est ex corpore et anima; ita hic homo, scilicet Callias aut Socrates, est ex hoc corpore et ex hac anima. Si autem animæ sunt diversæ, et intellectus possibilis est virtus animæ, qua anima intelligit; oportet quod differat numero, quia nec fingere possibile est quod diversarum rerum sit una numero virtus.

Si quis autem dicat quod homo intelligit per intellectum possibilem sicut per aliquid sui quod tamen est pars ejus non ut forma, sed sicut motor; jam ostensum est supra quod hac positione facta, nullo modo potest dici quod Socrates intelligat. Sed demus quod Socrates intelligit per hoc quod intellectus intelligit, licet intellectus sit solum motor, sicut homo videt per hoc quod oculus videt. Et ut similitudinem sequamur, ponatur

quod omnium hominum sit unus oculus numero : inquirendum restat utrum omnes homines sint unus videns, vel multi videntes. Ad cuius veritatis inquisitionem considerare oportet, quod aliter se habet de primo movente, et aliter de instrumento. Si enim multi homines utantur uno et eodem instrumento numero, dicentur multæ operationes; puta cum multi utuntur una machina ad lapidum projectionem vel elevationem. Si vero principale agens sit unum quod utatur multis instrumentis, nihilominus operans est unum, sed forte operationes diversæ propter diversa instrumenta. Aliquando autem est operatio una, licet ad eam multa instrumenta requirantur. Sic igitur unitas operantis attenditur non secundum instrumenta, sed secundum principale agens quod utitur instrumentis. Prædicta igitur positione facta, si oculus esset principale in homine, qui uteretur omnibus potentiis animæ et partibus corporis quasi instrumentis, multi habentes unum oculum essent unus videns. Si ergo oculus non sit principale hominis, sed aliquid sit in eo principalius quod utitur oculo quod diversificatur in diversis; essent quidem multi videntes, sed uno oculo. Manifestum est autem quod intellectus est id quod est principale in homine, et utitur omnibus potentiis animæ et membris corporis tamquam organis : propter hoc Aristoteles subtiliter dixit quod « homo est intellectus maxime. » Si igitur sit unus intellectus omnium, ex necessitate sequitur quod sit unus intelligens, et per consequens unus volens, et unus utens pro suæ voluntatis arbitrio omnibus illis secundum quæ homines diversificantur ad invicem. Et ex hoc ulterius sequitur quod nulla differentia sit inter homines quantum ad liberam voluntatis electionem, sed eadem sit omnium; si intellectus, apud quem solum residet principalitas et dominium utendi omnibus aliis, est unus et idem in diversis hominibus : quod est manifeste falsum et impossibile. Repugnat enim his quæ apparent, et destruit totam scientiam moralem, et omnia quæ pertinent ad conversationem <sup>1</sup> civilem, quæ est omnibus naturalis, ut Aristoteles dicit.

Adhuc. Si omnes homines intelligunt

<sup>1</sup> Al. : « ad conservationem. »



uno intellectu, qualitercumque eis unia-  
tur, aut ut forma, sive ut motor; de  
necessitate sequitur quod omnium ho-  
minum sit unum numero ipsum intelli-  
gere quod est simul et respectu unius  
intelligibilis; puta, si ego intelligo lapi-  
dem, et tu similiter, oportebit quod una  
et eadem sit intellectualis operatio et  
mei et tui. Non enim potest esse ejusdem  
activi principii, sive sit forma, sive sit  
motor, respectu ejusdem objecti, nisi  
una numero operatio ejusdem speciei in  
eodem tempore : quod manifestum est  
ex his quæ Philosophus determinat in  
V *Phys.* Unde, si essent multi homines  
habentes unum oculum, omnium visio  
non esset nisi una respectu ejusdem ob-  
jecti in eodem tempore. Similiter ergo si  
intellectus sit unus omnium, sequitur  
quod omnium hominum idem intelli-  
gentium eodem tempore sit una actio in-  
tellectualis tantum; et præcipue, cum  
nihil eorum secundum quæ ponuntur  
homines differre ab invicem, in opera-  
tione intellectuali diversificetur. Phan-  
tasmata enim præambula sunt actioni  
intellectus, sicut colores actioni visus :  
unde per eorum diversitatem non diver-  
sificatur actio intellectus, maxime unius  
intelligibilis; secundum quæ tamen po-  
nunt diversificari scientiam hujus a scien-  
tia alterius, inquantum hic intelligit ea  
quorum phantasmata habet, et ille ea  
quorum phantasmata habet. Sed in duo-  
bus qui idem sciunt et intelligunt, ipsa  
operatio intellectualis per diversitatem  
phantasmatis nullatenus diversificari po-  
test.

Adhuc autem ostendendum est quod  
hæc positio manifeste apparet repugnans  
dictis Aristotelis. Cum enim dixisset de  
intellectu possibili quod est separatus,  
et quod est in potentia omnia, subjungit  
quod « cum sic singula sciat, » scilicet  
in actu, « ut sciens dicitur qui secundum  
actum, » idest hoc modo sicut scientia  
est actus, et sicut sciens dicitur esse in  
actu inquantum habet habitum : unde  
subdit : « Hoc autem confestim accidit,  
cum possit operari per se ipsum. Est  
quidem igitur et tunc potentia quodam-  
modo, non tamen similiter sicut ante  
addiscere aut invenire. » Et postea cum  
quæsivisset : « Si intellectus simplex est  
et impassibilis, et nulli nihil habet com-  
mune, sicut dixit Anaxagoras ; quomodo  
intelliget, si intelligere pati aliquid est ? »  
Et ad hoc solvendum respondet dicens :

« Quoniam potentia quodammodo est  
intelligibilia intellectus, sed actu nihil  
antequam intelligat. Oportet autem sit,  
sicut in tabula nihil est actu scriptum :  
quod quidem accidit in intellectu. » Est  
ergo sententia Aristotelis quod intellec-  
tus possibilis ante addiscere aut invenire  
est in potentia, sicut tabula in qua nihil  
est actu scriptum; sed post addiscere et  
invenire secundum habitum scientiæ,  
quo potest per se ipsum operari, quam-  
vis et tunc sit in potentia ad considerare  
in actu.

Ubi tria notanda sunt. Primo quod ha-  
bitus scientiæ est actus primus ipsius  
intellectus possibilis, qui secundum hunc  
fit actu, et potest per se ipsum operari.  
Non autem scientia est solum secundum  
phantasmata illustrata, ut quidam dicunt,  
et quædam facultas quæ in nobis acqui-  
ritur ex frequenti meditatione et exerci-  
tio, ut continuemur cum intellectu pos-  
sibili per nostra phantasmata. Secundo  
notandum quod ante nostrum addiscere  
et invenire, ipse intellectus possibilis  
est in potentia, sicut tabula in qua nihil  
est scriptum. Tertio quod per nostrum  
addiscere seu invenire, ipse intellectus  
possibilis fit actu. Hæc autem nullo  
modo possunt stare, si sit unus intellec-  
tus possibilis omnium qui sunt et erunt  
aut fuerunt. Manifestum est enim quod  
species conservantur in intellectu ; est  
enim locus specierum, ut Philosophus  
supra dixerat, et iterum scientia est ha-  
bitus permanens. Si ergo per aliquem  
præcedentium hominum factus est in actu  
secundum aliquas species intelligibiles  
et perfectus secundum habitum scientiæ,  
ille habitus et illæ species in eo reman-  
ent. Cum autem omne recipiens sit de-  
nudatum ab eo quod recipit, impossibile  
est quod per meum addiscere aut inve-  
nire illæ species acquirantur in intellectu  
possibili.

Et si tamen aliquis dicat quod secun-  
dum nostrum invenire, intellectus pos-  
sibilis secundum aliquid fiat in actu de  
novo, puta si aliquid intelligibilium in-  
venio quod a nullo præcedentium est  
inventum ; tamen in addiscendo hoc con-  
tingere non potest : non enim possum  
addiscere nisi quod docens scivit. Frustra  
ergo dixit quod ante addiscere aut inve-  
nire, intellectus erat in potentia.

Sed et si quis addat, homines semper  
fuisse, secundum opinionem Aristotelis ;  
sequeretur quod non fuerit primus homo

intelligens : et sic per phantasmata nullius species intelligibiles sunt acquisitæ, in intellectu possibili, sed sunt species intelligibiles intellectus possibilis æternæ. Frustra ergo Aristoteles posuit intellectum agentem, qui faceret intelligibilia in potentia, intelligibilia actu. Frustra etiam posuit quod phantasmata se habent ad intellectum possibilem sicut colores ad visum, si intellectus possibilis nihil a phantasmatibus accipit. Quamvis et hoc ipsum irrationabile videatur quod substantia separata a phantasmatibus nostris accipiat, et quod non possit se intelligere nisi post nostrum addiscere aut invenire, sive intelligere : quia Aristoteles post verba præmissa subjungit : « Et ipse tunc se ipsum potest intelligere post addiscere aut invenire. » Substantia enim separata per se ipsam est intelligibilis : unde per suam essentiam se intelligeret intellectus possibilis, si esset substantia separata ; nec indigeret ad hoc speciebus intelligibilibus ei supervenientibus per nostrum intelligere aut invenire.

Si autem hæc inconvenientia velint evadere dicendo quod omnia prædicta Aristoteles dicit de intellectu possibili secundum quod continuatur nobis, et non secundum quod in se est : primo quidem dicendum est quod verba Aristotelis hoc non sapiunt ; immo de ipso intellectu possibili loquitur secundum id quod est proprium sibi, et secundum quod distinguitur ab agente. Si vero fiat vis de verbis Aristotelis ; ponamus, ut dicunt quod intellectus possibilis ab æterno habuerit species intelligibiles, per quas continetur nobis secundum phantasmata quæ sunt in nobis. Oportet enim ut species intelligibiles quæ sunt in intellectu possibili, et phantasmata quæ sunt in nobis, aliquo horum trium modorum se habeant. Quorum unus est quod species intelligibiles quæ sunt in intellectu possibili, sint acceptæ a phantasmatibus quæ sunt in nobis, ut sonant verba Aristotelis : quod non potest esse secundum prædictam positionem, ut ostensum est. Secundus autem modus est ut illæ species non sint acceptæ a phantasmatibus, sed sint irradiantes super phantasmata nostra ; puta si species aliquæ essent in oculo irradiantes super colores qui sunt in pariete. Tertius autem modus est ut neque species intelligibiles quæ sunt in intellectu possibili, sint acceptæ a phantasmatibus, neque imprimant aliquid

supra phantasmata. Si autem ponatur secundum, scilicet quod species intelligibiles illustrent phantasmata, et secundum hoc intelligantur : primo quidem sequitur quod phantasmata fiunt intelligibilia actu non per intellectum agentem, sed per intellectum possibilem secundum suas species. Secundo quod talis irradiatio phantasmatum non poterit facere quod phantasmata sint intelligibilia actu : non enim fiunt phantasmata intelligibilia actu nisi per abstractionem ; hæc autem magis erit receptio quam abstractio. Et iterum cum omnis receptio sit secundum naturam recepti, irradiatio specierum intelligibilium, quæ sunt in intellectu possibili, non erit in phantasmatibus quæ sunt in nobis, intelligibiliter, sed sensibiliter et materialiter ; et sic non poterimus intelligere universale per hujusmodi irradiationem. Si autem species intelligibiles intellectus possibilis neque accipiuntur a phantasmatibus, neque irradiant super ea ; erunt omnino disparatæ, et nihil proportionale habentes, nec phantasmata aliquid facient ad intelligendum : quod manifeste veritati repugnat.

Sic igitur omnibus modis impossibile est quod intellectus possibilis sit unus tantum omnium hominum.

## CAPUT VII.

### *Rationes ponentium unitatem intellectus et earum solutiones.*

Restat autem nunc solvere ea quibus pluralitatem intellectus possibilis nituntur excludere.

Quorum primum est, quod omne quod multiplicatur secundum divisionem materiæ, est forma materialis : unde substantiæ separatae a materia non sunt plures in una specie. Si ergo plures intellectus essent in pluribus hominibus qui dividuntur ad invicem numero per divisionem materiæ, sequeretur ex necessitate quod intellectus esset forma materialis : quod est contra verba Aristotelis, et probationem illius, qua probat quod intellectus est separatus. Si ergo est separatus, et non est forma materialis, nullo modo multiplicatur secundum multiplicationem corporum. Huic autem rationi tantum innituntur, quod dicunt, quod Deus non posset facere plures in-

tellectus unius speciei in diversis hominibus : dicunt enim, quod hoc implicaret contradictionem, quia habere materiam ut numeraliter multiplicetur, est aliud a natura formæ separatæ. Procedunt autem ulterius, ex hoc concludere volentes quod nulla forma separata est una numero, nec aliquid individuum : quod dicunt ex ipso vocabulo apparere, quia non est unum numero nisi quod est unum de numero : forma autem liberata a materia non est unum de numero, quia non habet in se causam numeri, eo quod causa numeri est a materia.

Sed ut a posterioribus incipiamus, videntur vocem propriam ignorare in hoc quod ultimo dictum est. Dicit enim Aristoteles in IV *Metaphysic.*, quod cujusque substantiæ unum est esse non secundum accidens, et quod nihil est aliud unum præter ens. Substantia ergo separata si est ens, secundum suam substantiam est una, præcipue cum Aristoteles dicat in VIII *Metaphysic.*, quod ea quæ non habent materiam, non habent causam ut sint unum et ens. Unum autem in V *Metaphysic.*, dicitur quadrupliciter : scilicet numero, specie, genere, et proportione. Nec est dicendum quod aliqua substantia separata sit unum tantum specie vel genere, quia hoc non est esse simpliciter unum. Relinquitur ergo quod quælibet substantia separata sit unum numero. Nec dicitur aliquid unum numero quia sit unum de numero : non enim numerus est causa unius, sed e converso, quia in numerando non dividitur : unum enim est id quod non dividitur. Nec iterum hoc verum est quod omnis numerus causatur a materia : frustra enim Aristoteles quævisset numerum substantiarum separatarum. Ponit etiam Aristoteles in V *Metaphysic.*, quod multum dividitur non solum numero, sed etiam specie et genere. Nec etiam hoc verum est quod substantia separata non sit singularis et individuum aliquod; alioquin non haberet aliquam operationem, cum actus sint solum singularium, ut Philosophus dicit : unde contra Platonem dicit in VII *Metaphysic.*, quod si ideæ sint separatæ, non prædicabitur de multis idea, nec poterit definiri, sicut nec alia individua quæ sunt unica in sua specie, ut sol et luna. Non enim materia est principium individuationis in rebus materialibus nisi in quantum materia non est participabilis a pluribus, cum sit primum subjectum non

existens in alio. Unde et de idea Aristoteles dicit, quod si idea esset separata, esset quædam substantia individua, quam impossibile esset prædicari de multis. Individuæ ergo sunt substantiæ separatæ, et singulares; non autem individuantur ex materia, sed ex hoc ipso quod non sunt natæ in alio esse, et per consequens nec participari a multis. Ex quo sequitur quod si aliqua forma nata est participari ab aliquo, ita quod sit actus alicujus materiæ illa potest individuari et multiplicari per comparisonem ad materiam. Jam autem supra ostensum est quod intellectus est unitus animæ, quæ est actus corporis. In multis igitur corporibus sunt multæ animæ, et in multis animabus sunt multæ virtutes intellectuales, quæ vocantur intellectus; nec propter hoc sequitur quod intellectus sit virtus materialis, ut supra ostensum est.

Si quis autem objiciat, quod si multiplicantur secundum corpora, sequitur quod destructis corporibus non remanent multæ animæ; patet solutio per ea quæ dicta sunt. Unumquodque enim sic est ens sicut est unum, ut dicitur in IV *Metaphysic.* Sicut igitur esse animæ est quidem in corpore, in quantum est forma corporis, nec est ante corpus, destructo tamen corpore adhuc remanet in suo esse; ita unaquæque anima remanet in sua unitate, et per consequens multæ animæ in sua multitudine.

Valle autem ruditer argumentantur ad ostendendum quod Deus facere non posset quod sint multi intellectus ejusdem speciei, credentes hoc includere contradictionem. Dato enim quod non esset natura intellectus quod multiplicaretur, non propter hoc oporteret quod intellectum multiplicari includeret contradictionem. Nihil enim prohibet aliquid non habere in sua natura causam alicujus, quod tamen habet illud ex alia causa : sicut grave habet ex sua natura quod non sit sursum; tamen grave esse sursum non includit contradictionem; sed grave esse sursum secundum suam naturam, contradictionem includeret. Si ergo intellectus si naturaliter esset unus omnium quia non haberet naturalem causam multiplicationis, posset tamen sortiri multiplicationem ex supernaturali causa : nec esset implicatio contradictionis. Quod non tantum dicimus propter propositum; sed magis ne hæc argumentandi forma ad alia extendatur : sic enim possent

concludere quod Deus non potest facere quod mortui resurgant, et quod cæci ad visum reparantur.

Adhuc autem ad munimentum sui erroris aliam rationem inducunt. Quærent enim, utrum intellectum in me et in te sit unum penitus, aut duo in numero et unum in specie. Si enim unum intellectum, tunc unus erit intellectus; si duo in numero et unum specie, sequitur quod intellecta habebunt rem intellectam. Quæcumque enim sunt duo in numero et unum in specie, sunt unum intellectum, quia est una quidditas per quam intelliguntur: et sic procedetur in infinitum; quod est impossibile. Ergo impossibile est quod sint duo intellecta numero in me et in te. Est ergo unum tantum, et unus intellectus numero tantum in omnibus hominibus.

Quærendum est autem ab his qui tam subtiliter se argumentari putant, utrum esse duo intellecta in numero et unum in specie, sit contra rationem intellecti in quantum est intellectum, aut in quantum est intellectum ab homine. Et manifestum est secundum rationem quam ponunt quod hoc est contra rationem intellecti, in quantum est intellectum. De ratione autem intellecti in quantum hujusmodi, est quod non indigeat quod ab eo aliquid abstrahatur ad hoc quod sit intellectum. Ergo secundum eorum rationem simpliciter concludere possumus, quod sit unum intellectum tantum, et non solum unum intellectum ab omnibus. Et si est unum intellectum tantum, secundum eorum rationem sequitur quod sit unus tantum intellectus in toto mundo, et non solum in hominibus. Ergo intellectus noster non solum est substantia separata, sed etiam est ipse Deus: et universaliter tollitur pluralitas substantiarum separatarum.

Si quis autem vellet respondere quod intellectum ab una substantia separata et intellectum ab alia non est unum specie, quia intellectus differunt specie; seipsum deciperet: quia id quod intelligitur, comparatur ad intelligere et ad intellectum sicut objectum ad actum et potentiam: objectum autem non recipit speciem ab actu neque a potentia, sed magis e converso. Est ergo simpliciter concedendum, quod intellectum unius rei, puta lapidis, est unum tantum, non solum in omnibus hominibus, sed etiam in omnibus intellectibus.

Sed inquirendum restat, quid sit in-

tellectum. Si enim dicant quod intellectum est una species immaterialis existens in intellectu possibili; latet ipsos quod quodammodo transeunt in dogma Platonis, qui posuit quod de rebus sensibilibus nulla scientia potest haberi, sed omnis scientia habetur de forma una separata. Nihil enim refert ad propositum, utrum aliquis dicat quod scientia quæ habetur de lapide, habetur de una forma lapidis separata, aut de una forma lapidis quæ est in intellectu: utrobique enim sequitur quod scientiæ non sunt de rebus quæ sunt hic, sed de rebus separatis solum. Sed quia Plato posuit hujusmodi formas immateriales per se subsistentes, poterat etiam cum hoc ponere plures intellectus participantes ab una forma separata unius veritatis cognitionem. Isti autem qui ponunt hujusmodi forma immateriales, quas dicunt esse intellecta, necesse habent ponere quod sit unus intellectus tantum non solum omnium hominum sed etiam simpliciter.

Est ergo dicendum secundum sententiam Aristotelis quod intellectum quod est unum, est ipsa natura vel quidditas rei. De rebus enim est scientia naturalis et aliæ scientiæ, non de speciebus intellectis. Si enim intellectum esset non ipsa natura lapidis quæ est in rebus, sed species quæ est intellectu; sequeretur quod ego non intelligerem rem quæ est lapis, sed solum intentionem quæ est abstracta a lapide. Sed verum est quod lapidis natura, prout est in singularibus, est intellecta in potentia; sed intellecta in actu per hoc quod species a rebus sensibilibus mediantibus sensibus usque adphantasiam perveniunt, et per virtutem intellectus agentis species intelligibiles abstrahuntur, quæ sunt in intellectu possibili. Hæ autem species non se habent ad intellectum possibilem ut intellecta, sed sicut species quibus intellectus intelligit; sicut etiam species quæ sunt in visu, non sunt ipsa visa, sed ea quibus visus videt; nisi in quantum intellectus reflectitur supra se ipsum, quod in sensu accidere non potest. Si autem intelligere esset actio transiens in exteriorem materiam, sicut comburere et movere, sequeretur quod intelligere esset secundum modum quo natura realiter habet esse in singularibus, sicut combustio ignis est secundum modum combustibilis. Sed quia intelligere est actio in ipso intelligente manens, ut Aristoteles dicit IX *Metaphy-*



*sic.*, sequitur quod intelligere sit secundum modum intelligentis, idest secundum exigentiam speciei qua intellectus intelligit. Hæc autem cum sit abstracta a principiis individuantes, non repræsentat rem secundum conditiones individuales secundum naturam universalem tantum. Nihil enim prohibet, si aliqua duo conjunguntur in re, quin unum eorum repræsentari possit etiam in sensu sine altero : unde color mellis vel pomi videtur a visu sine ejus sapore. Sic igitur intellectus intelligit naturam universalem per abstractionem ab individualibus principiis. Est ergo unum quod intelligitur a me et a te; sed alio intelligitur a me, et alio a te, idest alia specie intelligibili; et aliud est intelligere meum, et aliud tuum; et alius est intellectus meus, et alius tuus. Unde et Aristoteles in *Prædicamentis* dicit, aliquam scientiam esse singularem quantum ad subjectum, ut quædam grammatica in subjecto quidem est in anima, de subjecto vero nullo dicitur. Unde et intellectus meus quando intelligit se intelligere, intelligit quemdam singularem actum; quando autem intelligit intelligere simpliciter, intelligit aliquid universale : non enim singularitas repugnat intelligibilitati, sed materialitas. Unde cum sint aliqua singularia immaterialia, sicut de substantiis separatis supra dictum est, nihil prohibet hujusmodi singularia intelligi. Ex hoc autem apparet quomodo sit eadem scientia in discipulo, et doctore. Est enim eadem quantum ad rem scitam, non tamen quantum ad species intelligibiles quibus uterque intelligit : quantum enim ad hoc individuatur scientia in me et in illo; nec oportet quod scientia quæ est in discipulo, causetur a scientia quæ est in magistro, sicut calor aquæ a colore ignis, sed sicut sanitas quæ est in materia, a sanitate quæ est in anima medici. Si enim in infirmo est principium naturale sanitatis, cui medicus auxilia subministrat ad sanitatem perficiendam; ita in discipulo est principium naturale scientiæ, scilicet intellectus agens, et prima principia per se nota. Doctor autem subministrat quædam adminicula, deducendo consequens ex principiis per se notis : unde et medicus nititur sanare eo modo quo natura sanaret, scilicet calefaciendo et frigidando; et magister eodem modo inducit ad scientiam quo inveniens per se ipsum scientiam acquireret, procedendo scilicet

de notis ad ignota : et sicut sanitas in infirmo fit non secundum potestatem medici, sed secundum facultatem naturæ; ita et scientia causatur in discipulo non secundum virtutem magistri, sed secundum facultatem addiscentis.

Quod autem ulterius objiciunt, quod si remanerent plures substantiæ intellectuales destructis corporibus, sequeretur quod essent otiosæ; sicut Aristoteles in II *Metaph.*, argumentatur, quod si essent substantiæ separatæ non moventes corpus, essent otiosæ : si bene *Litteram* Aristotelis considerassent, de facili possent dissolvere. Nam Aristoteles antequam hanc rationem inducat, præmittit : « Quare et substantias et principia immobilia tot esse, rationale est suscipere : necessarium enim dimittatur fortioribus dicere. » Ex quo patet quod ipse probabilitatem quamdam sequitur, non necessitatem inducit. Deinde, cum otiosum sit quod non pertingit ad finem ad quem est, non potest dici etiam probabiliter, quod substantiæ separatæ essent otiosæ, si non moverent corpora; nisi forte dicatur, quod motus corporum sint fines substantiarum separatarum, quod est omnino impossibile, cum finis sit potior his quæ sunt ad finem. Unde nec Aristoteles inducit quod essent otiosæ si non moverent corpora, sed quod « omnem substantiam impassibilem se eundum se optimum finem sortitam esse oportet æstimare. » Est enim perfectissimum uniuscujusque rei ut non solum sit in se bonum, sed ut bonitatem in aliis causet. Non erat autem manifestum qualiter substantiæ separatæ causarent bonitatem in inferioribus nisi per motum aliquorum corporum. Unde ex hoc Aristoteles quamdam probabilem rationem assumit ad ostendendum quod non sunt aliquæ substantiæ separatæ nisi quæ per motus cœlestium corporum manifestantur; quamvis hoc necessitatem non habeat, ut ipsemet dicit. Concedimus autem quod anima humana a corpore separata non habet ultimam perfectionem suæ naturæ, cum sit pars naturæ humanæ : nulla enim pars habet omnimodam perfectionem, si a toto separetur. Non autem propter hoc est frustra; quia non est animæ humanæ finis movere corpus, sed intelligere, in quo est sua felicitas, ut Aristoteles probat in X *Ethic.*

Objiciunt etiam ad sui erroris assertionem, quod si intellectus essent plures plurium hominum, cum intellectus sit incor-



ruptibilis, sequeretur quod actu essent infiniti intellectus, secundum positionem Aristotelis, qui mundum æternum et homines semper fuisse.

Ad hanc autem objectionem sic respondet Algazel in sua *Metaphysica*: dicit enim quod « in quocumque fuerit unum istorum sine alio, idest quantitas vel multitudo sine ordine, infinitas non removebitur ab eo, sicut a motu cœli; » et postea subdit: « Similiter etiam animas humanas quæ sunt separabiles a corporibus per mortem, concedimus esse infinitas numero, quamvis habeant esse simul: quoniam non est inter eas ordinatio naturalis, qua remota desinant esse animæ, eo quod nullæ earum sunt causæ aliis; sed simul sunt sine prius et posterius, natura et situ. Non enim intelligitur in eis prius et posterius secundum tempus creationis suæ. In essentiis autem earum secundum quod sunt essentiæ, non est ordinatio ullo modo, sed sunt æquales in esse, e contrario spatiis et corporibus, et causæ et causato. »

Quomodo autem hæc Aristoteles solveret, a nobis sciri non potest, quia illam partem *Metaphysicæ* non habemus quam fecit de substantiis separatis. Dicit enim Philosophus in II *Physic.*, quod de fermis quæ sunt separata, in materia autem, inquantum sunt separabiles, considerare, est opus Philosophiæ primæ. Quicquid autem circa hoc dicatur, manifestum est quod ex hoc nullam angustiam Catholici patiuntur, qui ponunt mundum incepisse.

Patet autem falsum esse quod dicunt, hoc fuisse principium apud omnes philosophantes, et Arabes et Peripateticos, quod intellectus non multiplicaretur numeraliter, licet apud Latinos non. Algazel enim Latinus non fuit, sed Arabs; Avicenna etiam, qui Arabs fuit, in suo libro *De anima* sic dicit: « Prudentia et stultitia et opinio et alia his similia, non sunt nisi in essentia animæ. » Ergo anima non est una, sed sunt multa numero, et ejus species una est. Et ut Græcos non omittamus, ponenda sunt circa hoc verba Themistii in commento *De anima* lib. III, cap. xxxii, juxta edit. Barb. Cum enim

quæsiisset de intellectu agente utrum sit unus aut plures, subjungit solvens<sup>1</sup>: Ergo patet per verba Themistii, quod nec intellectus agens, de quo Aristoteles loquitur, est unus, qui est illustrans; nec etiam possibilis, qui est illustratus; sed verum est quod principium illustrationis est unum, scilicet aliqua substantia separata, vel Deus secundum Catholicos, vel intelligentia ultima secundum Avicennam. Unitatem autem hujus principii separati probat Themistius per hoc quod docens et addiscens idem intelligit: quod non esset, nisi esset idem principium illustrans. Sed verum est quod postea dicit, quosdam dubitasse de intellectu possibili utrum sit unus. Nec circa hoc plus loquitur, quia non erat intentio ejus tangere diversas opiniones Philosophorum, sed exponere sententiam Aristotelis, Platonis et Theophrasti: unde in fine concludit: « Quod dixi pronunciare quidem de eo quod dicit Philosophus, singularis est studii et sollicitudinis. Quod autem maxime aliquis utique ex verbis quæ collegimus, accipiat de his sententiam Aristotelis et Theophrasti, magis autem ipsius Platonis, hoc promptum est propalare. Ceterum quærere quid quisque de anima senserit, et loci et curæ alterius est. At quamnam fuerit opinio Aristotelis, quæ Theophrasti, et quæ etiam Platonis, facile arbitror « colligi posse ex verbis his quæ supra de libris eorum prompsimus præteximusque. » Ergo patet quod Aristoteles et Theophrastus et ipse Plato non habuerunt pro principio, quod intellectus possibilis sit unus in omnibus. Patet etiam quod Averroes perverse refert sententiam Themistii et Theophrasti de intellectu possibili et agente: unde merito supra diximus eum Philosophiæ Peripateticæ perversorem. Unde mirum est quomodo aliqui solum commentum Averrois videntes, pronuntiare præsumunt, quod ipse dicit, hoc sensisse omnes Philosophos Græcos et Arabes, præter Latinos. Est etiam majori admiratione, vel etiam indignatione dignum, quod aliquis Christianum se profitens tam irreverenter de chris-

<sup>1</sup> Al. ex citata translatione: « An primus quidem intellectum illuminantem credi unum oportet, illuminatos vero, et subinde illuminantes multos? Quemadmodum quamquam sol est unus, tamen lux quæ de sole prodit et mittitur, quasi abjungitur ab eo et divellitur, atque ita in multo obtutus distrahitur distribuiturque. Quamobrem

Aristoteles intellectum non soli, sed lumini comparavit. Plato autem soli. » Parm.: « aut primus illustrans, est unus, illustrati et illustrantes sunt plures. Sol quidem unus est: lumen autem dices partiri aliquo modo adversus. Propter hoc enim non solem ponit in comparisonem, scilicet Aristoteles, sed lumen; Plato autem solem. »

tiana fide loqui præsumperit : sicut cum dicit, quod « Latini pro principiis eorum hæc non recipiunt, » scilicet quod sit unus intellectus tantum, « quia forte lex eorum est in contrarium. » Ubi duo sunt mala: primo quia dubitat an hoc sit contra fidem; secundo quia alienum se innuit ab hac lege. Et quod postmodum dicit : « Hæc est ratio per quam Catholici videntur habere hanc positionem : » ubi sententiam fidei positionem nominat. Nec minoris præsumptionis est quod postmodum asserere audet, Deum facere non posse quod sint multi intellectus, quia implicat contradictionem. Adhuc autem gravius est quod postmodum dicit : « Per rationem concludo de necessitate, quod intellectus est unus numero ; firmiter tamen teneo oppositum per fidem. » Ergo sentit quod fides sit de aliquibus quorum contraria de necessitate concludi possunt. Cum autem de necessitate concludi non possit nisi verum necessarium, cujus oppositum est falsum et impossibile; sequitur secundum ejus dictum, quod fides sit

de falso et impossibili : quod etiam Deus facere non potest. Quod fidelium aures ferre non possunt. Non caret etiam magna temeritate quod de his quæ ad philosophiam non pertinent, sed sunt puræ fidei, disputare præsumit, sicut quod anima patiatur ab igne inferni, et dicere, sententias Doctorum de hoc esse reprobandas. Pari ergo ratione posset disputare de Trinitate, de Incarnatione, et aliis hujusmodi, de quibus non nisi balbutiens loqueretur.

Hæc igitur sunt quæ in destructionem prædicti erroris conscripsimus, non per documenta fidei, sed per ipsorum Philosophorum rationes et dicta. Si quis autem gloriabundus de falsi nominis scientia velit contra hæc quæ scripsimus, aliquid dicere; non loquatur in angulis, nec coram pueris, qui nesciunt de causis arduis judicare; sed contra hoc scriptum scribat, si audet: et inveniet non solum me, qui aliorum sum minimus, sed multos alios, qui veritatis sunt cultores, per quos ejus errori resistetur, vel ignorantia consuletur.

---

# OPUSCULUM XVI.

## TRACTATUS DE REGE ET REGNO<sup>1</sup> AD REGEM CYPRI.

(EDIT. ROM. XX.)

### ARGUMENTUM OPERIS.

Cogitanti mihi quid offerrem regiæ celsitudini dignum, meaque professioni congruum et officio, id occurrit potissime offerendum, ut regi librum de regno scriberem : in quo et regni originem, et ea quæ ad regis officium pertinent, secundum Scripturæ divinæ auctoritatem, philosophorum dogma, et exempla laudatorum principum diligenter depromerem, juxta ingenii proprii facultatem : principium, progressum, consummationem operis ex illius expectans auxilio qui est *Rex regum et Dominus dominantium, per quem reges regnant, Deus, magnus Dominus, et rex magnus super omnes deos.*

### LIBER PRIMUS.

#### CAPUT I.

*Quid significetur nomine regis<sup>2</sup>.*

Principium autem intentionis nostræ hinc sumere oportet ut quid nomine regis intelligendum sit, exponatur. In omnibus autem quæ ad finem aliquem ordinantur, in quibus contingit sic et aliter procedere, opus est aliquo dirigente, per quod directe debitum perveniatur ad finem. Non enim navis, quam secundum diversorum ventorum impul-

sum in diversa moveri contingit, ad destinatum finem perveniret, nisi per gubernatoris industriam dirigeretur ad portum. Hominis autem est aliquis finis, ad quem tota vita ejus et actio ordinatur, eum sit agens per intellectum, cujus est manifeste propter finem operari. Contingit autem diversimode homines ad finem intentum procedere : quod ipsa diversitas humanorum studiorum et actionum declarat. Indiget igitur homo aliquo dirigente ad finem. Est autem unicuique hominum naturaliter insitum rationis lumen, quo in suis actibus dirigatur ad finem. Et si quidem homini conveniret singulariter vivere, sicut multis animalium, nullo alio dirigente indigeret ad finem, sed ipse sibi unusquisque esset rex sub Deo summo rege, in quantum per lumen rationis divinitus datum sibi, in suis actibus se ipsum dirigeret. Naturale autem est homini ut sit animal sociale et politicum, in multitudine vivens, magis etiam quam omnia alia animalia : quod quidem naturalis necessitas declarat. Aliis enim animalibus natura præparavit cibum, tegumenta pilorum, defensionem, ut dentes, cornua, ungues, vel saltem velocitatem ad fugam. Homo autem institutus est nullo horum sibi a natura præparato, sed loco omnium data est ei ratio, per quam sibi hæc omnia officio manuum posset præparare. Ad quæ præparanda unus homo non sufficit : nam unus homo per se sufficienter vitam transigere non posset. Est igitur homini naturale quod in societate multorum vivat. Amplius : aliis animalibus

<sup>1</sup> Parm. : « de regimine principum. »

<sup>2</sup> Parm. : « Quod necesse est homines simul viventes ab aliquo diligenter regi. »

insita est naturalis industria ad omnia ea quæ sunt eis utilia vel nociva, sicut ovis naturaliter æstimat lupum inimicum. Quædam etiam animalia ex naturali industria cognoscunt aliquas herbas medicinales, et aliqua <sup>1</sup> eorum vitæ necessaria. Homo autem horum quæ sunt suæ vitæ necessaria, naturalem cognitionem habet solum in communi, quasi eo per rationem valente ex universalibus principiis ad cognitionem singulorum quæ necessaria sunt humanæ vitæ pervenire. Non est autem possibile quod unus homo ad omnia hujusmodi per suam rationem pertingat. Est igitur necessarium homini quod in multitudine vivat, ut unus ab alio adjuvetur, et diversi diversis inveniendis per rationem occupentur, puta <sup>2</sup> unus in medicina, alius in hoc, alius in alio. Hoc etiam evidentissime declaratur per hoc quod est proprium hominis locutione uti, per quam unus homo aliis suum conceptum totaliter potest exprimere. Alia quidem animalia exprimunt mutuo passiones suas in communi, ut canis in latratu iram, et alia animalia passiones suas diversis modis. Magis igitur homo est communicativus alteri quam quodcumque aliud animal quod gregale videtur, ut grus, formica et apis. Hoc ergo considerans Salomon in Ecclesiaste iv, 9, ait : *Melius est esse duos quam unum : habent enim emolumentum mutux societatis.* Si ergo naturale est homini quod in societate multorum vivat, necesse est in hominibus esse per quod multitudo regatur. Multis enim existentibus hominibus, et unoquoque id quod est sibi congruum, providente, multitudo in diversa dispergeretur, nisi etiam esset aliquis de eo quod ad bonum multitudinis pertinet, curam habens; sicut et corpus hominis et cujuslibet animalis deflueret, nisi esset aliqua vis regitiva communis in corpore quæ ad bonum commune omnium membrorum intenderet. Quod considerans Salomon dicit Prov. xi, 14 : *Ubi non est gubernator \*, dissipabitur populus.* Hoc autem rationaliter accidit : non enim idem est quod proprium et quod commune : secundum propria quidem differunt, secundum autem commune uniuntur. Diversorum autem diversæ sunt causæ. Oportet igitur, præter id quod movet ad proprium

Populus  
ruet.

bonum uniuscujusque, esse aliquid quod movet ad bonum commune multorum : propter quod et in omnibus quæ in unum ordinantur, aliquid invenitur alterius regitivum. In universitate enim corporum per primum corpus, scilicet cœleste, alia corpora ordine quodam divinæ providentiæ reguntur, omniaque corpora per creaturam rationalem. In uno etiam homine anima regit corpus, atque inter animæ partes irascibilis et concupiscibilis ratione reguntur. Itemque inter membra corporis unum est principale quod omnia movet, aut eor, aut caput. Oportet igitur esse in omni multitudine aliquid regitivum.

Contingit autem in quibusdam quæ ordinantur ad finem, et recte et non recte procedere. Quare et in regimine multitudinis et rectum et non rectum invenitur. Recte autem dirigitur unumquodque quando ad finem convenientem deducitur : non recte autem quando ad finem non convenientem. Alius autem est finis conveniens multitudini liberorum et servorum. Nam liber est qui sui causa est; servus autem est qui id quod est, alterius est. Si igitur liberorum multitudo a regente ad bonum commune multitudinis ordinetur, erit regimen rectum et justum, quale convenit liberis. Si vero non ad bonum commune multitudinis, sed ad bonum privatum regentis regimen ordinetur, erit regimen injustum atque perversum : unde et Dominus talibus rectoribus comminatur per Ezechielem cap. xxxiv, 2, dicens : *Væ pastoribus qui pascebant semetipsos, quasi sua propria commoda quærentes. Nonne greges a pastoribus pascuntur?* Bonum siquidem gregis pastores quærere debent, et rectores quilibet bonum multitudinis sibi subjectæ. Si igitur regimen injustum per unum tantum fiat, qui sua commoda ex regimine quærat, non autem bonum multitudinis sibi subjectæ; talis rector tyrannus vocatur, nomine a fortitudine derivato, quia scilicet per potentiam opprimit, non per justitiam regit; unde et apud antiquos, potentes quique tyranni vocabantur. Si vero injustum regimen non per unum fiat, sed per plures; si quidem per paucos, « Oligarchia » vocatur, idest principatus paucorum quando scilicet pauci propter divitias opprimunt

<sup>1</sup> Parm. : « alia. »

<sup>2</sup> Parm. omittit : « puta. »

plebem, sola pluralitate a tyranno differentes. Si vero iniquum regimen exerceatur per multos, « Democratia » nuncupatur, idest potentatus populi, quando scilicet populus plebeiorum per potentiam multitudinis opprimit divites. Sic enim et populus totus erit quasi unus tyrannus. Similiter autem et justum regimen distingui oportet. Si enim administraretur per aliquam multitudinem, communi nomine « Politia » vocatur, utpote cum multitudo bellatorum in civitate vel provincia dominatur. Si vero administraretur per paucos, virtuosos autem, huiusmodi regimen « Aristocratia » vocatur, idest potentatus optimus, vel optimorum, qui propterea optimates dicuntur. Si vero justum regimen ad unum tantum pertineat, ille proprie rex vocatur : unde Dominus per Ezechielem cap. xxxvii, 24, dicit : *Servus meus David rex super omnes erit, et pastor unus erit omnium eorum.* Ex quo manifeste ostenditur quod de ratione regis est quod sit unus qui præsitet, et quod sit pastor, commune multitudinis bonum, et non suum commodum quærens. Cum autem homini competat in multitudine vivere, quia sibi non sufficit ad necessaria vitæ, si solitarius maneat : oportet quod tanto sit perfectior multitudinis societas, quanto magis per se sufficiens erit ad necessaria vitæ. Habetur siquidem aliqua vitæ sufficientia in familia domus unius, quantum scilicet ad naturales actus nutritionis, et prolis generandæ, et aliorum huiusmodi : in uno autem vico <sup>1</sup>, quantum ad ea quæ ad unum artificium pertinent ; in civitate vero, quæ est perfecta communitas, quantum ad omnia necessaria vitæ : sed adhuc magis in provincia una propter necessitatem compugnationis, et mutui auxilii contra hostes. Unde qui perfectam communitatem regit, idest civitatem vel provinciam, antonomastice rex vocatur ; qui autem domum regit, non rex, sed paterfamilias dicitur ; habet tamen aliquam similitudinem regis, propter quam aliquando reges, populorum patres vocantur.

Ex dictis igitur patet quod rex est qui unius multitudinem civitatis vel provin-

ciæ, et propter bonum commune regit : unde Salomon in Eccle. v, 8, dicit : *Universæ terræ rex imperat servienti.*

## CAPUT II.

*Quid plus expediat civitati vel provincia pluribus aut uno regi rectore <sup>2</sup>.*

His autem præmissis requirere oportet, quid provinciæ vel civitati magis expedit, utrum a pluribus regi, vel uno. Hoc autem considerari potest ex ipso fine regiminis.

Ad hoc enim cuiuslibet regentis ferri debet intentio ut ejus quod regendum suscepit, salutem procuret. Gubernatoris enim est navem contra maris pericula servando, illæsam perducere ad portum salutis. Bonum autem et salus consociatæ <sup>3</sup> multitudinis est ut ejus unitas conservetur, quæ dicitur pax ; qua remota sociali vitæ perit utilitas, quinimmo multitudo dissentiens sibi ipsi fit onerosa. Hoc igitur est ad quod maxime rector multitudinis intendere debet, ut pacis unitatem procuret. Nec recte consiliatur, an pacem faciat in multitudine sibi subjecta, sicut nec <sup>4</sup> medicus, an sanet infirmum sibi commissum. Nullus enim consiliari debet de fine quem intendere debet, sed de his quæ sunt ad finem. Propterea Apostolus commendata fidelis populi unitate, *Solliciti*, inquit Ephes. iv, 3, *sitis servare unitatem spiritus in vinculo pacis.* Quanto igitur regimen efficacius fuerit ad unitatem pacis servandam, tanto erit utilius. Hoc enim utilius dicimus quod magis perducit ad finem. Manifestum est autem quod unitatem magis efficere potest quod est per se unum, quam <sup>5</sup> plures ; sicut efficacissima causa est calefactionis quod est per se calidum vel calefaciens <sup>6</sup>. Utilius igitur est regimen unius quam plurium.

Amplius. Manifestum est quod plures multitudinem nullo modo bene regerent <sup>7</sup>, si omnino dissentirent. Requiritur enim in pluribus quadam unio ad hoc quod quoquo modo regere possint ; quia nec multi navem in unam partem

<sup>1</sup> In Parm. et in omnibus Edit. mira prorsus incuria : « dico. »

<sup>2</sup> Quod utilius est multitudinem hominum simul viventium regi per unum quam per plures.

<sup>3</sup> Al. : « consortii. »

<sup>4</sup> Parm. omittit : « nec. »

<sup>5</sup> Al. : « quam quod per plures. »

<sup>6</sup> Parm. omittit : « vel calefaciens. »

<sup>7</sup> Parm. : « conservant. »



traherent, nisi aliquo modo conjuncti. Uniri autem dicuntur plura per appropinquationem ad unum. Melius igitur regit unus quam plures ex eo quod appropinquant ad unum.

Adhuc. Ea quæ sunt secundum naturam<sup>1</sup>, optime se habent : in singulis enim operatur natura quod optimum est. Omne autem naturale regimen ab uno est. In membrorum enim multitudine unum est quod<sup>2</sup> omnia movet, scilicet cor ; et in partibus animæ, una vis principaliter præsidet, scilicet ratio. Est etiam apibus unus rex, et in toto universo unus Deus factor omnium et rector. Et hoc rationabiliter. Omnis enim multitudo derivatur ab uno. Quare si ea quæ sunt secundum artem, imitantur ea quæ sunt secundum naturam ; et tanto magis opus artis est melius, quanto magis assequitur similitudinem ejus quod est in natura ; necesse est quod in humana multitudine optimum sit quod per unum regatur.

Hoc etiam experimentis apparet. Nam provinciæ vel civitates quæ non reguntur ab uno, dissensionibus laborant, et absque pace fluctuant, ut videatur adimpleri quod Dominus per Prophetam conqueritur, dicens Jerem. XII, 10 : *Pastores multi demoliti sunt vineam meam*. E contrario vero provinciæ et civitates quæ sub uno rege reguntur, pace gaudent, justitia florent, et affluentia rerum lætantur. Unde Dominus pro magno munere per Prophetas populo suo promittit quod poneret sibi caput unum, et quod princeps unus erit in medio eorum.

### CAPUT III.

*Quod regimen tyranni est pessimum*<sup>3</sup>.

Sicut autem regimen regis est optimum, ita regimen tyranni est pessimum. Opponitur autem politiæ quidem democratia : utrumque enim, sicut ex dictis apparet, est regimen quod per plures exercetur ; aristocratia vero oligarchia, utrumque enim exercetur per paucos ; regnum autem tyrannidi, utrumque enim

per unum exercetur. Quod autem regnum sit optimum regimen, ostensum est prius. Si igitur optimo opponitur pessimum, necesse est quod tyrannis sit pessimum.

Adhuc. Virtus unita magis est efficax ad effectum inducendum quam dispersa vel divisa. Multi enim congregati simul trahunt quod divisim per partes singulariter a singulis trahi non posset. Sicut igitur utilius est virtutem ad bonum esse magis unam, ut sit virtuosior ad operandum bonum ; ita magis est nocivum, si virtus operans malum sit una, quam divisa. Virtus autem injuste præsentis operatur ad malum multitudinis, dum commune bonum multitudinis in sui ipsius bonum tantum retorquet. Sicut igitur in regimine justo, quanto regens est magis unum, tanto est utilius regimen, et<sup>4</sup> regnum utilius est quam aristocratia, aristocratia vero quam politia ; ita e converso erit et in injusto regimine, ut videlicet quanto regens est magis unum, tanto magis sit nocivum. Magis igitur est nociva tyrannis quam oligarchia, oligarchia autem quam democratia.

Amplius. Per hoc regimen fit injustum quod spreto bono communi multitudinis, quæritur bonum privatum regentis. Quanto igitur magis receditur a bono communi, tanto est regimen magis injustum. Plus autem receditur a bono communi in oligarchia, in qua quæritur bonum paucorum, quam in democratia, in qua quæritur bonum multorum ; et adhuc plus receditur a bono communi in tyrannide, in qua quæritur bonum tantum unius : omni enim universitati propinquius est multum quam paucum, et paucum quam unum solum. Regimen igitur tyranni est injustissimum. Similiter autem manifestum fit considerantibus divinæ providentiæ ordinem, quæ optime universa disponit. Nam bonum provenit in rebus ex una causa perfecta, quasi omnibus adunatis quæ ad bonum juvare possunt ; malum autem singillatim ex singularibus defectibus. Non enim est pulchritudo in corpore, nisi omnia membra fuerint<sup>5</sup> decenter disposita ; turpitudine autem contingit, quodcumque membrorum in-

<sup>1</sup> Sic Codd. — In Parm. : « sunt ad naturam ; » sed in notula : Numquid « secundum naturam ? »

<sup>2</sup> Al. : « unum est quod principaliter movet. »

<sup>3</sup> Quod sicut dominium unius optimum est quando est justum, ita oppositum ejus est pessi-

num : probaturque multis rationibus et argumentis.

<sup>4</sup> Parm. : « ut regnum melius. »

<sup>5</sup> Al. : « bene. »

decenter se habeat. Et sic turpitudine ex pluribus causis diversimode provenit; pulchritudo autem uno modo ex una causa perfecta : et sic est in omnibus bonis et malis, tamquam hoc Deo providente, ut bonum ex una causa sit fortius, malum autem ex pluribus causis sit debilius. Expedi igitur ut regimen justum sit unius tantum, ad hoc ut sit fortius. Quod si in <sup>1</sup> injustitiam declinat regimen, expedi magis quod <sup>2</sup> sit multorum, ut sit debilius, et se invicem impediant. Inter injusta igitur regimina tolerabilius est democratia, pessimum vero tyrannis.

Idem etiam maxime apparet, si quis consideret mala quæ ex tyrannis proveniunt. Quia cum tyrannus contempto communi bono quærit privatum, consequens est ut subditos diversimode gravet, secundum quod diversis passionibus subjacet ad bona aliqua affectanda. Qui enim passione cupiditatis detinetur, bona subditorum rapit : unde Salomon Proverb. xxix, 4 : *Rex justus erigit terram, vir avarus destruet eam.* Si vero iracundia: passioni subjaceat, pro nihilo sanguinem fundit : unde per Ezech. xxii, 27, dicitur : *Principes ejus in medio ejus quasi lupi rapientes prædam ad effundendum sanguinem.* Hoc igitur regimen fugiendum esse, Sapiens monet dicens Eccli. ix, 18 : *Longe esto ab homine potestatem habente occidendi, quia scilicet non pro justitia, sed per potestatem occidit pro libidine voluntatis.* Sic igitur nulla erit <sup>3</sup> securitas, sed omnia sunt incerta, cum a jure disceditur; nec firmari quidquam potest quale <sup>4</sup> sit quod positum est in alterius voluntate, ne dicam libidine. Nec solum in corporaliibus subditos gravat, sed etiam spiritualia eorum bona impedit : quia qui plus præesse appetunt quam prodesse, omnem profectum subditorum impediunt, suspicantes omnem subditorum excellentiam suæ iniquæ dominationi præjudicium esse. Tyrannis enim magis boni quam mali suspecti sunt, semperque his aliena virtus formidolosa est. Conantur igitur prædicti tyranti ne ipsorum subditi virtuosus effecti magnanimitatis concipiant spiritum, et eorum iniquam dominationem non ferant; conantur etiam <sup>5</sup>

ne inter subditos amicitia: fœdus firmetur, et pacis emolumento ad invicem gaudeant; ut sic dum unus de altero non confidit, contra eorum dominium aliquid moliri non possint. Propter quod inter ipsos discordias seminant, exortas nutriunt, et ea quæ ad fœderationem hominum pertineat, ut connubia et convivia, prohibent, et cetera hujusmodi, per quæ inter homines solet familiaritas et fiducia generari. Conantur etiam ne potentes aut divites fiant, quia de subditis secundum suæ malitiæ conscientiam suspicantes, sicut ipsi potentia et divitiis ad nocendum utuntur, ita timent ne potentia subditorum et divitiæ eis nocivæ reddantur. Unde et Job xv, 21, de tyranno dicitur : *Sonitus terroris semper in auribus ejus; et cum pax sit, nullo scilicet malo ei intentante, ille semper insidias suspicatur.* Ex hoc autem contingit ut dum præsidentes, qui subditos ad virtutes inducere deberent, virtuti subditorum nequiter invident, et eam pro posse impediunt, sub tyrannis pauci virtuosus inveniuntur. Nam juxta sententiam Philosophi apud illos inveniuntur fortes viri apud quos fortissimi quique honorantur, et, ut Tullius dicit, « jacent semper et parum vigent quæ apud quosque improbantur. » Naturale etiam est ut homines sub timore nutriti, in servilem degenerent animum, et pusillanimes fiant ad omne virile opus et strenuum : quod experimento patet in provinciis quæ diu sub tyrannis fuerunt. Unde Apostolus Colossen. iii, 21, dicit : *Patres, nolite ad indignationem provocare filios vestros, ne pusillo animo fiant.*

Hæc igitur nocumenta tyrannidis rex Salomon considerans dicit Prov. xxviii, 12 : *Requantibus impiis ruinæ hominum;* quia scilicet per nequitiam tyrannorum subjecti a virtutum perfectione deficiunt : et iterum dicit ib. xxix, 2 : *Cum impii sumpserint principatum, gemet populus quasi sub servitute deductus;* et iterum ibid. xxviii, 28 : *Cum surrexerint impii, abscondentur homines,* ut tyrannorum crudelitatem evadant. Nec est mirum, quia homo absque ratione secundum animæ suæ libidinem præsidens nihil differt a bestia : unde Salomon ibid. xxviii, 15 : *Leo rugiens et ursus esuriens,*

<sup>1</sup> Al. : « justitia. »

<sup>2</sup> Parm. : « ut. »

<sup>3</sup> Al. : « potest esse. »

<sup>4</sup> Parm. omittit : « quale sit. »

<sup>5</sup> Parm. omittit : « conatur etiam. »

*princeps impius super populum pauperem.* Et ideo a tyrannis se abscondunt homines, sicut a crudelibus bestiis; idemque videtur tyranno subijci, et bestiae sævienti substerni.

## CAPUT IV.

*Quare subditis regia dignitas rectorum odiosa* <sup>1</sup>.

Quia ergo <sup>2</sup> optimum et pessimum regnum existit <sup>3</sup> in monarchia, idest in principatu unius; multis quidem propter tyrannorum malitiam redditur regia dignitas odiosa; quidam vero dum regimen regis desiderant, incidunt in sævitiam tyrannorum; rectoresque quamplures tyrannidem exercent sub prætextu regie dignitatis. Horum quidem exemplum evidenter apparet in Romana republica. Regibus enim a populo Romano expulsis, dum regium, vel potius tyrannicum fastum ferre non possent <sup>4</sup>, instituerunt <sup>5</sup> sibi consules et alios magistratus, per quos regi cœperunt et dirigi, regnum in aristocratiam commutare volentes: et <sup>6</sup>, refert Sallustius, incredibile est memoratu, quantum adepti libertate in brevi Romana civitas creverit. Plerumque namque convenit <sup>7</sup> ut homines sub rege viventes, segnius ad bonum commune nitantur, utpote æstimantes id quod ad commune bonum impendunt, non sibi ipsis proferre <sup>8</sup>, sed alteri, sub cuius potestate vident esse bona communia. Cum vero bonum commune non vident esse in potestate unius, non attendunt ad bonum commune quasi ad id quod est alterius, sed quilibet attendit ad illud quasi suum: unde experimento videtur quod una civitas per annuos rectores administrata, plus potest interdum quam rex

aliquis, si haberet et tales <sup>9</sup> tres vel quatuor civitates: parvaque servitia exacta a regibus gravius feruntur <sup>10</sup> quam magna onera, si a communitate civium imponantur; quod in promotione Romanæ reipublicæ servatum fuit. Nam plebs et <sup>11</sup> ad militiam scribebatur; et pro militantibus stipendia exsolvebat <sup>12</sup>, et cum stipendiis exsolvendis non sufficeret commune ærarium, in usus publicos opes venere privatae, adeo ut præter singulos annulos aureos, singulasque bullas, quæ erant dignitatis insignia, nihil sibi auri ipse etiam senatus reliquerit. Sed tamen <sup>13</sup> dissensionibus fatigabatur continuus, quæ usque ad bella civilia excreverunt; quibus bellis civilibus eis libertas ad quam multum studuerant, de manibus erepta est, et <sup>14</sup> sub potestate Imperatorum esse cœperunt, qui se reges a principio appellari noluerunt, quia Romanis fuerat nomen regium odiosum. Horum autem quidam more regio bonum commune fideliter procuraverunt, per quorum studium Romana respublica et aucta et conservata est: plurimi vero eorum in subditos quidem tyranni, ad hostes vero effecti desides et imbelles <sup>15</sup>, Romanam rempublicam ad nihilum redegerunt. Similis etiam processus fuit in populo Hebræorum. Primo quidem dum sub iudicibus regebantur, undique diripiebantur ab hostibus. Nam unusquisque quod bonum erat in oculis suis, hoc faciebat. Regibus vero eis divinitus datis ad eorum instantiam, propter eorum regiam <sup>16</sup> malitiam, a cultu unius Dei recesserunt, et finaliter ducti sunt in captivitatem. Utrunque igitur pericula imminet: sive dum timetur tyrannus, evitetur regis optimum regimen <sup>17</sup>; sive dum hoc desideratur <sup>18</sup>, potestas regia in malitiam tyrannicam convertatur.

<sup>1</sup> Quomodo variatum est dominium apud Romanos, et quod interdum apud eos magis aucta est respublica ex dominio plurium.

<sup>2</sup> Parm.: « igitur. »

<sup>3</sup> Parm.: « consistunt in. »

<sup>4</sup> Parm.: « possunt. »

<sup>5</sup> Parm.: « instituerant. »

<sup>6</sup> Parm. addit: « sicut. »

<sup>7</sup> Parm.: « contingit. »

<sup>8</sup> Parm.: « conferre. »

<sup>9</sup> Parm. omittit: « et tales. »

<sup>10</sup> Parm.: « ferunt. »

<sup>11</sup> Parm. omittit: « et. »

<sup>12</sup> Parm.: « exsolvebant. »

<sup>13</sup> Parm.: « cum. »

<sup>14</sup> Parm. omittit: « et. »

<sup>15</sup> Parm.: « imbecilles. »

<sup>16</sup> Parm.: « regnum. »

<sup>17</sup> Parm.: « dominium. »

<sup>18</sup> Parm.: « consideratur »

## CAPUT V.

*Quod minus malum est ex monarchia in tyrannidem converti, et quod cum regno plurium obtingit communius* <sup>1</sup>.

Cum autem inter duo, ex quorum utroque periculum imminet, eligere oportet, illud potissime eligendum est ex quo sequitur minus malum. Ex monarchia autem si in tyrannidem convertatur, minus malum sequitur quam ex regimine plurium optimatum, quando corrumpitur. Dissensio enim quæ plurimum sequitur ex regimine plurium, contrariatur bono pacis quod est præcipuum in multitudine sociali: quod quidem bonum per tyrannidem non tollitur, sed aliqua particularium hominum bona impediuntur <sup>2</sup>, nisi fuerit excessus tyrannidis quod in totam communitatem desæviat. Magis igitur præoptandum est unius regimen quam multorum, quamvis ex utroque sequantur pericula.

Adhuc. Illud magis fugiendum videtur ex quo pluries sequi possunt magna pericula. Frequentius autem sequuntur maxima pericula multitudinis ex multorum regimine quam ex unius. Plerumque enim contingit ut ex pluribus aliquis ab intentione communis boni deficiat, quam quod unus tantum. Quicumque autem ex pluribus præsentibus divertat ab intentione communis boni, dissensionis periculum in subditorum multitudine imminet, quia dissentientibus principibus consequens est ut in multitudine sequatur dissensio. Si vero unus præsit, plerumque quidem ad bonum commune respicit; aut si a bono communi intentionem avertat, non statim sequitur ut ad subditorum oppressionem <sup>3</sup> intendat, quod est excessus tyrannidis et in malitia regiminis maximum gradum tenens, ut supra ostensum est. Magis igitur sunt fugienda pericula quæ proveniunt ex regimine plurium <sup>4</sup> quam quæ ex gubernatione unius. Amplius. Non minus contingit in tyrannidem veli regimen

multorum quam unius, sed forte frequentius. Exorta namque dissensione per regimen plurium, contingit sæpe unum super alios superare, et sibi soli multitudinis dominium usurpare: quod quidem ex his quæ pro tempore fuerunt, manifeste suscipi <sup>5</sup> potest. Nam fere omnium multorum regimen est in tyrannidem terminatum, ut in Romana republica maxime <sup>6</sup> apparet. Quæ cum diu per plures magistratus administrata fuisset; exortis simultatibus, dissensionibus et bellis civilibus, in crudelissimos tyrannos incidit: et universaliter si quis præterita facta, et quæ nunc fiunt, diligenter consideret, plures inveniet exercuisse tyrannidem in terris quæ per multos reguntur, quam in illis quæ gubernantur ab uno <sup>7</sup>. Si igitur regimen quod est optimum regimen, maxime vitandum videatur propter tyrannidem, tyrannis autem non minus, sed magis contingere solet in regimine plurium quam unius, relinquatur simpliciter magis esse expediens sub rege uno vivere quam sub regimine plurium.

## CAPUT VI.

*Qualiter providendum est ne rex incidat in tyrannidem* <sup>8</sup>.

Quia ergo unius regimen præeligendum est, quod est optimum, et contingit ipsum in tyrannidem converti, quod est pessimum, ut ex dictis patet; laborandum est diligendi studio ut sic multitudini provideatur de rege, ut non incidant in tyrannum.

Primum autem est necessarium ut talis conditionis homo ab illis ad quos hoc spectat officium, promoveatur in regem, quod non sit probabile in tyrannidem declinare. Unde Samuel Dei providentiam erga institutionem regis commendans, ait I Regum xiii, 14: *Quæsit sibi Dominus virum secundum cor suum*. Et præcepit ei Dominus ut esset dux super populum suum <sup>9</sup>. Deinde sic disponenda

<sup>1</sup> Quod in dominio plurium magis sæpe contingit dominium tyrannicum quam ex dominio unius; et ideo regimen unius melius est.

<sup>2</sup> Sic Codd. in Parm.: « impediuntur. » cum hac notula: « an impediuntur. »

<sup>3</sup> Parm.: « depressionem. »

<sup>4</sup> Parm.: « proveniunt ex gubernatione multorum, quam ex gubernatione unius. »

<sup>5</sup> Parm.: « insipici. »

<sup>6</sup> Parm.: « manifeste. »

<sup>7</sup> Parm.: « per unum. »

<sup>8</sup> Conclusio, quod regimen unius simpliciter sit optimum. Ostendit qualiter multitudo se debet habere circa ipsum, quia auferenda est ei occasio ne tyrannizet, et quod etiam in hoc est tolerandus propter majus malum vitandum.

<sup>9</sup> Parm. omittit: « et præcepit ei Dominus ut esset dux super populum suum. »

est regni gubernatio, ut regi jam instituto tyrannidis subtrahatur occasio. Simul etiam sic ejus temperetur potestas, ut in tyrannidem de facili declinare non possit. Quæ quidem quomodo<sup>1</sup> fiant, in sequentibus considerandum erit. Demum vero curandum est, si rex in tyrannidem derveret, qualiter posset occurri.

Et quidem si non fuerit excessus tyrannidis, utilius est remissam tyrannidem tolerare ad tempus, quam contra tyrannum agendo<sup>2</sup> multis implicari periculis, quæ sunt graviora ipsa tyrannide. Potest enim contingere ut qui contra tyrannum agunt, prævalere non possint, et sic provocatus tyrannus magis desæviat. Quod si prævalere quis possit adversus tyrannum, ex hoc ipso proveniunt multoties gravissimæ dissensiones in populo, sive dum in tyrannum insurgitur, sive dum post dejectionem tyranni erga ordinationem regiminis multitudo separatur in partes. Contingit etiam ut interdum dum alicujus auxilio multitudo expellit tyrannum, ille potestate accepta tyrannidem arripiat, et timens pati ab alio quod ipse in alium fecit, graviori servitute subditos opprimat. Sic enim in tyrannide solet contingere ut posterior gravior fiat quam præcedens, dum præcedentia gravamina non deserit, et ipse ex sui cordis malitia nova excogitat: unde Syracusis quondam Dionysii mortem omnibus desiderantibus, anus quædam, ut incolumis et sibi superstes esset, quotidie<sup>3</sup> orabat; quod ut tyrannus cognovit, cur hoc faceret interrogavit. Tum illa: Puella, inquit, existens cum gravem tyrannum haberemus, mortem ejus cupiebam, quo interfecto aliquantum durior successit. Ejus quoque dominationem finiri magnum existimabam. Tertium te importuniorum habere cœpimus rectorem. Itaque si tu fueris absumptus, deterior in locum tuum succedet.

Et si sit intolerabilis excessus tyrannidis, quibusdam visum fuit ut ad fortium virorum virtutem pertineat tyrannum interimere, seque pro liberatione multitudinis exponere periculis mortis: cujus rei exemplum etiam in veteri testamento habetur. Nam Aioth quidam Eglon regem Moab, qui gravi servitute populum Dei premebat, sica infixam in ejus femore in-

teremit, et factus est populi iudex. Sed hoc apostolicæ doctrinæ non congruit. Docet enim nos Petrus non bonis tantum et modestis, verum etiam dysecolis dominis reverenter subditos esse: II Pet. II. Hæc est enim gratia, si propter conscientiam Dei sustineat quis tristitias patiens injuste. Unde cum multi Romani Imperatores fidem Christi persequerentur tyrannice, magna que multitudo tam nobilium quam populi esset ad fidem conversa, non resistendo, sed mortem patienter et armati<sup>4</sup> sustinentes pro Christo laudantur, ut in sacra Thebæorum legione manifeste apparet. Magisque Ajoth judicandus est hostem interemisse quam populi rectorem, licet tyrannum. Unde et in veteri testamento leguntur occisi fuisse hi qui occiderunt Joas regem Juda, quamvis a culto Dei recedentem, eorum filiis reservatis secundum legis præceptum. Esset autem hoc multitudini periculosum, et ejus rectoribus, si privata præsumptione aliqui attentarent præsentium necem, etiam tyrannorum. Plerumque enim hujusmodi periculis magis exponunt se mali quam boni. Malis autem solet esse grave dominium non minus regum quam tyrannorum; quia secundum sententiam Salomonis, Prov. xx, 26: *Dissipat impios rex sapiens*. Magis igitur ex hujus præsumptione immineret periculum multitudini de amissione boni<sup>5</sup> regis, quam remedium de subtractione tyranni.

Videtur autem magis contra tyrannorum sævitiam non privata præsumptione aliquorum, sed auctoritate publica procedendum. Primo quidem si ad jus multitudinis alicujus pertineat sibi providere de rege, non injuste ab eadem rex institutus potest destrui, vel refrenari ejus potestas, si potestate regia tyrannice abutatur. Nec putanda est talis multitudo infideliter agere tyrannum destituens, etiam si eidem in perpetuo se ante subjecerat: quia hoc ipse meruit, in multitudinis regimine se non fideliter gerens, ut exigit regis officium quod ei pactum a subditis non reservetur. Sic Romani Tarquinium superbum, quem in regem susceperant, propter ejus et filiorum tyrannidem a regno ejecerunt, substituta minori, scilicet consulari, potestate. Sic etiam Domitianus, qui modestissimis

<sup>1</sup> Parm.: « ut fiant. »

<sup>2</sup> Al.: « quam tyrannum agendo. »

<sup>3</sup> Parm.: « continue. »

<sup>4</sup> Al.: « et animati. »

<sup>5</sup> Parm. omittit: « boni. »



Imperatoribus Vespasiano Patri, et Tito fratri ejus successerat, dum tyrannidem exercet, a Senatu Romano interemptus est, omnibus quæ perverse Romanis fecerat, per senatusconsultum juste et salubriter in irritum revocatis. Quo factum est ut beatus Joannes Evangelista dilectus Dei discipulus, qui per ipsum Domitianum in Pathmos insulam fuerat exilio relegatus, ad Ephesum per senatusconsultum remitteretur. Si vero ad jus alicujus superioris pertineat multitudini providere de rege, expectandum est ab eo remedium contra tyranni nequitiam. Sic Archelai, qui in Judæa pro Herode patre suo regnare jam cœperat, paternam malitiam imitantis, Judæis contra eum querimoniam ad Cæsarem Augustum deferentibus, primo quidem potestas diminuitur ablato sibi regio nomine, et medietate regni sui inter duos fratres suos divisa: deinde cum nec sic a tyrannide compesceretur, a Tiberio Cæsare relegatus est in exilium apud Lugdunum Galliæ civitatem. Quod si omnino contra tyrannum auxilium humanum haberi non potest, recurrendum est ad regem omnium Deum, qui est adjutor in opportunitatibus in tribulatione. Ejus enim potentiæ subest ut cor tyranni crudele convertat in mansuetudinem secundum Salomonis sententiam in Proverb. xii, 1: *Cor regis in manu Dei*: quocumque voluerit, inclinabit illud. Ipse enim regis Assneri crudelitatem, qui Judæis mortem parabat, in mansuetudinem vertit. Ipse est qui ita Nabuchodonosor crudelem regem convertit quod factus est divinæ potentiæ prædicator. *Nunc igitur, inquit, ego Nabuchodonosor laudæ et magnifico et glorifico regem cæli: quia opera ejus vera, et viæ ejus judicia, et gradientes in superbia potest humiliare*: Dan. iv, 34. Tyrannos vero quos reputat conversione indignos, potest auferre de medio, vel ad infimum statum reducere, secundum illud Sapientis Eccl. x, 17: *Sedem ducum superborum destruxit Deus, et sedere fecit mites pro eis*. Ipse est qui videns afflictionem populi sui in Ægypto, et audiens eorum clamorem, Pharaonem tyrannum dejecit cum exercitu suo in mare. Ipse est qui memoratum Nabuchodonosor prius superbientem non solum ejecit de

regni solio, sed etiam de hominum consortio in similitudinem bestię commutavit. Nec enim abbreviata manus ejus est, ut populum suum a tyrannis liberare non possit. Promittit enim populo suo per Isaiam requiem se daturum a labore et confusione, ac servitute dura, qua ante servierat: et per Ezech. xxxiv, 10, dicit: *Liberabo gregem meum de ore eorum*, scilicet pastorum qui pascunt se ipsos. Sed ut hoc beneficium populus a Deo consequi mereatur, debet a peccatis cessare, quia in ultionem peccati divina permissione impii accipiunt principatum, dicente Domino per Oseæ xiii, 11: *Dabo tibi regem in furore meo*; et in Job. xxxiv, 30, dicitur quod *regnare facit hominem hypocritam propter peccata populi*. Tollenda est igitur culpa, ut cesset a tyrannorum plaga.

## CAPUT VII.

*Quod mundanus honor et gloria non sunt sufficiens præmium regis*<sup>1</sup>.

Quoniam autem secundum prædicta, regis est bonum multitudinis quærere, nimis videtur onerosum regis officium, nisi ei aliquod proprium bonum ex hoc proveniret. Oportet igitur considerare, quale sit boni regis conveniens præmium.

Quibusdam igitur visum est non esse aliud nisi honorem et gloriam. Unde et Tullius *de republica* definiit principem civitatis esse alendum gloria: ejus rationem Aristoteles in libro *Ethic.* assignare videtur, quia princeps cui non sufficit honor et gloria, consequenter tyrannus efficitur. Inest enim animis omnium ut proprium bonum quærant. Si ergo contentus non fuerit princeps gloria et honore, quaret voluptates et divitias; et sic ad rapinas et subditorum injurias convertetur.

Sed si hanc sententiam receperimus, plurima sequuntur inconvenientia. Primo namque hoc regibus dispendiosum esset, si tot labores et sollicitudines paterentur pro mercede tam fragili. Nihil enim videtur in rebus humanis fragilius gloria, et honore favoris hominum, cum depen-

<sup>1</sup> Hic quærit sanctus Doctor, quid præcipue movere debeat regem ad regendum; utrum honor

vel gloria: et ponit opiniones circa hoc, quid sit tenendum.

deat ex opinionibus hominum et verbis eorum<sup>1</sup> quibus nihil mutabilius in vita hominum: et inde est quod Isaias Propheta cap. xx hujusmodi gloriam nominat florem feni. Deinde humanæ gloriæ cupido animi magnitudinem aufert. Qui enim favorem hominum quærit, necesse est ut in omni eo quod dicit aut facit, eorum voluntati deserviat; et sic dum placere hominibus studet, fit servus singulorum. Propter quod et idem Tullius, in libro *De officiis*, cavendam dicit esse « gloriæ cupidinem: eripit animi libertatem, pro qua magnanimis viris omnis debet esse contentio. » Nihil autem principem, qui ad magna<sup>2</sup> peragenda instituitur, magis decet quam animi magnitudo. Est igitur incompetens regis officio humanæ gloriæ præmium. Simul etiam est multitudini nocivum, si tale præmium statuatur principibus. Pertinet enim ad boni viri officium ut contemnat gloriam, sicut alia temporalia bona. Virtuosi enim et fortis animi est pro justitia contemnere gloriam, sicut et vitam: unde fit quiddam mirabile; ut quia virtuosos actus sequitur gloria, ipsa gloria virtuose contemnatur, et ex contemptu gloriæ homo gloriosus reddatur, secundum sententiam Fabii dicentis: « Gloriam qui spreverit, veram habebit: » et de Catone dixit Sallustius: « Quo minus petebat gloriam, tanto magis assequebatur illam: » ipsique Christi discipuli se sicut Dei ministros exhibebant per gloriam et ignobilitatem, per infamiam et bonam famam. Non est igitur boni viri conveniens præmium gloria, quam contemnuunt boni. Si igitur hoc solum bonum statuatur præmium principibus, sequetur bonos viros non assumere principatum, aut si assumpserint, impræmiatos esse. Amplius ex cupidine gloriæ periculosa mala proveniunt. Multi enim dum immoderate gloriam in rebus bellicis quærunt, se ac suos perdidierunt exercitus, libertate patriæ sub hostili potestate redacta<sup>3</sup>: unde Torquatus Romanus princeps in exemplum<sup>4</sup> hujus vitandi discriminis, filium qui contra imperium suum provocatus ab hoste juvenili ardore pugnavit, licet vicisset, occidit, ne plus

mali esset in præsumptionis exemplo quam utilitatis in gloria hostis occisi. Habet etiam cupido gloriæ aliud sibi familiare vitium, simulationem videlicet. Quia enim difficile est, paucisque contingit veras virtutes assequi, quibus solis honor debetur et gloria<sup>5</sup>; multi gloriam cupientes, virtutum simulatores fiunt. Propter quod<sup>6</sup> Sallustius dicit « ambitio multos mortales falsos<sup>7</sup> fieri coegit: aliud clausum in pectore, aliud promptum habere in lingua, magisque vultum quam ingenium habere. » Sed et Salvator noster eos qui bona opera faciunt, ut ab hominibus videantur, hypocritas, idest simulatores, vocat. Sicut igitur periculosum est multitudini, si princeps voluptates et divitias quærat pro præmio, ne<sup>8</sup> raptor<sup>9</sup> contumeliosus fiat; ita periculosum est cum detinetur gloriæ præmio, ne præsumptuosus et simulator existat.

Sed quantum ex dictorum sapientum intentione apparet, non ea ratione honorem et gloriam pro præmio principi decreverunt tamquam ad hoc principaliter ferri debeat boni regis intentio; sed quia tolerabilius est si gloriam quærat, quam si pecuniam cupiat, vel voluptatem sectetur<sup>10</sup>. Hoc enim vitium virtuti propinquius est; cum gloria, quam homines cupiunt, ut ait Augustinus, nihil aliud sit quam iudicium hominum bene de hominibus opinantium. Cupido enim gloriæ aliquod habet virtutis vestigium, dum saltem bonorum approbationem quærit, et eis displicere recusat. Paucis igitur ad veram virtutem pervenientibus tolerabilius videtur, si præferatur ad regimen qui, vel iudicium hominum metuens, saltem<sup>11</sup> a malis manifestis retrahitur. Qui enim gloriam cupit, aut vera via per virtutis opera nititur ut ab hominibus approbetur, vel saltem dolis ad hoc contendit, atque fallaciis. At qui dominari desiderat, si cupiditate gloriæ carens non timeat bene iudicantibus displicere, per apertissima scelera quærit plerumque obtinere quod diligit: unde bestias superat sive crudelitatis sive luxuriæ vitiis, sicut in Nerone Cæsare patet: cuius, ut Augustinus dicit, tanta luxuria fuit ut nihil

<sup>1</sup> Parm. omittit: « et verbis eorum. »

<sup>2</sup> Parm.: « bona. »

<sup>3</sup> Parm.: « reducta. »

<sup>4</sup> Al.: « in exemplo. »

<sup>5</sup> Parm. omittit: « et gloria. »

<sup>6</sup> Parm.: « sicut dicit. »

<sup>7</sup> Al.: « falso. »

<sup>8</sup> Al.: « ut raptor. »

<sup>9</sup> Parm. addit: « et. »

<sup>10</sup> Parm.: « sequatur. »

<sup>11</sup> Parm. omittit: « saltem. »

putaretur ab eo virile metuendum : tanta crudelitas, ut nihil molle habere putaretur. Hoc autem satis exprimitur per id quod Aristoteles de magnanimo in *Ethi- cis* dicit, quod non quærit honorem et gloriam quasi aliquid magnum, quod sit virtutis sufficiens præmium, sed nihil ultra hoc ab hominibus exigit. Hoc enim inter omnia terrena videtur esse præcipuum ut homini ab hominibus testimonium de virtute reddatur.

### CAPUT VIII.

*Quod sufficiens præmium regis est a Deo expectandum*<sup>1</sup>.

Quoniam ergo mundanus honor et hominum gloria regis sollicitudinis non est sufficiens præmium, inquirendum restat quale sit eidem sufficiens. Est autem conveniens ut rex præmium expectet a Deo. Minister enim pro suo ministerio præmium expectat a domino. Rex autem populum gubernando minister Dei est, dicente Apostolo Rom. xiii, 4, et 4, quod *omnis potestas a Domino Deo est*, et quod *est Dei minister, vindex in iram ei qui male agit*: et in lib. Sap. reges, Dei esse ministri describuntur. Debeant igitur reges pro suo regimine præmium expectare a Deo. Remunerat autem Deus pro suo ministerio reges interdum temporalibus bonis ; sed talia præmia sunt bonis malisque communia : unde Dominus, Ezech. xxix, 18 : *Nabuchodonosor rex Babylonis servire fecit exercitum suum servitute magna adversus Tyrum : et merces non est reddita ei, nec exercitui ejus de Tyro, pro servitute qua servivit mihi adversus eam*, ea scilicet servitute qua potestas, secundum Apostolum, Dei minister est, vindex in iram ei qui male agit : et postea de præmio subdidit : *Propterea hæc dicit Dominus Deus : Ecce ergo dabo Nabuchodonosor regnum Babylonis in terra Ægypti : et diripiet spolia ejus, et erit merces exercitui ejus*. Si ergo reges iniquos contra Dei hostes pugnantes, licet non intentione serviendi Deo, sed sua odia et cupiditates exequendi, tanta mercede Dominus remunerat ut de hostibus victoriam tribuat, regna subiciat, et spo-

lia diripienda proponat ; quid faciet bonis regibus, qui pia intentione Dei populum regunt, et hostes impugnant ? Non quidem terrenam, sed æternam mercedem eis promittit, nec in alio quam in seipso, dicente Petro pastoribus populi Dei I, Pet. v, 3 : *Pascite qui in vobis est gregem Domini... et cum venerit Princeps pastorum, idest rex regum Christus, percipietis immarcescibilem gloriæ coronam* : de qua dicit Isa. xxxviii, 5 : *Erit Dominus sertum exultationis et diadema gloriæ populo suo*. Hoc autem ratione manifestatur. Est enim mentibus omnium ratione utentium inditum, virtutis præmium beatitudinem esse. Virtus enim uniuscujusque rei describitur quæ « bonum facit habentem, et opus ejus bonum reddit. » Ad hoc autem quisque bene operando nititur pervenire quod est maxime desiderio inditum. Hoc autem est esse felicem, quod nullus potest non velle. Hoc igitur præmium virtutis convenienter expectatur, quod hominem beatum facit. Si autem bene operari virtutis est opus, regis autem opus est bene regere subditos ; hoc etiam erit præmium regis quod eum faciat esse beatum. Quid autem hoc sit, hinc considerandum est. Beatitudinem quidem dicimus ultimum desideriorum finem. Neque enim desiderii motus usque in infinitum procedit ; esset enim inane naturale desiderium, cum infinita pertransiri non possint. Cum autem desiderium intellectualis nature sit universalis boni, hoc solum bonum vere beatum facere poterit quo adepto nullum bonum restat quod amplius desiderari possit : unde et beatitudo dicitur bonum perfectum, quasi omnia desiderabilia in se comprehendens. Tale autem non est aliquod bonum terrenum : nam qui divitias habent, amplius habere desiderant : qui voluptatibus perfruuntur, amplius et perfrui desiderant<sup>2</sup>. Et simile patet in ceteris. Et si ampliora non quærunt, desiderant tamen ut ea permanent, vel alia in locum eorum succedant : nihil enim permanens invenitur in rebus terrenis. Nihil igitur terrenum est quod quietare desiderium possit. Neque igitur terrenum aliquid beatum facere potest, ut possit esse regis conveniens præmium.

Adhuc. Cujuslibet rei finalis perfectio

<sup>1</sup> Hic declarat sanctus Doctor, qualis est verus finis regis, qui movere ipsum debet ad bene regendum.

<sup>2</sup> Parm. : « qui voluptatibus perfruuntur, amplius et perfrui desiderant. »

et bonum completum ab aliquo superiore dependet : quia et ipsa corporalia meliora redduntur ex adjunctione meliorum ; pejora vero, si deterioribus miscentur : si enim argento misceatur aurum, argentum fit melius, quod ex plumbi admixtione impurum efficitur. Constat autem terrena omnia esse infra mentem humanam ; beatitudo autem est hominis finalis perfectio, et bonum completum, ad quod omnes pervenire desiderant. Nihil igitur terrenum est quod hominem possit beatum facere. Nec igitur terrenum aliquid est præmium regis sufficiens. « Nou<sup>1</sup> enim, » ut Augustinus dicit *De civit. Dei* lib. V, cap. xxvi : « christianos principes<sup>2</sup> ideo felices dicimus, quia diutius imperarunt, vel imperatores filios morte placida reliquerunt, vel hostes reipublicæ domuerunt<sup>3</sup>, vel cives adversum se insurgentes et cavere et opprimere potuerunt... Sed felices eos dicimus, si juste imperant... si malunt cupiditatibus potius quam gentibus quibuslibet imperare ; si omnia faciunt non propter ardorem inanis gloriæ, sed propter ardorem inanis gloriæ, sed propter caritatem felicitatis æternæ... Tales Imperatores christianos felices dicimus interim spe, postea re ipsa futuros, cum id quod expectamus advenerit. » Sed nec aliquid aliud creatum est quod beatum hominem faciat, et possit regi decerni pro præmio. Tendit enim uniuscujusque rei desiderium in suum principium, a quo esse<sup>4</sup> suum causatur. Causa vero mentis humanæ non est aliud quam Deus, qui eam ad suam imaginem facit. Solus igitur Deus est qui hominis desiderium quietare potest, et facere hominem beatum, et esse regi conveniens præmium. Amplius. Mens humana universalis boni cognoscitiva est per intellectum, et desiderativa per voluntatem. Bonum autem universale non invenitur nisi in Deo. Nihil ergo est quod possit hominem beatum facere, ejus implendo desiderium, nisi Deus, de quo dicitur in Ps. cii, 5 : *Qui replet in bonis desiderium tuum*. In hoc ergo rex suum præmium statuere debet. Hoc igitur considerans David rex dicebat

Ps. lxxiv, 24 : *Quid mihi est in cælo, et a te quid volui super terram?* Cui quæstioni postea respondens, subjungit : *Mihi autem adhærere Deo bonum est, et ponere in Domino Deo spem meam*. Ipse enim est qui dat salutem regibus, non solum temporalem, qua communiter salvat homines et jumenta, sed etiam eam de qua per Isa. li, 6, dicit : *Salus autem mea in sempiternum erit* : qua homines salvat, eos ad æqualitatem Angelorum perducens.

Sic igitur verificari potest quod regis præmium est honor et gloria. Quis enim mundanus et caducus honor huic honori similis esse potest, ut homo sit civis et domesticus Dei, et inter Dei filios computatus, et hereditatem regni cœlestis assequatur cum Christo? Hic est honor quem concupiscens et admirans rex David dicebat, Psal. cxxviii, 17 : *Nimis honorati sunt amici tui, Deus*. Quæ insuper humanæ laudis gloria huic comparari potest, quam non fallax blandientium lingua, non decepta hominum opinio profert, sed ex interioris conscientiæ testimonio producit, et Dei testimonio confirmatur, qui suis confessoribus repromittit quod confiteatur eos in gloria Patris coram Angelis Dei? Quia autem hanc gloriam quærunt, eam inveniunt, et quam non quærunt gloriam hominum, consequuntur, exemplo Salomonis, qui non solum sapientiam, quam quæsivit, accepit a Domino, sed factus est super reges alios gloriosus.

## CAPUT IX.

*Quem gradum in beatitudine tenuerunt reges beati<sup>5</sup>.*

Considerandum autem restat ulterius, quod sublimem<sup>6</sup> et eminentem obtinebunt cœlestis beatitudinis gradum, qui officium regum digne et laudabiliter exequentur. Si enim beatitudo virtutis est præmium, consequens est ut majori virtuti major gradus beatitudinis debeatur. Est autem præcipua virtus qua homo

<sup>1</sup> Neque enim... imperantes filios... si hæc omnia faciunt. »

<sup>2</sup> Verba : « ideo felices dicimus » supplevimus ex Augustino.

<sup>3</sup> Al. : « diminuerunt. »

<sup>4</sup> Al. : « suum principium causatur. »

<sup>5</sup> Hic declarat sanctus Doctor, quod præmium regum et principum tenet supremum gradum in beatitudine cœlesti : et hoc multis rationibus ostenditur, et exemplis.

<sup>6</sup> Parm. omittit : « sublimem. »

aliquis non solum se ipsum, sed etiam alios dirigere potest : et tanto magis, quanto plurimum est regitiva : quia et secundum virtutem corporalem tanto aliquis virtuosior reputatur, quanto plures vincere potest, aut pondera plura levare. Sic igitur major virtus requiritur ad regendum domesticam familiam quam ad regendum se ipsum, multoque major ad regimen civitatis et regni. Est igitur excellentis virtutis bene regium officium exercere. Debetur igitur ei excellens in beatitudine præmium.

Adhuc : in omnibus artibus et potentiis laudabiliores sunt qui alios bene regunt, quam qui secundum alienam directionem bene se habent. In speculativis enim majus est veritatem aliis docendo tradere, quam quod ab aliis docetur, capere posse; in artificiis etiam majus æstimatur, majorique conducitur pretio architector qui ædificium disponit, quam artifex qui secundum ejus dispositionem manualiter operatur : et in rebus bellicis majorem gloriam de victoria consequitur<sup>1</sup> prudentia ducis quam militis fortitudo. Sic autem se habet rector multitudinis in his quæ a singulis secundum virtutem sunt agenda, sicut doctor in disciplinis, et architector in ædificiis, et dux in bellis. Est igitur rex majori præmio<sup>2</sup> dignus, si bene subjectos gubernaverit, quam aliquis subditorum, si sub rege bene se habuerit.

Amplius. Si virtutis est ut per eam opus hominis bonum reddatur, majoris virtutis esse videtur quod majus bonum per eam aliquis operetur. Majus autem et divinius est bonum multitudinis quam bonum unius : unde interdum malum unius sustinetur, si in bonum multitudinis cedat ; sicut occiditur latro, ut pax multitudini detur : et ipse Deus mala esse in mundo non sineret, nisi ex eis bona eliceret ad utilitatem et pulchritudinem universi. Pertinet autem ad regis officium, ut bonum multitudinis studiose procuret. Majus igitur præmium debetur regi pro bono regimine quam subdito pro recta<sup>3</sup> actione.

Hoc autem manifestius fiet, si quis in speciali consideret. Laudatur enim ab hominibus quævis privata persona, et ei a

Deo computatur in præmium, si egenti subveniat, si discordes pacificet, si oppressum a potentiore eripiat, denique si alicui qualitercumque opem vel consilium conferat ad salutem. Quanto igitur magis laudandus est ab hominibus et præmiandus a Deo, qui totam provinciam facit pace gaudere, insolentias<sup>4</sup> cohibet, justitiam servat, et disponit quid sit agendum ab hominibus suis legibus et præceptis? Hinc etiam magnitudo regis virtutis apparet quod præcipue Dei similitudinem gerit, dum agit in regno quod Deus in mundo : unde in Exod. xxii, iudices multitudinis, dii vocantur. Imperatores etiam apud Romanos divi vocantur<sup>5</sup>. Tanto autem est aliquid Deo acceptius, quanto magis ad ejus imitationem accedit : unde et Apostolus monet Ephes. v, 1 : *Estote imitatores Dei, sicut filii carissimi*. Sed si secundum sapientis sententiam, omne animal diligit simile sibi, secundum quod causæ aliquantulum similitudinem habent causati ; consequens igitur est honos reges Deo esse acceptissimos, et ab eo maxime præmiandos. Simul etiam, ut Gregorii verbis utar, « quid est ~~tempestas maris~~ nisi tempestas mentis? Quieto autem mari recte navem etiam imperitus dirigit; turbato autem mari tempestatis fluctibus etiam peritus nauta confunditur : unde et plerumque in occupatione regiminis ipse quoque boni operis usus perditur, qui in tranquillitate tenebatur. » Valde enim difficile est si, ut Augustinus dicit, inter linguas sublimantium et honorantium, et obsequia nimis humiliter salutantium non extolluntur, sed se homines esse meminerint. Et in Eccli. xxxi, 8, dicitur : *Beatus vir... qui post aurum non abiit, nec speravit in pecuniæ thesauris : qui potuit impune transgredi, et non est transgressus ; et facere mala, et non fecit*. Ex quo quasi in virtute opere probatus invenitur fidelis. Unde secundum Biantis proverbium principatus virum ostendit. Multi enim ad principatus culmen pervenientes, a virtute deficiunt, qui dum in statu essent infimo, virtuosos videbantur. Ipsa igitur difficultas quæ principibus imminet ad bene agendum, eos facit majori præmio dignos ; et si aliquando per infirmi-

<sup>1</sup> Al. : « sequitur. »

<sup>2</sup> Parm. : « pretio » et in notula : an legendum : « præmio. »

<sup>3</sup> Parm. : « bona. »

<sup>4</sup> Parm. : « violentias. »

<sup>5</sup> Parm. omittit : « imperatores etiam apud Romanos divi vocantur. »

Gen

Reg. P.  
I.

potestas  
videtur

\* Pecuniæ  
et thesauris.

Ar. 6<sup>th</sup>  
20



tatem peccaverint, apud homines excusabiliores redduntur, et facilius a Deo veniam promerentur; si tamen, ut Augustinus ait, pro suis peccatis humilitatis et miserationis et orationis sacrificium Deo suo vero immolari non negligunt. In cuius rei exemplum de Achab rege Israel, qui multum peccaverat, Dominus ad Eliam dixit III Reg. XXI, 29: *Quia humiliatus est mei causa, non inducam \* hoc*

*Inducam  
alum in  
iebus e-  
is.*

*malum in diebus suis.* Non solum autem ratione ostenditur quod regibus excellens præmium debeatur, sed etiam auctoritate divina firmatur. Dicitur enim in Zach. XII, quod in illa beatitudinis die qua erit Dominus protector habitantibus in Jerusalem, idest in visione pacis æternæ, aliorum domus erunt sicut domus David, quia scilicet omnes reges erunt, et regnabunt cum Christo, sicut membra cum capite. Sed domus David erit sicut domus Dei: quia sicut regendo fideliter Dei officium gessit in populo, ita in præmio Deo propinquius erit, et inhærebit. Hoc etiam fuit apud gentiles aliquantulum somnium, dum civitatem rectores atque servatores in deos transformari putabant.

## CAPUT X.

*Quæ bona perdant tyranni quæ regibus exhibentur<sup>1</sup>.*

Cum regibus tam grande in cœlesti beatitudine præmium proponatur, si bene in regendo se habuerint; diligenti cura se ipsos observare debent, ne in tyrannidem convertantur. Nihil enim eis acceptabilius esse debet quam quod ex honore regio, quo sublimantur in terris, in cœlestis regni gloriam transferantur. E contra<sup>2</sup> vero tyranni, quia propter quædam terrena commoda justitiam deserunt tanto privantur præmio, quod adipisci poterant juste regendo. Quam autem stultum sit pro hujusmodi parvis et temporalibus bonis maxima et sempiterna perdere bona, nullus nisi stultus aut infidelis ignorat. Addendum est autem<sup>3</sup>, quod hæc temporalia commoda, propter quæ tyranni justitiam deserunt, magis

ad lucrum proveniunt regibus, dum justitiam servant. Primo namque inter mundana omnia nihil est quod amicitie dignæ præferendum videatur. Ipsa namque est quæ virtuosos in unum conciliat, virtutem conservat atque promovet. Ipsa est qua omnes indigent in quibuscumque negotiis peragendis: quæ nec prosperis importune se ingerit, nec deserit in adversis. Ipsa est quæ maximas delectationes affert, intantum ut quæcumque delectabilia in tædium sine amicis vertantur. Quælibet autem aspera, facilia et prope nulla facit amor: nec est alicujus tyranni tanta crudelitas ut amicitia non delectetur. Dionysius enim Syracusanorum tyrannus cum duorum amicorum, qui Damon et Pythias dicebantur, alterum occidere vellet, is qui occidendus erat, inducias impetravit ut domum profectus res sua ordinaret; alter vero amicorum sese tyranno obsidem<sup>4</sup> pro ejus reditu dedit. Appropinquante autem promisso die, nec illo redeunte, unusquisque fidejussorem stultitiæ arguebat. At ille nihil se metuere de amici constantia prædicabat. Eadem autem hora qua fuerat occidendus, rediit. Admirans autem amborum animum tyrannus, supplicium propter fidem amicitie remisit, insuper rogans ut eum tertium reciperent in amicitie gradu. Hoc autem amicitie bonum quamvis desiderent tyranni, consequi tamen non possunt. Dum enim commune bonum non quærunt, sed proprium, fit parva vel nulla communio eorum ad subditos. Omnis autem amicitia super aliqua communione firmatur. Eos enim qui conveniunt vel per naturæ originem, vel per morum similitudinem, vel per eujuscumque societatis communionem, videmus amicitia conjungi. Parva igitur, vel potius nulla est amicitia tyranni et subditi; simulque dum subditi per tyrannicam injustitiam opprimuntur, et se amari non sentiunt sed contemni, nequaquam amant. Est enim majoris virtutis inimicos diligere et persequentibus benefacere, quam quod a multitudine observatur<sup>5</sup>. Nec habent tyranni unde de subditis conquerantur si ab eis non diliguntur, quia nec ipsi tales se ipsis exhibent ut diligere ab eis debeant. Sed boni

<sup>1</sup> Quod rex et princeps studere debet ad bonum regimen propter bonum sui ipsius, et utile quod inde sequitur: ejus contrarium sequitur regimen tyrannicum.

<sup>2</sup> Parm.: « errant... deserunt; qui: »

<sup>3</sup> Parm.: « etiam. »

<sup>4</sup> Al.: « ob fidem. »

<sup>5</sup> Parm. omittit: « est enim... observatur. »

reges dum communi profectui studiose intendunt, et eorum studio subditi plura commoda se assequi sentiunt, diliguntur a plurimis dum subditos se amare demonstrant: quia et hoc est majoris malitiæ quam quod in multitudine cadat, ut odio habeantur amici, et benefactoribus rependatur malum pro bono. Et ex hoc amore provenit ut bonorum regum regnum sit stabile, dum pro ipsis se subditi quibuscumque periculis exponere non recusant. Cujus exemplum in Julio Cæsare apparet, de quo Suetonius refert, quod milites suos usque adeo diligebat, ut audita quorundam cæde, capillos et barbam ante non dempserit quam vindicasset: quibus rebus devotissimos sibi et strenuissimos milites reddidit; ita quod plerique eorum capti, concessam sibi sub ea conditione vitam, si militare adversus Cæsarem vellent, recusarent. Octavianus etiam Augustus qui modestissime imperio usus est, intantum diligebatur a subditis, ut plerique morientes, victimas quas devoverant, immolari mandarent, quia eum superstitem reliquissent. Non est ergo facile ut principis perturbetur dominium, quem tanto consensu populus amat: propter quod Salomon dicit Prov. xxix, 14: *Rex qui judicat in justitia pauperes, thronus ejus in æternum firmabitur.* Tyrannorum vero dominium diuturnum esse non potest; cum sit multitudini odiosum. Non potest enim diu conservari quod votis multorum repugnat. Vix enim a quoquam præsens vita transigitur quin aliquas adversitates patiat. Adversitatis autem tempore occasio deesse non potest contra tyrannum insurgendi; et ubi adsit, non deerit ex multis vel unus qui occasione non utatur. Insurgentem autem populus votive prosequitur: nec de facili carebit effectu quod eum favore multitudinis attentatur. Vix ergo potest contingere quod tyranni dominium protendatur in longum.

Hoc etiam manifeste patet, si quis consideret unde tyranni dominium conservatur. Non enim conservatur amore, cum parva vel nulla sit amicitia subjectæ multitudinis ad tyrannum, ut ex præhabitis patet. De subditorum autem fide tyrannis confidendum non est. Non enim invenitur tanta virtus in multis, ut fidelitatis virtute reprimantur, ne indebitæ servitutis jugum, si possint, excutiant. Fortassis autem nec fidelitati contrarium

reputabitur secundum opinionem multorum, si tyrannicæ nequitie qualitercumque obvietur. Restat ergo ut solo timore tyranni regimen sustentetur: unde et timeri se a subditis tota intentione procurant. Timor autem est debile fundamentum: nam qui timore subduntur, si occurrat occasio qua possint impunitatem sperare, contra præsidentes insurgunt eo ardentius, quo magis contra voluntatem ex solo timore cohibebantur, sicut si aqua per violentiam includatur, cum aditum invenerit, impetuosius fluit. Sed nec ipse timor caret periculo, cum ex nimio timore plerique in desperationem incidunt. Salutis autem desperatio audacter ad qualibet attentanda præcipitat. Non potest igitur tyranni dominium esse diuturnum.

Hoc etiam non minus exemplis quam rationibus apparet. Si quis enim antiquorum gesta et modernorum eventus consideret, vix inveniet dominium tyranni alicujus diuturnum fuisse. Unde et Aristoteles in sua *Politica* multis tyrannis enumeratis, omnium demonstrat dominium brevi tempore fuisse finitum; quorum tamen aliqui diutius præferunt, quia non multum in tyrannide excedebant, sed quantum ad multa imitabantur regalem modestiam.

Adhuc autem hoc magis fit manifestum ex consideratione divini judicii. Ut enim in Job xxxiv, 30, dicitur, *Regnare facit hominem hypocritam propter peccata populi.* Nullus autem verius hypocrita dici potest quam qui regis assumit officium, et exhibet se tyrannum. Nam hypocrita dicitur qui alterius repræsentat personam, sicut in spectaculis fieri consuevit. Sic igitur Deus præfici permittit tyrannos ad puniendum subditorum peccata. Talis autem punitio in Scripturis ira Dei consuevit nominari. Unde per Oseam xiii, 11, Dominus dicit: *Dabo vobis regem in furore meo.* Infelix est autem rex qui populo in furore Dei conceditur. Non enim ejus stabile potest esse dominium; quia *non obliviscetur misereri Deus, nec continebit in ira sua misericordias suas:* Psal. lxxvi, 10: quinimmo per Joel. 11, 12, dicitur quod est *patientis, et multæ misericordiæ, et præstabilis super malitia.* Non igitur permittit Deus diu regnare tyrannos, sed post tempestatem per eos inductam populo, per eorum dejectionem tranquillitatem inducet.

Unde Eccli. x, 17, dicitur: *Sedes ducum superbiorum destruxit Deus, et sedere fecit mites pro eis.*

Experimento etiam magis apparet quod reges per justitiam magis adipiscuntur divitias quam per rapinam tyranni. Quia enim dominium tyrannorum subjectæ multitudini displicet, ideo opus habent multos habere satellites, per quos contra subditos tuti reddantur; in quibus necesse est plura expendere quam a subditis rapiant. Regum autem dominium quod subditis placet, omnes subditos pro satellitibus ad custodiam habet, in quibus expendere opus non est; sed interdum in necessitatibus plura regibus sponte donant quam tyranni diripere possint; et sic impletur quod Salomon dicit Proverb. xi, 24: *Alii, scilicet reges, dividunt propria, benefaciendo subjectis, et ditiores fiunt; alii, scilicet tyranni, rapiunt non sua, et semper in egestate sunt.* Similiter autem justo Dei contingit iudicio, ut qui divitias injuste congregant, inutiliter eas dispergant, aut etiam juste auferantur ab eis. Ut enim Salomon dicit Eccli. v, 9: *Avarus non implebitur pecunia; et qui amat pecunias, fructum non capiet ex eis:* quinimmo, ut Proverb. xv, 27, dicit, *conturbat domum suam qui sectatur avaritiam.* Regibus vero qui justitiam quærunt, divitiæ adduntur a Deo; sicut Salomon, qui dum sapientiam quæsivit ad faciendum iudicium, promissionem de abundantia divitiarum accepit.

De fama vero superfluum videtur dicere. Quis enim dubitet bonos reges non solum in vita, sed magis post mortem quodammodo laudibus hominum vivere, et in desiderio haberi; malorum vero nomen aut statim deficere, vel si excellentes in malitia fuerint, cum detestatione eorum rememorari? Unde Salomon dicit Proverb. x, 7: *Memoria justi cum laudibus, nomen autem impiorum putrescet:* quia vel deficit, vel remanet cum fœtore.

## CAPUT XI.

*Quæ supplicia sustinebunt tyranni* <sup>1</sup>.

Ex his ergo manifestum est quod stabilitas potestatis, divitiæ, honor et fama

magis regibus quam tyrannis ad votum proveniunt; propter quæ tamen indebite adipiscenda declinat in tyrannidem princeps. Nullus enim a justitia declinat nisi cupiditate alicujus commodi tractus. Privatatur insuper tyrannus excellentissima beatitudine, quæ regibus debetur pro præmio; et quod est gravius, maximum tormentum sibi acquirit in pœnis. Si enim qui unum hominem spoliatur vel in servitutem redigit vel occidit, maximam pœnam meretur; quantum quidem ad iudicium hominum mortem, quantum vero ad iudicium Dei damnationem æternam; quanto magis putandum est tyrannum deteriora mereri supplicia, qui undique ab omnibus rapit, contra omnium libertatem laborat, pro libito voluntatis suæ quoscumque interficit? Tales insuper raro pœnitent; vento inflati superbiæ, merito peccatorum a Deo deserti, et adulationibus hominum delibuti, rarius digne satisfacere possunt. Quando enim restituent omnia quæ præter justitiæ debitum abstulerunt? Ad quæ tamen restituenda nullus dubitat eos teneri. Quando recompensabunt eis quos oppresserunt, et injuste qualitercumque læserunt? Adjicitur autem ad eorum impœnitentiam quod omnia sibi licita æstimant quæ impune sine resistentia facere potuerunt: unde non solum emendare non satagunt quæ male fecerunt, sed sua consuetudine pro auctoritate utentes, peccandi audaciam transmittunt ad posteros; et sic non solum suorum facinorum apud Deum rei tenentur, sed etiam eorum quibus apud Deum peccandi occasionem reliquerunt. Aggravatur etiam eorum peccatum ex dignitate suscepti officii. Sicut enim terrenus rex gravius punit suos ministros, si invenit eos sibi contrarios; ita Deus magis punit eos quos sui regiminis executores et ministros facit, si nequiter agant, Dei iudicium in amaritudinem convertentes. Unde et in libro Sapientiæ vi, 5, ad reges iniquos dicitur: *Quoniam cum essetis ministri regni illius, non recte judicastis, neque custodistis legem justitiæ<sup>2</sup> nec secundum voluntatem Dei ambulastis; horrende et cito apparebit vobis: quoniam iudicium durissimum his<sup>3</sup> qui præsumunt fiet. Erigite enim conceditur misericordia; potentes autem potenter*

<sup>1</sup> Quod bona etiam mundialia, ut sunt divitiæ, potestas, honor, et fama, magis proveniunt regibus quam tyrannis: et de malis quæ incurrunt

tyranni etiam in hac vita.

<sup>2</sup> Al.: « justitiæ nostræ. »

<sup>3</sup> Al.: « in his. »

*tormenta patientur.* Et Nabuchodonosor per Isa. xiv, 15, dicitur : *Ad infernum detraheris in profundum lacu. Qui te viderint, ad te inclinabuntur, teque prospicient* quasi profundis in pœnis submersum. Si igitur regibus abundant temporalia bona et proveniunt, et excellens beatitudinis gradus præparatur a Deo ; tyranni autem a temporalibus bonis quæ capiunt, plerumque frustrantur, multis insuper periculis subjacentes, et quod est amplius, bonis æternis privantur, ad pœnas gravissimas reservati : vehementer studendum est his qui regendi officium suscipiunt, ut reges se subditis præbent, non tyrannos. De rege autem quid sit, et quod expediat multitudini regem habere ; adhuc autem quod præsi expediat se regem multitudini exhibere subjectæ, non tyrannum : tanta a nobis dicta sint.

#### CAPUT XII<sup>1</sup>.

##### *Quid sit regis officium<sup>2</sup>.*

Consequens autem ex dictis est considerare quod sit regis officium et qualem oporteat esse regem. Quia vero ea quæ sunt secundum artem, imitantur ea quæ sunt secundum naturam, ex quibus accipimus ut secundum rationem operari possimus ; optimum videtur regis officium a forma regiminis naturalis assumere. Invenitur autem in rerum natura regimen et universale et particulare. Universale quidem secundum, quod omnia sub Dei regimine continentur, qui sua providentia universa gubernat. Particulare autem regimen maxime quidem divino regimini simile est, quod invenitur in homine : qui ob hoc minor mundus appellatur, quia in eo invenitur forma universalis regiminis. Nam sicut universa creatura corporea et omnes spirituales virtutes sub divino regimine continentur ; sic et corporis membra et ceteræ vires animæ a ratione reguntur ; et sic quodam modo se habet ratio in homine, sicut Deus in mundo. Sed quia, sicut ostendimus, homo est animal naturaliter sociale, in multitudine vivens ; similitudo

divini regiminis invenitur in homine non solum quantum ad hoc quod per rationem regitur unus homo, sed etiam quantum ad hoc quod per rationem unius hominis regitur multitudo : quod maxime pertinet ad officium regis, dum, et in quibusdam animalibus quæ socialiter vivunt, quædam similitudo invenitur hujus regiminis, sicut in apibus, in quibus et reges esse dicuntur : non quod in eis per rationem sit regimen, sed per instinctum naturæ inditum a summo regente, qui est auctor naturæ. Hoc igitur officium rex suscepisse cognoscat, ut sit in regno sicut in corpore anima, et sicut Deus in mundo. Quæ si diligenter recogitet, ex altero justitiæ in eo zelus accenditur, dum considerat ad hoc se positum ut loco Dei iudicium regno exerceat ; ex altero vero mansuetudinis et clementiæ lenitatem acquirit, dum reputat singulos qui suo subsunt regimini, sicut propria membra.

#### CAPUT XIII.

##### *Quid sit regi faciendum et quomodo<sup>3</sup>.*

Oportet igitur considerare, quid Deus in mundo faciat : sic enim manifestum erit quid imminet regi faciendum. Sunt autem universaliter considerata duo opera Dei in mundo : unum quo mundum instituit ; alterum quo mundum institutum gubernat. Hæc etiam duo opera anima habet in corpore. Nam primo quidem virtute animæ informatur corpus : deinde vero per animam corpus regitur et movetur. Horum autem secundum quidem magis proprie pertinet ad regis officium : unde ad omnes reges pertinet gubernatio, et a gubernationis regimine regis nomen accipitur. Primum autem opus non omnibus regibus convenit : non enim omnes regnum aut civitatem instituunt, in quo regnant ; sed regno ac civitati jam institutis regiminis curam impendunt. Est autem considerandum, quod nisi præcessisset qui institueret civitatem aut regnum, locum non haberet gubernatio regni. Sub regis enim officio

<sup>1</sup> Illic in Cod. S. Genoy. lib. secundus incipit.

<sup>2</sup> Procedit ad ostendendum regis officium : ubi secundum viam naturæ ostendit regem esse in regno sicut anima est in corpore, et sicut Deus est in mundo.

<sup>3</sup> Assumit ex hæc similitudine modum regiminis, ut sicut Deus unamquamque rem distinguit quodam ordine, et propria operatione et loco, ita rex subditos suos in regno : et eodem modo de anima.

comprehenditur etiam institutio civitatis et regni: nonnulli enim civitates instituerunt, in quibus regnarent, ut Ninus Ninivem, et Romulus Romam. Similiter etiam ad gubernationis officium pertinet ut gubernata conservet, ac eis utatur ad quod sunt constituta. Non igitur gubernationis officium plene cognosci poterit, si institutionis ratio ignoretur. Ratio autem institutionis regni ab exemplo institutionis mundi sumenda est: in quo primo consideratur ipsarum rerum productio, deinde partium mundi ordinata distinctio. Ulterius autem singulis mundi partibus diversæ rerum species distributæ videntur, ut stellæ cælo, volucres aeri, pisces aquæ, animalia terræ: deinde singulis ea quibus indigent, abundanter divinitus provisa videntur. Hanc autem institutionis rationem Moyses subtiliter et diligenter expressit. Primo enim rerum productionem proponit dicens: *In principio creavit Deus cælum et terram.* Deinde secundum ordinem convenientem omnia divinitus distincta esse denuntiat, videlicet diem a nocte, a superioribus inferiora, mare ab arida. Hinc cælum luminaribus, avibus aerem, mare piscibus animalibus terram ornatam refert: ultimo assignatum hominibus terræ animaliumque dominium. Usus vero plantarum tam ipsis quam animalibus ceteris ex providentia divina, denuntiat. Institutor autem civitatis et regni de novo producere homines, et loca ad inhabitandum, et cetera vitæ subsidia non potest, sed necesse habet his uti quæ in natura præexistunt; sicut etiam ceteræ artes operationis suæ materiam a natura accipiunt, ut fabri ferrum, ædificator ligna et lapides in artis usum assumunt.

Necesse est igitur institutori civitatis et regni primum quidem congruum locum eligere qui salubritate habitores conservet, ubertate ad victum sufficiat, amœnitate delectet, munitione ab hostibus tutos reddat. Quod si aliquid de dicta opportunitate deficiat, tanto locus erit convenientior, quanto plura vel magis necessaria di prædictis habuerit. Deinde necesse est ut locum electum institutor civitatis aut regni distinguat secundum exigentiam eorum quæ perfectio civitatis aut regni requirit: puta, si regnum

instituendum sit, oportet providere quis locus aptus sit urbibus constituendis, quis villis, quis castris; ubi constituenda sint studia litterarum, ubi exercitia militum, ubi negotiatorum conventus; et sic de aliis quæ perfectio regni requirit. Si autem institutioni civitatis opera detur, providere oportet quis locus sit sacris, quis juri reddendo, quis artificibus singulis deputandus. Ulterius autem oportet hominis congregare, qui sunt congruis locis secundum sua officia deputandi. Demum vero providendum est ut singulis necessaria suppetant secundum uniuscujusque constitutionem et statum: aliter enim nequaquam posset regnum vel civitas commanere.

Hæc igitur sunt, ut summarie dicatur, quæ ad regis officium pertinent in institutione civitatis aut regni, ex similitudine institutionis mundi assumpta.

#### CAPUT XIV.

*Quod ratio gubernationis mundi ex divina gubernatione sumenda est<sup>1</sup>.*

Sicut autem institutio civitatis aut regni ex forma institutionis mundi convenienter accipitur, sic et gubernationis ratio ex gubernatione sumenda est. Est tamen præconsiderandum, quod gubernare est, id quod gubernatur, convenienter ad debitum finem perducere. Sicut etiam navis gubernari dicitur, dum per nautæ industriam recto itinere ad portum illæsa perducitur. Si igitur aliquid ad finem extra se ordinetur, ut navis ad portum; ad gubernatoris officium pertinebit non solum ut rem in se conservet illæsam, sed quod ulterius ad finem perducatur. Si vero aliquid esset cujus finis non esset extra ipsum, ad hoc solum intenderet gubernatoris intentio ut rem illam in sua perfectione conservaret illæsam. Et quamvis nihil tale inveniatur in rebus post ipsum Deum, qui est omnibus finis, erga id tamen quod ad extrinsecum ordinatur, multipliciter cura impenditur a diversis. Nam forte alius erit qui curam gerit ut res in suo esse conservetur; alius autem, ut ad altiorem perfectionem perveniat: ut in ipsa navi, unde gubernationis ratio

<sup>1</sup> Quis modus gubernandi competat regi, quia secundum modum gubernationis divinæ: qui quidem modus gubernandi a gubernatione navis

sumpsit initium: ubi et ponitur comparatio sacerdotalis dominii et regalis.



assumitur, manifeste apparet. Faber enim lignarius curam habet restaurandi, si quid collapsum fuerit in navi; sed nauta sollicitudinem gerit ut navem perducatur ad portum: sic etiam contingit in homine. Nam medicus curam gerit ut vita hominis conservetur in sanitate; œconomus, ut suppetant necessaria vitæ; doctor autem curam gerit ut veritatem cognoscat, institutor autem morum, ut secundum rationem vivat. Quod si homo non ordinaretur ad aliud exterius bonum, sufficerent homini curæ prædictæ. Sed est quoddam bonum extraneum homini, quamdiu mortaliter vivit, scilicet ultima beatitudo, quæ in fruitione Dei expectatur post mortem: quia, ut Apostolus ait II ad Corinth. v. 6: *quamdiu sumus in corpore, peregrinamur a Domino*. Unde homo christianus, cui beatitudo illa est per Christi sanguinem acquisita, et qui pro ea assequenda Spiritus sancti arham accepit, indiget alia spiritualia cura, per quam dirigatur ad portum salutis æternæ. Hæc autem cura per ministros Ecclesiæ Christi fidelibus exhibetur. Idem autem oportet esse iudicium de fine totius multitudinis, et unius. Si igitur finis hominis esset bonum quodcumque in ipso existens; et regendæ multitudinis finis ultimus esset similiter ut tale bonum multitudo acquireret, et in eo permaneret. Et si quidem talis ultimus sive unius hominis sive multitudinis finis esset corporalis vita et sanitas corporis; medici esset officium. Si autem ultimus finis esset divitiarum affluentia, œconomus rex quidam multitudinis esset. Si vero bonum cognoscendæ veritatis tale quid esset ad quod posset multitudo pertinere, rex haberet doctoris officium. Videtur autem finis esse multitudinis congregatæ, vivere secundum virtutem. Ad hoc enim homines congregantur ut simul bene vivant quod consequi non posset unusquisque singulariter vivens. Bona autem vita est secundum virtutem. Virtuosa igitur vita est congregationis humanæ finis. Huius autem signum est quod hi soli partes sint multitudinis congregatæ qui sibi invicem communicant in bene vivendo. Si enim propter solum vivere homines convenirent; animalia et servi essent pars aliqua congregationis civilis. Si vero propter acquirendas divitias, omnes simul negotiantes ad unam civitatem pertinerent; sicut videmus eos solos sub una multitudine computari qui

sub eisdem legibus et eodem regimine diriguntur ad bene vivendum. Sed quia homo vivendo secundum virtutem ad ulteriorem finem ordinatur, qui consistit in fruitione divina, ut supra jam diximus; oportet eundem finem esse multitudinis humanæ qui est hominis unius. Non est ergo ultimus finis multitudinis congregatæ vivere secundum virtutem, sed per virtuosam vitam pervenire ad fruitionem divinam. Si quidem autem ad hunc finem perveniri posset virtute humanæ naturæ, necesse esset ut ad officium regis pertineret dirigere homines in hunc finem. Hunc enim dici regem supponimus cui summa regiminis in rebus humanis committitur. Tanto autem est regimen sublimius, quanto ad finem ulteriorem ordinatur. Semper enim invenitur ille ad quem pertinet ultimus finis imperare operantibus ea quæ ad finem ultimum ordinantur; sicut gubernator ad quem pertinet navigationem disponere, imperat ei qui navem constituit, qualem navem navigationi aptam facere debeat; civilis autem qui utitur armis, imperat fabro qualia arma fabricet. Sed quia finem fruitionis divinæ non consequitur homo per virtutem humanam, sed virtute divina, juxta illud Apostoli Rom. vi, 23: *Gratia Dei, vita æterna*; perducere ad illum finem non humani erit, sed divini regiminis. Ad illum igitur regem huiusmodi regimen pertinet qui non est solum homo, sed etiam Deus, scilicet ad Dominum nostrum Jesum Christum, qui homines filios Dei faciens in cœlestem gloriam introduxit. Hoc igitur est regimen ei traditum quod non corrumpetur, propter quod non solum Sacerdos, sed rex in Scripturis sacris nominatur, dicente Jerem. xxiii, 5: *Regnabit rex, et sapiens erit*. Unde ab eo regale sacerdotium derivatur: et, quod est amplius, omnes Christi fideles, in quantum sunt membra ejus, reges et sacerdotes dicuntur. Huius ergo regni ministerium, ut a terrenis essent spiritualia distincta, non terrenis regibus, sed sacerdotibus est commissum, et præcipue summo Sacerdoti successori Petri, Christi vicario, Romano Pontifici, cui omnes reges populi christiani oportet esse subditos sicut ipsi Domino Jesu Christo. Sic enim ei ad quem finis ultimi cura pertinet, subditi debent illi ad quos pertinet cura antecedentium finium, et ejus imperio dirigi. Quia igitur sacerdotium gentium et totus divino-

rum cultus erat propter temporalia bona conquirenda, quæ omnia ordinantur ad multitudinis bonum commune, cujus regi cura incumbit; convenienter sacerdotes gentilium regibus subdebantur. Sed et quia in veteri lege promittebantur bona terrena non a dæmonibus, sed a Deo vero religioso populo exhibenda; inde et in lege veteri sacerdotes regibus leguntur fuisse subjecti. Sed in nova lege est sacerdotium altius, per quod homines traducuntur ad bona cœlestia: unde in lege Christi reges debent sacerdotibus esse subjecti. Propter quod mirabiliter ex divina providentia factum est ut in Romana urbe, quam Deus præviderat christiani populi principalem sedem futuram, hic mos paulatim inolesceret, ut civitatum rectores sacerdotibus subjacerent. Sicut enim Valerius Maximus refert, « omnia post religionem ponenda semper nostra civitas duxit, etiam in quibus summæ majestatis decus conspici voluit. Quapropter non dubitaverunt sacris imperia servire, ita se humanarum rerum habitura regimen æstimantia, si divinæ potentiæ bene atque constanter fuissent famulata. » Quia vero etiam futurum erat ut in Gallia christiani sacerdotii plurimum vigeret religio, divinitus est permissum ut etiam apud Gallos gentiles sacerdotes, quod Druidas nominabant, totius Galliæ jus definirent, ut refert Julius Cæsar in libro quem de *Bello Gallico* scripsit.

## CAPUT XV.

*Quod regnum ordinari debet ad beatitudinem consequendam principaliter*<sup>1</sup>.

Sicut autem ad vitam quam in cœlo speramus beatam ordinatur sicut ad finem vita qua hic homines bene vivunt: ita ad bonam multitudinis vitam ordinantur<sup>2</sup> sicut ad finem quæcumque particularia bona per hominem procurantur, sive divitiæ, sive luera, sive sanitas, sive facundia vel eruditio. Si igitur, ut dictum est, qui de ultimo fine curam

habet, præesse debet his qui curam habent de ordinatis ad finem, et eos dirigere suo imperio; manifestum ex dictis fit, quod rex sicut dominio et regimini quod administratur per sacerdotis officium, subdi debet, ita præesse debet omnibus humanis officiis, et ea imperio sui regiminis ordinare. Cuicumque autem incumbit aliquid perficere quod ordinatur in aliud sicut in finem, hoc debet attendere ut suum opus sit congruum fini; sicut faber facit gladium ut pugnae conveniat, et ædificator sic debet domum disponere ut ad habitandum sit apta.

Quia igitur vitæ qua in præsentī bene vivimus, finis est beatitudo cœlestis: ad regis officium pertinet ea ratione vitam multitudinis bonam procurare secundum quod congruit ad cœlestem beatitudinem consequendam; ut scilicet ea præcipiat quæ ad cœlestem beatitudinem ducunt, et eorum contraria, secundum quod fuerit possibile, interdicat. Quæ autem sit ad veram beatitudinem via, et quæ sint impedimenta ejus, ex lege divina cognoscitur, cujus doctrina pertinet ad sacerdotum officium, secundum illud Malachiæ n, 7: *Labia sacerdotis custodient scientiam, et legem requirent*<sup>3</sup> de ore ejus. Et ideo in Deuter. xvii, 48. Dominus præcipit: *Postquam sederit rex in solio regni sui, describet sibi Deuteronomium legis hujus in volumine, accipiens exemplar a sacerdote Leviticæ tribus, et habebit secum, legetque illud omnibus diebus vitæ suæ, ut discat timere Dominum Deum suum, et custodire verba et cæremonias ejus quæ in lege præcepta sunt.* Rex legem igitur divinam edoctus, ad hoc præcipuum studium debet intendere, qualiter multitudo sibi subdita bene vivat: quod quidem studium in tria dividitur; ut primo quidem in subjecta multitudo bonam vitam instituat, secundo ut institutam conservet, tertio ut conservatam ad meliora promoveat.

Ad bonam autem unius hominis vitam duo requiruntur: unum principale quod est operatio secundum virtutem (virtus enim est qua bene vivitur); aliud vero

<sup>1</sup> Quod sicut ad ultimum finem consequendum requiritur ut rex subditos suos ad vivendum secundum virtutem disponat, ita ad fines medios; et ponuntur hic quæ sunt illa quæ ordinant ad bene vivendum, et quæ impediunt: et quod remedium rex apponere debet circa dicta impedi-

menta.

<sup>2</sup> Al.: « ita bonam multitudinis ordinat sicut ad finem etc. » Parm.: « ad bonum multitudinis ordinantur. »

<sup>3</sup> Al.: « sacerdotum custodiunt. »

secundarium et quasi instrumentale, scilicet corporalium bonorum sufficientia, quorum usus est necessarius ad actum virtutis. Ipsa tamen hominis unitas per naturam causatur: multitudinis autem unitas, quæ pax dicitur, per regentis industriam est procuranda. Sic igitur ad bonam vitam multitudinis instituendam tria requiruntur. Primo quidem ut multitudo in unitate pacis constituatur. Secundo ut multitudo vinculo pacis unita dirigatur ad bene agendum: sicut enim homo nihil bene agere potest nisi præsupposita suarum partium unitate; ita hominum multitudo pacis unitate carens, dum impugnat se ipsam, impeditur a bene agendo. Tertio vero requiritur ut per regentis industriam necessariorum ad bene vivendum adsit sufficiens copia. Sic igitur bona vita per regis officium in multitudine constituta, consequens est ut ad ejus conservationem intendat.

Sunt autem tria quibus bonum publicum permanere non sinitur. Quorum quidem unum est a natura proveniens. Non enim bonum multitudinis ad unum tantum tempus institui debet, sed ut sit quodammodo perpetuum. Homines autem cum sint mortales, in perpetuum durare non possunt: nec dum vivunt, semper sunt in eodem vigore, quia multis variationibus humana vita subicitur; et sic non sunt homines ad eadem officia peragenda æqualiter per totam vitam idonei. Aliud autem impedimentum boni publici conservandi ab interiori proveniens, in perversitate voluntatum consistit, dum vel sunt desides ad ea peragenda quæ requirit respublica, vel insuper sunt paci multitudinis noxii, dum transgrediendo justitiam, aliorum pacem perturbant. Tertium autem impedimentum rei publicæ conservandæ ab exteriori causatur, dum per incursum hostium pax dissolvitur, et interdum regnum aut civitas funditus dissipatur. Igitur circa tria prædicta triplex cura imminet regi. Primo quidem de successione hominum, et substitutione illorum qui diversis officiis præsent; ut sicut per divinum regimen in rebus corruptibilibus, quia semper eadem durare non possunt, provisum est ut per generationem alia in locum aliorum succedant, ut vel sic conservetur

integritas universi; ita per regis studium conservetur subjectæ multitudinis bonum, dum sollicite curat qualiter alii in deficientium locum succedant. Secundo autem ut suis legibus et præceptis, pœnis et præmiis homines sibi subjectos ab iniquitate coerceat, et ad opera virtuosa inducat, exemplum a Deo accipiens, qui hominibus legem dedit, observantibus quidem mercedem, transgredientibus pœnas retribuens. Tertio imminet regi cura ut multitudo sibi subjecta contra hostes tuta reddatur. Nihil enim prodesset interiora vitare pericula, si ab exterioribus defendi non posset.

Sic igitur bonæ multitudinis institutioni tertium restat ad regis officium pertinens, ut sit de promotione sollicitus; quod fit dum in singulis quæ præmissa sunt, si quid inordinatum est corrigere: si quid deest, supplere; si quid melius fieri potest, studet perficere. Unde et Apostolus I Corinth. xii, fideles manet ut semper amulentur *charismata meliora*.

Hæc igitur sunt quæ ad regis officium pertinent; de quibus per singula diligentius tractare oportet.

## LIBER SECUNDUS.

### CAPUT I.

*Quod ad officium regis spectet in institutione* <sup>1</sup>.

Primum igitur præcipue oportet exponere regis officium ab institutione civitatis aut regni. Nam sicut Vegetius dicit, potentissimæ nationes et principes nominati nullam majorem potuerunt gloriam assequi quam aut fundare novas civitates, aut ab aliis conditas in nomen suum sub quadam amplificatione transferre: quod quidem documentis sacre Scripturæ concordat. Dicit enim Sapiens in Eccli. xi. 19 quod *ædificatio civitatis confirmabit nomen*. Hodie namque nomen Romuli nesciretur, nisi quia condidit Romam. In institutione autem civitatis aut regni, si copia detur, primo quidem est regio per regem eligenda, quam temperatam esse oportet. Ex regionis enim temperie ha-

<sup>1</sup> Qualiter ad regem pertinet instituire civitatem, vel castra ad gloriam consequendam; et quod eligere debet ad hoc loca temperata; et

quæ commoda ex hoc, regno consequantur, et quæ incommoda de contrario.

bitatores multa commoda consequuntur. Primo namque consequuntur homines ex temperie regionis incolumitatem corporis et longitudinem vitæ. Cum enim sanitas in quadam temperie humorum consistat, in loco temperato conservabitur sanitas : simile namque suo simili conservatur. Si autem fuerit excessus caloris vel frigoris, necesse est quod secundum qualitatem aeris corporis qualitas immutetur : unde quadam naturali industria animalia quædam tempore frigido ad calida loca se transferunt, rursus tempore calido loca frigida repetentes, ut ex contraria dispositione temporis temperiem consequantur. Rursus, cum animal vivat per calidum et humidum, si fuerit calor intensus, cito naturale humidum exsiccat, et deficit vita, sicut lucerna cito extinguitur, si humor infusus cito per ignis magnitudinem consumatur. Unde in quibusdam calidissimis Æthiopum regionibus homines ultra triginta annos non vivere perhibentur. In regionibus vero frigidis in excessu, naturale humidum de facili congelatur, et calor naturalis extinguitur. Deinde ad opportunitates bellorum, quibus tuta redditur humana societas, regionis temperies plurimum valet. Nam, sicut Vegetius refert, omnes nationes quæ vicinæ sunt soli, nimio calore siccatae, amplius quidem sapere, sed minus de sanguine habere dicuntur, ac propterea constantiam atque fiduciam de propinquo pugnandi non habent, quia metuunt vulnera qui modicum sanguinem se habere noverunt. E contra septentrionales populi remoti a solis ardoribus inconsultiores quidem, sed tamen largo sanguine redundantes, sunt ad bella promptissimi. His qui temperatioribus habitant plagis et copia sanguinis suppetit ad vulnerum mortisque contemptum, nec prudentia deficit, quæ modestiam servet in castris, et non parum prodest uti in dimicatione consiliis. Demum temperata regio ad politicam vitam valet. Ut enim Aristoteles dicit in sua *Politica*, quæ in frigidis locis habitant gentes, sunt quidem plenæ animositate, intellectu autem et arte magis deficientes, propter quod liberæ perseverant magis; non vivunt autem politice, et vicinis propter imprudentiam principari non possunt. Quæ, autem in calidis

sunt, intellectivæ quidem sunt, et artificiosæ secundum animam, sine animositate autem : propter quod subjectæ quidem sunt, et subjectæ perseverant. Quæ autem in mediis locis habitant, utroque participant; propter quod et liberi perseverant, et maxime politice vivere possunt, et sciunt aliis principari. Est igitur eligenda regio temperata ad institutionem civitatis vel regni.

## CAPUT II.

*Quod locus habeat aerem salubrem* <sup>1</sup>.

Post electionem autem regionis, oportet civitati constituendæ idoneum locum eligere : in quo primo videtur aeris salubritas requirenda. Conversationi enim civili præjacet naturalis vita, quæ per salubritatem aeris servatur illæsa. Locus autem saluberrimus erit, ut Vegetius tradit, excelsus, non nebulosus, non pruinosus, regionesque cæli spectans neque æstuosas neque frigiditas, demum paludibus non vicinus. Eminentia quidem loci solet ad aeris salubritatem conferre, quia locus eminens ventorum perflationibus patet, quibus redditur aer purus : vapores etiam qui virtute radii solaris resolvuntur a terra et ab aquis, multiplicantur magis in convallibus et in locis demissis quam in altis : unde in locis altis aer subtilior invenitur. Hujusmodi autem subtilitas aeris, quæ ad liberam et sinceram respirationem plurimum valet, impeditur per nebulas et pruinas, quæ solent in locis multum humidis abundare : unde loca hujusmodi inveniuntur salubritati esse contraria. Et quia loca paludosa nimia humiditate abundant, oportet locum construendæ urbi electum a paludibus esse remotum. Cum enim auræ matutinæ sole oriente ad locum ipsum pervenient, et eis ortæ a paludibus nebulæ adjungentur, flatus bestiarum palustrium venenatarum cum nebulis mixtos spargent, et locum facient pestilentem. Si tamen mœnia constructa fuerint in paludibus quæ fuerint prope mare, spectentque ad septentrionem, vel circa, hæque paludes excelsiores fuerint quam littus marinum, rationaliter videbuntur esse constructa. Fossis

<sup>1</sup> Qualiter eligere debent reges et principes regiones ad civitates vel castra instituenda, in qui-

bus aer sit salubris : et ostendit in quo talis aer cognoscitur, et quibus signis.

enim ductis exitus aquæ patebit ad litus, et mare tempestatibus auctum in paludes redundando non permittet animalia palustria nasci. Et si aliqua animalia de superioribus locis venerint, inconsueta salsedine occidentur. Oportet et locum urbi destinatum ad calorem et frigus temperate disponi secundum aspectum ad plagas cœli diversas. Si enim mœnia, maxime prope mare constituta spectabunt ad meridiem, non erunt salubria. Nam hujusmodi loca mane quidem erunt frigida, quia non respiciuntur a sole; meridie vero erunt ferventia propter solis respectum. Quæ autem ad occidentem spectant, orto sole tepescunt vel etiam frigent, meridie calent, vespere fervent propter caloris continuitatem et solis aspectum. Si vero ad orientem spectabunt, mane quidem propter solis oppositionem directam temperate calescent; nec multum in meridie calor augebitur, sole non directe spectante ad locum, vespere vero totaliter radiis solis aversis loca frigescent. Eademque vel similis temperies erit, si ad aquilonem locus respiciat urbis, e converso est quod de meridiem respiciente est dictum. Experimento autem cognoscere possumus quod in majorem calorem minus salubriter aliquis transmutatur. Quæ enim a frigidis locis corpora traducuntur in calida, non possunt durare, sed dissolvuntur, quia calor sugendo vaporem naturales virtutes dissolvit: unde etiam in salubribus locis corpora æstate infirma redduntur. Quia vero ad corporum sanitatem convenientium ciborum usus requiritur, in hoc conferre oportet de loci salubritate qui constituendæ urbi eligitur, ut ex conditione ciborum discernatur qui nascuntur in terra: quod quidem explorare solebant antiqui ex animalibus ibidem nutritis. Cum enim hominibus aliisque animalibus commune sit uti ad nutrimentum his quæ nascuntur in terra, consequens est ut si occisorum animalium viscera inveniuntur bene valentia quod homines etiam in loco eodem salubribus possint nutriri. Si vero animalium occisorum apparent morbida membra, rationabilis accipi potest quod nec hominibus illius loci habitatio sit salubris. Sicut autem aer temperatus,

ita salubris aqua est requirenda. Ex his enim maxime dependet sanitas corporum, quæ sæpius in usum hominum assumuntur. Et de aere quidem manifestum est quod quotidie ipsum aspirando introrsum attrahimus usque ad ipsa vitalia: unde principaliter ejus salubritas ad incolumitatem corporum confert. Item quia inter ea quæ assumuntur per modum nutrimenti, aqua est qua sæpissime utimur tam in potibus quam in cibis; ideo nihil est præter aeris puritatem magis pertinens ad loci sanitatem quam aquarum salubritas. Est et aliud signum ex quo considerari potest loci salubritas; si videlicet hominum in loco commorantium facies bene coloratæ appareant, robusta corpora, et bene disposita membra; si pueri multi et vivaces, si senes multi reperiantur ibidem. E converso, si facies hominum deformes appareant, debilia corpora, exinanita membra vel morbida, si pauci et morbidi pueri, et adhuc pauciores senes; dubitari non potest locum esse mortiferum.

### CAPUT III.

*Quod habeat ubertatem propter motuum.*

Oportet autem ut locus construendæ urbi electus non solum talis sit qui salubritate habitatores conservet, sed ubertate ad victum sufficiat. Non enim est possibile multitudinem hominum habitare ubi victualium non suppetit copia. Unde, ut<sup>2</sup> Vitruvius refert, cum Xenocrates architector peritissimus Alexandro Macedoni demonstraret in quodam monte civitatem egregiæ formæ construi posse, interrogasse fertur Alexander, si essent agri qui civitati possent frumentorum copiam ministrare. Quod cum deficere inveniret, respondit vituperandum esse, si quis in tali loco civitatem construeret. Sicut enim natus infans non potest ali sine nutricis lacte, nec ad incrementum perducii; sic civitas sine ciborum abundantia frequentiam populi habere non potest. Duo tamen sunt modi quibus alieni civitati potest affluentia rerum suppetere. Unus, qui dictus est, propter regionis fertilitatem abunde omnia pro-

<sup>1</sup> Qualiter necesse est talem civitatem construendam a rege, habere copiam rerum victualium, quia sine eis civitas esse perfecta non po-

test: et distinguit duplicem modum istius copię, primum tamen magis commendat.

<sup>2</sup> Parm: « vult Philosophus. »



ducentis quæ humanæ vitæ requirit necessitas. Alius autem per mercationis usum, ex quo ibidem necessaria vitæ ex diversis partibus adducantur. Primus autem modus convenientior esse manifeste convincitur. Tanto enim aliquid dignius est, quanto per se sufficientius invenitur; quia quod alio indiget, deficiens esse monstratur. Sufficientiam autem plenius possidet civitas cui circumjacens regio sufficiens est ad necessaria vitæ, quam illa quæ indiget ab aliis per mercationem accipere. Dignior enim est civitas si abundantiam rerum habeat ex territorio proprio, quam si per mercatores abundet. Cum hoc etiam videtur esse securius; quia propter bellorum eventos et diversa viarum discrimina, de facili potest impediri victualium deportatio, et sic civitas per defectum victualium opprimetur. Est etiam hoc utilius ad conversationem civilem. Nam civitas quæ ad sui sustentationem mercationum multitudine indiget, necesse est ut continuum extraneorum convictum patiat. Extraneorum autem conversatio corrumpit plurimum civium mores, secundum Aristotelis doctrinam in sua *Politica*: quia necesse est evenire ut homines extranei aliis legibus et consuetudinibus enutriti, in multis aliter agant quam sint civium mores; et sic dum cives exemplo ad agenda similia provocantur, civilis conversatio perturbatur. Rursus si cives ipsi mercationibus fuerint dediti, panditur pluribus vitiis aditus. Nam cum negotiatorum studium maxime ad lucrum tendat, per negotiationis usum cupiditas in cordibus civium traducitur, ex quo convenit ut in civitate omnia fiant venalia, et fide subtracta locus fraudibus aperitur, publicoque bono contempto, proprio commodo quisque deserviet, deficientque virtutis studium, dum honor virtutis præmium omnibus deferretur: unde necesse erit in tali civitate civilem conversationem corrumpi. Est etiam negotiationis usus contrarius quam plurimum exercitio militari. Negotiatores enim dum umbram colunt, a laboribus vacant; et dum fruuntur deliciis, mollescunt animo, et corpora redduntur debilia, et ad labores militares inepta: unde secundum jura civilia ne-

gotiatio est militibus interdicta. Denique civitas illa solet esse magis pacifica cujus populus rarius congregatur, minusque intra urbis mœnia resident. Ex frequenti enim hominum concursu datur occasio litibus, et seditionibus materia ministratur: unde secundum Aristotelis doctrinam utilius est quidem quod populus extra civitates exerceatur, quam quod intra civitatis mœnia jugiter commoretur. Si autem civitas sit mercationibus dedita, maxime necesse est ut intra urbem cives resideant, ibique mercationes exercent. Melius igitur est quod civitati victualium copia suppetat ex propriis agris, quam quod civitas sit totaliter negotiationi exposita. Nec tamen negotiatores omnino a civitate oportet excludi, quia non de facili potest inveniri locus qui sic omnibus vitæ necessariis abundet quod non indigeat aliquibus aliunde allatis; eorumque in eodem loco superabundant, eodem modo reddetur multis damnosa copia, si per mercatorum officium ad alia loca transferri non possent. Unde oportet quod perfecta civitas moderate mercatoribus utatur.

## CAPUT IV.

*Quid sit locus amœnus* <sup>1</sup>.

Est etiam construendis <sup>2</sup> urbibus eligendus locus qui amœnitate habitatores delectet. Non enim facile deseritur locus in quo delectabiliter vivitur <sup>3</sup> nec de facili ad locum illum confluit habitantium multitudo cui deest amœnitas, eo quod absque amœnitate vita hominis diu durare non possit. Ad hanc autem amœnitatem pertinet quod sit locus camporum planitie distentus, arborum ferax, montium propinquitate conspicuus, nemoribus gratus, et aquis irriguus. Verum <sup>4</sup> nimia amœnitas superflue ad delicias homines allicit quod civitati plurimum nocet; ideo oportet ea moderate uti. Primo namque homines vacantes deliciis, sensu hebetantur; immergit enim earum suavitas sensibus animam, ita quod in rebus delectantibus liberum iudicium habere non possunt. Unde secundum Aristotelis sententiam, prudentia iudicis per delecta-

<sup>1</sup> Quod regio quam rex eligit ad civitates et castra instituenda, debet habere amœnitates: in quibus cives sunt arcendi, ut moderate eis utantur, quia sæpius sunt causa dissolutionis, unde

regnum dissipatur.

<sup>2</sup> Parm.: « constituentibus. »

<sup>3</sup> Parm.: « amœnus. »

<sup>4</sup> Parm. addit: « quia. »

tionem corrumpitur. Deinde delectationes superflue ab honestate virtutis deficere faciunt : nihil enim magis perducit ad immoderatum augmentum, per quod medium virtutis corrumpitur, quam delectatio : tum quia natura delectationis est avida, et sic modica delectatione sumpta præcipitatur in turpium delectationum illecebras, sicut ligna sicca ex modico igne accenduntur : tum etiam quia delectatio appetitum non satiat, sed gustata sitim sui magis inducit. Unde ad virtutis officium pertinet ut homines a delectationibus superfluis abstineant. Sic enim superfluitate vitata facilius ad medium virtutis perveniuntur. Consequenter etiam deliciis superflue dediti mollescent animo, et ad ardua quæque attentanda, nec non ad tolerandos labores et pericula abhorrenda pusillanimes fiunt : unde et ad bellicum usum deliciæ plurimum nocent : quia, ut Vegetius dicit in libro *De re militari*, minus timet mortem qui minus deliciarum se novit habuisse in vita. Demum deliciis resoluti plerumque pigrescunt, et intermissis necessariis studiis et negotiis debitis, solis deliciis adhibent curam, in quas quæ prius ab aliis fuerant congregata, profusi dispergunt : unde ad paupertatem deducti, dum consuetis deliciis carere non possunt, se furtis et rapinis exponunt, ut habeant unde possint suas voluptates explere. Est igitur nocivum civitati, vel ex loci dispositione, vel ex quibuscumque aliis rebus, deliciis superfluis abundare. Opportunum est autem <sup>1</sup> in conversatione humana modicum delectationis quasi pro condimento habere, ut animis <sup>2</sup> hominum recreentur quia, ut Seneca dicit *De tranquillitate animi ad Serenum*, danda est animis remissio. Meliores enim aptioresque requieti resurgunt ; quasi prosit animo temperate deliciis uti, ut sal in ciborum coctura pro ipsorum suavitate quod superflue immissum illos corrumpit. Amplius autem, si id quod est ad finem, ut finis quæritur, tollitur et destruitur ordo naturæ ; sicut si faber quærit martellum propter se ipsum, aut carpentarius seram, sive medicus medicinam, quæ ordinantur ad suos debitos fines. Finis autem quem rex in civitate sui regiminis debet intendere, est vivere secundum

virtutem : ceteris autem quilibet uti debet sicut his quæ sunt ad finem, et quantum est necessarium in prosequendo finem. Hoc autem non contingit in his quæ sunt ad finem, et quantum est necessarium in prosequendo finem. Hoc autem non contingit in his qui superflue delectationibus innituntur, quia tales delectationes non ordinantur ad finem jam dictum, immo quæri videntur ut finis : quo quidem modo videntur velle uti illi impii qui in libro Sapientiæ cap. 11, 6, dicunt, non recte cogitantes, ut dicta Scriptura testatur : *Venite, fruamur bonis quæ sunt quod ad finem pertinet, et utamur creatura, tamquam in juventute celeriter*, et cetera quæ ibidem sequuntur. In quibus immoderatus usus delectabilium corporis ut juvenilis ætatis ostenditur, et digne a Scriptura reprehenditur. Hinc est quod Aristoteles in *Ethicis* usum delectabilium corporis, usui ciborum assimilat : qui amplius minusve sumpti sanitatem corrumpunt ; qui autem commensurati sunt, et salvant et augment. Ita de virtute contingit circa amœnitates et delicias hominum.

## CAPUT V.

*Quod necessarium est regi et cuicumque domino abundare divitiis temporalibus, quæ naturales vocantur ; et ponitur causa.*

His igitur sic deductis, quæ ad substantiale esse civilitatis, sive politiæ, seu regalis regiminis requiruntur, ad quorum institutionem et providentiam rex principaliter debet intendere ; agendum est de quibusdam quæ ad regem pertinent in relatione ad subditos, unde et suum regimen quietius gubernetur. Et quamvis supra aliquantulum sit tactum in genere, nunc in specie est tractandum ad majorem declarationem eorum quæ sunt agenda per principem.

Primum quidem ut in singulis partibus sui regiminis abundet in divitiis naturalibus, quas sic vocat Aristoteles in I suæ *Politicæ*, vel quia naturalia sunt, seu quia homo ipsis naturaliter indiget, ut sunt vineta, nemora, silvæ, vivaria diversorum animalium, et avium

<sup>1</sup> Parm. : « igitur. »

<sup>2</sup> Parm. : « animus hominum recreatur. » Hic explicit opus in Cod. S. Gen.

genera, de quibus Paladius Palatinus Comes Valentiniano Imperatori, ad præfata exhortans, luculentissimo stilo ac diffusius documentum tradidit.

Hinc <sup>1</sup> etiam Salomon rex volens ostendere magnificentiam sui regiminis, *Ædificavi*, inquit Eccl. ii, 4, *mihî domos, plantavi vineas, feci hortos et pomaria, et conseci ea cuncti generis arboribus: extruxi mihî piscinas ad \* irrigandum silvam lignorum germinantium.* Cujus quidem triplex ratio sumi potest. Una sumitur ex parte usus ipsius rei, qui quidem delectabilior esse videtur in re propria quam aliena, eo quod magis unita. Unio enim est amoris proprietatis, ut tradit Dionysius. Ad amorem autem sequitur delectatio. Cum enim adest quod diligitur, etiam delectationem secum affert. Amplius autem ipsa diligentia operis exercita circa prædicta: in qua quidem homo sic congaudet, quanto est opus difficilior: magis enim amamus cum non est facile quod sumitur, ut Philosophus dicit. Ex qua ratione et filios diligimus et quamlibet nostram facturam secundum mensuram operis. Adhibendo igitur sollicitudinem circa proprias divitias naturales jam dictas, gratiores jam fiunt quam alienæ: et si gratiores, delectabiliores ipsas dicemus.

Secunda ratio sumitur ex parte officialium regis. Si enim ipsos oporteat recurrere ad convicaneos pro necessariis vitæ sui domini, interdum scandala generantur in subditis, vel ex rerum commercio: in quo vel lædit avaritia, quæ ementem vel vendentem concomitatur, vel fraus conturbat. Unde in Prov. xx, 14, dicitur: *Malum est, dicit omnis emptor: et cum recesserit, tum gloriabitur*, quasi fraude vendentem prævenierit: et in Ecclesiastico monemur cavere a corruptione emptionis et negotiatorum, quasi hoc sit proprium eorum in mercando. Amplius autem ex commercio contrahitur familiaritas ad feminas, per quod, vel ex incauta locutione in alterutrum, aut aspectu aut gestu causatur zelotypia inter cives, et inde contra regimen provocantur.

Sed etiam tertia ratio hoc idem confirmat, quam accipimus ex parte rerum venalium. Victualia enim quæ venduntur, ut in pluribus non carent sophismate; et ideo non sunt tantæ efficacitæ sicut propria ad nutriendum: unde idem Salomon in Prov. v, 15: *Bibe*, inquit, *aquam de cisterna tua*: in hoc comprehendens omne nutrimentum, sed præcipue potum, quia facilius potest sophisticari, et ipsum minus a sua natura et puritate remotum, citius de ipsius malitia indicat. Rursus propria victualia sunt majoris securitatis in sumendo, quia possunt facilius ab extraneo venenari vel esse nociva, quam si in proprio horreo vel cellario reponantur. Unde et Propheta Isa. xxxiii, 16, in exaltationem retributionis viri justî, *Panis*, inquit *datus est ei, et aquæ ejus fideiores \* sunt*; quasi, propria cibaria et potabilia securiora sunt ad sumendum.

## CAPUT VI.

*Quod expedit regi habere alias divitias naturales, ut sunt armenta et greges, sine quibus domini bene regere terram non possunt.*

Non solum autem prædicta ad naturales divitias pertinent, sed et diversa genera animantium ex eadem ratione et causa, ut in præcedentibus est ostensum: in quibus primo patri tamquam prædominanti toti humanæ naturæ, datum est privilegium regendi et dominandi, ut in Gen. i, 28, scribitur: *Crescite*, inquit Dominus, *et multiplicamini, et replete terram, et dominamini piscibus maris et volatilibus cæli, et cunctis animalibus quæ moventur super terram.* Unde ad regiam majestatem pertinet his omnibus uti et abundare: et quanto plus in his dominatur, tanto plus primi domini principatum habet similiorem, cum omnia sint ad usum hominis deputata in creationis primordio. Propter quod Philosophus dicit in I *Pol.*, quod venatio animalium silvestrium naturaliter est justa; quia per eam homo sibi vindicat quod suum est: et de piscatione et aucupatione similiter dici potest: unde et natura aves rapaces providit et canes ad hujusmodi officium exercendum. Quia vero in piscibus non est aptitudo loci ad talia ministeria, loco canum et avium homo retia adinvenit. Ad supplementum igitur et decorem regni, rex indiget supradictis: quibusdam quidem ad usum et esum, ut sunt pisces et aves, armenta boum, et greges ovium, quibus Salomon abundavit, ut scribitur in Ecclesiaste et in III libro Regum, ad sui magnificentiam ostentandam; aliis autem animalibus rex indiget ad ministerium, ut sunt equi et muli, asini et cameli ad diversa ministeria deputati, secundum varias consuetudines regionum. Horum igitur omnium rex copiam habere debet, quantum eidem est possibile, sive de animalibus deputatis ad esum, sive ad ministerium, et propter causam jam de aliis divitiis naturalibus quia res propriæ delectabiliores sunt, ut superius est ostensum, et tanto plus, quanto plus habent de ratione vitæ: unde magis accedunt ad divinam assimilationem, quæ est major causa amoris.

Adhuc aliæ sunt causæ in prædictis, propter quas expedit regi ipsis abundare ut propriis. Primo autem ad hoc movet natura, quæ delectatur ex suo opere, dum considerat in eis novum continue modum procedendi in suis actibus, sive in vivendo, sive in generando, sive in parturiendo, ex quibus consurgit in dominis admiratio, et ex admiratione delectatio. Quod autem nutritiva sit causa dilectionis, et per consequens delectationis, apparet in Exodo in filia Pharaonis, quæ Moysen nutrire fecit, et postea ibidem subjungitur quod post nutritionem ipsum sibi adoptavit in filium: qua ratione dicit Dominus in Oseæ xi, 3: *Ego quasi nutritivus Ephraim*, in hoc insinuans suum affectum ad populum.

Amplius autem et ipsorum venatura sive silvestrium animalium, sive aliorum, pro quibus se principes et reges gymnasiis exponunt, et filios suos submitunt, valet ad robur acquiren-

<sup>1</sup> Hic explicat opus in Cod. S. Victoris.

dum corporis, et conservandum sanitatem, et cordis vigorandam virtutem, si temperate utantur, ut Philosophus tradit in *Ethicis*; et hoc cum in pace quiescunt ab hostibus, ut solent reges Franciæ et Angliæ talibus uti, et ut de Germanis in *Gestis Francorum* scribit Aimoinus. (a)

Rursus equitatura ad hoc idem movetur, qua reges esse debent ornati ad decorem regni, et ejusdem contra hostes defensionem: ad quod aptiores redduntur et expeditiores, si propria habeant equorum armenta, ut mos est regibus ac principibus orientis, quemadmodum et de Salomone scribitur in III Regum IV, quod in sua florens prosperitate habebat quadraginta millia præsepia equorum curalium, et undecim millia equorum equestrium, quos custodiebant supra dicti regis præfecti.

Præterea si de animantibus agatur quæ ordinantur ad esum, adhuc magis competit habere propria, sive quadrupedia, sive reptilia, idest pisces: quia omnibus his homo delectabilius unitur ex hoc quod melius nutriuntur, et aptiora efficiuntur ad esum: tum quia re cognita in utendo magis gaudemus: tum etiam quia securius et liberius nobis offeruntur ad esum quod est actus magis nostræ proportionatus naturæ, ex quo et delectabilius agit.

Amplius autem et causa communis jam dicta superius ad hoc facit, scilicet vitatio commercii cum civibus, quod potest esse scandali adminiculum præcavendum officialibus regis.

Rursus hoc exigit magnificentia regis ut transcantibus in cibis et potibus uberius administretur et largius: hoc autem fit expeditius, si reges abundant gregibus et armentis.

Concluditur ergo ex prædictis quod divitiæ naturales necessariae sunt regi, ut in singulis regionibus proprias habeat ad sui regiminis et regni munimen.

## CAPUT VII.

*Quod oportet regem abundare divitiis artificialibus, ut est aurum et argentum, et nummismata ex eis conflatum.*

Sed de artificialibus divitiis, ut est aurum et argentum et alia metalla, et ex ipsis conflata nummismata, necessaria sunt regi ad munimen regiminis sui. Supposito enim quod collegium sit necessarium secundum naturam ad regimen constituendum sive politiam, et per consequens rex, et quicumque dominus qui multitudinem regat; oportet ulterius concludere de sibi conexo, videlicet thesauro, ut est aurum et argentum, et ex eis conflatum nummismata, sine quo tuum regimen rex congrue et opportune exercere non potest: quod quidem ostendi potest multiplici via.

Prima quidem manifestatur ex parte regis. Homo enim in commutationibus faciendis, auro vel argento sive nummismate utitur ut instrumento. Unde Philosophus dicit in V *Ethic.* quod nummismata est quasi fidejussor futuræ necessi-

tatis, quia continet omnia opera sicut ipsarum pretium. Si ergo quilibet indiget, multo magis rex: quia si simpliciter ad simpliciter, et magis ad magis.

Rursus. Virtus proportionatur naturæ, et opus virtuti. Natura autem status regalis quamdam habet universalitatem, eo quod communis est populo sibi subjecto. Ergo et virtus et similiter opus. Si ergo status dominorum secundum suam naturam est communicativus: ergo virtus et operatio. Hoc autem esse non potest sine nummismate, sicut nec faber nec carpentarius sine propriis instrumentis.

Item ad idem. Secundum Philosophum in IV *Ethicor.*, virtus magnificentia magnos sumptus respicit. Magni autem sumptus ad magnanimum pertinent, qui est rex, ut ipse Philosophus tangit ibidem: unde in Esther I, scribitur de Assuero, qui in oriente dominabatur centum viginti septem provinciis quod in convivio quod fecit principibus sui regni, ministrabatur in cibis et potibus prout exigebat magnificentia regis. Hoc autem sine instrumento vitæ fieri non potest quod est nummismata, sive aurum vel argentum. Quare idem quod prius. Concluditur ergo ex parte regis, eidem thesaurum esse necessarium, qui artificiales divitias continet.

Secunda via sumitur in comparatione ad populum sive in genere sive in specie. Quia ad hoc debet rex abundare pecuniis, ut possit suæ domui providere in necessariis, et suorum subvenire necessitatibus subditorum. Ut enim tradit Philosophus VIII *Ethic.*, sic se rex habere debet ad populum, sicut pastor ad oves et sicut pater ad filios. Sic se habuit Pharaon ad totam terram Ægypti, ut in Genesi scribitur: de publico enim ærario frumentum emit: quod ingruente fame distribuit secundum prudentiam Joseph, ne populos fame deliceret. Sallustius etiam narrat sententiam Catonis in *Catilinario*, qualiter respublica profecit Romanis: quia ærarium publicum vixit Romæ: quo deliciente ad nihilum est redacta, ut temporibus ejusdem Catonis dicit accidisse.

Amplius autem quodlibet regnum, sive civitas sive castrum sive quodcumque collegium assimilatur humano corpori, sicut ipse Philosophus tradit, et hoc idem in *Polieratico* (b) scribitur; unde comparatur ibidem commune ærarium regis stomacho, ut sicut stomacho recipiuntur cibi, et diffunduntur ad membra; ita et ærarium regis repletur thesauro pecuniarum et communicatur atque diffunditur, pro necessitatibus subditorum et regni.

Rursus et in specie hoc idem contingit. Turpe est enim, et multum regali reverentiæ derogat, a suis subditis mutuare pro sumptibus regis vel regni. Amplius autem ex hac subjectione mutui sustinetur a dominis ut per subditos sive quoscumque fiant super regnum exactiones indebitæ, unde status enervatur regni.

Item ad idem. In mutuis sæpe mutuans scandalum patitur, quia hæc est natura mutuantis ut difficile sit ei mutuum reddere. Unde sententia fertur esse Biantis unius de septem sapientibus: « Amico a te mutuante pecuniam, et ipsum et pecuniam perdis. » Necessarium est igitur regi

(a) Aimoinus, monachus Horiacensis, auctor ejusdem historiae Francorum, unde immerito Ed. Parm. scribit: « Ammonius. »

(b) Joannes sariberiensis, duodecimo sæculo post Christum floruit, et scripsit *Polieraticon*, sive *de nugis curialium*, et vestigiis Philosophorum.



artificiales divitias congregare ex causis jam dictis in comparatione ad populum sive in genere sive in specie.

Tertia autem via ad hoc idem probandum accipitur in respectu ad rem sive personam extra regis dominium constitutas: quarum quidem duo sunt genera. Unum videlicet inimicorum, contra quos oportet ærarium publicum regis esse plenum. Et primo pro sumptibus suæ familiæ: secundo pro stipendiis militum conductorum, cum contra hostes movet exercitum: tertio ad præsidia resarcienda vel constituenda, ne hostes invadant terminos sui regni. Aliud autem genus in augmentum tendit sui regni, unde et necessarius regi est thesaurus. Contingit enim interdum regiones gravari vel penuria vel onere debitorum, aut etiam ab hostibus: et recurrunt tunc ad regni subsidium; quibus subveniendo cum instrumento vitæ, quod est aurum vel argentum, vel quodcumque nummismata, subjiciuntur eidem, et sic augmentatur regnum.

Liquet ergo ex dictis, regi necessarias esse artificiales divitias ad conservationem sui regimini ex tribus causis jam dictis. Unde etiam in Judith scribitur, quod Holofernes princeps Nabuchodonosor, quando invasit regiones Syriæ et Ciliciæ cum exercitu magno, tulit aurum et argentum multum nimis de domo regis paratum, videlicet ad expeditionem contra suos hostes. Et hoc idem de Salomone scribitur in libro superius allegato Eccl. II, 8 inter actus regalis magnificentiæ: *Coacervari, inquit, mihi aurum et argentum et substantiam regnum ac provinciarum*, substantiam vocans nummismatum thesauros propter tributa ab ipso exacta, et patris sui David, ut patet II et III libr. Regum. Et hoc ideo quia secundum Philosophum in *Ethic.*, humanæ vitæ sunt instrumentum, ut dictum est supra.

Nec istud contradicit divino præcepto tradito a Domino in Deuteronomio per Moysem quantum ad reges et principes populi. Ibi enim lex scribitur de rege, quod non habeat auri vel argenti immensa pondera. Quod quidem intelligendum est ad ostentationem sive fastum regalem ut de Cræso rege Indorum narrant historiæ: ex qua causa ruinam passus est, quia captus a Cyro rege Persarum, nudus in alto monte patibulo est affixus. Sed ad subventionem regni omnino est necessarium propter causas jam dictas.

## CAPUT VIII.

*Qualiter ad regimen regni et cujuscumque domini, necessarij sunt ministri: ubi incidenter distinguitur de duplici dominio, politico et despotico; ostendens multis rationibus quod politicum oportet esse suave.*

Non solum autem divitiis oportet regem esse munitum, sed etiam ministris. Unde et ille magnus rex Salomon in præallegato lib. cap. II, 7, dicit de se ipso: *Possedi servos et ancillas et familiam multam nimis*. Quod autem possidetur, in dominio videtur esse possidentis: et ideo hoc distinguendum est circa dominium incidenter. Duplex enim principatus ab Aristotete ponitur in sua *Politica* (quorum quilibet suos habet ministros, licet plures ponat in *V Politicorum*, ut supra est distinctum, et infra etiam declarabitur,) politicus videlicet et despoticus. Politicus quidem,

quando regio sive provincia sive civitas sive castrum, per unum vel plures regitur secundum ipsorum statuta, ut in regionibus contingit Italiæ, et præcipue Romæ, ut per senatores et consules pro majori parte ab urbe condita. Horum autem dominium convenit amplius quadam civilitate regere, eo quod in ipso sit continua de civibus sive extraneis alternatio; sicut de Romanis scribitur in I Machab. VIII, ubi dicitur, quod per singulos annos committunt uni homini magistratum suum dominari universæ terræ suæ. Unde duplex est in tali dominio ratio quare subdit non rigide possint corrigi, ut in regali dominio.

Una sumitur ex parte regentis, quia temporaneum est ejus regimen. Ex hoc enim diminuitur ejus sollicitudo in sibi subditis, dum considerat suum tam brevi tempore dominium terminari. Propter quod et judices populi Israël, qui politice judicabant, moderatiores fuerunt in judicando quam reges. Unde Samuel, qui dictum populum certis judicavit temporibus, sic ait ad ipsos, volens ostendere suum regimen fuisse politicum et non regale, quod elegerant, I Regum XII, 3: *Loquimini, inquit, de me coram Domino et Christo ejus, utrum bovem cujusquam tulerim, aut asinum: si quempiam calumniatus sum; oppressi aliquem; de manu\* alicujus munus accepi*: quod quidem qui regale dominium habent, non faciunt. ut infra patebit, et in I lib. Regum dictus Propheta ostendit. Amplius autem modus regendi in partibus ubi politicum est dominium, mercenarius est: mercede enim domini conduntur. Ubi autem merces pro fine præligitur, non tantum intenditur regimini subditorum, et sic per consequens temperatur correctionis rigor. Unde et Dominus in Joan, X, 12, dicit de talibus: *Mercenarius autem, et qui non est pastor, cui non est cura de ovibus, quia scilicet ad tempus præponitur, videt lupum et fugit. Mercenarius autem fugit, quia mercenarius est*; quasi ipsa merces sit sibi finis regiminis, et subditos sibi postponat: propter quod et antiqui Romani duces, ut scribit Maximus Valerius, curam gerebant reipublicæ sumptibus propriis, ut M. Curius et Fabricius, et multi alii: unde reddebantur ad curam politiæ audaciores et magis solliciti, quasi tota in hoc esset eorum intentio, et major effectus: et in talibus verificatur Catonis sententia, quam Sallustius refert in *Catilinario*; « Unde respublica ex parva effecta est magna, quia in istis domi fuit industria, foris justum imperium, animus in consulendo liber, neque delicto neque libidini obnoxius. »

Secunda autem ratio unde dominium politicum oportet esse moderatum, ac cum moderatione exercitum, sumitur ex parte subditorum: quia talis est eorum dispositio secundum naturam proportionata tali regimini. Probat enim Ptolemæus in *Quadripartito*, regiones hominum esse distinctas secundum constellationes diversas quantum ad morum regimen, circumscripto semper, secundum ipsum, super stellarum dominium imperio voluntatis. Unde regiones Romanorum sub Marte ponuntur ab ipso, et ideo minus subjicibiles: propter quod ex eadem causa præfata gens esse ponitur insueta pati cum suis terminis, et subdi nescia, nisi eum non possit resistere; et quia impatiens alieni arbitrii, et per consequens superioris invida. Inter Romanos Præsides, ut I Machab. VIII, cap. scribitur, nemo portabat diadema, nec induebatur purpura; et ulterius subditur effectus istius humilitatis, quia non est invidia nec zelus inter eos. Quadam igitur

\* Cujusquam.



placabilitate animi, ut natura requirit subditorum illius regionis, et incessu humili rempublicam gubernabant: quia, ut tradit Tullius in *Philippicis*, « nullum majus armatorum præsidium caritate et benevolentia civium: qua oportet principantem esse munitum, non armis. » Et hanc etiam refert Sallustius de Catone quantum ad antiquos patres Romanos. Rursus ad idem: Confidentia subditorum sive de exoneratione domini regentium, sive dominandi in suo tempore congruo, reddit ipsos ad libertatem audaces, ne colla submittant regentibus: unde oportet politicum regimen esse suave. Amplius autem est certus modus regendi, quia secundum formam legum sive communium, sive municipalium, cui rector astringitur: propter quam causam et prudentia principis, quia non est libera, tollitur, et minus imitatur divinam. Et quamvis leges a jure naturæ trahant originem; ut Tullius probat in tractatu *De legibus*, et jus naturæ a jure divino, ut testatur David Propheta Ps. iv, 7; *Signatum est*, inquit, *hunc vultus tui super nos, Domine*: deficient tamen in particularibus actibus, quibus omnibus legislator providere non potuit ex ignorantia subditorum futurorum. Et inde sequitur in regimine politico diminutio, quia legibus solum rector politicus judicat populum, quod per regale dominium suppletur, dum non legibus obligatus, per eam censeat quæ est in pectore principis: propter quod divinam magis sequitur providentiam; cui *est cura de omnibus*, ut in libro Sapientiæ dicitur.

Patet igitur qualis est principatus politicus et modus ejus regendi. Nunc videndum est de principatu despotico.

#### CAPUT IX.

*De principatu despotico, quis est et qualiter ad regalem reducitur: ubi incidenter comparat politicum ad despoticum secundum diversas regiones et tempora.*

Est autem hic advertendum, quod principatus despoticus dicitur qui est domini ad servum: quod quidem nomen græcum est. Unde quidam domini illius provincie adhuc hodie despoti vocantur: quem principatum ad regalem possumus reducere, ut ex sacra liquet Scriptura.

Sed tunc est quæstio, quia Philosophus in *Politicorum* dividit regale contra despoticum. Hoc autem in sequenti libro declarabitur, quia ibidem occurrit definiendi materia; sed unne sufficiat per divinam Scripturam probare quod dicitur. Traduntur enim leges regales per Samuelem Prophetam Israelitico populo, quæ servitutem important. Cum enim petivissent regem a Samuele jam ætate defecto, et filiis suis non juste dominantibus modo politico, ut iudices alii dicti populi fecerant, consulto Domino respondit I Reg. viii, 7: *Audi, inquit, vocem populi in his quæ loquuntur. Veruntamen contestare eos et prædicare eis jus regis. Filios vestros tollet et ponet in*

*curribus suis, facietque sibi equites et præcursores quadrigarum suarum: et constituet aratores agrorum suorum, et messorum segetum, ac fabros armorum suorum: filias quoque vestras faciet sibi focarias, unguentarias, ac panificas* et sic de aliis conditionibus ad servitutem pertinentibus, quæ in I lib. Regum traduntur: per hoc quasi volens ostendere quod regimen politicum, quod erat iudicium, et suum fuerat, fructuosius erat populo, cujus tamen superius contrarium est ostensum.

Ad cujus dubii declarationem sciendum est, quod ex duplici parte regimen politicum regali præponitur. Primo quidem si referamus dominium ad statum integrum humanæ naturæ, qui status innocentie appellatur, in quo non fuisset regale regimen, sed politicum; eo quod tunc non fuisset dominium quod servitutem haberet sed præminentiam et subjectionem in disponendo et gubernando multitudinem secundum merita ejuscumque, ut sic vel in influendo, vel in recipiendo influentiam quilibet esset dispositus secundum congruentiam suæ naturæ. Unde apud sapientes et homines virtuosos ut fuerunt antiqui Romani, secundum imitationem talis naturæ regimen politicum melius fuit. Sed quia *perversi difficile corriguntur et stultorum infuitus est numerus*, ut dicitur in Eccle. i, 15; in natura corrupta regimen regale est fructuosius: quia oportet ipsam naturam humanam sic dispositam quasi ad sui fluxum, limitibus refrenare. Hoc autem facit regale fastigium; unde scriptum est in Prov. xx, 8: *Rex qui sedet in solio iudicii, dissipat omnem mahum intuitu suo*. Virga ergo disciplinæ, quam quilibet timet, et rigor justitiæ sunt necessaria in gubernatione mundi: quia per ea populus et indocta multitudo melius regitur. Unde Apostolus ad Rom. xiii, 4, dicit loquens de rectoribus mundi, quod *non sine causa gladium portat... vindex in iram ei qui male agit*. Et Aristoteles dicit in *Ethicis*, quod pœnæ in legibus institutæ sunt medicinæ quædam. Ergo quantum ad hoc excellit regale dominium. Amplius autem et situs terræ secundum stellarum aspectum regionem disponit, ut dictum est supra: unde videmus quasdam provincias aptas ad servitutem, quasdam autem ad libertatem. Propter quod Julius (a) Celsus et Aimoinus qui describunt gesta Francorum et Germanorum, eos mores et actus attribuunt eisdem in quibus etiam nunc perseverant. Romani autem cives aliquo tempore vixerunt sub regibus, a Romulo videlicet usque ad Tarquinium superbum, cujus cursus annorum ducentorum sexaginta quatuor fuit, ut historiæ tradunt. Sic et Athenienses post mortem Codri regis sub magistratibus vixerunt, quia sub eodem climate constituti. Considerantes enim quod dicta regio magis apta foret ex causis jam dictis ad politicum regimen, sic ipsam rexerunt usque ad tempora Julii Caesaris sub consulibus, dictatoribus et tribunis, quod fuit quadringentorum quadraginta quatuor annorum. In quo quidem tempore, ut dictum est supra, tali regimine multum profecit respublica. Patet igitur qua consideratione politiam regno et regale dominium politiæ præponimus.

<sup>1</sup> Al. : « Dei. »

(a) Julius Celsus paucis ante Christum annis

floruit, scripsitque commentaria quædam super Julii Caesaris vitam, ann. 1473, typis edita.

## CAPUT X.

*Habita distinctione domini, hic distinguitur de ministris secundum differentiam dominorum : et quædam genera ministrorum ostendit omnibus dominis communia : postea probat servitutem in quibusdam esse naturalem.*

His igitur sic deductis, videndum est de ministris qui ad regiminis sunt complementum : quia sine eis quodcumque dominium transire non potest, ut per eos secundum gradum personarum exercentur officia, distribuuntur opera et administrantur necessaria sive in regno sive in quacumque republica, et secundum merita cujuscumque in ea contenti. Unde et primus dux in Israelitico populo Moyses a Jethro cognato suo merito redarguitur, ut patet in Exod. xviii, 17, quia ipse solus satisfaciebat populo suo sine ministris : *Stulto, inquit, labore consumeris tu et populus iste qui tecum est; et ultra vires tuas est, nec poteris sustinere... Provide, inquit, viros potentes et timentes Deum, in quibus sit veritas, et qui oderint avaritiam; et constitue ex eis tribunos et* *centuriones et quinquagenarios \* ac denarios, qui judicent populum.* Hoc et de Romanis invenitur : quia cum regum regimen cessasset ab urbe, Brutus factus consul, parum in consulatu solus urbem rexit, sed moventibus bellum Sabinis eidem per senatum adjunctus est dictator, qui dignitate consules præibat, quorum primus Lamius vocatus est. Hoc etiam tempore adjunctus est magister equitum, qui dictaturæ obsequeretur, quorum primus Spurius Cassius. Post hæc quasi circa idem tempus instituti sunt tribuni, qui in favorem populi essent : quod pro tanto sit dictum, ad ostendendum quod regimen cujuscumque collegii, sive provinciæ, sive civitatis vel castris, sine ministerio diversorum officialium bene regi non potest.

Sed circa hoc distinguendum de eis videtur secundum diversitatem regiminis; quia oportet ministros dominis cujuscumque regiminis esse conformes sicut membra capiti. Unde regimen politicum ministros requirit secundum qualitatem politiæ. Propter quod hodie in Italia omnes sunt mercenarii, sicut et domini; et ideo agunt sicut mercede conducti non ad utilitatem subditorum, sed ad lucrum suum, præstituentes in mercede finem. Quando vero gratis ministrabant, ut antiqui Romani, tunc eorum sollicitudo fgebatur ad rempublicam sicut ad finem; et inde proficiebant, sicut Maximus Valerius narrat de Camillo, qui precatus est quod si alicui deorum felicitas Romanorum nimia videretur, ejus invidia suo et non reipublicæ incommodo satiaretur. Sed regalis regiminis alii sunt ministri perpetui<sup>1</sup> officii deputati ad ministrandum regi pro suo sui que populi fructu, ut sunt comites, barones et milites simplices, feudatarii, qui ex suo feudo et ipsi et sui successores ad regni gubernacula sunt obligati perpetuo. Unde patet et ministros esse necessarios cuicumque dominio, et secundum ipsius dominantis conditionem ministros debere constitui. Propter quod et in Eccli. x, 2, dicitur : *Secundum judicem populi, sic et ministri*

*ejus : et qualis rector est civitatis, tales et inhabitantes in ea.* Distinguuntur autem et alia quatuor genera ministrorum a Philosopho in *Politica*, qui haberi possunt regimini magis conjuncti. Quidam enim sunt quos habet civitas sive regimen omnino necessarios ad vilia officia exercenda dominorum, de quibus natura providit ut sint gradus in hominibus, sicut et in aliis rebus. Videmus enim in elementis esse inlimum et supremum : videmus etiam in mixto semper esse aliquod prædominans elementum : in plantis etiam quædam sunt deputata ad humanum cibum, quædam ad limum : et eodem modo in animalibus : sed et in homine inter membra corporis similiter erit. Hoc idem consideramus in relatione corporis ad animam et in ipsis etiam potentiis animæ in alterutrum comparatis : quia quædam ordinatæ sunt ad imperandum et movendum, ut intellectus et voluntas, quædam ad serviendum eidem secundum gradum ipsarum : ita inter homines erit : et inde probatur esse aliquos omnino servos secundum naturam. Amplius autem contingit aliquos delicere a ratione propter defectum naturæ : tales autem oportet ad opus inducere per modum servile quia ratione uti non possunt; et hoc justum naturale vocatur. Hæc autem omnia Philosophus tangit in I *Politicorum*. Sunt autem et alii ministri ad idem deputati officium alia ratione : ut in bello devicti : quod lex humana non sine ratione sic statuit ad acendum bellatores pro republica fortiter pugnandum, ut videlicet victi subjiciantur victoribus jure quodam : quod Philosophus in prædicto loco justum legale appellat. Unde isti quamvis vigeant ratione, ad statum tamen rediguntur servorum quadam militari lege ad acendum corda bellantium; et hunc modum observaverunt Romani. Unde tradunt historiæ, T. Livium tantæ eloquentiæ virum a Romanis captum, in servitutem reductum, sed propter suam probitatem a Livio nobilissimo Romano, sub cujus dictione traditus erat, manumissus, ab ipso cognomen accipiens, Titus Livius est vocatus : quem libertati tradidit pro liliis instituendis liberalibus artibus, cui ante non licuisset secundum principum instituta. Hoc etiam et lex divina præcepit, ut in Deuteronomio patet. Sunt autem et alia duo genera ministrorum in familia assistentium; videlicet vel mercede conductorum, seu servientium quadam benevolentia et amore ad sui honoris cumulum vel virtutis profectum, ut sunt ministrantes principi in domestica domo, sive de re militari, sive aucupii, sive venationis, sive in aliis rebus familiaribus domus : de quibus non est modo dicendum per singula; et pro quibus quis captat vel amicitiam vel gratiam dominorum, vel mercedem reportat, vel virtutis laudem acquirit. Unde in Proverbiis xiv, 35 dicitur quod *acceptus est regi minister intelligens* : et in Ecclesiastico xxxiii, 31 : *Si est tibi servus fidelis, sit tibi sicut anima tua.*

Concludendum est igitur quod ad complementum regni et fulcimentum regiminis, quæ dicta sunt supra de divitiis et ministris, princeps debet esse munitus; propter quod Philosophus dicit in VIII *Ethic.*, quod non est rex qui per se non est sufficiens, et omnibus bonis superexcellens : quibus omnibus superabundavit rex Salomon, ut patet in III libro Regum x, 7; sed præcipue in

<sup>1</sup> Al. : « perpetui. »

ornatu et ordine ministrorum : de quo admirata regina Saba, *Major est, inquit, sapientiu tua quam rumor quem audivi. Beati viri tui et servi tui, hi qui astant coram te semper et audiunt sapientiam tuam.*

## CAPUT XI.

*Quod necessarium est regi et cuilibet domino in sua jurisdictione munitiones habere fortissimas et rationes quare ibi multæ ponuntur.*

Post hæc autem ad robur domini sive regalis sive politici, necessariae sunt munitiones, ad quas se conferant domestici regis, vel ipse rex. Cujus rei documentum accipimus a rege David, qui postquam cepit Jerusalem, accepit montem Sion pro suo munimine, ibique arcem edificavit, ubi domatum fistulae ducebantur usque ad Mello, ipsamque arcem suam vocavit civitatem. Hoc autem ubique reges observant quod in singulis civitatibus et castris speciale habent præsidium sive arcem, ubi degit regis familia et officiales ejusdem. Cujus quidem rei multæ sunt causæ.

Una sumitur ex parte principum, quia expedit eis esse in loco tuto, ut in regendo, corrigendo et gubernando sint magis securi et in exequendo justitiam efficiantur audaces. Unde et Romani consules et senatores tutiorem elegerunt locum, videlicet Capitolium : de quo narrant historiae quod tota occupata ab hostibus urbe Roma, in ipso permanserunt illæsi. Amplius autem et regis suæque familiae major honestas hoc exigit, ne vel eorum commercio cum subditis vilificetur in conspectu populi ipsorum majestas; vel ex incauto aspectu, ubi maxima requiritur pudicitia (sicut senes populi Trojani se habebant ad Heleam, ut Philosophus dicit in *Ethic.*), populus regis indignationem incurrat; vel ipse et sui se dehonestandi in subditis occasionem assument : in quem casum lapsus est rex David circa uxorem Uria scutiferi Joab, quam lavantem vidit de solario domus regiae, ut scribitur in II libro Regum.

Secunda ratio sumitur ex parte populi, qui magis sensibilibus movetur quam ratione ducatur. Cum enim vident magnificos sumptus regum in munitionibus, facilius ex admiratione inclinantur ab obedientiam et ad suis parendum mandatis, ut Philosophus dicit in VI *Politicorum*. Amplius autem minorem causam habent rebellandi, seu subjiciendi se hostibus, dum nimium infestantur. Cum enim ministros reges munitionibus habent præsentibus, sollicitantur audacius ad defensionem sui. Sic et Judas Machabeus fecit de arce Sion, quam devictam cinxit muris fortissimis et turribus altis pro defensione patriæ contra hostes, ut scribitur in I Machabeorum; et similiter in Bethsuram munitiones fortissimas extruxit contra faciem Idumææ. Rursus ad idem necessariae sunt munitiones principibus pro conservandis divitiis, quibus abundare debent, ut dictum est supra, et ut eisdem possint cum sua familia liberius uti, unde et ministri liant ad preparandum necessaria promptiores : quod est delectabilis ac honorificentius etiam in domestica domo. Hoc enim est proprium in humanis actibus quod ex ordine debito causant speciem sive pulchritudinem tanquam in re proportionata et commensurata in suis partibus :

unde consequitur in nobis spiritualis lætitia, quæ ex se quasi extasim facit : quam passa videtur regina Saba in aspectu ordinis ministrorum curiæ Salomonis, ut superius est ostensum.

## CAPUT XII.

*Quod ad bonum regimen regni sive cujuscumque domini pertinet stratas sive quuscumque vias in regione vel provincia habere securas et liberar.*

Est et aliud necessarium regi ad bonum regimen regni, ad quod ordinantur ipsæ munitiones : ut videlicet stratas faciant securas et aptas ad transeundum sive pro advenis, sive pro indigenis, vel regalibus suis. Viæ enim communes sunt omnibus quodam jure naturæ et legibus gentium : propter quod prohibentur a nemine occupari, nec ulla præscriptione, ne quocumque temporum cursu jus de eisdem posset alicui acquiri. Unde in libro Numerorum, via publica via regia nominatur ad significandum ejus communitatem : ubi Augustinus in *Glossa* dictum verbum exponit, quia pro tanto sic appellatur, quia debet esse libera cuilibet transeunti innoxio, ratione humanæ societatis. Propter quod et ibidem scribitur quod Amorrhæis contradicentibus ne filii Israel transirent per eos, cum sola via regia gradi permitterent, hoc est sine lesione aliqua regionis, Dominus mandavit ipsos deleri. Ut autem stratae in sua communitate sint liberæ, et transeuntibus forent securæ, jura principibus permittunt pedagia. Unde et eis servantibus quæ viatoribus sunt prædicta, officiales principum ipsa merito possunt exigere, et proficiscentes debite obligantur persolvere. Amplius autem et viarum securitas in regimine regni principibus est fructuosa, quia illuc magis confluent mercatores cum mercibus, unde et regnum in divitiis crescit : qua ratione in urbe aucta fuit respublica propter vias, circa quas sollicitabantur expeditas habere, et stratae vocabantur Romanæ, ut homines magis redderentur securi ad deferendum merces; ac sub simulatione callida sub nominibus librarii permutatis, ut latrones ignorarent tempus, sicut computistæ scribunt, cum in urbe celebrarentur nundinæ, sic eos decipiebant. Quædam etiam extra urbem institutæ fuerunt per Romanos principes, eorumque sunt intitulatæ nominibus, ut ex hoc majorem obtinerent firmitatem, et loca tutiora advenientibus redderentur; ut Forum Julii quod in confinibus multarum provinciarum, et diversis regionibus adhuc nomen remansit. Amplius autem et per diversos consules ac senatores Romanos stratae sunt institutæ, extendentes se ad diversas provincias, quorum titulis authenticari videntur, ad liberiores ac securiores accessum ad urbem, vel ad ipsorum memoriam clariorem, ut via Aurelia ab Aurelio principe, via Appia ab Appio senatore, quarum prima tendebat versus Reatem, ubi historiae provinciam Aureliam ponunt, secunda vero in Campaniam summam habebat progressum : ac sic de singulis aliis sive consulibus, sive senatoribus, ut Flaminio vel Emilio, a quibus stratae vel provinciae sunt nominatæ propter causam jam dictam. Rursus et divinus cultus in hoc augetur, propterea quod promptiores sunt homines ad reverentiam divinam, cum liber est aditus viarum ad indulgentiam sive ad aditum sancti. Unde

et præcipuum motivum Romanorum fuit stratas faciendi securas, divinus videlicet idolorum cultus, pro quo multum zelabat respublica, ut Maximus Valerius scribit in principio libri sui. Sacra etiam Scriptura in Esdra refert reverentiam templi impeditam fuisse propter hostes in circuitu, propter quod tardata fuit ædificatio templi, juxta quod Domino dicitur in Joan. ii, 20 : *Quadragesima et sex annis ædificatum est templum hoc, et tu in triduo reædificabis illud?*

### CAPUT XIII.

*Qualiter in quolibet regno et quocumque dominio necessarium est nummisma proprium; et quot bona ex hoc sequuntur, et quæ incommoda, si non habeatur.*

His igitur expletis agendum est de nummismate, in cujus usu vita hominis regulatur, et sic per consequens omne dominium, sed præcipue regnum, propter varios proventus quos ex nummismate percipit. Unde et Dominus quærens a pharisæis simulatorie tentantibus ipsum, *Cujus est, inquit Matth. xxii, 21, imago hæc et superscriptio?* Cumque respondissent, *Cæsaris*, sententiam quæsitæ super ipsos retorsit, dicens : *Reddite ergo quæ sunt Cæsaris Cæsari, et quæ sunt Dei Deo;* quasi ipsum nummisma sit causa ut in pluribus tributa solvendi. De materia autem nummismatis, et qualiter sit regi necessarium talibus abundare, supra satis est pertractatum. Sed nunc ipsum accipiamus prout est mensura quædam, per quam superabundantia et defectus reducuntur ad medium, ut Philosophus in V *Ethic.* dicit. Ad hoc enim inventum est nummisma ut solvantur lites in commerciis, et sit mensura in commutationibus. Et licet multa sint genera commutationum, ut ex Philosopho habemus I *Politicorum*, ista tamen expeditior est inter omnes, propter quod inventum dicitur esse nummisma. Unde et politia Lyeurgi, qui Parthis et Lydis primo leges tradidit, in quibus nummisma prohibebat, solam commutationem ex alterutrorum mercibus permittens, per Philosophum reprobatur, ut ex jam dictis apparet. Unde et ipse concludit eodem lib. *Ethic.*, nummisma constitutum propter commutationis necessitatem, quia per ipsum expeditius fit commercium, ac tollitur in commutando materia litis. Quam quidem habemus ab Abraham patre nostro, qui per multa tempora fuit ante Lyeurgum et omnes philosophos. Unde de ipso scribitur in Genesi xxxiii, 16, quod agrum emit pro sepultura suorum pretio quadringentorum siclorum *publicæ ac probatæ monetæ.*

Sed quamvis ex se nummisma sit necessarium, proprium tamen in omni regimine, sed præcipue regis : cujus duæ sunt causæ. Unam accipimus ex parte regis; aliam vero ex parte populi subjecti. Quantum ad primum, nummisma, sive moneta propria, ornamentum est regis et regni et cujuslibet regiminis, quia in ea representatur imago regis, ut Cæsaris, sicut dictum est supra : unde in nulla re tanta potest esse claritas memoriæ ejus, eo quod nihil sic per manus hominum frequentatur quod ad regem vel quemcumque dominum pertineat, quantum nummisma.

Amplius autem in quantum moneta regula est

et mensura rerum venalium, intantum monstratur sua excellentia, ut videlicet imago ipsius sit in nummo regula hominum in ipsorum commerciis. Unde moneta dicitur, quia monet mentem, ne fraus inter homines, cum sit mensura debita, committatur : ut imago Cæsaris sit in homine quasi imago divina, sicut Augustinus exponit pertractans dictam materiam. Nummisma vero dicitur, quia nominibus Principum effligieque designatur, ut tradit Isidorus. Per quod manifeste apparet quod ex nummismate majestas dominorum relucet : et ideo civitates, sive principes sive prælati hoc pro sua gloria singulariter ab imperatoribus impetrant ut habeant specieate nummisma.

Rursus nummisma proprium cedit in commodum principis, ut dictum est supra : quia per ipsum mesurantur tributa, et quæcumque exactiones quæ fiunt in populo, ut in lege mandabatur divina; circa oblationes videlicet et redemptiones quascumque sacrificii loco.

Amplius autem ipsius factura propter auctoritatem principis causatur commodum regi : quia nulli alii licet sub eadem figura et superscriptione cudere, ut jura gentium mandant. In qua quidem, etsi liceat suum jus exigere in cudendo nummisma, moderatus tamen debet esse princeps quicumque vel rex sive in mutando sive in diminuendo pondus vel metallum : quia hoc cedit in detrimentum populi, cum sit rerum mensura, sicut supra dictum est : unde tantum est mutare monetam sive nummisma, quantum stateram sive quodcumque pondus. Hoc autem quomodo Deo displiceat, in Prov. xx, 11, scribitur. *Pondus, inquit, et pondus, statera et statera, utrunque abominabile est apud Deum :* de quo et graviter rex Aragonum reprehenditur ab Innocentio Papa, qui nummisma mutaverat diminuendo in populi detrimentum. Propter quod et filium obligantem se per juramentum dictam servare monetam, a dicto absolvit juramento, eidem mandans ut ipsam ad pristinum statum reformaret. Jura etiam in nummismatibus favent mutuis, et pactionibus quibuscumque : mandant enim solvi mutua, et pacta servari juxta illius temporis nummisma in omni mensura qualitatis et quantitatis. Concluditur ergo qualiter unicuique regi nummisma proprium est necessarium.

Sed etiam ex parte populi adhuc nummisma Regis proprium est necessarium, ut etiam ex jam dictis apparet. Primo quia expeditior est in commutationibus mensura. Rursus quia certior inter populares est. Multi enim sunt qui alias monetas ignorant, et de facili possunt simplices præveniri fraude quod est contra formam regalis regiminis : circa quod Romani principes providerunt. Unde tradunt historiæ quod tempore Domini nostri Jesu Christi in signum subjectionis Romanorum unum erat nummisma in toto orbe terrarum, in quo erat Cæsaris imago : quam statim cognoverunt pharisæi seiscitati a Domino Jesu Christo ad discooperiendum eorum fraudem : et istud nummisma decem usuales valebat denarios; quod solvebat quilibet teloneariis prædictorum principum, sive eorum gerentibus vicem in provinciis vel civitatibus seu castris.

Rursus proprium nummisma fructuosius est. Cum enim extraneæ monetæ communicantur in permutationibus, oportet recurrere ad artem campsoriam, cum talia nummismata non tan-



tum valeant in regionibus extraneis quantum in propriis: et hoc sine damno esse non potest. Et præcipue accidit in partibus Theontoniæ et regionibus circumstantibus, propter quod coguntur cum de loco ad locum transeunt, massam auri vel argenti secum deferre, et quantum in commutationibus rerum venalium indigent, tantum vendunt. Unde Philosophus in lib. IV species pecuniarum distinguens, sive artis pecuniariæ, sive nummismaticam, sive campsoriam obolostaticam et cathos; primam solam dicit esse naturalem, quia ad commutationem rerum naturalium ordinatur: quod facit proprium nummismata, et non aliud, ut ex jam dictis apparet. Propter hoc ipsam solam commendat aliis supradictis spretis, et de quibus infra dicitur.

Concludendum est igitur, in omni regimine pro conservatione domini, et præcipue regalis, necessarium esse nummismata propria, sive ex parte populi, sive ex parte regis vel regiminis cujuscumque.

#### CAPUT XIV.

*Qualiter ad bonum regimen regni et cujuscumque domini sive politiæ, pondera et mensuræ sunt necessariae, exemplis et rationibus persuadetur.*

Post hæc autem agendum est de ponderibus et mensuris, quæ necessaria sunt ad domini cujuscumque regimen conservandum, sicut et nummismata, quia cum eis solvuntur tributa, seu etiam quia per ipsa lites diminuuntur, et in emptionibus et venditionibus fidelitas servatur: vel quia, sicut et nummismata, vitæ sunt humanæ instrumenta, immo plus imitantur naturalem actionem quam nummismata, quia scriptum est in lib. Sapientiæ xi cap. quod omnia disposuit Deus in numero, pondere et mensura. Si ergo omnes creaturæ his tribus limitibus terminantur, magis videtur quod pondus et mensura a natura trahant originem quam nummismata; et ideo magis necessaria in republica sive in regno.

Amplius autem pondus et mensura, in quantum talia, semper ordinantur ad mensurata et ponderata; aliter per se nihil sunt. Sed nummismata, quamvis sit mensura et instrumentum in permutationibus, tamen per se aliquid esse potest: puta, si conlletur, erit aliquid, videlicet aurum vel argentum. Ergo semper non ordinabitur ad permutationes. Et hoc etiam habet veritatem in aliis speciebus pecuniarum, immo amplius, ut in campсорia, quæ non proprie ordinatur ut sit mensura rerum venalium, sed magis ad permutationem nummismatis. Item in obolostatica, quæ consistit circa ponderis excessum in permutationibus: quibus inventis supra pondus in metalla resolvuntur, ut sunt ponderatores in trabuchetis, et aliis ponderibus. Item nec cathos, id est ars furnaria, quæ magis ordinatur ad nummismata sicut ad finem, aliis permutationibus exclusis: de quibus speciebus in IV *Politico*rum agit Philosophus, et infra dicitur, et supra est tactum.

Rursus. Illi actus sunt maxime necessarii in republica sive in regno, qui ex jure naturæ procedunt: quia leges institutæ per principes idem

habent initium, alias justæ leges non essent. Sed talia sunt de jure naturæ, quia adæquant naturalem justitiam. Sic ergo ad naturam regni sive politiæ, mensuræ et pondera sunt necessaria.

Hinc est quod primus dux Israëliti populi, videlicet Moyses, ut describit Isidorus, tradendo leges divinas, quæ primæ fuerunt, simul cum illis pondera et mensuras constituit, sive pro cibis et potibus, ut ephi, et gomor, et modius, et sextarius; sive in terris et pannis, quæ cubitales habent mensuras, sive in auro et argento et nummismatibus, quæ sunt statera et alia pondera. Unde cum dictus Moyses in Levitico xix, 3, exhortaretur populum ad justitiam faciendam, statim subjungit regulas naturalis justitiæ, ut Origenes ibidem exponit. *Non facietis, inquit, iniquum aliquid in pondere et mensura. Statera justa, et æqua sint pondera, justus modius, æquusque sextarius.* Refert iterum Isidorus quod Sidon Argus Græcis mensuras dedit, ubi tunc florebat Argivorum regnum circa tempora præfati ducis Moysis. Narrant etiam historiæ Cererem mensuras agriculturæ, et frumenti Græcis Sicione tradidisse. Unde et dea frumentaria et demetria est vocata.

Ex his ergo apparet quod naturaliter oportet regem vel quemcumque dominum ad bonum ipsorum regimen mensuras et pondera populo sibi subjecto tradere propter causas jam dictas, et exemplo dictorum principum, de quibus nunc est actum.

#### CAPUT XV.

*Hic auctor declarat quod oportet regem et quemlibet dominum ad conservationem sui status adhibere sollicitudinem ut de ærario publico provideatur pauperibus: et hoc exemplis et rationibus probat.*

Est autem et aliud quod est ad bonum regimen pertinens regni sive provinciæ, vel civitatis, vel cujuscumque principatus: ut videlicet de communi ærario provideatur per principem qui præsit indigentibus pauperum, pupillorum et viduarum, ac adventis et peregrinis assistat. Si enim natura quæcumque non delicit in necessariis, ut Philosophus dicit in III *De cæl. et mundo*, multo minus et ars, quæ imitatur naturam. Inter omnes autem artes ars vivendi et regendi superior et amplior est, ut tradit Tullius *De Tusculanis questionibus*. Ergo reges et principes in necessariis delicere non debent indigentibus, immo potius subvenire.

Præterea, Reges et principes vices Dei gerunt in terris, per quos Deus mundum gubernat sicut per causas secundas. Unde et Samuel Propheta spretus in dominio, cum querelam proponeret coram Deo, responsum habuit, quod non ipsum Israëlitiens populus spreverat, sed Deum, cujus videlicet vices gerebat; et in Prover. xviii, 15, dicitur: *Per me reges requant, et legum conditores justo decernunt.* Sed Deo specialiter est cura pauperum, ad naturam ipsorum defectum supplendum; propter quod sic agit divina providentia circa indigentem sicut pater erga filios impotentes, de quibus amplior incumbit sollicitudo propter ampliorem necessitatem. Unde et ipse Dominus sibi reputat fieri specialiter quod sit pau-



peri : ipso attestante, qui dicit Matth. xxv, 40 : *Quod uni ex minimis meis fecistis, mihi fecistis.* Ergo ad istum defectum pauperum supplendum, sicut vices Dei gerentes in terris, principes et praelati sunt debitores, et sicut patres, quos cogit officium esse auxiliatores subditorum, ut Philosophus dicit in VIII *Ethic.*, ipsorum cum effectu beneficium speciale debent curam habere. Talem autem sollicitudinem habuit Philippus rex Macedo circa Phisiam : quem, ut scribit Vegetius lib. III *De re militari*, cum prius haberet offensum, audiens ipsum licet nobilem habere tres filias, et cum ipsis inopia premi, ab admonentibus de hoc, quaerens utrum melius foret partem aegram corporis abscindere quam curare, familiariter accersivit, et accepta de facultatum domesticarum pecunia instruxit, et fidelio rem habuit.

Amplius autem quia reges et principes communes habent actiones, et universalem diligentiam subditorum, cum non sufficiat homo solus ad proprias actiones, oportet quod in multis delicias : quia talis actio, sive actiones, quae sunt populum gubernare, ac unicuique suorum subditorum secundum merita providere, transcendit virtutem naturae : propter quod dicitur quod est ars artium regimen animarum : et arduum est valde ut qui nescit tenere moderamina vitae suae, iudex fiat vitae alienae. Secundum quam causam Sauli assumpto et uncto in regem per Samuelem Prophetam praecipitur quod ascenderet ad concum Prophetarum, ut ibidem per elevationem mentis prophetando cum eis, circa populum gubernandum ex divina influenza haberet notitiam agendorum : quod et factum fuit, ut patet I Reg. x. Unde impossibile est reges et principes non errare propter dictam causam, nisi ad illum qui omnia gubernat et omnium est conditor, se convertant. Et propter hanc causam dicitur in Ecclesiastico de regibus Israelitici populi, quod praeter David, Ezechiam et Josiam, qui fuerunt viri spirituales et a Deo illuminati, omnes peccaverunt Domino. Isti autem defectui subvenitur per eleemosynae beneficium, unde pauperes sustententur ; sicut per Danielelem Prophetam dictum est illi principi ethnico regi Babylonis Nabuchodonosor, qui in toto oriente generalis erat monarcha Dan. iv, 24 : *Peccata tua eleemosynis redime, et iniquitates tuas in misericordis pauperum converte.* Sunt ergo ipsae eleemosynae, quas faciunt Principes indigentibus, quasi quidam fidejussor coram Deo pro ipsis ad solvendum debita peccatorum, ut Philosophus dicit de nummismate respectu rerum venialium. Et sicut nummismata est mensura in permutacionibus pro vita corporali, ita eleemosyna in vita spirituali propter quod in Eccl. xvii, 18, dicitur : *Eleemosyna viri quasi (a) sacculus cum ipso, et gratiam hominis quasi pupillam oculi conservabit.*

Ex hoc igitur satis est manifestum, qualiter opportunum est regibus et cuicumque domino in ipsorum dominio, de communi aerario republicae, sive regali, pauperibus providere. Hinc est quod in singulis provinciis, civitatibus et castris, ad talia ministeria exercenda sunt hospitalia instituta sive per reges, sive per principes et cives, ad pauperum inopiam ubi vanda, et non solum apud fideles, sed etiam apud infideles. Domos enim instituebant hospitalitatis ad pauperum

subventionem, quas Jovis hospitalia nominabant, ut patet in libro II Machab., propter effectum benevolentiae et pietatis qui eidem attribuitur planetae, secundum astrologos. De Aristotele etiam tradunt historiae, quod Alexandro exhortatorias litteras destinavit, quod pauperum inopiae memor esset, ad prosperitatem sui regiminis augmentandam.

## CAPUT XVI.

*Hic auctor declarat qualiter oportet regem et quemcumque dominantem, ad cultum divinum intendere ; et quis fructus ex hoc sequatur.*

His habitis agendum est de cultu divino, ad quem reges et principes studere debent toto conatu et sollicitudine sicut ad finem debitum : et ideo hic in hoc ultimo capitulo traditur : de quo rex ille magnificus Salomon in Eccl. xii, 13, scribit : *Finem loquendi omnes pariter audiamus. Deum time, et mandata ejus observa : hoc est enim omnis homo.* Et quamvis iste finis omnibus sit necessarius, divinus videlicet cultus et reverentia per observantiam mandatorum, ut jam dictum est ; regi tamen magis competit, et hujus rei est magis debitor propter tria quae sunt in ipso : quia videlicet homo, et quia dominus, et quia rex.

Quia homo singulariter a Deo creatus : ceteras enim creaturas Deus dicendo fecit ; cum vero hominem creavit, dixit Gen. 1, 26 : *Faciamus hominem ad imaginem et similitudinem nostram.* Unde Apostolus in Act. Apostolorum xvii, 28, refert verba Arati Poetae dicentis : *Ipsius enim genus Dei sumus.* Ex hac ergo parte debitores sumus omnes Deo in generali ad divinam reverentiam, quod est primum praecipuum primae tabulae : unde dicitur populo Israelitico in Deuter. cap. vi, 4, per Moysen, et per consequens nobis : *Audi Israel : Dominus Deus tuus, Deus unus est :* quasi ipse solus sit cui debetur reverentia et honor, in quantum ab ipso solo creati sumus, et singulari quaedam praerogativa producti. Et propter hoc, habita consideratione tanti beneficium, subdit Moyses in eodem statim loco, dicens : *Diliges Dominum Deum tuum ex toto corde tuo, et in tota anima tua, et in tota fortitudine tua :* in hoc volens ostendere quod totum Deo debeamus quod sumus. Et in recognitionem ejus praecipuum de decimis fuit institutum, ad quod quilibet obligatur non in quantitate numeri, sed cuicumque rei ex dicta jam causa. Sed quamvis quilibet ad hoc sit obligatus, plus tamen princeps, etiam sicut privata persona, in quantum plus participat de nobilitate humanae naturae ratione sui generis unde trahit originem, et inde nobilitatem, ut Philosophus probat in sua *Rhetorica.* Qua consideratione motus Caesar Augustus, qui et Octavianus, ut historiae tradunt, divinos honores non sustinens, qui eidem exhibebantur a Romano populo propter corporis ejus pulchritudinem et animi probitatem, suum creatorem et factorem quaesivit a Sybilla Tyburtina, quem et invenit et adoravit ; prohibuitque edicto ne ipsum ulterius aliquis de dicto populo adoraret, vel Deum aut Dominum vocaret.

(a) Hugo a S. Charo : « Quasi sacculus. »

Amplius autem inquantum dominus, quia *non est potestas nisi a Deo*, ut Apostolus dicit ad Romanos, xii cap., unde et vices Dei gerit in terris, ut dictum est supra. Propter quod tota virtus domini ex Deo dependet sicut ejus ministri. Ubi autem est dependentia in domino<sup>1</sup>, necessaria est superioris reverentia, quia per se nihil est, ut in ministris regalium curiarum contingit. Propter quod in Apocalypsi quotiescumque agitur de cœlestium spirituum ministerio, qui per seniores tamquam maturiores in actionibus, et animalia quæ potius aguntur quam agant, ex vehementi irradiatione divina, et in ministerio designantur, semper de eisdem subjungitur, quod *cciderunt in facies suas, et adoraverunt Deum* : qui quidem duo actus sunt patriæ, seu divini cultus. Unde et ille Nabuchodonosor monarcha in oriente, ut scribitur in Daniele, quia suum dominium non recognoscebat a Deo, secundum suam imaginationem, in bestiam est translatus, et dictum est ei Dan. iv. 22 : « *Septem temporu mutabuntur super te, donec scias quod dominetur Excelsus in regno hominum, et cui-cumque voluerit, det illud.* » Circa quod etiam monitus Alexander, ut historiae tradunt, cum proposito vadens Judæam destruendi regionem, cum appropinquanti Jerusalem ei irato in albis summus Pontifex occurrisset cum ministris templi, mansuefactus, et de equo descendens, ipse eum vice Dei reveritus est, et ingressus templum maximis honoravit donis, et gentem totam pro divina reverentia libertate donavit.

Non solum autem sicut homo et dominus ad divinum obligatur cultum, sed etiam sicut et rex, quia inunguntur oleo consecrato, ut patet de regibus Israelitici populi, qui oleo sancto inungebantur manibus Prophetarum : unde et Christi Domini vocabantur propter excellentiam virtutis et gratiæ in conjunctione ad Deum, quibus præditi esse debebant : secundum quam unctionem consequabantur quamdam reverentiam et delationem honoris. Propter quod etiam David, quia præcidit chlamydem regis Saulis percussit pectus suum in pœnitentiis signum, ut scribitur in I lib. Regum. Rex etiam David eum lamentabiliter deplorat mortem Saulis et Jonathæ, ita querelam proponit de Ailophylorum irreverentia, quod sic occiderant regem Saul, quasi non esset unctus oleo : ut in fine scribitur secundi libri Regum. Cujus sanitatis etiam argumentum assumimus ex gestis Francorum, de beati Remigii super Clodoveum regem primum Christianum inter reges Francorum, et delatione olei desuper per columbam, quo rex præfatus fuit inunctus, et inunguntur posterius signis et portentis, ac variis curis apparentibus in eis ex unctione prædicta. Amplius autem et in dicta unctione, ut Augustinus ait *De civitate Dei*, figurabatur rex verus et Sacerdos, juxta Danielem Prophetam ix cap. *Cum venerit*, inquit, *Sanctus sanctorum, cessabit unctio vestra*. Inquantum igitur figuram gerunt in hac unctione illius qui est *Rex regum et Dominus dominantium*, ut dicitur in Apocal. xix cap. qui est Christus Dominus noster, debitores sunt reges ad ipsum imitandum, ut sit debita proportio figuræ ad figuratum, umbræ ad corpus : in quo verus ac perfectus cultus divinus includitur.

Patet igitur quam necessarium sit cuilibet do-

mino ut sit Deo devotus et reverens, sed præcipue regi ad conservationem sui regiminis : cujus exemplum trahimus quidem a primo urbis rege, videlicet Romulo, ut historiae tradunt. In primordio enim sui regiminis in urbe Romana fabricavit asylum, quod templum pacis nominabant, multis amplians gratis ; pro cujus nomine et reverentia omnem sceleratum qui ad ipsum confugeret, ejuſcumque status esset, reddebat immunem. Qualem autem habuerint exitum posterius ejus, qui in divino cultu fuerunt negligentes, et qui fuerunt ferventes, scribit Valerius Maximus in principio libri sui. Quid vero dicam de deicolis regibus sive veteris sive novi testamenti? Omnes enim qui ad divinam reverentiam fuerunt solliciti, feliciter suum consummaverunt cursum : qui vero e contra, infelicem consecuti sunt exitum. Tradunt etiam historiae quod in qualibet monarchia ab initio sæculi tria se invicem per ordinem comitata sunt : divinus cultus, sapientia scholastica et sæcularis potentia. Quæ quidem tria se invicem per ordinem consequuntur, et in rege Salomone ex suis meritis conservata sunt, quia per divinam reverentiam cum descendit in Hebron locum orationis, assumptus in regem consecutus est sapientiam, et ex utroque ulterius in regali virtute super reges sui temporis excellentiam. Cum vero a vero cultu Dei recessit, infelicem exitum habuit, ut patet in III libro Regum.

Hæc igitur de pertinentibus ad regimen cujuscumque domini, se præcipue regalis, in hoc libro in tantum sint dicta.

## LIBER TERTIUS.

### CAPUT I.

*Consideratur et probatur omnium dominium esse a Deo, considerata natura entis.*

Et quia *cor regis in manu Dei, quocumque voluerit, inclinat illud* : ut in Proverb. xxi, 1, scribitur : quod et ille magnus monarcha in oriente, Cyrus videlicet rex Persarum, per publicum confitetur edictum : post victoriam enim de Babylonia consecutam, quam usque ad solum destruxit, ac occiso Balthassar rege ibidem, sicut historiae tradunt, sic ait, ut in principio libri Esdræ i. 1, 2, patet : *Hæc dicit Cyrus rex Persarum : Omnia regna mundi dedit mihi Dominus Deus cœli* : inde manifeste apparet a Deo omne provenire dominium sicut a primo dominante : quod quidem ostendi potest triplici via, quam Philosophus tangit : quia vel inquantum ens, vel inquantum motor, vel inquantum finis.

Ratione quidem entis : quia oportet omne ens ad ens primum reducere sicut ad principium omnis entis, ut et omne calidum ad calidum ignis, ut patet per Philosophum in II *Metaphys.* Qua ergo ratione omne ens ex ente primo dependet, eadem et dominium : quia ipsum super ens fundatur, et tanto super nobilius ens, quanto et ad dominandum super homines in natura cœquales eisdem præponitur. Unde et causam habet non

<sup>1</sup> Al. : « a dominio. »

superbiendi, sed humanæ suum populum gubernandi, ut Seneca dicit in *Epistola ad Lucillum* Propter quod in Eccli. dicitur xxxii, 1 : *Rectorem te posuerunt ? noli extolli, sed esto in illis quasi unus ex illis* \*. Sicut ergo omne ens ab ente primo dependet quod est prima causa ; ita et omne dominium creaturæ a Deo sicut a primo dominante et primo ente.

Amplius autem omnis ab uno procedit, et per unum mensuratur, ut patet per Philosophum in *X Primæ Philosophiæ* (a). Ergo eodem modo et multitudo dominantium ab uno dominante trahit originem quod est Deus : sicut videmus in regalibus curiis quod in diversis officiis multi sunt dominantes, sed omnes ex uno dependent, videlicet rege. Propter quod Philosophus in *XII Primæ Philosophiæ* dicit quod sic se habet Deus, sive prima causa, ad totum universum, sicut dux ad exercitum a quo tota multitudo castrorum dependet. Unde et ipse Moyses in Exod. xv, 13, Deum ducem populi vocat. *Dux, inquit, fuisti in misericordia tua populo quem redemisti*. A Deo igitur omne dominium habet initium.

Rursus ad idem. Virtus est proportionata enti cuius est virtus, et adæquatur ei : quia virtus fluit ab essentia rei, ut patet per Philosophum in I et II lib. *De celo*. Sicut ergo se habet ens creatum ad increatum quod est Deus ; ita virtus cuiuslibet entis creati ad virtutem increatam, quæ etiam est Deus : quia quidquid est in Deo, Deus est. Sed omne ens creatum ab ente increato trahit originem. Ergo virtus creata ab increata. Hoc autem in dominio præsupponitur, quia non est dominium ubi non est potentia sive virtus. Ergo omne dominium erit ab increata virtute, et hæc est Deus, ut supra dictum est ; et sic idem quod prius. Unde Apostolus dicit ad Heb. 1, quod Deus portat omnia verbo virtutis suæ. In Eccli. 1, 8, etiam scribitur quod *unus est altissimus creator omnium, omnipotens, rex potens, metuentus nimis, sedens super thronum, dominans Deus*. In quibus verbis satis apparet, a quo omnis creatura habet esse, virtutem et operationem, et per consequens dominium ; et multo amplius rex, ut superius est ostensum.

## CAPUT II.

*Hoc idem probat ex consideratione motus cuiuslibet naturæ creatæ.*

Non solum autem ratione entis, sed ratione etiam motus probatur, a Deo provenire dominium.

Et primo quidem assumenda est ratio Philosophi in *VIII Physicorum*. Quia omne quod movetur, ab aliquo movetur ; et in moventibus et motis non est abire in infinitum. Ergo oportet venire ad aliquod primum movens immobile quod est Deus, sive causa prima. Inter omnes autem homines, qui plus habent de ratione motus, sunt reges et principes, et omnes qui præsent, sive in gubernando, sive in iudicando, sive in defendendo, et sic de aliis actibus qui ad curam regiminis pertinent. Unde Seneca *De consolatione fratris ad Polibium*, sic loquitur de Cæsare, exhortans eum ad contemp-

tum mundi : « Cum voles omnium rerum oblivisci, cogita Cæsarem. Vide quantam hujus vitæ indulgentiæ fidem, quantam industriam debeas ; intelliges non magis tibi incurvari licere quam illi. Si quis modo est fabulis traditus, cuius humeris mundus innititur ; Cæsari quoque ipse, cui omnia licent, propter hoc ipsum multa non licent. Omnium domos illius vigilia defendit, omnium otium illius labor, omnium delicias illius industria, omnium vacationem illius occupatio. Ex quo se Cæsar orbi terrarum dedicavit, sibi se eripuit ; et siderum modo, quæ irrequieta semper cursus suos explicant, nunquam illi licet nec subsistere, nec quidquam suum facere. » Si ergo reges et alii domini tantum habent de ratione motus, ipsum non possunt perlicere nisi per influentiam et virtutem moventis primi quod est Deus ; ut superius est probatum. Propter quod in lib. Sapient. ubi connumerantur effectus divinæ virtutis per suam sapientiam, volens auctor ostendere qualiter omnia influentiam divini motus participant, subdit statim Sap. vii, 24 : *Omnibus mobilibus mobilior est sapientia : attingit autem ubique propter suam munditiam, munditiam* <sup>1</sup> vocans absolutam et supergredientem ac immixtam divinam virtutem ad omnia movendum, ad similitudinem corporis lucis, quæ ex hac parte naturam imitatur divinam.

Rursus ad idem. Omnis causa primaria plus est influens in suum causatum quam causa secundaria. Causa autem prima Deus est. Ergo si virtute primæ causæ omnia moventur et influentiam primi motus omnia recipiunt, et motus minorum erit ex virtute Dei et ex Deo movente.

Amplius autem. Si est ordo in motibus corporalibus, multo magis et in spiritualibus erit. Sic autem videmus in corporibus quod inferiora per superiora moventur, et omnia reducuntur ad motum supremi quod est nona sphaera, secundum Ptolomæum in I distinct. *Almagesti* ; sed secundum Aristotelem in II *De celo*, est octava. Si ergo omnes motus corporales regulantur per primum, et a primo habent influentiam, multo magis spirituales substantiæ, propter majorem assimilationem quam habent in alterutrum : unde aptiores sunt ad recipiendam influentiam primi et supremi moventis, sive motoris ; quod est Deus : quem quidem motum nobis tradit beatus Dionysius in lib. *De divinis nominibus*, et *De cælesti hierarchia*, distinguens in eis motum sicut et in corporibus, videlicet circularem, rectum et obliquum. Qui quidem motus sunt quædam illuminationes quas recipiunt a superioribus ad agendum, ut idem Doctor exponit : ad quas quidem illuminationes recipiendas necessaria est dispositio mentis, in qua fit ista influentia motus. Inter omnes autem homines qui paratiores esse debeant, sunt reges et principes, et alii dominatores orbis : tum ex exercitio quod habent ; tum ob universales actiones regiminis, unde et mens magis elevatur ad divina ; tum etiam quia hoc eis incumbit ut se disponant ut cura eis imposita in gubernando gregem <sup>2</sup>, et alia quæ sunt necessaria in actibus regiminis, quæ supra ipsum sunt, et naturam particularem excedunt, per talem motum divinæ influentiæ sufficientius deducantur. Sic enim David rex se disposuit : propter quam causam ex motu illu-

<sup>1</sup> Al. deest vox repetita : « munditia. »

<sup>2</sup> Al. : « regem : » forte : « regnum. »

(a) *Prima Philosophia*, seu *Metaphysica*.

minationis præfatæ super omnes reges et Prophetas meruit in suis psalmis spiritum propheticæ intelligentiæ, ut doctores Scripturæ sacræ tradunt. Ex cuius contrario actu principes ethnici, de quibus Daniel Propheta mentionem facit, ut Nabuchodonosor et Balthassar, pater et filius, meruerunt obumbrari : unde et influentia divinæ illuminationis movit eorum phantasiam in imaginativis visionibus, ut in Daniele est manifestum, ut scirent quid circa regale regimen eis esset agendum : sed quia mens ipsorum non erat disposita, sed involuta tenebris peccatorum, ad ipsam notitiam non potuerunt venire. Propter quod insignito lumine prophetiæ Danieli dictum est : *Tibi datus fuit spiritus intelligentiæ ad ista interpretandum* : ut verificetur quod per Salomonem dicitur in Proverb. viii, 14 : *Meum est consilium et æquitas, mea est prudentia, et mea est fortitudo : per me reges regnant, et legum conditores justa decernunt : per me principes imperant, et potentes decernunt justitiam.*

Et sic manifestum est, qualiter omne dominium est a Deo in consideratione motus.

### CAPUT III.

*Hoc idem probat per considerationem finis.*

Sed et respectu finis adhuc hoc idem apparet. Si enim est hominis agere propter finem ratione sui intellectus, qui finem in unaquaque ejus actione præstituit, unaquæque natura quanto est magis intellectiva, tanto magis propter finem agit. Cum ergo Deus sit summa intelligentia et purus actus intelligendi, sua actio magis finem includit. Ergo oportet dicere quod in unoquoque fine uniuscujusque rei creatæ præexigatur actio intellectus divini, quam et nos divinam prudentiam vocamus, per quam Dominus cuncta disponit, et in debitum finem deducit, ut Boetius *De consolatione Philosophiæ* ipsam nominat : secundum quam rationem dicitur in lib. Sapientiæ quod divina sapientia *attingit a fine usque ad finem fortiter, et disponit omnia suaviter.* Concluditur ergo ex hoc quod quælibet res quanto ordinatur ad excellentiorem finem, tanto plus participat de actione divina. Hujusmodi autem est regnum ejusdemque communitatis seu collegii sive politiæ, sive regalis, sive ejuscumque conditionis : quia cum intendat nobilissimum finem, ut Philosophus tangit in *Ethic.*, et in *I Politicorum*, in ipso divina præintelligitur actio, et suæ virtuti dominorum subjicitur regimen. Et hinc forte trahit originem veritatis quod bonum commune dicitur potentia a Philosopho in *Ethic.*

Amplius. In regimine legislator semper debet intendere ut cives dirigantur ad vivendum secundum virtutem : immo hic est finis legislatoris, ut Philosophus dicit in *II Ethic.* Propter quod et Apostolus dicit ad Timotheum I cap. 1, 3, quod *finis præcepti est caritas.* Sed ad istum finem venire non possumus sine motione divina, sicut nec calor calefacere sine virtute caloris ignis, nec lucidum lucere sine virtute lucis : et tanto altius et excellentius motio primi moventis, quanto virtus divina supergreditur et transcendit virtutem creatam, et omne genus operis ; sed et fortius influat, intantum, ut dicat illi Isaias Propheta xxvii, 12 : *Omnia opera nostra operatus es in nobis Domine* : et vox evangelica Joan. xv, 5 : *Sine me nihil potestis facere.*

Rursus ad idem. Finis movet efficientem ; et tanto efficacius, quanto finis nobilior et melior reperitur, ut bonum gentis respectu boni civitatis vel familiæ, sicut Philosophus dicit in *I Polit.* Finis autem ad quem principaliter rex intendere debet in se ipso et in subditis, est æterna beatitudo, quæ in visione Dei consistit. Et quia ista visio est perfectissimum bonum, maxime debet movere regem et quemcumque dominum, ut hunc finem subditi consequantur : quia tunc optime regit, si talis in ipso sit finis intentus. Tali autem modo suos regebat et gubernabat rex ille et Sacerdos Christus Jesus, qui dicebat in Joan. x, 28 : *Ego vitam æternam do eis* ; et iterum ibid. 41 : *Ego veni ut vitam habeant et abundantius habeant.* Hoc autem maxime facit rex, quando super gregem suum sicut bonus pastor invigilat ; quia tunc super eum divina lux irradiat ad bene regendum, ut pastoribus in ortu regis nostri et Salvatoris. Et irradiationis jam dictæ ad bonum regimen et in principe et in subditis motum circulem accipimus rectum et obliquum, de quibus distinctum est supra et beatus Dionysius loquitur in iv cap. *De divinis nominibus.* Illic enim motus ideo rectus dicitur, quia fit per divinam illuminationem super principe ad bene regendum et super populum meritis principis. Sed obliquus vocatur, quando per divinam illuminationem sic subditos regit quod virtuose vivunt et insurgit in eis divina laus et gratiarum actio, ut sit quasi quædam arcualis figura ex chorda recta et arcu obliquo. Sed circularis motus divinarum radiorum dicitur, quando divina illuminatio irradiat principem vel subditum : ex qua quidem elevantur ad Deum contemplandum et diligendum : qui ideo circularis motus vocatur, quia est ab eodem ad idem et a puncto ad punctum ; quod circularis motus est proprium. Quem quidem motus Philosophus etiam ponit *II Metaph.*, ubi dicitur quod motor primus, sive causa prima quod est Deus, movet alia sicut desideratum, hoc est ratione finis, qui est ipse. De quo et Propheta David loquitur in Psalm. lxxi, licet secundum sacros doctores adaptetur ad Christum regem nostrum : *Deus, inquit, iudicium tuum regi da, et iustitiam tuam filio regis : iudicare populum tuum in iustitia et pauperes tuos in iudicio. Suscipiant montes pacem populo et colles iustitiam.* Quæ quidem omnia deprecativa sunt regis et ejuslibet domini ad Deum pro bono regimine populi, ad quod principaliter conari debet, ut dictum est supra. Et quia mentem sic dispositam habent ad divinam influentiam recipiendam pro salute subditorum, statim subditur : *Descendet sicut pluvia in vellus, et sicut stillida stillantia super terram. Orvetur in diebus ejus iustitia et abundantia pacis.* Per quæ omnia satis manifestum est quod dominium est a Deo in relatione ad finem sive remotum, qui est ipse, sive propinquum, qui est operari secundum virtutem.

### CAPUT IV.

*Hic auctor declarat, qualiter dominium Romanum fuit a Deo prorsum propter zelum patriæ.*

Et quia inter omnes reges et principes mundi, Romani ad prædicta magis fuerunt solliciti, Deus illis inspiravit ad bene regendum, unde et digne



meruerunt imperium, ut probat Augustinus in lib. *De civ. Dei* diversis causis et rationibus, quas ad præsens perstringendo, ad tres reducere possumus, aliis, ut tradatur compendiosius, resecatis, quarum intuitu meruerunt dominium. Una sumitur ex amore patriæ, alia vero ex zelo justitiæ, tertia autem ex zelo civilis benevolentia.

Prima jam dicta virtus satis erat digna dominio, qua participabant quamdam naturam divini, eo quod ad communitatem suam fertur effectus: versatur enim ad universales actiones populi, sicut Deus est universalis causa rerum: unde et Philosophus dicit in I *Ethic.*, quod bonum gentis est bonum divinum. Et quia regale regimen et quodcumque dominium communitatem importat, communitatem diligens dominii, communitatem meretur, ut sic ipsum concomitetur præmium secundum meriti qualitatem: et hoc requirit conditio divinæ justitiæ unicuique mercedem rependere juxta virtutis opus, ut verbum scriptum in Apocalypsi impleatur in eis: *Opera eorum sequuntur illos*: et iterum in Matth. xxv. cap. scribitur, quod Dominus dedit unicuique secundum propriam virtutem.

Amplius autem amor patriæ in radice caritatis fundatur, quæ communia propriis, non propria communibus anteponit, ut beatus Augustinus dicit exponens verbum Apostoli de caritate. Virtus autem caritatis in merito antecedit omnem virtutem, quia meritum cujuscumque virtutis ex virtute caritatis dependet. Ergo amor patriæ super ceteras virtutes gradum meretur honoris. Hoc autem est dominium. Ergo ex amore digne consequitur quis principatum. De hoc autem amore patriæ dicit Tullius in lib. *De officiis*, quod « omnium societatum nulla est gratior, nulla carior quam ea quæ cum republica perseverat. Unicuique enim nostrum cari sunt parentes, cari sunt liberi, cari sunt propinqui ac familiares; sed omnium propinquitates patria sua caritate complexa est: pro qua qui bonus dubitet mortem oppetere, si eidem sit profuturus? » Quantus vero fuerit amor patriæ in antiquis Romanis, Sallustius refert in *Catilinario* ex sententia Catonis, quasdam de eis communerando virtutes, in quibus dictus amor includitur « Nolite, » inquit, « existimare majores nostros armis rempublicam ex parva magnam fecisse: quippe amplior nobis quam ipsis armorum est copia; sed quia in eis fuit domi industria, foris justum imperium, in consulendo animus liber, neque delicto neque libidini obnoxius. Pro his nos habemus luxuriam atque avaritiam, publice egestatem, privatim opulentiam: laudamus divitias; sequimur inertiam; inter bonos et malos nullum discrimen: omnia virtutis præmia ambitio possidet. »

Rursus amor patriæ primum et maximum mandatum continere videtur, de quo Evangelium Lucæ mentionem facit, quia in zelando rem communem assimilat sibi naturam divinam, in quantum vice Dei diligentem circa multitudinem adhibet curam.

Item proximi dilectionem adimplet, dum totius populi sibi commissi ex affectu paterno sollicitudinem gerit, et sic adimplet mandatum præfatum, de quo dicitur in Deut. vi, 5: *Diliges Dominum Deum tuum ex toto corde tuo, et ex tota anima tua, et ex tota fortitudine tua, et proximum tuum sicut te ipsum.* Et quia in isto præcepto divino non cadit dispensatio, inde est quod Tul-

lius dicit de republica, quod nulla causa intervenire debet unde propria patria denegetur. De isto autem amore patriæ exemplum accipimus, ut historiae tradunt, et beatus Augustinus in V *De civit. Dei* de Marco Curtio nobili milite, qui armatum equo sedentem in abruptum terræ hiatus se præcipitem dedit, ut pestilentia cessaret ab urbe. Item de M. Regulo, qui salutem reipublicæ suæ præferens, consultus a Romano populo, et inter prædictum populum et Pœnorum gentem mediator pacis existens, in Africam rediens a Carthaginensibus est occisus. Quam mundas etiam habuerunt manus a muneribus principes eorum, pro conservanda republica, patet de M. Curio, de quo scribit Maximus Valerius libro quarto quomodo Samnitum divitias contempsit. Cum enim post victoriam de ipsis habitam, legati eorum ad ipsum aditum habuissent, ipsumque reperissent in scamno sedentem, et catino ligneo cœnantem, magnumque auri pondus offerrent, suis invitatus verbis ut eo uti vellet, vultum protinus risu solvens, « Supervacue, » inquit. Narrate Samnitibus, M. Curium malle locupletibus imperare quam locupletem fieri: et mementote me non acie vinci, nec pecunia posse corrumpi. » Simile etiam refert idem auctor libro eodem de Fabritio, qui cum honore et auctoritate omnibus in ætate sua major, censu vero par esset unicuique pauperrimo, requisitus a Samnitibus, quos in clientela detinebat, pecuniam et servos sibi missos contempsit, ac frustratos remisit: « continentia suæ beneficio et zelo patriæ sine pecunia prædives, et sine usu familiæ abunde comitatus: quia locupletem illum faciebat non multa possidere, sed pauca desiderare. » De talibus autem concludit dictus Doctor, quod eisdem non datur dominandi potestas, nisi summi Dei providentia, quando res humanas judicat talibus donis esse dignas. Multa similia ibidem dicit, per quæ definire videtur eorum dominium fuisse legitimum, et eis a Deo collatum. Sed et Mathathias et filii quamvis fuerint de sacerdotali genere, propter zelum legis et patriæ in populo Israelitico meruerunt dominium, ut patet in I et II Machab. Cum enim morti esset vicinus, sic filios suos alloquitur I Machab. ii, 50: *Æmulatores inquit, estote legis, et date animas vestras pro testamento patrum.* quod pro republica accipimus in populo prædicto: et postea subditur: *Et accipietis gloriam magnam, et nomen æternum*: quod ad filiorum referimus principatum, quorum unus alteri successit, Judas videlicet et Jonathas et Simon; et quilibet eorum sacerdos et dux in eodem floruit populo.

## CAPUT V.

*Qualiter Romani meruerunt dominium propter leges sanctissimas quas tradiderunt.*

Est autem et alia ratio, unde digne Romani dominium sunt adepti: zelus videlicet justitiæ. Quo quidem modo acquisierunt principatum quodam jure naturæ, a quo habet exordium omne justum dominium. Primo quidem quia, ut idem Doctor scribit, consulebant patriæ consilio libero, avaritiam relegantes in dominio, sive turpis lucri gratiam neque delicto neque libidini obnoxii, pro quibus jam stans dominium dissipatur. Trahe-



bantur enim homines ad ipsorum amorem, ut propter ipsorum justissimas leges se sponte eisdem subicerent. Unde et ipse Apostolus Paulus cum a Judæis nimis injuriis vexaretur, coram Festo principe circa partes Cæsareæ Palestinæ, ut in Actibus Apostolorum traditur, ad Cæsarem appellavit, ac se subjecit legibus Romanis. Quales autem fuerint eorum leges, et quam sanctæ, sic in eisdem Actibus Apostolorum scribitur de dicto Festo, quia cum Jerosolimis esset, adierunt ipsum principes sacerdotum et sacerdotes postulantes adversum Paulum damnationem mortis: quibus dictus Festus respondit, prout dictis legibus Romanorum subjectus, quod non est consuetudo Romanis damnare aliquem, sive donare, nisi præsentibus habeat accusatores, locumque defendendi accipiat ad abluenda crimina. Propter quod dicit idem Doctor Augustinus in XVIII lib. *De civit. Dei*, c. xviii, quod Deo placuit orbem terrarum per Romanos debellare, ut in unam societatem reipublicæ legumque productum longe lateque pacaret.

Amplius autem ad hoc. Quia de jure naturæ est ut quis gerens curam alterius mercedem reportet, eo quod, ut scribitur in Proverb. Eccli. xvii, 12, *Unicuique mandavit Deus de proximo suo*. Ex qua quidem ratione jura concedunt, quod quis rem alienam contrectare possit et expensas deducere, ac premium accipere juxta meritum actionis, cum dicta bona male tractantur a prædonibus, vel quibuscumque raptoribus. Hoc ergo supposito, consonum videtur naturæ ut dominium sit concessum pro pace ac justitia conservanda, jurgiis ac discordiis rescandis.

Item. Ad hoc videtur provisum, ut mali puniantur, et boni promoveantur: et hoc est officium dominorum, in hoc quasi officium gerentium proximorum, ut inde suam reportent mercedem; quia ex hoc sua recipiunt vectigalia et tributa. Unde cum Apostolus ad Romanos ostendisset a Deo provenire omne dominium: *Non est, inquit, Rom. xii, 1, potestas nisi a Deo*, et cetera quæ ibi ponuntur ad dominium pertinentia: ultimo concludit: *Ideo et tributa præstatis: ministri enim Dei sunt, in hoc ipsum servientes*. In quantum igitur homines virtuosi, ac sua probitate præpollentes pro gubernanda populi multitudine quæ rege indiget, et rectorem non habet, curam assumunt, et sub legibus populum diriguunt, non tantum instinctu Dei moveri videntur, sed vicem Dei gerunt in terris, quia conservant hominum multitudines in civili societate, qua necessario homo indiget, cum sit animal naturaliter sociale, ut Philosophus dicit I *Politico*. Unde et in isto casu dominium videtur esse legitimum. Quod quidem probat Augustinus in IV *De civit. Dei*, c. iv: dicit enim sic: « Remota justitia, quid sunt ipsa regna nisi quædam latrocinia? » Ergo ipsa supposita, regnum et quodlibet dominium esse videtur concessum. Introducit autem ad suum probandum intentum exemplum de quodam pyrata, qui vocabatur Dionides (a); qui cum fuisset captus ab Alexandro, quæsivit ab eo cur mare haberet infestum. Ipse « libera contumacia » respondit: « Quod tibi, ut orbem terrarum. Sed quia ego exiguo navigio

id facio, latro vocor; tu vero « quia magna classe, » diceris « Imperator. » Ista ergo ratione Romanis a Deo collatum fuit dominium. Unde et idem Doctor in v ejusdem lib. dicit, quia propter leges ipsorum sanctissimas nisi sunt tamquam recta via ad honores, imperium et gloriam: nec habent unde conqueri debeant de summi et veri Dei justitia: perceperunt enim mercedem suam, juste videlicet dominando, ac legitime gubernando. Quantum autem fuerit zelus justitiæ apud romanos consules antiquos contra malos, de multis est manifestum. Unde scribit Augustinus in v sæpe jam dicto libro, quod Brutus filios suos occidit, quia bella concitabant in populo: ex quo, vigore justitiæ mortem merebantur. « Vicit » enim in eo, ut ait Poeta (Virgilius *Æneid.* vi),

Amor patriæ, laudumque immensa cupido.

Narrat etiam de Torquato, quod idem fecit de filio, quia contra edictum patris invasit juvenili quodam provocatus ardore: et licet victoriosus extiterit, quia tamen castra suæ gentis discrimini exposuit, ipsum morti adjudicavit juxta militares leges ubi idem Doctor causam suæ mortis insinuat, dicens: « Ne plus mali esset in exemplo imperii contempti, quam boni in gloria hostis occisi. » Maximus autem Valerius dicit de ipso, quod maluit proprio nato carere quam disciplinæ militaris transgressionibus indulgere. Sic ergo patet qualiter zelo legalis justitiæ Romani dominium meruerunt.

#### CAPUT VI.

*Quomodo concessum est eis dominium a Deo propter ipsorum civilem benevolentiam.*

Tertia vero virtus per quam subjugarunt Romani mundum, et meruerunt dominium, fuit singularis pietas, ac civilis benevolentia: quia ut tradit Maximus Valerius lib. V, humilitatis dulcedo barbarorum ingenia penetrat: et hoc experimentum habet. Unde et in Eccli. vi, 5, dicitur, *quod verbum dulce multiplicat amicos et mitigat inimicos*. Item in Prov. xv, 1: *Responsio mollis franquit iram: sermo durus suscitatur iram*. Cujus quidem ratio sumitur ex generositate animi, ut dicit Seneca, « qui magis dicitur quam trahatur. Habet enim mens quodam sublime et altum ac impatiens superioris; sed delectatione cujusdam subjicitur reverentiæ, seu lenitatis per quam suspicatur ad paria posse conscendere, et a suo non resilire gradu. » Propter quod et Philosophus dicit in VIII *Ethic.*, quod benevolentia est principium amicitiae. Quantum autem antiqui Romani in hac excelluerint virtute, unde exteræ nationes ad suum traherent amorem, seque eisdem sponte subicerent, exempla ipsorum deducantur in medium. Primo quidem de Scipione, qui, ut refert Maximus Valerius lib. IV, cum esset in Hispania dux Romani exercitus contra gentem Hannibalis, ac vegesimum quartum agens annum Carthaginem ibidem a Pœnis conditam in suam redigisset potestatem, in ipsa virginem cepit eximie venustatis, quam ut desponsatam agno-

<sup>1</sup> « Quid sunt regna, nisi magna latrocinia. »

(a) S. Augustinus in IV *De civitate Dei*, Piratæ istius nomen refert. Legitur tamen etiam in *Speculo Historiali* Vincent. Bellov. lib. IV, c. 11:

« Aug. lib. *De civit. Dei*. Quæ dum peragraret, comprehensus est ab eo Dionides archipirata quidam. »

vit et nobilem, ipsam inviolatam parentibus reddidit, et aurum quod in redemptione ejus traditum fuerat, doli ejus adjecit. Ex quo facto ad amorem Romanorum hostes adduxit, admirantes de tam casta moderatione continentiae dicti principis: quia cum idem auctor ipsum referat solutioris vitae in juvenili aetate fuisse, se ipsum in tanta libertate et potestate consistens ab omni delicto conservavit immunem. Unde Titus Livius de bello Punico narrat, Scipionem sponsum dictae virginis allocutum fuisse, in quo sermone suam ostendit pudicitiam digne principibus imitabilem, et domini meritoriam. Scribit et idem Titus de ipso quaedam benevolentiae inductiva in praedicta victoria. Cum enim misit obsides Romanis, primo quidem hortatus est universos bonum habere animum, venisse enim eos in Romanorum potestatem, qui beneficio quam metu obligare homines mallet, exterisque gentes fide ac societate junctas habere, quam tristi subjectas servitio. De hoc etiam dicit Augustinus I *De civit. Dei.* quod proprium ipsorum fuit parcere subjectis, et debellare superbos, acceptaque injuria ignoscere quam persequi malebant. Refert etiam idem Doctor in eodem lib. de Marco Marcello, qui cum Syracusam urbem cepisset, ante illius ruinam suas illi effudit lacrimas, tantaeque fuit pudicitiae et continentis animi, benignaeque mentis, quod priusquam oppidum jussisset invadi, publico edicto constituit ne quis corpus liberum violaret. Quid pluribus exemplis insistimus? Cum etiam Machabaei, Judas videlicet, Jonathas et Simon, de genere Judaeorum, quorum est proprium aliarum nationum aspernari consortium, tum quia Saturnini sunt, sicut Macrobius dicit super somnium Scipionis, tum quia legibus prohibebatur eisdem, considerata benevolentia Romanorum, cum ipsis statuerunt amicitiam, ut in I Machabaeorum scribitur, ubi inter alia commendabilia de ipsis unde populos gentesque diversas ad suum trahebant amorem et subjectionem politicam, seu despoticam, sub compendio interseritur, quod inter praesides Romanos nemo portabat diadema, nec induebatur purpura, ut magnificaretur in ea. Et quia curiam fecerunt, et consulebant quotidie trecentos viginti, consilium agentes semper de multitudine, ut quae digna sunt gerant: et committunt uni homini magistratum suum per singulos annos dominari universae terrae suae: et omnes obediunt uni, et non est invidia neque zelus inter eos. Ubi attendendum quam ordinatum erat tunc temporis regimen politicum in urbe, quod erat praecipuum motivum cujuscumque nationis et provinciae ipsorum appetere dominium, et eisdem sua colla subjicere. Aliud etiam erat in eis provocativum subjectionis, quia ex cupidine dominandi non se dominos vocabant, sed socios et amicos. Unde et de Julio Caesare in Suetonio scribitur, quod milites suos non sibi subiectos, sed socios et commilitones vocabat. Sic et antiqui consules de Judaeis fecerunt: qui quidem etsi modicum haberent in oriente dominium, cum Romanis tamen confederati sunt foedere amicitiae. Et cum amplam haberent Romani monarchiam in oriente et occidente et aliis mundi plagis, ut ex praedicto lib. Machab., est manifestum, non tamen dignati sunt cum Judaeis societatem inire et ad paria se publico in alterutrum attestari edicto.

Patet igitur ex jam dictis quod meritum virtutis in Romanis antiquis meretur dominium: unde etiam aliae nationes allectae sunt ad ipsorum dominium; tum ex dilectione patriae, pro qua omnia contemnebant: tum ex vigore justitiae, propter quam contra omnem malefactorem et perturbatorem pacis se opponebant: tum ex civili ipsorum benevolentia, in qua ceteras nationes ad sui amorem trahebant. Pro quibus omnibus ex merito virtutum in ipsis divina bonitas consensisse videtur <sup>1</sup> ad ipsorum principatum ex causis et rationibus assignatis. Sic enim quis meretur dominium, ut Philosophus in V *Ethic.* tradit: ubi dicit quod non sinimus principari hominem in quo est natura humana tantum, sed illum qui est perfectus secundum rationem, sicut dictum est supra.

## CAPUT VII.

*Hic Auctor declarat, qualiter Deus permittit ali-  
quod dominium ad punitionem malorum; et quod  
tute dominium est quasi instrumentum divinae  
justitiae contra peccatores.*

Fuit autem et alia causa, unde dominium est a Deo permissam, quam a sacra accipimus Scriptura, nec Philosophorum et sapientum hujus saeculi sententiis est contraria, videlicet propter merita populorum: quam beatus Augustinus assignat in XIX *De civit. Dei.* Probat enim ibi servitutum introductam propter peccatum. Unde et sacra Scriptura dicit in Job. xxxiv, 30, videlicet quod *facit regnare hominem hypocritum propter peccata populi.* Quod quidem apparet, quia primo dominantes in mundo fuerunt homines iniqui, ut historiae tradunt, sicut Cain, Nembrot, Belus, Ninus, et Semiramis uxor ejus, qui et dominium habuerunt in prima et secunda aetate mundi. Causa autem unde habuerunt istud dominium, assumi potest ex parte subditorum, vel dominantium: quia tyranni sunt instrumentum divinae justitiae ad puniendum delicta hominum, sicut rex Assyriorum super Israeliticum populum, et rex Gothorum flagellum Dei super Italiam, ut historiae narrant. Item Dionysius in Sicilia, sub quo captivatus est populus, et tandem ab ipso libertate donatus, ut scribit Maximus Valerius lib. IV. De rege vero Assyriorum quomodo ad puniendum delicta sui populi est destinatus, sic ostenditur per Isaiam Prophetam, cap. x, 5: *Assur virga furoris mei. unde et baculus ipse est: in manu ejus \* indignatio mea. Ad gentem fallacem mittam eum, et contra populum furoris mei mandabo illi ut auferat spolia, et dividat \* praedam, et ponat illum in conculationem quasi lutum platearum:* quae omnia verificata sunt, quando Jerusalem obsessa est a Chaldaeis, per Nabuchodonosor regem Assyriorum capta et combusta, captis principibus ejus cum rege Sedecia, ejus confossis oculis, et occisis filiis, sicut in fine IV lib. Regum traditur: per quae verba satis ostenditur, qualiter Deus punit peccatores per manum tyranni. Unde concluditur, ipsos esse instrumentum Dei sicut daemones, quorum potestas justa a sacris doctoribus ponitur, voluntas tamen semper iniqua. Quod etiam ostendit nobis tyrannicum regimen, quia non or-

Eorum.

Diripiat.

<sup>1</sup> Al.: « consentanea videtur. »

dinatur nisi ad onus et molestiam subditorum. Tyranni enim proprietas est propriam et solam sui utilitatem et commodum quaerere, ut dictum est supra, et Philosophus tradit in VIII *Ethic.* : ubi ponit quod sic se habet tyrannus ad subditos sicut dominus ad servos, et sicut artifex ad organum et instrumentum. Hoc autem poenale est subditis, et contra naturam dominii, sicut superius est probatum. Sed ex parte dominantium tale dominium videtur a Deo concessum primo in casu supposito, vel Deo disponente pro subditis quod est ad exitum meliorem, quando videlicet princeps ad Dei placitum studet quamvis peccator, ut de Cyro rege Persarum scribitur in Isa. cap. XLV, 1 : *Hæc, inquit, dicit Dominus Christo meo Cyro, cujus apprehendi dexteram, ut subjiciam ante faciem ejus gentes, et dorsa regum vertam. Aperiam ante faciem ejus januas, et portæ non claudentur.* Quod quidem adimpletum fuit, ut historiæ tradunt, quando subito desiccato alveo Euphratis et Tigris, qui per mediam Babylo-niam transibant, civitatem intravit, occiditque Balthassar ipsorum regem cum gente sua, ipsamque civitatem destruxit, ad Medos transfere-prosinquus, ubi tunc regnabat Darins Cyri propinquus, ut Josephus scribit. Hoc autem Deus sic disposuit, quia dictus Cyrus humanitatem ostendit in suis fidelibus Judæis, qui captivi tenebantur in Assyria, quos postea remisit liberos in Judæam cum vasis templi, et ipsum templum reedificari mandavit : ex quibus bonis et operibus virtuosis quæ exerent circa divinum cultum, et Dei populum, totius orientis obtinuit monarchiam, ut superius est ostensum. Prædictus vero Balthassar occisus fuit, ut ex sententia Danielis apparet, quia Deo ingratus, et quia vasis templi Domini in uno convivio est abusus : unde dictum est ei per Daniele cap. v, 22 : *Quia non humiliasti cor tuum, sed adversus dominatorem celi elevatum est, et vasa domus ejus allata sunt coram te, et tu et optimates tui et uires vinum bibistis in eis... porro Deum celi, qui habet statum tuum in manibus suis et omnes vias tuas, non glorificasti : idcirco ab ipso missus est articulus manus contra te : quod pro sententia divina accipimus contra ipsum, ut rei postea probavit eventus.* Narrat enim historia Danielis quod dum Balthassar rex Babyloniorum persisteret in Dei contumelia, ut ex dictis liquet, ex opposito mensæ sui convivii videbat digitos manus in pariete scribentis; ex qua Scriptura perterritus est, quasi ipsa esset nuntius suæ mortis. Refert enim Scriptura Danielis quod ex aspectu scribentis, cujus imaginem non videbat, nisi digitorum manus, facies ejus perterrita est, et cogitationes ejus perturbabant eum, compages renum ejus dissolvebantur, et genua ejus ad se invicem collidebantur; quæ omnia insinuativa erant timoris immensi, et futuri judicii super eum. Sed hanc scripturam rex non discernens, vocatus Daniel, interpretatusque sub tribus nominibus, ipsum denunciavit moriturum, videlicet « *Maue, Thecel, Phares* : » quod exposuit scriptura. « *Mauē : Numeravit Deus regnum tuum, et complevit illud :* » hoc est, in termino posuit, sicut res numerata, quæ tollitur et separatur ab acervo pecuniæ. « *Thecel : Appensus es in statera, et inventus es minus habens :* » unde et dignus es morte. « *Phares : Divisum est regnum tuum, et datum est Medis et Persis,* » ut superius est ostensum. Ex quibus omnibus satis est manifestum quod illæ clausulæ non proprie sunt significativæ secundum aliquod idioma linguarum, sed

secundum dispositionem divinam, sicut et factum quoddam : in quo Propheta comprehendit divinam circa nos voluntatem. Sit ergo hoc conclusum, quod in illa scriptura suam insinuavit sententiam contra Principem Babylo-niæ, quia propter peccata sua dignus erat morte et privatione regalis principatus, juxta illud Eccli x, 8; « *Regnum de gente in gentem transfertur propter injustitias... et diversos dolos.* »

## CAPUT VIII.

*Hic auctor declarat, quod interdum tale dominium cedit in malum dominantium, quia propter ipsorum ingratitude in superbiam elati graviter deprimuntur.*

Sed adhuc insistendum est circa divinam providentiam in dominio. Contingit enim interdum quod cum quis assumit principatum, erit homo virtuosus, et aliquo tempore perseverabit in eo. Sed aliquo tempore procedendo, ex favore humano et prosperitate rerum regalium elevatur quis in superbiam, et de beneficiis sibi a Deo collatis ingratus eidem efficitur. Unde Philosophus dicit V *Ethic.*, quod principatus virtutem ostendit; sicut accidit de Saule, de quo scribitur I Regum, quod in tota tribu Benjamin non erat vir melior illo. Sed post duos annos a suo regimine factus est Deo inobediens : unde dictum est Prophetae Samueli de ipso I Reg. XVI, 2 : *Usquequo tu luges Saul, cum ego projecerim cum ne regnet super Israel ?* quasi ex divina sententia irrefragabili sit sepultus. Propter quod ultimo dictus princeps fuit occisus cum filiis, totaque ejus progenies a dominio est avulsa : unde in Paralipomenon de ipso concluditur, quod mortuus est Saul propter iniquitates suas. Hoc autem et de Salomone accidit, qui magnificatus est super omnes reges qui fuerant ante eum, ut scribitur in Ecclesiaste, et universa terra desiderabat audire sapientiam Salomonis. Sed, ut dicit Augustinus, XVII *De civit. Dei*, secundæ res prædicto regi fuerunt noxiæ, quia lapsus in luxuriam, ruit in idololatriam : ex quo factus est abominabilis populo intantum ut servi ejus rebellarent ei diripientes spolia suæ regionis et vastantes terram absque resistencia aliqua, cum tamen prius omnes obedirent ad nutum sicut testatur regina Saba, ut patet in III lib. Reg. Ad magna igitur promotus in principio sui regiminis propter divinam reverentiam quam exhibuit, in fine sui regiminis decidit in vilia propter delicta quæ commisit : *Quia miseros facit populos peccatum.* Prob. XIV, 34. Tradunt tamen Hebræi, ut Hieronymus refert in *Commento super Ecclesiaste*, quod in fine vitæ suæ ex multis vexatibus suum recognovit errorem, seque disposuit ad poenitentiam de commissis librumque præfatum composuit in quo sicut expertus ennecta definit vanitati subjacere, subjiciens se divino timore ad suorum observantiam mandatorum. Unde in fine prædicti libri cap. XII, 13, concludit : *Finem loquendi pariter audiamus. Deum time, et mandata ejus observa, hoc est enim omnis homo.* Sed et præter reges deicolos quid de principibus ethnicis dicam? qui quamdiu fuerunt Deo grati virtutumque cultores, floruerunt in dominio; cum vero ex elatione dominii ad contrarium se converterunt, mala morte vitam

*Elevatus  
In manu  
ia.  
Ab eo.*

finierunt, sicut contingit de præfato Cyro rege Persarum monarchia. Tradunt enim historiæ de ipso, quod cum totam subjugasset Asiam, Parthiam, Scythiamque ferro perdomuit, tandem longum certamen Scythis inferens, dominante tunc Tamari regina dictæ gentis, quæ Massagetia vocabatur, primo quidem cum filio dictæ Reginae adolescentulo dimicavit, ipsumque vicit et occidit, nullique parcens ætati, ingentem multitudinem peremit. Quia ergo crudelitatem exercuit et in Babylonia et in regno Lydiæ, quia in utroque reges et principes mala morte trucidavit, et in regno Massagetarum similiter fecit; in hoc eodem iudicio similiter eum Deus punivit. Narrant enim historiæ quod dicta regina congregavit exercitum contra ipsum, Scythas videlicet, Massagetas et Parthos et in quibusdam montibus dicta regina insidiis compositis invasit castra ejusdem; et sic impetu armorum absorbit, quod ducenta nulla fuerunt occisa præfati principis, et ipse captus: cui amputato capite regina ipsum in utre sanguine pleno mandavit includi, et sic invective acclamabatur eidem: «Sanguinem sitisti: sanguinem bibe:» quasi ipsa mors ignominiosa quam passus est, fuerit argumentum suæ atrocitatis. Omnes etiam monarchæ ipsum sequentes, ut in Græcia magnus Alexander, quamdiu cum reverentia suos tractavit Macedones, vocans milites suos patres tantquam antiquiores, optime processit in monarchiam; sed eisdem existens ingratus, a sôre venenatus est: et præcipue quia post victoriam Darii accepta filia in conjugem, militaria cœpit postponere, luxui vitæ intendens, et sui immemor factus dolorosa morte vitam finivit. Et sic de multis aliis principibus ethnicis exemplum potest adduci, ut de Julio Cæsare et Hannibale, qui propter abusum dominii diro necati sunt exitu, ut eis conveniat quod in Ecclesiaste cap. viii, 9 scribitur: *Interdum dominatur homo homini in malum suum: nec non et illud Isaïæ Prophetæ, quod in omnibus tyrannis locum habet. Cum enim ostendisset ipsos esse divinæ justitiæ exactores contra peccatores, sicut carnifices dominorum, ut manifestum est supra cum dixit cap. x, 5: Assur virga furoris mei etc.; statim subdit: Ipse autem non sic arbitrabitur et cor ejus non sic æstimabit; quasi sic agat ut Dei instrumentum: Ad conterendum erit cor ejus, et ad interfectionem gentium non paucarum: dixit enim: Numquid non princeps nostri simul reges sunt?* attribuens videlicet suæ virtuti, et non Dei, qui movet ipsum ad puniendum transgressores divinum mandatorum. Hanc autem ingratitude<sup>1</sup> et præsumptionem tyrannorum Dominus statim ibidem redarguit et gravissime punit, ut in jam dictis principibus patet. Unde subdit Propheta in eodem loco: «*Numquid gloriabitur securis contra eum qui secat in ea? An exultabit serra contra eum qui se fecit? Quomodo si elevetur virga contra elevantem eam, et exaltetur baculus, qui utique lignum est.* Ubi consideranda est similitudo, quia valde congrua est. Sic enim se habet virtus dominantis ad Deum, sicut virtus baculi ad percutientem et sicut virtus serræ ad artificem. Constat autem quod virtus serræ vel securis in artificio nulla est nisi per artificem moventem et dirigentem: ita et de virtute dominantis continuit, quod nulla est sine Deo movente et guber-

nante. Ergo stultum et præsumptuosum est gloriari de sua virtute. Ista autem ratio satis aperta esse videtur, et haberi potest ex verbis Philosophi supra inductis. Quia virtus cujuslibet mobilis a virtute dependet primi moventis, et ejus instrumentum erit: et hinc est quod Deo talis gloria est displicibilis, quia tales derogant divinæ potentiæ: propter quod scribitur in Judith, quod de sua virtute gloriantes Deus humiliat: et ideo subjungit dictus Propheta Isaïas: *Propter hoc mittet dominator Dominus exercituum in pinguibus ejus tenuitatem, et subtus gloriam ejus succensu ardebit quasi combustio ignis.* In quo significatur pœna sensibilis, quæ talibus inferitur tyrannis, et annihilatio principatus, ut in prædictis est manifestum. Relinquitur igitur a Deo omne esse dominium, sive legitimum sive tyrannicum, secundum varias vias<sup>2</sup> suæ investigabilis providentiæ.

## CAPUT IX.

*Hic autor declarat, quod homo naturaliter dominatur animalibus silvestribus et aliis rebus irrationalibus, et quomodo: quod probatur multis rationibus.*

Nunc igitur accedendum est ad diversas species dominandi secundum diversos modos et gradus in hominibus dominii et principatus.

Et primus quidem generalis est omnium, qui competit homini secundum naturam, ut tradit Augustinus, XVIII *De civit Dei*: in quo casu et Philosophus concordat in I *Politicorum*. Hoc autem et Scriptura sacra confirmat, quando in sui creatione tamquam naturæ dicit Gen. i, 28: *Dominamini piscibus maris et volatilibus cœli, et universis animantibus quæ moventur super terram: in quibus ostenditur quod naturæ institutor humanæ talem indidit potestatem.* Qui enim dixit, *Germinet terra herbam virentem*, et ex tali dicto data est potestas arboribus germinandi, dixit et nobis similiter: *Dominamini piscibus maris* etc. Et sic ex jam dictis apparet quod dominium hominis supraceteras creaturas est naturale. Unde et Philosophus probat secundum eandem rationem quod venationes et aucupia sunt a natura. Et Augustinus in prædicto libro hoc probat per dominium quod antiqui patres soliti erant habere, ut pastores essent pecorum, quæ et divitiæ naturales definitæ sunt supra. Et quamvis tale dominium diminutum sit propter peccata, quia etiam vilia animalia dominantur in nobis, et facta sunt nobis nociva, quod non contingit in homine nisi propter dictam causam; tanto magis tamen participamus de dicto dominio, quanto magis ad statum attingimus innocentiae: quod etiam vox evangelica nobis promittit, si ejus imitatores fuerimus in justitia et sanctitate. Cum enim Dominus exhortaretur discipulos ad animarum salutem, verbum Dei prædicando, sic de eisdem virtutem denuntiat dicens Marc. xvi, 17: *In nomine meo dæmonia ejicient, linguis loquentur novis, serpentes tollent: et si mortiferum quid biberint, non eis nocebit.* Quod experimento didicimus in virtuosis et perfectissimis viris, ut in gestis sanctorum patrum scribitur; et de beato Paulo

<sup>1</sup> Al.: « ingratitude ad præsumptionem. »

<sup>2</sup> Al.: « rimas. »



traditur in Actibus Apostolorum, quia vipera ipsum non læsit, nec beatum Joannem Evangelistam venenum : et sic de multis aliis sanctissimis patribus, qui super crocodilos atrocissimas bestias sive venenosa reptilia Nilum vadabant, ut impleretur in eis quod Dominus in Luca dixit discipulis x, 13 : *Ecce dedi vobis potestatem calcandi super serpentes et scorpiones, et supra omnem virtutem inimici.* Istius autem domini in prima hominis institutione collati ex triplici via ratio congruentiæ assignari potest. Primo quidem ex ipso naturæ processu. Sicut enim in generatione rerum naturalium intelligitur quidam ordo quo de imperfecto ad perfectum proceditur : nam materia est propter formam, et forma imperfectior est propter perfectiorem : ita et in usu rerum naturalium ; nam imperfectiora cedunt in usum perfectorum : plantæ enim utuntur terra ad suum nutrimentum, animalia vero plantis, homo autem plantis et animalibus. Unde concluditur, quod homo naturaliter dominatur animalibus : propter quod sicut superius est tactum, Philosophus probat in I *Politicorum*, quod venatio animalium silvestrium est justa naturaliter, quia per eam homo sibi vindicat quod naturaliter est suum. Secundum apparet hoc ex ordine divinæ providentiæ, quæ semper inferiora per superiora gubernat ; unde cum homo sit supra cetera animalia, utpote ad imaginem Dei factus, convenienter hominis gubernationi alia animalia subduntur. Tertio apparet idem ex proprietate hominis et aliorum animalium. In aliis enim animalibus invenitur secundum æstimationem naturalem quaedam participatio prudentiæ ad aliquos particulares actus ; in homine vero reperitur quaedam universalis <sup>1</sup> prudentia, quæ est ratio naturalium agibilium. Omne autem quod est per participationem, subditur ei quod est per essentiam universaliter. Unde patet quod est naturalis subjectio aliorum animalium ad hominem.

Sed utrum dominium hominis super hominem sit naturale vel a Deo permissum, vel provisum, ex jam dictis veritas haberi potest. Quia si loquamur de dominio per modum servilis subjectionis, introductum est propter peccatum, ut dictum est supra. Sed si loquamur de dominio prout importat officium consulendi et dirigendi, isto modo quasi naturale potest dici, quia etiam in statu innocentie fuisset. Et hæc est sententia Augustini, XIX. *De civ. Dei.* Unde istud dominium ei competebat in quantum homo est <sup>2</sup> sociale naturaliter, sive politicum, ut dictum est supra. Talem autem societatem oportet ad invicem ordinari. In his autem quæ sunt ad invicem ordinata, oportet semper aliquid esse principale et dirigens primum, ut tradit Philosophus in I *Polit.* Hoc etiam ostendit ipsa ratio ordinis, sive natura : quia, ut per Augustinum scribitur in prædicto libro, ordo est « parium dispariumque rerum sua cuique tribuens dispositio. » Unde manifestum est quod nomen ordinis inæqualitatem importat, et hoc est de ratione domini. Et ideo secundum hanc considerationem dominium hominis super hominem est naturale, et est in Angelis, et fuisset in primo statu, et est etiam modo : de quo nunc per ordinem est dicendum secundum ipsius dignitatem et gradum.

## CAPUT X.

*Hic auctor declarat de dominio hominis secundum gradum et dignitatem ; et primo de dominio Papæ qualiter præfertur omni dominio.*

Recipit igitur divisionem dominium quadri-membrem eadem causa et ratione. Quia quoddam est sacerdotale et regale similiter. Aliud autem est regale solum, sub quo imperiale sumitur, et sic de aliis, ut infra patebit. Tertium vero politicum. Quartum autem æconomicum.

Primum autem ceteris antefertur multiplici via : sed præcipua sumitur ex institutione divina, videlicet Christi. Cum enim eidem secundum suam humanitatem omnis sit collata potestas, ut patet in Matth. xvi, 18, dictam potestatem suo communicavit vicario cum dixit : *Ego dico tibi, quia tu es Petrus, et super hanc petram ædificabo Ecclesiam meam : et tibi dabo claves regni cælorum : et quodcumque ligaveris super terram, erit ligatum et in cælis : et quodcumque solveris super terram, erit solutum et in cælis.* Ubi quatuor ponuntur clausulæ, omnes significativæ domini Petri suorumque successorum super omnes fideles, et propter quas merito summus Pontifex Romanus Episcopus dici potest, rex et Sacerdos. Si enim Dominus noster Jesus Christus sic appellatur, ut Augustinus probat, XVII *De civit. Dei*, non videtur incongruum suum sic vocare successorem, circumscriptis rationibus quæ possent adduci, quia satis est clarum. Sed redeundum est ad clausulas jam dictas : quarum una sumitur ex nominis impositi magnitudine, secunda vero ex domini fortitudine, tertia autem ex domini amplitudine, quarta ex domini plenitudine. Primam igitur partem præfatam accipimus, cum Dominus dicit : *Ego dico tibi, quia tu es Petrus, et super hanc petram ædificabo Ecclesiam meam.* In hoc enim nomine, ut sacri exponunt doctores, sicut Hilarius et Augustinus, Dominus potentiam Petri insinuat : quia a petra, quæ est Christus, ut dicit Apostolus, cujus confessionem Petrus præmiserat, Petrus est appellatus, ut secundum etiam quandam participationem nomen acquirat et potestatem, et audire mereatur : *Et super hanc petram ædificabo Ecclesiam meam :* quasi totum dominium inter fideles ex Petro dependeat in ejus successores. Secunda vero clausula domini importat fortitudinem : quod significat verbum quod sequitur : *Et portæ inferi non prævalerunt adversus eam :* quæ sunt curiæ tyrannorum et persecutorum Ecclesiæ, ut doctores sacri ibidem tradunt ; sic dictæ, quia sunt causa omnium peccatorum intra Ecclesiam militantem. Ad tales enim principes omnes scelerati recurrunt, ut accidit in curia Federici et Corradini, et Manfredi. Sed tales non prævaluerunt adversus Ecclesiam Romanam ; immo omnes mala morte extirpati sunt : quia, ut dicitur in libro Sapient. iii, 19, *Nationis iniquæ diræ sunt consummationes.* Domini vero amplitudo ostenditur cum subjungit Dominus : *Et tibi dabo claves regni cælorum.* In hoc enim insinuat nobis potestas Petri et successorum suorum quæ se extendit ad totam Ecclesiam, scilicet militan-

<sup>1</sup> Al. : « nihil. »

<sup>2</sup> Au deest. : « animal. »



lem, et triumphantem, quæ per regnum cœlorum designantur, et quæ clauduntur clavibus Petri. Sed domini plenitudo ostenditur cum ultimo dicitur: *Et quodcumque ligaveris super terram, erit ligatum et in cœlis; et quodcumque solveris super terram, erit solutum et in cœlis.* Cum enim summus pontifex sit caput in corpore mystico omnium fidelium Christi, et a capite sit omnis motus et sensus in corpore vero; sic erit in proposito. Propter quod oportet dicere, in summo Pontifice esse plenitudinem omnium gratiarum, quia ipse solus confert plenam indulgentiam omnium peccatorum: ut competat sibi quod de primo principe Domino dicimus, quia *de plenitudine ejus omnes accipimus*, Joan. 1, 16. Quod si dicatur ad solam referri spirituales potestatem, hoc esse non potest quia corporale et temporale ex spirituali et perpetuo dependet, sicut corporis operatio ex virtute animæ. Sicut ergo corpus per animam habet esse, virtutem et operationem, ut ex verbis Philosophi et Augustini de immortalitate animæ patet, ita et temporalis jurisdictio principum per spirituales Petri, et successorum ejus. Cujus quidem argumentum assumi potest per ea quæ invenimus in actis et gestis summorum Pontificum, et Imperatorum, quia temporali jurisditioni cesserunt. Primo quidem in Constantino apparet, qui Sylvestro in imperio cessit. Item de Carolo Magno quem Papa Adrianus Imperatorum constituit. Idem de Ottone I qui per Leonem creatus et imperator est constitutus, ut historiæ referunt. Sed ex dispositione principum auctoritate apostolica facta, satis apparet ipsorum potestas. Primo enim invenimus de Zacharia hanc potestatem exercuisse super regem Francorum, quia ipsum a regno deposuit, et omnes barones a juramento fidelitatis absolvit. Item de Innocentio III qui Ottoni quarto imperium abstulit. Sed et Federico secundo hoc idem accidit per Honorium Innocentii immediatum successorem. Quamvis in omnibus istis summi Pontifices non extenderunt manum nisi ratione delicti, quia ad hoc ordinatur eorum potestas et cujuslibet domini, ut prosiat gregi: unde merito pastores vocantur, quibus vigilantia incumbit ad subditorum utilitatem. Alias non sunt legitime domini, sed tyranni, ut probat Philosophus, et dictum est supra. Unde Dominus utitur in Joanne quadam importuna interrogazione, ter quærens a suo successore beato Petro, quod si ipsum diligit, gregem pascat, *Petre, inquit, amas me? Pasce oves meas*: Joann. xxi, 17; quasi in hoc consistat tota pastoralis cura, profectus videlicet gregis. Hoc ergo supposito, quod pro utilitate gregis agat, sicut Christus intendit, omne supergreditur dominium, ut ex dictis apparet: quod ex visione prima Nabuchodonosor satis est manifestum, de statua videlicet quam vidit, cujus caput aureum, pectus et brachia de argento, venter et femur de ære, tibie vero ferreæ: pedum quædam pars ferrea, quædam fictilis. Sed dictam statuam dum contemplatur, abscissus est lapis de monte sine manibus, et omnia prædicta contrivit. Hic autem lapis factus est mons magnus, et implevit universam terram: quam quidem visionem Daniel Propheta, ut Hieronymus et Augustinus exponunt, ad quatuor monarchias adaptat: Assyriorum videlicet pro aureo capite; Medorum et Per-

sarum, pro argento in brachiis et pectore; Græcorum vero monarchiam pro æreo ventre et femore, sed Romanorum ultimo, pro tibiis ferreis, et pedibus partim ferreis, partim vero fictilibus. Sed post hæc *suscitabit*, ait Propheta Daniel, cap. ii, 44: *Dominus Deus cœli regnum quod in æternum non dissipabitur, et regnum ejus populo alteri non tradetur, comminuetque universa regna, et ipsum stabit in æternum*: quod totum ad Christum referimus; sed vice ejus ad Romanam Ecclesiam, si ad ascendendum gregem ejus intendat. Attendendum etiam, quod divina institutio destitui non potest, quia solum dispensatores et ministros assumpsit suos vicarios Christus sicut Apostolus dixit I ad Corinth. ix, 1: *Sic nos, inquit, existimet homo ut ministros Christi, et dispensatores mysteriorum<sup>1</sup> Dei.* Solus enim Christus fundavit Ecclesiam, cujus ministerium Petro et pastoribus commisit; *Fundamentum autem aliud nemo potest ponere præter id quod positum est, quod est Christus Jesus*; I Cor. iii, 11. Unde sacri doctores quamdam potestatem Christo attribuunt quam Petrus non habuit nec sui successores; et ipsam potestatem excellentem nuncupant: et sic potestas Petri et successorem ejus non adæquatur potestati Christi, immo omnino transcendit. Potuit enim Christus sine baptismo salvare: propter quod et Hieronymus dicit *Super Matthæum*, quod nullum sanavit in corpore quem non sanavit in mente, et tamen sine baptismo; quod tamen Petrus non potuit: unde et Cornelium Centurionem, ut in Actibus Apostolorum legitur, cum tota sua familia baptizavit etiam post adventum Spiritus sancti. Potuit etiam mutare Christus formam sacramentorum et materiam, quod Petrus non potuit, nec successores ejus.

Hæc ad præsens dicta sufficiant, subtiliora sapientibus relinquendo, et altiora quæ dici possent. In hoc tamen sistat conclusio præsentis capituli, Vicarios Christi pastores Ecclesiæ cunctis debere præferri ex jam dictis causis.

## CAPUT XI.

*Hic auctor declarat de dominio regali, in quo consistit, et in quo differt a politico, et quo modo distinguitur diversimode secundum diversas rationes.*

Nunc autem ad regale dominium est procedendum: ubi est distinguendum de ipso secundum diversas regiones, et prout a diversis varie invenitur traditum. Et primo quidem in sacra Scriptura aliter leges regalis domini traduntur in Deuteronomio per Moysen, aliter in I Reg. per Samuelem Prophetam: uterque tamen in persona Dei differenter ordinat regem ad utilitatem subditorum, quod est proprium regum, ut Philosophus tradit in VIII *Ethic.* Cum inquit Dent. xvii, 16, *constitutus fuerit rex, non multiplicabit sibi equos, nec reducet populum in Ægyptum, equitatus numero sublevatus: non habebit uxores plurimas quæ alliciant animam ejus, neque argenti aut auri immensa pondera*: quod quidem qualiter habeat intelligi, supra traditur in hoc libro, *describetque sibi Deuteronomium regis hujus.* \* Et anni.

<sup>1</sup> Al.: « ministeriorum. »

*et habebit secum, legetque illud omnibus diebus vitæ suæ; ut discat timere Dominum Deum suum et custodire verba ejus, et cæremonias et ut videlicet possit populum dirigere secundum legem divinam. Unde et rex Salomon in principio sui regiminis hanc sapientiam a Deo petivit, ad directionem sui regiminis pro utilitate subditorum, sicut scribitur in III lib. Regum. Subdit vero dictus Moyses in eodem lib. ibid. 20: Nec elevetur cor ejus in superfluum super fratres suos, neque declinet in partem dexteram vel sinistram, ut longo tempore regnet ipse et \* filius ejus super Israel. Sed in I Regum traduntur leges regni. magis ad utilitatem regis, ut supra patuit in lib. II hujus operis; ubi ponuntur verba omnino pertinentia ad conditionem servilem; et tamen Samuel leges quas tradit, cum sint penitus despoticae, dicit esse regales. Philosophus autem in VIII Ethic., magis concordat cum primis legibus. Tria enim ponit de rege in eodem lib.: videlicet quod ille legitimus est rex qui principaliter bonum subditorum intendit. Item qui per se sufficiens reperitur, et qui omnibus bonis superexcellit, ne videlicet subditos gravet. Item ille rex est qui curam subditorum habet, ut bene operentur, quemadmodum pastor ovium. Ex quibus omnibus manifestum est quod juxta istum modum, despoticum multum differat a regali, ut idem Philosophus videtur dicere in I Polit. Item quod regnum non est propter regem, sed rex propter regnum: quia ad hoc Deus providit de eis ut regant et gubernent, et unumquemque in suo jure conservent; et hic est finis regiminis: quod si ad aliud faciunt, in se ipsos commodum retorquendo, non sunt reges, sed tyranni: contra quos dicit Dominus in Ezech. xxxiv, 2: *Vae pastoribus Israel, qui pascunt semetipsos. Nonne greyes pascuntur a pastoribus? Lac comedebatis, et laniis operiebamini, et quod crassum erat occidebatis: gregem autem meum non pascabatis. Quod infirmum fuit non consolidastis; et quod ægrotum non sanastis; quod confractum non alligastis; quod abjectum non quasistis: sed cum austeritate imperabatis eis et cum potentia.* In quibus verbis nobis sufficienter forma regiminis traditur redarguendo contrarium.*

Amplius autem regnum ex hominibus constituitur, sicut domus ex parietibus, et corpus humanum ex membris, ut Philosophus dicit in III Polit. Finis ergo regis est ut regimen prospereatur quod homines conserventur per regem. Et hinc habet commune bonum cujuslibet principatus participationem divinæ bonitatis: unde bonum commune dicitur a Philosopho in I Ethic., esse quod omnia appetunt, et esse bonum divinum: ut sicut Deus, qui est Rex regum et Dominus dominantium, cujus virtute principes imperant, ut probatum est supra, nos regit et gubernat non propter se ipsum sed propter nostram salutem; ita et reges faciunt, et alii dominatores in orbe. Sed quia nemo militat stipendiis suis unquam, et quodam jure naturæ de suo labore unusquisque debet reportare mercedem, ut probat Apostolus in I Epistola ad Corinth.; hinc habemus quod licet principibus a suis tributa percipere et annuos census: unde cum Apostolus ad Romanos probasset omne dominium a Deo esse provisum, ultimo persuadet eisdem retribuere pro labore. *Ideo*, inquit capit. xiii, 6:

*et tributa præstatis: ministri enim Dei sunt in hoc ipsi servientes.* Augustinus etiam eadem verba pertractans de verbis Domini, hoc idem probat. Concludendum est ergo, legitimum regem secundum formam in Deuteronomio traditam, sic debere regere et gubernare.

Ad hoc etiam exemplis monemur, quia omnibus agentibus contrarium male cessit. Primo quidem regibus Romanis, quia propter eorum superbiam et violentiam quam exercebant, ejecti sunt a regno ut Tarquinius superbus cum filio, sicut historiae tradunt. Item Achab et Jezabel uxor ejus mala morte interierunt propter violentiam quam fecerunt Naboth de vinea sua, ut in IV Regum scribitur. Traditur etiam ibi id quod canes linguerunt sanguinem suorum cadaverum in prædicta vinea, in argumentum maleficii in Naboth commissi. Sed non sic rex David, ut scribitur in III lib. Regum. Cum enim vellet altare condere ad Deum placandum pro numeratione populi fastuosa nimis offensum, aream emit ab Hareuma Jebusæo: ipsoque offerente gratis recusavit rex: et, ut scribitur in I Paralipomenon, pro præfata area dedit David sexcentos siclos auri justissimi ponderis. Per quod habemus quod principes suis debent esse contenti stipendiis, nec subditos suos gravare possunt in bonis eorum et rebus nisi in duobus casibus; videlicet ratione delicti, et pro bono communi sui regiminis. Primo enim modo propter ingratitudinem suos privat feudo fideles<sup>1</sup>; alios autem titulo justitiæ, propter quam sunt concessa dominia, ut dictus est supra. Et in Proverbiis xxv, 5 dicitur quod *justitia* firmatur *thronus* regis. Unde et lex divina transgressores divinatorum præceptorum mandat lapidari, et diversis cruciari poenis. Quod quidem consonum videtur, si attendamus ad quamcumque rem creatam, et præcipue ad corpus humanum: quia ut nobilior pars conservetur, abjicimus viliores; amputamus enim manum ut conservetur cor et cerebrum, in quibus principaliter hominis vita consistit: quod lex evangelica approbat. *Si*, inquit Matth. xviii, 9, *oculus tuus scandalizat te, et sive manus, sive pes* quod pro gradu hominum accipit Augustinus, *erue eum, et projice abs te: quia melius est ad vitam ingredi debilem vel claudum, quam duos oculos et duas manus habentem mitti in gehennam.* Item quod pro bono reipublicæ possit exigere, sicut pro defensione regni, vel pro quamcumque alia causa pertinente rationabiliter ad bonum commune sui domini, ratio est in promptu: quia supposito quod humana societas sit naturalis, ut probatum est supra, omnia necessaria ad communem conservationem dictæ societatis erunt de jure naturæ. Hoc autem est in proposito. Sic igitur supposito legitimo dominio regali, potest rex exigere a subditis quod ad bonum ipsorum requiritur. Præterea ars imitatur naturam in quantum potest, ut Philosophus in II Phys., tradit. Sed natura non delicit in necessariis. Ergo nec ars. Sed inter omnes artes ars vivendi est melior et amplior, ut tactum est supra, et probat Tullius in *Tusculanis quæstionibus*, eo quod ceteræ artes ordinantur ad ipsam. Sic et in necessitatibus regni quod pertinet ad conservationem socialis humanæ vitæ, rex, qui est artifex architectus dictæ societatis, non debet delicere, sed omnem defectum supplere cum ipsa socie-

<sup>1</sup> Id est vassallos, qui fidem ipsi debent.

Et filii.

Pasce  
ant.

Eduxis-  
s.

tate. Et ideo concludendum est quod isto casu possunt legitimæ exactiones, et talliæ, ac census sive tributa imponi, dummodo non transcendant necessitatis metas. Unde Augustinus exponens illud Matthæi, *Reddite quæ sunt Cæsaris Cæsari*: Igitur, inquit quod Cæsar præcipit, ferendum est; quod imperat, tolerandum: sed sit intolerabile, dum prædam exactores accumulunt. Et postea exponens verbum Joannis Baptistæ quod militibus dixit: *Neminem concutiatis, neque calumniam faciatis, sed estote contenti stipendiis vestris*: Hoc, inquit, sumi potest de militibus, prætoribus, concisque rectoribus. Quicumque enim sibi stipendia publice decreta consequitur, si amplius quærit, tamquam calumniator et concussor sententia Joannis condemnatur. Ex hac ergo duplici parte principatus despoticus ad regale reducitur; sed præcipue ratione delicti, propter quod servitus est introducta, ut Augustinus dicit XVIII *De civit. Dei*. Licet enim etiam in primo statu fuisset dominium, non tamen nisi officio consulendi et dirigendi, non libidine dominandi, vel intentione subjiciendi serviliter, ut dictum est supra.

Leges vero traditæ de regali dominio Israelitico populo per Samuelem Prophetam, hæc considerationes sunt datæ, quia dictus populus propter suam ingratitude, et quia duræ cervicis erat, merebatur tales audire. Interdum enim dum populus non cognoscit beneficium boni regiminis, expedit exercere tyrannides, quia etiam hæc sunt instrumentum divinæ justitiæ; unde et quædam insulæ et provinciæ, secundum quod historiae narrant, semper habent tyrannos propter malitiam populi, quia aliter nisi in virga ferrea regi non possunt. In talibus ergo regionibus sic dyscolis necessarius est regibus principatus despoticus, non quidem juxta naturam regalis domini, sed secundum merita et pertinacias subditorum. Et ista est ratio Augustini in prædicto jam lib. Philosophus etiam in III *Politic.*, ubi distinguit genera regni, ostendit apud quasdam barbaras nationes regale dominium esse omnino despoticum, quia aliter regi non possent: quod quidem dominium præcipue viget in Græcia, et apud Persas, saltem quantum ad regimen populare.

Hac igitur de dominio in tantum sint dicta, et qualiter principatus despoticus ad ipsum reducitur, et unde dividitur contra politicum: quod in capitulo de dominio politico adhuc clarius ostendetur.

## CAPUT XII.

*Hic sanctus Doctor declarat de dominio imperiali, unde istud nomen habuit originem, et de quibusdam aliis nominibus: ubi incidenter distinguuntur monarchiæ et quantum duraverunt.*

De imperiali vero post prædicta dominia congruum videtur esse dicendum, quia medium tenet inter politicum et regale, quamvis universalius; et ideo quantum ad hæc præponi deberet regali, sed alia causa est quare postponitur, quam nunc prætermittimus.

Circa hoc quidem tria pro nunc sunt attendenda. Unum de nomine, quia nomen istud a supremo dominio fastuose et elate trahit originem, quasi omnium dominus: unde et ille superbus Nicanor, cum rogaretur a Judæis ut deferret

dicti sanctificationis, hoc est sabbato, cum arrogantia ab eisdem quærens, si erat potens in cælo qui imperavit agi diem talem, responsoque accepto quod erat potens in cælo Dominus Deus: *Et ego inquit cum fastu non modico, sum potens super terram qui impero arma sumi*, II Machab. xv, 5. Propter quam causam ipse postea divinitus turpiter a Juda Machabæo, ut scribitur in II Machab., captus in bello, amputatisque capite et manu dextera, quam contra templum erexerat, mala morte vitam finivit. Quædam autem alia nomina istius domini assumpta sunt a quibusdam excellentibus viris dicti principatus propter aliquam prærogativam in eis repertam, ut Cæsar a Julio, ut historiae tradunt, sic dictus, quia, ut scribit Isidorus lib. *Etymologiarum* IX, quia casu mortuæ matris utero prolatus est, vel quia cum cæsarie natus: a quo Imperatores sequentes sic vocati sunt, quia comati essent: sed Augustus, ab augendo rempublicam, primus vocatus est Octavianus, ut idem Isidorus scribit.

Secundum autem quod hic attendimus, est de processu istius imperii: quia supra est tactum de quadruplici monarchia; sed nos quintam possumus addere, de qua infra dicemus. Prima fuit Assyriorum, cujus caput Ninus fuit tempore Abraham, quæ duravit 1241 annos, ut scribit Augustinus, IV *De civit. Dei*, usque ad Sardanapalum, qui propter merita muliebria perdidit principatum; sed Arbaces transtulit ad Medos et Persas. Quo tempore regnavit Proca dux Romanorum, ut idem Doctor in XVIII *De civit. Dei* dicit. Secunda vero monarchia, videlicet Medorum et Persarum, duravit usque ad tempora Alexandri, 233 annos, quando videlicet devincitur Darius a prædicto principe, ut scribit idem Doctor in eod. lib. XII. Sed monarchia Græcorum in Alexandro incepit, et in eodem finitur. De quo dicitur I Mach. quod regnavit Alexander annis *duodecim*, et mortuus est. Sed quamvis Græci non habuerint universale dominium, viguit tamen regnum Macedonum usque ad mortem Alexandri, de quo et prædictus liber mentionem facit, annis 483, ut Augustinus scribit in eodem XII lib. In quo prædictus princeps suum inchoavit dominium, patri suo in eodem regno succedens, ut historiae tradunt. Post hanc autem monarchiam Romanus principatus vigere incepit. Tempore enim Judæ Machabæi, qui immediate quasi post mortem floruit Alexandri, cum Ptolomæo Lagi concurrente, in lib. I Machabæorum, multa de Romanis traduntur: in quibus ipsorum potentia ad omnes mundi plagas videbatur diffusa, sub consulibus tamen: quia superstitibus regibus cum finitimis sollicitabantur regionibus, et modicæ adhuc erant virtutis. Duravitque consulatus, immo monarchia, usque ad tempora Julii Cæsaris, qui primus usurpavit imperium; sed parum in ipso supervixit, a senatoribus quidem occisus propter abusum domini. Post hunc Octavianus filius sororis suæ successit, qui vindicta exercita contra occisores Julii, interfectoque Antonio, qui monarchiam tenebat in oriente, solus ipsam obtinuit: et propter suam modestiam longo tempore in eo principatum habuit, ac in quadragesimo secundo anno sui regiminis completa septuagesima hebdomada secundum Daniel sui domini, cessante regno et sacerdotio in Judæa, nascitur Christus, qui fuit verus Rex et Sacerdos, et verus Monarcha: unde post resurrectionem suam apparens discipulis suis dixit: *Data est mihi omnis potestas in cælo et in terra*: quod quidem ad humanitatem oportet

referre secundum Augustinum et Hieronymum, quia de Divinitate nulli est dubium quin semper habuerit.

### CAPUT XIII.

*Hic sanctus Doctor declarat de monarchia Christi, quomodo in tribus excellit, et Octaviano Augusto, quomodo gessit vices Christi.*

Et hæc quinta monarchia, quæ successit Romanis, secundum veritatem omnibus præcellit ex triplici parte. Primo quidem ex annorum quantitate, quia plus duravit, et adhuc durat, et durabit usque ad mundi renovationem, ut patet in visione Danielis, ut dictum est supra, et adhuc nunc magis declarabitur. Secundo apparet ejus excellentia ex domini universitate, quia *in omnem terram exiit solum eorum et in fines orbis terræ verba eorum*; Psal. xviii, 5. Nullus enim angulus mundi est, nulla plaga, in qua nomen Christi non adoretur. Omnia enim subiecit sub pedibus ejus, ut introducit Apostolus in fine I Epistolæ ad Cor. In princ. etiam Malachia Prophetæ cap. i, 2, ostenditur istud dominium. *Ab ortu, inquit, solis usque ad occasum magnum est nomen meum in gentibus, et in omni loco sacrificatur et offertur nomini meo oblatio munda quia magnum est nomen meum in gentibus dicit Dominus exercituum.* In quo verbo satis apparet quod dominium Christi ordinatum ad salutem animarum, et ad spiritualia bona, ut jam videbitur; licet a temporalibus non excludatur eo modo quo ad spiritualia ordinantur. Et inde est quod quamvis Christus adoraretur a Magis, glorificaretur ab Angelis in signum universalis sui domini, humili tamen loco jacuit, vilibus involutus pannis, quia qua via homines melius ad virtutem trahuntur quam armorum virtute. Et hoc quidem intendebat, licet sapius sua uteretur potentia ut verus Dominus. In humilitate ergo vixit, et demum in Augusto substituit ut describeretur universus orbis in ortu Domini, ut Lucas Evangelista testatur. Et in hæc descriptione solvebatur census, sive tributum, ut historiarum tradunt, in recognitionem debitæ servitutis, non sine mysterio: quia ille natus erat qui verus erat mundi Dominus et Monarcha, ejus vices gerebat Augustus, licet non intelligens, sed nutu Dei, sicut Caiphas prophetavit. Unde hoc instinctu dictus Cæsar mandavit tunc temporis, ut narrant historiarum, ne quis de Romano populo Dominum ipsum vocaret. Quas quidem vices monarchiæ post Christi veri Domini nativitatem gessit Augustus, quatuordecim annos toto orbe terrarum subacto: quia, ut acta principum Romanorum describunt, dictus Cæsar Augustus quinquaginta sex annos et menses sex tenuit principatum. Tiberius etiam, qui eidem Augusto successit, ut narrant historiarum, Christum tanquam verum Dominum inter deos transferri voluit, licet impeditus fuerit a superbo et fastuoso senatu impatiens alicujus domini. Tertio autem apparet excellentia monarchiæ Christi super alias quatuor præcedentes, ex dominantis dignitate, quia Deus et homo. Secundum quam considerationem humana natura in Christo participat inlimitam virtutem, ex qua majoris fortitudinis est et virtutis supra humanam fortitudinem et virtutem. Quam quidem describit Isaias cap. ix, 6,

quantum ad virtutem temporalem Christi: unde ipsum Monarcham appellamus. *Parvulus, inquit, natus est nobis, et filius datus est nobis: et factus est principatus super humerum ejus: et vocabitur nomen ejus, Admirabilis, Consiliarius, Deus fortis, Pater futuri sæculi, princeps pacis. Multiplicabitur ejus imperium et pacis non erit finis.* In quibus verbis omnia tanguntur quæ requiruntur ad verum principem. Immo transcendit metas omnium dominorum, ut in sequenti cap. declarabitur, et aspicienti patet. Hic ergo principatus sive dominium omnes monarchias sive dominia transcendit, annihilat et confringit, quia omnia regna subjiciuntur eidem: quod per eundem prophetam cap. xlv, 22, prænuntiatum est: *Vivo ego, dicit Dominus, quia mihi curvabitur omne genu.* Et Apostolus Paulus ad Philipp. cap. ii, 11: *In nomine Jesu omne genu flectatur, cælestium, terrestrium, et infernorum.* De hæc monarchia concludit Daniel cap. ii, 44 exposita Nabuchonosor sui somnii visione: *In diebus, inquit, illis, hoc est post illas quatuor monarchias Assyriorum, Persarum et Medorum, Græcorum et Romanorum, suscitabit Dominus \* regnum cæli quod in æternum non dissipabitur, et regnum ejus alteri non tradetur, et comminuet universa regna hæc, et ipsum stabit in æternum.* Cujus quidem ratio æternitatis satis est in promptu, quia iste principatus æterno conjungitur, cum iste Dominus, Deus et homo sit.

Et sic completus est circulus a puncto ad punctum: quia probatum est supra, a Deo omne dominium originem trahere. In isto vero principatu percursis hominum motibus, terminatur principatus sicut in re immobili, ultra quam non est motus. Et sic oportet ex dictis concludere quod istud dominium non potest deficere.

### CAPUT XIV.

*Movetur quæstio de monarchia Christi; quo tempore incepit, et quomodo latuit, et quare: et duplex assignatur causa suæ occultationis, et primo ponitur una.*

Sed tunc oritur quæstio de isto Domini principatu, quando incepit: quia constat multos postea imperasse, ipse vero abjectam vitam elegit. Unde in Matthæo viii, 21, dicitur: *Vulpes foveas habent, et volucres cæli nidus; filius autem hominis non habet ubi caput suum reclinet.* Item in Joan. scribitur quod cum pavisset multitudinem abscondit se, quia volebant eum populo rapere, ac regem facere. Item in eodem xviii, 36, ipse dicit: *Regnum meum non est de hoc mundo.*

Ad hanc autem quæstionem est responsio; quia principatus Christi incepit statim in ipsa sui nativitate temporali. Cujus argumenta sunt in eodem die, Angelorum ministratio et denuntiatio: unde in Luca xi, 11, scribitur quod *Angelus ad pastores ait: Annuntio vobis gaudium magnum, quia natus est vobis salvator mundi.* Item Magorum adoratio: unde in Matth. xi, 1, dicitur: *Cum natus esset Jesus in diebus Herodis regis, ecce Magi veniunt ab oriente Hierosolymam, dicentes: Ubi est qui natus est rex Judæorum? Vidimus enim stellam ejus in oriente, et venimus adorare eum.* In quibus actibus satis est notus principatus ejus, ac temporis exordium: prophetatus quidem et præ-



nuntiatus per Isaiam in verbis supra præmissis. Et attendendum quod in sua infantia<sup>1</sup> plus apparuit virtutis et potentiae prætendentis excellentiam sui domini, quam in adulta ætate; ad insinuandum suam inlirmitatem esse voluntariam, non necessariam, quæ assumpta est ab ipso: et non publice usus nisi in casibus propter duplicem causam, quæ ad præsens sufficiant. Una est ad docendum in principibus humilitatem, per quam quis redditor in regimine gratosus. Quia humilitas meretur gratiam, juxta illud Prov. xxix, 23: *Humilem spiritum suscepit gloria: et iterum Eccli. iii, 19: « In mansuetudine opera tua perfice, et super hominum gloriam diligeris: »* et in Canonica beati Jacobi iv, 6: *Deus superbis resistit, humilibus autem dat gratiam.* Sed tanto amplius in principe est necessaria, quanto per eminentiam sui status, dentibus invidiæ superiorem non patientis laceratur. Quod considerans David rex, fastuosæ regis filiæ, videlicet Michol, insultanti et dicenti quod coram ancillis suis se discooperuisset ad Dei laudem et reverentiam divinæ arcæ, quæ tunc pro numine habebatur, responsum dedit, ut patet in II Regum vi, 22: *Ante Dominum, qui elegit me potius quam patrem tuum, et quam omnem domum ejus, et præcepit mihi ut essem dux super populum Domini in Israel, et ludam et viator fiam plusquam factum sum, et ero humilis in oculis meis.* Quam regulam Christus servare voluit in se ipso secundum voluntatem Dei Patris, per Prophetam Zachariam prænuntiata, quam Evangelista Matth. xxi, 3, in Christo adimpletam esse pronuntiat. *Ecce, inquit, rex tuus venit tibi mansuetus, sedens super asinam et pullum filium subjugalis.* Quod si principes mundi de humilitate commendantur et paupertate, per quæ gratiosi facti sunt subditis, et ipsorum prosperatum est dominium; quare non magis commendabimus perfectam humilitatem Christi? Scribit enim Valerius Maximus lib. II de Codro Atheniensi rege, et Augustinus *De civit. Dei*, quod cum Peloponenses pugnarent contra Athenienses, ex consultatione Apollinis certioratus est quod ille exercitus prævaleret cujus dux morti dicaretur. Unde rex Codrus pro salute suæ gentis, in effigie pauperis se hostibus interficiendum obtulit: ipsoque mortuo in fugam versi sunt hostes. Propter quod Athenienses ipsum inter deos asserebant fuisse translatum. Tradit etiam idem Augustinus in præfato lib. et Valerius Maximus de quibusdam consulibus Romanis, et Lucio Valerio quod in tanta mortuus est indigentia, ut cogerentur amici collectam facere nummorum pro ejus sepultura. Fabritius etiam consul de hoc ipse summe commendatur. Unde scribit idem Valerius Maximus, et Vegetius *De re militari* lib. IV et dictum est supra quod cum esset par unicuique pauperi, et legati Epirotarum magnum auri pondus eidem offerrent, eo recusante, « Narrate, » inquit, « Epirotis me malle hæc habentibus imperare quam ipsa possidere. » Quid plus insistimus? Omnes magni principes et monarchæ cum humilitate subjugaverunt mundum; sed cum fastu elationis perdiderunt dominium, ut superius est factum. Propter quod in Ecclesiastico iii, 20, scribitur: *Quanto magnus es, humilia te in omnibus; et coram Deo invenies gratiam.* Amplius autem si virtus humilitatis et benevolentiae in quocumque principe commen-

datur, multo magis laudari debet in principe nostro Christo, tamquam in supremo gradu virtutis constituto.

Concluditur ergo quod Christi humilitas et paupertas fuit consona rationi, quamvis legitimus esset Dominus propter causam jam dictam.

## CAPUT XV.

*Secunda causa assignatur quare Dominus assumpsit vitam abjectam et occultam, licet esset verus Dominus mundi; et exponuntur verba Isaiæ Prophetæ de Christo.*

Est et alia ratio quare Dominus noster statum humilem assumpsit, quamvis Dominus mundi: ad insinuandum videlicet differentiam inter suum et aliorum principum dominium. Quamvis enim temporaliter esset Dominus orbis, directe tamen ad spiritualem vitam suam ordiavit principatum, juxta illud Joannis x, 10: *Ego veni ut vitam habeant, et abundantius habeant.* Hinc etiam verificatur suum verbum superius allegatum: *Regnum meum non est de hoc mundo.* Propter hoc igitur humiliter vixit, ut suos fideles exemplo sui traheret ad operandum secundum virtutem, cujus via aptior est humilitas ac mundi contemptus, ut Stoici et Cynici posuerunt, ut de ipsis Augustinus et Valerius Maximus referunt. Ipse etiam Seneca idem ostendit, qui perfectus Stoicus fuit, in libello *de Dei providentia et de brevitate vite ad Paulinum*: per quam quis efficitur dignus ad regnum æternum: ad quod consequendum, sui domini fuit principalis intentio. Unde ipse Dominus in Luca xx, 28 discipulis suisque sequacibus dixit: *Vos estis qui permausistis mecum in tentationibus meis: et ego dispono vobis, sicut disposuit mihi Pater meus, regnum, ut edatis et bibatis super mensam meam in regno meo.* Voluit igitur Dominus sequaces suos humiliter vivere exemplo sui, ex causa jam dicta, juxta illud Matth. xi, 29: *Discite a me, quia mitis sum et humilis corde:* ac suum temporale dominium ad hoc ordinare. Unde vita spiritualis fidelium, regnum cælorum vocatur, quia differt in vivendo a regno mundano, et quia ad verum regnum ordinatur æternum, non ad temporale dominium tantum. Ad tollendam igitur suspicionem de cordibus hominum quod quasi principatum assumpsit, ut in mundo dominaretur, et hoc esset finis ejus, ut aliorum dominorum; vitam abjectam elegit; et tamen verus erat Dominus et Monarcha, quia factus est principatus super humerum ejus, ut dictum est supra per Prophetam: quod optime fuit in præmissis verbis Isaiæ prænuntiatum: quia primo præponitur humilis et abjectus: *Parvulus, inquit, natus est nobis: postea subjungitur cum ista parvitate virtus et excellentia sui domini propter conjunctum: Ego filius, inquit, datus est nobis.* Quia enim humanitas in Christo conjuncta erat Divinitati Filii tamquam instrumentum ejus, omnipotentis erat virtutis: et ideo Propheta ibidem circumloquitur ineffabile ejus dominium multis clausulis singularis potentiae, quæ omnes distincte habent intelligi, ut Hieronymus exponit ibidem, ut per ordinem clausularum est manifestum. Primo si-

<sup>1</sup> Al.: « in sua instantia. »



quidem quantum ad domini securitatem et soliditatem : *Cujus, inquit, principatus super humerum ejus.* Ea enim quæ portantur in humeris, firmiora sunt : sic enim onera solidius veluntur. Secundo quantum ad domini novitatem : unde scribitur : *Et vocabitur nomen ejus Admirabilis* : admiratione enim dignum est quia humilis et pauper, et tamen Dominus mundi. Tertio quantum ad sapientiæ claritatem, quod est præcipue principibus necessarium, quia *væ terræ cujus rex puer est*, ut dicitur in Eccl. x, 16; quod accidit quando princeps per se nihil potest, sed innixus aliorum agit consilio, sive agitur, ut melius dicatur : unde subjungitur, *Consiliarius.* Quarto quantum ad domini dignitatem, quia *Deus.* Cum enim in ipso sit unum suppositum et una persona, in qua sunt unitæ divina et humana natura; et principatus Christi in virtute agit divini suppositi; et ideo sequitur, *fortis.* Recipit enim influentiam Christi principatus ex divina virtute, quæ in ipso personaliter erat : qua potentia usus est Christus circa passionem, cum Judæi vellent eum occidere, et ipsum quærerent : quo dicente, *Ego sum*, statim ceciderunt in terram, ut in Joanne scribitur. Quæ quidem fines sui successoris excedit quia constat quod vicarius Christi non est Deus : et in hoc transcendit sua potestas potentiam sui successoris, ex quo Christus multa potuit circa ordinationem suorum fidelium et regimen, quæ beatus Petrus non potuit, nec sui successores, ut superius est ostensum. Et ex eadem parte, videlicet quod iste parvulus erat, subditur sexta conditio singularis sui principatus, quæ est regendi benignitas : quia *pater futuri sæculi* : quod ad plenitudinem gratiæ referre possumus, qua quidem qui pleni sunt, omne jugum legis leviter portant : Qua ratione Apostolus dicit ad Galat. v, 18 : *Si spiritu ducimini, non estis sub lege.* Unde talibus ad regendum virga ferrea non est necessaria : et hoc singulare est in principatu Christi. Septimum et ultimum sumitur ex eadem causa quod est regendi tranquillitas, cum subditur, princeps pacis, etsi non corporis, tamen pectoris. Et hanc quidem suis fidelibus Christus rex noster et princeps, et vivendo offert, et moriendo reliquit. *In mundo*, inquit Joan. xvi, 33 : *pressuram habebitis, in me autem pacem* : et hoc etiam est singulare in suo principatu. In humilitate ergo et paupertate suum fundavit dominium, et in adversitatibus et laboribus et arumnis; quomodo aucta fuit respublica Romanorum, non videlicet fastu, vel pompis superbiæ, ut Sallustius refert ex sententia Catonis, et Valerius Maximus hoc idem probat.

## CAPUT XVI.

*Hic sanctus Doctor declarat quod isto modo aucta fuit respublica per exempla antiquorum Romanorum; et postea subdit de Constantino.*

Et hinc est quod rex noster Christus principes sæculi permisit dominari, et eo vivente, et eo moriente, ad tempus; quousque videlicet summum regnum esset perfectum, et ordinatum in suis fidelibus, operationibus virtuosis, et eorum sanguine laureatum. Si enim Regulus, qui et Marcus

appellatur, pro zelo suæ patriæ a Carthaginiensibus est occisus; si Marcus Curtius in abruptum terræ hiatus se projecit ad liberationem patriæ; si Brutus et Torquatus filios occiderunt pro justitia et disciplina militari conservandis, ut historiæ tradunt; quorum zelo respublica ex parva facta est magna; item si Seleucus apud Locros dominans, ut Valerius Maximus refert lib. VI, filium uno orbavit oculo, alteroque se ipsum pro adulterio commisso, ut justitia servaretur contra prædictum delictum per filium perpetratum, sicque admirabili æquitatis temperamento se inter misericordem patrem et justum legislatorem partitus est : quare non magis Christiani reddi debent laudabiles, si se exponunt passionibus et tormentis pro zelo fidei et amore Dei, ac virtutibus variis conantur florere, ut regnum consequantur æternum, ac Christi principatus accrescat in eorum meritis? Hæc autem Augustinus *De civit. Dei*, quasi per totum subtiliter valde ac diffuse pertractat : propter quod et dictum librum fecit. Quod et factum fuit intermedio tempore a passione Domini usque ad tempora beati Silvestri et Constantini : quo quidem sæculi spatio infinita populi multitudo per mortem Christo Domino suo dedicata est et conjuncta, ac suum ducem et principem est secuta. Primo quidem primi duces Apostoli, et alii Christi discipuli, omnes Christi vicarii, et Petri successores; quod fuit tempus trecentorum quinquaginta annorum, in quorum sanguine et corporibus, ac ipsorum vitæ meritis fundata est Ecclesia tamquam lapidibus vivis et pretiosis, ac ineffabili fundamento, contra quod nec venti nec pluvia, nec quæcumque procellæ diversarum passionum vel quarumcumque perturbacionum sæviant, ipsum possunt obruere. Opportuno igitur tempore, ut manifestaretur mundo regnum Christi compositum, virtus Principis nostri Jesu Christi principem mundi sollicitavit, Constantinum videlicet, percutiens eum lepra, ac ipsum curans supra humanam virtutem. Qua probata, in dominio cessit vicario Christi, beato videlicet Sylvestro, cui de jure debebatur ex causis et rationibus superius assignatis : in qua quidem cessione spirituali Christi regno adjunctum est temporale, spirituali quærente in suo vigore : qua illud per se quæri debet a Christi fidelibus, istud vero secundario tamquam administrans primo : aliter autem contra intentionem lit Christi. Tunc adimpletum est quod post illam clausulam scribitur in Isaia ix, 7 : *Multiplicabitur ejus imperium, et pacis non erit finis.* Apertæ sunt enim Ecclesiæ ab eo tempore, et cepit Christus predicari publice quod ante non poterat sine periculo mortis. Et eodem anno quo Constantinus curatus est a lepra, et conversus est ad fidem, baptizati sunt circa partes Romanas plusquam centum millia hominum ex virtutibus ostensis per dictum Christi vicarium. Sed attendendum quod dicit Propheta : *Et pacis non erit finis.* Constat enim post mortem Constantini filium ejus hæresi Ariana fuisse infectum, et Ecclesiam perturbasse. Unde sub eo passi sunt exilium solemnes Ecclesiæ Doctores, Hilarius Pictaviensis et Athanasius Alexandrinus Episcopi, ac Eusebius Vercellensis, et multi alii Ecclesiarum doctores et clerici; nec non et caput Ecclesiæ summus Pontifex (a) Liberius in veritate fidei

(a) Summus Pontifex Liberius damnationi

S. Athanasii causam fidei propugnantis subscrip-

vacillavit ex multa persecutione Constantii, ut historiæ tradunt. Post ipsum fuit Julianus apostata, frater Galli, et consobrinus Constantii. Hic secundam intulit persecutionem fidelibus, sub quo passi sunt Joannes et Paulus germani. Unde ergo verificatur verbum Domini per Prophetam jam dictum? Oportet autem prædicta ad pacem pectoris reducere, non corporis. Unde ipse Dominus quando pacem offert discipulis in Joan. xiv, 27, de tali pace loquitur : *Facem meam do vobis : non quomodo mundus dat, ego do vobis*. Manifestum est enim illa verba discipulis imminente passione dicta. Tunc autem constat ipsos persecutionem passos : unde dictum est eis in eodem temporis momento : *Si me persecuti sunt, et vos persequentur*. Hanc ergo pacem electi Christi fideles perdere non possunt, nisi velint. Quod si licuit Stoicis dicere, bona hominis, quæ virtutes appellant, in homine semper manere, nec auferri posse virtuosus invitis, ut refert Aulus Gellius in lib., *Noctium Atticarum* de Dione Stoico, et Augustinus *De civit. Dei* lib. V, quare non magis dicemus de mentibus fidelium quod pacis eorum non erit finis, cum inhæreant fini qui sine fine vivit?

## CAPUT XVII.

*Qualiter imperatores Constantinopolitani sequentes a Constantino fuerunt obedientes et reverentes Ecclesiæ Romanæ : et hoc ostendit per quatuor Concilia, quibus dicti principes se subjecerunt.*

His autem peractis, Juliano in bello Persarum interfecto, reddita est pax Ecclesiæ per Jovinianum fratrem ejus virum catholicum, licet parum regnaverit. Istud autem notabile ab inde usque ad tempora Caroli Magni, de imperatoribus reperitur : omnes quasi obedientes et reverentes fuisse Romanæ Ecclesiæ, tamquam ipsa principatum teneret ; sive respectu spiritualis domini, sicut sancta Synodus Nicæna definit, sive temporalis. Unde Gelasius Papa Anastasio imperatori scripsit, Imperatorem ex judicio Papæ dependere, ut historiæ tradunt, et non e contrario. Valentinianus etiam, qui immediate Joviniano successit, sic fertur dixisse, ut *Ecclesiastica historia* refert, cum Archiepiscopi Mediolanensis instaret electio. « Talem, inquit, nobis in pontificali instituere sede, cui nos, qui gubernamus imperium, sincere nostra capita submittamus, et ejus monita, dum tamquam homines deliquerimus, necessario veluti curantis medicamina suscipiamus. »

Et quia ista materia est fructuosa ad ostendam reverentiam principum circa vicarium Christi, de imperatoribus usque ad tempora Caroli est hic agendum. Ulterius autem a Carolo usque ad Ottonem primum, inter quæ tempora facta est diversitas in tribus. Primo quantum ad modum eligendi ; secundo quantum ad modum succedendi ; tertio quantum ad modum providendi. Et ut appareat, tradendum est hic aliquid de processu imperatorum a tempore Constantini, qui subjecti fuerunt Ecclesiæ, præter

jam dictos tyrannos. Sicut enim narrant historiæ, postquam Constantinus cessit imperium vicario Christi, traustulit se cum satrapis et principibus suis in provinciam Thraciæ, ubi Asia major incipit, et terminatur Europa ; ibique unam civitatem assumpsit, quæ vocabatur Byzantium. Quam quidem, ut historiæ tradunt, quasi adæquavit urbi, et suo nomine appellavit. In hac ergo fuit imperialis sedes ad Carolum, in cujus persona Adrianus Papa congregato Concilio in urbe imperium a Græcis transtulit ad Germanos. In quo apparet imperatores Constantinopolis a Vicario Christi, summo videlicet Pontifice, dependere, ut Gelasius Papa Anastasio scribit Imperatori : unde ipsorum imperium ad exequendum regimen fidelium secundum mandatum summi Pontificis ordinatur, ut merito dici possint ipsorum executores esse, et cooperatores Dei ad gubernandum populum christianum. Quod quidem ostenditur primo de quatuor imperatoribus qui in isto medio tempore regnaverunt, nec non et præsentibus fuerunt quatuor Conciliis solemnioribus et universalioribus, et approbantes ipsorum statuta, et eisdem se similiter subjicientes. Primum fuit Nicænum trecentorum decem et octo Episcoporum tempore Constantini, ubi condemnatus est Arius presbyter Alexandrinus, ut historiæ tradunt, qui Filium Dei asserebat minorem Patre : ubi de dicto principe fertur quod eidem Concilio omnes sumptus fecit, quasi in hoc recognoscens suum dominum vicarium Christi : cujus vices totum gerebat Concilium, quia Beatus Sylvester absens fuerat ab eodem ex speciali causa. Secundum autem Concilium fuit Constantinopoli, sub Cyriaco Papa celebratum, quidam tamen dicunt sub Damaso, præsentibus Theodosio seniore, ut historiæ tradunt, centum quinquaginta Episcoporum : in quo multæ fuerunt hæreses condemnatæ, sed præcipue Macedonii Episcopi Constantinopolis, qui Spiritum sanctum negabat esse Deum, Patri consubstantialem et Filio. Hic autem Theodosius tantæ reverentiæ fuit <sup>1</sup> ad Ecclesiam quod, ut scribit Gelasius Anastasio Imperatori, beato Ambrosio prohibente eidem ingressum Ecclesiæ, non fuit ausus intrare ; quin potius excommunicavit eum, quia consensit in necem multitudinis Thessalonicæ, eo quod suum judicem occidissent, ut narrat historia tripartita. Quod totum princeps catholicus patienter tulit, et tandem durissime reprehensus ab ipso, publicam prius egit pœnitentiam, quam publicum haberet Ecclesiæ ingressum. Tertium autem Concilium celebratum fuit sub Theodosio juniore Arcadii filio apud Ephesum, ducentorum Episcoporum, tempore Cælestini primi, licet præsentibus non fuerit, sed ejus vices gessit Cyrillus Alexandrinus Episcopus confidentia Theodosii, qui tantæ fuit honestatis et maturi consilii et reverentiæ ad divinum cultum quod etiam in tenella ætate permissus est imperare, ut historiæ tradunt. Synodus autem prædicta contra Nestorium Constantinopolis Episcopum congregata fuit, qui duas personas ponebat in Christo, et duo supposita, per quæ tollebatur vera unio utriusque naturæ. Quartum autem Concilium fuit celebratum in Chalcedonia sexcentorum triginta Episcoporum sub Leone I

sit, non tamen hæretico dogmati consensit ; sed catholicum dogma expresse retinuit unde hic improprie dicitur : « Pontifex Liberius in fidei

veritate vacillavit. »

<sup>1</sup> Al. : « tanta reverentia fugit. »

præsente principe Marciano <sup>1</sup> de quo pro reverentia Romanæ Ecclesiæ sic dixisse fertur in actione septima præfatae Synodi : « Nos, » inquit, « ad fidem confirmandam, non ad potentiam ostendendam, exemplo religiosissimi viri Constantini, huic Consilio interesse volumus, ut inventa veritate, non ultra multitudo pravis doctrinis attracta discordet. » Per quod habeo quod tota intentio principum antiquitus erat ad favendum fidei et Ecclesiæ Romanæ reverentiæ et honori. In hoc autem Concilio damnatus est Eutyches cum Dioscuro Episcopo Alexandrino : qui, sicut Nestorius ponebat naturas et personas distinctas, sic isti asserebant confusas et admixtas.

## CAPUT XVIII.

*De duobus Conciliis sequentibus post alia quatuor, celebratis tempore Justiniani et Constantini junioris et quæ fuit ratio quare imperium translatum fuit a Græcis ad Germanos.*

Multa etiam et alia fuerunt Concilia, licet ista fuerint principaliora, a tempore Constantini usque ad Carolum, in quibus principes se subiectos Ecclesiæ ac fideles ostendunt ; sed præcipue Justinianus post cursum quintæ <sup>2</sup> Synodi centum viginti Episcoporum præsidente Julio Papa. Hoc enim manifestum est ex suis legibus, quas in favorem condidit ecclesiastici status. Item ex epistola quam celebrato Concilio in Constantinopoli per totum orbem terrarum direxit, in qua institutis Ecclesiæ se subiecit, mandans populis eisdem in omnibus obedire, replicans etiam super quatuor Conciliorum memoratorum statuta, et eadem confirmandas, suas <sup>3</sup> sanctiones sive leges subiciens ecclesiasticis institutis ; sed præcipue in usuris et matrimonio, in quibus tota vita civilis versatur. Quæ quidem Synodus celebrata fuit contra Theodorum et ejus sectatores Constantinopoli, qui aliud dicebant esse Verbum Dei, et aliud Christum, negantes etiam beatam Mariam. Sexta autem Synodus celebrata fuit in urbe regia præfata, Constantino Juniore procurante, centum quinquaginta Episcoporum, rogatu Agathonis contra Macarium Antiochenum Episcopum et ejus socios, qui unam operationem et unam voluntatem in Christo asserunt juxta perlidiam Eutychetis. In qua quidem Synodo dictus Constantinus, qui fuit post Justinianum principem ad 150 annos, fidei multum favit : destruens Monothelitas hæreticos, quorum pater et avus fuerunt fautores, restauravit Ecclesias per ipsos destruktas.

Hæc pro tanto sint dicta ad ostendendum quod Constantinopoli imperatores fuerunt Romanæ Ecclesiæ protectores ac propugnatores usque ad tempora Caroli Magni. Tunc igitur gravata Ecclesia a Longobardis et Constantinopoli imperio auxilium non ferente, quia forte non poterat, ejus potentia diminuta, advocavit Romanus Pontifex ad sui defensionem contra prædictos Barbaros regem Francorum. Primo quidem Pipinum Stephanus Papa et successor Zacchariæ contra Aistulphum regem Longobardorum : deinde

Adrianus et Leo Carolum Magnum contra Desiderium Aistulphi filium : quo extirpato et devicto cum sua gente, propter tantum beneficium Adrianus Concilio celebrato Romæ centum quinquaginta quinque Episcoporum et venerabilium abbatum, imperium in personam magnifici principis Caroli a Græcis transtulit in Germanos : in quo facto satis ostenditur qualiter potestas imperii ex judicio Papæ dependet. Quamdiu enim Constantinopoli principes Romanam Ecclesiam defenderunt, ut fecit Justinianus per Belisarium contra Gothos et Manritius contra Longobardos, Ecclesia dictos principes fovit. Postquam vero defecerunt, ut tempore Michaelis contemporanei Caroli, de alio principe ad sui protectionem providit.

## CAPUT XIX.

*Qualiter diversificatus est modus imperii a Carolo Magno usque ad Ottonem tertium, et unde plenitudo potestatis summo Pontifici convenit.*

Et tunc diversificatus est modus imperii : quia usque ad tempora Caroli in Constantinopoli in eligendo servabatur modus antiquus : aliquando enim assumebantur de eodem genere, aliquando aliunde ; et aliquando per principem fiebat electio, aliquando per exercitum. Sed instituto Carolo, cessavit electio, et per successionem assumebantur de eodem genere, ut semper primogenitus esset imperator : et hoc duravit usque ad septimam generationem : qua etiam deficiente, tempore Ludovici a Carolo separati, cum Ecclesia vexaretur ab iniquis Romanis, advocatus est Otto primus dux Saxonum in Ecclesiæ subsidium, liberataque Ecclesia a vexatione Longobardorum, et impiorum Romanorum, ac Berengarii tyranni, in imperatorem coronatur a Leone septimo genere Alamano, qui et imperium tenuit usque ad tertiam generationem : quorum quilibet vocatus est Otto. Et ex tunc, ut historiae tradunt, per Gregorium quintum genere similiter Theutonicum provisus est electio, ut videlicet per septem principes Alamaniæ fiat, quæ usque ad ista tempora perseverat ; quod est spatium ducentorum septuaginta annorum, vel circa : et tantum durabit, quantum Romana Ecclesia, quæ supremum gradum in principatu tenet, Christi fidelibus expediens judicaverit. In quo casu, ut ex verbis Domini supra inductis est manifestum, videlicet pro bono statu universalis Ecclesiæ, videtur vicarius Christi habere plenitudinem potestatis, cui competit dicta provisio ex triplici jure. Primo quidem divino : quia sic videtur voluisse Christus ex verbis superius introductis, et infra etiam ostendetur. Secundo vero ex jure naturali : quia supposito ipsum primum locum tenere in principatu, oportet eum dici caput, a quo est omnis motus et sensus in corpore mystico : per quod habemus quod omnis influentia regiminis ab ipso dependet. Amplius autem in communitate oportet attendere ad conservationem ipsius : quia hoc natura requirit humana, quæ sine societate vivere non potest. Conservari autem nequit nisi per dirigentem primum in quolibet

<sup>1</sup> Al. : « Martino. »

<sup>2</sup> Al. : « quartæ. »

<sup>3</sup> Al. : « sanctas. »

gradu hominum : et hoc est in actibus hominum primus hierarcha, qui est Christus : unde est primum dirigens et consulens et movens, cujus vices summus Pontifex gerit. Rursus autem dictum est supra in primo libro, quod princeps est in regno sicut Deus in mundo et anima in corpore. Constat autem quod omnis operatio naturæ ex Deo dependet sicut gubernante, movente et conservante : quia *in ipso movemur et sumus*, ut dicitur in Actibus Apostolorum xvii, 28, et Propheta Isa. xxvi, 12 : *Omnia opera nostra operatus es in nobis Domine*. Similiter et de anima dici potest : quia omnis actio naturæ in corpore in triplici genere causæ dependet ex anima. Hoc autem videmus in Deo quod gubernando et dirigendo mundum, permittit corruptionem particularis entis pro conservatione totius ; sic et natura facit pro conservatione humani corporis ex virtute animæ. Simile contingit in principe totius regni : quia pro conservatione regiminis super subditos ampliatur ejus potestas imponendo talias, destruendo civitates et castra pro conservatione totius regni. Multo igitur magis hoc conveniet summo et supremo principi, idest Papæ, ad bonum totius Christianitatis. Propter quod et prima Synodus Nicæna præsentem Constantino eidem primatum attribuit in primis canonibus quos instituit. Jura etiam sequentia dictum Concilium in his singulariter dictum principatum attollunt, dicentia quod sic debet reputari ejus sententia tamquam ab ore Dei prolata : et hoc idem Carolus Magnus conlitetur ibidem. Item non licet appellare ab ejus sententia. Item ipse est qui superiorem non habet. Item ipse est qui vices Dei gerit in terris.

Et hæc est tertia via, sive ratio per quam ostenditur et concluditur, summum Pontificem in dicto caso plenitudinem potestatis habere. In duobus igitur casibus ampliatur ejus potestas, ut patet supra : vel ratione delicti, vel ad bonum totius fidei : quod eleganter nobis ostendit Propheta Jeremias cap. 1, 10, cui in persona vicarii Christi dicitur : *Ecce, inquit, constitui te super gentes et regna, ut evellas et destruas et disperdas ac dissipas* : quod ad rationem delicti referimus : ubi in quatuor illis vocabulis diversa genera pœnarum accipimus, quæ infligi possunt unicuique fideli ; sive subdito, cum dicit *et super gentes* ; sive domino, cum dicit *et super regna*. Secundum autem est, unde accipimus ampliatam summi Pontificis potestatem, cum postea dicitur : *Et ædifices et plantes* : quod ad providentiam vicarii Christi pertinet pro bono universalis Ecclesiæ.

## CAPUT XX.

*Comparatio regalis domini inter imperiale et politicum qualiter convenit cum utrisque.*

His habitis, videnda est comparatio imperialis domini ad regale et politicum : quia, ut ex dictis apparet, convenit cum utroque : et cum politico quidem quantum ad tria.

Primo enim considerata electione. Sicut enim consules Romani et dictatores, qui politice regabant populum, assumebantur per viam electionis, sive a senatoribus ; ita et de imperatoribus contingebat, quod assumebantur sive a Romano exercitu, ut Vespasianus in Palæstina, ut historiæ tradunt, et similiter Phocas ex militari sedi-

tione in oriente assumptus est contra Mauritium imperatorem, quem postea interfecit. Aliquando autem eligebantur imperatores a senatoribus, ut Trajanus et Diocletianus ; quamvis unus de Hispania esset, alter vero de Dalmatia. Et similiter Ælius Pertinax a senatoribus est assumptus. Item non semper de genere nobili, sed de obscuro, ut in prænominatis liquet Cæsaribus, Vespasiano et Diocletiano, sicut historiæ tradunt. Sic de consulibus et dictatoribus Romanis contigit, sicut supra patuit de Lucio Valerio et Fabricio. Et Augustinus refert in *V De civitate Dei* de Quinto Cincinnato, qualiter cum solum quatuor haberet jugera ad colendum, factus est dictator major.

Item alia est comparatio sive similitudo, quod ipsorum dominium non transibat in posteros ; unde statim ipso mortuo dominium expirabat. Quantum autem ad ista duo exemplum habemus etiam modernis temporibus, quod electi sunt Imperatores, videlicet Rodolphus simplex comes de Augsburg : quo mortuo, assumptus est in Imperatorem comes Adolphus de Anaxone : quo occiso ab Alberto Rodolphi filio, eodem modo assumptus est. Hoc ergo generale est, nisi forte vel ipsorum probitate contingeret ipsos assumi, vel ex gratia patris ipsorum, ut de Arcadio et Honorio filiis antiquioris Theodosii contigit, et similiter de Theodosio juniore Honorii filio. Nam quia bene rexerunt reipublicam et imperialem aulam, meruerunt in suo genere aliquo tempore perseverare dominium. Similiter accidit de Romanis consulibus : quod licet singulis annis eligerent consules, saltem quantum ad magistratum, ut patet in I Machab., sæpius tamen contingebat quod propter probitatem personæ, vel generis transibat in posteros, ut de Fabio Maximo contigit, de quo scribit Maximus Valerius, quod cum a se quinquies et a patre, avo et proavo, majoribusque suis sæpe consulatum gestum conspiceret, animadversione quam constanter potuit cum populo id egit, ut aliquando vacationem Fabiæ genti darent, ne maximum imperium in una tantum continuaretur familia.

Accidit quoque quandoque per quamdam violentiam usurpari imperium, non ex merito virtutum, sicut fertur de Caio Caligula sceleratissimo, qui fuit nepos Tyberii, sub quo Christus passus est. Et similis de Nerone verificatur sententia. Hoc idem accidit de consulibus urbis, quod ex eorum impietate, ut historiæ narrant, usurpaverunt dominium, sicut Sylla et Marius, commotores urbis et orbis. Ex quibus omnibus patet convenientia imperialis domini cum politico.

Sed et cum regali ex triplici parte convenientia ostenditur.

Primo quidem ex modo regendi : quia jurisdictionem habet ut reges, et eisdem quodam jure naturæ sunt ut regibus tributa et vectigalia instituta, quæ et transgredi non possunt sine peccato, nisi sicut in jure regali superius delinito : quod consules nequeunt, nec etiam quicumque alii civitatum rectores in Italia, qui politico regunt regimine, ut jam dicitur. Tributa enim et vectigalia ad ærarium publicum deducuntur : et de hoc Sallustius refert, qualiter reprehendit Cato in sua concione Romanos consules sui temporis. Cum enim commendasset eos, quod « eis fuit domi industria, foris justum imperium, animus in consulendo liber neque libidini neque delicto obnoxius : » subjungit : « Pro his nos habemus luxuriam atque avaritiam ; publice egestatem, privatim opulentiam. »



Secunda convenientia imperatorum cum regibus est corona, quia coronantur ut reges. Duplicem enim habent coronam et recipiunt electi in Imperatorem. Unam quidem prope Mediolanum, in villa quæ dicitur Modætia, ubi sepulti sunt reges Longobardorum : quæ quidem corona ferrea dicitur esse signum quod primus imperator Germanus Carolus Magnus colla regum Longobardorum suæque gentis perdomuit. Secundam coronam, quæ aurea est, a summo percipit Pontifice ; et cum pede sibi porrigitur, insignum suæ subjectionis et fidelitatis ad Romanam Ecclesiam. Hujus autem fastigii dignitatem nec consules nec dictatores habebant in urbe : quia, ut scribitur in I Machabæorum, inter præsidēs Romanos nemo portabat diadema nec induebatur purpura, quorum utrumque faciunt imperatores et reges.

Tertia vero convenientia quam imperatores habent cum regibus et qua differunt a consulibus sive rectoribus politicis, est institutio legum et arbitraria potestas quam habent super subditos in dictis casibus : propter quod est eorum dominium majestas appellatur, imperialis videlicet et regalis : quod consulibus et rectoribus politicis non convenit, quia agere ipsis non licet nisi secundum formam legum eis traditam, vel ex arbitrio populi, ultra quam judicare non possunt.

Patet igitur de qualitatibus imperialis regiminis secundum diversitatem temporum et comparisonem ipsius ad regimen politicum et regale.

## CAPUT XXI.

*De dominio principum qui subsunt imperatoribus et regibus, et de diversis nominibus eorum quid importent.*

Determinatis his quæ ad regimen regale et imperiale pertinent, nunc de dominiis eisdem annexis est dicendum, ut sunt principes, comites, duces, marchiones, barones, castellani, et quibusdam aliis nominibus ad dignitatem pertinentibus secundum diversas consuetudines regionum. Sunt etiam alia nomina dignitatum sub regibus, de quibus Scriptura sacra mentionem facit, ut satrapa : unde in Daniele capit. iii, 91, scribitur : *Congregati sunt satrapæ regis Babiloniæ, magistratus et judices* : et ibidem etiam fit mentio de optimatibus regis. In I etiam Machab. quatuor ponuntur nomina dignitatum : ubi dicitur, quod contra Nicanorem Judas constituit populo duces, tribunos et centuriones et pentacontarchos et decuriones. Gesta etiam Romanorum quibusdam singularibus nominibus suos rectores appellant, post exactos reges : videlicet consules, dictatores, magistratus, tribunos, senatores, patricios et præfectos. Item Scipiones, censores et censorinos. De quibus omnibus sub duplici titulo est agendum. Primo quidem de nominibus propriis imperatorum et regum et annexis statui, unde traxerunt originem et quale fuit ipsorum regimen : postea vero de propriis pertinentibus ad politicum principatum.

Propria autem nomina dignitatum deserventium imperatoribus et regibus, sunt quidem principes, domini videlicet provinciarum, quasi primum locum tenentes sub regali vel imperiali dominio. Unde et dominantur baronibus et co-

mitibus interdum, ut in Theutonia et regno Siciliae patet. Quamvis etiam Scriptura istud nomen sæpius extendat ad omne genus domini et præcipue nobilis : ad cuius similitudinem quidam Angelorum ordo vocatur principatus, quia dominantur toti provinciæ. Unde et in Daniele x, 13, scribitur : *Princeps Persarum restitit viginti uno diebus*. Item etiam Joseph, qui secundus erat a rege in Ægypto, se principem vocat, ut in Genes., scribitur. Secundum nomen est Comitum : quod quidem nomen fuit assumptum primo a populo Romano post exactos reges. Eligebant enim singulis annis, ut tradit Isidorus II *Etymologiarum*, duos consules, quorum unus rem militarem, alter vero rem administrabat civilem : et isti duo consules primo vocati sunt comites, a comiendo simul per veram concordiam. Unde aucta fuit respublica, ut Sallustius tradit *De bello Jugurthino*. Processu vero temporum istud nomen abolitum est a Romano regimine, et translatum est ad statum aliquem dignitatis, sub regibus et imperatoribus deputatum. Unde dicuntur comites a comitando, quia ipsorum officium est præcipue reges et imperatores sequi in rebus bellicis, vel quacumque re militari, et in aliis quibuscumque gerendis pro totius regni utilitate. Duces autem a ducatu populi dicti sunt, sed præcipue in castris. Est enim ipsorum officium, exercitum dirigere, et ipsum in pugna præire. Unde cum filii Israel impugnarentur a Chananaeis, quæsiverunt a se invicem, ut scribitur in lib. Judicum, cap. i, 1 : *Quis ascendet ante nos contra Chananaeam, et quis erit dux belli?* Et hoc nomen tali rectori proprie convenit propter difficultatem regendi quando quis est in pugna. Unde ab excellentia regiminis congruissime dux vocatur. Qua ratione Josue, sive Jesus Nave, quia pugnavit bella Domini, sic vocatus est, sicut testificatur de ipso ille egregius princeps Mathathias in I Machabæorum ii, 55 : *Jesus dum implet verbum, factus est dux in Israel*. Sic etiam dixerunt zelatores legis Judaicæ Jonathæ, mortuo Juda Machabæo ibid. ix, 30 : *Eligimus te in principem et ducem ad bellandum bellum nostrum*. Aliud autem nomen dignitatis deserviens imperatoribus et regibus est Marchio, qui comitatu æquipollet ; sed hoc nomen sortitur a severitate justitiæ. Dicitur enim marchio, a marcha, quod est singulare divitum pondus, per quod significatur recta et rigida justitia. Hoc autem satis congrue apparet in dictis principibus : quia, ut communiter reperitur, in regionibus nobis notis, omnes tales principes qui isto nomine nuncupantur sunt in provinciis asperis, propter quod et confinia regionum, quæ sunt loca montuosa et rigida, apud aliquos appellantur marchia, vel in provinciis lascivis, quorum utrumque genus rigore justitiæ conservatur. Est et aliud nomen quod baro dicitur, a labore dictum : sive quia in laboribus fortes, ut Isidorus tradit in commemorato lib. : « Bara » enim græce, latine « gravis, » sive « fortis » vocatur. Hoc autem proprium est principum ut in continuis sint gymnasiis, sicut in partibus Gallia et Germaniæ est solitum, sive in venationibus vel aucupis, sive in torneamentis, ut mos fuit ipsorum antiquitus, ut Aimoinus historiarum scriptor egregius scribit. Cujus ratio ponitur a Vegetio *De re militari*, quia oportet ipsos esse primos ad bellandum pro subditis, et assuetudine efficiuntur audaces. Unde ipse subdit ibidem, quod nullus attentare dubitat quod se bene di-



dicisse confidit. Et quia ad omnes principes laboris exercitium pertinet, ideo istud nomen omnibus est commune, sive ad principes, sive ad comites, et sic de aliis sub regali dominio existentibus.

## CAPUT XXII.

*De quibusdam nominibus dignitatum singularibus in quibusdam regionibus: et quale sit omnium istorum regimen.*

Sunt autem et alia nomina consequentia regale vel imperiale dominium in quibusdam regionibus sive provinciis, quæ aliquid important, ut nomen satrapæ et optimatis apud Persas et Philistæos. Quorum primum significat promptitudinem serviendi: unde satrapæ dicuntur quasi satis parati, quod est officium principis propter fidelitatem quam jurat suo superiori: vel satis rapientes, quod videtur importare ipsum nomen, cum sit fastuosum, ut ex ipsa sacra Scriptura est manifestum. Optimatum autem nomen significare videtur supremum gradum sub principe, ab optimo dictum. Magistratus a præeminentia consilii et doctrinæ dicti sunt in regimine; quomodo et majores curiæ regis Franciæ sic vocantur, quasi majores statu. « Steron » græce, latine « statio » dicitur. Judices vero quasi jus dantes populo, qui proprie assessores dicuntur, qui etiam prætores quasi præ aliis locum tenentes in curia. Sed præses nomen est sacre Scripturæ sic dictus, ut tradit Isidorus, quia alienius loci tutelam præsidialiter tenet. Sunt et alia duo nomina ad dignitatem pertinentia in curia regis, de quibus fit mentio inter officiales curiæ Salomonis in III Regum, ut a commentariis et scriba, qui in officiis distinguebantur: quia unus præerat legionibus scribendis per principem institutis, quod idem videtur quod magistratus; alius autem præpositus erat responsivis regum, quem et nos cancellarium appellamus. Præter hæc autem sunt et alia duo nomina usitata quidem in partibus Galliæ, forte ex proprio idiomate alicujus gentis, in quibus nos ab ipsis talem possumus etymologiam sortiri, ut est mariscallus et senescallus, qui proprie rectores expositi sunt ad universalia negotia regionis, quod utrumque nomen importat, ut mariscallus (a), idest dominus laborum (« Maris » enim syriace, « domina, » vel « dominus » latine, callus autem laborem importat); senescallus autem a « senes, » propter maturitatem regiminis, et « callus calli; » in tali enim officio non debent exponi nisi homines magnæ experientiæ et laboris assidui. Apud Hispanos autem omnes sub rege principes divites homines appellantur, et præcipue in Castella: cujus est ratio; quia rex providet in pecuniis singulis baronibus secundum merita sua; vel secundum complacentiam hos deprimit, hos exaltat. Ut in pluribus enim munitiones et jurisdictiones non habent nisi ex voluntate regis, et inde vocantur divites homines; quia cui in majori summa providetur per regem, ille major est princeps, quia pluribus potest militibus providere; quem mo-

dum adhuc observant Romanæ militiæ, eo quod sub stipendiis vivunt. Sunt ibi et alii qui vocantur infantes, et alii infantiones: quorum primi sunt de genere regio, qui filii vel nepotes, sic dicti ab innocentia, quia nullum debent lædere, sed conservare, ac in justitia fovere, et regi sicut infantes in omnibus obedire, quod hodie male observatur ibidem. Secundi vero sic sunt dicti, quia primos debent sequi sicut majores. Sunt enim nobiles, qui plus virtutis habent quam miles simplex, et aliquorum castrorum et villarum domini, qui et alicubi castellani dicuntur. Dicti autem sunt infantiones, quia minus possunt inter alios principes lædere propter impotentiam suam, sicut pueri ab infantia recedentes. Si enim lædant subditos suos, rebellant, majoribus principibus adhærentes, et sic perdunt dominium. Item nec potentiam habent majorum principum, sicut nec puer respectu viri.

Hæc igitur de principibus subjectis et subalternatis regibus dicta sufficiant, et quid significant vel quid importent. De ceteris vero dignitatibus supra præmissis, quia ut in pluribus pertinent ad politiam, licet aliqua sint communia, infra in sequenti opere declarabitur. Nunc enim videndum est quale est dictorum principum regimen: circa quod est respondendum secundum sententiam sacre Scripturæ. Dicitur enim in Eccli. x, 2: *Secundum judicem populi, sic et ejus ministri sunt, et qualis est rector civitatis tales habitantes in ea.* Tales enim principes modum habent communiter regendi, regaliter vel imperialiter, nisi forte in aliquibus locis propter consuetudinem usurpatam vel ex tyrannide, vel propter malitiam gentis, quia aliter domari non possunt, ut dictum est supra, nisi tyranico regimine, ut accidit in insula Sardinia et Corsicæ, item in quibusdam insulis Græciæ, item in Cypro, in quibus dominantur nobiles principatu despotico vel tyrannico: unde et de insula Sicilia tradunt historiæ, quod semper fuit nutritrix tyrannorum. In partibus etiam Italiae comites et alii principes, nisi forte per violentiam tyrannizent, oportet subditos suos regere more politico et civili. Inveniuntur etiam apud eos quædam nomina dignitatum ex jure imperii dependentium, et supra simplicem militiam transcendentium, ut sunt valvasalli et cathani, qui et proceres appellantur, jurisdictionem super subditos habentes; quamvis hodie per civitatum potentiam sit diminuta vel subtracta totaliter. Valvasalli autem vocantur a valvis, quia deputati erant ad custodiendum portas palatii regalis sive imperialis, quos nos ostiarios appellamus. Cathani ab universalitate operum in curia principum et strenuitate super alios simplices milites, sunt dicti, qui et proceres quasi ante alios procedentes dicuntur. « Catha » enim universale græco nomine significamus. Multa etiam sunt alia nomina secundum diversas regiones et linguas ad beneplacitum principum instituta. Sed hoc ad præsens sufficiat, reliqua reservando ad regimen politiæ, de quo specialis debet esse tractatus propter diffusionem materiæ: ubi de nominibus dignitatum agatur, prout patietur natura regiminis secundum diversos provinciarum mores, ut philosophi et historici tradunt scriptores.

(a) Mariscallus, equorum dominus, seu equorum custos, et, decursu temporis, magister equi-

tum. Unde non admittenda est etymologia hic ab auctore allata.

## LIBER QUARTUS.

## CAPUT I.

*De differentia inter principatum regni et principatum politicum, quem dividit in duos.*

*Constitues eos principes super omnem terram; memores erunt nominis tui, Domine.* Psalm. xvi, xvii, Licet dominium omne sive principatus a Deo sit institutus, ut supra est declaratum in III lib., diversus tamen in ipso traditur modus a Philosopho, et per sacram Scripturam. Quia ergo supra in præfato jam libro actum est de monarchia unius, puta de dominio summi Pontificis, regali et imperiali, ac ipsorum naturam concomitantibus; nunc hic congrue agitur de dominio plurium, quod communi nomine politicum appellamus; descriptum nobis in præsumptis verbis dupliciter: et quantum quidem ad modum assumendi, et quantum ad modum vivendi. Modus autem assumendi in hoc gradu electivus est in quocumque hominis genere non per naturæ originem, ut de regibus accidit, quod verbum institutionis importat. *Constitues*, inquit, *eos principes*: sed addit, *super omnem terram*, in hoc ostendens generalem regulam in principatu politico; ut generalis sit per viam electionis, ut statuatur princeps: sed quod sit virtuosus: unde subdit: *Memores erunt nominis tui, Domine*, in consideratione scilicet divina suorumque præceptorum, quæ sunt regentibus quædam recta ratio agendorum. Propter quod in Proverbiis cap. vi, 23, dicitur, quod *mandatum Domini lucerna est, et lex lux*. Maximus etiam Valerius de Cæsare dicit, quod celesti providentia virtutes per ipsum fovebantur, et vitia vindicabantur. De hoc autem principatu in presenti libro est tractandum: quem Philosophus sic distinguit in III *Polit.*, et supra ostensum est in principio libri: quia si tale regimen gubernatur per paucos et virtuosos, vocatur « Aristocratia, » ut per duos consules, vel etiam dictatorem in urbe Romana in principio expulsis regibus. Si autem per multos, veluti per consules, dictatorem et tribunos, sicut in processu temporis in eadem contigit urbe, postea vero senatores, ut historiae narrant; tale regimen « Politiam » appellant, a « polis » quod est pluralitas, sive civitas: quia hoc regimen proprie ad civitates pertinet, ut in partibus Italiae maxime videmus; et olim viguit apud Athenas post mortem Codri, ut Augustinus refert *De civitate Dei*. Tunc enim a regali dominio destiterunt, magistratus reipublice assumentes, sicut in urbe. Sed quocumque modo dividitur contra regnum sive monarchiam, et ipsorum oppositum contra oppositum: quia si propositum in proposito et oppositum in opposito. Et quoniam utrumque pluralitatem includit, ista duo ad politicum se extendunt, prout dividitur contra regale seu despoticum, ut Philosophus tangit in I et III *Polit.* De hoc ergo hic est agendum. Et primo quidem in quo differt a regali sive imperiali, sive monarchico, quod ex supra dictis in I et III lib., aequaliter videri potest. Sed nunc etiam differentia est addenda, quia legibus astringuntur rectores politici, nec ultra possunt procedere in

prosecutione justitiæ: quod de regibus et aliis monarchis principibus non convenit: quia in ipsorum pectore sunt leges reconditæ, prout casus occurrunt; et pro lege habetur quod principi placet, sicut jura gentium tradunt: sed de rectoribus politicis non sic reperitur, quia non audebant aliquam facere novitatem, præter legem conscriptam: unde in I Machabæorum vii, 15, scribitur, quod Romani *curiam fecerunt*, et quod *quotidie consulebant trecentos viginti, consilium agentes semper de multitudine, ut quæ digna sunt gerant*. Per quod habetur quod in regimine Romano a regum expulsionem dominium fuerit politicum, usque ad usurpationem imperii, quod fuit quando Julius Cæsar prostratis hostibus, videlicet Pompeio occiso, et filiis, subjugatoque orbe, singulare sibi assumpsit dominium et monarchiam, convertitque politiam in despoticum principatum sive tyranicum. Nam, sicut historiae tradunt, post prædicta ad contemptum senatorum videbatur intendere. Ex quo provocati majores urbis, ipsum in Capitolio viginti quatuor pugionibus perforaverunt, auctoribus Bruto et Cassio, plurimoque senatu. Advertendum etiam hic, quod quamvis unus dominaretur singulis annis, ut in dicto lib. Machabæorum scribitur, sicut in civitatibus Italiae etiam modo contingit, regimen tamen dependebat ex pluribus, et ideo non regale, sed politicum appellabatur; sicut et de iudicibus Israelitici populi accidit, cum tamen non regaliter sed politice populum regerent, sicut dictum est supra. Considerandum etiam, quod in omnibus regionibus, sive in Germania, sive in Scythia, sive in Gallia, civitates politice vivunt; sed circumscripta potentia regis sive imperatoris cui sub certis legibus sunt astricti. Est etiam alia differentia: quia rectores sæpius exponuntur examini, si bene iudicaverunt aut rexerunt secundum leges eisdem traditas, et ex contrario subiciuntur pænis: unde ipse Samuel, sicut in I Regum xii, 2, scribitur, quia populum Israeliticum iudicaverat prædicto modo, tali se sententiæ exponit, assumpto in regem Saule. *Ecce*, inquit *præsto sum: loquimini de me coram Domino et Christo ejus*, scilicet Saul, *utrum bovem cujusquam tulerim, si quempiam calumniatus sum, si oppressi aliquem, si de manu alicujus munus accepi*. Sic etiam de consulibus Romanis tradunt historiae. Propter quam causam accusatus Scipio Africanus ab impiis amulis, quod pecunia corruptus fuisset, urbem reliquit. Ex talibus falsis amulationibus in processu temporis exorta sunt bella civilia: quod in regibus vel Imperatoribus locum non habet; nisi quod regiones interdum eis rebellant, si jura regni transcendunt, sicut in partibus Hispaniæ et Hungariæ frequentius accidit; et inde etiam in oriente sæpius machinantur mortem dominis, ut apud Ægyptum de Soldano contingit, et in Perside et Assyria, de principibus Tartarorum. Ex qua causa quia principes sæpe efficiuntur tyranni, quædam regiones indignum iudicant, ut etiam Philosophus narrat in sua *Politica*, quod reges in ipsorum provinciis perpetuentur in filiis, hoc est quod filii regum succedant in regno; sed ipso mortuo eligit populus quem magis ornatum moribus comprehendunt, sicut fiebat de imperatoribus, ut supra patuit in III lib., et in Ægypto adhuc observatur modernis temporibus. Quæruntur enim pueri elegantes in diversis regionibus, et præcipue in partibus Aquilonis, quia sunt staturæ proceræ, et ad militarem disciplinam idonei. Hi de ærario publico nu-

triantur, exercitantur in gymnasiis et disciplinis scholasticis, in civilibus actibus, et rebus bellicis assistunt Soldano in ministerio, sicut traditur; et post mortem ejus, qui probati inveniuntur, ad principatum assumuntur. Interdum tamen impeditur ex violentia, sive ex tyrannide, aut fastu ambitionis. Sunt et aliæ differentiae circa regimen, quantum ad tempus regiminis, et alias circumstantias, de quibus Philosophus mentionem facit in IV *Politicorum*; sed ista sufficiant et quæ dicta sunt supra in secundo et tertio libro.

## CAPUT II.

*Hic ostendit necessitatem constituendi civitatem, propter communitatem necessarium humanæ vitæ, circa quam præcipue consistit principatus politicus.*

Et quia regimen politicum maxime consistit in civitatibus, ut ex supradictis apparet: provinciæ enim magis ad regale pertinere videntur, ut in pluribus reperitur, excepta Roma, quæ per consules et tribunos ac senatores gubernabat orbem, ut in dicto libro Machabæorum est manifestum, et quibusdam aliis Italiæ civitatibus, quæ licet dominantur provinciis, reguntur tamen politice: ideo de ipsius constitutione nunc est agendum. Et primo quidem ostendenda est ejus constituendæ necessitas, et quæ ejus communitas. Secundo vero quot sunt partes ejus, sive ex quibus hominum generibus componitur.

Necessitudo autem apparet primo quidem considerata humana indigentia, per quam cogitur homo in societate vivere: quia, ut in Job. xiv, 1, scribitur, *homo natus de muliere, brevi vivens tempore, repletur multis miseriis*, id est necessitatibus vitæ, in quibus miseria manifestatur: unde secundum naturam est animal sociale sive politicum, ut Philosophus probat in I *Polit.*; et inde concluditur communitatem civitatis esse necessariam pro necessitatibus humanæ vitæ.

Amplius autem natura providit ceteris animalibus ornamenta et munimenta in sui exordio: unde ex virtute naturæ æstimativa vitat contraria et convenientia diligit, nullo dirigente prævio, ut opus naturæ sit in eis opus intelligentiæ, sicut Philosophus tradit in II *Physic.* Sed in homine non sic: immo instructore indiget ad eligendum proportionata naturæ, propter quod nutricem habet ad ista docenda.

Rursus ad idem. Vestes et tegumenta, quibus ornantur animalia et plantæ statim sicut nascuntur, et homo caret, significativa sunt indigentia: pro quibus oportet recurrere ad hominum multitudinem, unde civitas constituitur. Propter quod Dominus ostendit in hoc lilia agri et volucres cœli, et sic de similibus, melioris esse conditionis quam homo, referendo indigentiam ad illum magnificum regem Salomonem, qui tam excellenter abundavit. *Respiciite*, inquit Matth. vi, 26, *volucres cœli, quia non serunt neque metunt, neque congregant in horreu. Considerate lilia agri, quomodo non laborant neque nent.* Postea subdit: *Dico vobis, quod nec Salomon in omni gloria sua coopertus est sicut unum ex istis*; quasi majoris fuerit indigentia quantum ad victum, et vesti-

menta ac tegumenta, quam plantæ et animalia.

Amplius autem ferocitas animalium, quæ facta sunt homini nociva post lapsum Adæ, ad hoc ipsum inducit. Ad majorem enim securitatem hominis cujuscumque rei timendæ, necessaria est communitas hominum, ex quibus civitas constituitur, unde homo reddatur securus. Et inde motus fuit Cain civitatem construere, ut in Genesi scribitur: unde et in Ecclesiastico xl, 19, dicitur, quod *ædificatio civitatis confirmabit nomen.*

Rursus præter necessitatem in corpore sano sunt et aliæ conditiones necessitatis pertinentes ad corpora ægra, quibus homo frequenter subicitur. Ad sui autem reparationem sibi homo solus non sufficit, quemadmodum animalia cum patiuntur, quibus natura providit ut sine hominum medicina curentur, cognoscentia per æstimativam eis inditam herbas sanativas eorumdem, seu quæcumque alia ordinata ad ipsorum salutem. Homo autem horum ignarus indiget medicis, medicina, et hominum<sup>1</sup> ministerio, quæ omnia multitudinem requirunt hominum, quæ civitatem facit; et sic idem quod prius.

Amplius autem quia casus sunt multi in quos homines incidunt per inopinatum eventum, quibus relevantur in societate: unde in Ecel. iv, 10, scribitur: *Væ soli; quia si ceciderit, non habet sublevantem se.* \* *Si autem fuerint duo, fovebuntur* \* *Etsi dormierint.*

Ex quibus omnibus concluditur, civitatem esse necessariam homini constituendam propter communitatem multitudinis, sine qua homo vivere decenter non potest: et tanto magis de civitate quam de castro vel quacumque villa, quanto in ea plures sunt artes et artifices ad sufficientiam humanæ vitæ, ex quibus civitas constituitur. Sic enim Augustinus definit eam in I *De civ. Dei*, quod est « multitudo hominum in uno societatis vinculo colligata. »

Advertendum autem quod superius in principio primi libri probatum est societatem humanam esse necessariam, et hic similiter; sed aliter et aliter utrobique; quia ibi secundum quod partes multitudinis sibi invicem sunt necessariae; propter quam causam necessario sunt institutæ civitates et castra, prout ordinantur ad politicum regimen.

## CAPUT III.

*Hic declarat hoc idem ex parte animæ, sive ex parte intellectus sive voluntatis, scilicet constitutionem civitatis esse necessariam.*

Non solum autem ex parte corporis, hoc est quantum ad sensitivam virtutem, habet persuasionem et veritatem continet quod secundum naturam constructio civitatis est necessaria; sed etiam ex parte animæ rationalis hoc est manifestum; et tanto amplius, quanto homo, in quantum est rationalis, quod ex parte intellectus provenit, societatem magis requirit.

Circa partem autem rationalem duplex distinguitur potentia et actus; videlicet intellectus et voluntas. Quantum autem ad partem intellectivam duplices sunt actus, juxta quos versatur politicum

<sup>1</sup> Al.: « et omnium »

regimen; videlicet speculativus et practicus. In practico quidem includuntur virtutes morales, quæ referuntur ad opus et non ad scire tantum, sicut Philosophus dicit in II *Ethic.*, ut sunt temperantia, fortitudo, prudentia et justitia: quæ quidem omnes ad alterum ordinantur, et sic requirunt multitudinem hominum, ex quibus constituitur civitas, ut jam dictum est supra. Et quamvis dictæ virtutes non omnes habeant pro subjecto intellectum; fortitudo enim est in irascibili, temperantia in concupiscibili, quæ ad partem sensitivam pertinent; participant tamen rationem inquantum regulantur ab ipsa, unde prudentia est ipsarum directiva. Est enim prudentia « recta ratio agibilium, » ut Philosophus dicit in VI *Ethicor.*

Amplius autem et ipsa sacra Scriptura dictas virtutes morales ad hoc idem ordinat. Sic enim de istis virtutibus dicit lib. Sapient. viii, 7, loquens de eo quod *sobrietatem et sapientiam docet, justitiam et virtutem: quibus utilius nihil est in vita hominibus.* Deinde subdit de merito istarum virtutum: *« Habebō, inquit, per hanc, videlicet scientiam, sive experientiam harum virtutum, claritatem ad turbas, et honorem apud seniores: et multa alia ibidem subduntur quæ ad multitudinem hominum pertinent. Sed de speculativo intellectu adhuc est manifestum: quia, ut vult Aristoteles in II Ethic., homo maxime ex doctrina argumentum accipit, et scientiæ generationem, et experimento indiget et tempore: quæ omnia respiciunt hominum multitudinem, ex quibus civitas constituitur.*

Rursus. Duo sunt disciplinabiles sensus, ut tradit Philosophus *De sensu et sensato*, visus videlicet et auditus. Auditus autem multitudinem respicit. Ergo idem quod prius.

Præterea Philosophus dicit I *Metaph.* quod sapientis est ordinare. Ordo autem multitudinem requirit: est enim ordo, ut Augustinus dicit *De civ. Dei*, « parium dispariumque sua cuique tribuens dispositio: » quod sine multitudine esse non potest.

Amplius autem et ipsa loquela, quæ manifestativa est cordis, ad partem intellectivam pertinet, ut Philosophus dicit, ad alterum ordinatur: propter quod in Eccli. xx, 32, scribitur: *Sapientia abscondita, et thesaurus invisus: quæ utilitas in utrisque?* Hoc idem et de scriptura dici potest, quia respicit multitudinem, sine qua nec fieri nec explanari valeret.

Sed ex parte voluntatis, quæ potentia rationalis ponitur a Philosopho, hoc idem dici potest. Duæ enim sunt virtutes in ipsa quæ ad alterum ordinantur, ac multitudinem requirunt. Una quidem est justitia, quam respectu voluntatis jus gentium sic definit: « Justitia est constans et perpetua voluntas jus suum unicuique tribuens: » quæ quidem sive legalis, quæ dominatum justum vocatur a Philosopho, sive distributiva, sive communitativa, quæ partes justitiæ omnes sunt, politiæ in civitatibus sunt præcipue necessaria, immo sine eis exerceri non possunt, ut Philosophus tradit in V *Ethic.*, nec etiam ipsæ civitates conservari. Per quod concluditur civitatis constructionem esse necessariam secundum naturam respectu talis virtutis. Secunda vero quæ in voluntate ponitur, et ad multitudinem refertur, est amicitia, quæ principaliter communitatem requirit multitudinis; et siue ea non est ista virtus; de qua Philosophus dicit in VIII *Ethic.*, quod maxime est necessaria ad vitam

humanam, eo quod nullus eligeret vivere sine amicis: unde idem Aristoteles connumerat utilitates istius virtutis, ad ostendendam ipsius necessitatem, semper tamen respectu multitudinis: Primo quidem in infortuniis, quia in talibus recurritur ad amicos. Item in fortuniis, quia per amicos conservantur: unde præcipue opus habent amicis, qui divitias possident et sunt in principatibus, ut Philosophus idem ait. Amicis autem indigent juvenes, ut religantur a concupiscentiis, et ad non peccandum; senes vero ad famulatum; et sic de singulis generibus hominum. Per quæ colligitur communitatem multitudinis hominibus esse necessariam secundum naturam, et per consequens constructio civitatis: in qua si amicitia vigeat, et nutriatur concordia, civitas quamdam causat harmoniam et animæ suavitatem, ut Augustinus *De civ. Dei* dicit lib. II; ex summis videlicet, intimis et mediis ordinibus quibus moderatur. Propter quod Propheta dicit Ps. cxxxii, 1: *« Ecce quam bonum et quam jucundum habitare fratres in unum! »* Idem etiam Augustinus duas constituit civitates in dicto libro secundum duos amores.

Præter hæc vero est alia ratio ad ostendendum communitatem multitudinis hominum esse necessariam: appetitus videlicet humanus ad communicandum opera sua multitudini, ut molestum sit eidem aliquid virtutis agere absque hominum societate: unde Tullius dicit in lib. *De amicitia*, quod natura nihil solitarium amat. Verum est enim quod ab Archita Tarentino, ut opinor, dicere solitum esse, a senibus nostris audiui: si quis in cælum ascendisset, naturamque mundi ac siderum aspexisset, pulchritudinem insuavem illi sine amico vel socio admirationem fore. Ipsæ etiam divitiæ nisi effusæ in multitudine non clarescunt, ut Boetius dicit.

Patet igitur, hominem sive ex parte corporis, sive partis sensitivæ, sive considerata sua rationali natura, necesse habere vivere in multitudine. Ex qua parte necessaria est secundum naturam constructio civitatis: unde Philosophus dicit in I *Politicorum*, quod natura quidem omnibus inest ad talem communitatem, qualis est civitatis communitas. Et quamvis primos institutores civitatum malos homines Scriptura referat, ut Cain fratricidam, Nembroth oppressorem hominum, qui ædificavit Babylonem, Assur qui ædificavit Ninivem, ut in Genesi scribitur, a Nembroth fugatum; moti tamen fuerunt ad constituendum civitates propter hominum commoditates jam dictas, retorquendo tamen in suum dominium, pro quo conservando necessaria erat in unum multitudinis congregatio.

#### CAPUT IV.

*De communitate civitatis, in quo consistat: uti Aristoteles refert opinionem Socratis et Platonis, quam hic auctor declarat.*

Habita igitur necessitate constituendæ civitatis propter communitatem hominum, necesse quærendum videtur in quo sistat ista communitas. Circa quod diversi philosophi et sapientes diversas constituerunt politias respectu communitatis, ut Philosophus refert in sua *Politica*: ubi primo narrat opinionem Socratis et Platonis in II *Politica*, quod communitatem ponerent in

\* Et prudentium.

\* Propter hanc.

\* Absconsa.



sua politia quantum ad omnia, ut videlicet omnia essent communia, tam divitiæ quam uxores et filii : moti quidem ex bono unionis in communitate, per quam respublica commendatur et crescit.

Amplius autem, cum bonum sit diffusivum et sui communicativum, quanto res communior est tanto plus de bonitate habere videtur. Ergo omnia communicare plus habet de ratione virtutis et bonitatis.

Præterea. Amor est virtus unitiva, ut Dionysius tradit. Ubi est ergo unionis major ratio, ibi plus vigeat virtus amoris, qui civitatem constituit et conservat, ut Augustinus dicit et dictum est supra. Ergo omnia habere communia, tam divitiis quam uxores et filios, habet rationem majoris bonitatis.

Hæ autem rationes sunt et multæ aliæ quas Philosophus refert iuxta opinionem Socratis et Platonis, licet non per eadem verba, sed a sententia non discordat. Et si attendimus ad qualitatem dictorum Philosophorum, quia fuerunt homines virtutibus dediti super omnes Philosophos, eo quod solas virtutes bonum hominis ponebant, non videtur credibile, talem communitatem eos posuisse eo modo quo Aristoteles videtur eis imponere in prædicto libro, quia hoc videtur magis bestiale quam humanum, feminas scilicet esse communes quantum ad mixtionem carnis : unde et sacra Scriptura matrem separat a filiis et filiam a patre et virum uxori conjungit, ac solum cum sola distinguit in primo hominis præcepto : propter quod in Genesi II, 24, dicitur : *Quamobrem relinquet homo patrem et matrem et adhærebit uxori suæ : et erunt duo in carne una.* Non autem dicit plures. Sed et de filiis est impossibile ; quia in actu generationis duo semina non conveniunt, sed unum solum ex parte vici. Propter quod ipsa etiam animalia suos natos cognoscunt quanto tempore est necessarium ad nutrimentum filiorum, ut in pullis avium maxime contingit, antequam advolare possunt. Quod ergo dicamus dictos Philosophos minus compositos animalibus, videtur absurdum, qui ad componendos mores corrigendosque totam suam struxerunt Philosophiam, ut Augustinus tradit de Socrate, VIII *De civit. Dei* : cujus doctrina Plato ejus discipulus fertilissime sortitus est, ut Valerius Maximus scribit : qui cum sapientissimus omnium esset sui temporis, et a juvenibus studiosis certatim quæreretur Athenis, in Ægyptum descendens a sacerdotibus illius gentis geometriæ multiplices numeros cælestium rationum observare percepit, et in Italiam peragrans ab Archita et Arione Pythagoræ præceptis instructus est. Talibus ergo et tantis viris talem politiam attribuire, unde ordo destrueretur naturæ, non est sine admiratione. Sed et ipsi commentatores Aristotelis hoc eidem attribuunt quod non plene retulerit aliorum opiniones ; et præcipue Socratis et Platonis, sicut Eustratius dicit super I *Eth.* circa ideam bonitatis, et Simplicius in fine primi *De cælo et generatione mundi.* Augustinus autem in IX *De civit. Dei* hoc idem refert de opinione Stoicorum circa passiones animi quod aliqui attribuebant Stoicis, quorum princeps Socrates fuit, quod in sapientem non caderent, ut idem Aristoteles in II *Ethic.*, præfate imponit Philosopho. Et tamen Augustinus idem dicit esse falsum, ex sententia Auli Gellii in lib. *Noctium Atticarum.* Sed hæc omnia referenda sunt ad effectum amoris. Quia ergo dicti Philosophi virtutibus erant

præditi et ad hoc sollicitabatur eorum conatus ; virtus autem amoris ad paria nobis cum proximo præcipitur. *Diliges*, inquit Salvator Matth. XXI, 30, *proximum tuum sicut te ipsum* ; cum ipsi sub quibusdem metaphoris soliti essent loqui, volentes persuadere ad concives amorem per quem civitas proficit, communitatem posuerunt in uxoribus et filiis in dilectione mutua ; sed in possessionibus in communicatione necessaria. Quia *si quis viderit fratrem suum necessitatem habere et clausit viscera sua ab eo, quomodo amor Dei manet in eo ?* I Joan. III, 17, quod fuit præcipuum Stoicorum. Rerum enim exteriorum sive divitiarum contemptivi erant, ut de Socrate refert Hieronymus.

Per hoc autem patet responsio ab objecta. Quia unio et amor habet gradum in inferioribus entibus : quoniam perfectior est unio in corpore animato, si in diversis organis virtus animæ diffunditur ad diversas operationes unitas in una substantia animæ ; sicut apparet tam in animatis perfectis quam in animatis quæ habent solum sensum tactus, ut sunt vermes, et quædam animalia quæ Aristoteles vocat in II *De anima*, animalia imperfecta. Propter quod et Apostolus comparat corpus mysticum, idest Ecclesiam, vero corpori et naturali, in quo sunt membra diversa sub diversis potentiis et virtutibus, in uno principio animæ radicatis : unde et unionem allegatam reprobat Apostolus in I epistola ad Corinthios XII, 17 dicens : *Si totum corpus oculus, ubi auditus ? Et si totum auditus, ubi odoratus ?* quasi necessarium sit in qualibet congregatione, quæ præcipue est civitas, esse distinctos gradus in civibus quantum ad domos et familias, quantum ad artes et officia ; omnia tamen unita in vinculo societatis quod est amor suorum civium, ut dictum est supra ; et de quo etiam Apostolus dicit ad Colossos. Cum enim connumerasset quædam opera virtuosa ad quæ cives ad invicem obligantur, statim subdit : *Super hæc autem omnia caritatem habentes quod est vinculum perfectionis ; et pax Christi exultet in cordibus vestris, in qua vocati estis in uno corpore*, distincto videlicet per membra juxta civitas statum. Ex qua diversitate artium et officiorum, quanto in eis multiplicatur amplius, tanto civitas redditur magis famosa : quia sufficientia humanæ vitæ, propter quam necessaria est constructio civitatis, magis reperitur in ea.

Quod si forte allegatur de discipulis Christi quibus omnia fuerunt communia, non importat legem communem, quoniam status eorum omnem modum vivendi transcendit. Ipsorum enim politia non ordinabatur ad uxores et filios, sed ad civilitatem cælestem, in qua neque nubent neque nubentur, sed sunt sicut Angeli Dei : sed quantum ad divitias bona erant communia : quod solum perfectorum est, ut Dominus dicit in Evangelio. *Si vis*, inquit Matth. X, 21, *perfectus esse, vade et vende omnia quæ habes, et da pauperibus ; et veni sequere me.* Hoc et Socratici fecerunt et Platonici, sicut contemptivi rerum temporalium, ut de Plotino scribit Mercurius Trismegistus et Macrobius *Super somnium Scipionis.* In ceteris autem civibus communis status expedit possessiones habere distinctas ad vitanda litigia, sicut etiam de Abraham et Loth scribitur in Genesi XIII, 8. Cum enim contentio oriretur inter ipsorum pastores pro pastura gregum : *Ne quæso, dixit Abraham ad Loth, sit iurgium inter me et te, et pastores meos et tuos : fratres enim sumus.*



*Ecce universa terra coram te est. Si ad sinistram ieris, ego dextram tenebo; si dexteram elegeris, ego ad sinistram pergam.* Per quod habemus quod inter cives expedit ad societatem servandam, ipsorum divitias esse distinctas. Et sic patet responsio ad prædicta.

## CAPUT V.

*De opinione Socratis et Platonis circa mulieres, quomodo sint exponendæ rebus bellicis.*

Sed ad eandem politiam redeundo prædictorum Philosophorum, quædam alia Aristoteles eisdem attribuit in præfato libro, quia volebant mulieres instruendas in rebus bellicis. Quorum argumentum inducit secundum ipsos, quia videmus in avibus rapacibus ferociores esse feminas et efficacius pugnare: hoc idem et de bestiis liquet, sicut præcipue in ferocibus animalibus est manifestum.

Amplius autem corporale exercitium confert feminis, quantum ad virtutem corporis et fortitudinem, sicut in ancillis familiarum et mulieribus rusticanis est manifestum, quia fortiores sunt et saniores. Virtutis autem proprium est quod bonum faciat habentem et opus suum bonum reddat. Si ergo in gymnasiis ac rebus bellicis magis confortatur feminea virtus, congrue opera bellica videntur eisdem competere.

Amplius autem proportio qualitatum primarum ad hoc idem inducit, ut calidi et humidum, frigidi, et sicci: ex quibus ad medium deductis, fortificatur mixtum in sua virtute. Sic enim videmus ligna viridia, ex quo in eis humidum est consumptum et ad medium deductum quod fortius ardent. Sic enim videmus in avibus rapacibus quod femina ratione sui motus sunt fortioris nature et majoris corpulentia. Cum igitur in mulieribus abundet humidum, sicut in pueris, per motum consumitur, et venit ad temperamentum et vires recipit.

Hujus autem argumentum assumitur de regno Amazonum quod fortissimum fuit in oriente, et quasi totam Asiam, tertiam partem orbis, subjugaverunt sibi, ut historiae narrant, quæ de Scythis orientalibus traxerunt originem: unde apud ipsos Scythas, de quibus descenderunt Tartari, mulieres in rebus bellicis exponuntur et cum suis militant viris. Ex quibus omnibus moti forte fuerunt præfati Philosophi in constitutione politica, mulieres fore ad opera bellica exponendas.

Sed contra hanc politiam rationes sunt fortes, quibus difficile est respondere. Una quidem est Aristotelis in II *Politicorum*: quia non est eadem ratio de animalibus et hominibus, eo quod animalia non subjiciuntur dominio œconomico: solus autem homo gubernationi intendit familie. Quæ quidem fieri non potest ubi mulieres exponuntur armis: quia sicut in politica officii sunt distincta, ita et in œconomia, ut paterfamilias ad exteriora negotia intendat, mulieres autem ad intrinsecos actus familie. Cujus quidem argumentum assumere possumus ex parte Romanæ reipublicæ, quæ, ut tradunt historiae, duos habebat consules: unus intendebat bellicis rebus, alter rempublicam gubernabat. Hoc idem et de Amazonibus scribitur: in quorum regno seu monarchia, quæ distinguebantur in officiiis, sicut de Romanis consulibus est dictum.

Secunda ratio sumitur ex ipsa membrorum muliebrium ineptitudine ad pugnandum. Sic enim Philosophus distinguit *De gestis animalium* inter masculum et feminam, quia masculus habet superiora membra grossiora, brachia, manus, nervos et venas, ex quibus vox grossior generatur; nates vero et ventrem, et alia, circumstantia subtiliora: mulieres autem e converso; et hoc ut in actu generationis sint aptiores. Amplius autem et mammillas ad nutriendam prolem, quæ omnia sunt impeditiva pugnae: unde et de Amazonibus scribitur quod puellis mammillas amputabant dexteras, sinistras autem comprimebant, ne impedirentur a sagittando.

Tertia ratio sumitur ex dispositione animæ. Tradit enim Philosophus *De gestis animalium* quod mulier est masculus occasionatus: unde sicut deficit in complexione, ita et in ratione. Et inde est quod propter defectum caloris et complexionis sunt pavidæ, et mortis timidæ: quod in bellis maxime fugiendum est. Propter vero defectum rationis, carent astutiis bellicis, quibus pugnant ut plurimum sunt victores, sicut Vegetius tradit *De re militari*: unde tradunt historiae quod Alexander quibusdam astutiis et blanditiis devicit Amazones, magis quam bellandi fortitudine: quarum regnum temporibus ejus fortissimum et potentissimum erat in Asia.

Quarta ratio sumitur ex periculoso commercio viri et mulieris: quia actus venereus corrumpit æstimationem prudentiæ, ut tradit Philosophus in VII *Ethicorum*, et impossibile est in eo aliquid intelligere. Ex qua causa virilis animus enervatur: unde ferunt historiae Julium Cæsarem, cum bellum immineret, jussisse suis omnes delicias separari a castris, et præcipue mulieres. Cyrus etiam rex Persarum, cum Lydos superare non posset, quia fortissimi erant et ad labores assueti, tandem per ludos et usum veneris ibidem constitutos virtute et fortitudine enervatos perdomuit. De ipsis insuper Romanis antiquis sic scribit Vegetius in principio primo libri: « Ideo ipsos perfectos ad bellum semper, quia nullis voluptatibus nullisque deliciis frangebantur. » Quid plura? quia etiam equi fortissimi, qui alias sunt audacissimi ad pugnandum et procul odorant bellum, ex præsentia equæ distrahuntur a pugna. Propter hanc ergo causam ipsæ Amazones, ut historiae narrant, nullum virum in sua recipiebant acie.

Patet igitur ex jam dictis mulieres a rebus bellicis excludi debere.

## CAPUT VI.

*Assumit alteram partem quod non est conveniens mulieres exponi debere bellicis rebus; et respondet ad argumenta in contrarium facta.*

Sed quia motivum dictorum Philosophorum probabilitatem habuit, sicut in argumentis apparuit; solvendæ sunt ipsorum rationes, et cum reverentia pertractandæ. Quod enim ponitur exemplum de avibus rapacibus, et quibusdam bestiis quod audaciores et fortiores sunt feminae ad pugnandum, et capiendum prædam: ergo similiter erit in mulieribus: ad hoc est responsio, quia non est simile de avibus et bestiis et mulieribus. Ut enim dictum est supra, homo naturaliter est civilis et œconomicus, et in governa-

tione suæ familiæ proprius actus est mulieris sive in nutritione filiorum, sive in honestate servanda in domo, sive in provisione victualium : quæ omnia fieri non possent, si rebus bellicis intenderent. Et propter hæc natura ipsam sic disposuit, ut ab ipsa pugnandi occasio tolleretur : quia, ut Philosophus vult in libro *De animalibus*, mulieres debiliora habent corpora quam viri, et sunt minoris caloris, et sola illa membra grossiora in eis videmus quæ ad actum ordinantur generationis et gestum, ut venter et nates, ac ad nutrimentum mammillæ. Omnia autem alia habent subtiliora et debiliora quam viri, et minus nervosa, in quibus fortitudo consistit, ut sunt pedes, crura, manus et lacerti ; et sic de singulis membris ubi fortitudo fundatur, ut dictum est supra.

Quod vero dicitur quod fortitudo augetur in eis per exercitium, hoc est verum : ergo pugnare expedit eis : ad hoc responderi potest quod sola fortitudo non sufficit ad vincendum in pugna, ut probat Vegetius *De re militari* in principio ; sed astutia bellandi, qua mulieres carent. Rudis enim et indocta multitudo exposita est semper ad necem. Sic autem brevitatis corporum Romanorum adversus Germanorum proceritatem prævaluit, ut ibidem dicitur. Et præterea mulieres non debent actibus exponi ex quibus a virtutibus excludantur ; quod contingit, si rebus bellicis deputentur, propter incentivum libidinis quod in eis est et respectu sui, et ex consortio viri : propter quod natura mulieri multa frena providit, ut est verecundia, quæ est præcipuum vinculum ejus, ut Hieronymus scribit ad Cellantiam virginem, talaris vestes, annulus in digito, servitus viri : sic enim Scriptura sacra Gen. iii, 16, testatur : *Quoniam sub viri potestate eris*. Bellicis autem rebus intendere in republica libertatem meretur : unde et militibus jura gentium speciales apices privilegiorum concedunt.

Quod autem tertio objicitur super idem medium de fortitudine ad bellandum, locum haberet, si sola fortitudo esset causa victoriæ, et aptitudo membrorum esset in feminis ad pugnandum, sicut in viris ; cujus contrarium est probatum. Et præterea natura mulieris est a viro pati, et non agere ; pugnare autem summa est actio, cum sit actus fortitudinis, qui solus si laudabiliter exerceatur, meretur coronam.

Dicendum est ergo simpliciter mulierem non debere exponi bellicis rebus, sed in domo quiescere, curam gerere rei familiaris, ut dictum est supra : unde et in hoc Salomon in fine Proverb., fortitudinem mulieris commendat, speciale de ipsa componens canticum, sub litteris Hebraici alphabeti, ac totum circa eam ad domesticam referens actionem. *Mulierem*, inquit Prov. xxxi, 10, *fortem quis inveniet? Procul et de ultimis finibus pretium ejus* ; quasi multum sit reverenda, si habeat quæ sequuntur. Unde primo ponit artem filandi. *Quæsiit*, inquit, *lanam et linum, et operata est consilio manuum suarum* ; per hoc volens ostendere quod istud sit proprium earum officium : propter quod et in *Gestis Caroli Magni* scribitur quod (a) filiabus suis, quas intime dilexit, eolo et fuso mandavit insistere, et operosas esse. Uterius Salomon subjungit alios actus mulieris

qui referuntur ad domesticam domum, ut est filiorum curam habere, familiam dispensare, suæ domui providere, amicos viri sui honorare, ad defectus ejus supplere : quæ sunt propriæ operationes conjugis, et ad bona matrimonii pertinentes, ut de Abigail uxore Nabal Carmeli scribitur, sicut patet in I Regum. Sed quia talis sollicitudo multas habet perturbationes, ut de Martha dicitur in Luca ix, 41 : *Martha, Martha, sollicita es, et turbaris erga plurima* ; cum talia sint objectum virtutis, et fortitudinis : ideo dictus Sapiens talem mulierem *fortem* vocat, non quidem fortitudine ad opera bellica, sed ad patienter gubernandam familiam, ut superius est ostensum.

## CAPUT VII.

*Refert aliam opinionem dictorum Philosophorum quantum ad principatum, quem volebant esse perpetuum : circa quam disputat ad utramque partem.*

Est autem et alia conditio quam Philosophus in II *Polit.*, attribuit politiæ dictorum Philosophorum : videlicet magistratus ad regimen juxta morem Atticæ regionis, cujus caput sunt Athenæ, post mortem videlicet Codri regis : quos quidem magistratus romana respublica senatores vocabat. Hos prælati Philosophi voluerunt esse perpetuos, et quoscumque officiales in sua politia constitutos : quorum motivum fuit imitatio naturæ, ut Aristoteles eis imponit. Videmus enim in terra quod partes ejus eodem modo semper se habent, ut in mineris contingit : quia minera auri in eadem parte terræ semper generat aurum, et minera argenti argentum : unde in Job xxviii, 1, dicitur : *Habet argentum venarum suarum principia, et auro locus est in quo conflatur*. Ex hoc ergo principio sic concludunt quod si locus auri nunquam mutatur, et argenti, ut fiat locus plumbi vel ferri ; nec locus plumbi vel ferri, ut fiat locus auri vel argenti : sic et in principatibus contingere debet : quia nec principes nec sui officiales mutari debent ut fiant aliquando subditi, vel quod subditi fiant officiales vel principes : quia ars imitatur naturam in quantum potest.

Amplius autem ad hoc idem probandum sic argumentum assumi potest. Quia, ut Philosophus dicit in principio suæ *Metaph.*, experientia facit artem, et inexperientia casum : et Vegetius *De arte militari*, « Scientia, » inquit, « rei militaris nutrit audaciam. Nemo enim facere metuit quod se bene didicisse confidit. » Ex his autem arguitur quod si fiat mutatio rectorum vel principum seu magistratus, interdum assumitur inexpertus, ex quo multi contingunt errores in politia.

Rursus ad idem. Talis vicissitudo regimini derogat, ut dictum est supra in II libro : quia datur occasio subditis non obedientiæ ex spe evadendi manum principis, vel veniendi ad dictum principatum : et sic motivum dictorum Philosophorum, Soeratis videlicet et Platonis, videtur consonum rationi.

Sed e converso fuit motivum sapientum urbis sive romanæ reipublicæ : quia post expulsionem

(a) « Filias lanificio assuescere, eoloque ac fuso (ne per otium torpescerent) operam impendere, atque ad omnem honestatem erudiri jussit. »

Chronographus apud Vincent Bellov. lib. XXIV *Specul. Hist.* c. 1

regum statuerunt consules : unde in I Mach. viii, 16, scribitur inter alia commendabilia de Romanis quod *committunt uni homini magistratum suum per singulos annos dominari universæ terræ suæ, et omnes obediunt uni*. Causam autem assignant historiæ, ut nec insolens diu maneret, et moderatior cito succurreret. Quam quidem causam Philosophus etiam tangit in II *Polit.* : quia mutare aliquando principatum ad dignitatem, magistratus personis idoneis distribuere, causa est majoris pacis in civitate, et in politia quacumque.

Alia autem causa assumitur ex uno principio Philosophi V *Ethic.*, ubi dicitur quod principatus virum ostendit. Contingit enim interdum personam assumptam ad dignitatem esse hominem virtuosum in gradu suo; sed postquam statum principatus accepit, elevatur in superbiam et tyrannus efficitur, sicut accidit de Saule; de quo dicitur in I Reg. quod quando assumptus est in regem, inter filios Israel non erat melior vir illo, et solis duobus annis in sua permansit innocentia. Postquam autem factus tyrannus et Deo inobediens, dictum est ei per Samuelem ibid. xv, 23 : *Quia abiecasti sermonem Domini, et non obedisti voci ejus, abiecit te Dominus ne sis rex*.

Amplius autem gradus quidam est in natura hominis quantum ad virtutes et gratias. Quidam enim sunt ad subjectionem dispositi, sed ad regimen minus valent; quidam autem e converso. Ex tali ergo opinione, quia bonus est subditus assumptus, et male regens, si perpetuetur cum principatu, est causa scissuræ in civitate<sup>1</sup>, conveniens est mutare rectores.

Rursus. Appetitus honoris inest homini : unde Valerius Maximus dicit quod « nulla est tanta humilitas, quæ hac dulcedine non tangatur : » et hinc sequitur aliud, scilicet quod est superioris impatiens. Dare ergo principatum uni soli est causa seditionis in multitudine. Et ista est etiam ratio Aristotelis in II *Polit.* : ubi dicit quod Socrates semper facit eosdem principes : quod seditionis est causa apud nullam dignitatem possidentes. Videntes enim se omnino statu carere, si contingat eos esse viriles et animosos, ad discordias nituntur civium. Propter quod Valerius Maximus refert de Fabio duce romano lib. X, de quo dictum est supra quod cum sæpius consulatum habuisset, et in sua progenie talis dignitas a longo tempore per successionem continuata esset, id egit cum populo ut aliquando vacationem ejus honoris Fabiæ genti darent. Laudabilis igitur politia est, in qua secundum merita unicuique civi vicissim distribuuntur honores, ut antiqui fecerunt Romani, quam etiam Philosophus magis commendat.

### CAPUT VIII.

*Hic declarat melius esse in politia non perpetuare rectores; et respondet ad partem oppositam : ubi etiam dicit, nullum in Lombardia habere dominium nisi per viam tyrannicam, Duce Venetiarum excepto.*

Sed quod pro se inducunt de mineris præfati Philosophi, non habet similitudinem, sive neces-

sitatem in arguendo, eo quod mineræ sive auri, sive argenti, sive cujuscumque metalli recipiunt impressionem a corpore cœlesti, quæ est ad unum determinata : unde sicut ficulnea semper ficus producit, et non alium fructum propter eadem principia quæ sunt in ipsa, et mediante influenza cœlesti; ita et eadem pars terræ sic disposita ut si minera auri, semper faciet aurum. Sed non sic est de voluntate humana, quæ sideribus non subjicitur, ut Ptolomæus probat in *Centiloquio*, quia volubilis est : unde actus humani ponuntur a Philosopho in *Ethicis* de contingenti materia, et inde variantur de bono in malum, et e converso; et ideo perpetuatio est periculosa.

Sed quod postea dicitur de experientia, hoc supponi debet, ut eligatur expertus qui possit et sciat regere, et cives dirigere ad virtutem : alias si eligitur unus insufficientis pretio vel amore, jam politia est corrupta. Formam enim eligendi tradit ille Jetro Moysi cognato suo, ut in Exod. xviii, 21, scribitur, loquens de principibus et assessoribus populi. *Provide, inquit, viros potentes de omni populo, in quibus sit veritas, et qui oderint avaritiam; et constitue ex eis tribunos et centuriones, quinquagenarios et decanos, qui judicent populum*. Philosophus etiam in V *Ethic.* dicit quod non similis hominem principari in quo est natura humana tantum, sed illum qui est perfectus secundum rationem : quia si aliter fiat, assumptus ad principatum dat sibi plus de bonis et tyrannus efficitur

Quod autem inducitur ultimo de derogatione regiminis, si principatus immutetur<sup>2</sup>, hic attendendum est, sicut tactum est supra in II lib., quod regiones diversificentur quantum ad homines et in modo vivendi, sicut cetera viventia secundum aspectum cœli, ut Ptolomæus tradit in *Quadripartito*. Si enim plantæ transferuntur ad aliam regionem, ad ejus naturam convertuntur : simile est de piscibus et animalibus. Sicut ergo de viventibus, ita et de hominibus. Gallici, enim qui se transferunt in Siciliam, ad naturam applicantur Siculorum : quod quidem apparet, quia ut narrant historiæ, jam ter est populata dicta insula de præfata gente. Primo enim tempore Caroli Magni; secundo ad (a) trecentos annos tempore Roberti Guiscardi; et temporibus nostris per regem Carolum : qui jam induerunt<sup>3</sup> ipsorum naturam. Hoc ergo supposito, dicendum est, quod regimen et dominium ordinari debet secundum dispositionem gentis, sicut ipse Philosophus in *Politicis* tradit. Quædam autem provinciæ sunt servilis naturæ; et tales gubernari debent principatu despoticæ, includendo in despoticæ etiam regale. Qui autem virilis animi, et in audacia cordis et in confidentialia suæ intelligentiæ sunt, tales regi non possunt nisi principatu politico, communi nomine extendendo ipsum ad aristocraticum. Tale autem dominium maxime in Italia viget; unde minus subjeçibiles fuerunt semper propter dictam causam. Quod si velis trahere ad despoticum principatum, hoc esse non potest nisi domini tyrannizent. Unde partes insulares ejusdem, quæ semper habuerunt reges et principes, ut Sicilia, Sardinia, et Corsica, semper habuerunt tyrannos. In partibus autem Liguriæ, Æmiliæ et Flaminia, quæ hodie Lombardia vocatur, nullus

<sup>1</sup> Al. : « in civitatem. »

<sup>2</sup> Al. : « imitetur. »

<sup>3</sup> Al. : « imbuerunt. »

(a) Robertus Guiscardus ann. 1085 obiit,

S. Thomas de Aquino ann. 1274 vita functus est : unde non scripisset : « ad trecentos annos tempore Roberti Guiscardi.

principatum habere potest perpetuum, nisi per viam tyrannicam, Duce Venetiarum excepto, qui tamen temperatum habet regimen: unde principatus ad tempus melius sustinetur in regionibus supra-dictis. Quod enim dicitur derogare politiæ, non est verum, si eligantur idonei: alias, ut dictum est, corrumpitur politia. Idoneos autem Aristoteles tradit in *Politicis* lib. IV, mediocres civitatis, hoc est nec nimis potentes, quia de facili tyrannizant, nec nimis inferioris conditionis, quia statim democratizant. Cum enim se in alto considerant, sui immemores sicut ignari regiminis, in erroris barathrum submerguntur, vel de improvida cura ad subditos, vel de præsumptuosa audacia ad aliorum gravamina: unde et politia corrumpitur et inquietatur. Assumendi igitur sunt rectores vicissim in politia, sive consules, sive magistratus vocentur, sive quocumque alio nomine, dummodo idonei reperiantur. Amplius autem nec periculum imminet, quia judicant secundum leges eis traditas, quibus sunt per iuramentum astricti; unde non est materia scandali puniendo, quia tales leges ab ipsa multitudine sunt institutæ. Rursus nec dominio derogat, si leviter puniat secundum naturam gentis subjectæ: quia aliquando in talibus regionibus melius politia servatur dissimulando culpam, vel dimittendo pœnam. In quo factò epicielis<sup>1</sup>, de qua Philosophus loquitur in V *Ethic.*, videtur locum habere, quæ iustum legale diminuit. In quo etiam regimine regulæ illius summi pastoris sunt attendendæ, videlicet B. Gregorii in *Registro pastorali*, in quibus modum correctionis tradit secundum personarum statum et qualitatem.

## CAPUT IX.

*Hic disputat de communitate bonorum quantum ad possessiones, quam quidam philosophus nomine Pheleas dicit debere adæquari in omnibus; et quod est falsum quod Lycurgus philosophus senset.*

Et quia opiniones dictorum philosophorum versabantur circa communitatem possessionum, congruum videtur de aliis dicere qui circa ipsas suam constituerunt politiam. Duo enim fuerunt philosophi, qui considerantes litigia generari in civitatibus ex eo quod unus abundat et alter caret, voluerunt in sua politia adæquare in civitatibus suis possessiones. Unus fuit Pheleas Chalcedonius, de quo Philosophus loquitur in II *Polit.*: alter fuit Lycurgus Spartanorum regis filius, qui Lacedæmoniis jura constituit, ut tradit Justinus, ut æquata possessio neminem potentiorum altero redderet. Modus autem quem teneri voluit Pheleas in adæquando, narratur a Philosopho, ut fieret videlicet in ipsa constitutione civitatis habita consideratione multitudinis civium et camporum: alias difficile judicabat: et ut hoc perseveraret, ordinabat matrimonia contrahi inter majores et minores; et sic per hoc tollebantur jurgia, movebantur<sup>2</sup> injuriæ, auferebantur arrogantiae vel superbiendi materia. Ad hoc etiam movebat exemplum in aliis politiis. Quia ubi est bonorum temporalium inæqualitas, contingit sæpius perturbatio: ibi enim est invidendi occasio; inde cupiditas oritur, quæ, juxta Aposto-

lum, *radix omnium malorum est*. Ipse etiam Lycurgus propter hanc causam in legibus quas Lacedæmoniis tradidit, pro ipsorum conservanda politia, artificiales subtraxit divitias, sive numismata in commutationibus rerum venalium, in solis naturalibus divitiis tales permutationes relinquens.

Sed hanc positionem Philosophus reprobatur in II *Polit.*, ostendens hanc adæquationem omnino impossibilem et per consequens contra rationem. Et primo ex parte humanæ naturæ, quæ non semper in filiis multiplicatur æqualiter: quia contingit unum patremfamilias habere multos filios, alium autem nullum. Quod ergo isti duo haberent æquales possessiones, esset impossibile: quia una familia deficeret in victualibus, altera superabundaret: et hoc esset contra provisionem naturæ: quia quæ familia plus multiplicatur in prolem, amplius cedit ad firmamentum politiæ propter ipsius augmentum, quam quæ in generatione prolis deficit; et quodam jure naturæ magis meretur a republica sive politia provideri.

Amplius autem. Natura non deficit in necessariis, ut dictum est supra. Ergo nec ars, quæ civilis est regiminis. Sed hoc contingit, si in familiis adæquantur possessiones; quia videlicet cives moriuntur penuria, unde politia corrumpitur.

Non tantum autem ex parte naturæ humanæ sequitur inconveniens adæquare possessiones, sed etiam ex gradu personæ. Est enim differentia inter cives, quemadmodum inter membra corporea, cui politia est superius comparata. In diversis autem membris virtus diversificatur et operatio. Constat enim quod majores expensas cogitur facere nobilis quam ignobilis: unde et virtus liberalitatis in principe magnificentia vocatur propter magnos sumptus. Hoc autem fieri non posset ubi possessiones essent æquales: unde et ipsa vox evangelica testatur de illo patrefamilias sive rege qui peregre profectus est, qualiter servis suis bona distribuit, sed non æqualiter; immo uni dedit quinque talenta, alteri duo, alii vero unum, unicuique secundum propriam virtutem.

Amplius autem nec ipse ordo naturæ hoc patitur, in quo divina providentia res creatas in quadam inæqualitate constituit, sive quantum ad naturam, sive quantum ad meritum. Unde ponere æqualitatem in bonis temporalibus, ut sunt possessiones, est ordinem in rebus destruere, quem Augustinus respectu inæqualitatis definit *De civitate Dei*: est enim ordo « parium et disparium rerum sua cuique tribuens dispositio. » Et ex hoc Origenes in *Periarchon* reprehenditur, quia omnia dixit æqualia ex sui natura, sed facta sunt inæqualia propter defectum nostrum, hoc est propter peccatum. Non ergo ex adæquatione possessionum vitantur litigia, quin potius augmentantur: dum in hoc destruitur sive tollitur jus naturæ, quando subtrahitur indigenti qui plus meretur.

Item quia contra rationem est esse omnia æqualia in politia, cum omnia Deus instituerit *in numero pondere et mensura*, ut in lib. Sapient., dicitur, quæ gradum inæqualitatis ponunt in entibus et per consequens in civilibus sive politicis.

<sup>1</sup> Al.: « epicheiæ, epiciæ. »

<sup>2</sup> Al.: « amovebantur. »



## CAPUT X.

*Agitur rursus de politia Platonis et Socratis quantum ad genera hominum qui requiruntur in ea, quæ sunt quinque; ubi multum disputatur de numero bellatorum.*

Sed redeundum est ad politiam Socratis et Platonis: quia quædam alia constituerunt in ipsa præter ea quæ dicta sunt supra. Suam enim civilitatem distinxerunt in quinque genera hominum: videlicet in principes, consiliarios, bellatores, artifices et agricolas. Quæ quidem divisio satis videtur sufficiens ad perfectionem civitatis, quia omnia genera hominum comprehendit quæ ad regimen politicum pertinent.

Sed Aristoteles in hoc prædictos Philosophos videtur reprehendere. Tum quia numerum ponebant bellatorum excedentem proportionem civitatis: ponebant enim mille bellatores ad minus vel ad plus quinque millia. Secundum quod Philosophus reprehendit, est, quia sic distinguebant bellatores ab aliis, quod nullo modo se exponerent bellicis rebus alii cives a bellatoribus.

Sed quantum ad primum non videtur determinatus numerus posse poni eo quod omnes civitates non sunt æqualis potentia: et virtutis: unde consideranda est multitudo populi in civitate, et secundum numerum constituere bellatores. Item latitudo regionis, ut sit sufficientia pascuorum et victualium: unde Aristoteles dicit in II *Polit.*, quod si tanta debeat esse multitudo bellatorum in civitate, oportet ipsam adæquari civitati Babylonis, quæ videlicet excedit in gentis multitudine et in magnitudine camporum. Sed si attendimus ad ipsum numerum bellatorum, qui est mille, ut historiae tradunt, secundum unam expositionem, politia Platonis et Socratis cum civitate concordat Romuli primi constructoris urbis, a quo et istud nomen miles originem habuit: unde et miles dicitur electus ad bellandum ex numero mille, quia mille erant tunc expediti bellatores ab ipso electi ad pugnandum contra adversarios urbis, ut contra Sabinos primo, ulterius vero contra Samnites: et sic in hoc concordabat Romulus cum Socrate et Platone, licet primus conditor urbis per longum tempus Philosophos antecesserit sæpe dictos. Alio modo dicitur miles quasi unus ex mille, juxta quod Scriptura volens commendare sanctum David de constantia et fortitudine: *Dilectus*, inquit, Cant. v, 10 *meus candidus et rubicundus, electus ex millibus* (a): ut sic importet quamdam excellentiam in pugnando: quos Scriptura sacra expeditos vernaculos appellat in Genesi. Sic enim scribitur de Abraham quod contra quatuor reges processit cum trecentis decem et octo expeditis vernaculis, qui quinque reges devicerant capto Loth nepote ejusdem Abraham cum tota familia. Unde satis credibile videtur quod majorem habuit multitudinem ad pugnandum; sed isti nominantur propter ipsorum probitatem ad invadendum. Sic et Gedeon trecentos elegit de populo Israelitico ad pugnandum contra castra Madianitarum, ut in libro Judicum traditur, quos probavit divino mandato esse aptiores ad pugnam,

ex eo quod transiens populus quasdam aquas, omnibus ex populo hibernis ex aquis prædictis et genua flectentibus, illi soli lambuerunt ut canes, non poplite flexo. Tales igitur sic electos non videtur possibile mille in civitate reperiri; et multo minus quinque millia: et sic vera est sententia Aristotelis contra Socratem et Platonem, et sic intendant.

Secundum vero quod Aristoteles improbat, est de distinctione bellatorum, quasi alii cives sint immunes a bello, ut consiliarii et artifices: quod non est verum, ubi sit aggressus multitudinis hostium contra cives. Quamvis autem bellatores sint aptiores ad pugnam, quia experientiam habent et pugnandi artem et, ut ait Vegetius, « nemo facere metuit quod se bene didicisse confidit: » impetum tamen multitudinis sustinere non possent, nisi cum multitudine. Sic enim Judas Machabeus defecit, quia cum paucis pugnavit contra multitudinem Bacchidis principis Demetrii regis, recedente ab ipso multitudine sua gentis, sicut patet in I lib. Machabæorum. Hinc est etiam quod quamvis Saul elegerit tria millia virorum ad defensionem sui regni (duo enim millia erant cum ipso, ubi ipse curiam tenebat, ut in Magmas et in Bethel, mille vero cum Jonatha in domo propria, ut in Gabaa Benjamin:) nihilominus contra multitudinem hostium multitudine usus est: unde cum Naas Ammonites rex ejusdem regionis obsideret cum multitudine Jabes Galaad, trecenta millia de filiis Israel congregavit in castris, et triginta millia de tribu Juda ad expugandum Ammonitas præfatos, ut scribitur I Reg.

Sed advertendum quod militaris disciplina Vegetii in III lib. secundum sententiam Lacedæmoniorum, sive Atheniensium, restringit numerum at in exercitu armorum videlicet ad decem millia peditum et duo millia equitum, vel ad plus vigintimillia peditum et quatuor millia equitum, ostendens magnam multitudinem esse damnosam, tum quia difficiliter regitur, tum quia laboriosius in victualibus providetur. Ibidem etiam cum exercitu computat non solum tyrones, sed etiam auxiliatores, quod ad alios cives referimus, qui non erant militiae deputati. Et præterea idem Vegetius in I lib. ubi docet eligi tyronem, ad agricolas et artifices magis remittit, eo quod assueti sunt ad labores.

Assumendi sunt igitur cives ad pugnam non solum bellatores distincti in quocumque genere sint, sive consiliarii, sive artifices sive agricoltures, dummodo dispositionem corporis habeant, unde non impediuntur a pugna, ut sunt homines corpulenti et ponderosi ad ambulandum, cives nimis deliciis dediti, homines etiam quos emeritos habebant antiqui Romani, homines etiam provecæ ætatis quos divina lex prohibet a pugna. Hos excludere a pugna dignum videtur, ut patet in Deuteronomio, quos lex prædicta prohibet, instante exercitu et acclamante prætere: ubi quatuor genera hominum ponuntur, qui a pugna excipiuntur ibidem, videlicet qui adificasset novam domum et non ea fuisset usus: vel qui plantasset novam vineam; qui in proximo uxorem duxisset: quæ quidam tria intentionem distrahunt a pugnante, et ex hoc efficitur minus audax. Quartum genus est nimis timementium mortem, qui a sacra Scriptura forni-

(a) Negari forsitan posset hæc de sancto David sacram scripturam dixisse.



dolosi vocantur. Vegetius etiam in principio primi libri, inter artifices quinque genera hominum dicit excludenda a castris; videlicet piscatores, aucupes, dulciarios, idest qui deliciis intendunt, lenciones, idest qui molles sunt et flexibiles; item qui videntur intendere ad genesia, idest ad opera muliebria, ut sunt opera textrina, sive venerea.

Ceterum de ordine castrorum, sive exercitus, et ipsius rectoribus seu motoribus, non est præsentis negotii: quia nostrum non videtur congruum docere pugnare, vel de ejusdem pugnae gymnasiis agere, sed solum veram tradere politiam: per quam si ad veram pertingamus, disponimur ad vivendum secundum virtutem, et quasi participamus cœlestem, quæ est civitas Dei, de qua gloriosa dicuntur.

## CAPUT XI.

*Hic declarat de politia Hyppodami Philosophi, qui reprehenditur quantum ad genera hominum, quia ponit solum tria, et quantum ad numerum populi.*

Præter has autem quamvis Philosophus in II *Polit.*, multas pertractet politias, inter alios tamen a supradictis, qui multum de politia tractaverunt, fuit Hyppodamus philosophus Eriphontis filius, sed Milesius patria, unde Thales unus ex septem sapientibus originem traxit. Hic enim suam politiam ex multis, et ad plura ordinavit. Et primo quidem in ea numerum multitudinis determinatum tradidit civitati <sup>1</sup> circa decem milia virorum: quem numerum sufficientem putabat in omni civitate: cujus forte fuit motivum quod superius traditum est de castris, quia melius gubernantur, et in victualibus potest per rectores congruentius provideri. Dictam autem multitudinem ad tria genera hominum reducebat; ad bellatores videlicet, artifices et agricolas. In qua quidem divisione sic ponebat eos esse distinctos quod nec bellator ad cultum terræ, nec ad negotiationes, nec agricola ad arma transiret. Horum autem generum hominum sufficientiam dicebat esse, quia ordinantur ad conservationem humanæ vitæ. Agricola quidem quantum ad victum, artifices autem quantum ad tegumentum, sed bellatores ad bonorum suorum firmamentum sive custodiam. Sed si attendamus ad ea quæ dicta sunt supra, et infra sunt dicenda, faciliter errorem dicti Philosophi percipere possumus ex jam dictis: quia in politia determinatum numerum dare non possumus, sed multiplicatur in ea populus vel propter amœnitatem loci, vel propter famam regionis, vel propter fecunditatem gentis. Rursus videmus civitates quod quanto magis abundant in gente, tanto majoris potentia et famosiores judicantur: nec propter hoc impediuntur in regimine, si per officiales bene disponantur et rectores; quia pœnæ

in legibus institutæ hominum arcet malitiam, et sunt in politia medicinæ quædam, ut tradit Philosophus in II *Ethic.* Nec iterum distingui sic debet, quin cum opportunitas hoc requirit, illa tria genera sint admixta: quia artifices et agricolæ aliquando sunt bellatores; cum de istis duobus generibus hominum præcipue eligantur tyrones, ut dictum est supra ex verbis Vegetii; et e converso dicimus de bellatoribus ad artifices et agricolas, cum de eis sæpius assumantur. Sed et sua divisio de solum tribus generibus hominum non est sufficiens: quia relinquit consiliarios et sapientes, qui sunt principalis pars politia, sine quibus convenienter politia ipsa non regitur: ut enim historia tradunt, Demosthenes Atheniensis præfatos viros peritos, vel quoscumque senes expertos sic se habere ad politiam definiit ut canes ad gregem, quorum custodia arcetur lupi: sic et se habent sapientes et advocati in civitatibus, quia canes sunt populi. Unde Tullius scribit in libro *De officiis*, quod Solon plus profuit reipublicæ civitatis Atheniensis, quæ legibus et institutis ejus erudita fuit, quam victoria Themistoclis, quod bellum gestum fuerat consilio magistratus sive senatus instituti ab eodem sapiente, qui fuit unus de septem: unde et in *Ecccl.* ix, 18, scribitur: *Melior est sapientia quam arma bellica* Valerius (a). Maximus de Aristotele refert quod cum esset vitæ supremæ, reliquias senilibus atque rugosis membris in summo litterarum otio vix custodiens, adeo valenter pro salute patriæ (b) incubuit, ut eam hostilibus armis quasi solo æquatam, in lectulo Athenis jacens eriperet: et quantum ad hoc simile in eo lib. *Ecccl.* ix, 14, scribitur de sapiente: *Civitas parva, et pauci in ea viri: venit contra eam rex magnus, et vallavit eam, extruxitque munitiones per gyrum, et perfecta est obsidio*, sicut accidit de Athenis per Philippum regem Macedonum, ut historia tradunt. *Inventus est in ea vir pauper et sapiens*, ut dicti philosophi, quorum fuit proprium mundum spernere, et quasi vitam religiosam eligere, sicut Hieronymus scribit: et postea subditur in eodem lib. quod *liberavit urbem per sapientiam suam*. Concluditur ergo ex præmissis, consiliarios non debere excludi a politia. Eodem etiam modo nec rectores, cum sint caput universitatis civilis, ex quo totum corpus dependet.

## CAPUT XII.

*Refert etiam opinionem ejusdem quantum ad possessiones, quas in tres partes dividit; et in quo salvatur sua positio.*

Sunt autem et alia quæ dictus Hyppodamus posuit in sua *Politia*, ut est de distinctione possessionum: quia in tres partes distinguebat possessiones totius regionis civitatis. Quasdam enim deputabat ad rem sacram, quæ scilicet divino cultui dedicantur, ut sunt hodie bona eccle-

integrum ab Alexandro restituta, cum prius æquata solo fuisset: cujus beneficii ab Aristotele accepti, ut memoriam conservent, stagirita festum celebrant, quod Aristotelem nuncupant, mensemque ipsum, in quem festum illud incidit, Stagiritem nominant. » Ex *Aristot. vit.*, auctore Ammonio. »

<sup>1</sup> Al.: « civitatem. »

(a) In *Parm.*: « Vegetius etiam *De arte militari*, et Valerius Maximus de Aristotele referunt, » sed nil tale igitur apud Vegetium, qui tamen artem bellicam in Xanthippo extollit, lib. III, Prolog.

(b) « Quod in commune multis profuerit, testis est urbs stagira, hortatu suasque Aristotelis in

siastica; quasdam autem assignabat communes, quæ bellatoribus dispensabantur; quasdam vero proprias, quæ agricolis debebantur. Artificibus vero nihil assignabatur, eo quod ex arte sufficienter vivere possent. Sed hæc divisio, etsi insufficienter videbatur in multis, in quantum tamen ad aliquid laudabilis erat, in eo videlicet quod divinæ reverentiæ deferebat. Quam quidem et jure naturæ et jure divino debemus: sic enim mos fuit apud antiquos Romanos, ubi viguit disciplina. Unde Genes. XLVII, scribitur quod tota terra Ægypti imminente fame tempore Joseph, in servitutem redacta est regis, præter terram sacerdotum, quæ videlicet sic erat dedicata Deo quod alienari non poterat, sicut nec hodie possessiones Ecclesiæ, nisi multum legitimis casibus. Philosophus etiam refert in sua *Metaphysica* quod Ægyptii fuerunt de primis Philosophiæ vacantibus, et præcipue in mathematicis artibus: cujus rationem assignat, quia gens illa sacerdotalis plus vacare permisit est, ex abundantia videlicet eorum quam habebant ex possessionibus eis concessis, per quæ tollitur sollicitudo in quaerendo victum. Et quamvis lex Mosaica prohibeat sacerdotibus inter fratres suos possessiones habere, plus tamen eisdem concessit, dum omnium civium possessiones in partem fructuum percipiunt, videlicet decimarum. Unde Malach. III, 10, scribitur: *Afferte, inquit, omnem decimationem, ut sit cibus in domo mea*: et de hoc quasi de opere perfectæ justitiæ se ille Pharisæus extollit in Luca XVIII, 12: *Decimas, inquit, do*, videlicet sacerdotibus et levitis, *omnium quæ possideo*. Rationabile etiam erat quod Hyppodamus de bellatoribus seu militibus ordinaverat, ut stipendia perciperent de bonis communitatis, sicut communitati deserviant. Sic etiam Romana respublica statuit, ut de publico ærario viverent. Quo quidem titulo dicit Joannes Baptista militibus, ut in Luca III, 14, scribitur: *Estote, inquit, contenti stipendiis vestris*: et Apostolus in I Epist. ad Cor. IX, 9: *Quis, inquit, militat stipendiis suis unquam?* Sed in hoc sua deliciebat politia, in quantum solis agricolis proprias assignabat possessiones: nisi forte hoc dicitur ratione agriculturæ, quia hic est proprius eorum actus: unde agricolæ proprias dicuntur possessiones habere quantum ad culturam, ceteri vero cives quantum ad usum. Alias esset imperfecta politia et defectiva. Constat enim possessiones, ut dictum est supra in II lib., inter naturales divitias computari: quæ sic vocantur, quia homo ipsis naturaliter indiget ut necessariis humanæ vitæ, et propter ipsarum amoenitatem, ad refocillationem animæ: unde primus homo primo usus est eis divino mandato, quia collocatus est in paradiso, quem Dominus plantaverat diversis arborum generibus, et operaretur et custodiret illum operatione quidem delectabili sine fatigue, ut Augustinus exponit VIII lib. *Super Genes. ad litteram*. De primis etiam libris Adæ, videlicet Cain et Abel, historia Genesis narrat quod prima ars quam didicerunt, fuit gubernare divitias naturales, quia Cain factus est homo agricola, Abel autem custos ovium, in hoc volens ostendere, ipsas esse institutas ad indigentiam vitæ. Ergo non solis agricolis erant assignandæ possessiones, ut Hyppodamus dicit. Ad perfectionem igitur politiæ requiritur ut non solum agricolæ proprias habeant possessiones, sed etiam alii, nisi eo modo quo supra est declaratum; et tanto amplius abundant, quanto in altiori culmine sunt constituti, ut supra de regibus est dic-

tum, ut jam patuit; ne forte ex nimia cura rerum temporalium distraherentur a rebus bellicis, vel ipsorum nimia amœnitate mollescant, quod cedit in politiæ non modicum detrimentum. Unde et ipse Hyppodamus proprias eis auferebat possessiones, ut solis armis intenderent.

## CAPUT XIII.

*Ponit opinionem ejusdem circa judices et assessores politiæ, ubi divisionem facit multiplicem et notabilem circa ea quæ sunt agenda per judices.*

Et quia Philosophus de dicto Hyppodamo longum adhuc sermonem fecit circa suam politiam, et de ipso multum est dictum, sub compendio accipienda est sua traditio, quæ restat. Omnium enim referre politias, cum quælibet civitas suam habeat, et diversam, laboriosum esset scribere et fastidiosum audire. Illud autem in quo multum institit dictus Hyppodamus fuit de judiciis, ut refert Aristoteles in *Polit.* Primo quidem de judiciis respectu sui: quia omnia judicia ad tria reduxit, in quibus homines litigant, videlicet vel de damno rerum, vel de injuria in personam; et hoc dupliciter, vel de offensa in verbo, vel de gestu quod dehonorationem Aristoteles appellat, secundum dictum Philosophum; vel est de læsione sive percutiendo sive vulnerando, quam Philosophus mortem vocat, quia ad mortem ordinatur, de quibus longus est sermo in jure civili; et hæc injustificationem vocat ibidem, quia contra justitiam exercentur. Distinguebat etiam de judiciis ex parte judicantium, quia ad duo genera referebat: videlicet ad patronum ordinarium; secundum vero erat provocatorium, quod ipse principale vocat, in quo erat appellationis refugium: et istud, ut Philosophus narrat in II *Polit.*, volebat constitui ex senioribus electis civitatis, qui male judicata revocarent, quos Tusci antianos vel priores vocant, et ad hoc sunt inventi. Interdum autem est syndicus constitutus ad idem, sic nominatus quasi curam gerens politiæ, ne lædatur per injustitiam, ut faciunt collegiorum economi.

Item statuit dictus Hyppodamus in sua *Politia*, in utroque prætorio tam ordinario quam principali, ut judicia fierent sine collectione sapientum, sed quilibet scriberet singillatim in pugillaribus de sententia ferenda suum consilium, quam ordinario vel judici appellationis secreto porrigeret: cujus causam Aristoteles assignat, ne forte timore civium dejeraret et declinaret a vero: quem modum hodie politia Tuscorum observat ponendo fabam sive denarium in pixidibus deputatis ad affirmativam vel negativam super rebus agendis pro republica, sive pro condemnando, sive pro absolvendo civem.

Item statuit idem Hyppodamus in sua *Politia* quasdam leges pietate plenas, et juri naturæ consentaneas circa quædam genera hominum. Primo quidem quantum ad sapientes: ut si ex eis aliquis ordinaret expediens civitati vel castro, honorem consequeretur juxta meritum operis, sicut factum est Joseph per Pharaonem, ut in Genesi scribitur, et sic accidit Mardocheo per Assuerum; et hoc propter beneficia quæ uterque contulerat, unus quidem regioni, alter vero principi. Hoc idem etiam de bellatoribus præcipit, ut si aliqui eorum morentur in bello ob de-

fensionem patriæ et bonum civitatis, ipsorum nati acciperent cibum de ærario publico. In quo quidem Romana respublica maxime conatum adhibuit victoriosos milites honorare sive in morte sive in vita, ut historiæ tradunt; sed præcipue in filiis; quia in eis, cum sint ipsorum similitudo, satis perpetuatur memoria, ut verum sit quod in Ecclesiastico xxx, 4 scribitur: *Mortuus est enim, et quasi non est mortuus; similem enim reliquit post se, videlicet in beneficio adepto causa patris.*

Item statuit quod totus populus, videlicet tam bellatores quam artifices, quam etiam agrico'æ, principem eligerent: nolebat enim principem per successionem, quemadmodum pro majori parte observant civitates Italiæ.

Item statuit quod principes de tribus haberent curam præcipue: videlicet de rebus communibus, de peregrinis et orphanis: orphanos vocans omnes impotentes, qui non possunt sua jura consequi. Quod et lex divina specialiter præcipit, eo quod eosdem alii de facili lædunt propter impotentiam resistendi.

Ista sunt igitur quæ de politia tradit idem Philosophus. Et quamvis idem Philosophus in II *Polit.*, ipsam reprehendat in multis quæ disputabilia sunt in utramque partem, sicut actus humani, cum sint de materia contingenti; multa tamen laudabilia scribit, et quæ cum politia Romana concordant, sicut infra videbitur. Et hæc de ipso intantum ad præsens sint dicta.

#### CAPUT XIV.

*De politia Lacedæmoniorum, quam reprehendit circa regimen servorum et mulierum, et circa bellatores.*

Nunc igitur ad alias politias procedendum, quas Philosophus refert in prædicto libro II, ut Cretensium et Lacedæmoniorum, quæ claræ videbantur et ex fama regionis, et ipsarum antiquitate, et earum auctore. Et licet in multis Aristoteles commendat politiam prædictam, multa tamen ibidem reprehendit. Primo quidem de remissione quantum ad servos, quia non ut subditos sed ut amicos eos habebant, et inde lasciviebant et efficiebantur elati, et concitabant rixas in confinibus Lacedæmoniorum contra tyrannos, ut de eis illud competeret quod in Proverb. xxix, 21, dicitur: *Qui delicate a pueritia nutrit servum suum, postea illum sentiet contumacem.* Item ibidem 19, dicitur: *Servus verbis non potest emendari; quia quod dicis intelligit, et respondere contemnit.* Sed forte hoc non sine ratione contingit interdum, quando imminet pugna cum hostibus: quia tunc servi manumittuntur, eo quod audaciores sunt ad aggrediendum. Unde in III libro Regum scribitur quod rex Achab per pedissequos civitatis ex mandato Dei Syriam percussit et fugavit. Propter quod historiæ Romanæ tradunt quod post conflictum ipsorum apud Cannas tanta fuit ipsorum strages quod coacti sunt relegatos et proscriptos revocare, ac servos libertate donare, ex quibus aciem fecerunt ad defensionem urbis. Quia ergo Lacedæmonii infestos habebant confines, ideo servos levius tolerabant. Lacedæmonii enim confines erant, ut ipse Aristoteles

dicit, duabus regionibus; Arcadiæ videlicet, et Mesenæ, item Thessalonica; ab alia autem parte Achaïæ et Thebæis, qui antiquitus multum viriles fuerunt. Reprehenduntur ergo Lacedæmonii, si populares, quos servos vocant, sustinent non refrenando eorum stultitias ex jam dicta causa; sed tolerari possunt, si confines sunt nimis infesti, ut dictum est supra: quia prædictis servis datur audacia ad invadendum et refrenandum malitiam hostium: et ex eadem causa dabatur libertas mulieribus, unde efficiebantur lascivæ. De hoc enim a Philosopho reprehenduntur quod suas mulieres non restringebant a discursibus quod mulieri est laqueus libidinis, ut de Dina accidit filia Jacob, sicut in Genesi cap. xxxiv, scribitur, quæ oppressa fuit a Sichem filio regis Emor, quia sine custodia discurrebat per regiones. Unde in Eccli. xxvi, 13, dicitur: *In filia non avertente se firma custodiam, ne inventa occasione, abutatur se.* Ita et de Lacedæmoniiis contingebat quod vivebant voluptuose propter nimiam libertatem. Sed eos excusat Aristoteles propter ipsorum nimia bellorum exercitia, quæ habebant Lacedæmonii: unde uxores eorum cogebantur discurrere ad gubernationem familiæ; sed si alias sustinuissent ipsorum viri, mala erat politia.

Tertium autem quod Aristoteles disputat de Lacedæmoniorum politia, est circa milites, utrum deberent uxores habere, vel mulieribus conjungi: quia si hoc est, distrahuntur a pugna. Ex actu enim carnalis delectationis mollescit animus, et minus virilis redditur, ut dictum est supra: et sententia est Platonis, ut Theophrastus refert quod militaribus rebus intentis non expedit nubere. Sed Aristoteles istud reprobatur dicto II libro, c. ix quia bellatores naturaliter sunt proni ad luxuriam. Causa autem assignatur in quodam libello *De problematibus* translato de græco in latinum Friderico Imperatori. Sed Philosophus ibidem (a) introduxit Hesiodi poetæ fabulam, quæ Martem cum Venere junxit: unde si abstineant a mulieribus, prolabantur in masculos. Et ideo Aristoteles in hoc reprobatur Platonis sententiam, quia minus malum est mulieribus carnaliter commisceri, quam in vilia declinare flagitia. Unde Augustinus dicit quod hoc facit meretrix in mundo quod sentina in mari, vel cloaca in palatio. Tolle cloacam, et replebis foetore palatium: et similiter de sentina. Tolle meretrices de mundo, et replebis ipsum sodomia. Propter quam causam idem Augustinus ait in XIII *De civit. Dei* quod terrena civitas usum scortorum licitam turpitudinem fecit. Hoc etiam vitium sodomiticum ipse Philosophus in VII *Ethic.*, dicit accidere propter vitiosam naturam, et perversam consuetudinem: et horum etiam non est convenientiam vel inconvenientiam assignare, cum non sint per se delectabilia humanæ naturæ unde medium virtutis ibi esse non potest. Et hoc concordat cum Apostolo ad Rom. 1, qui tales actus ignominia passionem appellat.

Quartum autem quod Aristoteles reprehendit in Lacedæmoniorum politia, est de inæquali divisione successionum: quia unus civis quasi totam occupabat regionem, ex re videlicet pecuniaria, sicut sæpius accidit de feneratoribus; alii vero cives expoliati fugiunt, et sic remanet politia nuda.

Item circa uxores, quia in bonis defuncti uxor

(a) Id est, II *Polit.*, c. ix.

ratione dotis duas occupabat partes, sicut accidit in Francia de medietate bonorum; residuum vero distinguebatur seu distribuebatur heredibus, et pro suis legatis. Sed quantumcumque tolleretur apud Lacedæmonios de aliis civitatibus diminutio possessionum, quantum tamen ad bellatores sustineri non debet, quia per eos civitas conservatur in sua virtute. Hoc autem Aristoteles accidisse Spartiatis, hoc est Lacedæmonis, dicit, quia ad nihilum sunt redacti propter dictam causam; cum tamen soliti essent habere decem millia bellatorum, quod non erat modicum apud veteres. Isti autem sunt illi Spartiatae, de quibus agitur in II Machab., qui propter virilitatem animi cum Judæis et Romanis specialem habebant amicitiam.

## CAPUT XV.

*Reprehendit etiam dictam politiam quantum ad leges filiorum et iudicium, movens questionem, utrum pauperes sint eligendi ad regimen politicum.*

Est et aliud quod reprehendit Aristoteles in dicta politia, de generatione videlicet filiorum. Statuerant enim in sua politia ad provocandum cives quod zelarent multiplicationem prolis, quod qui tres haberet filios, assumeretur ad dignitatem publicorum negotiorum; et qui quatuor, esset sine vectigali. Hoc autem erat causa depauperandi cives: unde fiebant impotentes ad invadendum hostes, et hoc fuit in eis causa dissensionis, unde regio diminuta est in virtute. Istud autem reprehensibile esse, in ratione fundatur: quia quod quis generet plures, non est virtutis, ex qua quis meretur præeminentiam, puta ut in bellando pro republica, quod est virtutis fortitudinis, vel in consulendo civitati, quod pertinet ad prudentiam, vel in regendo cives, quod pertinet ad justitiam, vel in conversando honeste cum eis, quod pertinet ad temperantiam. Sed quod in generando quis mereatur præmium in republica, hoc non est virtutis, quia etiam vilis homo potest habere virtutem generativam meliorem: unde quod in hoc honoretur, non est dignum, quia honor non debetur nisi propter virtutem, ut Philosophus dicit in I *Ethic.* In omnibus igitur actibus politiae inter cives æque debet esse ponderatio oneris et honoris, præterquam in prædictis: ut verum sit quod dixit David, sicut in I Reg. xxx, 24 scribitur, recuperatis spoliis de Siceleg contra Amalecitas: *Equa, inquit, erit portio euntis ad bellum et remanentis ad sarcinas.* Et quamvis lex mosaica sterili maledictionem imprecetur, ut in Exod. et Deuter. manifestum, et ad multiplicandam generationem plurium uxorum sit facta concessio; hoc non fuit ibi concessum nisi ad virtutem, referendo ad cultum divinum, sicut Augustinus dicit *De civit. Dei.*

Aliud autem quod reprehendit Philosophus in Lacedæmoniis, unde ipsorum corrupta fuit politia, circa electionem iudicum, est, quia eligebantur pauperes, qui egestate compulsi corrumpebantur pecuniis a majoribus, et inde opprimebatur justitia, et exercebantur tyrannides. Comparatione ergo istius politiae democratiam Philosophus magis commendat: quia deficientibus in civitate hominibus virtuosus ad regimen, ex quibus constituitur principatus qui aristocra-

tia vocatur, melius regitur per divites malos, ex quibus constituitur principatus qui appellatur democratia. Non ergo expedit politiae pauperes assumi et cupidos ad iudicandum. Unde narrant historiae, quod duo viri per consules Romanos fuerunt electi ad gubernandum Hispaniam, quorum unus nimis pauper, alter nimis erat avarus. Cumque delatio facta fuisset in Capitolio de ipsis, quia de hoc litigabant, Scipio Africanus de neutro consuluit, utrumque corruptorem definiens politiae sive cujuscumque regiminis, quia se habent ad civitatem velut sanguisugæ ad corpus humanum. Unde in Prov. xxx, 15, dicitur: *Sanguisugæ duæ sunt filiae, dicentes: Affer, affer;* quasi ad hoc sit principalis eorum intentio extorquere pecunias. Sed quid dicemus de Fabricio consule, qui pauperrimus fuit? ut scribit Valerius Maximus. Item de Lucio Valerio? de quo dictum est supra, qualiter in summa paupertate mortuus est.

Ad hoc autem distingui oportet de duplici indigentia: voluntaria scilicet et necessaria. Voluntariam habuit Christus et sui discipuli; et hanc habuit Fabricius, et alius consul Romanus, qui ut fideliter gubernarent rempublicam, divitiis contempserunt. Maluit enim Fabricius divitiis imperare quam locupletem fieri, ut dictum est supra de ipso. Hæc ergo non repellitur a regimine; sed secunda necessaria: quia talis raro vel nunquam bene regit vel consulit, nisi suo appetitui vacuo satis detur. Cujus ratio et differentia de utraque paupertate haberi potest ex diversitate finis. Finis autem paupertatis voluntariae est bonum honestum, sive bonum virtutis; finis vero necessariae inopiae est bonum utile, ad quod appetitus ejus est pronus. Hoc autem est cujus gratia aliquid agitur, ut Philosophus dicit. Quid ergo agunt qui talem habent indigentiam, ad hunc finem deducunt ut suum impleant ventrem et bursam. Sed qui voluntariam, sicut contemptivi diviarum, ordinant omnia ad virtutem: et ideo eum gubernant vel regunt cives, semper in eis bonum virtutis intendunt, quod est bonum humanum, ut idem Aristoteles dicit in I *Eth.* Amplius autem natura nihil frustra operatur, ut dicit Philosophus in I *De celo.* Appetitus vero ejus qui non habet divitias ex necessitate et non voluntate, semper tendit ad habendum divitias. Si ergo non consequitur, erit frustra: et ideo natura appetitus ad hoc impellit, sicut refugiens vacuum, quod sustinere non potest. Ergo difficile est vitare ut non insequatur quocumque modo ad habendum divitias. Periculosum est igitur politiae sive reipublicae pauperum assumi ad consulatum sive ad iudicatum, ut Philosophus dicit, nisi quando paupertas est placida: quia tunc est resecata cupiditas, quæ omnium malorum est radix, ut scribit Apostolus. Talis enim indigens ad regimen politiae est optimus, de quo in Eccl. ix, 14, scribitur, quod *inventus est vir pauper et sapiens, qui liberavit urbem per sapientiam suam, nulla videlicet cupiditate impeditam.*

## CAPUT XVI.

*Redit adhuc super politiam Lacedæmoniorum quantum ad ipsorum regem, reprobandum modum quem tenebant circa ipsum, ostendens inconvenientiam quæ sequebantur ex hoc.*

Post hoc autem et super Lacedæmoniorum regimen est agendum. Volunt enim historici, ut



Justinus Hispanus, magnus gestorum scriptor, dictam civitatem habuisse regem, et ipse Aristoteles in II *Polit.*, hoc affirmat quod rex esset respectu regionis et provinciæ, sicut in urbe contingit. Hoc etiam videmus in multis partibus Europæ occidentalis et borealis quod regem habent, et quælibet civitas suas leges et politiam, puta Francia, Hispania, Gallia et Germania. Lacedæmonii igitur, qui Spartiatæ sive Spartani, regem habuerunt, in quo Catellus regnavit, cujus Lyncurgus, ut tradit idem Justinus, ut pupillari ætate curam suscepit, ut in Cretensi politia patebit. Circa quod quidem regimen regis Spartiatarum seu Lacedæmoniorum procedit Philosophus in *Polit.*, reprehendens ipsum de multis. Primo de provisione regis, quia non sustinebant occasione inventa quod regimen esset perpetuum. Sed nec etiam ad vitam : modum rectorum politicorum servare volentes quod in præjudicium non modicum videbatur esse regiminis : quia in hoc enervabatur ipsorum potestas, et subditis dabatur occasio resiliendi a legibus observandis : et sic non poterant ipsorum reges facere viros perfectos et virtuosos. Propter quam causam, licet dictus Philosophus non faciat mentionem, historiæ tamen tradunt Lacedæmonios fuisse gentem indomabilem, nisi quod per dictum Lyncurgum fuit morum maturitate, ac præclaris legibus regulata, de quibus infra dicitur. Sequebatur etiam istud inconveniens : quod si quando civitas legatos mitteret, ut ipse Philosophus dicit, ad aliquam civitatem vel provinciam sive regionem, cum quidam ex eis pugnarent pro rege, quidam autem hostes forent, cognoscebatur ipsorum dissensio : unde minus erant cari, et de sua legatione raro reportabant intentum. Et advertendum quod quamvis consules in urbe annuales essent, ut dictum est supra, et assignata causa est, sicut et magistratus Athenis; tamen non sic erat faciendum de rege; immo si non sit perpetuus, valde periculosum est civibus. Dictum est enim supra quod hæc est differentia inter regem et rectorem politicum quod alter, videlicet politicus, solis legibus suæ civitatis populum judicat; regalis vero princeps ultra leges quas invenit, vel ante statuit, opportunis temporibus legibus, quas in pectore defert, utitur pro meliori exitu sui regiminis, ac suæ gentis salute. Si ergo tales principes ad tempora regnent, contingit ipsos ad judicandum esse præcipites sive contra cives qui de ipso amovendo fuerunt solliciti, sive alicujus rei adipiscendæ cupidine, vel ut amicis præsent gratiam, quam si reguassent, non fuissent facturi. Quantum autem ad primum habemus exemplum illius qui dixit in Luc. xix, 27, exponendo, ut *Littera sonat : Verumtamen inimicos illos qui noluerunt me regnare super se, adducite huc, et interficite ante me.* Hoc eodem modo, ut historiæ tradunt, Herodes occidit multos ex nobilibus Judæorum, qui conabantur sibi regnum auferre. Quantum autem ad secundum, exemplum assumi posset de villico iniquitatis in eodem Evangelio : quod extendi potest ad omnem gradum regiminis, quia gerunt vicem dominorum in terra quod et principes orbis faciunt in respectu Dei. Cum enim timent amoveri ab officio, de ærario publico dominii sui jugiter sibi amicos copulant. Ex quibus omnibus manifestum est quod maximum est periculum alicui temporali rectori conferre regendi arbitrium in faciendo justitiam. Sed si dominium est perpetuum, rector curabit de subditis sicut de re propria, ad quam quotidie

et continuo sollicitatur quasi ad suas divitias naturales, et ad indeficientem thesaurum. Propter quod sic ipse eos gubernat sicut pastor gregem, sicut hortulanus plantam, quorum qualiscumque læsio eis efficitur scandalosa.

## CAPUT XVII.

*Ex eadem causa ponit quædam in dicta politia Lacedæmonia repræhensibilia; quæ erant materia dissensionis in populo.*

Inerat etiam quædam consuetudo talibus dominis in politia Lacedæmoniorum, ex eadem causa trahens forte originem, quia tales principes de republica non curabant ut in eorum solemnitatibus et ostentationibus, primum fierent exactiones in populum : unde gravati pauperes seditionem concitabant, et sic enervabatur politia. Propter quod, ut de publico licet ærario, Philosophus in II lib. *Pol.*, magis commendat : quam quidem consuetudinem dicit in Creta fuisse, sive legem constitutam. Exactiones enim sive vectigalia multiplicata in populo, nisi pro urgenti causa, ut puta pro conservatione civitatis vel regionis, ipsam conturbant, et sunt in ea causa dissensionis et litis. Ex hac etiam eadem ratione sequebatur aliud inconveniens quod navalis princeps distinguebatur ab ipsa, ex qua sequebatur divisio animorum et per consequens dissensio politiæ : quod non accidisset, si fuisset princeps perpetuus; quia quicumque fuisset dux civitatis, fuisset ei subjectus. Facit autem mentionem de navali bello, quia Lacedæmonii multum dominabantur mari. Concluditur etiam ex eodem forte malam esse politiam prædictorum, quia viri militares non assumebantur qui essent fortes virtute, videlicet fortitudinis, quæ est una de principalibus inter quatuor, qua cives exponunt se morti pro republica, sicut Regulus apud Pœnos; sed habebant dicti milites sive principes partem virtutis, quam Philosophus increpat in sua *Politica*. Distinguit enim Aristoteles in III *Ethic.*, duplicem fortitudinem. Quarum alteram hic tangit, quæ militaris dicitur, quæ solis viribus innitur corporis; et hanc Philosophus vocat partem virtutis, sive fortitudinis, quia requiritur interdum in vera fortitudine. Alia est quæ gratia reipublicæ se exponit et non cedit, neque fugit periculis excrescentibus : de qua Seneca dicit in libro *De Dei providentia* : « Fortissimos, » inquit, « sibi pares fortuna quærit. Ignem experitur in Mutio, paupertatem in Fabricio, exilium in Rutilio, tormenta in Regulo, venenum in Socrate, mortem in Catone : » et de qua etiam dicitur in I Mach. ii, 66, per Mathathiam de filio : *Judas, inquit, fortis viribus a juventute sua sit vobis princeps, et ipse aget bella populi* : pro qua hostibus gratia reipublicæ non cedens, sed pro ea dissolutus corde in cæde oppressus occubuit. Prima autem fortitudo est imperfecta, secunda autem perfectissima virtus. Assumere igitur ad bellandum sive principem, sive quemcumque militem qui non sit fortis secunda fortitudine, non est bonæ politiæ : quia sæpius tales convertuntur in tyrannos, vel periculis cedunt, ut dictum est supra. Item ex eadem causa, quia videlicet princeps non perpetuus erat, nec ad vitam, contingebat quod non erant in politia Lacedæmoniorum expensæ communes pro bellatoribus : et inde sequebatur quod ex-



perti milites non gerebant bella populi propter defectum stipendiiorum, quibus respublica providere non poterat; sed exponebantur idiotæ, idest inexperti, plebei videlicet, et amatores pecuniarum: et hoc Aristoteles reprobatur in dicto libro, quia sæpius erant causa ruinae. Hæc igitur de politia Lacedæmonica intantum dicta sufficiant.

## CAPUT XVIII.

*Hic declarat de politia Cretensi, et differentia ejus ad Lacedæmonicam; de auctoribus dictæ politiæ, et de legibus Lycurgi.*

Pertractat etiam dictus Aristoteles in dicto libro de politia Cretensium, quam dicit traditam a Lycurgo fratre regis Lacedæmoniorum, cui nomen Polibita, patre Catilli, ut Justinus refert. Item a Minoe rege ejusdem insulæ, qui fuerunt primi legum inventores in Græcia: ad quas discendas profectus est Pythagoras, ipsasque Cretenses perdocuit, sicut idem tradit Justinus: de quibus etiam duobus Philosophus in præfato libro mentionem facit. Et licet diversæ historiæ de Lycurgo diversimode loquantur, nos tamen relationi ejusdem Justini magis insistimus, quia præclarissimus fuit historiæ scriptor antiquus: et hinc forte contigit Lacedæmonicos cum Cretensibus eandem habuisse politiam: unde Philosophus dicit Lacedæmonios in hoc imitari Cretenses, quasi ab ipsis leges habuerint.

Licet igitur in multis convenient, differunt tamen quantum ad convivia et festivitates, quia fiebant de communi ærario apud Cretenses quod dabatur ab incolis de fructibus et pecoribus quæ offerebantur in sacrificiis in his quæ ad deos pertinent, quo modo inventæ sunt decimæ.

Alia differentia erat de mulieribus, quia Lacedæmonii zelabant multiplicationem prolis, Cretenses non tantum.

Tertia differentia erat de agricultura: quia terras Lacedæmoniorum colebant servi, terras vero Cretensium colebant incolæ, per quos oblationes fiebant jam dictæ.

Quarta differentia erat, quia apud Cretenses eligebantur consules sive sapientes, quos Bosmoim, idest ornatos senes vocabant, non de omnibus, sed de majoribus, et erant plures numero; sed Lacedæmonii de omnibus, quos Aphorim<sup>1</sup> dicebant, idest procuratores reipublicæ, sed pauciores; et hoc quidem Aristoteles magis commendat quod minor erat occasio concitandi turbam.

Ratio autem dissensionis apud Cretenses, quia olim habuerunt regem, de quo dictum est supra; sed tempore Aristotelis non habebant nisi duem, quem dicti sapientes eligebant: unde quia populus nunquam habebat electionem, fomentum erat invidiae, et per consequens odii. Sed Lacedæmonii etsi haberent regem secundum beneplaciti tempus, eligebatur tamen a sapientibus, assumptus de omnibus gradibus civium: et hoc videbatur consonum rationi, ut consensu totius consilii assumpti ad regimen populi fieret rex, ut hodie commuiter faciunt civitates Italiae. Sic

<sup>1</sup> Al.: « Ephoros. »

<sup>2</sup> Lege hic et infra in hoc capitulo, et in sequenti: « Charchedoniorum, » seu Carthaginiensium.

(a) Illic graviter errat; auctor nam quæ dicit

enim civitatis nomen importat, quæ est secundum Augustinum *De civ. Dei*, hominum multitudo, aliquo societatis vinculo colligata: unde civitas, quasi civium unitas. Cum ergo nomen civitatis omnes cives includat, rationabile quidem videtur ad regimen ejus de singulis generibus civium debere requiri, prout exigunt merita singulorum, ac civilis regiminis status. Politia ergo Lacedæmoniorum quam Cretensium in hoc melior videbatur.

In multis igitur convenientes dictæ regiones, ut Philosophus tradit, in aliquibus tamen differant eo modo quo dictum est supra. Et hæc de politia Cretensium sufficiant quantum ad sententiam Aristotelis.

Sed quia de Lycurgo mentionem facit; quod historia de suis legibus narrat, congruum videtur hic interserere. Tradit enim idem Justinus hunc Lacedæmonii et Cretensibus scripsisse canones, ad quos observandos sub juramento Lacedæmonios obligavit usque ad reditum suæ peregrinationis, quam ad templum Apollinis simulabat, ibidem consulturus de ipsorum salute. Dicit ergo legislator in Cretam se transtulit, ibique moriens, suasque leges eisdem tradens, ossa sua in mari jactari præcepit, ut suis juribus daret æternitatem, quibus ipse primum documentum operis dedit. Leges igitur quas tradidit, sub compendio idem Justinus refert.

Primo quidem auri argentique materiam sustulit populo. Legendi senatum, vel creandi quos vellet magistratus potestatem permisit. Fundos omnium æqualiter inter eos divisit, ut æquata patrimonia neminem potentiorum altero redderent. Convivari omnes publice jussit, ne cujusquam divitiæ vel luxuria in occulto essent. Juvenibus vero non amplius una veste toto anno vestiri permisit, nec aliquem cultius quam alterum progredi, nec epulari opulentius. Emi singula non pecunia, sed compensatione mercium jussit. Pueros puberes non in forum, sed in agrum duci mandavit, ut primos annos non in luxuria, sed in opere agerent et labore; nihil eos causa somni sustinere; vitam sine pulmento degere, neque prius in urbem redire quam viri facti forent, jussit. Virginem sine dote nubere voluit, ut uxores non pecuniæ causa eligerentur, strictiusque viri sua matrimonia coercerent, cum nullis frenis dotis tenerentur. Maximum honorem non divitum et potentum, sed senum esse statuit; nec usquam terrarum locum honoratiorum quam senectuti statuit.

Hæc igitur sunt leges politiæ Lycurgi, de quibus Philosophus mentionem non facit, et de quibus disputare quales sint, longus esset sermo: et ideo omittitur ad præsens; non tamen contradicunt his quæ a Philosopho dicta sunt de ipso.

## CAPUT XIX.

*Hic declarat de politia Chalcedoniorum, qualiter famosa fuerit: et in quo conveniebant Lacedæmonii et Cretenses cum ipsis, et in quo differant.*

Sed et de politia (a) Chalcedoniensi<sup>2</sup> nunc est

de Politia Chalcedoniorum, Aristoteles de politia χαρκεδονίων seu Carthaginiensium assertit; non sic hallucinatus fuisset S. Thomas, qui libri II *Politiorum* Aristotelis commentum exquisitum scripsit.

agendum, quam Aristoteles multum commendat, dicens istas tres politias, Lacedæmoniorum, Cretensium et Chalcedoniorum apud Græcos magis fuisse famosas, quia magis ordinatæ fuerunt secundum virtutem. Est autem Chalcedonia civitas in Thracia sita, ubi celebratum fuit Concilium quartum sexcentorum triginta Episcoporum sub Leone I, præsentem Marciano principe : quod non fuit sine magna copia regionis facultatem habere ad provisionem tantæ multitudinis prælatorum. Hujus ergo politiam Aristoteles in II *Pol.*, præfert ceteris, quamvis præcedentes duæ eidem plurimum sunt propinquæ : cujus quidem perfectionis et bonitatis Aristoteles tria signa subjungit. Unum, quia officiales ejusdem vivebant ordinate, et sua tranquille exquebantur officia cum quadam stabilitate morum. Secundum vero quod inter eos in ministerio reipublicæ satis videbatur esse concordia, nec unquam est ibi concitata seditio talis, unde dignum esset in scripturis, vel quocumque modo de ipsa facere mentionem. Tertium autem argumentum suæ bonitatis sumit Philosophus ex quieto dominio. Nunquam enim inter eos surrexit sive dominus, sive nobilis, sive cujuscumque potentia, qui ibidem tyrannidem exerceret.

Subjungit autem Aristoteles communitatem quam habebant Lacedæmonii cum Chalcedoniis, sed Chalcedonii excellentiori modo. Primo quidem in conviviis et festis, quæ fiebant in demonstrationibus honorabilium personarum, quæ faciebant utrique per contributionem; sed Chalcedonii honestiori modo, quia sine oppressionem pauperum. Secundum autem in quo conveniebant, erat electio seniorum et regis : sed in hoc differebant : quia Lacedæmonii assumebant quoscumque de populo, quos Aphorim vocabant, et erant pauci, ad quos pertinebat electio regis; sed Chalcedonii plures eligebant et ex melioribus quos et Aristoteles principes appellabat; et erant in Chalcedonia centumquatuor : quos ideo principes nominat propter virtutem sui regiminis, in quo nemo melius principatur. Istos eosdem Philosophus Genisios, idest honoratos, nuncupat, quorum officium erat et assistere regi et ipsum eligere. Item in hoc differebant a Lacedæmoniis, quia non eligebant de quocumque genere, nec ex indifferentibus, sed ex eligibilioribus secundum virtutem : cujus rei causam assignat Aristoteles, quia de vili loco assumpti ad principatum, ut pluries lædunt politiam, et læserunt aliquando Chalcedoniam; juxta illud Poetæ :

Asperius nihil est humili cum surgit in altum.

Unde et in Ecclesiaste scribitur cap. x, 5, quasi hoc sit in magnum detrimentum regiminis : *Est inquit, malum quod vidi sub sole, et quasi per errorem egrediens a facie principis : positum stultum in dignitate sublimi et divites sedere deorsum. Vidi servos in equis, et principes ambulare quasi servos super terram.* Item non semper eligebant de eodem genere, quia natura deficit sæpius in successu suæ prolis; sed assumebant Chalcedonii ubicumque reperirent meliorem, sive principem, sive genisios, idest honoratos senes; et in hoc imitabantur politiam aristocraticam, quæ est principatus et paucioribus et virtuosis : quod quidem verum erat apud Chalcedonios, quia rex cum aliquibus hominis honoratis et virtuosis tractabat quæ agenda erant in civitate, non re-

quisito populi consensu, ut de Romanis scribitur in I Machab., quod consilium agebant trecentum viginti de multitudine, ut quæ digna sunt gerant. Quamvis autem istud rex posset cum prædictis honoratis, interdum tamen requirebat populum de quibusdam agendis : et licitum erat populo consentire, vel non, ita ut locum non haberet, nisi fuisset acceptum, postquam fuisset propositum populo : et tunc reducebatur status politia ad principatum democraticum, quia hæc fiebant in favorem gentis plebeæ. Aliquando vero committebatur aliquid paucis; et tunc principatus oligarchicus vocabatur. Eligebantur enim quinque ex divitibus, quos Aristoteles Pentarchos appellat, ad quos pertinebat illos centum quatuor assumere honoratos sive Genisios, et fuit proprium politia Chalcedoniorum : quem modum hodie observant civitates Italiae et præcipue Tusciae. Hic etiam ritus servatus fuit in urbe toto tempore quo consulatus duravit. Primo enim creati sunt consules, qui erant duo : postea dictator et magister equitum, ut historiae tradunt, ad quos pertinebat totum civile regimen; et sic principatus aristocratice regebatur. Ulterius inventi sunt tribuni in favorem plebis et populi, sine quibus consules et alii prædicti regimen exercere non poterant; et sic adjunctus est democraticus principatus. Processu vero temporis senatores acceperunt regendi potestatem, licet senatores primo a Romulo sint inventi. Divisit enim totam civitatem in tres partes : in senatores, milites et plebem : et tunc existentibus regibus, in urbe tenebant locum senum qui erant in Lacedæmonio, qui Aphorim dicebantur, sive in Creta quos Bosmoim appellabant; sive in Chalcedonia, quos nominabant Genisios, ut supra dictum est. Et quia senatores cum primis erant in multitudine, ideo tunc principatus Romanorum politicus dicebatur. Quando vero corrumpebatur politia per potentiam aliquorum, puta tempore quo exorta sunt bella civilia, tunc regebatur oligarchico principatu. Hæc pro tanto sunt dicta ad ostendendum regimen Græcorum multum concordare cum nostro, etiam tempore Aristotelis.

## CAPUT XX.

*Quomodo Aristoteles tradit in politia Chalcedoniorum documentum de electione principis, utrum dives vel pauper sit eligendus; et qualiter pauper virtuosus sustentari debeat; et utrum uni principi competant plura dominia.*

Tradit etiam documentum idem Philosophus in dicta politia Chalcedoniorum quantum ad electionem, ut non arte, vel sortialiter eligant, sed virtuosos; quia contingit aliquando talem sortem super pauperem cadere, cujus principatus est periculosus; quia, ut ipse dicit et supra est ostensum, impossibile est egentem bene principari, ac legitime negotiis publicis posse vacare. Propter necessitatem enim inhiat lucris, et resilit a virtute, nec sibi ipsi vacare potest, ut quiescat animus, seu, ut dicit Sallustius de antiquis Romanis, sit animus in consulendo liber. Tradit etiam documentum Philosophus quod et Chalcedonia dicit contingisse in sua *Politia*; ut si quando reperiretur pauper qui foret virtuosus, ad tollendam occasionem ne se lucris immergat

illicitis, ut respublica ei provideat in necessariis : unde et in omni regimine sunt instituta stipendia sive de ærario publico, ut Augustinus dicit *De verbis Domini*; ne forte dum sumptus quæritur, prædo grassetur; sive de bonis cujuslibet sub regimine constituti, ut sunt tributa et vectigalia, quæ dominis debentur quodam jure naturæ, sicut probat Apostolus ad Roman. xiii, 5 : *Ideo, inquit, et tributa præstatis : ministri enim Dei sunt, in hoc ipsum servientes.* Item in prima epistola ad Corinth. x, 7 : *Quis, inquit, militat stipendis suis unquam? Quis pascit gregem et de lacte ejus non manducat?*

Sed tunc movetur quæstio, quam Aristoteles tangit in dicta politia: utrum ad principatum semper dives eligi debeat: quia in hoc datur materia ut homines sint amativi pecuniarum quocumque modo, eo quod natura humana semper est appetitiva honoris, ut scribit Maximus Valerius. Ad quod ipse Philosophus multa dicit comparans oligarchiam ad aristocratiam; quia secundum primum principatum eligitur dives, juxta secundum semper assumitur virtuosus. Sive ergo pauper, sive dives, dummodo vivat secundum virtutem, assumendus est in vera politia. Sed minus periculum est de divite; quia instrumenta sibi adsunt humanæ vitæ, per quæ honeste suum potest officium exequi, salva tamen justitia subditorum. Multa alia scribit Philosophus de de politia Chalcedoniensi, comparans ad invicem principatus; duo tamen concludit reprehensibilia de ipsis Chalcedoniensibus. Unum, quod sustinebant principem plures principatus habere: quod Aristoteles reprobatur, ostendens multo melius esse vel dignius plures esse, vel convenire, ad unum principatum, quam quod unus habeat plures. Ratio autem hujus ex verbis Philosophi haberi potest ibidem: quia in diversis principatibus actus unius per alium impeditur: unde dat istud principium, ex quo argumentum assumitur quod ab uno unum opus optime perficitur: cujus rei gratia duo ponit exempla. Unum de fistulizantibus, sive cytharizantibus, et choreariis, quia in opere sibi contrariantur et in instrumentis. Fistula enim sive cythara requirit hominem intelligentem in melodiis et manus agiles et subtiles. Sed chorearius nihil horum requirit, quia sufficit homo etiam rusticanus cum manibus crabrosus. Ita et de diversis contingit dominis quod contrariantur sibi invicem, sicut fistulans choreario. Aliud exemplum introducit de nautico bello et campali; quia non est conveniens ut utrobique sit unus rector, cum non habeant similes actiones. Alius est enim modus pugnandi in campo et alius in aquis; et alia instrumenta requirit campale bellum et alia navale, et per consequens alias actiones. Unde concluditur inconveniens esse unum dominum habere plura dominia, et ea bene posse gubernare, propter contrarias actiones et instrumenta. Amplius autem et virtus est debilis in agente, quia vix homo sufficit ad sui regimen. Durum est enim ut qui nescit tenere moderamina vitæ suæ, iudex fiat alienæ, ut Gregorius ait. Multo ergo difficilius est habere multa regimina, propter causas jam dictas.

## CAPUT XXI.

*De politia Pythagoræ, quam didicit a prædictis Philosophis Minoe et Lycurgo: et quomodo totus suis conatus ad hoc fuit, assuefacere scilicet homines ad virtutes.*

Præter dictas autem politias, quas Philosophus tangit in sua *Politica*, invenitur una philosophica, de qua Aristoteles mentionem non facit; videlicet Pythagoræ, qui ipsum præcessit per duas hominum ætates, a quo nomen Philosophi exordium habuit, ut scribit Maximus Valerius: non est enim ausus se nominare sapientem, neque se in numero septem sapientum computare qui ipsum præcesserant; sed se philosophum appellavit, idest sapientiæ amatorem. Hic, ut tradit Justinus Hispanus, cum peragrasset Ægyptum ad perdiscendos siderum motu originemque mundi, inde regressus, Cretam et Lacedæmoniam profectus est ad cognoscendum leges Minois et Lycurgi, de quibus dictum est supra, et in quibus suam fundavit politiam. Sed præter leges jam dictas, idem Justinus hoc de ipso scribit, quod Crotonam veniens, populum in luxuriam lapsam sua auctoritate ad usum frugalitatis revocavit. Laudabat quotidie virtutem et vitia reprimebat, casumque civitatum hac peste perditarum enumerabat. Tantum quoque studium ad frugalitatem perdiscendam multitudini persuasit, ut aliquos ex eis luxuriatos fuisse incredibile videretur. Tradit etiam Tullius de ipso, quod quibusdam harmoniis vitia in hominibus extinguebat luxuriæ. Unde dicit, quod Tauromitanum juvenem quemdam libidine flagrantem, cum audivisset Pythagoras ad ostium amicæ meretricis insanire, jussit psalterium spondæum canere, et sic cum ad sanam mentem revocavit. Matronarum quoque separatarum a viris doctrinam et puerorum a parentibus frequenter habuit, ut de ingressu religionis frequenter contingit ex ignito sermone prædicationis, vel ex virtuosa operatione et excellenti vita doctoris. Docebat autem nunc hos pudicitiam, nunc illos modestiam, litterarumque studium. Ut matronæ aureatas vestes ceteraque dignitatis suæ ornamenta deponerent, velut quædam luxuriæ instrumenta, omniaque in Junonis ædem deferrent, eidemque consecrarent, suadebat, asserens matronarum vera ornamenta pudicitiam fore. Hic autem cum annos viginti esset Crotonæ, Metapontum se transtulit, ibidemque decessit: cujus tanta fuit admiratio, ut de ejus domo templum facerent, ipsumque pro deo colerent. Scribit etiam Hieronymus de ipso *Contra Jovinianum*, quod filiam habuit tantæ pudicitiae, ut virginitatem servans, choro simul virginum jam præesset, easque castitatis instruxit doctrina. Per quod apparet quod in sua *Politia* ad hoc tota sua ferebatur intentio suusque conatus, ut homines traheret ad vivendum secundum virtutem; quod et Aristoteles in *Politica* docet; quin etiam omnis vera politia corrumpitur, si ab hoc sine declinetur.

## CAPUT XXII.

*De documentis pythagoricis sub figuris et ænigmatibus traditis, et de duobus pythagoricis fidelissimis amicis.*

Tradit etiam Hieronymus ubi supra quasdam leges pythagoricas ab conservationem suæ politiæ sub quibusdam paradigmis et parabolis more antiquorum traditas. « Fugienda, » inquit, « sunt modis omnibus et abscindenda, languor quidem a corpore, imperitia ab animo, luxuria a ventre, a civitate seditio, a domo discordia, et in commune a cunctis rebus intemperantia. » Pythagoricorum etiam sunt ista : « amicorum omnia esse communia, et amicum se alterum esse : » in quo maxime fuit eorum conatus. Ude narrat Maximus Valerius de duobus Pythagoricis seu Pythagoræ discipulis, Damone et Pythia quod cum alterum eorum Dionysius tyrannus morti adjudicasset, et is tempus ab ea impetrasset, ut prius quam periret, profectus domum res domesticas ordinaret, alter vadem pro altero se tyranno dare non dubitavit. Appropinquante autem diffinita die, nec illo redeunte, cum unusquisque tam temerarium sponsoem stultitiæ damnasset, is nihil se amici constantiam metuere prædicabat. Eodem itaque momento eademque hora per Dionysium constituta, qui eam acceperat, supervenit. Admiratus tyrannus amborum animum, supplicium renisit, eorumque fidei se conjungi desiderans, eos ut ipsum in societatem suæ amicitiae recipere rogavit. Scribit etiam Hieronymus alia documenta seu leges, quas Pythagoras in sua tradidit *Politia* : duorum videlicet temporum maxime curam habere, mane videlicet et vespere, idest eorum quæ acturi sumus, et eorum quæ gessimus. Post Deum veritatem colendam, quæ sola homines proximos Deos facit. Refert etiam Hieronymus super Ecclesiasten, pythagoricam fuisse doctrinam ut homines scholastici usque post quinquennium taceant, postea vero eruditi loquantur. Item alia documenta et leges de ipso reperiuntur sub ænigmatibus tradita, quæ Hieronymus narrat *Contra Jovinianum*. « Stateram, » inquit, « ne transilies; » idest, ne prætergrediaris justitiam. « Ignem gladio ne foveas; » idest, iratum et tumidum animum verbis maledicis ne lacessas. « Coronam minime carpendam, » idest leges urbium observandas. « Cor non comedendum, » idest mœrorem de animo expellendum. « Per viam publicam ne ambules; » idest « ne multorum sequaris errores. » « Hirundinem in domo non habeas; » idest, garrulos et verbosos in tua societate non suscipias : et multa alia documenta vel his similia leges, quæ in sua *Politia* prædictus Philosophus tradidit, magis ordinata ad regimen animæ quam corporis; qua regulata, corporalia facilius disponuntur.

Et hæc ad præsens de diversorum politiis dicta sufficiant. Nunc vero de vera vita politica sive per Philosophum tradita, sive per alios sapientes, in sequentibus est agendum.

## CAPUT XXIII.

*In quo consistat perfecta politia, ex qua accipitur felicitas politica; scilicet quando partes politiæ sunt bene dispositæ, et sibi ad invicem correspondent.*

Quia vero cum de politia agitur, ad civitatem refertur, modus agendi de ipsa ex qualitate civitatis dependet. Civitas autem, ut Augustinus dicit in I *De civitate Dei*, est « hominum multitudo aliquo societatis vinculo colligata, quæ vera virtute beata redditur. » Hæc autem delinitio a sententia Philosophi non discordat, qui in perfecto politiæ regimine felicitatem ponit politicam, ut ex I *Ethymologiarum* patet. Virtus enim qua rector politicus civitatem gubernat, architecta est respectu cujuslibet aliarum virtutum quæ sunt in civibus : quia ceteræ virtutes civiles ordinantur ad istam, sicut ad militarem equestris et sagittaria. Et ideo in operatione ejus, cum sit virtus suprema, consistit felicitas politica, ut Philosophus videtur velle in commemorato jam libro. Sic enim de vera et perfecta politia contingit, quemadmodum de corpore bene disposito, in quo vires organicæ sunt in perfecto vigore. Et si virtus suprema, quæ est ratio, ceteras dirigat inferiores potentias, et ad suum moveantur imperium, tunc insurgit quædam suavitas et perfecta delectatio virium in alterutrum, quam harmoniam vocamus. Unde Augustinus dicit in III *De civitate Dei* quod respublica sive civitas bene disposita melodiæ vocibus comparatur, in qua diversis sonis proportionatis ad invicem, fit cantus suavis et delectabilis auribus : quæ proprie fuit in statu innocentiae regulata ex virtute originalis justitiæ præter actum divinæ cognitionis : unde causabatur contemplativa felicitas, et etiam modo secundum quamdam participatam virtutem in viris perfectis, ut nihil velint nisi quod regula mandat rationis, et quod Deo placet. Et ex hac quidem ratione motus fuit Philosophus assimilare rempublicam seu politiam naturali et organico corpori, in quo sunt motus dependentes ex uno movente, sive ex duobus, ut sunt cor et cerebrum : et tamen in qualibet parte corporis est operatio propria primis motibus correspondens, et in alterutrum subministrans : unde hoc corpus divini muneris beneficio animari asserit, et quod summæ æquitatis, nutu Dei agitur moderamine rationis : quod et Apostolus confirmat in I epistola ad Corinth., ostendens totam Ecclesiam esse unum corpus distinctum in partibus, sed unitum vinculo caritatis.

Ad veram igitur civilitatem sive politiam requiritur ut membra sint conformia capiti, et ad invicem non discordent, et sint omnia sic disposita in civitate, ut jam est dictum. Amplius autem in causis et causatis, et moventibus et motis, ita videmus quod est debita proportio ipsorum ad invicem quantum ad influentiam : quia inferiora moventur secundum superiorem motum, et superiora movent quantum est inferiori conveniens, cum natura non deficiat in necessariis. Si igitur talis est ordo superiorum ad inferiora, et e converso, in qualibet natura creata; multo magis esse debet in natura intellectuali, quanto perfectior est inter entia. Si ergo talis dispositio suavitatem facit contemplantando, multo magis ope-



rando. Et hinc Pythagorici, moti fuerunt in cœlestibus corporibus ponere melodiam, ut Philosophus dicit in II *De cœlo*, propter ordinatos motus quos habent, et indeficibiles, unde insurgit summa suavitas : et quia ipsa fore dicebant animata, ex hac parte eisdem dabant felicitatem. Ergo sic politice vivere, perfectam et felicem vitam facit.

Præterea. Ordo est « parium dispariumque rerum, sua cuique tribuens dispositio, » ut Augustinus dicit XVIII *De civit. Dei* : per quam definitionem habemus diversum gradum in politia, tam in executione officiorum, quam in subjectione sive obedientia subditorum : unde tunc est perfecta socialis congregatio, quando quilibet in suo statu debitam habet dispositionem et operationem. Sicut enim ædificium est stabile, quando partes ejus sunt bene sitæ ; sic de politia contingit quod firmitatem habet et perpetuitatem quando quilibet in suo gradu, sive rector, sive officialis, sive subditus, debite operatur, ut suæ conditionis requirit actio. Et quia ibi nulla est repugnantia, consequenter ibi erit summa suavitas et perpetua firmitas status : et hoc est proprium felicitatis politicæ, ut Philosophus tradit. Hos autem tales rectores civitatis sive politia pro conservando in pace populo, describit nobis in Exod. cap. xviii, 21, Jetro cognatus Moysi : *Provide, inquit, de plebe viros potentes, in quibus sit veritas, et qui oderint avaritiam et constitue ex eis tribunos et centuriones et quinquagenarios et decanos, qui judicent populum omni tempore* : et postea subdit : *Si hoc feceris, implebis imperium Domini, et præcepta ejus poteris sustinere, et omnis hic populus revertetur in pace ad loca sua* : quasi omnia subsistant in quadam suavitate mentis et pace temporis, ex quibus insurgit felicitas hominis, si tales sint gubernatores reipublicæ quales hic ordinantur. Tales et Sallustius dicit fuisse rectores Romanos : unde respublica ex parva facta est magna, quia « in eis fuit domi industria, foris justum imperium, animus in consulendo liber, neque libidini neque delicto obnoxius : » in quibus tales actus virtuosus regiminis nobis traduntur, unde perfecta et felix ostenditur politia.

#### CAPUT XXIV.

*Dividit politiam tripliciter; et unamquamque partem prosequitur : et primo quid sit in partes distinguatur integrales secundum opinionem Socratis et Platonis.*

Nunc igitur de his in specie est agendum in quæ, sive in quas partes civitas sive politia dividitur. Quas quidem oportet accipere respectu totius civitatis, cui partes integraliter respondent vel respectu sui regiminis, aut ut ad negotia ordinatur bellica ; quia secundum hanc divisionem diversa sortiuntur vocabula a diversis historiarum scriptoribus et auctoribus legum.

Quantum autem ad primum modum tradendi divisionem, accipere possumus superius tactam, quæ est Socratis et Platonis, qui totam politiam in quinque colligebant partes ; in rectores scilicet, consiliarios, bellatores, artifices et agricolas. Aliam autem quæ est Romuli primi principis

urbis Romæ : qui, ut historiæ referunt, divisit multitudinem sui populi in tres partes ; videlicet senatores, milites et plebem. Politia vero Hypodami per tria genera hominum dicebatur et ipsa constitui ; per bellatores, artifices et agricolas, ut supra est traditum. Harum autem quælibet sustineri potest, et rationem habet.

Prima enim, quæ quinque hominum genera comprehendit, satis videtur conveniens. Si enim vires animæ consideremus, quarum respectu nostra attenditur indigentia, unde accipitur constituendi civitatem necessitas ; manifestum est dictam divisionem esse sufficientem. Patitur enim homo indigentiam respectu partis intellectivæ, ut possit vivere secundum virtutem, propter quod est sibi provisa directio in agendis : ad quod ordinatur consiliativa, quæ ponitur a Philosopho inter intellectuales virtutes. Unde in Eccli. xxxii, 24, scribitur : *Fili, inquit, sine consilio nihil facias, et post factum non penitebis*. Et ideo in republica sive in politia consiliarii sunt optima pars ejus : propter quod a Plutarcho comparantur oculo, qui inter partes corporis est nobilior. Indiget etiam refrenativa concupiscentiæ, sive affectivæ, quæ inordinata est, ut ipse Philosophus tradit, unde ipsas ægritudines in VII *Ethic.* appellat : et inde necessarii sunt rectores ad corrigendum hominum malitiam : propter quod et Apostolus dicit Rom. xiii, 4, quod *non sine causa gladium portat, vindex in iram ei qui male fecit*. Ex qua ratione institutæ sunt leges per principes et rectores, ut per Philosophum patet : et ipse Apostolus in epistola ad Galat. iii, 19, *Lex, inquit, propter transgressores posita est* : et iterum I Tim. i, 9 : *Justo non est lex posita*. Sunt etiam et aliæ indigentia humanæ vitæ, quæ respondent aliis potentiis animæ, ut est tegumentum, ornamentum et nutrimentum. Duo quidem prima indigentiam suppleant partis sensitivæ hominis quod artificum est officium, sive in ædificiis, sive in vestimentis, sive calceamentis, sive quibuscumque aliis artificialibus rebus, quæ aspectum vel auditum vel odoratum sive tactum delectant, vel eisdem conferunt supplementum. Sed ad indigentiam supplendam humanæ vitæ quantum ad nutrimentum quod respondet parti vegetativæ, ordinantur agricolæ, sive in pane, sive in vino, sive in fructibus, sive in gregibus, sive in armentis, sive in volatilibus, quæ omnia de jure ad civitatem per agricolas deferuntur et transportantur. Bellatores autem congrua sunt pars politia, ordinata quidem contra impulsores aliarum partium, et ad ipsarum munimen. Ad hoc enim constituitur miles in civitate, ut se pro sua patria contra hostes opponat : unde ad hoc juramento astringuntur eum ad gradum militarem ascendunt, pro republica non recusantes mortem, ut in *Policratico* traditur, ubi de sacramento militis agitur. Est ergo bellator in republica necessarius, et pars præcipua politia : quia ejus officium est assistere principi pro exequenda justitia, ut dicitur in commemorato libro, et fideliter et constanter contra hostes pugnare pro conservanda patria ; et sic non solum parti politia, sed toti, militaris gradus in republica singulariter est fructuosus.

Ex quibus omnibus manifeste patet sufficientia politia Socratis et Platonis quantum ad partes ejus.



## CAPUT XXV.

*Hic ostendit sufficientiam partium integralium politiæ quas Hyppodamus tradit et Romulus.*

Sed de duobus aliis modis jam dictis adhuc divisio tolerari potest, quia comprehenduntur cum prima, cujus sufficientia est jam ostensa. Et quidem in divisione Romuli cum de senatoribus agitur, rectores accipimus politicos et sapientes eis adjunctos, sive assessores, sive quoscumque alios jurisperitos. Plus enim principes politici sunt consiliativi quam regales vel imperiales: sicut et de Romanis scribitur I Machabæorum viii, quod *consulebant quotidie trecentos viginti de multitudine ut quæ digna sunt gerant.* Cujus ratio esse potest, quia regimen politicum solis roboratur legibus, ut dictum est supra; regale vero sive imperiale, etsi legibus gubernetur, in casibus tamen opportunis ac gerendis quibuscumque negotiis regimen consistit in arbitrio principis: quia « pro lege habetur quod principi placuerit, ut jura definiunt. Concludendum est igitur, in dominio politico consiliarios maxime fore necessarios, quos in nomine senatorum includimus: unde Isidorus dicit in II *Ety-mologiarum* quod senator a consulendo et tractando est dictus, qui sic se habet ut consulat, et nulli noceat. Unde et Augustinus *De civitate Dei* senes inter senatores connumerat. Comprehendimus etiam in nomine senatoris rectores, sicut idem Isidorus tradit in prænominato libro ex verbi Sallustii dicentis quod « Senatores patres vocati sunt propter diligentem curam regiminis. » Nam sicut patres filios, ita illi rempublicam gubernabant. Patet igitur quod in nomine senatorum, quos Romulus distinxit a militibus et plebeis, etiam rectores et consiliarios comprehendit, quos Socrates et Plato in sua *Politia* posuerunt distinctos. Sed in nomine plebis artifices et agricolas accipere possumus, quia utrumque genus de gente plebea accipitur. Et apparet quod divisio multitudinis in civitate per præfatos Philosophos a divisione quam fecit Romulus, non discordat.

De distinctione tamen Hyppodami jam præacti videtur esse dubium: quia nulla fit ibidem mentio de consiliariis et rectoribus, nec ad partes reduci valent per dictum Philosophum assignatas, cum actus et naturæ ipsarum penitus sint diversa. Sed si attendimus ad ea quæ ad civilitatem ejus sunt tradita, quæstio facilius solvitur. Pertractat enim de iudicibus et assessoribus, ubi circa ipsos suam ponit distinctionem, et nos ex ea possemus accipere consiliarios et rectores: de quibus pro tanto mentionem non facit cum de partibus agit politiæ, eo quod illas partes solum assuit quæ ad indigentiam referuntur corporalis vitæ: unde et sua positio quantum ad substantiam a prima, videlicet Socratis et Platonis, non videtur differre.

Hæc igitur de partibus politiæ, ex quibus constituitur, dicta sufficiant. Unum tamen de eis adhuc considerandum videtur, de bellatoribus videlicet, quia omnes politiæ de ista parte faciunt

mentionem: cujus quidem rationem habere possumus a Vegetio, *De arte militari* fine I *lib.*: quia omnes regiones et civitates per bellatores in suo sunt conservatæ vigore, et quod respublica diminuta est per dissuetudinem bellandi, in urbe, post primum bellum Punicum per annos viginti in pace vitam deducens: unde Romanos ubique victores sic enervavit, « ut in secundo bello Punico Annibali pares esse non possent. Tot itaque consulibus, tot exercitibus amissis, tunc demum ad victoriam pervenerunt, cum exercitium militare condiscere potuerunt: » et postea concludit: « Semper ergo legendi <sup>1</sup> exercitandique sunt juniores. Utilius enim constat suos erudire armis quam alienos mercede conducere. » Necessary igitur sunt bellatores omnis tempore in republica, tum pro pace civium conservanda, tum pro incursu hostium evitando: quorum considerato fructu in republica amplior eis inter cives confertur honor, tamquam magis necessariis ad conservationem politiæ, et propter periculum cui se pro ipsa debent exponere. Propter quod eisdem solis dabatur victoriosus corona. Hinc est quod in *Policratice* assimilantur manni, quæ secundum Aristotelem in II *De anima*, est organum organorum. Jura etiam ipsos milites ampliori decorant privilegio inter omnes civiles, seu in testamentis, sive in donationibus, seu in quibuscumque negotiis, sed præcipue dum sunt in castris, ac suum exercent officium.

## CAPUT XXVI.

*Agit ulterius de aliis partibus politiæ respectu regiminis, ubi verba exponuntur diversorum officialium.*

De partibus autem politiæ respectu regiminis, quia Romana respublica magis ordinem præcipuum tenuit, et post Tarquinium expulsum a regno gradus officialium ponitur ab historiarum scriptoribus, de ipsis specialiter tamquam aliorum exemplaribus est agendum. Narrant enim primo, consules institutos, Brutum videlicet, qui maxime egerat ut expelleretur Tarquinus, et Tarquinium Collatinum maritum Lucretiæ: sic dicti vel a consulendo civibus, vel a regendo cuncta consilio: quos mutandos ideo elegerunt per singulos annos, ut dictum est supra, ut nec insolens diu maneret, et moderatior cito succurreret. Propter hoc autem duos pares erant, quia unus rem civilem, alter vero rei militaris curam gerebat. Processu autem temporis, idest quinto ab ejectis regibus anno, inventa est dictatura, occasione habita alicujus novitatis in urbe. Dum enim gener Tarquinii ad viudicandum regis injuriam magnum congregasset exercitum contra civitatem, ad confortationem gentis nova instituta est dignitas, quam dictaturam appellarunt: major potestate ac imperio consulatu: item tempore excellentior; quia de quinto in quintum annum ipsorum expirabat officium, consulatus autem per annum. Hi dictatores magistri a populo vocabantur, quam dignitatem ferunt historiæ habuisse Julium. Eodem etiam anno tradunt magistrum equitum institutum, qui dictatori

<sup>1</sup> Apud Vegetium: « exercendi... vilis enim constat » et hic « vilis » nil aliud dicit quam

« moderatori pretio. »

obsequabatur. Dictator autem primus, ut scribit Eutropius, fuit Lamius, sed magister equitum Spurius Cassius. Sexto autem anno, quia consules nimis gavabant plebem, a populo institui fuerunt tribuni, sic dicti, ut tradit Isidorus lib. IX *Etymologiarum*, eo quod jura populo tribuant : quem locum in civitatibus Italiæ tenent antiani, ordinati ad defensionem gentis plebæ. Sed advertendum hic quod senatores semper fuerunt ex quo sunt a Romulo instituti : unde tradunt historiæ quod quia consules cum senatoribus populo erant infesti, inventi fuerunt tribuni in favorem plebis.

Sunt autem et alia nomina officialium urbis, de quibus historiæ faciunt mentionem, sed præcipue Isidorus lib. IX *Etymologiarum* : videlicet censores, patritii, prætores, patres conscripti, proconsules, exconsules, censorini, decuriones magistratus et tabelliones, de quibus omnibus sub compendio est dicendum. Censoria autem dignitas apud veteres Romanos erat, quæ apud modernos est dignitas judicialis : censere enim iudicis est. Dicuntur etiam censores patrimoniorum, ut tradit idem Isidorus, a censu æris appellati quod est officium specialis curæ in civitate, sive tutoribus dandis, sive actoribus, sive curatoribus, vel quibuscumque causis et negotiis pupillorum et viduarum, vel etiam rebus patrimonialibus dividendis; sed patritii ideo dicuntur, quia sicut patres filiis, sic illi cives Romanæ reipublicæ curam gerebant, qualis fuit domus Fabia, de qua dictum est supra. Patritiatus igitur non erat officium in republica, sed quædam paternæ reverentiæ populi ad aliquam progeniem civitatis pro zelo politiæ Romanæ quem gerebant : unde et jura gentium patritiatum omni eminentiæ sive principatui præferunt sicut pater omni curæ tutoriæ. Præfecti autem dicti sunt, eo quod prætoriam potestate præsent, unde et prætores idem quod præfecti dicuntur. Importat enim tale officium omnimodam factionem quasi præcipuus sit operator et executor justitiæ. Scriptura tamen sacra ad exteriores refert actiones, ut in principio Exodi, cap. v, 6, scribitur quod *præfectus operum et exactoribus populi dicens : Nequaquam ultra dabitis populo paleas ad conficiendos lateres*. Hi autem et prætores vocabantur ex prosecutione justitiæ. Patres autem conscripti appellabantur senatores ratione officii. Ut enim refert Isidorus, cum Romulus ipsos instituit in decem curias, ipsos eosdem elegit, et nomina eorum præsentî populo in tabulas aureas contulit, atque inde nominati sunt patres conscripti : quos etiam in tres ordines distinxit. Primi vocabantur illustres, secundi spectabiles, tertii autem clarissimi : quorum verba exponere longum esset. Proconsules autem dicti sunt coadjutores consulum quasi projecti sive adjecti consulibus; nec consulatu fungebantur simpliciter, sicut nec procurator curatoris sive actoris : vel proconsul dicebatur assessor, qui vice consulum iudicabat. Exconsul vero dicebatur consul amotus ab officio, peracto vicis suæ anno ; unde exconsul quasi extra consulatum existens. Habebat tamen aliqua fastigia sui consulatus, sive alienjuss immunitalis, sive alienjuscumque signi eminentiæ, per quod cognoscebatur fuisse consul. Censorini autem minores iudices dicebantur, ad actus censoriæ curiæ vel regiminis deputati, de qua dictum est supra, quasi inferiores censores. Sed decuriones ad omnem actum curialis officii, sic dicti, ut dicit Isidorus, quia sunt de ordine curiæ et quia

officium curiæ administrant : sic vocatus est Joseph ab Arimathæa, nobilis videlicet decurio, ac vir justus et bonus, qui pro Domino nostro Jesu Christo mercatus sindonem, officiosissimam et reverendissimam contulit sepulturam. De magistratu autem in fine superioris libri satis est declaratum. Nunc autem agendum est de altero officio et infimo cujuscumque regiminis quod est tabellio : sic dictus, ut tradit Isidorus, quoniam portitor sit tabellarum et susceptor, in quibus acta geruntur sive reipublicæ, sive personæ privatæ. Idem etiam et scriba publicus vocatur, quia ea solus scribit gesta quæ publica vocantur, quem et jura gentium servum publicum appellant.

Restat autem de uno solo nomine dignitatis definire quantum ad regimen politiæ quod scipio appellatur : quod quidem secundum proprietatem vocabuli baculus dicitur, cui quasi ad sui ducatum innititur et sustentatur, quo pater Cornelii Scipionis indignuit. Hunc autem patrem tradunt historiæ fuisse cæcum, unde cum baculo sive scipione veniebat in forum. Ad cujus igitur similitudinem filius ejus Publius Cornelius quia sustentavit rempublicam contra Annibalem et Carthaginem, vocatus est Scipio : et quia totam Africanam subjugavit Romanis, dictus est Scipio Africanus ad differentiam alterius Scipionis nepotis ejus, qui Hispaniam devicit et vocatus est Lucius Cornelius Numantinus a Numantia, quam subjecit ac prostravit. Scribit etiam Augustinus, I *De civ. Dei*, tertium fuisse Scipionem, qui et Nasica est vocatus, frater majoris Scipionis, qui ne Carthago destrueretur prohibuit, asserens ipsam esse medicinam Romanis. Ex his igitur propter probitatem tantorum virorum considerato principio unde nomen Scipionis ortum habuit, scipionem legislatores vocarunt virgam quam princeps portat in manu cum sceptro quasi semper victoriosus, ut ille magnus Scipio fuit. Unde narrat Isidorus in XVII *Etymolog.*, quod triumphantes purpuram palliatam et togatam habebant vestem, et scipionem cum sceptro gerebant in manu ad imitationem victoriæ Scipionis.

Hæc igitur de nominibus dignitatum respectu regiminis intantum sint dicta.

#### CAPUT XXVII.

*Hic declarat de partibus politiæ quantum ad bellatores, quos distinguit secundum triplicem considerationem.*

Sed et de partibus ordinatis ad bellum, quæ sunt partes politiæ et eidem necessariæ, ut superius est probatum, congruum videtur tradere : quæ quidem bene dispositæ pulchritudinem et decorem causant et delectationem generant : ex quo etiam ingens cordis augmentum, audacesque reddunt animos ad arduorum aggressum. Unde Salomon in Canticis exercitum dispositum ad bellandum pulchritudini sponsæ assimilat et decori. *Pulchra*, inquit, Cant. vi, 3, *es et decora, filia Jerusalem, terribilis ut castrorum acies ordinata*. Sic enim pulchritudo allicit, ut extasim faciens nihil aggredi timeat vel formidet : quod in excessivis amantibus maxime est manifestum. Ita etiam de acie bene ordinata contingit; et ideo ipsam terribilem vocat sive ad aciem referens ex causa jam dicta. Propter quod non imme-

rito de dictis partibus est agendum, quia ad ornatum faciunt politiæ. Et quia homo in bello præcipue regimine indiget propter difficilem et terribilem actum quem exercet, indet opportunum videtur in castris exercitum dividere in numerum certum, cuilibet assignando ducatum, per quem regatur et dirigatur ad pugnandum cum hostibus. Quem quidem accipere possumus a Vegetio in I lib. *De re militari*, ubi exercitus dividitur in legiones : in quo dicit duas sufficere cuilibet duci vel consuli. Legionem dividit in decem cohortes ; sed cohors prima numero et merito antecedit. Nam genere quidem et litterarum instructione viros electissimos quærit, ut idem tradit Vegetius : quod pro tanto dicit, ut castra magis confidant, si tanti viri in prima exponantur acie ; et quia maxime requiritur sapientia, ubi periculum totius dependet exercitus. Hæc autem cohors aquilam suscipit signum præcipuum Romanorum castrorum et totius legionis insigne : quod et imperatoribus posterioribus est relictum. Cujus quidem ratio assignari potest, quia, ut idem dicit Vegetius, militaris Romana disciplina primas acies faciebat alares : inter omnes autem avium alas aquilinæ sunt fortiores. Vel aliter dici potest quod ideo signum aquilæ eis traditur ex præeminentia, videlicet in mundo, quantum ad dominium, propter cælestem et divinum effectum, quem implorare debent continue, ut faciebat ille princeps Judas Machabæus, qui in pugnando auxilium de cælo petebat : quod præcipue eis competit propter periculum cui se committunt, vel quia merentur apud Deum ut sint victoriosi, eo quod morti se exponunt pro populo. De qua aquila dicitur in Ezechiele xvii, 3, loquente de Nabuchodonosor orientis monarcha : *Aquila grandis, magnarum alarum, longo membrorum ductu, plena plumis et varietate, venit ad Libanum et tulit medullam cedri*. Post hoc subdit Vegetius numerum primæ cohortis, quam millenariam vocat, eo quod mille centum pedites in ea sunt, equestres autem centum triginta sex. Ceteras autem vocat quinquagenarias, quia in qualibet ponit quingentos quinquagintaquinque pedites, equestres autem sexaginta sex, ut quilibet eques certum numerum peditum habeat. Disponit etiam in quinta cohorte milites fortiores, quia sicut prima dextrum tenet cornu, ita et quinta sinistrum. Multa alia dicit ibi Vegetius, quæ enumerare nimis esset longum ; et verba ejus tamquam inusitata modernis temporibus majori indigerent expositione. Hæc autem tantum ad præsens sufficiant.

Quod si multitudo populi in politia sub certis limitibus in gradu et numero disponitur quantum ad sui directionem, multo magis in castris, in quibus maxima et periculosissima est difficultas regiminis tum ex parte operis quod eis incumbit, quia ad finem terribilium ordinatur quod est mors ; tum ex parte hostium qui infestant. Unde sicut in Exodo xviii, 21, consulitur Moysi a cognato suo Jethro, ut onera divideret per officia diversa in judicando populum, ubi ait : *Provide viros potentes... et qui oderint avaritiam, et constitue ex eis tribunos et centuriones et quinquagenarios, et decanos, qui judicent populum* ; ita et Judas Machabeus cum infestaretur ab hostibus, sua castra in eadem numero constituendo duces, per tribunos videlicet, centuriones, pentacontarchos et decuriones : qui quidem numerus satis proportionatus est militibus ad distinctionem exercitus : unde unus in altero continetur, ut facilius sit ad conjunctionem unius cum altero,

cum bellandi necessitas hoc requirit. Distinctio vero quam facit Vegetius ex dispositione acierum, attenditur cum campale bellum ordinatur, licet etiam ipse cohortes ad centurias reducat et decurias ex certis causis rationibus.

## CAPUT XXVIII.

*Hic declarat de nominibus ducum et de numero cohortum, et qui significat unumquodque.*

Sed quia de nominibus agitur ducum, videntum est de ipsis prout Scriptura sacra denominat et Romana respublica, ac moderni describunt. Et primo quidem de tribuno : quod quidem nomen dicit Vegetius ex tribu originem habere, quia præerat militibus quos Romulus elegerat, qui ex tribu originem traxerunt. Isidorus autem in IX *Ethymologarum* dicit, quod tribuni dicitur sunt, quod plebeis jura præbent : unde in favorem eorum sunt instituti proconsules. Alibi vero dicitur, quod tribuni dicebantur qui mille militibus præcerant, quos Græci chyliarchos appellant, sicut centuriones a centum militibus sunt nominati. De quinquagenariis, sive pentacontarchis quod idem est, Vegetius mentionem non facit ; sed Scriptura sacra in præfatis jam lib. et in IV lib. Regum, quos ad imprecationem Eliæ juxta eorum meritum flamma combussit. Sed decanos, sive decuriones, sic dictos, quod decem militum curam habent in castris, Vegetius sub uno contubernio et uno papilione disponit.

Nomina vero generalia multitudinis armatorum ad pugnandum disposita hæc sunt ; videlicet exercitus ab exercitio, sive ab exercitando dictus, utrumque enim in prædicta requiritur multitudo : vocantur et castra, a castitate dicta, ut tradit Isidorus, eo quod ibi debet castrari libido : subtrahebantur enim deliciæ a castris cum incumberet hostium pugna, ut Vegetius scribit : unde castra filiorum Israel devicta fuerunt a Madianitis, quia fornicati sunt cum filiabus eorum, ut scribitur in Numeris. Propter quod in Deuteronomio scribitur, quod Dominus ambulabat in medio castrorum Israelitici populi, ut sint castra eorum sancta, nihilque in eis appareat fœditatis. Vel castra dicebantur propter munitionem exercitus in aggeribus et vallibus, ac aliis clausuris fortissimis, quibus Romani principes utebantur cum invadebant hostes. Propter quod fossores, fabri, ac latomi assumebantur ad militarem disciplinam, ut haberent in promptu artifices necessarios ad tuitionem exercitus. Est et aliud nomen, per quod et multitudo pugnatorum exprimitur, videlicet legio, ab electione dicta, ut tradit Isidorus, eo quod milites in ea contenti eligebantur ab aliis tamquam magis experti. Quædam autem alia nomina sunt partium legionum, sive exercitus, quæ a Vegetio traduntur in II libro ab Isidoro libro IX ; ut manipulus, qui est numerus ducentorum militum, sic dictus quod mane hostes impeteret, sive quod pro signo manipulos stipulæ sive alicujus herbæ ferret secum : de quibus Lucanus,

*Convocat armatos exemplo ad signa maniplos.*

Alii vocantur velites, a volitando dicti propter suam agilitatem. Romana enim respublica quosdam juvenes agiles habebat in militia legionum.

qui cum invaderent hostes, condebant post equitum terga, tunc subito desilientes de equis turbabant hostes. Tales autem milites Annibali; ut scribit Isidorus, multum fuerunt infesti, per quos elephantum ejus in majori parte sunt intercepti: qualis fuit ille Eleazarus, de quo traditur in I Machab., quod exiliens in medium legionis contra castra regis Antiochi bestiam invasit elephantinam loricatam loricis regis, ipsamque bestiam occidit. Est et aliud genus armorum, quod acies nuncupatur; ab acuitate dicta, ut Isidorus dicit, quod audaciam importat in aggrediendo hostes: de qua Scriptura sacra sæpius mentionem facit: unde et de una tribu Israelitici populi scribitur in *Paralipomenon*, quod egrediebantur ad pugnam in acie provocantes contra hostes. Aliud etiam nomen est quod cuneus appellatur, quasi coitus, quod est in unum collecta multitudo ad pugnandum, et maxime necessarius in bellando; de quo in Deuteronomio dicitur, quod unusquisque suos cuneos præparabit ad bellum: a quo forte conostabulus vocabulum trahit apud modernos usitatum, quasi caput cunei stabilis, hoc est constantis et fortis. Est et aliud nomen novum apud Tuscos de prima cohorte, et quasi ejusdem Romanæ cohortis si-

militudinem gerens, qua censu, genere, litteris, forma, virtute pollentes milites innitebantur, ut dicit Vegetius, cui tribunus præerat armorum scientia, virtute corporis, ac morum honestate præcipuus: quam trapellum dicunt, ad performandum acies hostium appellata: hoc enim verbum trapellationis importat. Sed et de officialibus castrorum multa tradit Vegetius in I lib.; sed hæc quæ dicta sunt sub compendio, ad præsens sufficiant quantum pertinet ad politiæ tractatum in hoc IV lib.

Restat ulterius de principatu œconomo, hoc est de regimine domus, quod est patrisfamilias: qui quidem materiam habet omnino distinctam ab aliis principatibus. Et ideo congruum videtur hoc per se opus componere, distinguendo per libros sive tractatus, et sua capitula, prout natura facti requirit: qua in re Philosophus eundem modum tenet. Est ultimum de virtutibus quæ requirunt ad partes regiminis in quocumque genere, sive sint subditi, sive rectores, sive principes, sive subjecti fideles; quia sic requirit ordo doctrinæ in arte vivendi, et non simul ac mixtim tractare de ipsis; ut quidam fecerunt: quia hoc est impedire intellectum discentis, et est contra normam dicentis.

# OPUSCULUM XVII.

## DE <sup>1</sup> REGIMINE JUDÆORUM AD DUCISSAM BRABANTIÆ (a).

(EDIT. ROM. XXI.)

Excellentiæ<sup>2</sup> vestræ recepi litteras, ex quibus et piam sollicitudinem circa regimen subditorum vestrorum, et devotam dilectionem quam habetis ad Fratres nostri Ordinis plenarie intellexi, Deo gratias agens, qui vestro cordi tantarum virtutum semina inspiravit. Quod tamen in eisdem a me requirebatis litteris, ut vobis super quibusdam articulis responderem, utique mihi difficile fuit: tum propter occupationes meas, quas requirit officium<sup>3</sup> lectionis; tum quia mihi placeret ut super his requireretis aliorum consilium magis in istis rebus peritorum. Verum, quia indecens reputavi ut vestræ sollicitudini negligens coadjutor inveniar, aut dilectioni ingratus existam; super propositis articulis vobis præsentibus<sup>4</sup> respondere curavi absque præjudicio sententiæ melioris.

Primo ergo vestra requirebat excellentia, si liceat vobis aliquo tempore, et quo, exactionem facere in Judæos.

Ad quam quæstionem sic absolute propositam responderi potest, quia quamvis<sup>5</sup>, ut jura dicunt, Judæi merito culpæ suæ sint vel essent perpetuæ servituti addicti, et sic eorum res terrarum domini possint accipere tamquam suas; hoc tamem ser-

vato moderamine, ut necessaria vitæ subsidia eis nullatenus subtrahantur; quia tamen oportet nos honeste ambulare etiam ad eos qui foris sunt, ne nomen Domini blasphemetur, et<sup>6</sup> Apostolus fideles admonet suo exemplo, ut sine offensione sint<sup>7</sup> Judæis, ac Gentibus, et Ecclesiæ Dei; hoc servandum videtur, ut sicut jura determinant, ab eis coacta servitia non exigantur, quæ ipsi præterito tempore facere non consueverunt: quia ea quæ sunt insolita, magis solent animos hominum perturbare. Secundum igitur hujus moderationis sententiam potestis secundum consuetudinem prædecessorum vestrorum exactionem in Judæos facere, si tamen aliud non obsistat.

Videtur autem, quantum conjicere potui,<sup>8</sup> ex his quæ subsequenter<sup>9</sup> inquiritis, in hoc magis dubitationem vestram versari<sup>10</sup>, quod Judæi terræ vestræ nihil videntur habere nisi quæ<sup>11</sup> acquisierunt per usurariam pravitatem: unde consequenter quæritis, si liceat aliquid ab eis exigere, cum restituenda sint sic exorta.

Super hoc ergo sic respondendum videtur, quod cum ea quæ Judæi per usuras ab aliis extorserunt<sup>12</sup> non possint licite retinere, consequens est ut si etiam vos

<sup>1</sup> Al.: « de regimine subditorum. »

<sup>2</sup> Cod. Vict.: « Illustri dominæ, etc. frater Thomas de Aquino ordinis fratrum Prædicatorum, salutem, etc. »

<sup>3</sup> Parm.: « operatio. »

<sup>4</sup> Parm.: « ad præsens. »

<sup>5</sup> Parm.: « licet. »

<sup>6</sup> Parm.: « ut. »

<sup>7</sup> Parm.: « simus. »

<sup>8</sup> Parm.: « potui, circa hoc dubitatio vestra augeri. »

<sup>9</sup> Parm.: « consequenter. »

<sup>10</sup> Parm. non habet: « in hoc magis dubitationem vestram versari. »

<sup>11</sup> Parm.: « quod. »

<sup>12</sup> Sic Cod. S. G. — Parm. non habet: « extorserunt » sed in notula dicit: supple: « extorserunt. »

(a) Ducissa illa fuit, ut arbitror, Alix Burgundiæ, Henrici III, Brabantie ducis, uxor, quæ cum eodem Henrico conventum Lovaniensem ordinis FF. Prædicatorum condidit, annoque 1273 migravit ad Dominum.



hæc acceperitis ab eis, non possetis licite retinere, nisi forsitan essent talia quæ a vobis vel antecessoribus vestris hactenus extorsissent. Si qua vero habent quæ extorserunt ab aliis, hæc ab eis exacta illis debetis restituere quibus Judæi restituere tenebantur : unde si inveniuntur certæ personæ a quibus extorserunt usuras, debet eis restitui ; alioquin debet in pios usus secundum consilium diœcesani Episcopi et aliorum proborum, vel etiam in communem utilitatem terræ, si necessitas immineat, vel exposcat communis utilitas, erogari. Nec esset illicitum, si a Judæis exigeretis talia de novo, servata consuetudine prædecessorum vestrorum, hac intentione ut in prædictos usus expendantur.

Secundo vero requirebatis, si peccaverit Judæus, utrum sit pœna pecuniaria puniendus, cum nihil habet præter usuras.

Respondendum videtur secundum prædicta, quod expedit eum pecuniaria pœna puniri, ne ex sua iniquitate commodum reportet. Videtur etiam mihi quod esset majori pœna puniendus Judæus, vel quicumque alius usurarius, quam aliquis alius in simili <sup>1</sup> casu, quanto pecunia quæ aufertur ei, minus ad eum noscitur pertinere. Potest etiam pecuniariæ alia pœna superaddi, ne hoc solum ad pœnam sufficere videatur quod pecuniam aliis debitam desinit possidere. Pecunia autem pœnæ nomine ab usurariis ablata retineri non potest, sed in usus prædictos debet expendi, si nihil habeant aliud quam usuras.

Si vero dicatur, quod ex hoc principes terrarum damnificantur ; hoc damnum sibi imputent, utpote ex negligentia eorum proveniens. Melius enim esset ut Judæos laborare compellerent ad proprium victum lucrandum, sicut in partibus Italiæ faciunt, quam quod otiosi viventes solis usuris ditentur, et sic eorum domini suis redditibus defraudentur. Ita enim et per suam culpam principes defraudarentur

reditibus propriis, si permitterent suos subditos ex solo latrocinio vel furto lucrari. Tenerentur enim ad restitutionem ejus quodcumque ab eis exigent.

Tertio quærebatur, si ultro offerant pecuniam, vel aliud exenium, an recipere liceat.

Ad quod respondendum videtur quod licet recipere ; sed expedit quod sic accepta <sup>2</sup> pecunia reddatur his quibus debetur, vel aliter, ut supra dictum est, expendatur, si nihil aliud habeant quum usuras.

Quarto quæritur, si plus accipitur a Judæo quam ab eo Christiani requirant, quid sit de residuo faciendum.

Ad quod patet responsio ex jam dictis. Quod enim Christiani <sup>3</sup> a Judæo quod est amplius, non requirunt, <sup>4</sup> duobus modis potest contingere vel quia forte Judæus aliquid habebat propter usurarium lucrum, et in tali casu licet vobis illud retinere servato moderamine supradicto : et idem videtur dicendum, si illi extorserint usuras eis qui postea bona voluntate donaverunt, cum tamen Judæi prompte se offerrent ad restituendum usuras. Vel potest contingere quod illi a quibus acceperunt, sunt sublatis de medio vel per mortem, vel in terris aliis morantes ; et tunc ipsi debent restituere. Si tamen non apparent certæ personæ quibus restituere teneantur, procedendum <sup>5</sup> videtur secundum modum prædictum.

Quod autem de Judæis dictum est, intelligendum est et de <sup>6</sup> Cahorsinis (a), vel quibuscumque aliis insistentibus usurariæ pravitati.

Quinto quærebatis de balivis et officialibus vestris, si liceat eis officia vendere, vel mutuo ab eis recipere aliquid certum, donec tantum recipiant ex officiis sibi deputatis <sup>7</sup>.

Ad quod dicendum videtur quod quæstio ista duas difficultates retinere <sup>8</sup> videtur : quarum prima est de officiorum venditione. Circa quam considerandum mihi <sup>9</sup> videtur quod Apostolus dicit quod multa

<sup>1</sup> Parm. omittit ; « in simili casu. »

<sup>2</sup> Parm. : « sic acceptum. »

<sup>3</sup> Parm. : « minus. »

<sup>4</sup> Parm. : « potest esse propter duo. »

<sup>5</sup> Parm. : « est ut supra. »

<sup>6</sup> Parm. : « Cavorsinis. »

<sup>7</sup> Parm. omittit : « sibi deputatis. »

<sup>8</sup> Parm. : « habere. »

<sup>9</sup> Parm. omittit : « mihi. »

(a) Cahorsini iidem qui Caorsini, Caorcini, Cavorsini et Cahoursini vocantur, sive a civitate,

sive a pago Cadurcensi in Gallia, sive a Caorsa urbe Pedemontii quondam celebriori quam nunc est, sic appellati, de quibus statuta Synod. Eccl. Carnot. ann. 1368 : « Prohibemus ne quis in domibus, vel in locis et terris ecclesiarum Lombardos, vel alios advenos, qui vulgariter Cahoursini dicuntur, manifestos usurario recipere præsumant. Porro Mercatores Italici sub hoc nomine propter fœnerationem usurariam erant famosi. »

licent quæ non expediunt. Cum autem balivis et officialibus vestris nihil committatis nisi temporalis officium potestatis, non video quare hujusmodi officia non liceat vobis vendere, dummodo talibus vendatis de quibus possit præsumi quod sint utiles ad talia officia exercenda, et non tanto pretio vendantur officia quod recuperari non possit sine gravamine vestrorum subditorum. Sed tamen talis venditio omnino <sup>1</sup> expediens non videtur. Primo quidem, quia contingit frequenter quod illi qui essent magis idonei ad hujusmodi officia exercenda, sunt pauperes, ut emere non possint; et si etiam sunt divites, illi qui meliores sunt, talia officia non ambiunt, nec inhiant ad lucra ex officio acquirenda. Sequitur igitur quod ut plurimum illi officia in terra vestra suscipiant qui sunt pejores, ambitiosi, et pecuniæ amatores; quos etiam probabile est subditos vestros opprimere, et vestra etiam commoda non ita <sup>2</sup> fideliter procurare. Unde magis videtur expediens ut bonos homines et idoneos ad suscipiendum vestra officia eligatis, quos etiam invitos, si necesse fuerit, compellatis: quia per eorum bonitatem et industriam magis <sup>3</sup> accrescet vobis et subditis vestris, quam de prædicta officiorum venditione acquirere valentis: et hoc consilium dedit Moysi ejus cognatus. *Provide, inquit Exod. xviii, 23, de omni plebe viros sapientes, et timentes Deum, in quibus sit veritas <sup>4</sup>, et qui oderint avaritiam; et constitue ex eis tribunos, et centuriones, et quinquagenarios, et decanos, qui judicent populum omni tempore.*

Secunda vero dubitatio circa hunc articulum esse potest de mutuo. Circa quod dicendum videtur quod si hoc pacto mutuum dant ut officium accipiant, absque dubio pactum est usurarium, quia pro mutuo accipiunt officii potestatem: unde in hoc datis eis occasionem peccandi, et ipsi etiam tunc tenentur resignare officio taliter acquisito. Si tamen gratis officia dederitis, et post ab eis mutuum acceperitis quod de suo officio possint recipere; hoc <sup>5</sup> absque omni peccato fieri potest.

Sexto quærebatis, si liceat vobis exactiones facere in vestros subditos Christianos. In quo considerare debetis quod principes terrarum sunt a Deo instituti non quidem ut propria lucra quærant, sed ut communem populi utilitatem procurent. In reprehensione enim quorundam principum dicitur in Ezech. xxii, 27: *Principes ejus in medio ejus quasi lupi rapientes <sup>6</sup> prædam, positi ad effundendum sanguinem, et ad perdendas <sup>7</sup> animas, et \* avaritiæ lucra sectanda <sup>8</sup>*: et alibi dicitur *\* Et avaritiam per quemdam Prophetam Ezech. 34, 2: re ad sectanda lucra* *Væ pastoribus Israel qui pascebant semet ipsos. Nonne greges pascuntur a pastoribus? Lac comedebatis, et lanis cooperiebamini; quod crassum erat occidebatis; gregem autem meum non pascebatis.* Unde constituti sunt redditus terrarum principibus, ut ex illis viventes a spoliatione subditorum abstineant. Unde in eodem Propheta, cap. xlv, 8, Domino mandante dicitur quod *principi erit possessio in Israel, et non depopulabuntur ultra principes populum meum.*

Contingit tamen aliquando quod principes non habent sufficientes redditus ad custodiam terræ, et ad ea <sup>9</sup> quæ imminent rationabiliter principibus expendenda <sup>10</sup>. Et in tali casu justum est ut subditi exhibeant unde possit communis eorum utilitas procurari. Et inde est quod in aliquibus terris ex antiqua consuetudine domini suis subditis tallias <sup>11</sup> certas imponunt, quæ si non sunt immoderata, absque peccato exigi possunt: quia secundum Apostolum, *nullus militat stipendiis suis.* Unde princeps, qui militat utilitati communi, potest de communibus vivere et communia negotia procurare vel per redditus deputatos, vel si hujusmodi desint, aut sufficientes non fuerint, per ea quæ a singulis colliguntur. Et similis ratio esse videtur, si aliquis casus emergat de novo, in quo oportet plura expendere pro utilitate communi, vel pro honesto statu principis conservando, ad quæ non sufficiunt redditus proprii, vel exactiones consuetæ; puta, si hostes terram invadant, vel aliquis similis casus emergat. Tunc enim et præter solitas

<sup>1</sup> Parm. omittit: « omnino. »

<sup>2</sup> Parm.: « sic. »

<sup>3</sup> Parm.: « majora accrescent. »

<sup>4</sup> Al.: « caritas. »

<sup>5</sup> Al.: « non absque. »

<sup>6</sup> Parm.: « rapaces. »

<sup>7</sup> Parm.: « quærendas. »

<sup>8</sup> Parm.: « sequenda. »

<sup>9</sup> Parm.: « alia. »

<sup>10</sup> Parm.: « expetenda » et in nota: « numquid exequenda, curanda. »

<sup>11</sup> Parm.: « certas collectas. »

exactiones possent licite terrarum principes a suis subditis aliqua exigere pro utilitate communi. Si vero velint exigere ultra id quod est institutum, pro sola libidine habendi, aut propter inordinatas et immoderatas expensas : hoc eis omnino non licet. Unde Joannes Baptista militibus ad se venientibus dixit Luc. III, 14 : *Neminem concutiatis, nec calumniam faciatis ; et contenti estote stipendiis vestris*. Sunt enim quasi stipendia principum eorum reditus ; quibus debent esse contenti, ut ultra non exigant, nisi secundum rationem prædictam, et si utilitas est communis.

Septimo quærebatis, si officiales vestri absque juris ordine aliquid a subditis extorserint quod ad manus vestras devenerit, vel non forte, quid circa hoc facere debeatis.

Super quo plana est responsio : quia si ad manus vestras devenerint, debetis restituere vel certis personis, si potestis, vel in pios usus expendere, sive pro utilitate communi, si personas certas non potestis invenire. Si autem ad manus vestras non devenerint, debetis compellere officiales vestros ad consimilem <sup>1</sup> resti-

tutionem, etiam si non fuerint notæ vobis aliquæ certæ personæ a quibus exegerint, ne a sua injustitia lucrum <sup>2</sup> reportent : quinimmo sunt a vobis super hoc gravius puniendi, ut ceteri a similibus abstineant in futurum : quia, sicut Salomon dicit Proverb. XIX, 25, *pestilente flagellato stultus sapientior erit*<sup>3</sup>.

Ultimo quæritis, si bonum est ut provinciam vestram Judæi signum distinctivum a Christianis deportare cogantur.

Ad quod plana est responsio, et secundum statutum Concilii generalis, Judæi utriusque sexus in omni Christianorum provincia et in omni tempore aliquo habitu ab aliis populis debent distingui. Hoc eis etiam in lege eorum mandatur, ut scilicet faciant <sup>4</sup> fimbrias per sibi angulos palliorum, per quas <sup>5</sup> ab aliis discernantur.

Hæc sunt, illustris et religiosa Domina, quæ vestris quæstionibus ad præsens respondenda occurrunt : in quibus vobis non sic meam sententiam ingero, quin magis suadeam peritiorum sententiam magis<sup>6</sup> esse tenendam. Valeat Dominatio vestra per tempora longiora.

<sup>1</sup> Parm. : « consimiles. »

<sup>2</sup> Parm. : « commodum. »

<sup>3</sup> Parm. : « fit. »

<sup>4</sup> Parm. : « faciat fimbrias per quatuor angulos. »

<sup>5</sup> Parm. : « per quos. »

<sup>6</sup> Parm. omittit : « magis. »

# OPUSCULUM XVIII.

## DE FORMA ABSOLUTIONIS AD GENERALEM MAGISTRUM SUI ORDINIS.

(EDIT. ROM. XXII.)

### CAPUT I.

*Quod temerarium est dicere quod hoc non sit forma absolutionis, scilicet ego te absolvo, etc* <sup>1</sup>.

Perlecto libello a vobis exhibito, inveni assertionem cujusdam valde temerariam, dicentis quod sacerdos absolvendo uti non debet hac forma : « Ego te absolvo. » Quod quidem præsumptuosum judico, quia repugnat evangelicis dictis. Dicit enim Dominus Petro, Matth. XVI, 19 : *Quodcumque solveris super terram, erit solutum et in cælis* : quod ad usum clavium pertinere ostenditur : nam præmiserat : *Et tibi dabo claves regni cælorum* : et post quasi usum clavium exponens dicit : *Et quodcumque solveris*. Patet ergo ex dictis Salvatoris quod habens claves absolvit. Præsumptuosum est ergo, ne dicam erroneum, ut sacerdos dicere non possit, « Ego absolvo te, » quem Dominus absolvere confitetur. Magis autem ex verbis Domini colligitur hanc esse formam debitam absolvendi, « Ego te absolvo. » Sicut enim Dominus discipulis dixit : *Euntes docete omnes gentes, baptizantes eos*, Matth. ult. 19 ; ita dicit : *Quodcumque solveris super terram*. Unde, sicut conveniens est forma baptismi, ut minister dicat, « Ego te baptizo, » quia Dominus ministris actum baptizandi attribuit ; ita conveniens forma est ut dicatur, « Ego te absolvo, » quia Dominus ministro actum absolvendi attribuit. Diony-

sius etiam expresse in XIII capitulo *Angelicæ hierarchiæ* sic dicit : « Nihil igitur inconveniens, si purgare dicitur Theologum Seraphin. Nam sicut Deus purgat omnes, eo quod omnis purgationis est causa : magis autem propinquo utar exemplo, quemadmodum qui secundum nos est Hierarcha, idest Episcopus, per ipsius diaconos aut sacerdotes purgans aut illuminans, ipse dicitur purgare aut illuminare. » Patet ergo per auctoritatem Dionysii quod licet Deus ut principalis auctor purget et illuminet, minister tamen dicitur purgare et illuminare. Ad hoc etiam est communis consuetudo tali forma utentium, cui aliquem contrariari non parvæ præsumptionis est. Apostolus etiam II Corinth. II, 10, dicit : *Ego quod donavi, propter vos in persona Christi* : Glossa : « Si ergo magister petitione discipulorum donavit cui voluerint peccatum, multo magis discipuli prece magistri idem facere debent. » Et ut ratum ei cui donavit, ostenderet apud Deum, subdit : *Et hoc feci in persona Christi* ; idest ac si ipse Christus condonaret. Donare autem peccatum, est absolvere a peccato. Ergo convenienter minister dicit, « Ego te absolvo a peccato. » Non est etiam parva auctoritas ejus quod in Ecclesia cantatur,

Jam bone pastor Petre clemens accipe  
Vota precantium et peccati vincula  
Resolve tibi potestate tradita.

Potestas autem tradita Petro est potestas clavium. Potest ergo habens claves ex tradita sibi potestate dicere, « Ego te absolvo. »

<sup>1</sup> Hunc titulum omittit Parm.

Non solum autem hoc convenienter dicere potest; sed et necessarium esse videtur. Sacramenta enim novæ legis efficiunt quod figurant. Figurant autem seu significant et ex materia et ex forma verborum, ut in sacramento baptismi apparet: nam ablutio corporalis, quæ fit per aquam, significat interiorem ablutionem et sacramentaliter efficit eam: similiter verba quæ dicuntur, « Ego te baptizo, » idem significant. Et idem apparet in sacramento confirmationis, in quo forma est: « Consigno te signo crucis, et confirmo te chrismate salutis etc. » Quibus verbis manifeste effectus sacramenti figuratur. In sacramento etiam Eucharistiæ sacerdos ex persona Christi loquens dicit: « Hoc est corpus meum: Hic est calix sanguinis mei: » hoc significans quod in sacramento efficitur. Similiter etiam in sacramento Matrimonii requiruntur verba exprimentia consensum de præsentis in <sup>1</sup> copulam conjugalem. In sacramento vero Ordinis, quia fit traductio potestatis, est forma imperativi modi, cum Pontifex dicit: « Accipe potestatem » faciendi hoc vel illud. In solo autem sacramento Extremæ Unctionis forma verborum est sub modo deprecativæ orationis, sicut cum dicitur: « Per istam unctionem et suam sanctam ac piissimam misericordiam indulgeat tibi Deus quicquid deliquisti per visum etc. » Servatur autem hoc in hoc sacramento propter auctoritatem sacræ Scripturæ: dicitur enim Jacobi v, 15, ubi de hoc sacramento loquitur: *Oratio fidei salvabit infirmum, et alleviabit eum Dominus: et si in peccatis sit, remittentur ei:* ubi etiam ratio hujus singularis observantiæ assignari videtur. In aliis enim sacramentis nihil corporaliter agitur quod non statim ex operatione ministri sequatur; sicut statim in baptismo fit ablutio corporalis, quæ spiritualem designat, et sacramentaliter causat: sanatio autem corporalis non statim sequitur ex unctione, sed petitur præstanda a Deo: unde et interior sanatio, quæ per eam signatur, sub deprecatione a Deo poscitur. In sacramento autem pœnitentiæ verba Scripturæ, quæ maxime sunt sectanda,

non faciunt mentionem de aliqua deprecatione, sed magis verbo indicativo utitur: non enim dicit, Quæcumque petieris esse solvenda, erunt soluta: sed *Quæcumque solveris, erunt soluta*. Si ergo illa tantum dicuntur esse soluta quæ habens claves solverit; qui autem petit aliquid esse solvendum, non solvit: miror quæ temeritate aliquis asserat esse solutum, quem habens claves non significat se solvere, sed solum rogat esse solvendum.

Subest <sup>2</sup> autem ratio utendi deprecativa oratione in sacramento extremæ unctionis, non autem in sacramento pœnitentiæ, quia nihil hic corporale expectatur futurum, quod non statim fiat ut in extrema unctione: quinimmo certissimum est in hoc sacramento per claves Ecclesiæ remissionem peccatorum conferri, nisi sit impedimentum ex parte confitentis, sicut etiam accidit in baptismo. Dicit enim Augustinus lib. II *De adult. conjug.* c. IX: « Non <sup>3</sup> erit turpis nec difficilis post patrata et purgata adulteria reconciliatio conjugii, ubi per claves regni cœlorum non dubitatur fieri remissio peccatorum. » Non ergo sub incerto modo deprecativæ orationis significanda est in hoc sacramento remissio peccatorum, sed sub certitudine per indicativam orationem. Non ergo est forma in sacramento pœnitentiæ, « Absolutionem, et remissionem tribuat tibi omnipotens Deus; » sed « Ego te absolvo. »

## CAPUT II.

*Rationes probare volentium dictam absolutionis formam non debere teneri et earum solutiones <sup>4</sup>.*

Sicut autem temerarius est in asserendo, ita vaniloquus in probando, dum frivola quædam pro rationibus inducit.

Primo enim inducit quamdam postillam super summam Raimundi, (a) quæ dicit quod « in talibus, » scilicet <sup>5</sup> excommunicatione et absolutione, « quamvis verba exigantur, non tamen præscripta

<sup>1</sup> Parm.: « et. »

<sup>2</sup> Parm.: « non autem similis ratio est utendi deprecativa oratione in hoc sacramento, sicut in sacramento extremæ unctionis. »

<sup>3</sup> « Non est... post perpetrata... reconciliatio conjugum. »

<sup>4</sup> Parm.: « objectiones cum resolutionibus. »

<sup>5</sup> Parm. addit: « ab. » — Parm.: excommunicatione, licet »

(a) Raimundi a Pennafort, Canonistæ celeberrimi.



est forma verborum, sicut in sacramento Baptismi et Eucharistiæ. » Ubi primo derisorium est in tanta re postillam summæ pro auctoritate adducere. Deinde, ut postillatori non fiat injuria, dicamus quod alia ratio est de absoluteione ab excommunicatione, quæ non est sacramentalis, sed magis judiciaria, jurisdictionem consequens; et aliud de absoluteione a peccatis in sacramento pœnitentiæ, quæ consequitur potestatem clavium, et est sacramentalis. In illa enim verba habent efficaciam ab intentione dicentis, unde non refert quibuscumque verbis utatur ad exprimendam suam intentionem; in sacramentis autem verba habent efficaciam ex institutione divina, unde tenenda sunt verba determinata consonantia divinæ institutioni. Institutioni autem dicentis: *Quodcumque solveris* etc. ista verba conveniunt, « Ego te absolvo; » sicut institutioni dicentis, *Euntes docete omnes gentes baptizantes*, etc. Sicut ergo ista tenenda sunt in baptismo, « Ego te baptizo; » ita in pœnitentia, « Ego te absolvo. »

Secundo autem ponit quod Magister qui sententias compilavit, non posuit hanc formam, nec aliquem sanctorum legimus hac forma usum fuisse. Contra quod dicendum est quod nec Magister formam posuit, nec legitur de alia forma qua aliquis sanctorum sit usus, nec etiam legitur quod aliquis istam formam negaverit; legitur autem quod ipse institutor sacramenti dixit, *Quodcumque solveris*, quod est majus omni auctoritate.

Tertio ad hoc inducit quod in quibusdam absoluteionibus quas Ecclesia facit in Prima et in Completorio, ante Missam, et post prædicationem secundum morem Romanæ Ecclesiæ, et in die cinerum, et cœnæ Domini, non fit absoluteio per orationem indicativam, sed per deprecativam tantum<sup>1</sup>. In quo miror eum non advertere quod hujusmodi absoluteiones non sunt sacramentales, sed sunt quædam orationes quibus dicuntur venialia peccata dimitti, sicut per orationem dominicam, qua dicitur *Dimitte nobis debita nostra*.

Quarto autem inducit sic sensisse quos-

dam antiquos famosos Magistros, scilicet Magistrum Gulielmum de Altissiodoro, et Magistrum Gulielmum Alvernum<sup>2</sup> quondam Episcopum Parisiensem, et Dominum Hugonem (a) quondam Cardinalem: de quibus quod ita senserint, non constat. Sed etsi ita senserunt, numquid eorum opinio præjudicare poterit verbis Domini dicentis Petro: *Quodcumque solveris* etc.? Numquid etiam si nunc viverent, præjudicare possent communi sententiæ Magistrorum Theologiæ<sup>3</sup> Parisius legentium<sup>4</sup>, qui contrarium sentiunt discernentes absque his verbis, « Ego te absolvo, » absoluteionem non esse per solam deprecativam orationem?

Quinto vero proponit de eo quod agitur in sacramento extremæ unctionis quod supra solutum est.

Sexto objicit de hoc quod Matth. ix, cum dixisset Dominus paralytico, *Remittuntur tibi peccata tua*, dixerunt, *Hic blasphemat*: nam peccata dimittere solius est Dei: non ergo sacerdotis. Hoc etiam per verba Dionysii supra solutum est; quia Dei est auctoritate peccata dimittere, hominis autem est ministerium ad remissionem exhibere, dum in persona Christi peccata condonat, sicut dicit Apostolus.

Septimo objicit quod in suscitatione Lazari, secundum Augustinum et Gregorium, significata est suscitatio<sup>5</sup> peccatorum; sed Lazarus est prius a Domino vivificatus, quam traderetur discipulis absolvendus. Ex quo arguit quod nihil valet absoluteio sacerdotis antequam homo sit a Deo vivificatus per gratiam, et suscitatus a morte culpæ. Ergo sacerdos non potest super culpam. Quæ quidem ratio multiplices defectus habet. Primo quidem, quia arguitur ex metaphoricis locutionibus, ex quibus non est arguendum, ut Dionysius et Augustinus dicunt. Secundo, quia ratio sua non est ad propositum. Constat enim quod Dominus Lazarum suscitavit, et discipulis solvendum mandavit. Ergo discipuli absolvunt. Per hoc ergo non ostenditur quod sacerdos non absolvat, aut non debeat dicere, « Ego te absolvo; » sed quod eum non debet absolvere in quo signa contritionis

<sup>1</sup> Parm. omittit: « tantum. »

<sup>2</sup> Parm. omittit: « Alvernum. »

<sup>3</sup> Parm. omittit: « theologiæ. »

<sup>4</sup> Parm.: « regentium, » sed non recte; non omnes etenim « regentes » erant.

<sup>5</sup> Parm.: « suscitationis peccatorum præparatio; quia. »

(a) Hugonem a S. Charo. *Concordantiarum Bibliæ* inventorem, totius Scripturæ sacræ postillatorem conspicuum, primumque cardinalem ex FF. Prædicatorum ordine assumptum.

non videt, per quam homo justificatur interius a Deo culpa remissa.

Et cum <sup>1</sup> dicit quod sacerdos non potest super culpam potestatem, hoc potest habere calumniam; quia si intelligat quod sacerdos sua auctoritate super culpam potentiam non habet, dicit verum. Si autem intelligit quod sacramentum quod sacerdos ut minister tradit, non se extendat ad remissionem culpæ, falsum dicit. Sicut enim per baptismum dimittitur omnis culpa et originalis et actualis; ita per sacramentum pœnitentiæ remittitur actualis culpa. Contingit autem quandoque in baptismo quod aliquis antequam sacramentum baptismi actu percipit, dum habet sacramentum in voto vel in proposito, consequitur justificationem a solo Deo: et tamen si ante consecutus non fuerit ex vi sacramenti, nisi obicem opponat, justificationem consequitur sacramentum suscipiendo: ita omnino est de pœnitentia. Nullus enim reputatur contritus, nisi habeat propositum subjiçendi se Ecclesiæ clavibus; quod est habere sacramentum in voto. Unde quandoque aliqui consequuntur justificationem in ipsa absolutione, quam ante non fuerant assecuti.

Octavo objicit quod parvis potestatis est baptismo abluere interius, et a culpa mortali absolvere. Sed Deus non communicavit potestatem interius baptizandi, ne spes poneretur in homine. Ergo nec absolvendi ab actuali peccato. In quo suam vocem ignorare videtur contra se ipsum objiciens. Sicut enim solus Deus interius baptizat, et tamen quia homo ministerium exterius exhibet, dicit, « Ego te baptizo, » ita Deus per se ipsum a peccato absolvit, et tamen homo, qui exterius ministerium exhibet, dicere debet, « Ego te absolvo. »

Nono objicit, quod remissio peccatorum fit per gratiam, quam homo dare non potest. Cui dicendum est, quod licet homo non possit dare gratiam, potest tamen dare gratiæ sacramentum per quod fit remissio peccatorum.

Decimo objicit, quod Dominus dixit ad Moysen: *Loquere Aaron et filiis ejus: Sic benedicetis filiis Israel, et dicetis eis: Benedicat tibi Dominus, et custodiat te: Numer. vi, 23, et subditur: Invocabuntque nomen meum super filios Israel, et ego*

*benedicam eis; quod videntur imitari prælati, cum dicunt, « Benedicat vos Deus, » vel divina majestas; nec dicunt, « Ego te benedico. » Hic aperte decipitur, quia benedictio ista non est sacramentalis; sed ubi sacramentalis benedictio occurrit, sicut in sacramento Eucharistiæ, tunc ipsi sacerdotes, benedicere dicuntur: unde Apostolus dicit I Cor. x, 16: *Calix benedictionis, cui benedicimus.* Glossa: « Cui nos sacerdotes quotidie benedicimus. » Nec est verum quod subdit, quod hoc quod dicitur, « Absolutionem et remissionem tribuat tibi etc., » sit forma, aut pars formæ. Non enim conveniunt verbis Scripturæ, quæ dicit: *Quodcumque solveris, etc. Quorum remiseritis, etc.* Nec hoc quod dicitur: « Benedictio Dei omnipotentis etc. » pars est formæ; cum hoc ex Scriptura trahi non possit, nec in usu communi habeatur, licet aliqui hoc dicant.*

Undecimo objicit, quod cum clavis sit potestas quæ est in ministro, si extendere se ad culpæ absolutionem, hoc esset per modum efficiendi, quod soli Deo competit. Cujus solutio jam ex præmissis <sup>2</sup> apparet. Potestas enim clavium se extendit ad absolutionem culpæ, non sicut causa efficiens principalis, hoc enim Dei est, sed sicut instrumentum: sicut et aqua baptismi, de qua Augustinus dicit, quod « corpus tangit, et cor abluit. »

Duodecimo objicit, quod Dominus idem voluit ostendere dicens: *Quodcumque solveris etc., et Quorum remiseritis etc.* Nullus autem dicit, « Ego tibi remitto peccata. » Ergo nec debet dicere, « Ego te absolvo. » Sed obliviscitur ejus quod Apostolus dicit, se donasse peccatum non propria auctoritate, sed in persona Christi. Donare autem idem est quod etiam remittere. Papa etiam se relaxare dicit aliquam partem de pœnitentia injuncta: ideo enim in absolutione sacramentali potius utimur verbo absolutionis quam remissionis, ut forma absolutionis conveniat verbis institutionis: quia Dominus exponens clavium potestatem, his verbis usus est, *Quodcumque solveris etc.*

Tertiodecimo objicit ex auctoritate Hieronymi reprehendentis quosdam de eo quod putant se damnare innoxios, vel absolvere noxios. Non enim sacerdos a peccatis absolvens noxios solvit qui vo-

<sup>1</sup> Parm.: « quia vero dicit, quod sacerdos non potest habere super culpam potestatem, et hoc

habere potest calumniam; sciendum est quod. »  
<sup>2</sup> Parm.: « dictis patet. »

luntate noxii remanent, sed qui pœnitendo recedunt a noxa culpæ.

Quartodecimo objicit de hoc quod Hieronymus dicit *Super Levit.*, quod leprosi jubentur ostendere se sacerdotibus, quos illi non faciunt leprosos vel mundos, sed discernunt, ita et hic. Decipitur autem, quia similitudinem nimis extendit. Absit enim ut sacramenta novæ legis solum significant, et nihil faciant, sicut veteris legis sacramenta. Si autem sacerdos solum discernendo denuntiaret peccatoris absolutionem, nihil faceret, sed tantum significaret. Ergo facit aliquid ministerium absolutionis impendendo; non tamen facit idoneos accedentes ad sacramentum: hoc enim solus Deus facit, qui ad se hominum corda convertit: et respectu hujus idoneitatis non habet sacerdos nisi discretionem, sicut et sacerdos legalis circa lepram.

Quintodecimo objicit, quod Ambrosius dicit, quod « solus ille peccata dimittit qui pro peccatis mortuus est. » Augustinus etiam dicit, quod « nemo tollit peccata mundi nisi solus Christus. » Hoc solvit Apostolus dicens, quod ipse donavit in persona Christi, scilicet tamquam Christi minister, qui sua passione remissionem meruit peccatorum; a qua passione efficaciam habent claves Ecclesiæ, sicut et cetera sacramenta.

Sextodecimo objicit de leprosis mundatis a Christo, Matth. viii et Luc. xvii, quibus dixit, quod ostenderent se sacerdotibus; tamen antequam se ostenderent; mundati sunt. Quod similiter solvendum est, sicut id quod de Lazaro supra posuit.

Decimo septimo resumit, quod cum Dominus dixisset paralytico, *Dimittuntur tibi peccata*, Judæi dixerunt, *Hic blasphemat*. Hoc supra solutum est, nec oportet reiterare.

### CAPUT III.

*Quomodo adversarius nititur quamdam absolutionem fingere.*

His autem rationibus positis, nititur quamdam absolutionem fingere, quæ est, « Si aliquis talis dicat, quod ad ministerium sacerdotis pertinet oratio absolutionem Dei impetrans, postea tamen debet dicere judicative, « Ego te absolvo, idest absolutum te ostendo. » Quam

quidem absolutionem nec ego approbo, si simpliciter, ut verba sonant, intelligatur. Non enim oratione sacerdotis impetratur remissio peccatorum, sed passione Christi. Alioquin si sacerdos esset in peccato mortali, absolvere non posset. Præmittitur autem oratio, ut impetretur confitenti idoneitas ad suscipiendum effectum sacramenti. Quæ quidem oratio licet plus valeat a justo quam a peccatore oblata propter meritum personæ quod additur, tamen etiam a sacerdote peccatore oblata non est cassa, quia proponitur ab eo in persona totius Ecclesiæ. In forma autem sacramentorum non plus facit verbum a peccatore quam a justo prolatum; quia non operatur ibi meritum hominis, sed passio Christi, et virtus Dei. Similiter non sufficit illa expositio: « Ego te absolvo, idest absolutum te ostendo: » quia secundum hoc in sacramentis novæ legis non esset nisi ostensio, vel significatio, quod idem est; sed est sensus: « Ego te absolvo, » idest sacramentum vel ministerium absolutionis tibi impendo: nisi forte sicut aliquis dicitur ostendere, non solum significando, sed etiam faciendo.

Si tamen dicta responsio sustineatur, non utile erit considerare, quam frivolis eam rationibus impugnet. Objicit enim primo, quod Dominus dedit potestatem discipulis sanandi omnes infirmitates corporales et spirituales. Sed in sanatione corporalium infirmitatum non dicebant, Ego sano te, sed sanet te Dominus Jesus. Ergo nec in sanatione spirituali debet dicere sacerdos, « Ego te absolvo. » Non advertit autem qui hoc objicit, quod potestas sanandi infirmitates erat gratia specialiter homini data, non ad sanandum, sed ad sanitatem impetrandam. Potestas autem clavium non computatur inter gratis datas, sed virtus sacramentalis, quæ principaliter residet in Christo, instrumentaliter autem seu ministerialiter in sacerdotibus claves habentibus. Unde verbum dicentis, Sanet te Dominus, non sanabat, sed sanationem impetrabat. Verba autem sacramentalia efficiunt quod figurant, ut supra dictum est.

Secundo objicit, quod temerarium videtur denuntiare aliquem esse ab omnibus peccatis absolutum, quia sic esset sicut Angelus Dei. Sed multo magis est temerarium dicere, quod per claves Ecclesiæ non fiat certa remissio peccatorum, ut Augustinus dicit. Numquid enim est

abbreviata manus Domini, ut qui in baptismo ab omnibus peccatis mundat, in sacramento pœnitentiæ hoc non faciat?

Tertio objicit quod dicere, Ostendo te absolutum, non est eum ostendere absolutum, sicut dicere, Comedo, non est comedere. In quo decipitur non considerans, quod formæ sacramentorum non solum sunt verba significativa, sed factiva.

Quarto objicit, quod cum dicitur, « Ego te baptizo, » non est baptizare, nisi sequatur immersio, vel intinctio. Sed hoc est valde ridiculum: quia in sacramento baptismi elementum materiale requiritur cum forma sacramenti; sed in sacramento pœnitentiæ elementum exterius non adhibetur.

Quinto objicit, quod temerarie sacerdos dicit, Ostendo te absolutum, cum ignoret an Deus absolverit. Sed secundum hanc eandem rationem temerarium esset dicere, « Ego te baptizo, » cum ignoret an Deus interius baptizet. Neutrum autem est temerarium, quia sacramenta habent certos effectus, licet impediri possint per fictionem recipientis. Unde sacerdos dicens, « Ego te absolvo, vel « Ego te baptizo, » cum certitudine denuntiat sacramenti effectum.

Similiter dicitur ad id quod sexto et septimo objicit de incertitudine dimissionis pœnæ.

Octavo objicit, quod non potest dicere, Ostendo te absolutum, nisi forte alicui sit revelatum, sicut Joanni Evangelistæ, vel B. Virgini. Ad quod etiam super id quod dictum est, addendum est, quod si iudex absque temeritate testibus auditis potest pronuntiare aliquem innocentem, quamvis forte sit nocens secundum rei veritatem; non temerarie ostendit sacerdos aliquem absolutum in foro pœnitentiæ, in quo creditur pœnitendi pro se, et contra se.

Ex quo etiam patet quod non est periculosum sacerdoti dicere, « Ego te absolvo, » illis in quibus signa contritionis videt, quæ sunt dolor de præteritis et propositum de cetero non peccandi: alias absolvere non debet. Periculose autem solam orationem dicit, quia hoc non est absolvere, sed sub dubio pœnitentiæ relinquere. Orare autem pro aliquo ut absolvatur, potest, sive sit contritus, sive non.

#### CAPUT IV.

*Quod impositio manus sacerdotis non est de necessitate hujus sacramenti.*

Ulterius autem non minus temerarie asserere præsumit, quod impositio manus sit de necessitate hujus sacramenti.

Primo quidem propter hoc quod Act. viii, 17, dicitur: *Imponebant manus super illos, et accipiebant Spiritum sanctum.* Illa enim impositio fuit loco sacramenti confirmationis, quod datur per majores ministros.

Secundo objicit quod Marc. ult., 18, dicitur: *Super ægros manus imponent, et bene habebunt.* Sed hoc est ridiculum: quia non loquitur de impositione sacramentali, sed de signis faciendis.

Tertio objicit, quod Augustinus dicit quod sacramentum novæ legis debet esse signum sacræ rei, et per naturalem similitudinem quod de suo addit: per hoc volens dicere, quod sola verba non faciunt nec perficiunt sacramentum. Sed patet in omni sacramento quod verba ad materiam accedentia perficiunt sacramentum. In sacramento enim Eucharistiæ sola verba prolata super materiam consecrandam perficiunt sacramentum. In baptismo etiam verba prolata super aquam tantum non faciunt sacramentum, sed supra aquam adhibitam in baptismo, quia totum est loco materiæ. Ipse autem peccator confitens, est sicut materia in hoc sacramento. Unde verba absolutionis super eum prolata efficiunt pœnitentiæ sacramentum.

Quarto objicit quod dicitur Matth. xix, 13, quod *oblatis sunt parvuli, ut eis manus imponeret.* Sed hoc non potest referri ad pœnitentiæ sacramentum, quod parvulis impendi non consuevit. Oblati sunt autem ei, ut manus imponeret benedicens, secundum consuetudinem Judæorum ut dicit Remigius.

Quinto objicit, quod dicitur Actuum viii, 18: *Cum vidisset Simon quod per impositionem manuum Apostolorum, etc.* Hoc autem pertinet ad impositionem manuum quæ fit in confirmatione, ut supra dictum est.

Sexto objicit ad hoc auctoritatem Magistri Gulielmi Alverni, (a) qui an hoc

(a) Parisiensis Episcopi, qui ann. 1248 exc-

sit e vivis.

dixerit nescio; sed scio eum non fuisse tantæ auctoritatis ut ejus dicto standum sit in tanta re; præsertim cum Dominus Petro potestatem clavium exponens non dixerit, Cuicumque manus imposueris, sed *Quodcumque solveris*.

## CAPUT V.

### *Objectiones contra prædicta, et earum solutiones.*

Ultimo redit ad primum, resumens rationes prius adductas quod non debet sacerdos dicere « Ego te absolvo: » tum quia hoc pertinet ad potestatem Dei; tum quia sacerdoti incertum est an ille absolvatur: quæ jam supra soluta sunt.

Addit etiam objiciendo, quod vix triginta anni sunt quod omnes hac sola forma utebantur, « Absolutionem et remissionem etc. » Sed quomodo de omnibus potest testimonium perhibere, qui omnes non vidit? Sed hoc certum est quod jam sunt mille ducenti anni et amplius quod dictum est Petro: *Quodcumque solveris* etc. Quare autem non dicatur in forma, Ego tibi remitto, sicut « Ego te absolvo, » jam supra dictum est.

Objicit autem ulterius quod si sacerdos potest absolvere a peccatis, utilius esset absolvi quam accipere crucem transmarinam. Quod quam ridiculum sit dictum, de facili potest adverti. Non enim crux transmarina datur valitura nisi absoluto a peccatis ad remissionem totius pænæ pro peccatis debitæ.

Objicit autem ulterius quod væ imminet vivificanti animas quæ non vivunt, ut dicitur Ezech. xiii, 18; et sic sacerdos se committit discrimini, cum nesciat quod vivant. Sed hoc jam solutum est: quia etsi nesciat quod vivant, scit tamen quod sacramentum justificare potest.

<sup>1</sup> Parm.: « propriorum quisque peccatorum vinculis constringitur. »

(a) Opinionem de forma absolutionis quam tenebat olim scriptor a S. Thoma in hoc opusculo impugnatus, penitus erat antiquata, cum eam suscitavit Joannes Morinus, Oratorii Presbyter, lib. VIII *De pœnitentia*. Hunc secuti sunt Iucnin, Witasse, Vanroy, Tournely, Piette, et alii. Fatentur nunc in Ecclesia Latina post conc. Florentini et Tridentini definitionem, formulam indicativam necessario adhibendam esse, nec depreca-

ulterius objicit quod, sicut dicit Ambrosius, Dominus parem vim esse voluit ligandi et solvendi. Sed sacerdos non ligat vinculo peccati, sed <sup>1</sup> *peccatorum suorum* quisque *funibus constringitur*, ut dicitur Prov. v, 22. Ergo sacerdos non absolvit a vinculo culpæ. Contra quod dicendum quod hoc sacerdos facit ligando et solvendo per ministerium quod Deus dedit per auctoritatem. Deus enim absolvit a peccato directe, gratiam apponendo; et ligat vel trahit in peccatum, gratiam non apponendo, ut dicitur Rom. i. Similiter sacerdos tamquam minister a peccato solvit, sacramentum gratiæ apponendo; et ligat non apponendo, propter hoc quod ligat ad pœnam quam jungit.

Inducit autem ultimo auctoritatem Hilarii quod soli Deo de se credendum est; et sic absolutionem a culpa, quam solus Deus facit, sacerdos ostendere non potest.

Item quod Dionysius dicit quod sacerdotibus non est utendum virtutibus hierarchicis nisi quo Deitas voluerit eos. Sed hæc ex superioribus sunt soluta multoties, et iterare non oportet.

Ad extremum inducit quod ante potestatem clavium Petro traditam fit mentio de revelatione sibi facta, quasi oporteat semper revelationem divinam sacerdotem expectare antequam clavibus utatur. Non advertit autem quod revelatio facta Petro non fuit de idoneitate absolventorum, sed de potestate Christi, per quam sacramenta gratiæ certissimos effectus habent.

Hæ sunt igitur rationes quas pro se inducit: quæ non solum demonstrationes non sunt, sed vix apparentes rationes judicari possunt. Voluntas autem Dei fuit ut pro defensione potestatis Petro traditæ, in festo Cathedræ Petri hoc opus de vestro mandato compilans laborem (a).

tionem sufficere. Sed duodecim prioribus Ecclesiæ sæculis sufficiebat, juxta illos et apud Græcos semper valuit, etiamnumque valet. Ast Arcadius, natione Græcus, diserte probat formas Græcorum, quæ videntur deprecativæ non esse mere deprecativæ, sed habere sensum absolutum, ac formæ indicativæ æquivalere; insuper, Clemens Papa VIII formam indicativam quibusdam imposuit Græcis, qui, etsi non omnes Græci id agerent, utebantur tamen ipsi forma solummodo deprecatoria.



# OPUSCULUM XIX.

## IN DECRETALEM I. EXPOSITIO AD ARCHIDIACONUM TRIDENTINUM<sup>1</sup>.

(EDIT. ROM. XVIII.)

### *De summa Trinitate et Fide catholica.*

Firmiter credimus et simpliciter confitemur quod unus solus est verus Deus, aternus et immensus, incommutabilis, incomprehensibilis et ineffabilis, Pater et Filius et Spiritus sanctus : tres quidem personæ, sed una essentia, substantia, seu natura, simplex omnino. Pater a nullo, Filius autem a solo Patre, ac Spiritus sanctus ab utroque pariter, absque initio et fine. Pater generans, Filius nascens et Spiritus sanctus procedens ; consubstantiales et cœquales, cœnipotentes et cœterni, unum universorum principium, creator omnium invisibilium et visibilium, spiritualium et corporalium, qui sua omnipotenti virtute simul ab initio temporis utramque de nihilo condidit creaturam, spiritualem et corporalem, angelicam videlicet et mundanam, ac deinde humanam, quasi communem, ex spiritu et corpore constitutam. Diabolus enim et demones alii, a Deo quidem natura creati sunt boni, sed ipsi per se facti sunt mali : homo vero diaboli suggestionem peccavit.

Hæc sancta Trinitas secundum communem essentiam individua et secundum personales proprietates discreta, per Moysen et sanctos Prophetas, aliosque famulos suos, juxta ordinatissimam dispositionem temporum, doctrinam humano generi tribuit salutarem. Et tandem unigenitus Dei Filius Jesus Christus a tota Trinitate communiter incarnatus, ex Maria semper virgine Spiritus sancti cooperatione conceptus, verus homo factus ex anima rationali et humana carne compositus, una in duabus naturis persona, viam vitæ manifestans demonstravit. Qui cum secundum divinitatem sit immortalis et impassibilis, idem ipse secundum humanitatem factus est passibilis et mortalis : quin etiam pro salute humani generis in ligno crucis passus et mortuus, descendit ad inferos, resurrexit a mortuis et ascendit in cœlum. Sed descendit in anima, resurrexit in carne, ascenditque pariter in utroque ; venturus in fine sæculi judicare vivos et mortuos, et redditurus singulis secundum opera sua, tam reprobis quam electis. Qui omnes cum suis propriis corporibus resurgent, que nunc gestant ; ut recipiant secundum merita sua, sive bona fuerint, sive mala ; illi cum diabolo penam perpetuam, et isti cum Christo gloriam sempiternam.

Una vero est fidelium universalis Ecclesia, extra quam nullus omnino salvatur. In qua idem ipse Sacerdos et sacrificium Jesus Christus : cujus corpus

et sanguis in sacramento altaris sub speciebus panis et vini veraciter continentur, translatis<sup>2</sup> pane in corpus et vino in sanguinem, potestate divina, ut ad perficiendum mysterium unitatis accipiamus ipsi de suo quod accepit ipse de nostro. Et hoc utique sacramentum nemo potest conficere nisi Sacerdos qui fuerit rite ordinatus secundum claves Ecclesiæ, quas ipse concessit Apostolis et eorum successoribus Jesus Christus.

Sacramentum vero baptismi quod ad invocationem individua Trinitatis, videlicet Patris et Filii et Spiritus sancti, consecratur in aqua, tam parvulis quam adultis in forma Ecclesiæ a quocumque rite collatum, proficit ad salutem.

Et si post susceptionem baptismi quisquam prolapsus fuerit in peccatum, per veram pœnitentiam semper potest reparari. Non solum autem virgines et continentes, verum etiam conjugati, per fidem rectam et operationem bonam placentes Deo, ad æternam merentur beatitudinem pervenire.

### CAPUT I.

#### *Quid sit fides, et de quibus sit<sup>3</sup>.*

Salvator noster discipulos ad prædicandum mittens, tria eis injunxit. Primo quidem ut docerent fidem ; secundo ut credentes imbuerent sacramentis ; tertio ut credentes sacramentis imbutos ad observandum divina mandata inducerent : dicitur enim Matth. ult. 19 : *Euntes, docete omnes gentes*, quantum ad primum : *baptizantes eos in nomine Patris et Filii et Spiritus sancti*, quantum ad secundum : *docentes eos servare omnia quæcumque mandavi vobis*, quantum ad tertium. Inter quæ tria decenter fidei doctrina præmittitur. Est enim fides omnium bonorum spiritualium fundamentum, secundum illud Apostoli Hebr. xi, 1 : *Est autem fides substantia* (idest fun-

<sup>1</sup> Al. : « cœlestinum. » Cod. S. Viet. : « Tunderinum. » et forsân melius. »

<sup>2</sup> Parm. : « transsubstantiatis. »

<sup>3</sup> Parm. omittit cap. i. — Quid sit fides, et de quibus sit.

damentum) *sperandarum rerum*. Est enim fides per quam anima vivificatur per gratiam, secundum illud Apostoli Galat. II, 20 : *Quod autem nunc vivo in carne, in fide vivo Filii Dei*; et Habac. II, 4 : *Justus ex \* fide sua vivit*. Ipsa est per quam anima a peccatis purgatur : Act. XV, 9 : *Fide purificans corda eorum*. Ipsa est per quam anima justitia ornatur<sup>1</sup> : Roman. III, 22 : *Justitia autem Dei per fidem Jesu Christi*. Ipsa est per quam anima Deo desponsatur : Oseæ II, 20 : *Sponsabo te mihi in fide*. Ipsa est per quam homines in Dei filios adoptantur : Joan. I, 12 : *Dedit eis potestatem filios Dei fieri, his qui credunt in nomine ejus*. Ipsa est per quam acceditur ad Deum : Hebr. XI, 6 : *Accedentem ad Deum oportet credere*. Ipsa denique est per quam homines æternæ vitæ bravium consequuntur, secundum illud Joan. VI, 40 : *Hæc est voluntas Patris mei qui misit me, ut omnis qui videt Filium et credit in eum, habeat vitam æternam*. Convenienter ergo Christi Vicarius propositurus mandata quibus Ecclesia per Apostolorum prædicationem fundata pacifice gubernatur, titulum de fide præmittit.

Sed considerandum est quod cum multi sint articuli fidei, quorum quidam videntur pertinere ad ipsam<sup>2</sup> divinitatem, quidam vero ad humanam naturam, quam Filius Dei in unitatem personæ assumpsit, alii vero ad divinitatis effectum, fundamentum tamen totius fidei est ipsa prima veritas divinitatis<sup>3</sup>, cum omnia alia ea ratione contineantur sub fide, in quantum ad Deum aliquammodo referuntur<sup>4</sup>. Unde Dominus discipulis dicit Joan. XIV, 1 : *Creditis in Deum, et in me credite*; per quod datur intelligi quod in Christum creditur in quantum est Deus, quasi fide principaliter de Deo existente. Inter ea vero quæ de Deo fide tenemus, hoc est singulare fidei christianæ ut Trinitatem personarum in unitate divinæ essentiæ fateamur. Sub hac enim professione Christo per baptismum sumus consignati, ut patet per id quod supra inductum est : *Baptizantes eos in nomine Patris et Filii et Spiritus sancti*. Alia vero quæ de Deo asserimus, nobis et aliis communia esse inveniuntur; puta quod Deus est unus,

omnipotens, et si qua alia de Deo fide tenentur; quæ etiam Judæi et Saraceni non diffitentur. Unde ad insinuandum proprium et singulare dogma fidei christianæ, non prætitulavit fidei tractatum de Deo, sed de « Trinitate. » Addidit<sup>5</sup> autem, « Summa, » quia divina Trinitas arcem quamdam tenet inter plurimas trinitates ab ea derivatas. Derivatur enim ab illa Trinitate divina quædam trinitas in anima nostra, secundum quam ad imaginem Dei sumus secundum memoriam, intelligentiam et voluntatem. Derivantur et ab ipsa aliæ trinitates in singulis creaturis, prout modum quemdam, speciem et ordinem habent secundum quæ in eis divinæ Trinitatis quasi quoddam vestigium invenitur, ut Augustinus dicit in libro *De Trinitate*. Ad discretionem igitur harum omnium trinitatum quæ a divina descendunt, dicitur, « De summa Trinitate. »

Sed de hac Trinitate divina diversi hæretici diversa errantes senserunt<sup>6</sup>; quorum Sabellius abstulit personarum distinctionem dicens, Patris et Filii et Spiritus sancti esse unam essentiam et personam, sed eos solum differre nominibus; Arius vero posuit trium personarum esse diversas substantias, in dignitate et duratione differentes; quæ omnia et consimilia fides condemnat catholica. Quia igitur de summa Trinitate et alii ad fidem pertinentibus hic tradere intendit quod fides catholica tenet; ideo additur, « Et fide catholica. » Dicitur autem fides Ecclesiæ catholica, idest universalis, ut Boetius dicit in libro *De Trinitate*, tum propter universalium præcepta regularum, tum propterea quia ejus cultus per omnes pene mundi terminos emanavit; hæreticorum vero errores sub certis terrarum angulis includuntur<sup>7</sup>.

Quia de fide sanctæ Trinitatis considerandum est; primo oportet scire, quod duplex est actus fidei, scilicet corde credere et ore confiteri<sup>8</sup>, secundum illud Rom. X, 10 : *Corde creditur ad justitiam, ore autem confessio fit ad salutem*. Uterque autem actus aliquid requirit ad sui perfectionem. Nam interior actus fidei exigit firmitatem absque omni dubitatione, quæ firmitas provenit ex infallibilitate

<sup>1</sup> Al. : « ordinatur. »

<sup>2</sup> Parm. omittit : « ipsam. »

<sup>3</sup> Al. : « deitatis. »

<sup>4</sup> Parm. : « reducuntur. »

<sup>5</sup> Parm. : « addit. »

<sup>6</sup> Parm. : « dixerunt. »

<sup>7</sup> Parm. addit : « de reprobatione errorum tam hæreticorum quam philosophorum. »

<sup>8</sup> Parm. : « profiteri. »

divinæ veritatis, cui fides innitur : unde dicitur Jac. 1, 6 : *Postulet autem in fide nihil hæsitans*. Sed confessio fidei debet esse simplex, idest absque simulatione, secundum illud I ad Timoth. 1, 5 : *Finis præcepti est caritas de corde puro et conscientia bona et fide non ficta*. Debet etiam esse simplex, idest absque erroris permutatione, secundum illud I ad Thessal. 11, 3 : *Exhortatio non fuit de errore*. Debet etiam esse absque variatione : II ad Corinth. 1, 18 : *Sermonoster qui fuit apud vos, non fuit in illo Est et Non*. Quantum ergo ad primum actum fidei dicit, « Firmiter credimus » ; quantum ad secundum dicit, « Simpliciter confitemur. » Ultimo autem considerandum est, quod fidei christianæ articuli a quibusdam duodecim, a quibusdam quatuordecim computantur. Secundum illos qui computant quatuordecim, septem articuli pertinent ad divinitatem, septem vero ad humanitatem. Illi autem qui ad divinitatem pertinent, sic distinguuntur, ut unus sit articulus de divinæ essentialitatis unitate, qui tangitur in *Symbolo* cum dicitur : « Credo in unum Deum. » Secundus<sup>1</sup> est de persona Patris, qui tangitur cum dicitur : « Patrem omnipotentem. » Tertius est de persona Filii qui tangitur cum dicitur : « Et in Jesum Christum Filium ejus. » Quartus est de persona Spiritus sancti, qui tangitur cum dicitur : « Et in Spiritum sanctum. » Quintus est de effectu, quo a Deo creamur in esse naturæ, qui tangitur cum dicitur : « Creatorum cæli et terræ. » Sextus est de effectu Dei secundum quod revertimur in esse gratiæ, qui tangitur cum dicitur : « Sanctam Ecclesiam catholicam, sanctorum communionem et remissionem peccatorum, » quia<sup>2</sup> per gratiam Dei in unitatem Ecclesiæ congregamur, sacramenta communicamus et remissionem peccatorum consequimur. Septimus articulus est de effectu Dei quo perficimur in esse gloriæ et quantum ad corpus et quantum ad animam ; et hic<sup>3</sup> tangitur cum dicitur : « Carnis resurrectionem et vitam æternam. » Articuli vero septem ad incarnationem pertinentes sic distinguuntur, ut primus sit de Christi conceptione, qui tangitur cum dicitur : « Qui conceptus est de Spiritu sancto. » Secundus

autem est de ejus navitate, qui tangitur cum dicitur : « Natus ex Maria Virgine. » Tertius est de ejus passione, qui tangitur cum dicitur : « Passus, mortuus et sepultus. » Quartus est de descensu ad inferos : « Descendit ad inferos. » Quintus de resurrectione : « Tertia die resurrexit a mortuis. » Sextus de ascensione : « Ascendit ad cælos. » Septimus de adventu ad iudicium : « Inde venturus est iudicare vivos et mortuos. » Alii vero ponentes duodecim articulos, ponunt unum articulum de tribus personis : et articulum de effectu gloriæ dividunt in duos, ut scilicet alius articulus sit de resurrectione carnis, et alius de vita æterna : et sic articuli ad divinitatem pertinentes sunt sex. Item conceptionem et navitatem Christi sub uno articulo comprehendunt : et sic etiam articuli de humanitate fiunt sex : unde omnes<sup>4</sup> sunt duodecim.

## CAPUT II.

*In quo agitur de personarum pluralitate, et essentialitatis unitate, et rerum creatione*<sup>5</sup>.

Primo prosequitur articulum primum de essentialitatis unitate : unde primo ponit unitatem divinæ essentialitatis : « Unus est solus et verus Deus, » secundum illud Joan. xvii, 3 : *Ut cognoscant te solum verum Deum* : Deut. vi, 4 : *Audi Israel, Dominus Deus tuus \* Deus unus est* ; per quod excluditur error gentilium ponentium multos deos. Dicitur autem verus, Deus qui est essentialiter et naturaliter Deus<sup>6</sup>. Dicuntur enim aliquid dii non veri, sed per adoptionem, vel per participationem divinitatis ; sive nuncupatione, secundum illud Psalm. lxxxii, 6 : *Ego dixi : dii estis*. Dicuntur<sup>7</sup> etiam aliqui dii secundum opinionem errantium, secundum illud Psal. cxv, 5 *Omnes dii gentium dæmonia*. Deinde ostendit excellentiam divinæ naturæ sive essentialitatis : et primo quantum ad hoc quod non comprehenditur tempore : quod significatur cum dicitur, « Æternus. » Dicitur enim æternus, quia caret principio et fine, et quia ejus esse non variatur per præteritum et futurum.

<sup>1</sup> Parm. : « secundum. »

<sup>2</sup> Parm. addit : « enim. »

<sup>3</sup> Parm. : « hoc. »

<sup>4</sup> Parm. : « omne. »

<sup>5</sup> Parm. omittit hunc titulum.

<sup>6</sup> Parm. : « Deus autem verus, qui est essentialiter et naturaliter Deus, unus est. »

<sup>7</sup> Parm. omittit : « Ego dixi : Dii estis. » dicuntur... secundum illud Psal. cxv, 5.

Nihil enim ei subtrahitur, nec aliquid ei de novo venire potest : unde dicit ad Moysen Exod. III, 14 : *Ego sum qui sum* ; quia scilicet ejus esse non novit præteritum et futurum, sed semper præsentialiter se <sup>1</sup> habet. Et Apostolus dicit ad Rom. ult. 26 : *Nunc patefactum est per Scripturas Prophetarum secundum præceptum æterni Dei*. Secundo ostenditur quod ejus magnitudo excedit incomparabiliter omnium magnitudinem creaturarum, cum dicitur, « immensus. » Illud enim mensurari potest per aliquid aliud, quod si excedat in magnitudine, tamen excessus est secundum aliquam proportionem. Sicut binarius mensurat senarium, in quantum ter duo faciunt sex. Senarius autem excedit binarium secundum aliquam proportionem, secundum quam <sup>2</sup> binarius mensurat senarium, quia est triplum ejus. Deus autem excedit magnitudine suæ dignitatis omnem creaturam in infinitum ; et ideo dicitur « immensus, » quia nulla est commensuratio vel proportio alicujus creaturæ ad ipsum : unde dicitur in Psalm. CXLIV, 3 : *Magnus Dominus et laudabilis nimis, et magnitudinis ejus non est finis* : et Baruch III, 25, dicitur : *Magnus est, et non habet finem, excelsus et immensus*. Tertio ostenditur quod excedit omnem mutabilitatem, cum dicitur, « Incommutabilis, » quia scilicet nulla est apud ipsum variatio, secundum illud Jacob. I, 17 : *Apud quem non est transmutatio, nec vicissitudinis obumbratio*. Quarto ostenditur quod sua potestas transcendit omnia, cum dicitur, « Omnipotens, » quia simpliciter omnia potest : unde ipse dicit Gen. XVII, 1 : *Ego Deus omnipotens*.

Et si quis objiciat id quod Apostolus dicit II ad Timoth. II, 13 : *Ille fidelis permanet, negare seipsum non potest* ; et ita non est omnipotens : dicendum quod negare seipsum, est deficere a se ipso <sup>3</sup> non posse autem deficere non est ex defectu potentiæ, sed ex potentiæ perfectione ; sicut etiam apud homines ex magna fortitudine est quod aliquis vinci non possit. In hoc ergo vere Deus omnipotens ostenditur quod omnia potest facere, et in nullo potest deficere.

Quinto ostenditur quod excedit omnium rationem et intellectum, cum dicitur, « Incomprehensibilis. » Illa enim

comprehendere dicimur quæ perfecte cognoscimus, quantum cognoscibilia sunt. Nulla autem creatura tantum potest Deum cognoscere quantum cognoscibilis est ; et propter hoc nulla creatura potest eum comprehendere : unde dicitur Job. XI, 7 : *Forsitan vestigia Dei comprehendes, et usque ad perfectum Omnipotentem reperies?* quasi dicat, non. Et Jerem. XXXII, 18, dicitur : *Dominus exercituum nomen tibi, magnus consilio, et incomprehensibilis cogitatu*. Sexto ostenditur quod excedit omnem locutionem, cum dicitur, « Ineffabilis, » quia scilicet nullus potest sufficienter effari laudem ipsius : unde dicitur Eccl. XLIII, 33 : *Exaltate illum quantum potestis ; major est enim omni laude*.

Deinde accedit ad articulum Trinitatis, ponens quidem primo nomina trium personarum, cum dicit : « Pater et Filius et Spiritus sanctus, » quæ quidem exprimentur Matth. ult., 19 : *Docete omnes gentes, baptizantes eos in nomine Patris et Filii et Spiritus sancti*.

Sed circa hæc tria nomina diversimode aliqui erraverunt. Sabellius enim dixit quod Pater et Filius et Spiritus sanctus solis nominibus distinguuntur, dicens, eundem in persona esse, qui quandoque dicitur Pater, quandoque Filius, quandoque Spiritus sanctus, propter rationes diversas : et ad hoc excludendum subditur : « Tres quidem personæ : alia est enim persona Patris, alia Filii, alia Spiritus sancti. » Arius vero posuit quod Pater et Filius et Spiritus sanctus sicut sunt diversa nomina, ita sunt diversæ substantiæ : et ad excludendum hoc subdit : « Sed una substantia. » Verum quia substantia secundum usum vocabuli aliter sumitur apud nos et aliter apud Græcos ; ne circa hoc posset fieri aliqua deceptio, subditur, « Seu natura. » Apud Græcos enim hypostasis, idest substantia, accipitur, sicut apud nos persona, pro re aliqua subsistente, quam dicimus suppositum vel rem naturæ ; sicut hic homo est suppositum, vel res humanæ naturæ. Apud nos vero secundum communem usum loquendi, substantia dicitur essentia vel natura rei, secundum quod humanitas dicitur natura hominis. Sic igitur datur intelligi, quod in divinitate tres sunt subsistentes, scilicet Pater et Filius

<sup>1</sup> Parm. : « esse. »

<sup>2</sup> Parm. omittit : « aliquam proportionem se-

cundum quam. »

<sup>3</sup> Parm. : « a se. »

et Spiritus sanctus, sed una numero simpliciter natura est in qua subsistunt; quod in rebus humanis contingere non potest. Petrus enim et Paulus et Joannes sunt quidem tres subsistentes in natura humana: sed natura humana, etsi sit una specie in istis tribus, non tamen<sup>1</sup> est una et eadem numero; et ideo tres homines sunt, non unus homo. Quia vero in Patre et Filio et Spiritu sancto est una numero divina natura, dicimus quod Pater et Filius et Spiritus sanctus sunt unus Deus, et non tres dii. Posset autem aliquis prave intelligere unam essentiam trium personarum, ita scilicet quod una pars illius naturæ esset in Patre, alia in Filio, alia in Spiritu sancto; sicut si diceremus unam aquam esse in tribus rivis defluentibus ab uno fonte, ita scilicet quod una pars aquæ est in uno rivo, alia in alio, tertia in tertio. Si autem sic esset una natura trium personarum, sequeretur quod divina natura esset composita ex pluribus partibus: et ideo ad hoc excludendum subdit, « Simplex omnino, » idest nullam compositionem habens. Omne enim compositum posterius est his ex quibus componitur: sic igitur aliquod esset prius Deo; quod est impossibile.

Sed posset aliquis quærere: Si trium personarum est una simplex natura, unde ergo tres personæ distinguuntur? Et ideo ad hoc respondens subdit: « Pater a nullo, Filius a Patre sola, ac Spiritus sanctus pariter ab utroque. » Ubi considerandum est quod quidquid in divinis absolute dicitur, commune est et unum in tribus personis; sicut quod dicitur Deus bonus, sapiens et omnia hujusmodi. Ibi enim solum invenitur distinctio, ubi aliquid invenitur pertinens ad relationem originis; quia scilicet Pater a nullo est, et secundum hoc innascibilis dicitur. Filius autem dicitur Filius, quia a Patre est per generationem, secundum illud Psalm. II, 7: *Ego hodie genui te*; et secundum hoc Patri attribuitur paternitas, et Filio filiatio. Spiritus autem sanctus ab utroque procedit; et secundum hoc Spiritui sancto attribuitur processio, Patri vero et Filio communis spiratio, quia scilicet communiter spirant Spiritum sanctum. Sic igitur quinque sunt notio-

nes, secundum quas distinctiones personarum designantur in divinis: scilicet paternitas, per quam ostenditur quod a Patre est Filius<sup>2</sup>, per quam ostenditur quod genuit Filium; filiatio, per quam ostenditur quod Filius est a Patre; processio per quam ostenditur quod Spiritus sanctus est a Patre et Filio; innascibilitas, per quam dignoscitur quod Pater a nullo est; communis spiratio, per quam ostenditur quod Pater et Filius communiter spirant Spiritum sanctum.

Sed rursus posset alicui occurrere falsa cogitatio, ut quia in rebus humanis filius a quodam principio temporis a patre generatur, et generatio ejus non semper durat, sed certo termino temporis finitur, sic etiam sit circa originem divinarum personarum: ut scilicet Filius ab aliquo tempore inceperit a Patre generari, et aliquo tempore ejus generatio fuerit finita; et similiter de Spiritu sancto. Ideo ad hoc excludendum subdit: « Absque initio semper ac sine fine Pater generans, Filius nascens, Spiritus sanctus ab utroque procedens: » cujus exemplum aliquantulum in creaturis inveniri potest, licet imperfectum. Videmus enim quod a sole radius procedit, et statim quando fuit sol, radius processit ab eo, nec unquam desinet radius procedere quamdiu sol erit. Sic autem<sup>3</sup> Filius procedit a Patre, ut radius a sole: unde dicit Apostolus ad Hebr. I, 3: *Qui cum sit splendor gloriæ; Spiritus autem sanctus ab utroque procedit, sicut calor a sole et ratio*: unde dicitur in Psalm. XVIII, 7: *Nec est qui se abscondat a colore ejus*. Sed hoc exemplum deficit quantum ad hoc quod sol non semper fuit, et ideo nec radius ejus semper ab eo processit: quia vero Deus Pater semper fuit, semper ab eo processit Filius et ab utroque Spiritus sanctus. Potest et aliud exemplum poni in anima humana, in qua verbum interius conceptum, a memoria procedit; et ab utroque procedit amor. Et ita etiam a Patre procedit Filius sicut Verbum ejus, et Spiritus sanctus sicut amor communis utriusque. Sed hoc exemplum deficit in duobus. Primo quidem quia intellectus humanus non semper fuit; secundo, quia non semper verbum in corde suo actualiter concipit. Sed intellectus divinus

<sup>1</sup> Parm. omittit: « una et. »

<sup>2</sup> Parm.: « Quæ est constitutiva Patris. »

<sup>3</sup> Parm.: « enim. »



semper fuit, et semper absque intermissione intelligit: unde semper in eo oritur Verbum quod est Filius, et procedit amor qui est Spiritus sanctus.

Quia vero hæretici Ariani Filium Patri postponebant, et Spiritum sanctum utrique; ideo hoc consequenter excludit. Est autem considerandum quod Ariani postponebant Filium Patri, primo quidem quantum ad essentiam, dicentes quod essentia Patris est dignior quam essentia Filii: et ad hoc excludendum subdit, « Consubstantiales, » quia scilicet essentia Patris et Filii una est, et in nullo differens. Secundo vero quantum ad magnitudinem: non quod in Deo sit magnitudo molis, sed magnitudo virtutis quæ est perfectio bonitatis suæ. Dicebant enim Patrem esse Filio majorem etiam secundum divinitatem: et ad hoc excludendum subdit: « Coæquales. » Secundum humanitatem vero Dominus dicit Joan. xiv, 28: *Pater major me est.* Tertio quantum ad potestatem, dicentes, Filium non esse omnipotentem: et ad hoc excludendum subditur, « Et coomnipotentes. » Quarto quantum ad durationem, quia dicebant Filium non semper fuisse: et ad hoc excludendum subdit, « Coæterni. » Quinto quantum ad operationem. Dicebant enim quod Pater operabatur per Filium sicut per instrumentum suum, vel sicut per ministrum: sed ad hoc excludendum subdit, « Unum universorum principium. » Non enim Filius est aliud principium rerum, quasi inferius quam Pater, sed ambò sunt unum principium: et quod dictum est de Filio, intelligendum est etiam de Spiritu sancto.

Deinde accedit ad alium articulum, qui est de creatione rerum: ubi varias opiniones excludit. Fuerunt enim aliqui hæretici, sicut Manichæi, qui posuerunt duos creatores: unum bonum, qui creavit creaturas invisibiles et spirituales alium malum, quem dicunt creasse omnia hæc visibilia et corporalia. Fides autem catholica confitetur, omnia, præter Deum, tam visibilia quam invisibilia, a Deo esse creata: unde Paulus dicit Act. xvii, 24: *Deus qui fecit mundum et omnia quæ in eo sunt, hic cæli et terræ cum sit Dominus, non in manufactis templis habitat:* et Hebr. xi, 3: *Fide credimus apta esse sæcula Verbo Dei, ut ex invisibilibus visibilia fierent:* unde ad hunc errorem excludendum dicit: « Creator omnium, visibilium et invisibilium, spiritualium et

corporalium. » Alius error fuit ponentium Deum quidem esse primum principium productionis rerum; sed tamen non immediate omnia creasse, sed mediantebus Angelis mundum hunc esse creatum: et hic fuit error Menandrianorum: et ad hunc errorem excludendum subdit: « Qui sua omnipotenti virtute: » quia scilicet sola Dei virtute omnes creaturæ sunt productæ, secundum illud Psalm. viii, 5: *Videbo cælos tuos opera digitorum tuorum.* Alius fuit error Origenis ponentis quod Deus a principio creavit solas spirituales creaturas, et postea quibusdam earum peccantibus, creavit corpora, quibus quasi quibusdam vinculis spirituales substantiæ alligarentur; ac si corporales creaturæ non fuerint ex principali Dei intentione productæ, quia bonum esset eas esse, sed solum ad puniendum peccatum spiritualium creaturarum; cum tamen dicatur Gen. i, 31: *Vidit Deus cuncta quæ fecerat, et erant valde bona.* Unde ad hoc excludendum dicit: « Simul ab initio temporis utramque de nihilo condidit creaturam, spiritualem et corporalem, angelicam videlicet et mundanam. » Alius error fuit Aristotelis ponentis quidem omnia a Deo producta esse, sed ab æterno, et nullum fuisse principium temporis; cum tamen scriptum sit Gen. i, 1: *In principio creavit Deus cælum et terram.* Et ad hoc excludendum addit, « Ab initio temporis. » Alius error fuit Anaxagoræ, qui posuit quidem mundum a Deo factum ex aliquo principio temporis, sed tamen materiam mundi ab æterno præextitisse, et non esse eam factam a Deo: cum tamen Apostolus dicat Rom. iv, 17: *Qui vivificat mortuos, et vocat ea quæ non sunt tamquam ea quæ sunt.* Et ad hoc excludendum addit, « De nihilo. » Fuit autem alius error Tertulliani ponentis animam hominis corpoream esse; cum tamen Apostolus dicat I ad Thess. v: *Ipse autem Deus pacis sanctificet vos per omnia, ut integer spiritus vester et anima et corpus sine querela in adventu Domini nostri Jesu Christi servetur:* ubi manifeste a corpore animam et spiritum distinguit. Et ad hoc excludendum subdit: « Deinde, » scilicet condidit Deus, « humanam, » scilicet naturam, « quasi communem, » scilicet « ex spiritu et corpore constitutam: » componitur enim homo ex spirituali natura et corporali. Secundum autem prædictum Manichæorum errorem ponentium duo prin-

cipia, unum bonum et unum malum, non solum attendebatur distinctio quantum ad creationem creaturarum visibilium et invisibilium, ut scilicet invisibilia sint a bono Deo, visibilia a malo; sed etiam quantum ad ipsa invisibilia. Ponebant enim primum principium esse invisibile, et ab eo quasdam invisibiles creaturas esse productas, quas dicebant esse naturaliter malas: et sic in ipsis Angelis erant quidam naturaliter boni ad boni Dei creationem pertinentes, qui peccare non poterant; et quidam naturaliter mali, quos dæmones vocamus, qui non poterant non peccare: contra id quod dicitur Job iv, 18: *Ecce qui serviunt ei, non sunt stabiles, et in Angelis suis reperit pravitatem.* Similiter et circa animas hominum errabant, dicentes, quasdam esse bonæ creationis, quæ naturaliter bonum faciunt, quasdam autem malæ creationis, quæ naturaliter faciunt malum: contra id quod dicitur Eccl. vii, 30, *Deus \* fecit hominem*

\* Inveni quod fecerit, . . . et ipse se infinitis miscuerit.

*rectum, et ipse immiscuit se infinitis quæ-  
tionibus.* Et ideo ad hoc excludendum, dicit: « Diabolus autem, » scilicet principalis, « et alii dæmones quidem a Deo natura creati sunt boni, sed ipsi per se mali facti sunt, » scilicet per liberum voluntatis arbitrium: « homo vero diaboli suggestionem peccavit; » idest, non naturaliter, sed propria voluntate.

### CAPUT III.

*De articulis ad Christum pertinentibus, et aliquibus Ecclesiæ sacramentis<sup>4</sup>.*

Deinde accedit ad articulum Incarnationis; et quia Evangelium Christi, sicut dicit Apostolus Rom. i, 2: *Deus ante promiserat per Prophetas suos in Scripturis sanctis;* ideo præmittit de prænuntiatione Prophetarum, circa quam erraverunt multi. Nam Manichæi et alii hæretici vetus testamentum dixerunt non a bono Deo, qui est Pater Christi, sed a malo Deo esse traditum; et per consequens doctrinam veteris testamenti semper fuisse mortiferam: quod manifeste falsum ostenditur per hoc quod Dominus dicit Joan. ii, 16, loquens de templo Judæorum: *Nolite facere domum Patris mei domum negotiationis:* ubi manifeste Pa-

trem suum dicit Deum veteris testamenti, qui in templo Judæorum colebatur. Ariani vero dixerunt, in veteri testamento diversis visionibus Filium apparuisse, non autem Patrem: quod manifeste falsum ostenditur ex hoc quod Abraham in figuram Trinitatis tres viri apparuerunt, ut legitur Gen. xviii. Cataphryges etiam posuerunt, Prophetas veteris testamenti quasi arreptitios esse locutos, non intelligentes quæ loquebantur, contra id quod dicitur Dan. x, 1: *Intelligentia opus est in visione.*

Ad hos igitur errores excludendos dicit quod « hæc sancta Trinitas, de qua dictum est, quæ scilicet est « secundum communem essentiam individua, et secundum proprietates personales discreta per Moysen et sanctos Prophetas aliosque famulos suos. » Ubi videtur distinguere vetus testamentum, scilicet in legem quæ per Moysen data est et Prophetas, sicut fuit Isaias, Jeremias, etc. et in eos qui agiographa conscripserunt, sicut fuit Salomon, Job, et alii hujusmodi, quos famulos Dei hic vocat; secundum quam distinctionem Dominus dicit Lucae xlii: *Oportet impleri omnia quæ scripta sunt in lege et in Prophetis et in Psalmis de me.*

« Juxta autem<sup>2</sup> ordinatissimam dispositionem temporum: » quod ponitur ad excludendum errorem gentilium, qui irridebant fidem christianam ex hoc quod fuit post multa tempora, quasi subito Deo in mentem venerit legem Evangelii hominibus dare. Non autem fuit subitum, sed convenienti ordinatione dispositum, ut prius humano generi per legem et Prophetas fieret prænuntiatio de Christo, tamquam hominibus tunc parvulis et minus eruditis, secundum illud Gal. iii, 24: *Lex pædagogus noster fuit in Christo,* et hoc est quod dicit quod « juxta ordinatissimam dispositionem temporum doctrinam humano generi tribuit salutarem, » non mortiferam, ut Manichæi dicebant.

His igitur præmissis, recedit ad ipsum Incarnationis mysterium explicandum, in quo etiam diversos errores excludit. Ubi primo sciendum est, quod Sabelliani confundentes divinas personas concedebant Patrem esse innatum, quia dicebant eundem in persona esse Patrem et Filium. E contrario autem Ariani dividen-

<sup>4</sup> Hunc titulum Parm omittit.

<sup>2</sup> Parm. omittit: « autem »

tes substantiam divinitatis, ex hoc quod Filius est incarnatus, et non Pater, volebant concludere aliam esse essentiam Patris et aliam Filii, et aliam operationem utriusque. Fides autem catholica media via inter utrumque incedens, propter distinctionem personarum dicit Filium solum esse incarnatum (est enim facta incarnatio per unionem in persona, non in natura, ut infra dicitur); propter unitatem autem naturæ et operationis in tribus personis, dicit Trinitatem totam operatam fuisse incarnationem : et hoc est quod dicit : « Et tandem unigenitus Dei Filius Jesus Christus a tota Trinitate communiter incarnatus fuit. » Fuit etiam error Helvidii, qui posuit Mariam quidem concepisse virginem et peperisse ; sed post partum non semper virginem permansisse, sed ex Joseph postmodum alios filios genuisse : et ad hoc excludendum dicit : « Ex Maria semper Virgine. » Alii vero, scilicet Ebionitæ, gravius erraverunt, dicentes, Christum ex Joseph semine esse conceptum : et ad hoc excludendum subditur : « Spiritu sancto cooperante est conceptum. » Fuerunt autem alii, scilicet Manichæi, qui dixerunt, Christum non veram carnem accepisse, sed phantasticam, contra id quod Dominus discipulis post resurrectionem æstimantibus eum phantasma esse, dicit, Luc. ult. 39 : *Spiritus carnem et ossa non habet, sicut me videtis habere* : ad quod excludendum dixit, « Vere homo factus. » Ariani vero dixerunt quod Filius Dei assumpsit solam carnem sine anima, et quod Verbum fuit carni loco animæ. Sed postea Apollinaristæ dixerunt eum habere animam sensitivam tantum, contra id quod dicitur Matth. xxvi, 38 : *Tristis est anima mea usque ad mortem* : et Joan. x, 18 : *Potestatem habeo ponendi animam meam* : et ideo ad hoc excludendum dicit « Ex anima rationali. » Alii vero scilicet sequaces Valentini, posuerunt, corpus Christi non esse assumptum de Virgine, sed de cælo allatum, contra id quod dicitur ad Galat. iv 4 : *Factum ex muliere* : ad Roman. 1, 3 : *Qui factus est ei ex semine David secundum carnem*. Et ad hoc excludendum dicit, « Et humana carne compositus. » Circa autem ipsam unionem contrarie erraverunt Nestorius et Eutyches : quorum Nestorius posuit unionem esse factam solum secundum inhabitatio-

nem gratiæ, sicut etiam in aliis sanctis Deus dicitur esse per inhabitantem gratiam, ut sic Dei et hominis sit alia et alia persona, contra id quod dicitur Joan. 1, 14 : *Verbum caro factum est*, idest Filius Dei factus est homo : quod non potest dici de aliis quos per gratiam inhabitat. Eutyches vero posuit quod facta est unio Dei et hominis in unam naturam : ita scilicet quod Christum asserebat esse ex duabus naturis, non autem in duabus quia scilicet intendebat quod ante incarnationem erant duæ naturæ, Dei et hominis ; sed post incarnationem, facta est una natura. Unde ad utrumque excludendum dicit : « Una in duabus naturis persona viam vitæ manifestius demonstravit. » Fuerunt enim quidam Eutychis sectatores, scilicet Theodosius et Galanus, qui ponentes unam naturam in Christo, quasi ex divinitate et humanitate confectam, diversimode erraverunt : nam Theodosius posuit illam naturam esse corruptibilem et passibilem ; Galanus autem incorruptibilem et impassibilem. Et ad hos errores excludendos, dicit : « Qui cum secundum divinitatem sit immortalis et impassibilis, secundum humanitatem factus est passibilis et mortal. »

Deinde accedit ad articulum passionis, dicens, « Qui etiam pro salute humani generis in ligno crucis passus et mortuus : » post quem ponit articulum de descensu ad inferos, dicens : « Descendit ad inferos. » Postea vero ponit articulum de resurrectione Christi, dicens, « Et resurrexit a mortuis. » Ac deinde ponit articulum de ascensione, dicens, « Ascendit in cælum. »

Sed notandum est quod horum articulorum veritatem prædictus Arii et Apollinaris error salvare non potest. Si enim Christus animam non habuit, sed Verbum fuit carni loco animæ, et in morte separatum fuit a carne : consequens est quod illud quod carni convenit, de Filio Dei dici non possit : unde non potest dici quod Filius Dei jacuit in sepulcro, vel quod a mortuis resurrexit : similiter etiam dici non poterit quod ad inferos descendit, quia divinitati secundum seipsam, cum sit omnino immobilis, ascendere vel descendere convenire non potest. Et ideo ad excludendum prædictum errorem, prædictorum articulorum veritatem explicat <sup>1</sup>

<sup>1</sup> Al. : « implicat. »

subdens : « Sed descendit in anima, et resurrexit in carne, ascendit que pariter in utroque. » In morte enim Christi anima est separata a carne, sed divinitas indivisibiliter utrique, scilicet animæ et carni, mansit unita. Unde cum anima Christi descenderit ad inferos, dicitur Filius Dei descendisse secundum animam sibi unitam. Similiter etiam cum caro Christi, quæ in morte quodammodo ceciderat, resurrexit ad vitam, dicitur Filius Dei, qui secundum divinam naturam mori non poterat, secundum carnem resurrexisse, per hoc quod caro iterato animam resumpsit; et sic secundum utrumque, idest secundum animam et corpus, ascendit in cœlum.

Deinde ponit articulum de adventu ad iudicium, dicens : « Venturus in fine iudicare vivos et mortuos. » Dicit autem vivos eos qui reperientur vivi in adventu Iudicis, mortuos autem eos qui ante fuerunt præmortui : quod non est sic intelligendum, quasi aliqui sint futuri qui non moriantur; sed quia in ipso adventu Iudicis morientur et statim resurgent. Vel vivos et mortuos intelligere spiritualiter possumus, idest justos et peccatores. Et quia aliqui fuerunt ponentes quod in finali iudicio aliqui salvabuntur non propriis meritis, sed precibus aliquorum sanctorum donati; ideo ad hoc excludendum subdit : « Et redditurus singulis secundum opera sua, tam reprobis quam electis. »

Deinde ponit articulum resurrectionis generalis, quæ pertinet ad effectum gloriæ, dicens : « Qui omnes tam reprobi quam electi cum suis propriis resurgent corporibus, quæ nunc gestant : » quod ponitur ad excludendum quorundam hæreticorum errorem, qui dicunt, quod resurgentes non habebunt eadem corpora quæ nunc per mortem deponunt, sed quædam corpora de cœlis allata : quod est contra illud Apostoli ad Corinth. xv, 53 : *Oportet corruptibile hoc induere incorruptionem.*

Consequenter autem assignat causam resumptionis corporum, cum dicit : « Ut recipiant secundum opera sua, sive bona fuerint, sive mala. » Quia enim homo aut bene aut male operatus est in anima simul et corpore, justum est ut in utroque damnetur aut præ-

mietur. Et quia Origenes posuit quod pœna damnatorum non erit perpetua, similiter nec gloria beatorum; ideo ad hoc excludendum dicit : « Et illi cum diabolo pœnam æternam, et isti cum Christo gloriam sempiternam. » Sicut enim invidia diaboli mors intravit in orbem terrarum, ut dicitur Sap. ii; ita per gratiam Christi reparamur ad vitam, secundum illud Joan. x : *Ego veni ut vitam habeant, et abundantius habeant.*

Deinde accedit ad articulum qui est de effectu gratiæ : et primo tangit effectum gratiæ quantum ad Ecclesiæ unitatem cum dicit : Una est fidelium « universalis Ecclesia, extra quam nullus salvatur omnino. » Unitas autem Ecclesiæ est præcipue propter fidei unitatem : nam Ecclesia nihil est aliud quam aggregatio fidelium. Et quia sine fide impossibile est placere Deo, ideo extra Ecclesiam nullus patet locus saluti. Salus autem fidelium consummatur per Ecclesiæ sacramenta, in quibus virtus passionis Christi operatur : et ideo consequenter exponit quid fides catholica sentiat circa Ecclesiæ sacramenta : et primo circa eucharistiam, cum dicit : « In qua » scilicet Ecclesia : » quia scilicet ipse obtulit seipsum in ara crucis *oblationem et hostiam Deo in odorem suavitatis*, ut dicitur ad Ephes. v, 2, in cuius sacrificii commemorationem quotidie in Ecclesia offertur sacrificium sub specie panis et vini. Circa quod sacrificium tria determinat. Primo quidem veritatem rei sub sacramento contentæ, cum dicit : « Cujus corpus et sanguis in sacramento altaris sub speciebus panis tritici<sup>1</sup> et vini veraciter continentur. » Dicit autem, « Veraciter, » ad excludendum errorem quorundam qui dixerunt quod in hoc sacramento non est corpus Christi secundum rei veritatem, sed solum secundum figuram, sive sicut in signo. Dicit autem : « Sub speciebus panis et vini, » ad excludendum errorem quorundam qui dixerunt, quod in sacramento altaris simul continetur substantia panis, et substantia corporis Christi : quod est contra verbum Domini dicentis, Luc. xxxii, 19 : *Hoc est corpus meum.* Esset enim secundum hoc dicendum magis : Hic est corpus meum. Ut ergo ostendat quod in hoc sacramento non remanet substantia panis et vini, sed solum species, idest

<sup>1</sup> Parm. omittit : « tritici. »

accidentia sine subjecto, dicit : « Sub speciebus panis et vini. » Secundo ostendit quomodo corpus Christi incipiat esse sub sacramento : scilicet per hoc quod substantia panis convertitur miraculose in substantiam corporis Christi, et substantia vini in substantiam sanguinis : et hoc est quod dicit : « Translatis<sup>1</sup> pane in corpus et vino in sanguinem potestate divina, ad mysterium perficiendum unitatis, » idest ad celebrandum hoc sacramentum, quod est signum ecclesiasticæ unitatis. « Accipimus » igitur « ipsi de suo quod ipse accepit de nostro. » In hoc enim sacramento accipimus de corpore et sanguine Christi, quæ Filius Dei accepit de nostra natura. Tertio determinat ministrum hujus sacramenti, in quo etiam tangit ordinis sacramentum : et hoc est quod dicit, « Et hoc utique « sacramentum nemo potest conficere, nisi rite fuerit sacerdos ordinatus : » quod est contra hæresim pauperum Lugdunensium, qui dicunt quemlibet hominem istud sacramentum posse conficere. Addit autem : « Secundum claves Ecclesiæ, quas ipse concessit Apostolis et eorum successoribus Jesus Christus : » quod dupliciter potest intelligi : vel quia sacerdos rite ordinatus claves Ecclesiæ suscepit, vel quia secundum potestatem clavium sacerdotalis ordo confertur. Sunt autem claves Ecclesiæ auctoritas discernendi et potestas judicandi.

Deinde accedit ad sacramentum baptismi ; circa quod primo tangit formam, cum dicit : Sacramentum vero baptismi quod ad invocationem individuæ Trinitatis, videlicet Patris et Filii et Spiritus sancti, consecratur. » Hæc est enim forma baptismi : « Ego te baptizo in nomine Patris et Filii et Spiritus sancti, »

ut traditur Matth. ult. 19. Secundo ponitur materia, cum dicitur, « Consecratur in aqua. » Non enim in alio potest hoc sacramentum perfici, nisi in vera aqua. Tertio ostenditur quibus sit conferendum hoc sacramentum, cum dicit : « Tam parvulis quam adultis... proficit ad salutem : » quod ponitur ad excludendum errorem Pelagianorum, qui dicebant, parvulos non habere peccatum originale, propter quod oporteat eos ablui<sup>2</sup> per baptismum. Quarto tangit ministrum hujus sacramenti, cum dicit : « In forma Ecclesiæ a quocumque rite collatum proficit ad salutem : » quod est contra errorem Donatistarum, qui baptizatos ab hæreticis dicebant non suscipere verum baptismum, sed esse baptizandos. Fides autem catholica recognoscit esse verum baptismum a quocumque fuerit collatum in forma Ecclesiæ supradictæ.

Deinde accedit ad sacramentum pœnitentiæ, dicens : « Si post susceptionem baptismi quisquam « prolapsus fuerit in peccatum, per veram pœnitentiam semper potest reparari : » quod ponitur ad excludendum errorem Novatianorum, qui dicebant, quod peccantes post baptismum, non possunt reparari per pœnitentiam.

Deinde accedit ad sacramentum matrimonii dicens : « Non solum autem virgines et continentes, verum etiam conjugati, per fidem rectam et operationem bonam placentes Deo, ad æternam merentur beatitudinem pervenire : » quod ponitur ad excludendum errorem Tatianorum et Manichæorum, qui nuptias damnabant. De aliis autem sacramentis mentionem non facit, quia circa ea non fuit specialiter erratum.

<sup>1</sup> Parm. : « transubstantiatis. »

<sup>2</sup> Al. : « absolvi. »



# OPUSCULUM XX.

## IN DECRETALEM II EXPOSITIO AD EUMDEM.

(EDIT. ROM. XXIV.)

### *De errore Abbatis Joachim.*

Damnamus ergo et reprobamus libellum, sive tractatum, quem Abbas Joachim edidit contra Magistrum Petrum Lombardum de unitate seu essentia Trinitatis, appellans ipsum hæreticum, et insanum, pro eo quod in suis dixit sententiis, quoniam quædam summa res est Pater et Filius et Spiritus sanctus, et in illa non est generans, neque genita, nec procedens. Unde asserit quod ille non tam Trinitatem quam quaternitatem adstruebat in Deo, videlicet tres personas et illam communem essentiam quasi quartam : manifeste protestans quod nulla res est quæ sit Pater et Filius et Spiritus sanctus, nec est essentia, nec substantia, nec natura; quamvis concedat quod Pater et Filius et Spiritus sanctus sunt una essentia, una substantia, unaque natura. Verum unitatem hujusmodi non veram et propriam, sed quasi collectivam et similitudinariam esse fatetur; quemadmodum dicuntur multi homines unus populus, et multi fideles una Ecclesia, juxta illud : « Multitudinis credentium erat cor unum et anima una : » et : « Qui adhæret Deo, unus Spiritus est cum illo. » Item : « Qui plantat et qui rigat, unum sunt » et : « Omnes unum corpus sumus in Christo. » Rursus in libro Regum : Populus meus et populus tuus unum sunt. » Ad hanc autem sententiam adstruendam illud potissimum verbum iudicavit quod Christus de fidelibus inquit in Evangelio : « Volo, Pater, ut sint unum in nobis, sicut et nos unum sumus, ut sint consummati in unum. » Non enim, ut ait, fideles Christi sunt unum, idest una quædam res quæ communis sit omnibus; sed hic modo sunt unum, idest una Ecclesia propter catholicæ fidei unitatem, et tandem unum regnum propter unionem indissolubilis caritatis. Quemadmodum in canonica Joannis epistola legitur : « Quia tres sunt qui testimonium dant in cælo, Pater, Verbum et Spiritus sanctus; et hi tres unum sunt. » Statimque subjungitur : « Et tres sunt qui testimonium dant in terra : spiritus, aqua et sanguis; et hi tres unum sunt; » sicut in codicibus quibusdam invenitur.

Nos autem, sacro et universali concilio approbante, credimus et confitemur cum Petro, quod una quædam summa res est, incomprehensibilis quidem et ineffabilis, quæ veraciter est Pater et Filius et Spiritus sanctus, tres simul personæ, ac singulatim quælibet earundem. Et ideo in Deo Trinitas est solummodo, non quaternitas : quia quælibet trium personarum est illa res, videlicet substantia, sive natura divina, quæ sola est universorum principium,

præter quod aliud inveniri non potest. Et illa res non est generans neque genita, nec procedens; sed est Pater qui generat, Filius qui gignitur et Spiritus sanctus qui procedit; ut distinctiones sint in personis et unitas in natura. Licet igitur alius sit Pater, alius Filius, alius Spiritus sanctus, non tamen aliud : sed id quod est Pater, est Filius et Spiritus sanctus, idem omnino; ut secundum orthodoxam et catholicam fidem consubstantiales esse credantur. Pater enim ab æterno Filium generando, suam substantiam ei dedit, juxta quod ipse testatur : « Pater quod dedit mihi, majus est omnibus. » Ac dici non potest quod partem suæ substantiæ illi dederit et partem retinuerit ipse sibi : cum substantia Patris indivisibilis sit, utpote simplex omnino. Sed nec dici potest quod Pater in Filium transtulerit suam substantiam generando, quasi sic dederit eam Filio, quod non retinuerit ipsam sibi : alioquin desiisset esse substantia. Patet ergo quod sine ulla diminutione Filius nascendo substantiam Patris accepit; et ita Pater et Filius habent eandem substantiam; et sic eadem res est Pater et Filius, nec non et Spiritus sanctus ab utroque procedens.

Cum ergo veritas pro fidelibus suis ad Patrem orat « Volo » inquit « ut ipsi sint unum in nobis, sicut et nos unum in nobis, sicut et nos unum sumus : » hoc nomen Unum pro fidelibus quidem accipitur ut intelligatur unio caritatis in gratia; pro personis vero divinis, ut attendatur identitatis in natura unitas, quemadmodum veritas alibi ait : « Estote perfecti, sicut et Pater vester cælestis perfectus est; » ac si diceret manifestius : Estote perfecti perfectione gratiæ, sicut pater vester cælestis est perfectione naturæ : utraque videlicet suo modo; quia inter creatorem et creaturam non potest tanta similitudo notari, quin inter eos major sit dissimilitudo notanda.

Si quis igitur sententiam sive doctrinam præfati Joachimi in hac parte defendere vel approbare præsumperit, tanquam hæreticus ab omnibus confutetur. In nullo tamen per hoc Florensi monasterio, cujus ipse Joachim extitit institutor, volumus derogari : quoniam ibi et regularis institutio est et observantia salutaris; maxime cum idem Joachim omnia scripta sua nobis assignari mandaverit, apostolicæ sedis judicio approbanda, seu etiam corrigenda : dictans epistolam, cui propria manu subscripsit, in qua firmiter confitetur se illam fidem tenere quam Romana tenet Ecclesia, quæ cunctorum fidelium, disponente Domino, mater est et magistra. Reprobamus etiam et damnamus perversissimum dogma impii Amalrici, cujus mentem sic pater mendacii excecavit, ut ejus doctrina non tam hæretica censenda sit quam insana.

## CAPUT I.

*In quo excluditur error, et asseritur, veritas circa divinæ essentiæ unitatem*<sup>1</sup>.

« Damnamus ergo et reprobamus libellum, sive tractatum, quem Abbas Joachim edidit contra Magistrum Petrum Lombardum. » Exposita forma catholicæ fidei in præcedentibus, in hac Decretali damnatur error Joachim, reprobare volentis doctrinam Magistri Petri Lombardi circa unitatem divinæ essentiæ et Trinitatem personarum. Et ut utriusque intentio plenius videatur, accipiendum est ibi quod in præcedenti est dictum quod scilicet sancta Trinitas secundum communem essentiam est individua et secundum proprietates personales discreta: ut enim supra expositum est, persona Patris non distinguitur a persona Filii nisi paternitate, et Filius distinguitur a Patre filiatione, inquantum scilicet Pater genuit Filium et Filius genitus est a Patre: et similiter Spiritus sanctus distinguitur a Patre et Filio, inquantum procedit ab utroque. Persona igitur in divinis distinguitur, inquantum persona generat, vel generatur, vel procedit. Consequens<sup>2</sup> est quod distinguitur in tribus personis, et quod sicut est alia persona Patris, alia Filii, alia Spiritus sancti; ita etiam sit earum alia et alia substantia vel essentia: quod in Ario damnavit Nicæna synodus, asserens Filium homousion Patri, idest coessentialem et consubstantialem. Quod magister Petrus sequens docuit quod una est essentia vel substantia communis Patris et Filii et Spiritus sancti; quæ nec generat<sup>3</sup>, nec generatur nec procedit, ut sit penitus indistincta, ut patet in v distinctione I *Sententiarum* ejus. Joachim autem Abbas Florentis monasterii non bene capiens verba Magistri prædicti, utpote in subtilibus fidei dogmatibus rudis, prædictam Magistri Petri doctrinam hæreticam reputavit, imponens ei quod quaternitatem induceret in divinis, ponens tres personas et communem essentiam, quam credebat sic poni a Magistro Petro quasi aliquid distinctum a tribus personis, ut sic possit dici quasi

quartum. Credebat enim quod ex hoc ipso quod dicitur: *Essentia divina nec est generans nec genita, nec procedens, distinguatur a Patre qui generat et a Filio qui generatur et a Spiritu sancto qui procedit.* Et ideo ipse Joachim protestabatur<sup>4</sup> quod in divinis non est aliqua res una quæ sit Pater et Filius et Spiritus sanctus, sive illa res<sup>5</sup> una dicatur substantia, sive essentia, sive natura: his enim tribus nominibus idem intelligimus. Sed ne videretur totaliter a fide Nicænae synodi recedere, concedebat quod Pater et Filius et Spiritus sanctus sunt una essentia, una substantia, una natura; quasi una essentia possit prædicari de tribus personis, ut dicamus: tres personæ sunt una essentia, non autem e converso, ut dicatur: una essentia est tres personæ. Sed in hoc ipso quod concedebat tres personas esse unam essentiam vel substantiam vel naturam, non habebat sanum intellectum. Non enim ponebat unitatem essentiæ trium personarum esse veram, realem et simplicem; sed quasi similitudinariam et collectivam, idest quasi ex pluribus congregatam, sicut multi homines dicuntur unus populus, et multi fideles dicuntur una Ecclesia, secundum illud Actuum iv, 32: *Multitudinis credentium erat cor unum et anima una*: et secundum illud Apostoli, I ad Cor. vi, 16: *Qui adhæret Deo unus spiritus est*, scilicet cum ipso et I ad Cor. xiii, 8: *Qui plantat et qui rigat, unum sunt*. Præterea I ad Corinth. xii, 5: *Multi unum corpus sumus in Christo*: et III Reg. xxii, 5, *dixit Josaphat rex Juda ad regem Israel: Populus meus et populus tuus unum sunt*. In quibus omnibus significatur unitas collectiva, et non vera et simplex. Quod autem secundum hunc modum diceretur esse una substantia vel essentia vel natura trium personarum, probare nitebatur quibusdam auctoritatibus. Dicitur enim Joan. xvii quod Dominus pro fidelibus suis Patrem exorans, inter cetera dixit, vers. 22: *Volo Pater, ut sint, scilicet fideles mei, unum in nobis*, idest in me et in te, per fidem et caritatem, *sicut et nos unum sumus, ut tandem in patria sint consummati in unum*. Ex quo sic arguebat. Fideles Christi non sic sunt unum ut sit aliqua una res quæ communis sit

<sup>1</sup> Parm.: hunc titulum omittit.

<sup>2</sup> Parm.: « Si ergo essentia divina generat, vel procedit, consequens est quod sicut est alia. »

<sup>3</sup> Al. omittitur: « nec generat. »

<sup>4</sup> Parm.: « protestatur. »

<sup>5</sup> Parm. omittit: « res. »

omnibus; sed sunt quodammodo unum idest<sup>1</sup> collective idest una Ecclesia propter unitatem catholicæ fidei, et tandem erunt in patria unum regnum propter unionem indissolubilis caritatis: quia caritas viæ dissolvi potest per peccatum, caritas autem patriæ indissolubilis est. Inducebat etiam ad suæ opinionis assertionem quod dicitur in Joan. ult., 7: *Tres sunt qui testimonium dant in cælo, Pater, Verbum, et Spiritus sanctus.* Pater quidem, cum dixit: *Hic est Filius meus dilectus*: et hoc in baptismo, ut dicitur Matth. III, 17, et in transfiguratione, ut habetur ibid. 17. Filius vero dedit testimonium fidei christianæ per doctrinam et miracula: unde dicit Joan. VIII, 18: *Ego sum qui testimonium perhibeo de me ipso; et testimonium perhibet de me qui misit me Pater.* Spiritus sanctus testimonium perhibuit in specie columbæ super Christum apparens in baptismo, et per adventum suum in discipulos Christi. Et ad insinuandum unitatem trium personarum, subditur: *Et hi tres unum sunt*: quod quidem dicitur propter essentiæ unitatem. Sed hæc Joachim perverse trahere volens ad unitatem caritatis et consensus, inducebat consequentem auctoritatem: nam subditur ibidem 8: *Et tres sunt qui testimonium dant in terra, scilicet spiritus, aqua et sanguis.* In quibusdam libris additur<sup>2</sup>: *Et hi tres unum sunt*<sup>3</sup>; sed hoc in veris exemplaribus non habetur, sed in quibusdam libris dicitur esse appositum ab hæreticis Arianis ad pervertendum intellectum sanum auctoritatis præmissæ de unitate essentiali trium personarum. Similiter etiam Ariani utebantur illa auctoritate. *Ut sint unum in nobis, sicut et nos unum sumus*, ad ostendendum quod Pater et Filius non sunt unum nisi secundum consensum amoris, sicut et nos, ut patet per Augustinum et Hilarium, qui dicunt hunc fuisse perversum errorem Arianorum. Unde manifestum est quod Joachim in errorem Arianorum incidit, licet non pertinaciter, quia ipse scripta sua apostolicæ sedis iudicio subiecit, ut infra dicetur: et ideo consequenter ponitur determinatio Concilii pro veritate. In qua quidem determinatione quinque facit. Primo enim asserit veritatem quam Magister Petrus docebat, sci-

licet quod divina essentia est quædam summa res incomprehensibilis cogitatu et ineffabilis verbo, de qua vere prædicantur tres personæ et simul et singillatim. Potest enim vere dici quod essentia divina est Pater et Filius et Spiritus sanctus: et iterum vere dicitur: Essentia divina est Pater<sup>4</sup> essentia divina est, Filius, divina essentia est Spiritus sanctus. Quod quidem in nobis non accidit: non enim essentia Petri est Petrus; sed essentia Dei Patris est ipse Pater: quia Petrus est ex multis compositus; non autem persona Patris, neque persona Filii, nec persona Spiritus sancti.

Secundo ubi dicit, « Et ideo in Deo Trinitas est solummodo, non quaternitas, » solvit rationem quam pro se inducebat Joachim. Est enim considerandum quod nihil connumeratur aliis nisi quod ab eis distinguitur. Unde cum animal non distinguatur ab homine, equo et bove, quorum quodlibet est animal; ideo non possumus dicere quod homo et equus et bos et animal sunt quatuor; sed sunt tria tantum, quia quodlibet illorum est animal. Ita, quia quælibet trium personarum est illa res, scilicet divina essentia vel natura, non potest dici quod tres personæ et illa res sunt quatuor, quia illa res non est aliquid aliud a tribus personis. Quod quidem probat per hoc quod sola divina essentia est principium creans universa; ita quod nihil potest inveniri præter divinam essentiam quod scilicet non sit idem cum essentia divina, vel non sit creatum ab ea. Tres autem personæ non sunt creatæ a divina, quia increatus Pater, increatus Filius, increatus Spiritus sanctus; quinimmo possumus dicere quod Pater est principium universorum, et similiter Filius et Spiritus sanctus. Unde manifestum est quod divina essentia non est aliquid aliud a tribus personis: unde non est quaternitas in divinis, sed Trinitas.

Sed quia Joachim credebat, quod ex dictis Magistri sequeretur quod esset essentia distincta in tribus personis; ideo tertio eum dicit, « Et illa res non est generans neque genita nec procedens; » ostendit quod hoc non sequitur. Verum est enim quod non possumus dicere: essentia divina est generans, vel genita,

<sup>1</sup> Parm.: « unum collectione. »

<sup>2</sup> Al.: « attenditur. » Parm.: « attextitur. »

<sup>3</sup> De hac Aquinatis animadversione consule

inter alios Augustinum Calmetum in commentario loci citati.

<sup>4</sup> Parm. omittit: « Pater essentia divina est. »

vel procedens, sicut non possumus <sup>1</sup> dicere quod divina essentia est distincta in tribus personis (ex hoc enim aliquid est distinctum in divinis quod est generans vel genitum vel procedens, ut dictum est); possumus tamen dicere quod essentia divina est ille qui distinguitur, idest Pater qui distinguitur a Filio: et similiter possumus dicere quod essentia divina est Pater qui generat, et est Filius qui gignitur, et est Spiritus sanctus qui procedit; ita scilicet quod distinctiones importatæ per hæc tria adjectiva, generans, genitum et procedens, determinant ipsas personas, de quibus prædicantur prædicta adjectiva, non autem essentiam vel naturam quæ non distinguitur. Non ergo sequitur quod Joachim putabat: Essentia non est generans; Pater est generans: ergo essentia non est Pater: quia etsi essentia non generet, est tamen ille qui generat, idest Pater: et similiter essentia non nascitur, sed est ille qui nascitur, idest Filius: neque essentia procedit, sed est ille qui procedit, idest Spiritus sanctus.

## CAPUT II.

*In quo ostenditur personarum distinctionem in una individuali essentia <sup>2</sup>.*

Quarto cum dicit, « Licet igitur alius sit Pater, alius Filius, alius Spiritus sanctus; non tamen aliud, » concludit qualiter secundum fidem catholicam sit significanda distinctio personarum. Circa quod considerandum est quod in divinis masculinum genus refertur ad personam, neutrum autem genus refertur ad essentiam vel naturam: sicut etiam in rebus humanis per masculinum genus quærimus de persona, sicut, Quis currit? Petrus: per neutrum genus quærimus de natura, sicut, Quid est homo? Animal rationale mortale <sup>3</sup>. Quod igitur in divinis essentia est indistincta, personæ vero distinctæ; ideo nominibus distinctivis utimur in divinis in masculino genere, non autem in neutro. Dicimus enim quod licet sit alius Pater, et alius Filius et alius Spiritus sanctus; non tamen sunt aliud: quia non est alietas <sup>4</sup> in essentia, etsi sit

alietas in personis; sed id ipsum quod est Pater, est Filius, et Spiritus sanctus, quia est eadem essentia trium. Et propter hoc sunt omnino idem, si idem sit neutri generis, quia hoc pertinet ad identitatem essentiæ; non autem sunt idem masculine, quia hoc tolleret distinctionem personarum. Ideo autem oportet quod sint idem neutraliter, ut credantur esse consubstantiales, secundum fidem orthodoxam, id est recte gloriantem, ab orthos quod est rectum, et doxa quod est gloria, et catholicam, id est universalem, sicut supra expositum est. Hoc enim determinatum est in Nicæna synodo quod Filius sit homousion, id est consubstantialis Patri.

Quinto cum dicit, « Pater enim ab æterno Filium generando suam substantiam ei dedit, » probat quod una et eadem sit essentia trium personarum. Pater enim generando Filium, dedit ei substantiam suam, cum generare nihil aliud sit quam ex substantia sua alium producere. Et sicut ab æterno Pater genuit Filium, non quidem prius non existentem; ita etiam ab æterno Pater dicit substantiam Filio, non quidem quasi prius non habenti, sed quia ab æterno eam ab alio habuit, idest a Patre. Et de ista donatione ipse Filius Dei testatur, Joan. x, 29: *Pater meus quod dedit mihi, majus omnibus est*; id enim quod est maximum, est divina essentia.

Sciendum tamen quod aliter se habet in generatione humana, et aliter in divina. Quia enim natura humana divisibilis est, potest homo generans partem substantiæ suæ transfundere in filium. Divina autem natura est simplex et indivisibilis; et ideo subjungit quod non potest dici quod Pater partem substantiæ suæ Filio dederit. Similiter etiam non potest dici quod Pater dans substantiam suam Filio, eam sibi non retinuerit; quia sic Pater desiisset esse divina substantia. In corporalibus enim quod datur, non retinetur; sicut qui dat equum, non retinet ipsum; sed in spiritualibus simul datur aliquid et retinetur; sicut qui communi- cat alii scientiam, retinet ipsam. Patet igitur quod Filius sine ulla diminutione accepit nascendo substantiam Patris, et Pater eam retinet: unde sequitur quod Pater et Filius habeant unam substan-

<sup>1</sup> Parm. omittit: « non possumus dicere..., vel genita, vel procedens, sicut non. »

<sup>2</sup> Parm. omittit hunc titulum.

<sup>3</sup> Parm. omittit: « mortale. »

<sup>4</sup> Al.: « alienitas. »

tiam : et eadem ratio est de Spiritu sancto, qui ab utroque procedit. Pater autem est substantia sua, quia non est in eo aliqua compositio, et similiter Filius et Spiritus sanctus. Cum ergo sit una essentia trium, sequitur quod una res, quæ est divina essentia, est Pater et Filius et Spiritus sanctus; et ideo irrefragabiliter est probata sententia Magistri Petri Lombardi, et per consequens dictum Joachim infirmatum ut falsum.

Sexto cum dicit, « Cum ergo Veritas pro fidelibus suis ad Patrem orat etc., » ponit auctoritates quas male intellectas pro se Joachim inducebat. Quod enim Dominus orans pro fidelibus dicit, Joan. xvii, 21 : *Volo ut ipsi unum sint in nobis,*

*sicut et nos unum sumus;* sic inducebat Joachim ac si eodem modo accipiendum esset hoc quod dicitur unum, in nobis, et in divinis personis. Hoc autem est falsum; quia in fidelibus sic accipitur ut intelligatur unitas caritatis per gratiam; in divinis autem personis sic accipitur ut intelligatur unitas ejusdem naturæ. Et hoc probat per simile : quia Dominus dicit, Matth. v, 48 : *Estote vos perfecti, sicut et Pater vester cælestis perfectus est.* Non tamen est idem motus perfectionis humanæ et divinæ; quia non potest esse tanta similitudo inter Creatorem et creaturam, quin major inveniatur ibi dissimilitudo, propter hoc quod creatura in infinitum distat a Deo.



# OPUSCULUM XXI.

## TRACTATUS (a) DE SORTIBUS AD DOMINUM DE BURGO<sup>1</sup>.

(EDIT. ROM. XXV.)

Postulavit a me vestra dilectio ut quid de sortibus sentiendum sit, vobis scriberem<sup>2</sup>. Non est<sup>3</sup> fas ut preces quas fiducialiter caritas porrigit, apud amici<sup>4</sup> animum repulsam patiantur. Unde petitioni vestræ satisfacere cupiens, intermissis paulisper occupationum mearum studiis, solemnium vacationum tempore<sup>5</sup>, quid mihi de sortibus videatur, scribendum curavi. De quibus considerare oportet in quibus<sup>6</sup> locum sors habeat, quis sit sortium finis, quis modus, quæ earum virtus; et utrum eis liceat uti secundum christianæ religionis doctrinam.

### CAPUT I.

*In quibus rebus fiat inquisitio per sortes.*

Primo igitur considerandum est quod rerum quædam sunt ex necessitate et semper, sicut Deum esse, duo et tria esse quinque, solem oriri, et alia hujusmodi, quæ vel semper sunt, vel semper eodem modo eveniunt. In his autem sors locum non habet. Derisibilis enim videtur, si quis sortibus explorandum ali-

quid esse æstimaret circa esse divinum, vel circa numeros, vel circa motus solis et stellarum. Alia vero sunt quæ naturaliter quidem contingunt et ut frequentius eodem modo eveniunt, quandoque tamen, sed rarius, aliter contingunt; sicut æstatem esse siccam, hiemem vero pluviosam. Contingit tamen interdum, sed rarius, evenire contrarium, ex eo quod solitus naturæ cursus ex aliquibus causis impeditur. In neutris autem prædictarum rerum secundum se consideratis locum sors habet. Potest<sup>7</sup> quidem sors locum habere non tamen secundum quod res naturales in se considerantur, sed secundum quod cursus earum attingit aliquantulum usum humanæ vitæ, sicut<sup>8</sup> ab aliquibus sorte inquiri potest<sup>9</sup> an fluvius inundet et domum et agrum occupet, an pluvia æstate abundet et<sup>10</sup> fruges in agro corrumpet. Sed an pluvia vel fluvius inundet in locis desertis, in quibus hæc ad usum humanæ vitæ non pertinent nullus sorte inquirere studet. Ex quo patet quod sors proprie in rebus humanis locum habet. Sed quia ad unumquemque hominum pertinet sollicitari de his quæ pertinent ad usum propriæ vitæ et eorum

<sup>1</sup> (S. G.) Jacobum de Bonego.

<sup>2</sup> Parm.: « conscriberem. »

<sup>3</sup> Parm.: « autem. »

<sup>4</sup> Parm.: « amicum. »

<sup>5</sup> Parm.: « temporibus. »

<sup>6</sup> Parm. omittit: « considerare oportet in quibus. »

<sup>7</sup> Parm.: « sed si res secundo dictæ considerantur secundum quod. »

<sup>8</sup> Parm.: « sic. »

<sup>9</sup> Parm. addit: « ut. »

<sup>10</sup> Parm. omittit: « et fruges in agro corrumpet. »

(a) Cod. S. Vict. eundem tractatum, sed abbreviatum continet. Unde legitur ad marginem: « Deficit prologus, scilicet: Postulavit, etc. Item nulla convenientia est hujus cum alio in quo vidi. Ideo vel aliud scribatur, vel exemplar aliud habeatur. »

cum quibus quocumque modo communionem habet, consequens est quod nec ad omnes res humanas inquisitio sortis extendatur. Nullus enim in Gallia existens forte aliquid inquirendum curat de his quæ ad Judæos <sup>1</sup> pertinent, cum quibus nullatenus in vita communicat. Sed de his consueverunt homines sorte aliquid inquirere quæ qualitercumque ad eos pertinent, vel ad sibi conjunctos. Rursus autem nec in his omnibus sortes inquire videntur. Nullus enim sorte inquit ea quæ per suam industriam vel cognoscere, vel ad effectum perducere potest. Derisibile namque videtur, si quis sorte inquirat an comedat, fruges ex agro colligat, vel si id quod videt, est homo vel equus. Relinquitur igitur quod homines sorte aliquid inquirent in rebus humanis aequaliter ad se pertinentibus, quæ per propriam prudentiam non possunt cognoscere, nec ad effectum perducere.

## CAPUT II.

### *Ostenditur ad quem finem sortes ordinantur.*

Quia igitur in his aliquid sorte requiritur quæ pertinent ad usum vitæ humanæ, necesse est quod ad hoc inquisitio sortis tendat, secundum quod res aliquæ accommodantur usui vitæ humanæ. Circa ea vero quæ veniunt in usum humanum, primo quidem sollicitantur homines ut ea qualitercumque habeant; secundo vero ut habitis utantur; tertio vero ut futurum eventum usus cognoscant. Et quia res vitæ nostræ deservientes in nostros usus assumere non possumus nisi eas aequaliter habeamus; res autem secundum sui naturam communes sunt omnibus: necesse fuit ad hoc quod eis distincte homines uti possent, ut per aliquem modum inter homines dividerentur.

Quandoque autem communium rerum divisio ex humana industria et voluntatum concordia potest ad effectum perducere; et tunc sortibus non indiget. Sed quando humanus sensus non sufficit ad concorditer dividendum, tunc consueverunt sorte dividere, secundum illud Prover. xviii, 18: *Contradictiones comprimit*

*sors*. Sicut autem est distinctio facultatum, ita etiam et honorum sive dignitatum. Unde quandoque contingit quod aliqui non valentes concorditer eligere aliquem cui dignitas aliqua conferatur, sorte hoc requirendum existimant. Quod etiam in veteri lege observatum fuit, ut sorte quædam ad officium summi Sacerdotis accederent: unde dicitur Luc. I quod Zacharias sorte exiit ut incensum poneret. Saul etiam sorte fuit electus in regem, ut legitur I Regum, x.

Sicut autem contingit dubitari circa distributionem honorum, ita et circa distributionem pœnarum. Et ideo si credatur aliquis puniendus, ignoretur autem quem puniri oportet, sorte hoc aliquibus inquirendum videtur. Sic enim legimus Jonam fuisse in mare projectum, sicut et Josue Achan de anathemate surripientem sorte punivit, ut legitur Josue vii. Sic igitur uno modo sors ordinatur ad inquirendum quis sit habiturus vel possessionem vel dignitatem vel pœnam; et hæc vocari potest sors divisoria, quia per eam dividitur id quod ignoratur qualiter sit distribuendum: unde et verbum sortiendi a sortibus sumptum esse videtur.

Sicut autem dubitare contingit quis rem aliquam sit habiturus; ita dubitare contingit utrum re aliqua sit utendum, et universaliter utrum expediat aliquid agere. Nam omnis actio usus aliquis est vel sui ipsius, vel rei alterius. Cum igitur talis occurrit dubitatio circa agenda; si quidem per humanam prudentiam huic dubitationi satisfieri possit, ad humanum consilium recurrendum opinamur. Sed quia, ut dicitur Sapient. ix, 14: *Cogitationes mortalium timidæ et incertæ providentiæ nostræ*; ubi humano consilio dubitationi plenarie occurri non potest, ad sortium inquisitionem recurrerunt. Hujus exemplum legimus in Esther cap. iii, 7, ubi dicitur quod *missa est sors in urnam... quo die et quo mense gens Judæorum deberet interfici*: et quia hujusmodi sors succedit loco consilii, potest dici sors consultoria, quasi ad consultandum ordinata.

Sollicitantur etiam plerumque homines de futuris eventibus, ex quorum cognitione homo in pluribus agendis vel vitandis potest dirigi, et tamen futurorum

<sup>1</sup> Parm.: « Indos. »

cognitio excedit humanam industriam, secundum illud Eccle. viii, 6 : *Multa hominis afflictio qui ignorat præterita, et futura nullo scire potest nuntio.* Unde homines, ad aliquid de futuris eventibus cognoscendum, interdum putant esse recurrendum ad sortes; et huiusmodi sortem divinatoriam vocare possumus: divini enim dicuntur qui aliqua de futuris prænoscent, quasi sibi attribuentes quod est proprium Dei, secundum illud Isa. xli, 2 : *Annuntiate quæ ventura sunt in futurum, et sciemus quia dii estis vos.*

### CAPUT III.

*In quo ostenditur quis sit modus inquirendi per sortes.*

Scire autem oportet quod multipliciter aliqui cognitionem exquirunt eorum quæ humanam excedunt industriam. Quidam enim manifesta responsa deprecantur vel a Deo vel a dæmonibus: quorum primum pertinet ad propheticos viros, qui quadam privilegiata familiaritate Deo conjuncti, ab eo merentur instrui de futuris eventibus, aut de quibuscumque supernaturalibus rebus, secundum illud Amos iii, 7 : *Non faciet Dominus Deus verbum, nisi revelaverit secretum suum ad servos suos Prophetas.* Revelat autem interdum vigilantibus per manifestam visionem, interdum autem per somnium, secundum illud Num. xii, 6 : *Si quis fuerit inter vos Propheta Domini, in visione apparebo ei, vel per somnium loquar ad illum.* Hujus autem gratiæ particularis plerique homines participes effecti<sup>1</sup> admonentur in somnis de his quæ pertinent ad eorum salutem: unde dicitur Job xxxiii, 15 : *Per somnium in visione nocturna, quando irruit sopor super homines et dormiunt in lectulo, tunc aperit aures virorum, et erudiens eos instruit disciplinam\*, ut avertat hominem ab his quæ fecit, et liberet eum de superbia.* Secundum vero pertinet ad nigromanticos, qui quibusdam incantationibus et sacrificiis a dæmonibus aliqua responsa exquirunt vel sermone prolata, vel aliquibus signis demonstrata; et hoc vel in vigilia, vel in somno.

Quandoque vero aliquorum occultorum

homines exquirunt notitiam, quasi signum eorum accipientes ex quibusdam quæ in aliis rebus considerant: cujus quidem inquisitionis diversæ sunt species. Exquirunt enim quidam occultorum notitiam sive circa futuros eventus, sive circa ea quæ expedit agere, per considerationem cœlestium motuum, inspiciendo scilicet motus et situs eorum, ex quibus futura et occulta se posse cognoscere putant: quod pertinet ad mathematicos sive astronomos, qui etiam genethliaci appellantur propter natalium dierum considerationes.

Quidam vero occultorum notitiam exquirendam putant considerando motus et voces aliquorum animalium, et etiam hominum sternutationes: quod totum pertinet ad auguria sive ad aruspicia, quæ exinde dicuntur, quia præcipue aves inspiciunt, et earum garritus attendunt.

Alii vero sunt qui occultorum notitiam quærunt ex aliquibus quæ ab hominibus dicuntur vel fiunt sub alia intentione<sup>2</sup> quod quidem inquisitionis genus proprie nomen vocatur: cujus exemplum ex Valerio Maximo accipere possumus, qui narrat quod cum Lucius Paulus consul bellum cum rege Persarum esset factururus, a curia regressus filiam suam tristem inveniens, tristitiæ causam quæsit: quæ respondit, Persam periisse: decesserat enim catulus quidam nomine Persa. Arripuit igitur omen Paulus, et spem clarissimi triumphi animo concepit.

Quidam vero quærunt occulta attendendo quasdam figuras in quibusdam corporibus apparentes, ut puta secundum lineas manus humanæ quod dicitur chiromantia, vel etiam in osse spatulæ cujusdam animalis quod dicitur spatulantia.

Tertio vero modo aliqui notitiam occultorum requirunt ex his quæ per eos geruntur, eorum considerantes eventum: quod etiam multipliciter fit. Ad hoc enim genus pertinet geomantiæ usus, per quem quibusdam punctis descriptis eos diversimode secundum quasdam figuras disponendo, aliquorum occultorum putant per hoc se notitiam posse acquirere. Pertinet etiam ad hoc genus quod quibusdam cedulis reconditis in occulto, dum in quibusdam earum diversa scribuntur, in aliis vera nihil, discernitur quid accipientibus cedulas contingere

<sup>1</sup> Parm.: « perfecti. »

<sup>2</sup> Parm.: « aliqua attestazione. »

debeat, vel de eis quid oporteat fieri : cui etiam simile est quod quibusdam festucis inæqualibus absconditis, diversa circa aliquos indicantur ex eo quod majorem vel minorem<sup>1</sup> accipiunt. Ad quod etiam aliquo modo pertinere videtur taxillorum projectio, vel si aliquid aliud fiat, per quod dijudicatur qualiter sit aliquid dividendum, vel quid oporteat agere ad cognoscendum aliquod præteritum occultum futurum. Unde etiam duella videntur ad hoc pertinere, nisi in quantum per artem vel virtutem plerumque unus alium superat. Videntur etiam ad hoc pertinere judicia ferri candentis vel aquæ, vel alia hujusmodi; nisi quod in his non est eventus indifferens : unde in his requiritur expressius divinæ virtutis iudicium quam in aliis supradictis.

Nomen autem sortis ad hoc tertium inquisitionis genus videtur pertinere : cum scilicet aliquid fit ut, ejus eventu considerato, aliquod occultum innotescat : unde sortes dicuntur projici, vel in sinum mitti, vel aliquid aliud additur in commemoratione sortium quod pertinet ad actum humanum, secundum illud Proverb. xvi 33 : *Sortes mittuntur in sinum.*

Patet igitur ex supradictis quod sors est inquisitio occulti excedentis humanam industriam, per aliquid a nobis factum; scilicet rebus humanis ad nos pertinentibus vel habendis vel utendis vel cognoscendis.

Scire autem oportet quod quandoque hoc tertium inquisitionis genus quod ad sortes dictum est pertinere, potest alicui prædictorum generum permisceri. Quandoque quidem prophetiæ consultationi : sicut patet in facto Gedeonis, qui vellus expandens in area, inquisivit signum roris a Domino, ut legitur Judicum vi. Quandoque vero permiscetur nigromatiæ inspectioni, sicut in aruspicio, secundum quod inspiciuntur viscera animalium demonibus immolatorum. Quandoque vero astronomiæ considerationi, etiam augurum observationi, puta si hoc aut illud facienti, aspectus talis stellæ vel talis avis occurrat. Quandoque vero divinationi, quæ fit per observationem verborum propter aliud dictorum : ad quod pertinere videtur quod aliqui in in apertione librorum observant quid eis

occurrat. Et similiter aliæ sortium diversitates facile colligi possunt secundum commixtionem tertii generis ad alia duo. Hæc igitur de modo sortium dicta sint.

#### CAPUT IV.

##### *Unde sit sortium virtus.*

Oportet autem considerare, an sit efficax prædicta inquisitio sortium. Ad cujus considerationem assumere oportet diversas opiniones circa rerum humanarum eventus.

Quidam enim fuerunt qui res humanas nullo superiori regimine gubernari existimaverunt; sed solum ratione humana; ita quod quæcumque præter humanam providentiam fiunt in rebus humanis crederent esse omnino fortuita. Secundum igitur horum sententiam nulla potest esse præcognitio futurorum. Ea enim quæ fortuito fiunt, incognita sunt : unde totaliter sors divinatoria tollitur. Similiter etiam nec sors consultoria locum haberet : quid enim utile sit consultanti, pensatur ex futuris eventibus : unde si futuri eventus ignorantur, consultatio frustra fiet. Secundum hos tamen sors divinatoria locum potest habere : non quod per eam decernatur quid in divisione rerum expediat : sed ut quod ratione definiri non potest, saltem relinquatur fortunæ. Sed hæc opinio divinam providentiam, quæ infinita est, certo fine concludit. Dum enim subtrahit a divina providentia res humanas, in quibus tamen plerumque manifesta indicia divinæ gubernationis apparent, ipsis etiam rebus humanis facit injuriam quas absque regimine fluctuare affirmat. Subtrahit etiam cujuscumque religionis cultum, et Dei timorem hominibus aufert. Unde penitus est repudianda.

Alii vero fuerunt qui dixerunt omnes actus humanos et eventus eorum, et omnes res humanas necessitati siderum subdi : unde cum sit certus ordo quo moventur cœlestia corpora, ex eorum consideratione æstimabant posse per certitudinem futuros hominum eventus prænosci, nisi quatenus ad hoc hominibus experientia deficit. Et quia secundum horum sententiam omnes actus humani

<sup>1</sup> Parm. omittit : « vel minorem. »

ex siderum necessitate proveniunt, consequens est ut etiam ipsi humani actus, qui requiruntur ad sortes, secundum siderum dispositionem procedant, ut hoc vel illud proveniat; puta, si geomanticus puncta describat in pulvere, manus ejus moveri asserunt secundum cœli virtutem ad hoc quod talis numerus punctorum proveniat, qui sit conveniens dispositioni cœlesti; idemque in ceteris similibus dicunt. Et sic secundum ea quæ proveniunt ex hujusmodi actibus, dicunt futura posse prænosci, secundum quod procedunt ex virtute cœlestium corporum, ex quibus humanos eventus disponi existimabant. Et sic secundum hanc opinionem sors divinatoria locum habet, per quam considerantur futuri eventus: et per consequens consultoria, quæ dependet ex consideratione futurorum eventuum. Divisoria etiam sors locum habet non solum quantum ad hoc ut rerum divisio sortis iudicio relinquatur; sed etiam quantum ad hoc ut sic possideantur res sicut dispositio cœlestis requirit. Et quia non solum actus humanos, sed etiam ceterorum animalium motus, atque omnium naturalium corporum, sideribus dicunt esse subjectos; secundum prædictam etiam rationem dicunt, per auguria, et alios prædictos inquisitionis modos, ad idem genus pertinentes, posse futura prænosci, inquantum hos motus vel dispositiones ex virtute siderum dicunt procedere: unde hujusmodi nominant stellas secundas, quia in his impressio quædam apparet cœlestium corporum. Et quia homo dormiens non habet perfectum rationis usum, sed secundum imaginem communem movetur, ex prædicta etiam causa dicunt somnia vim divinationis habere, inquantum scilicet motus phantasmatum quæ apparent in somnis, ex corporum cœlestium dispositione procedunt. Sed et hæc opinio expressam continet falsitatem. Non enim est possibile quod cœlestia corpora in aliquid incorporeum imprimant; quia quolibet incorporeum est virtuosius et nobilius quolibet corpore. Intellectus autem humanus neque est corpus neque virtus corporei organi, ut Aristoteles probat: alioquin non posset omnium corporum naturas cognoscere; sicut oculus non posset videre omnes colores, si pupilla

esset aliquo colore affecta<sup>1</sup>. Impossibile est ergo quod corpus cœleste imprimat in intellectum humanum. Voluntas autem in intellectiva parte est, et movetur a bono per intellectum apprehenso: unde pari ratione corpora cœlestia in eam imprimere non possunt. Omnes autem actus humani principaliter ex intellectu et voluntate procedunt. Non possunt igitur per certitudinem futuri hominum actus prænosci per inspectionem cœlestium corporum; et multo minus per inspectionem quorumcumque aliorum quæ ab eis moventur, puta per garritum avium, per descriptionem punctorum, et alia supradicta. Manifestum est autem quod humanarum rerum eventus plurimi ab actibus humanis dependent: unde nec eventus humanarum rerum per prædicta possunt prænosci. Inquantum tamen humanarum rerum eventus dependet ex aliquibus corporeis causis, sicut abundantia frugum ex siccitate aeris vel pluviarum descensu, nihil prohibet eos ex inspectione stellarum posse prænosci, et per consequens ex consideratione aliorum corporum, quæ dispositionem stellarum sequuntur: quia, sicut Augustinus dicit in VI *De civ. Dei*, c. vi « non usquequaque absurde dici potest<sup>2</sup>, ad solas corporum differentias afflatus quosdam valere sidereos, sicut solaribus accessibus et recessibus. » Videmus etiam ipsius anni tempora variari, et lunaribus incrementis atque decrementis augeri aut minui quædam genera rerum<sup>3</sup> unde et nautæ ex consideratione stellarum et statu animalium prænoscent ventos et tempestates futuras. Nec tamen erit de sortibus similis ratio: quia per sortes non solum de actibus humanis inquiritur, sed etiam per humanos actus inquisitio ipsa procedit: unde non potest dici quod ipsa projectio sortium, corporum cœlestium dispositionem ex necessitate sequatur. Quia tamen ad actus humanos non solum concurrunt voluntas et intellectus, qui impressioni siderum non subduntur, sed etiam sensitiva pars animæ, quæ in eo quod corporali utitur organo, necesse est quod corporibus cœlestibus subjiciatur; potest dici quod ex dispositione cœlestium corporum aliqua inclinatio sit in nobis ad hæc vel illa facienda; inquantum scilicet ad hoc inducimur per

<sup>1</sup> Parm.: « infecta. »

<sup>2</sup> « Posset... sicut in solaribus... et decibus. »

<sup>3</sup> Parm. omittit: « rerum. »



imaginariam apprehensionem, et per appetitus sensitivi passiones, scilicet iram, timorem et alia hujusmodi, ad quæ homo est magis vel minus dispositus secundum corporalem complexionem, quæ subditur dispositioni stellarum. Quia tamen homo per intellectum et voluntatem, imaginatio- nis phantasmata et sensibilis appetitus passiones reprimere potest; ex stellarum dispositione nulla necessitas inducitur homini ad agendum, sed quædam incli- natio sola, quam sapientes moderando refrenant. Propter quod Ptolomæus dicit in *Centiloquio* quod « sapiens homo do- minatur astris, » idest inclinationi quæ ex astrorum dispositione relinquitur. Stulti vero omnino secundum ea agun- tur, quasi ratione non utentes; in quo parum discordant a bestiis, secundum illud Psalm. XLVIII, 13 : *Homo, cum in honore esset, non intellexit; comparatus est jumentis insipientibus, et similis factus est illis.* Et quia « stultorum » secundum Salomonem Eccl. I, 15 *infinitus est nume- rus, in paucis autem perfecte ratio do- minatur, in pluribus hominum inclina- tiones cælestium corporum sortiuntur effectum.* Et propter hoc quandoque as- trologi ex inspectione stellarum vera prænuntiant, præcipue circa communes eventus; quamvis in particularibus fre- quenter deficiant propter rationem, quæ corporibus cælestibus non est sub- jecta : unde in protractione punctorum geomantiæ, actores hoc observandum putant, ut et ille qui protrahit puncta, absque præmeditatione rationis proce- dat; et ille qui consultat, quasi interiori sollicitudine instigatus interroget, non quasi ex deliberatione rationis : quod etiam in omnibus talibus consultationi- bus dicunt esse servandum. Quamvis autem secundum prædictum inclinationis modum, corpora cælestia disponant ad aliquos actus humanos necessitatem non imponendo, non tamen ad omnes even- tus humanos talis inclinatio se potest extendere. Corpora enim cælestia natu- raliter agunt. Est autem hoc naturæ pro- prium ut ad unum aliquid tendat; sicut etiam actio rei naturalis ab uno procedit principio, scilicet a propria forma rei, quæ est naturalis actionis principium. Intellectus vero agit per formas mente conceptas, quæ in eodem possunt multi- plicari : et ideo potestates rationales non determinantur ad unum, sed se ha- bent ad multa. Ea vero quæ in humanis

eventibus casualiter accidunt, per acci- dens sunt; puta quod homo fodiens se- pulcrum, inveniatur thesaurum. Quod vero per accidens est, non est unum. Unde nullum agens naturale inclinare potest ad id quod per accidens evenit. Posset igitur esse in homine aliqua inclinatio naturalis ut sepulcrum foderet, quia hic hoc aliquid unum est, et similiter ad hoc quod thesaurum quæreret; sed hoc quod fodienti sepulcrum thesaurus occurrat, non potest causam naturalem habere. Non igitur per modum inclinationis ad omnes eventus humanos secundum præ- dictam opinionem sortium inquisitio ef- ficax esse potest. Sed intellectus potest accipere ut unum quod evenit per acci- dens, ex multis unam compositionem formando : et ideo nihil prohibet aliqua quæ per accidens evenire videntur, ab aliquo intellectu esse præordinata; puta, si aliquis lapidem in via ponat, ad quem qui ab eo mittitur, impingens cadat; casus quidem euntis est per accidens, non eveniens secundum ejus proposi- tum; est autem dispositum per intellec- tum alterius eum mittentis.

Et secundum hunc modum alii dicunt quod ea quæ in humanis eventibus se- cundum nos videntur esse fortuita, ab aliquo superiori intellectu ordinantur. Supremus autem intellectus Deus est, qui sicut sua sapientia universa in esse produxit, ita etiam eadem sapientia con- servat et movet, omnia dirigens in debi- tum finem, secundum illud Sap. VIII, 1 : *Attingit a fine usque ad finem fortiter, et disponit omnia suaviter.* Divina autem dispositione non solum moventur cor- pora, sed etiam hominum mentes ad pro- prias actiones. A Deo enim illuminatur intellectus humanus ad veritatem cognos- cendam; unde Psalmista petebat Psalm. XII, 5 : *Illumina oculos meos, ne unquam obdormiam in morte.* Ejus etiam virtute moventur hominum voluntates ad desi- derandum et agendum, secundum illud Apostoli ad Phil. II, 13 : *Deus est qui ope- ratur in nobis et velle et perficere pro bona voluntate.* Et quia intellectus et voluntas sunt propria principia actuum humano- rum, consequens est quod humani actus subdantur dispositioni divinæ, secundum illud Isai. XXVI, 12 : *Omnia opera nostra operatus es in nobis.* Quia igitur et hu- mani actus et exteriorum rerum motus providentiæ divinæ subduntur, quid uni- cuique accidere debeat, ex divina dispo-

sitione procedit, per quam quidam sui propositi debitum finem assequuntur : unde Psalmista petebat, Psalm. xxiv, 5 : *Dirige me in veritate tua.* Et interdum etiam homines in aliquod bonum dispositione divina inducuntur præter eorum propositum : unde et Apostolus dicebat ad Ephes. III, 20 : *Deus potens est facere omnia superabundanter quam petimus aut intelligimus.* Similiter etiam ex divina dispositione procedit quod homines deficient a suo proposito, secundum illud Job v, 12 : *Qui dissipat cogitationes malignorum, ne possint implere manus eorum quod cœperant.* Interdum etiam ex divina dispositione dejiciuntur aliqui in adversa, quæ nec cavere potuerunt, secundum illud Isai. xxiii, 7 : *Ducent eam pedes sui longe ad peregrinandum. Quis cogitavit hoc super Tyrum quondam coronatam?* Et postea subdit : *Dominus exercituum cogitavit hoc.* Et inde est quod dicitur Jer. x, 23 : *Scio, Domine, quia non est hominis via ejus, nec viri est ut ambulet et dirigat gressus suos.*

Ex his igitur patet quod humanarum rerum eventus non subduntur totaliter dispositioni humanæ, sed dispositioni divinæ : ex qua contingit quod aliqui ad ampliora bona proveniunt quam excogitare potuissent, qui dicuntur bene fortunati ; quidam vero ab his quæ prudenter disponunt, deficient, et ad inordinata mala deveniunt, qui infortunati dicuntur.

Hoc autem non solum auctoritate divina firmatur, sed ex sententiis philosophorum patet. Aristoteles enim in lib. *De bona fortuna* sic dicit : « Hominis principium non ratio, sed aliquid melius. Quid igitur erit melius scientia et intellectu, nisi Deus? Et propter hoc bene fortunati vocantur qui si impetum facient, diriguntur sine ratione existentes : habent enim principium tale quod est melius intellectu et consilio.

Sic igitur secundum prædeterminata ex divina dispositione inquisitio sortium efficaciam potest habere, inquantum et eventus exteriorum rerum divinæ providentiæ subjiuntur, et per ipsam humani actus diriguntur. Et sic potest contingere, Deo faciente, ut humani actus talem sortiantur effectum sive processum qui competit exteriorum rerum eventibus : unde dicitur Prov. xvi, 33 : *Sortes mit-*

*tuntur in sinum, sed a Domino temperantur* : et Dionysius dicit, v cap. *Ecclesiasticæ hierar.*, de divina sorte quæ super Matthiam divinitus cecidit : « Alii quidem aliter dixerunt non religiose tractantes, sicut arbitrò ; meam autem et ipse intentionem dicam. Videntur mihi sacra eloquia sortem nominare thearchicum, idest divinum, quoddam donum demonstrans illi hierarchico choro, » idest apostolico, « divina electione susceptum. » Per quod datur intelligi, ad sortem pertinere cum ex dono Dei per certum effectum humanorum actuum declaratur hominibus quid divina dispositio habeat vel in rebus dividendis quod pertinet ad divisoriam sortem ; vel in rebus agendis quod pertinet ad consultoriam ; vel in futuris prænoscentis quod pertinet ad divinoriam sortem.

Considerandum tamen quod divina dispositio quorundam spirituum ministerio operatur, secundum illud Psalm. cii, 20 : *Benedicite Domino omnes Angeli ejus* : et postea subditur : *Ministri ejus qui faciunt voluntatem ejus* : unde eorum operatio in omnibus divinæ dispositioni concordat ; et sic de his quæ per eos aguntur, idem est judicium, et de his quæ aguntur dispositione divina. Sunt tamen quidam deceptores spiritus, quos dæmones nominamus, qui quamvis, quantum in ipsis est, dispositioni divinæ renitentur, utitur tamen Deus eis ad suæ dispositionis impletionem, sicut et malis hominibus utitur ad implendum suæ propositum voluntatis, ut patet in tyrannis, quorum nequitia usus est ad coronas Martyribus fabricandas. Hujusmodi autem immundi et fallaces spiritus ambiunt honorem Divinitatis sibi ab hominibus deferendum ; et ideo illis rebus se ingerunt quæ ad Deum pertinere videntur, ut divinitatis eis honor ab hominibus deceptis exhibeatur. Et inde est quod imaginibus quas a principio fecerant homines ex inordinato affectu ad mortuos, dæmones se incluserunt, in quibus responsa dabant, ut ex hoc divinum honorem sibi conquirerent. Similiter autem cum per sortes vel quolibet alio modo homines præter debitum ordinem occulta exquirunt, ingerunt se dæmones, ut divinationis prætextu homines in errorem inducant : unde Augustinus <sup>1</sup> in II *Super Gen. ad litteram*

<sup>1</sup> Al. redundat hic : « dicit. »

cap. xvii, de mathematicis loquens, qui per astra futuros eventus prænuntiant, « Fatendum est » inquit « quando ab istis vera dicuntur, instinctu quodum occultissimo dici, quem nescientes humanæ mentes patiuntur : quod cum ad decipiendos <sup>1</sup> homines sit, spirituum immundorum et seductorum operatio est : » et in II *De doctrina christiana* c. xxiii dicit, omnia hujusmodi divinationum genera ad pacta quædam cum dæmonibus inita pertinere. Et ab hoc non discordat sententia Valerii Maximi, qui dicit quod hominum observatio aliquo contractu religionis innixa est, quoniam non fortuito motu, sed divina providentia constare creditur.

Patet ex præmissis, unde sortes efficaciam habent.

## CAPUT V.

*In quo ostenditur utrum sortibus liceat uti.*

His igitur visis, de facili patet utrum sortibus liceat uti. Et primo manifestum est quod nulli Christiano licet aliquod pactum societatis cum dæmonibus habere. Dicit enim Apostolus I ad Cor. x, 20 : *Nolo vos socios fieri dæmoniorum* : ad quam societatem pertinent non solum manifestæ dæmonum invocationes, quibus nigromantici utuntur, sed etiam quæcumque occulta <sup>2</sup> pacta cum dæmonibus inita. Et ideo Augustinus, II *De doctrina christiana* cap. xxiii præmissis diversis superstitiosis hominum observationibus subdit : « Omnes artes<sup>3</sup> hujusmodi vel nugatoriæ vel noxiæ superstitionis ex quadam pestifera societate hominum et dæmonum, quasi pacta infidelis et dolosæ amicitia constituta, penitus sunt repudianda et fugienda Christiano. » Unde et Deut. xviii, 10, dicitur : *Non inveniatur in te qui lustrat filium suum aut filiam, ducens per ignem; aut qui ariolos sciscitetur, et observet somnia atque auguria; nec sit maleficus aut incantator, nec qui pythones consulat, nec divinos, et<sup>4</sup> quærat a mortuis veritatem.*

Sed adhuc dubitatio restat, quæ sint dicendæ superstitiosæ inquisitiones sortium, vel quarumcumque divinationum,

per quas pacta cum dæmonibus contrahuntur. Cujus quidem dubitationis solutio haberi potest ex præmissis Augustini verbis, si subtiliter discutiantur. Dixit enim per artes nugatoriæ vel noxiæ superstitionis pacta cum dæmonibus fieri. Noxia autem superstitio dicitur quæ aliquid manifeste illicitum continet; sicut invocationes et sacrificia dæmonum, vel quodcumque hujusmodi. Nugatorium autem dicitur quando aliquis utitur re aliqua ad quod virtus ejus extendi non potest : hoc enim in vanum fieri videtur. Vana ergo nugatoria dicimus : puta si æger medicinam assumat contra morbum quem potest sanare, non est superstitiosa nugatio : sed si quis collo alliget quædam quæ omnino ad sanitatem non pertinent, etiam secundum sententiam medicorum hoc ad nugatoriam superstitionem pertinere videtur; et simile est, cum vestis a soricibus roditur, plus timere suspicionem mali futuri quam præsens damnum dolere : et multa hujusmodi exempla Augustinus ponit ibidem.

Ad quæ autem <sup>4</sup> virtus sortium se possit extendere, haberi potest ex præmissis. Ostensum est enim quod cœlestium corporum virtus extendit se ad corporales effectus, non autem ad immutandum liberum arbitrium hominis : unde si quis astrologum consulat utrum sit æstas futura pluviosa vel sicca; non est nugatoria consultatio, sicut si quis consuleret utrum sibi fodienti sepulcrum thesaurus occurrat, vel quid sibi interroganti alius sit responsurus : unde talis consultatio ad societatem dæmonum pertinet, qui inordinatis hominum motibus se immiscerent. Idem quoque est in augurio observandum. Si quis enim cornicula frequenter crocitate mox futuram prænuntiet pluviam, non est nugatoriæ superstitionis : moventur enim animalia quodam naturali instinctu ex impressione corporum cœlestium, secundum dispositionem aeris ad temporis cognitionem, secundum quod est necessarium naturæ ipsorum, secundum illud Jerem. viii, 7 : *Milvus in cælo cognovit tempus suum; turtur et hirundo et ciconia custodierunt tempus adventus sui.* Similiter etiam si quis ex subito volatu avium denuntiet ibi latere insidias, unde aves volando recesserunt,

<sup>1</sup> Al. : « ad decipientes. »

<sup>2</sup> Parm. omittit : « occulta pacta cum dæmonibus inita. Et ideo. »

<sup>3</sup> Al. : « artifices. »

<sup>4</sup> Parm. omittit : « autem. »

non est superstitio, sed humana industria. Si vero per motum vel garrum avium de humanis actibus prænuntietur aliquid, superstitiosum est. Simile etiam est in sortibus et omnibus similibus observandum quod quicquid aliquam certam causam potest habere vel naturalem vel humanam vel divinam, superstitiosum non est; sed solum id nugatorium dicitur et superstitiosum, quod certam habere non potest causam: et hoc ad societatem dæmonum pertinet, qui talibus rebus efficaciam aliquando præstant, ut vanitatibus animos hominum implicent: unde in Psalm. xxxix, 5, dicitur: *Beatus vir cuius est nomen Domini spes ejus, et non respexit in vanitates et insanias falsas.* Has igitur sortes sacri canones damnant, quæ dum noxia vel nugatoria superstitione fiunt, ad societatem dæmonum pertinent.

Si autem ea quæ naturalem vel humanam causam habent, culpa carent, multo magis ea quæ divino auxilio innituntur. Nam ad beatitudinem hominis pertinet, secundum Psalmum eundem, ut nomen Domini sit spes ejus: et ideo si per sortium projectionem aliqui divinum requirant iudicium, non est secundum se peccatum. Dicit enim Augustinus *Super illud Psalm. xxx: In manibus tuis sortes meæ.* « Sors non est aliquid mali, sed res in humana dubietate divinam indicans voluntatem. »

Sciendum tamen, quatuor modis in hujusmodi sortibus peccatum posse contingere. Uno modo, si absque ulla necessitate putet aliquis ad sortes esse recurrendum: hoc enim videtur esse tentare Deum, si quis habens quod faciat ex humana industria, eo prætermissio putet esse requirendum divinum iudicium. Dicitur enim II Paralip. xx, 12: *Cum ignoremus quid agere debeamus, hoc solum habemus residui ut oculos nostros dirigamus ad te.* Secundo, si absque debita reverentia et devotione, etiam in necessitate, sortibus requiritur divinum iudicium: unde Beda dixit *Super Actus Apostolorum*: « Si qui necessitate aliqua compulsi Deum putant sortibus exemplo Apostolorum esse consulendum, videant hoc ipsos Apostolos collecto fratrum cœtu et precibus ad Deum fuis egisse. » Tertio, si divina oracula ad humana et terrena negotia convertantur: unde Augustinus dicit *Ad inquisitiones Januarii*: « Hi qui de paginis evangelicis sortes legunt,

etsi optandum sit ut id potius faciant quam ad dæmonia consulenda concurrant; tamen ista mihi displicet consuetudo, ad negotia sæcularia et ad vitæ hujus vanitatem divina oracula velle convertere. » Quarto, si illud quod est per divinam inspirationem faciendum, aliquis forte velit committere sorti; sicut ad ecclesiasticas dignitates sunt homines promovendi concordia electionis, quam Spiritus sanctus facit: et ideo illicitum est in hujusmodi electionibus sorte uti: faceret enim injuriam Spiritui sancto, qui humanum sensum instruit ad recte iudicandum, secundum illud I ad Corinth. ii, 15, *Spiritualis iudicat omnia.* « Qui autem sorte eligitur, humano iudicio non comprehenditur, » ut dicit Ambrosius *Super Lucam*: unde, sicut Beda dicit *Super Actus Apostolorum*, « Matthias, ante Pentecosten ordinatus sorte quæritur, quasi nondum Spiritus sancti plenitudine in Ecclesia effusa; septem autem diaconi postea non sorte, sed discipulorum electione, Apostolorum vero oratione et manus impositione sunt ordinati. »

Prædicta autem necessitas, in qua licitum est per sortes divinum iudicium implorare, maxime videtur locum habere quantum ad consultoriam sortem: quia et apud antiquos justos frequenter invenimus aliquos Deum in dubiis negotiis consultasse, sicut legitur I Reg. xxx, 8, quod *consuivit David Dominum dicens: Persequar latrunculos hos et comprehendam eos, an non?*

Potest etiam hujusmodi necessitas ad sortem pertinere divisoriam: quando scilicet contradictiones hominum super rerum divisiones aliter sopiri non possunt, nisi per sortes divino iudicio committatur, secundum illud Proverb. xviii, 18: *Contradictiones exprimit sors, et inter potentes quoque dijudicat.* Nec solum in rerum divisione necessitas divisorie sortis potest provenire; sed etiam in divisione eorum quæ sunt a diversis agenda: unde Augustinus dicit in *Epistola ad Honoratum*: « Si inter Dei ministros sit disceptatio, qui eorum persecutionis tempore maneat, ne fuga omnium; et qui eorum fugiant, ne morte omnium deseratur Ecclesia: si hæc disceptatio aliter non poterit terminari; quantum mihi videtur, qui maneat et qui fugiant, sorte eligendi sunt. »

Similiter etiam sortis necessitas imminet, si aliquid dandum occurrat pluribus

quod non nisi uni eorum dari possit : unde Augustinus dicit in I *De doctrina christiana* cap. xxviii : « Si tibi abundaret aliquid quod oporteret dari ei qui non haberet, nec duobus dari posset <sup>1</sup>; si tibi duo occurrerent quorum neuter alium vel indigentia, vel egestate aliqua, vel necessitate <sup>2</sup> superaret; nihil justius faceres quam ut sorte legeres cui dandum esset quod dari utrique non posset. » Et quia terrenæ dignitatis officium ad temporalia dispensanda ordinatur; potest etiam licite ad hujusmodi sortes haberi recursus, si aliter electio concors esse non potest : quamvis enim rector quærendus sit non sorte, sed industria prudens; tolerabilius tamen est sorte sæcularem rectorem quærere quam populum dissensionibus laborare. De rectore vero spirituali est alia ratio, ut supra jam diximus.

Sed in divinatoria sorte prædicta necessitas non videtur occurrere : unde et Dominus dicit discipulis Act. 1, 7 : *Non*

*est vestrum nosse tempora vel momenta quæ Pater posuit in sua potestate.* Si qua tamen futura necessarium est prænoscere sive ad cautelam Ecclesiæ, sive alicujus singularis personæ; hæc per Spiritum sanctum fidelibus innotescunt : de quo Dominus dicit Joan. xvi, 13 : *Quæ ventura sunt annuntiabit vobis.* Unde et de hujusmodi futuris licet per modum consultoriæ sortis judicium divinum requirere; sicut legitur Judicum vi quod Gedeon quæsivit a Domino si per manus ejus populus Israel esset salvandus, petens signum in vellere. Sed quia divisorsia sors locum posset habere etiam si res humanæ fortuito agerentur, ut supra dictum est; contingit aliquem divisorsia sorte uti, non quasi requirat divinum judicium, sed quasi committens fortunæ : quod maxime videtur in taxillatorio ludo. Hoc autem vitio vanitatis non caret. In tantum igitur nunc de sortibus dictum est.

<sup>1</sup> Al. : « potuisset. »

<sup>2</sup> « Vel erga te aliqua necessitudine superaret etc. »



# OPUSCULUM XXII.

## DE JUDICIIS ASTRORUM AD FRATREM REGINALDUM.

(EDIT. ROM. XXV.)

Quia petisti ut tibi scriberem an liceret judiciis astrorum uti; petitioni tuæ satisfacere volens, quæ a sacris doctoribus super hoc traduntur, scribere curavi.

In primis ergo oportet te scire, quod virtus cœlestium corporum ad immutanda corpora inferiora se extendit. Dicit enim Augustinus, V, *De civitate Dei*, c. vi: « Non usquequaque absurde dici potest<sup>1</sup>, ad solas corporum differentias afflatus quosdam sidereos pervenire. » Et ideo si aliquis judiciis astrorum utatur ad præ-noscendum corporales effectus, puta tempestatem et serenitatem aeris, sanitatem vel infirmitatem corporis, vel ubertatem et sterilitatem frugum, et similia quæ ex corporalibus et naturalibus causis dependent; nullum videtur esse peccatum. Nam omnes homines circa tales effectus aliqua observatione utuntur corporum cœlestium; sicut agricolæ seminant et metunt certo tempore, quod observatur secundum motum solis; nautæ navigationem vitant in plenilunio; similiter<sup>2</sup>, etiam in lunæ defectu; medici circa ægritudines criticos dies observant, qui determinantur secundum cursum solis et lunæ. Unde non est inconveniens secundum aliquas alias occultiores stellarum observationes circa corporales effectus uti astrorum iudicio.

Hoc autem omnino tenere oportet, quod voluntas hominis non est subjecta

necessitati astrorum; alioquin periret liberum arbitrium: quo sublato non deputarentur homini neque bona opera ad meritum, neque mala ad culpam. Et ideo certissime tenendum est cuilibet Christiano, quod ea quæ ex voluntate hominis dependent, qualia sunt omnia humana opera, non ex necessitate astris subduntur: et ideo dicitur Jerem. x, 2: *A signis cœli nolite metuere, quæ gentes timent.* Sed diabolus ut omnes pertrahat in errorem, immiscet se operationibus eorum qui judiciis astrorum intendunt. Ideo Augustinus dicit II *Super Gen. ad litteram*, c. xvii: « Fatendum, quando ab Astrologis vera dicuntur, instinctu quodam occultissimo dici, quem nescientes humanæ mentes patiuntur: quod cum ad decipiendos homines sit, spirituum immundorum et seductorum operatio est; quibus quædam vera de temporalibus rebus nosse permittitur. » Et ideo Augustinus dicit II *De doctrina christiana*, c. xxiii, quod tales astrorum observationes referendæ sunt ad quædam pacta cum dæmonibus habita. Est autem omnino Christiano vitandum pactum vel societatem cum dæmonibus habere, secundum illud Apostoli, I ad Corinth. x, 20: *Nolo vos fieri socios dæmoniorum.* Et ideo pro certo tenendum est, grave peccatum esse, circa ea quæ a voluntate hominis dependent, judiciis astrorum uti.

<sup>1</sup> Al. : « posset. »

<sup>2</sup> Parm. : « vel. »

# OPUSCULUM XXIII.

## TRACTATUS QUID SIT POSSIBILE DE ÆTERNITATE MUNDI<sup>1</sup>.

(EDIT. ROM. XXVII.)

Supposito secundum fidem catholicam, mundum ab æterno non fuisse, sicut<sup>2</sup> quidam philosophi errantes posuerunt, sed quod mundus durationis initium habuerit, sicut Scriptura sacra, quæ falli non potest testatur; dubitatio mota est, utrum potuerit semper fuisse. Cujus dubitationis ut veritas explicetur, primo distinguendum est quid est in quo cum dicentibus contrarium convenimus, et quid est illud in quo ab eis differimus. Si enim intelligatur quod aliquid præter Deum potuerit semper fuisse, quasi possit esse aliquid<sup>3</sup> præter eum, ab eo non factum; error abominabilis est non solum in fide, sed etiam apud philosophos, qui confitentur et probant quod omne quod est quoquo modo, esse non possit nisi sit causatum ab eo qui maxime et verissime habet esse. Si autem intelligatur aliquid semper fuisse, et tamen causatum a Deo secundum totum quod in eo est; videndum est utrum hoc possit stare. Si autem dicatur hoc impossibile; vel hoc dicetur quia Deus non potuit facere aliquid quod semper fuerit; aut quia non potuerit<sup>4</sup> fieri, etiam si Deus posset facere. In prima autem parte omnes consentiunt: scilicet in hoc quod Deus potuit facere aliquid quod semper fuerit, considerando potentiam ipsius infinitam.

Restat igitur videre, utrum possibile sit aliquid fieri quod semper fuerit. Si autem dicatur quod hoc non potest fieri; hoc non potest intelligi nisi duobus modis, vel duas causas veritatis habere: scilicet vel propter remotionem potentiæ passivæ, vel propter repugnantiam intellectuum. Primo modo posset dici, quod antequam Angelus sit factus, non poterat Angelus fieri, quia non præcessit ad ejus esse aliqua potentia passiva, cum non sit factus ex materia præcedenti<sup>5</sup>; tamen Deus poterat facere Angelum, et poterat facere ut Angelus fieret, quia fecit, et factus est. Sic ergo intelligendo, simpliciter concedendum est secundum fidem, quod non potest causatum a Deo semper esse: quia hoc ponere esset ponere potentiam passivam semper fuisse; quod hæreticum est. Tamen ex hoc non sequitur quod Deus non possit facere ut fiat semper aliquod ens. Secundo modo dicitur per repugnantiam intellectuum aliquid non posse fieri, sicut non potest fieri ut affirmatio et negatio sint simul vera; quamvis Deus hoc possit facere, ut quidam dicunt<sup>6</sup>. Unde Augustinus in libro XXVI, *Contra Faustum*, c. v: « Quisque<sup>7</sup> ita dicit: Si omnipotens est Deus, faciat ut quæ facta sunt, facta non fuerint: non videt hoc se dicere: Si omnipotens est,

<sup>1</sup> Parm.: « de æternitate mundi contra murmurantes. »

<sup>2</sup> Cod. S. Genov. non habet: « sicut quidam Philosophi errantes posuerunt, » nec: « sicut Scriptura sacra quæ falli non potest testatur. »

<sup>3</sup> Parm. addit: « æternum. »

<sup>4</sup> Parm.: « potuit. »

<sup>5</sup> Parm.: « præjacenti. »

<sup>6</sup> Parm.: « quidam vero dicunt, quod nec Deus hoc potest facere, quia positio qua ponitur esse, destruit se ipsam. Si tamen ponatur quod Deus potest facere de heri ut fiat; positio non est hæretica, quamvis, ut credo, sit falsa, sicut quod præteritum non fuerit, includit in se contradictionem. »

<sup>7</sup> Parm.: Quisquis itaque. »

faciat ut ea quæ vera sunt, eo ipso quod vera sunt, falsa sint. » Et tamen quidam magni pie dixerunt Deum posse facere de præterito quod non fuerit præteritum; nec fuit reputatum hæreticum. Videndum est ergo, utrum in his duobus sit repugnantia intellectuum, quod aliquid sit causatum a Deo, et tamen semper fuerit<sup>1</sup>. Cum enim ad omnipotentem Dei pertineat ut omnem intellectum et virtutem excedat, expresse omnipotentia derogat qui dicit aliquid posse intelligi in creaturis quod a Deo fieri non possit. Nec est instantia de peccatis, quæ in quantum hujusmodi, nihil sunt.

In hoc ergo tota consistit quæstio, utrum esse creatum a Deo secundum totam substantiam, et non habere durationis principium, repugnet ad invicem, vel non. Quod autem non repugnet, sic ostenditur. Si enim repugnant, hoc non est nisi propter alterum duorum, vel propter utrumque : aut quia oportet ut causa agens præcedat duratione ; aut quia oportet quod non esse præcedat esse duratione, propter hoc dicitur creatum a Deo ex nihilo fieri. Primo ergo ostendendum, quod non est necesse ut causa agens, scilicet Deus, præcedat duratione suum causatum, si ipse voluisset.

Primo sic. Nulla causa producens effectum suum subito, necessario præcedit effectum suum duratione. Sed Deus est causa producens effectum suum non per motum, sed subito. Ergo non est necessarium quod duratione præcedat effectum suum. Primum patet per inductionem in omnibus mutationibus subitis, sicut est illuminatio et hujusmodi. Nihilominus potest probari per rationem sic. In quocumque instanti ponitur res esse, potest poni principium actionis ejus, ut patet in omnibus generabilibus : quia in illo instanti in quo incipit ignis, incipit esse calefactio. Sed in operatione subita, simul, immo idem est principium et finis ejus, sicut in omnibus indivisibilibus. Ergo in quocumque instanti ponitur agens producens effectum suum subito, potest poni terminus actionis suæ. Sed terminus actionis est simul cum ipso facto. Ergo non repugnat intellectui, si ponatur causa producens effectum suum

subito non præcedere duratione causatum suum. Repugnaret autem in causis producentibus effectus suos per motum : quia oportet quod principium motus præcedat finem ejus. Et quia homines consueti sunt considerare hujusmodi factiones quæ sunt per motum ; ideo non facile capiunt quod causa agens duratione effectum suum non præcedat. Et inde est quod multorum inexperti ad pauca respicientes enuntiant facile.

Nec potest huic rationi obviari, quia Deus est causa agens per voluntatem : quia non est necessarium quod voluntas præcedat duratione effectum suum, nec agens per voluntatem, nisi per hoc quod agit ex deliberatione ; quod absit ut in Deo ponamus.

Præterea. Causa producens totam rei substantiam, non minus potest in producendo totam substantiam, quam causa producens formam in productione formæ ; immo multo magis ; quia non producit educendo de potentia materiæ, sicut est in eo qui producit formam. Sed aliquod agens quod producit solum formam, potest in hoc ut forma ab eo producta sit quancumque ipsum est, ut patet in sole illuminante. Ergo multo fortius Deus, qui producit totam rei substantiam, potest facere ut causatum suum sit quancumque ipse est.

Præterea. Si aliqua sit causa qua posita in aliquo instanti non possit poni effectus ejus ab ea procedens in eodem instanti, hoc non est nisi quia illi causæ deest aliquid de complemento : causa enim completa et causatum sunt simul. Sed Deo nunquam deest aliquid de complemento. Ergo causatum ejus semper potest poni eo posito ; et ita non est necessarium quod duratione præcedat.

Præterea. Voluntas volentis nihil minuit de virtute ejus, et præcipue in Deo. Sed omnes solventes ad rationes Aristotelis, quibus probatur res semper fuisse a Deo, per hoc quod idem semper facit idem, dicunt quod hoc sequeretur, si non esset agens per voluntatem. Ergo et si ponatur agens per voluntatem, nihilominus sequitur quod non potest facere ut causatum ab eo nunquam non sit.

Et ita patet quod non repugnat intel-

<sup>1</sup> Parm. : « et quidquid de hoc verum sit, non erit hæreticum dicere : quia hoc potest fieri a Deo ut aliquid causatum a Deo semper fuerit. Tamen credo quod si esset repugnantia intellec-

tuum, non solum non est falsum, sed etiam impossibile aliter esse et erroneum si aliter dicatur. »

lectui quod dicitur causa agens non præcedere effectum suum duratione; quia in illis quæ repugnant intellectui, Deus non potest facere ut illud sit.

Nunc restat videre, an repugnet intellectui aliquid factum nunquam non fuisse propter hoc quod necessarium sit non esse ejus esse duratione præcedere, propter hoc quod dicitur ex nihilo factum esse. Sed quod hoc in nullo repugnet, ostenditur per dictum Anselmi in *Monologio*, cap. viii, exponentis quomodo creatura dicatur facta ex nihilo. « Tertia, » inquit, « interpretatio, qua dicitur aliquid esse factum ex nihilo, est cum intelligimus esse quidem factum, sed non esse aliquid unde sit factum. » Per similem significationem dici videtur, cum tristatur sine causa, dicitur contristatus de nihilo. Secundum igitur hunc sensum, si intelligatur quod supra conclusum est, quia præter summam essentiam cuncta quæ sunt ab eodem, ex nihilo facta sunt, idest non ex aliquo; nihil inconueniens sequetur. Unde patet quod secundum hanc expositionem non ponitur aliquis ordo ejus quod factum est ad nihil, quasi oportuerit prius quod factum est, nihil fuisse, et postmodum aliquid esse. Præterea, supponatur, quod ordo ad nihil in propositione importatus remaneat affirmatus, ut sit sensus, creatura facta est ex nihilo, idest facta est post nihil: hæc dictio « post » ordinem importat absolute. Sed ordo multiplex est: scilicet durationis et naturæ. Si igitur ex communi et universali non sequitur proprium et particulare, non erit necessarium ut propter hoc quod creaturam esse post nihil dicitur prius duratione fuerit nihil, et postea fuerit aliquid: sed sufficit, si prius natura sit nihil quam ens; prius enim inest unicuique naturaliter quod convenit sibi in se, quam quod solum ex alio habet. Esse autem non habet creatura nisi ab alio; sibi autem relicta in se considerata nihil est: unde prius naturaliter inest sibi nihil quam esse. Nec oportet quod propter hoc sit simul nihil et ens, quia duratione non præcessit: non enim ponitur, si creatura semper fuit, ut in aliquo tempore nihil sit: sed ponitur quod natura ejus est talis quod esset nihil, si sibi relinqueretur; ut si dicamus aerem semper fuisse illuminatum a sole, oportebit dicere quod aer est factus lucidus a sole. Et quia omne quod fit, ex incontinenti fit, idest ex eo quod non

contingit simul esse cum eo quod dicitur fieri; oportebit dicere quod sit factus lucidus ex non lucido, vel tenebroso; non ita quod nunquam fuerit non lucidus vel tenebrosus, sed quia esset talis, si sibi soli relinqueretur. Et hoc expressius patet in stellis et orbibus qui semper illuminantur a sole. Sic ergo patet quod in hoc quod dicitur, aliquid factum esse a Deo et nunquam non fuisse, non est intellectus aliqua repugnantia. Si enim esset aliqua repugnantia, mirum est quomodo Augustinus eam non vidit: quia hæc efficacissima via esset ad improbandum æternitatem mundi, cum tamen ipse multis rationibus impugnet æternitatem mundi in XI et XII *De civ. Dei*. Hanc autem unde omnino prætermittit? Quinimmo innuere videtur quod non sit ibi repugnantia intellectuum: unde dicit X *De civ. Dei*, xxx cap., de Platonicis loquens: « Id quomodo intelligant, viderint non esse hoc videlicet temporis, sed substitutionis initium. Sicut enim, inquirunt, si pes semper ex æternitate fuisset in pulvere, semper ei subesset vestigium, quod tamen vestigium ex calcante factum nemo dubitaret; nec alterum altero prius esset, quamvis alterum ab altero factum esset: sic inquirunt et mundus et dii in illo creati semper fuerunt, semper existente eo qui fecit; et tamen facti sunt. » Nec unquam dicit hoc non posse intelligi: sed alio modo procedit contra eos. Item dicit XI lib., cap. iv: « Qui autem a Deo quidem factum mundum fatentur, non tamen eum temporis volunt habere, sed suæ creationis initium, ut modo quodam vix intelligibili semper sit factus; dicunt quidem aliquid, unde sibi Deum videntur velut a fortuita temeritate defendere. » Causa autem quare vix intelligibilis, facta est prima ratione. Mirum est etiam quomodo nobilissimi philosophorum hanc repugnantiam non viderunt. Dicit enim Augustinus in eodem lib. cap. v, contra illos loquens de quibus in præcedenti auctoritate facta est mentio. « Cum his enim agimus qui etiam Deum corporum et omnium naturarum quæ non sunt quod ipse Creator est, nobiscum sentiunt: » de quibus postea subdit: « Isti Philosophi ceteros nobilitate atque auctoritate vicerunt. » Et hoc etiam patet diligenter consideranti dictum eorum qui posuerunt mundum semper fuisse: quia nihilominus ponunt eum a Deo factum,

nihil de hac repugnantia intellectuum sentientes. Ergo illi qui tam subtiliter eam percipiunt, soli sunt homines, et cum eis oritur sapientia (a).

Sed quia quædam auctoritates videntur pro eis facere, ideo ostendendum est quod præstant eis debile fundamentum. Dicit enim Damascenus in lib. I, *Fid. orth.*, cap. viii : « Non aptum natum est quod ex non ente esse deducitur, coæternum esse ei quod sine principio est et semper est. » Item Hugo de sancto Victore in principio lib. sui *De sacramentis* dicit : « Ineffabilis omnipotentiae virtus non potuit aliquid præter se habere coæternum, quo in faciendo iuvaretur. » Sed harum auctoritatum et similium intellectus per hoc patet quod Boetius dicit ult. *De consolatione* : « Non recte quidam, cum audiunt visum Platoni mundum hunc nec habuisse initium temporis, nec habiturum esse defectum, hoc modo conditori conditum mundum fieri coæternum putant. Aliud enim est per interminabilem duci vitam quod mundo Plato tribuit; aliud interminabilis vitæ totam pariter complexam esse præsentiam quod divinæ mentis proprium manifestum est. » Unde patet quod etiam non sequitur quod quidam objiciunt, scilicet quod creatura æquaretur Deo in duratione; et quod per hunc modum dicatur quod nullo modo potest esse aliquid<sup>1</sup> coæternum Deo, quia nihil potest esse immutabile nisi solus Deus : quod patet per hoc quod dicit Augustinus, XII *De civit. Dei*, cap. xv : « Tempus, quo-

niam mutabiliter<sup>1</sup> transeurit, æternitati immutabili non potest esse coæternum. Ac per hoc etiam si immortalitas Angelorum non transit in tempore, nec præterita est quasi jam non sit; nec futura quasi nondum sit : tamen eorum motus, quibus tempora peraguntur in futuro, in præteritum transeunt. Et ideo Creatori, in cujus motu dicendum non est vel fuisse quod jam non sit, vel futurum esse quod nondum sit, coæterni esse non possunt. » Similiter etiam VIII *Super Gen.* : « Quia omnino immutabilis est illa natura Trinitatis, ob hoc ita æterna est ut ei aliquid coæternum esse non possit. » Et similia verba dicit in XI lib. *Confessionum*.

Adducunt etiam pro se rationes quas etiam Philosophi tetigerunt et eas solverunt; inter quas illa est difficilior quæ est de infinitate animarum : quia si mundus semper fuit, necesse est modo infinitas animas esse. Sed hæc ratio non est ad propositum : quia Deus mundum facere potuit sine hominibus et animabus : vel tunc etiam potuit hominem facere quando fecit, si etiam totum alium mundum fecisset ab æterno; et sic non remaneret post corpora animæ infinitæ. Et præterea adhuc non est demonstratum quod Deus non possit facere ut sint infinita actu.

Aliæ etiam rationes sunt a quarum responsione supersedeo ad præsens, tum quia eis alibi responsum est, tum quia quædam earum sunt ita debiles quod sua debilitate contrariæ parti videntur probabilitatem afferre.

<sup>1</sup> « mutabilitate. »

(a) Nota hunc passum; ironiam etenim redolet,

nec modo assueti D. Thomæ in disputationibus bene concordat.



# OPUSCULUM XXIV.

## DE FATO SECUNDUM ALBERTUM<sup>1</sup>.

(EDIT. ROM. XXVIII.)

### ARTICULUS I.

#### *An fatum aliquid sit.*

Quæritur de fato, an sit et quid sit, utrum necessitatem imponat rebus, an seibile sit et in quo genere causæ incidat.

Ad primum objicitur sic. Nihil definitur nisi quod habet esse. Fatum a Boetio definitur in IV *De consolatione philosophiæ* pros. vi (a). Ergo habet esse.

Item. In II *De generatione* dicit Aristoteles quod unumquodque mensuratur periodo : mensuratur enim per aliquid minimum quod quantitatem mensurati certificat et numerat. Si ergo vita quæ est esse inferiorum, mensura circuli, quæ vocatur periodus, mensuratur, est accipere<sup>2</sup> in mensura circuli aliquam partem quæ per se vel per æquale sibi esse et vitam inferiorum certificat. Per gradus ergo circuli distinctos secundum domos duodecim certificatur esse et vita inferiorum. Non autem accipitur periodus sine contentis in periodo planetis et stellis, et his quæ accidunt eis ex<sup>3</sup> situ et radiatione. Igitur<sup>4</sup> ex stellis circuli cœlestis et radiatione et situ earum scitur et numeratur omne esse et vita et partes

esse et vitæ<sup>5</sup> inferiorum. Hoc autem fatum vocatur. Ergo fatum habet esse.

Item. Aristoteles in IV *Physic.*, dicit quod esse in tempore, est a quadam parte temporis mensurari. Tempus autem cum sit unum numero et non multiplicetur per temporalium multitudinem, oportet quod per unum aliquid ad durationem omnium temporalium referatur. Hoc autem non est nisi motus circuli<sup>6</sup> cœlestis. Ergo per motum circuli cœlestis causatur et numeratur esse et vita omnium inferiorum; et hoc fatum vocatur. Ergo fatum est. Nam motus circuli, ut dicit Aristoteles, est tanquam vita existentibus omnibus.

Sed forte dices quod ex motu circuli cœlestis inhæret dispositio quædam inferioribus; sed hæc<sup>7</sup> vincitur a qualitatibus materiæ et sic fatum excluditur. Contra. Inferiores causæ, quæ sunt in materia, ordinatæ sunt ad superiores sicut materialia ad sua formalia, et sicut locata ad sua loca, et sicut mota ad sua moventia. Ergo superiora informant, continent et movent inferiora. Informantia autem, continentia et moventia semper vineunt. Ergo omne esse et vita inferioris vincitur et trahitur ad dispositionem superioris.

Sed dices quod hoc verum est quantum-

<sup>1</sup> Parm. omittit : « secundum Albertum. »

<sup>2</sup> Parm. : « accipere mensuram circuli perfectionem aliquam, quæ æquale sibi esse et vitam inferiorum numerando manifeste. »

<sup>3</sup> Parm. : « ex stellis. »

<sup>4</sup> Parm. : « ergo. »

<sup>5</sup> Parm. omittit : « et partes esse et vitæ. »

<sup>6</sup> Parm. omittit : « circuli. »

<sup>7</sup> Parm. : « homo vincit quamlibet dispositionem et non. »

(a) « Fatum inhærens rebus mobilibus dispositio, per quam Providentia suis quæque necit ordinibus. »

ad corpora, sicut videtur Augustinus dicere V *De civit. Dei* quod afflatus sidereos possumus dicere valere usque ad corporum transmutationes, non autem animæ. Contra. Vires animæ vegetabilis et sensibilis non operantur extra sui organi harmoniam. Si ergo harmonia regatur afflatibus cœlestibus sidereis, per consequens et operationes animæ vegetabilis et sensibilis afflatibus sidereis regulabuntur.

Uterius. Etiam de anima rationali videtur. Quia dicit Philosophus quod intellectus noster est cum continuo et tempore. Temporalia autem et continua sensu et imaginatione percipiuntur : habitum autem est jam quod talia subjacent afflatibus sidereis. Ergo et operationes intellectus, sive animæ rationalis.

Item. Dicit Philosophus quod anima est instrumentum intelligentiæ et quod intelligentia imprimit in eam et illuminat eam. Ergo intelligentia movendo causat formas illuminationis in anima intellectiva. Sed inter movens et motum non est medium, ut dicit Philosophus VII *Physic.* Ergo intelligentia sic movens erit immediata animæ. Aut ergo per se ipsam, aut per aliquod medium deferens causalitatem suam ad animam. Non per se ipsam, quia physice loquendo, intelligentia est motor orbis. Oportet ergo quod sit medium deferens illuminationes ejus ad animam. Medium autem hic non potest accipi nisi motus cœli influens per motum inferioribus formas motoris. Ergo intelligentia per motum cœli regulat et causat operationes intellectuales animæ : et hoc per simile videre possumus. Cor enim quod secundum Aristotelem est principium vitæ et vegetationis et sensus, membris a se distantibus virtutes has non influit nisi per vehiculum spiritus ; et sic est in omnibus moventibus et motis quæ distant invicem. Similiter est in intelligentia et anima : quoniam intelligentia distat, et imprimit in animam rationalem secundum locum distans ab ea. Non enim physice dici potest quod intelligentia veniat inferius ; quia secundum Philosophum, intelligentia in orbe est, et numeratur ad numerum orbium, et ad numerum motuum orbis ; et ipse orbis motus, secundum Aristotelem, componitur ex intelligentia movente et circulo cœlesti.

Item. Somnia, ex quibus prognosticantur futura, ut dicit Macrobius, sive

sint oracula, sive intelligentiæ, sive prophetiæ, fiunt in nobis et causantur, ut dicit Philosophus in I *De somno et vigilia*, per signum, vel per causam vel per accidens : quod, inquam, accidens est per se, et non communiter. Est autem somnium passio sensus communis. Ergo per aliquid dormitionis accidit somnium dormienti. Accidens autem dormitionis quod est prognosticum futuri, non potest causari a calido, humido, frigido et sicco, quæ sunt in materia. Ergo oportet quod causetur a forma aliqua quæ est forma ordinis, et regula vitæ interioris ; et hæc forma non potest esse nisi a circulo cœlesti. Ergo per circulum cœlestem aliquid inhæret inferioribus, per quod regulatur tota vitæ dispositio : et hoc fatum vocatur. Ergo fatum est.

Item. Ptolomæus dicit quod <sup>1</sup> melius prognosticatur qui sigua futurorum accipit a stellis secundis, stellas secundas vocans effectus stellarum, quæ apparent in inferioribus elementis, sicut in nubibus, vel in aliquo hujusmodi : et ex hoc habetur quod effectus stellarum in inferioribus sunt ex quibus futura vitæ dispositio et causatur et noscitur. Hoc autem fatum vocant mathematici. Ergo fatum est.

Item. Boetius, V *De consol. philosophiæ* loquitur de casu et fortuna, quæ causantur ex duabus causis per se concurrentibus ; sicut quando aliquis intendit fodere thesaurum, et alius in eodem loco intendens fodere sepulcrum, consequitur quasi in fortuna inventionem thesauri ; et sic causatur ex duabus causis per se concurrentibus, ut dicit Boetius. Has autem causas occurrere fecit ordo iste inevitabili connexionem causarum, qui de fonte scientiæ Dei procedit. Connexio autem hujusmodi causarum a Boetio fatum vocatur. Ergo fatum est.

Item. Boetius ibid. : « Qui summa providit providentia, simpliciter fatum, dirigit singula in motum, locis, formis, temporibus distributa. » Ergo fatum est.

Si dicatur quod fatum est ordo præscientiæ divinæ : hoc non repugnat his quæ dicta sunt : quoniam præscientia divina ea quæ ordinavit, exequitur et administrat ministerio causarum naturalium, ut explicitus ordo esse et vitæ ab hujusmodi causis fatum vocetur.

Contra. Dicit Gregorius in *Hom. de*

<sup>1</sup> Parm. : « conjector omnium prognosticatur

per signa futurorum accepta. »

*Epiph. Domini* : « Absit a fidelium cordibus ut fatum aliquid esse credatur : » et tradit rationem : « quoniam stellæ factæ sunt propter hominem, non homo propter stellas. » Si ergo stellarum motus non esset in hominis ministerium, stella quæ Magis apparuit, non moveretur ad nutum Domini : quod est inconveniens.

Item. Augustinus, in libro *De doctrina christiana* fatum dicit nihil esse : et si mathematici aliquando vera de futuris prænuntiare videntur, dicit hoc fieri arte dæmonum ad deceptionem fidelium.

Item. Si est fatum; aut est causa, aut causatum. Non causatum, quia hoc regulatur fato, ut dicunt mathematici. Si causa; aut inferior, aut superior. Non inferior, quia illa sunt calidum, frigidum, humidum et siccum : quorum nullum est fatum. Non superior, quia causa superior est cœlestis circulus cum suo motu quod Mathematici non dicunt esse fatum, sed esse fati factivum. Fatum ergo nihil est.

Item. Res non habent nisi duplex esse, ut dicit Augustinus : scilicet in causa prima, in qua sunt vita et lux, quorum neutrum est fatum; et in se ipsis. Sed esse rei in se ipsa non est fatum, ut dicunt Mathematici, sed potius regulatur a fato. Ergo fatum nihil est.

Item. Augustinus dicit quod inferiorum causam sufficit dicere voluntatem Dei, quia omnia fiunt Dei voluntate, vel permittuntur. Voluntas autem Dei non est fatum. Ergo fatum nihil est.

Item <sup>1</sup>. Omne quod habet esse, tenet ordinem ut dicit Boetius. Sed fatum non tenet ordinem, quia videmus indignos exaltari, et dignos dejici, quod inordinatum est; cum ergo fatum circa talia esse ponatur fatum nihil esse videtur.

Item. Si fatum est effectus circuli cœlestis, ea quæ sunt unius circuli, videntur esse unius fati. Sed Jacob et Esau ex uno concubitu Isaac concepti sunt, et sic videntur esse unius circuli; et tamen non fuerunt unius fati, sicut consequens probavit eventus. Ergo fatum nihil videtur esse.

## ARTICULUS II.

### *Quid sit fatum.*

Secundo quaritur quid sit fatum. Boe-

<sup>1</sup> Parm. : Item. Si fatum habet esse, tenet ordinem. Cum ergo fatum non teneat ordinem, quia videmus indignos exaltari, et dignos dejici,

tius enim IV *De consol.*, dicit quod fatum est « dispositio inhærens mobilibus, per quam providentia suis quæcumque tribuit ordinibus (a). » Hermes autem Trimegistus dicit quod fatum quod Græci « imarmenem » dicunt, est « complexio causarum singulis temporaliter distribuens quæ sacramento deorum cœlestium sunt præordinata.

Respondeo quod fatum multipliciter dicitur. Uno modo dicitur fatum mors dispositione periodorum inducta : sic dicitur in Claudiano :

Livor post fata quiescit :

et hoc modo decursum vitæ tribus deabus fatalibus Platonici tribuebant, inceptio-nem scilicet Clotho, Lachesi progressum, et conclusionem termini Atrope, sicut dicitur :

Clotho colum portat, Lachesis trahit, Atropos  
[occat.

Et hoc modo non quæritur hic de fato. Secundo modo dicitur fatum dispositio providentiæ divinæ de futuro progressu esse et vitæ inferioris; quæ dispositio cum sit æterna, constat quod nihil ponit in rebus; et cum explicatur in effectu, tunc effectus iste per res completur temporibus et locis opportunis; sicut præordinatio alicujus in mente de agendis negotiis suis per nuntium, nihil ponit in nuntio, sed tamen per nuntium expletur quando nuntium dirigit, et sibi injungit negotium : et hoc modo loquitur Boetius de fato. Et hoc modo iterum non quæritur hic de fato. Sed natura tamen hujus præordinationis et prædestinationis in mente divina existens, simplex est et æterna, divina, immaterialis, incommutabilis, et cum per res temporales explicatur, temporalis fit, et materialis et multiplicata, mobilis et contingens. Tertio modo dicitur fatum forma ordinis esse et vitæ inferiorum, causata in ipsis ex periodo cœlestis circuli, qui suis radiationibus ambit nativitates eorum : et hoc modo Hermes loquitur de fato, vocans stellas et sacramenta deorum immobilem dispositionem esse et vitæ inferioris.

Est autem hæc forma non forma dans esse, sed potius forma ejusdam universalis ordinis esse et vitæ, simplex et quod inordinatum est; et fatum circa talia sit : fatum nihil esse videtur.

(a) Cfr. notulam articuli I.

æterna, multiplex in virtute. Simplex est a simplicitate circulationis; multiplici-  
tatem autem virtutis habet a multiplicati-  
one eorum quæ continentur a circulo.  
Fit enim a multis stellis, et sitibus et  
spatiis, et imaginibus, et radiationibus,  
et multiplicibus angulis, qui scribuntur  
in intersecationibus radiorum cœlestium  
corporum, et radiorum productorum su-  
per rem. Per aspectum enim solis, sicut  
dicit Proclus, omnes virtutes eorum qui  
sunt in cœlesti circulo, congregantur et  
adunantur. Hæc autem talis forma me-  
dium est inter necessarium et possibile.  
Necessarium enim est quicquid est in  
motu cœlestis circuli; possibile autem et  
mutabile quicquid est in materia genera-  
bilibium et corruptibilium. Forma autem  
ista causata ex cœlesti circulo, et inhæ-  
rens generabili et corruptibili, media est  
inter utrumque. Omne enim quod proce-  
dit a causa nobili in causatum ignobile,  
in aliquo tenet proprietatem suæ causæ;  
tamen esse suum non est nisi quantum  
permittit possibilitas ejus in quo est;  
quia omne quod recipitur in aliquo, ut  
dicit Boetius et Aristoteles, est in eo in  
quo recipitur, secundum potestatem re-  
cipientis, et non secundum potestatem  
causæ a qua est. Hoc possumus videre in  
his quæ a Dionysio dicuntur. Processio-  
nes enim divinæ, sicut est vita, ratio,  
sapientia, et hujusmodi, secundum quod  
procedunt longius a Deo secundum gra-  
dus entium, efficiuntur magis temporalia  
et mutabilia et commixta, et potentiæ  
materiali et privationi admixta; cum ta-  
men in Deo sint simplicia et æterna et  
immutabilia et immaterialia. Et similiter  
est de forma ordinis esse et vitæ: quæ  
in cœlesti circulo est necessaria, inevita-  
bilis et inalterabilis; in rebus autem ge-  
neratis, propter mutabilitatem ipsarum  
esse, est recepta mutabiliter et contin-  
genter. Unde Boetius in V *De consol.*,  
figurat multos circulos, in quorum centro  
ordo et causa est fati et fatalium; et in  
circulo distante, in quo continentur ge-  
nerabilia et corruptibilia ejusdem fati,  
est contingentia et mutabilitas per esse  
generatorum et corruptorum; et sic est  
dispositio esse et vitæ in mente motoris  
primi, quem explet circulus juxta causa-  
tum propinquior; et eodem ordine forma  
dispositionis, prout est in periodo cœlesti,  
explet dispositionem quæ est in mente  
primi motoris; et circulus a centro dis-  
tans designat eandem formam disposi-

tionis prout mutabiliter adhæret genera-  
tis et corruptis. Forma autem cum sit  
imago periodi, potentialiter et virtualiter  
præhabet totum esse et compositionem  
et durationem generatorum et corrupto-  
rum; et sic licet sit necessaria, est tamen  
mutabilis et contingens. Hujus autem  
causam optime assignat Ptolomæus in  
*Quadripartito*, dicens quod « secundum  
virtutem stellarum per aliud, et per acci-  
dens fiunt inferioribus. » Per aliud qui-  
dem, quia per sphæram activorum et  
passivorum; per quorum qualitates acti-  
vas et passivas inhæret inferioribus; per  
accidens autem, quia hæc forma etsi ef-  
fluat a causa necessaria et immutabili,  
accipit tamen esse in rebus contingentibus  
et mutabilibus accidentaliter. Ex  
duobus autem habet mutabilitatem: sci-  
licet ex qualitatibus elementorum, per  
quæ defertur ad generata, et ex esse ge-  
natorum in quibus est sicut in subjecto.  
Hoc ergo est fatum.

Et sic primæ rationi consentimus.  
Concedimus enim quod hoc modo habet  
esse.

Secundam etiam in hoc modo concedi-  
mus, quod quæ sunt, mensurantur pe-  
riodo.

Ad tertiam et quartam dicendum, quod  
inferiora quidem nata sunt obedire supe-  
rioribus: sed inferius et superius dupli-  
citer referuntur ad invicem. Si enim re-  
latio fiat per unam simplicem formam,  
quam dat superior motor, verum est  
quod superiori movente de necessitate  
movetur inferius; et talis forte relatio est  
inter motores superiores orbium cœles-  
tium. Si autem inferior motor sit forma  
una, quam non accipit a superiori, sed  
refertur ad ipsum sicut directus ab ipso  
et instrumentum ejus; nihil prohibet  
quin per contrarium suæ formæ vel aliam  
dispositionem impediatur, ita quod a su-  
periore motum non suscipiat; et sic est  
de calido et frigido relatis ad virtutes  
cœlestium: calidum enim per propriam  
formam, non per cœlestem virtutem est  
congregativum homogeneorum et dis-  
gregativum heterogeneorum; et frigi-  
dum e contrario; et ideo istæ qualitates  
per contrarietatem inventam in materia  
et diversitatem dispositionum materiæ,  
sæpe excludunt dispositionem et effectum  
motus cœlestis. Propterea Ptolomæus  
dicit, quod « sapiens homo dominatur  
astris. » Unde dicit Commentator, quod  
si effectus circuli cœlestis in curando hu-

mores corpus disponat ad quartanam, sapiens medicus hoc prævidens, per calida et humida corpora disponit ad sanitatem; et tunc excluso effectu cœlesti quartana non inducitur.

Ad id quod ulterius objicitur, dicendum est, quod hoc modo ad cœlum referuntur virtutes operationum vegetabilium, ut sint etiam impedibiles ab oppositis dispositionibus inventis in anima sensibili. Hoc enim faciunt apprehensa in virtutibus animæ sensibilis quod faciunt dispositiones activarum qualitatum in corporibus: unde imaginatione mulieris concepta, corpus totam transmutatur ad venerea. Propter quod etiam Avicenna dicit, quod quidam ex imaginatione lepræ, leprosus factus est: et patientibus fluxum sanguinis prohibet Galenus aspectum rubicundorum. Si ergo hujusmodi apprehensa sint contraria motui cœlesti, excludunt effectum cœli, sicut per contrarias dispositiones et apprehensiones animales juvatur cœlestis effectus. Et hoc est quod dicit Mesalon, quod cœlestis effectus, qui vocatur « alatre, » juvatur a sapiente astronomo, sicut in producendis terræ nascentibus juvatur per seminationem et artem.

Ad hoc quod objicitur de causa somniorum, de plano videtur, mihi esse concedendum, maxime de somniis quæ fiunt per imaginarias visiones.

Ad hoc quod objicitur de illuminatione intellectus animæ rationalis, secundum philosophiam respondendum est dupliciter. Uno modo secundum Stoicos, qui ponunt quod cum substantia nobilior per imperium habeat movere inferiorem, et inferior obedit ei; sic in phantasmatibus anima unius videndo alterum impedit et ligat operationes ejus: dicunt enim, quod virtute alicujus naturæ superioris, sive intelligentiæ, sive stellæ, anima unius ponitur in gradu superiori et alterius in inferiori: et tunc inferior nata est moveri ab apprehensione superioris, et sic fieri fascinationem. Et cum dicit Aristoteles, quod inter moveus et motum non fit medium, non intelligit semper de immediatione loci sive spatii, sed de immediatione gradus superioris et in-

ferioris <sup>1</sup>, quod est inter percipiens et id quod percipitur. Hoc autem, secundum sententiam Peripateticorum non bene congruit: quia sine dubio inter agens et actum, inter movens et motum, immediatio debet esse et conjunctio secundum contactum. Propterea dicimus, quod sicut calor digestivus duplicis est virtutis; et unam virtutem habet in quantum est calor ignis secundum se consideratus, quæ est alterare et separare ea quæ sunt diversi generis et decoquere; alteram habet in quantum est instrumentum animæ, quæ est principium vitæ, secundum quam terminat digerendo <sup>2</sup> ad formam vitæ: ita etiam cœlestis motus duplicis est virtutis: uno modo prout est motus corporis orbicularis, et sic movet corpora; alio modo prout est instrumentum intelligentiæ moventis, et hoc modo effectus ejus efficitur in anima sensibili per formas corporum et in anima intellectuali per formas illuminationis: quia, sicut prædiximus, formæ quæ fiunt in aliquo, fiunt secundum potestatem recipientis et non secundum potestatem dantis <sup>3</sup>.

Quæcumque alia ad hanc partem objecta sunt, plana sunt.

Ad dictum Gregorii dicendum est, quod ipse loquitur de fato secundum quod a quibusdam philosophis et hæreticis necessitatem rebus imponere dicebatur, secundum quod dicit Poeta:

Te tua fata trahant, ne incepta relinquere possis.

Ad hoc quod quæritur, utrum fatum sit causa vel causatum, dicendum, quod est similitudo causæ universi ordinis esse et vitæ; et sic est aliquid causæ, licet non vera causa; et secundum quod adhæret rebus generatis, est dispositio causati, licet similitudinem causæ exprimat; est enim forma continens concursum esse et vitæ mobiliter et contingenter.

Ad hoc quod objicitur de gemellis, dicendum, quod licet possemus dicere quod in uno conceptu semen per vices projicitur et per vices a matrice glutitur, et sic non est una hora conceptorum geminorum, tamen si diceremus esse

<sup>1</sup> Parm. hic addit: « ponens exemplum quod post inductum est: quia organum imaginationis non est immediatum vasis seminariis, et tamen ad imaginem mulieris extenduntur vasa seminaria et affluit semen propter immediatum su-

perioritatis et inferioritatis, quæ est inter præcipiens et id cui præcipitur. »

<sup>2</sup> Al.: « dirigendo. »

<sup>3</sup> Parm.: « agentis. »



unam horam conceptorum, centrum tamen cordis eorum, a quo incipit conceptus formatio, non est unum; et mutato centro, necesse est mutari totum circum, et sic horizon eorum non est unus, nec anguli; ideo nec eadem domorum dispositio; et sic tota periodus efficitur diversa, et per consequens adhærens rebus natis dispositio fatalis necessario variatur.

Et per hoc patet solutio de his quæ quæsitæ sunt de hoc articulo.

### ARTICULUS III.

*Utrum fatum necessitatem rebus imponat.*

Tertio quæritur, utrum fatum rebus necessitatem imponat; et videtur quod sic. Cujus enim causa est necessaria, ipsum est necessarium. Causa fati est cœlestis circulus, qui est necessarius. Ergo fatum est necessarium, et necessitatem rebus imponit.

Item. Fatum est regula et mensura totius vitæ et esse: regulatum autem necessario refertur ad regulam. Sed regula est necessaria. Ergo etc.

Item. Fortiora sunt superiora quam inferiora. Ergo superiora trahunt inferiora ad sui dispositionem necessariam. Cum autem fatum sit vinculum per quod inferiora trahuntur ad superiora, videtur fatum necessitatem rebus imponere.

Item. Aristoteles dicit, quod inter moventia superiora et inferiora concursus est harmonia sicut in chordis citharæ. Sed harmonia necessaria est quod inferiora per omnia consequantur dispositionem superioris. Ergo dispositio superioris adhærens inferioribus necessitatem imponit eis.

Contra. Fatum est adhærens rebus mobilibus. Sed motus mobilibus moventur ea quæ sunt in ipsis. Ergo fatum est dispositio diversa, mutabilis, contingens; ergo contingenter se habet ad res et non imponit necessitatem.

Respondeo dicendum, quod fatum multipliciter dicitur esse causa, ut supra diximus; ideo nullam necessitatem imponit rebus, sed inclinatur ad effectus cœlestium, si non sit dispositio fortior in materia ad contrarium movens; et ideo

hujusmodi moventia assimilatur Philosophus in lib. *De somno et vigilia*; duplicibus consiliariis. Sapientes enim consilarii ex rationibus certis persuadent aliquid utiliter esse faciendum, quod tamen inferiores propter adversos casus obviantes dissuadent. Tunc solvitur lex consilii sapienter: et est verbum suum tale, quod supervenientibus consiliis aliis, consilia mutantur sapienter. « Regula enim, » ut dicit Aristoteles, « Lesbiae ædificationis mutatur ad ædificatum. »

Est enim Lesbia insula in qua lapides non ad rectam lineam sunt dolabiles; et ideo oportet quod regula secundum quam dolantur, aliquantulum curvetur ad ipsas ædificationes. Et ita est de dispositione esse et vitæ inferioris, in qua propter causas quæ sunt in materia sæpe mutatur dispositio sapiens circuli cœlestis, et dispositio adhærens mobilibus, quæ fatum vocatur, extra rectitudinem cœlestium declinans exorbitat propter multas oppositas inferiorum transmutationes.

Ad primum ergo dicendum, quod fati causa necessaria est; sed ex hoc non sequitur aliud nisi quod sit necessarium ipsum esse, sed non sequitur quod necessitatem rebus imponat: quia non inhæret eis secundum potestatem cœlestium, quæ necessaria sunt, sed secundum potestatem inferiorum, quæ omnino mutabilia et contingencia sunt.

Ad secundum dicendum, quod ratio quæ est inter regulans et regulatum, necessaria est sicut ratio quæ est inter patrem et filium. Sed quia mutatio causat relationem et causat relationis destructionem; ideo mutatio quæ est in rebus mobilibus, causa est quod regulatum non sequitur regulam et non sequitur ad ipsam, et quo ad hoc etiam non regulatur.

Ad tertium dicendum, quod licet fortiora sint superiora quam inferiora, tamen ex impotentia inferioris contingit quod non omnino possunt in superiorum effectus; et quo ad hoc ex parte ipsorum solvitur vinculum.

Ad quartum dicendum, quod solutio temperantiæ chordarum dissonantiam inducit in cithara; et similiter mutatio et alteratio inferioris dissonantiam facit ad effectum superioris: unde dicit Damascenus quod superiora <sup>1</sup> sunt inferioro-

<sup>1</sup> Al.: « superiora inferiorum quædam sunt

signa nostrorum actuum, et nullo modo causa. »

rum quædam signa, nostrorum autem <sup>1</sup> actuum nullo modo causa.

#### ARTICULUS IV.

##### *An fatum sit scibile.*

Quarto quæritur, an fatum sit scibile: et videtur quod non. Quia cum sit effectus cœlestis circuli, et similitudo quædam ipsius, sicut forma alicujus similis; est ipsi causa ejusdem ordinis. Sed in cœlesti circulo quo ad nos sunt infinita consideranda, sicut stellæ numero et specie et virtutibus, et situs earum in circulo declivi, et extra ipsum, et distantia, et conjunctiones, et quantitas anguli sub quo incidit radius, et pars formæ, et gradus lucidi et umbrosi in puteis et in turribus existentes, et hujusmodi infinita quo ad nos. Ergo videtur quod effectus ejus a nullo sciri possit.

Item. Circulus continet datorem formæ et datorem sensus et intellectus, qui « yles, » et « alchato » dicitur a mathematicis: aliter enim non esset mensura totius vitæ, quia principium vitæ non includeret. Hora autem principii omnium est hora casu seminis in matrice. Sed hanc quod ad nos non contingit scire. Ergo ignorabitur forma dispositionis totius vitæ, et sic ignorata est dispositio rerum.

Nec etiam videtur ex effectibus. Sunt enim quædam quorum videtur esse una periodus, et tamen accidentia eorum per se, sicut est sexus masculinus et femininus, non sunt eadem: et causam hujus non contingit sciri ex cœlestis circuli effectibus.

Similiter etiam natus octavo mense moritur ut frequentius, et in septimo vivit.

Similiter in geminis, quorum unus est masculus, alter femina, rarissime contingit masculum vivere, femina vero aliquando supervivit; et causam impossibile aut difficile est assignare ex circulo cœlesti.

Item. Luminaribus existentibus in capite Algon, idest Gorgonis, si ea Mars respectu inimicitia radiaverit; natus, ut dicit Ptolomæus, truncabitur manibus et pedibus, et truncatus <sup>2</sup> suspendetur in cruce.

Item. Dicit quod luna existente in Leone, vestimenta nova induere malum est. Manifestum est autem quod hæc omnia si essent scibilia, esset deductio syllogistica ad ea. Sed hoc non est: non enim sequitur: Luna est in Leone, ergo malum est induere vestes novas: aut, luminaria sunt in capite Gorgonis, et radiatio Martis a quadrato, vel ab opposito diametro: ergo respicit ex inimicitia: ergo natus tunc suspendetur in cruce.

Respondeo dicendum, quod duæ partes sunt Astronomiæ, sicut dicit Ptolomæus: una est de sitibus et motibus superiorum, et quantitatibus eorum, et passionibus propriis; et ad hanc per demonstrationem pervenitur. Alia est de effectibus astrorum in inferioribus, quæ in rebus mutabiliter recipiuntur: et ideo ad hanc oportet astronomum in ista parte secundum aliquem physicum habitum inferioris certitudinis esse, et ex signis physicis conjecturari. Conjecturatio autem cum sit ex signis mobilibus, generat habitum minoris certitudinis quam sit scientia vel opinio. Cum enim hæc communia signa sint et mutabilia, non potest ex ipsis haberi via syllogistica, eo quod ut in pluribus includunt signa tantum, et fiunt judicia quædam multis de causis mutabilia, sicut patet per ante dicta. Et ideo sæpe astronomus dicit verum, quia dictum suum est quo ad dispositionem cœlestium verissimum, si hæc dispositio sit a mutabilitate rerum exclusa.

Ad primum dicendum, quod multa taliter quo ad nos infinita consideranda essent. Sed considerantur paucissima, ex quibus alia prænoscentur, de quibus habetur conjecturatio; propter quod dicitur per Ptolomæum, quod per cœlorum motus non nisi communiter judicare debemus, et potestates rerum consequentes, quas proprie rerum causæ frequenter excludunt.

Ad secundum, quod hora talis difficulter cognoscitur: et ideo inventum est remedium ut accipiatur gradus ascendens circuli, hoc est horæ conjunctionum luminarium, cui adæquatur circulus, quia ille habet influentiam ad communem necessitatem quæ proximo sequitur; vel accipiatur ascendens ad nativitatem ex utero.

Ad aliud dicendum, quod via syllogis-

<sup>1</sup> Parm. omittit: « autem. »

<sup>2</sup> Parm.: « truncus. »

tica sciri non potest conclusio conjecturalis; sed tamen imperfectie scientiæ, ut dicit Ptolomæus, quin hoc sciatur non impedit: unde sciri potest, sicut est in prognosticatione somniorum. Non enim beatitudo syllogistica est inter somnium et prognosticatione somnii; et sic est in omnibus æstimationibus conjecturalibus.

Ad aliud quod objicitur de disparitate sexus in geminis, dicendum, quod sexus femineus fit semper propter occasionem defectus alicujus principiorum. Cum enim semen masculinum factivum sit et formativum, et incorporetur per virtutem formativam quam habet in semine ipso, semper inducit formam masculini de intentione propria, nisi qualitate materiæ impediatur: et ideo sexus femineus accidit ex defectu naturæ particularis, quæ nunquam intendit facere feminam; sed cum melius fieri non possit ex natura universali, fit adjutorium generationis, et non generatorum proprie; et hæc est femina: et hoc est quod Dominus intendit dicere Gen. ii, 18: *Non est bonum esse hominem solum; faciamus ei adjutorium sibi simile.* Unde dispar sexus in geminis provenit ex defectu principiorum naturalium in altera parte seminis, et non ex periodo cœlesti. Quod autem in talibus mas frequentius moritur, provenit ex hoc quod cum tales gemini ex uno semine diviso generantur, fit materia male terminabilis a virtute formativa: quia si fuisset bene terminabilis, utrumque formasset in marem. Materia autem masculi majori et multiplici indiget terminatione quam materia feminae; et ideo mas remanet ægrotus et debilis, interminatione materiæ causam habens mortis; in femina autem parva sufficit terminatio, et propter mollietatem corporis supervivit; frequentissime tamen ambo moriuntur.

Ad id quod dicitur de octavo mense, dicendum non est quod quidam dixerunt, quod ut frequentius octavo mense moritur, quia octavus mensis Saturno attribuitur, cujus frigiditas et siccitas natum interficiunt. Hoc enim falsum probatur: quia multi in astronomia filii Saturni esse dicuntur, qui diu supervivunt. Causa ergo non est in circulo, sed in principis materiæ. Luna enim est mensis dominativa, ad cujus conversionem commensurantur conceptus et imprægnationes, ut dicit Aristoteles. Luna enim est alter sol, eo quod recipit lumen a sole; et quod sol facit in anno, luna facit in mense. A

prima enim intentione usque ad hoc quod et dimidia, est calida et humida, sicut tempus veris; a mediatione usque ad plenilunium est calida et sicca, sicut est æstas; a plenilunio usque ad secundam mediationem est frigida et sicca, sicut est autumnus; a secunda mediatione usque ad conjunctionem est frigida et humida; sicut hiems. Quod autem nata sit movere humorem patet, prout est in accessu et recessu maris, quod accessus et recessus maris in media lunatione, quæ est novem dierum, recedit ad circulum in ascendendo et descendendo. Si enim minimus sit fluxus maris, ad idem punctum parvitatatis reverteretur decimoquarto die. Licet enim luna in media lunatione non transeat nisi medietatem circuli sui, tamen motus augis ex opposito occurrens sibi complet aliam circulationem mediam. Luna enim in quolibet mense bis est in auge, scilicet in præventionem et conjunctionem. Luna enim cum in conjunctione vivificum lumen a sole accipit, et cum Venus nunquam a sole distet longe, et Venus habeat movere humorem seminalem; luna quando soli jungitur, acquirit Veneris virtutem; et sic ex virtute propria movet humores, et ex virtute solis influit vitam humori moto, et ex virtute Veneris movet seminis genituram ad formas genituræ convenientes. Et quia Mercurius habet commiscibilem virtutem ex multis girationibus ejus, quas habet super omnes alios planetas, luna hanc virtutem lucratur ex conjunctione ad ipsum, et ex illa semen viri et feminae movet ad commixtionem. Sic ergo luna conversionibus sui commixtiones, conceptus et imprægnationes causat et regulat. Sunt autem in genitura septem mutationes necessariae. Quarum prima est seminis conversio, et præcipue ad formas cordis. Secunda est materiæ distinctio ad formam membrorum principalium, quæ et causativas habent virtutes, sicut hepar causat virtutes naturales, et vasa seminaria virtutes formativas conceptuum: et ideo in secunda mutatione seminis adherent puncto cordis tres vesiculæ, quas facit spiritus ad locum cerebri, hepatis et vasorum seminalium. Tertia mutatio est distinctio materiæ, quando vesiculæ cerebri ascendit sursum, et vesicula hepatis aliquando ad dextrum, et ad ultimum descendit ad vesiculam vasorum seminalium: et hunc ascensum et descensum facit spiritus exufflatione qui est in corde. Quarta mutatio

est totius materiæ distinctio, ut distribuatur locis membrorum secundariorum, qui causatrices virtutes non habent : et hanc distinctionem iterum facit spiritus exufflatione cordis : quæ exufflatio perforat et distendit materiam, et perforando facit viam venarum pulsatilium et quietarum et nervorum, extendendo autem distribuit materiam uniuscujusque membrorum in locum proprium. Quinta mutatio est transmutatio materiæ in figuram membrorum : quam figuram non reciperet, nisi humidum esset in ea : et hanc mutationem facit cum vis formativa cordis in locum membrorum per spiritum exufflatur. Membra autem figurata non sunt apta recipere virtutem operativam et motivam nisi per confederationem et colligationem. Sexta mutatio est quæ completur per calorem cordis cum spiritu diffuso in membris, qui exsiccat superfluum humidum, consolidat et confortat juncturas et connexiones. Septima mutatio est motus, scilicet per virtutes motivas, qui omnibus membris a corde influit. Et cum omnis motus genituræ sit a Luna, sicut jam dictum est, oportet quod septem conversionibus Lunæ in homine, quod est perfectissimum seminis, compleatur. Et licet istæ mutationes seminis non sint successivæ secundum numerum mensium, tamen perfectio earum non completur nisi completo numero conversionum secundum septem menses : et in animalibus aliis ab homine non hæc ita regulariter observantur propter ignobilitatem suarum complexionum ; sed aliqua diutius, ut elephas, alia breviori tempore imprægnantur. Perfectis etiam conversionibus habet embrio ea quæ exiguntur ad necessitatem, et, sicut dicit Galenus, virtus formativa tripliciter se habet ad semen, seu ad materiam. Aliquando enim materia est diminuta, et virtus abundans : aliquando virtus est deficiens, et materia superabundans : aliquando sunt secundum qualitatem proportionata. Et quando quidem virtus est abundans, et materia diminuta, terminata est complexio septimo mense ; et tunc virtus abundans fortem facit motum ad exitum, et nascitur puer, et convalescit, et efficitur parvus corpore, et agilis valde in operationibus. Quando autem adæquata sunt virtus et materia, et quando est super-

abundans materia, tunc non est completa complexio septimo mense, sed quiescit per unam Lunæ conversionem in octavo mense, et facit motum ad exitum, et nascitur nono mense, et convalescit : et hoc est ut in pluribus fere omnium natiuitas. Sed quando virtus est deficiens, et inobediens materiæ, ex angustia facit motum in septimo mense, quando virtus motiva data est, et ex dispositione non comprobatur ipsum nisi octavo mense, et tunc nascitur et moritur ut in pluribus : et hoc non convenit ex periodo, sed ex dispositione et corruptione principiorum naturalium. Hæc autem quæ dicta sunt, ut in pluribus sunt vera. Multum enim variationis faciunt complexionem feminarum, et complexionem climatum : propter quod ego vidi unam quæ peperit in undecimo mense puerum maximæ quantitatis : et Aristoteles dicit se vidisse unam quæ peperit in decimoquarto mense similiter.

Ad illud quod objicitur de nato<sup>1</sup> in capite Gorgonis, dicendum, quod illæ stellæ funereæ sunt, et monstruosam inducant<sup>2</sup> vitæ terminationem : propter quod ipse etiam Persens caput averso vultu abscissum tenet. Sed hoc, sicut primo diximus, non imponit rebus necessitatem ; sed facile<sup>3</sup> mutabilem inclinationem.

Ad illud quod objicitur de nova veste induta, Luna existente in leone, eodem modo dicendum est. Sicut enim radiatio periodi dispositionem ordinis esse et durationis imprimit rebus naturalibus, ita etiam imprimit artificiatas : propter quod figuræ imaginum magicarum ad aspectum stellarum imprimuntur, et fieri percipiuntur.

## ARTICULUS V.

*In quo genere causæ fatum incidat.*

Quinto quæritur in quo genere causæ incidat : et hoc solutum est per antecedentia<sup>4</sup> : quia in veritate causa non est, sed est aliquid causæ. Est enim forma ordinis et vitæ imaginem habens, et virtutem cœlestis circuli ; et sicut dicimus aliquando, quod aliqua non sunt vere entia, sed sunt aliquid entis, sicut ea quæ sunt in anima, et secundum aliquos motus et tempus, ut dicit Avicenna.

<sup>1</sup> Parm. omittit : « nato in. »

<sup>2</sup> Parm. : « indicant. »

<sup>3</sup> Parm. : « sed facilem et mutabilem inclina-

tionem habet. »

<sup>4</sup> Al. : « per accidentia. »

Quidam tamen nituntur probare quod sit causa, eo quod Plato ponit compares stellas his quæ nascuntur, in quibus sunt formæ, quæ sunt causa rerum generatarum, et regula esse et vitæ earum. Inducit enim Deum deorum dicentem ad deos corporales, quæ sunt stellæ, et dicit : « Horum generatorum in inferioribus sementem ego faciam, ut vobis contradam : vestrum erit parare ea. » Et præcipit eis quos similes sibi videt, justitiam et pietatem colere : et hæc vivent<sup>1</sup> post terreni dissolutionem intellectus. Hoc de hominibus dictum est quorum immortalis est intellectus, et post mortem sidereas sedes accipient, sicut a semente siderum in generationem descendit. Propterea dicit quod descendens per circulos planetarum vires animæ accipit, memoriam, intelligentiam et voluntatem, sicut exponit Macrobius *Super somnium Scipionis*.

Hoc etiam videtur tangere Ovidius loquens de lacteo circulo, et dicens :

† Hac iter est superis ad magni tecta Tonantis.

Hoc etiam videtur per rationem ; quia quorum unus est essentialis actus, illorum videtur esse una natura. Intelligentiæ autem hominis ex conceptione viri, videtur esse unus essentialis actus. Ergo una natura.

Inde ulterius. Quarumcumque formarum una natura est, illarum una relatio est ad corpus unius naturæ, si in aliquo corpore esse dicuntur. Sed intelligentiæ cœlestis relatio est ad stellam, vel ad orbem secundum comparem stellam. Ergo et intellectualis naturæ in homine erit relatio ad stellam comparem.

Hoc etiam videtur per dictum Commentatoris super XI *Metaph.*, ubi dicit quod finis prosperitatis intellectus hominis est, si post mortem continuetur motori cœlesti.

Solutio. Dicendum quod falsum et hæreticum est dicere quod animæ intellectuales descendant a compare stella. Ægyptiorum enim Philosophorum fuit opinio, quod intellectuales animæ in stellis a Deo deorum factæ<sup>2</sup>, terreno affectu, aliquando afficiuntur, gravantur ; quæ gravatæ deprimuntur ad corpora generabilia et corruptibilia, et ibidem depu-

tatæ per cullum pietatis et justitiæ recipiuntur ad compares stellas. Affectum autem terrenum ad intellectuales animas pervenire dixerunt eo modo quo afficitur anima secundum certam dulcedinem nutrimenti corporis. Posuerunt enim quod subtilissimo vapore paludum mæotidarum inter duo solstitiâ positarum, super quas maximus planetarum est discursus, nutriuntur corpora planetarum, ita quod quando illum attrahunt, ex gravitate deprimuntur et retrogradantur, et quando eundem digerunt, elevantur, et cursu diriguntur. Hanc autem subtilitatem in sphaera ignis et aeris nectar deorum vocabant. Et hoc modo affectum terrenorum ad animas in stellis positas pervenire dixerunt.

Hæretici autem ab hac opinione occasionem erroris sumentes, dixerunt animas esse in cœlo cum Angelis factas, et propter peccatum quod commiserunt, in corpora esse detrusas, ut hic purificatæ ad cœlestes sedes recipiantur : et hoc est quod dicit David Psalm. cxli, 8 : *Educ de carcere animam meam*, etc.

His ergo refutatis, dicendum est cum Philosopho, II *De causis proprietatum elementorum et planetarum*, quod cum cadit semen viri in matricem mulieris decoquitur in ea decoctione forti, et fit fructum carnis, et creatur in ea anima jussu Dei.

Ad primum ergo dicendum quod Plato cum dicit sementes animarum esse in stellis, hoc dicit ratione similitudinis proportionis intellectus humani ad intellectum intelligentiæ cœlestis ; nec stellæ hoc assequuntur nisi per ministerium, sicut ipse Deus deorum dicit quod ipse horum sementem facit. Sementis enim<sup>3</sup> hoc non est in potentia quæ sit ante actum, sed est ipsa factio naturæ intellectualis.

Dictum autem Ovidii in lib. *Metamorph.* est : Non nisi per viam candidam candore innocentiae et justitiæ pervenitur ad magni tecta tonantis.

Ad id quod objicitur per rationem, dicendum quod quorum unus est essentialis actus, illorum est una natura. Intelligere autem, et contemplari intellecta, non ex æquo est intelligentiæ cœlestis et animæ rationalis, sed per prius et posterius : quia intellectus intelligentiæ est

<sup>1</sup> Al. : « videt. »

<sup>2</sup> Al. : « animæ stellis a Deorum factis. » Verbum « factæ » pro « positæ, » quod habetur in-

fra, usurpatur. »

<sup>3</sup> Al. : « hæc. »



sine continuo et tempore, et sine collatione, et in ista prima rerum veritate; intellectus autem noster est cum continuo et tempore, habens se ad primas veritates rerum sicut oculus vespertilionis ad lucem solis. Sic autem intelligere per prius et posterius convenit superiori et inferiori, quæ specificè differunt.

Ad dictum Commentatoris dicendum quod continuatio non est secundum unam

naturam communem, sed secundum unum commune objectum speculationis ab beatitudinem post mortem pertinentis, sicut dicit Philosophus lib. *Cæli et mundi*, quod extra cælum non est tempus nec locus, sed vita beata; intelligens extra cælum esse quod est super cursum siderum in loco quietæ contemplationis bonorum.

---

# OPUSCULUM XXV.

## DE PRINCIPIO INDIVIDUATIONIS.

(EDIT. ROM. XXIX.)

### CAPUT I.

#### *De modo cognitionis sensitivæ* <sup>1</sup>.

Quoniam duæ sunt in homine potentia cognoscitivæ, scilicet sensus et intellectus; manifestum est illas diversitatem supponere ex parte objectorum suorum. Sciendum est autem quod in cognitione humana fundamentum et origo est sensus: unde propinquior est rei extraneæ supra quam tota actio virium sensitivarum fundatur secundum Philosophum in lib. *Periherm.* Unde propter manifestam passionem sensuum a sensibilibus tamquam a propinquo ortam, passiones intellectuum dixit esse similitudines rerum, de passionibus vero sensuum nullam mentionem fecit ibi. Quod tamen principaliter factum est, quia passiones intellectivæ sunt causæ vocum immediatius quam passiones sensuum, de quibus tunc agere intendebat. Certum est autem accidentia ipsa, sive propria sive communia, esse sensibilia, sive objecta sensuum, ut habetur in lib. II *De anima.* Unde, cum super proprium objectum unius potentia altera non feratur nisi per accidens, sicut oculus videt dulce inquantum est album vel nigrum; impossibile est intellectum ferri super illa accidentia nisi per accidens, inquantum scilicet agit circa ipsa phantasmata quæ sunt a parte ipsorum sensibilibus acci-

dentium; et hoc est per modum cujusdam reflexionis. Reflexio autem est duplex: una ab origine potentia, altera ab origine objecti. Primo namque quælibet potentia fertur super objectum suum proprium, et illud habet determinare actum ipsius potentia; unde ultra non transit actus potentia quam sub forma ulteriori ipsius principalioris objecti; aliter namque non esset id proprium ejus objectum: proprium enim objectum est, per cujus informationem potentia actum suum exercet, sicut se habet color ad visum, et sonus ad auditum. Quidditas autem rei sensibilis est objectum intellectus proprium, ut dicitur in III *De anima*: unde quocumque anima se vertit, hoc objectum est sibi ratio agendi. Potest igitur vel redire in se per actum et potentiam suam, vel redire per objectum in ipsam originem objecti, scilicet per phantasmata in species sensibilibus. Ideo isti sunt duo modi reflexionis suæ, quarum altera cognoscit se et quæ a parte sua sunt; altera vero quæ sunt a parte objecti sui. In utroque vero modo sua cognitio ad aliquid singulare terminatur. Cum enim in ipso suo objecto figitur acies, rationem universalis apprehendit quod solum in istis inferioribus ab intellectu determinatur ut proprium objectum, cum omnia singularia apud nos materialia sint: materia enim impedit intellectum, singulare vero non: materia namque non est scibilis nisi per analogiam ad formam, ut dicitur I *Phys.* Si autem esset

<sup>1</sup> Parm. titulos omittit.

apud nos singulare insensibile et immateriale, quod tamen est impossibile, ipsum per se sine aliqua abstractione cognosceretur, quia singularitas non impedit intellectum, sed materialitas. Cum ergo intellectus tendit in originem sui objecti, in sensibilia scilicet, reflectitur super objecta aliarum virium cognoscitivarum. Cum vero ad se redit, non tendit in objectum alicujus alterius virtutis : quia potentialitas animæ, ratione cujus ipsa se intelligit, non potest esse completum objectum intellectus proprii, nisi ducta ad actum per speciem principalis objecti, ut docet Philosophus in III *De anima*, quia anima intelligit se sicut et alia. Sed intelligit alia per speciem. Ergo non est materialitas quæ facit esse ut objectum alterius potentiæ; facit tamen quemdam modum singularitatis, non qui sit alicujus rei completæ in specie, sed quia esse animæ terminatur per receptibilitatem suæ naturæ, cujus potentialitas major est potentialitate Angelorum, quia magis distat a Deo in gradu naturæ quam Angelus. Deus enim actus purus est; et quanto sibi aliquid minus appropinquat, tanto plus potentialitatis et minus actualitatis habet : non solum enim in materia, sed etiam quæcumque potentialitas passiva de ratione objecti intellectus minus habet : quia dicit Philosophus, IX *Metaph.*, quod unumquodque intelligitur secundum quod est actu ens. Unde anima ad objecta duplicem cognitionis modum habet. Unum in se, ut separata accipitur : tunc enim cognoscibilis est secundum modum sui esse, quia est actus perficiens suam potentialitatem : non enim in anima sunt duo actus, scilicet sua essentia quæ est sua potentialitas, et esse suum. Sed esse suum est sua actualitas, ratione cujus ipsa essentia animæ est actus corporis : omnis enim forma participat actum, qui est primus per essentiam ; sed hoc analogice fit. Duos autem actus ejusdem ordinis impossibile est aliquod unum participare simul, sicut impossibile est eandem materiam duas formas substantiales simul participare. Alium autem modum cognitionis habet a se, in quantum nata est per sensus cognoscere : unde non est cognoscibilis in statu in quo accipitur aliquid per sensum, nisi per species rei sensibilis ; et ideo omnis cognitio sua de se ipsa proprie est reflexa.

## CAPUT II.

*Quo ostenditur ubi separatur cognitio sensus et intellectus.*

Nunc ergo restat ostendere, ubi separatur cognitio sensus et intellectus a se mutuo. Manifestum est enim intellectum incipere ubi sensus desinit. Sensus autem exteriores ipsa sensibilia accidentia, communia scilicet et propria, habent pro suis per se objectis. Quidditas autem rei particularis in particulari non spectat ut per se objectum ad illos sensus exteriores, cum quidditas ista substantia sit et non accidens, nec ad intellectum pertinet ut per se objectum ejus propter suam materialitatem. Ideo quidditas rei materialis in ipsa sua particularitate est objectum rationis particularis, cujus est conferre de intentionibus particularibus, loco cujus in brutis æstimativa naturalis est : quæ potentia per sui conjunctionem cum intellectu, ubi est ratio ipsa quæ confert de universalibus, participat vim collativam : sed quia pars sensitivæ est, non abstrahit omnino a materia. Unde objectum suum proprium manet quidditas particularis materialis. Hoc autem non est quod illa potentia apprehendat materiam in se, cum ipsa non possit sciri nisi per analogiam ad formam ; sed quia collatio de materia in ordine ad formam per ipsam materiam individuatum spectat ad hanc potentiam ; sicut considerare de materia in communi in ordine ad formam speciei, spectat ad rationem superiorem.

## CAPUT III.

*Quo ostenditur quod est principium individuationis.*

Ex his facile est videre quomodo materia est principium individuationis : hoc enim intendimus ostendere. Sciendum est ergo quod individuum apud nos in duobus consistit. Est enim individuum in sensibilibus ipsum ultimum in genere substantiæ quod de nullo alio prædicatur : immo ipsum est prima substantia, secundum Philosophum in *Præd.*, et primum fundamentum omnium aliorum. Natura enim formæ materialis, cum ipsa

non possit esse hoc aliquid completum in specie, cujus solum esse est incommunicabile, est communicabilis quantum est de ratione sua; sed est incommunicabilis solum ratione suppositi, quod est aliquid completum in specie, quod cuilibet formæ non convenit, ut dictum est. Ideo quantum est de ratione sua, communicabilis est, ut dictum est. Communicatio autem sua est, ut dictum est, per hoc quod recipitur in aliis. Ideo quantum est de natura sua, communicabilis est, et in multis recipi potest, et recipitur secundum unam rationem, cum una sit ratio speciei in omnibus suis individuis. Sed quia ipsa esse non habet, ut dictum est, quia esse est solius suppositi, ut patet per Philosophum VII *Meta.*, et suppositum incommunicabile est, ut dictum est; ideo ipsa forma materialis diversificatur secundum multa esse incommunicabilia, manens una secundum rationem multis communicatam: sua autem receptio est in materia, quia ipsa materialis est. Ex quo patet quod de natura sua sibi relinquitur unitas rationis in communicatione sua, et quod redditur incommunicabilis per receptionem suam in materia. Ex quo enim recipitur in materia, efficitur individuum quod est incommunicabile, et primum fundamentum in genere substantiæ, ut completum aliorum de se prædicabilium subjectum. In via autem generationis semper incompletum est prius completo, licet in via perfectionis sit totum e contrario. Illud ergo quod est primum subjectum omnium in via generationis, et incompletum quod de nullo illius generis prædicatur, materia scilicet, necessario erit primum principium esse incommunicabilis quod est proprium individui. Aliud est in quo salvatur ratio individui apud nos, determinatio scilicet ejus ad certas particulas temporis et loci, quia proprium est esse sibi hic et nunc, et hæc determinatio debetur sibi ratione quantitatis determinatæ. Et ideo materia sub quantitate determinata est principium individuationis: materia enim sola est principium individuationis, quo ad illud

in quo salvatur ratio primi in genere substantiæ quod tamen impossibile est reperiri sine corpore et quantitate. Et ideo quantitas determinata dicitur principium individuationis, non quod aliquo modo casset subjectum suum quod est prima substantia, sed concomitatur eam inseparabiliter, et determinat eam ad hic et nunc. Illud ergo quod cadit sub ratione particulari, est hoc aliquid per naturam materiæ; quod autem cadat sub sensu exteriori, est per quantitatem. Sed huic objici potest quod materia de sui natura communis est, sicut et forma, cum possit una sub pluribus formis esse. Unde hæc communitas sua potest impedire ipsam, ne sit principium primum individuationis. Sed sciendum est quod impossibile est formam uniri materiæ quin sit particularis, et quod eam sequatur quantitas determinata, per quem modum non est ultra communicabilis materia alteri formæ, quia hæc quantitas cum alia forma reperiri non potest cum eadem determinatione. Et ideo materia non est communicabilis secundum eandem determinationem, sicut forma est, ut dictum est. Ratio enim materiæ sub forma aliqua est alia a ratione sua sub alia forma, quia certificatur ratio sua per determinationem quantitatis, quæ in diversa proportione et dimensione requiritur ad diversas formas. Essentia enim materiæ non diversificatur sub diversis formis sicut ratio sua: ratio enim materiæ non est una et communis sicut sua essentia est: ratio enim formæ in diversis materiis est una; licet secundum esse sit diversa. Et ideo communitas secundum essentiam tantum quæ est ipsius materiæ, et non secundum eandem rationem, non impedit materiam esse primum principium individuationis. Sed advertendum est quod accidentia non individuuntur per materiam primam, sed per subjectum proprium quod est ens actu individuuntur, sicut et formæ substantiales per materiam primam, quæ est earum subjectum. Et hæc de principio individuationis ad præsens sufficient.

# OPUSCULUM XXVI.

## DE ENTE ET ESSENTIA.

(EDIT. ROM. XXX.)

### PROOEMIUM.

Quia parvus error in principio magnus est in fine, secundum Philosophum in *I De cælo et mundo*, ens autem et essentia sunt quæ primo in intellectu concipiuntur, ut dicit Avicenna in *V Metaphys.*, ideo primo, ne ex eorum ignorantia errare contingat, ad horum difficultatem aperiendam dicendum est quid nomine essentiæ et entis significetur, et quomodo in diversis inveniantur, et quomodo se habeant ad intentiones logicas, scilicet genera, species et differentias. Quia vero ex compositis cognitionem simplicium accipere debemus, et ex posterioribus devenire in priora, ut a facilioribus incipientibus convenientior fiat disciplina, ideo ex significatione entis ad significationem essentiæ procedendum est.

### CAPUT PRIMUM.

*Quid significetur communiter nomine entis et essentiæ*<sup>1</sup>.

Sciendum est quod, sicut Philosophus dicit in *V Metaphys.*, ens per se dicitur dupliciter : Uno modo, quod dividitur per decem genera; alio modo quod significat propositionum veritatem. Horum autem differentia est quia secundo modo potest dici ens omne illud de quo affirmativa

propositio formari potest, etiamsi illud in re nihil ponat; per quem modum privationes et negationes entia dicuntur : dicimus enim quod affirmatio est opposita negationi, et quod cæcitas est in oculo. Sed primo modo non potest dici aliquid quod sit ens, nisi quod in re aliquid ponat; unde primo modo cæcitas et hujusmodi non sunt entia. Nomen igitur essentiæ non sumitur ab ente secundo modo dicto; aliqua enim dicuntur hoc modo entia, quæ essentiam non habent, ut patet in privationibus; sed sumitur essentia ab ente primo modo dicto. Unde Commentator, in eodem loco, dicit : « Ens primo modo dictum est quod significat substantiam rei. » Et quia, ut dictum est, ens hoc modo dictum dividitur per decem genera, oportet quod essentia significet aliquod commune omnibus naturis per quas diversa entia in diversis generibus in diversis speciebus collocantur : sicut humanitas est essentia hominis, et sic de aliis. Et quia illud per quod res constituitur in proprio genere vel specie, est quod significamus per definitionem indicantem quid est res; inde est quod nomen essentiæ a philosophis in nomen quidditatis mutatur; et hoc est quod Philosophus, in *VII Metaphys.*, frequenter nominat quod quid erat esse, idest hoc per quod aliquid habet esse quid. Dicitur etiam forma, secundum quod per formam significatur perfectio vel certitudo uniuscujusque rei, sicut dicit Avicenna in *II Metaph.* Hoc etiam alio

<sup>1</sup> In Parm. tituli desiderantur.



nomine natura dicitur, accipiendo naturam secundum primum modum illorum quatuor modorum quos Boetius, *De duabus naturis* assignat, secundum scilicet quod natura dicitur esse illud quod quocumque modo intellectu capi potest; non enim res intelligibilis est nisi per suam definitionem et essentiam: et sic etiam dicit Philosophus in V *Metaphys.*, quod omnis substantia est natura. Nomen autem naturæ hoc modo sumptæ videtur significare essentiam rei secundum quod habet ordinem vel ordinationem ad propriam operationem rei, cum nulla res propria destituatur operatione. Quidditatis vero nomen sumitur ex hoc quod per definitionem significatur; sed essentia dicitur secundum quod per eam et in ea res habet esse.

## CAPUT II.

### *Quid sit essentia in substantiis compositis.*

Sed quia ens absolute et primo dicitur de substantiis, et posterius secundum quid de accidentibus, inde est quod essentia proprie et vere est in substantiis sed in accidentibus est quodammodo et secundum quid. Substantiarum vero quædam sunt simplices et quædam compositæ, et in utrisque est essentia; sed in simplicibus veriori et nobiliori modo. Secundum etiam quod habent esse nobilius, sunt etiam causa eorum quæ composita sunt, ad minus substantia prima et simplex quæ Deus est. Sed quia illarum substantiarum essentiæ sunt nobis magis occultæ, ideo ab essentiis compositorum incipiendum est, ut a facilioribus convenientior fiat disciplina. In substantiis igitur compositis forma et materia notæ sunt, ut in homine anima et corpus. Non autem potest dici quod alterum eorum tantum dicatur essentia. Quod enim materia sola non sit essentia, planum est, quia res per suam essentiam cognoscibilis est et in specie ordinatur vel in genere; materia autem non est cognitionis principium, nec secundum eam aliquid ad speciem vel ad genus determinatur, sed secundum id solum quo in actu aliquid est. Neque etiam forma tantum substantiæ compositæ essentia dici potest, quamvis quidam hoc asserere conentur. Ex his enim quæ dicta sunt patet quod essentia est id quod per defi-

initionem rei significatur; definitio autem substantiarum naturalium non tantum formam, sed et materiam continet; aliter enim definitiones naturales et mathematicæ non differrent. Nec etiam potest dici quod materia, in definitione substantiæ naturalis, ponatur sicut additum essentiæ ejus, vel sicut ens extra illam naturam vel essentiam ejus, quia hic modus proprius est accidentibus quæ essentiam perfecte non habent; unde oportet quod in definitione sua substantiam vel subjectum recipiant quod est extra genus eorum. Patet ergo quod essentia comprehendit materiam et formam. Non etiam potest dici quod essentia significet relationem quæ est inter materiam et formam vel aliquid superadditum illis, quia hoc de necessitate esset accidens extraneum a re, nec per eam res cognosceretur: quæ omnia essentiæ non conveniunt. Per formam enim, quæ est actus materiæ, materia efficitur ens actu et hoc aliquid; unde illud quod superadvenit non dat esse actu simpliciter materiæ, sed esse actu tale, sicut accidentia faciunt; ut albedo facit actu album. Unde, quando talis forma acquiritur, non dicitur generari simpliciter, sed secundum quid.

Relinquitur ergo quod nomen essentiæ in substantiis compositis, significat illud quod est ex materia et forma compositum. Et huic positioni consonat verbum Boetii, in comment. I *Prædicam.* ubi dicit quod Ousia significat compositum. Ousia enim apud Græcos idem est quod essentia apud nos, ut ipsemet in III *De duabus naturis* fatetur. Avicenna autem dicit quod quidditas substantiarum compositarum est ipsa compositio formæ et materiæ. Commentator autem dicit in VII *Metaphys.*: « Natura quam habent species in rebus generabilibus est aliquid medium, idest compositum ex materia et forma. » Huic etiam ratio concordat, quia esse substantiæ compositæ non est tantum formæ nec tantum materiæ, sed ipsius compositi; essentia autem est secundum quam res dicitur esse. Unde oportet ut essentia qua res denominatur ens, non tantum sit forma nec tantum materia, sed utrumque, quamvis hujusmodi esse sive essentiæ sola forma suo modo sit causa: sicut in aliis videmus, quæ ex pluribus principiis constituuntur quod res non denominantur ex altero illorum principiorum tantum, sed ab eo quod utrumque complectitur, ut patet in

saporibus, quia ex actione calidi digerentis humidum causatur dulcedo: et quamvis hoc modo calor sit causa dulcedinis, non tamen denominatur corpus dulce a calore, sed a sapore qui calidum et humidum complectitur. Sed quia individuationis principium est materia, ex hoc forte videtur sequi quod essentia, quæ complectitur in se simul et formam, sit tantum particularis et non universalis. Ex quo sequeretur universalis definitionem non habere, si essentia est id quod per definitionem significatur. Et ideo sciendum est quod materia non quomodolibet accepta est principium individuationis, sed solum materia signata. Et dico materiam signatam quæ sub certis dimensionibus consideratur. Hæc autem materia in definitione hominis, in quantum homo, non ponitur; sed poneretur in definitione Socratis, si Socrates definitionem haberet; in definitione autem hominis ponitur materia non signata; non enim in definitione hominis ponitur hoc os et hæc caro, sed os et caro absolute quæ sunt materia hominis non signata.

### CAPUT III.

#### *Quomodo se habeat essentia ad rationem generis et differentiam.*

Patet ergo quod essentia hominis et Socratis non differunt nisi secundum signatum et non signatum: unde Commentator dicit in VIII *Metaphys.*, quod Socrates non aliud est quam animalitas et rationalitas, quæ sunt quidditas ejus; sicut etiam essentia generis et essentia speciei secundum signatum et non signatum differunt, quamvis alius modus designationis sit utrobique: quia designatio individui respectu generis est per differentiam constitutivam, quæ ex forma rei sequitur. Hæc autem determinatio vel designatio quæ est in specie respectu generis, non est per aliquid in essentia speciei existens quod nullo modo in essentia generis sit; imo quidquid est in specie est etiam in genere, licet non determinatum. Si enim animal non esset totum quod est homo, sed pars ejus, non esset totum quod est homo, sed pars ejus, non prædicaretur de eo, cum nulla pars integralis prædicetur de suo toto. Hoc autem quomodo contingat videri

potest, si inspiciatur corpus secundum quod ponitur pars animalis et secundum quod ponitur genus; non enim potest dici eo modo esse genus quo est pars integralis. Hoc igitur nomen quod est « corpus » multipliciter accipi potest; corpus enim, secundum quod est in prædicamento substantiæ, dicitur ex eo quod habet talem naturam ut in eo designari possint tres dimensiones; ipsæ autem tres dimensiones designatæ sunt corpus quod est in genere quantitatis. Contingit autem in rebus ut quod habet unam perfectionem, ad ulteriorem perfectionem pertingat; sicut patet in homine, qui naturam sensitivam habet et ulterius intellectivam. Similiter etiam et super hanc perfectionem, quæ est habere talem formam ut in ea possint tres dimensiones designari, potest alia perfectio adjungi, ut vita vel aliquid hujusmodi. Potest ergo hoc nomen « corpus » rem quamdam designare, quæ habet talem formam, ex qua sequitur in ipsa designabilitas trium dimensionum cum præcisione, ut scilicet ex illa forma nulla ulterius perfectio sequatur, sed, si aliquid aliud superadditur, sit præter significationem corporis, sic dicti: et hoc modo corpus erit materialis et integralis pars animalis, quia sic anima erit præter id quod significatum est nomine corporis, et superveniens ipsi corpori, ita quod ex ipsis duobus, scilicet ex anima et corpore, sicut ex partibus, constituitur animal. Potest etiam hoc nomen « corpus » hoc modo accipi ut significet rem quamdam quæ habet talem formam, ex qua possint in ea tres dimensiones designari, quæcumque forma sit illa, sive ex ea possit provenire alia ulterior perfectio, sive non: et hoc modo corpus erit genus animalis, quia in animali nihil est accipere quod in corpore implicite non contineatur. Non enim anima est alia ab illa forma per quam in re illa poterant designari tres dimensiones; et ideo, quando dicebam quod corpus est quod habet talem formam ex qua possunt designari tres dimensiones in eo, intelligebam quæcumque forma esset illa, sive anima esset, sive lapideitas, sive quæcumque alia forma; et sic forma animalis implicite in corpore sive in corporis forma continetur, prout corpus est genus ejus. Et etiam talis est animalis habitudo ad hominem. Si enim animal nominaret tantum rem talem quæ habet quamdam perfectionem

ut possit sentire et moveri per principium in ipso existens cum præcisione alterius perfectionis, tunc quæcumque alia perfectio superveniret, haberet se ad animal per modum partis et non sicut implicite contenta in ratione animalis, et animal non esset genus; sed est genus secundum quod significat rem quamdam ex cuius forma potest provenire sensus et motus, quæcumque sit illa forma; sive sit anima sensibilis tantum; sive sit anima sensibilis et rationalis simul. Sic igitur genus significat indeterminate id totum quod est in specie (non enim significat tantum materiam); similiter etiam differentia significat id totum quod est in specie et non tantum formam; et etiam definitio significat totum et etiam species, sed diversimode; quia genus significat totum ut quædam denominatio determinans id quod est materiale in re sine determinatione propriæ formæ; unde genus sumitur a materia, quamvis non sit materia. Unde patet quod corpus dicitur quod habet talem perfectionem ut possint in eo designari tres dimensiones; quæ quidem perfectio est, ut materialis, se habens ad ulteriorem perfectionem. Differentia vero e converso est sicut quædam determinatio a forma determinata sumpta, præter hoc quod de intellectu primo sit materia determinata; ut patet cum dicitur animatum, scilicet illud quod habet animam, non determinatur quid sit, utrum corpus vel aliquid aliud. Unde dicit Avicenna quod genus non est in differentia sicut pars essentiæ ejus, sed solum sicut ens extra quidditatem sive essentiæ; sicut etiam subjectum est de intellectu passionum; et ideo genus non prædicatur de differentia per se loquendo, ut dicit Aristoteles, in III *De anima* et IV *Topic.*, nisi forte sicut subjectum prædicatur de passione. Sed definitio sive species comprehendit utrumque; scilicet determinatam materiam quam designat nomen generis, at determinatam formam quam designat nomen differentię.

Et ex hoc patet ratio quare genus et species et differentia se habeant proportionaliter ad materiam, formam et compositum in natura, quamvis non sint idem cum illis; quia neque genus est materia, sed sumitur a materia ut significans totum, nec differentia est forma, sed sumitur a forma ut significans totum. Unde dicimus hominem esse animal rationale, et non ex animali et rationali,

sicut dicimus eum esse ex anima et corpore. Ex corpore enim et anima dicitur esse homo, sicut ex duabus rebus quædam tertia res constituta, quæ neutra illarum est. Homo enim nec est anima neque corpus. Sed, si homo aliquo modo ex animali et rationali dicatur esse, non erit sicut res tertia ex duabus rebus, sed sicut intellectus tertius ex duobus intellectibus. Intellectus enim animalis est sine determinatione formæ specialis naturam exprimens rei, ex eo quod est materiale respectu ultimæ perfectionis. Intellectus autem hujus differentię « rationalis » consistit in determinatione formæ specialis; ex quibus duobus intellectibus constituitur intellectus speciei vel definitionis. Et ideo, sicut res constituta ex aliquibus non recipit prædicationem earum rerum ex quibus constituitur, ita nec intellectus recipit prædicationem eorum intellectuum ex quibus constituitur: non enim dicimus quod definitio sit genus vel differentia.

Quamvis autem genus significet totam essentiam speciei, non tamen oportet ut diversarum specierum quarum est idem genus, sit una essentia; quia unitas generis ex ipsa indeterminatione vel indifferentia procedit: non autem ita quod id quod significatur per genus sit una natura numero in diversis speciebus, cui superveniat res alia quæ sit differentia determinans ipsum, sicut forma determinat materiam quæ est una numero; sed quia genus significat quamdam formam, tamen non determinate hanc vel illam quam determinate differentia exprimit, quæ non est alia quam illa quæ indeterminate significabatur per genus. Et ideo dicit Commentator, II *Metaphys.*, quod materia prima dicitur una per remotionem omnium formarum, sed genus dicitur unum per communitatem formæ signatæ; unde patet quod per additionem differentię, remota illa indeterminatione quæ erat causa unitatis generis, remanent species diversæ per essentiam. Et quia, ut dictum est, natura speciei est indeterminata respectu individui, sicut natura generis respectu speciei; inde est quod sicut id quod est genus, prout prædicatur de specie, implicat in sua significatione, quamvis indistincte, totum id quod determinate est in specie; ita id quod est species, secundum quod prædicatur de individuo, oportet quod significet totum quod essentialiter est in in-

dividuo, licet indistincte; et hoc modo essentia speciei significatur nomine hominis: unde homo de Socrate prædicatur. Si autem significatur natura speciei cum præcisione materiæ signatæ quæ est principium individuationis, sic se habebit per modum partis; et hoc modo significat nomen humanitatis; humanitas enim significat id unde est homo. Materia autem signata non est illud unde homo est homo; et ita nullo modo continetur inter illa ex quibus homo habet quod sit homo. Cum igitur humanitas in suo intellectu includat tantum ea ex quibus homo habet quod sit homo, patet quod a significatione ejus excluditur vel præciditur materia determinata vel signata: et quia pars non prædicatur de toto, inde est quod humanitas nec de homine nec de Socrate prædicatur: unde dicit Avicenna quod quidditas compositi non est ipsum compositum ejus est quidditas quamvis etiam ipsa ipsa quidditas sit composita; sicut humanitas, licet sit composita, non tamen est homo, imo oportet quod sit recepta in aliquo quod est materia signata. Sed quia, ut dictum est, designatio speciei respectu generis est per formas, designatio autem individui respectu speciei est per materiam; ideo oportet ut nomen significans id unde natura generis sumitur cum præcisione formæ determinatæ perficientis speciem, significet partem materialem totius, sicut corpus est pars materialis hominis. Nomen autem significans id unde sumitur natura speciei cum præcisione materiæ signatæ, significat partem formalem; et ideo humanitas significatur ut forma quædam. Et dicitur quod est forma totius, non quidem quasi superaddita partibus essentialibus materiæ et formæ, sicut forma domus superadditur partibus integralibus ejus: sed magis est forma quæ est totum, scilicet formam complectens et materiam, cum præcisione tamen eorum per quæ materia est nata designari. Sic ergo patet quod essentia hominis significatur hoc nomine « homo » et hoc nomine « humanitas, » sed diversimode, ut dictum est: quia hoc nomen « homo » significat eam ut totum, in quantum scilicet non præterdit designationem materiæ, sed implicite continet eam et indistincte, sicut dictum est quod genus continet differentiam, et ideo prædicatur hoc nomen « homo » de individuis; sed hoc nomen « humanitas » si-

gnificat eam ut partem, nec continet in sua significatione nisi id quod est hominis in quantum homo, et præcidit omnem designationem materiæ, unde de individuis hominis non prædicaretur. Et propter hoc quandoque hoc nomen « essentia » invenitur prædicatum de re (dicitur enim Socrates essentia quædam), et quandoque negatur, sicut dicimus quod essentia Socratis non est Socrates.

#### CAPUT IV.

*Per quem modum sit essentia in substantiis separatis.*

Viso quid significetur nomine essentia in substantiis compositis, videndum est quomodo se habeat ad rationem generis, speciei et differentia. Quia autem cui convenit ratio generis speciei vel differentia, prædicatur de hoc singulari signato; impossibile est quod ratio generis vel speciei vel differentia conveniat essentia secundum quod per modum partis significatur, ut nomine humanitatis vel animalitatis. Et ideo dicit Avicenna quod rationalitas non est differentia, sed differentia principium; et eadem ratione humanitas non est species nec animalitas genus. Similiter etiam non potest dici quod ratio generis, speciei, differentia, conveniat esse secundum quod est quædam res existens extra singularia, ut Platonici ponebant; quia sic genus et species non prædicarentur de hoc individuo; non enim potest dici quod Socrates sit hoc quod ab eo separatum est; nec separatum illud proficit in cognitione hujus singularis signati. Et ideo relinquitur quod ratio generis vel speciei vel differentia conveniat essentia, secundum quod significat per modum totius ut in nomine hominis vel animalis, prout implicite et indistincte continet totum hoc quod in individuo est. Natura autem vel essentia sic accepta potest dupliciter considerari: Uno modo, secundum naturam et rationem propriam, et hæc est absoluta consideratio ipsius; et hoc modo nihil est verum de ea dicere, nisi quod conveniat sibi secundum quod hujusmodi; unde, quidquid aliorum sibi attribuitur, falsa est attributio: v. g. homini, in eo quod est homo, convenit rationale et animal et alia quæ in ejus definitionem cadunt; album vero vel nigrum vel quod-



cumque hujusmodi quod non est de ratione humanitatis, non convenit homini in eo quod est homo. Ideo si quæretur utrum ista natura possit dici una vel plures, neutrum concedendum est : quia utrumque est extra intellectum humanitatis, et utrumque potest sibi accidere. Si enim pluralitas esset de ratione ejus, nunquam posset esse una, cum tamen una sit secundum quod est in Socrate. Similiter, si unitas esset de intellectu et ratione ejus, tunc esset una et eadem natura Socratis et Platonis, nec posset in pluribus plurificari. Alio modo consideratur, secundum quod habet esse in hoc vel in illo : et sic de ipsa prædicatur aliquid per accidens ratione ejus in quo est, sicut dicitur quod homo est albus, quia Socrates est albus, quamvis homini non conveniat in eo quod est homo. Hæc autem natura habet duplex esse : unum in singularibus, aliud in anima ; et secundum utrumque consequuntur accidentia dictam naturam. Et sic in singularibus habet multiplex esse secundum diversitatem singularium, et tamen ipsi naturæ, secundum propriam considerationem, scilicet absolutam, nullum istorum esse debet ; falsum enim est dicere quod natura hominis, in quantum hujusmodi, habeat esse in hoc singulari ; si enim esse in hoc singulari conveniret homini in quantum est homo, non esset unquam extra hoc singulare ; similiter, si conveniret homini, in quantum est homo, non esse in singulari nunquam esset in eo. Sed verum est dicere quod homo, in quantum est homo, non habet quod sit in hoc singulari vel in illo. Patet ergo quod natura hominis absolute considerata abstrahit a quolibet esse, ita quod non fiat præcisio alicujus eorum ; et hæc natura sic considerata est quæ prædicatur de omnibus individuis. Non tamen potest dici quod ratio universalis conveniat naturæ sic acceptæ ; quia de ratione universalis est unitas et communitas. Naturæ autem humanæ neutrum eorum convenit secundum suam absolutam considerationem : si enim communitas esset de intellectu hominis, tunc in quocumque inveniretur humanitas inveniretur communitas ; et hoc falsum est, quia in Socrate non invenitur communitas aliqua, sed quidquid est in eo individuatum est.

Similiter etiam non potest dici quod ratio generis accidat naturæ humanæ secundum illud esse quod habet in indi-

viduis ; quia non invenitur in individuis natura humana secundum unitatem, ut sit unum quid conveniens cuilibet ; quod ratio universalis exigit.

Relinquitur ergo quod ratio speciei accidat naturæ humanæ secundum illud esse quod habet in intellectu. Ipsa enim natura habet esse in intellectu abstractum ab omnibus individuantibus, et habet rationem uniformem ad omnia individua quæ sunt extra animam, prout essentialiter est imago omnium et inducens in cognitionem omnium, in quantum sunt homines : et ex hoc quod talem relationem habet ad omnia individua, intellectus adinvenit rationem speciei et attribuit sibi ; unde dicit Commentator, I *De anima*, quod intellectus est qui facit universalitatem in rebus ; hoc etiam Avicenna dicit in VIII *Metaph.* Et quamvis hæc natura intellecta habeat rationem universalis secundum quod comparatur ad res quæ sunt extra animam, quia est una similitudo omnium, tamen, secundum quod habet esse in hoc intellectu vel in illo, est species quædam intellecta particularis. Et ideo patet defectus Commentatoris, in III *De anima*, qui voluit ex universitate formæ intellectus unitatem intellectus concludere ; quia non est universalitas illius formæ secundum hoc esse quod habet intellectum, sed secundum quod ad res refertur ut similitudo rerum ; sicut etiam, si esset una statua corporea representans multos homines, constat quod illa imago vel species statuæ haberet esse singulare et proprium secundum quod esset in hac materia, sed haberet rationem communitatis secundum quod esset commune representativum plurium. Et quia naturæ humanæ, secundum suam absolutam considerationem, convenit quod prædicetur de Socrate, et ratio speciei non convenit sibi secundum suam absolutam, scilicet humanæ naturæ considerationem, sed est de accidentibus quæ consequuntur eam secundum quoddam esse quod habet in intellectu, ideo nomen speciei non prædicatur de Socrate, ut dicatur : Socrates est species ; quod de necessitate accideret, si ratio speciei conveniret homini secundum esse quod habet in Socrate, vel secundum suam absolutam considerationem, scilicet in quantum est homo. Quidquid enim convenit homini in quantum est homo, prædicatur de Socrate. Et tamen prædicari convenit generi per se, cum in ejus defi-



nitioe ponatur. Prædicatio enim est quoddam quod completur per actionem intellectus componentis et dividens, habens tamen fundamentum in re, ipsam unitatem eorum quorum unum de altero dicitur. Unde ratio prædicabilitatis potest claudi in ratione hujus intentionis quæ est genus, quæ similiter per actionem intellectus completur; nihilominus id cui intellectus intentionem prædicabilitatis attribuit, componens id cum altero, non est ipsa intentio generis, sed potius id cui intellectus intentionem generis attribuit, sicut quod significatur hoc nomine « animal. » Sic ergo patet qualiter essentia vel natura se habet ratione speciei; quia ratio speciei non est de illis quæ conveniunt ei secundum suam absolutam considerationem, neque de accidentibus quæ consequuntur ipsam secundum esse quod habet extra animam, ut albedo vel nigredo; sed est de accidentibus quæ consequuntur eam secundum esse quod habet in intellectu: et per hunc modum convenit sibi ratio generis vel differentie.

#### CAPUT V.

##### *Qualiter diversimode sit essentia in diversis.*

Nunc restat videre secundum quem modum essentia sit in substantiis separatis, scilicet in anima, intelligentiis et causa prima. Quamvis autem causæ primæ simplicitatem omnes philosophi concedant, tamen compositionem materiæ et formæ in intelligentiis et animabus quidam nituntur ponere: cujus positionis auctor fuisse dicitur Avicbron in libro *Fontis vitæ*. Hoc autem dictis philosophorum reperitur esse contrarium, quia eas substantias a materia separatas nominant et absque omni materia esse probant; cujus demonstratio potissima est ex virtute intelligendi quæ in eis est. Videmus enim formas non esse intelligibiles in actu nisi secundum quod separantur a materia et a conditionibus ejus; nec efficiuntur intelligibiles in actu nisi per virtutem substantiæ intelligentis, secundum quod recipiuntur in ea, et secundum quod aguntur per eam. Unde oportet quod in qualibet substantia intelligente sit omnimoda immunitas a materia; ita quod nec habeat materiam par-

tem sui, neque etiam sit sicut forma impressa materiæ, ut est de formis materialibus.

Nec potest dicere aliquis quod intelligibilitatem non impediatur materia quælibet, sed materia corporalis tantum. Si enim hoc esset ratione materiæ corporalis tantum; cum materia non dicatur corporalis nisi secundum quod stat sub forma corporea, tunc oporteret quod hoc haberet materia a forma corporali, scilicet impedire intelligibilitatem. Et hoc non potest esse, quia et ipsa forma corporalis actu intelligibilis est, sicut et aliæ formæ, scilicet quæ a materia abstrahuntur. Unde in anima intellectiva et in intelligentia nullo modo est compositio ex materia et forma, ut hoc modo accipiatur materia in eis sicut in substantiis corporalibus, sed est ibi compositio formæ et esse. Unde in commento nonæ propositionis libri *De causis*, dicitur quod intelligentia est habens formam et esse, et accipitur ibi forma pro ipsa quidditate vel essentia simplici. Et quomodo hoc fit, planum est videre. Quæcumque enim ita se habent ad invicem quod unum est causa esse alterius, illud quod habet rationem causæ potest habere esse sine altero, sed non convertitur. Talis autem invenitur habitudo materiæ et formæ, quod forma dat esse materiæ; et ideo impossibile est esse aliquam materiam sine forma; tamen non est impossibile esse aliquam formam sine materia. Forma enim non habet, in eo quod forma, dependentiam ad materiam; sed si inveniuntur aliquæ formæ quæ non possunt esse nisi in materia, hoc accidit eis secundum quod sunt distantes a primo principio, quod est actus primus et purus. Unde illæ formæ quæ sunt propinquissimæ primo principio, sunt formæ per se sine materia subsistentes; non enim forma secundum totum genus suum materia indiget, ut dictum est; et hujusmodi formæ sunt intelligentiæ: et ideo non oportet ut essentiæ vel quidditates harum substantiarum sint aliud quam ipsa forma.

In hoc ergo differt essentia substantiæ compositæ et substantiæ simplicis, quod essentia substantiæ compositæ non tantum formam nec tantum materiam, sed formam et materiam complectitur; essentia vero substantiæ simplicis est forma tantum. Et ex hoc causantur duæ aliæ differentie. Et una est quod essentia

substantiæ compositæ potest significari ut totum vel ut pars, quod accidit propter materiæ designationem, ut dictum est; et ideo non quomodolibet prædicatur essentia rei compositæ de ipsa re composita; non enim potest dici quod homo sit quidditas sua. Sed essentia rei simplicis, quæ est sua forma, non potest significari nisi ut totum, cum nihil sit ibi præter formam, quasi formam recipiens: et ideo, quocumque modo sumatur essentia substantiæ simplicis, de ea prædicatur; unde Avicenna dicit quod quidditas substantiæ simplicis est ipsummet simplex, quia non est aliquod recipiens ipsam. Secunda differentia est, quia ex eo quod essentiæ rerum compositarum recipiuntur in materia designata vel multiplicantur secundum divisionem ejus, contingit quod aliqua sint idem specie et diversa numero. Sed, cum essentia simplicium non sit recepta in materia, non potest ibi esse talis multiplicatio; et ideo non oportet quod inveniantur plura individua unius speciei in illis substantiis: sed quotquot sunt individua, tot sunt species, ut Avicenna dicit expresse. Hujusmodi ergo substantiæ quamvis sint formæ sine materia, non tamen in eis est omnimoda simplicitas, nec sunt actus puri, sed habent permixtionem potentiæ; et hoc sic patet. Quidquid enim non est de intellectu essentiæ vel quidditatis, hoc est adveniens extra, et faciens compositionem cum essentia; quia nulla essentia sine his quæ sunt partes essentiæ intelligi potest. Omnis autem essentia vel quidditas intelligi potest sine hoc quod aliquid intelligatur de esse suo facto: possum enim intelligere quid est homo vel phoenix, et tamen ignorare an esse habeant in rerum natura: ergo patet quod esse est aliud ab essentia vel quidditate: nisi forte sit aliqua res cujus quidditas sit unum esse; et hæc res non potest esse nisi una et prima: quia impossibile est ut fiat plurificatio alicujus nisi per additionem alicujus differentiæ, sicut multiplicatur natura generis in speciebus; vel per hoc quod forma recipitur in diversis materiis, sicut multiplicatur natura speciei in diversis individuis; vel per hoc quod unum est abstractum et aliud in aliquo receptum: sicut, si esset quidam color separatus, esset alius a colore non separato, ex ipsa sua separatione. Si autem ponatur aliqua res quæ sit esse tantum, ita ut ipsum esse sit

subsistens, hoc esse non recipiet additionem differentiæ, quia jam non esset esse tantum; sed esse, et præter hoc forma aliqua: et multo minus recipiet additionem materiæ, quia jam esset esse non subsistens, sed materiale. Unde relinquitur quod talis res quæ sit suum esse non potest esse nisi una; unde oportet quod, in qualibet alia re præter eam, sit aliud esse suum et aliud quidditas vel natura seu forma sua. Unde in intelligentiis oportet quod sit esse præter formam; et ideo dictum est quod intelligentia est forma et esse.

Omne autem quod convenit alicui, vel est causatum ex principiis naturæ suæ, sicut risibile in homine, vel advenit ab aliquo principio extrinseco, sicut lumen in aere ex influenza solis. Non autem potest esse quod ipsum esse sit causatum ab ipsa forma vel quidditate rei, dico sicut a causa efficiente, quia sic aliqua res esset causa suiipsius, et aliqua res seipsam in esse produceret: quod est impossibile. Ergo oportet quod omnis talis res, cujus esse est aliud a natura sua, habeat esse ab alio. Et quia omne quod est per aliud reducitur ad id quod est per se, sicut ad causam primam; ideo oportet quod sit aliqua res quæ sit causa essendi omnibus rebus, eo quod ipsa est esse tantum: alias iretur in infinitum in causis, cum omnis res quæ non est esse tantum habeat causam sui esse, ut dictum est. Patet ergo quod intelligentia est forma et esse, et quod esse habeat a primo esse quod est esse tantum; et hoc est prima causa, quæ Deus est.

Omne autem quod recipit aliquid ab alio, est in potentia respectu illius; et hoc quod receptum est in eo, est actus ejus. Ergo oportet quod ipsa forma vel quidditas quæ est intelligentia, sit in potentia respectu esse quod a Deo recipit; et illud esse receptum est per modum actus; et ita invenitur actus et potentia in intelligentiis, non tamen forma et materia, nisi æquivoce; unde etiam pati, recipere, subjectum esse et omnia hujusmodi quæ videntur rebus ratione materiæ convenire, æquivoce conveniunt substantiis intellectualibus et corporalibus, ut Commentator dicit in III *De anima*. Et quia, ut dictum est, intelligentiæ quidditas est ipsamet intelligentia, ideo quidditas vel essentia ejus est ipsum quod est ipsa, et esse suum receptum a Deo est id quod subsistit in rerum natura; et propter hoc

a quibusdam hujusmodi substantiæ dicuntur componi ex quo est et quod est, vel ex quo est et essentia, ut Boetius dicit in I *Prædicam.* Et quia in intelligentiis ponitur potentia et actus, non erit difficile invenire multitudinem intelligentiarum; quod esset impossibile, si nulla potentia in eis esset. Unde dicit Commentator in III *De anima*, quod, si natura intellectus possibilis esset ignorata, non possemus invenire multitudinem in substantiis separatis. Est ergo distinctio earum ad invicem, secundum gradum potentiae et actus; ita quod intelligentia superior, quæ plus propinqua est primo, habet plus de actu et minus de potentia, et sic de aliis; et hoc completur in anima humana, quæ tenet ultimum gradum in intellectualibus substantiis. Unde intellectus potentialis ejus se habet ad formas intelligibiles sicut materia prima, quæ tenet ultimum gradum in esse sensibili, ad formas sensibiles, ut Commentator in III *De anima*, dicit; et ideo Philosophus comparat eam tabulæ rasæ, in qua nihil est depictum. Et propter hoc, quia, inter alias substantias intelligibiles, plus habet de potentia, ideo efficitur in tantum propinqua rebus materialibus, ut res materialis trahatur ad participandum esse suum, ita quod ex anima et corpore resultat unum esse in uno composito; quamvis illud esse, prout est animæ, non sit dependens a corpore. Et ideo post istam formam, quæ est anima, inveniuntur aliæ formæ plus de potentia habentes et magis propinquæ materiæ, intantum quod esse earum sine materia non est. In quibus etiam invenitur ordo et gradus usque ad primas formas elementorum, quæ sunt propinquissimæ materiæ; unde nec aliquam operationem habent, nisi secundum exigentiam qualitatum activarum et passivarum et aliorum quibus materia ad formam disponitur.

## CAPUT VI.

### *Quomodo sit essentia in accidentibus.*

His visis, patet quomodo essentia invenitur in diversis. Invenitur autem triplex modus habendi essentiam in substantiis. Aliquid enim est, sicut Deus, cujus essentia est ipsum suum esse; et ideo inveniuntur aliqui philosophi dicentes quod Deus non habet essentiam, quia

essentia ejus non est aliud quam esse ejus. Et ex hoc sequitur quod ipse non sit in genere, quia omne quod est in genere oportet quod habeat quidditatem præter esse suum; cum quidditas aut natura generis aut speciei non distingatur secundum rationem naturæ in illis quorum est genus vel species; sed esse est in diversis diversimode. Nec oportet, si dicimus quod Deus est esse tantum, ut in errorem eorum incidamus qui Deum dixerunt esse illud esse universale quo quælibet res formaliter est. Hoc enim esse quod Deus est, hujus conditionis est ut nulla sibi additio fieri possit: unde per ipsam suam puritatem est esse distinctum ab omni esse; propter quod, in commento nonæ propositionis libri *De causis*, dicitur quod individuatio primæ causæ, quæ est esse tantum, est per puram bonitatem ejus. Esse autem commune, sicut in intellectu suo non includit aliquam additionem, ita nec includit in intellectu suo aliquam præcisionem additionis; quia, si hoc esset, nihil posset intelligi esse in quo super esse aliquid adderetur.

Similiter etiam, quamvis sit esse tantum, non oportet quod deficient ei reliquæ perfectiones vel nobilitates; imo habet omnes perfectiones quæ sunt in omnibus generibus, propter quod perfectum simpliciter dicitur, ut Philosophus et Commentator, in V *Metaphys.* dicunt; sed habet eas modo excellentiori omnibus rebus, quia in eo omnes unum sunt, sed in aliis diversitatem habent; et hoc est quia omnes illæ perfectiones conveniunt sibi secundum suum esse simplex: sicut, si aliquis per unam qualitatem posset efficere operationes omnium qualitatum, in illa una qualitate omnes qualitates haberet: ita Deus in ipso esse suo omnes perfectiones habet. Secundo modo invenitur essentia in substantiis creatis intellectualibus, in quibus est aliud esse quam essentia ipsarum, quamvis essentia sit sine materia; unde esse earum non est absolutum, sed receptum, et ideo limitatum et finitum ad capacitatem naturæ recipientis: sed natura vel quidditas earum est absoluta, non recepta in aliqua materia. Et ideo dicitur in libro *De causis* quod intelligentiæ sunt finite superius et infinitæ inferius: sunt enim finite quantum ad esse suum quod a superiori recipiunt; non tamen finiuntur inferius, quia earum formæ non limitantur ad capacitatem alicujus materiæ recipientis eas; et in tali-

bus substantiis non invenitur multitudo individuorum in una specie, ut dictum est, nisi in anima humana, propter corpus cui unitur. Et licet individuatio ejus ex corpore occasionaliter dependeat, quantum ad sui inchoationem, quia non acquiritur sibi esse individuum nisi in corpore cujus est actus, non tamen oportet, ut, destructo corpore, individuatio pereat; quia, cum habeat esse absolutum ex quo acquisitum est sibi esse individuum, ex hoc quod facta est forma hujus corporis, illud esse semper remanet individuum; et ideo dicit Avicenna quod individuatio animarum et multiplicatio dependet ex corpore, quantum ad sui principium, sed non quantum ad sui finem. Et quia in illis substantiis quidditas non est idem quod esse, ideo sunt ordinabiles in prædicamento; et propter hoc invenitur in eis genus, species et differentia, quamvis earum differentiarum propriarum nobis occultarum sint. In rebus enim sensibilibus etiam ipsarum differentiarum essentialium nobis ignotarum sunt; unde significantur per differentias accidentales quæ ex essentialibus oriuntur, sicut causa significatur per suum effectum, sicut bipes ponitur differentia hominis. Accidentia autem propria substantiarum immaterialium nobis ignota sunt; unde differentiarum earum nec per se, nec per accidentales differentias nobis significari possunt.

Hoc tamen sciendum quod non eodem modo sumitur genus et differentia in illis substantiis et in substantiis sensibilibus: quia, in sensibilibus, genus sumitur ab eo quod est materiale in re, differentia vero ab eo quod est formale in ipsa; unde dicit Avicenna in I *De anima* quod forma, in rebus compositis ex materia et forma, est differentia simplex ejus quod constituitur ex illa: non autem ita quod ipsa forma sit differentia, sed quia est principium differentiarum, ut idem dicit in sua *Metaph.* Talis differentia est differentia simplex, quia sumitur ab eo quod est pars quidditatis rei, scilicet a forma. Cum autem substantiarum spirituales sint simplices quidditates, non potest in eis differentia sumi ab eo quod est pars quidditatis, sed a tota quidditate; et ideo dicit Avicenna in I *De anima* quod differentiam simplicem non habent nisi species quarum essentialium sunt compositarum ex materia et forma. Similiter etiam in eis ex tota essentia sumitur genus, modo tamen differenti; una enim substantia separata

convenit cum alia in immaterialitate: differunt autem ab invicem in gradu perfectionis, secundum recessum a potentialitate et accessum ad actum purum. Et ideo ab eo quod sequitur illas in quantum sunt immateriales, sumitur in eis genus, sicut intellectualitas vel aliquid hujusmodi; ab eo autem quod sequitur in eis gradum perfectionis, sumitur in eis differentia, nobis tamen ignota. Nec oportet has differentias esse accidentales, quia sunt secundum majorem et minorem perfectionem, quæ non diversificat speciem. Gradus enim perfectionis in recipiendo eandem formam non diversificat speciem, sicut albius et minus album in participando ejusdem speciei albedinem: sed diversis gradibus perfectionis in ipsis formis vel naturis participatis diversificat speciem: sicut natura procedit per gradus de plantis ad animalia, per quædam quæ fiunt media inter animalia et plantas, secundum Philosophum in lib. *De animal.* Nec iterum est necessarium ut divisio intellectualium substantiarum sit semper secundum differentias veras, quia hoc est impossibile in omnibus rebus accipere, ut Philosophus dicit in II *De animal.* Tertio modo invenitur in substantiis compositis ex materia et forma in quibus et esse est receptum et finitum, propter quod et ab alio esse habent: et iterum natura vel quidditas earum recepta est in materia signata, et ideo sunt finitæ et superius et inferius, et in eis jam propter divisionem materiarum signatarum possibilis est multiplicatio individuorum in una specie; et in his substantiis qualiter se habeat essentia ad intentiones logicas, supra dictum est.

## CAPUT VII.

### *Qualiter sit genus et differentia in accidentibus.*

Nunc autem restat videre qualiter essentia sit in accidentibus; quomodo autem sit in omnibus substantiis dictum est. Et quia, ut dictum est, essentia per definitionem significatur, oportet quod eo modo habeant essentiam quo habent definitionem. Definitionem autem habent incompletam, quia non possunt definiri nisi ponatur subjectum in eorum definitione; et hoc ideo est quia non habent in se esse absolutum per se a subjecto; sed,



sicut ex forma et materia relinquatur esse substantiale quando componitur, ita ex accidente et subjecto relinquatur esse accidentale quando accidens subjecto advenit. Et ideo etiam nec forma substantialis completam essentiam habet, nec materia, quia in definitione formæ substantialis oportet quod ponatur illud cuius est forma; et ita definitio ejus est per additionem alicujus quod extra ejus genus est, sicut et definitio formæ accidentalis: ut etiam in definitione animæ ponitur corpus a naturali, qui considerat animam solum in quantum est forma physici corporis. Sed tamen inter formas substantiales et accidentales tantum interest, quia, sicut forma substantialis non habet per se esse absolutum sine eo cui advenit, ita nec cui advenit, scilicet materia: et ideo ex conjunctione utriusque relinquatur illud esse in quo res per se subsistit, et ex eis efficitur unum per se; propter quod ex conjunctione eorum relinquatur essentia quædam. Unde forma, quamvis in se considerata non habeat rationem completæ essentiæ, tamen est pars essentiæ completæ. Sed illud cui advenit accidens, est ens in se completum, consistens in suo esse; quod quidem esse naturaliter præcedit accidens quod supervenit; et ideo accidens superveniens, ex conjunctione sui cum eo cui supervenit, non causat illud esse in quo res subsistit, per quod res est ens per se, sed causat quoddam esse secundum, sine quo res subsistens intelligi potest esse, sicut primum potest intelligi sine secundo vel prædicatum sine subjecto. Unde ex accidente et subjecto non fit unum per se, sed unum per accidens; et ideo ex eorum conjunctione non resultat essentia quædam, sicut ex conjunctione formæ cum materia; propter quod accidens neque rationem completæ essentiæ habet, neque pars completæ essentiæ est; sed sicut est ens secundum quid, ita et essentiam secundum quid habet. Sed, quia illud quod dicitur maxime et verissime in quolibet genere, est causa eorum quæ sunt post in illo genere, sicut ignis qui in fine caliditatis est causa caloris in rebus calidis, ut in secundo *Metaphys.* dicitur, ideo substantia, quæ est principium in genere entis, maxime et verissime essentiam habens, oportet quod sit causa accidentium quæ secundario et quasi secundum quid rationem entis participant. Quod tamen diversimode contingit; quia

enim partes substantiæ sunt materia et forma, ideo quædam accidentia principaliter consequuntur formam, et quædam materiam. Forma autem invenitur aliqua cuius esse non dependet a materia, ut anima intellectualis; materia vero non habet esse nisi per formam. Unde in accidentibus quæ sequuntur formam est aliquid quod non habet communicationem cum materia, ut intelligere quod non est per organum corporale, sicut probat Philosophus in III *De anima*; aliqua vero ex consequentibus formam sunt, quæ habent communicationem cum materia, ut sentire; sed nullum accidens sequitur materiam sine communicatione formæ.

In his tamen accidentibus quæ materiam consequuntur invenitur quædam diversitas. Quædam enim accidentia consequuntur materiam secundum ordinem quem habet ad formam specialem, ut masculinum et femininum in animalibus, quorum diversitas ad materiam reducit, ut dicitur in decimo *Metaphysicorum*; unde, remota forma animalis, dicta accidentia non remanent nisi æquivoce. Quædam vero consequuntur materiam secundum ordinem quem habet ad formam generalem; et ideo, remota forma speciali, adhuc in ea remanent; sicut nigredo cutis est in Æthiope ex mixtione elementorum, et non ex ratione animæ; et ideo post mortem in eo remanet. Et quia unaquæque res individuatur ex materia et collocatur in genere vel specie per suam formam, ideo accidentia quæ consequuntur materiam sunt accidentia individui, secundum quæ etiam individua ejusdem speciei differunt ad invicem. Accidentia vero quæ consequuntur formam, sunt propriæ passionis vel generis vel speciei; unde inveniuntur in omnibus participantibus naturam generis vel speciei; sicut risibile consequitur in homine formam, quia risus contingit ex aliqua apprehensione animæ hominis. Sciendum etiam est quod aliquando accidentia ex principiis essentialibus causantur secundum actum perfectum, sicut calor in igne qui semper actu est calidus; aliquando vero secundum aptitudinem tantum, sed complementum accipiunt accidentia ex agente exteriori; sicut diaphaneitas in aere, quæ completur per corpus lucidum exterius; et in talibus aptitudo est accidens inseparabile; sed complementum quod advenit ex aliquo principio quod est extra essentiam rei



vel quod intrat constitutionem rei, est separabile, sicut moveri et hujusmodi. Sciendum est autem quod in accidentibus alio modo sumuntur genus, differentia et species quam in substantiis. Quia enim in substantiis ex materia et forma substantiali fit per se unum, una quadam natura ex eorum conjunctione resultante, quæ proprie in prædicamento substantiæ collocatur, ideo in substantiis nomina concreta quæ compositum significant, proprie in genere esse dicuntur, sicut genera vel species, ut homo vel animal : non autem forma vel materia est in prædicamento hoc modo nisi per reductionem, sicut principia in genere principiatorum esse dicuntur. Sed ex accidente et subjecto non fit unum per se; unde non resultat ex eorum conjunctione aliqua natura cui intentio generis vel speciei possit attribui. Unde nomina accidentium concretive dicta non ponuntur in prædicamento sicut species vel genera, ut album vel musicum nisi per reductionem; sed solum secundum quod abstracta significantur, ut albedo et musica. Et quia accidentia non componuntur ex materia et forma, ideo non potest in eis sumi genus a materia et differentia a forma, sicut in substantiis compositis; sed oportet ut primum genus sumatur ex ipso modo essendi, secundum quod ens diversimode secundum prius et posterius de decem generibus prædicatur; sicut dicitur quantitas ex eo quod est mensura substantiæ, et qualitas secundum quod est dispositio substantiæ, et sic de aliis, secundum Philosophum in II *Metaphys.* Differentiæ vero in eis sumuntur ex di-

versitate principiorum ex quibus causantur. Et quia propriæ passiones ex propriis principiis subjecti causantur, ideo subjectum ponitur in definitione eorum loco differentiæ, si in abstracto definiantur, secundum quod sunt proprie in genere, sicut dicitur quod simitas est nasi curvitas; sed e converso esset, si eorum definitio sumeretur secundum quod concretive dicuntur; sic enim subjectum in eorum definitione poneretur sicut genus; quia tunc definirentur per modum substantiarum compositarum in quibus ratio generis sumitur a materia, sicut dicimus quod simum est nasus curvus. Similiter etiam est, si unum accidens alterius accidentis principium sit, sicut principium relationis est actio et passio et quantitas; et ideo secundum hæc dividit Philosophus relationem in V *Metaphys.* Sed quia propria principia accidentium non semper sunt manifesta, ideo quandoque sumimus differentias accidentium ex eorum effectibus, sicut congregativum et disgregativum visus dicuntur differentiæ coloris, quæ causantur ex abundantia et paucitate lucis ex qua diversæ species coloris causantur. Sic ergo patet quomodo essentia est in substantiis et accidentibus, et quomodo in substantiis compositis et simplicibus, et quomodo intentiones logicæ universales in eis inveniuntur, excepto primo principio quod est infinitæ simplicitatis, cui non convenit ratio generis vel speciei, et per consequens nec definitio propter suam simplicitatem. In quo sit finis et consummatio hujus sermonis.

# OPUSCULUM XXVII.

## DE PRINCIPIIS NATURÆ AD FRATREM SILVESTRUM.

(EDIT. ROM. XXXI.)

Nota quod <sup>1</sup> quoddam potest esse licet non sit, quoddam vero <sup>2</sup> est; illud quod potest esse et non est, dicitur esse potentia; illud autem quod jam est, dicitur esse actu. Sed duplex est esse : scilicet esse essentielle, sive esse substantiale rei, ut hominem esse; et hoc est esse simpliciter. Est autem aliud esse accidentale, ut hominem esse album; et hoc est esse secundum quid. Ad utrumque autem esse est aliquid in potentia : aliquid enim est in potentia ut sit homo, ut sperma et sanguis menstruus; aliquid in potentia ut sit album, ut homo; tamen illud quod est in potentia ad esse accidentale, potest dici materia, sicut sperma hominis, et homo albedinis. Sed in hoc differunt : quia illud quod est in potentia ad esse substantiale, dicitur materia ex qua; quod autem est in potentia ad esse accidentale, dicitur materia in qua. Item, proprie loquendo, illud quod est in potentia ad esse substantiale, dicitur materia prima; quod autem est in potentia ad esse accidentale, dicitur subjectum : subjectum enim dat esse accidenti, scilicet existendi, quia accidens non habet esse nisi per subjectum : unde dicitur quod accidentia sunt in subjecto, non autem dicitur quod forma substantialis sit in subjecto. Et secundum hoc differt materia a subjecto : quia subjectum est quod non habet esse ex eo quod aliquid ei advenit, sed quod est per se, et habet esse completum, ut homo non habet esse per albedinem. Sed materia dicitur quod

habet esse ex eo quod sibi advenit, quia de se esse incompletum, immo nullum esse habet, ut dicit Commentator in II *De anima*. Unde, simpliciter loquendo, forma dat esse materiæ, accidens autem non dat esse subjecto, sed subjectum accidenti; licet aliquando ponatur unum pro alio, scilicet materia pro subjecto, et e contrario. Sicut autem omne quod est in potentia, potest dici materia, ita omne a quo habet aliquid esse, quodcumque esse sit illud, sive substantiale, sive accidentale, potest dici forma; sicut homo cum sit potentia albus, fit per albedinem actu albus; et sperma cum sit potentia homo, fit actu homo per animam. Et quia forma facit esse in actu, ideo dicitur quod forma est actus : quod autem facit esse actu substantiale, dicitur forma substantialis, et quod facit actu esse accidentale, dicitur forma accidentalis. Et quia generatio est motus ad formam, duplici formæ respondet duplex generatio : formæ substantiali respondet generatio simpliciter; formæ accidentali respondet generatio secundum quid. Quando enim introducitur forma substantialis, dicitur aliquid fieri simpliciter, sicut dicimus homo fit, vel homo generatur; quando autem introducitur forma accidentalis, non dicitur aliquid fieri simpliciter, sed fieri hoc; sicut quando homo fit albus, non dicitur simpliciter hominem fieri vel generari, sed fieri vel generari album. Et huic duplici generationi opponitur duplex corruptio; scilicet simplex, et secundum

<sup>1</sup> Parm. : « quoniam quoddam. »

<sup>2</sup> Parm. addit : « jam. »

quid. Generatio vero et corruptio simpliciter non sunt nisi in genere substantiæ; generatio vero et corruptio secundum quid sunt in omnibus aliis generibus. Et quia generatio est quædam mutatio de non esse vel de non ente ad esse vel ad ens, e contrario autem corruptio debet esse de esse vel ente ad non esse vel non ens. Non autem ex quolibet non esse fit generatio; sed ex non ente quod est ens in potentia; sicut idolum ex cupro quod est idolum in potentia, et non actu. Ad hoc autem quod sit generatio, tria requiruntur: scilicet ens in potentia quod est materia: et non esse actu quod est privatio; et id per quod fit actu quod est forma: sicut quando ex cupro fit idolum, cuprum quod est in potentia ad formam idoli, est materia; hoc autem quod est infiguratum sive indispositum, est privatio; figura autem a qua dicitur idolum, est forma. Non autem forma substantialis: quia cuprum ante adventum figuræ habet esse actu, et ejus esse non dependet ab illa figura, sed est forma accidentalis: omnes enim formæ artificiales sunt accidentales: ars enim non operatur nisi circa id quod jam constitutum est in esse perfecto a natura. Sunt igitur tria principia naturæ, scilicet materia et forma et privatio; quorum scilicet forma, est id propter quod fit generatio; alia duo sunt ex parte ejus ex quo est generatio. Unde materia et privatio sunt idem subjecto, sed differunt ratione: idem enim est æs et infiguratum ante adventum formæ; sed ex alia ratione dicitur æs, et ex alia infiguratum: unde privatio dicitur principium non per se, sed per accidens, quia scilicet coincidit cum materia; sicut dicimus quod est per accidens quod medicus ædificat: non enim ex eo quod medicus, sed ex eo quod domifactor est, quod coincidit in medico in eodem subjecto. Sed duplex est accidens: scilicet necessarium quod non separatur a re, sicut risibile homini: et non necessarium quod separatur, sicut album ab homine. Unde, licet privatio sit principium per accidens, non tamen sequitur quod non sit necessarium ad generationem, quia materia a privatione nunquam denudatur: in quantum enim est sub una forma, habet privationem alterius, et e contra; sicut in igne est privatio aeris, et in aere est privatio ignis. Et sciendum quod cum generatio sit ex non esse, non dicimus quod nega-

tio sit principium, sed privatio; quia negatio non determinat subjectum. Non videre enim potest dici etiam de non entibus, ut chimæra non videt; et iterum de entibus quæ non sunt nata habere visum, sicut de lapidibus. Sed privatio non dicitur nisi de determinato subjecto, in quo scilicet natus est fieri habitus; sicut cæcitas non dicitur nisi de his quæ sunt nata videre. Et quia generatio non fit ex non ente simpliciter, sed ex non ente quod est in aliquo subjecto, et non in quolibet, sed in determinato: non enim ex quolibet non igne fit ignis, sed ex tali non igne, circa quem nata sit fieri forma ignis; ideo dicitur quod privatio est principium, et non negatio. Sed in hoc differt ab aliis; quia alia sunt principia et in esse et in fieri: ad hoc enim quod fiat idolum, oportet quod sit æs, et quod ulterius sit figura idoli: et iterum, quando est jam idolum, oportet hæc duo esse. Sed privatio est principium in fieri, et non in esse: quia dum fit idolum, oportet quod non sit idolum: si enim esset, non fieret, quia quicquid fit non est, nisi in successivis, ut in tempore et motu: sed ex quo jam idolum est, non est ibi privatio idoli, quia affirmatio et negatio non sunt simul, similiter nec privatio et habitus. Item privatio est principium per accidens, ut supra est expositum; alia vero sunt principia per se. Ex dictis ergo patet quod materia per se differt a forma et privatione secundum rationem. Materia enim est id in quo intelligitur forma et privatio, sicut in cupro intelligitur forma et infiguratum; quandoque tamen materia denominatur cum privatione, quandoque sine privatione: sicut æs cum fit materia idoli, non importat privationem, quia ex hoc quod dico æs, non intelligitur indispositum sive infiguratum; sed farina cum sit materia respectu panis, importat in se privationem formæ panis; quia ex hoc quod dico farina, significatur indispositio sive inordinatio opposita formæ panis. Et quia in generatione materia sive subjectum permanet, privatio vero non, nec compositum ex materia et privatione; ideo materia quæ non importat privationem, est permanens: quæ autem importat, est transiens. Et est sciendum quod quædam materia habet compositionem formæ: sicut æs, cum sit materia respectu idoli, ipsum tamen æs est compositum ex materia et forma; et ideo æs non dicitur

materia prima, quia habet formam : illa autem materia quæ intelligitur sine qualibet forma et privatione, sed est subiecta formæ et privationi, dicitur materia prima, propter hoc quod ante ipsam non est materia alia; et hæc dicitur *yle*, hoc est chaos vel confusio, græce. Et quia omnis definitio et omnis cognitio est per formam; ideo materia prima non potest per se definiri nec cognosci, sed per comparisonem ad formam; ut dicatur quod illud est materia prima quod hoc modo se habet ad omnes formas et privationes sicut æs <sup>1</sup> ad idolum et infiguratum; et hæc dicitur simpliciter prima. Potest etiam aliquid dici materia prima respectu alicujus generis, sicut aqua respectu liquabilium : quæ tamen non est prima simpliciter, quia est compositum ex materia et forma, unde habet materiam priorem. Et sciendum est quod materia prima, et etiam forma, non generatur neque corrumpitur, quia omnis generatio est ex aliquo ad aliquid. Id autem ex quo est generatio, est materia, id autem ad quod est generatio, est forma. Si ergo materia et forma generarentur, materiæ esset materia, et formæ esset forma, et sic in infinitum. Unde generatio non est nisi compositi, proprie loquendo. Sciendum est etiam quod materia prima dicitur una numero in omnibus. Sed unum numero dicitur duobus modis; scilicet quod habet unam formam determinatam in numero, sicut Socrates : et hoc modo materia prima non dicitur una numero, cum in se non habeat aliquam formam. Dicitur etiam aliquid unum numero, quia est sine dispositionibus quæ faciunt differre secundum numerum; et hoc modo dicitur materia prima unum numero, quia intelligitur sine omnibus dispositionibus quæ faciunt differre numero, vel a quibus est differentia in numero. Sciendum etiam quod licet materia prima non habeat in sua ratione aliquam formam vel privationem, sicut in ratione aeris non est figuratum vel infiguratum; materia tamen nunquam denudatur a forma et privatione : quandoque enim est sub una forma, quandoque sub alia. Per se autem nunquam potest esse; quia cum in ratione sua non habeat aliquam formam, non potest esse in actu, cum esse actu non sit nisi a

forma; sed est solum in potentia. Et ideo, quicquid est in actu, non potest dici materia prima. Ex dictis ergo patet tria esse principia naturæ : scilicet materiam, formam et privationem; sed non sunt hæc sufficientia ad generationem. Quod enim est in potentia, non potest se reducere ad actum : sicut cuprum quod est in potentia ad idolum, non facit se idolum, sed indiget operante, ad hoc quod forma idoli exeat de potentia in actum. Forma etiam non potest se extrahere de potentia in actum : et loquor de forma generati, quam dicimus esse terminum generationis : forma enim non est nisi in facto esse; quod autem operatur est in fieri, dum res fit. Oportet ergo præter materiam et formam aliquid principium esse quod agat; et hoc dicitur causa efficiens, vel movens, vel agens, vel unde est principium motus. Et quia, ut dicit Aristoteles in II *Metaph.*, omne quod agit, non agit nisi intendendo aliquid, oportet esse aliud quartum, id scilicet quod intenditur ab operante; et hoc dicitur finis. Et sciendum quod licet omne agens tam naturale quam voluntarium intendat finem, non tamen sequitur quod omne agens cognoscat finem, vel deliberet de fine. Cognoscere autem finem est necessarium in his quorum actiones sunt determinatæ, sed se habent ad opposita, sicut sunt agentia voluntaria; et ideo oportet quod cognoscant finem, per quem suas actiones determinent. Sed in agentibus naturalibus sunt actiones determinatæ : unde non est necessarium eligere ea quæ sunt ad finem : et ponit exemplum Avicenna de citharædo, quem non oportet de qualibet percussione chordarum deliberare, cum percussiones sint determinatæ apud ipsum; alioquin esset inter percussiones mora quod esset absolum. Magis autem videtur de operante voluntarie quod deliberet, quam de agente naturali. Et ita patet per locum a majori quod si agens voluntarie, de quo magis videtur, non deliberat aliquando, ergo nec agens naturale. Ergo possibile est agens naturale sine deliberatione intendere finem : et hoc intendere nihil aliud est quam habere naturalem inclinationem ad aliquid. Ex dictis patet quod sunt quatuor causæ : scilicet materialis, efficiens, formalis et finalis. Licet autem

<sup>1</sup> Al. : « sicut est. »

principium et causa dicantur convertibiliter, ut dicitur V *Metaph.*, tamen Aristoteles in lib. *Phys.*, ponit quatuor causas et tria principia : causas enim accipit tam pro extrinsecis quam pro intrinsecis. Materia autem et forma dicuntur intrinsecæ rei, eo quod sunt partes constituentes rem; efficiens autem et finalis dicuntur extrinsecæ, quia sunt extra rem. Sed per principia accipit solum causas intrinsecas; privatio autem non nominatur inter causam, quia est principium per accidens, ut dictum est. Et cum dicimus quatuor esse causas, intelligimus de causis per se, ad quas tamen omnes causæ per accidens reducuntur : quia omne quod est per accidens, reducitur ad id quod est per se. Et licet Aristoteles ponat principia pro causis intrinsecis in I *Physic.*, tamen, ut dicitur V *Metaph.*, principium proprie dicitur de causis extrinsecis, elementum vero de causis quæ sunt partes rei, scilicet de causis intrinsecis, causa vero de utrisque. Tamen aliquando ponitur unum pro alio : omnis enim causa potest dici principium, et omne principium causa; sed tamen causa videtur addere supra principium communiter dictum; quia id quod est principium, sive ex eo consequatur esse posterioris, sive non, potest esse principium, sicut faber dicitur principium cultelli, quia ex ejus operatione cultelli est esse. Sed quando aliquid movetur de albedine in nigredinem, dicitur quod albedo est principium illius motus; et universaliter omne id a quo incipit motus, dicitur principium: tamen albedo non est id ex cuius esse consequitur esse posterioris, scilicet nigredinis. Sed causa solum dicitur de illo principio ex quo consequitur esse posterioris : unde dicitur quod causa est id, ex cuius esse consequitur aliud. Et ideo illud principium a quo incipit motus, non potest dici per se causa, etsi dicatur principium: et propter hoc privatio ponitur inter principia, et non inter causas, quia privatio est id a quo incipit generatio. Sed potest dici etiam causa per accidens, in quantum coincidit cum materia, sicut supra dictum est. Elementum autem non proprie dicitur nisi de causis ex quibus est compositio rei, quæ proprie sunt materiales : et iterum non de qualibet causa materiali, sed de illa ex qua est prima compositio : sicut non dicimus quod membra sint elementa hominis, quia membra etiam

componuntur ex aliis; sed dicimus quod terra et aqua sunt elementa, quia non componuntur ex aliis corporibus, sed ex ipsis est prima compositio corporum naturalium : unde Aristoteles V *Metaph.*, dicit quod elementum est ex quo componitur res primo, et est in ea, et non dividitur secundum formam. Expositio primæ particulæ, scilicet « Id ex quo componitur res primo » patet per antedicta. Secunda particula, scilicet « Et est in ea » ponitur ad differentiam illius materiæ quæ ex toto corrumpitur per generationem : sicut panis est materia sanguinis, sed non generatur sanguis nisi corrumpatur panis; unde panis non remanet in sanguine : unde non potest dici panis elementum sanguinis : sed elementa oportet aliquo modo manere, cum non omnino corrumpantur, ut dicitur in lib. *De gener.* Tertia particula, scilicet « Et non dividitur secundum formam » idest speciem, ponitur ad differentiam eorum quæ habent partes diversas in forma, idest in specie; sicut manus, cujus partes sunt caro et ossa, quæ differunt secundum speciem : sed elementum non dividitur in partes diversas secundum speciem, sicut aqua, cujus quælibet pars est aqua : non enim oportet ad esse elementi, ut non dividatur per quantitatem, sed sufficit si non dividatur secundum formam : et si etiam nullo modo dividatur, dicitur elementum, sicut litteræ sunt elementa dictionum. Patet ergo ex dictis quod principium aliquo modo est plus quam causa; et causa, in plus quam elementum. Et hoc est quod dicit Commentator in V *Metaph.*

Viso autem quod sunt quatuor genera causarum, sciendum est quod non est impossibile quod idem habeat plures causas, ut idolum cujus causa est cuprum et artifex; artifex ut efficiens, cuprum autem ut materia. Nec est impossibile ut idem sit causa contrariorum : sicut gubernator est causa salutis navis et submersionis; sed hujus per suam absentiam, illius per suam præsentiam, ut dicit Philosophus II *Phys.* Sciendum est etiam quod non est impossibile ut aliquid idem sit causa et causatum, non quidem respectu ejusdem, sed diversimode : ut ambulatio est aliquando causa sanitatis ut efficiens, sed sanitas est causa deambulationis ut finis. Deambulatio enim est aliquando causa sanitatis, et propter sanitatem : et etiam corpus est materia



animæ, anima vero forma corporis. Efficiens vero dicitur causa respectu finis, cum finis non sit in actu nisi per operationem agentis : sed finis dicitur causa efficientis, cum efficiens non operetur nisi per intentionem finis : unde efficiens est causa illius quod est finis, ut puta deambulatio, ut sit sanitas ; non tamen facit finem esse finem. Et ideo non est causa causalitatis finis, idest non facit finem esse causam finalem : sicut medicus facit sanitatem esse in actu, non tamen facit quod sanitas sit finis. Finis etiam non est causa illius quod est efficiens, sed est causa ut efficiens sit efficiens : sanitas enim non facit medicum esse medicum ; et dico de sanitate quæ fit operante medico : sed facit quod medicus sit efficiens. Unde finis est causa causalitatis efficientis, qui facit efficiens esse efficiens : et similiter facit materiam esse materiam, et formam esse formam ; cum materia non suscipiat formam nisi propter finem, et forma non perficiat materiam nisi per finem. Unde dicitur quod finis est causa causarum, quia est causa causalitatis in omnibus causis : materia etiam dicitur causa formæ, inquantum forma non est nisi in materia : et similiter forma est causa materiæ, inquantum materia non habet esse in actu nisi per formam : materia enim et forma dicuntur relative ad invicem, ut dicitur II *Physicor.* Dicuntur etiam relative ad compositum sicut pars ad totum, et sicut simplex ad compositum ; et similiter compositum dicitur ad partes. Sed quia omnis causa, inquantum est causa, est naturaliter prior suo causato, sciendum est quod prius dicitur duobus modis, ut dicit Aristoteles in III *De anima* : per quorum diversitatem potest dici aliquid prius et posterius respectu ejusdem, et causa et causatum. Dicitur enim aliquid prius altero generatione et tempore, et iterum substantia et complemento. Cum enim operatio naturæ procedat ab imperfecto ad perfectum, et ab incompleto ad completum ; imperfectum est prius perfecto scilicet generatione et tempore, sed perfectum est prius imperfecto substantia : sicut potest dici quod vir est ante puerum secundum substantiam et complementum, sed puer est ante virum generatione et tempore. Sed licet in rebus generabilibus imperfectum sit prius perfecto, et potentia actu, considerando quod in uno et eodem prius est imperfectum quam perfectum,

et potentia quam actus ; simpliciter tamen loquendo, oportet actum et perfectum prius esse : quia quod reducit potentiam ad actum, actu est ; et quod perficit imperfectum, perfectum est. Materia quidem est prior forma generatione et tempore : prius est enim id cui aliquid advenit, quam id quod advenit : sed forma est prior materia substantia et complemento, quia materia non habet esse complementum nisi per formam. Similiter etiam efficiens est prius fine generatione et tempore, cum ab efficiente fiat motus ad finem ; sed finis est prior efficiente inquantum est efficiens, substantia et complemento, cum actio efficientis non compleatur nisi per finem. Ergo istæ duæ causæ, scilicet materialis et efficiens, sunt prius per viam generationis ; sed forma et finis sunt prius per viam perfectionis. Et notandum quod duplex est necessitas : absoluta et conditionalis. Necessitas quidem absoluta est quæ procedit a causis prioribus in viam generationis, quæ sunt materia et efficiens ; sicut necessitas mortis quæ provenit ex materia et dispositione contrariorum componentium ; et hæc dicitur absoluta quia non habet impedimentum ; dicitur etiam necessitas materiæ. Necessitas autem conditionalis procedit a causis posterioribus in generatione, scilicet forma et fine : sicut dicimus quod necessarium est esse conceptionem, si debeat generari homo : et ista dicitur conditionalis, quia hanc mulierem concipere non est necessarium simpliciter, sed sub conditione, scilicet si debeat generari homo : et hæc dicitur necessitas finis. Et notandum quod tres causæ possunt incidere in unum, scilicet forma, finis, et efficiens : sicut patet in generatione ignis : ignis enim generat ignem ; ergo ignis est causa efficiens inquantum generat : et iterum ignis est causa formalis, inquantum facit esse actu quod prius erat in potentia : et iterum finis est, inquantum terminantur ad ipsum operationes agentis, et inquantum est intentus ab agente. Sed duplex est finis : scilicet generationis, et rei generatæ ; sicut patet in generatione cultelli : forma enim cultelli est finis generationis ; sed incidere, quod est operatio ipsius cultelli, est finis generati, scilicet cultelli. Finis autem generationis coincidit cum duabus dictis causis aliquando : scilicet quando fit generatio a simili in specie, sicut homo generat hominem, et oliva

olivam, quod non potest intelligi de fine rei generatæ. Sciendum tamen quod finis incidit cum forma in idem numero : quia est idem numero quod est forma generati et finis generationis; sed cum efficiente non incidit in idem numero, sed in idem specie : impossibile est enim ut faciens et factum sint idem numero, sed possunt esse idem specie : unde quando homo generat hominem, homo generans et generatus sunt in numero diversi, sed idem specie. Materia autem non coincidit cum aliis, quia materia ex eo quod est ens in potentia, habet rationem imperfecti, sed aliæ causæ cum sint actu, habent rationem perfecti; perfectum autem et imperfectum non coincidunt in idem.

Viso ergo quod quatuor sunt causæ, scilicet efficiens, formalis, materialis et finalis, sciendum est quod quælibet ipsarum causarum dicitur multis modis. Dicitur enim aliquid causa per prius, aliquid causa per posterius; sicut dicimus quod ars et medicus sunt causa sanitatis; sed ars est causa per prius, et medicus per posterius : et similiter in causa formali, et in aliis causis. Et nota quod semper debemus ducere quæstionem ad causam primam : ut si quærat : Quare iste est sanus? Respondendum est quod medicus sanavit eum : et iterum, quare medicus sanavit eum? propter artem sanandi quam habet. Sciendum est etiam quod idem est dictum causa propinquior quod causa posterior : et causa remota quod causa prior. Unde istæ duæ divisiones causarum, aliqua per prius, aliqua per posterius, et causarum aliqua propinqua, aliqua remota, idem significant. Hoc autem observandum est quod semper illud quod universalius est causa remota : dicitur quod autem specialius, causa propinqua : sicut dicimus quod forma hominis propinqua est sua definitio, scilicet animal rationale, sed animal est magis remotum, et iterum substantia remotior. Omnia enim superiora sunt formæ inferiorum : et similiter materia idoli propinqua est cuprum, sed remota est metallum, et ideo remotior corpus. Item causarum alia est causa per se, alia per accidens : causa per se dicitur quæ est causa alicujus rei in quantum hujusmodi, sicut ædificator est causa domus, et lignum materia scamni; causa per accidens dicitur illa quæ accidit causæ per se, sicut dicimus quod grammaticus

ædificat. Grammaticus enim dicitur causa ædificans per accidens, non in quantum grammaticus, sed in quantum accidit ædificatori quod sit grammaticus : et similiter est in aliis causis. Item causarum quædam est simplex, quædam composita : simplex causa quando solum causa dicitur illud quod per se est causa, vel solum id quod per accidens est; ut si dicamus ædificatorem esse causam domus et similiter si dicamus medicum esse causam domus; composita autem causa est quando utraque dicitur causa; ut si dicamus ædificator medicus est causa domus. Potest etiam dici causa simplex secundum quod exponit Avicenna, illud quod sine adjunctione alterius est causa; sicut cuprum est causa idoli sine adjunctione alterius materiæ : ex cupro enim fit idolum; et sicut dicitur quod medicus facit sanitatem, vel quod ignis calefacit. Composita autem causa est, quando oportet plura advenire ad hoc quod sit causa : sicut unus homo non est causa motus navis, sed multi; et sicut unus lapis non est materia domus, sed multi. Item causarum quædam est actu, quædam potentia; causa in actu est quæ causat actum, ut ædificator dum ædificat, vel cuprum cum ex se fit idolum; causa in potentia est, quæ licet non causet rem in actu, potest tamen causare; sicut ædificator, non quod ædificet, sed quia potest ædificare, et cuprum dum non est idolum. Et sciendum quod loquendo de causis in actu, necessarium est causam et causatum simul esse, ita quod si unum sit, et alterum : si enim sit ædificator in actu, oportet quod ædificet; et si sit ædificatio in actu, oportet quod sit ædificator in actu. Sed hoc non est necessarium in causis quæ solum sunt in potentia. Sciendum est autem quod causa universalis comparatur causato universali, et causa singularis comparatur causato singulari, sicut dicimus quod ædificator est causa domus, et hic ædificator hujus domus. Sciendum est etiam quod loquendo de principiis intrinsicis, scilicet materia et forma, secundum convenientiam et differentiam principiatorum, et convenientiam et differentiam principiorum; quædam sunt idem numero, ut Socrates et hic homo demonstrato Socrate; quædam sunt diversa numero et idem specie, sicut Socrates et Plato, qui licet differant numero, conveniunt tamen in specie humana; quædam vero differunt in spe-

cie, sed sunt idem genere, sicut homo et asinus conveniunt in genere animalis; quædam vero non sunt diversa in genere, sed sunt idem solum secundum analogiam, sicut substantia et quantitas, quæ non conveniunt in aliquo genere, sed conveniunt solum secundum analogiam: conveniunt enim solum in eo quod est ens. Ens autem non est genus, quia non prædicatur univoce sed analogice. Et ad hujus intelligentiam sciendum est quod tripliciter aliquid prædicatur de pluribus: scilicet univoce, æquivoce et analogice. Univoce quidem prædicatur aliquid secundum idem nomen et secundum eandem rationem, idest definitionem, sicut animal prædicatur de homine et asino: utrumque enim dicitur animal, et uterque est substantia animata sensibilis quod est definitio animalis. Æquivoce prædicatur quod prædicatur de aliquibus secundum idem nomen, et secundum diversam rationem: sicut canis dicitur de latrabili et de sidere cœlesti, qui conveniunt in nomine, et non in definitione neque significatione: id enim quod significatur per nomen, est definitio, sicut dicitur IV *Metaph.* Analogice dicitur prædicari, quod prædicatur de pluribus quorum rationes et definitiones sunt diversæ, sed attribuuntur uni alieni eidem: sicut sanum dicitur de corpore animalis, et de urina et potione, sed non ex toto idem significat in omnibus tribus: dicitur enim de urina ut de signo sanitatis, de corpore ut de subjecto, de potione ut de causa; sed tamen omnes istæ rationes attribuuntur uni fini, scilicet sanitati. Aliquando enim ea quæ conveniunt secundum analogiam et proportionem et comparisonem, attribuuntur uni fini, sicut patuit in prædicto exemplo sanitatis; aliquando uni agenti, sicut medicus dicitur de eo qui operatur sine arte ut vetula, et etiam de instrumentis, sed per

attributionem ad genus quod est medicina; aliquando autem per attributionem ad unum subjectum, ut ens dicitur de substantia, quantitate, qualitate, et aliis prædicamentis: non enim ex toto est eadem ratio quia substantia est ens, et qualitas, et omnia alia. Sed omnia dicuntur ens ex eo quod attribuuntur substantiæ, quæ est aliorum subjectum. Et ideo ens dicitur per prius de substantia, et per posterius de aliis. Et ideo ens non est genus substantiæ et aliorum prædicamentorum, quia nullum genus prædicatur secundum prius et posterius de suis speciebus, sed ens prædicatur analogice: et hoc est quod dicimus quod substantia et quantitas differunt genere, sed sunt idem secundum analogiam. Eorum ergo quæ sunt idem numero, etiam forma et materia sunt idem numero, sicut Tullii et Ciceronis. Eorum autem quæ sunt idem specie diversaque numero, materia et forma non eadem sunt numero, sed specie, sicut Socratis et Platonis: et similiter eorum quæ sunt idem genere, ut anima et corpus asini et equi differunt specie, sed sunt idem genere: et similiter eorum quæ conveniunt secundum analogiam sive proportionem tantum, principia quidem sunt eadem secundum analogiam tantum, sive proportionem. Materia enim et forma et privatio, sive potentia et actus, sunt principia substantiæ et aliorum generum. Tamen materiæ, substantiæ et quantitatis, et forma similiter et privatio differunt genere; sed conveniunt secundum proportionem solum in hoc quod sicut materia substantiæ se habet ad substantiam in ratione materiæ, ita se habet materia quantitatis ad quantitatem: sicut tamen substantia est ceterorum causa, ita principia substantiæ sunt principia omnium<sup>1</sup> aliorum.

<sup>1</sup> Parm. : « omnia. »

# OPUSCULUM XXVIII.

## DE NATURA MATERIÆ ET DIMENSIONIBUS INTERMINATIS.

(EDIT. ROM. XXXII.)

### CAPUT I.

*In quo ostenditur per motus quæ sit natura materiæ, et qualiter non requiruntur dimensiones interminatæ, ut posuit Averroes, nec sunt formæ unius rei<sup>1</sup>.*

Postquam de principiis sermo habitus est, remansit plenius naturam materiæ considerare. Sciendum est ergo quod ad materiam causalitas creaturæ non se extendit, quia actio creaturæ super aliud fundatur. Materia autem non habet subjectum aliquod de quo per actionem educi possit, quia materiæ non est materia. Unde materiæ non est generabilis nec corruptibilis : quia omne quod generatur, ex materia generatur : et quod corrumpitur, in materiam corrumpitur ; quia materia est principium primum ex quo aliquid fit, et ultimum in quod abit quod corrumpitur, secundum Philosophum in I *Phys.* Unde ipsa non nisi ex nihilo producit, et non nisi in nihilum desinere potest. Sicut autem ex nihilo creatura non potest aliud producere, ita ex subtractione virtutis creatæ corrumpitur aliquid in nihilum. Creatura ergo materiam causare non potest. Et quia omne agens physicum mediante instrumento corporeo agit, actio autem quæ per motum exercetur motus est ; ideo actio omnis agentis physici in motu est. Motus autem in mobili est ut in subjecto, sicut dicitur III *Phys.*

Materia autem mobilis non est, quia in omni eo quod movetur, necesse est materiam imaginari, ut dicitur II *Metaphysic.* Omne enim mobile habet partem et partem, materia autem non habet partem nisi sub quantitate. Subjectum ergo actionis physicæ erit mobile in quantum actu existens. Unumquodque vero mobile movetur motu proprio per qualitatem sibi inhærentem, quæ est sibi principium passivum sui motus, cujusmodi sunt gravitas et levitas in motu locali : his enim qualitibus inest virtus generantis ad motum localem in istis inferioribus : inde est quod quandoque hæ qualitates dicuntur principia activa motus in quantum sunt instrumenta generantis, quod est movens principale gravium et levium : quandoque vero passiva, in quantum sunt effectus generantis : effectus enim rationem passivi habet, quia per passionem subjecti efficitur, de quo educitur. Quædam enim agentia non solum proprios effectus causant, sed etiam simul sua instrumenta ; ut generans ignem non solum causat motum ejus, sed ad motum ejus facit leve in igne : unde leve quandoque activum, quandoque passivum principium motus dicitur. Hæ autem qualitates mobilium non possunt esse qualitates primæ, quia solum ordinantur ad ea quæ sunt extranea rei, ad motum scilicet localem, per quem non acquiritur rei aliqua forma substantialis. Et ideo necesse est aliquas qualitates præcedere in re, quæ sunt ins-

<sup>1</sup> Parm. : « cap. I. quod materia prima non potest nisi per creationem in esse produci, et

quod ipsa est primum subjectum in generatione physica. »

trumenta generantis in acquisitione formæ substantialis. Hanc enim necesse est præcedere omnem motum localem ipsius, quia motus localis requirit quantitatem in mobili, et partem et partem. Forma autem substantialis omnem quantitatem præcedit; actio autem generantis in productione formæ substantialis est alteratio, cujus terminus est spoliatio materiæ a forma prioris et inductio novæ formæ: et sic corruptio unius est generatio alterius. Quoniam ergo alteratio est actio physica, actio autem physica per instrumentum corporeum perficitur, ut dictum est, et omnis talis actio per motum exercetur; ideo alteratio cujus terminus est generatio, requirit subjectum actu existens, ut mobile grave vel leve; alteratio autem motus est, ut dicitur *V Physic.* Quia ergo in termino cujuslibet motus quædam quies invenitur secundum naturam ipsius motus, ut in motu locali est quies secundum locum terminans ipsum motum; in motu autem dealbationis, quies est ipsa albedo terminans ipsam dealbationem; ideo in fine dealbationis quies est inductio formæ substantialis. Alteratio ergo per quam spoliatur materia priori forma, in se requirit subjectum actu existens, quia ipsa motus est, ut dictum est: in suo autem termino non requirit subjectum actu existens. Terminus autem ejus est generatio. Unde generatio non requirit subjectum nisi in potentia tantum. Hoc autem solum manet in generatione, quia subjectum necessario manet cum eo cujus est subjectum. Quoniam ergo generatio non est motus, sed mutatio, ut dicitur *V Physic.*, cum generatio sit terminus actionis physicæ, scilicet alterationis, quæ propter naturam motus requirit semper subjectum actu existens; materia quæ est subjectum generationis, nunquam est sine forma: ideo agens in cujus actione non oportet præcedere aliquem terminum actionis, potest ex materia aliquid educere sine alteratione aliqua, sive ex nihilo, sive aliquo motu præsupposito. Actio namque sua cum non sit motus, neque terminus motus, ens in potentia tantum transmutare potest subito sine ulla alteratione præcedente: quia tempus non requiritur, quod mensuret actionem rei naturalis, nisi propter motum adjunctum: unde

non foret necessarium materiam uniri formæ per actionem divinam, cui subiceretur forma unita, sed per actionem physicam, quæ non attingit ens in potentia tantum, sed in suo termino ubi cessat motus. Ex termino ergo actionis physicæ sumi potest via ad naturam materiæ inquirendam, sicut facit Philosophus in *I Physic.*

Considerandum est <sup>1</sup> ergo quod terminus actionis physicæ est duplex: scilicet primus et secundus. Primus est generatio, quæ est terminus alterationis physicæ. Secundus vero est forma, quæ est finis generationis; licet non semper vi generationis inducatur forma, quæ est finis generationis: sicut patet de anima humana quæ non introducitur per agens physicum: unde primus terminus actionis physicæ in generatione humana est dispositio sufficiens ad introductionem animæ, quæ a Philosopho dicitur generatio in *II Physic.*, quia homo generat hominem et sol. Proprie vero generatio est quando forma ex natura generantis generato adjungitur; quod fit quando principium actionis non excedit modum agendi in nulla sua virtute, sicut patet de omnibus formis materiæ immersis: tales enim formæ non secundum aliquid sui sunt principium agendi, quasi aliquid sui sit non immersum materiæ, aliquid vero immersum; sed omnino sunt principium actionis rerum quarum sunt formæ: ideo ex vi actionis fit aliquid simile in specie in genere talium rerum. Sed anima hominis excedit modum actionis suæ et generationis, quia anima hominis non est forma materiæ penitus immersa: generativa enim potentia hominis non est tota virtus animæ humanæ, sed una pars ejus quæ conditiones materiæ non excedit. Et ideo in generatione hominis non attingitur ad idem specie ex vi generationis sicut in aliis: quantumcumque enim materia secundum naturam disponatur ad animam humanam, Deus tamen posset eam non creare. Ex generatione ergo quæ est primus terminus actionis physicæ, accipi potest quæ sit natura materiæ. Cum enim non requiratur aliquod subjectum actu in actione physica nisi propter motum, sicut de alteratione dictum est, et subjectum necesse sit manere in toto

<sup>1</sup> Hic incipit in Parm. cap. II.



motu; sequitur necessario, quod quamdiu est aliquid de natura alterationis et motus, subjectum esset in actu. Cum vero motus alterationis deficit, deficit subjecti actualitas. Hæc autem est in ejus termino qui est generatio. Unde in generatione necessario tota actualitas subjecti alterati peribit. Solum ergo ens in potentia manet in generatione. Ens autem in potentia est materia solum. Et ideo materia nuda est subjectum generationis. Cum ergo materia impediatur cognitionem, et unumquodque non cognoscatur nisi secundum quod est actu, ut dicitur IX *Metaph.*; ideo materia non est scibilis nisi in ordine ad formam, ut dicit Philosophus I *Phys.*; ideo formam per prius oportet cognoscere et per eam requirere naturam materiæ: forma enim est terminus actionis physicæ, ut dictum est. Sciendum est ergo quod in termino cujuslibet motus nihil est in isto quod per motum derelinquitur, sicut in termino motus localis nihil est de loco a quo incipit motus localis; et in termino dealbationis nihil est de nigro, a quo incipit dealbatio. Cum ergo alteratio ab actu formæ substantialis incipiat, et ipsum compositum alteretur alteratione materiæ ad denudandam ipsam ab omni actu quem prius habebat, ut dictum est; in termino ejus necessario denudabitur ab actu primo quem habebat: primum enim in constitutione est ultimum in resolutione. Hoc autem est actus formæ substantialis. Quod ergo manet derelictum a forma substantiali, hoc est materia; quia per actionem creaturæ non devenimus in nihil, ut dictum est. Sic ergo per formam cognoscibilis est materia.

Sciendum<sup>1</sup> autem quod tria sunt genera formarum. Quædam enim est forma quæ est ipsum suum esse, et non recipitur ab aliquo priori, nec communicatur alicui posteriori; et talis forma est Deus. Et ideo ipse solus est infinitus absolute. Aliæ vero sunt formæ, quæ licet non sint receptæ in materia, tamen non sunt ipsum suum esse, cum in eis cadat compositio essentiæ et esse; et ideo ex una parte sunt finitæ, et ex alia infinitæ: finiuntur enim secundum suum esse sursum terminatum ab alio, sed non deorsum, cum non recipiantur in aliquo inferiori. Et hæc est doctrina Commenta-

toris in lib. *De causis*. Aliæ autem sunt formæ, quæ undique sunt finitæ, quæ et esse aliunde habent, quod est commune omni creaturæ: nihilominus recipiuntur in aliqua materia. Inter quas tamen est magna differentia; quia quanto minus in materia immerguntur, tanto minus finiuntur: et ideo anima humana quodammodo est omnia, ut dicitur III *De anima*. Eo enim quod non immergitur materiæ sicut aliæ formæ, remanet in ea quædam infinitas. Unde intellectus ad plura se extendit, sensus vero ad pauciora: nec propter hanc majorem ejus extensionem spargitur ad multa, sed magis unitus remanet in acceptione plurimum intelligibilium, quam sensus in paucis sensibilibus; et hoc est propter unitatem majorem medii per quod ipsa cognoscit, quod est magis unum quam medium quo perficitur sensus cognitio. Ex his ergo constat et manifestum est, quod formæ in se acceptæ unitæ sunt et non dispersæ. Cum vero in materia recipiuntur, et ei immerguntur, patiuntur divisionem in sui natura. Et ideo, cum species formam sequatur; in formis separatis a materia non est differentia suppositorum vel multitudo in eadem specie seu ratione formali: sed quodlibet suppositum unite colligit in se totam suam speciem; in formis vero in materia receptis, una species reperitur in multis suppositis. Sed hoc non est a natura materiæ qualitercumque acceptæ: cum materia sit de natura specierum in rebus materialibus: sed hoc est per receptionem formæ in materia secundum quod est subjectum primum. Cum enim subjectum in aliqua specie, seu aliqua pars subjectiva sit prima substantia, quæ individuum dicitur; illud quod tenet rationem primi subjecti est causa individuationis et divisionis speciei in suppositis. Primum autem subjectum est quod in alio recipi non potest. Et ideo formæ separatæ, eo ipso quod in alio recipi non possunt, habent rationem primi subjecti. Et ideo seipsis individuantur. Et cum in ipsis non sit nisi forma, est in eis forma secundum rationem formæ. Et ideo cum in eis sit idem suppositum et forma, ex quo seipsis individuantur, inquantum habent rationem primi subjecti; ad multiplicationem suppositorum,

<sup>1</sup> Hic incipit in Parm. cap. III.

multiplicatur in eis forma secundum rationem formæ secundum se, et non per aliud, quia non recipiuntur in alio. Omnis autem talis multiplicatio multiplicat speciem : et ideo in eis tot sunt species quot sunt individua. In aliis vero formis ubi est multitudo formæ per receptionem in alio quod habet rationem primi subjecti, et non secundum rationem formæ, manet eadem species in diversis suppositis. Hoc autem recipiens est materia, non qualitercumque accepta, ut dictum est, cum ipsa sit de intellectu philosophicæ speciei; sed secundum quod habet rationem primi subjecti, et signatio ejus est esse sub certis dimensionibus, quæ faciunt esse hic et nunc ad sensum demonstrabile. Ad hanc igitur divisionem formæ non requiritur in materia dimensio aliqua interminata : materia enim est principium individuationis, ut est primum subjectum, ut dictum est, et solum sic : quamdiu enim manet aliquid ulterius receptibile, non invenitur ultimum quod in nullo natum est recipi ; si autem sint dimensiones interminatæ, necessario erunt in materia ut in subjecto. Materia autem cum tribus dimensionibus non est primum subjectum, sed secundum se et in natura sua : per quem modum non pertinet ad naturam speciei, sed prout est in acceptione intellectus, cujus est determinationem seu intentionem speciei percipere. Cum ergo forma recipitur in materia circumscriptis omnibus per intellectum dimensionibus, fit aliquid existens in genere substantiæ et ultimum, completam habens rationem individui in substantia. Sed non fit hic et nunc demonstrabile sine dimensionibus determinatis et certis, quæ habere necesse est, eo quod forma recipitur in materia : cum impossibile sit eam recipi in materia, quin constituatur corporalis substantiæ <sup>1</sup>, sub cujus propria figura sunt dimensiones ipsæ. Et ideo dicitur quod materia sub certis dimensionibus est causa individuationis : non quod dimensiones causent individuum, cum accidens non causet suum subjectum ; sed quia per dimensiones certas demonstratur individuum hic et nunc, sicut per signum proprium individui et inseparabile.

Ex <sup>2</sup> dictis ergo patet quod Averrois er-

ravit in libro *De substantia orbis* ponendo dimensiones interminatas præesse in materia, et hoc necessario ad productionem formarum substantialium : cujus ratio potissima est de divisione, quia diversæ formæ non possunt recipi in eadem parte materiæ, nec materia habet partem et partem nisi per quantitatem, nec potest quantitas terminata intelligi, nisi præcesserit forma substantialis : ideo dicit Philosophum posuisse dimensiones interminatas necessarias ad constitutionem rerum naturalium, et has præexistere in essentia materiæ, quæ in adventu formæ substantialis terminantur. Essentiam vero materiæ dicit spoliari non posse his dimensionibus, aliter non fieret de corpore corpus et de dimensionibus dimensiones quod ipse pro inconvenienti habet. Si vero est aliqua forma quæ non dividitur per materiæ receptionem, sicut forma cæli ; non est necesse ponere tales dimensiones. Et ideo dicit Avicennam errasse, quia non posuit tales dimensiones, sed voluit primum quod inest materiæ, esse formam substantialem ; et ideo multa inconvenientia sequuntur ex dictis Avicennæ secundum Commentatorem : quia sic non divideretur forma per materiam, nec reciperetur in materia nisi forma una tantum, et illa duraret in ea perpetuo. Hæc est opinio Averrois de dimensionibus interminatis : contra quem rationes ponere necesse est, ut verus modus generationis rerum inveniatur : posterius vero, quomodo impossibile et inconveniens est ponere dimensiones interminatas ostendere : sic enim credimus intentionem nostram posse impleri. Arguitur itaque sic. Prædictæ dimensiones quæ essentialiter quantitates sunt, etsi non actu ad genus quantitatis pertineant, aut sunt eductæ de potentia materiæ ei subjectæ, aut non. Si sunt eductæ de potentia materiæ : ergo prius ibi non erant in materia nisi in potentia materiæ per modum aliquorum quæ de potentia materiæ educuntur. Spoliari ergo potest materia talibus dimensionibus ; cujus contrarium ipse dicit. Et iterum quod deducitur de potentia materiæ, educitur per transmutationem materiæ. Non autem est transmutatio in materia nisi transendo de potentia materiæ in actum formæ substantialis. Oportet igitur tales dimensio-

<sup>1</sup> Parm. : « corpus substantiæ » sed in notula : « an : corporalis substantia. »

<sup>2</sup> Hic incipit in Parm. cap. iv.

nes sequi inductionem alicujus formæ substantialis in materia. Sed omnes dimensiones quæ sequuntur formam, sunt terminatæ, secundum eundem. Igitur non erunt dimensiones interminatæ eductæ de potentia materiæ. Si vero non sunt eductæ de potentia materiæ, non erunt tantum duo principia in constitutione rerum naturalium, materia scilicet et forma; sed etiam tertium, scilicet dimensiones prædictæ. Omne enim quod manet, et non fit ex aliquo, necesse est esse principium, ut dicitur I *Phys.* Et iterum accidentia habent aliqua alia principia a principiis substantiæ, scilicet dimensiones prædictas quod ipse Commentator habet pro se, dicens dimensiones terminatas fieri ex interminatis. Præterea, illæ dimensiones interminatæ aut distinguunt partes materiæ ab invicem, aut non. Si distinguunt, cum omnis distinctio sit ab aliquo actu, materia haberet distinctas partes actu, et non ab aliqua forma substantiali; quod est impossibile, cum materia non habeat esse nisi a forma substantiali. Si vero non distinguunt nisi in potentia, ad nihil ponuntur in materia, quia in materia nuda est potentia ad distinctionem partium quam acquirit introducta forma quod est totum compositum ex diversis partibus. Præterea, in substantiis prius est intelligere essentias rerum quam esse earum, sicut recipiens prius est recepto naturaliter. Sed cum accidentia non habeant esse in suis essentiis, sed per eorum receptionem in suis subjectis, in quibus habent esse; naturaliter prius est esse quod habent in suis subjectis, quam essentia in consideratione sui generis. Impossibile est ergo dimensionum essentias intelligere in materia sine esse. Esse autem est primum omnium actuum. Ergo sine actu non est intelligere dimensiones in materia. Præterea, aut fit unum ex dimensionibus interminatis et ex materia, aut non. Si fit unum, aut per se, aut per accidens: non per se, quia tunc ex subjecto et accidente fieret unum per se quod est contra Philosophum; si per accidens: cum omne per accidens ad per se habeat reduci, ergo oportet præexistere aliqua, ex quibus fiat unum per se. Hoc autem non est nisi compositum ex materia et forma substantiali. Necessario ergo præexistit forma substantialis quibuscumque dimensionibus. Si non fiat unum ex materia et talibus dimensionibus, tunc esse

accidentis connumerabitur illi in quo est: quod est impossibile, nisi essent duo distincta ab invicem. Non ergo erunt dimensiones interminatæ in materia ante formam substantialem. Præterea, omne quod pertinet ad genus aliquod, aut est contentum in illo genere, ut est species vel genus vel individuum: vel est reducibile in illud genus, ut principium reducitur ad genus principiati, et privatio ad genus sui habitus, et pars ad genus sui totius. Prædictæ autem dimensiones non sunt in genere quantitatis ut species vel individuum, cum omnis species sit denominata seu determinata respectu sui generis, et individuum respectu speciei. Nec sunt in genere quantitatis, ut principium est in genere sui principiati: principium enim dimensionum non est dimensio: prima enim dimensio est linea, ejus principium est punctus, qui omni dimensione caret, cum partem et partem non habeat. Cum ergo quædam indivisibilia sint propria omnium dimensionum terminatarum, impossibile est ponere dimensiones interminatas in materia ut principia dimensionum terminatarum. Nec sunt reducibiles in genere quantitatis ut privationes, quia privationes non habent essentias; illæ autem dimensiones essentiæ quædam dicuntur. Non reducuntur etiam sicut partes ad totum: totum enim in quantitate habet partes determinatas per certas dimensiones, quantitates autem interminatæ non sunt partes alicujus quantitatis terminatæ. Præterea quod habet essentiam, definiiri potest, etsi esse non habeat, quia definitio indicat essentiam rei. Sed in accidentibus impossibile est definitionem assignare nisi per subjectum in quo esse habent, quia esse eorum non sequitur eorum essentias in proprio genere. Impossibile est ergo ponere essentias accidentium sine esse sui subjecti. Materia autem non habet esse sine forma. Impossibile est ergo ponere dimensiones in materia sine forma substantiali. Præterea interminatum aufert certitudinem a quantitate: sed in qualibet re naturali est certitudo quantitatis posita, ultra quam et citra quam non extenditur consideratio physica secundum Philosophum II *De anima*: unde nec de materia loquitur Philosophus, cum accipitur aliquid citra minimam carnem, ut patet I *Physic.*, sed est tantum metaphysica, sive intelligibilis: quia eum de ea loquitur Philosophus, accipit eam in or-

dine ad formam physicam, quæ est semper terminata. De dimensionibus ergo interminatis nihil ad naturalem spectat. Ipse tamen Commentator dicit Philosophum eas invenisse, non considerans quod Philosophus extendit considerationem suam usque ad mathematicam tamquam ad terminum non sui generis : unde dimensio interminata excluditur a consideratione physica, et non includitur in ea. Præterea, secundum Philosophum I *Physic.*, si generatur homo, de necessitate generatur homo animal ex non hoc animali, et non ex non animali simpliciter ; sed si generaretur animal simpliciter, de necessitate generaretur ex non animali simpliciter. Et hæc est sufficiens ratio ad ostendendum res a Deo esse productas ex nihilo, cum sit causa entis absolute quod necessario erit ex non ente simpliciter. Hoc autem est nihil. Cum ergo dimensiones simpliciter sint dimensiones terminatæ et perfectæ, necessario erunt ex non dimensionibus simpliciter. Hoc autem est nihil ante dimensiones, et hoc ipse Commentator pro inconvenienti habet. Præterea principium omnium dimensionum est punctus : unde in definitione lineæ, quæ est prima dimensio, punctus ponitur : linea enim est cujus extrema sunt duo puncta, ut dicit Euclides. Impossibile est autem ponere rem aliquam, et non rei principium. Impossibile est igitur lineam sine puncto poni. Punctus autem sicut est principium lineæ, sic est ejus terminus, ut patet per definitionem lineæ. Impossibile est ergo dimensionem interminatam ponere, cum nulla possit esse sine puncto. Punctus autem interminatus non est, cum ipse sit terminus aliarum dimensionum. Ergo interminatus non est nec esse potest. Præterea, cum dimensio interminata fiat terminata per introductionem formæ, ipsa autem dimensio interminata aut est in materia sicut in subjecto, aut in composito. Sed in materia non potest poni, cum nihil sit immediatius materiæ quam forma substantialis : nec iterum foret hæc dimensio mensura ipsius compositi, sed materiæ tantum ; quantitas enim solum est mensura sui subjecti ; et hoc est falsum : nec erit in ipso composito, quia, cum terminatum et interminatum non varient essentiam dimensionum, idem accidens per

essentiam mutaretur de subjecto in subjectum : aliud enim est ipsum compositum, et aliud materia nuda. Ex dictis ergo manifestum est quod dimensiones interminatas in materia ponere, et præcedere omnem formam substantialem, est impossibile, nisi intellectu tantum, sicut ponunt mathematici. Sed de hoc posterius erit sermo.

## CAPUT II <sup>1</sup>.

*In quo ostenditur qualiter res constituitur ex materia et forma.*

Nunc vero restat modum constitutionis rei considerare. Ubi primo attendendum est quod nihil est commune penitus formæ et privationi nisi materia nuda : quia terminus actionis physicæ, scilicet generatio, attingit nudam essentiam materiæ, quia generatio non est motus, ut dictum est : alteratio vero non attingit nudam essentiam materiæ, cum nullum accidens sit præter suum subjectum. Subjectum autem alterationis est ens actu habens diversas partes, quia alteratio motus est qui requirit diversitatem partium. Nos enim loquimur de ea quæ semper est abiciens aliquid a re alterata ; talis enim alterationis terminus est generatio. Materiam autem habere diversas partes secundum se est impossibile, quia diversitas partium proprie est ipsius compositi constituti ex partibus diversis : unde materia sicut est in potentia ad formam, cujus acquisitio est generatio compositi ex partibus constituti, ita est in potentia ad diversitatem partium ipsius compositi ex ea generati : ex materia enim non generatur forma per se secundum Philosophum, quia illud ex quo generatur aliquid per se, est pars ejus. Materia autem non est pars formæ, sed ipsius compositi : ideo compositum per se generatur, ut dicitur VII *Metaph.* Compositum autem dicitur quod habet diversas partes. Unde diversitas partium non est materiæ, nec formæ, sed compositi. Compositum autem est nihil aliud esse, quam materiam transmutari ad formam, ad quam erat in potentia. Ex quo manifestum est quod non aliunde materia est in potentia ad partes termi-

<sup>1</sup> Parin. : « caput v... qualiter res naturales generantur generatione physica ex materia ; et

de modo constitutionis rei. »



natas et distinctas, quam per id quod est in potentia ad formam, cujus inductio est generatio compositi ex partibus, ut dictum est. Et ex hoc ulterius manifestum est quod nulla potentia ponenda est a parte materiæ, nisi illa quæ perficitur per formam substantialem; cum ad idem genus spectent materia et sua forma. Potentia autem in qua prædictæ dimensiones ponuntur, non informatur forma substantiali, cum ad idem genus substantiæ non pertineat. Impossibile est ergo ponere aliquam aliam potentiam ex parte materiæ respectu formæ substantialis, et respectu diversarum partium ipsius compositi generati per inductionem formæ in materiam. Et ideo manifestus est error Averrois, qui posuit dimensiones interminatas in materia potentiam quamdam ad dimensiones terminatas, aliam potentiam materiæ respectu formæ substantialis: et de hoc satis dictum est supra. Quando ergo aliqua forma substantialis perficit materiam; sicut potentia materiæ est reducta per formam ad actum; ita per illud idem esse permutatur ad distinctionem et terminationem partium totius compositi: in forma enim substantiali non solum est vis perfectiva materiæ, sed etiam distinctiva totius per partes. Et huic necesse est respondere a parte materiæ potentiam, quæ respiciat ipsam perfectionem suam per formam, et etiam partium sequentium diversitatem. Ad cujus evidentiam considerandum est quod si tota materia activorum et passivorum attenditur, invenitur ejus potentia in quadam latitudine esse, quæ nihil aliud est quam amplitudo proportionis suæ ad omnes formas quæ in ea simul esse possunt: si enim possibile esset ipsam totam spoliari et denudari ab omni forma quam modo habet, certum est quod nihil diversitatis in ea reperiretur in aliqua partium distantia, cum quantitas sine forma substantiali in materia esse non possit, ut dictum est; sed non propter hoc aliquid de potentia receptibilitatis formarum, quæ de ea educi possunt, si simul de ea omnes formæ quæ modo in speciali inveniuntur, per agens sufficiens educerentur. Si vero aliqua particularis materia, puta ignis vel aeris a sua forma spoliaretur, manifestum est in ipsa non relinqui tam amplam potentiam ad formas de ea educibiles, sicut invenitur in materia in sua universalitate; unde nec tot formæ sensibiles, nec tanta quantitas de

ea educerentur per quodcumque agens sola sua potentia transmutata ad actum. Patet ergo quod diversæ formæ simul in materia recipi possunt, ut sunt quatuor formæ elementares, et diversæ formæ mixtorum ex amplitudine proportionis materiæ ad suas formas, et non ex aliqua diversitate præexistente in materia per aliquam quantitatem. Unde ad susceptionem diversarum formarum, si est necesse in materia præexistere aliquam diversitatem partium, et subsequi necesse est; et hoc ideo quia inductio diversarum formarum est generatio diversorum compositorum habentium partes et formas diversas, ut dictum est. Præcedit tamen in materia necessario proportio capacitatis, quam scire non possumus, nisi secundum quod videmus in ea simul plures formas, sicut in tota materia, vel unam tantum, sicut in materia alicujus particularis. Unde ponere qualemcumque partitionem a parte materiæ, quasi necessariam ad inductionem diversarum formarum simul, et hanc præexistere, sequitur imaginationem quæ ponit formas dari ab extra; quæ cum in se diversitatem habeant per suam naturam, sequi videtur materiam diversitatem partium habere per naturam quantitatis ad suscipiendas diversas formas, cum in una parte recipi non possint. Sed cum formæ non educantur ab extra, sed educantur de potentia materiæ per ejus transmutationem, secundum Philosophum; materia autem sit illud quod est in potentia ad formas substantiales quæ sunt actus ejus: impossibile est quamcumque partitionem ante formam substantialem in ea ponere, cum inductio formæ sit generatio compositi, cujus solum est habere partes per se: materia autem et forma non habent partes per se, sed tantum per accidens: unde non dividitur nisi per accidens, ad divisionem scilicet totius. Ex quo manifestum est quod priusquam compositum constitueretur, nulla partibilitas fuit ex parte materiæ, cum hoc non competat sibi nisi per accidens. Ex dictis ergo manifestum est quod ratio Commentatoris non cogit ponere dimensiones interminatas necessario præcedere vel præesse in materia ad inductionem formarum substantialium diversarum, cum aliud possit esse ratio sufficiens, ut dictum est. Deceptus autem fuit ex consideratione materiæ particularis, ad cujus similitudinem locutus est de tota materia. Videmus



enim quod in materia in re particulari habet reperiri duplex totum : scilicet totum essentialis, et totum quantitatis ; et istud totum non debetur materiæ nisi per accidens : et similiter est de forma rei particularis. Materia autem secundum totalitatem suæ essentialis est in qualibet parte rei, non autem secundum totalitatem quantitatis : et similiter est de forma rei particularis : tota enim forma ignis secundum totalitatem suæ essentialis est in qualibet parte suæ materiæ, cum tota definitio ignis cuilibet parti ejus conveniat, non autem respiciendo totum quantitatis suæ. Quantum autem ad formas particulares sciendum est quod anima humana non est quanta secundum se, nec secundum accidens. Per hunc ergo modum opinatus est Averroes ipsam materiam in sua universalitate secundum totum essentialis suæ in qualibet re particulari esse, quæ est pars totius ex materia generati. Et ideo posuit in ea quantitatem secundum se totam, ut per quantitatem diversificetur per accidens, et non esse tota totalitate quantitatis in qualibet re particulari, in qua tamen esset tota totalitate essentialis. Sed cum de materia non sit loquendum nisi in ordine ad formam suam secundum Philosophum, manifestum est non esse simile de forma in universali et in particulari : forma enim in universali est quidquid in materia vel de materiæ potentia potest educi. Manifesta est ergo differentia, quia forma particularis tota secundum suam essentialitatem est in qualibet parte materiæ, et materia similiter sub qualibet parte formæ, ut dictum est : tota autem forma in universali etiam secundum totalitatem essentialis non est in qualibet parte materiæ : alioquin in materia quæ est sub forma aeris, esset essentialis formæ ignis, et omnium aliorum quæ de materia generantur : unde necessario propter proportionem materiæ ad formam tota materia in communi secundum totum essentialis suæ non erit sub forma unius eorum quæ generantur de materia. Itæ ergo totalitas materiæ est ipsa proportio capacitatis suæ essentialis ad formam, et non aliqua diversitas introducta per ullam quantitatem. Sicut enim forma in quadam amplitudine essentialis consistit, in qua comprehenditur quidquid de materia

educi potest ; ita secundum propriam rationem materiæ corruptibilium invenitur amplitudo capacitati ejus correspondens, ut dictum est : aliter enim ex materia in qualibet re particulari totum posset generari quod generatur ex tota materia : quod manifeste est falsum esse, cum ex minimo quod potest esse in igne, nulla alia forma educi possit.

### CAPUT III.

*In quo ostenditur qualiter possunt concedi dimensiones interminatæ<sup>1</sup>.*

Nunc ergo restat ostendere quomodo possibile sit dimensiones ponere, et quomodo possunt dici interminatæ. Ad cujus evidentiam sciendum est quod quidam alio modo et rationabilius eas posuerunt, quam Averrois. Dixerunt enim quod forma secundi generis, scilicet corporis, adveniens materiæ, dat materiæ quoddam esse incompletum ordinabile ad esse actu completum quod advenit materiæ per unam aliam formam perfectiorem. Per istam ergo formam incompletam dicunt in re esse tres dimensiones interminatas, quæ postea terminantur ad adventum alterius formæ perfectioris. Et pro tanto rationabilius dixerunt isti quam Averrois, quia non posuerunt materiam nudam subjectum aliquarum dimensionum, sed compositum ex materia et forma substantiali. Sed isti iterum erraverunt : quia impossibile est ponere plures formas substantiales ordinabiles ad invicem in materia ; quia materia est in potentia ad formas quæ de ea educuntur. Si ergo essent plures formæ substantiales ordinabiles ad invicem in materia, forma completior aut educeretur de potentia nuda materiæ, aut de potentia totius compositi ex materia et tali forma incompleta. Sed non educitur de potentia totius compositi ex materia et tali forma : quia, sicut dictum est, terminus actionis physicae, scilicet generatio, attingit nudam essentialitatem materiæ. Cum ergo forma, quæ est terminus actionis, sit tantum illius subjecti quod attingitur per generationem simpliciter, impossibile est quod talis forma completa educatur de potentia talis compositi ex materia et forma

<sup>1</sup> Parm. : « caput vi. — Quid sunt dimensiones

interminatæ secundum veritatem. »

incompletea : unde necesse est ponentes plures formas ordinatas ad invicem destruere generationem simpliciter, et consequenter necesse est ponere omnes formas præter unam, scilicet primam, esse accidentia. Si autem forma posterior educitur de potentia nuda materiæ; omnis autem forma substantialis solum illam potentiam informat de qua educitur : ergo formam quam dicunt posteriorem, non erit perfectio talis compositi, sed materiæ nudæ tantummodo; et sic non erit ordo in formis substantialibus in eadem materia commanentibus, et hoc idem dicitur VII *Metaph.* Sciendum est ergo quod omnes dimensiones sunt accidentia quæ sequuntur materiam in ordine ad formam quam primo materia nata est induere; hæc autem est forma corporis, quia totam materiam necesse est sub forma corporis contineri. Quod non est intelligendum quod sit una creata vel increata forma corporis, qua prima materia primo informetur : quia secundum Commentatorem materia prima primum habilitatem habet ad formas elementares, et postea ad formas mixtorum. Ex quo manifestum est quod eadem est forma corporis simplicis cum forma elementi et mixti corporis : sed oportet primo quod per has formas constituatur genus corporis, deinde specierum perfectarum. Materia namque in quidditate sua indivisibilis est penitus : ablata enim quantitate substantia manet indivisibilis, ut dicitur I *Phys.* Sed ex corporeitate quam sequuntur dimensiones quantitatis in actu, sequitur divisio materiæ, per quam materia ponitur sub diversis sitibus; et secundum hoc acquiruntur in ea diversæ formæ. Ordo enim in situ corporum ostendit nobilitatem eorum; sicut ignis est supra aerem. Hæc autem acquisitio formarum non ostendit ordinem temporis, sed naturæ. Patet ergo quod dimensiones interminatæ non trahunt originem a quocumque gradu quem facit forma ignis in igne, sed solum a primo. Nihilominus ignis secundum totum est subjectum dimensionum, secundum totum etiam mensuratur, et idem necessario invenitur in formis corporum mixtorum. Sed considerandum est quod in mixtis corporibus quædam formæ trahuntur de potentia materiæ, quædam non, ut hominum animæ quæ divisionem

nullo modo patiuntur, cum non sint dimensionatæ nec per se, nec per accidens. Formæ enim quæ nullo modo sunt eductæ de potentia materiæ, nullo modo divisionem recipiunt etiam in materia existentes. Unde animæ humanæ aliter terminant ordinem materiæ ad dimensiones, quam formæ quæ de materia educuntur. Cum enim accidentia inseparabilia oriuntur a principiis rei, in ipsa re constituta in actu erunt accidentia ut in subjecto. Si autem forma rei sit educta de materia ipsa, quam sequuntur dimensiones, ipsa forma erit, non tamen semper, sed ut in pluribus, dimensionata et divisibilis per accidens; sicut est in lapide et in ligno, in quibus dimensiones redeunt semper super formam ipsarum rerum. Si vero forma non sit educta de materia, non redeunt dimensiones super formam; et ideo anima hominis omnino indivisibilis est. Patet ergo quod anima hominis non terminat ordinem materiæ ad formam in acquirendo dimensiones actu nisi altero modo tantum, scilicet constituendo eas in actu; et hoc est in hoc homine, in quo sunt ut accidentia in subjecto. Ordo vero materiæ in acquirendo dimensiones non redeunt super formam, solum terminatur per formam quæ de ea educitur. Nec propter hoc minus potest anima humana quam alia forma : quia hoc accidit illi formæ in quantum educta est de materia; quod non est de ratione formæ ut forma est : aliter omnis forma educeretur de materia quod est falsum. Quidquid enim potest forma imperfectior ut forma est, potest anima humana, et amplius. Quia ergo dimensionalitas formæ potentiam sonat et non actum, possibile est ponere ordinem materiæ ad talem formam terminari in potentia, et dimensiones in potentia sequi ordinem materiæ ad ipsam formam. Et quia dimensio dicit formam propinquam actui, sive ipsi esse quod per dimensionem acquiritur; ideo dimensiones sequuntur materiam in ordine ad formam, quæ est in maxima propinquitate ad actum, qui est esse. Nec propter hoc erunt diversæ essentiæ dimensionum in eadem re : quia unum et idem potest simul esse in actu in uno ordine, et in potentia in alio ordine<sup>1</sup>.

Ex his ergo facile est scire, quomodo dimensiones possunt dici interminatæ.

<sup>1</sup> Hic incipit in Parm. caput VII.

Sicut enim essentiæ rerum terminantur per sua esse, quæ sunt in rebus maxime formalia; antequam vero essentiæ dicantur, non considerantur in actu, nec terminatæ; sic dimensiones prædictæ sunt indeterminatæ antequam dicantur esse in actu: et licet actu sint in homine ut in subjecto, in quo habent rationem mensurandi quod est eis proprium, cum esse actu habent; tamen habent esse in potentia, et non sunt actu in illo ad quod dependent secundum originem, ut in subjecto, et ut redeunt super formas utroque modo antequam ipsum actu fuerit, nec mensurant illud, et quia nihil habet propriam mensuram quod nondum habet proprium esse. Cum autem corrumpitur homo, succedit forma dans novum esse, et hæc erat forma in ordine ad quam dimensiones ipsæ sequebantur, ut ad materiam vel formam redeunt: unde eadem dimensiones sunt in vivo et in mortuo per essentialiter, quia idem ordo manet in materia et ad eandem formam, sed secundum esse actu non manet nisi in quadam æqualitate, et idem est de aliis accidentibus quæ sequuntur mixtionem elementorum, ut album et nigrum; quæ non remanent in mortuo quoad ipsum esse actu nisi eorum similitudo quædam. Essentiæ vero huiusmodi accidentium non aliter auferuntur nisi destructa origine ipsa cui immobiliter inhærent, et contrahuntur ad esse actu cum materia quam sequuntur in ordine prædicto ad formam unde homo est homo. Et ideo hæc accidentia non migrant derelinquendo suum subjectum, quia quod a subjecto acceperunt, in subjecti corruptione corrumpitur; et ideo respectu esse actu posterioris subjecti a quo etiam ordinem seu originem habent, indeterminatæ erant dimensiones in vivo, terminantur autem cum acquirunt esse actu tali subjecti, ad quod pendunt secundum radicem, unde sunt propria ejus mensura etiam homine mortuo. Ex dictis ergo manifestum est necesse esse ponere essentialiter alicujus formæ in homine sine esse, per cujus naturam dictæ dimensiones manent prædicto modo; de quo in sequentibus agetur. Manifestum est etiam subjecto eodem manente dimensiones easdem manere, et ipso corrupto redigi in materiam eandem, de qua ite-

rum eadem numero educi non possunt per naturam: unde si per naturam eadem specieeductæ essent, non forent aptæ trahi ad esse actu ejusdem animæ; si tamen per miraculum educuntur eadem numero, natæ erunt ad eundem actum animæ recipi. Ex quo patet quod idem homo numero resurget et non alius, cum omnia sua principia redeant ad invicem eadem numero. Anima enim humana simpliciter eadem numero manet post mortem cum plenitudine virtutum suarum ad perficiendum materiam in omni gradu eodem quo prius eam perfecit. Etiam materia manet eadem numero, cum ipsa sit incorruptibilis. Easdem etiam dimensiones necesse est manere in materia, licet non nisi in potentia; aliter agens physicum easdem numero produceret: quod falsum est. Manent ergo in potentia materiæ eadem numero respectu agentis divini, quia aliter non foret idem numero individuum, cum dimensiones agant ad individuationem, ut supra dictum est; et ideo ex eadem materia et eisdem dimensionibus cum anima eadem resurget idem homo numero et non alius.

#### CAPUT IV.

*In quo ostenditur quomodo possibile sit ponere formam in homine sine esse.*

Nunc restat ostendere, quomodo possibile sit essentialiter alicujus formæ ponere in homine, sic quod ad eam non sequatur esse substantiale: hoc enim supposuimus superius. Ad huius ergo evidentiam considerandum est quod proprium est substantiæ esse simpliciter: unde generatio quæ terminatur ad formam, sive esse substantiæ, est generatio simpliciter; proprium vero per accidens est esse secundum quid, sicut generatio rei sub forma accidentali, est generatio secundum quid; esse autem simpliciter est esse absolutum non dependens ab esse alterius sicut ei inhærens, licet omnia dependeant a Deo sicut a causa prima. Sic autem aliquid continet perfectam rationem essendi, secundum quod perfecta ratio essendi reperitur in eo, ut in substantia, ut dicitur VI *Metaph.* Ad

<sup>1</sup> Parm.: « caput viii. — Quomodo in homine sunt plures formæ secundum essentialiter, sed una

tantum secundum esse. »

istud ergo esse absolutum participandum accedunt partes substantiæ, per quod trahuntur ad genus sui totius. Esse vero accidentis dependens est per modum inhærentis : unde accidentia non trahuntur in genus illius cui inhærent. Ex quo patet differentia inter esse partis alicujus totius et esse accidentis. Esse autem alicujus totius absolutum aliquando est proprius effectus Dei ; scilicet quando tota res secundum omnia principia sua deducitur ex nihilo ad esse perfectum, sicut fuit in prima productione rerum, in qua causalitas Dei extendebatur usque ad ipsam materiam ; quandoque vero esse est effectus creaturæ, scilicet quando agens physicum agit ex suppositione subjecti, non producens totum illud quod pertinet ad esse rei, sed formam tantum, transmutando materiam ad talem vel talem formam : ad materiam enim actio creaturæ non se extendit, ut supra dictum est : in hoc enim convenit agens divinum cum agente physico, quia utrumque ad esse absolutum terminat actionem suam quod est ultimum transmutationis sive simplicis emanationis ; licet in simplici emanatione non sit prius et posterius, nisi secundum intellectum tantum. Cum ergo tale esse absolutum sit terminus utriusque actionis, ut dictum est : materia autem non est esse ut subjecti quod est esse absolutum, nec etiam formæ materialis, cum ipsa non sit habens esse, licet sit quo aliquid est ; et neutra actio terminatur ad materiam, vel formam materialem, sed ad esse compositi, cujus est per se et absolute subsistere : de intellectu enim ejus est habere esse quod non est de ratione et intellectu essentiæ. In tali enim composito necessario est compositio duplex, suppositi scilicet et essentiæ, quæ in re materiali differunt necessario, cum individuum in materialibus multa addat supra naturam speciei, quæ essentiæ tantum complectitur ; et ideo alia est compositio totius rei et sui esse. In rebus vero immaterialibus creatis tantum altera compositio invenitur, rei scilicet et esse. In ipsis ergo non est essentia habens esse per aliquid quod realiter a se differat, cum idem sit essentia et res quæ significatur ut habens esse ; ideo essentia in eis est non tamquam principium tantum quo aliquid dicitur esse, sed sicut habens esse absolutum non inhærens. In substantiis vero compositis et materialibus, in quibus

essentia realiter differt a supposito, essentia non habet esse nisi per suppositum, cujus est esse simpliciter et absolutum : unde essentia in eis non est ut habens esse, sed ut reductum ad esse per suppositum aliquod individuum, cujus est habere esse absolutum, ad quod terminatur actio producentis. Cum ergo forma materialis sit ad quam non sequitur aliquod suppositum vel individuum, cujus est habere esse absolutum ad quod terminetur actio producentis, ut dictum est ; possibile erit ponere formam aliquam substantialem sine esse, sicut possibile est ponere id quod est principium sine relatione principii et sine principiatio. In immaterialibus vero non est hoc invenire, cum in eis non sit essentia quæ non sit suppositum : unde posita essentia in eis necessario ponitur esse quod est suppositum. Ad constitutionem autem suppositi materialis sive individui, quantitas terminata requiritur, quæ ubicumque fuerit, tale individuum necessario erit, cum ipsa sit proprium et inseparabile signum individui, ut supra dictum est. Omnes autem formæ elementares terminatas quantitates requirunt et diversas ab invicem : unde ubicumque fuerit forma elementaris, necessario erit suppositum, cujus est habere esse completum et terminatam quantitatem : unde formæ elementares non possunt in essentiis suis simul esse in una re : ut patet in lib. *De generat. et corrupt.* In mixtis autem rebus in quibus forma non educitur de materia quantitatis, non sequitur materiam in ordine ad talem formam, licet esse actu per eam in re habeat, ut dictum est cum quantitas semper respondeat illi principio, vel redeat in principium a quo originem sumpsit. Anima autem hominis non est quanta per se nec per accidens, ut dictum est. Unde non repugnat in tali re ponere essentiæ formæ a qua dependeat quantitas secundum originem, sive cum esse quod se habeat ad illam formam ut principium ad principiatum. Unde tali essentiæ formæ ratio actus non convenit, sicut nec materiæ, cum esse sit actus communis et primus non solum materialium, sed etiam formarum ; unde sine esse forma non dicitur actus. Solum enim natura substantialis esse in substantiis impedit duas formas substantiales simul esse in eadem materia, quia esse simpliciter : unde quod advenit tali esse est accidens necessario.



Esse etiam substantiæ habet se sicut unitas rei, quia unum et ens convertuntur: unde una res non potest habere duo esse, substantialia, nisi amittat unitatem suam; unde in re composita ex substantia et accidente non est unitas nisi secundum quid. Nihil ergo contradictionis sustinebimus, si posuerimus in re aliquas formas, ad quas tamen non sequatur esse simpliciter. Solum enim per naturam ipsius esse simpliciter quod in substantia reperitur, simpliciter impeditur pluralitas formarum substantialium ejusdem rei. Unde certum est, et a Philosopho ostensum quod impossibile est plura esse substantialia in una re ponere, sed solum forma ad quam esse sequitur, in re ipsa ponitur; aliæ vero ei non connumerantur. Quomodo autem hoc intelligi possit, diligenter considerandum est in rerum progressu. Sciendum est igitur quod materia est in potentia ad omnes formas quæ de ea educi possunt: unde quanto ad plures earum simul accedit, tanto plus perficitur ejus potentia. Et ideo in elementis materia est minime perfecta, quia solum unica forma unius elementi perficitur simul: et si quandoque virtus formæ alterius elementi sibi adsit, hoc non est per modum manentis, sed per modum alterantis, sicut patet quando calor ignis agit in aere ad inductionem formæ ignis. In corporibus vero mixtis magis perfecta est materia: ibi enim cum una forma mixti quæ dat esse, sunt omnes formæ elementorum, virtute tamen et non in essentia, quia quælibet illarum requirit debitam quantitatem et terminatam, ut dictum est: unde cum unum sit suppositum mixti et esse unum, una est forma ejus. Supposita autem mixta quædam sunt animata, et præcipue homo ejus forma non producit ex materia disposita per qualitatem mixti; unde conveniens est, ut in animatis sint essentiæ aliquarum formarum sine esse: hoc enim est propinquissimum in quo animata possunt transcendere simpliciter mixta, scilicet perficiendo suam materiam in acquisitione plurium formarum simul, sicut videmus quod alio modo fit simplex ex mixtis et alio modo ex materia prima, in qua nihil est de actu formæ educendæ antequam fiat, sicut in aere non est aliquid de forma phialæ, antequam phiala fiat; et in ligno similiter nihil est de lecto, antequam fiat: sic enim se habet materia prima ad ea quæ ex ea fiunt,

sicut se habet argentum ad statuum et lignum ad lectum ut dicitur I *Phys.* In mixto vero manent formæ miscibilium secundum virtutem, secundum Philosophum. Virtus autem ad actum pertinet. Et ideo in mixto est unde agatur ad generationem alterius miscibilium, secundum quod virtus unius miscibilium vincit proportionem, in qua salvatur forma mixti; unde corrupto mixto generatur corpus simplex: in hac namque transmutatione fit spoliatio omnium quæ erant ipsius mixti, nec aliquid manet nisi materia prima tantum. Sed in generatione ipsius mixti non fit spoliatio simplicium usque ad materiam primam: aliter virtutes simplicium non manerent in mixto. Nunc autem manent. Unde non est corruptio simpliciter, per quam fit generatio compositi, cum elementa non corrumpantur penitus, sicut dicitur I *Meteor.*, quia eorum est mixtio quorum est separatio; non enim miscentur nisi ea quæ apta sunt per se existere: idem enim est de materia disposita per aliquam alterationem factam circa ipsam et mixto: tunc enim virtus formæ inducenda est in ea potentia. « Unde potentia sua non est jam adeo remota ab actu formæ, sicut ante alterationem: ante namque alterationem ipsa materia erat in potentia remota ab actu; inchoata vero alteratione, incipit potentia appropinquare actui, sicut vincente altero miscibilium appropinquatur ad actum simplicis elementi. Cum vero alteratio magis ac magis intenditur, plus et plus ad actum acceditur: unde completa alteratione, materia est in actu constituta. Alia igitur est potentia materiæ nudæ et nondum alteratæ a potentia mixti, in qua est virtus alterativa: unde hæc est propinquior actui quam illa et perfectior, quia magis procedit ad suum actum. Si igitur foret in mixto forma elementi simplicis, quod est impossibile, sicut supra ostensum est, statim unico virtutis suæ actu foret per se existens: esse enim est propinquissimum essentiæ formæ, licet ab invicem differant in materialibus. Ideo licet propinquior sit potentia materiæ in qua sunt miscibilia in mixto actui suo quam potentia materiæ nudæ, in qua nihil de actu est; alteratione tamen indiget ad hoc quod hæc potentia actui suo jungatur: unde miscibilia in mixto tunc sunt in potentia maxime appropinquata actui, quando mixtum est in optima sui proportionem: sed tunc



maxime elongata sunt ab actu suo in tali genere; non tamen tantum distant, sicut potentia materiæ nudæ. Potentia autem in qua sunt partes organicæ ad esse per se, est in majori propinquitate ad esse seorsum, quam sit potentia ipsius mixti: quia, sicut dicitur VII *Metaph.*, partes animatorum sunt in potentia propinqua actui eorum proprio per separationem a toto: quod verum est de toto etiam in imperfectissimo gradu suo manente. Unde quandoque virtus alterativa quæ in rebus invenitur animatis in quantum mixtæ sunt ex quatuor primis corporibus, minime agit; scilicet quando elementa maxime ducta sunt ad medium; ut est in homine, in quo inter omnia mixta maxima est elongatio a contrarietate: adhuc tamen partes animatorum sunt in potentia maxime distante a suo termino. Ex quo concluditur quod hæc propinquitas non est per dispositionem materiæ per alterationem aliquam, cujus terminus sit inductio novæ formæ per essentiam.

Essentia vero formæ noviter induci non potest nisi recedente alteratione, cujus terminus est productio formæ de novo. Constat tamen quod in parte a toto separata sit forma substantialis. Unde, cum impossibile sit duo esse substantialia in eadem re ponere, ut supra dictum est; nec per aliquam alterationem præcedentem pars est in potentia in suo toto maxime propinqua actui, nec forma de novo inducitur nisi per alterationem: unde nec cælum quod est agens universale respectu istorum inferiorum, nec aliquod particularium agentium aget nisi alteret: et ideo cælum est primum alterans secundum Philosophum. Necessario ergo sequi videtur aliquam formam in parte rei sine esse ponere, et ideo partem esse in potentia maxime propinqua actui. Esse enim est maxime propinquum formæ, ut dictum est, quia non requiritur ad hoc quod esse substantiæ propriam sequatur formam, nisi quod res per se ponatur, quod unica actione fieri potest.

Ex <sup>1</sup> dictis ergo manifestum est triplicem esse potentiam differentiam, in qua aliquid dicitur esse: scilicet potentia materiæ, in qua nihil est de illo quod de potentia educitur. Secunda est potentia mixti, vel materiæ quæ est in alteratione, in qua licet non sit essentia formæ indu-

cendæ, est tamen virtus. Tertia est potentia totius, per quam partes sunt in toto quæ est maxime actui proprio propinqua secundum Philosophum: unde in eis nihil est sicut agens ad proprium actum, sicut est quando harmonia est perfecta, necessario erunt essentiæ formarum prope sua esse. Hoc autem facilius scietur, si gradus et ordo rerum naturalium diligenter discutatur. Sciendum igitur quod communissimus unitatis modus reperitur in rebus materialibus, quæ est unitas continuitatis; in omnibus rebus materialibus hæc unitas reperitur. Primum namque accidens quod sequitur materiam, est quantitas. Super hanc unitatem reperitur in diversis rebus unitas suæ propriæ formæ: in quibusdam quidem magis, in quibusdam vero minus perfecte, ut habetur IV *Metaph.* Unitas continuitatis in re reperta maxime potentialis invenitur, quia omne continuum est unum actu et multiplex in potentia: sicut partes lineæ non sunt aliqua duo actu, sed unum: ipsa vero linea est duo in potentia, et facta divisione fit duo actu, sola enim divisio continui facit esse actu: unde in divisione lineæ non inducitur aliquid novi in ipsis divisis; sed eadem essentia lineæ quæ prius erat actu una, et multiplex in potentia, per divisionem facta est multa in actu. Est tamen hic similitudo ejusdem corruptionis: quia actus prior qui erat totius, ablatum est, et potentia ducta est ad actum posteriorem per divisionem solam. Consimile penitus reperitur in lapide, et in igne, et in omnibus corruptibilibus et generabilibus inanimatis: forma enim totius in eis, per quam habent quamdam unitatem suæ naturæ super unitatem quantitatis, secundum totam rationem formæ est in qualibet parte talium rerum. Unde facta divisione manet essentia ejusdem formæ in partibus ab invicem divisis: quælibet enim pars ignis est ignis, et quælibet pars lapidis est lapis. Est tamen in istis divisionibus quædam similitudo corruptionis et generationis; non quod novæ formæ per divisionem talium inducantur; sed quia esse, sive actus prior aufertur per divisionem ipsam, et potentia ducitur ad actum proprium. Super hæc autem sunt animata imperfecta, ut plantæ, et quædam animalia imperfecta, ut sunt

<sup>1</sup> Hic incipit in Parm. caput ix.

animalia anulosa; et in ipsis idem invenitur: quia cum avellitur ramus ab arbore, non advenit nova essentia vegetabilis, sed eadem essentia vegetabilis, quæ una erat in arbore tota, etiam actu uno, simul erat multiplex in potentia, et per divisionem novum esse perdit, et actus alius et alius secutus est. Similiter est in animalibus anulosis una anima in actu et unum esse, sed multiplex in potentia accidentali: unde facta divisione, remoto actu priori et unitate actus sunt multa in actu. Et sic facile est videre quando essentia alicujus formæ est in potentia accidentali ad esse quod tamen nondum habet: et hoc totum contingit propter imperfectionem talium formarum; quia, cum sint sub uno actu, simul sunt sub potentia multiplici respectu esse diversorum, quæ acquiruntur eis sine aliqua corruptione in suis essentiis, sed sola divisione. In animalibus vero perfectis, præcipue in homine, forma quæ est una in actu, non est multiplex in potentia, ut per divisionem constituatur eadem essentia formæ sub diversis esse, et sub diversis actibus; cum anima hominis non dividatur nec per se, nec per accidens, ut dictum est. Unde, cum in homine sit unitas ejusdem continuitatis, quæ manifestior est in carne sua et ossibus quam in aliis membris quæ sibi conjunguntur per naturam ipsam continuitatis, necessario erit alia essentia formæ in eo, quæ per solam divisionem a toto habeat esse actu. Hoc etiam in omnibus continuis invenitur. Hæc enim est forma respectu ejus quantitas sequitur materiam super ipsam formam rediens, ut supra dictum est: semper namque forma a qua quantitas secundum originem pendet, est divisibilis per accidens. Et hoc satis manifestum est: quia cum partes hominis sint in eadem propinquitate ad per se esse, sicut partes aliarum rerum perfectarum, sicut dictum est; ideo nulla nova essentia formæ introducitur per divisionem, sed esse novum acquiritur. Forma vero hominis dividi non potest, ut in ea acquirantur multa nova et diversa esse. Ideo necessaria erit in eo alia essentia formæ suæ ab essentia formæ quæ per divisionem solam esse acquirit. Sed in hoc est differentia inter animalia perfecta et imperfecta: quia in imperfectis non erat illa essentia sine esse simpliciter, licet esset sine esse acquisito per divisionem;

in perfectis vero erat sine esse simpliciter sibi debito, quia duo esse substantialia impossibile est simul ponere in una re, ut dictum est. Est etiam alia differentia a parte divisionis ipsius: quia cum dividi non possit nisi quod est actu quantum; quantitas autem in homine non est actu per formam respectu cujus sequatur materiam ut rediens super formam, sed per solam animam, a qua est totus actus qui est in homine: in igne vero et lapide quantitas est actu per formam, quam ipsa quantitas sequitur in materia: inde est quod divisio in homine est in quantitate actu per animam; sed quod efficitur per divisionem in esse acquisito, non est aliquid de essentia animæ secundum aliquid esse, sed est aliquid de essentia formæ originalis ipsius quantitatis, cui datur esse actu per divisionem. In rebus vero imperfectis divisio est in quanto actu, et hoc per formam ad quam sequitur ipsa quantitas, cui per divisionem aufertur unum esse actus prius habitum, et acquiruntur duo vel plura, sub quibus essentia ipsa dividitur, quæ prius erat una, secundum quam erat unum esse in re ante divisionem. Licet autem esset unum esse ante divisionem in rebus, nihilominus illa eadem essentia formæ erat in potentia actuali ad multa esse simul cum uno esse actu quod habebat, et ejus subjectum erat materia una et eadem numero. Et tamen constat quod alium respectum habet materia ad esse actu primum et alios respectus ad esse actu per divisionem acquisita, quibus tamen respectibus materiæ respondebat eadem essentia formæ ante ipsa esse actu. Licet enim potentia materiæ non differat ab eis secundum quod potentia dicit principium receptivum, differt tamen secundum quod dicit relationem materiæ ad formam. Et isto modo possunt esse in materia multi respectus, essentia tamen ejus manente una. Sicut ergo materia per unum respectum tantum habet unum esse, cum aliis tamen respectibus multa habet, essentiæ etiam formæ sine esse per divisionem acquisito respondente; ita sub forma perfecta, ejusmodi est anima humana, reperitur in materia hominis unum esse tantum, licet in eadem materia sint essentiæ aliarum formarum sine esse quod tamen eis sola divisione acquiritur. Hujus exemplum est reperire in linea et puncto. Protracta enim una linea, punctus qui eam

terminat : esse habet secundum quod illam lineam terminat : in ipso autem puncto sunt multi et diversi respectus, secundum quod potest esse terminus multarum linearum : sed per unum respectum impossibile est nisi unam lineam recipi in puncto. Unde per alias lineas quæ in eo recipiuntur simul cum linea prima protracta non acquiritur puncto aliquod esse in earum terminatione, nec illis non protractis minus haberet punctus esse in terminatione primæ lineæ. Per quem modum de materia et ejus respectibus imaginari possumus, cum ipsa in sui natura indivisibilis, et sine partibus sit omnino, ut punctus, licet in multis sint dissimilia. Secundum ergo unum respectum ejus esse, quasi per

unam lineam, impossibile est sibi inesse nisi unam formam quæ det sibi esse. Unde, cum prædicata substantiæ accipiuntur quasi in uno respectu, veluti cum ex una parte linea accipitur in puncto; impossibile est ut prædicata contenta in linea prædicamenti substantiæ per diversas formas prædicentur de Socrate, sed per unam et eandem. Secundum alios vero respectus quos habet de prope ad esse per se, sine tamen esse, poterit essentias formarum recipere. Mirabilis enim est potentia materiæ, nec sciri potest nisi cognoscendo ea quæ in ea esse habent, scilicet conferendo de formis quæ in ea esse habent, ut patet I *Physic.*

---

# OPUSCULUM XXIX.

## DE MIXTIONE ELEMENTORUM, AD MAGISTRUM PHILIPPUM.

(EDIT. ROM. XXXIII.)

Dubium apud multos esse solet, quomodo elementa sint in mixto. Videtur autem quibusdam quod, qualitatibus activis et passivis elementorum ad medium aliquo modo deductis per alterationem, formae substantiales elementorum maneat : si enim non remaneant, videtur esse corruptio quaedam elementorum, et non mixtio. Rursus si forma substantialis corporis mixti sit actus materiae non praesuppositis formis simplicium corporum, tunc simplicia corpora elementorum amittent rationem : est enim elementum ex quo componitur aliquid primo, et est in eo, et est indivisibile secundum speciem : sublatis enim formis substantialibus, non sic ex simplicibus corporibus corpus mixtum componetur, quod in eo remanent. Est autem impossibile sic se habere : impossibile est enim materiam secundum idem diversas formas suscipere elementorum. Si igitur in corpore mixto formae substantiales elementorum salventur, oportebit diversis materiae partibus eas inesse. Materiae autem diversas partes accipere est impossibile, nisi praesentem intellecta quantitate in materia : sublata enim quantitate, substantia remanet indivisibilis, ut patet I *Physic.* Ex materia autem sub quantitate existente, et forma substantiali adveniente, corpus physicum constituitur. Diversae igitur partes materiae formis elementorum subsistentes plurium corporum rationem suscipiunt. Multa autem corpora impossibile est simul esse. Non igitur in qualibet parte corporis mixti erunt quatuor elementa ; et sic non erit vera mixtio, sed secundum sensum, sicut accidit in congregatione

invisibilium sive insensibilium corporum propter parvitatem. Amplius, omnis forma substantialis propriam requirit dispositionem in materia, sine qua esse non potest : unde alteratio est via ad generationem et corruptionem. Impossibile est autem in idem convenire propriam dispositionem, quae requiritur ad formam ignis, et quae requiritur ad formam aquae, quia secundum tales dispositiones ignis et aqua sunt contraria. Contraria autem impossibile est simul esse in eodem adaequate. Impossibile est igitur quod in eadem parte mixti sint formae substantiales ignis et aquae. Si igitur mixtum fiat remanentibus formis substantialibus simplicium corporum, sequitur quod non sit vera mixtio, sed ad sensum solum, quasi juxta se positis partibus insensibilibus propter parvitatem. Quidam autem volentes utrasque rationes evitare, in majus inconveniens inciderunt. Ut enim mixtiones elementorum ab eorum corruptione distinguerent, dixerunt formas quidem substantiales elementorum remanere in mixto aliquo modo ; sed ne cogere dicere mixtionem ad sensum, et non secundum veritatem, posuerunt quod formae elementorum non remanent in mixto secundum suum complementum, sed in quoddam medium reducuntur : dicunt enim quod formae elementorum : suscipiunt magis et minus, et habent contrarietatem ad invicem. Sed quia hoc palam repugnat opinioni et dicti Philosophi dicentis in *Prædic.*, quod substantiae nihil est contrarium, et quod non suscipit magis et minus ; ulterius procedunt, et dicunt, quod formae elemen-

torum sunt imperfectissimæ, utpote materiæ primæ propinquiores : unde sunt mediæ inter formas substantiales et accidentales ; et sic, in quantum accedunt ad naturam formarum accidentalium, magis et minus suscipere possunt, licet habeant contrarietatem ad invicem. Hæc autem positio multipliciter est improbabilis. Primo, quia esse aliquid medium inter substantiam et accidens est omnino impossibile : esset enim medium inter affirmationem et negationem. Proprium enim accidentis est esse in subjecto, substantiæ vero in subjecto non esse. Formæ autem substantiales sunt quidem in materia, non autem in subjecto : nam subjectum est hoc aliquid ; forma autem substantialis est quæ facit subjectum hoc aliquid, non autem præsupponit illud. Item ridiculum est dicere medium esse inter ea quæ non sunt unius generis ; quia medium et extrema oportet ejusdem generis esse, ut probatur in X *Metaph.* Nihil ergo potest esse medium inter substantiam et accidens. Deinde impossibile est formas substantiales elementorum suscipere magis et minus. Omnis enim forma suscipiens magis et minus est divisibilis per accidens, in quantum scilicet potest eam subjectum participare magis et minus. Secundum id autem quod est divisibile per se vel per accidens, contingit esse motum continuum, ut patet in VI *Phys.* Est enim loci mutatio et augmentum et decrementum secundum locum et quantitatem quæ sunt per se divisibilia ; alteratio autem secundum qualitates quæ suscipiunt magis et minus, ut calidum et album. Si igitur formæ elementorum suscipiunt magis et minus, tam generatio quam corruptio elementorum erit motus continuus. Quod est impossibile : nam motus continuus non est nisi in tribus generibus, scilicet quantitate, qualitate, et ubi, ut probatur in V *Phys.* Amplius, omnis differentia secundum formam substantialem variat speciem. Quod autem suscipit magis et minus, differt ab eo quod est minus, et quodammodo est

ei contrarium, ut magis album et minus album. Si igitur forma substantialis ignis suscipit magis et minus, magis facta vel minus facta speciem variabit, nec erit eadem forma, sed alia. Hinc est quod dicit Philosophus in VIII *Metaph.*, quod sicut in numeris variatur species per additionem et subtractionem, ita in substantiis. Oportet ergo alium modum invenire, quo veritas salvetur mixtionis, et elementa non totaliter corrumpantur, sed aliquantulum in mixto permaneant. Considerandum est igitur, quod qualitates activæ et passivæ elementorum sunt ad invicem contrariæ, et suscipiunt magis et minus. Ex contrariis autem qualitatibus suscipientibus magis et minus constitui potest media qualitas, quæ utriusque sapiat extremi naturam, sicut pallidum inter album et nigrum, et tepidum inter calidum et frigidum. Sic igitur remissis excellentiis qualitatum elementarium, constituitur ex eis quædam qualitas media, quæ est propria qualitas corporis mixti, differens tamen in diversis secundum diversam mixtionis proportionem : et hæc quidem qualitas est propria dispositio ad formam corporis mixti, sicut qualitas simplex ad formam corporis simplicis. Sicut igitur extrema inveniuntur in medio, quod participat utriusque naturam ; sic qualitates simplicium corporum inveniuntur in propria qualitate corporis mixti. Qualitas autem corporis simplicis est quidem aliud a forma substantiali ipsius : agit tamen in virtute formæ substantialis : alioquin calor calefaceret tantum, non autem per ejus virtutem forma substantialis educeretur in actum ; cum nihil agat extra suam speciem. Sic igitur virtutes formarum substantialium simplicium corporum salvantur in corporibus mixtis. Sunt igitur formæ elementorum in mixtis non actu, sed virtute : et hoc est quod dicit Philosophus in I *De gener.* Non igitur manent elementa in mixto actu, ut corpus et album ; nec alterantur ambo nec alterum ; salvatur enim virtus eorum.



# OPUSCULUM XXX.

## DE OCCULTIS OPERIBUS NATURÆ AD QUEMDAM MILITEM.

SEU DE IMPRESSIONE CORPORUM CÆLESTIUM.

(EDIT. ROM. XXXIV.)

Quoniam in quibusdam naturalibus corporibus quædam naturales actiones apparent, quarum principia maxime apprehendi non possunt; requisivit a me vestra dilectio, ut quid super his mihi videatur, transcriberem. Videmus siquidem quod corpus elementorum in se dominantium motus sequitur; puta quod lapis movetur ad medium secundum proprietatem terræ dominantis in eo: metalla etiam secundum proprietatem aquæ habent frigidandi virtutem. Quæcumque igitur actiones et motum elementorum corporum sunt secundum proprietatem et virtutem elementorum, ex quibus talia corpora componuntur. Tales autem actiones et motus habent manifestam originem, de qua nulla emergit dubitatio. Sunt autem quædam operationes talium corporum, quæ a virtutibus elementorum causari non possunt: puta quod magnes attrahit ferrum, et quod quædam medicinæ quosdam determinatos humores purgant, et determinatis corporis partibus. Oportet igitur tales actiones in altiora principia reducere. Est autem considerandum, quod aliquod agens inferius secundum superioris agentis virtutem dupliciter agit vel movetur. Uno modo inquantum actio procedit ab eo secundum formam vel virtutem sibi impressam a superiori agente, sicut luna illuminata per lumen a sole receptum. Alio modo agit per solam virtutem superioris agentis nulla forma recepta ad agendum, sed per solum motum a supe-

rriori agente movetur, sicut carpentator utitur serra ad secandum. Quæ quidem sectio est principaliter actio artificis, secundario vero serræ inquantum ab artifice movetur: non quod talis actio sequatur aliquam formam vel virtutem quæ in serra remaneat post motionem artificis. Si quæ enim elementaria corpora a superioribus agentibus aliquas actiones vel motus participant, oportet altero dictorum modorum hoc esse: scilicet quod tales actiones consequantur aliquas formas vel virtutes impressas corporibus elementatis a superioribus agentibus, vel quod tales actiones consequantur solam motionem elementorum corporum a dictis agentibus. Superiora autem agentia, quæ naturam elementorum et elementorum excedunt, sunt non solum corpora cælestia, sed etiam superiores substantiæ separatæ. Ex utrisque autem aliquæ actiones vel motus in corporibus inferioribus inveniuntur, quæ non procedunt ab aliqua forma inferioribus corporibus impressa, sed solum ex superiorum agentium motione: aqua enim maris fluens et refluxus talem motum sortitur præter proprietatem elementi ex virtute lunæ, non per aliquam formam sibi impressam, sed ex lunæ motione, qua scilicet aqua movetur a luna. Apparent etiam quarumdam nigromanticarum imaginum quidam effectus, qui procedunt non ab aliquibus formis quas susceperint dictæ imagines, sed a dæmonum actione qui in dictis imaginibus operantur: quod quidem quando-

que contingere credimus operatione divina, vel bonorum Angelorum : quod enim ad umbram Petri Apostoli sanarentur infirmi, vel ad tactum reliquiarum alicujus sancti aliqua ægritudo pellatur, non fit per aliquam formam his corporibus inditam, sed solum per operationem divinam quæ his corporibus utitur ad tales effectus. Patet autem non omnes operationes corporum elementatorum occultas operationes habentium esse tales. Primo quidem, quia dictæ operationes quæ non consequuntur aliquam formam impressam, non inveniuntur communiter in omnibus quæ sunt ejusdem speciei : non enim omne os nec omnes reliquiæ sanctorum tangendo sanant, sed aliquorum, et aliquando : nec omnes imagines hujusmodi habent effectus, nec omnis aqua fluit et refluit secundum motum lunæ. Quædam vero operationes occultæ in quibusdam inveniuntur corporibus, quæ similiter inveniuntur in omnibus quæ sunt ejusdem speciei, sicut omnis magnes attrahit ferrum. Unde relinquitur tales operationes consequi aliquod intrinsecum principium commune habentibus hanc speciem. Deinde operationes, de quibus supra dictum est, non semper ex hujusmodi habitibus procedunt : cujus evidens signum est, quod non proveniunt ex aliqua virtute indita et permanente, sed solo motu alicujus superioris agentis ; sicut serra non semper secat lignum sibi conjunctum, sed solum quando ad hunc effectum ab artifice movetur. Quædam vero operationes occultæ sunt corporum inferiorum, quæ quancumque adhibentur suis passivis, similes effectus producent ; sicut rheubarbarum semper purgat determinatum humorem. Unde relinquitur, talem actionem provenire ex aliqua virtute insita et permanente in tali corpore. Restat autem considerare, quod sit istud principium intrinsecum permanens a quo tales operationes procedunt. Patet autem hoc principium potentiam quamdam esse : potentiam enim dicimus principium intrinsecum quo agens agit, vel patiens patitur ; quæ quidem potentia secundum quod refertur ad ultimum in quo aliquid potest, accipit nomen et rationem virtutis. Talis autem virtus quæ est talium actionum vel passionum principium, maxime ostenditur ex forma rei specifica derivari : omne enim accidens quod est alicujus speciei proprium, derivatur ex principiis essen-

tialibus illius speciei : et inde est quod ad demonstrandum proprias passiones de suis subjectis, accipimus pro causa definitionem designantem essentialia principia rei. Est autem essentiæ et quidditatis principium forma in determinata materia existens. Oportet igitur tales virtutes procedere a formis talium rerum secundum quod in propriis materiis existunt. Deinde, cum natura rei dicatur forma vel materia illius ; si qua virtus rei ab his non derivetur, non erit tali rei naturalis virtus, et per consequens nec actio vel passio a tali virtute procedens, erit naturalis. Tales autem actiones quæ sunt præter naturam, non sunt diuturnæ, sicut quod aqua calefacta calefacit ; actiones autem occultæ, de quibus nunc loquimur, eodem modo se habent semper, vel ut frequenter. Relinquitur ergo virtutes quæ sunt harum actionum principia, essentielles esse, et a forma procedere secundum quod in tali materia existit. Formarum autem substantialium Platonici quidem principium attribuebant in substantiis separatis, quas species vel ideas vocabant, quarum imagines dicebant esse formas naturales materiæ impressas. Sed hoc principium non potest sufficere. Primo quidem, quia oportet faciens simile esse facto. Id autem quod fit in rebus naturalibus, non est forma, sed compositum ex materia et forma ; ad hoc enim aliquid fit, ut sit : proprie autem esse dicitur compositum subsistens ; forma autem dicitur esse ut quo aliquid est. Non igitur forma proprie est id quod fit, sed compositum. Id igitur quod facit res naturales esse, non est forma tantum, sed compositum. Deinde formas absque materia existentes oportet immobiles esse, quia motus est actus existentis in potentia, quod primæ materiæ convenit : unde oportet quod semper eodem modo se habeant. A causa autem eodem modo se habente procedunt formæ eodem modo se habentes : quod quidem in formis inferiorum corporum non apparet propter generationem et corruptionem talium corporum. Relinquitur igitur quod principia formarum talium corporum corruptibilium sint corpora cœlestia, quæ diversimode se habentia secundum accessum et recessum, generationem et corruptionem causant in his inferioribus. Procedunt tamen tales formæ a substantiis separatis ut primis principiis, quæ mediante virtute et motu corporum cœ-

lestium imprimunt formas apud se intellectas in materiam corporalem. Et quia actiones et virtutes corporum naturalium ex formis specificis causari ostendimus; consequens est quod ulterius reducantur, sicut in altiora principia, in corpora cœlestia, vel in virtutes cœlestium corporum, et adhuc ulterius in substantias separatas intellectuales. Utrorumque autem horum principiorum vestigium quoddam apparet in ipsis naturalium rerum operationibus: nam quod talia naturæ opera fiant cum quadam transmutatione, et secundum certum cuiusdam temporis spatium, provenit ex corpore cœlesti, per cuius motum temporis mensura definitur. Sed a substantiis separatis intellectualibus invenitur in naturæ operationibus, quod determinatis viis ad determinatos fines, rerum ordine et congruentissimo modo procedunt, sicut et ea quæ fiunt ab arte: ita quod totum opus naturæ videtur opus esse cuiusdam sapientis, propter quod natura dicitur sagaciter operari. Opus autem sapientis oportet esse ordinatum: hoc enim proprie ad sapientem dicimus pertinere, ut omnia congruo ordine disponat. Quia igitur formæ inferiorum corporum proveniunt ex sapientia substantiæ separatæ mediante virtute et motu corporum cœlestium, oportet in his formis inferiorum corporum quemdam ordinem inveniri: ita scilicet, quod quædam sint imperfectiores et materiæ propinquiores, quædam autem perfectiores et proximiores superioribus agentibus: imperfectissimæ vero formæ et maxime materiæ propinquæ, sunt formæ elementorum, ex quibus inferiora corpora componuntur (a) materialiter: quæ quidem tanto sunt nobiliora, quanto a contrarietate elementorum magis recedentia, ad quamdam æqualitatem mixtionis accedunt; propter quam quodammodo assimilantur corporibus cœlestibus, quæ sunt ab omni contrarietate aliena. Illud autem quod est ex contrariis compositum, neutrum est actu contrariorum, sed potentia tantum. Et ideo, quanto talia corpora ad majorem æqualitatem mixtionis accedunt, tanto nobiliorem formam sortiuntur a Deo: quale est corpus humanum, quod est temperatissimæ mixtionis, ut probat bonitas tactus in hominibus, et nobilissimam formam habet, scilicet animam

rationalem. Virtutes autem et actiones oportet formis proportionari a quibus procedunt. Et inde est quod formas elementorum quæ sunt maxime materiales, consequuntur qualitates activæ et passivæ, puta calidum, frigidum, humidum, siccum et alia similia quæ pertinent ad materiæ dispositionem. Formæ vero mixtorum, scilicet inanimatorum corporum, puta lapidum, metallorum, mineralium, præter virtutes et actiones quas ab elementis participant ex quibus componuntur: quasdam alias virtutes et actiones nobiliores habent consequentes formas eorum specificas; puta, quod aurum lætificat cor, sapphyrus sanguinem constringit; et sic semper ascendendo, quanto formæ specificæ sunt nobiliores, tanto virtutes et operationes ex eis procedentes excellentiores existunt: intantum quod nobilissima forma, quæ est anima rationalis habet virtutem et operationem intellectivam, quæ non solum transcendent virtutem et actionem elementorum, sed etiam omnem virtutem et actionem corporalem. Ex extremis autem formis oportet de mediis iudicium sentire<sup>1</sup>. Sicut enim virtus calefaciendi et infrigidandi est in igne et aqua consequens proprias eorum formas; et virtus et actio intellectualis in homine consequens animam rationalem; ita omnes virtutes et actiones mediorum corporum transcendent virtutes elementorum, consequuntur eorum proprias formas, et reducuntur sicut in altiora principia in virtutes corporum cœlestium, et adhuc altius in substantias separatas. Ex talibus enim principiis formæ inferiorum corporum derivantur, excepta sola rationali anima, quæ ita ab immateriali causa procedit, scilicet a Deo, quod nullo modo causatur ex virtute corporum cœlestium; alioquin non posset habere virtutem et operationem intellectualem a corpore penitus absolutam. Quia igitur tales virtutes et operationes a forma specifica derivantur, quæ est communis omnibus individuis ejusdem speciei, non est possibile quod aliquod individuum alicujus speciei aliquam talem virtutem vel actionem obtineat præter alia individua ejusdem speciei, ex hoc scilicet quod est sub determinato situ corporum cœlestium generatum. Possibile tamen est quod in

<sup>1</sup> An. : « sumere ? »

(a) Hic in Cod. S. Vict. hoc opusculum explicit,

et legitur ad marg. : « De hoc tractatu deficit unum bonum folium. »

uno individuo ejusdem speciei virtus et operatio consequens speciem remissius vel intensius inveniatur secundum diversam dispositionem materiæ et diversum situm corporum cœlestium in generatione hujus vel illius individui. Ex hoc autem ulterius patet, quod formæ artificiales sunt accidentia quædam quæ non consequuntur speciem : non enim potest esse quod aliquod artificiatum aliquam operationem et virtutem a corpore cœlesti in sua operatione participet vel sortiatur ad producendum ex virtute indita aliquos effectus naturales transcendentis elementorum virtutes. Tales autem virtutes si quæ essent in artificiatum, ex cœlestibus corporibus nullam formam consequerentur ; cum forma artificis aliud nihil sit quam ordo, compositio et figura, ex quibus prodire non possunt tales virtutes et actiones. Unde patet quod si quas tales virtutes artificiatum perficiant, puta quod ad aliquam sculpturam moriantur serpentes aut immobilitentur animalia vel lædantur, non procedit hoc ab aliqua virtute indita et permanenti, sed ex virtute agentis extrinseci, quod utitur talibus sicut instrumentis ad suum effectum. Nec potest dici quod tales actiones proveniant ex virtute corporum cœlestium, quia naturaliter agunt in ista inferiora ; et ex eo quod aliquod corpus sic vel sic figuretur, nullam idoneitatem

majorem vel minorem habet ad recipiendum impressionem naturalis agentis : unde non est possibile quod imagines vel sculpturæ quæ fiunt ad aliquos effectus singulares producendos, efficaciam habeant ex corporibus cœlestibus, licet sub certis constellationibus fieri videantur ; sed solum ab aliquibus superioribus agentibus, qui per imagines et sculpturas operantur. Sicut autem imagines ex materia naturali fiunt, sed formam sortiuntur ex arte ; ita et verba humana materiam quidem habent naturalem, scilicet sonos ab hominis ore prolatos, sed significationem quasi formam habent ab intellectu suas conceptiones per tales sonos exprimente. Unde pari ratione nec verba humana habent efficaciam ad aliquam immutationem corporis naturalis ex virtute alicujus causæ naturalis, sed solum ex aliqua spiritali substantia. Hæ enim actiones quæ per talia verba fiunt, vel per quascumque imagines vel sculpturas, vel quævis talia, non sunt naturales, utpote non procedentes a virtute intrinseca, sed tantum extrinseca ; sed sunt ad superstitionem pertinentes. Actiones vero quas supra diximus consequi formas corporum, sunt naturales, utpote ex principiis intrinsecis procedentes. Et hæc de operationibus et actionibus occultis ad præsens dicta sufficiant.

# OPUSCULUM XXXI.

## DE MOTU CORDIS, AD MAGISTRUM PHILIPPUM.

(EDIT. ROM. XXXV.)

Quia omne quod movetur, necesse est habere motorem, dubitabile videtur quid moveat cor, et qualis sit ejus motus. Non enim videtur ejus motus esse ab anima: ab anima enim nutritiva non movetur, quia animæ nutritivæ operationes sunt generare, alimento uti, et augmentum<sup>1</sup> et diminutio, quorum nullum motus cordis esse videtur: Et<sup>2</sup> anima nutritiva etiam plantis inest; motus autem cordis animalium proprius est. Nec etiam animæ sensitivæ motus esse videtur, sed<sup>3</sup> nec intellectivæ: <sup>4</sup> intellectus enim et sensus non movent nisi mediante appetitu; motus autem cordis involuntarius est. Sed nec naturalis esse videtur, cum sit ad contrarias partes: componitur enim ex pulsu et tractu; motus autem naturalis ad unam partem est, ut ignis<sup>5</sup> sursum, et terræ deorsum. Dicere etiam<sup>6</sup> motum cordis esse violentum, est omnino extra rationem. Manifeste enim hoc motu subtracto, subtrahitur sive moritur animal; nullum<sup>7</sup> autem violentum conservat naturam. Videtur quidem igitur<sup>8</sup> hic motus maxime naturalis esse; vita<sup>9</sup> enim animalis et hic motus se inseparabiliter consequuntur. Dicunt autem quidam hunc modum naturalem esse non ab aliqua<sup>10</sup> natura ani-

mali<sup>11</sup> intrinseca, sed ab aliqua natura universali, vel etiam<sup>12</sup> ab intelligentia. Sed hoc ridiculum apparet<sup>13</sup>. In omnibus enim rebus naturalibus propriæ passionis aliquis generis vel speciei aliquod principium intrinsecum consequuntur: naturalia enim sunt quorum principium motus in ipsis est. Nihil autem proprium magis est animalibus quam motus cordis; quo cessante, perit eorum vita. Oportet<sup>14</sup> igitur inesse ipsis animalibus aliquod principium hujus<sup>15</sup> motus. Adhuc, si aliqui motus in corporibus inferioribus ex natura universali causentur, non semper eis adsunt: sicut in fluxu et refluxu maris apparet<sup>16</sup>, quod sequitur motum lunæ, et secundum ipsum variatur. Motus autem cordis semper adest animali. Non est ergo a causa separata tantum, sed ab aliquo intrinseco principio. Dicunt autem alii principium hujus motus in animali esse calorem, qui per spiritum generatus movet cor. Sed et<sup>17</sup> hoc irrationabile est. Illud enim quod est in aliqua re principalius, oportet esse causam. Principalius autem in animali videtur esse motus cordis et magis contemporaneum vitæ, quam quævis alteratio secundum calorem. Non igitur alteratio secundum calorem, est

<sup>1</sup> Parm. : « augmentatio. »

<sup>2</sup> Parm. : « Hæc etiam anima. »

<sup>3</sup> Parm. omittit : « sed. »

<sup>4</sup> Parm. : « quia. »<sup>4</sup>

<sup>5</sup> Parm. : « movetur tantum... et terra. »

<sup>6</sup> Parm. : « autem. »

<sup>7</sup> Parm. : « cum tamen nullum... conservet. »

<sup>8</sup> Parm. : « autem. »

<sup>9</sup> Parm. : « cum vita animalis... consequuntur. »

<sup>10</sup> Parm. addit. : « particulari. »

<sup>11</sup> Parm. : « animalis. »

<sup>12</sup> Parm. omittit : « etiam. »

<sup>13</sup> Parm. : « est. »

<sup>14</sup> Parm. : « sequitur. »

<sup>15</sup> Parm. : « talis. »

<sup>16</sup> Parm. : « patet, qui sequuntur... et secundum ipsam. »

<sup>17</sup> Parm. omittit : « et. »



causa motus cordis, sed magis<sup>1</sup> e converso motus cordis est causa alterationis secundum calorem : unde Philosophus in lib. *De mot. animalium* dicit : Oportet quod futurum est movere, non alteratione tale esse. Item animal perfectum, quod est movens seipsum, maxime accedit ad similitudinem totius universi : unde et homo qui est perfectissimus animalium, dicitur a quibusdam minor mundus. In universo autem primus motus est motus localis, qui causa est motus<sup>2</sup> alterationis et aliorum motuum; unde et in animali magis videtur motus localis esse alterationis principium, quam e contra : unde et Philosophus in VIII *Phys.*, hanc similitudinem sequens, dicit, quod motus est ut vita quædam natura existentibus omnibus. Adhuc, quod est per se, prius est eo quod est per accidens. Primus autem motus animalis est motus cordis; calor autem non movet localiter nisi per accidens : per se enim caloris est alterare, per accidens autem movere secundum locum. Ridiculum igitur est dicere, quod calor sit principium motus cordis : sed oportet ei assignare causam quæ per se possit esse principium motus localis. Principium ergo hujus considerationis hinc oportet accipere : quod, sicut Philosophus dicit in VIII *Phys.*, quorumcumque principium motus in seipsis est, hoc natura dicimus moveri ; unde animal quidem totum natura seipsum movet : corpus autem ejus contingit et natura et extra naturam moveri. Differt enim secundum qualem motum quod movetur eveniat, et ex quali elemento constet. Cum enim animal movetur deorsum, est quidem motus naturalis et toti animali et corpori, eo quod in corpore animalis elementum grave dominatur, cujus natura est moveri deorsum ; cum autem animal movetur sursum, est quidem motus naturalis animali, quia est a principio ejus intrinseco, quod est anima ; non tamen est naturalis corpori gravi ; unde et magis fatigatur animal in hoc motu. Motus autem secundum locum in animalibus causatur appetitu et apprehensione sensitiva vel intellectiva, ut Philosophus docet in III *De anima*. In aliis igitur animalibus totus processus motus naturalis est : non enim agunt a proposito, sed a natura : naturaliter enim hirundo facit nidum et

arana telam. Solius autem hominis est a proposito operari, et non a natura. Sed tamen cujuslibet operationis suæ principium naturale est. Licet enim conclusiones scientiarum speculativarum et practicarum non naturaliter sciat, sed ratiocinando inveniat, prima tamen principia indemonstrabilia sunt ei naturaliter nota, ex quibus ad alia scienda procedat : similiter ex parte appetitus appetere ultimum finem, qui est felicitas, est homini naturale, et fugere miseriam ; sed appetere alia non est ei naturale, sed ex appetitu ultimi finis procedit in appetitu aliorum : sic enim est finis in appetibilibus, sicut principium indemonstrabile in intellectualibus, ut dicitur II *Phys.* Sic ergo cum motus omnium aliorum membrorum ex motu cordis causetur, ut probat Philosophus in lib. *De mot. anim.* ; motus quidem alii possunt esse voluntarii, sed primus motus qui est cordis, est naturalis. Oportet autem considerare, quod motus sursum est naturalis igni, eo quod consequitur formam ejus : unde et generans, quod dat formam, est per se movens secundum locum. Sicut autem formam elementi consequitur aliquis motus naturalis : sic nihil prohibet alias formas sequi alios motus naturales : videmus enim quod ferrum naturaliter movetur ad magnetem, qui tamen motus non est ei naturalis secundum rationem gravis et levis, sed secundum quod habet talem formam. Sic igitur et animal in quantum habet talem formam quæ est anima, nihil prohibet habere aliquem motum naturalem ; et movens hunc motum est quod dat formam. Dico autem motum naturalem animalis eum qui est cordis : quia, ut Philosophus dicit in lib. *De motu animalium*, existimandum est constare animal quemadmodum civitatem bene ac legitime rectam. In civitate enim quando semen stabilitus fuerit ordo, nihil est opus separato monarca, quem oporteat adesse ad singula eorum quæ fiunt, sed quilibet facit quæ ipsius sunt, ut ordinatum est, et fit hoc post hoc propter consuetudinem. In animalibus autem idem hoc per naturam fit : et quia natum est unumquodque sic constantium facere proprium opus, ut nihil opus sit in unoquoque esse animam, scilicet in quantum est principium motus, sed in quodam principio

<sup>1</sup> Parm. : « potius e contra... est causa talis. »

<sup>2</sup> Parm. omittit : « motus. »

cordis existente alia quidem vivere, eo quod apta nata sunt facere proprium opus propter naturam. Sic igitur motus cordis, est naturalis quasi consequens animam, in quantum est forma talis corporis, et principaliter cordis. Et forte secundum hunc intellectum dixerunt quidam motum cordis esse ab intelligentia, in quantum posuerunt animam ab intelligentia esse: sicut Philosophus dicit in VIII *Physic.*, motum gravium et levium esse a generante, in quantum dat formam, quæ est motus principium. Omnis autem proprietas et motus consequitur aliquam formam secundum conditionem ipsius; sicut formam nobilissimi elementi, puta ignis, consequitur motus ad locum nobilissimum, qui est sursum. Forma autem nobilissima in inferioribus est anima, quæ maxime accedit ad similitudinem principii motus cæli. Unde et motus ipsam consequens simillimus est motui cæli: sic enim est motus cordis in animali, sicut motus cæli in mundo. Sed tamen oportet motum cordis a motu cæli deficere sicut principiatum deficit a principio. Est autem motus cæli circularis et continuus, et hoc ei competit in quantum est principium omnium motuum mundi: accessu enim et recessu corpus cæleste imponit rebus principium et fidem essendi, et sua continuitate conservat ordinem in motibus, qui non sunt semper. Motus autem cordis principium est omnium motuum qui sunt in animali: nude Philosophus in III *De part. animalium*, dicit, quod motus delectabilium et tristium, et totaliter omnes sensus hinc incipientes videntur, scilicet in corde, et ad hoc terminari: unde ad hoc quod cor esset principium et finis omnium motuum qui sunt in animali, habuit quemdam motum non circularem, sed similem circulari, compositum scilicet ex tractu et pulsu: unde Philosophus dicit in III *De anim.*, quod movens organice est ubi est principium et finis idem. Omnia autem pulsu et tractu moventur; propter quod oportet sicut in circulo manere aliquid, et hinc incipere motum. Est etiam iste motus continuus durante vita animalis, nisi in quantum necesse est intercidere morulam mediam inter pulsum et tractum, eo quod deficiat a motu circulari. Per hoc ergo de facili solvuntur quæ in contrarium obijci possunt. Neque enim dicimus motum cordis esse cordi naturalem in quantum est grave vel leve, sed in quantum est

animatum tali anima: et duo motus qui videntur contrarii, sunt quasi partes unius motus compositi ex utroque, in quantum deficit a simplicitate motus circularis, quem tamen imitatur in quantum est ab eodem in idem; et sic non est inconveniens si quodammodo sit ad diversas partes, quia et motus circularis aliquando sic est. Nec etiam oportet quod causetur ex apprehensione et appetitu, licet sit ab anima sensitiva: non enim causatur ab anima sensitiva per operationem suam, sed in quantum est forma et natura talis corporis. Motus autem progressivus animalis causatur per operationem sensus et appetitus: et propter hoc medici distinguunt operationes vitales ab operationibus animalibus, et dicunt quod cessantibus animalibus remanent vitales, vitales appellantes quæ motus cordis concomitantur, quibus cessantibus cessat vita, et hoc rationabiliter. Vivere enim viventibus est esse, ut dicitur II *De anim.*; esse autem cuique est a propria forma. Hoc autem differt inter principium motus cæli et animam, quia illud principium non movetur per se neque per accidens: anima autem sensitiva licet non moveatur per se, movetur tamen per accidens: unde proveniunt in ipsa diversæ apprehensiones et affectiones. Unde motus cæli semper est uniformis, motus autem cordis variatur secundum diversas affectiones et apprehensiones animæ: non enim affectiones animæ causantur ab alterationibus cordis, sed potius causant eas; unde in passionibus animæ, puta in ira, formale est, quod est ex parte affectionis, scilicet quod sit appetitus vindictæ; materiale autem quod pertinet ad motum cordis, puta quod sit accensio sanguinis circa cor. Non autem in rebus naturalibus forma est propter materiam, sed e contra, ut patet III *Phys.*; sed in materia est dispositio ad formam. Non ergo propter hoc aliquis vindictam appetit quia sanguis circa cor accendatur, sed ex hoc aliquis est ad iram dispositus; irascitur autem ex appetitu vindictæ. Licet autem aliqua variatio accidat in motu cordis ex apprehensione diversa et affectione, non tamen illa variatio motus est voluntaria, sed involuntaria, quia non fit per imperium voluntatis. Dicit enim Philosophus in lib. *De causa mot anim.*, quod multoties apparente aliquo, non tamen jubente intellectu, movetur cor et pudenda: et hujus causam assignat: quia

necesse est alterari alteratione naturali animalia : alteratis autem partibus, hoc quidem augeri, hoc autem decrementum pati, ut jam moveatur et permutetur natis haberi permutationibus invicem. Causa autem motuum animalis caliditas et frigiditas, quæ de foris et intus existentes naturales et præter rationem utique facti

motus dictarum partium, idest cordis et pudendi alteratione incidente fiunt. Intellectus enim et phantasia passionem afferunt, ut concupiscentiæ, iræ et hujusmodi, ex quibus cor calescit vel infrigidatur. Et hæc de motu cordis dicta sufficiant.

---

# OPUSCULUM XXXII.

## DE INSTANTIBUS.

( EDIT. ROM. XXXVI. )

### CAPUT I.

*Quid sit tempus, et qualiter tempus in istis inferioribus participetur, et quæ Angelorum et eorum operationum mensura.*

Quoniam omnem durationem concomitatur instans, ideo ad naturam durationis aperiendam de natura instantis oportet aliquid dicere : horum enim alterius notitia ad alterius cognitionem valet. Et quia composita sunt nobis notiora simplicibus, et divisibilia indivisibilibus ; ideo a temporis notitia incipiendum est, ut per ipsum ad instantis cognitionem, et inde ad diversarum durationum notitiam facilius possit perveniri. Sciendum est ergo primo quod tempus dicitur IV *Phys.*, numerus motus. Licet enim nihil sentiamus per aliquem sensum exteriori nisi aliquo motu facto circa corpus ; tamen sola cogitationum successione potest anima prius et posterius percipere in ipsa successione : et ita necessaria in successione apprehendit anima duo vel tria vel plura ; et iste numerus apprehensus in successione est tempus. Sed hoc dubitationem habet. Cum enim tempus sequatur motum primi mobilis ut ejus propria mensura, actio animæ primo mobili non subjaceat, eum non perficiatur organo corporali, sola enim corpora primo corpori et ejus motui subjacent, videtur secundum actionem animæ tempus non posse percipi, nisi aliqua transmutio circa corpus contingat. Ad

hujus ergo evidentiam considerandum est quod est unus primus motus, qui est causa omnis motus secundi. Et ideo quæcumque transmutationes sunt circa ista corpora inferiora, fiunt ab illa prima transmutatione. In actionibus autem animæ, licet non sit transmutatio ex parte ipsius animæ, tamen est transmutatio ex parte phantasmatum, per quorum naturam in cogitationibus animæ est continuum et tempus, sicut dicitur in III lib. *De anima*. Et ideo anima in suis cogitationibus percipit successionem continuam, et apprehendit prius et posterius in ea, et in hoc consistit ratio temporis : tempus enim est numerus prioris et posterioris in motu. Et ab unitate primi motus habet tempus unitatem : comparatur enim tempus ad primum motum non solum ut mensura ad mensuratum, sed etiam ut accidens ad subjectum. Impossibile est autem in uno subjecto esse plura accidentia ejusdem speciei ; sicut in una parte superficiem non possunt simul esse duæ albedines. Motus autem primus est unus et uniformis. Unde tempus oportet esse unum. Ad alias autem transmutationes comparatur tempus ut mensura : unum solum enim potest esse mensura plurium, ut una virga plurium pannorum. Et ideo tempus non multiplicatur ad multiplicationem inferiorum transmutationum, sed manet unum ipsis multiplicatis. Ex quibus patet quod in substantiis separatis, quæ non intelligunt eum continuo et phantasmate, non est tempus in ejus definitione cadit motus, qui est subjectum temporis, a quo tem-

pus habet quod sit continuum : in definitione enim temporis ponitur numerus ut formale et ut genus, et motus ponitur oblique ut ejus subjectum, et loco differentiae : semper enim cum accidentia in abstracto definiuntur, ponitur subjectum loco differentiae, sicut simitas dicitur nasi curvitas. Secundo namque loco debet semper differentia in definitione poni. Et inde est quod tempus non est absolute numerus sicut duo vel tria, sed est numerus applicatus rebus, sicut duæ ulnæ panni et hujusmodi. In substantiis autem separatis non est subjectum temporis sic dicti : unde mensura actionis in eis non habet aliquam continuationem a materia, nec ab aliquo exteriori. Sed quia non potest ab eis apprehendi simul nisi unum, oportet quod in apprehensione plurium cadat successio prioris et posterioris. Sed totum hoc est discretum, et non continuum : et tempus est in actionibus eorum secundum similitudinem ejus quod est formale in eo, non autem secundum ejus materiale; a quo habet esse continuum : ideo tempus quo mensuratur successio in actionibus Angelorum, est ex indivisibilibus, sicut numerus componitur ex unitatibus quæ sunt indivisibilia quædam. Illa autem indivisibilia non pertinent ad genus quantitatis, sicut unitates pertinent : et hoc de facili cognoscitur, si natura nostri temporis consideretur. Sciendum est ergo quod, cum ratio mensuræ primo inveniatur in quantitate discreta, et per ejus naturam in continua; nihil poterit habere rationem mensuræ in quantitate continua nisi ex adjunctione quantitatis discretæ. Et ideo tempus, quod est mensura motus, a quo habet continuitatem, sicut a subjecto, formaliter est numerus; et per hoc est mensura, quamvis esse habeat per motum, sicut accidens a suo subjecto. Si ergo tempus nostrum consideretur formaliter, est numerus, sive etiam quantitas discreta; sed ratione sui subjecti est quantitas continua; unde tempus non est numerus absolutus, sed applicatus rebus. Quantitas autem discreta habet originem a quantitate continua, ut dicitur III *Phys.*: propter divisionem enim continui est additio in numero: nec forent duæ unitates facientes numerum aliquarum rerum, nisi illæ res essent divisæ ab invicem, in se tamen retinentes unitatem. Divisio autem rerum singularium ejusdem speciei est per materiam, non per formam, cum species

sequatur formam : species autem una est. In Angelis autem materia non est. Et ideo substantiæ separatæ a philosophis vocantur. Ex quo patet quod mensura actionum in Angelis cum insit eis ut in subjecto, non pertinet ad quantitatem discretam : divisio enim et numerositas quæ est in eis, est solum formalis, et nullo modo materialis, cum tot sint in eis species quot individua; et ideo multitudo quæ est in eis, est de transcendentibus. Certum est enim quod unum et multa dividunt ens; et patet quod illud unum et multa non sunt in aliquo genere determinato, puta in quantitate, cum unitas talis et multitudo possit reperiri ubi nulla est quantitas, ut in Angelis. Tempus autem quod mensurat eorum actiones non est continuum, nec numerus qui est quantitas discreta, cum ista oriatur a continua; sed est numerus qui est multitudo quæ est de transcendentibus, et ex talibus indivisibilibus componi habet. Et ideo non oportet inter duas ejus actiones quæ perficiuntur in diversis indivisibilibus illius temporis, aliquod medium cadere possunt enim duæ actiones immediate sibi succedere, sicut et duæ unitates : solum enim inter duo indivisibilia temporis nostri quod ex talibus componi non potest, cum sit continuum, cadit medium. Sed si ex eis componeretur tempus nostrum, nihil caderet medium, quia partes rei immediate coirent. Et ideo instantia in tempore nostro non sunt partes, cum sibi invicem immediate succedere non possint. Ex dictis ergo manifestum est non esse transitum, cum Angelus aliquid morose intelligit, sicut quando intelligit duo successive. Apud nos autem successio quædam est quando intelligimus unum continue; sicut quando intelligimus plura successive; et hujus ratio dicta est : quia tempus quod mensurat actiones nostras, non est in eis sicut in subjecto, sed est mensura earum tantum. In motu vero primo est sicut in subjecto, et ab illo habet transitum per naturam, quia subjectum ejus est cum essentia motus sicut in quodam transitu. Et ideo quando intelligimus aliquod indivisibile, puta, A, oportet quod ipsum solum simul intelligamus, cum non habeat quid prius et quid posterius intelligatur, est enim indivisibile; si morose intelligatur, et quiescat intellectus illud intelligendo, et aliud non transeundo, mensura actionis nostræ nullum transi-



tum habebit, cum ipsa sit tota simul : natura enim mensuræ intrinsecæ est nihil accipere a mensurato. Tempus autem est mensura extrinseca omnium præterquam ipsius tantum in quo est sicut in subjecto, et idem est motus primus. Erit ergo transitus, quando intelligimus aliquid indivisibile non a parte actionis nostræ causatus in ipso tempore, cum in eo nihil causetur nisi a subjecto proprio ; sed a parte ipsius temporis applicati actionibus nostris tamquam mensura mensurato, et non tamquam accidens subjecto. Cum autem Angelus aliquid unum intelligit morose, nullus transitus est, sed est una particula ipsius temporis indivisibilis quo mensuratur actio ejus, quæcumque mora fuerit in illud intelligendo : non enim aliquid continuum unum uniforme est transitum habens, ejus tempus illud sit mensura et accidens, ut apud nos. Et ideo particula illius temporis non habent transitum nec a parte intelligibilium sibi succedentium, cum unum aliquid indivisibile intelligatur, nec a parte alicujus subjecti, ejus existentia est in continuo motu et transitu. Hoc autem imaginationem nostram transcendit, quia imaginatio nostra non transcendit continuum et tempus. Una ergo particula indivisibilis illius temporis manere potest cum multo tempore nostro, ejus tamen partes illi particula commanere non possunt. Nec tamen propter hoc est in illa particula successio vel continuatio aliqua, cum tempus illud non sit accidens alicujus in successione et continuitate existentis, ut dictum est. Manifestum est ergo quod universaliter omne tempus consistit essentialiter in quadam morosa successione. Accidit autem ei quod illa successio sit continua vel discreta ratione eorum quibus applicatur. Discretio enim illa quæ est temporis in Angelis, non est ejus ut numerus quo numeratur, hoc enim est absolutum a tempore ; sed habet eam ab actionibus quæ sibi succedunt sine medio chorus<sup>1</sup>.

## CAPUT II.

*Qualiter in toto tempore est instans idem re, differens in ratione.*

Nunc vero de ipsis instantibus superest agere. Sciendum est ergo quod sicut

punctus se habet ad lineam, ita se habet nunc ad tempus. Geometræ autem imaginantur punctum per motum suum causare lineam : quorum ratio est, quia linea non habet nisi unam dimensionem, unde indivisibilis est secundum latum et profundum ; et ideo non est in linea unde punctum excedat in latum. Cum autem in longum linea excedat punctum, si imaginemur punctum quiescere, non poterimus imaginari ipsum esse causam lineæ. Si vero imaginemur ipsum moveri, licet in ipso nulla sit dimensio, nec aliqua divisio per consequens, per naturam tamen motus sui relinquitur aliquid divisibile. Et quia punctus non habet causare lineam nisi secundum quod linea caret latitudine et profunditate, non autem secundum quod habet longitudinem ; ideo ex natura motus sui quod relinquitur, erit dimensionale una dimensione, et tale necessario erit linea. Ille tamen punctus nihil est de ipsius lineæ essentia ; quia nihil unum et idem realiter omnibus modis indivisibile potest simul in diversis partibus ejusdem continui permanentis esse. Necessario tamen si esset de essentia lineæ constitutæ per suum motum, foret de essentia cujuslibet partis suæ : quia qua ratione pertineret ad unam partem ejusdem, eadem ratione pertineret ad omnes, cum æqualiter ad omnes se habeat. Nec potest esse terminus ejus vel continuatio aliqua, cum ille punctus sit aliquid unum realiter : unde non possunt esse plures puncti realiter. In linea tamen sunt plures puncti et realiter ab invicem divisi, ut duo ejus termini, et similiter in ejus continuatione : linea enim est quantitas positionem habens et manens, nec cum puncto moto transiens. Punctus ergo mathematicè imaginatus, qui motu suo causat lineam, necessario nihil lineæ erit, sed erit unum secundum rem, et diversum secundum rationem ; et hæc diversitas quæ consistit in motu suo, realiter est linea, non identitas sua secundum rem. In hac ergo linea constituta per diversitatem puncti, erunt puncta quadam duo actu ut ejus termini, qui cadunt in ejus definitione, et infinita alia in potentia, secundum quod ipsa est in infinitum divisibilis potentialiter : per quem modum de instanti temporis est agendum : nisi quod instans est de substantia temporis. Sciendum

<sup>1</sup> Parm. omittit : « chorus. »

est ergo quod mobile est causa motus non efficiens, sed materialis : motus enim est in mobili ut in subjecto, sicut dicitur in III *Phys.* Mensura autem ipsius mobilis est instans, quia instans sequitur id quod fertur, ut dicitur IV *Phys.* Et quidam referuntur hoc ad instans ævi, dicentes ipsum esse idem secundum rem cum instanti temporis, differens tamen ratione : dicentes quod primum mobile, ejus mensura est instans, quia essentia sua est tota simul, et non in aliqua successione, sicut et essentia instantis est tota simul, ideo est unum et idem realiter in toto motu suo, sed diversum et diversum ratione : et hæc ejus diversitas est totus motus ejus, ejus ipsum mobile secundum essentiam nihil est, sed est penitus extra genus ejus, cum ipsum sit substantia, motus vero accidens. Eodem vero modo instans quod est mensura ipsius mobilis sequens ipsum, est unum secundum rem, cum nihil perdat de substantia ipsius mobilis, ejus instans est mensura inseparabilis ; sed diversum et diversum secundum rationem ; et hæc ejus diversitas est tempus essentialiter, ejus ipsum instans quod est mensura primi mobilis, nihil est secundum eos. Et ideo aliud in essentia sua est instans quod est unum in toto tempore, a quolibet instanti quod est in toto tempore vel ut continuans, vel ut terminus. Illud enim instans est mensura etiam primi mobilis secundum quod est permanens. Nullum autem istorum instantium est mensura essentiam alicujus, quia ipsum tempus in quo reperiuntur prædicta instantia, est mensura omnium inferiorum non solum secundum suos motus, sed etiam secundum sua esse, quia inferiora sunt transmutabilia non solum secundum locum, sed etiam secundum suum esse, cum sint corruptibilia. Unde dicunt quod multos decipit æquivocatio instantis, quæ multipliciter latet in genere, secundum Philosophum. Non enim est aliquod instans quod mensuret aliquam rem inferius quod idem sit in toto tempore ipsius motus ; cum nullum tempus sit accidens motus rei inferioris, sed primi mobilis tantum. Unde cum res inferior movetur, motus ejus est accidens ejus, sed tempus ejus non est accidens hujus motus, sed mensura tantum ; mensura enim est accidens primi mensurati tantum in isto genere, aliorum autem mensura tantum, non autem accidens. Et ideo tempus non est

in aliquo motu alicujus rei corruptibilis ut in subjecto, sed in motu primi mobilis tantum. Potest tamen ratio de isto tempore cuilibet motui particulari aliquid attribuere, et assignare in eo principium et finem per comparisonem ad principium et ad terminum alicujus motus particularis, sicut facit in die cum accipit ortum et occasum talis tamquam principium et finem temporis.

### CAPUT III.

*Cujus sit mensura instans temporis et ævum.*

His autem est adversum quod dicit Philosophus IV *Physic.*, dicens ipsum instans sequi rem motam, sicut tempus sequitur motum per hoc quod nos devenimus in notitiam prioris et posterioris in motu per ipsum mobile : quia cum ipsum invenimus in aliqua parte magnitudinis per quam movetur, statim dicimus motum per quem illuc advenit præterisse, et motum per quem inde ad aliam partem magnitudinis transibit, futurum esse ; et sic per mobile alteratum apprehendimus numerum motus. Similiter est in tempore : quia id quod distinguit partes temporis ab invicem, est nunc quod est principium temporis unius, et finis alterius. Ergo a commutata proportionem, sicut se habet tempus ad motum, ita se habet nunc temporis ad mobile : unde videtur Philosophum velle nunc temporis sequi ipsum mobile, ita quod idem nunc sit mensura mobilis, et continuans partes temporis adjuncti. Idem etiam nunc dicit primo mensurare tempus ipsum : quia unumquodque mensuratur per id quod est notius in suo genere : unde illud de genere temporis est : de eodem etiam nunc subjungitur quod nihil temporis est, nisi ipsum scilicet nunc. Ex quibus patet quod instans quod sequitur mobile, sit de substantia temporis, ejus oppositum dicebatur. Ad hujus ergo difficultatis solutionem notandum est quod instans ævi non est accidens primi mobilis, sed mensura tantum secundum illud ejus quod est inalterabile, scilicet secundum essentiam ; accidens vero est primi æviterni, et sequitur illud sicut accidens subjectum suum, alia autem non. Unde manifestum est quod non est idem nunc ævi et nunc

temporis quod sequitur mobile. Hoc enim est mensura mobilis secundum quod est idem in toto motu et accidens ejus : unde Philosophus quærens naturam instantis in IV *Physic.*, docet quod nihil temporis est nisi instans : et ad hoc accepit rationem ex habitudine motus ad mobile : dicens quod sicut loci mutatio et ipsum mobile sunt simul, sic numerus mobilis simul est cum numero motus localis. Sed tempus est numerus loci mutationis. Ergo numerus ipsius mobilis semper erit cum tempore. Hoc autem nihil aliud est quam nunc. Ergo nunc et tempus sunt simul. Addit autem quod ipsum comparatur ad id quod fertur non sicut numerus, sed sicut unitas, cum nunc sit indivisibile. Ex quibus manifestum est aliam esse naturam instantis quod mensurat mobile secundum illud quod est, et secundum id quod est idem in toto motu, aliud autem est quod continuat tempus. Patet enim ex parte motus et mobilis mobile esse idem in toto motu realiter, sed alterum et alterum ratione. Sed hæc ejus alteritas consistit in quibusdam indivisibilibus motus, quæ dicuntur mutata esse, sine tamen interpolatione, et hujusmodi continuant motum, quando quies in aliquo illorum non accidit. Mobile autem nihil est horum, cum quodlibet horum accidat sibi : simul tamen sunt hæc mutata esse cum mobili, quia ejus sunt ut subjecti. Sicut a parte mobilis, ita et a parte instantis quod sequitur mobile, est accipere diversa et diversa esse. Et hæc ejus diversitas consistit in ipsis indivisibilibus temporis, quæ et dicuntur mensurata esse : et ista mensurata esse sine interpolatione sunt instantia quæ continuant tempus : et hæc nihil aliud sunt nisi diversa et diversa ratio ejusdem instantis quod idem est realiter in toto tempore sequens mobile in quantum est idem re in toto motu ; hinc autem adjungitur instans ævi quod mensurat mobile secundum se, sicut aliud nunc est mensura ejus in quantum essentia ejus conjuncta est motui. Unde sicut bene arguitur quod nihil motus est nisi mobile sit, et tamen mobile non est aliquid de substantia, seu de essentia motus (nisi forte sicut subjectum dicitur pertinere ad accidens suum cum cadat in ejus definitione. Sed hoc est quia accidentia definiuntur per suppletionem subjectorum quæ penitus sunt extra essentias eorum) :

ita bene arguitur quod nihil temporis sit, nisi instans sit; nec tamen ideo sequitur quod illud instans sit aliquid temporis. Et ideo Philosophus subtilissime, cum vellet ostendere nihil temporis esse nisi nunc, non hoc directe conclusit quod intendere videbatur; sed directe conclusit nunc et tempus esse simul, sicut mobile et motus sunt simul, et constat quod motum esse ipsius mobilis est continuatio ipsius motus, non autem ipsum mobile. Sed sicut mobile non separatur a moto esse, nec a motu, sed semper sunt simul; ita etiam de ipso nunc quod ipsa diversa esse sunt essentiæ ejus conjuncta : non dico diversa esse ejus, quia diversitas non attingit essentiam ævi, licet ei jungatur, sed attingit nunc temporis : unde hæc diversa esse ei adjuncta, erunt aliquid temporis, et non ipsum nunc, præter quod tamen nihil temporis est; ipsum vero instans quod in se alteratur diversa et diversa ratione quo ad sua esse, est aliquid temporis, sed non tempus. Unde Philosophus *ibid.*, cum prius vocasset ipsum nunc numerum mobilis, super hoc enim stabat argumentum ejus, subjungit nunc non comparari ad mobile sicut numerum, sed sicut unitatem numeri, quam constat non esse numerum. Sed ejus replicatio quæ est sibi alterum et alterum esse, est numerus. Ipsa autem replicatio unitatis non est ipsa unitas, sed accidens ejus, licet ipsa quoque sit accidens. Instans ergo quod est quasi unitas ipsius primi mobilis, secundum Philosophum, non est instans ævi, quia instans ævi est aliud per essentiam ab instantibus continuantibus tempus : ab illo tamen ista derivantur et oriuntur. Sed ipsum est idem in essentia sua, in qua nulla cadit alteratio, sicut in essentia primi mobilis. Nec alterabitur etiam consequenter ad alterationem primi mobilis quod alteratur secundum ubi, hoc est instans quod nos vocamus ævum; quod est principium temporis. Unde Boetius in lib. III *De consol. Metr.* ix.

... Qui tempus ab ævo

Ire jubes :

Quia ab isto instanti procedit tempus sicut motus a mobili, non tamquam ab aliquo sui generis, sed exemplariter, sicut dicimus inferiora procedere a superioribus. Ideo subtiliter discernendum est inter ista duo nunc : quia primum nunc

est mensura tantum, secundum vero etiam est accidens, et ad genus temporis pertinens, ideo dicitur mensurare tempus. Unde Philosophus, IV *Physic.*, per comparisonem mobilis ad motum docet quomodo instans mensurat tempus, quia scilicet unumquodque mensuratur per id quod est notius sui generis. Inter ea autem quæ ad tempus pertinent, notius est instans, sicut et ipsum mobile notius est in motu, et per ipsum cognoscitur ipse motus. Ubi considerandum est quod duobus modis aliquid potest esse mensura alterius. Uno modo quando ipsa mensura semel vel pluries accepta æquiparatur mensurato, sicut trinarius alium trinarium mensurat, vel novenarium. Alio modo quando unum est ratio cognoscendi aliud. Unde de isto cognitio non habetur nisi secundum quod aliud ducit intellectum in cognitionem ipsius; et ideo illud non erit absolute mensura alterius, sed mediante scientia. Et ideo Philosophus dicit X *Metaph.*, quod scientia est mensura scibilis. Hoc autem erit per modum illius per quod intellectus ducitur in cognitionem talis rei. Isto modo mobile potest dici mensura motus, quia per ejus notitiam devenitur in notitiam motus, ut *ibid.*, dicitur, quia mobile est permanens, motus vero transiens; ideo mobile notius est ipso motu. Similiter instans tale notius est tempore simpliciter, quia permanens est et idem re, tempus vero transiens: licet quandoque tempus sit nobis notius, quia est aliquo modo subjectum sensui, quia est sensibile commune, cum sit numerus motus. Cum autem dicitur quod nihil est præsens de tempore nisi nunc, non significatur aliquod instans quod continuans partes temporis ad invicem; quod cum tempore labitur, nec permanet, ut iterum signari possit, sicut potest punctus in linea unus et idem existens bis sumi, inquantum scilicet est principium et finis respectu diversarum partium lineæ; nihilominus idem nunc est principium unius partis et finis alterius in tempore, sicut in linea punctus. Sed hoc dicitur de nunc quod sequitur, id quod fertur. Id enim manet idem secundum essentiam in toto tempore, variatum tamen per rationem, et in ista diversitate ejus inveniuntur multa instantia, semper tamen labentia cum tempore. Constat autem nullum talium instantium labentium esse causam temporis, cum nullum ipsorum maneat in toto tempore,

sed transeat cum qualibet parte temporis: ipsa enim sunt diversæ rationes ipsius instantis quod est idem in toto tempore; et ideo vocantur instantia. Quod autem instans permanens patitur aliquam alterationem sibi adjungi, quia dictum est ipsum nunc habere diversum esse, hoc accidit, quia unum et idem natum est habere diversas mensuras, sicut patet de corpore cœlesti quod secundum suum esse quod est intransmutabile, mensuratur ævo quod est instans permanens. Sed quia idem corpus habet transmutationem adjunctam motui, movetur enim secundum locum; tempus autem est mensura motus, ut dictum est; ideo hoc instans, licet sit intransmutabile, est tamen mutationi adjunctum ratione sui subjecti quod movetur secundum locum, ut dictum est: et sic accidentaliter habet mutationem adjunctam, sive alterationem. Similiter in substantiis separatis reperitur quidam motus affectionum et intellectionum, non autem secundum suum esse: unde ubicumque reperitur natura istius nunc, semper est reperire motum aliquem adjunctum. Ex quo manifestum est quod ævum non est ut in subjecto in primo mobili, sed est mensura ejus tantum, ut in subjecto autem est in primo æviterno. Sicut enim tempus respectu primi mobilis est accidens et mensura, respectu autem motuum aliorum inferiorum mensura tantum; ita ævum respectu primi in genere eorum quæ ævo mesurantur, est accidens et mensura; respectu autem aliorum est mensura tantum. Et quia primum in quolibet genere est unum tantum; in uno autem subjecto impossibile est plura esse accidentia unius naturæ, ab illius unitate erit tantum unum ævum omnium quæ ævo mesurantur, sicut tempus est unum omnium, quia motus primi mobilis est unus.

#### CAPUT IV.

*Quid mensurat operationes Angelorum.*

Considerandum est autem quod nulla actio substantiæ separatæ mensuratur isto nunc, cum nulla actio sua sit sua substantia. Solius enim Dei actio est ejus substantia; et ideo substantia et actio ejus est æterna. Cum autem Angelus agit aliquid extra, sicut quando aliquid agit

circa ista corpora illa transmutando, sicut factum est in Angelo Tobiae, tunc actio sua mensuratur tempore nostro. Si autem actio sua non fuerit ad extra, cujusmodi est intelligere, tunc si intelligit in Verbo, actio sua mensuratur aeternitate participative: sic enim actio sua naturam suam transcendit, quia per naturam suam non videret res in Verbo. Si vero intelligat per species suas, tunc actio sua, cum sit successiva, mensurabitur tempore quod non est (idem) cum nostro, nec etiam cum eo formale est in ipso: et hujus temporis una particula cum multo tempore nostro esse potest nullo medio intercedente, quamvis in tempore nostro multa media cadant propter ejus continuitatem. Cum vero intelligibilia sibi succedunt, erit ibi tempus perfectum ex multis particulis indivisibilibus in seipsis, et hæ particulae non sunt instantia: quia nulla istarum est eadem in toto tali tempore, sicut est instans temporis in tempore. Nec aliqua istarum est continuatio temporis, sed quaelibet est pars sicut unitas numeri. Ex his manifestum est quod tempus nostrum non causatur ab illo tempore, sed ab ævo quod est idem in toto tempore. Ævo autem nulla actio mensuratur, sed esse ipsorum æviternorum et ipsa æviterna. Ævum autem non se habet ad tempus sicut aliquid ejusdem speciei, sed tanquam causa analogica: per prius enim invenitur ratio mensurae in ævo quam in tempore. Unde a parte ævi quod toti tempori nostro coexistit et cuilibet ejus instanti, inferri potest primum Angelum toti tempori nostro coexistere, sed non quod mensuretur ævo. Tempus enim nostrum concomitanter se habet ad Angelum ratione ævi, enim tempus nostrum est adjunctum. Unde si aliquo modo diceretur Angelus commetiri seu mensurari tempori quod est mensura motus; necessario hoc foret per concomitantiam; et hoc inconvenienter posset dici, si tempus non haberet finem, sicut est Philosophi opinio: tunc enim tempus indeficienter sequeretur ævum. Sed quia tempus non semper durabit, cessabit namque motus; non est concordia seu concomitantia temporis et ævi, nisi ut nunc. Tempus vero quod mensurat actiones Angelorum, concomitatur simpliciter ipsum ævum: semper enim Angeli intelligent per species rerum proprias quas apud se habent. Quia ergo hoc tempus absolute ævum concomitatur, tempori autem nos-

tro in nullo proportionatur, nisi forte accidentaliter, potest enim una particula indivisibilis illius temporis toti tempori nostro commanere, et ultra hoc, secundum moram quam faceret Angelus super idem intelligibile; ideo per naturam illius temporis non potest inferri quod intelligere Angeli mensuretur tempore nostro, nec etiam quod tempus nostrum commetitur unicam ejus intellectionem, ut ostensum est nisi ex suppositione: ut si ponatur una particula illius temporis, in qua intelligit unum intelligibile, coexistere alicui particulari tempori apud nos. Tunc enim ex hypotesi sequeretur tempus nostrum commetiri ipsi intelligere Angeli, non tanquam propria mensura ejus, sed tanquam quid eam concomitans, et adhuc remotius quam ævum, quia tempus nostrum non comparatur illi tempori sive illi intelligere nisi per ævum, a quo effluit utrumque tempus.

## CAPUT V.

### *Quid sit subjectum ævi.*

Nunc vero restat ostendere cujus sit ævum ut subjecti. Ad cujus evidentiam considerandum est quod sicut dicitur *X Metaph.*, unumquodque mensuratur per simplicius sui generis. Est autem accipere simpliciter simplicissimum secundum multitudinem, sed non secundum magnitudinem: et hoc vel simpliciter, sicut unitas est mensura omnis numeri: vel in ipso genere habens rationem generis, sicut binarius est numerus simplicissimus minimam habens compositionem, sed non mensura simpliciter, sed tantum numerorum parium. Simplicissimum autem in motibus secundum multitudinem est primus motus, quo mensurantur alii motus. Secundum vero magnitudinem non est accipere simplicissimum, quia magnitudo est divisibilis in infinitum. Ex statuto tamen significatur minimum secundum magnitudinem, ad quod omnia mensurantur, ut pedale, vel hujusmodi; et in aliquo istorum semper erit ista mensura ut in subjecto. Ad alia autem comparatur ut mensura tantum; ideo tempus est in primo motu ut in subjecto. Quia vero in rebus ordinatis inter se supremum infimi attingit infimum supremi; ideo tempus in supremo sui, ubi est sicut in subjecto, conjungitur ævo



quasi infimo sui, quia ævum non pertinet ad cœlum nisi sicut mensura tantum. Oporteret ergo ævum esse ut in subjecto in re tali, cui conjungitur æternitas in ratione mensuræ. Nulla autem creatura secundum esse suum est æterna; potest tamen secundum actionem suam participare æternitatem, sicut Angelus qui intuetur res in speculo æternitatis: hæc enim est perfectio essentiæ naturæ angelicæ, scilicet visio gloriæ. Ævum ergo ut in subjecto erit in illo qui magis participat tali visione: illius enim essentia est magis perfecta, et natura sublimata. Et ideo, supposito quod Lucifer fuisset maximus Angelorum, si stetisset, in eo foret ævum ut in subjecto. Sed quia ejus natura non est perfecta perfectione gloriæ æternæ, non est in eo aliquid quod sit aliis mensura, sed in eo qui magis inter omnes est gloriæ particeps. Manifestum est enim quod in corpore perfectissimo quod est maxime a corruptione remotum,

ut puta cœlesti, est unde alia mensurantur; ejus autem perfectio sequitur naturam suam, quia non est aliquis nixus ad oppositum suæ perfectionis in eo. In Angelis autem non est tota perfectio a natura: quia potest in eis esse motus ad oppositum: sicut patet de illis qui peccaverunt, in quibus aliqui perfectiorem naturam habebant multis qui steterunt, quorum natura perfecta est per gloriam: et ille qui perfectiorem naturam habet in gloria, habet in se unde alii mensurantur. Et ideo secundum Commentatorem, X *Metaph.*, dicitur: Deus qui est simplicissimus, est mensura omnium simpliciter, non tamquam ejusdem generis, sed quia unumquodque tantum habet de esse et bonitate quantum ad illum plus appropinquat qui est ipsa bonitas et ipsum esse, a quo omnia bona sunt, qui est Deus benedictus in secula. Amen.

---

# OPUSCULUM XXXIII.

## DE QUATUOR OPPOSITIS.

(EDIT. ROM. XXXVII.)

### CAPUT I.

*Quod contradictio est maxima oppositio, et quod eam immediate sequitur oppositio privativa.*

Quoniam quatuor sunt oppositiones, ut dicitur in *Prædicamentis*; ideo de eis breviter agere intendimus. Primo enim considerandum est quod oppositio contradictionis prima est, et major inter alias : cujus rationem assignat Philosophus in lib. *Post.*, dicens, quod « contradictio est oppositio, cujus secundum se non est medium : » medium enim ostendit distantium convenientiam, et ideo minuit rationem oppositionis. Cum igitur in omnibus aliis oppositionibus sit invenire medium; ideo omnes diminuunt de ratione oppositionis contradictoriæ. Aliæ enim oppositiones medium habent; quædam tamen plus, quædam minus : et secundum hoc magis et minus participant de ratione oppositionis contradictoriæ, et consequenter magis et minus opponuntur. Primum enim in quolibet genere est causa omnium quæ sunt in illo genere, ut patet X *Metaph.* : et ideo quanto magis aliquæ participant ratione primi in genere oppositionum, tanto minus conveniunt in medio. Convenire autem in medio est dupliciter. Aliqua enim conveniunt in medio ejusdem generis cum eis, et iterum in medio materiæ; sicut album et nigrum conveniunt in medio colore, et iterum in subjecto. Aliqua vero conveniunt in medio materiæ tantum, sicut

contraria immediata et habitus et privatio : contraria namque immediata subjectum commune habent, et similiter habitus et privatio. Sed in his differentia est : quia in quibusdam privative oppositis servatur ordo respectu subjecti, et ideo non fit reditus a privatione ad habitum : similiter est de quibusdam contrariis immediatis, sicut est de quibusdam infirmitatibus, quæ sunt incurabiles ; et tam in his quam in privationibus non relinquitur aliqua virtus in subjecto ad habitum. Alia autem sunt contraria immediata, sicut est sanitas et ægritudo, quæ indifferenter, licet ordine quodam, respiciunt suum subjectum, et tamen per unum eorum non aufertur potentia ad reliquum. In relativis vero non aufertur potentia ad reliquum. In relativis vero neutro modo est convenientia : non enim conveniunt in subjecto : idem enim non est pater et filius secundum quod pater refertur ad filium : nec conveniunt in medio sui generis, cum non sit in relativis magis et minus : habent tamen quemdam specialem modum conveniendi, quia unum illorum secundum illud quod est, dependet ad alterum : relativa enim se mutuo includunt et ponunt et perimunt, secundum Philosophum. In contradictoriis vero nihil horum reperitur : non enim habent medium sui generis, cum alterum extremum sit non ens simpliciter extra omne genus : nec in subjecto convenire possunt, cum non ens subjectum habere non possit, nec etiam illud in quo salvatur perfecta ratio entis, quod est substantia : nec conveniunt secundum dependentiam suorum

intellectum, sicut relativa : ens enim non ponit suum oppositum, scilicet non ens, sicut pater ponit filium. Et ideo contradictio simpliciter est secundum se non habens medium : unde minime conveniunt contradictorie opposita, et maxime opponuntur. Post oppositionem autem contradictionis sequuntur aliæ oppositiones ordine quodam. Et ideo secundum magis et minus reperitur in eis oppositio. Privative ergo opposita, cum non habeant medium sui generis, sicut aliqua contraria habent, nec dependentiam ad invicem, sicut relativa, cum non habent subjectum commune ; primum locum tenent post contradictionem. In his autem alterum extremum, privatio scilicet, nihil ponit : unde de se negatio est et non ens : privationes enim, secundum Philosophum, sunt de genere non entium. Sed quia non est negatio absoluta, sed talis habitus qui requirit subjectum, ideo privatio est negatio in subjecto : privatio enim de se est tamquam alterum extremum contradictionis ; sed ratione habitus quem sequitur, determinatur ad subjectum et ad genus sui habitus. Et ideo privatio est negatio in genere, et etiam in subjecto, ut dictum est. Sed considerandum est, quod non conveniunt omnino in subjecto ; quia privatio cum inest, aufert a subjecto rationem contrarietatis prius habitæ, cum habitus induci non possit. Hoc autem non facit omnis contrarietas. Unde manifestum est, privative opposita maxime opponi, et maxime attingere oppositionem contradictionis. Ex quo de facili ostenditur, cui privatio nata est opponi, et quomodo. Privatio namque id quod oppositionem habet, accipit a contradictoriis, ubi invenitur negatio absoluta, non esse scilicet. Unde, cum privatio sit de genere non entium quantum in se est, quia de natura sua attingit vilius extremum contradictionis, etsi deficiat, quia omne quod est post, deficit a primo, unde alterum extremum contradictionis terminatur ad subjectum, et ad genus privativum, illud cui opponitur privatio per se erit aliquod esse in subjecto, sicut esse absolutum est cui opponitur non esse primo et per se in contradictione. Sicut ergo non esse, quod est alterum extremum contradictionis, opponitur ipsi esse absolute primo et per se, ei autem ad quod sequitur ipsum esse simpliciter, sicut formæ substan-

tiali, vel etiam materiæ, ex consequenti solum opponitur, quia materia est aliquid quod requiritur ad hoc quod totum ens habeatur, opponitur ex consequenti ; ita non esse in subjecto, quod est privatio, primo et per se alicui esse opponitur, quod est natum reperiri in tali subjecto ; ei autem ad quod sequitur tale esse, idest habitui, opponitur ex consequenti. In ordine enim principiorum formalium primum est esse, quia esse est primus actus ; nec aliquid designatur in actu nisi per esse : non enim aliquis habet sanitatem actu nisi sanitas ponatur esse in eo : ideo omnes formæ sequuntur ipsum esse in ordine actuum, sive principiorum formalium, ut dictum est. Sed inhærendo e contrario est. Forma enim per prius inhæret, et per ipsam ipsum esse ; et ideo, considerando ipsam inhærentiam, esse sequitur formam. Et hoc facile est videre in re materiali, ut puta in lapide, ubi esse non est ipsius formæ primo, sed ipsius rei, lapidis : scilicet materiæ ; materiæ autem et formæ ex consequenti. Videmus enim quod esse in re tali per medium et quasi distanter se habet ad formam : ipsum enim esse in lapide est actus rei immediate et primo, et per rem ipsam ipsum esse actus formæ realis rei, non ut entis, sed ut ejus quo aliquid est. Ex quibus patet quod esse prius est in ordine actuum quam forma. Sed quia materia immediate habet conjungi formæ, cui ipsa est proportionata, ex qua conjunctione resultat compositum, cujus actus est ipsum esse ; ideo forma est medium in acquirendo esse ipsi materiæ et ipsi composito ; quia ipsum conjunctum non esset nisi forma inhærens esset materiæ. Et ideo secundum inhærentiam prior est forma, et esse posterius, ut dictum est. Privatio enim secundum id quod oppositionem contradictionis attingit, non esse scilicet, quod est negare primum actum, directe opponitur alicui esse, et ex consequenti opponitur illi ad quod esse sequitur ; secundum vero quod deficit a contradictione, quia accipitur ut in subjecto, et per modum inhærentis, primo repugnat habitui, quia habitus est prior in inhærendo, ut dictum est. Sed manifestum est, quod hoc debetur privationi in quantum deficit a perfecta ratione oppositionis. Ex dictis ergo manifestum est quod plus requiritur ad oppositionem privativam quam contradictoriam ; sed

tamen id quod addit oppositio privativa supra contradictionem, non auget oppositionem, sed minuit. Sed dubium est, quomodo oppositio contradictoria major sit quam privativa. Cum enim oppositio non sit nisi elongatio potentiae ab actu, sicut calor facit potentiam sui subjecti distare a frigido, privatio autem omnino removet a suo subjecto potentiam ad habitum, cum impossibile sit habitum induci post privationem, unde non magis potest natura de caeco facere videntem quam ex non ente ens; non minus videtur opponi visus et caecitas, quam ens et non ens. Sciendum est etiam quod dupliciter elongat aliquid potentiam ab actu. Uno modo ipsam potentiam removendo, ita quod nihil ejus relinquatur; et isto modo in oppositione contradictoria elongatur potentia ab actu, quia in non ente simpliciter nihil potentiae est ad esse. Alio modo interponendo obstaculum, ne potentia ducatur ad actum; sed hoc contingit dupliciter: uno modo ad tempus et mobiliter, sicut albedo facit subjectum suum distare a nigredine; alio modo immobiliter: et sic privatio removet potentiam sui subjecti ad habitum; non quod potentia omnino auferatur; sed quia obstaculum indelebile ponitur in ipso subjecto. Et ideo dicitur quod privatio auferat potentiam ad actum: unde magis miraculum est in quolibet die animas creare, licet hoc minus miretur, quam caecum illuminare; quod tamen quia rarius est, mirabilius putatur.

## CAPUT II.

### *De oppositione contraria quod magis distat a contradictoria quam privativa.*

Post privationem sequitur oppositio contraria, in qua invenitur magis convenientia quam in praedictis. Est tamen in ea quidam accessus ad praedictas oppositiones: et quicquid in ea oppositionis est, totum efficitur per participationem oppositionis privativae et contradictoriae. Quaedam namque contraria non habent medium suae naturae, sicut est sanum et aegrum, secundum Philosophum; tamen conveniunt in subjecto; et in illis ubi non fit reditio, ut ab aegritudine ad sanitatem, magis acceditur ad naturam privationis et habitus. In illis

vero in quibus fit reditio, minus acceditur ad naturam privationis. Semper tamen in contrariis omnibus alterum extremum est ut privatio, et alterum ut habitus: privatio enim et habitus faciunt contrarietatem, ut dicitur I *Phys.*: et ideo omnes contrarietates reducuntur in habitum et privationem tamquam in primam oppositionem quae est in genere: sed in oppositionem contradictionis reducitur omnis contrarietas, ut in primam oppositionem simpliciter. In ipsa enim oppositione contradictionis alterum extremum est nihil simpliciter, et simpliciter nihil sibi determinans tamquam subjectum, quia nobilius ejus extremum, scilicet ens, nullum subjectum requirit: quod manifestum est ex eo in quo salvatur ratio ejus perfecta, quod est substantia, cujus est non esse in subjecto, secundum Philosophum. In oppositione vero privativa alterum extremum vilius nihil est simpliciter, cum sit de genere non entium; tamen aliquid sibi determinat pro subjecto: quod patet ex altero ejus extremo, quod requirit subjectum, et hoc est habitus ipse: semper enim nobilius extremum trahit ignobilius ad subjectum, si ipsum habuerit subjectum et si ipsum non habuerit subjectum, nec aliud habebit. In oppositione autem contraria utrumque extremum aliquid est realiter, licet imperfectius deficiat magis a ratione entis; per quem modum dicit Philosophus in lib. *De sensu et sens.* quod nigredo est privatio albedinis: et similiter utrumque extremum requirit idem subjectum: unde oportet quod oppositio contraria magis distet ab oppositione contradictoria quam privativa. Veruntamen quidquid oppositionis in ea est, totum est per naturam contradictionis, secundum videlicet quod alterum extremum pertinet ad ens, alterum vero ad non ens: album enim et nigrum sunt album et non album, sicut videns et caecus sunt videns et non videns, et in contradictione ens et non ens; sed differenter: quia in contradictione absoluta ens et non ens accipiuntur universaliter; in privatione vero non videns non accipitur universaliter: lapis enim est non videns, non tamen illud non videns opponitur visioni per modum privationis, sed non videns quod tamen natum est videre; hoc autem est non videns in particulari acceptum. Similiter non album opponitur albo sicut nigrum: non

quidem non album Æthiopsis, sed non album quod tamen natum est esse album. Ex dictis ergo manifestum est, quod contradictio, secundum quod contradictio est, nihil negat in genere, sed simpliciter extra genus. Quod autem contradictoriæ propositiones ut communiter accipiuntur in genere, ut puta homo albus, homo non albus, homo currit, homo non currit, hoc non est per naturam contradictionis simpliciter, sed per resolutionem propositionum contrariarum in contradictorias, ex quibus naturam oppositionis accipiunt; idem enim est homo niger et homo non albus, homo non currens et homo stans. Et ideo omnes tales contradictiones habent extrema in genere. Inde est quod sophistæ decepti sunt putantes alterum extremum contradictionis, non esse scilicet, in genere contineri, quia viderunt propositionem unam non esse alteri contradictoriam, nisi de eodem subjecto idem re vere affirmaretur et falso negaretur, et hoc in eodem tempore, quod acceperunt in prædicatis contrariis resolutis tamen in contradictoria : quæ quidem prædicata contraria necesse est convenientiam habere in subjecto et genere, ut patet de albo quod opponitur nigredini : nam quod non est simpliciter, non est album : adeo namque vera est propositio in qua negatur esse album de eo quod non est, sicut est illa in qua affirmatur esse de eo quod est. Et ideo cum dicitur, Socrates est albus, Socrates non est albus, non est contradictio absolute; sed contradictio participata in contrariis, in albo scilicet et nigro. Et ideo in omnibus talibus propositionibus utrumque extremum est in genere. In contradictoriis vero absolute neutrum extremum est in genere : hujusmodi enim sunt esse et non esse. Manifestum enim est quod ens non est in genere, nec suum oppositum. Et ideo, sicut omnes res quæ sunt in genere; ita omnes oppositiones rerum in genere existentium est resolvere in oppositionem illam cujus termini non sunt in genere. Et sicut res tanto perfectiores sunt quanto magis participant de ente, sicut substantia est perfectior accidente, quia in ea reperitur perfecta ratio entis; ita oppositiones rerum tanto perfectiores sunt in genere oppositionum, quanto magis accedunt ad participandam oppositionem cujus extremum est ens; et hoc reperitur in privatione et habitu quæ

sunt extrema primæ oppositionis pertinentia ad substantiam.

### CAPUT III.

#### *De oppositione relativa.*

Oppositio autem relativa minimum habet de contradictione : non quia habeat medium sui generis quod in aliis minuit rationem oppositionis, sed quia non requirit extrema realiter diversa. Sunt enim quædam relationes quæ sequuntur actionem intellectus, sicut est de relatione identitatis, et de genere et de specie, et hujusmodi, in quibus nulla est diversitas nisi quam facit intellectus. In aliis vero relativis quæ fundantur super quantitatem vel actionem, est diversitas realis, ut patet de duplo et dimidio, patre et filio, et hujusmodi. In omnibus autem aliis oppositionibus est reperire diversa extrema, sicut patet de albo et nigro quæ sunt contraria, de visu et cæcitate quæ sunt privative opposita. In contradictoriis vero absolute non sunt extrema realiter diversa, quia non ens non est aliqua res. Sunt tamen extrema contradictionis semper realiter non eadem : quod tamen in relativis quandoque deficit, ut dictum est. In aliis autem, scilicet relativis quorum esse est ad aliud, propter dependentiam eorum ad se mutuo, adhuc minus de contradictione est quam in oppositionibus aliis quarum extrema non includunt se invicem nec ponunt, immo cum unum inest, reliquum impossibile est inesse; et hoc universaliter verum est in omnibus oppositionibus quarum extrema conveniunt in aliquo subjecto, ut est de albo et nigro, visu et cæcitate. Et ideo transmutatur subjectum secundum illa, alterum relinquens et alterum requirens; et sic generatio unius est corruptio alterius.

### CAPUT IV.

#### *Quomodo diversi modi transmutationum sequuntur oppositiones prædictas.*

Nunc ergo restat videre de modis transmutationum quæ sequuntur oppositiones prædictas. Sciendum est ergo quod secundum doctrinam philosophorum, res productæ sunt a Deo ad esse suum : unde



non solum est Deus causa motus cœli, sed etiam substantiæ ejus, ut dicit Philosophus. Sicut ergo cum per naturam fit aliquid ex suo opposito, sicut esse animal fit ex non esse animal, ita necesse est esse simpliciter quod est proprius Dei effectus, emanare ex non esse simpliciter; et hoc est alterum extremum contradictionis; non quod ipsum non esse necesse sit duratione præcedere ipsum esse, sed natura tantum. Propria ergo causalitas Dei attingit extrema contradictionis, quæ extra genus sunt: et ideo actio sua nihil supponit necessario: et hæc actio est creatio, quæ non est de genere motuum, cum non habeat aliquod subjectum tamquam principium motus sui: motus autem semper est in mobili ut in subjecto. Inde est quod hæc actio sua solummodo est, et nulli creaturæ communicatur. Actio enim rei non excedit principia ipsius per quæ agit. Omnis autem res creata in genere est. Unde impossibile est creaturam ad id quod non est in genere attingere tamquam subjectum suæ actionis. Hujusmodi autem sunt esse et non esse, quæ sunt extrema contradictionis et creationis. Et ideo nulla creatura creare potest. Ad hujus evidentiam considerandum est quod esse diversimode se habet ad creationem vel ad generationem. Esse enim est prima rerum creaturarum, secundum auctorem lib. *De causis*: non quod creatio sit ut in subjecto in ipso esse, cum creatio passiva sit accidens, ejus est habere subjectum: sed ut in subjecto est in ipsa creatura. Sed creatio secundum quod relatio est, terminat respectum per se ad ipsum rei creatæ, et ad rem per ipsum esse. Quod patet: quia extremum relationis ipsius realiter est in creatura; quod non contingeret, nisi creatura haberet esse realiter. Ipsum tamen esse nullius accidentis est susceptivum, sed ipsum quod est. Ideo in re habente esse secundum illud quod relatio habet commune cum aliis accidentibus, relatio pertinet ad rem; sed secundum propriam rationem ejus quæ est referri ad alterum, pertinet ad ipsum esse rei per se, per quod res refertur ad Deum. Esse namque divinum proprie est ratio creandi: quia per creationem omnes res communiter accedunt ad participandum esse quantum est eis possibile, non autem naturam divinam: ipsa enim non participatur a creatura, licet ibidem sit esse et natura et sapientia et potentia,

sive quodcumque hujusmodi: hujusmodi enim in paucis reperitur. In generatione vero non ducitur generatum ipsum ad participandum esse generantis, sed ad participandum naturam ejus: aliter, cum esse sit suppositi, in tali natura foret participatio in supposito, et sic Socrates generaret Socratem: ideo in generatione Socrates non generat Socratem, cum suppositum non habeat nisi unum esse incommunicabile, sed homo generat hominem: natura enim manet una secundum rationem naturæ, cum definitio sit una. Deus vero non creat Deum: Deus enim nomen naturæ est, sicut homo; ens tamen creat ens; ideo relatio creaturæ ad Deum fundatur super esse creaturæ. Relatio vero unius rei ad aliam super ipsas res principaliter fundatur, ut dictum est; ideo proprie actio creatura ad rem terminatur unde compositum est quod generatur, secundum Philosophum VII *Metaph.* Compositum enim habet naturam generantis; ad ipsum autem esse ex consequenti, cum compositi sit esse. Actio vero Dei qua producit totam rem simul constitutam ex suis principiis, ad ipsum esse terminatur quod est intimum et maxime formale in re, cum in ipso esse rei salvetur alterum extremum relationis, ut dictum est. Ex dictis ergo manifestum est quod actio Dei, quæ dicitur creatio, totam rem producit simul cum principiis suis, ex quibus res constituitur in esse suo quod est objectum creationis, ut dictum est: et ideo illa non dicuntur creata quorum non est tale esse; cujusmodi est forma materialis, et materia, vel ipsa etiam per se accidentia talis rei; sed omnia hæc potius dicenda sunt concreata. Anima vero humana, licet sit forma; quia tamen habet esse per se, licet in corpore hoc sibi acquisitum sit et non extra; quia etiam non producitur de materia, sicut aliæ formæ; magis proprie dicitur creata quam aliæ formæ. Si enim consideretur terminus a quo in creatione, qui est nihil, sive non ens simpliciter; cum anima sit non ex materia aliqua, simpliciter creatur. Si vero consideremus terminum ad quem, qui est esse ad quod terminatur creatio; animæ autem humanæ in principio sui non acquiritur esse, sed homini, sicut docet Avicenna; ipsa proprie non dicitur creata. Sed hoc idem esse animæ est corpori communicatum: quod non reperitur in aliis formis. Et ideo in generatione hominis miscetur. In aliis au-

tem operibus naturæ vel artis, creatio tantum supponitur, in quibus omnino materia in essentia sua non efficitur, sed compositum per transmutationem materiae.

De prædictis autem dubitari potest. Nam cum esse sit terminus creationis, ut dictum est; non solum autem compositum quod subsistit, dicitur esse, sed etiam ipsa materia, vel etiam ipsa accidentia; videtur quod creatio terminetur ad materiam et ad accidentia: omnia enim quæ habent essentiam in rerum natura, necessario esse habebunt per naturam essentia suæ; et si aliunde illud eis acquiratur, nihil acquiritur. Unde fit quasi implicatio cujusdam contradictionis cum dicitur, Materia est essentia quædam, sine esse tamen: quod enim est essentia, aliquo modo est, ut videtur, et quod est, habet esse; quod autem est sine esse, non habet esse. Unde videtur quod essentia quæ ponitur sine esse, simul habeat esse et non habeat esse. Ad hujus ergo evidentiam considerandum est quod licet illud quod est aliquid aliud extraneum a natura sua possit habere adjunctum, secundum Boetium, ipsum tamen esse nihil potest secundum compati quod ad ipsum non pertineat; et ideo esse separatum quod Deus est, simplicissimum est. Cum autem in quibuscumque rebus inveniatur aliquid præter naturam ipsius rei quasi sibi adveniens, certum est illam rem non esse idem quod suum esse; et hoc est commune omni creaturæ, in omnibus enim creaturis sunt accidentia quædam præter illud quod spectat ad speciem rei: et in hoc differt omnis creatura a Deo. Ulterius in ipsis creaturis est differentia: quia in quibusdam idem est res naturæ et natura ipsa secundum id quod ad genus pertinet rei, licet res naturæ subjectum accidentium fuerit, et sic differt res naturæ a natura, quia sic in re naturæ accipitur suppositum speciei cum omnibus ipsum contingentibus, et hæc sunt accidentia omnia quæ sequuntur individuum. Sed res naturæ et ipsa natura unum et idem sunt quod simpliciter respondet conceptioni speciei et individui in ea. In aliis vero, ut in rebus materialibus, differt individuum sive res naturæ ab ipsa natura non solum per accidentia quæ contingunt ipsum individuum, cujusmodi est quantitas et hujusmodi; sed per aliquid quod sui generis est. Et sicut in eis non ab uno simplici accipitur ratio

generis et differentia, sed a materia accipitur genus, et a forma differentia; ita in eis aliunde accipitur ratio speciei, a forma scilicet; aliunde vero ratio individui, quia a materia. Forma enim facit speciem; et ideo dicitur differentia constituere speciem et materia individuum. Manifestum est ergo quod per aliquid sui generis differt individuum in rebus materialibus a specie, et non solum per accidentia. In rebus vero simplicibus individuum solum per accidentia differt a specie, et non per aliquid sui generis; et ideo in eis tot sunt species quot sunt individua. Sed quia dictum est genus sumi a materia, et differentiam a forma, et materiam causare individuum, et formam speciem; ideo sciendum est quod idem est differentiam sumi a forma, et formam constituere speciem. Differentia enim specifica sumpta facta est species. Et idem est genus sumi a materia, et materiam causare individuum: nam genus fit per actum intellectus abstrahentis universale a materia particulari, quæ est principium individuationis. Inde est quod sicut materia est prius in constitutione rei quam forma, ita genus prius est differentia. Ex dictis ergo manifestum est quod in Deo solum idem est esse et natura et suppositum omnibus modis. In rebus vero immaterialibus idem est natura et suppositum in omnibus quæ ad idem genus pertinent. In compositis vero omnia prædicta ad invicem differunt. In Deo ergo esse æqualiter respicit naturam ipsam et rem naturæ. Et ideo natura divina non habet esse ab aliquo supposito divinæ naturæ: et ideo essentia divina est habens esse, etsi non significatur ut habens esse, sed ut quo aliquid est. Quod autem essentia divina sit habens esse, manifestum est, cum nihil operetur nisi quod habet esse. Cum ergo divina essentia creet et gubernet omnia, habet ipsum necessario esse. Inde est quod est necesse ponere in divinis suppositum aliquod essentia ad hoc quod essentia habeat esse, licet non habeat modum suppositi, cujus est habere esse; sed de perfectione ipsius essentia divinæ est quod ipsa est suum esse: et ideo non solum est id quo aliquid est, sed in se est perfecte subsistens et perfectum esse habens. In rebus vero simplicibus cum idem sit suppositum et essentia, ut dictum est, et differant secundum rationem, necessario essentia erit habens, sicut et suppositum abso-

lute. Sed quia ratione differunt : essentia enim est ut quo aliquid est, suppositum vero ut habens esse ; ideo cum essentia non sit suum esse, dicitur essentia in eis habere esse per suppositum, cum quo tamen realiter idem est, ut dictum est. In rebus vero materialibus, in quibus differunt res naturæ et ipsa natura, et utrumque ab ipso esse, ut dictum est ; ipsa non habet esse nisi in re naturæ, quæ est ut habens esse : semper enim suppositum in qualibet natura est habens esse in illa natura. Suppositum autem et res naturæ in genere substantiæ est prima substantia, secundum Philosophorum in *Præd.* : ejus est per se esse, ut ibidem dicitur, et non in alio sicut accidens nec sicut pars : et non solum hoc, sed nec habet dici de aliis : in quo differt ab aliis secundis substantiis, quæ de aliis dicuntur, licet non sint in aliis. Cum ergo proprium sit suppositi in genere substantiæ per se esse, nam omnia alia, ut accidentia et partes et ipsa universalia quæ intellectus facit, non per se subsistunt, sed a prima substantia dependent, quæ destructa impossibile est aliquid aliorum remanere sub rationibus propriis : non enim manet homo vel animal destructis individuis omnibus utriusque ; nec manebit aliquid habens rationem partis istorum, nec aliquid accidens eorum ipsis destructis ; essentia in rebus materialibus non habet esse, cum differat a suo esse ; sed ipsum suppositum est habens esse, a quo iterum ipsa essentia differt. Unde in rebus materialibus esse non sequitur essentiam, nisi quando principia ipsius essentiae, materia scilicet et forma, constituent suppositum per se existens quod est prima substantia, quæ non potest esse dependens ab aliquo, sed per se subsistit in esse perfecto. Inde manifestum est quod partes animatorum, ut manus et pedes et hujusmodi quæ sunt in potentia propinqua ad actum seorsum qui eis acquiritur sola divisione a toto, siue alienius novæ essentia: productione, habent aliud esse de novo quod ad prædictam essentiam non sequebatur : quia ipsa ejus principia non constituebant aliquid suppositum habens esse actu, sive primam substantiam, ejus solum est habere esse per se, quod per ipsam suæ essentiae convenit et non aliunde, cum essentia non habeat esse nisi per suppositum ipsum, ejus est habere esse, ut dictum est. Ex dictis ergo manifestum est quod non est dicendum

omne id habere esse in rerum natura, esse dico quod sequatur essentiam, de quo propositio formari potest. Ideo cum dicitur, Cæcitas est in oculo, non designatur cæcitatem habere esse sequens essentiam, cum privatio non habeat essentiam : sed significatur potius quod oculus careat quodam esse. Similiter cum dicitur, Materia prima est non ens per accidens, non significatur quod aliquid esse sequatur essentiam materiæ ipsius, quia esse actus est qui in materia prima de se non reperitur, cum sit pura potentia, sed significatur quod essentia materiæ est subjecta privationi, ratione ejus dicitur non ens ; non simpliciter quod est nihil, sed in genere ; sicut est ipsa privatio quæ est participatio non entis simpliciter quod est alterum extremum contradictionis, et propinquius quam alterum contrariorum quod ponit aliquid in natura rei ipsius. Et propter hoc dicit beatus Augustinus quod materia est prope nihil : quod est propter privationem adjunctam. Ex dictis facile est solvere ea quæ superius objecta sunt. Hoc enim solum creari dicitur quod habet esse ; et hoc est suppositum, sive prima substantia, ejus est esse per se. Materia vero non dicitur esse nisi per tale suppositum, nec etiam accidentia. Et ideo concreata dicuntur potius quam creata. Nec est etiam implicatio contradictionis cum dicitur, Materia est quædam essentia, si esse non sequitur ipsam essentiam : quia cum dicitur quod materia est essentia quædam, idem prædicatur de se, quia materia est sua essentia quod in omnibus simplicibus invenitur. Non autem per hoc denotatur aliquid esse sequi essentiam, quia in omni re creata differt esse ab ipsa re. Nec oportet quod quodcumque in propositione aliqua ponitur « est » aliquid esse etiam respondere in re, ut dictum est.

## CAPUT V.

### *Quomodo ex contrario fit contrarium.*

Nunc restat ostendere, quomodo ex contrario fit contrarium. Cum enim per naturam non possit fieri transmutatio inter extrema contradictionis, nec a privatione ad habitum, ut dictum est, hujusmodi namque motus non sunt ; relinquuntur per naturam solum transmutationem esse inter contraria inter quæ attenditur

motus, secundum Philosophum. Scien- dum est ergo quod contrarietas proprie reperitur in qualitatibus activis et passivis, quæ sunt propriæ passionibus corporum naturalium. Unde spoliari non potest corpus ab his qualitatibus nisi ipsum corrumpatur, sicut calor non potest auferri ab igne nisi corrumpatur ignis : calor enim ignis sequitur formam substantialem ipsius ignis inseparabiliter. Et ideo corrupto calore necesse est ignem corrumpi. Secundum has autem qualitates attenditur alteratio quæ consistit in actione et passione. Passiones vero proprie dicuntur, per quas semper abjicitur aliquid a re. Et ideo cum alteratio fuerit perfecta et in termino sui, necessario abjicietur contraria qualitas et corrumpetur suum subjectum, quod est ens actu : et nihil relinquetur nisi materia prima tantum sub forma noviter inducta, cum corruptio unius sit generatio alterius, secundum Philosophum in lib. *De gener. et corrupt.* Unde impossibile est generationem fieri sine alteratione præcedente. Et hoc est manifestum cum ex uno elemento fit aliud, quæ sibi contrariantur in qualitatibus ; ut est ignis et aqua ; sed in his quæ in qualitatibus conveniunt, sicut in habentibus symbolum, ut est ignis et aer, non videtur alteratio ita manifesta. Sed quia impossibile est eandem qualitatem in diversis corporibus manere, cum accidens non migret de subjecto in subjectum, necesse erit alterationem ponere in generatione ignis ex aere : ideo advertendum est quod diversimode fit alteratio. Quælibet enim qualitas corporum naturalium duos terminos habet : unde ultra illos non invenitur illa qualitas, nec citra. Secundum hoc ergo habet considerari natura alterationis : nam aliter se habet in his quæ generantur per intensionem, et aliter in illis quæ generantur per remissionem. Cum enim ex aere generatur ignis, generatio fit per intensionem caloris aeris ; et ideo in tota alteratione nihil caloris auferitur, sed semper intenditur. Et quia terminum habet ultra quem intendi non potest ; ideo cum calor ignis ultra intenditur, simul totus calor aeris auferitur, et non pars post partem auferendo : unde privatio facta in aere magis et magis aliquid abjicit non partem auferendo ut in aliis ; sed quia magis et magis facta, plus promovet ad totum similiter auferendum. Sed cum ex igne fit aer, minuitur paulatim calor ignis, hoc enim fit per remis-

sionem : sicut enim videmus quod ignis in materia aliena, ut in ligno, minus caloris habet quam in propria ; ita cum materia sua disponitur ad aliam formam, tanto plus remittitur ejus calor ; et quanto plus disponitur, tanto calor ejus minuitur : et similiter cum elementa non habentia symbolum ex se generantur, alteratio semper fit per remissionem. Quando ergo dicit Philosophus, quod in habentibus symbolum facilior est transmutatio, non ideo dictum est quod eadem qualitas maneat in utroque ; sed quia minor resistentia et minor elongatio potentia ab actu est in elementis convenientibus in symbolo quam in aliis : quod patet ex eo, quod tota simul caliditas aeris manet cum calore ignis usque ad ejus corruptionem. Sed adhuc notandum est, quod in elementis habentibus symbolum, ut sunt ignis et aer, facilius ex uno eorum fit alterum quam e contrario : facilius enim ex aere fit ignis, quam e contrario ex igne aer ; quia qualitas ignis inter omnes qualitates elementares est maxime activa, et ideo non de facili patitur. In corporibus autem diversimode accipiuntur termini, infra quos natura rei salvatur : uno modo a parte ipsius mixtionis ; alio vero modo a parte diversarum specierum, ad quas requiruntur diversæ proportionibus miscibilium. A parte namque ipsius mixtionis sunt termini, quibus transit fit continuo elementum simplex, cujus virtus dominabatur in mixto super alia elementa. A parte vero proportionis miscibilium, quia requiritur ad diversas formas, et ad diversa esse, sunt termini similiter. Et ideo, cum una proportio deficit, succedit forma dans novum esse. Considerandum est tamen, quod una forma mixti, ut puta anima humana, non salvatur in aliquo indivisibili ipsius proportionis, sed in quadam latitudine, infra terminos tamen naturæ certos ; nec ea remota necesse est statim formam simplicis elementi induci, sed aliud mixtum potest sequi : unde magis distant a se termini mixtionis simpliciter, in quibus salvari potest natura mixti, quam termini infra quos salvatur homo, vel quodcumque animatum. Cum termini ipsius mixtionis simpliciter transit sint, non fit nisi simplex : unde cum simplex elementum sit ultimum in quod resolvitur mixtum, necessario simplex elementum fuit primum in ejus constitutione ; non tamquam potentia tantum, sed sicut illud cujus virtus in ipso manet,



secundum Philosophum; et hæc virtus mutatur a proportione una in aliam, generando et corrumpendo species mixtorum, donec ad naturam propriam redeatur. Unde cum unum mixtum fit ex alio, non est necesse elementa ex novo convenire; immo virtutes elementorum causando diversas proportiones mixtionis causant diversa mixta: unde cum ex vivo fit mortuum, utrumque infra terminos mixtionis salvatur, sed non infra terminos proportionis necessarios ad speciem determinatam. Cum vero ex mixto fit simplex elementum, transitur non solum terminus proportionis miscibilium, sed etiam terminus mixtionis; utrumque tamen fit per virtutem formarum elementorum quæ manent in mixto, secundum Philosophum. Ex quo patet quod virtus formæ elementaris dominantis in mixto habet non solum solvere mixtum et inducere propriam formam talis elementi, sed transmutare mixtum de una proportione miscibilium in aliam, quousque in ipsam formam propriam deveniatur. Et ideo, licet forma corporis mortui non fuerit virtute in vivo: quia corpus mortuum non venit in constitutione corporis vivi, quod tamen facit quidquid virtute continetur in alio, sicut patet in elementis quæ constituunt mixtum; est tamen in vivo virtus elementaris, quæ nata est solvere proportionem miscibilium, in qua salvatur vita; ad hoc sequitur quod succedat alia forma dans novum esse. Manifestum est enim quod nulla virtus erat in mixto agens per illam formam, quod tamen contingeret, si virtute esset in mixto; sed hæc forma fuit in mixto in virtute non propria, sed formæ elementaris, ut dictum est. Ex dictis manifestum est, quod licet extrema contradictionis absolutæ et etiam oppositionis privativæ non subsint potentiæ creatæ, tamen contrarietatis extrema ei subiecta sunt: utrumque enim ponit aliquid in rerum natura. Et ideo manifestum est alterum extremum contrarietatis minus elongare potentiam materiæ ab actu alterius extremi, quam in contradictoriis vel privative oppositis; super quæ non potest nisi potentia infinita, ut dictum est. Sed de hoc dubitari potest: quod termini generationis physicæ sunt esse et non esse, quæ sunt contradictoria: et propter hoc generatio simpliciter terminatur ad substantiam. Substantiæ autem nihil est contrarium secundum Philosophum. Unde ex his duobus videtur, quod

extrema contradictionis magis subsint potentiæ naturali quam extrema contrarietatis. Ad hujus ergo evidentiam considerandum est quod esse est terminus generationis; et ideo quantumcumque aliquid acquiratur ante ipsum esse, non dicitur res generari; et hoc est esse simpliciter, secundum Philosophum. Et quia una res non potest habere simul duo diversa esse simpliciter, aliud autem esse quam simpliciter non invenitur in substantia, sed in accidentibus, in quibus est magis et minus: et ideo semper cum unum esse acquiritur, aliud abjicitur, et e converso; et sic generatio et corruptio esse consequuntur, secundum Philosophum. Hoc autem esse non est esse in communi, sed esse hoc vel illud compositum in specie determinata: omne enim agens naturale est in specie aliqua: et ideo sua actio non extenditur ad esse quod non sit in sua specie, cujusmodi est esse in communi acceptum, quod est alterum extremum contradictionis absolutæ, ut dictum est. Similiter non esse, quod est terminus a quo in generatione simpliciter, non est non esse absolute, sed non esse hoc; esse tamen aliquid ut non esse actu, est esse in potentia, secundum Philosophum. Esse autem in potentia ad unum necessario adjungitur esse actu aliud, quia nunquam est esse in potentia pura sine aliquo actu; aliter materia esset sine forma. Et propter hoc ista extrema subsunt potentiæ naturali: esse enim in potentia propter esse actu adjunctum subest agenti naturali: agens enim naturale semper requirit subjectum actu in quod agat. Et ideo finis actionis suæ est spoliatio actus prioris et inductio novi actus. Ex his manifestum est, quod illud non est esse simpliciter extra genus, sed est negatio existentis in genere, ut principium est in genere. Actus enim est alterum eorum principiorum quæ sunt in genere, quia genus dividitur per actum et potentiam: ideo negatio hujus vel illius actus ad idem genus pertinet, quia negat in illo genere, et non in alio: ideo non esse, quod est terminus in generatione simpliciter, pertinet ad genus substantiæ. Est ergo ista extrema contradictio per resolutionem, ut dictum est supra de non albo, quod opponitur nigro: nihil enim non album sic est non album, quod non sit nigrum, vel medio modo coloratum. Diversimode tamen fit hic et ibi resolutio oppositionis posterioris in con-



traditionem : nam in qualitatibus istis utrumque extremum est aliquid actu in se, sicut nigredo et albedo. Et ideo ex utraque parte potest sumi negatio : potest enim dici nigrum et non nigrum, sicut dicitur album et non album. Sed in generatione simpliciter alterum extremum non est aliquid actu in se, ut patet de materia prima, licet habeat actum adjunctum. Et ideo non potest ex utraque parte sumi negatio, sed ex altera tantum. In generatione ergo simpliciter fit resolutio contrariorum extremorum in contradictoria, quia unus terminus, esse scilicet hoc vel illud quod acquiritur per generationem, ratione qualitatis suæ opponitur actui adjuncto ipsi esse in potentia propter ejus qualitatem, sicut ignis contrariari ipsi aquæ propter naturam calidi et frigidi. Sicut ergo dicitur non album quod tamen est nigrum vel medium, opponi albo, et nullum alium non album ; ita non esse actu hoc, sive esse in potentia hoc, cui tamen adjunctum est esse actu aliud, opponitur esse actu hoc. Ex dictis ergo manifestum est, quod ad alterum extremum contradictionis simpliciter, ad esse scilicet, pertinent ambo extrema generationis, esse scilicet hoc, et non esse hoc, quod est esse in potentia. Esse enim in potentia aliquo modo ad esse pertinet. Sed comparando unum eorum ad alterum, esse in potentia est quasi non esse, quia quod est in potentia non est, secundum Philosophum : et similiter esse album et non esse album, quod est esse nigrum vel medio colore coloratum, ad esse pertinent, licet non esse album vel esse nigrum comparatum ad esse album sit quodammodo non ens, cum ad vilius extremum contradictionis spectet. Quod autem ista non sint absolute contradictoria, manifestum est ex dictis. Nam non esse, quod est alterum extremum generationis, non est non esse simpliciter, secundum Philosophum ; sed illud non esse idem est quod esse in potentia. Et ideo manifestum est quod talis non esse et esse oppositi est commune subjectum, materia scilicet : et similiter est de nigro vel non albo, quod est idem, et albo. Horum enim est commune subjectum quod est ens medium. Sed contradictoria medium non habent, secundum Philosophum, ut supra dictum est. Unde ista sunt contradictoria per resolutionem aliarum oppositionum in contradictorias, quia oppositio contradictoria includitur in omni alia opposi-

tione, ut supra dictum est, sicut prius includitur in suo posteriori.

His objiciunt sophistæ, dicentes utrumque extremum contradictionis in genere esse : quorum ratio est, quia illud quod nihil est, nihil potest negare : unde non ens quod est extra genus, nihil negat. Addunt etiam quod contraria possunt simul esse falsa, contradictoria vero non. Unde non videtur eis quod oppositio contraria possit resolvi in contradictoriam. Dicendum est ergo eis quod ens uno modo dicitur quod significat veritatem propositionis, ut dicitur V *Metaph.* Ideo enim ita vera est negatio entis de eo quod non est, sicut ejus affirmatio de eo quod est ; et per oppositum, necessario erit falsa affirmatio entis de eo quod non est, et negatio entis de eo quod est. Eo enim quod res est vel non est, oratio dicitur vera vel falsa, secundum Philosophum. Et ideo id quod nihil est, non negat aliquid quod est esse, sed negat aliquid quod non est esse. Et ideo duplex est sermo quo dicitur quod non est nihil negat. Uno modo a parte prædicati : et hoc est illud quod negatur : et sic verum est id quod non est nihil negare, quia quod non est nihil est aliquid, et esse aliquid aliquid est ; et hoc negatur per alterum contradictorium. Alio modo a parte subjecti : et sic de eo quod non est, vere potest esse removeri. Unde, cum negare pertineat ad compositionem quæ communis est subjecto et prædicato, ipsa, cum a parte ipsius subjecti nihil habeat, rationem non entis habet ; a parte vero prædicati aliquid habet ipsa compositio : et ideo a parte subjecti removet naturam rei et proprietatem subjecti ; a parte vero prædicati naturam non removet, sed inhærentiam tantum. Quod autem dicunt contraria simul falsa, contradictoria vero non ; hoc est in propositionibus ratione signorum : quæ in contrariis sunt universalis ex utraque parte ; in contradictoriis vero non, sed ex una tantum. Cum enim prædicatum aliquod contingenter inest alicui subjecto, non potest universaliter de eo affirmari vel negari nisi falso ; et ideo falsitas quæ est in talibus propositionibus accidit quia accipitur ut subjectum contrariorum quod non est subjectum secundum se, sed secundum aliquid sui, non tamen quod secundum se denominari potest : unde falsitas attenditur a parte subjecti, et non a parte contrariorum : et ideo cau-

satur ex additione signorum : signa autem subjectis habent addi. Si vero attendatur natura ipsorum contrariorum tantum, inter quæ est oppositio, non erit convenientia in falsitate. Si enim accipiat subjectum secundum quod natum est subjici contrariis, ut corpus, impossibile est simul falso affirmare et negare de eo alterum contrariorum : ut puta, si accipiat aliquis homo ut subjectum sanitatis et ægritudinis, affirmatio unius contrariorum de eo est negatio ejusdem quod est affirmatio alterius : et ideo nec simul veræ sunt nec simul falsæ, sicut nec duæ contradictoriæ absolute. Considerandum est ergo quando aliquid reperitur in contrarie oppositis, utrum hoc sit a parte subjecti, aut a parte extremorum. Si a parte extremorum, attribui debet ipsi oppositioni secundum se. Si autem a parte subjecti, non nisi per accidens ; et ideo accidit quod duæ propositiones contrariæ sunt simul falsæ a parte subjecti propositionis, et non ratione extremo-

rum, ut dictum est. Et ideo quando negatur alterum extremorum de subjecto aliquo, ut album, patet quod ipsa negatio supponit aliquid, a quo removet albedinem, scilicet subjectum ; et similiter quod removetur. In contradictoriis autem absolute non præsupponitur aliquid tamquam subjectum, cum non habeant medium, ut dictum est. In oppositis vero relative non est transmutatio ; sed tamen ipsa relatio quandoque sequitur transmutationem, sicut sunt relativa quæ sequuntur generationem naturaliter. In aliis vero generibus super quæ relatio fundatur, vel est transmutatio inter ipsa extrema, sicut relatio inter esse et non esse, et hoc pertinet ad genus substantiæ : vel ipsum genus consistit in ipsa transmutatione, ut actio et passio. Transmutatio autem multas habet species, ut patet in lib. *Phys.* : sed motus qui est una species, non est nisi in tribus generibus, ut ibidem patet. Et hæc de quatuor oppositis dicta sufficiant.

---

# OPUSCULUM XXXIV

## DE DEMONSTRATIONE.

(EDIT. ROM. XXXVIII.)

Ad habendum cognitionem de demonstratione, sciendum quod demonstratio est syllogismus ex veris, primis et immediatis, prioribus, notioribus, causisque conclusionis : et hæc est demonstratio potissima : aut ex talibus quæ per aliqua vera et prima principium suæ cognitionis sumpserunt : et hæc est demonstratio non potissima. Unde sciendum est quod tria exiguntur ad demonstrationem : scilicet subjectum, passio et dignitas. Subjectum est de quo prædicatur passio. Passio autem est accidens per se convertibile cum subjecto de quo prædicatur. Est ergo demonstratio potissima, quando prædicatur passio de subjecto universali per medium quod est definitio dicens quid et propter quid. Subjectum autem universale passionis alicujus est quod est convertibile cum sua passione, et quod habet causam intra se suæ passionis ; unde triangulus est subjectum universale hujus passionis, quæ est habere tres angulos : quod est convertibile cum sua passione, quia quidquid est triangulus, habet tres angulos etc., et e converso : et triangulus in eo quod triangulus est, habet angulos. Subjectum particulare est quod non est convertibile cum illa passione, et non habet causam intra se suæ passionis, ut isosceles ; quia non quidquid habet angulos tres, est isosceles ; quia isosceles in eo quod isosceles, non habet tres angulos, sed in eo quod triangulus. Definitio vero dicens quid, est definitio data per essentialia, et est definitio subjecti, « ut triangulus est figura plana tribus lineis contenta. » Definitio vero propter quid, est definitio data per cau-

sam, et quæ est definitio passionis, quia definitio passionis dicit causam inhærentiæ passionis in subjecto, per quod subjectum passio habet esse : verbi gratia, habere tres angulos æquales duobus rectis est habere angulum extrinsecum æqualem duobus rectis intrinsecis sibi oppositis : et propter hoc passio inest triangulo per suam definitionem. Si autem quæretur propter quid habet triangulus etc. : respondetur quod habet angulum extrinsecum æqualem duobus rectis sibi oppositis. Et dico quod definitio dicens quid et propter quid, quæ scilicet est ex oppositis, et ita ex definitione subjecti et passionis, est medium in potissima demonstratione, propter quam prædicatur passio propria de subjecto universali et adæquate : verbi gratia : omnis figura plana tribus lineis contenta, habens angulum extrinsecum æqualem duobus intrinsecis sibi oppositis, habet tres angulos etc. In propositione majori cadit secundus modus dicendi per se, qui est quando definitum prædicatur de definitione. Sed omnis figura plana tribus lineis contenta habet angulum extrinsecum æqualem duobus intrinsecis sibi oppositis. In hac minori cadit primus modus, qui est quando definitio vel pars definitionis prædicatur de subjecto, qui est cum reduplicatione causæ : ut luna propter interpositionem terræ deficit ; et interemptus propter interemptionem interiit. Aliud exemplum est de potissima demonstratione. Omne corpus naturale illuminatum a sole privatum luce a terræ objectu deficit. Luna est hujusmodi. Ergo luna deficit. Et probatur

passio per definitionem dicentem quid et propter quid. Demonstratio vero non potissima fit multipliciter : scilicet, quando prædicatur passio de subjecto particulari per medium quod est subjectum illius passionis ; quia scilicet subjectum est causa proxima passionis in subjecto particulari, ut si probatur habere tres de isoscele per triangulum : scilicet, Omnis triangulus habet tres : isosceles est triangulus : Ergo isosceles habet tres. Unde iste syllogismus potest esse sophisticus, vel dialecticus, vel demonstratio particularis. Syllogismus enim sophisticus est, si probetur de subjecto particulari tamquam de subjecto universali et convertibili, propter identitatem quam habet isosceles cum triangulo : quando enim propter identitatem in parte subjecti cum prædicato movetur ad credendum quicquid dicatur de uno et de altero, est fallacia accidentis. Syllogismus dialecticus est prout probatur passio de illo, ut de isoscele, ut de subjecto particulari per triangulum, in quantum est commune prædicabile quoddam de pluribus : manifestum est enim quod in syllogismo dialectico est commune prædicabile de pluribus. Item demonstratio particularis est, quando passio de isoscele ut de subjecto particulari per triangulum, secundum quod est causa proxima passionis in subjecto particulari : triangulus enim est causa proxima quare isosceles habet angulos tres : non enim isosceles in eo quod isosceles,

habet tres, sed in eo quod triangulus. Aut demonstratio non potissima fit aliter : scilicet quando probatus effectus per causam remotam, vel quando probatur causa per effectum ; ut si probetur habere tres de isoscele non per triangulum qui est causa proxima et immediata isoscelis, ut dictum est, sed per figuram planam etc., quæ est definitio trianguli et suæ passionis, dicens quid et propter quid, quod est causa proxima respectu subjecti universalis, et causa remota respectu subjecti particularis. Item aliter fit demonstratio non potissima, quando probatur causa per effectum, ut si de planeta probetur prope esse per non scintillare, hoc modo omne corpus luminosum non scintillans est prope positum visui. Sed planeta est hujusmodi. Ergo prope ponitur nobis. Hic enim demonstratur causa ejus quod est non scintillare, et non e converso : non enim quia planeta non scintillat, est prope positus, sed quia prope positus non scintillat. Si vero per corpus luminosum demonstraretur non scintillare, demonstrabitur effectus per causam. Simile est si probetur de luna quod sit circularis, quia augetur circulariter, hoc modo : Omne corpus luminosum vel aptum illuminari in quo lumen augetur circulariter, est circulare : luna augetur circulariter, ideo est circularis. Sed quia circularis et spherica est luna, ideo lumen circulariter augetur : et sic patet quod diximus.

# OPUSCULUM XXXV<sup>1</sup>.

## DE FALLACIIS AD QUOSDAM NOBILES ARTISTAS

(EDIT. ROM. XXXIX.)

Quia logica est rationalis scientia, et ad ratiocinandum inventa; ratiocinari autem contingit recte, et non recte: utrumque enim ad logici considerationem spectat, ut per rectam ratiocinationem ad rei veram cognitionem perveniat, et falsam ratiocinationem vitando errorem falsitatis evitet. Uterque autem<sup>2</sup> ratiocinandi modus competit uni homini, et ad seipsum et<sup>3</sup> ad alium: nam et secum aliquis considerans potest recte et non recte ratiocinari, et cum alio conferens. Sed cum aliquis secum considerans ratiocinatur non recte, præter intentionem hoc accidit; quia nullus sui ipsius deceptionem intendit. Cum autem ad alium ratiocinatur non recte, contingit quandoque ex intentione ratiocinantis, cum scilicet aliquis de altero intendit vel experimentum sumere, vel victoriam habere ad sui gloriam. Ratiocinatio autem quæ ad seipsum est, syllogismus dici potest, sive aliqua alia species argumentationis. Sed ratiocinatio quæ est ad alterum, non solum est syllogismus sed<sup>4</sup> argumentatio, sive<sup>5</sup> disputatio: vertitur enim inter duos, scilicet inter opponentem et respondentem; et ideo de falsis ratiocinationibus tractaturi, primo de disputatione incipiendum est.

—

Disputatio est actus syllogisticus unius ad alterum ad aliquod propositum osten-

dendum. Per hoc quod dicitur actus, tangitur disputationis genus: et per hoc quod dicitur syllogisticus, tangitur disputationis instrumentum, scilicet syllogismus, sub quo comprehenduntur omnes aliæ species argumentationis et disputationis sicut imperfectum sub perfecto; et per hoc distinguitur disputatio ab actibus corporalibus, ut currere vel comedere: et ab actibus voluntariis, ut amare et obedire: nam per hoc quod dicitur unius ad alterum, tanguntur duæ personæ opponentis et respondentis, inter quas vertitur disputatio: etiam hoc additur ad differentiam ratiocinationis quam habet qui secum ratiocinatur. Per hoc autem quod dicit, ad propositum ostendendum, tangitur disputationis effectus, sive terminus, aut finis proximus: et per hoc distinguitur disputatio a syllogismis exemplaribus, qui non inducuntur ad ostendendum propositum aliquod, sed ad formam syllogisticam exemplificandam.

—

Disputationis autem quatuor sunt species: scilicet doctrinalis, dialectica, tentativa et sophistica, quæ etiam alio nomine dicitur litigiosa. Doctrinalis sive demonstrativa est quæ ad scientiam ordinatur, procedens ex primis et veris et per se notis, et propriis principiis illius

<sup>1</sup> Divisio hujus opusculi in capit. deest in Cod...

<sup>2</sup> Parm. omittit: « autem. »

<sup>3</sup> Parm. omittit: « et. »

<sup>4</sup> Parm.: « vel. »

<sup>5</sup> Parm.: « sed. »



scientiæ de qua fit disputatio ; et hoc vertitur inter docentem et addiscentem. Dialectica vero disputatio etiam est ex probabilibus procedens, et ad opinionem vel propositum tendens. Probabilia autem dicuntur quæ videntur omnibus aut pluribus <sup>1</sup> vel sapientibus et his <sup>2</sup>, aut omnibus, aut præcipuis aut maxime notis. Tentativa autem disputatio est quæ ordinatur ad experimentum sumendum de aliquo per ea quæ videntur respondententi. Sophistica autem est tendens ad gloriam, ut sapiens esse videatur : unde dicitur sophistica quasi apparens sapientia et procedit ex his quæ videntur esse vera sive probabilia, et non sunt ; vel simpliciter falsas propositiones assumendo, quæ videntur esse veræ ; vel in virtute falsarum propositionum argumentando. Locales enim argumentationes sunt in virtute verarum propositionum, ex quibus tota virtus argumentationis pendet, sicut ista argumentatio : Socrates est homo : ergo Socrates est animal, procedit ex virtute hujus propositionis : De quocumque prædicatur species, et genus, quæ est simpliciter vera. Sophistice sic argumentatur : Socrates est animal : ergo est homo, quæ in virtute hujus propositionis falsæ procedit : De quocumque prædicatur genus, et species. Relictis aliis disputationibus, ad præsens de his quæ ad sophisticam pertinent intendimus.

Quia vero sophistica, ut dictum est, ad gloriam tendit, volens sapiens videri : hoc autem assequi studet per hoc quod de adversario cum quo disputat victoriam habeat apparentem : quod quidem fit, cum ipsum ad aliquod inconveniens ducat : ideo terminus disputationis sophisticæ est aliquod inconveniens, ad quod sophista ducere nititur respondentem, et hoc dicitur meta, idest finis vel terminus. Unde de duobus oportet tractare : primo de hujusmodi metis, secundo de modis argumentandi, quibus sophistæ nituntur ad metas ducere respondentem. Sunt autem metæ quinque : scilicet redargutio, falsum, inopinabile, solæcismus et nugatio. Redargutio est prænegati concessio, vel præconcessi negatio in eadem disputatione vi argumentationis factæ : ut si respondens negaverit se carnes crudas comedisse, sophisticæ contra arguat sic : Quicquid emisti comedisti : carnes crudas

emisti, ergo carnes crudas comedisti. Si vi hujusmodi argumentationis respondens concedat quod prius negaverit, est redargutus : et talis modus argumentandi dicitur elenchus, si bonus sit syllogismus : vel dicitur apparens elenchus si videatur et non sit aut syllogismus, aut contradictio. Est autem elenchus syllogismus contradictionis. Si autem non in eadem disputatione, vel vi argumenti, sed propria voluntate aliquis negat concessum, vel concedat negatum, non est redargutio. Falsum autem, secundum quod hic sumitur, est aliquod manifestum falsum, vel concessio alicujus manifeste falsi, quod respondens concedere cogitur vi sophisticæ argumentationis : sicut hic : Omnis canis est latrabilis. Cæleste sidus est canis. Ergo cæleste sidus est latrabile. Inopinabile est quod est contra communem opinionem omnium, vel plurium, quod tamen non est falsum. Differt autem a falso, quia omne falsum est inopinabile, sed non convertitur : quia aliquid est contra opinionem communem, quod tamen non est falsum, erit tamen inopinabile : sicut stellam esse majorem terra, et aliquem regem divitem et felicem esse miserum et infelicem et infortunatum, si ipse sit peccator. Ad quod potest sophisticæ sic aliquis duci. Quemeumque contingit ab aliquo vinci, est infelix, quia ille qui vincitur est infelix. Sed regem contingit ab hoste vinci, ergo est infelix. Solæcismus est vitium in contextu partium orationis contra regulas artis grammaticæ factum, ut vir alba, et homines currit : et ad hoc potest aliquis sic sophisticæ duci, Tu seis hoc. Hoc autem est lapis. Ergo tu seis lapis, quod grammaticæ non dicitur. Nugatio autem est ejusdem rei ex eadem parte inutilis repetitio, ut homo currit. Dico autem ex eadem parte : quia si ponatur idem in subjecto et in prædicato, non erit nugatio, ut hic homo est homo. Inutilis autem repetitio dicitur, quia si idem repetatur ad majorem expressionem non erit nugatio, ut cum dicitur, Deus Deus meus, respice in me. Ad hoc potest aliquis sic duci sophisticæ. Iste nasus est simus. Sed simus idem est quod nasus simus. Igitur iste nasus est nasus simus. Et est sciendum, quod ista inconvenientia respiciunt diversas scientias : nam redar-

<sup>1</sup> Parm. omittit : « aut pluribus. »

<sup>2</sup> Parm. : « sapientibus, aut omnibus, vel præcipuis et magis notis. »

gutio est contra Metaphysicam, ad quam pertinet consideratio hujus primi principii, Contradictoria non sunt simul vera. Falsum vero est contra scientiam naturalem, quæ considerat res sensibiles, in quibus veritas et falsitas est manifesta : et similiter contra mathematicam, in qua est maxima certitudo. Inopinabile vero est contra Dialecticam, quæ procedit ex probabilibus quæ sunt secundum opinionem omnium vel plurium sapientum. Solœcismus est contra Grammaticam : nugatio est contra Rhetoricam, cujus est ornate loqui. Et sic dum in scientiis singulis ad inconveniens sophista ducit respondentem, apparet circa omnia sciens esse.

Nunc autem <sup>1</sup> restat videre de modis argumentationum, quibus ad prædicta inconvenientia sophista nititur ducere respondentem. Est autem sciendum, quod sicut argumentatio dialectica firmitatem habet ex loco vero, ita argumentatio sophistica apparentem firmitatem habet ex loco apparenti. Locus autem verus firmitatem dialecticæ argumentationi præstans, est habitudo inferentis ad illatam, quæ dicitur maxima, vel differentia maximæ, ut genus, species, totum et pars : ex quorum habitudine veritas maximæ propositionis oritur super quam fundatur veritas dialectici argumenti : sicut ex habitudine speciei ad genus sumitur hæc maxima, De quocumque prædicatur species, et genus : ex quo hoc argumentum formatur, Socrates est homo, igitur Socrates est animal. Et similiter locus sophisticus consistit in habitudine inferentis ad illatum, ex qua sumitur aliqua falsa propositio, sed apparens vera, secundum quam procedit sophisticum argumentum : sicut cum dicitur : Cognosco venientem. Coriscus est veniens. Ergo cognosco Coriscum. Hic enim proceditur ab accidente ad subjectum, scilicet a veniente ad Coriscum, secundum virtutem hujus maximæ, Quicquid est verum de accidente, et de subjecto : quæ quidem maxima falsa est propter diversitatem accidentis et subjecti ; videtur tamen vera propter convenientiam utriusque. Unde ad prædictum locum sophisticum duo concurrunt : unum quod est causa apparentiæ, quod facit argumentum apparere bonum ; et dicitur etiam princi-

pium motivum, quia movet hominem ad hoc ut argumento sophistico assentiat : et hoc est in prædicto argumento unio accidentis ad subjectum ; aliud est principium defectus, quia scilicet facit defectum necessitatis in argumento ; et vocatur etiam causa non existentiae, quæ in prædicto argumento est diversitas subjecti et accidentis. Ex his autem duobus contingit hominem falli : quia scilicet apparet aliquid et non est. Unde locus sophisticus alio nomine fallacia dicitur, quia scilicet est causa fallendi quantum est de se, licet aliquis non fallatur per ipsum in actu, nisi ignorantia adveniente. Sicut autem loci dialectici distinguuntur penes diversas habitudines, ex quibus maxime causatur firmitas argumenti et argumenta ipsa sumuntur ; ita et loci sophistici sive fallaciæ distinguuntur penes principia motiva, ex quibus apparet esse firmitas in sophisticis argumentis. Hoc autem contingit dupliciter. Uno quidem modo ex parte vocis, quando propter unitatem vocis creditur esse unitas rei per vocem significatæ ; sicut illa quæ per nomen canis significantur, unum esse videntur, quia hoc nomen « canis » est unum. Alio modo ex parte rei : ex eo scilicet quod aliquæ res quæ aliquo modo conveniunt, simpliciter unum esse videntur, sicut supra dictum est de subjecto et accidente.

Locorum igitur sophisticorum sive fallaciarum quædam sunt in dictione, quædam extra dictionem. In dictione quidem locus sophisticus sive fallacia est, quando principium motivum sive causa apparentiæ est ex parte vocis : extra dictionem vero quando est parte rei. Ex parte autem vocis est principium motivum sive causa apparentiæ ex eo quod una vox multa significat : quod contingit per multiplicationem vocum. Est autem multiplex triplex : scilicet actuale, potentiale, et phantasticum. Actuale est quando una vox in nullo variata multa significat : et hoc si sit in una dictione, dicitur æquivocatio, ut in hoc nomine, canis, pro latrabili, cœlesti sidere, et pro pisce marino ; si in oratione, dicitur Amphi-

<sup>2</sup> Parm. omittit : « autem. »

bologia, ut liber Aristotelis, idest ab Aristotele factus vel possessus. Multiplex potentiale est, quando una vox aliquo modo secundum prolationem variatâ multa significat: quod quidem est in dictione secundum accentum, ut pendere, secundum quod gravi vel acuto accentu profertur, multa significat. In oratione vero est secundum compositionem et divisionem, ut, duo et tria sunt quinque: hæc enim oratio diversa significat composite vel divisim prolata. Phantasticum vero, idest apparens multiplex, est quando una dictio secundum rei veritatem unum significat et videtur etiam aliquid aliud significare: sicut hoc nomen « homo » significat quale et quid et videtur significare hoc aliquid, ut dicitur in *Prædicationis*; et dicitur figura dictionis, quasi dictionis similitudo. Sunt igitur loci sophistici in dictione sex: scilicet æquivocatio, amphibologia, accentus, compositio, divisio, et figura dictionis.

—

Primo igitur est dicendum de æquivocatione. Est autem æquivocatio unius et ejusdem nominis diversa significatio; fallacia autem æquivocationis est deceptio proveniens ex eo quod unum nomen plura significat. Principium autem motivum hujus fallaciæ, sive causa apparentiæ in æquivocatione est unitas dictionis ejusdem simpliciter; quod dicitur ad differentiam Accentus, in quo non est dictio una simpliciter, sed solum in potentia. Principium autem <sup>1</sup> non existentia, <sup>2</sup> est diversitas rei <sup>3</sup> significatæ. Species autem sive modi æquivocationis sunt tres. Prima species est quando una dictio principaliter plura significat: ut hoc nomen « canis » principaliter significat latrabile animal et marinam belluam et cœleste sidus: et formatur sic paralogismus, idest apparens syllogismus: Omnis canis est latrabilis. Cœleste sidus est canis. Igitur cœleste sidus est latrabile. Sed non sequitur: quia hoc nomen « canis » aliud significat in prima et aliud in secunda, secundum quod utra-

que accipitur vera; et sic non est verus syllogismus, cum non sit idem terminus medius. Si autem accipiatur ut idem significans in utraque, sic altera præmissarum est falsa. Sicut autem oportet in syllogismo idem medium bis sumi in præmissis, ita oportet duas extremitates bis sumi in syllogismo, in præmissis scilicet semel, et semel in conclusione: unde eadem ratione potest fieri paralogismus, si sit æquivocatio in altera extremitatum, ut hic <sup>4</sup>: Grammatici discunt. Grammatici sunt scientes; ergo scientes discunt: discere enim æquivocum est: nam uno modo discere idem est quod intelligere docentem; et sic, scientes discunt. Alio modo idem est quod accipere scientiam ab aliquo; et sic scientes non discunt. Secunda species est, quando unum nomen principaliter unum significat, et aliud metaphorice sive transumptive: sicut hoc verbum « ridere <sup>5</sup> » principaliter significat actum hominis proprium; metaphorice autem sive transumptive significat prati floritionem: et formatur sic paralogismus: Quidquid ridet, habet os. Pratum ridet. Ergo pratum habet os; vel sic: Quidquid currit, habet pedes. Navis <sup>6</sup> currit: ergo habet pedes. Non sequitur: quia « ridet » et « currit: » primo sumuntur proprie, et postea transumptive. Et ad hanc speciem reducitur multiplicitas nominum analogorum, quæ dicuntur de pluribus <sup>7</sup> secundum prius et posterius: sicut sanum dicitur aliquando de animali, urina et diæta: et formatur paralogismus sic: Omne sanum habet vitam. Sed urina est sana; ergo urina habet vitam. Non sequitur: quia « sanum » primo sumitur pro eo quod principaliter significat, scilicet habere sanitatem, secundo pro eo quod posterius significat, scilicet pro signante sanitatem. Ad hanc etiam speciem reducitur multiplicitas præpositionum: quia præpositio unam habet habitudinem per prius, et aliam per posterius: et formatur sic paralogismus: In quocumque est sanitas, illud est animal. Sed sanitas est in humorum adæquatione: ergo humorum adæquatio est animal. Non sequitur: quia hæc præpositio « in » primo desi-

<sup>1</sup> Parm. addit: « motivum esse. »

<sup>2</sup> Parm. addit: « sive defectus. »

<sup>3</sup> Parm.: « rerum significatarum »

<sup>4</sup> Parm. omittit: « hic. »

<sup>5</sup> Non ut in Parm.: « videt ». — « Ridere. »

etenim, « videre » non proprium est hominis. Nam alia animalia vident; sed inter animalia solus homo ridet.

<sup>6</sup> Parm.: « Tiber currit: igitur Tiber. »

<sup>7</sup> Parm. omittit: « de pluribus. »

gnabat habitudinem accidentis ad subiectum, secundo habitudinem effectus ad causam. Tertia species est, quæ provenit ex diversa consignificatione, quæ quidem attenditur circa accidentia partium orationis, sicut secundum tempus, numerum, genus, personam et similia : et sic formatur paralogismus : Quicumque surgebat, stat. Sedens surgebat : ergo sedens stat. Non sequitur : quia « sedens » in minori propositione sumebatur ut est præteriti temporis imperfecti, in conclusione secundum quod est temporis præsentis <sup>1</sup>.

—

Sequitur videre de amphibologia. Sicut autem æquivocatio provenit ex eo quod dictio penitus eadem plura significat, sic amphibologia ex eo quod una oratio penitus eadem plura significat, unde dicitur amphibologia ab « amphi » quod est dubium et « bole » quod est sententia et « logos » sermo, quasi dubia sententia sermonis. Fallacia autem amphibologiæ est deceptio proveniens ex eo quod una oratio penitus eadem plura significat : et dico « penitus eadem » ad differentiam orationis quæ composita et divisa plura significat. Causa apparentiæ, sive principium motivum amphibologiæ est unitas orationis plura significantis; causa vero non existentia, sive principium defectus est diversitas significacionis. Species autem amphibologiæ sunt tres. Prima species provenit ex eo quod una oratio principaliter plura significat manente eadem constructione, propter diversam habitudinem constructorum : sicut hæc oratio « liber Aristotelis » plura significat, si semper istæ duæ dictiones construantur eodem modo ; sed tamen propter diversam habitudinem diversa significant. Potest autem intelligi secundum habitudinem effectus ad causam, vel possessi ad possidentem : et formatur sic paralogismus : Quidquid est Aristotelis, possidetur ab Aristotele. Iste liber est Aristotelis. Ergo possidetur ab Aristotele. Non sequitur, quia primo construebatur nominativus

cum genitivo in habitudine possessionis ad possidentem, secundo in habitudine effectus ad causam. Secunda species provenit ex eo quod una oratio plura significat propter diversam ordinationem partium, ex eo quod aliqua dictio potest construi cum alia transitive vel intransitive, sicut hic : Quidquid videt aliquis, hoc videt. Sed columnam videt. Ergo columna videt. Non sequitur : quia hæc dictio « hoc » construitur cum hoc verbo, videt, transitive, et est accusativi casus; et sic est vera; et est sensus : Qui videt rem aliquam, est videns eam. Alio modo potest construi intransitive, et tunc est nominativi casus, et tunc est falsa, et est sensus : Qui videt rem unam, illa res videt : et sic procedit conclusio : et similiter hic : Quoscumque volo me accipere, volo quod ipsi recipiant me. Sed pugnantibus volo me accipere : ergo volo quod ipsi recipiant me. Non sequitur : quia « me » potest construi cum hoc verbo accipere transitive et intransitive; et in uno sensu est vera, et in alio falsa : similiter hic : Quicumque sunt Episcopi, sunt Sacerdotes. Isti asini sunt Episcopi. Ergo isti asini sunt Sacerdotes. Non sequitur : quia minor est duplex, ex eo quod « Episcopi » potest esse nominativi casus et construi intransitive, et sic est falsa : vel potest construi transitive, et sic est genitivi casus et est vera. Et est attendendum quod diversitas casuum pertinet ad fallaciam amphibologiæ, quia casus accidunt dictioni secundum quod construitur cum alia dictione; diversitas vero aliorum accidentium pertinet ad æquivocationem, quia alia accidentia accidunt dictioni secundum quod in se considerantur. Tertia species est, quando una oratio principaliter significat unum, et aliud metaphorice sive transumptive, sicut hæc oratio : Littus aratur, principaliter significat littoris scissuram, transumptive vero operis amissionem : et formatur sic paralogismus : Quandocumque littus aratur, tunc terra scinditur. Sed quando indocilis docetur, littus aratur : ergo quando indocilis docetur, terra scinditur. Non sequitur propter multipliciter prædictam.

<sup>1</sup> Codex S. Genov. non habet : « Quicumque sanabitur, sanus est. Laborans sanabitur. Igitur laborans sanus est. Minor et conclusio sunt duplices : quia hoc participium « laborans » significat tempus præsens et præteritum imperfectum; unde significat laborantem tunc, et nunc labo-

rantem; et ideo si teneretur pro laborante, tunc minor est falsa; quia simul esset sanus et laborans, quod falsum est. Si autem teneatur pro laborante nunc, vera est, quia potest esse nunc laborans, et tunc poterat esse sanus : et e converso de conclusione. »

Sequitur de fallacia compositionis et divisionis : in quibus, sicut supra dictum est, deceptio provenit ex potentiali multiplici unius orationis. Dicitur autem una oratio potentialiter multiplex pro eo quod dictiones eadem diversimode componi possunt ad invicem, vel ab invicem distingui : sicut cum dicitur : Quidquid vivit, semper est, hæc dictio « semper » potest componi cum hoc verbo « vivit, » vel dividi ab eodem. Et quia oratio per constitutionem partium constituitur, et ipsæ partes se habent ad orationem sicut materia, compositio vero sicut forma; ubi sunt ergo eadem partes, sed non eadem compositio, est oratio eadem multiplex potentialiter et materialiter, sed non formaliter et actualiter. Et propter hoc est multiplex potentiale, quia oratio quæ est una formaliter, potentialiter plura significat; et in hoc differunt illæ fallaciæ ab amphibologia, quia in amphibologia semper in eodem ponitur cum eodem, licet non uniformiter; unde est eadem compositio; et per consequens eadem oratio formaliter et actualiter una est secundum multiplex actuale; hic autem non est actualis unitas et formalis, sed solum potentialis, quia unum componitur cum diversis. Differunt autem hæc duæ fallaciæ, scilicet compositionis et divisionis. Quando enim oratio in sensu composito est falsa, tunc est fallacia secundum compositionem; quando autem in sensu diviso est falsa, tunc est fallacia secundum divisionem. Et nota quod tunc oratio est composita, quando partes magis debito ordinantur; et tunc est divisa, quando partes minus ordinantur. Causa autem apparentiæ, sive principium motivum est unitas potentialis orationis plura significantis; causa vero non existentis, sive principium defectus est diversitas significationis, secundum quod intelligitur composita vel divisa. Sunt autem tres modi sive tres species utriusque fallaciæ. Primus modus est, quando aliquod dictum potest supponere verbo vel ratione totius, vel ratione partis : si ratione totius supponat, erit oratio composita; si ratione partis, erit divisa oratio; et tunc si sub composito sensu falsa oratio erit, fallacia est compositionis; si autem in sensu diviso est falsa, erit fallacia divisionis; si autem in utroque sit falsa vel vera, tunc nulla fallacia est; quod etiam in aliis multiplicibus intelligendum est : et formatur sic paralogis-

mus : Quemcumque possibile est esse album, possibile est quod ipse sit albus. Sed nigrum possibile est esse album. Ergo possibile est quod niger sit albus. Non valet : quia illud dictum, nigrum esse album, potest supponere ei quod dicitur possibile, vel ratione subjecti, et tunc possibilitas attribuitur subjecto dicti, et est modalis de re, et tunc est divisa et vera; est enim sensus quod ille qui est niger, potentiam habet quod sit albus; vel potest idem supponere ratione totius dicti, et sic est modalis de dicto, et est composita et falsa, et est sensus quod hoc dictum, album esse nigrum, sit possibile : unde est fallacia compositionis. Et potest etiam formari sic paralogismus. Quodcumque esse nigrum est impossibile, ipsum non potest esse nigrum. Sed album esse nigrum est impossibile; igitur album non potest esse nigrum. Non valet : quia minor est duplex, sicut supra dictum est; et in sensu composito est vera, et in diviso est falsa, unde est fallacia divisionis. Secundus modus provenit ex eo quod aliquando prædicatum, in quo plura adunantur per conjunctionem copulativam vel disjunctivam, potest attribui subjecto conjunctim vel divisim. Si conjunctim, est oratio composita; si divisim, oratio est divisa; et tunc si in sensu composito oratio est falsa, est fallacia compositionis; si in sensu diviso est falsa, est fallacia divisionis, ut patet in his paralogismis : Quicumque numerus componitur ex duobus et tribus, est duo et tria. Sed quinque non sunt duo et tria. Ergo quinque non componitur ex duobus et tribus. Non sequitur : media enim sive minor est duplex, ex eo quod hoc prædicatum « duo et tria » potest intelligi et removeri a subjecto divisim, et sic est vera : est enim sensus quod quinque nec sunt duo, nec tria. Vel potest removeri a subjecto conjunctim, et sic est falsa : est enim sensus quod duo et tria simul juncta non sunt quinque. Unde in hoc sensu procedit conclusio : unde est fallacia compositionis. Et potest sic formari paralogismus : Quæcumque sunt duo et tria, sunt duo. Sed quinque sunt duo et tria : ergo quinque sunt duo. Hæc similiter minor est duplex : quia in sensu composito est vera, et in sensu diviso est falsa; unde est fallacia divisionis. Simile est si in prædicato ponatur conjunctio disjunctiva, sicut hic. Omne animal est rationale vel irrationale. Sed



non omne animal est rationale. Ergo omne animal est irrationale. Non valet : quia prima est duplex, eo quod prædicatum potest attribui conjunctim subjecto, et sic est composita et vera : est enim sensus quod de quolibet animali est verum dicere quod est rationale vel irrationale. Vel potest attribui divisim, et sic est falsa : est enim sensus quod altera istarum sit vera. Omne animal est rationale, vel omne animal est irrationale; cum tamen utraque sit falsa : unde est fallacia divisionis. Potest etiam sic formari paralogismus : Quicquid non est rationale vel irrationale, nec est rationale nec irrationale. Sed non omne animal est rationale vel irrationale : ergo animal est quod nec est rationale nec irrationale. Non sequitur; nam minor est in sensu diviso vera, in sensu composito falsa : unde est fallacia compositionis. Est autem sciendum quod quando prædicatum comparatur ad subjectum conjunctim, tunc conjunctio conjungit terminos; et sic accipitur in vi unius propositionis, quia duo termini conjunctim accepti sumuntur ut unum prædicatum, et cum simul attribuantur subjecto subjectum erit etiam unum; ex uno autem subjecto et uno prædicato fit una oratio. Quando vero termini in prædicato positi copulato vel diviso divisim subjecto attribuantur, sic accipiuntur ut duo prædicata, et per consequens ut duo subjecta eis respondentia, et sic intelliguntur quasi duæ orationes per conjunctionem copulativam vel disjunctivam. Tertius modus est, quando una dictio potest conjungi diversis dictionibus in locutione positis : erit autem tunc secundum hoc composita oratio, quando conjungitur cum dictione cui magis apparet, vel apta nata conjungi; diversa vero, quando ab ea disjungitur : sicut in hoc paralogismo patet : Quod potest unum solum ferre, plura potest ferre. Sed quod solum unum potest ferre, non potest nisi unum ferre. Ergo quod non potest nisi unum solum ferre, potest plura ferre. Non valet : nam prima est duplex, ex eo quod hæc dictio « solum » potest conjungi cum hac dictione « potest, » cum qua magis videtur conjungi, et sic est composita et falsa : est enim sensus quod ille qui non potest portare nisi unum solum pondus, potest plura portare. Vel potest dividi ab hoc verbo « potest » et conjungi cum hac dictione

« ferre » et sic est divisa et vera : est enim sensus quod ille qui modo potest ferre unum solum pondus, potest quandoque plura ferre : unde est fallacia compositionis. Item, Quicumque vivit, semper est. Iste asinus vivit : ergo semper est. Non sequitur : nam prima est duplex, ex eo quod hoc adverbium « semper » potest componi cum verbo « est » cum quo magis videtur componi, et sic est composita et falsa. Vel dividi ab eo, et componi cum hoc verbo « vivit » et sic est divisa et vera, unde est fallacia compositionis. E contrario est fallacia divisionis, ut patet in his paralogismis, Quocumque vides hunc percussum, illo percussus est. Sed oculo vides hunc percussum : ergo oculo percussus est. Non valet : quia minor est duplex, eo quod iste ablativus « oculo » potest componi cum hoc verbo, « vides » cum quo magis videtur componi, et sic est composita et vera : vel dividi ab eo, et componi cum hoc participio « percussum » et sic et divisa et falsa; unde est fallacia divisionis. Item, Quicumque est hodie natus, hodie primo incæpit esse. Sed tu es hodie natus, constat enim quod hodie es, et es natus : ergo hodie cœpisti esse. Non valet : quia minor est duplex, ex eo quod hoc adverbium « hodie » potest componi cum hoc verbo « es » et sic est composita et vera : vel cum hoc participio « natus » et sic est divisa et falsa. Et est notandum quod obliqui et adverbia magis videntur determinare verbum quam participium, et magis verbum principale quam secundarium quod implicatur in subjecto. Cum enim dicitur, Quicumque currit, movetur « movetur » est verbum principale, « currit » secundarium in subjecto implicatum.

—

Sequitur de fallacia accentus. Accentus autem, secundum quod hic sumitur, est modus pronuntiandi aliquam dictionem. Fallacia autem accentus est deceptio proveniens ex eo quod aliqua dictio diversimode pronunciata diversa significat. Sicut enim fallacia secundum compositionem et divisionem est eadem oratio materialiter, diversificata secundum formam; ita hic est eadem dictio materialiter diversificata secundum diversum

modum pronuntiandi : et ideo sicut ibi est potentialis multiplicitas orationis, ita est hic potentialis multiplicitas dictionis. Causa apparentiæ hujus fallaciæ est materialis unitas dictionis ; causa non existentiae est diversitas significationis sive dictionis diversimode pronuntiatae. Sunt autem quatuor modi hujus fallaciæ, secundum quod quatuor modis contingit diversificari modos pronuntiandi dictionem. Primo namque variatur per diversos sonos sive accentus, qui sunt tres ; scilicet accentus gravis, acutus et circumflexus. Accentus acutus, sive sonus, est qui acuit sive elevat syllabam, sicut patet in media syllaba cum dicitur « Martinus » media syllaba acuitur, sive elevatur ; gravis autem accentus est qui deprimit syllabam et deponit, sicut patet in media hujus dictionis « Dominus » et ultima syllaba hujus dictionis « Lucas ; » Circumflexus vero accentus est, qui acuit syllabam, et postea deprimit, ut « Roma. » Primus ergo modus hujus fallaciæ est qui provenit ex eo quod aliqua dictio potest pronuntiari gravi accentu, vel acuto, vel circumflexo. Acuto, ut patet in hoc paralogismo : Quoscumque justum est pendere, justum est pati pœnam. Sed bonos viros justum est pendere. Ergo bonos viros justum est pati pœnam. Non sequitur : quia in prima « pendere » sumebatur prout fertur acuto accentu, in secunda ut fertur gravi, et sic idem est pendere quod donare pœnam. Secundo modo variatur modus pronuntiandi accentus secundum diversa tempora : quæ sunt duo scilicet productio in syllaba longa, et correptio in syllaba brevi. Secundus quidem provenit ex eo quod aliqua syllaba alicujus dictionis potest corripiri ; vel produci ut patet in hoc paralogismo : Omnis populus est arbor. Sed aliqua gens est populus ; igitur aliqua gens est arbor. Non valet : quia hæc dictio « populus » aliud significat secundum quod prima syllaba ejus producit, quia sic significat arborem quamdam ; et aliud secundum quod corripitur, quia sic significat gentem. Tertio modo variatur modus pronuntiandi dictionem secundum diversitatem spiritus, qui quidem diversificatur secundum asperum vel lenem : asper quidem spiritus designatur per hanc figuram « h » lenis vero spiritus est, quando sine aspiratione syllaba profertur. Tertius modus hujus fallaciæ provenit ex eo quod syllaba potest leniter vel aspere proferri, ut patet in hoc para-

logismo: Quicquid hamatur, hamo capitur. Sed vinum amatur : igitur vinum hamo capitur. Non valet : quia primo « hamatur » profertur aspere, postea leniter : similiter hic : Omnis ara est in templo. Stabulum porcorum est hara : igitur stabulum porcorum est in templo. Non sequitur : quia hoc nomen « ara » primo profertur leniter, postea aspere. Quartus modus provenit ex eo quod aliquid potest proferri ut una dictio vel plures, ut hic : Tu es qui es. Sed quies idem est quod requies. Ergo tu es requies. Non sequitur : quia hæc dictio « qui es » primo sumitur ut oratio, postea ut dictio una : similiter hic : Quicquid Deus fecit invite, fecit invitus. Sed racemos fecit in vite : igitur racemos fecit invitus. Non sequitur : quia primo hæc dictio « invite » sumitur ut una dictio, postea ut plures. Patet ergo ex prædictis quod accentus denominatus secundum quod ab eo denominatur hæc fallacia, communior est quam accentus qui dividitur per gravem et acutum et circumflexum, quia comprehendit sub se et hunc accentum, et alios tres, ut dictum est.

—

Sequitur de fallacia figuræ dictionis. Figura dictionis, prout hic sumitur, est similitudo unius dictionis ad alteram, sicut aliquid dicitur ad figuram alterius factum quod ei assimilatur : unde fallacia figuræ dictionis est deceptio proveniens ex eo quod aliqua dictio similis alteri dictioni videtur habere eundem modum significandi, cum tamen non habeat ; ut hæc dictio « homo » videtur significare hoc aliquid propter similitudinem quam habet cum nominibus significantibus substantias particulares : et sic in hac fallacia non est multiplex verum, sed phantasticum : quia una dictio non significat plura secundum veritatem rei, sed habet unum modum significandi, et videtur habere alium. Causa apparentiæ est similitudo unius dictionis cum alia dictione ; causa vero non existentiae est diversus modus significandi. Sunt autem tres modi hujus fallaciæ. Primus modus provenit ex eo quod dictio quæ significat masculinum, sumitur ac si significaret femininum vel neutrum, aut e converso, ut patet in hoc paralogismo : Quæcumque substantia coloratur albe-

dine, est alba. Papa coloratur albedine : igitur Papa est alba. Non sequitur ; quia cum Papa sit nomen viri, non significat foeminam, licet videatur propter similitudinem quam habet cum nominibus foemininis : unde non habet sumi sub distributo foeminino. Vel sic : Omnis substantia colorata albedine, est alba. Sed vir est substantia colorata albedine : igitur vir est alba. Non sequitur : quia masculinum mutatur in foemininum. Secundus modus provenit ex eo quod aliqua dictio quae significat per modum unius praedicamenti, potest videri significari per modum alterius ; sicut hic : Quicquid heri vidisti, hodie vides. Album heri vidisti : ergo album hodie vides. Non valet : quia mutatur quid in quale : vel : Quantumcumque emisti, comedisti. Sed carnes crudas emisti : ergo carnes crudas comedisti. Non sequitur : quia mutatur quantum in quale : vel sic : Quotcumque digitos olim habuisti, modo habes. Sed olim habuisti parvos : ergo modo habes parvos. Non sequitur : quia mutatur quantum quantitatis discretæ in quantum quantitatis continuæ. Et est notandum quod non facit fallaciam figuræ dictionis mutatio praedicamentorum quantum ad rem significatam, sed quantum ad modum significandi. Albedo enim significat qualitatem, sed significat eam per modum substantiæ, quia non significat eam ut inhærentem ; album autem significat eam per modum qualitatis, quia significat eam ut inhærentem. Et contingit hoc, quando quale quid mutatur in hoc aliquid : unde hic non est fallacia figuræ dictionis. Quicquid heri vidisti, hodie vides. Albedinem heri vidisti : igitur albedinem hodie vides. Tertius modus provenit ex eo quod aliqua dictio, quae significat quale quid, significare videtur hoc aliquid. Et dicitur significare, quale quid quod significat naturam communem generis vel speciei, secundum quod pertinet ad tertium modum ; hoc aliquid vero significat substantiam particularem. Si autem sumatur quale quid, secundum quod pertinet ad genus qualitatis, sic mutare quale quid in hoc aliquid pertinet ad secundum modum, ut : album currit. Socrates est albus. Ergo Socrates currit : et formatur sic paralogismus : Socrates est alter ab homine. Et ipse est homo : igitur est alter a seipso. Non sequitur : quia proceditur ab homine ad Socratem, et sic mutatur quale quid in hoc aliquid. Et ad hunc modum reducitur

omnis deceptio proveniens ex mutata suppositione terminorum : unde cum dicitur : Homo est species. Socrates est homo : igitur Socrates est species, hic proceditur a simplici suppositione ad discretam, quæ mutat quale quid in hoc aliquid.

—

Sequitur de fallaciis extra dictionem : quæ in hoc differunt a fallaciis in dictione, ut supra dictum est : quia in fallaciis in dictione principium motivum sive causa apparentiæ est ex parte vocis : in fallaciis autem extra dictionem est ex parte rei. Sicut enim in fallaciis in dictione deceptio provenit ex eo quod unum nomen plura significans accipitur ac si significaret unum, ita in fallaciis extra dictionem deceptio provenit ex eo quod aliquæ res aliquo modo convenientes vel differentes accipiuntur ut eadem simpliciter vel diversæ. Sunt autem fallaciæ extra dictionem septem : quarum prima est secundum accidens, secunda secundum quid et simpliciter, tertia secundum ignorantiam elenchi, quarta secundum petitionem principii, quinta secundum consequens, sexta secundum non causam ut causam, septima secundum plures interrogationes ut unam. Accipiuntur autem hæ fallaciæ secundum quasdam generales entium conditiones : nam ens aliud est per se, et aliud per accidens : et secundum hoc accipitur fallacia accidentis. Item secundum perfectum et imperfectum accipitur fallacia secundum quid et simpliciter ; secundum autem oppositum et non oppositum est fallacia secundum ignorantiam elenchi : secundum vero idem et diversum est fallacia petitionis principii : secundum vero prius et posterius est fallacia consequentis ; secundum causam et causatum est fallacia secundum non causam ut causam : secundum autem unum et multa est fallacia secundum plures interrogationes ut unum.

—

Dicendum est ergo primo de fallacia accidentis. Ubi sciendum, quod accidens hic accipitur prout distinguitur contra per se. Per se autem dicitur inesse ali-

quid alicui, quod inest ei secundum rationem propriæ definitionis; præter hoc autem quicquid inest alicui, dicitur inesse per accidens; unde ad hoc est inesse per se aut per accidens, tripliciter aliquid potest se habere. Quædam enim sunt quæ omni modo sunt eadem secundum substantiæ rationem, ut vestis et indumentum; et in his est solum per se, et nullo modo per accidens: quædam sunt, quorum unum est omnino extraneum a ratione alterius, ut album et homo; et in istis est solummodo per accidens, et nullo modo per se; quædam vero sunt, quorum unum ad alterius rationem aliquo modo pertinet, licet non sint omnino eadem secundum definitionem, sicut se habet superius et inferius: nam superius ponitur in definitione inferioris; tamen non est omnino eadem definitio inferioris et superioris, ut animalis et hominis, cum definitio inferioris addat super definitionem superioris. Et simile est de proprio et de specie: nam species ponitur in definitione proprii, non tamen species et proprium sunt omnino idem in definitione. Et in his est quodammodo per se, et quodammodo per accidens; in quantum partim secundum definitionem conveniunt, et partim differunt. In his ergo quæ primo modo se habent, necesse est quod quicquid verum de uno sit, sit etiam verum de alio, eo quod talia sunt penitus eadem secundum rem, et differunt secundum nomen solum; unde in his non contingit esse fallaciam accidentis: sed in omnibus aliis non est necessarium quod quicquid est verum de uno, sit etiam verum de altero. Et ideo si ex hoc quod aliquid est de uno verum, concludatur esse verum de altero, est fallacia accidentis. Contingit autem quandoque, ut quod est verum de uno, concludatur esse verum de altero; scilicet quando aliquid attribuitur uni secundum quod est idem alteri; tunc enim quod inest uni, et alteri inerit. Si vero attribuitur uni secundum quod est ab altero divisum, non inerit alteri; si autem ut non diversum ab altero, erit et alterius: sicut si album attribuitur animali in quantum est idem homini, oportet quod conveniat homini; si autem animali ut est divisum ab homine, non oportet quod conveniat homini; et si concludatur inesse, erit fallacia accidentis: sicut si dicatur, Animal est quadrupes. Homo est animal: igitur homo est

quadrupes. Quadrupes enim non prædicatur de animali ut animal est homo, sed secundum quod est ab homine diversum. Unde patet quod in prædicto argumento medium diversimode accipitur: nam primo accipiebatur secundum quod erat diversum ab homine, sed in secundo secundum quod est idem homini. Et ideo quando est fallacia accidentis, semper est diversa acceptio medii. Dico autem diversam acceptionem medii esse, quando medium secundum quod convenit cum una extremitate, est diversum ab alia. Fallacia accidentis est deceptio proveniens ex eo quod aliquid significatur simile utrique eorum quæ sunt aliquantulum per accidens unum. Ex quo patet quod in fallacia accidentis semper inveniuntur tres termini, sicut in syllogismo; quorum duo per accidens aliquo modo junguntur; qui quidem se habent sicut medium, et minor extremitas; tertium vero quod assignatur utrique inesse, est major extremitas. Causa vero apparentiæ in hac fallacia est unitas quædam et identitas eorum quæ per accidens quodammodo junguntur; causa vero non existentiae est diversitas eorumdem: nam sicut dicit Philosophus in I *Elenchor.*, fallacia accidentis fit ex eo quod aliquis non potest judicare idem et diversum, unum et multa. Sunt autem tres modi hujus fallaciæ. Primus modus provenit ex eo quod proceditur ab accidente ad subjectum, vel e converso; sicut hic: Cognosco Coriscum. Coriscus est veniens. Igitur cognosco venientem. Non sequitur: quia veniens et Coriscus sunt unum per accidens, et non per se. Unde non sequitur quod quicquid est verum de uno, sit verum de alio. Hoc enim fallit, quando aliquid est verum de uno secundum quod est diversum ab altero, sicut hic, cognosco Coriscum: Coriscus enim non subjacet cognitioni secundum quod est idem venienti. Unde patet quod est diversificatio medii, et sic est fallacia accidentis. Similiter hic, Iste canis est tuus, et est pater. Igitur est tuus pater. Canis enim et pater sunt unum per accidens. Unde non sequitur quod quicquid est verum de uno, sit verum de alio: secundum enim quod canis est pater, non convenit ei esse tuum. Secundus modus est, quando illud quod convenit superiori concluditur in inferiori, vel e converso, sicut hic, Homo est animal, et animal est genus: igitur

homo est genus. Non sequitur : superius enim et inferius aliquo modo sunt unum per accidens, licet alio modo sint unum per se. Unde ex dictis patet, quod si idem verificatur de uno eorum secundum quod idem est alteri, necesse est de altero verificari. Et secundum hoc sumuntur argumenta dialectica a genere et specie, sive a superiori ad inferiora. Quod autem verificatur de uno eorum secundum quod differt ab altero, non oportet de altero verificari. Tunc autem est variatio medii et fallacia accidentis, sicut est in proposito : nam esse genus non prædicatur de animali secundum quod est idem homini, sed secundum quod ab eo differt sicut superius ab inferiori. Similiter est hic : Triangulus est figura. Sed proprietas trianguli est habere tres angulos. Igitur est proprietas figuræ. Non sequitur : quia triangulus et figura non sunt omnibus modis idem. Unde non oportet quod verificatur de uno, de altero verificari. Similiter est hic : Socrates est alius ab homine. Ipse autem est homo : igitur est alius a se. Tertius modus provenit, quando proceditur a specie ad proprium, vel e converso, sicut hic : Homo est risibilis. Sed risibile est proprium : igitur homo est proprium, vel homo est species. Non sequitur : quia risibile et homo non sunt omnino idem secundum definitionem; et ideo aliquo modo unum se habet ad alterum per accidens et extraneum; et propter hoc non est necesse quod quidquid verificatur de uno, verificetur de altero. Et est sciendum quod non est inconveniens, si in aliquibus prædictorum paralogismorum sint assignatæ duæ fallaciæ, scilicet figuræ dictionis et accidentis, quia secundum quod provenit deceptio ex similitudine dictionis, est fallacia figuræ dictionis; secundum vero quod provenit ex convenientia rerum, fallacia accidentis est : homo enim et Socrates quantum ad rem conveniunt, et quantum ad nomen similitudinem habent. Sciendum est etiam quod sicut fit paralogismus accidentis ex propositionibus categoricis, ita ex hypotheticis, ex eo quod medium diversimode sumitur, prout scilicet comparatur ad unam extremitatem, est diversum ab alia, sicut hic : Si nullum tempus est, dies non est, per locum a toto in quantitate : et si dies non est, nox est, per locum ab oppositis. Ergo si nullum tempus est, nox est. Sed

si nox est, aliquid tempus est. Igitur si nullum tempus est, aliquid tempus est. Patet ergo quod illud medium, quod est diem non esse, est diversum ab eo quod est noctem esse, secundum quod sequitur ad hoc quod est nullum tempus esse. Ex hoc enim quod est diem non esse, nisi supposito tempore, secundum quod sequitur ad hoc est nullum tempus esse, supposito tempore, sicut ex hoc quod est videntem non esse, sequitur cæcum esse, supposito animali quod est natum videre.

—

Sequitur de fallacia secundum quid et simpliciter. Simpliciter autem hic dicitur, quod nullo modo addito dicitur : ut cum dicitur, Socrates est albus, vel Socrates currit; secundum quid autem dicitur, quod cum aliquo addito dicitur, ut, iste currit bene, vel Socrates est albus secundum dentem. Hoc autem quod additur, dupliciter se habet ad id cui additur : nam quandoque non diminuit de ratione ejus cui additur; et tunc potest procedi ab eo quod est secundum quid ad hoc quod est simpliciter : ut cum dicitur : Iste currit velociter, igitur currit : velocitas enim nihil diminuit de ratione cursus : et est in prædicto argumento locus a parte in modo. Quandoque vero id quod additur, diminuit aliquid de ratione ejus cui additur; ut cum dicitur : Æthiops est albus secundum dentem; nam hæc determinatio « dentem » diminuit aliquid de ratione ejus quod dicitur albus : non enim potest dici albus, nisi qui totus est albus, vel secundum plures et principaliores partes. Et ideo si concludatur, Æthiops est albus secundum dentem, ergo est albus, est locus sophisticus, vel fallacia secundum quid et simpliciter; et est deceptio proveniens ex eo quod dictum secundum quid accipitur ac si esset dictum simpliciter. Causa apparentiæ in hac fallacia est convenientia ejus quod est secundum quid, ad id quod est simpliciter; causa vero non existentiae est diversitas eorumdem. Sunt autem quinque modi hujus fallaciæ. Et primus modus est, quando determinatio addita habet oppositionem ad illud cui additur : ut in hoc argumento, Cæsar est homo mortuus. Ergo est homo. Non sequitur :



nam esse hominem mortuum habet oppositionem ad hominem, eo quod vivum est de ratione hominis, cum homo sit animal, et animal est substantia animata sensitiva : et sic patet quod hæc determinatio « mortuus, » tollit hominis rationem. Similiter : Iste est bonus latro, igitur est bonus : nam bonum per se suppositum oppositionem habet ad latrocinium. Similiter hic : Mendax dicit verum dicendo se dicere falsum. Ergo dicit verum. Non sequitur : nam dicere verum opponitur ei quod est dicere falsum, et e converso. Secundus modus provenit ex eo quod aliqua determinatio addita pertinet ad animæ actum : nam aliqui actus animæ possunt esse circa existentiam, et circa non existentiam, sicut hic : Chymæra est animal opinabile, igitur Chymæra est animal. Non sequitur : nam opinabile additum animali diminuit de ejus ratione. Similiter hic : Cæsar est in memoria hominum. Igitur Cæsar est. Similiter hic : Tu habes felicitatem in tua voluntate, igitur habes felicitatem. Tertius modus est, quando determinatio addita significat aliquid in potentia esse, sicut hic : Ovum potentialiter est animal. Ergo est animal. Non sequitur : nam esse in potentia diminuit de ratione ejus quod est esse simpliciter. Quartus modus est, quando determinatio addita significat partem, sicut hic : Æthiops est albus dente. Ergo est albus. Non sequitur : quia esse in parte diminuit de ratione ejus quod est esse simpliciter. Sciendum tamen, quod si a parte sit natum denominari totum, non accidit fallacia, ut patet in hoc processu. Iste est crispus secundum capillos. Ergo est crispus. Bene sequitur : quia homo denominatur crispus secundum capillos ; et hic modus se extendit ad alias partes, scilicet loci, vel temporis, vel aliorum totorum. Si vero aliquid additur toti in loco mediante parte in loco, a qua parte totum non est natum denominari, accidit fallacia in his processibus, ut : Hæc diæta est bona in locis ægrotativis, ergo est bona. Non sequitur : quia hoc quod dicit « in locis ægrotativis » significat partem in loco. Similiter est de toto et parte in tempore, sicut hic : Bibere vinum est malum ægrotanti. Ergo est malum. Et eadem ratio est in omnibus similibus. Quintus modus est, quando determinatio addita cogit terminum, cui additur, stare materialiter ; sicut hic : Sapiens vult amittere ma-

lum. Ergo vult malum. Non sequitur : nam amittere malum non dicit malum simpliciter, sed secundum quid. Similiter hic : Fur vult sumere bonum. Igitur vult bonum. Et est eadem ratio in aliis similibus. Sic ergo patet ex dictis, quod hæc fallacia provenit secundum rationem perfecti et imperfecti : nam determinatio diminuit, eo quod significat aliquid esse imperfectum.

—

Sequitur de fallacia secundum ignorantiam elenchi. Est autem elenchus syllogismus contradictionis : qui quandoque est unus, quandoque duo. Unus quidem, quando concludit contradictoriam alterius propositionis prius datæ ; sicut si detur aliquid animal esse incorruptibile, et procedatur sic : Omne compositum ex contrariis est corruptibile. Omne animal est hujusmodi. Ergo omne animal est corruptibile. Hæc enim conclusio est contradictoriæ propositionis datæ. Duo enim syllogismi constituunt elenchum, quando ex duobus syllogismis concluditur contradictorie, sicut si supradicto syllogismo contraponatur alius talis syllogismus. Nullum beatum est corruptibile. Et aliquid animal est beatum : igitur aliquid animal non est corruptibile. Quia igitur de ratione elenchi est syllogismus et contradictio ; ideo quicquid est contra definitionem syllogismi et contradictionis, est contra definitionem elenchi. Et ideo cum in qualibet fallacia defectus accidat propter hoc quod aliquid omittitur de definitione syllogismi et contradictionis ; ideo omnis fallacia reducitur ad ignorantiam elenchi sicut ad generale principium. Quia vero in definitione elenchi ponitur contradictio, quasi differentia quæ constituit speciem ; ideo specialiter omissio eorum, quæ ad contradictionem requiruntur, ignorantiam elenchi constituit secundum quod est fallacia specialis. Sed quia fallacia esse non potest si apparentia desit, oportet ad hoc quod circa contradictionem sit fallacia, ut sit apparens contradictio et cum hoc aliquid ad veritatem contradictionis desit. Apparens autem contradictio esse non potest, nisi sit unius et ejusdem : quia nisi sit ibi unum et idem, non videbitur esse contradictio, ut dicendo. Homo currit, asinus non currit. Ex vera autem

contradictione non potest deficere nisi ex defectu unius et ejusdem. Unde, hoc observato, ex defectu aliquorum, quæ ad contradictionem requiruntur, fit fallacia. Est autem contradictio oppositio unius et ejusdem non rei tantum, sed rei et nominis simul secundum idem ad idem similiter et in eodem tempore: fallacia autem secundum ignorantiam elenchi est deceptio proveniens ex eo quod non observantur ea quæ sunt necessaria ad definitionem elenchi, et præcipue ex parte contradictionis: unde dicitur ignorantia elenchi, quæ accidit deceptio solum per hoc quod definitio contradictionis ignoratur; causa autem apparentiæ in hac fallacia est similitudo apparens contradictionis deficientis ad contradictionem perfectam; causa vero non existentiae est diversitas eorumdem. Modi hujus fallaciæ sunt quatuor. Primus peccat contra hanc particulam « ad idem » ut hic: Duo sunt duplum ad unum, et non sunt duplum ad tria: igitur sunt duplum et non duplum. Non sequitur: quia, omisso hoc quod est esse ad idem, non est contradictio. Secundus autem peccat contra hanc particulam « secundum idem » sicut hic: Hoc est duplum ad illud secundum longitudinem, et non est duplum secundum latitudinem. Ergo idem est duplum et non duplum. Non sequitur: quia omittitur hæc particula, secundum idem, quæ requiritur ad contradictionem. Tertius peccat contra hanc particulam « similiter » sicut hic: Cælum movetur circulariter, et non movetur sursum et deorsum. Ergo movetur et non movetur. Non sequitur: quia omissio hujus particulæ, similiter, tollit contradictionem. Quartus est contra hanc particulam « in eodem tempore » sicut hic: Domus est clausa in nocte, non est clausa in die. Ergo est clausa et non est clausa. Non sequitur: quia diversitas temporis impedit contradictionem. Et est sciendum, quod hæc fallacia convenit cum fallacia secundum quid, et simpliciter in hoc: quia in utraque proceditur ab eo quod dicitur cum determinatione ad id quod dicitur simpliciter. Sed hæc differentia, quia in fallacia secundum est quid et simpliciter determinatio diminuit de ratione ejus quod est simpliciter esse, quod non de necessitate accidit in hac fallacia; sed hæc determinationes additæ minuunt de ratione contradictionis: bene enim sequitur. Hoc est duplum ad illud secundum latitudinem.

Igitur est duplum ad illud; non tamen sequitur quod sit contradictio, si ad diversa referatur. Patet etiam ex dictis, quod hæc fallacia provenit secundum generalem entium contradictionem, quæ est oppositio: nam est omnis contradictionis principium.

Sequitur de fallacia petitionis principii. Principium hic dicitur principale propositum. Tunc igitur aliquis petit principium, quando petit sibi concedi principale propositum quod debet probare: quod quidem si sub eodem nomine petat, nulla fit fallacia, sed petens videbitur deridendus, sicut si velit probare, homo currit, et petit eandem sibi concedi. Si vero petat id quod vult probare sub alio vocabulo, poterit esse fallacia; et tunc proprie petit illud quod est in principio, id est illud quod in se continet principale propositum. Fallacia ergo petitionis principii est deceptio proveniens ex eo quod idem assumitur ad probationem sui ipsius sub alio vocabulo. Causa ergo apparentiæ in hac fallacia est diversitas apparens; similitudo conclusionis est ex præmissis, causa vero non existentiae est identitas earumdem. Sunt autem modi hujus fallaciæ quinque. Primus modus est, quando definitum petitur ad definitionis probationem, vel e converso, ut si debeat probari quod homo currit, et petitur concedi quod animal ratione mortale currat, quo concessio, arguatur sic: Animal rationale mortale currit: igitur homo currit. Hæc nulla probatio est, quia similiter dubitatur de præmissa et conclusione. Secundus modus est, quando universale petitur ad probationem particularis; ut si debeat probari quod omnium contrariorum eadem est disciplina, et assumatur ista: Omnium oppositorum eadem est disciplina. Ergo omnium contrariorum eadem est disciplina. Hæc præmissa non est magis nota quam conclusio. Tertius modus est, quando petuntur omnia particularia ad probationem universalis, ut si debeat probari quod omnium oppositorum est eadem disciplina, et assumatur ista: Omnium contrariorum est eadem disciplina. Omnium privative oppositorum eadem est disciplina, et sic de aliis: igitur omnium oppositorum est eadem disciplina: Hæc etiam conclusio

in præmissis petitur. Quartus modus est, quando petitur divisim quod debet probari conjunctim; ut si debeat probari quod medicina sit scientia sani et ægri, et sumatur ita: Medicina est scientia sani, et medicina est scientia ægri. Ergo medicina est scientia sani et ægri. Hic etiam petitur id quod deberet probari. Quintus modus est, quando petitur unum correlativorum ad probationem alterius; ut si debeat probari quod Socrates sit pater Platonis, et sumatur ita: Plato est filius Socratis: igitur Socrates est pater Platonis. Hic etiam petitur quod deberet probari ab aliis verbis. Et est sciendum quod hæc fallacia non peccat contra vim illativam argumentandi, quia bene sequitur conclusio, datis præmissis, cum servetur debita habitudo inferentis ad illatum, sed peccat contra probationem argumenti, nam probatio debet esse magis manifesta quod hic non observatur; unde hic non accidit deceptio ex eo quod conclusio non infertur ex præmissis, cum illationes prædictæ sint secundum locos dialecticos; sed accidit deceptio ex eo quod petitur idem concedi ac si esset diversum. Unde si in præmissis modis argumentandi accipiantur præmissæ ex eo quod sint magis notæ, et non quasi petitæ, non erit argumentum sophisticum sed dialecticum. Patet autem ex prædictis quod hæc fallacia provenit secundum « idem et diversum » prout non discernitur inter ea.

—

Sequitur de fallacia consequentis. Consequens autem, ut hic sumitur est, quod sequitur ad antecedens in propositione conditionali, ut cum dicitur. Si Socrates est homo, est animal: Socratem esse animal est consequens, Socratem vero esse hominem est antecedens. Est ergo fallacia consequentis deceptio proveniens ex eo quod consequens æstimatur esse idem cum antecedente omnino. Ex hoc enim contingit aliquem credere quod si consequens sequitur ad antecedens, ita e converso antecedens sequatur ad consequens. Unde patet quod hæc fallacia consequentis in duabus consistit consequentiis, quarum una est vera, et altera falsa, sicut si dicatur. Si aliquis currit movetur. Sed Socrates movetur: igitur Socrates currit. Hæc enim consequentia:

Si Socrates currit, movetur, quæ primo ponitur, est vera; sed ista, ad quam proceditur, est falsa: Si movetur, igitur currit. Ubi vero tantum ponitur una consequentia, non est fallacia consequentis: unde si dicatur: Socrates est animal; igitur Socrates est homo, non est fallacia consequentis ex modo argumentandi, sed magis fallacia accidentis: nam, sicut fallacia consequentis provenit ex eo quod consequens existimatur omnino esse idem antecedenti cum non sit, ita fallacia accidentis provenit ex eo quod prædicatum existimatur omnino idem esse subiecto. Unde hæc fallacia denominatur a consequendo, illa autem ab accidendo quod est inhærere. Et inde est quod quando proceditur argumentando solum ab aliqua cathogorica, per quam significatur aliquid inesse, est fallacia accidentis; quando ab aliqua conditionali, est fallacia consequentis. Et ideo Philosophus dicit « quod fallacia accidentis est in uno, et fallacia consequentis in pluribus, » scilicet consequentiis: et ex hoc etiam patet quod in consequentiis consequens est aliquo modo pars accidentis: nam omne quod sequitur, aliquo modo accidit: sed non omne quod accidit, sequitur. Non enim sequitur, Si est homo, est album, licet hæc si vera « quod ly homo sit album ». Et ideo ubicumque est fallacia consequentis aliter ordinatis terminis, potest fieri fallacia accidentis, sed non convertitur. Causa apparentiæ in hac fallacia est convenientia consequentis cum antecedente: causa vero non existentiæ est diversitas eorundem. Sunt autem modi hujus fallaciæ duo. Primus modus procedit ex consecutione magis communis ad minus commune, sive magis commune sit genus, sive accidens, ut patet in his paralogismis: Si aliquid est asinus, est animal. Sed tu es animal. Igitur tu es asinus, non sequitur: non enim consequentia prius posita convertitur. Similiter hic: Si aliquid est mel, est rubeum. Sed fel est rubeum, igitur fel est mel. Similiter hic: Si aliquis est fur, errat de nocte. Sed tu erras de nocte. Igitur tu es fur. In his enim omnibus putatur consequentia converti, quæ non convertitur, unde est fallacia consequentiæ. Si autem sumantur propositiones cathogoricæ in eisdem terminis, est fallacia accidentis sicut; asinus est animal. Tu es animal. Igitur tu es asinus; et hæc: Mel est rubeum, et fel est rubeum. Igitur mel est

fel. Secundus modus est, quando proceditur a consequentia oppositi ad similem consequentiam in alio opposito, ut si dicatur. Si aliquid est generatum, habet principium. Sed anima non est generata. Igitur anima non habet principium, sed semper fuit; non sequitur: est enim in oppositis duplex consequentia, una in ipso, altera in contrario: in ipso quidem est consequentia, quando sicut ad antecedens sequitur consequens, ita ad oppositum antecedentis sequitur oppositum consequentis, ut: Si est justum, est bonum. Igitur si est injustum est malum. Consequentia a contrario est, quando sicut ad antecedens sequitur consequens, ita ad oppositum consequentis sequitur oppositum antecedentis, ut: Si est homo, est animal. Igitur si non est animal, non est homo: in oppositis enim secundum affirmationem et negationem non est consequentia in ipso, sed in contrario. Et ideo quando proceditur in hujusmodi oppositis ac si esset consequentia in ipso, est fallacia consequentis, sicut in exemplo patet. In his autem terminis est fallacia accidentis categoricis propositionibus sumptis, ut si dicatur sic: Omne generatum habet principium. Sed anima non est generata. Igitur non habet principium. Et est sciendum quod sicut primus modus peccat contra consequentiam procedendo a positione consequentis ad positionem antecedentis, ita secundus peccat procedendo a destructione antecedentis ad destructionem consequentis. Est autem contrario modo procedendum, scilicet a destructione consequentis ad positionem antecedentis: patet enim quod hæc fallacia provenit secundum rationem prioris et posterioris. Et nota quod quoddam consequens est in plus suo antecedente, et quoddam in minus: consequens in plus est in terminis universalibus, sicut cum dico: Homo est, ergo animal est; consequens in minus est, sicut totum in quantitate, et ejus pars, ut cum dicitur: Omnium oppositorum eadem est disciplina. Ergo omnium contrariorum.

—

Sequitur de fallacia secundum non causam ut causam. Causa autem hic dicitur quod est causa inferendi, secundum quod præmissæ dicuntur causa conclusionis

esse. Ergo fallacia secundum non causam ut causam est quando inter præmissas, ex quibus sequitur conclusio, ponitur propositio aliqua quæ nihil ad conclusionem operatur, et sic non est causa. Tamen ad hoc quod fiat fallacia, oportet quod videatur esse causa: quod quidem fit per hoc quod convenit cum aliis propositionibus, quæ sunt causæ conclusionis in terminis. Ex hoc autem quod propositio quæ non est causa, sumitur ut causa, non provenit aliqua deceptio, nisi quando ex conclusione reditur ad præmissas, et interimitur aliqua præmissarum: quod quidem fit in syllogismis ad impossibile, in quibus per hoc quod conclusio est impossibilis, ostenditur aliquam præmissarum impossibilem fuisse. Et ideo hæc fallacia non habet fieri nisi in hujusmodi syllogismis. In syllogismis enim ostensivis, in quibus aliud directe ostenditur, ad nullum inconveniens duci potest respondens, si sumatur in præmissis aliqua propositio quæ non est causa conclusionis ac si esset causa. Est ergo causa apparentiæ in hac fallacia convenientia propositionis, quæ non est causa cum illis quæ sunt causæ. Causa vero non existentiæ est defectus habitudinis debitæ inter propositionem inferentem et propositionem illatam. Formatur autem secundum hanc fallaciam hoc modo paralogismus: Putas ne anima et vita sunt idem? quo dato proceditur sic: Anima et vita sunt idem, et mors et vita sunt contraria, et generatio et corruptio sunt contraria. Sed mors est corruptio. Ergo vita est generatio. Igitur vivere est generari; quod est impossibile: nam qui vivit, non generatur, sed jam generatus est. Ergo et primum fuit impossibile, scilicet quod anima et vita sint idem: non sequitur, quia ista propositio: Anima et vita sunt idem, quæ accipiebatur in præmissis, non fuit causa conclusionis impossibilis: quod ex hoc patet, quia ea remota, adhuc sequitur conclusio. Unde per hoc, quod conclusio est impossibilis, non potest ostendi quod prædicta propositio sit impossibilis, sed quod magis ista sit impossibilis ex qua sequitur, quæ est ista: Mors et vita sunt contraria: ex hujus enim falsitate sequitur falsitas in conclusione: mors enim et vita non sunt contraria, sed opponuntur ut privatio et habitus. Patet ergo quod hæc fallacia peccat contra rationem causæ et causati.

—



Sequitur de fallacia secundum plures interrogationes ut unam. Est autem idem secundum substantiam enuntiatio, propositio, interrogatio et conclusio: sed dicitur enuntiatio secundum quod significat simpliciter aliquid esse, vel non esse; interrogatio secundum quod sub dubitatione proponitur; propositio secundum quod sumitur ad alterius probationem; conclusio vero secundum quod ex aliis probatur: et ideo sicut enuntiatio est una, vel plures, ita interrogatio, propositio et conclusio. Est autem enuntiatio una, in qua dicitur unum de uno ut « homo est animal, vel est albus. » Enuntiatio vero plures, quando dicuntur plura de uno, ut « Socrates est albus et musicus » vel unum de pluribus, ut « Socrates et Plato sunt albi » vel plura de pluribus, ut « Socrates et Plato sunt albi et musici. » Sciendum est autem quod quando plura prædicantur de uno, ex quibus fit unum per se, est enuntiatio una, ut cum dicitur: « Homo est animal rationale mortale » nam ex partibus definitionis fit unum per se, quod est de natura speciei. Si autem plura prædicantur, ex quibus fit unum per accidens, tunc est enuntiatio plures ut cum dicitur: « Socrates est homo albus » ex homine enim et albo fit unum per accidens. Provenit ergo hæc fallacia ex hoc, quod ad interrogationem quæ est plures, datur una responsio, eo quod sub uno modo interrogandi proponitur, ut si dicatur: « Putas ne Socrates et Plato currunt? » ex eo enim quod simul interrogatur de duobus, videtur esse una interrogatio cum sint plures. Causæ apparentiæ in hac fallacia est unitas ex parte modi

interrogandi: causa vero non existentiae est pluralitas interrogationis. Modi autem hujus fallaciæ sunt duo. Primus modus est, quando interrogatio est plures, eo quod unum de pluribus in singulari prædicatur, et e converso: sicut hic « Putas ne homo et asinus sunt animal rationale mortale? » Si dicam sic, procedatur sic: Homo et asinus sunt animal rationale mortale. Igitur asinus est animal rationale mortale etc. Si dicatur quod non, procedatur sic: Homo et asinus non sunt animal rationale mortale: igitur homo non est animal rationale. Deceptio enim hæc provenit, quia ad interrogationem prædictam cum sit plures, non est danda una responsio, ut dicam simpliciter sic, vel non, sed duæ, ut dicatur sic: Homo est animal rationale, et asinus est animal irrationale, vel non est animal rationale. Similiter hic: Putas ne tu es homo et asinus? si dicatur non: igitur tu non es homo; si dicatur sic, concludatur: Tu es asinus. Similiter hic: Putas ne æthiops est homo albus? si dicatur quod sic, concludatur: Ergo est albus; si dicatur quod non, concludatur: Ergo non est homo. Secundus modus est, quando interrogatio est plures ex eo quod plura subjiciuntur, vel prædicantur in plurali numero, sicut hic: Putas ne mel et fel sunt dulcia? si dicatur, non, concludatur: Igitur mel non est dulce; si dicatur, sic, concludatur: Igitur fel est dulce. In omnibus enim his non est una responsio, sed plures, ut: sic, mel est dulce, et fel non est dulce. Patet ergo quod hæc fallacia provenit secundum unum et multa. Et hæc de fallaciis dicta sufficiant.



# OPUSCULUM XXXVI.

## DE PROPOSITIONIBUS MODALIBUS.

(EDIT. ROM. XL.)

Quia propositio modalis a modo dicitur, ad sciendum quid sit propositio modalis, oportet prius scire quid sit modus. Est autem determinatio adjacens rei, quæ quidem fit per adjectionem nominis adjectivi, quod determinat substantivum, ut cum dicitur « homo est albus » vel per adverbium quod determinat verbum, ut « homo currit bene. » Sciendum etiam quod triplex est modus. Quidam determinat subjectum propositionis, ut « homo albus currit. » Quidam determinat prædicatum, ut « Socrates est homo albus » vel « Socrates currit velociter. » Quidam determinat compositionem ipsam prædicati ad subjectum, ut cum dicitur « Socratem currere est impossibile » et ab hoc solo modo dicitur propositio modalis. Aliæ vero propositiones quæ modales non sunt, dicuntur de inesse. Modi autem qui compositionem determinant, sunt sex, scilicet: verum, falsum, necessarium, impossibile, possibile, contingens. Verum autem et falsum nihil addunt supra significationes propositionum de inesse: idem enim significatur cum « dicitur Socrates non currit » et « Socratem currere est falsum: et Socrates currit, et Socratem currere est verum. » Quod non contingit de aliis quatuor modis, quia non idem significatur cum dicitur « Socrates currit, et Socratem currere est possibile. » Et ideo prætermisso de vero et falso, de aliis quatuor consideremus. Quia vero prædicatum determinat subjectum, et non e converso; ideo ad hoc quod propositio sit modalis, oportet quod quatuor prædicti modi prædicentur, et verbum importans compositionem ponatur pro subjecto:

quod quidem fit, si pro verbo indicativo propositionis sumatur infinitivus, et pro nominativo accusativus: et dicitur dictum propositionis, sicut hujus propositionis « Socratem currere est possibile » dictum est Socratem currere. Quando ergo dictum ponitur pro subjecto, et modus pro prædicato, tunc est propositio modalis, ut cum dicitur « Socratem currere est possibile. » Si autem convertatur, erit de inesse, ut « possibile est Socratem currere. » Propositionum autem modalium quædam est de dicto, quædam est de re: modalis de dicto est, in qua totum dictum subjicitur, et modus prædicatur, ut « Socratem currere est impossibile » modalis de re est, in qua modus interponitur dicto, ut « Socratem possibile est currere. » Sciendum est autem quod omnes modales de dicto sunt singulares, eo quod modus prædicatur de hoc vel de illo sicut de illo sicut de quodam singulari. Modalis autem dijudicatur: universalis, particularis, indefinita, vel singularis secundum subjectum dicti, sicut de propositionibus de inesse, unde hæc « Omnem hominem possibile est currere » est universalis, et sic de aliis. Item sciendum est, quod propositio modalis dicitur: affirmativa, vel negativa secundum affirmationem, vel negationem modi, et non dicti: unde hæc « Socratem non currere est possibile » est affirmativa; hæc vero « Socratem currere non est possibile » est negativa. Attendendum est autem quod necessarium habet similitudinem cum signo universali affirmativo, quia quod necesse est esse, semper est: impossibile cum signo universali negativo, quia quod est impos-

sibile esse, nunquam est. Contingens vero et possibile similitudinem habent cum signo particulari : quia quod est contingens et possibile, quandoque est, quandoque non est. Et ideo necesse est esse et impossibile est esse, sunt contrariæ, et possibile est esse et possibile est non esse, subcontrariæ : necesse est esse et possibile est esse, subalternatur, et similiter : impossibile est esse et possibile est non esse; sed necesse est esse et possibile est non esse, contradictorianatur; similiter: impossibile est esse et possibile est esse, ut patet in sequenti figura. Notandum, quod omnes propositiones, quæ sunt in eodem ordine, æquipollent. Lex autem, et modus argumentandi in contrariis, subalternis et contradictoriis eodem modo attenditur in his, sicut in propositionibus de inesse. Sciendum est autem circa modalium æquipollentias, quod idem operatur negatio posita ad modum, sicut in propositionibus de inesse. Negatio in modalibus præposita modo facit æquipollere suo contradictorio, ut « non necesse est esse, et impossibile est non esse » æquipollent; negatio vero apposita dicto, facit æquipollere contrario: negatio vero apposita

utrique, subalterno. Unde sciendum, quod possibile et contingens idem significant: unde propositiones de possibili contingenti similiter ordinatæ æquipollent. Omnes autem propositiones sibi invicem æquipollentes sunt in uno ordine. Unde patet quod quatuor sunt ordines. Primus ordo est: possibile est esse cum suis æquipollentibus. Secundus: possibile est non esse cum suis æquipollentibus. Tertius: impossibile est esse cum suis æquipollentibus. Quartus: necesse est esse cum suis æquipollentibus. Ex quo patet, quod quartus ordo contrarius est tertio; ergo primus subcontrarius secundo, tertius contradictorius primo, quartus secundo contradictorius, primus quartus subalternus, et secundus tertio. Unde versus :

Tertius est quarto semper contrarius ordo.  
Pugnat cum quarto contradicendo secundus.  
Sit subcontraria linea tibi prima secundæ.  
Tertius est primo contradictorius ordo.  
Prima subest quartæ vicem particularis habens.  
Sed habet ad seriem se lege secunda sequentem.  
Vel ordo subalternus sit primus sive secundus.  
Primus amabimus, edentulique secundus.  
Tertius illiace, purpurea reliquis.  
Destruit u. totum sed a. confirmat utrumque.  
Destruit e. dictum, destruit i. que modum.

## PURPUREA

Non possibile est non esse.      CONTRARIE  
Non contingens est non esse.  
Impossibile est non esse.  
Necesse est esse.

*Subalternæ*

Possible est esse.      SUBCONTRARIE  
Contingens est esse.  
Non possibile est esse.  
Non necesse est non esse.

## AMABIMUS

## ILLIACE

Non possibile est esse.  
Non contingens est esse.  
Impossibile est esse.  
Necesse est non esse.

*Subalternæ*

Possible est non esse.  
Contingens est non esse.  
Impossibile est non esse.  
Non necesse est esse.

## EDENTULI.

# OPUSCULUM XXXVII.

## DE ERUDITIONE PRINCIPUM

(EDIT. ROM. HABETUR, NON SIGNATUM NUM. T. XVII P. 227.)

### PROLOGUS.

Cum pars illustris Ecclesiæ si cœtus principum, et initium ab eis dependeat vitæ minorum, non est negligenda cura eorum ab his, qui Ecclesiæ habent zelum. Judith v : *Cor meum diligens principes Israel.* Non negligebat eos Paulus, cum scribens Timotheo obsecraret fieri *obsecrationes, orationes, postulationes pro regibus et aliis in sublimitate constitutis*, I Tim. ii. *Glossa Aymonis* : « Obsecrationes sunt adjurationes pro rebus difficilibus, ut pro conversione impij, vel malis removendis. Orationes sunt, ut quando jam conversis virtutes et bona orantur. Postulationes sunt, ut quando jam justis gloria cœlestis oratur. » Nec mirum quod hæc faciebat Paulus : sciebat enim bonitatem eorum valde utilem esse Ecclesiæ Dei : multumque dolendum esse his qui Ecclesiam regunt, cum conspiciunt in optimatibus deteriorationem, in generosis degenerationem, et deformitatem in illis qui debuerunt esse præ ceteris speciosi : *Ad te Domine clamabo*, ait Propheta Psalm. xxvii : *quia ignis comedit speciosam deserti.* Joel i ; desertum vocat mundum, propter spiritualium bonorum defectum, ibi : « Comitantur se temporalium bonorum abundantia, et spiritualium indigentia. » In mundo frequenter sunt deformiores qui videntur esse speciosiores, intus enim igne infernali sunt exusti, igne videlicet iræ, vel cupiditatis, vel luxuriæ. Multum plangere debent qui habent zelum Dei, si videant

cæcum principem statuæ Nabuchodonosor assimilatum, cujus caput fuit ex auro optimo, membra vero inferiora multum erant capiti dissimilia. Quam devoti Deo et Ecclesiæ olim principes fuerunt, noverint qui antiquas historias legunt ; sed, quantum ad multos, magna mutatio in ipsis facta est, et non in bonum : unde hodie habet locum illa admiratio. Thren. iv : *Filii Sion induti et amicti auro puro, quomodo reputati sunt in vasa testea ?* Propterea ego in ordine fratrum Prædicatorum minimus a quodam principe rogatus, et ad acquiescendum ejus precibus a majoribus meis, quibus obedire debebam, inductus, ad gloriam beatissimæ Trinitatis colligere volui aliqua ad instructionem et ad exhortationem principum utilia, non de meis confisus viribus, sed de benignitate Salvatoris, qui potentes non abjicit, cum sit et ipse potens ; et, in mundo natus, reges voluit de se instruere, et eis in splendore sideris apparere. Opus vero istud decrevi in septem libros distinguere, ut ea quæ in ipso continentur et facilius inveniantur, et melius in memoria teneantur. In primo libro agitur in communi de quibusdam, quæ ad principes pertinent : in secundo ostenditur quomodo ad Deum et Ecclesiam ejus habere se debeant : in tertio, quomodo ad seipsos : in quarto, quomodo ad eos qui sunt circa ipsos : in quinto, quomodo ad eos qui sunt ex ipsis, scilicet ad filios : in sexto, quomodo ad populum sibi subditum : in septimo, quomodo ad eos qui sunt contra ipsos, scilicet ad hostes. Primus liber continet octo partes : in prima agitur de potestate

terrena : in secunda, de sapientia habenti potestatem necessaria : in tertia, de bonitate, sine qua potestas et sapientia sunt nociva : in quarta, de nobilitate vera, quæ principem multum decet : in quinta, de humilitate principum : in sexta, de veritate quam debent diligere : in septima, de eorum clementia : in octava, de pietate.

## LIBER PRIMUS

### CAPUT I.

*Quod potestas terrena potius est timenda quam appetenda.*

Cum inordinatus amor potestatis terrenæ multum noceat, juxta illud Bernardi in lib. *De consid.* « Nullum tibi venenum, nullum gladium plus formido quam libidinem dominandi ; » diligenter attendendæ sunt conditiones hujus potestatis, ex quibus manifestum erit quod ipsa est timenda, et non propter se appetenda, licet aliquando suscipienda sit propter Dei ordinationem, et populi utilitatem. Sciendum ergo quod potestas terrena, qua homo super alios homines est, non est res naturæ, sed sequela culpæ. Hæc potestas multum habet impotentia, brevis est duratione : videtur altitudo esse et dominium, cum potius sit subjectio et ministerium : honor est contemptibilis ; multum habet periculi, multum oneris, multum inquietudinis, multum punctionis, et, ut frequenter, nociva est eam habenti. Non est res naturæ, sed sequela culpæ : non enim datum est homini ab initio, ut præset hominibus, sed ut præset creaturis irrationabilibus. Gen. 1 : *Faciamus hominem ad imaginem et similitudinem nostram, et præsit piscibus maris, et volucris cæli, et bestiis terræ.* Naturaliter æquitas est inter homines, non prælatio. Gregorius : « Omnes homines naturaliter sunt pares. » Item. Ibid : « Non est data homini prælatio ut dominetur hominibus, sed bestiis terræ et volucris et piscibus, idest hominibus in eo quod induunt faciem horum. » Ubi enim non delinquimus, pares sumus, cum prælatio quam multi appetunt, et subjectio quam multi fugiunt, se comitentur : non est laudabilis appetitus quo aliquis appetit suam prælationem per aliorum subjectionem, nisi hoc velit prop-

ter Dei ordinationem, vel populi utilitatem. Non est hic appetitus naturalis, nec virtutis, sed vitii I Cor. xiv : *Caritas non est ambitiosa.* Non habet homini velle alienum malum propter suum bonum. Sapiens : « Si videas murem velle dominari alii muri, numquid risum teneas ? Asinus auribus intumescit cum se videt per comparem comprehendi. » Philosophus : « Sævitia est in obsequium cogere quod vobis fratres eadem natura convenit. » Idest : ex his quibus nobiscum convenire ostendit. Hæc potestas multum habet impotentia, cum a subditis dependeat : nullius enim valoris est potestas terrena, si in subditis desit obedientia. Qui magnæ potestatis reputantur, non possunt se defendere a pulicibus et muscis, frequenter in se infirmiores sunt ceteris, et ex parte animæ, et ex parte corporis : ex parte animæ, quia minus possunt resistere diabolo et vitiis ; ex parte corporis, quia facilius ægrotant, et minus potentes sunt abstinentia et labori. Arundinea est hæc potestas, exterius habet nitorem, interius vacuitatem ; ad homines habet apparentiam, in ipsis qui præsent non habet existentiam. Potestas terrena baculus arundineus est Isa. xxxvi : *Ecce confidis super baculum arundineum.* Duratione est brevis Eccles. x : *Omnis potentatus brevis vita.* In eodem, *Rex hodie est, et cras morietur.* Quam parum duravit regnum Magui Alexandri, qui duodecim annis dicitur regnasse ; sed in septimo illorum annorum pugnavit, unde patet quod in miseria fuit ; annis numero quinque in pace regnavit. Hæc potestas videtur esse altitudo, sed est locus infimus, tamquam inferno proximus, et a cælo remotus : facile enim inde ad infernum descenditur, et difficile in cælum ascenditur. Qui potestatem recipit, sublimari videtur ; sæpe tamen dejicitur secundum illud Ps. lxxii : *Dejecisti eos dum alleverentur* : frequenter enim talis dignitas ab indigno, et per indigna obtinetur ; et cum eam aliquis obtinuerit, indigna operatur. Unde cum multum Deum despiciat, multum a Deo despicitur, et vilior est quam prius I Rom. xi : *Qui me contemnunt, erunt ignobiles* ; Luc. xvi : *Quod altum est hominibus, abominatio est ante Deum.* In lib. *Consol.* « Quanto major est dignitas, tanto despectiores improbos facit, et non impune. » Reddunt namque improbi parem dignitatibus vicem, quas sua contagione commaculant. Sapiens : « Non

sit tibi ambitio ad dignitatem quæ tibi nihil nisi indignitatem majorem adducet. » Ideo cave honores, quos sine culpa tenere non potes. Sublimitas honorum magnitudo scelerum est: dominium esse videtur, cum potius sit subjectio: ministerium potest homo habere in talibus; sed verum dominium illius est qui ait: *Ego Dominus, ego Dominus*, Lev. xix, et cui Ecclesia dicit: « Tu solus Dominus. » Augustus Cæsar cum toti mundo præesset, prohibuit ne aliquis eum dominum vocaret. Superbi in dignitate positi terrena, præter pessimam servitutem diaboli et vitiorum in quibus sunt, etiam illis serviunt quibus dominari videntur, quibus providere tenentur: et quantum ad hoc minus sunt liberi, quam illi, cum habeant multis servire, illi vero uni. Hæc potestas honor videtur esse contemptibilis, non desiderabilis, quam peccati ignominia introduxit, quam ignominia servitutis multorum comitatur, qua aliquis ministerium habet in his quæ Deus non ex corde suo operatur, scilicet inflictione pœnarum Thren. iii: *Non humiliavit ex corde suo, et abjecit filios hominum*. Viles personæ reputantur qui sententias judicum pœnales exequentur mutilando homines, vel suspendendo, vel aliter puniendo. Potestas ista multum habet periculi. Augustinus in *Regula*: « Quanto quis in loco superiori tanto in periculo majori versatur. » Habenti potestatem istam ex omni parte timendum est. Dæmones, qui cœlestem altitudinem amiserunt, positus in terrena altitudine invidentes eos maxime impugnant, reputantes sibi honorabilius si eos sibi subjecerint, et scientes quod per eos pluribus poterunt dominari; sicut in exercitu hostes visibiles ducem exercitus capere vel occidere conantur, eo quod, ipso capto, vel occiso, exercitus dispergatur, sic hostes invisibiles eum qui præest, maxime persequuntur I Reg. ult.: *Totum pondus prælii conversum est in Saul*. Subditi etiam volunt eos pervertere, alii eis obsequendo, alii persequendo, et bonis et malis volunt eos inducere ut eorum voluntatem faciant, et Dei voluntatem deserant. Hæc potestas locus est præcipitii; Bernardus: « Facile est in alto se continentem obstupescere, et de vita periclitari: » II Reg. i: *Incliti Israel super montes interfecti sunt*. Ibid. *Jonathas in excelsis occisus est*. Status ille periculosus est et quantum ad animam, et quantum ad corpus. Quantum ad animam

quia difficile in statu illo cavere a peccato. Inter reges Judæorum omnes se male habuerunt exceptis tribus. Ecl. xlix: *Præter David et Ezechiam et Josiam omnes reges commiserunt peccatum, nam dereliquerunt legem potentis, reges Juda, et contempserunt timorem Dei*. Glossa: « Hi tres comparatione aliorum non dicuntur peccasse: quod enim peccaverunt, condigna pœnitentia deleverunt, et devotione ex pietate Deo placuerunt: » Jerem. v: *Ibo ad optimates etc. Ecce hi magis confregerunt jugum, rupe-runt vincula*. In majori etiam periculo corporis sunt. Hieronymus: « Honores secum pericula trahunt, cito periclitatur potestas; quanto major honor, tanto majora pericula. » Idem: « Altissimi montes crebris fulminibus feriuntur. » Alii principes in sua civitate sine armatis non audent ire quod est valde miserum. Sap. « Nonne milites melius est perire, quam in civitate sine armatorum præsidio non posse vivere? » Alexander Magnus cum dominium mundi adeptus esset, sumpto veneno, usum linguæ amisit, et mortuus est: Julius Cæsar, postquam Pompeio prævaluerat, cum per triennium et octo menses tenuisset imperium, dolo Bruti et Cassii occisus est. Principibus specialiter Deus comminatur, Sap. vii: *Audite reges et intelligite etc. Horrende et cito apparebit vobis, quoniam judicium durissimum in his qui præsumunt fiet. Exiguo enim conceditur misericordia: potentes autem potenter tormenta patientur*. Ibid. *Fortioribus fortior instat cruciatio, quia status habentis potestatem periculosus est*; ideo Salvator cum vidisset quod venturi essent ut raperent eum, et facerent eum regem fugit in montem solus, Jo. vi. *Qui quærentibus se ad mortem se ultro obtulit*, Jo. xvii, volens ostendere quod aliquibus magis expediret esse mortuos, quam terrenam habere potestatem. Heb. xii, dicitur de Christo quod *proposito sibi gaudio sustinuit crucem*. Hæc potestas multum habet oneris: multum oneratus est qui unam civitatem, vel comitatum unum, vel regnum habet super humeros. De hoc onere conqueritur Moyses Num. xii, dicens Domino: *Cur imposuisti pondus universi populi hujus super me?* Peccata populi principi imputantur. Num. xxv, dixit Dominus ad Moysen: *Tolle cunctos principes populi, et suspende eos contra solem in patibulis, ut avertatur furor meus ab Israel*. Glossa: « Hoc si co-



gitarent homines, principatus non ambirent. » Multum habet punctionis hæc potestas, et maxime in principibus malis : in eis enim corona est spinea. *Postquam Saul recessit a Dep, spiritus malus eum exagitabat.* I Reg. xvi. Ambitio ambitiosorum crux, quomodo, omnes torquens, omnibus places? nil acerbius cruciat. Multum habet status iste inquietudinis, locus enim est ventis expositus, perflant altissima venti. Gregorius : « Quid est potestas culminis? tempestas mentis; specialiter perflat ibi aquilo, juxta verbum luciferi dominantis. Sedebo in lateribus aquilonis, Isa. xiv. Locus est frigidus sine calore caritatis, flatus Aquilonis est suggestio diaboli ad discordiam et odium, sic flatus Spiritus Sancti est exhortatio ad amorem et concordiam. Frequenter hæc potestas nociva est habenti Eccl. viii : *Interdum dominatur homo homini in malum suum* : verum honorem ut frequenter hic honor impedit, scilicet statum gratiæ et gloriæ, aufert homini etiam seipsum, ut non habeat tempus cogitandi de se, et operandi salutem suam, et cum cetera eum habeant ipse se non habet. Bernardus Eugenio Papæ : Cum omnes te habeant, esto etiam te ex habentibus unus. Si maledictus qui partem suam facit deteriorem, quid ille qui se penitus reddit expertem? » Sap. « Inestimabile bonum est suum esse. » Locus est bonis spiritualibus deficiens, quia secundum Augustinum « alta siccantur, ima replentur. » Status talis mons est, qui vix a Domino visitatur, et si ab eo visitaretur irrigatione gratiæ, flatu ventorum exsiccaretur. Ut frequenter propter utilitatem subditorum ponitur aliquis in tali statu potius quam propter suam : cappa pluvialis ceteris vestibus superponitur ad earum conservationem, non propter suum bonum, non quia carior habeatur, sed potius ut sola deturpetur. Gregorius : « Misericors Deus quod tenere diligit, ab extremis actionibus abscondit : nam et paterfamilias ad eum laborem servos mittit, a quo subtiles filios suspendit, et inde filii sine cessatione decori sunt, unde servi in pulvere deturpantur. » Ex prædictis patet quod potestas temporalis non est propter se appetenda, sed est multum timenda, locus vero humilis eligendus est secundum consilium Salvatoris dicentis, *Recumbe in novissimo loco*, Luc. xiv. Hic locus est congruens homini qui terra est et cinis Eccl. x : *Quid superbis terra et*

*cinis?* Terræ non congruit esse in alto, quæ est infima elementorum : cineri etiam non expedit ut in alto sit, ne dispergatur a vento. Status humilis locus est quietus, et tutus, et abundans bonis. Quietus est, quia non est ventis expositus. Isa. xxxii : *Erit vir quasi qui absconditur a vento, et celat se a tempestate.* Tutus est cum sit in imo. Augustinus : « Humilitas in imo est, et non habet quo cadat. » Bonis spiritualibus abundat velut vallis fertilis in Psal. lxiiv : *Valles abundabunt frumento.*

## CAPUT II.

### *Quod habenti potestatem terrenam necessaria sit sapientia.*

Habenti potestatem terrenam multum necessaria est sapientia. Si enim desit ei, nescit potestate uti. Bonum vero potestatis et aliarum rerum temporalium non est positum in earum magnitudine, sed in earum laudibili usu; Sapiens : « Stulto nulla re opus est, nulla enim re scit uti. » Et maxime nescit uti potestate, quia valde difficile est bene uti. Sic, sicut insanus periculose tenet gladium ne inde lædat se, vel alium, sic periculosum est potestatem habere insipienti, ne noceat sibi, vel alteri. Ad amorem sapientiæ monet eos qui præsumunt et natura, et sacra Scriptura, et multa exempla. Natura monet : quia in corpore humano caput quod inter membra præeminet et sensibus abundat, quinque sensus habens, cum cetera membra habeant unum, scilicet tactum, sic in eo qui ceteris hominibus præest, sapientia abundare debet. Non dedit natura eorum cornua asino stolido, per quæ in Scripturis intelligitur potestas. Quidam rex Romanorum scribens cuidam regi Francorum et orans eum ut liberos suos instrui faceret liberalibus disciplinis, adjecit : Rex illiteratus est quasi asinus cornutus. De admonitionibus vero Scripturæ paucas ponere sufficiat. Legitur Sap. vi : *Si delectamini in sedibus et sceptris, o reges populi, diligite sapientiam, ut regnetis in perpetuum.* Item in eod. : *Diligite lumen sapientiæ omnes qui præestis populis.* Item ibi : *Concupiscentia sapientiæ deducet ad regnum perpetuum.* Glossa : « Tunc bene regitur respublica, cum philosophi regnant, et reges philosophantur. » Magnum amorem habuit ad sapientiam Salomon cunctis re-

bus sapientiam præferens, cui cum dixisset Dominus : *Postula quod vis ut dem tibi, ait Domino : Servus tuus in medio est populi quem elegisti, populi infiniti, qui numerari et supputari non potest præ multitudine. Dabis ergo servo tuo cor docile, ut possit judicare populum tuum, et discernere inter bonum et malum.* III. Reg. III. Amor sapientiæ in principe Deo multum placet, principem sapientia multum decet, et populo multum utilis est. Primum patet ex hoc quod subditur post verba prius posita : *Placuit sermo coram Domino, quod Salomon rex rem hujusmodi postulasset.* Prov. XIV : *Acceptus est regi minister intelligens* (regi inquam cælesti) : *iracundiam ejus inutilis sustinebit* : inutilis dicitur, non intelligens. Principem multum decet sapientia : indecens valde est quod ille, qui alios dirigere habet, in se cæcitatem habeat, et in singulos alios duce indigeat. Utile valde est populo quod ipsius rector sapientiam habeat : *Rex enim sapiens populi stabilimentum est.* Sap. VI. E contrario : *Rex insipiens perdet populum suum.* Eccl. X. Necessaria est sapientia illi qui præest et propter se, et propter populum : propter se, cum sit in majori periculo quam ceteri, a quo periculo non est liberatio nisi per sapientiam. Prov. X : *Justi liberabuntur scientia.* Propter populum etiam necessarie est ei sapientia. Primo, quia mederi habet, sed non igne et ferro : lumen vero sapientiæ necesse est igne et ferro medentibus, sicut et illis qui aliter medentur. Saluberrimum omnium medicamentorum est sapientia. Sap. XI : *Per sapientiam sanati sunt omnes qui placuerunt tibi ab initio.* Secundo, quia subditos habet regere ut dux eorum ; cæcitas vero inutilem reddit hominem ducatum, secundum illud Matth. XI : *Cæcus, si cæco ducatum præstet, ambo in foveam cadunt.* Tertio, quia bona subditorum debet portare, non eos gravare ; si vero desit sapientia, ut frequenter, subditos gravat, secundum illud Prov. XXVIII : *Dux indigens prudentia multos opprimet per calumniam.* Sapientiam concomitatur temporalium abundantia, ut patet in Salomone III Reg. III, et Prov. VIII : *Mecum sunt divitiæ et gloria* etc., dicit sapientia. E contrario : defectum sapientiæ concomitatur temporalium indigentia, quam sequitur calumnia ad extorsionem pecuniæ facta, et oppressio subditorum. Quarto, quia subditos a periculis liberare debet, ad quod multum

valet sapientia Eccles. X : *Civitas parva et pauci in ea viri, venit contra eam rex magnus et vallavit eam, et extruxit munitiones per gyrum et perfecta est obsidio, inventusque in ea vir pauper et sapiens et liberavit urbem per sapientiam suam.* Quinto, quia debet populum defendere, ad quam defensionem multum valet sapientia, plus etiam quam fortitudo. Prov. XXIV : *Vir sapiens fortis est, et vir doctus, robustus et validus* etc. Eccl. IX : *Dicebant ergo meliorem esse sapientiam fortitudine.* Ibid. X : *Melior est sapientia quam arma bellica* ; Sapient. V : *Melior est sapientia quam vires, et vir prudens quam fortis.* Sexto, quia ab eo qui præest, procedere debet ordinatio in populo ; si vero desit sapientia, potius procedit inde confusio et turbatio. Prov. XXVI : *Quasi qui mittit lapidem in acervum Mercurii, ita qui tribuit insipienti honorem.* Apud gentiles Mercurius deus est mercatorum. Qui lapillulis computanti mittens lapidem in acervum lapillorum, quibus fit computatio, computum turbat, sic qui insipienti dat honorem turbat populum. Septimo, quia potestatem habens in hoc tenet locum Dei, et vices Dei debet agere, et secundum ipsius voluntatem populum regere, quæ per legem ipsius ei indicatur ; unde non debet esse omnino ignarus legis divinæ. Ideo præcepit Dominus Deuter. XVIII : *Postquam sederit rex in solio regni sui, describet sibi Deuteronomium legis hujus in volumine, accipiens exemplar a sacerdotibus leviticæ tribus, et habebit secum, legetque illud omnibus diebus vitæ suæ, ut sciat timere Dominum Deum suum.* Item, cum Dominus commisisset regnum populi Josue, dixit illi : *Non recedat volumen legis hujus ab ore tuo, sed meditaberis in eo diebus ac noctibus, ut facias et custodias omnia quæ scripta sunt in eo.* Rex secundum cor Dei, scilicet David de quo Dominus ait : *Inveni David filium Jesse virum secundum cor meum, qui faciet omnes voluntates meas,* Act. XIII, valde magnum amorem ad legem Dei habuit, ut patet ex multis verbis ipsius in Psalm. CXVIII : *Quomodo, inquit, dilexi legem tuam, Domine? tota die meditatio mea est.* Item : *Bonum mihi lex oris tui super millia auri et argenti,* Josias rex bonæ memoriæ magnum amorem ad legem Dei habuit, et Eccl. XLIX : *Memoria Josiæ in compositione odoris facta est, opus pigmentarii, in omni ore quasi mel indulcabitur ejus memoria ;*

cum lectus fuisset ei liber Deuteronomii, et audisset maledictiones scriptas in eo in transgressores legis, sciens populum transgressum fuisse legem, multum fuit iratus, et scidit vestimenta sua ipse, et misit in omnem provinciam, et congregavit omnem populum in Jerusalem, et stans supra gradus legit cunctis audientibus omnia verba libri, et percussit fœdus coram Domino, et compulit omnes sacramenta præstare ut leges Moysi per omnia custodirent, et delevit quæ ad cultum idololatriæ pertinebant. Legitur etiam de Ptolomæo Philadelpho rege Ægypti, qui erat infidelis quod cum nuntiatum esset sibi apud Judæos esse legem ore ipsius Dei editam, et digito ejus scriptam, voluit eam habere, et petiit ab Eleazaro Pontifice Judæorum ut mitteret sibi Judæos, hebrææ et græcæ linguæ peritos, cum lege Dei, qui ad eam transferendam sufficerent: et misit ei Eleazarus LXXII interpretes, qui legem ei transtulerunt, et sciscitatus est ab eis præcipue de duobus, de cognitione Dei et regni gubernatione. Si amorem habuit Ptolomæus ad legem veterem, et voluit eam habere, verisimile est quod magnum amorem habuisset ad legem clementiæ, scilicet ad Evangelium, si tradita esset, et hoc ei innotuisset. Hanc multum desiderabat Job xxxi, cum diceret: *Quis mihi tribuat auditorem ut desiderium meum audiât Omnipotens, et librum scribat ipse qui judicat, ut in humero meo portem illum?* Si lucratus est princeps Scripturam salubrem, libenter debet legere: si non est, prædicationem libenter debet audire: in quo quidem principes multum reprehensibiles sunt, qui raro, vel nunquam prædicationem audire volunt, qui in vanum videntur accepisse animas suas; de refectione corpus nimiam sollicitudinem habentes, refectionem vero animæ omnino negligentes; quantum ad illos impleta est in Ecclesia prophetia illa Isa. v; *Nobiles ejus interierunt fame;* Psal.: *Esurientes enim et sitientes, anima eorum in ipsis defecit.* Debet principes, si potest, procurare ut secum habeat sapientes, quorum sapientia et doctrina proficiat; Seneca: « Qui nihil videntur agere, majora agunt, humanaque et divina simul tractant. » Proverb. i: *Audiens sapiens sapientior erit, et intelligens gubernacula possidebit.* Item in eod. xiii: *Qui cum sapientibus graditur, sapiens erit: amicus autem stultorum similis eis efficietur;* in Psalm. ii: *Erudimini, qui judicatis ter-*

*ram.* Cum sapientia pretiosior sit cunctis opibus, et prævaleat etiam regno et sceptris, non est negligenda pro aliqua re temporali. Sap. vii: *Præposui eam sedibus et regnis:* sicut anima quæ habet corpus regere, nobilius est ipso corpore, et potentia videndi nobilior est suo organo; sic sapientia, qua regnum regitur, ipsi regno est præponenda. Leguntur magni principes magistros habuisse, ut Alexander magnus Aristotelem, Nero imperator Senecam. Eccl. vi: *Si dilexeris audire, sapiens eris. Initium sapientiæ est verissima disciplinæ concupiscentia,* Sap. vi.

### CAPUT III.

*Quod habenti potestatem et sapientiam multum necessaria sit bonitas.*

Ostensum est quod habenti potestatem valde necessaria sit sapientia; nunc ostendendum est quod habenti potestatem et sapientiam bonitas multum sit necessaria. Notandum ergo quod si bonitas potestatem et sapientiam concomitetur, eis bene utitur, et est hoc multum utile Ecclesiæ Dei; si vero bonitas desit, et malitia adsit, male utentur eis, et est Ecclesiæ valde noxium, ut patet in diabolo habente magnam potestatem et astutiam sine bonitate. Si princeps malus sit, altitudo potestatis ejus mons pestifer est, unde multa mala populo proveniunt. Jerem. li: *Ecce ego ad te, mons pestifer, qui corrumpis universam terram.* Nocet talis princeps populo male imperando, male non corrigendo, exemplo malo ad malum provocando. Prov. xxviii: *Regnantibus impiis ruinæ hominum.* In eod.: *Leo rugiens, et ursus esuriens, princeps impius super populum pauperem.* Ibid. 29: *Cum impii sumpserint principatum, gemet populus.* Dignitas principis impii cathedra pestilentiae est: beatus est qui in illa non sedit. Et notandum quod multum desideranda est bonitas eorum qui præsent: bonum per se amabile est, bonitas ratio est quare aliquid sit amandum. Augustinus: « Notio veri et amor boni nobis naturaliter insita sunt. » Septem vero sunt quæ ad amorem propriæ bonitatis debent homines incitare. Primum est patris cælestis bonitas, a qua degeneramus si boni non sumus. Seneca: « Pudeat eum tanto patri vixisse degenerem. » Multum periculosa est hæc degeneratio,

quæ piissimum patrem nobis convertit in hostem, ut nos odiat ad mortem et ad mortem æternam. Secundum est hoc quod bonum Dominum habemus, qui summe odit malitiam, cujus potentiæ non possumus resistere, et cujus sapientiæ nihil possumus abscondere, qui malitiæ subditorum, si finalis fuerit, non parcat. Daniel. iii : *Thronus ejus flamma ignis* ; Malac. iii : *Quis stabit ad videndum eum* ? Isa. xxx : *Ardens furor ejus, et gravis ad portandum*. Tertium est hoc quod cum tantum in omnibus rebus nostris bonitatem amamus, magnæ corruptionis est quod aliquis non amet bonitatem in se, qui in omnibus suis eam amat. Augustinus : « Bona vis habere, et bonus non vis esse? quid est quod te malum velis habere? nihil omnino, non uxorem, non servum, non tunicam, postremum non caligam, et tamen vis habere malam vitam? Rogo te præpone vitam tuam caligæ tuæ. » Item : « Quid te offendit vita tua, quam solam vis habere malam? » Seneca : « Nihil est cuique se vilis. » Quartum est hoc quod Deus tantum amat bonitatem nostram quod propter eam in mundum misit Unigenitum suum. Immittit etiam cordibus nostris Spiritum suum. Propter hanc etiam spiritus angelicos mittit in ministerium; hanc petentibus paratus est dare. Luc. xi : *Si vos cum sitis mali, nostis bona data dare filiis vestris, quanto magis Pater vester cælestis dabit spiritum bonum petentibus se* ? Quintum hoc est quod bonitas nostra tanti valoris est, quod cum homo prævaleat toti mundo, bonitas ejus bonitati totius mundi videtur prævalere. Hæc est quæ maxime Deo assimilatur, comparatione hujus cetera non reputantur. Seneca : « In homine nihil ad rem pertinet quod a multis salutetur, quam pretioso recumbat lecto, quam perlucido bibat poculo, sed quam bonus sit. » Sextum est hoc quod a bonitate hominis bonitas rerum dependet. Si homo non sit bonus, non sunt vere bona opera ipsius, sed bonorum imagines. Sapiens : « Apud sapientem sunt honesta, apud vulgus simulacra rerum honestarum. » Plus valet unum opus viri justi, quam infinita peccatoris. Sapiens : « Unus dies hominum eruditorum plus valet quam imperiti longissima ætas. » Bona etiam temporalia peccatori sunt mala et noxia. Fit enim justo Dei judicio cum aliquis est malus vero dominio quod illa ei sint mala quibus dominatur, quasi vin-

dicantia creatorem suum. Sapiens : « Nihil homini bonum sine se bono; » Eccl. viii : *Bona est substantia, cui non est peccatum in conscientia*. Sicut sanguis non est bonus corpori qui est ei materia infirmitatis, sic non pecunia homini quæ materia est peccati. Septimum est hoc quod sicut homo si sit bonus, melior est ceteris creaturis visibilibus, sic si malus miserior est illis : quia non solum malus est malitia pœnæ, sed etiam culpæ : debitor est et mortis temporalis et æternæ, in quo deterioris conditionis est serpentibus et bufonibus. Simile invenitur in Angelo qui, si bonus sit, valde bonus est; si malus sit, valde malus est, ut diabolus. Multum desideranda est bonitas ejus qui præest Ecclesiæ Dei ut sit utilis. Si enim bonus est, bonos dirigit et custodit, malos corrigit et a malis compescit, exemplo ad bonum provocat, bona imperat et promovet, et mala dissipat. Prov. xx : *Rex, qui sedet in solio judicii, intuitu suo dissipat omne malum*. In solio judicii sedet qui secundum æquitatem judicat. Multum conformantur subditi ei qui præest in malo, vel in bono. Eccl. x : *Secundum judicem populi, sic et ministri ejus : et qualis est rector civitatis, et tales qui habitant in ea*. Matth. ii : *Herodes rex turbatus est, et omnis Jerosolyma cum eo* ; Glossa : « Propter favorem, qui asæpe populus eis injuste favet, quos crudeles sustinet. » Bernardus : « Patet quantum nocet iniqua potestas, quomodo caput impium subjectos quoque conformat impietati. » Misera plane civitas, in qua regnat Herodes, quoniam herodianæ malitiæ particeps erit. Magnum periculum est quod hostis Ecclesiæ sit in capite ejus, super quo plangit Jeremias dicens : *Facti sunt hostes ejus in capite*. Jam dominium diabolus habet, ex quo aliquis de suis præest, fiduciam hostis habere potest quod totum occupet, ex quo jam arcem tenet. Non videtur dicendus esse rex, princeps, cui bonitas deest, Isidorus : « Reges a recte regendo vocati sunt; atque recte faciendo regis nomen tenetur, peccando amittitur. »

## CAPUT IV.

*De erroribus qui sunt circa nobilitatem.*

Cum Salomon dicat, *Beata terra cujus rex est nobilis*. Eccl. x, patet quod no-



bilitas in principe est laudabilis. Sed quia multi circa nobilitatem errant, credentes eos nobiles qui non sunt, tangendum est de erroribus hominum circa nobilitatem, et declarandum est quæ sit nobilitas vera, et signa ponenda. Unus error circa nobilitatem est quod multi credunt se, vel alios esse nobiles, propter nobilitatem corporis, licet habeant ignobilitatem mentis, et sint servi vitiorum et diaboli. Sapiens : « Non est quod sibi aliquis de nobilitate generis blaudiat, si ex meliori parte sui sit famulus. Multo indignius est mente servire quam corpore. » Augustinus : « Malus tot dominorum servus est, quot vitiorum. » Bernardus : « An non servus cui dominatur iniquitas, et maxime nisi tu forte indignius iudices hominem tibi, quam vitium dominari. » Secundus error est quod aliquem nobilem reputant propter nobilitatem alienam. Non est aliquis sapiens propter sapientiam quam pater habuit, ut in filio Salomonis patet, qui fuit valde stultus, cum pater ejus fuerit sapientissimus, nec aliquis dives propter divitias quas parentes ejus habuerunt, quæ ad eum non pervenerunt; sic non est aliquis gloriosus nobilitate quam parentes ejus habuerunt, si ipse degeneravit. Sap. : « Nemo inglorius vestrorum vixit, nec quod ante nos fuit, nostrum est : animus nobilem facit. » Tertius error est, quod credunt aliquos esse nobiles, quia a nobilioribus originem habuerunt, qui error multipliciter potest manifestari. Primo quia si habeatur respectus ad primam causam, scilicet hominum, ab uno omnes originem habemus; unde quantum ad hoc omnes homines sunt æque nobiles. Malach. II : *Numquid non Deus unus creavit nos, quare despicit fratrem suum unusquisque vestrum?* Si respectus habeatur ad causam creatam, omnes habemus primum patrem et primam matrem, Adam scilicet et Evam. Omnes ergo vel sumus nobiles vel sumus ignobiles. Non legitur Deus fecisse unum omnem argenteum, unde essent nobiles, et unum luteum unde essent ignobiles; sed unumquemque de limbo terræ plasmavit, Malach. II : *Numquid non pater unus omnium nostrum?* Augustinus : « Adam et Evam intendamus, et omnes fratres sumus. » Præterea et ex eadem radice exeunt vile et nobile, et ex eadem radice procedunt flos farinæ et furfur tamen furfur cibus vilis est, quo porci pas-

cuntur, ex flore vero farinæ fit nobilis panis unde pascuntur reges. Item ex eadem radice procedunt rosa et spina. Rosa creatura nobilis est, benefica his qui juxta eam sunt, gratum odorem suum undique diffundendo; spina vero vilis est pungens eum qui juxta ipsam est; sic ex eisdem parentibus possunt nasci duo, quorum unus erit nobilis, alter vero ignobilis : unus ad modum rosæ vicinis suis erit beneficus, et hic nobilis erit; alter vero ad modum spinæ vicinos pun gere non cessabit, in ignem infernalem sicut spina mittendus, et hic erit ignobilis. Ex eadem arbore nascuntur duo poma, unum sanum et aliud putridum, vel vermem habens. Ex eadem libero arbitrio procedit bonum et malum; si nobile esset, quidquid a nobili procedit, pediculi, et aliæ superfluitates, quæ a nobilibus generantur, essent nobiles. Quod non sit homo nobilis, eo quod ortum habeat a nobilibus, ipsi Philosophi perpenderunt. Nemo altero nobilior, nisi cui rectius est ingenium et bonis artibus aptius. Item nihil aliud est nobilitas, quam antiquatæ divitiæ. Item quis est eques, aut servus, aut libertinus? nomina ex ambitione, vel injuria nata. Plato ait neminem regem nisi ex servis oriundum esse, neminem servum nisi ex regibus : omnia ista longa varietas miscuit, et sursum deorsum fortuna versavit. Quartus error est quod ipsi judicant unum altero nobiliorem secundum corpus quod est servilis conditionis, datum enim est ad serviendum spiritui : quod ridiculum est illud judicium, sicut si aliquis judicaret servum vel rusticum aliis servis vel rusticis nobiliorem. Quintus error est, quod judicant homines habere nobilitatem per vilis portionis a corpore parentum traductionem. Non sic sentiebat Job XVI, qui ait : *Putredini dixi, pater meus es.* Sextus error est, quod nobilem reputant eum qui per ignaviam nobilitatem amisit, et non illum qui virtute eam acquisivit : illum reputant nobilem qui a probitate destitit, non illum qui in probitate perstitit, nobilem eum reputant qui degeneravit, et genus suum obscuravit, et non illum qui genus suum ornavit et illustravit. Sapiens : « Pulchrum est nobilitati respondisse, pulchrum est humilius genus factis illustrasse, laudabile est homini a statu suo surgere, caput esse generis sui decus est. » E contrario vero erubesci-



bile est ei a statu suo cadere, esse caudam generis sui et dedecus. Septimus error est, quod eos reputant nobiles, quos Deus iudicat viles, scilicet homines sibi servire nolentes, qui sunt rustici. I Reg. II : *Qui me contemnunt, erunt ignobiles*, seu viles. Simpliciter iudicandus est rusticus, qui Deo est rusticus. Nobilitas corporis est possessio magni oneris et parti valoris si sit sine nobilitate mentis, et sequelæ pestilentis. Magni honoris comitatus, vel magni episcopatus non sufficient ad solvendum censum quo onerata est, et faciendum expensas quas requirit : immo ultra reditus quas habent, oportet, sicut nobiles aliqui recognoscunt, ut se diabolo et obligent et regnum cœlorum impiguoent, ut onus nobilitatis portare possint. Utilitas hujus nobilitatis est refrænatio malis. Hieronymus : « Nihil aliud video in nobilitate appetendum, nisi quod nobiles quadam necessitate adstringuntur, ne ab antiquorum probitate degenerent. » Sapiens : Ad hoc tantum nobilitatis meminimus, ut cum claritate generis morum sanctitate contendas, et cum nobilitate corporis animi nobilitate proficias. ¶ Sequelam pestilentem habet, quia secundum verbum sapientis, commune malum nobilitatis est superbia, quam multa mala sequuntur : regina etenim vitiorum est, unde non vadit sola ; immo comitantur eam multa mala. Eccl, x : *Initium omnis peccati superbia est, qui tenuerit eam, adimplebitur maledictis.*

## CAPUT V.

### *De vera nobilitate.*

Vera nobilitas animi est secundum illud :

Nobilitas sola est animum quæ moribus ornat.

Et hæc duplex est : quædam naturalis, de qua dixit Sapiens : Quis est generosus ad virtutem? bene a natura compositus : item nemo altero nobilior nisi cui rectius est ingenium, et bonis artibus aptius ; altera est gratuita, quæ filios Dei et Christi coheredes facit. Ad veram principis nobilitatem pertinet ut ipse sit sine ignobilitate, sine erubescibili servitute, a nulla rusticitate superari se permittat, turpitudinem omnem abhorreat, ad largitatem bonorum bene se habeat, bona sua libenter et liberaliter tribuat, subjectis sit clemens et pius,

in rebelles severus, parva despiciat, magna appetat, aggrediatur ardua, non vano timore ab eo quod aggressus est citra consummationem desistat. Non enim est nobilitas vera, quæ non est pura, sed ignobilitati admixta est, vel sociata, qualis est in eo qui habet nobilitatem carnis cum ignobilitate mentis. Non est vere nobilis qui servit diabolo et vitiis : non est vere nobilis, in quo corpus servilis conditionis dominatur. Quomodo enim nobilis est, qui servi sui servus est? Non est iste vere nobilis, qui servus est ventris sui, quales erant, de quibus dicitur Rom. ult. : *Hujusmodi Christo Domino nostro non serviunt, sed sui ventri.* Qui ventrem habent pro Domino, Dominum habent valde vilem, et improbum exactorem, multas expensas requirit ejus servitium. Non est vere nobilis, qui servus est membrorum erubescibilium, quæ generationi sunt deputata, et adeo subjectus est eis, ut obediat cum ei imperant mortem suam. Potius eligendum esset servum esse unius leprosi, quam esse in servitute tali. Vere nobilem nulla rusticitas superat eum sibi assimilando : rusticus est qui rusticitatem facit, quia vult Deus filios perfecte esse nobiles, ut nullius rusticitatis occasione sibi facta rusticitatem faciant. Parum nobilis est qui primo rusticitatem nulli facit, provocatus tamen eam reddit, cum non exeat de sacco nisi quod est in eo. Aliquid rusticitatis videtur esse in eo, qui occasione sumpta ab alio rusticitatem facit. Vere nobilis turpitudinem abhorret, et illam quæ est immunditiæ peccati, et illam quæ est perditionis. Immunditiam peccati, quæ aliam immunditiam excedit, pro posse suo cavet : et si contingat eam incurrere, diu eam sustinere non potest. Vere nobilis omnibus fidem inviolabiliter servat, et cavet ne erga aliquem proditiose agat, et maxime erga Deum qui Dominus est ipsius super alios dominos. Proditiose erga Deum agit, qui ex ejus bonis vivit et senescit, si eum impugnat, et diabolo inimico Domini et suo adhæret. Hæc proditio coram toto mundo, si non de ea satisfecerit, ipsi objicietur. Vere nobilis ad largitorem bonorum bene se habet. In corde nobili plus proficiunt bona, in corde servili plus mala. Servi non emendantur nisi suppliciiis. Prov. xxix : *Servus verbis erudiri non potest.* Multi qui reputantur nobiles, in hoc magnum patiuntur de-

fectum nobilitatis : multas enim rusticitates Deo faciunt bonorum omnium largitori, quas homini non facerent. Qui beneficium recepit, et benefactoris et beneficii dicitur reminisci : ipsi vero quanto plura beneficia a Deo recipiunt, tanto minus ipsius memores sunt, Oseæ III : *Adimpleti sunt, saturati sunt, et elevaverunt cor suum*; unde Gregorius : « Qui felicitatem quæsitam in terris invenit, auctorem qui eam tribuit non requirit. » Item : « Qui homini gratias agunt de minimo xenio, non agent gratias Deo de maximo beneficio? » Item : « Minus Deum diligunt, qui plura ab eo recipiunt, et minus ab ejus offensa se custodiunt, et quanto majorem terram ab eo tenent, tanto minus servitium ei exhibent. » De bonis etiam Domini, quæ in manibus suis habent, nolunt Deo per pauperes petenti dare, vel ad centuplas usuras commodare, quod uni Judæo, vel Saraceno facerent, si sine peccato hoc facere possent. Augustinus ad avarum : « Dixit tibi Christus : Da mihi ex eo quod tibi dedi, de meo quæro, da et redde; habuisti me largitorem, fac me debitorem. Parum est quod dixi, habuisti me largitorem, habeam te fœneratorem : pauca tradas, plura reddam; temporalia mihi das, æterna restituam. » Vere nobilis bona sua libenter communicat, imitator Dei qui est nobilissimus et liberalissimus. Tanta est ejus liberalitas, ut non solum sua, sed etiam seipsum largiatur, nec solum servientibus sibi, sed etiam hostibus suis bona sua communicat : *Ipse enim solem suum oriri facit super bonos et malos, pluit super justos et injustos*, Matth. v. Ipse propter liberalitatem fecit quæcumque fecit, creaturas rationales ut eis daret, alias ut eas daret. Leo animal nobile et rex animalium liberalis est : unde Aristoteles dicit illum esse communicativum. Et sicut liberalitas signum est nobilitatis, sic rapacitas signum est rusticitatis : unde aliqui qui reputantur nobiles, rusticissimi sunt, eo quod bonis suis spolient pauperes, sicut ostendit magister Alanus quibusdam militibus, qui audito, quod tantus clericus esset, quod ad omnia interrogata responderet, accedentes ad eum de communi consilio, quæsierunt ab eo quæ esset maxima curialitas, qui respondit eis, quod curialissimum esset dare, qui responsionem ejus acceptaverunt. Tunc

ipse dicit eis ut, habito consilio de responsione ad invicem, sibi dicerent, quæ esset maxima rusticitas : et cum, habito consilio de responsione, convenire non possent, ipse increpavit eos dicens, quod posuerat eos in via per quam possent invenire responsionem : sicut enim dare curialissimum, ita auferre, quod est ei contrarium, rusticissimum est, et subdidit, vos ergo qui non cessatis auferre pauperibus, rusticissimi estis. Vere nobilis clemens est subjectis et pius : sicut leo animal nobile hominibus prostratis ante se et infirmioribus animalibus parcere dicitur, in repugnantia vero sævire. Vere nobilis parva despicit, et magna appetit. Non est vere nobilis qui terræ amorem adhærens de regno cælorum non curat : sicut cor nobile non habet qui terram unius pauperis militis ad se pertinentem ex parte matris, uni magno regno pertinenti ad se ex parte patris præponeret. Ex parte matris nostræ Evæ pertinet ad nos miseria præsentis exilii, ex parte patris cœlestis regnum cælorum. Ad vere nobilem pertinet dicere illud cum David Psal. LXXI : *Quid mihi est in cælo, et a te quid volui super terram?* Vere nobilis leoui similis nullo vano timore terretur Prov. xxx : *Leo fortissimus bestiarum ad nullius pavebit occursum.*

## CAPUT VI.

*Quod principibus superbia sit cavenda et timenda, et humilitas amanda.*

Quia potestatem terrenam frequenter comitatur superbia, ostendendum est quod superbia principibus multum sit timenda et cavenda; humilitas vero multum amanda. Ut principes superbiam caveant, vult Dominus ut ruinam superbi Angeli attendant : unde Ezech. xxviii : *Cherubim in terram projeci te, ante faciem regum dedi te ut cernerent te* : et quibusdam interpositis subditur : *Nihil factus es, et non eris in perpetuum.* Multum timendus est mons superbiæ, in quo Angelus adeo deterioratus est. Bernardus : « Nonne hic est mons, in quem Angelus ascendit, et diabolus factus est? » Attendere etiam debent principes ad illos reges, qui propter superbiam suam sunt dejecti; et ut causa exempli de multis paucos proferamus in medium, Saul hu-

milis in regem est sublimatus; superbus vero a regno est dejectus; I Reg. xv, ait ei Samuel: *Nonne cum esses parvulus in oculis tuis, caput in tribubus Israel factus es?* et quibusdam interpositis subditur: *Quia projecisti sermonem Domini, projecit te Dominus ne sis Rex super Israel.* De Ozia legitur II Paral. xxvi, quod: *cum roboratus esset, elevatum est cor ejus in interitum suum, et neglexit Dominum Deum suum, et volens usurpare officium sacerdotale percussus est lepra, et fuit leprosus omnibus diebus vitæ suæ:* et Dan. iv, sic legitur: *Deambulabat rex Nabuchodonosor in aula Babylonis: et ait: Nonne hæc est Babylon civitas magna, quam ego ædificavi in domum requi in robore fortitudinis meæ, et in gloria decoris mei? Cumque adhuc esset sermo in ore regis, vox de cælo ruit: Tibi dicitur Nabuchodonosor rex: Regnum tuum transit a te:* ibid. v: *Quando elevatum est cor Nabuchodonosor, et spiritus ejus obfirmatus est ad superbiam, depositus est de solio requi sui, et gloria ejus ablata est:* Isa. xxxvii: *Dicit Dominus Sennacherib: Superbia, tua ascendit in aures meas etc.* subditur Ibid. de ejus dejectione: *Egressus Angelus Domini percussit in castris Assyriorum centum octuaginta quinque millia hominum, et reversus est rex Sennacherib rex Assyriorum, et cum adoraret in templo Deum suum, filii ejus percusserunt eum gladio:* Eccles. x: *Sedes ducum superbiorum destruxit Deus.* Non debet princeps reputare se magnum, eo quod in altitudine potestatis sit positus, sicut nec granum milii magnum est, licet in monte est. Sapiens: « Nemo istorum quos divitiæ et honores in alto fastigio posuerunt, magnus est, sed tibi magnus videtur, quia cum basi illum metiris; non est magnum milium, licet in monte constiterit. » Non debet superbire princeps ex hoc quod in alto positus est. Aliquando enim in alto milia levantur, et pretiosa in imo remanent: tenet granum locum in infimum, palea vero est sursum. Non debet se reputare meliorem his quibus præest, nec eos despiciere. Et si caput corpore humano sit altius, corpus tamen est majus; corpus regitur a capite, sed caput portatur a corpore: non minus indiget caput corpore, quam corpus capite: caput habet a corpore quod sit in alto, corpore subjecto quod quantum in se est, esset in imo. Sic princeps a subditis habet potestatem, et quod in alto sit; et cum

eos despicit, aliquando potestatem et altitudinem suam amittit, sicut accidit Roboam filio Salomonis stulto et superbo. III Reg. xii: *Dicit Roboam populo: Pater meus aggravavit jugum vestrum, ego autem addam jugo vestro: pater meus cecidit vos flagellis, ego cedam vos scorpionibus,* propter hoc amisit majorem partem regni. Scorpio dicitur rubus aculeatus, vel flagellum virgarum nodosum. Multum voluit Dominus regem populi sui cavere superbiam: unde Deut. xvii: *Non poteris alterius gentis hominem tibi regem facere, qui non sit frater tuus: cumque fuerit constitutus, non multiplicabit sibi equos.* Item in eodem: *Describet sibi Deuteronomium, ne elevetur cor ejus in superbiam super fratres suos nimium:* Dan. iv: *Dominatur excelsus in regno hominum et cuicumque voluerit, dabit illud, et humillimum hominum constituet super eos.* Multum dissuadet Scriptura sacra superbiam his qui præsent. Eccl. xi: *In die honoris tui ne extollaris:* Ibid. xxxii: *Rectorem te posuerunt, noli extolli, esto in illis quasi unus ex ipsis.* Superbia in eo qui præest, multum ipsi est periculosa et Deo, et hominibus multum exosa, subditis nociva et onerosa, principi periculosa, tamquam infirmitas quæ in eo difficile sanatur: materiam enim magnam habet superbiendi, et quasi adhærens est materia, unde difficile evacuatur. Dignitates enim multum amantur, et difficile relinquuntur. Præterea superbiam tamquam vitiorum reginam multitudo vitiorum comitatur. Eccl. x: *Initium omnis peccati superbia.* Cum status habentis potestatem multum sit ex se periculosus, secundum illud Augustini: « Quanto quis in loco superiori, tanto in periculo majori versatur. » Superbia etiam multum fit periculosa, secundum illud Eccl. iv: *Synagogæ superbiorum non erit sanitas etc.* Si princeps superbiam non vitat, vix est quin peccet, cum scriptum sit Eccl. x: *Odibilis coram Deo et hominibus est superbia.* Multum est cavenda ei qui præest, qui secundum verbum Augustini « plus debet appetere amari a subditis quam timeri. » Ad Deum etiam, a quo honorem habet, et cujus minister est, sic se debet habere ut ab eo non odiatur, sed ametur. Speciale odium habet Deus ad superbiam, quæ eum primo inhonoravit. Multum comminatur Deus in sacra Scriptura superbiam eorum qui præsent. Isa. xxviii: *Væ coronæ superbiam. In eodem: Pedibus*

*conculcabitur corona superbiæ.* Abd. 1 : *Si exaltatus fueris ut aquila et inter sydera nidum tuum posueris, inde extraham te, dicit Dominus : Job. xx : Si ascenderit in cælo superbia ejus, et caput ejus nubes tetigerit, quasi sterquilinum in fine perdetur.* Nociva est superbia principis, et eam sequitur ira, odium, jurgium, guerræ. Nam pix principem malum designans, secundum Josephum, ex se ignem producit, sic princeps superbus, iracundus, odiens vicinos suos, jurgia et guerras faciens. Prov. xiii : *Inter superbos semper jurgia sunt.* Ibid. xxxii : *Arma et gladii in via superbi :* Eccle. xxvii : *Effusio sanguinis in rixa superbi :* In Psal. ix : *Dum superbit impius, incenditur pauper.*

Quicquid delirant reges, plectuntur achiivi.

Onerosa est superbia principis subditis, quia magnas expensas requirit, unde frequenter comitatur eam paupertas, secundum illud Eccl. xxi : *Domus, quæ nimis locuples est, annullabitur superbia ; paupertatem vero principis sequitur gravamen exactionum in subditis.* In dignitate positum plus debet magnitudo oneris, quod habet supra se, ad humilitatem inclinare, quam altitudo honoris in superbiam elevare. Eccl. iii : *Quanto major es, humilia te in omnibus.* Super omnia eos qui præsent, debet ad humilitatem inducere Christi humilitas, qui regum est rex et caput Ecclesiæ, qui humillimus fuit. Magna perversitas et deformitas est quod aliquod membrorum corporis altius sit capite. Indecens est valde quod rege sedente ad terram, servi ejus sedent in alto. Augustinus loquens de illo verbo Apostoli ad Phil. ii, *Humiliavit semetipsum :* « Ecce habemus humilitatis exemplum, superbiæ medicamentum. Princeps tuus humilis est, et tu superbus? Caput est humile, et membrum superbum? » Licet hominibus cunctis medicina tumoris sit humilitas Christi, specialiter tamen his qui præsent. Isa. xlii : *Utinam dirumperes cælos et venires, a facie tua montes defluerent,* idest principes humiliarentur. Perversitas magna est quod superbiat qui habet solum ministerium, eum humiliari videat eum qui habet dominium. Pulchrum ornamentum in principe est humilitas. Bernardus : « Nescio quo pacto vis humilitatis major in majoribus, clamor in clamoribus comprobatur. » Idem : « Non est magnum in abjec-

tione esse humilem, magna prorsus et rara virtus est humilitas honorata. » Quantumcumque homo in hac vita in alto sit, tamen terra est, et cinis, unde non est ei superbiendum. Eccl. x : *Quid superbis terra et cinis?* In principe salubris est capula, ut cogitans se esse summum, cogitet se esse cinerem vilissimum : hæc humilitas in principe multum ad hoc juvat, ut a terrena dignitate transeat ad cœlestem. *Pauperum enim spiritu, scilicet humilium, regnum cœlorum est.* Matth. v. Apoc. iii : *Ecce dedi ostium apertum coram te quod nemo potest claudere, quia modicam habes virtutem, scilicet humilitatem.* Superbia vero multum hoc impedit, Matth. xviii : *Nisi conversi fueritis, et efficiamini sicut parvuli, non intrabitis in regnum cœlorum.*

## CAPUT VII.

*Quod principi sit cavendum mendacium.*

Cum multum deceat principem veritas, ostendendum est quod tam falsitas quam vanitas veritati opposita, principi multum sit cavenda, et veritas multum amanda. Quod princeps vanitatem, et falsitatem cavere debeat, intellexit rex Salomon, qui ait Domino : *Vanitatem et verba mendacii longe fac a me,* Prov. xxx. Cavendum est principi mendacium ut venenum. Caveant sibi principes multum a corporali veneno, amplius cavendum est eis a veneno mendacii quod adeo mortiferum est quod adhuc existens in ore hominem occidit, secundum illud Sap. i : *Os quod mentitur, occidit, animam.* Hoc venenum habuit in ore serpens, qui Evam matrem nostram decepit, cum ait : *Nequaquam moriemini,* Gen. iii. Hoc venenum occasio dicitur fuisse quod serpens venenum corporale habeat in ore. Cavendum est mendacium, eo quod ei multum noceat, Deo multum displiceat, et eum opprobrium hominum faciat. Quæ differentia est inter denarium bonum et falsum, est inter principem mendacem et veracem ; vilis est denarius falsus respectu boni, centum enim falsi non valent unum bonum, sic princeps mendax parvi valoris est. Cum princeps nolit unum de denariis suis falsum esse, quomodo se velit esse falsum et mendacem? videtur se habere viliores denario uno. Cum principes monetæ falsarios graviter puniant, quid



faciet princeps summus de illis principibus qui seipso falsificant? qui enim debent habere in se veritatem, destructa ea, habent falsitatem et mendacitatem diaboli imaginem, de quo dicit Salvator Joan. viii : *Dum loquitur mendacium, ex propriis loquitur, quia mendax est et pater ejus.* Aliquando auditorus est princeps mendax : *Cujus est hæc imago?* et cum responsum fuerit: diaboli, dicitur: reddite quod est diaboli diabolo, et cum ipso mittetur in ignem æternum. Mendacium multum displicet Deo in quocumque homine, sive princeps sit, sive de populo : unde enumeratur lingua mendax inter ea quæ specialiter odit, Prov. vi : *Sex sunt quæ odit Dominus, et septimum detestatur anima ejus, Oculos sublimes, linguam mendacem,* etc. Mendacium est immunditia membrorum nobile maculans, scilicet os; unde Salvator falsum testimonium enumerat inter ea quæ coinquinant hominem, Matth. xxv. Debet ergo homo abominari mendacium, quod si non facit, si ei placet, ipsi Deo abominabilis efficitur, secundum illud, Prov. xii : *Abominatio sunt Deo labia mendacia.* Specialiter est abominabilis Deo princeps mendax, qui immunditiam oris cavere debuit, nec solum propter membri quod maculat nobilitatem, sed et propter generis nobilitatem et dignitatis sublimitatem : nec solum displicet Deo princeps mendax, sed et hominibus, secundum illud Eccl. xxv : *Tres species odivit anima mea, et aggravor valde animæ illorum, pauperem superbum, divitem mendacem, senem fatuum, et insensatum;* versus :

Tres species vere Salomonis displicuere :  
Vir mendax, fatuusque senex, pauperque super-  
[bus.]

Dives mendax est princeps mendax, plus habens in bonis temporalibus, quam centum, vel mille alii homines. Mendacium principem opprobrium hominum facit. Eccl. ii : *Opprobrium nequam in homine mendacium,* et subdit : *Potior est fur, quam assiduus vir in mendaciis.* Cum mendacium sit opprobrium, et princeps plus debeat cavere opprobrium quam illi qui sunt de populo propter suam nobilitatem, et propter dignitatem, plus debet cavere assiduitatem mentiendi, quam furtum. Primo quia plus sibi nocet; plus etiam nocet Deo, et proximo : sibi quia cum furtum ut frequenter sit omnibus hominibus occultum, solam conscientiam

furantis lædit et non famam, mendacium vero lædit famam; Deo etiam amplius nocet, ad cujus ministerium principem in magna parte reddit inutilem; cum cum ad ministerium ejus pertineat, scilicet populum docere, et ei imperare, auctoritatem docendi perdit si mendax fuerit : ideo Salomon specialiter a Deo sapientiam petiit, ut ejus populum posset docere III Reg. iii; Proximo etiam plus nocet : furtum enim nocet proximo in re contemptibili, scilicet terrena, quæ est bonum minimum, mendacium vero nocet personæ ipsius non ex parte corporis, sed in nobiliori parte ejus, scilicet anima, nobilem partem ipsius, scilicet oculum intellectus obtenebrando, faciendo eum errare. Mendacium principem, qui debuit esse filius Dei, filium facit diaboli quod non est parvum opprobrium; Joan. viii, dicit Salvator de diabolo : *Ipse est mendax, et pater ejus,* scilicet mendacii. In eodem dixit de Judæis : *Vos ex patre diabolo estis.* Deus virtutis amator veritatis voluit esse tutor : unde sui nominis assumptione veritatem voluit confirmari. Vult etiam quod princeps qui ejus locum tenet, ejus sit tutor, et scriptura sua, et sigillo suo eam confirmet; sed cum vivæ voci principis mendacis non credatur, quomodo scripturæ et sigillo ejus credetur? Mendacium ex magna parte aufert validitatem sermonis, maxime tamquam est respectu proximi. Deo enim cui omne cor patet, et omnis voluntas loquitur, non est sermo tam necessarius, sed ad hoc est sermo necessarius, ut homines per eum sibi invicem suas indicent voluntates : sed si quis mendax est, et sibi non creditur, ejus sermone voluntas alteri non manifestatur. Cum autem princeps non solum voluntatem suam, sed etiam divinam sermone populo habeat indicare, multum ejus mendacium obest : qui hanc utilitatem aufert, quodammodo os Dei est, ejus voluntatem indicando quod nefarium est mendacio inquinare. Cavere debet princeps mendacium non solum in his quæ asserit cum juramento, sed etiam verbo simplici. Sapiens : « Cujus dictum non habet pondus jusjurandi, ejus jusjurandum quodlibet vile est. » Multi vero principes adeo facti sunt mendaces, ut etiam juramentis eorum non credatur. Mendacitas infidelitas est; ut ostendit Augustinus in lib. *De doct. chris.* dicens : « Omnis qui mentitur, inique facit. Nemo enim mentiens in eo quod mentitur, ser-



vat fidem : nam hoc utique vult, ut mentitur, sibi fidem habeat, quam tamen mentiendo ei non servat; omnis autem fidei violator impius est. » Idem insinuat Salomon Prov. xxii, qui post illud, *Abominatio est Domino labia mendacia*, subdit, *Qui autem fideliter agunt, placent ei*. Infideliter agit qui fidem ei non servat, de quo vult ut sibi fidem adhibeat; fideliter vero agit, qui contrarium facit. Cum igitur nobilitatem principis vitium infidelitatis, vel prodicionis, nullo modo deceat, omnino indecens est quod princeps mendax existat.

### CAPUT VIII.

*Quod principi contemnenda sit vanitas.*

Contemnenda est vanitas principis. Sapiens : « Fundamentum bonæ mentis est non gaudere vanis : » fundamentum esse dixi, culmen est. Vana est omnis creatura comparatione creatoris qui verissime est. Vana est, scilicet vadens in nihilum : sicut enim ex nihilo est, sic, quantum in se est, ad nihilum tendit. Augustinus : « Deus ex nihilo omnia fecit, et si se subtraheret, in nihilum redigerentur. » Gregorius : « Esse omnium quæ de nihilo sunt, in nihilum tenderet, nisi ea omnium auctor manu regiminis retineret : » quia nihil est creatum respectu creatoris : unde sup. illud Eccl. i, Nativitas etc., dicit *Glossa* : « De creatis possumus ea bona quidem per se dicere, sed Deo comparata quasi nihil esse, ut lucerna in solis comparatione nec cernitur lucere, et stellarum lumina orto sole obscurantur. » Specialiter vana sunt temporalia et transitoria ratione corruptibilitatis, et mutabilitatis, contemptibilitatis, vel vilitatis; ratione corruptibilitatis sunt videntia in nihilum, cum corrumpantur; ratione mutabilitatis sunt vana, mutantur enim in se, in eodem enim statu non permanent; mutantur etiam transendo de possessore in possessorem. Bernardus : « Erras si mansuras putas tibi divitias, quæ per tot manus hominum transierunt; » ratione contemptibilitatis, vel vilitatis sunt vana valentia nihil, vel parum, respectu verorum honorum, quæ sunt gratia Dei et gloria. Signa contemptibilitatis eorum sunt, quod sunt bonis et malis communia, et plus dat Deus de illis inimicis quam amicis, et pluribus sunt noxia quam utilia. Gregorius : « Con-

temptilibus contemptibilia dantur, gratia et gloria sunt vera bona, bonis amicis Dei propria, habentibus ea semper utilia, cum eis nemo male utatur. » Temporalia bona principi sunt contemnenda tamquam bona infima, quæ non congruunt ejus magnanimitati, et tamquam bona ut frequenter majoris boni impeditiva, scilicet cœlestis dignitatis. Princeps terrenus in præsentis regno se debet habere fideliter, ut in futuro regno feliciter audiat illud dulce verbum Salvatoris *Euge, serve bone et fidelis, quia super parva fuisti fidelis, super multa te constituam*. Matth. xxvi. Vana sunt temporalia, cum non conferant plenitudinem continentiam secundum illud Eccl. v : *Avarus non implebitur pecunia nec fulcimentum in tenti, secundum illud, Qui confidunt divitiis, corrumpunt*. Proverb. xi; nec fructum optatum et speratum in eis laborant secundum illud, *Qui amat divitias, fructum non capiet ex eis*. Eccl. v. Et licet temporalia sint vana, tamen amicis Dei vana non sunt, qui ordinate se habent in ea diligendo, et utendo, in eis enim bona temporalia gratiæ Dei deserviunt, et gloria contemplantam vel acquirenda adminicula sunt; vanitatum est vanitas non eorum qui veritatem sectantur, quæ fuit David, rex secundum cor Dei, qui ait *Viam veritatis elegi*. Salomon secundum *Litteram* : *Vanitas est vanitatum, omnia vanitas*. Augustinus in lib. *De vera relig.* « Non frustra additum est vanitatum quia si vanitates detrahas, qui tamquam prima sectantur extrema, non erit corruptio vanitas, sed in suo genere, quam vana extremam, pulchritudinem sine ullo colore monstrabit. » Vanitates sunt quæ extrema bona sectantur, ac si esse prima, de quibus dicit Jerem. ii : *Ambulaverunt post vanitatem, et vani facti sunt*. Bona temporalia quæ habent, sectantur sicut servus sequitur illum qui sibi dominatur; ea vero quæ non habent, sequuntur, et ut frequenter non assequuntur, vani fiunt vanitate mutabilitatis, sicut quæ ipsi diligunt : conformantur enim eis ut, secundum variationem in eis factam affectiones doloris, vel gaudii, timori vel spei, in ipsis varientur.

### CAPUT IX.

*De vanitate divitiarum.*

Vanae sunt divitiæ, vaniores deliciae

gloria vero mundana, gratia et laus sunt vanissimæ. Vanæ sunt divitiæ non solum comparatione Dei, vel comparatione gratiæ et gloriæ, sed etiam comparatione animæ, quam replere non possunt triplici ratione. Primo, propter suam modicitatem, et animæ capacitatem. Cum enim anima capax sit Dei, non potest repleri minori Deo. Cum ergo orbis terrarum sit quasi gutta roris ante lucem respectu Dei Sapien. xi : *Orbis terrarum, respectu animæ, est quasi una gutta roris.* Unde non potest eam replere. Secundo, propter divitiarum indigentiam. Sicut homo habet aliquem defectum, sic et aliæ creaturæ, quem secum afferunt, cum acquiruntur : unde cum auro, vel argento venit defectus clavis et serræ, et cum vinea acquiritur, venit defectus cellarii, doliorum, et multorum aliorum, et datur necessitas plura expendendi, secundum illud Eccl. v : *Ubi multæ opes, multi qui comedunt eas.* Ideo verum est plurimis indigere, qui plurima possident. Jerem, vi : *Aspexi terram, et ecce vacua erat.* Augustinus in lib. *De vera relig.* : « Temporalium specierum multiformitas ab unitate Dei hominem lapsum per carnis sensus dominabatur, et mutabili varietate multiplicavit ejus affectum : et ita facta est laboriosa abundantia, et, si dici potest, copiosa egestas. » Sapiens : « Congregatum in te, Quidquid multi divites possident ex his majora cupere disces. » Idem : « Altera cupiditatum ex fine alterius trahitur. » Qui sitim cupiditatis divitiis vult extinguere, similis est illi qui sitim corporalem aqua salsa vellet extinguere ; aqua salsa in quantum aqua, habet sitim sedare, in quantum salsa provocare, sic divitiæ in quantum aliquem defectum supplent, ad sedandam cupiditatem valent, in quantum vero multos defectus secum afferunt eam provocant. Tertio, quia divitiæ corporales sunt, anima vero res spiritualis est : et sicut arca quæ est corporalis, sapientia, quæ est spiritualis, non impletur, sic nec anima quæ res spiritualis est, divitiis corporalibus, maxime cum non intrent animam divitiæ, sed earum similitudines. Quomodo frumentum quod ponitur in arca, vel vinum quod ponitur in dolio animam implebit, in qua non ponitur ? Quid in præsentī replet animam nisi gratia ? Bernardus : « Non plus satiatur cor hominis auro quam corpus aura. » Unde verissimum est quod dicit Beata Virgo : *Divites dimisit inanes*, Luc. ii. Sa-

piens : « Animus humanus non arca dives appellari solet, quamvis illa plena sit ; cum inanem te videbo, divitem non putabo. » Contentum esse suis rebus sunt maximæ certissimæque divitiæ. *Quasi dives potest esse cupidus, sed vere dives non erit* ; Prover. xiii. *Est quasi dives cum nihil habeat* : et potius habetur a divitiis quæ ei dominantur, quam ipse eas habeat.

## CAPUT X.

*De vanitate deliciarum.*

Multum vanæ sunt carnales delitiæ. Eccl. ii : *Dixi in corde meo vadam, et affluam delitiis, et fruam bonis.* Vidi quod hoc quoque esset vanitas. Ibid. xi : *Adolescentia et voluptas vana sunt.* Carnales delitiæ vanæ sunt ratione suæ brevitatis, ratione suæ utilitatis, et ratione adjunctæ afflictionis. Breves sunt duratione. Sapiens : « Voluptas brevis fastidio objecta, quo avidius hausta est, citius in contrarium recidens. » Idem : « Improbæ voluptates non sunt solidæ, non sunt fideles, etiam si non nocent, fugiunt. » Bernardus : « Voluptas gutturis, quæ tanti hodie æstimatur, vix duarum habet digitorum latitudinem. » Augustinus in lib. *Confes.* « Quod si quid arrisisset, per spiritum credebat apprehendere, quia prius quam pene teneretur advolabat. » Delitiæ carnales viles sunt. Sapiens : « In voluptate nihil est magnificum, nihil quod naturam Deo proximam deceat. Membrorum vilium ac turpium ministratio veniens, exita fœdam adjunctam habet afflictionem. » Boetius : « Dulcedo felicitatis humanæ multis amaritudinibus est respersa : labor est in parando, aliquando major, quam sit voluptas in utendo. » Appetitus habet anxietatem, Hieronymus : « Appetitus fornicationis anxietas est, satiety pœnitentia. » Abusum deliciarum sequitur amaritudo duplex, scilicet gravamen naturæ ex excessu qui frequenter est, cum cibi sunt delicati Luc. xxi : *Attendite vobis ne forte graventur corda vestra crapula et ebrietate* : et remorsio conscientiæ Eccl. vii : *Inveni amariorē morte mulierem.* Hæc mulier est voluptas animam separans a Deo ; et ideo amarior est morte corporis, quæ animam separat a corpore, cum Deus melior sit anima ejus. Separatio vel amissio peior est et amarior palato cordis infecto de febre iniquitatis :

unde sancti potius elegerunt mortem corporis sustinere, quam morti culpæ consentire. Carnales delitiæ vanæ sunt comparatæ ad spirituales quas impediunt, quæ multo meliores eis sunt. Bernardus : « Delicata est divina cõsolatio, et non datur admittentibus alienam. Spiritus sanctus per columbam designatus fugit aquam carnalis voluptatis. » Bernardus loquens de illo verbo : *Nisi ego abiero paraclitus non veniet ad vos.* Joan. xvii : « Quis audeat de cetero carnis illecebris phantasticis deditus, paraclitum expectare? Eceles. xxx : *Non est oblectementum super cordis gaudium.* » Sapiens : « Aliquod bonum mansurum circumspice, sola virtus præstat gaudium æternum et securum. » Item carnales delitiæ vanæ sunt comparatæ ad pænæ æternæ amaritudinem ad quam ducunt. Gregorius : « Momentaneum est quod delectat, æternum autem quod cruciat. » Sunt et vanæ comparatæ ad æternas delicias, ad quas anima creata est, quas ei auferunt. Item vanæ sunt comparatione ad animam deliciarum æternarum capacem, quoniam modicitate sua replere, vel satiare non possunt. Hieronymus : « Voluntas habita famem non satietatem perit. » Joan. iv : *Qui bibit ex aqua, sitiet iterum.* Eccl. i : *Non satiatur oculus visu, nec auris auditu impletur.* Augustinus : « Anima humanæ delectationis avida, ex quo ab unitate recessit, cum rerum qualitate satiari non possit, rerum satietate satiari desiderat. » Item vanæ sunt carnales delitiæ, quia amatoribus suis multum sunt noxiæ ; nocent autem eis quasi proditione, quanto enim recipiuntur lætius, nocent amplius : unde de vino dicitur Prov. xxii : *Ingreditur blande, in fine mordebit ut coluber.* Sapiens : « Voluptates inter res vilissimas præcipue æstima, quæ more latronum in hoc nos amplectuntur, ut jugulent. » Delitiæ carnales videntur esse infirmitatis humanæ medicamenta, et sunt nocumenta : ex eis enim infirmitas recipit incrementa. Gregorius : « Ipsum medicamen in vulnus vertitur, quia exquisito remedio paulo diutius inhaerentes, ex eo gravius deficimus quod provide ad refectionem paramus. » Qui delitiis carnalibus assuescit, miseræ servituti se subjicit, et hosti suo super se malam consuetudinem acquirere permittit. Sapiens de amatoribus voluptatum : « Voluptatibus se immergunt, qui in consuetudinem adductis carere non possunt, et ob hoc miserimi sunt quod illis quæ sunt super-

vacua facta, sunt necessaria. » Nocent carnales delitiæ et corpori, et animæ. Corpori quia multoties sunt occasio infirmitatis, vel mortis. Sapiens : « Potest autem nostra providentia huic corpusculo moram prorogare longiorem, si voluptates quibus major pars corporum perit, poterimus regere et coercere. » Idem : « Voluptates in tormenta vertuntur. » Idem : « Quis hostis in quemquam tam contumeliosus fuit, sicut in quosdam voluptates suæ sunt? » Sufficit alicui si hostem suum excæcet, sed voluptates non solum excæcant voluptuosos, sed etiam impotentes reddunt, et contractos et leprosos, et aliis infirmitatibus eos affligunt, et tandem interficiunt. Chrysostomus : « Illi, qui in delitiis et luxuriis vitam ducunt, resoluta corpora et omni cera molliora circumferunt, atque infirmitatibus repleta. » Animæ nocent : quia carni, quæ concupiscit adversus spiritum, sunt in adiutorium, et sic de spiritu triumphant. » Bernardus *Ad Fratres de monte Dei* : « De condimentis sufficit ut comestibiles fiant cibi nostri, non etiam concupiscibiles vel delectabiles : sufficit enim concupiscentiæ malitia sua, quæ cum vix aut nullo modo pertransire possit ad finem explendæ necessitatis, nisi per viam quantæcumque delectationis, si cœpit habere irritamenta, fiunt duo contra unum, et periclitatur conscientia : et, licet delectatio illa quæ necessitatem comitatur, vix possit caveri, illa tamen, quæ est præter necessitatem, contemnenda est, et cavenda. » De prima delectatione dicit Gregorius loquens de illo verbo Psal. xxiv : *De necessitatibus meis erue me* : « Necessitates corporales hoc habent periculosum, quia in eis minime sæpe dignoscitur, quid circa eas vitio, vel utilitatis studio agatur. » Has necessitates Psalmista cupit evadere, sciens plerumque voluptatum culpas ex actione necessitatis prorumpere. Augustinus : « Sumenda sunt alimenta tamquam medicamenta ; sed dum ad quietem satietatis gaudio ad indigentiam transitur, in ipso transitu laqueus concupiscentiæ insidiatur. Frequenter enim accidit, quod adjungit se periculosa necessitas, jucunditas, et plerumque percurrit ut ejus causa fiat, quod causa salutis fieri debuit, et gaudet infelix anima ut obtentu salutis obumbret negotium voluptatis. » Præter necessitatem sunt delectationes pertinentes ad curiosos et periculosos respectus, et ad audi-

tum cantilenarum, instrumentorum musicorum, et officium rerum odoriferarum. Aspectus curiosos et periculosos multum dehortatur Scriptura sacra. Eccle. ix : *Ne respicias mulierem multivolam, ne forte incidas in laqueos illius.* In eod. : *Virginem non conspicias, ne forte scandalizeris in decore illius.* In eod. : *Noli conspiceri in vicis civitatis, nec aberraveris in plateis illius. Averte faciem tuam a muliere compta, et ne circumspicias speciem alienam. Propter speciem mulieris multi perierunt :* et hæc est concupiscentia, qua ignis exardescit. Contemnendus etiam est et aspectus ludorum vanorum, etiam illorum qui in avibus cœli fiunt, et aliorum. Item cavendus est auditus cantuum lascivorum, et colloquium mulierum. Eccle. ix, dicitur de saltatrice : *Ne audias illam, ne forte pereas in efficaciam illius.* Ibid. dicitur de muliere aliena : *Colloquium illius, quasi ignis ardescit.* Contemnenda sunt instrumenta musica homini in valle lacrymarum existenti, ad mortem incessanter tendenti. Job xxi : *Tenant tympanum et cytharam, et gaudent ad sonitum organi, ducunt in bonis dies suos, et in puncto ad inferna descendunt.* Specialiter indecens est ei, qui ceteris dominatur, sensibus suis esse subjectum : unde Antigonus Alexandri pædagogus cytharam ejus fregit et subjecit dicens : *Ætati tuæ jam regnare convenit, pudeatque in corpore regis voluptatem luxuriæ dominari.* Indecens autem est quod ille, qui donis Dei utitur, delectatione eorum ita demergatur, quod datoris eorum omnino obliviscatur, nec membris ipsius compatiatur. Isai. v : *Cythara et lyra, tympanum et tibia et vinum in convivis vestris, et opus Domini non respicitis, quo mirabiliter nos pascit.* Amos vi : *Væ qui opulenti estis in Sion, etc. Qui canitis ad vocem psalterii, bibentes in phialis vinum, et optimo unguento delibuti, et nihil patiebantur super contritione Joseph,* idest Christi per Joseph designati. Item, contemnenda sunt odorifera timore fœtoris infernalis, in quem sunt commutanda, secundum illud Isa. iii : *Erit pro suavi odore fœtor ; una pœna inferni erit fœtor sulphuris, secundum illud Psal. x : Ignis sulphur et spiritus procellarum pars calicis eorum.* Isa. xxx : *Flatus Domini quasi torrens sulphuris succendens eam.*

## CAPUT XI.

*De vanitate gratiæ mundanæ.*

Multum contemnenda est gratia mundana, tamquam valde vana, similiter et laus et gloria. Prov. ult. : *Fallax gratia, et vana est pulchritudo.* Fallax est gratia qua aliquis mundo patet. Vana est laus qua aliquis sermone hominum extollitur. Vana est gratia qua aliquis opinione hominum magnus habetur. Vere gratia mundi fallax est. Primo, quia parum, vel nihil, vel minus quam nihil valet, et multum constat. Secundo, quia nocet. Tertio, quia frequenter accidit quod non habetur, cum haberi creditur. Quarto, quia cum habetur, facile amittitur. Et cum minus quam nihil valeat mundi gratia, potius eligenda est ejus ira quam gratia. Eccle. vii : *Melior est ira risu :* per iram enim corrigitur animus delinquentis. Amicus mundi est amicus proditoris, et ejus osculum est fraudulentum. Prov. xxviii : *Meliora sunt vulnera diligentis, quam fraudulenta oscula odientis :* unde addæmones est illud verbum Matth. xxvi : *Quemcumque osculatus fuero, ipse est, tenete eum ;* sic facit mundus illi quem amare se simulat, sicut fecit Joab Abner quem quasi osculans occidit, II Reg. xx. Prosperitas hominem excæcat, quem adversitas illuminat : ideo magis est timenda prosperitas quam adversitas. Gregorius : « Cum omnis fortuna timenda sit, magis timenda est prospera quam adversa, hæc enim sæviendo erudit, illa blandiendo seducit. » Multum constat mundi gratia, propter eam habendam fiunt vestes pulchræ et pretiosæ, convivia superba, vasis aureis et argenteis ornata, et habetur familia magna, et equorum multitudo, et fiunt tantæ expensæ, quod ad eas regna et ducatus, comitatus et episcopatus non sufficiunt. Magnam gratiam apud Deum homines haberent, si medietatem eorum, quæ pro gratia mundi expendunt, pro gratia Dei expenderent. Gratia mundi amatoribus suis multum nocet, quia gratiam Dei pretiosissimam eis aufert : gratia Dei pretium est regni cœlestis, secundum illud Roman. vii : *Gratia Dei vita æterna ;* et Psal. lxxii : *Confusi sunt qui hominibus placent, quoniam Deus sprevit eos ;* Gal. v : *Si hominibus placerem, servus Dei non es-*



sem; Jacob. iv. *Adulteri, nescitis quia amicitia hujus mundi inimica est Deo?* Quicumque ergo vult esse amicus hujus sæculi, inimicus Dei constituitur. Aliquando gratia mundi creditur haberi cum non habetur: *Abscondunt enim odium labia mendacia*, Proverb. x; et si aliquando habetur, cito amittitur, sicut patet in Christo, quia ante passionem venit Jerusalem, magnam gratiam erga populum habuit, sed cito gratia illa fuit amissa. Bernardus: « Ab eodem populo, in eodem loco, et ipso tempore, paucissimis diebus interpositis, primo cum tanto triumpho susceptus, postea crucifixus est. O quam dissimile est: Tolle, tolle, crucifige eum, et benedictus qui venit in nomine Domini, hosanna in excelsis. Quam dissimile est: rex Israel, et non habemus regem nisi Cæsarem. Quam dissimile est: regnum et crux, flores et spinæ, cui prius profnebant vestimenta aliena, ecce suis exutus et sors mittitur super illa. » Mundus hominem in prosperitate diligit, in adversitate deserit. Eccl. vi: *Est amicus secundum tempus suum, et non permanebit in tempore tribulationis.*

Cum fueris felix, multos numerabis amicos:  
Tempora si fuerint nubila, solus eris.

Sapiens: « Amicus qui causa utilitatis assumptus est, tamdiu placebit, quamdiu utilis erit. Multum contemnenda est laus vel gratia, tamquam multum vana, amatoribus suis noxia, proximo injuriosa, Deo contumeliosa. Multum vana est cum nihil valeat, et mutabilissima sit: unde ejus amatores valde sunt mutabiles; ipsi sunt sicut galli in turribus Ecclesiarum, et sicut arundo, quæ ad omnem ventum movetur, et sicut paleæ, quas ducit ventus. Eccl. v: *Ne te ventiles in omnem ventum.* Job. xxi: *Erunt sicut paleæ ante faciem venti.* Bernardus: « Qui conscientias suas in alienis linguis posuerunt, modo parvi, modo nulli videntur sibi, prout linguis hominum eos laudare vel vituperare placuerit. » Tales vento pascuntur quo inflati eruciantur. Osee ii: *Effraim pascit ventum.* Ipsi pascuntur digitis hominum, et popularibus auris; pascuntur etiam foliis verborum, ut aliqui viles vermiculi. Tales appetunt triplex esse vanum, scilicet esse in hominum visione, opinione et dictione. Primum appetunt quod omnia opera sua

quæ faciunt, videantur, Matth. xxiii; quod vere vanum est, idest nihil valens ei qui videtur. Non est secundum naturam ut sensatum delectetur in hoc quod sentitur, sed sensus in sensato habet delectari: non delectatur cibus in hoc quod comeditur, sed potius comedens delectatur in cibo. Multum ergo fatue agunt qui tot et tantis expensis procurant diversas pulchritudines, ut in eis oculi hominum delectentur. Qui appetunt esse in opinione hominum, appetunt quasi esse chimericum, quod est in fictione, et est valde vanum, nihil valens chimera de qua fit fictio. Similiter et esse in dictione hominum vanum est, cum dici possit et quod est et quod non est. Dictio utilis est dicenti, cum per eam alii voluntatem indicet. Utilis etiam esse potest illi cui dicitur, quia per eam scientia loquentis ei communicatur; illi vero de quo dicitur, qui aliquando non est, inutilis esse videtur in dictione, cum esset in signo significante ad placitum; sicut insignia regia, ei qui non est rex ad derisionem sunt, sic ei, qui falso laudatur, est laus ad verecundiam secundum illud Sapientis: « Qui falso prædicantur, necesse est ut suis laudibus erubescant. »

## CAPUT XII.

### *De vanitate mundanæ laudis et gloriæ.*

Valde noxia est amatoribus suis laus et gloria mundana: aufert enim eis non solum bona spiritualia, sed etiam temporalia. Magnas enim expensas pro illis faciunt, ita quod magni redditus eis non sufficiant; sicut ventus vehemens arboribus aufert fructus, sic ventus vanitatis amatoribus vanæ laudis et vanæ gloriæ aufert bona sua. Ventus iste, licet videatur levis, tamen in mari hujus mundi multas naves perire facit, et etiam ne veniant ad portum salutis impedit, et multas magnas arbores evertit, et a regno Dei transfert in regnum diaboli. Ventus iste contrarius est austro, spiritui scilicet in cælum ducenti, cum ad infernum impellat. Amatores laudis et gloriæ mundanæ multum injuriantur proximo: de his enim quæ pauperibus subtrahunt, oculos divitum pascunt. Bernardus: « Clamant nudi, clamant famelici, et conqueruntur: nobis, inquit, fame et frigore miserabiliter laborantibus, quid conferunt tot



mutatoria, vel extensa in porticis, vel plicata in manticis? Nostrum est quod effunditis, nobis crudeliter subtrahitur, quod inaniter expenditis. Illud inveniunt curiosi quo delectentur, et non inveniunt miseri quo sustententur. » Tales Deo magnam contumeliam inferunt, cujus gloriæ, gloriam hominum, quæ in valore nihil est, præferunt Joan. viii : *Si ego glorifico meipsum, gloria mea nihil est.* Non est appetenda laus mundi, primo quia mundus est senex fatuus et insensatus; ideo non est curandum de verbis ejus : *Stultus enim fatua loquitur*, Is. xxxv. Nec timenda est, vituperatio nec quærenda ejus laudatio. Eccl. xxv : *Tres sunt species quæ odivit anima mea, et aggravor valde animæ eorum. : Pauperem superbum, divitem mendacem, senem fatuum et insensatum.* Pauper superbus est corpus humanum, quia, secundum corpus, homo nudus egreditur de utero matris suæ. Ita quisquis mandatum evangelicum implens de duabus tunicis, dat unam homini non habenti, ut dicit Augustinus : « Dives homo mendax est, qui plus potest quam credat, qui in his, quæ ad Deum pertinet, toties mendaciter dicit, non possum. » Bernardus in *Ep. ad Frat. de monte Dei* : « Ignosce Domine, ignosce, excusamus, tergiversamur, vix est aliquis qui in his quæ ad te sunt, experiri velit quid possit, etiam quod promptissime potest secundum carnem, vel secundum sæculum, sive timor impulit, sive cupiditas traxit. » Senex fatuus et insensatus mundus est Deo exosus, ad cujus instructionem Deus studiose operatus est, et semper est levior et vanior. Hic, mundum intellige eos, qui amant bona transitoria mundi usque ad contemptum Dei. *Mundus iste Salvatorem non cognoscit*, Joan. v : *Nec spiritum veritatis potest accipere*, Ibid. xiv. Dedit ei Dominus legem naturalem, mosaicam, doctrinam prophetarum, doctrinam philosophicam, doctrinam evangelicam, doctrinam Apostolorum, doctrinam sanctorum expositorum. *Et, quia doctrina et flagella in omni tempore sapientia*, Eccl. xxii, Deus flagellavit eum multipliciter. Adhuc habet supra dorsum de illa virga, qua percussus est pro peccato primorum parentum, septem frustra, scilicet famem, sitim, calorem, frigus, laborem, infirmitatem et mortem. *Virga enim in dorso ejus qui indiget corde*, idest sapientia, Prov. x. Præterea dedit ei Dominus ex-

emplar speciosissimum vivendi in seipso, quia « longum est iter per præcepta, breve et efficax per exempla » secundum verbum Sapientis. Sed si neque sic sapiens factus est, quid fiet amplius ei? Is. i : *Super quo percutiam vos ultra addentes prævaricationem.* Secundo laus mundi appetenda non est, quia mundus diligit malum, et odit bonum; ideo non est ei credendum, nec contra malum, nec pro malo. Amorem, vel odium veritatis, nescit judicium, juxta verbum Bernardi. Mich. iii : *Numquid non vestrum est scire judicium qui odio habetis bonum, et diligitis malum?* Amatores mundi similes sunt avibus, quarum oculos nox illuminat et lux cæcat. Non est curandum de laude, vel vituperio eorum qui dicunt bonum malum, et malum bonum, sicut non esset credendum testimonio noctuæ contra lucem vel pro nocte. Ipsi sunt velut jumenta viros sanctos despicientes, sicut jumenta aurum et argentum, et lapides pretiosos pedibus conculcarent. Prov. xiv : *Ambulans recto itinere et timens Deum, despicitur ab eo qui infami graditur via*; ibid. xxix : *Abominantur impii eos qui in recta via sunt.* Cum quidam diceret sapienti cuidam, homines te contemnunt, ait, et illos asini, sed non illi asinos, nec ego illos curo. Despiciunt et derident mali bonos, et hoc tale est ac si cæcus despiceret et irrideret videntem, et claudicans recte ambulantem, sed contemptus eorum contemnendus est, et irrisio irridenda. Sapiens : « Æquo animo audienda sunt imperitorum convitia, et ad honestatem tradenti, contemnendus est ipse contemptor. » Tertio laus mundi appetenda non est, quia maledictus est. Is. v : *Væ qui dicitis bonum malum, et malum bonum.* Ad singulas transgressiones mandatorum Dei habet maledictum super caput suum in Ps. cviii : *Maledicti qui declinant a mandatis tuis*, et Deut. xxviii, dicitur transgressori mandatorum Dei. *Maledictus eris in civitate, et maledictus in agro*, etc. A maledicto quomodo egreditur benedictio? Benedictio mundi habet maledictionem adnexam, et maledictio benedictionem; ideo potius timenda est ejus benedictio, quam maledictio. In Ps. cviii : *Maledicent illi, et tu benedices.* Matth. v : *Beati estis cum maledixerint vobis homines.* Benedictio mundi homini est venenata; maledictio vero eis est medicinalis. Magis ergo eis timenda est benedictio mundi, quam maledictio. Sa-

piens : « Habet suum venenum blanda oratio. » Gregorius : « Idcirco Dominus linguas detractorum in electos laxat, ut si quid elationis in eis surrexerit, lingua detractoris eradat : » quo verbo apparet quantum Dominus malos despiciat, cum de lingua eorum quod est membrum nobile, velit serviri bonis abstersione sordium eorum. Prov. xi : *Qui stultus est, serviet sapienti.* Lingua laudatoris timenda est sicut novacula acuta faciens dolum, jugulat enim cum quo credit decorari. Hieronymus : « Adulatores ut inimicos cave, quorum sermones super oleum molles, et ipsi sunt jacula. Corruptunt fictis laudibus leves animos, et male credulis mentibus blandis vulnus infligunt. » Idem : « Adulator apud philosophos definitur blandus inimicus. » Cum lingua adulatoris decipiat, lingua vero vituperatoris erudiat, magis timenda est adulatio quam vituperatio. Is. iii : *Popule meus, qui te beatum dicunt, ipsi te decipiunt.* Item ix : *Erunt, qui beatificant populum istum, seducentes.* Cum amatores mundi sint vituperabiles, contemnenda est laudatio et glorificatio eorum. Non enim facit hominem laudabilem laudes eorum habere qui non sunt laudabiles, nec facit hominem gloriosum habere gloriam apud eos qui sunt inglorii. Sapiens : « Tam turpe sibi tibi laudari a turpibus, quam laudari ob turpia : » Idem : « Amor turpium nisi turpi ratione conciliari non potest. » Item : « Malis displicere laudare est. » Præterea cum homines bonitatem nostram, quæ in corde est, sint quasi cæci cum eam non videant, nec videre valeant, tale est cum quis laudatur ab hominibus, ac si cæcus naturaliter judicaret de coloribus. I Reg. xiii : *Homines vident quæ apparent, Deus autem intuetur cor.* Pr. xvi : *Spirituum ponderator est Dominus.* Item cum principem audacia deceat, non est appetenda ab eo laus, vel gloria : amor enim talium hominem timidissimum facit, ut sonitus folii eum terreat, secundum illud Lev. xxvii : *Terrebit eos sonitus folii volantis : folium volans est verbum vituperium sonans.* Sapiens : « Relinque ambitionem, ambitio timenda est, res vana, ventosa. » Item cum principem deceat virilitas, verecundari debet cum se lactari quasi puerum ab adulante videtur, et propinanti sibi lac adulationis multum indignari potest. Prov. xi : *Si te lactaverint peccatores, ne acquiescas eis.* Ibid.

xxiv : *Non lactes quemquam labiis tuis.* Item, cum ad principem pertineat ut se et alios sapienter regat, multum cavendum est ei ne ad verba hominum in regimine sui et aliorum respectum habeat, stulte enim operaretur : ad voluntatem Dei operando respicere debet, non ad verba hominum, sicut dictum est de David, qui fuit rex juxta cor Dei. Sicut Angelus Dei, sic est Dominus meus rex, ut nec benedictione, nec maledictione moveatur. Angelus respicit ad voluntatem Dei, non ad verba hominum.

## CAPUT XIII.

*Quod veritas multum sit amanda principi.*

Veritas multum est amanda principi. Omni rei temporali dedit eam præponere : nec timore temporalis damni, nec amore lucri, nec etiam timore scandali debet eam deserere, cujus contrarium multi principes faciunt modica occasione veritatem vitæ, vel judicii relinquentes, ut in eis impletum sit illud Dan. viii : *Prosternetur veritas in terra.* Veritas in terra prosternitur, cum pro vitando damno terreno, vel lucro requirendo veritas deseritur. Prov. xxviii : *Qui cognoscit in judicio faciem, non bene facit, et pro buccella panis deserit veritatem.* Laborare debet princeps ut veritatem agnoscat, et cavere ne in sermone veritatem amittat. Prov. xxiv : *Veritatem eme.* Veritas emittitur, quando cum labore magno, et expensis, et damno temporalium veritatis cognitio acquiritur. Ad hoc quod in sermone non amittatur veritas, multum valet sermonis raritas : veritas enim in multiloquia periclitatur, juxta verbum beati Bernardi : « Princeps potestatem suam veritati debet subicere, » ut dicat illud Apostoli II Cor. xiii : *Non possumus aliquid adversus veritatem, sed pro veritate.* Princeps debet veritatem defendere, cum a perversis impugnatur, ne veritas ruinam patiat. Is. xxviii : *Corruit in platea veritas.* Si princeps in præsentī potestatem habens pro veritate fuerit, in futuro judicio pro eo veritas erit, ubi nihil contra veritatem fieri poterit, et eum liberabit. Joan. viii : *Veritas liberabit vos.* Ekd. ii : *Veritas manet, et invalescit in æternum, et vivit, et obtinet in sæcula sæculorum.*

## CAPUT XIV.

*Quod clementia multum deceat principem.*

Clementia multum decet principem. Est autem clementia, ut dicit Sapiens : « Virtus, per quam animus in odium alicujus temere concitatus, benignitate retinetur : » secundum Senecam : « Clementia est temperantia animi in potestate ulciscendi, vel potestate superioris adversus inferiorem in pœnis constituendis. » In hoc conveniunt fideles et infideles quod clementia necessaria sit principi. Dominus primum principem populi sui Moysen constituit, qui erat *mitissimus super omnes homines qui morabantur in terra.* Num. xii. Et III Reg. xx, legitur : *Audivimus quod reges domus Israel clementes sunt.* Isaias petit clementem dominatorem : *Emitte inquit agnum, Domine, dominatorem terræ.* Is. xvi, et talis missus est Matth. xxi : *Ecce rex tuus venit tibi mansuetus.* Lex ejus vocatur *lex clementiæ*, Prov. ult., et in signum clementiæ unguuntur reges christiani. Assuerus qui infidelis erat Esth. xiii : *Volvit potentiæ nequaquam abuti magnitudine, sed lenitate et clementia gubernare subjectos.* Seneca : « Nullum ex omnibus clementia magis quam regem, aut principem, decet. » Item clementia efficit ut inter regem et tyrannum sit differentia. Ad virtutem clementiæ pertinet mediocritatem servare in parcendo et ulciscendo. Seneca : « Tam omnibus ignoscere crudelitas est, quam nulli parcere : modum enim tenere debemus. » Sed quia difficile temperamentum est, quidquid plus æquum futurum est, in partem humaniorem præponderet. Princeps maxime debet esse temperatus in ultione propriarum injuriarum. Seneca : « Quemadmodum magni animi non est qui de alieno liberalis est, sed ille qui quod alteri donat, sibi detrahit ; ita clementem voco non dolore alieno facilem, sed eum qui cum suis stimulis exagitetur, non prosilit, qui intelligit magni animi esse injurias in summa patientia pati, nec quidquam esse gloriosius principe impune læso. » Idem : « Magni animi proprium est placidum esse, et injurias atque offensiones superne despiciere. » Clementia principem servat, ne impatientia, vel aliqua alia inordinata affectio ultionem præcipiat.

Cicero : « Optandum est ut qui reipublicæ præsent, legum similes sint, quæ ad puniendum non iracundia, sed æquitate ducuntur. » *Ira viri injustitiam operatur.* Jac. i. Justitia enim Dei est cum tranquillitate, ira vero habet perturbationem. Quomodo habere se princeps debeat in ulciscendo, ostendit Seneca his verbis : « In hac tanta facultate rerum non ira me ad iniqua supplicia compulit, non juvenilis impetus, non tenuitas hominum et contumacia, quæ sæpe tranquillissimis quoque pectoribus patientiam extorsit. » Idem : « Alterius ætate prima motus sum, alterius ultima, quoties inveni nullam misericordiæ causam, tamen peperci. » Et notandum est quod sunt septem quæ principem incitare debent ad clementiam. Primum est humana natura, cui mansuetudo congruit ; est homo animal mansuetum natura, crudelitas vero hominem bestialem facit, Seneca : « Quod istud delectari sono catenarum, quocumque ventum est, multum sanguinis effundere, aspectu suo terrere et fugare ? quæ alia vita esset si leones ursique regnarent ? si serpentibus in nos, ac noxissimo animali cuique daretur potestas ? Ipsamet rationis inexperta natura abstinet a suis, et statuta etiam inter feras similitudo morum est. » Aristoteles in lib. *De nat. anim.*, dicit « quod non est avium unius speciei, ut se comedant. » Secundum est nobilitas animorum qui regendi sunt. Seneca : « Remissius imperanti melius paretur. Non contumax est animus humanus, et in contrarium atque arduum nitens, faciliusque sequitur quam ducatur. » Tertium est exemplum : inter exempla vero præcipuum est exemplum summi principis, scilicet Dei, de quo legitur Joel. ii, quod *benignus, et misericors, et præstabilis super malitia est.* Sapient. xii : *Parcis omnibus, quoniam tua sunt.* Seneca : « Si Deus placabilis est, et delicta potentum non statim fulminibus persequitur, quanto æquius est hominibus præpositum miti animo exercere imperium ? » Etiam in his creaturis inferioribus invenitur clementiæ exemplum. Seneca ponit exemplum de rege apum, dicens : « Iracundissimæ, ac pro captu corporis pugnacissimæ sunt apes, et aculeum in vulnere relinquunt. Rex ipse sine aculeo est, noluit ipsum natura nec sævum esse, nec ultionem in magno constitutum petere, telumque detraxit, iramque ejus inermem

reliquit : Exemplum hoc omnibus regibus ingerens : pudeat ab exiguis animalibus non trahere mores : tanto moderatior homo esse debet, quanto vehementius nocet. » Quartum est humani sanguinis pretiositas, quo parcissime utendum est. Seneca : « Clementia sanguini alieno tamquam suo parcat, et scit homini non esse homine prodige utendum. » Quintum est finis, propter quem principes sunt super alios constituti, scilicet ut hominibus medeantur : unde verecundum est principi, si eum occidit, cui mederi debuit. Seneca : « Non minus sunt turpia principi multa supplicia, quam medico multa funera. » Idem : « Sapiens multa remittit. Multos pater sani, sed et sanabilis ingenii servabit. Agricolas bonos imitatur, qui non tantum rectas procerasque arbores colunt, sed illis quoque quos aliqua depravavit causa, vincula quibus innitantur, applicant. » Idem : « Princeps alios ex civibus suis, quia utiles sunt et boni, libens videat, alios in numerum relinquat, quosdam esse gaudeat, quosdam esse patiatur. » Sextum est quod clementia principi securitatem dat et in presenti, et in futuro. De presenti securitate dicit Seneca : « Errat, si quis existimat ibi tutum esse regem, ubi a rege nihil tutum est. Securitas securitate mutua pascenda est. Non est opus latera montium abscondere multiplicibus muris et turribus sæpire. » Salvum regem clementia in aperto præstabit : crudelitas hostes multiplicat. Seneca : « Oportet voluntas ante sæviendi deficiat, quam causa : alioquin quemadmodum præcisæ arbores pluribus ramis repullulant, et multa satorum genera, ut densiora surgant, rescinduntur ; ita regia crudelitas auget inimicorum numerum, tollendo. Parentes enim liberique eorum qui interfecti sunt et propinqui, et amici eorum in locum singulorum succedunt. » In futuro dat securitatem, quia in extremo iudicio Deum clementem habebit, qui in inferioribus se in presenti clemens fuerit. Luc. vi : *Cum qua mensura mensi fueritis, remetietur vobis.* Septimum est quod clementia regnum roborat : unde dicitur Proverb. xx, de rege, quod *roboratur clementia thronus ejus.*

## CAPUT XV.

*Quod pietas necessaria sit principi.*

Pietas multum decet principem, cum locum ejus teneat, cui proprium est misereri semper et parcere, et de quo scriptum est Psal. cXLIV : *Misericordia ejus super omnia opera ejus.* Princeps enim cujus minister est, maxime debet imitari in misericordia. Sapiens : « Maximam potestatem accipiens, datorem potestatis, juxta possibilitatem suam, imitari debet. In hoc Deum maxime imitabitur, si nihil judicaverit quam misereri pretiosius. » Vir misericordiæ debet esse princeps, sicut et fuit Christus, princeps principum, de quo dicit Augustinus : « Quæ misericordia eum de cælo disposuit, et carne induit, ipsa pro pauperum redemptione eum vendidit. » Augustinus de ipso, « Redemit venditus. » Princeps contra astutias perversorum debet consilium, pauperibus debet compassionem, imbecillis contra violentiam potentum defensionem : ad illum pertinet ad illud Job xxix : *Oculus fui cæco, et pes claudo, pater eram pauperum.* Propter pauperes venit Filius Dei in mundum, secundum illud Psal. xi : *Propter miseriam inopum et gemitum pauperum, nunc exurgam, dicit Dominus :* et propter simplices, pauperes et impotentes ordinavit Deus in Ecclesia principes. Multum valet pietas ad hoc quod aliquis principatu sit dignus : unde Machab. ii : *David in sua misericordia obtinuit sedem regni in sæcula,* et cum David misericorditer egisset cum Saul, nolens interficere eum cum posset, ait : *Nunc scio quod certissime regnaturus sis, et habiturus in manu tua regnum Israel,* I Reg. xxiv. Princeps Dei præ ceteris misericordia indiget, quia in majori periculo est quam alii : « quanto enim aliquis in loco superiori, tanto in periculo majori versatur, » sicut dicit Augustinus : Deus enim misericors erit, si ipse proximo misericors fueris. Matth. v : *Beati misericordes, quoniam ipsi misericordiam consequentur.* Cum omne animal diligat sibi simile, quomodo misericordia Dei misericordiæ hominis propitia non erit? Augustinus : « Rivus fluit, et fons siccabitur, » Isai. lvm : *Frangere esurienti panem tuum etc., tunc invocabis, et Dominus exaudiet te.* Non potest esse quod



rivus misericordiæ nostræ fluat ad proximum, et fons divinæ misericordiæ siccus sit nobis. Nihil est utilius principi pietate I ad Tim. iv : *Pietas ad omnia utilis est, promissionem habens vitæ quæ nunc est et futuræ.* Ipse pauperes facit stipendiarios nostros Gregorius : « Pauperes sunt contemnendi ut egeni, sed exorandi ut patroni. » Eccles. iv et xx de eleemosyna : *Super scutum, et lanceam pugnabit pro te adversus inimicum tuum.* Pietas est per quam princeps maxime placet Deo et populo. Augustinus : « Non est, quod ita Deo amabiles faciat ut pietas. » Eccl. iv : *Esto pupillis misericors ut pater, et pro viro matri eorum, et eris tu velut filius altissimi.* Licet virtutes communiter in principe placeant populo, plus tamen, quia populus miseriis premitur, misericordia ipsius ei dulcius sapit Prov. xix : *Qui promus est ad misericordiam, benedicitur.* Multum necessaria est principi misericordia : custodit enim eum ne ignis zeli eum destruat Prov. xx : *Misericordia et veritas custodiunt regem.* Ignis zeli ardere debet in oleo misericordiæ ; deficiente vero hoc oleo, ignis zeli destruit principes, sicut ignis, si desit oleum materiale, destruit lampadem. Gregorius *Sup. Ezech.* : « Zeli sancti destructio de virtute misericordiæ necesse est ut ardeat. » Flevit Salvator ex pietate destructionem Jerusalem, quæ erat facienda ex justitia. Misericordia debet movere principes ad naturam, zelo vero justitiæ contra culpam. Augustinus : « Duo sunt nomina, homo, peccator : quia peccator est, corripe : quia homo est, miserere, » sicut dicit *Glossa sup. ill. Matth. v* : *Beati qui esuriunt et sitiunt justitiam* : Justitiæ lumen est misericordia : justitia sine misericordia est cæcus furor, est ut cæcus sagittarius, occidens hominem, cum debet occidere vitium, sicut Lamech qui sagittavit Cain et occidit, volens sagittare feram. » Debet princeps attendere pauperem suum esse fratrem, ne eum despiciat et opprimat. Augustinus : « Adam et Evam intendamus, et omnes fratres sumus. » Isai. lviii : *Carnem tuam ne despexeris*, Levit. xxv : *Fratres vestros non opprimetis per potentiam.* Item attendere debet princeps pauperem membrum esse cum ipso illius corporis, cujus Christus est caput, ut ei compatiatur et amore capitis, et quia membrum ejusdem corporis, cujus et ipse I ad Cor. xii : *Si patitur unum membrum, compatiuntur omnia*

*membra.* Item attendere debet princeps Christum tantum amorem habere erga pauperes, ut quod fit pauperi, sibi reputet fieri. Matth. xxv : *Quod uni ex minimis meis fecistis, mihi fecistis* : et debet honorare Christum in paupere amplius ceteris, sicut Deus præ ceteris ipsum honoravit. Prov. xiv : *Honorat Dominum qui misereatur pauperis.* Multum displicet Deo cum pauperes ab hominibus inhonorantur, quos Deus tantum honoravit. Jacob. ii : *Nonne Deus pauperes elegit hoc in mundo, divites in fide, et hæredes regni etc. Vos autem exhonorastis pauperem.* Attendere etiam debet princeps pauperibus regnum cælorum esse datum, et sic se habere ad eos, ut cum principatus ejus defecerit, in regno æterno a pauperibus recipiatur.

## LIBER SECUNDUS

### PROOEMIUM

Declaratis quibusdam in præcedenti libro, quæ communiter decent principem, ostendetur in hoc secundo libro, quomodo princeps habere se debeat ad Deum, et ejus Ecclesiam. Et primo tangetur de fide ipsius : secundo de spe : tertio de timore : quarto de amore.

### CAPUT I.

*Quod fides sit necessaria cuilibet homini.*

Fides multum necessaria est cuilibet homini, sine qua nullus placet Deo, juxta illud Hebr. xi : *Sine fide impossibile est placere Deo.* Hæc virtus præstat Deo primum, subjiciens illi intellectum nostrum : ideo multum placet ei : juxta illud Eccl. i : *Beneplacitum est Deo fides.* Respectus divinæ misericordiæ specialiter est ad fidem Jerem. v : *Domine oculi tui prospiciunt fidem,* Ubi amor, ibi oculus. Non est remissio peccatorum extra fidem, nec opus aliquod vere bonum, Joan. iii : *Qui incredulus est Filio, non videbit vitam æternam, sed ira Dei manet super eum.* Augustinus super illud Rom. iii : *Arbitramur hominem justificari per fidem* : « Bona, inquit, opera ante fidem inania sunt. Ita enim mihi videntur esse ut magnæ vires. et cursus celerrimus præter viam. » Nemo ergo computet vere opera sua bona, ante



fidem. Ubi vera fides non erat vere bonum opus non erat: bonum enim opus intentio facit, intentionem fides dirigit. » Fides principium est gratiæ, et ordinatrix, et causa vitæ æternæ. Hebr. x: *Justus ex fide vivit*; Gal. ii: *In fide vivo Filii Dei*; I Joa. v.: *Vitam habebitis æternam, qui creditis in nomine Filii Dei*. Extra fidem nihil vivit vita spirituali, sicut in mari mortuo nihil vivere potest vita corporali. Augustinus: « Tantam gratiam Deus fidei contulit, ut mors, quam constat vitæ esse contrariam, instrumentum fieret, per quod transiretur ad vitam. » Fides radix est omnium bonorum; Augustinus *Super Joan*: « Sicut in radice arboris nulla prorsus apparet species pulchritudinis, et tamen quidquid est in arbore pulchritudinis et decoris, ex illa procedit; sic ex fidei humilitate quidquid meriti, quidquidve beatitudinis animæ susceptum est, procedit. » Fides ceteris virtutibus lumen ministrat: unde sine ipsa aliæ virtutes sunt quasi in tenebris. Fides lucerna est, ad quam in nocte præsentis vitæ ambulatur I Cor. v: *Per fidem ambulamus, et non per speciem*. Non est aliquis reputandus spiritualiter sanus, qui veram fidem non habet, licet multum abstineat, et eleemosynas multas faciat. Attendendum est quod nihil prohibet aliquem habere os sanum, vel manum, qui tamen habet oculum infirmum. Corvus infernalis multum conatur oculum fidei corrumpere, sicut corvus corporalis primo currit ad oculum cadaveris. Gregorius fidem vocat sapientiam. Hæc est sapientia illa, de qua habetur Sap. vii: *Sapientia vero vincit malitiam, attingit a fine usque ad finem fortiter, et disponit omnia suaviter*. Vere fidem non vincit malitia: peccata enim firmitati fidei non prævalent, juxta illud Matth. xvi: *Portæ inferi non prævalebunt adversus eam*, scilicet adversus firmitatem fidei. Peccata vocantur portæ inferni: inter portam et domum solum limen est medium, et inter mortale peccatum et infernum corpus est medium. Anima enim separata a corpore quasi in puncto descendit ad infernum, juxta illud Job. xxi: *Ducunt in bonis dies suos, et in puncto ad inferna descendunt*. Sapientia ista attingit a fine usque ad finem, idest a creatione mundi usque ad extremum judicium, per beneficium creationis invitans homines ad Dei servitium, et per distinctionem judicii exterrens a Dei offensa;

ipsa attingit a cœlo usque ad infernum, a delectationibus transitoriis separans homines amaritudinibus suppliciorum infernalium, et amaritudines, quæ occurrunt in servitio Dei, dulcorans magnitudine præmiorum. Gregorius: « Si dulcia quærimus, necesse est ut amara toleremus. » Eccles. i: *Usque in tempus sustine patiens, et postea redditio jucunditatis*. Si sapientia disponit omnia suaviter guttas amaritudinis præsentium, immensa dulcedine futurorum bonorum condiens, fide cognoscit homo eum a quo est, et ad quem est rediturus, et secundum merita sua ab eo recepturus, sine qua cognitione nullus sapienter se regit.

## CAPUT II.

### *Quod specialiter fides sit necessaria principi.*

Specialiter fides necessaria est principi, quia cognoscit eum sub quo est, cui serviturus est, cui fructuosissime bene servitur, periculosissime male. Bene autem non servitur ei nisi non serviatur ad voluntatem suam: nec ad voluntatem suam servitur ei, nisi ipsa cognoscatur, non a casu. Voluntatem ergo ejus necesse est principem agnoscere. Augustinus: « Initium obedientiæ est quid præcipiatur velle cognoscere, et pars servitii est didicisse quid facias. Indubitanter accidere potest ut voto obsequendi aliquis offendant, qui prius non didicit qualiter obsequi debeat. » Fide agnoscitur quod nec in rebus, quæ reputantur nostræ, habeamus dominium, sed ministerium. Unde multum cavendum est principi, ne a ministerio transire velit ad dominium, et ne in illis in quibus debuit habere respectum ad Dei voluntatem, et ejus gloriam quærere, sequatur propriam voluntatem, et quærat gloriam propriam. De hoc punitus est Nabuchodonosor quia ministerio regni transierat in dominium, reputans se regni sui dominum, Dau. iv: *Tibi dicitur Nabuchodonosor rex, Regnum tuum transibit a te, et ab hominibus ejicieris, et cum bestiis et feris erit habitatio tua, fœnum quasi bos comedes, et septem tempora mutabuntur super te, donec scias quod dominetur excelsus in regno hominum, et cui-cumque voluerit, det illud*. Quod verum dominium solius Dei sit, apparet ex hoc quod toties habetur in lege veteri: *Ego*

*Dominus* : et ex hoc quod Ecclesia dicit Christo : « Tu solus Dominus. » Hoc videtur intellexisse Gedeon Jud. viii, qui cum diceretur ei a filiis Israel : *Dominare nostri tu, et filius tuus*, respondit : *Non dominabor vestri, nec dominabitur in vos filius meus, sed dominabitur Dominus*. Idem videtur intellexisse Cæsar Augustus, qui cum imperaret toti mundo, prohibuit tamen ne aliquis vocaret eum dominum. Et sicut multum displicet Deo usurpatio domini, sic multum placet ei intellectus ministerii, juxta illud Prov. xiv : *Acceptus est regi minister intelligens*; inquam, se tantum ministrum esse. Et notandum quod quatuor sunt quæ videntur pertinere ad eum qui se tantum ministrum reputat. Primum est, ut sollicitus sit quod domini sui voluntatem impleat, sperans quod, cum necessitas fuerit, Dominus voluntatem ejus implebit; et hoc specialiter sperandum est, quando dominus bonus est, Sapient. i : *Sentite de Domino in bonitate*. Secundum est, ut sic operetur, quasi de omnibus rationem Domino redditurus quod specialiter agendum est, quando dominus est talis quod nihil possit ei occultari. Boetius in lib. *De consol.* : « Magna nobis, si dissimulare non volumus, indicta est probitatis necessitas, cum ante oculos judicis agamus cuncta cernentis. » Tertium est quod si Dominus per illa quorum habet ministerium, ipse non offendatur, nec indignetur, sed dicat : *Dominus dedit, Dominus abstulit : sicut Domino placuit, ita factum est, sit nomen Domini benedictum*, Job i. Attendere debet minister et onus, et periculum administrationis, et mercedem quam expectat. Amore ergo mercedis administrationem patienter sustineat, si propter onus et periculum administrationis ipsam timeat, et ejus ablationem pro magna exoneratione habeat. Quartum est, ne cum Dominus petiit in suis pauperibus de bonis suis, ipse ad dandum se difficilem exhibeat. Matth. xxv : *Amen dico vobis, quicquid fecistis uni ex his fratribus meis minimis, et mihi fecistis*. Et ut verbo uno multa comprehendam, ad voluntatem Domini, non ad suam, respectum debet habere minister, bona domini sui servando, vel largiendo. Multum displicet incredulitas Deo in principe qui locum ejus tenet. De hac punitus est Moyses et Aaron, qui synagogæ præfuerunt, Num. xx : *Quia non credidistis mihi, ut me sanctificaretis coram filiis Israel, non*

*introducetis hos populos in terram quam dabo eis*. In eodem : *Non intrabis, Aaron, terram quam dabo filius, eo quod incredulus fueris ori meo ad aquas contradictionis* : Eccles. vii : *In gente incredibili exardescet ignis* : Matth. xvii : *O generatio incredula et perversa, usquequo vos patiar ?* Apoc. xxi : *Timidis et incredulis pars illorum est in stagno igne ardenti et sulphure*. Fides in bello corporali et spiritali triumphare facit homines, etiam dæmones vincens. Hebr. xi : *Fide muri Jerico corruerunt*. Fides a Deo fortitudinem recipit II Paral. xvi : *Præbet fortitudinem his qui perfecto corde credunt in eum*. Ibid. xx : *Credite in Dominum Deum vestrum, et securi eritis*. Fides a periculis eripit, juxta illud I Mac. iii : *Ananias Azarias, Mizacl credentes liberati sunt a flamma*. Etiam fide informi, quæ sine caritate est, miracula fiunt, ut patet in Alexandro, qui cum venisset ad montes Caspios, et petiissent filii captivitatis decem tribuum ab eo licentiam egrediendi, ipse, cognita causa inclusionis eorum, quod scilicet aperte recessissent a Deo Israel vitulis aureis immolando, et per Prophetas Dei prædictum eis quod a captivitate non essent redituri, respondit quod arctius includeret eos : cumque angustas vias eorum obstruere vellet molibus bituminatis, videns laborem humanum non sufficere, oravit Deum Israel, ut opus illud compleret, et accesserunt ad se invicem prærupta montium, et factus est locus immeabilis, ut dicit Josephus. Quid facturus est Deus pro fidelibus suis, si tantum fecit pro infideli? Sicut fides bello corporali triumphare facit, juxta illud Josue i : *Confortare et esto robustus, noli metuere* (idest : noli timere), *quia tecum est Dominus Deus tuus* : sic defectus fidei facit hominem vinci juxta illud. Eccles. ii : *Væ dissolutis corde, quoniam non credunt Deo*; et ideo non proteguntur ab eo. Etiam fides informis facit triumphare, sicut accidit in Alexandro, cui per somnium Deo apparuit in habitu summi Sacerdotis, dum adhuc ipse in Licia civitate Macedoniae esset constitutus, dumque cogitaret utrum Asiam posset obtinere, jussit eum confidere : nam ipse exercitum ejus perduceret, et principatum Persarum ei traderet. Qui promissioni ejus credidit, et secundum fidem suam factum est ei. Et cum Alexander iratus veniret Jerosolymam et Pontifex Judæorum præcepto Domini pontificalibus in-

dutus, et reliqui sacerdotes cum eo stolis legitimis induti exirent obviam ei extra civitatem, Alexander intuens antistitem pontificali stola insignem : et super cidarim laminam, in qua scriptum erat nomen Domini, descendit de equo, et adiit eum solus; et nomen Domini adoravit, et pontificem veneratus est; et obstupuerunt principes exercitus, putantes mentem regis ludificatam, solus Parthemius quæsi- vit cur sacerdotem gentis Judææ adoras- set et respondit : Non hunc adoravi, sed Deum, cujus principatum sacerdotii gerit : nam in tali habitu per somnium Deum conspexi. Fides ostendit misericordiam, et justitiam Dei in servos suos, et exhibitam et exhibendam, justitiam in offendentes, misericordiam in debito modo servientes. Ostendit etiam thesau- rum regni cœlestis quod Deus daturus est servientibus sibi debito modo.

### CAPUT III.

#### *Qualis debeat esse fides principis.*

Fidem principis decet esse magnam, vivam et stabilem. Ad fidei magnitudi- nem quinque videntur pertinere. Primum est, ut homo de Deo magna sentiat, ut Centurio Matth. viii; qui credebat Deum solo verbo posse sanare servum suum, et se indignum esse ut Christus intraret sub tectum ipsius : unde dictum est de eo a Domino : *Non inveni tantam fidem in Israel.* Secundum est, ut homo bona transi- toria intuitu æternorum contemnat. Hebr. xi : *Fide Moyses grandis factus negavit se esse filium filix Pharaonis, magis eligens affligi cum populo Dei, quam temporalis peccati habere jucunditatem : majores di- vitias existimans thesauro Ægyptiorum, impropriè Christi : aspiciebat enim in remunerationem.* Tertium est, ut in ad- versis de Deo confidat. Matth. xiv : *Mo- dicæ fidei, quare dubitasti?* Quartum est, ut ad longam credentiam bona sua Deo tradat. Magni enim principes credentiam requirunt Isa, xxviii : *Qui crediderit, non festinet* : Prov. xx : *Hereditas ad quam festinatur in principio benedictione carebit in novissimo* : Eccl. xx : *Hodie sæneratur quis, et cras repetit, et odibilis est homo hujusmodi.* Quintum est, ut cum homo aliquid petit a Deo, et non statim accipit, non ideo a proposito desistat. Dictum est mulieri in oratione stanti, *O mulier magna*

*est fides tua, fiat tibi sicut vis,* Matth. xv. Ad impetrandum multum valet fidei ma- gnitudo. Augustinus *Super Joan.* : « Quan- tum vas fidei attulerit quis ad fontem, tantum implet. » Bernardus *Super Cant.* : « Magna siquidem fides magna meretur. » Fidem principis oportet esse vivam : fides mortua est, quæ est impotens ad suas operationes. Jacob. ii : *Si fides non habet opera, mortua est in semetipsa.* Fides viva est quasi arbor florens per firmum pro- positum Deo serviendi, et folia debita habens, scilicet sermonem qui sit ad ædi- ficationem fidei, et det gratiam audienti- bus, et fructum debitum bonorum ope- rum proferens II ad Corinth. xiii : *Si estis ex fide, vos probate per opera.* Fidem etiam principum oportet esse stabilem. Tob. ii : *Vitam illam expectamus quam Deus datu- rus est his qui fidem suam nunquam mu- tant ab illo.* Valde reprehensibiles sunt, qui fidem illam in qua nutriti sunt et tam- diu vixerunt, et quam parentes eorum tenuerunt, pro fide alicujus hæretici re- linquunt, contra illud Prov. i : *Ne dimittas legem matris tuæ.* Et sicut qui jam est in possessione rei, non de facili permittit sibi eam auferri, sic non debet homo de facili relinquere fidem, in qua nutritus est. In tali casu, *qui cito credit, levis est corde,* Eccl. xix. Nec debet homo moveri, si aliquos hæreticos videat vel absti- nentes, vel misericordes, cum plures tales inveniantur qui sunt fidei catholicæ, vel si aliqui, qui sunt fidei catholicæ, in- veniantur mali; multi enim magnæ mali- tiæ sunt inter hæreticos, sed occultant eam quantum possunt, nec mirum cum et seipsos occultent.

### CAPUT IV.

#### *Explanatio descriptionis spei.*

Dicto de fide principis, dicendum est de spe illius. Spes est certa expectatio fu- turæ beatitudinis, veniens ex Dei gratia, et meritis præcedentibus. Ad spei certi- tudinem duo valent, scilicet consideratio liberalitatis Dei, qui servientes sibi remun- erat super merita, prout decet ipsum, et hæc liberalitas vocatur gratia in descrip- tione spei prius posita. Valet ad idem consideratio meriti. Cum enim Deus pro- miserit se redditurum mercedem servien- tibus sibi debito modo, et ipse verax sit, quod promisit, solvit. Unde spes quasi

duabus basibus innititur, scilicet Dei liberalitati, servientes sibi ut eam decet remuneranti et Dei justitiæ promissa solventi.

## CAPUT V.

*Quod spes sit necessaria cuilibet homini.*

Spes omni homini necessaria est, sicut et fides. Fides hominem in via regni cœlestis dirigit, sed cum illa via sit ardua, necessaria est spes quæ, cum omnipotenti innitatur, hominem potentem ad perveniendum facit. Spes in hac valle miseriæ hominem beatum efficit. Psal. xxxiii : *Beatus vir qui sperat in eo*, Proverb. xvi : *Qui sperat in Domino, beatus est*. Omnes beatitudines illæ, quas ponit Salvator, Matth. v, dicens : *Beati pauperes* etc., spei sunt. Spes in deserto hujus mundi deliciis affluit, juxta illud Cant. ult. : *Quæ est ista quæ ascendit in deserto deliciis affluens, innixa super dilectum suum?* Multum debet movere hominem ad sperandum in Deo hoc, quod Deus monet eum ad hoc. Augustinus : « Quare Dominus toties nos ad innitendum sibi moneat, si supportare nos nollet? Non est illusor Deus ut se ad supportandum nos offerat et nobis innitentibus ei se subtrahat; Rom. v : *Spes autem non confundit*. Augustinus : « Confunditur qui quod sperat, non invenit. » Cum Deus non fallatur, nec fallere possit, sperans in eo non confunditur. Eccles. ii : *Nullus speravit in eo, et confusus est*. Vanitas est non præstare fulcimentum innitenti; veritas vero est, non negare fulcimentum innitenti. Unde cum Deus sit veritas, innitenti sibi se non subtrahit. Item ad sperandum movere debet imbecillitas, et insufficientia nostrâ. Parvulum, qui non habet vires ad standum, vel ambulandum, monet natura, ut rei stabili quæ juxta eum est, adhæreat, et sic casum vitet. Erubescere debet adultus, si nesciat facere quod naturaliter facit infans, ut scilicet, cognita infirmitate et imbecillitate sua, Deo adhæreat, et spe innitatur. Spes omnipotenti innititur, et juxta fontem bonitatis plantata est. Ex hoc quod omnipotenti innititur, habet securitatem, et fortitudinem; ex hoc quod est juxta fontem bonitatis, habet bonorum ubertatem. De primo dicitur in Psalm. cxxiv : *Qui confidunt in Domino, sicut mons Sion*, et sub-

dit, *Dominus in circuitu populi sui* : Isai. xxvi : *Urbs fortitudinis nostræ Sion Salvator, ponetur in ea, murus et antemurale*: murus est virtus divinitatis, antemurale est meritum humanitatis, et utrumque facit ad securitatem nostram. In Psalm. xvii : *Protector est Dominus omnium sperantium in se*. Ex hoc quod spes est juxta fontem bonitatis, abundanter influit ei bona. Thren. iii : *Bonus est Deus sperantibus in eum*. In Ps. xxxi : *Sperantem in Domino misericordia circumdabit*. Spes arbor benedicta est, fructus uberes habens, cum a misericordia Dei abundanter irrigetur. Jerem. xviii : *Benedictus vir qui confidit in Domino*; et subditur : *Erit quasi lignum quod plantatur super aquas, et ad humorem mittit radicem suam, et non timebit cum venerit æstus*. Et in Psal. i, dicitur de viro adhærente Deo : *Erit sicut lignum quod plantatum est secus decursus aquarum*. Spes in præsentis tempore, quæ est quasi quædam vigilia solemnitatis æternæ, habet quasi juche convivium, cum securitatem habeat. Prov. xv : *Secura mens quasi juche convivium*. Ipsa in hyeme præsentis exilii habet quasi tempus vernum et floridum. Prov. xvii : *Animus gaudens ætatem floridam facit*. De spei gaudio legitur Rom. xii : *Spe gaudentes*.

## CAPUT VI.

*Quod spes sit necessaria maxime principi.*

Principi maxime necessaria est spes tamquam illi qui ea facturus est, ad quæ omnino ex se insufficientis est : non solum enim habet regere se, sed etiam alios. Ad sui regimen non sufficit, nec quantum ad regnum cordis, nec quantum ad regnum corporis. De regimine cordis patet, cum primum actum cordis, qui est cogitare, non sufficiat regere, juxta illud II Cor. iii : *Non quod sufficientes simus aliquid cogitare a nobis, quasi ex nobis*. De regimine etiam corporis patet hoc, cum non sufficiat regere linguam modicum membrum corporis, immo *Domini est gubernare linguam*. Prov. xv. Sicut creatio mundi ad eum pertinet, ita et gubernatio. Augustinus : « Ubi dixisti sufficit, ibi defecisti. » Negotium principis, qui locum Dei tenet, et voluntatem ejus facere intendit, et gloriam ipsius quærit, supra vires hominis est : unde oportet



infirmi-  
tati humanæ Dei omnipotentiam associari, ut negotium valeat implere, spe firma innitendo Deo. In Psal. xxv : *Sperans in Domino non infirmabor*. Onus importabile est homini habere super se populum unius comitatus, vel ducatus, vel regni. De hoc conqueritur Moyses Num. x, dicens Domino : *Cur imposuisti pondus universi populi hujus super me?* Tria requiruntur ad hoc, quod infirmitati principis Dei omnipotentia associetur, scilicet excellens status principis, insufficientia hominis, gravitas oneris. Princeps divina habet agere, ideo divina potestate indiget adjutrice. Insufficientia hominis valde magna est : insufficientis enim est ad subsistendum, et ad bene vivendum. Ad subsistendum tripliciter est insufficientis. Primo, quia sicut ex nihilo est, ita in nihilum redigeretur, nisi a Deo in esse conservaretur. Bernardus in lib. *De dilig. Deo* : « Natura ita condita fuit, ut habeat jugiter necessarium protectorem, quem habuit conditorem, ut qui per ipsum non valuit esse, sine ipso non valeat subsistere. » Augustinus : « Ex nihilo Deus omnia fecit, et si se subtraheret, in nihilum redigerentur. » Secundo insufficientis est ad defendendum se ab hostibus suis : a dæmonibus enim valde cito perimeretur, nisi a Deo defenderetur. Thren. iii : *Misericordia Domini est quod non sumus consumpti*. Bernardus : « Si boni spiritus se a nobis elongaverint, impetum malorum quis poterit sustinere? » Tertio insufficientis est ad subsistendum, quia cibo indiget sustentari, aliter cito deficeret. Hanc insufficientiam non habet Angelus, nec etiam lapis. Tripliciter est homo insufficientis ad bene vivendum : primo quia non sufficit bonam vitam inchoare : secundo quia non sufficit in ea proficere : tertio quia non sufficit in ea perseverare. Potest se homo occidere peccando, sed non potest se occisum suscitare. Sap. xvi : *Homo per malitiam occidit animam suam* : Oseæ xiii : *Perditio tua ex te, Israel, tantummodo ex me auxilium tuum*. Item insufficientis est in bono inchoato perseverare. Gregorius : « Cito bonum amittitur, nisi a largiente custodiatur. » Insufficientis est etiam in bono inchoato proficere. Bernardus super illud Cant. i : *Trahe me post te*, dicit in persona Ecclesiæ : « Domine, scio me nequaquam pervenire ad te, nisi gradiendo post te ; sed nec hoc quidem nisi adjuvante te, ideo precor ut tu trahas me post te. Bea-

tus siquidem cujus est auxilium a te. » Magnitudo hominis ostensa est prius.

## CAPUT VII.

*De his quæ adversantur spei.*

Duo videntur spei adversari, scilicet diffidentia de Deo, et confidentia in creatura. Diffidens, sive desperans de Deo, similis est Cain. Caput cordis habet tremulum, vagus et profugus est, a procella tentationis, a terra viventium projectus, eo quod non habeat anchoram spei, qua retineatur. Desperatio est peccatum in Spiritum Sanctum : unde super illud Gen. iv : *Major est iniquitas mea quam ut veniam merear*, dicitur : « Desperatio est blasphemia in Spiritum sanctum, quæ non remittitur neque in hoc sæculo, neque in futuro : quia aut putant Deum nolle dimittere, aut non posse, tamquam aut omnia non possit, aut invidet saluti. » Confidentia in creatura triplex est, scilicet præsumptio de se, confidentia in homine, confidentia in re inferiori homine, ut in divitiis. De prima dicitur Prov. xxviii : *Qui confidit in corde suo, stultus est* : vere stultus est de se præsumens, cum homo valde sit insufficientis, ut prius ostensum est. Confidentes de se maledicti sunt. Is. v : *Væ qui sapientes estis in oculis vestris*. Confidentia vero in homine fallax est, hominem confundens. Is. xx : *Confundentur ab Æthiopia spe sua*, et ibid. xxxvi : *Ecce confidit super baculum arundineum confectum istum super Æthiopem cui si innixus fuerit homo, intrabit in manum ejus, et perforabit eam : sic Pharao rex Ægypti omnibus qui confidunt in eo*. Confidentes in homine maledicti sunt. Jerem. xxvii : *Maledictus qui confidit in homine*, et Is. xxix : *Væ qui descendunt in Ægyptum ad auxilium etc., non sunt confisi super sanctum Israel, et Dominum non exquisierunt*. Confidentia in rebus inferioribus valde periculosa est Gregorius *Sup. Job* : « De Creatore desperassem, si spem in creatura posuissem. » Item quasi in aquis defluentibus fundamentum ponere, est in rebus labentibus spei fiduciam velle solidare. Sap. v : *Spes impii quasi lanugo, quæ a vento tollitur, et tamquam spuma gracilis quæ a procella dispergitur* ; Job xxxi : *Si putavi aurum robur meum, supple, mihi*



male accidat. Prov. xi : *Qui confidit in divitiis suis, corruet*; Eccl. xxxi : *Beatus dives qui non speravit in pecuniæ thesauris* : I. Tim. vi : *Divitibus hujus sæculi præcipe, non sperare in incerto divitiarum, sed in Deo vivo*. Cum aurum et argentum vix possint haberi secure, etiam in arcis serratis, fatuus est qui ex his securitatem vult sibi facere. Quomodo enim possunt securitatem dare quam non habent? Principem decet spes Deo totaliter innitens, meritum adjunctum habens, in tribulatione non deficiens, sed vires suas ostendens. De primo dicitur Esth. xiv : *Exaudi vocem illorum qui nullam speciem aliam habent nisi in te*. De secundo dicit Bernardus *Sup. Cant* : « Integra Ecclesiæ consolatio cum non solum quid sibi sit expectandum, sed unde sit præsumendum noverit. » De tertio habetur Job xiii : *Etiam si occiderit me, in ipso sperabo*; in Psalm. xxv : *Si exurgat adversum me prælium, in hoc ego sperabo*. Cavenda est principi spes maledicta, quæ Deum offendit, quia de magnitudine misericordiæ ejus confidit. De qua Bernardus in *Sermonibus*, « Est infidelis fiducia, solius utique maledictionis capax. » Cum videlicet in spe peccamus, hic peccat in bonitatem Dei. Rom. ii : *An divitias bonitatis ejus et patientiæ, et longanimitatis contempnis?* Item cavenda est ei spes præsumptuosa, qua aliquis sperat, se facturum, cum voluerit, quod vires ejus excedit, ut cum aliquis præsumit se a malis convertendum, cum voluerit, de quo Eccles. xxix : *Repromissio nequissima multos perdidit*. Item cavenda est ei spes falsa, qua aliquis sperat quod futurum non est, ut cum quis promittit sibi longam vitam qui cito moriturus est, ut ille, cui dictum est Luc. xii : *Stulte, hac nocte repetent animam tuam a te*; Isa. xxviii : *Posuimus mendacium spem nostram*.

## CAPUT VIII.

*Quod timor Dei necessarius sit omni homini.*

Dicto de fide et spe principis, dicendum est de timore ipsius. Timor Dei necessarius est omni homini, quoniam Spiritus Sanctus principium et radix sapientiæ. Prov. ii : *Timor Domini princi-*

*pium sapientiæ*; Eccl. i : *Radix sapientiæ timere Deum*. Et notandum quod cum sapientia sit sapore virtutum condita scientia, duo vero pertinent ad sapientiam, scilicet cognitio et affectio, quantum ad cognitionem timor est principium sapientiæ. Primo, quia mundat cor, juxta illud Eccl. i : *Timor Domini expellit peccatum*. Mundando vero cor, facit oculum cordis videre clarius. Bernardus : « Sincero oculo veritas patet. » Secundo quia cum sit fuga mali, fugit errorem, et cavet, qui est malum rationis; homo timoratus non leviter credit, quod a ratione accipitur, sed diligenter illud examinat. Tertio, quia cum repellit omnem negligentiam, secundum illud Eccl. vii : *Qui timet Deum, nihil negligit*, cavet negligentiam in studio, et per diligens studium in sapientia proficit. Quarto, quia tumorem superbiæ expellit, quæ susceptionem sapientiæ impedit, et humilitatem introducit, quæ ad sapientiam disponit. Bernardus : « Superbo oculo veritas non videtur; » Prov. xi : *Ubi humilitas, ibi sapientia*. Quantum ad saporem, timor est principium sapientiæ, quia est prima affectio. Primo enim oportet animæ desipere mala, ut post ei sapiant bona. Bernardus : « Bene initium sapientiæ timor Domini, quia tunc Deus primo animæ sapit, cum eam afficit ad timendum, non cum instruit ad sciendum. » Timor ceteras virtutes purificat, opera eorum scrutatur, si quid mali in eis invenitur, facit illud corrigi, etiam tuta pertimescit, Job xi : *Verebar omnia opera mea*. Abundantiam bonorum operum illis procurat, Eccles. xv : *Qui timet Deum, faciat bona*; ibid. xl : *Timor Domini sicut paradus benedictionis*. Qui habet timorem Domini, semper timet, ne faciat parum, plus eligit abundare quam deficere : unde verum est illud Eccl. xl : *In timore Domini non est immoratio*; ibid. xix : *Timor Domini in plenitudine commorabitur*. Timor etiam ceteras virtutes conservat. Hieronymus in *Epist.* : « Timor Domini virtutum custos est, securitas ad lapsum facilis. » Timor virtutes comprimit ne evanescant. Eccl. viii : *Nisi te instanter tenueris in timore Domini, cito subvertetur domus tua*. Timor declinat pericula, quod multum valet ad conservationem. Prov. xvi : *In timore Domini declinatur a malo*. Timentes Deum sacra Scriptura multum beatificat, Psalm. cxii : *Beatus vir qui ti-*

*met Dominum.* Eccl. xxv : *Beatus cui donatum est habere timorem Domini.* Timens Deum quod vult, a Deo impetrat. Psal. xxxii : *Oculi Domini super metuentes eum* : oculi, inquam, quantum ad respectum misericordiæ. Item : *Quomodo miseretur pater filiorum, misertus est Dominus timentium se.* Item, voluntatem timentium se facit. De timore Domini dicitur Eccles. *Nihil melius quam timor Domini.* Bernardus sup. Cant. : *In veritate didici, nihil æque esse efficax ad gratiam promerendam, retinendam et recuperandam, si omni tempore coram Deo inveniaris non altum sapere, sed timere.* Timor Dei hominem fortem facit, et juxta illud, in via Domini timor operatur fortitudinem, in via sæculi debilitatem, timor Dei multum meliorat hominem, facit enim unum prævalere mille, juxta illud Eccl. xv : *Melior est unus timens Deum, quam mille filii impii.* Bona etiam temporalia meliorare videtur, juxta illud Prov. xv : *Melius est parum cum timore Domini, quam thesauri magni insatiabiles.* Et, ut breviter dicamus, finis salubris doctrinæ videtur esse timor Domini, juxta illud Eccl. ult. : *Finem loquendi omnes pariter audiamus, time Deum et mandata ejus observa, hoc est omnis homo.* De timore Dei dicitur Isa. xi, quod Christum repleverit, cum de aliis donis tantummodo dicatur, quod in Christo requieverint. Timor Dei replere debet viros sanctos. Bernardus loquens de spiritu timoris : « Iste est nimirum, qui te cum hominem, sibi debeat vindicare. » Idem : « Non est quo admittas superbiam, repletus timore Domini. » Viri sancti timent semper et ubique. Eccl. xviii : *Beatus homo qui semper est pavidus.* Quod semper sit timendum, ostendit Bernardus *Sup. Cant.* dicens : « Cum adest gratia, time ne indigne opereris ex ea; amplius time subtracta gratia, quia reliquit te in custodia tua; si redierit gratia, multo amplius tunc timendum, ne forte contingat pati recidivum; recidere enim quam incidere deterius est. » Aliæ tres causæ timoris assignari possunt, quarum prima tangitur in Psalm. cxviii : *Delicta quis intelligit?* Multi sunt qui, licet non committant peccatum mortale, nesciunt tamen, utrum omittendo mortaliter peccent. Alia causa timoris potest assignari esse, quia multa videntur homini bona, quæ Deus intelligit esse mala. Gregorius : « Plerumque in cons-

pectu sordet interni judicis, quod intentione fulget operantis. » I Cor. iv : *Nihil mihi conscius sum, sed non in hoc justificatus sum.* Clarius videt Deus quam homo. Tertia causa est, quia nescit homo qualis futurus sit finaliter, licet in præsentis sit bonus : Eccl. ix : *Sunt justique sapientes, et opera eorum in manu Dei, et tamen nescit homo utrum amore an odio dignus sit,* intellige finaliter. Potest enim homo in momento cadere, ita ut non adjiciat ut resurgat. Ubique timendum est, quia de quolibet statu aliqui damnantur. Osee xiii : *Consolatio abscondita est ab oculis nostris, quia ipse inter fratres dividet* : loquitur de inferno. Matth. xxiv : *Duo in lecto, unus assumetur, et unus relinquetur,* lectum intelligas quietem contemplationis. Timendum est homini ex omni parte : homo enim est sicut castrum undique portas habens per quas capi potest : portæ istæ sensus sunt. Est etiam homo sicut castrum obsessum ab hostibus undique. Sap. xiv : *Creaturæ Dei in odium factæ sunt, et in tentationem animæ hominum, et in mscipulam pedibus insipientium.* Viri sancti non solum timent in malis, sed in bonis. Job ix : *Verebar omnia opera mea.* Gregorius in ii par. *Moral.* : « Justi omne quod agunt metuunt, dum caute considerant, ante quantum judicem stabunt. »

## CAPUT IX.

### *Quod maxime sit timendum principi.*

Et licet timendum sit omni homini, tamen timendum est maxime principi. Sap. vi : *Horrendum et cito apparebit nobis, judicium durissimum his, qui præsumunt, fiet.* Durum erit judicium et his qui præsumunt, et his qui subditi sunt, propter judicis inflexibilitatem, sententiæ irrevocabilitatem, pœnæ quæ infertur gravitatem. De primo habetur Prov. vi : *Zelus et furor viri non parcat in die vindictæ, nec acquiescet cujusquam precibus, nec suscipiet pro redemptione dona plurima.* Non erit locus appellationi post illam sententiam; gravitas pœnæ erit et quantum ad acerbitatem, et quantum ad durationem, sed illis, qui præsumunt, erit judicium valde durum quinque de causis. Primo, quia judicando peccaverunt, et per quæ peccat quis, per hæc et torquetur, Sap. xl. Se-

cundo, propter adnexam superbiam, quam solet habere potestas judicaria. In Psal. xxx : *Retribuēt abundanter facientibus superbiam*; superbia in principio inhonoravit Deum, ideo Deus speciale odium habet ad eam. Tertio, quia gravius erit illis judicari, qui judicare consueverunt, sicut gravius est pauperem esse illi qui fuit dives. Quarto, quia judicabuntur pro se, et pro aliis. Hebr. xiv : *Obedite præpositis vestris et subjacete eis : ipsi enim pervigilant quasi rationem reddituri pro animabus vestris*. Quinto, quia iudicium Domini est; ideo multum displicet ei, quando scilicet ille qui locum Dei tenet, et qui operari debuit ut Deus, operatur ut diabolus; unde ait Josaphat II Paral. ii, loquens iudicibus : *Videte quid faciatis : non enim hominis exercetis iudicium, sed Domini, et quodcumque judicaveritis, in vos redundabit; sit timor Domini vobiscum, et cum diligentia cuncta facite. Non est enim apud Deum vestrum iniquitas, nec acceptio personarum, nec cupido*. Status principis periculosus est valde, nec est res propter se appetenda, sed magis timenda, licet aliquando propter Dei ordinationem, et populi utilitatem, sit sustinenda. De periculo principis require supra in lib. I. cap. i. Qui voluntarius est ad statum illum, et inordinate vult ascendere, injuriam facit Deo, ad quem pertinet ponere hominem loco sui. Luc. vi : *Nolite iudicare et non iudicabimini*. Super illud I ad Tim. iii : *Si quis Episcopatum desiderat etc.*, dicit Glossa Augustini : « Locus superior sine quo populus regi non potest, etsi ita teneatur atque administretur ut decet, tamen indecenter appetitur. » Qui ad principatum est voluntarius ramnum se esse ostendit : legitur Judith. ix : *Quæsierunt ligna ut ungerent super se regem. Dixerunt olivæ, impera nobis, quæ respondit : numquid possum deserere pinguedinem meam, qua dii utuntur et homines, et venire ut inter lingua promovear? Dixeruntque ligna ad arborem ficum. Veni et super nos regnum accipe, quæ respondit eis : numquid possum deserere dulcedinem meam, fructusque suavissimos, ut inter cetera ligna promovear? Locutaque sunt ligna ad vitem, veni et impera nobis, quæ respondit eis, numquid possum deserere vinum meum, quod lætificat Deum et homines, ut inter cetera ligna promovear? Dixeruntque omnia ligna ad ramnum : veni et impera super nos, qui respondit eis, si vere me regem constituitis, venite*

*et sub umbra mea requiescite*. Ligna super se regem unguunt, quando aliqui aliquem eligunt, ut eis dominetur. Notabiliter autem dicuntur ungere : occasionem enim ei dant, ut uncte et mansuete erga eos se debeat habere in hoc quod sibi eum præficiunt : valde enim perversum est, eos exhonore qui eum in honore posuerunt, et potestate de manu aliquorum accepta uti in oppressionem eorundem : quæ perversitas figurata est, Matth. xxvii, in hoc quod milites præsidis accipientes arundinem de manu Christi, percutiebant inde caput ejus; in arundine enim, quæ vacua est, potestas terrena intelligitur, quæ nihil habet soliditatis; in oliva designantur qui operibus misericordiæ insistent; in ficu vero contemplativi, Dei dulcedinem senties; per vitem, propter fervorem vini, intelligitur homo perfectæ caritatis et ferventis; ramnus vero genus rubi est quod vulgo senticem appellant, asperum nimis et aculeatum, sicut sentes, et secundum Josephum ad impetum venti ignem naturaliter producit, et est in principio mollis, sed postea indurescit; unde signat aliquem malum ambitiosum, qui spinis vitiorum spinosus est qui spoliat subditos suos, sicut spinæ spoliant lana oves contingentes eas; qui ex se emittit ignem perversæ conversationis, quo se et subditos suos comburit incendio infernali; qui se subditis suis mollem in principio exhibet, et mansuetum, deinde vero durum : quia, ut tyrannidem exerceat, talis principatum non recusat.

## CAPUT X.

*De his quæ valent ad hoc quod princeps ametur a Deo.*

Dicturi de amore principis, primo dicemus de amore Dei, secundo de amore proximi. Circa Dei amorem ostendentur aliqua quæ valent ad hoc quod princeps ametur a Deo : secundo tangetur de signis, quibus perpenditur quod Deus ametur ab ipso : tertio vero sunt quæ ad hoc valere possunt quod princeps a Deo ametur. Primum est sapientia. Sap. vii : *Sapientia infinitus est thesaurus hominibus, quo qui usi sunt, participes effecti sunt amicitie Dei*; in eodem : *Neminem diligit Deus, nisi eum qui cum sapientia inhabitat*. Stulti in sapientia habitare nequeunt : stultitia enim quæ sapientiæ est contra-

ria, hoc non patitur : sicut aqua ignem non sustinet. Novit Dominus quod de amicitia stultorum provenit ad damnum et dedecus ; ideo non vult habere amicitiam cum stultis. Prov. xiv : *Acceptus est regi minister intelligens*, regi, inquam, gloriæ. Secundum est munditia, quæ est effectus sapientiæ. Jac. iii : *Quæ de sursum est sapientia primum quidem pudica est*, idest pudicum faciens. Propter munditiam vocatus est Joannes, discipulus quem diligebat Jesus. Joan. ult. Cant. ii. *Dilectus meus mihi, et ego illi qui pascitur inter lilia* ; puritate enim delectatur, et mundis familiaris est. Sapient. vi : *Incorruptio facit proximum esse Deo*. Tertium est mansuetudo, quæ multum assimilat Deo, cujus bonitatem alicujus malitia non perturbat, et ideo Deo amabilem facit. Propter mansuetudinem Moyses qui erat *mansuetissimus super omnes homines, qui morabantur super terram*, Num. xii, specialiter amicus Dei fuit. Eccl. xlv : *Dilectus Deo ei hominibus Moyses*. Quartum liberalitas, quæ multum assimilat Deo, qui liberalitate fecit quicquid fecit, creaturas rationales ut eis daret, alias creaturas, ut eas daret. Seneca : « Qui dat beneficia, Deum imitatur, maxime imitatur eum qui dat pauperibus. » Deum maxime imitatur, qui nihil judicaverit quam misereri pretiosius. Liberalitas ergo ratione similitudinis hominem Deo reddit amabilem. II Cor. ix : *Illarem datorem diligit Deus*. Quintum est humilitas, propter quam David fuit vir secundum cor Dei. I Roman. xv, Matth. ix. In signum amoris quem habet Deus ad humiles, Dominus amplexatus est parvulum. Et Benjamin, frater minimus, vocatur amantissimus Domini, Deut. xxxiii. Sextum dilectio : diligit enim Dominus eos qui se diligunt, alioquin esset infidelis. Bernardus in *Epist.* : « Nemo se amari diffidat, qui eum amat libenter, Dei amor nostrum prævenit, subsequitur. Nam quomodo reamare pigebit quos amavit needum amantes ? » Septimum est temporalium contemptus. Matth. xix : *Si vis perfectus esse etc.* perfectus, inquam, in dilectione Dei. Seneca : « Nemo dignus Deo qui opes non contempserit. » Temporalia amata inquinant, juxta verbum Bernardi : ideo anima temporalia amans indigna est Dei amore.

## CAPUT XI.

*De signis quibus perpenditur quod Deus ametur a principe.*

Novem sunt signa quibus perpenditur quod Deus ab aliquo ametur. Primum est si de eo libenter cogitat : ubi enim amor, ibi oculus : super illud Joan. xx : *Domine, si tu sustulisti eum, dicito mihi ubi posuisti*, sic habetur : .« Non dicit quem, quia in animo agere solet vis amoris ut quem semper cogitat, nullum alium ignorare credat. » Sap. vi : *Cogitare de illa sensus est consummatus*, loquitur de sapientia increata. Secundum est cum aliquis amat quem credit a Deo amari, et odit quem credit a Deo odiri. Sapiens : « Idem velle, idem nolle, ea demum vera est amicitia. » Deus peccata summe odit, nihil enim odit nisi peccatum vel propter peccatum, virtutes vero amat. Virtutes princeps debet amare, peccata odire et persequi : unde dixit Valerius Maximus cuidam principi : « Tua providentia virtutes benignissime foventur : vitia sævissime vindicantur. » David : *Iniquos odio habui*. Idem : *Nonne qui oderunt te Domine oderam ?* Idem : *Defectio tenuit me, pro peccatoribus*. Et idem : *Vidi prævaricantes, et tabescebam*. Ambrosius super *Beati immaculati* : Si is qui non relinquit parentes suos propter nomen Dei, non est Deo dignus, tanto magis qui diligit ejus inimicos, acceptus Deo esse non poterit. » Hieronymus in *Epist.* : « Nationes adversariorum in mortali odio persequimur : blasphemantibus Deum clementem porrigamus manum. » Ambrosius in *Hexamerone* : « Quid nos dignum nostro referimus creatori, cujus cibo vescimur, et dissimulamus injurias ? » Tertium est cum aliquis pro Deo libenter patitur. Eccl. ii : *In igne probatur aurum et argentum : homines autem receptibiles in camino humilationis*. Joan. xviii : *Calicem, quem dedit mihi Pater meus, non vis, ut bibam illum ?* Gregorius in I part. *Moral.* : « Pœna quippe interrogat, si quietus quis veraciter amat. » Quartum est amor sacrorum locorum, cum scilicet libenter est in domo Dei, et immunitates loci sacri servat, et facit servari. Luc. ii, dicitur de Anna quod non discedebat de templo, quæ mervit interesse præsentationi divinæ in templo ; et Christus cum



esset duodecim annorum, inventus est in templo. Luc. II, cum Matri suæ et Joseph ait: *Nesciebatis quia in his quæ Patris mei sunt oportet me esse?* et super illud Matth. XX, *Intravit Jesus in Templum* sic habetur: « Ingressus urbem primo Templum adiit, dans formam religionis, ut quocumque ibimus, primo domum orationis, siibi est, adeamus. » Chrysostomus: » Proprium erat boni filii ut veniens primo ad domum curreret patris, tu autem imitator Christi factus, cum aliquam ingressus fueris civitatem, primo ante omnem actum ad Ecclesiam curras. » Quintum est amor ministrorum Dei; sicut qui eos spernit, Deum spernit, Matth. X, sic qui eos honorat, Deum honorat. Eccl. VII: *In omni virtute tua dilige eum qui te fecit, et ministros ejus ne derelinquas. Honora Deum ex tota anima tua, et honorifica Sacerdotes.* Sextum est cum libenter de Deo libenter loquitur. De hoc habemus exemplum in Magdalena, quæ Christum dilexit multum, cujus verba quæ habentur in Evangelio, vel de Deo vel cum Deo fuerunt. Unum habes Joan. XI: *Domine, inquit, si fuisses hic, pater meus non fuisset mortuus.* Alia tria habet Joan. penult.: *Tulerunt, inquit, Dominum meum et nescio ubi posuerunt eum;* et paulo post: *Domine, si tu sustulisti eum, dicito mihi, et ego eum tollam.* Septimum est cum aliquis libenter Deum audit, audita a Deo memoriter retinens, Luc. II: *Maria conservabat omnia verba hæc, conferens in corde suo:* Ejusd. X: *Maria, sedens secus pedes Domini, audiebat verba illius:* Joan. XIV: *Qui audit mandata mea, et servat ea, ille est qui diligit me.* Octavum est cum aliquis dat libenter pro Deo, Cant. ult.: *Si dederit homo omnem substantiam pro dilectione Dei, quasi nihil despiciet eam,* et Luc. VII, dicitur de Magdalena propter beneficia ejus enumerata: *Dimissa sunt ei peccata multa, quoniam dilexit multum;* et Joan. III: *Qui habuerit substantiam hujus mundi, et viderit fratrem suum necessitatem habere, et clauserit viscera sua ab eo, quomodo caritas Dei manet in eo?* Nonum est cum mandatis Dei aliquis obedit. I Joan. V: *Hæc est caritas Dei, ut mandata ejus custodiamus.* Item Joan. II: *Hæc est caritas Dei ut secundum mandata ejus ambuletis.* Joan. XIV: *Si quis diligit me, sermonem meum servabit.* Specialiter signum divini amoris est, si quis servat illum mandatum quod specialiter Salvator dicit suum Joa. V: *Hoc est præceptum*

*meum ut diligatis invicem;* I Joan. IV: *Hoc mandatum habemus a Deo, ut, qui diligit Deum, diligit et fratrem suum.* Maxime amor pauperum signum est quod aliquis amet Deum; illi non amantur propter se, sed propter Deum. Proverb. XIX: *A paupere etiam amici quos habuit separantur.* In eod.: *Fratres hominis pauperis oderunt eum, et amici procul recesserunt ab eo.* Attendere debet princeps in se dilectionem Dei, meditatione amoris, quam Deus nobis exhibuit: sicut enim ignis non melius quam igne accenditur, nec amor ita melius quam amore. Nutrire etiam debet in se Dei dilectionem, signis beneficiorum divinatorum generalium et specialium quæ a Deo recepimus, et continue recipimus, ut de ferventi Dei amore abundantia operum perfectæ bonitatis procedat, ita ut in eo locum non habeat pigritia, vel negligentia, vel fastidium, nec amor vanæ laudis, vel vanæ gloriæ, vel alicujus terreni emolumentum caritati opus præripiat et sibi usurpet. Ut princeps immunitatem sacrorum locorum custodiat, et custodiri faciat, attendere debet quod legitur II Mach. III, de Eliodoro, qui locum sacrum volebat spoliare pecuniis ibi commodatis: sicut enim ibi legitur, apparuit quidam equus terribilem sessorem habens optimis operimentis adornatus, isque cum impetu Eliodoro priores calces elisit. Qui autem insidebat, videbatur habere arma aurea, alii etiam apparuerunt duo juvenes, qui circumdederunt eum, et ex utraque parte flagellabant sine intermissione; subito autem Eliodorus concidit in terram, et in sella gestatoria deportatus est ex ærario, et jacebat mutus, atque omni spe, et salute privatus: sed postea precibus Oniæ vita ei donata est. Item cum Pompeius venisset Jerosolymam, irruentes Romani profanaverunt Templum, equos in porticibus stabulaverunt, ob quam rem Pompeius creditur de cetero nunquam pugnasse, quin vinceretur, qui hactenus fuerat fortunatissimus.

## CAPUT XII.

*De his quæ incitare debent principem ad amorem proximi.*

Ad amorem proximi primo incitare debet principem Scriptura sacra, quæ multum ad hoc monet Matth. XXII et Luc. X: *Diliges proximum tuum sicut teipsum;*



Joan. XIII : *Mandatum novum do vobis ut diligatis invicem.* Et specialiter illa Scriptura debet ad hoc incitare, quæ ostendit præceptum de dilectione proximi specialiter præceptum esse Salvatoris, Joan. XV : *Hoc est præceptum meum ut diligatis invicem.* Legitur in vita beati Joannis Evangelistæ quod cum ipse devenisset ad ultimam senectutem, et vix inter discipulorum manus ad Ecclesiam deferretur, nec posset plura dicere verba, ad quamlibet pausam dicebat : *Filioli diligite alterutrum.* Tandem discipuli et fratres, qui aderant, audientes quod eadem verba semper diceret, dixerunt : *Magister quare semper hoc loqueris? qui respondit : Quia præceptum Domini est, et si solum fiat, sufficit.* Secundo debet eum incitare ad amorem proximi amor, qui videtur inter animalia irrationabilia ejusdem speciei. Eccl. XIII : *Omne animal diligit simile sibi, et omnis caro ad similem sibi conjungitur.* Si lupo, leo et serpens non exercent illam ferocitatem in animalia suæ speciei quam exercent in alia, quid dicendum est de homine qui desævit in alium hominem, numquid ferocior est lupo, leone et serpente? Ipsa aqua, quæ naturaliter habet pugnam cum igne, pacem habet cum alia aqua, quæ est ejusdem speciei cum ea. Tertio debet incitare ad amorem proximi fraternitas naturalis, quæ est inter omnes homines. Augustinus in lib. *De doct. christ.* : « Si putamus non esse proximos, nisi qui de eisdem parentibus nascuntur, Adam vel Evam intendamus, et omnes fratres sumus. » Idem XII lib. *De civ. Dei* : « Nihil tam discordiosum vitio, tam sociale natura, quam genus humanum. Propterea voluit Deus creare parentem unum de quo multitudo propagaretur, ut hæc admonitione etiam in multis concursus humanitas servaretur. » Quod vero illi femina ex ejus latere facta est, etiam hic satis significatum est, quam cara mariti et uxoris debet esse conjunctio. Malach. II : *Numquid pater unus non est omnium nostrum? Quare ergo despicit unusquisque nostrum fratrem suum?* Voluit Dominus unicum hominem formare, ex quo omnes procederent, ut tamquam fratres omnes homines se amarent. Non sic legimus factum in Angelis, vel animalibus brutis. Seneca : « Hæc societas diligenter et sancte observanda est, quæ nos omnes omnibus miscet, et judicat aliquod esse commune jus generis humani. » Jus

illud videtur contineri in illis duobus mandatis : *Quod ab alio oderis tibi fieri, vide tu ne aliquando alteri facias*, Tob. IV; et Matth. VII : *Quodcumque vultis ut faciant vobis homines, et vos eadem faciatis illis.* Seneca : « Sapientiæ homo pro amico est : stultitiæ amicus non est pro homine. » Quarto, fraternitas spiritualis, de qua Augustinus *De doct. chr.* : « Omnes quidem fratres secundum quod homines sumus, quanto magis secundum quod christiani sumus : ad id quod homo es, unus pater fuit Adam, una mater fuit Eva ; ad id quod christianus, unus pater est Deus, una mater est Ecclesia. » Hæc fraternitas tanto melior est fraternitate naturali, quanto meliorem habet patrem Deum. Matth. XXIII : *Et patrem nolite vocare vobis super terram. Unus est enim pater vester, qui in cælis est.* Item quanto mater Ecclesia melior est matre carnali, tanto est melior hereditas cœlestis quam temporalis. Hebr. X : *Rapinam bonorum vestrorum cum gaudio suscepistis, cognoscentes vos habere meliorem, et manentem substantiam.* Si amandi sunt fratres illi qui dividendo hereditatem, portionem uniuscujusque minorem faciunt, quantum amandi sunt fratres illi, qui portionem uniuscujusque augent? Quanto enim plures erunt electi, tanto amplius gaudebunt. Quinto, debet movere ad amorem proximi exemplum Christi. Non enim est despiciendus quem Christus ita earum habuit quod pro ejus redemptione mori voluerit. Appretiandus est proximus hoc pretio ne nobis vilescat, Apoc. I : *Qui dilexit nos, et lavit nos a peccatis nostris in sanguine suo ;* Tim. II : *Qui dedit semetipsum pro nobis.* Exemplo suo voluit Christus nos ad hoc incitare cum dixit : *Sicut dilexi vos*, Joa. XV. Ad id incitare debet exemplum Angeli, qui adeo amat hominem, ut custodiat eum in omnibus viis suis. Non est despiciendus homo ab homine, qui adeo carus est Angelo. Matth. XVII : *Videte ne contemnatis unum ex his pusillis : dico enim vobis quia Angeli eorum semper vident faciem Patris mei, qui in cælis est.* Ad id debet etiam incitare similitudo quam habet proximus ad Deum, licet aliquis amet omnes filios amici sui ; tamen specialem amorem habet ad eum, qui amico suo amplius est similis : sic, licet ad omnia opera Dei amorem habere debeamus, tamen specialiter ad hominem, quem constat esse factum ad imaginem et similitudinem Dei, Gen. I. Ad idem

incitare debet quod proximus membrum est corporis, cujus Christus est caput. I Cor. II : *Vos estis corpus Christi : non amat caput qui non amat membra. Præterea proximus tuus membrum est ejusdem corporis, cujus es tu. Naturaliter vero amor est inter membra corporis. Rom. XIII : Multi unum corpus sumus in Christo, singuli autem alter alterius membra.* Ad idem incitare debet emolumentum multiplex quod sequitur ex hac dilectione. Eccles. IV : *Melius est duos esse simul quam unum : habent enim emolumentum suæ societatis.* Unum emolumentum est adjutorium, Proverb. XVIII : *Frater qui juvatur a fratre, quasi civitas firma.* Tullius *De amic.* ; « Virtutum amicitia adjutrix a natura data est, non vitiorum comes, ut, quia solitaria non posset virtus ad ea, quæ summa sunt, pervenire, conjuncta et consociata ad eam perveniret. » Aliud emolumentum est mutua exhortatio. Eccl. IV : *Unus quomodo calefiet?* Tertium est consolatio. Proverb. XXVII : *Unguento et variis odoribus delectatur cor, et bonis amici consiliis anima dulcoratur.* Ultimo incitare debet ad amorem proximi damnus quod facit odium vel discordia; hoc enim facit in corpore Ecclesiæ quod facit divisio continuitatis in corpore humano, ex qua sequitur dolor magnus, et quandoque mors; ideo Salvator multum rogat pro unitate Ecclesiæ, Joan. XVII : *Pater sancte, serva eos in nomine tuo, quos dedisti mihi, ut sint unum sicut et nos.* Idem in eodem : *Non pro eis rogo tantum, sed pro eis qui credituri sunt per verbum eorum in me, ut omnes unum sint.* Incitare debet principem ad amorem cleri, amor, quem in corpore humano videmus inter manum et oculum; si oculo immineat periculum, manus se opponit oculum protegens, et ictum suscipiens. Secundo hoc quod Deus reputat sibi fieri quod ministris ejus exhibetur. Matth. XVI : *Qui vos audit, me audit; et qui vos spernit, me spernit.* Tertio hoc quod parentes sunt spirituales, quibus honor et amor debetur. Basilius : « Parentes nostros ut propria viscera diligamus. » Quarto hoc quod ministrant spiritualia, ideo merito debentur eis temporalia. Matth. X : *Dignus est operarius cibo suo.* II Tim. II : *Laborantem agricolam oportet primum de fructibus percipere,* Gal. 6 : *Communicet is qui catechizatur verbo ei qui se catechizat in omnibus bonis,* I Timoth. V, *Qui bene præsumt presbyteri, duplici honore digni*

*habeantur, maxime qui laborant in verbo et doctrina.* Duplici honore sunt digni, quia bene vivunt, et bene præsumt, secundum Ambrosium. Digni sunt honore sublimi, et terreno honore : sublimi ut eis obediatur, terreno ut eis necessaria ministrentur, I ad Thess. V : *Rogamus vos, fratres, ut noveritis eos qui laborant inter vos, et præsumt vobis in Domino, et monent vos, ut habeatis eos abundantius in caritate.*

## CAPUT XIII.

*Quæ pertineant ad bonum principem, a diversis auctoribus collecta.*

Quæ pertineant ad bonum principem ostendit Cyprianus in lib. *De XII, abus.* Sæc. his verbis : « Justitia regis est neminem injuste per potentiam opprimere; sine acceptatione personarum inter virum et proximum suum juste judicare; advenis, pupillis et viduis defensor esse; cohibere furta; adulteria punire; iniquos non exaltare; impudicos et histriones non nutrire; impios de terra perdere; parricidas et perimentes non sinere vivere; Ecclesias defendere; pauperes elemosynis alere; justos super regni negotia constituere; senes et sapientes et sobrios consiliarios habere; magorum et ariolorum, pythionissarumque superstitionibus non intendere; iracundiam suam differre; patriam suam fortiter et juste contra adversarios defendere; prosperitatibus animum non elevare; cuncta adversantia patienter tolerare; per omnia in Domino confidere; fidem catholicam in Domino habere; filios suos non sinere impie agere; certis horis orationibus insistere; ante horas congruas cibum non gustare. Hæc regni prosperitatem in præsentem faciunt, et regem ad cælestia perducunt. » Item, Augustinus in lib. *De civ. Dei*, ostendit ea quæ ad principem pertinent his verbis : « Felices dicimus imperatores si juste imperant, si inter linguas sublimiter honorantium, et obsequia nimis humiliter salutantium non extolluntur; si se homines esse meminierint; si suam potestatem ad Dei cultum maxime dilatandum majestati ejus famulam faciunt; si Deum colunt, diligunt, timent; si plus amant illud regnum, ubi non timent habere consortes; si tardius vindicant, facile ignoscunt; si

eamdem vindictam pro necessitate regendæ tuendæque reipublicæ, non pro saturandis inimicitiarum odiis exercent; si eamdem veniam, non ad impunitatē iniquitatis, sed ad spem correctionis indulgent; si quod aspere coguntur plerumque decernere, minime lenitate et beneficiorum largitate compensant; si luxuria tanto est ei castigatior, quanta posset esse liberior; si malunt cupiditatibus suis, quam quibuslibet gentibus imperare. Et hæc omnia faciunt non propter ardorem inanis gloriæ, sed propter caritatem felicitatis æternæ; si pro suis peccatis humilitatis et miserationis ad orationis sacrificium Deo suo vero immolare non negligunt. Tales christianos imperatores dicimus esse felices interim spe, postea re ipsa futuros, cum id quod expectamus, advenerit. « Item, Gregorius ea quæ ad principem pertinent ostendit his verbis: « Summum bonum est in regibus justitiam colere, ac sua cuique jura servare, et in subditos non sinere quod potestatis est fieri, sed quod æquum est custodiri. » Idem: « Tunc regnum bene regitur, cum regnandi gloria animo non dominatur. » Item, Bernardus: « Restrīgenda sub ratione potestas est, nec quicquam agendum est prius quam concitata ad tranquillitatem mens redeat: quoniam commotionis tempore justum ira putat quod fecerit. »

## LIBER TERTIUS.

### PROOEMIUM

Ostensum est in præcedenti libro, quomodo princeps habere se debeat ad eum qui est super eum, scilicet ad Deum, vel ejus Ecclesiam; in hoc tertio libro ostenditur, quomodo princeps habere se debeat ad seipsum. Cavendum est principi primo ne circa alios occupatus seipsum negligat: secundo, ne relictis aliquibus vitiis, aliqua vitia retineat quibus pereat: tertio, ne subditis suis bona eorum auferat, propter quæ ipsos subditos amittat. Principi etiam multum necessarium est ut actionem consideratione præveniat, prudentia fortitudinem suam cohibeat. Trina consideratione quod facturus est, debet prævenire, scilicet an liceat, an expediat, an deceat. Frequenter etiam de se debet cogitare quid sit, quis, qualis.

### CAPUT I.

*Ne princeps se neglecto circa alios occupetur.*

Si princeps, se neglecto, circa alios occupetur, stulto labore consumitur, sicut dixit Jethro principi Synagogæ Moysi: *Vere stultus est labor talis*: cum Sapiens dicat « proprium est stultitiæ aliena vitia cernere, et sua oblivisci. » Valde fatuum est quod princeps, se neglecto, aliis intendat, cum ipse sit in majori periculo quam alii: « quanto enim quis in loco superiori, tanto in periculo majori versatur, » juxta verbum Augustini. Principi ex omni parte timendum est. Dæmones, qui cœlestem altitudinem amiserunt, positus in terrena altitudine invidentes, eos maxime impugnant, reputantes sibi honorabilius, si eos sibi subjecerint, scientes quod per eos pluribus poterunt dominari. Sicut in exercitu hostes visibiles ducem exercitus capere vel occidere conantur, eo quod ipso capto, vel occiso, exercitus dispergatur; sic hostes invisibiles eum, qui præest, maxime persequuntur: I Reg. ult.: *Totum pondus prælii versum est in Saul*. De periculo principis require supra lib. I capit. 1. Si neglexerit princeps suam salutem, non deerit qui ejus non negliget damnationem, sed eam non negligenter procurabit, cum juxta verbum Sapientis inæstimabile bonum sit suum esse. Multum est principi nociva occupatio, quæ hoc bonum ei aufert. Non est suus, qui in periculo positus sibi intendere non potest; si vult princeps totus esse omnium instar Apostoli, qui omnibus omnia factus est, laudabilis est humanitas, sed si plena sit; quomodo autem plena? eo excluso. Ipse homo est. Ergo ut plena et integra humanitas sit, colligat ipsum intra se, qui omnes recipit. Cum omnes eum habeant, sit ipse ex habentibus unus: si maledictus qui partem suam facit deteriorem; quid ille, qui se penitus reddit expertem? Quid prodest principi, si universum mundum lucretur, se unum perdens? Noverit licet omnia mysteria, lata terræ, alta cœli, profunda maris, si se nescierit, erit similis ædificanti in fundamento ruinam, non structuram faciens. Non est sapiens, qui non est sapiens in acquisitione salutis: nemo eo ipsi germanior.

## CAPUT II.

*Ut princeps se perfecte scrutetur.*

Multum cavendum est principi ne, aliquibus vitiis relictis, vitia aliqua retineat quibus pereat. Sunt aliqui qui de hoc confidentes quod sunt continentes, in aliis vitiis remanent, periculum suum non agnoscentes: superbi enim sunt, ventosi, invidi, iracundi, accidiosi, raptores, mendaces, blasphemi, detractores, malorum fautores, bonorum oppressores, in iudicio personarum acceptatores. Talibus necessarium esset, ut in speculo Scripturæ sacræ frequenter se suspicerent. Gregorius: « Specula sunt divina præcepta, in quibus animæ sanctæ semper inspicunt, et in quæ sunt in eis fœditates, deprehendunt, » Joan. in epist.: *Impossibile est quemquam Deo placere, qui quid ei placeat ignorat, fieri potest ut obsequendi voto offendat, si quomodo obsequi debeat, ante non didicit.* Bernardus Eugenio Papæ: « Admovi speculum, fœdus se in eo vultus agnoscat. Inspice ne forte etsi sit unde merito placeas tibi, etiam in quo debeas displicere, non desit. Nolo gloriaris testimonio conscientiæ: omnia illi desunt qui nil putat sibi deesse. » Principi multum cavenda est personarum acceptio in iudicio. Bernardus ibid.: « Caliginis duæ sunt causæ, ira et mollior affectus, is iudicii censuram enervat, illa præcipitat. Turbatus præ ira oculus elementer nil intuetur, suffusus quadam fluxa et muliébri mollitie animus rectum non videt. Non eris innocens si aut punias eum cui fuerat forte parcendum, aut parcas ei qui fuerat puniendus. » Impunitas nociva est valde. Bernardus in lib. *De consid.*: « Impunitas est incuriæ soboles, insolentiæ mater, radix impudentiæ, transgressionum nutrix. » Multum decet principem ut sit sine macula, cum teneat locum ejus qui est sine macula et vult habere ministros sine macula, juxta illud Psal. cx: *Ambulans immaculate hic mihi ministrabit.* Populus etiam multum ad eum respicit, unde ei bene convenit illud I ad Corinth. iii: *Spectaculum facti sumus mundo;* et sic Sapient. vii, dicitur de Christo, *qui est speculum sine macula;* ita ipsi pro possibilitate sua debent esse speculum sine macula, in quo pure reluceret Christi imago. Si macula fuerit in

speculo, illam videt qui in eo faciem videre quærebat; sic si macula fuerit in principe, ad eam respiciet populus, et secundum eam se maculabit. Præterea macula in principe macula est in gloria, in statu scilicet glorioso, cum perfectio christianæ religionis sit immaculatum se custodire ab hoc sæculo, Jac. i: *Princeps, qui super alios est, perfectius hoc debet facere.* Et notandum, quod multiplex est macula, quam aliquis contrahit ab hoc sæculo. Prima est superbiæ, quæ multum timenda est homini: hæc luciferum, ipsis sideribus clarius emicantem, in diabolium convertit. Hæc macula multum excæcat oculus cordis. Bernardus: « Superbo oculo veritas non videtur. » Secunda macula est avaritiæ, quæ valde deformis est. Sapiens: « Deterius avaritia vitium nullum est: » Eccles. xxxi: *Beatus vir qui inventus est sine macula, et qui post aurum non abiit.* Tertia est macula luxuriæ, de qua Eccl. xlvii: *Inclinasti femora tua mulieribus;* et paulo post subditur: *Dedisti maculam in gloria tua,* loquitur ad Salomonem. Hæc macula valde turpis est: Gregorius: « Superbia eo quod minus turpis creditur, minus vitatur, luxuriam eo magis erubescunt homines, quia omnes turpem noverunt. » Quarta, est peccatum gulæ, de qua habetur in Epistola Judæ: *Hi sunt in epulis suis maculæ convivantes:* varietate enim et delectabilitate ciborum occasio sunt ut convivantes cum eis maculentur. Quinta macula est loquacitatis, de qua Jacob. iv: *Lingua constituitur in membris nostris, quæ maculat totum corpus.*

## CAPUT III.

*Quod princeps subditis suis bona eorum non auferat.*

Multum cavendum est principi ne subditis suis bona eorum auferat, propter quod ipsos amittat. Bernardus in lib. *De consid.*: « Parvi dejectique animi est, de subditis non profectum quærere subditorum, sed quæstum proprium: non mediocris gloriæ est vox illa Apostoli. *Non requiro datum, sed fructum.* Indecens est valde principi, voluntate pro lege uti. Non est major Domino suo qui ait: *Non veni facere voluntatem meam.* Non minus dejecti quam elati animi est, veluti rationis expertis, non pro ratione,



sed pro libito agere, nec iudicio agi, sed appetitu. Quid tam bestiale, et tam indignum cuivis utenti ratione, quam vivere ut pecus? Quis in te rectore omnium, tantam contumeliam naturæ honoris injuriam ferat? sic degenerando, generale opprobrium fecisti tibi proprium. » Psalm. XLVIII : *Homo cum in honore esset, non intellexit : comparatus est jumentis insipientibus etc.* « Quid tam indignum tibi quam ut totum tenens, non sis contentus toto, nisi minutias quasdam atque exiguas portiones ipsi et tibi creditæ universitatis, tamquam non sint tuæ, satagas nescio quomodo adhuc facere tuas? Ubi etiam meminisse volo te parabolæ Nathan de homine qui centum oves habens, unam quæ erat pauperis concupivit. Hoc quoque veniat factum, immo facinus, regis Achab, qui rerum summam tenebat, et unam vineam affectavit, avertat Deus a te quod ille audivit : *cæcidisti et possedisti.* Non debet princeps subditos contemnere, sed ad eos humiliter se habere. Cyprianus : « Qualem cupis erga te Deum esse, talis esto ipse erga servum tuum. » Seneca : « Cum inferiore sic vivas, quemadmodum superiorem velis tecum vivere. » Idem : « Quemadmodum stultus est qui equum empturus non ipsum aspicit, sed stratum et frænos, sit stultissimus est qui hominem, aut ex veste, aut ex conditione, quæ vestis modo nobis circumdata est, existimat. » Item Seneca : « Servi sunt, immo homines : servi sunt, immo conservi : servi sunt, immo humiles amici. Video istos qui turpe existimant eum servo suo cœnare. Virga omne murmur compescitur, tota nocte jejuni perstant. Sic fit ut isti de domino loquantur, quibus coram domino loqui non licet, at illi quibus non tantum coram dominis, sed et cum dominis sermo erat, quorum os non consuebatur, parati erant pro domino porrigere cervicem : in conviviis loquebantur, sed in tormentis jacebant. » Coloss. III : *Domini, quod justum est et æquum, servis præstate, scientes quoniam et vos Dominum habetis in cælo.* Specialiter princeps debet diligere, et honorare subditos sensatos et fideles. Eccles. VII : *Servus sensatus sit tibi dilectus quasi anima tua.* Ibid. XXXIII : *Si est servus fidelis, sis tibi quasi anima tua, quasi fratrem sic eum tracta.*

## CAPUT IV.

*Quod princeps actionem consideratione præveniat.*

Multum necessarium est principi ut actionem consideratione præveniat. Ad considerationem monet Bernardus scribens ad Eugenium populi rectorem, multum commendans eam ipsi his verbis : « Non te totum, nec semper des actioni, sed considerationi aliquid tui et cordis et temporis sequestra. Consideratio ipsius actionis partes benigna præsumptione suas facit quodammodo peragendo et ordinando quæ agenda sunt necessario. Cave ne forte quæ prævisa poterant esse proficua, præcipitata magis fiant periculo. » Consideratio primo ipsum fontem suum, idest mentem de qua oritur, purificat, demum regit affectus, dirigit actus, corrigit excessus, componit mores, vitam honestat et ordinat, postremo divinarum rerum et humanarum scientiam confert. In minori mundo, scilicet homine, est defectus considerationis, quod in majori mundo est defectus illuminationis. Tria sunt in majori mundo ab illuminatione, scilicet decor, directio et securitas. Deficiente illuminatione decor deest mundo, vel non prodest, cum non delectet, eo quod non videatur, et est confusio, et inordinatio, et nulla securitas; sic in homine, si desit consideratio, deest decor honestatis, deest ordinatio; confusa est enim vita, et in periculo, imago existens miseræ infernalis, ubi non est decor, nec ordo, sed horror. Periculum istud verum solem fecit nasci in mundo isto, juxta illud Luc 1 : *Visitavit nos oriens ex alto. Illuminare his qui in tenebris sunt, et in umbra mortis sedent.* Imminet mors talibus intus et exterius, juxta illud Thren. 1 : *Foris interficit gladius et domi mors similis est.* Qui habent defectum considerationis, inconsiderati volunt, loquuntur et operantur. Voluntas eorum mortem vitæ prælegit. Eccl. XII : *Ante hominem vita et mors, bonum et malum : quod placuerit ei, dabitur illi.* Item cum mors et vita sint in manibus linguæ, Prov. XV, si non dirigatur lingua consideratione, mors prælegitur vitæ. Prov. XV : *Qui custodit os suum, custodit animam suam : qui autem inconsideratus est ad loquendum, sentiet mala.* Loquens



inconsiderate sentit hæc mala, scilicet conscientiæ remorsionem. Eccl. xx: *Qui multis utitur verbis, lædit animam suam.* Item, gratiæ evacuationem. In eodem: *Sapiens in verbis amabilem se facit: gratiæ autem fatuorum effundentur.* Item, confusionem. Proverb. x: *Os stulti confusioni proximum est.* Ibid. xiii: *Impius confundit et confundetur.* Item, damnationem. Matth. xiii: *Ex verbis tuis justificaberis, et ex verbis tuis condemnaberis.* Si desit consideratio, præeligitur via ducens ad mortem viæ quæ ducit ad vitam, et societas quæ ducit in infernum illi quæ ducit in paradisum. Ex consideratione est desertio periculosæ viæ. Psalm. cxviii: *Cogitavi vias meas, et converti pedes meos.* Homo, consideratione non utens, est ut animal brutum, vel eo deterior. Bernardus: « An non tibi bestiis bestialior videtur homo rationem habens, et ratione non utens? Pecus quidem, si ratione se non regat, excusationem habet a natura. » Versari debet consideratio nostra circa opera ejus qui supra nos est, juxta illud Eccl. vii: *Considera opera Dei,* quæ scilicet virtuti divinæ sunt possible, non humanæ. Hæc consideratio ad hoc utilis est, ne eo temere præsumamus. Hæc consideratio fidei est: si ipsa desit, cum Dei injuria quod Dei proprium est ab homine usurpatur, et creaturæ attribuitur, quod est quasi idololatria. Et si contingat quod ad exhortationem alicujus aliquis corrigatur, eloquentiæ et sapientiæ suæ hoc attribuit, et inde gloriam suam, et laudem hominum quærit. Si vero non corrigatur, offenditur, et peccatori indignatur, et irascitur, incorrigibilitatem ipsius suam contumeliam reputans, non attendens quod correctio peccatoris non est opus humanæ virtutis, sed divinæ. Ferens lucernam non confert visum gradienti, et cibum ministrans confert non vitam illi cui ministratur, et ad pugnam incitans non dat virtutem præliandi; adminiculantia sunt ista: sic prædicator non dat gratiam qua peccator corrigatur. Deus est qui correctionem operatur; unde, juxta verbum Salomonis: *Nemo potest corrigere quem ille despicit.* Quosdam Deus appetiatur, quos de manu inimici quasi violenter eripit tribulationibus multis; quosdam vero despicit, quos velut fragmenta vasorum, et pannos irreparabiles, in luto divitiarum et deliciarum putrescere permittit. Opera ejus qui contra nos est, scilicet diaboli, considerare debemus, ut

eorum destructioni intendamus, exemplo Salvatoris, qui mundo visibilis apparuit, ut ejus exemplo ad horum operum destructionem incitaremur, juxta illud Joan. iii: *In hoc apparuit Filius Dei, ut dissolvat opera diaboli.* Ad hoc debet esse studium et labor eorum, qui curas habent, ut peccata in parochiis eorum destruantur Isai. xxvii: *Iste omnis fructus, ut auferatur peccatum ejus.* Opera etiam nostra frequenter considerare debemus: distincte enim examinabuntur a Deo etiam verba otiosa. Job. xi: *Verebar omnia opera mea, sciens quod non parcis delinquenti:* Prover. xiii: *Astutus considerabit omnes gressus suos.* Opera etiam eorum, qui sunt inter nos, considerare debemus, ut inde exempla sumamus. Prov. vi: *Vade ad formicam, o piger, et considera vias ejus, et disce sapientiam.* Quod corrigere aliquem, Dei sit non hominis, intelligebat qui dicebat: *Sana me, Domine, et sanabor,* Jerem. xvii. Si cupiditas cor hominis occupaverit, nunquam sanabitur cor illud sine Dei operatione, sicut ex verbis patet Domini, Matth. xix, qui ait, cum juvenis habens multas possessiones abiisset tristis, audito verbo ipsius de contemptu divitiarum: *Amen dico vobis, dives difficile intrabit in regnum cælorum.* Item: *Facilius est camelum intrare per foramen acus quam divitem in regnum cælorum.* Et, cum hoc audito, dixissent discipuli: *Quis poterit salvus esse?* Respondit: *Apud homines impossibile est* (ut scilicet per se a suis cupiditatibus convertantur,) *apud Deum omnia possible sunt.* Idem intelligendum est de aliis corruptionibus. Si enim amor illicitus alicujus mulieris cor occupavit, sine virtute divina non sanabitur. Isai. xliiii: *Ego sum qui deleo iniquitates tuas propter me.* Oseæ xiii: *Perditio tua, Israel, tantum ex me auxilium tuum.* Job xiii: *Quis potest facere mundum de immundo conceptum semine? nonne tu qui solus es?* Eccles. xxi: *Quasi rhomphæa bis acuta omnis iniquitas plagæ illius; non est sanitas,* virtute scilicet humana. Sicut ad Deum pertinet creatio, ita recreatio. Peccatum hominem ad nihilum redigit, et, quodammodo, ad deterius. Bonum etiam esset ei si natus non fuisset, vel nihil omnino fuisset, nisi correctio secutura sit. Unde virtutis divinæ, non humanæ, est ad statum bonum illum reducere, cum gratia sit supra naturam, et solius Dei sit naturam animæ in esse perducere, ipsius solum erit gra-

tiam infundere. Ps. LXXXIII : *Gratiam et gloriam dabit Dominus.* Jac. I : *Omne datum optimum, et omne donum perfectum desursum est.* Non sufficiunt ad correctionem verbera, quæ sunt majoris efficaciam quam verba, juxta illud Prov. XXVII : *Si contuderis stultum in pila quasi ptisanas, desuper feriente pilo, non auferetur ab eo stultitia ejus.* Multominus ad eorum correctionem sufficit verbi exhortatio : cor non sanat nisi quod cor intrat. Non fit correctio sine gratia, quæ est immediate a Deo ; cum datur gratia, datur spiritus, scilicet, qui non datur nisi a Deo, cum sit donum optimum ; cum gratia datur, fit filius Dei cui datur, datur ei jus regni, pœna æterna remittitur, quæ omnia ad Deum constat pertinere. Multum necessaria est principi ut prudentia fortitudinem suam cohibeat. Bernardus Eugenio Papæ : « Adverte suavissimum amplexum virtutum, atque alteram pendere ex altera, matrem fortitudinis esse prudentiam, nec fortitudinem esse, sed temeritatem, quemlibet ausum quem non parturivit prudentia. » Hæc item est, quæ inter necessitates et voluptates media, quasi quædam arbitra, sedens, utrimque certis limitibus determinat, fines istis assignans et præbens quod satis est, illis quod minus est demens. Et sic ex alterutro tertiam formans virtutem, quam dicunt temperantiam, nempe intemperantem ipsa consideratio censet tam eum qui necessariis pertinaciter demit, quam qui indulget superfluis. Non est temperantia in solis resecandis superfluis, est et in admittendis necessariis ; tamen de justitia necesse est mentem consideratione præveniri, ut se formet in ea. Se enim necesse est prius cogitet, ut ex se normam ducat justitiæ. non factura utique alteri quod sibi nolit fieri, nec quod sibi fieri velit alteri negatura. Non est laudabilis in principe nimia audacia. Bernardus in lib. *De consid* : « Ego multo mihi tutius judico apud majestatem timiditate, quam temeritate periclitari. »

#### CAPUT V.

*Quod princeps trina consideratione quod facturus est præveniat.*

Princeps quod facturus est, trina consideratione debet prævenire, scilicet an liceat, an expediat, an deceat. I ad Cor. x :

*Omnia mihi licent, sed non omnia expediunt ;* loquitur Apostolus de comestione eorum quæ immolata sunt idolis, ut non omnia quæ licent expediunt, idest adjuvant in cursu prædicationis, sed magis impediunt. Eccl. XXXVII : *Non omnia omnibus expediunt ;* et subditur ab Apostolo ad explanationem : *Omnia mihi licent, sed non omnia ædificant ;* licent omnia potestate liberi arbitrii, et doctrina legis naturalis, quæ omnia munda sunt : *Domini est terra et plenitudo ejus ;* unde licet omnia comedere, sed, ad vitandum scandalum proximi, a tali comestione abstinendum est. Proverb. XIII : *Sapiens mulier ædificat domum suam : insipiens exstructam quoque destruet manibus ;* et subdit Apostolus : *Nemo quod suum est, querat ;* I Corinth. XI : *Caritas non querit quæ sua sunt,* supple : tantum ut dicit Augustinus, ibid. Philip. II : *Non quæ sua sunt singuli considerantes, sed quæ aliorum.* Si quis tamen objiciat de cibis prohibitis populo Judæorum Lev. XI., et Deuter. XIV, dicendum quod illi cibi non fuerunt prohibiti propter se, sed in onus populi, et propter significationem, et ad restringendum peccatum gulæ quod in populo illo multum regnabat. Apostolus etiam revocavit prohibitionem illam Tit. I dicens : *Omnia munda mundis.* Cum princeps considerare habeat, an deceat quod facturus est quod ad disciplinam pertinet, sciendum quod, secundum Hugonem de Sancto Victore, « Disciplina est omnium membrorum motus ordinatus, et dispositio decens in omni habitu et actione. » Idem : « Disciplina est conversatio bona et honesta, cui parum est non mala facere, sed studet in his quæ bene agit per cuncta irreprehensibilis apparere. » Hæc descriptio videtur esse sumpta ex verbis Augustini dicentis : « In incessu, statu, habitu, et in omnibus motibus vestris non fiat quod cujusquam offendat aspectum, sed quod vestram deceat sanctitatem. » Ista disciplina idem videtur esse quod modestia, de qua loquitur Philosophus : « Cujus est decorem, seu decentiam servare in exteriori conversatione, et est decor iste respectu hominum. » Ad videndum autem utrum aliquid sit decorum, seu decens, vel non, attendendum est an sit naturæ consentaneum, et an sit personæ dignum quæ hoc agit, vel cum qua agitur ; attendendum est etiam ad congruentiam temporis, vel loci. Decor est in homine quod

est consentaneum excellenti naturæ hominis, et est aliquid indecens in homine quod non esset indecens in bruto. Item aliquid indecens est in persona privata quod non esset in alia. Item aliquid indecens est in Religioso quod non esset in persona sæculari. Item aliquid est indecens congruentia temporis, secundum illud Ecel. xx : *Ex ore fatui reprobabitur parabola, quia non dicit illam in tempore suo.* Ratione etiam loci aliquid est indecens, ut cum in sacro loco aliquid fit indecenter quod alibi fieret decenter : sacro loco magna est exhibenda reverentia. Et notandum quod revereri multipliciter accipitur : aliquando enim dicit motum qui est fugiendo seu resiliendo ab altitudine alicujus rei in propriam parvitatem, et vocatur motus iste motus reverentiæ, et huic motui interiori respondet exterius elongatio, vel fuga, qua humiles prius elongant se ab his, qui sunt in potestate positi, non audentes eis appropinquare, quoniam revereri dicit honorem quem aliquis exhibet alteri gratia dignitatis, ad ostendendum quod ipse subjectus sit ei, et paratus voluntatem ejus sequi, ut est : assurgere venienti, assistere sedenti, inclinare transeunti, incedentem sequi. Et genuflexio exhibetur et honor alicui propter prioritatem temporis, vel naturæ dignitatem, vel excellentiam in aliqua gratia. Propter superioritatem exhibetur honor, juxta illud Roman. xiii : *Cui honorem, honorem* : I Petr. ii. *Regem honorificate.* Item propter prioritatem temporis, ut Lev. xix : *Coram cano capite consurge, et honora præsentiam senis.* Item propter dignitatem naturæ, ut Exod. xx : *Honora patrem tuam et matrem tuam* ; et Malac. i : *Si ergo pater Ego sum, ubi honor meus?* Propter excellentiam in aliqua gratia honor exhibendus est omnibus. Debemus enim credere quod omnes excedunt in aliqua gratia. I Petr. i : *Omnes honorate* : Rom. ii : *Honore invicem prævenientes* : Phil. i : *In humilitate superiores sibi invicem arbitrantes.* Augustinus : « Non hoc ita debemus arbitrari, ut nos æstimare fingamus, sed vere æstimemus aliquid posse esse occultum in aliquo, quo nobis superior sit, etiam si bonum nostrum, quo illo videmur superiores esse, non sit occultum. » Et notandum quod dignissima species honoris creaturæ exhibendi, est honor qui debetur humanæ naturæ quam Filius Dei assumpsit : specialiter vero est

honoranda humana natura in Christo propter inhonationem quam in cruce sustinuit, juxta illud Phil. ii : *Humiliavit semetipsum factus obediens usque ad mortem, mortem autem crucis, propter quod et Deus exaltavit illum.* Propter hoc ex institutione Ecclesiæ fit adoratio crucis, in qua is, cui exhibetur honor ille, est Christus passus ; ignominia vero crucis est causa illius adorationis. De adoratione humanæ naturæ a Filio Dei assumptæ dicit Augustinus super illud Psalm. xcviij : *Adorate scabellum pedum ejus quoniam sanctum est* : Sciendum est quod in Christo terra est, idest caro, quæ sine impietate adoratur. Post naturam humanam a Filio Dei assumptam, exhibendus est honor Beatæ Virgini, in qua et ex qua Filius Dei carnem assumpsit. Damascenus : « Dei genitricis imaginem, non materiam sed figuram adoramus, » figuram, hic intellige figuratum, seu significatum per imaginem, et subdit Damascenus : « Honor enim qui est ad ipsam, ad eum, qui ex ea incarnatus est, reduceitur. » Hoc dicit ideo, quia mater propter filium honoratur. Tertio, exhibendus est honor beatis Angelis et sanctis, qui sunt in statu gloriæ, ab his qui sunt in statu miseræ : status enim miseræ, inferior est statu gloriæ. Matth. xi : *Inter natos mulierum non surrexit major Joanne Baptista ; qui autem minor est in regno cælorum, major est illo.* Quarto, exhibendus est honor his qui præsent in Ecclesia militante, qui scilicet sunt in gradu superiori, ab his qui sunt in gradu inferiori : qui enim præsent, sunt in loco Dei, ideo honor eis exhibendus est, unde et dii vocantur, Exod. xxiii : *Diis non detrahes, et principi populi tui non maledices.* Præcipue honor exhibendus est his qui præsent quantum ad spiritualia, juxta illud I Tim. v : *Qui bene præsent presbyteri, duplici honore digni, habeantur, maxime qui laborant in verbo et doctrina.* Quinto, honor exhibendus est amicis Dei et in statu viæ qui sunt notæ sanctitatis ; unde qui se reputant peccatores, cum genuflexione suffragia solent petere a talibus : status enim eorum, secundum suam reputationem, est inferior statu aliorum, sicut status servi a statu domini, vel filii : filius domini a servis dominus vocare solet. Matt. xv : *Non est bonum sumere panem filiorum, et dare canibus.* Canes vocat peccatores ; filios, justos : et subditur : *Nam et catelli edunt de micis quæ cadunt de mensa domi-*

*norum suorum.* Intelligit illos dominos, qui primo vocati sunt filii. De hoc honore dicitur ad Ecclesiam. Is. XLIX : *Vultu in terram demisso adorabunt te.* Et notandum quod reverentia quæ debetur rebus Deo dicatis, ut templo vel cœmeterio, vel his quæ pertinent ad ornatum templi, vel sancto tempore, videtur esse quidam timor, quo timemus intrare templum illoti, vel non sanctificati, vel appropinquare altari vel aliis rebus sacris, vel inquinare nos in loco sancto, vel communia opera ibi exercere. De hoc timore habetur, Gen. XXVIII : *Quam terribilis est locus iste? non est hic aliud nisi domus Dei, et porta cœli.* Malac. II : *Levi a facie nominis mei pavebat.* Cum Dominus sanctus sit, in sanctitate vult appropinquari ad ejus ministerium. Exod. XXVIII : *Aaron sanctificatus ministret mihi.* Qui vero Deum non ostendit sanctum ad ministerium ejus in sanctitate appropinquando, ipse ostendet eum sanctum pro immunditia sua pœnam a Deo recipiendo. Levit. X : *Arreptis Nadab et Abiud filii Aaron thuribus imposuerunt ignem et incensum insuper, offerentes coram Domino ignem alienum, quod eis præceptum non erat, egressusque ignis a Deo devoravit eos; dixitque Moyses : Hoc est quod loquutus est Dominus : Sanctificabor in his qui appropinquant mihi.* Non legitur Christum in Evangelio tantam iram per zelum ostendisse, quantum ostendit eum vidit quod templo non exhibebatur debita reverentia; Joan. II et Matth. XXII. Tunc impletum est illud Psal. LXVIII : *Zelus domus tuæ comedit me.* Et Marc. II, legitur quod *non sinebat ut quisquam transferret vas per templum.* Post illud verbum Apostoli : *Omnia mihi licent,* subdit Apostolus : *Si cum gratia participo, quid blasphemor?* id est curcado in blasphemiam imperitorum, pro eo quod gratias ago? *Sive ergo manducatis, sive bibitis, sive aliud quid facitis, omnia in Dei gloriam facite,* id est in laudem Dei. Ambrosius : « Cum invocatione creatoris, ut in actibus et conversatione nostra, laudetur Deus. » Augustinus : « Si hæc recte fiunt, laudes Dei sunt. » Idem : « Cum laudatur Deus, de bono opere tuo Deum laudas : et cum blasphematur Deus, de malo opere tuo Deum blasphemas. » Item idem : « Si quod manducas et bibis, ad refectionem corporis sumis reparationemque membrorum tuorum, gratias agens ei qui tibi præbuit mortali et fragili supplementorum solatia, cibus tuus

et potus laudat Deum ; si vero modum naturæ debitum immoderatione voracitatis excedas, et vinolentia te ingurgites, quantumlibet laudes Dei lingua tua sonet, vita blasphemias. » De his qui sine benedictione et gratiarum actione, elemosynarum collationem comedunt, dicitur in Canonica Judæ : *Hi sunt in epulis suis cum maculis convivantes, sine timore semetipsos pascentes.*

## CAPUT VI.

*Quod princeps frequenter cogitet de se quid sit, quis, qualis.*

Frequenter debet princeps cogitare de se quid sit, quis, qualis : quid in natura, quis in persona, qualis in moribus : quid, verbi gratia, homo : quis, rector vel princeps : qualis, benignus, mansuetus, et similia. In definitione hominis, qui est animal rationale mortale, consideranti is occurret fructus, ut mortale quod est rationale humiliet, et rursum rationale mortale confortet, quorum neutrum erit contemptum homini circumspecto. Multum amanda est humilitas principi, unde ad eam admonet Eccl. III : *Quanto, inquit, magnus es, humilia te in omnibus.* Humilitas in majoribus est laudabilior, Deo gratior, et ipsis utilior. Bernardus in lib. *De consid* : « Cum omni indifferenter personæ humilitas sit quædam turris fortitudinis a facie inimici, nescio quo pacto vis ejus major in majoribus, et clarior in clarioribus comprobatur. » Idem : « Non altum sapere, sed humilibus consentire nil Deo carius, vel rarius apud homines. » Gregorius in *Moral.* : « Mirum est cum in cordibus sublimium regnat humilitas morum. » Bernardus : « Non est magnum esse humilem in abjectione, magna prorsus et rara virtus humilitas honorata. » Idem, loquens de illo verbo, Matth. III, quod dixit Salvator Præcursori : *Sine modo ; sic enim docet nos implere omnem justitiam* : « Sic plane sic decet ut vincat et humilitate quem sublimitate vincebat. » Humiles Deus ad principatum eligit, superbientes vero abjicit. I Reg. XV, dictum est Sauli : *Nonne cum parvulus esses in oculis tuis, caput in tribubus Israel factus es?* Saul abscondit se domi eum quæretur in regem I Reg. X ; et de David sublimando in regem dicitur Ibid. XVI : *Abjeci eum, nec juxta intuitum hominis ego judico.* Moyses humilis princeps constitui-



tur a Domino, Exod. iii : *Quis sum ego, ait Moyses, ut vadam ad Pharaonem, et educam filios Israel ex Ægypto?* Job. v : *Ponis humiles in sublime.* Ibid. xiii : *Qui humiliatus fuerit, erit in gloria.* Humilitas præparat ad sapientiam, quam constat principi multum esse necessariam. Bernardus in lib. *De consid.* : « Simia in tecto rex fatuus in solio sedens; » Prov. xi : *Ubi humilitas, ibi sapientia;* Matth. xi : *Revelasti ea parvulis;* Ptolomæus Philosophus, « Inter sapientes est sapientior qui existit humilior; Beda : « Humilitas est clavis scientiæ; » Gregorius : « Prima stultitia Angeli fuit elatio cordis. Vera sapientia efficitur hominis humilitas suæ æstimationis. » Humilitas facit principem diligi. Chrysostomus : « Nutrix dilectionis est humilitas; odii mater est superbia. » Bernardus : « Sola virtus humilitatis læsæ est reparatio caritatis. »

## CAPUT VII.

*Quod humilitas est astutissima.*

Humilitas est astutissima, sicut apparere potest in divisione mundi, quam ipsa facit cum superbia. Humilitas accipit in terra, superbia extra: unde super illud Job. vi : *Eum qui venit ad me non ejectionem foras sic habetur:* « Superbiæ est foras eijci, quæ nihil habet in bono interiori, nec hic nec futuro. » Seneca : « Sapiens in terra, se omne bonum terminabit. » Ad humiles pertinet illud : *Gloria nostra hæc est, testimonium conscientiæ nostræ,* II Cor. I. Humilitas vult habere crossellum, superbia operimento contacta est: humilitas vult habere nucleum, superbia vero corticem: humilitas accipit imum, superbia vero altum: hæc montes vult habere, illa vero valles; ideo superbia habet ventum, perflant enim altissima venti. Habet etiam ariditatem, juxta illud Augustini : « Alta siccantur, ima replentur. » Habet duritiem et sterilitatem et propinqua est præcipitio. Bernardus : « Facile est se in alto continentem obstupescere, et de vita periclitari: » opposita vero his habet humilitas. Superbia accipit florem, juxta illud Lev. xxviii : *Date flores Moab.* Moab interpretatur ex patre, et significat superbos qui de paterna nobilitate glóriantur, humilitas vero accipit fructum. Superbia accipit pulchrum, humilitas bonum: superbia acci-

pit paleam, et humilitas granum: superbia accipit imaginem, sive picturam honestatis, humilitas vero honestatem. Sapiens : « Apud sapientes sunt honesta, apud vulgus simulacra rerum honestarum, » opera scilicet in mortali, et cum sinistra intentione facta. Superbia quod est contentionis, humilitas vero quod est pacis. Humilitas *recumbit in novissimo loco,* juxta illud Salvatoris, Luc. xiv, superbia vero gloriam quærit: gloria vero res contentionis est. Cum unus laudat superbiam, duo eam vituperant. Humilitas laudem fugit, laus vero sequitur eam tamquam laude dignam. E contrario superbus laudem sequitur, laus vero fugit eum tamquam laude indignum. Superbia in ore hominum se et sua ponit, ideo non est mirum si morsus detractionis frequenter ibi sentit: humilitas vero altissimum ponit refugium suum. Ipsa enim dicit illud I Cor. iv : *Qui judicat me, Dominus est;* ideo morsus detractionum eam non attingit: humilitas verro turris fortissima est, juxta verbum Bernardi; ideo multum necessaria est principi, qui est in majori periculo quam ceteri. Multum cavendum est principi ne superbiat de multitudine populi cui præest. Rex Xerxes cum coram se videret exercitum suum multitudinis innumerabilis, attendens quod totus ille exercitus infra centum annos in pulverem convertendus esset, dixisse fertur, regem tanti exercitus et tam fortis me vocant homines, ego vero fateor me regem pulveris. Princeps tamquam prudens, non solum quod situm est ante oculos debet intueri, sed quod et futurum est quod ita certum est ac si jam fuisset. Cum obsidisset Sennacherib Jerusalem, eadem nocte Angelus Domini percussit in castris Assyriorum centum octuaginta quinque millia. Porro Jerosolymitæ videntes stragem hostium, egressi sunt et spoliaverunt castra, spolia vero mortuorum tollentes excusserunt ex eis pulverem tantum. Nam ignis divinus patenter eorum corda incineraverat. Talis est principi sapienti suus exercitus, qui non solum præsentia, sed et futura intuetur, ideo de illo non superbit. Humilitas supplet in homine defectus aliorum bonorum. Bernardus : « Apud Dominum, fratres, jus habere non possumus, quoniam in multis offendimus omnes; sed nec fallere eum, ipse enim novit abscondita cordis, quanto magis opera manifesta; nec resistere viribus, quoniam omnipotens est. Quid ergo



restat nisi ad humilitatis remedia tota mente confugere, et quicquid in aliis minus habemus, de ea supplere? » Debet princeps attendere quis sit, quoniam aliis est prælatus: sed cum hoc etiam debet cogitare humilem statum unde ad hoc assumptus est, et infirmitatem quam habet, qua ceteris infirmior est, ne evanescat salubris copula, ut cogitans se summum, attendat pariter se cinerem vilissimum non tantum fuisse, sed esse. Imitetur cogitatione naturam, imitetur etiam quod dignius est, auctorem naturæ summa imaque consocians. Nonne enim in parte hominis vili limo vitæ spiraculum colligavit? Nonne auctor naturæ in sua parte verbum contemperavit? Multum timenda est principi prosperitas; incautis enim prosperitas est ad disciplinam quod ignis ad ceram quod solis radius ad nivem, vel glaciem. Sanctus David, sapiens Salomon fuit; sed, blandientibus nimis secundis rebus, alter ex parte, alter ex toto desipuit. Magnus, qui incidens in adversa non excidit vel parum a sapientia: nec minor eni præsens felicitas si arrisit, non irrisit; quamquam facilius inveneris qui sapientiam retinuerit contraria sibi fortuna, quam qui propitia non perdidit. Tullius in prima *Rhet.*: « Difficile est illi virtutes habere, qui secunda semper fortuna usus sit. » Considerare etiam debet princeps qualis ipse sit. Hæc consideratio tenet eum in se, nec sinit eum a se evolare, nec ambulare in magnis super se. In se debet consistere, non infra dejici, non supra attolli, non evadere longius, non extendi in latius. Longum dico cum sibi homo promittit vitam longiorem; cum superfluis animus extenditur curis; altum, cum de se plus præsumit; profundum, cum se plus dejicit; longitudo extremum habere solet, dilatatio scissuram, altitudo ruinam, profundum absorptionem. In hoc fortis non dejicietur, prudens longioris vitæ non adducitur incerto, modestus moderabitur, curas temperabit a superfluis, non deerit necessariis. Multum cavenda est principi otiositas, mater nugarum, non vera virtutum. Cum omnia ad humilitatem hominem incitent, mirum est quomodo humiles non sumus, et quomodo adhuc in nobis superbiam relinamus.

## CAPUT VIII.

*De incitantibus ad humilitatem.*

Incitat nos ad humilitatem terra, infimum elementorum, quam cum inspiciamus, quasi cœmeterium et sepulcrum nostrum videmus, quia in terram reversuri sumus, juxta illud Gen, iii: *In sudore vultus tui vesceris pane tuo, donec revertaris in terram de qua sumptus es.* Terra, quæ nunc est sub pedibus nostris, quandoque futura est super caput nostrum. Ad humilitatem etiam incitare nos potest, quod tantum terra indigemus. Ipsa est quæ nos sustentat: si ipsa disrupta fuerit sub pedibus nostris, sicut fuit sub pedibus Datan et Abiron, Num. xvi, vivi in infernum descendemus. Ipsa etiam miro modo Dei virtute ex se producit unde pascimur: quod si non faceret, fame periremus. Item, si ligna non produceret, quibus possemus nos calefacere, periremus frigore. Aer etiam ad humilitatem multum nos incitat, si attendamus quod sine aere nec ad momentum possumus vivere: nisi enim ad cordis refrigerium aerem attrahamus, suffocamur. Item, si aer a vento frigidus commotus fuerit, multum nos affligit: si pestilens fuerit, nos interficit. Aqua etiam materiam humilitatis magnam nobis ministrat, quæ si defuerit, immundi erimus, et, terra existente arida et sterili, fame peribimus. Ignis etiam ad humilitatem nos incitat, qui si nobis defuerit, unde cibaria nostra coquamus, et nos calefaciamus, non habebimus, et fame et frigore peribimus. Propterea ignis paratus est in tormentum impiis. Deut. xxxii: *Ignis succensus in furore meo, et ardebit usque ad inferni novissima.* Quomodo ergo superbit homo facinorosus, ad ejus combustionem fornax jam succensa est? In terra et eis quæ de terra nascuntur, et brutis animalibus multam materiam humilitatis invenimus, cum multa bona habeant, quibus nos caremus, ut est fulgor auri, pulchritudo florum. Matth. vi: *Considerate lilia agri quomodo crescunt, non laborant, neque nent. Dico autem vobis, quoniam nec Salomon in omni gloria sua coopertus sicut unum ex istis.* In avibus etiam est suavitas cantus sine magisterio alicujus creaturæ, ad quam

suavitatem homo multis annis edoctus non potest pertingere. Item invenitur in brutis velocitas, fortitudo, pulchritudo, vestitus abundans. Hominem vero ab eis oportet mendicare unde nuditatem cooperiat, et pulchritudinem suam ornet, et tarditatem suam et debilitatem suam juvet. In luminaribus etiam cœli magnam materiam humiliandi nos habemus, quorum luce multum indigemus : sine luce enim oculi nostri sunt inutiles. In nobis multas causas humiliationis invenimus et ex parte corporis et ex parte animæ. Ex parte corporis, sive respiciamus ejus originem, sive finem, sive statum ejus præsentem. Bernardus : « Vide unde venis, et erubescere; ubi es, et ingemisce; quo vadis et contremisce. » Si attendatur unde corpus venit, invenitur quod ex putredine. Job xvii : *Putredini dixi pater meus es.* Si attendatur ad quem finem deveniat, pulvis et cinis fit. Gen. iii : *Pluis es, et in pulverem reverteris.* Item. Gen. xviii : dixit Abraham : *Loquar ad Dominum meum, cum sim pulvis et cinis.* Non est mirum si miles erigat se contra Dominum suum, qui habet castrum super rupem inexpugnabile; sed valde fatuus est qui non habet domicilium nisi de palea, quæ facillime potest comburi, si contra dominum suum potentem se erigat : sic homo fatuissimus est, cujus habitatio, scilicet corpus, ad calorem febrilem in ignem redigitur, nec ad ejus incinerationem ignis requiritur, si contra Deum se erigat. Multum deberet hominem humiliare corpus spiritui, ad ipsius humiliationem datum, quod est saccus stercoreum, et materia vermium, juxta illud Machab. ii : ubi dicitur de peccatore : *Gloria ejus est stercus et vermis.* Ipse unde confundi debet, gloriatur. Statum præsentem corporis attendebat, qui dicebat : *Humiliatio tua in medio tui,* Mich. iii; et Hieronymus : « Quomodo superbiet, qui semper secum sentinam portat? » Ex parte animæ multas causas humiliationis possumus invenire. Aut enim scimus nos esse in mortali, aut non : si sic, in inferiori statu sumus quam canis, vel porcus, vel bufo, cum simus debitores duplicis mortis, scilicet temporalis et æternæ, illi vero unicam mortem debeant; item miseriam habemus culpæ et pœnæ. Si vero nesciat se esse in mortali, nescit tamen se esse in statu salutis; scit se aliquando fuisse in statu damnationis, et nescit utrum ad-

huc peccatum sit sibi dimissum. Ecel. ix : *Sunt justi atque sapientes, et opera eorum in manu Dei : et tamen nescit homo utrum amore vel odio dignus sit, sed omnia in futurum reservantur incerta.* Gregorius ad hoc : « Cuncta nobis de meritis nostris incerta sunt, ut unam certam gratiam teneamus humilitatem, etiam si sciremus nos esse in statu salutis. » Ad humilitatem nostram possent ista valere : negligentia proficiendi, quam in nobis videmus, difficultas standi, facilitas cadendi (ad sibilum enim unius verbi deicitur aliquis), difficultas resurgendi, debilitas vitia minima vincendi. Item, in eis quæ sunt juxta nos multam materiam humiliationis invenimus. Si attendamus multos de fratribus nostris esse leprosos, multos cæcos, multos mendicos, et aliis miseriis afflictos. Item, magnam materiam humiliationis invenimus, si attendamus eos qui contra nos sunt, scilicet hostes invisibiles, qui et fortiores et astutiores nobis sunt, et nos strangularent, si Deus hoc eis permitteret. Thr. iii : *Misericordia Domini quia non sumus consumpti.* Item supra nos causas humiliationis invenire possumus, si attendamus Dei omnipotentiam paratam ad vindictam superbiorum. Tribus de causis solet aliquis se inclinare, vel demittere : vel quia gladius ejus capiti imminet; vel quia transiturus est per ostium humile; vel propter societatem alicujus magnæ personæ, quam ad terram videt sedere : similibus causis debet homo per humilitatem se inclinare, si per superbiam se erexerit. Gladius omnipotentis Dei est evaginatus super caput ejus. I Pet. v : *Humiliamini sub manu potentis Dei.* Item, necesse habet per ostium humile paradisi intrare. Augustinus *Sup. Joan. x : Ego sum ostium : Ostium humile est; si sano capite volumus intrare, oportet caput demittere.* Item, Altissimus in mundo isto et sancti valde se humiliter habuerunt. Matth. x : *Sufficit servo si sit sicut Dominus ejus,* et Joan. xv : *Mementote sermonis mei, quem ego dixi vobis : Non est servus major Domino suo.* Et bona et mala nostra debent nos humiliare. In bonis non verum dominium, sed onus et periculum habemus, pro illis censum debemus, et non solum illa perdere sed etiam pro illis perdi, possumus. Mala vero nostra, si sint mortalia peccata, multum debent nos humiliare, cum pro illis patibulo infernali adjudicati si-

mus. Mirum est, cum habeamus tot humiliantia, quomodo remanet in nobis superbia! O mira vanitas, o mira fatuitas cordis nostri, cujus elationem perfecte dimittere, cujus cervicosos motus omnino domare humilitatis materia tanta non sufficit, quin adhuc superbiat terra et cinis.

## CAPUT IX.

### *De mortis memoria.*

Et notandum quod multum valet ad humilitatem mortis memoria, sicut docet Ecclesia, in principio quadragesimæ, capitibus fidelium cineres imponens, dicens : *Memento quia cinis es, et in cinerem reverteris.* Debet homo se cinerem reputare, et ex parte animæ, et ex parte corporis. Ex parte corporis propter propinquitatem et certitudinem quam habet ad hoc quod in cinerem redigatur : sic enim loqui solet Scriptura sacra, ut aliquid, quod futurum est, dicat jam esse, propter propinquitatem et certitudinem. Gregorius : « Fere se mortuum considerat, qui se moriturum non ignorat : » Rom viii : *Corpus mortuum est propter peccatum, idest necessitati moriendi addictum.* Quantum vero ad animam, debet homo se cinerem reputare quantum ad tria. Primo, quantum ad vilitatem : cinis valde est vilis, licet materia, ex qua factus est, fuerit pretiosa; sic qui est in statu peccati quasi nullius valoris est respectus valoris in quo erat ante peccatum. In Psal. xvi : *Ad nihilum deductus est in conspectu ejus malignus.* Immo minus quam nihil videtur esse : melius enim esset ei non esse, quam malum esse, si in malitia perseveret. Secundo, quantum ad hoc quod cinis non potest resistere modico flatui quin ab eo dispergatur; sic peccator non potest resistere sibilo verbi modici, juxta illud Psal. i : *Non sic impij, non sic, sed tanquam pulvis quem projicit ventus.* Tertio, quantum ad hoc quod sicut cinis non potest ex se redire ad statum materiae, unde factus est, sed sola Dei virtute; sic peccator non potest reduci ad statum bonum, nisi Dei virtute. Principi qui jam habet coronam temporalem, et cui desideranda est æterna, multum expedit ut sua reputatione cinis sit, pro cinere enim corona promit-

titur. Isa. lxi. *Ad annuntiandum mansuetis misit me, ut darem coronam eis pro cinere.* Multum est utilis mortis memoria. Eccles. vii : *In omnibus operibus tuis memorare novissima tua, et in æternum non peccabis.* Hieronymus in *Epist.* « Platonis est sententia : Omnem sapientum vitam meditationem esse mortis. » Sapiens : « Summa philosophia est assidua mortis meditatio. » Specialiter mortis memoria juveni est necessaria : unde post illud Thren. : in *Bonum est viro cum portaverit jugum in adolescentia sua* subditur : *Ponet in pulvere os suum. Os sapientum est in corde ipsorum,* Ecl. xxv. Os ergo in pulvere ponit qui cogitat quod pulvis sit. In hac meditatione projicienda est cupiditas, et vanitas sæculi : unde Lev. i, præcepit Dominus ut faciens holocaustum de turturibus, vel pullis columbæ, projiceret vesiculam gutturis et plumas in locum cinerum. Holocaustum facit de turture, qui dat se Deo, ut ei serviat in claustris : de columba facit holocaustum, qui dat se Deo ut ei serviat in mundo : turtur enim amat solitudinem, columba gregatim volat. Vesicula gutturis, quæ est quasi horreum avium, cupiditatem designat, pluma vero levitatem. In loco cinerum vesiculam projicit, qui consideratione mortis suæ cupiditatem a se abjicit, non enrans acquirere quæ in brevi perdat, et a quibus perdat. Bernardus : « Utinam congregata tantum perirent, et non congregator eorum. Tolerabilius esset insudare labori perituro, quam perempto. » Plumam in locum cinerum projicit, qui consideratione mortis vanitatem hujus mundi refugit, intelligens fatuum esse in via ad mortem gaudere. Augustinus : « Nihil aliud est tempus presentis vitæ quam cursus ad mortem. » Memoria mortis valet ad contemptum mundi. Hieronymus : « Facile contemnit omnia, qui se semper cogitat moriturum : » Eccles. xi : *Si annis multis vixerit homo, et in omnibus lætus fuerit, meminisse debet tenebrosi temporis, et dierum malorum, qui cum venerint, vanitatis arguentur præterita.* In morte vanitatis arguitur omne quod est in mundo, scilicet concupiscentia carnis, concupiscentia oculorum, et superbia vitæ. Concupiscentia oculorum in hoc quod homo nudus revertitur in terram, Job i : *Nudus egressus sum de utero matris meæ nudus revertar illuc;* manifeste

apparet quod fatuum fuit tantum concupiscere terrena, cum spoliandus esset eis. Concupiscentia carnis in hoc quod corpus, delicate nutritum, vermibus esca datur, satis apparet in hoc quod delitiæ non sunt quærendæ carni : non multum curandum est qualem escam vermes comesturi sint. Superbia vitæ in hoc quod ille qui volebat esse super homines, ponitur sub terra ; et ambulant super eum porci et canes. Satis ex hoc apparet, quod valde fatuum fuit velle esse super alios. Qui vult navem regere, ponit se in fine navis ; sic sapiens consideratione finis regit se in his quæ sunt ad finem. Illum qui dicebat : *Anima mea, multa bona habes posita in annos plurimos, requiesce* etc. Dominus posuit in fine vitæ dicens : *Stulte, hac nocte repetent animam tuam a te*, Luc. xii.

## CAPUT X.

*Ut princeps a servitute diaboli et vitiorum se custodiat.*

Multum est necessarium principi ut a servitute diaboli et vitiorum se custodiat. Seneca : « Recte putandus est fortior qui cupiditates, quam qui hostes, vicerit. » Studium magnum et diligentiam adhibere debet, ut se debito modo regat. Seneca : « Vis habere magnum honorem? magnum imperium dabo tibi, impera tibi. » Qui baptizantur, cum ad regnum cœlorum eligantur, tripliciter inunguntur, scilicet in vertice, ut moneantur superiori parti sui, scilicet rationi, principatum seu dominium servare. Prov. xxx : *Per tria movetur terra, et quartum quod non potest sustinere, per servum cum regnaverit.*

Asperius nihil est humili cum surgit in altum.

Si corpus dominium habeat in homine, magna est inordinatio : simile est sicut si in corpore humano pedes essent in superiori parte, et caput in inferiori. Item inungitur in scapulis, ut moneatur mansuete portare onus præceptorum divinorum. Inungitur et in pectore, ut moneatur ad proximum viscera pietatis habere. In principe valde indecens est si servituti vitiorum et dæmoniorum se subjiciat, si Deo superiori suo non obediat, si ad proximum impie se habeat.

## LIBER QUARTUS.

## PROŒMIUM.

In præcedenti libro ostensum est quomodo princeps habere se debeat ad se ipsum ; in hoc quarto libro ostendendum est quomodo habere se debeat ad eos qui sunt juxta ipsum. Turpius est principi quod, eo præsentem, perperam agitur ; ideo illi quos præ oculis habet, ita debent esse ordinati et informati ut sint speculum et forma aliorum.

## CAPUT I.

*Quod duabus de causis cavendum est principi ne habeat juxta se malos.*

Multum cavendum est principi, ne sint mali qui sunt juxta illum. Bernardus in lib. *De consid.* : « Ne te dixeris sanum dolentem latera, hoc est ne te dixeris bonum, malis innitentem ; non sit tuta tibi tua bonitas obsessa malis, non magis quam sanitas vicino serpente, non est quo te subducas malo intestino. » Et e regione, bonum domesticum eo amplius sæpius juvat. Dupliciter nocent mali collaterales principi, scilicet convictu suo eum corrumpendo, et perverse ei consulendo. Cum peccatum sit morbus contagiosus, multum timenda est malorum societas. Non est tutum sano cum leprosis habitare. Eccles. xiii : *Qui tetigerit picem, inquinabitur ab ea : et qui communicaverit superbo, induet superbiam* : I. Cor. xv : *Corrumpunt bonos mores colloquia prava* ; similiter immo amplius, opera mala. Prov. xiii : *Qui cum sapientibus graditur, sapiens erit ; amicus autem stultorum similis eis efficietur*. Qui vult ire ad sanctum Jacobum, non ponit se in societate eorum qui Romam vadunt : societas non ducit nisi quo vadit. Qui vult ire in paradysum, declinare debet societatem eorum qui vadunt in infernum. Noluit Jacob habere Esau socium itineris sui. Gen. xxxiv. Seneca : « Convictor delicatus paulatim enervat et emollit : malignus comiti quamvis caudido et simplici rubiginem suam affricuit. » Eccl. xx : *Quis miserebitur ei qui comitatur viro iniquo?* Sicut non est tutum agnum habitare inter lupos, ita nec bonum habitare inter malos. Eccl. xii : *Sicut commu-*



*nicabit lupus cum agno aliquando, sic peccator justo.* Multum nocent mali colaterales perverse consulendo. Malus consiliarius est oculus eruendus, juxta verbum Domini Matth. v : *Si oculus tuus scandalizat te, erue eum, et projice abs te.*

## CAPUT II.

*Quod necessarium sit principi ut ad consilia bene se habeat.*

Multum utile est principi si ad consilia bene se habeat. Et notandum quod circa hoc quinque sunt commendabilia, scilicet: gratia consilium requirendi, gratia consiliarium eligendi, gratia consilium dandi, gratia consilium examinandi, gratia acquiescendi consilio. Gratia requirendi consilium est in eo qui non est præceptus ad operandum. Ille cui deest hæc gratia, offendit frequenter, juxta illud Prov. xix: *Qui festinus est, pedibus offendit.* Ad requirendum consilium monet Scriptura sacra Tob. iv : *Consilium semper a sapiente require;* Prov. xi : *Ubi non est gubernator, corruiit populus : salus autem ubi multa consilia;* simile habetur ibid. xxiv : *Erit salus ubi multa consilia sunt ;* Ibid. xiii : *Astutus omnia agit cum consilio ; fatuus autem aperiet stultitiam suam.* In eodem : *Qui agunt omnia cum consilio, reguntur sapientia.* Tullius in *Officiis* : « Parva foris sunt arma, nisi consilium sit domi. » I Machab. v : *In illa die ceciderunt Sacerdotes in bello, dum volunt fortiter facere, dum sine consilio exeunt in prælium.* Consilium regere debet fortitudinem. Ecl. xxx : *Sine consilio nihil facias.* Ibid. xxxvii : *Ante omnem actum præcedat consilium stabile.* Omne quod faciendum est tractare debet princeps apud se, et cum eis qui eum diligunt. Tractandum autem est ante factum, quia, post factum, sera retractatio est. Providere debet princeps ut tales secum habeat, quibus omnia sua secreta secure committat, consilia communicet, quibus se totum, quasi alteri sibi, refundat, qui si velit aliquatenus deviare, non sinant, frangent præcipitem, dormitantem excitent, extollentem reprimant, excedentem corrigant, quorum constantia nutantem firmet, erigat diffidentem, qui ad ea quæ sunt honesta et amabilia et bonæ famæ provocent, qui vulgus non spernant, pauperes non gravent, sed foveant, qui cum humilibus

humiles, cum innocentibus innocentes, duos dure redarguant, malignantes coerceant, et superbis retributionem reddant. Ad eligendum consiliarum mone-mur Ecl. vi : *Multi, inquit, pacifici sint tibi, et consiliarius tibi sit unus de mille.* Pro consiliario ante omnes eligendus est Deus. Tob. iv : *Omnia consilia tua in ipso permaneant.* Deinde recurrendum est pro consilio ad viros bonos. In Psal. lxxxviii : *Deus qui glorificatur in concilio sanctorum.* Eccles. xxxvii : *Anima sancti viri annuntiat aliquando vera, quasi septem circumspectores sedentes in excelso ad speculandum :* Matth. xi : *Abcondisti hæc a sapientibus et prudentibus, et revelasti ea parvulis.* Non est requirendum consilium a malis. Isa. xix : *Sapientes consiliarii dederunt Pharaoni consilium insipiens :* Prov. xii : *Consilia impiorum fraudulenta,* Ecl. xxxvii : *A consiliario malo serva animam tuam :* Job. xxi : *Consilium impiorum longe sit a me.* Item, a fatuis non est habendum consilium. Ecl. viii : *Cum fatuis non habeas consilium : non enim poterunt diligere nisi quæ eis placent.* In capite libri Psalmorum scriptum de capite Ecclesiae : *Beatus vir qui non abiit in consilio impiorum :* unde in alio Psalmo dicitur : *In capite libri scriptum est de me.* De principe vero qui quasi caput populi est, et locum Dei tenet, ante omnia necessarium est ut non abeat in consilio impiorum. Cum homo habeat unum Angelum consiliantem bonum, et habeat alium Angelum malum consulentem malum, si homines mali malum consilium habent, sunt plures contra unum, et non sine magno periculo. Item, non est quærendum consilium a juvenibus. Roboam pro magna parte regnum amisit, quia consilio juvenum acquievit, relicto consilio senum. Ecl. xxv : *Quam speciosa est veteranis sapientia, et gloriosus intellectus et consilium.* Non est consilium quærendum ab homine de negotio quod eum tangit, vel de eo quod nimis odit, vel nimis diligit, ne forte vel fallatur, vel fallere velit. Ecl. xxvii : *Noli consiliari cum socero tuo de aliquo quod videatur esse contra uxorem.* Non est requirendum consilium a socero, idest uxoris patre, vel ab amicis carnalibus de his quæ sunt contra carnem. Bernardus : « Amicos consulat qui non legit quod inimici hominis domestici ejus. » Jacob, ignorante Laban socero suo, de Mosopotamia recessit in terram Chanaam, Genes. xxxiii.



Commendabilis etiam est gratia dandi consilium, juxta illud Machab. II : *Ecce Simon frater vester, scio quia vir consilii est, ipsum audite semper.* Præcipue commendanda est hæc gratia in his qui habent alios regere. Gratia etiam examinandi consilium commendabilis est. Seneca : « Prudentis est proprium examinare consilium, et non cito facili credulitate ad falsa prolabi. » Item, commendabilis est gratia acquiescendi consilio. Prov. XII : *Via stulti recta in oculis ejus : qui autem sapiens est, audit consilium.* Moyses acquievit consilio Jethro, licet minor esset Jethro. Exod. XVIII : *Provide, inquit, tibi de omni plebe viros potentes et timentes Deum, in quibus sit veritas, et qui oderunt avaritiam.* Magnam discretionem et diligentiam debet habere princeps in eligendo, vel assumendo, qui secum habitent. Huic negotio non se ingerat rogans, consilio non præce agendum est : alius pro alio, alius pro se forte rogat ; pro quo rogatur sit is suspectus, qui rogat pro se minus est admittendus. Debet princeps collaterales suos ad amorem justitiæ multum monere, ad quam justitiam duo obtinent, scilicet nulli nocere, et communem utilitatem quærere. Tullius : « Fundamentum justitiæ est ne cui noceas, deinde communi utilitati deservias. » Multum placet Deo innocentia, et multum est utilis homini. Augustinus : « Nihil Deo dignius, vel carius esse potest, quam ut innocentia tota observatione teneatur. » Licet enim quis in aliis operibus devotus appareat, si illam non habuerit, sibi frustra blanditur. In Psal. XXXVI : *Custodi innocentiam.* Ambrosius : « Beatam vitam efficiunt tranquillitas conscientiæ, et securitas innocentia : quasi in statu beatorum est homo innocentiam servans, nihil enim amittit, ipsa servata, omnia bona servantur. » Dum Adam innocentiam servavit, nihil ei nocuit : nihil etiam nocet hodie his qui innocentiam servant : Eccl. VIII : *Qui custodit præceptum, non experietur quidquam mali.* Matth. X : *Omnes capilli capitis vestri numerati sunt.* Quæ videntur noxia, innocenti sunt utilia. Rom. VIII : *Scimus quoniam diligentibus Deum omnia cooperantur in bonum etc.* Innocentia est armatura Dei, quam si habueris, cum tuis salvus eris. Job. XXII : *Salvabor innocens ;* Ibid. IV : *Quis unquam innocens periit ?* Tales debent esse collaterales principis, juxta consilium Jethro, in quibus sit ve-

ritas, et qui oderint avaritiam, veritas, inquam judicii, quam multum impedit avaritia munera recipiens.

## CAPUT III.

*Quod acceptio munerum multum sit cavenda et timenda principi.*

Acceptio munerum multum timenda est et cavenda judicibus : multa enim mala facit eis, de quibus septem ponere sufficiat. Notandum enim quod munus acceptum judicem excæcat, mutum eum reddit, eum corrumpit ad minus quantum ad famam, in servitutem redigit, maledictum facit, ad omnem iniquitatem inclinat, et tandem morti æternæ condemnat. De excæcatione legitur Exod. XXXIII : *Non accipias munera, quæ excæcant prudentes, et subvertunt verba justorum ;* et Deut XVI : *Non accipies præmium, neque munera, quæ excæcant oculos sapientum, et mutant verba justorum.* De secundo malo dicit Gregorius : « Non potest constanter argui a quo accipitur. Apostolus noluit accipere, ne, dum acciperet, auctoritatem magisterii amitteret. » Et Isa. LVI dicitur de principibus : *Canes muti non valentes latrare.* De his duobus malis dicitur Eccl. XX : *Exenia et dona excæcant oculos judicum, et quasi muto in ore avertit correctiones eorum.* De tertio malo dicitur Isa. I : *Principes tui infideles socii furum ;* et subditur causa : *Omnes diligunt munera, sequuntur retributiones.* Et licet aliqui non corrumpantur per munera, tamen præsumptio habetur contra eos de corruptione ; quia, secundum Hieronymum, « sicut matrona non est casta, quæ cum rogatur munera accipit ; ita nec judex minuscula accipiens a corruptione immunis judicatur. » De quarto malo habetur I Cor. VI : *Omnia mihi licent, sed ego sub nullius redigar potestate.* Loquitur Apostolus de sumptibus recipiendis, et innuit quod si ab eis sumptus reciperet, jam sub eorum potestate esset. De quinto malo legitur Deuter. XVII : *Maledictus qui munera accipit, ut percutiat animam innocentis ;* Isa, V : *Væ qui justificatis impium pro muneribus.* Cupidus munus accipiens credit se solum benedictionem accipere, unde munus vocatur benedictio, ubi dicit Naaman Elisæo IV Reg. V : *Obsecro ut accipias benedictionem a servo tuo ;* sed latet maledictio quam Giezi sensit, cum lepra Naaman ei adhæ-

sit. De sexto malo habetur in Psal. xxv : *In quorum manibus iniquitates sunt, et subditur causa : Dextera eorum repleta est muneribus.* De septimo malo dicitur Job. xv : *Ignis devorabit tabernacula eorum qui libenter munera accipiunt.* Quis sanæ mentis in hospitio suo libenter recipiat eum a quo debeat excæcari, et tot alia mala pati? Quis sapiens amet ea quæ suis tantum amatoribus sunt noxia?

## CAPUT IV.

*De quibusdam quæ sunt reprehensibilia in acceptatoribus munerum.*

Specialiter reprehensibile est in acceptatoribus munerum si extorqueant, vel etiam oblata recipiant ea, ad quorum restitutionem sciant dantes teneri, ut sunt usuræ et rapinæ; qui, secundum Hieronymum, similes sunt illis qui minores pisces, devoratos a magnis, comedunt, qui cibus vilis est, et usui humano minus aptus. Item reprehensibile est in acceptatoribus munerum, cum habent ministros inferiores impios procurantes ut ipsi subditis aliquid valeant extorquere. Illi ministri sunt quasi aucupes, juxta illud Jer. v : *Inventi sunt in populo meo impii insidiantes quasi aucupes, laqueos ponentes et pediculis ad capiendum viros.* Reprehensibiles etiam sunt acceptores munerum, cum accipiunt munera pro causa, pro qua non debent, ut judices munera accipientes ut deserant justitiam, vel ut justitiam faciant, quam gratis debent facere, aliter nolentes facere. Sicut enim iniquus esset qui capam meam mihi vendere vellet, ita injustus est qui justitiam, quam debet gratis ex officio facere, non vult facere nisi accepto munere. Has justitias judicabit Dominus, juxta illud Psalm. lxxiv : *Cum accepero tempus, ego justitias judicabo; justitiam venditam Dominus judicabit, et pro ea venditorem damnabit.* Prohibere debet princeps collateralibus et inferioribus ministris ne aliquam injustitiam faciant, vel ut ei placeant, vel ut ei aliquid acquirant: providere etiam debet eis ut occasiones accipiendi munera non habeant. Ambrosius super illud Luc. ii : *Neminem concutiatis :* Singulis a generibus hominum tribuit Joannes Baptista responsum : publicanis ne ultra præscriptum exigant, militibus ne calumniam faciant, prædam non requi-

rant, docens idcirco stipendia constituta militiæ, ne, dum sumptus quæritur, prædò grassetur, idest latrocinetur. » Item, debet providere ne ministri inferiores aliquas falsas accusationes subditorum afferant, propter quas bona eorum ab eis extorqueantur. Prov. xxix : *Princeps qui libenter audit verba mendacii, omnes ministros habet impios.*

## CAPUT V.

*Quod multum sit timenda rapina principi in se et collateralibus et ministris inferioribus.*

Multum timenda et cavenda est rapina principi et in se suis collateralibus inferioribus. Multum est enim Deo et sanctis exosa, diabolo placida, homini nociva. De Dei odio habetur Isa. xli : *Ego Dominus amans judicium, et odio habens rapinam in holocaustum.* Exosa est Deo rapina, etiam cum inde ei obsequium exhibetur. Eccles. xxxiv : *Qui offert sacrificium ex substantia pauperum, quasi qui victimat filium in conspectu patris.* Cum substantia pauperum vita sit eorum, qui offert Domino eam, quasi vitam vel sanguinem pauperum, qui sunt filii Dei, ei offert : unde substantia pauperum sanguis vocatur Jerem. ii : *In alis tuis inventus est sanguis animarum pauperum.* Alæ sunt pretiosorum palliorum extremitates, in quibus sanguis animarum invenitur, cum de rapiis pauperum fiunt. Cum his alis non de facili volant in cælum. Item Eccl. xxxiv, rapina occisio dicitur, ubi sic habetur : *Qui aufert in sudore panem, quasi qui occidit proximum suum; cum raptor pauperi vitam aufert, quasi infert ei mortem.* Auferre enim vitam, et inferre mortem convertibilia esse videntur. Sancti odio odiunt rapinam pauperum, ut quasi propter eam displiceat eis præsens vita : et de Deo sustinente hoc videntur murmurare. Eccles. iv : *Verti me ad alia quæ sub sole geruntur, et vidi calumnias et lacrymas innocentium, et consolatorem neminem, nec posse resistere eorum violentiæ cunctorum auxilio destitutos, et laudavi magis mortuos quam viventes, et feliciorum utroque judicari qui necdum natus est, nec vidit mala quæ sub sole fiunt;* Abac. i : *Usquequo, Domine, clamabo, et non exaudies? vociferabor, a te vimpaticens, et non*

*salvabis? Quare respicis contemptores, et taces conculcante impio justiore se?* Non est mirum si Deus odit rapinam inter Christianos, cum sit proditio. Christiani enim omnes fratres sunt et fraternitate naturali, de qua Augustinus : « Adam et Evam intendamus, et omnes fratres sumus : » et fraternitate spirituali, de qua idem Augustinus : « Fratres quidem secundum quod homines sumus, quanto magis secundum quod Christiani sumus? ad id quod homo es, pater fuit Adam unus, una mater Eva; ad id quod christianus es, unus pater est Deus, una mater Ecclesia. » Non est sine crimine proditionis quod aliquis deprædetur fratrem suum innocentem : propterea qui deprædatur servum, in eo deprædatur Dominum; proditiose ergo agit in utrumque, utrumque deprædando. Multum placet diabolo, multum assimilans hominem ei. Ipse fuit primus raptor volens Dei altitudinem rapere cum ait : *Ero similis Altissimo*, Isa. XIII. Et adhuc incessanter laborat, ut bona nostra rapiat.

## CAPUT VI.

*Quod in aliquibus raptores diabolo sunt deteriores.*

Non solum assimilantur raptores diabolo, sed in aliquibus eo sunt deteriores, et specialiter in tribus. Primum est quod diabolus torquet eos qui mala agunt, sed raptores eos deprædantur et torquent qui a malo recedunt. Isa. LIX : *Qui recedit a malo prædæ patuit*; Proverb. XXIX : *Viri sanguinum oderunt simplicem*. Poterit diabolus se justificare comparatione raptorum in die iudicii dicendo Domino : Ego illos solos affixi qui te offenderant; sed raptores isti illos deprædaverunt et afflixerunt qui non meruerunt. Secundum est quod diabolus defert Angelo bono ad custodiam hominis deputato, ut ei, quem custodit, violentiam corporalem non inferat quod raptores non faciunt. Tertium est quod diabolus torquet homines in inferno, qui locus est tormentorum, ut habetur Luc. XVI, sed raptores torquent homines in mundo isto, ubi homines debent habere libertatem faciendi de se et de rebus suis quod volunt. Ad ostensionem magnæ malitiæ vocat eos in specie, scilicet lupos, Soph. III, dicens : *Judices tui lupi vespere, non*

*relinquebant in mane*. Peccatum rapinæ homini insultum nocet, macula est valde adhærens, vix enim aliquis perfecte restituit quæ rapuit : videmus eos qui habent vestes pretiosas novas diligenter cavere eis ab oleo et aliis liquoribus, quorum maculæ removeri non possunt. Dicunt enim : Perdita esset vestis, si tale qui caderet super eam : sic juvenis qui nondum rapuit, debet sibi cavere a rapina, et dicere : perditus sum, si rapere incæpero : nunquam enim de cetero restituetur.

## CAPUT VII.

*Quod Deus multum sit puniturus raptores.*

Multa sunt quibus perpendetur quod Dominus multum sit puniturus raptores, qui sua auferunt pauperibus. Primo per hoc quod ita districte judicat eos qui sua non largiuntur pauperibus : si enim damnantur qui sua auferunt pauperibus non distribuunt, quid fiet illis qui bona eorum auferunt? Unde sup. Luc. XVI, habetur : « Non reprehenditur dives quod aliena rapuerit, sed quod sua non erogaverit. » Ad idem facit illud Matth. XXV : *Tunc dicet rex his qui a sinistris erunt : Discedite a me, maledicti, in ignem æternum* : et subditur causa, *Esurivi et non dedistis mihi manducare*. Raptoribus vero poterit dicere : Esurivi, et austulistis mihi quod debebam manducare : ori meo subtraxistis quod porcis et canibus dedistis. Porei sunt homines voluptuosi : canes detractatores qui auferunt de ore Dei quod ponunt in ore diaboli. Os pauperis os Dei est : os diaboli os impii est. Ipse enim servus diaboli, et sic quæ ipsius sunt, diaboli sunt. Ad *Litteram* etiam de rapinis pauperum paseunt canes et sues. Secundo per lacrymas viduarum et pupillarum quibus injuriantur, quæ contra eos multum provocant Dominum, de quibus legitur Eccles. XXXV : *Non despiciet Dominus preces pupillarum, nec viduam si effundat loquelam gemitus : nonne lacrymæ viduæ ad maxillam descendunt, et exclamatio ejus super deducentem eas? a maxilla enim ascendunt usque ad cælum, et Dominus exauditor non delectabitur in illis*. Minus dicit, et plus significat, immo multum offendetur. Ad idem facit parabola quæ habetur Luc. XVIII, de iudice

iniquo, qui Deum non timebat, nec hominem reverebatur, qui nolebat per multum tempus vindicare viduam quamdam de adversario ejus, sed post dixit intra se : *Et si Deum non timeo, nec homines revereor, tamen quia molesta est mihi hæc vidua, vindicabo illam* : et subdit Dominus, *Videte quid iudex iniquitatis dicat : Deus autem non faciet vindictam electorum suorum clamantium ad se die ac nocte, et patientiam habebit in illis*? Multum est timendum raptoribus de salute sua : preces enim eorum non exaudiuntur propter peccatum rapinæ Isa. 1 : *Cum multiplicaveritis orationes vestras, non exaudiam : manus enim vestræ sanguine plenæ sunt*. Orationes honorum pro eis factæ non exaudiuntur, quia adversantur eis lacrymæ pupillorum et viduarum, quæ violentæ sunt in precibus, ut dicit Augustinus super illud Psal. xxxviii : *Auribus percipe lacrymas meas*. Ad hanc contrarietatem pertinet illud Eccles. xxxiv : *Unus orans, et unus maledicens, cujus vocem exaudiet Deus*? immo multi maledicentes. Non facile quis exaudiet in aliqua curia justa qui jus non habet, cum habet ibi multos adversarios fortes. Tertio per magnum amorem quem Deus habet ad pauperes, qui tantus est quod sibi reputat fieri quod eis fit, Matth. xxv : *Quod uni ex minimis meis fecistis, mihi fecistis*. Propter eos venit in mundum istum. In Psal. xi : *Propter miseriam inopum et gemitum pauperum nunc exurgam, dicit Dominus*. In primo etiam verbo novæ legis communicavit eis regnum suum dicens : *Beati pauperes etc.* Unde verisimile est quod districte iudicaturus sit pauperum oppressores, juxta illud Psal. lxxi : *Judicabit pauperes populi, et salvos faciet filios pauperum, et humiliabit calumniatorem*; Prov. xxiii : *Non attingas terminum parvulorum, et agrum pupillorum ne introcas : propinquus enim illorum fortis est, et ipse iudicabit contra te causam illorum*; Ib. xxii : *Non facias violentiam pauperi, quia pauper est, nec conteras egenum in porta : quia Dominus iudicabit causam ipsius, et configet qui confixerunt animam ejus*. Quarto per hoc quod pauperes quos spoliaverunt, erunt iudices, juxta illud Job. xxxv : *Pauperibus iudicium tribuit. Tunc stabunt justi in magna constantia adversus eos qui se angustiaverunt, et qui abstulerunt labores eorum*. Sap. v.

## CAPUT VIII.

*De pœnis quas Deus infert raptoribus in præsentem.*

In mundo isto punit Deus raptores multipliciter : paupertate, sterilitate, mortis acceleratione, et quod gladio moriuntur : filii etiam eorum mendici fiunt, et gladio pereunt. De paupertate habetur Prov. xi : *Alii dividunt propria, et ditiores fiunt : alii rapiunt non sua, et semper in egestate sunt*. Hujus paupertatis potest causa quadrupliciter assignari. Prima est quod ipsi, Deo relicto, qui est fons, et causa, et origo honorum, de indigentis pauperum repleri volunt, de quo conqueritur Dominus. Jerem. ii : *Dereliquerunt me fontem aquæ vivæ*. Deberent milites Deo servire, et ab eo necessaria sperare, non laboribus pauperum inhiare : de paupertate enim non colligitur abundantia. Secunda causa est, quia alii deprædantur eos sicut ipsi spoliant pauperes. Isa. xxxiii : *Væ qui prædatis, nonne et ipse prædaberis*? Abac. ii : *Quia tu spoliasti gentes multas, spoliabunt te omnes qui reliqui fuerint de populis*. Tertia causa est, quia Deus non dat libenter illis qui sibi auferunt in pauperibus, unde raptores plus amittunt quam auferant : amittunt enim quod liberalitas erat eis data; nec mirum si Deus multum offendatur, cum pauperi aliquid aufertur, cum ipse sit liberalissimus, tales vero extorsiones avaris solent fieri, non illis qui libenter dant bona sua. Quarta causa est, quia creaturæ in locis sibi deputatis conservantur et quiescunt, in locis vero ubi violenter ponuntur, non quiescunt, ut ponderosa quiescunt in infinis locis, levia in supernis; si vero in aliis locis ponuntur violenter, ad sua loca revertuntur. Sic accidit de divitiis, quæ a raptoribus violenter occupantur. Multoties sterilitas pœna raptorum est : cum enim contra Deum acquirere velint quæ possideant, Dominus negat eis, vel eorum successoribus, quin ea possideant, non dando eis heredem. Eccles. xl : *Nepotes impiorum non multiplicabunt ramos*. De mortis acceleratione dicitur in Psal. v : *Viri sanguinum, et dolosi non dimidiabunt dies suos*; Prov. ii : *Impii de terra perdentur, et qui inique agunt, auferuntur*. Quod raptores gladio morian-



tur, habetur. Jerem. xxii : *Væ qui ædificant domum suam in injustitia*; et quibusdam interpositis subditur : *Propter hoc dicit Dominus : Non plangent eum ; væ frater, et væ soror, non concrepabunt ei : væ domine, et væ inclyte, sepultura asini sepelietur, putrefactus et projectus extra portas Jerusalem.* Et propter hoc spiritus ejus a dæmonibus rapietur, juxta verbum Gregorii dicentis : « Qui mihi visibiliter rapit, urgente necessitate, subito invisibiliter rapietur. » De hoc quod filii eorum mendici fiant, et gladio pereant, habetur Nahum. ii : *Leo cepit sufficienter catulis suis, et legavit leænis, et implevit præda speluncam suam*; et subditur : *Ecce ego ad te, dicit Dominus exercituum, leunculos tuos comedet gladius, et exterminando de terra prædam tuam.* Job. xxvii : *Hæc est pars impii apud Deum, et hereditas violentorum, quam ab Omnipotente suscipient, si multiplicati fuerint, filii ejus in gladio erunt, et nepotes eorum non saturabuntur pane.* » Rapinæ sunt quasi molæ asinariæ, fune amoris collo raptorum suspensæ, in profundum inferni eos submersuræ, juxta illud Prov. xxi : *Rapinæ impiorum detrahent eos.* Et notandum quod rapina multum indecens est in principe sicut et furtum, immo plus quam furtum : universaliter enim majus malum est manifeste peccare quam occulte, ut patet in adulterio. Magis ergo peccat raptor pauperi rem suam manifeste auferens, quam fur qui subtrahit eam ipsi occulte.

## CAPUT IX.

*De vitiis quæ in principibus et ministris eorum solent abundare.*

Princeps quantum potest debet facere ut et ipse et qui sunt cum eo, immunes sint ab illis vitiis, quæ in principibus et ministris eorum solent abundare, de quibus causa brevitatis sex sufficiat ponere. Primum est vulpina astutia ad rapiendum, ad quod pertinet quod dicit Dominus, Lucæ xiv, de Herode : *Dicite vulpi illi.* Tullius in *I Rhet.* : « De re familiari impertiendum est, sed moderate. Quid stultius quam quod libenter facias curare ut diu facere non possis? » Ibid. : « Sequuntur largitionem rapinæ. Cum enim dando egere coeperint, alienis bonis manus inferre coguntur; ita cum benevo-

lentia comparandæ causa benefici esse velint, non tanta studia eorum assequuntur quibus dederint, quanta odia quibus ademerunt. » Idem : « Nullum vitium deterius avaritia, præsertim in principibus et rempublicam gubernantibus; habere quæstui rempublicam non modo turpe est, sed et sceleratum et nefarium. » Secundum est vitium curiositatis, de qua habetur exemplum, Luc. xxxiv, in Herode, qui cupiebat Salvatorem videre non causa suæ salutis, sed causa suæ curiositatis : de ipso sic legitur : « Herodes viso Jesu gavisus est valde : erat enim ex multo tempore cupiens videre eum. » Tertium vitium est contemptus simplicium, et irrisio : unde subditur ibi : « Sprevit autem illum Herodes cum exercitu suo, et illusit. » Quartum est gravamen minorum propter majores. Comparant enim gratiam potentum oppressionem innocentum, quæ negotiatio est valde iniqua et diabolica : unde subditur : « *Et facti sunt amici Herodes et Pilatus in illa die.* » Quintum est immiserordia, seu crudelitas, ad quam pertinet quod milites illusuri Domino turbam convocaverunt ut amplius erubesceret, et quod ei obtulit unus ex eis acetum, et alius latus ejus jam mortui lancea aperuit : sic milites quodammodo lanceant Christum in membris suis, cum pauperibus non parcunt, quorum vita quoddam genus mortis est : aceto etiam eum potant, qui ad hoc subditos suos cogunt ut, illis meliora quæ habent dantes, deterioribus utantur. Sextum vitium est quod ipsi spoliant Ecclesias bonis, quæ ipsi, vel antecessores eorum, contulerunt eis. Ad hoc pertinet quod milites induerunt Dominum veste purpurea, qua postea spoliaverunt eum. Multum est utilis principi justitia, multum noxia avaritia. Prov. xxix : *Rex justus eriget terram, vir avarus destruet eum*; in eod. : *Rex qui judicat in veritate pauperes, thronus ejus firmabitur in æternum.*

## CAPUT X.

*Quod princeps cum discretionem debeat eligere quem constituat super familiam suam.*

Quærendum est principi cum discretionem et diligentiam quem constituat super familiam suam : qui si fidelis non fuerit.



fraudabit; si vero non fuerit prudens, fraudabitur. Quærendum est ergo et fidelis et prudens, et danda ei potestas, ut quod videbitur sibi agendum, facere possit, contra quem clandestinæ et surraturæ delationes non sunt recipiendæ. Fidem debet ei princeps habere exemplo illius Ægyptii, qui, omnibus traditis Joseph, ignorabat quid habebat in domo sua. Bernardus : « Erubescat christianus christiano sua non credens : homo sine fide, fidem tamen habuit servo super omnia bona sua constituens eum, et hic erat alienigena. »

## LIBER QUINTUS.

### CAPUT I.

*Quod parentes generaliter debent esse solliciti de eruditione prolis.*

Generaliter de eruditione filiorum et filiarum solliciti debent esse parentes, sed amplius principes. Eccles. vii : *Filii tibi sunt? erudi illos.* Eruditionem eorum requirit status in quo sunt pueri post peccatum primorum parentum, habent enim ignorantiam et inordinatam conepiscientiam. Augustinus in lib. *De civit. Dei* : « Quis ignorat enim quanta veritatis ignorantia, quæ jam infantibus est manifesta, et enim quantæ vanæ cupiditatis abundantia, quæ incipit apparere in pueris, homo in hanc vitam veniat, ut si vivere dimittatur ut velit, et facere quicquid vult, in omnia, vel in multa facinorum et flagitiorum genera perveniat? » Nec sufficit contra ista eruditio verborum, immo necessaria est etiam disciplina verborum. Augustinus in eodem : « Quid sibi volunt multimodæ formidines, quæ cohibendis parvulorum adhibentur vanitatibus? quid pædagogum, quid magistrorum, quid ferulæ, quid virgæ, quid his poenis agitur nisi ut imperitia debellectur, et prava cupiditas infranctur, cum quibus malis in hoc sæculo vivitur? » Flagella magnæ efficaciam sunt in erudiendo et corrigendo : his erudiuntur et corriguntur etiam animalia irrationabilia, et non solum flagellis propriis, sed etiam alienis, ut patet in leone, cui timor incutitur, flagellato coram eo catulo; et in hominibus sunt etiam magnæ efficaciam : qui enim verbis erudiri non potest, eru-

ditur verberibus. Prov. xxii : *Stultitia colligata est in corde pueri, sed virga disciplinæ fugabit eam.* Ibid. xxviii : *Virga atque correctio tribuit sapientiam.* Eccl. xxii : *Flagella et doctrina in omni tempore sapientia*, id est causa sapientiæ. Disciplina usque ad livorem peccata fugat secundum illud Prov. xx : *Livor multis absterget mala.* Et non solum sunt erudiendi pueri ignorantiam expulsionem, sed etiam morum informationem. De prima eruditione exemplum Prov. iv, in Salomone loquente de seipso : *Ego, inquit, fui filius patris mei tenellus et unigenitus coram matre mea, et docebat me, atque dicebat : Suscipiat verba mea cor tuum.* De alia legitur Job i : *Qui ab infantia docuit filium suum timere Deum, et abstinere ab omni peccato.*

### CAPUT II.

*Quod negligentia parentum circa hanc eruditionem multum est reprehensibilis.*

Negligentia parentum circa custodiam et eruditionem filiorum valde reprehensibilis est quod potest multipliciter ostendi. Et primo per diligentiam quam habent circa res viles : diligentes enim sunt circa pecora sua custodienda, et opportuno tempore edomanda. Cariores videntur habere multi porcos suos, quam filios. Dixit Cæsar Augustus de Herode, qui proprios filios suos occiderat : *Mallet esse porcus Herodis, quam filius*; quia, cum ipse sit porcus, pascit porcos, et filios occidit. Quodammodo filios occidunt qui defectu custodiæ et disciplinæ eos perire permittunt. Secundo, potest idem ostendi per hoc quod ad diligentiam circa custodiam et eruditionem filiorum multum incitat natura. Naturalis est dilectio parentum in filios, ex qua dilectione sequi debet et eorum custodia et eruditio. In arboribus mittit truncus ad ramos humores, unde nutriuntur et augentur; ad custodiam, rami et fructus cortice operiuntur : aliqui etiam fructus non solum corticis sed etiam testæ operimentum habent. In animalibus brutis naturalis est amor ad fœtus suos, et habent curam de eorum custodia et eruditione. Gallina ut pullos suos custodiat, *sub alis suis eos congregat*, juxta verbum Salvatoris, Matth. xxiii. Aquila provocans ad volandum pullos suos, super

eos volitat. Ovem etiam docet natura ut lupum sibi nociturum æstimet, et eum fugiat. Tertio, potest idem ostendi per hoc quod ad eruditionem, et specialiter ad illam quæ fit per flagella, multum monet Scriptura. Prov. xxix : *Doce filium tuum, et refrigerabis te, et dabis delicias animæ tuæ.* Ibid. xxii : *Noli subtrahere a puero disciplinam : si enim percusseris eum virga, non morietur. Tu virga percutes eum, et animam ipsius de inferno liberabis.* Negligentia ista est verecunda, periculosa, damnosa et Deo multum exosa. Verecunda est : unde Eccles. xxii : *Confusio patris est de filio indisciplinato.* Culpa filii imputatur patri circa ejus eruditionem negligentem. Ibid. xli : *De patre impio queruntur filii, qui propter eum sunt in opprobrio,* scilicet propter defectum disciplinæ. E contrario diligentia patris circa filiorum disciplinam est ei gloriosa. Eccles. xxx : *Qui docet filium suum, laudabitur in illo.* Prov. x : *Gloria patris filius sapiens.* In eodem dicitur de docente filium suum : *In medio amicorum gloriabitur in illo.* Ibid. : *Doce filium tuum et operare in illo, ne in turpitudine illius offendas.* Turpitudine conversationis filii redundat in turpitudinem patris circa ejus eruditionem negligentem. Periculosa est negligentia ista. Prov. xiii : *Qui parcat virgæ, odit filium suum : qui autem diligit, instanter erudit.* Eccl. xxx : *Qui diligit filium suum, assiduat ei flagella, ut lætetur in novissimo suo.* Non amat pater inordinate filium suum, qui non amat in eo amplius quod valet amplius, ut scilicet amet amplius animam quam corpus : et qui non desiderat ei pretiosiora, scilicet sapientiam et virtutes. Pretiosior est sapientia divitiis. Prov. xvi : *Posside sapientiam, quia auro melior est.* De virtutibus dicit Augustinus quod sunt vel ambiendæ, vel abjiciendæ. Plus debent parentes desiderare filiis cœlestis partis hereditatem, quam suam : sicut pater habet a Deo filium, sic debet eum nutrire et erudire ad Dei servitium, I Paral. ult. : *Quæ de manu tua accepimus, dedimus tibi.* Honor conjugum est quod filium cum Deo communem habeant, ut qui est filius eorum secundum carnem, sit Dei filius per gratiam. Augustinus : « Bonum prolis est, ut qui geniti sunt filii sæculi, generentur filii lucis. » Plus debent amare in filiis quod sunt filii Dei, quam quod sunt filii eorum, et quod boni sint, quam quod sunt. Non

sunt necessarii Deo homines impii. Eccl. xv : *Non concupiscit Deus filiorum infidelium multitudinem, et inutilium.* Ipsi, si sunt damnandi, bonum esset si nati non fuissent. Ibid. xvi : *Ne jucunderis in filiis impiis, si multiplicentur : melior est enim unus timens Deum, quam mille filii impii : et melius est mori sine liberis, quam relinquere filios impios.* Non debent parentes gaudere si genuerunt filium gehennæ, quem coram toto mundo videntur duci ad patibulum infernale. Non plus de tali filio gaudere debent, quam si genuissent bufonem vel serpentem : unde, Luc. xxiii, dicit Salvator : *Filia Jerusalem, nolite super me flere, sed super vos ipsas flete, et super filios vestros : quoniam ecce venient dies, in quibus dicent : Beatæ steriles, et ventres qui non genuerunt, et ubera quæ non lactaverunt.* Plus videntur pueri indigere custodia et eruditione quam animalia irrationabilia : illa enim sibi nociva timent et fugiunt, et salutem suam appetunt ; pueri vero noxia cupiunt, et salubria negligunt. Manet columba super aquas, ut videns umbram accipitris eum fugiat. Cant. v, dicitur de columbis *quæ resident super fluentia plenissima.* Secundo, Hieronymus : « Aves cæteraque animalia in eadem pedicas retiaque non incidunt. » Item, *mittens lapidem in volatilia, dejiciet ea,* Eccl. xxi. Vix potest ita caute lapis accipi, et avibus projici, quin aves cognoscant et fugiant ; si projiciatur canis in aqua, natando tendit ad littus. Ista amore salutis facere videntur. Pueri vero se habent aliter unde Proverb. i : *Usquequo, parvuli, diligitis infantiam, et stulti quæ sibi sunt noxia cupient?* Periculosa est ignorantia in brutis et in hominibus : defectus enim cognitionis causa est captionis. Eccles. x : *Sicut pisces capiuntur hamo, et aves laqueo, sic homines capiuntur in tempore malo.* Piscis escam videt et non hamum, et capitur. Si hamum ut escam videret, non caperetur ; nec avis caperetur, si ita videret laqueum ut frumentum ; sic capiuntur a diabolo, qui considerant delectationem momentaneam, et non pœnam æternam, quæ inde sequitur. Gregorius : « Momentaneum est quod delectat, æternum autem quod cruciat ; » Isa. v : *Propterea captivus ductus est populus meus, quia non habuit scientiam.* Multum damnosa est negligentia circa eruditionem filiorum : bona enim quæ non agnoscuntur, non deside-

rantur, non quæruntur, non obtinentur; e contrario vero si agnoscantur, desiderantur, quæruntur et obtinentur. Magna bona, scilicet gr̄atiæ vel gloriæ, adultis a Deo vix dantur, nisi multum desiderentur. Augustinus : « Servat tibi Deus quod non vult cito dare, ut magna discas magnè desiderare. » Multum fructuosa est diligentia patris circa custodiam et eruditionem filiorum : vivens enim et moriens in filio docto lætatur, immo mortuus quodammodo in ipso vivit. Prover. xxxiii : *Qui sapientem genuit, lætabitur in illo : dolor vero patris filius stultus.* Ib. xxix, et Eccles. xxx, dicitur de docente filium in vita sua. *Vidit et lætatus est in illo, in obitu suo non est contristatus, nec confusus coram inimicis : reliquit enim defensorem domus contra inimicos, et amicis reddentem gratiam.* Ibid. : *Mortuus est pater, et quasi mortuus non est, similem enim reliquit post se.* Negligentia ista multum est exosa Deo, ut patet in Heli I Reg. iii : *Suscitabo adversum Heli omnia quæ loquutus sum super domum ejus, eo quod noverat indigne agere filios suos, et non corripuit eos.* Ibid. iv : *Mortui sunt in bello duo filii ejus, et ipse cecidit de sella retro, et fractis cervicibus expiravit.*

### CAPUT III.

*Quod principes de hac eruditione debent esse solliciti.*

Debent principes magis esse solliciti de filiorum eruditione, quia sapientia eorum poterit pluribus utilis esse qui habebunt se et populum regere. Sapiens : « Neminem magis deceet quam principem meliora vel plura noscere, cujus doctrina poterit omnibus subjectis prodesse. » De hac materia require primo lib. c. ii. Sapientiæ studium principi est valde necessarium ad vitandum otii periculum, et variarum occupationum, et habendum honestum solatium. Cum magnates labori corporali non intendant ut ceteri homines, necessaria est eis litterarum occupatio, sine qua frequenter erunt otiosi : quod est valde periculosum : *Multam enim multiam docuit otiositas,* Eccles. xxxiii. Seneca : « Olim sine litteris mors est : » Prov. xii : *Qui sectatur otium, stultissi-*

*mus est ; non solum stultus vel stultior : multoties enim habebunt vanas occupationes, si non habeant salubres. Præterea, cum spiritus rationalis nobilis sit, et ad delicias creatus, non potest esse sine delitiis, et si non habeat spirituales, volet habere carnales : ideo necessarium est ei solatium sapientiæ, de quo legitur, Sap. viii : *Intrans in domum meam, conquiescam cum illa : non enim habet amaritudinem conversatio illius, neque tædium convictus illius, sed lætitiā et gaudium.**

### CAPUT IV.

*Quod puerilis ætas optima est eruditioni et morum informationi.*

Cum, juxta verbum Salomonis, omni negotio tempus sit et opportunitas, tempus in quo fieri potest, et opportunitas in quo melius fit, eligendum est tempus opportunum filiis erudiendis et informandis in moribus. Puerilis vero ætas ad hoc est opportunior, ut patet ex multis scripturis, et adstrui potest variis exemplis. Legitur, Eccl. vi : *Fili, a juventute tua excipe doctrinam, et usque ad canos invenies sapientiam.* Libenter et cito intendendum est sapientiæ, et quia in brevi homo ibi proficit, et toto tempore vitæ suæ usque etiam ad canos ad proficiendum ibi invenit. Eccl. vi : *In opere ipsius exiguum laborabis, et cito edes de generationibus, idest de fructibus illius.* Ibid. vii, dicitur de filiis : *Curva illos a pueritia eorum.* Item xxx : *Curva cervicem ejus in juventute, et tunde latera ejus dum infans est, ne forte induret, et non credat tibi.* Quintillianus : « Ætas hominis tunc maxime formanda est cum simulandi nescia est, ac præcipientibus facilius cedit : frangitur enim citius quam corrigas qui in pravum duraverit. » Joan. ult., monet bis Dominus ad pascendum agnos, semel monens ad pascendum oves, innuens multum esse intendendum juvenum eruditioni, et morum informationi. Facilius impressionem recipit mollis cera, et facilius informatur in bonis moribus ætas tenera. Flexibilior est virgula trabe, et dirigi potest. In juventute bruta docentur, domantur, et domesticantur. Thren. iii : *Bonum est viro cum portaverit jugum ab adolescentia sua.*

## CAPUT V.

*Quod multa bona sequuntur ex hoc quod aliquis ab adolescentia portat jugum Domini.*

His qui jugum Domini ab adolescentia tollunt, multa bona proveniunt, de quibus septem ponere sufficiat. Primum est quod bonitas profundius infigitur, cum inveniatur subjectum magis tenerum. Philosophus : « Sapiunt vasa quicquid primum acceperint. » Poeta :

Quo semel est imbuta recens servabit odorem Testa diu.

Secundum est quod servitium Deo in adolescentia exhibitum gratius est illi (unde Joannem Evangelistam specialiter dilexit, quia ad ejus servitium adolescens venit) quam illum qui in senectute hoc facit : adolescens enim offert Deo de meliori vitæ suæ, de flore, de vigore suo, senex vero de fæce : ideo timere debet ne de fæce inferni bibat, secundum illud Psal. LXXIV : *Fæx ejus non est exinanita, bibent omnes peccatores terræ.* Adolescens offert ei simillam mundissimam, senex vero offert ei furfur. Ipsi senes offerunt ei spicas corrosas cum Cain venientes ad Dei servitium in senectute ; diabolo et mundo, tamquam dominis quod pulchrius est et melius de vita sua primo offerunt, reliquias vero, et id de quo mundus non curat, Deo dare volunt, cum tamen electa velit Deus sibi offerri. Num. XVIII : *Omnia quæ offertis ex decimis, et in donaria Domini separabitis, optima et electa cuncta erunt.* Eccl. XIV : *Dignas Deo offer oblationes.* Offerenti quod deterius est, dicitur Malach. I : *Offer illud duci tuo, si placuerit, ac susceperit faciem tuam.* Ibid. : *Maledictus qui habet masculum in grege, et votum faciens offert Deo debile, quia rex magnus est etc.* Tertium est, jucunda facilitas assuefactionem sequens. Sap. I : *Optima forma vivendi assumenda est, quam jucundam reddet assuetudo.* Quartum est, securitas in vita et in morte quod non est bonum modicum. Proverb. XXV : *Secura mens quasi juge convivium.* De securitate in vita dicit Seneca : « Pulchrum est ante mortem consummare vitam, deinde expectare secure reliquam temporis partem. » Incertus de salute

sua moritur, qui in fine vitæ suæ pœnitent. Augustinus : « Si quis positus in ultima necessitate voluerit accipere pœnitentiam, et accipit, et hinc vadit, fateor vobis, non ei negamus quod petit, sed quod secure exeat, non præsumimus : pœnitentiam possumus dare, securitatem vero non. » Qui ab adolescentia Domino servierunt, securi de salute sua decedunt quod non est modicum bonum. Gregorius : « Initium retributionis est in habitu securitas mentis. » Quintum est majoritas præmii. Habet Deus unde melius remuneret eos qui diutius sibi servierunt ; et licet salvetur qui tarde convertitur, si convertitur vere, tamen in domo Patris cœlestis mansiones multæ sunt. Sextum est evitatio, vel minoratio cruciatus purgatorii : licet ille salvetur qui vere in senectute ad Dominum convertitur, tamen salvus erit *quasi per ignem*, I Cor. III. Gravius est multum ignis purgatorii. Augustinus : « Miro modo gravius est ignis ille, licet non sit æternus : exsuperat enim omnem pœnam, quam aliquis in hoc mundo perpressus est. »

## CAPUT VI.

*Quod multa mala sequuntur ex hoc quod aliquis ab adolescentia portat jugum diaboli.*

E contrario illi multiplex malum evenit, qui jugum diaboli ab adolescentia sua portaverit : primum est quod obstaculum gratiæ recipit : secundum quod naturalia bona amittit, vel consumit : tertium amissio opportuni temporis : quartum malum est praviæ consuetudinis. Qui in adolescentia sua male agit, in terra spinas serit, quam spinis purgare debuit, spinas, inquam, vitiorum ; ligna madefacit, quæ accendere intendit. Cum aqua igni sit contraria, difficile ignem ligna vel candelæ suscipiunt, quæ habent aquam, aqua enim resistit ; sic malitia si primo adolescentem occupaverit, bonitati resistit. Non est ponenda primo immunditia in vase, in quo debet quis pretiosum liquorem ponere. Non est verisimile quod Deus in vase sordido, ubi immunditia diu fuit, balsamum gratiæ suæ adeo libenter ponere velit, sicut in vase in quo immunditia nunquam fuit. Habent pueri virtutes naturales, scilicet virginitatem, innocentiam, humilitatem, propter quas talium



dicatur esse regnum cœlorum. Matth. xvi, illorum scilicet qui habent per gratiam, quæ parvuli per naturam. Luc. xviii : *Quicumque non receperit regnum Dei ut puer, non intrabit in illud.* Facilius bonis terrenis ditari potest, qui habet multa bona a parentibus sibi dimissa, quam qui nulla habet. Hæ virtutes naturales peccando amittuntur, vires etiam naturales peccato corrumpuntur : peccatum enim ignis est usque ad consumptionem devorans, et omnia eradicans germina. Job xxxi : *Magnum est damnum amissio temporis.* Tempus enim est res valde pretiosa. Bernardus : « Nihil pretiosius est tempore : sed, heu, ab homine nihil vilius reputatur. » Hæc pretiositas ex hoc apparet quod hora una modica cum Dei adjutorio potest aliquis a debito mortis æternæ liberari, gratiam acquirere, et regnum cœlorum promereri : propter hoc tempus diligenter esset servandum. Eccl. xiv : *Fili, conserva tempus* ; Ibid. xxiv : *Particula diei bonæ non te prætereat.* Maxime vero servandum est tempus opportunum negotio maxime necessario, scilicet negotio salutis. O quantum gauderent qui in inferno sunt, si una hora temporis eis concederetur, in qua Dei gratiam acquirerent, a debito mortis æternæ liberarentur, et regnum cœlorum promererentur ! Malum prævæ consuetudinis multum timendum est, quia non est modicum : consuetudo enim mala est quasi catena ferrea qua aliquis ligatur, et ligatus a diabolo tenetur. Augustinus in libro *Confess.* : « Suspirabam ligatus non ferro alieno, sed mea ferrea voluntate. Velle meum tenebat inimicus ; et inde mihi catenam fecerat, et constrinxerat me, quippe ex voluntate perversa est facta libido, et dum consuetudini non resistitur, facta est necessitas. » Prov. v : *Iniquitates suæ capiunt impium, et funibus peccatorum suorum quisque constringitur.* De hoc servit diabolo qui peccat quod opere suo malo se ligat, et ligatum tradit se diabolo cruciandum. Difficile consuetudo mala relinquitur, cum sit quasi natura.

Naturam expellas furca, tamen usque recurret.

Prov. xxii : *Proverbium est : Adolescens juxta viam suam, etiam cum senuerit, non recedet ab ea.* Jerem. xiii : *Si mutare potest Æthiops pellem suam, et pardus varietatem suam, et vos poteritis benefacere, cum didiceritis malum.* In resuscitatione

Lazari, quo figuratus est qui assuetus est peccatis, Dominus fremuit, lacrymatus est, clamavit : quia *difficile surgit quem moles malæ consuetudinis premit*, ut dicitur super Joan. xi. Consuetudo mala est velut languor inveteratus, qui difficile curatur. Eccl. x : *Languor prolixior gravat medicum* ; Ibid. xviii : *Ante languorem adhibe medicinam.* Seneca : « Minus negotii habet medicus, si ad recens vitium adhibetur. » Sequuntur teneri et rudes recta monstrantem. Non potuerunt discipuli expellere malignum spiritum a quodam, in quo ferat ab infantia Matth. ix. Basilius : « Sicut non potest quis dediscere linguam maternam, sic vix peccati longam consuetudinem. » Consuetudo mala est sicut gutta quæ subintravit ossa, quæ vix expellitur Job xx : *Ossa ejus replebuntur vitii adolescentiæ.* Difficile trahuntur ad salutem, qui vi consuetudinis trahuntur ad damnationem. Prov. xxiv : *Eos, qui trahuntur ad interitum, liberare non cesses.* Sicut difficile est retinere equum, qui inchoavit cursum suum, sic difficile est eum corrigere qui assuetus est malis. Jerem. viii : *Nullus est qui agat penitentiam super peccato suo dicens, quid feci? Sed omnes conversi sunt ad cursum suum, quasi equus cum impetu vadens ad prælium.* Negligentiam addiscendi in adolescentia sequitur verecundia. Seneca : « Turpis et ridiculosa res est elementarius senex, juveni parendum, seni vertendum, » Eccl. xxv : *Quæ in juventute tua non congregasti, quomodo invenies in senectute tua?* Negligentiam addiscendi impropere Apostolus quibusdam Judæis, Heb. v, dicens : *Cum deberetis esse magistri secundum tempus, rursus indigetis ut doceamini quæ sint elementa exordii sermonum Dei.*

## CAPUT VII.

*Quod negligens in adolescentia sua informationem in moribus valde est culpabilis.*

Qui in adolescentia informationem in bonis moribus negligit, male se habet ad Deum, male se habet ad Angelum sibi a Deo ad custodiam deputatum, et male ad seipsum. Ad Deum, cum Deus ipsum sibi habitationem facere cupiat, ipse vero diaboli habitatio esse prælegit. Apoc. vii : *Ego sto ad ostium, et pulso, si quis audierit*



*vocem meam, et aperuerit mihi januam, intrabo etc.* Proverb. viii : *Deliciæ meæ esse cum filiis hominum.* Item, Deus ab eo pasci quærit, ipse vero in esca ejus fel apponit. Pascitur Deus puritate nostrorum operum. Cant. i : *Qui pascitur inter lilia.* Fel est amaritudo peccati. Item, ipse bona quæ a Deo recipit, Deo contempto, in servitium inimici ejus expendit. Ad Angelum male se habet, qui a tempore nativitatis ejus custodiæ intendit, propter quam in hac valle miseræ moram facit ; ipse vero consiliis et exhortationibus ejus non acquiescit, reverentiam non exhibet, sed quod coram uno gubernatore facere non auderet, coram Angelo facere audet. Bernardus : « In quovis diversorio, in quovis angulo, reverentiam exhibe Angelo tuo, nec audeas ipso præsentem quod me præsentem non auderes. » Ad seipsum male se habet, quoniam plus vult esse malum quam bonum, diaboli servum quam Dei filium, in statu latronis quam in statu regis. Qui in mortali est, in statu latronis est, infernali patibulo adjudicatus ; qui habet gratiam, in statu regio est ad regnum cœlestem inunctus.

## CAPUT VIII.

*De repromissione nequissima quæ hujus negligentia causa existit.*

Item notandum quod vitæ longæ repromissio multoties est causa quod adolescens non serviat Deo. Eccles. xxix : *Repromissio nequissima multos perdidit.* Hæc repromissio est nequam, quia repromittens sibi usurpat quod est Dei, scilicet disponere de tempore futuro. Act. i : *Non est vestrum nosse tempora, vel momenta, quæ Pater posuit in sua potestate.* Bernardus : « Quid de futuro, miser, temerarie præsumis, tamquam Pater tempora et momenta in tua, et non magis sua posuerit potestate ? » Nequior est : quia cum tempus infiniti valoris sibi a Patre cœlesti concessum fatue expenderit in contumeliam Dei, damnum cui et scandalum proximi, tamen præsumit quod Deus multum temporis ei daturus sit. Nequissima vero est : quia tempus dandum in Patris contumelia expendere proponit. Talis fatuissime agit, cum hora mortis incerta sit. Matth. xxiv : *Veniet Dominus servi illius in die qua non sperat ;*

XXVII.

Luc. xii : *Qua hora non putatis, filius hominis veniet ;* Eccl. ix : *Nescit homo finem suum.* Plures moriuntur ante senectutem, quam senes ; plures pelles agnorum feruntur ad forum, quam ovium. Secundum Augustinum : « Deus promittit pœnitenti peccatorum remissionem, sed nulli promittit crastinum diem. » Seneca : « Juvenes mortem habent a tergo, senes ante oculos : non minus timendus est hostis qui est a tergo, quam qui est ante oculos. » Præterea cum majoris rei bonitas sit magis optanda, et pravitas magis timenda, si certum esset quod vita futura esset longa, magis esset providendum quod esset bona. Augustinus : « Quid differs in crastinum, vita longa erit, ipsa longa bona sit : si longa erit, melius bona erit. » Infinitos diabolus hoc mendacio duxit in infernum : promittebat enim quod in matura ætate Deo servirent, et ipsi sperabant se aliquando Deo servituros, nunc sunt in inferno nunquam pœnitentiam facturi. Væ illis qui adhuc patri mendacii tale mendacium dicenti, credunt. Qui Deum contemnit in juventute, multum potest timere ne ipse contemnatur a Deo in senectute. Isa. xxxiii : *Væ qui spernis, nonne et ipse sperneris ?* Augustinus : « Hac justa animadversione percussus impius, ut moriens obliviscatur sui, qui dum viveret, oblitus est Dei. » Multum timere potest qui tanto tempore indignum se fecit Dei adjutorio, sine quo bonam vitam inchoare non potest. Prov. i : *Quia vocavi, et renuistis, ego quoque in interitu vestro ridebo.*

## CAPUT IX.

*De his quæ requirenda sunt in electione magistri disponentia ad hoc ut bene doceat.*

In magistro qui elegitur, quinque sunt requirenda, scilicet mens ingeniosa, vita honesta, humilis scientia, eloquentia, docendi peritia. Mens ingeniosa, ut inter ea quæ doceri possunt, sciat eligere meliora, nec totum ex alienis scriptis accipiat, sed aliqua inveniat. Sapiens : « Illum eruditorem elige, quem magis mireris in suis quam alienis. Nil magnificum docebit, qui a se nil didicit, falsoque magistri nuncupantur auditorum narratores, ac sic audiendi sunt ut quirecensent rumores. » Requirenda est vita honesta ; quia « Turpe

est doctoricum culpa redarguit ipsum. » Sunt qui in discipulis suis puniunt quod ipsi faciunt, super quo conqueritur Augustinus de magistris suis in libro *Confessionum* dicens : « In scholam datus sum ut litteras discerem, ludere delectabar, et in nos vindicabatur ab his qui talia agebant : sed majorum nugæ negotia vocantur, puerorum autem cum sint, a majoribus puniuntur. » Multum juvat vita honesta doctrinam. Seneca : « Plus viva vox tibi et convictus, quam oratio proderit. Homines amplius oculis, quam auribus credunt. Longum est iter per præcepta, breve et efficax per exempla. » Idem : « Illum elige auditorem, quem magis imiteris cum videris, quam audieris. » Verecundum est magistro bene docere, et male vivere : quasi enim lucernam defert ante se, qua immunditiam suam aliis ostendit. Prov. vi : *Mandata lucerna est, et lex est lux.* Litteras propriæ damnationis publicat. Rom. ii : *In quo alium judicas, teipsum condemnas.* In libro Prosperi : « Bene loqui, et male vivere, nil aliud est quam se sua voce damnare, seipsum confundere. » Hieronymus : « Non confundant opera tua sermonem tuum ; » Eccles. xxix : *Confirma verbum, et fideliter age cum illo.* Bonum opus verbum confirmat, malum vero illud infirmat. Vita mala suspectam reddit doctrinam. Quis credat dicenti sibi cibum aliquem esse venenatum, si eo vidente ipsum sumat ? Delectatio prohibita est quasi venenata. Quis credat alicui asserenti viam aliquam latronibus plenam, et transientes per eam spoliandos esse et jugulandos, si, post illam assertionem, viam illam sibi eligat ? Sicut exemplum boni operis plus aedificat quam sermo, sic exemplum mali operis magis corrumpit. Hieronymus : « Proclivis est malorum æmulatio : unde græca historia narrat Alexandrum orbis dominatorem Leonidis pedagogi sui non potuisse vitis carere in incessu et moribus, quibus adhuc parvulus infectus fuerat. » Indignum est cœlestem doctrinam esse in vase immundo. In Psal. xlix, peccatori dixit Deus : *Quare tu enarras justitias meas ?* Parum proficit ejus doctrina, cui repugnat vita. Augustinus in libro *De doctrina christiana* : « Non obedenter auditur qui seipsum non audit. » Gregorius in *Moral.* : « Cum imperio docetur, cum prius agitur quod dicitur. » Prov. v : *Bibe aquam de cisterna tua ;* et subditur : *Et deriventur*

*fontes tui foras.* Requirenda est humilis sapientia. Poeta :

Quod temere novit, nemo docere potest.

Hieronymus : « Multo tempore disce quod doceas. » Idem super Eccles. : « Pythagoricorum disciplina fuit tacere per quinquennium, et postea eruditos loqui : » Eccl. xviii : *Antequam loquaris, disce.* Ibid. xxxii : *Audi tacens, et pro reverentia accedet tibi gratia :* Prov. xviii : *Qui respondet prius quam audiat, stultum se esse demonstrat.* Socrates cuidam interroganti quomodo posset optime discere. Si nil, inquit, dixeris, nisi quod bene sciveris. Humilis debet esse scientia : illa enim quæ inflat, non est pura, nec vera scientia : habet enim multos errores adnexos, quia superbia meretur illudi, ut ait Augustinus, sed scientia humilis vera est. Prov. xi : *Ubi humilitas, ibi sapientia.* Superbus multa credit scire quæ nescit. I Cor. viii : *Si quis existimat se aliquid scire, nondum cognovit quemadmodum oporteat eum scire.* Scientia inflans, scientia est diabolica, a qua etiam dæmones nominantur. Dæmon enim sciens interpretatur. Jac. iii : *Non est ista sapientia desursum descendens, sed terrena, animalis, diabolica.* Qui de magnitudine scientiæ inflatur et gloriatur, fatuissime agit, cum gloriatur de hoc quo est magnus dæmon, sive sciens. Eloquentia requirenda est, unde dicitur in *Prolog. Rhet.* : « Sapientia sine eloquentia parum prodest. » Cicer : « Nihil est quod male narrando non possit depravari. » Juvat ad eloquentiam natura, conscientia, et gestus. Natura, quia, sicut dicit Sapiens : « Philosophia simulari potest, sed eloquentia non potest. » Conscientia : quia, sicut dicitur Eccles. vi : *Lingua eucharis, idest grata, in bono homine abundabit.* Seneca : « Oratorem te puta, si tibi ipsi ante omnes quod oportet persuaseris. » Sapiens : « Melius aliis suadebit, qui prius sibi suaserit. » Gestus, unde Sapiens : Eloquentiæ ornamenta in pronuntiatione apta, in convenienti corporis motu consistit. » Simplex debet esse eloquentia. Seneca : « Oratio, quæ veritati dat operam, incomposita esse debet, et simplex. » Item : « Oratio quæ in sanandis mentibus adhibetur, descendere in nos debet. » Item : « Aliæ artes ad ingenium pertinent, hic animi negotium agitur : non quærit æger medicum elo-

quentem, non erit quare gratuletur, si inciderit in medicum disertum. » Augustinus in lib. *De doctrina chr.* : « Quid prodest clavis aurea, si aperire quod volumus non potest? et quid obest lignea, si potest quando nil quærimus nisi patere quod clausum est? » Peritia docendi requirenda est, ad quam quinque pertinent, scilicet apertio, brevitatis, utilitas, suavitas et maturitas. Aperta debet esse doctrina ut ab omnibus intelligatur. In lib. Prosperi *De vita contemplativa*, dicitur : « Tam apertus debet esse sermo docentis, ut ab intelligentia sua nullos, quamvis imperitos, excludat. » Utendum est plano sermone ut nummis, ubi est publica forma, usitatis tutius utimur. Prov. xxix : *Doctrina prudentum facilis*; Eccl. iv : *Ne abscondas sapientiam tuam in decore ejus*. Ad hoc quod doctrina sit manifesta, multum valent exempla. Sapiens : « Lucidissimum genus docendi est exemplorum subditio : » et hoc multum est utile minus capacibus. Sapiens : « Pars, est prima prudentiæ ipsum, cui præcepturus es, parem existimare : » Matth. xxv : *Unicuique secundum suam virtutem*. De his qui simplicibus ingerunt subtilia, dicitur Isa. xix : *Confuidentur qui operabantur limum, plectentes et retexentes subtilia*. Laudabilis est brevitatis in docente si sit moderata. Hieronymus *Supra Gegem.* : « Nimia prolixitas onerat sensus legentium, et immoderata brevitatis præscindit studiorum desiderium. » Est autem brevitatis, ut dicitur in ipsa *Rhetorica*, eum nullum nisi necessarium assumitur verbum : unde bene, Eccl. xxi : *Verba sapientum statera ponderabuntur*. Augustinus in lib. *De doct. christ.* : « Sicut ingratus est qui incognita obnubilat, sic onerosus est qui cognita inculcat. » Poeta :

Omne supervacuum pleno de pectore manat.

Utilitas requiritur in doctrina. Isa. xlviii : *Ego Deus tuus docens te utilia*. Seneca : « Non multis opus est, sed efficacibus. » Suavitas laudabilis est in doctrina. Eccl. xl : *Tibiæ et spalterium suavem faciunt melodiam, et super utramque lingua suavis*. Ad suavitatem juvat eloquentia, valet etiam ad eam doctorum bonitas vel utilitas. Prov. xiii : *Doctrina bona dabit gratiam, supple : ipsi doctori et*

auditori. Valet etiam ad idem varietatis. In ipsa *Rhetorica* : « Narrationem magnopere varie oportet narrari, quoniam in omnibus rebus similitudo mater est satietatis. » Sapiens : « Hoc nobis sæpe accidit, ut cum optimis satiati sumus, varietas tamen nobis ex vilioribus grata sit. » Item Sapiens : « Gaudet natura varietate. » Maturitas, idest mediocritas inter velocitatem et tarditatem, laudabilis est in doctrina. Seneca : « Inopia verborum et exilitas minus intentum faciunt auditorem interruptæ tædio tarditatis : facilius tamen incidet qui expectatur, quam qui prætervolat. » Idem : « Philosophi pronuntiatio, sicut vita, debet esse composita. Nihil ordinatum est quod præcipitur et properat, æque stillare eum volo et currere. » Idem : « Dicendi celeritas philosophiæ non satis decora est, quæ ponere debet verba, non projicere. » Tertio debet doctor in doctrina intendere, scilicet ut instruat, placeat, et ad bonum moneat. Augustinus in lib. *De doct. christ.* : « Dixit quidam eloquens, et verum dixit, ita debere dicere eloquentem, ut doceat, ut delectet, ut flectat; docere necessitatis est, delectare suavitatis, flectere victoriæ. Docendi necessitas in rebus est constituta, reliqua duo in mundo quod dicimus. Qui dicit, quamdiu non intelligitur, non se existimet dixisse quod vult ei, quem vult docere; si vero intelligitur, quocumque modo dixerit, dixit. Quod, si delectare vult eum cui dixit, aut flectere, interest quomodo dicat. Sicut est autem, ut teneatur ad audiendum, delectandus auditor, ita flectendus, ut moveatur ad agendum : et sicut delectatur, si suaviter loquaris, ita flectetur, si amet quod polliceris, timeat quod minaris, oderit quod arguis. » Item Augustinus in eod. : « Quis audeat dicere adversus mendacium, in defensoribus suis inermem debere consistere veritatem, ut scilicet illi qui res falsas persuadere conantur, noverint auditorem vel benevolum, vel intentum, vel docilem præmio facere, isti autem non noverint? Illi falsa aperte, breviter, verisimiliter, isti et vera sic narrent, ut audire tædeat, intelligere non pateat, credere postremo non libeat? Illi fallacibus argumentis veritatem oppugnent, asserant falsitatem : isti nec vera defendere, nec falsa valeant refutare. »

## CAPUT X.

*De his quæ disponunt ad hoc quod aliquis bene addisecat.*

Dieto de his quæ disponunt ad hoc quod aliquis laudabiliter doceatur, vel doceat, dicendum est de his quæ disponunt ad hoc quod aliquis bene addisecat; inter quæ bene juvat quod volens addiscere bene vivat. Augustinus: « Errat quisquis veritatem se cognoscere posse putat, si adhuc nequiter vivat; » *Eecl. 1: Fili, concupiscens sapientiam, serva justitiam et Dominus præbebit tibi eam; Ibid. xxvii: Volatilia ad sibi similia conveniunt, et veritas ad eos qui operantur eam, revertetur.* Qui male vivunt, quasi spurcilia manuum suarum, lumen divinæ sapientiæ a se repellunt. Susceptionem sapientiæ impediunt vitia, sicut ostendi potest discurrendo per ea. Impedit hoc superbia: unde Augustinus in lib. *Confess.* loquens Deo de se, secundum pristinum statum: « Tumore meo separabar a te, et acies mea inflata non sinebat me videre verum; » Gregorius de superbis: « Tanto a longe a luce Dei sunt, quanto apud se humiles non sunt; » Bernardus: « Superbo oculo veritas non videtur sicut patet. » De invidia dicitur, *Sap. vi: Cum invidia tabescente iter non habebis, quoniam talis homo non erit particeps sapientiæ.* Invidi sunt ut noctuæ, lucem honorum operum odientes, et tenebrosa opera amantes *Job v Per diem incurrent tenebras.* Opera bona proximi sunt ut candelæ lucem boni exempli nobis ministrantes: sed invidi candelis istis oculos sibi eruunt. De ira dicit Sapiens: « Impedit ira animum, ne possit cernere verum; » in *Psalm. xvii: Supercecidit ignis, ignis, inquam, iræ: et non viderunt solem.* Ira ita excæcat, sicut ursus dicitur excæcari ad pelvim ardentem. De odio patet quod lumen sapientiæ impedit. Bernardus: « Amor, vel odium veritatis nescit iudicium. » De pigritia idem patet quod hominem dormire facit, et quasi oculos ei claudit. *Proverb. xix: Pigredo immittit soporem; Ibid. xxiv: Usquequo, piger, dormies? Pigrum mittit Salomon ad formicam, a qua doceatur, ut, verecundia talis magnæ pigritiæ, a sommo excitatus, sapientiam discat. Pro. vi: Vade piger, ad formicam et con-*

*sidera vias ejus et disce sapientiam.* De vitio gulæ idem patet Hieronymus: « Venter pinguis non gignit tenuem sensum. » Excessum cibi et potus sequuntur fumositates, quæ lucem sapientiæ impediunt. De ebrietate hoc planum est, quæ hominem quasi insanum reddit. *Oseæ v: Cæperunt furere principes a vino; Seneca: « Nihil aliud est ebrietas, quam voluntaria insania; » Bernardus: « Vinum modice sumptum, intellectui videtur acumen inferre: non modice vero potatum, rationem perturbat, intellectum hebetat, memoriam enervat. »* De luxuria idem patet, quæ hominem multum carnalem efficit: hæc Salomonem infatuavit. Fornicatio est unum eorum quæ cor auferunt, id est sensum, *Osea ii.* Amaus aliquam fatuo amore, credit eam esse pulchram, quam omnes alii sciunt esse turpem. De vitio cupiditatis et avaritiæ patet idem. Cupidi enim et avari habent oculos velatos sollicitudine temporalium. Excæcatus est Tobias calidis stercorebus hirundinis: sic ardens amor ad temporalia, quæ Apostolus arbitratus est ut stercora, oculos cordis excæcat. Augustinus in lib. *Confess.*, loquens Deo: « Spargis pœnales cæcitates super illicitas cupiditates. » Secundo, multum valet ad hoc quod aliquis bene addisecat, ut oratione lectionem, vel studium, præveniat. Cum sapientia donum Dei sit, non debet aliquis attentare violentia studii, Deo irrequisito, eam acquirere. *Jac. i: Si quis indiget sapientia, postulet eam a Deo; Augustinus: « Oratione melius solvuntur dubia quam inquisitione alia. »* Tertio, humilitas. *Matth. xi: Revelasti ea parvulis; Psal. cxviii: Declaratio sermonum tuorum illuminat, et intellectum dat parvulis.* Specialiter humilitas necessaria est volenti addiscere Scripturam sacram propter humilem modum loquendi quem habet, qui a superbis contemnitur. Augustinus: « Scriptura sacra invitatur omnes humili sermone. Ideo (loquens de se secundum statum ante conversionem suam): « Visa est mihi, inquit, Scriptura sacra indigna quam Tullianæ dignitati compararem. Tumor enim meus refugiebat modum ejus; » Idem: « Mira profunditas eloquiorum tuorum, quorum ante nos superficies blandiens parvulis, sed mira profunditas, Deus meus. » Ad humilitatem volentis addiscere pertinet ut ignorantiam suam fateri non erubescat, et quod nescit, humiliter quærat. Augustinus: « Non



est erubescendum homini confiteri se nescire quod nescit, ne dum se scire mentitur, nunquam scire mereatur; » Idem : « Nulla res magis memoriæ mandanda est, quam illa verborum loquutionumque genera quæ ignoramus, ut cum peritior occurrerit quæri possint. » Item, ut ab omni parte addiscat. Sicut qui ab omnibus accipiunt, fiunt ditiores, sic qui ab omnibus addiscunt, fiunt sapientiores. Clemens Papa : « Nullus episcopus, propter opprobrium senectutis vel nobilitatem generis, a parvulis etiam, vel minimis eruditis, inquirere negligat, si quid forte veritatis est, atque salutis; » Seneca : « Quid stultius est quam quæ non didiceris, nolle etiam a malis addiscere? » Augustinus in lib. *De doctrina christiana* : « Audiuntur utiliter qui utiliter non agunt, sua enim quærere student, sed sua docere non audent. Qui solum a bonis volunt addiscere, similes sunt illis qui solum in scyphis argenteis vel aureis volunt bibere, nec tamen in saccis vel purpureis vel aliter pretiosis frumentum recipitur, quorum fames vel sitis miseranda non est. » Quarto, valet ad hoc timor Dei. Prov. vi : *Timor Domini principium sapientiæ*. Timor addiscentem declinare facit a malo scilicet ab errore, a discendi præsumptione, a sinistra intentione, a negligentia implendi quod addiscitur. Eccles. vii : *Qui timet Deum, nihil negligit*. Si addiscenti desit timor Dei quod legit vel audit, ad alios refert, non vult secundum ea se dirigere, sed potius alios. Prudenti verbum Domini lucerna est pedibus ejus non aliorum. Proverb. xv : *Vir prudens dirigit gressus suos et imprudens, neglectis propriis, dirigit alienos*. » Quinto, mansuetudo, qua auctoritati sacræ Scripturæ credatur. Augustinus in lib. *De doctrina christiana* : « Mitescere opus est pietatis, neque contradicere divinæ Scripturæ seu intellectæ, seu non intellectæ, sed cogitare potius et credere id esse melius et verius quod ibi scriptum est, etiam si lateat, quam id quod per nosmetipsos sapere possumus. » Sexto, diligentia quæ est tamen in correctione librorum quam in indagatione Scripturarum. De primo dicit Augustinus in lib. *De doctrina christiana* : « Codicibus emendandis primitus debet invigilare solertia eorum, qui Scripturas noscere desiderant. » De secundo dicit idem Augustinus in eodem libro : « Erit divinarum Scripturarum solertissimus indagator,

qui prius totas legerit, notasque habuerit, et si nondum intellectu, jam tamen lectione dumtaxat eas quæ vocantur Canonice : nam ceteras securius leget fide veritatis instructus. » Cavenda est nimia velocitas in transcurrento : animus enim transcurrentis non videt latentem sententiam. Sapiens : « Nihil magnum non cito effici voluit, præposuitque cuilibet pulcherrimo operi difficultatem. » Cavenda est curiositas, quæ est non magnæ utilitati nimiam operam impendere. Seneca : « Quid te torques in illa quæstione quam utilius est contempsisse quam solvere? » Cavenda est instabilitas in legendo. Seneca : « Vide ne lectio actorum et omnis generis voluminum habeat aliquid vacuum et instabile. » Cavenda est etiam rixa, quæ peritos in arte logicali multum solet vexare; Augustinus : « Cavenda est rixandi libido, et puerilis quædam ostentatio adversarium decipiendi; » Il Tim. ii : *Noli verbis contendere*; Augustinus : « Verbis contendere est non curare quomodo error veritate vincatur, sed quomodo tua dictio dictioni alterius præferatur. » Septimus modus quantum ad ordinem, affectum, intentionem. Hugo de Sancto Victore : « Scholares nostri aut nesciunt, aut nolunt modum congruum in addiscendo, et ideo multos quidem invenimus studentes, paucos vero sapientes. » Octavo, instantia studii. Sapiens : « Artium mater est instantia, noverca eruditionis negligentia est; » Petrus in *epistola Clementis* : « Ignorantia est mater omnium malorum, qua malitia et ignavia gignitur. » Nono, labor exercitii. Eccl. x : *Si refusum fuerit ferrum, et nunc prius si hebetatum fuerit, multo labore exacuetur*. Ferrum vocatur humanum ingenium quod otium obtundit, denigrat, rubiginat et consumit : usus vero exacuit, dealbat, climat et a corruptione rubiginis conservat. Hieronymus : « Otio ingenium hebetatur, et desidia est quasi quædam rubigo sapientiæ. » Utilis etiam est addiscendum humilis collatio et pacifica disputatio. Prov. xxiv : *Ferrum ferro acuitur, et homo acuit faciem amici sui*. Refert tamen in quibus doctrinis sensus discipulorum exerceatur, et maxime puerorum. Non enim exercendi sunt in fabulis poeticis et luxuriosis figmentis : unde Valerius Maximus refert quod Lacedæmonii libros Archeloci a civitate sua fecerunt exportari, eo quod parum verecundam ac pudicam arbitrarentur lectionem : nolue-



runt enim ea liberorum suorum animos imbui, ne plus eorum moribus obsesset, quam ingeniis prodesset. Isidorus in lib. *Sent.*: « Ideo prohibetur christianis poetarum fragmenta legere, quia per oblectamenta fabularum nimium mentem excitant ad incentiva libidinum. » Augustinus etiam, in lib. *De conf.*, peccata sua confitens, inter alia de hac inordinatione sic loquitur: « Tenere tunc cogebam Æneæ nescio cujus errores, oblitus errorum meorum, et plorare Didonem mortuam, quæ se occidit ob amorem, cum interea meipsum in his a te morientem, non a te amantem siccis oculis miserimus ferrem. Quid enim miserius misero non miserante seipsum? » Decimo quod laboret addiscens, ut quod addiscit, memoriæ infigatur. *Ecl.* xxxv: *Sapientiam scribe in tempore vacuitatis.* Scriptura est durable signum; sapientiam scribit, qui eam memoriæ infigit: « Non minor est virtus quam quærere, parta tueri. Quid prodest quod canis feram rapit, si eam statim dimittit? Aqua de facili impressiones recipit, sed hoc inutile est, quia eas non custodit. Scriptor lente scribit, tamen, quia quod scribitur, manet, in uno anno bibliam scriptam habet ad bene addiscendum, unde dispositus est homo ante, si habeat bonum ingenium, et bonam memoriam. Ingenium sapientiam invenit, memoria custodit. Si vero hæc desint, tarditatem ingenii supplere debet instantia studii: defectum vero memoriæ, crebra ruminatio et scriptura. Parum prodest unum istorum, si desit reliquum. Hieronymus: « Divinæ Scripturæ semper in manibus et jugiter in mente volvantur; » Idem: Divinas Scripturas sæpius lege, immo nunquam sacra lectio de manibus tuis deponatur. » Undecimo quod ad doctorem suum se bene habeat, familiaritatem cum eo habendo, eum diligendo, subjectum se ei exhibendo. *Ecl.* vii: *Si videris sensatum, evigila ad eum, et gradus ostiorum illius exerat pes tuus.* Duodecimo, ut de sapientia a Deo accepta non sit ei ingratus, sed datorem suum glorificet. *Ecl.* ult.: *Danti mihi sapientiam dabo gloriam.*

## CAPUT XI.

*Quomodo diligenter pueri in bonis moribus sunt informandi.*

Studiose et diligenter in bonis moribus

pueri sunt informandi: quia in puero est ætas mollis et apta regi. Ostendenda sunt ei Dei beneficia et mandata, juxta illud Deuter. vi: *Narrabis ea filiis tuis.* Docuit Tobias filium ab infantia timere Deum, et recedere ab omni peccato. Apostolus ad hoc monens Eph. vi, sic loquitur parentibus de filiis: *Educate eos in disciplina et correptione Domini; Glossa:* « Disciplina verborum. » Ad morum informationem pertinet coercitio a malo, et exhortatio ad bonum. Justitia correctoris sunt increpationes et comminationes, virgæ, ferulæ, quibus secundum Augustinum « imperitia debellatur, et prava cupiditas refrænatur. » *Sensus et cogitatio humani cordis in malum prona sunt ab adolescentia,* Gen. x. Ideo in pueris huic pravitati occurrendum est, ne in actum exeat, sed diversimode secundum puerorum diversitatem. Aliqui enim sunt habiles ad suscipiendam disciplinam, quos non oportet trahere, vel cogere, sed sufficit eos ducere. Alios vero oportet trahere vel cogere, et, si a principio profectus non apparet, non propter hoc est diffidendum. Seneca: « Initium eundi ad virtutes arduum est: quoniam hoc primo imbecillis et ægræ mentis est fornidare inexperta: itaque cogenda est ut incipiat, deinde non est acerba medicina, protinus enim delectat dum sanat; » Prov. xix: *Erudi filium tuum, et ne desperes. Multum potest usus assiduus;* Philosophus: « Usus assiduus, uni rei deditus; et ingenium et artem sæpe vincit; » Ethnicus: « Nihil assuetudine majus; » Bernardus *Ad Eugenium Papam:* « Quid non mutat consuetudo? quid non usui cedat? Primo aliquid videbitur intolerabile, deinde si assuescat, non adeo grave, postea vero leve, tandem etiam delectabile. » Præcedere debet disciplinam comminatio, sicut excommunicationem præcedit admonitio; et aliquando utilior est comminatio quam flagellatio, quia pueri timidi sunt: et ideo sola comminatione a suis voluptatibus coercentur. Eruditor puerorum nobilium magnam sollicitudinem et diligentiam debet habere circa eorum informationem: confusio est enim ei si indisciplinate se habeant. Plutarchus philosophus Trajani imperatoris instructor in quodam libello quem ei scripsit, sic ait: « Modestiam tuam olim non appetere principatum novi, quem tamen semper morum elegantia mereri studuisti; quo quidem tanto judicaris dignior, quanto a

erimine ambitionis judicaris remotior. Itaque fortunæ meæ, et tuæ congratulor virtuti, quod probe meruisti; alioquin me detrahentium linguis subjectum iri non dubito, cum et ignaviam imperatoris Roma non ferat, et sermo publicus delicta discipulorum in præceptores refundere soleat. Sic Seneca Neronis sui merito detrahentium linguis carpitur: adolescentium suorum temeritas in Quintilianum refunditur: et Socrates in pupillum suum fuisse elementior criminatur. Tu vero quoque quid vis, geres reetissime, si non recesseris a te. Si primo te composueris ad virtutem, recte tibi universa procedent. Politicæ constitutionis majores tibi vires exsculpsi, cui si obtemperas, Plutarchum habebis auctorem vivendi; alioquin præsentem paginam testem invoco, quod in perniciem imperii non perges, auctore Plutarcho. »

## CAPUT XII.

*Quomodo deridendum est illud proverbium stultorum : Sanctum juvenem futurum diabolum senem.*

Deridendum est illud detestabile proverbium stultorum, quo dicitur : Sanctum juvenem futurum diabolum senem. Differunt stultorum et sapientum proverbia. Stultorum proverbia sunt noxia, et raro contingentia; sapientum vero proverbia sunt utilia, et semper valent in pluribus veritatem habentia. Contingere potest quod pueri, in quibus apparuerunt bonæ conversationis initia, mali fiant vel societate prava, vel educatione remissa, vel severitate nimia. Bonitas enim eorum est modica, et quasi tenera et nondum firma; infirmis autem causa pusilla nocet. Aliquando vero in pueris non est vera simplicitas, vel bonitas, sed simulata, vel ob parentum vel magistri favorem, vel flagellorum timorem, quibus cessantibus, malitia quæ latebat, erumpit. Tullius : « Omnia ficta celeriter tamquam flosculi decidunt, nec quidquam simulatum potest esse diuturnum. Nemo personam fietam ferre diu potest; » Seneca : « Cito in malitiam recidunt, quibus veritas non subest : quæ autem ex solido nascuntur tempore, in melius proficiunt. » Ex virga recta speramus trabem rectam, licet virgula dum tenera est, torqueri possit, et fieri torta. Non est periti medici ex signis

bonis præsumere mortem infirmantis : nec sapientis et ex bono initio præsumere malum finem. Non est sapientis agricolæ ex zizania, quam in agro videt pullulare, frumentum sperare, nec zizaniam ex frumento. *Quæ seminavit homo, hæc et metet. Non colliguntur ex spinis uvæ, nec ex tribulis ficus.* Non est sapiens qui caput animalis quod aspicit, cognoscens esse asini, ex hoc præsumit eandem esse vituli, cum cauda capiti soleat respondere. Cum dispositioni respondeat habitus, fatuissimum est ex hoc quod homo facit opera virtutum in juventute, præsumere quod vitiosus futurus sit in senectute. Proverbio dicto improbabilis et stulto præponendum est sapientiæ proverbium, quo dicitur : *Ex studiis suis intelligitur puer, si munda et recta sint opera ejus,* Prov. xx. Studia illius dicuntur opera, ad quæ est voluntarius, quibus intelligitur qualis est futurus, ut cum munda sunt et recta opera ejus, præsumitur quod sit bonus. Opera puerorum faciunt munda timor Dei, et hominum pudor. Timor facit declinare a malo, pudor est fuga rei indecentis, amor facit recta. Cant. II : *Recti diligunt te.*

## CAPUT XIII.

*In quibus disciplina correctionis corporis, cui primum intendendum est, consistit.*

Puerorum eruditor volens eos in bonis moribus informare primo debet disciplinæ correctionis corporis intendere, quæ circa sex attenditur, quæ sunt : gestus, habitus, loquela, sumptio cibi et potus, continentia conjugalis, vel majoris perfectionis. Admonendi etiam sunt pueri ad humilitatem et patientiam, et specialiter ad patientiam disciplinæ, et ad filialem obedientiam, sociabilitatem, puerilium evacuationem, accedente virili ætate, perseverantiam, sive stabilitatem.

## CAPUT XIV.

*Quid sit disciplina.*

Et notandum quod disciplina duobus modis dicitur. Uno modo dicitur disciplina, quæ ad alicujus correctionem adhibetur sive verba, seu verbera : sic sumitur Heb. XII, cum dicit, *In disciplina per-*

*severare; Item : Si extra disciplinam estis, cujus omnes participes facti sunt; ergo estis adulteri, et non filii.* Alio modo dicitur disciplina ordinatio conversationis exterioris. Cyprianus : « Disciplina est morum ordinata correctio, et majorum præcedentium patrum regularum observatio; » Hugo de Sancto Victore : « Disciplina est membrorum omnium motus ordinatus, et dispositio decens in omni habitu et actione. » Disciplina decorem et decentiam providet in exteriori conversatione. Ad cognoscendum vero an aliquid sit indecens, vel non, attendendum est ad naturam, et personam, et tempus, et locum. Ad naturam, an scilicet consentaneum sit naturæ. Aliquid indecens est naturæ rationali quod non est indecens brutali. Attendendum est ad personam, quæ agit, vel cum qua agitur. Aliquid esset indecens personæ nobili, et coram rege, vel episcopo quod non esset indecens coram aliquo, qui non esset positus in dignitate. Aliquid etiam est indecens, quia deest congruitas temporis, vel loci. Eccl. xx : *Ex ore fatui reprobanditur parabola, quia non dicit eam tempore suo.* Aliquid indecens est tempore sacro quod non esset indecens alio tempore : et aliquid est indecens in loco sacro quod non est indecens alibi. Sicut Deus corpus Adæ primo formavit, post in faciem ejus spiraculum vitæ inspiravit, et sicut in utero materno corpus primo formatur, post rationalis spiritus ei infunditur; sic magister puerorum primo debet intendere informationi et disciplinæ correctionis corporis. I Cor. xv : *Non prius quod spirituale est, sed quod animale.* Non est negligenda homini cura corporis sui quod datum est spiritui in adjutorium : propter quod, si peccat, subveniri potest ei per pœnitentiæ remedium quod Angelo non potest Genes. vii : *Non permanebit spiritus meus in homine, quia caro est.* Spiritus ibi dicitur indignatio : in eo solo susceptibilis est gratiæ spiritus hominis, in eo solo est ei locus vivendi.

## CAPUT XV.

### *Commendatio disciplinæ.*

Ad commendationem disciplinæ facit quod ab homine brutalem similitudinem expellit, corpus spiritui subdit, et ipsum Dei habitationem efficit. Brutalem similitudinem expellit, dum pravitatem quam

ex corruptione habet, ad bona infima compescit. Hieronymus : « Qui post carnem ambulant in ventrem et libidinem proni, tamquam irrationabilia jumenta reputantur; » in Psal. xlviii : *Homo cum in honore esset, non intellexit, comparatus est jumentis insipientibus, et similis factus est illis.* Puto jumenta dicerent, si loqui fas esset, *Ecce Adam quasi unus ex nobis factus est.* Hæc pronitas indecens est in homine : aliter se debet habere corpus quod regit solus spiritus brutalis, aliter etiam se debet habere corpus quod regit Spiritus sanctus, quam illud quod regit spiritus malus. Disciplina spiritui corpus subdit contra hominem quem ad statum innocentiae reducit : sicut corpus aliter dispositum congruit in statu gratiæ quam in statu gloriæ; sic aliter dispositum congruit in statu gratiæ, quam in statu solius naturæ corruptæ. Disciplina est corporis honestas, idest honoris status. Habet corpus humanum magnum honorem propter spiritum cui associatum est : ex hoc enim est corpus nobilissimum, ad quod alia corpora sunt ordinata : ex hoc etiam magnum honorem expectat, scilicet glorificationem cum spiritu, cum et maximum honorem jam recepit in Christo : associatum enim est divinitate, et conglorificatum spiritui Christi creato nobilissimo. Ideo valde decens est ut in honore custodiat, et non faciat spiritum inglorium contemnendo eum, qui fecit eum gloriosum. Ubi disciplina deest, spiritus, qui naturaliter debet esse corporis dominus, est corporis servus. Servitus vero ista multum est ignominiosa, aspera, sumptuosa. Ignominiosa est, cum spiritus sit creatura valde nobilis; corpus vero comparatione spiritus creatura valde vilis est. Hieronymus : « Nihil vilius quam a carne vinci; » Proverb. xx, *Non decet servum dominari principibus.* Specialiter indecens ei est, qui est nobilis genere, si servus sit ignobiliori sui parti, et illius qui servus ejus debuit esse. Aspera est, quia :

Asperius nihil est humili cum surgit in altum;

Prov. xxx : *Per tria movetur terra, et quartum sustinere non potest, scilicet per servum cum regnaverit.* Corpus tamquam vilis servus, si dominetur, vilia imperat, ut scilicet intendatur refectioni unius sacci, scilicet corporis, quem Dominus vocat saccum, dicens Psalm. xxix : *Cons-*

*cidisti saccum meum*; et « Repletionem loci immundi, » scilicet ventris. Sump- tuosa : servitus enim dominæ gulæ, cui singulis diebus parantur varia fercula, et multoties pluries in die, de quibus nihil retinet, sed postquam gustaverit ex illis, in locum turpitudinis et quasi perditionis transmittit Joël. 1 : *Ululate qui bibitis vinum in dulcedine : periit enim ex ore vestro*; Bernardus : « Voluptas gutturis, quæ tanti hodie æstimatur, vix duorum habet latitudinem digitorum : non durat delectatio illa, nisi quantum durat transitus ille per gulam. » Periculosa est hæc servitus : corpus enim tamquam servus male- volus noxia imperat, aliquando etiam mortem spiritus. Disciplina corpus huma- num Dei habitationem facit : unde Spiritus sanctus dicitur Spiritus disciplinæ Sap. 1 et I Cor. vi : *Nescitis, quia membra vestra templum sunt Spiritus sancti, qui habitat in vobis*. Sicut Deus habitationem suam cœlestem voluit esse ornatam, se- cundum illud Job. xxvi : *Spiritus ejus ornavit cœlos*; sic terrestrem habitationem suam vult esse ordinatam. Ornatus hujus habitationis est disciplina. Spiritus malus cognoscitur in domibus suis, ut cognoscebatur in Saul, quem spiritus nequam exagitabat. I Reg. v et vi, spiritus cognoscitur, scilicet in suis, scilicet in viris disciplinatis. Defectus disciplinæ nuditas est turpitudinem hominis ostendens, se- cundum illud Eecl. xix : *Amictus corporis, et risus dentium, et incessus hominis enuntiant de illo*. Disciplina corporis Dominum glorificat, sicut ornatus templi ipsius I Cor. vi : *Glorificate et portate Deum in corpore vestro*; Augustinus : « Si non parcis tibi, propter te, parce tibi, propter Deum, qui fecit te sibi domum. » Proxi- mum ædificat Matth. v : *Luceat lux vestra coram hominibus, ut videant opera vestra bona, et glorificent Patrem vestrum qui in cœlis est*. Disciplina est quasi vestis grati odoris Deo et hominibus. Isaac sentiens vestimentorum fragrantiam filii sui, be- nedixit ei, Gen. xxvii. Cant. iv : *Odor vestimentorum tuorum sicut odor thuris*. Multum displicet Deo indisciplina con- versatio : multum doluit Jacob videns tunicam filii sui sanguinolentam, Gen. xxxvii. Isa. ix : *Vestimentum mixtum sanguine erit in combustionem*. Multum offensus est rex inveniens in nuptiis non habentem vestem congruentem, Matth. xxii.

## CAPUT XVI.

*De disciplina in gestu.*

Eruditor puerorum nobilium curare de- bet ne gestus indiscipulatos habeant. Ges- tus est motus, vel dispositio corporis, qui indicat motum, vel dispositionem animi, sicut effectus causam. Bernardus : « Ex cordis thesauro procedit quicquid foris apparet vitiorum. Vanum cor vanitatis notam ingerit corpori. » Ad disciplinam in gestu monet Seneca dicens : « Si continens es, et animi tui et corporis motus observa, ne indecori sint. » Ad id monet Hugo de S. Victore : « Unumquodque membrum opus suum tam decenter ac modeste impleat, ut per indiscipulam oculos sapientium non offendant. » Idem : « Discretio actionum in membris conser- vanda est, ut scilicet id agat unumquod- que ad quod factum est, ut nec loquatur manus, nec os audiat, nec oculus linguæ officium assumat. Sunt enim qui nesciunt auscultare, nisi buccis patentibus, alii lo- quentes digitum extendunt, supercilia erigunt. » Specialiter reprimendi sunt pueri ne appareat in eis superbia in gestu, vel colli extensione, vel brachiorum ven- tilatione, vel humerorum gesticulatione, vel tibiarum extensione, vel aliter. De su- perbia in gestu habetur Proverb. vi : *Sex sunt quæ odit Dominus, et septimum detestatur anima ejus : oculos sublimes, linguam mendacem, manus effundentes innoxium sanguinem, cor machinans cogitationes pessimas, pedes veloces ad curren- dum in malum, proferentem mendacia, testem fallacem, et septimum eum qui se- minat inter fratres discordias*; Isai. iii : *Ambulaverunt collo extenso*. Reprimendi etiam sunt pueri a risu indiscipulato. Est autem risus multipliciter indiscipulatus : aliquando quia est de his de quibus non est ridendum, sicut accidit in his. *Qui lætantur cum male fecerint, et exultant in rebus pessimis*, Proverb. i. Indiscipulatus est risus invidiæ, de quo Poeta :

Risus abest ubi quem risi fecere dolores.

Item risus perfidiæ, de quo Proverb. x : *Quasi per risum stultus operatur scelus*. Item risus insaniam, qualis est risus phre- neticorum, de quo Augustinus : « Malunt sapientes se habere sanos lugentes, quam



phreneticos ridentes ; » Eccles. vii : *Sicut sonitus spinarum crepitantium sub olla, sic risus in ore stulti* ; Seneca : « Odibilem hominem facit risus aut superbus et clarus, aut malignus et furtivus, aut alienis malis evocatus. » Secundum Hugonem de Sancto Victore : « Indisciplinatus est risus, qui est cum dentium ostensione ; » secundum Senecam, qui est cum cachinno. « Risus, inquit, sit sine cachinno. » Indisciplinatus etiam est qui est cum vocis exaltatione. Eccles. xv : *Fatuus in risu exaltat vocem suam : vir autem sapiens vix tacite ridebit.* Item risus indisciplinatus est si sit nimius. Rarus debet esse risus in mundo isto. Primo quia loco in quo sumus, non congruit, vallis enim lacrymarum est : hoc ostendit puer natus lacrymans. Verecundum est viro adulto, si non agnoscat quod ostendit ei puer nascens. Super illud Ep. v : *Redimentes tempus, quam dies mali sunt,* dicit Augustinus : « Puer qui nascitur, a ploratu incipit, nec ridere potest ; statim natus plorat, propheta suæ calamitatis ; nondum loquitur, et jam prophetat. » Non congruit etiam tempori. Eccl. xii : *Tempus flendi, et tempus ridendi.* Tempus flendi est in præsentibus : nunc enim magnam materiam flendi habemus, et lacrymæ sunt in valore suo. Mala præsentis vitæ per se sunt materia fletus, bona vero temporalia per consequens, quia peccatorum sunt occasio. Eccl. xi : *Si dives fueris, non eris immunis a delicto.* Electi in Paradiso non habent materiam flendi ; lacrymæ vero reprobatorum in inferno nullius sunt valoris. Item maledictus est risus a Domino, Luc vi : *Væ vobis qui ridetis.* Vix gustaret aliquis cibum maledictum ab aliquo sancto, quantum ergo cavendus est et timendus risus, cui maledictionem ipse fecit Deus ?

## CAPUT XVII.

### *De disciplina in habitu.*

Ad disciplinam in habitu pertinet, ut in vestibus quæretur necessitas, nec ametur in eis nimia pretiositas, vel extraneitas. Vestium superfluitas non habeatur, earum suavitas contemnatur, gloriatio in eis caveatur, et intelligatur ornatum corporalem magis esse erubescibilem quam honorabilem. Ornatum corporali præponatur spiritualis, et ea-

veatur macula, et specialiter macula sanguinis. In vestibus quærenda est necessitas. Unde Augustinus : « Tibi vestis pura circumdetur non ad pulchritudinem, sed propter necessarium tegumentum, ne dum exquisitis vestieris, alteram turpitudinem assumes, » scilicet spiritualem ; I Timoth. vi : *Habentes alimenta, et quibus tegamur, his contenti simus.* Bernardus loquens de illo verbo, Act. iv : *Dividebatur singulis prout cuique opus erat* : Hoc est, inquit : quantum ad indumenta, quibus et nuditatem tegetet, et frigus repelleret. Non est amanda nimia pretiositas in vestibus : unde super illud Luc. xvi, *Induebatur purpura et bysso,* dicitur : « Si cultus pretiosarum vestium culpa non esset, sermo Dei non tam vigilanter exprimeret quod dives purpura et bysso indutus apud inferos torqueretur ; » Gregorius : « Nemo pretiosa indumenta nisi ad inanem gloriam quærit, scilicet ut honorabilior ceteris videatur. Nemo vult ibi pretiosis vestibus indui, ubi a nemine potest videri. Cum Deus spiritum pretiosum vili carne induerit, non est verisimile quod carnem vilem pretiosis indui voluerit. » Ad idem facit quod rex gloriæ conversaturus cum hominibus sacco nostræ carnis mortalis se induit, de quo in Psalm. xxix, ait : *Concidisti saccum meum* ; Sapiens : « Mercator trosellum etiam pretiosum vilibus induit. » Unde patet quod insipienter agit qui corpori suo vili vestes pretiosas quærit. Non est quærenda extraneitas, vel dissimilitudo in vestibus Soph. i : *Visitabo super omnes qui induti sunt veste peregrina.* Cavendum est a multitudine vestium superflua. Bernardus : « Clamant nudi, clamant famelici, et conqueruntur nobis fame et frigore miserabiliter laborantibus. Quid conferunt tot mutatoria, vel extensa in perticis, vel plicata in manticeis ? » Jac. v : *Agite nunc divites, plorate ululantes etc., vestimenta vestra a tineis comesta sunt.* Debent viri vestium suavitatem contemnere : potius congruit vestis suavitas mulieribus quam viris. Exod. xxii : *Non induetur vir veste feminea.* Cavenda est in vestibus gloriatio. Eccl. ix : *In vestitu ne glorieris umquam.* Ornatus vestium erubescibilis est, cum sit sequela peccati. Bernardus : « Qui gloriatur de veste, similis est furi qui gloriatur de cauterio, quia propter peccatum Adæ introductus est usus vestium. » Verecundum etiam est nobili-



creaturæ, scilicet homini, a vilibus creaturis suam pulchritudinem mendicare, scilicet a pannis et similibus. Præponendus est ornatus spiritualis corporali. Augustinus : « Non affectetis vestibus placere, sed moribus. » Potius intendendum est ornatui dominæ, scilicet animæ, quam ancillæ, scilicet carnis. Bernardus : « Magna abusio et nimis magna dominam ancillari, et ancillam dominari. » Pulchritudo corporis contemptibilis est respectu pulchritudinis animæ, quæ est Dei imago. Macula, vel immunditia, laudabiliter caveri potest. Seneca : « Non splendeat toga, nec sordeat ; » Hieronymus : « Ornatus et sordes pari modo sunt fugienda ; » Item : « Nec affectatæ sordes, nec exquisitæ delitiæ laudem pariunt. » Valde cavendum est, ne vestis sanguinolenta sit sanguine peccati, quia est male acquisita : Jer. II : *In alis tuis inventus est sanguis animarum.* Hæ alæ intelligi possunt extremitates palliorum, quas habent uxores usurariorum et raptorum de lacrymis pauperum. His alis volatur in infernum, non in cælum. In his alis sanguis duplex invenitur, scilicet sanguis pauperum, idest spolia eorum, quæ iudicio sacræ Scripturæ vita pauperum erant. Eccl. xxxiii : *Panis egentium vita pauperum est : qui defraudat eum, homo sanguinis est.* Alius sanguis est personæ quæ illud defert, sciens illud esse emptum de re injuste acquisita ; mors enim et damnatio ejus ut frequenter latet ibi.

## CAPUT XVIII.

*Quod multum necessaria est disciplina in locutione.*

Sequitur de disciplina in locutione, et notandum quod maxime est necessaria oris disciplina ; in custodia oris pro magna parte est custodia cordis. Prov. xiii : *Qui custodit os suum, custodit animam suam.* Os est quasi porta in homine, et sicut custodia castris, est custodia portæ. Valet custodia oculorum ad custodiam cordis, quia frequenter per oculos mors intrat ad animam : sic intravit ad animam matris nostræ Evæ, Gen. iii : *Videns enim quod bonum esset lignum ad vescendum, et pulchrum oculis aspectuque delectabile, tulit de fructu ejus, et comedit.* Simile accidit in David, cui aspectus

mulieris occasio fuit adulterii et homicidii, II Reg. xi. Custodia etiam aurium valet ad custodiam animæ, frequenter enim per aures mors intrat ad animam. Hieronymus : « Aures portæ sunt multum timendæ, et diligenter custodiendæ, cum sint semper apertæ ; unde sapiendæ sunt, » secundum illud Eccl. xxviii : *Sepi aures tuas spinis, et noli audire linguam detrahentem.* Aures sepiuntur cum ostensione tristis faciei, qua detractor repellitur. Prov. xxv : *Ventus aquilo dissipat pluvias, et facies tristis linguam detrahentem ;* Hieronymus : « Nemo invito auditori libenter narrat. » Præcipue ad custodiam cordis valet custodia oris, quia non solum nocent animæ quæ per os intrant, verum etiam quæ de ore exeunt, secundum illud Matth. xv : *Quæ de ore procedunt, de corde exeunt, et ea coinquant hominem.* Habet os duo officia, scilicet officium sumendi cibum et potum toti corpori, et officium loquendi : utrobique vero potest accidere periculum. Quantum ad primum majus periculum est, si oris custodia negligatur, quam oculorum, quia per oculos intrant rerum similitudines, per os vero intrant ipsæ res mansuræ, corpori uniendæ, quæ hominem multum immutant : unde qui custodit os suum quantum ad sumptionem cibi et potus, custodit animam suam, quia custodit vitam et naturæ et gratiæ. Vitam naturæ, quia hoc multum valet ad sanitatem. Eccl. xxxvii : *Qui abstinens est, adjiciet vitam ;* Eccl. xxxvii : *In multis escis non deerit infirmitas.* Valet etiam hoc ad custodiendam vitam gratiæ : sobrietatem enim comitatur continentia, unde *Super Matth. iv*, dicit *Glossa* : « Diabolus victus de gula non tentat de libidine. » Si tentetur aliquis de ira vel luxuria vel loquacitate post excessum de cibo et potu, facile acquiescit : non est sic, si sobrietatem servaverit. Custodiendum est os a cibus et potibus quasi a proditoribus : quanto cum majori gaudio recipiuntur, plus nocent. Prov. xxiii, dicitur de vino : *Ingreditur blande, et in fine mordebit ut coluber.* Seneca : « Voluptates inter res vilissimas præcipue extirpa, quæ more latronum in hoc nos amplectuntur ut jugulent. » Custodia vero oris, quantum ad locutionem, specialiter valet ad custodiam animæ, et pro illa videtur specialiter Salomon dixisse illud : *Qui custodit os suum* etc. unde subdit : *Qui autem inconside-*

*ratus est ad loquendum, sentiet mala.* Loquentem inconsiderate sequuntur hæc mala. Primo conscientiae remorsio. *Qui multis utitur verbis, animam suam lædit.* Eccl. xx. Secundo gratiae evacuatio. Ibid. : *Sapientis in verbis amabilem se facit, gratiae autem fatuorum effundentur.* Tertio confusio, Prov. x : *Os stulti confusio proximum est;* Ibid. xiii : *Impius confundit et confundetur;* in futuro vero damnatio. Ibid. xviii : *Mors et vita in manibus linguæ.*

### CAPUT XIX.

*Quod magna diligentia adhibenda est circa custodiam linguæ.*

Quadruplici ratione magna diligentia adhibenda est circa custodiam linguæ. Primo quia ejus custodia est valde difficilis : secundo quia est valde utilis : tertio quia valde indecens est circa ejus custodiam negligentia : quarto quia hæc negligentia est valde periculosa. Difficultatem custodiendi linguam primo ostendit nobis natura, quæ linguam inclusit, sicut solent includi crudelia animalia et indomita ne noceant. Secundo Scriptura Psal. cxi : *Pone, Domine, custodiam ori meo, et ostium etc.* Propter difficultatem custodiendi linguam, rogat David Dominum de ejus custodia. Proverb. xvi : *Domini est gubernare linguam.* Non sufficit ad hoc virtus vel discretio humana. Eccles. xxi : *Quis dabit ori meo custodiam?* Ibid. xxviii : *Ori tuo facito ostia, ut possit custodiri lingua.* Jac. iii : *Omnis natura bestiarum, et volucrum, et serpentum, et cetorum domantur, et domita sunt a natura humana, linguam autem nullus hominum domare potest:* et subditur : *Est enim inquietum malum.* Utilis est valde custodia linguæ : si enim lingua modo debito regatur, de fructu ejus potest homo ditari. Prov. xii : *De fructu oris sui unusquisque replebitur bonis.* Pretiosi fructus linguæ, quam Spiritus sanctus regit, qui in specie linguæ apparere voluit, sunt : modestia in loquendo, oratio, Dei laudatio, gratiarum actio, peccatorum confessio, proximi eruditio et consolatio. Linguæ utilitatem ostendit Salomon Prov. x, dicens : *Vena vitæ os justis.* Sermo est instrumentum sapientiæ, circa quod intendunt tres magnæ scientiæ, scilicet grammatica, logica, rhetorica, et

circa idem pro magna parte intendit divina scientia. Magnum reputatur scire ea quæ tres dictæ scientiæ circa sermonem attendunt ; sed valde magnum est servare ea quæ in sermone scientia divina requirit. Jac. iii : *Qui in lingua non offendit, hic perfectus est vir;* Proverb. x : *Qui moderatur labia sua, prudentissimus est,* non solum prudens vel prudentior. In sermone perpenditur, an aliquis sit sapiens. Eccles. iv : *In lingua sapientia dignoscitur;* Ibid. xxvii : *Ante sermonem non collaudes virum;* hoc enim tentatio est hominum. Hieronymus : « In pondere verborum probatio existit humanæ vitæ. » Valde indecens est cum linguæ custodia negligitur, et lingua iniquationi exponitur. Lingua enim est membrum nobile, rationis organum speciale, in quo membro homo specialiter honoratus est a Deo, quod specialiter deputatum est divino officio, electum specialiter a Spiritu sancto, quo fit instrumentum gratiæ et sapientiæ, scilicet sermo. Valde servandum est ab iniquatione os humanum et quantum ad labia et quantum ad linguam. Indecens valde est ibi immunditia propter ejus nobilitatem. Qui ori suo ab iniquatione non pareit, ab homine quasi degeneravit, et in porcum transiit. Porcus non plus pareit ab iniquatione oris quam pedis : ubi enim ponit pedem, ponit et os. Lingua, quantum ad usum loquelæ, rationis organum est, nec invenitur quantum ad usum istum naturaliter, nisi in habente rationem ; ideo a ratione regi debet, et ad ejus imperium in actum suum exire. Cum ad jumentum non pertineat loquela, juste posset Deus illi loquelam auferre qui ut jumentum factus est, et ratione linguam suam non regit. Cum in membro isto homo præ omnibus creaturis a Deo sit honoratus, valde ingratus est si eo Deum inhonorat. Creaturæ irrationales, ut aves, lingua sua Deum laudando honorant ; unde multum potest offendi Deus videns se sola lingua humana inhonorari, a qua maxime debuit honorari. Lingua deputata est divino officio : ea enim homo Deum et orat et laudat, quia illa Deus oratur. Multum cavendum est ne Deus ea offendatur : quia « Cum is qui displicet ad intercedendum mittitur. Irati animus ad deteriora provocatur. » Item, quia Deus ea laudatur, a peccato servanda est, quia *non est speciosa laus in ore peccatoris,* Eccl. xv. Cum electa sit a Spiritu sancto, non debet servire spiritui maligno. Sermo

instrumentum est sapientiæ. Sapientia est in corde quasi in quiete, in sermone enim est quasi in vehiculo, per sermonem enim quasi transfertur ab uno in alterum, etiam gratiæ est quasi vehiculum, quia sermone datur audienti gratia. Ephes. iv : *Omnis sermo malus de ore vestro non procedat, sed si quis bonus est, ad ædificationem fidei, ut det gratiam audientibus*; unde verba Christi dicuntur verba gratiæ. Luc. ii : *Mirabuntur omnes in verbis gratiæ procedebant de ore ejus*. Negligentia circa custodiam linguæ est valde periculosa, multum enim nocet si non servetur : unde Jacob. iii, dicitur de ipsa, quod est *Inquietum malum, plena veneno mortifero*; et ibid. dicitur : *Lingua nostra ignis est, universitas iniquitatis, Glossa, « universitas, quia per eam fere cuncta facinora, aut contenuantur, ut latrocinia, stupra : aut patrantur, ut perjuria, falsa testimonia : aut defenduntur, ut cum quilibet ipsius scelus excusat quod commisit. »* Nocet lingua ei qui loquitur evacuando mentem ejus bonis. Bernardus : « Levis res sermo, sed graviter vulnerat, aptissimum evacuandis cordibus instrumentum ; » Eccles. xxviii : *Multi ceciderunt in ore gladii, sed non sic quasi qui interierunt per linguam suam*; in eod. : *Flagelli plaga livorem facit : plaga autem linguæ comminuet ossa*. Nocet lingua audienti. Bernardus : « Unus est qui loquitur et tantum unum verbum profert, et tamen unum verbum uno momento multitudinis audientium, dum aures inficit, animas interficit. » Nocet his de quibus loquitur etiam valde remotis : lingua ejus qui est in Gallia, nocet ei qui est ultra mare, vel in Hispania, dum eum infamat ; immo lingua ejus, qui est in terra, nocet ei qui est in cælo, dum eum blasphematur. Psal. lxxii : *Posuerunt in cælum os suum*, etc. Et notandum quod cum homo constet ex corpore et spiritu, sermo, qui est ejus instrumentum, habet aliquid quasi corporale, scilicet vocem, et aliquid quasi spirituale, scilicet significationem, ratione cujus attingit non solum creaturam, sed etiam creatorem, qui sermone oratur, laudatur, vel blasphematur. Item attingit spiritum creatum : sermone enim voluntas unius spiritus alteri manifestatur. Item attingit non solum præsentia, sed etiam præterita et futura, et non solum propinqua, sed etiam remota : ideo multum potest nocere. Una mala lingua, scilicet unius mali consilarii, destruit pa-

triam unam. Eccl. xxviii dicitur : *Lingua tertia civitates muratas divitum destruxit*.

## CAPUT XX.

*Quæ pertinent ad disciplinam in locutione.*

Ad disciplinam in locutione pertinet attendere quis loquatur, et cui, et de quo. Item quid dicendum est, et ubi, et quando, et quomodo. Volens loqui attendere debet personam loquentis ; aliquis enim sermo decet senem, qui non decet juvenem : et aliquis sermo decet sapientem, qui non decet simplicem, et justum, qui non decet peccatorem. Proverb. xviii : *Non decet stultum verba composita* ; Eccl. xx : *Non est speciosa in ore stulti parabola*. Stultum intellige non solum illum cui deest scientia, sed illum cui deest bona vita. Attendere debet volens loqui ad personam cui locuturus est, an scilicet sit locutus sapienti vel insipienti, benevolo vel derisori, extraneo vel familiari. Prov. xxviii : *In auribus insipientium ne loquaris, quia despicient doctrinam tuam*. Eccl. xxi : *Cum stulto non multum loquaris* ; Proverb. xx : *Noli arguere derisorem* ; Matth. vii : *Margaritas noli spargere ante porcos* ; Sapiens : « Quidam ea, quæ solis amicis committenda essent, his, quos habuerint obviam, narrant ; » Eccles. xix : « *Sagitta infixæ femori canis, sic verbum in ore stulti* ; » in Exod. : « *A facie verbi parturit fatuus*. » Parturiens non quiescit donec partum emiserit, nec fatuus donec verbum protulerit. Attendere etiam debet de quo loquatur, de Deo vel de aliis. Cum reverentia et timore de Deo debet loqui. Seneca : « Vitiosum est de re sacra delicatum inferre sermonem. » Attendere etiam debet quid dicendum sit Ephes. iv : *Omnis sermo malus de ore vestro non procedat, sed si quis bonus est, ad ædificationem fidei, ut det gratiam audientibus*. Attendere etiam debet ubi dicendum sit : aliquid in loco sacro non est dicendum, quod alibi dici posset. Augustinus : « In oratorio nemo aliquid aliud agat nisi ad quod factum est. » Attendere etiam debet quando sit dicendum. Eccles. iii : *Tempus tacendi, et tempus loquendi* ; Ibid. xxvi : *Homo sapiens tacebit usque ad tempus* ; Ibid. xxviii : *Ex ore fatui reprobabitur parabola, quia non dicit eam in tempore suo*. Attendere etiam debet quomodo sit dicendum : in locutione reprehensibilis

est nimius clamor. Isa. XLII: *Non clamabit*; Seneca: « *Vox sit sine clamore.* » Et notandum quod ad condimentum sermonis facit quod sermo sit purus, opportunus, dulcis et utilis. De primo dicitur Prover. xv: *Sermo purus, pulcherrimus est.* Purus debet esse a falsitate, et noxietate proximi, et contumelia Dei. De secundo legitur Prov. xv: *Sermo opportunus, optimus est.* De tertio, Eccl. vi: *Verbum dulce multiplicat amicos, et mitigat inimicos*; Prover. xvi: *Qui sapiens est corde, appellabitur prudens; qui dulcis est eloquio, majora reperiet.* Magis enim proficiunt qui habent dulcedinem linguæ, quam qui habent sapientiam magnam. De quarto dicit Seneca: « *Sermones utiles magis quam facetos et affabiles amant, rectos potius quam obsecundantes*; » Ibid.: « *Non erit tibi scurrilis, sed grata urbanitas, urbanitas tua sine dente sit.* »

## CAPUT XXI.

### *De quibusdam quæ multum valent ad linguæ custodiam.*

Item notandum est, quod quatuor sunt quæ multum valere possunt ad linguæ custodiam; primum est, quod ante portam oris barræ ponantur; secundum est, quod hæc porta raro aperiatur; tertium, ut aperta cito claudatur; quartum, ut in ea clavis habeatur. Quasi barræ ante portam oris sunt proposita declinandi illas personas, cum quibus per linguam peccare solemus; vel loca illa, in quibus habemus occasionem peccandi per linguam; vel propositum tacendi illis horis in quibus lingua facile labitur, ut post sumptionem cibi et potus. Prover. xviii: *Frater, qui adjuvatur a fratre, quasi civitas firma: et judicia quasi vectes urbium*; proposita ex iudicio rationis facta, sunt quasi vectes, vel quasi barræ. Raro aperienda est porta oris, et cito claudenda. Sapiens: « *Ad summam perfectionem volo te esse breviloquum, tardiloquum, et submissa voce loquentem*; » Jac. i: *Sit omnis homo velox ad audiendum tardus ad loquendum*; Seneca: « *Tardiloquum et esse jubeo, et prope erit tibi Deus*; » Idem: « *Aurem verbis frequentius quam linguam accommoda.* » Sic multiloquium frequenter habet peccatum, secundum illud Prov. x: *In multiloquio*

*non deerit peccatum.* Sic breviloquium valet ad vitandum peccatum, Eccl. xix: *Qui odit loquacitatem, extinguit malitiam.* Clavis valet ad linguæ custodiam, quæ est firmum propositum non loquendi sine deliberatione. Hieronymus: « *Prius veniat sermo ad limam quam ad linguam*; Eccl. v: *Ne temere quid loquaris*; Ibid. iv: *Noli esse citus in linguam*; Ibid. xxi: *Verba prudentium statera ponderabuntur.* Sapiens habet os in corde, idest cordis, scilicet potestate et dispositione: stultus vero habet cor in ore. In eodem: *In ore fatuorum cor eorum, et in corde sapientum os illorum.* Qui non habet discretionem loquendi, habeat discretionem tacendi. Seneca: « *Taciturnitas homini stulto pro sapientia est*; » Prover. xviii: *Stultus si tacuerit, sapiens reputabitur.* Raro tamen gratia tacendi in stulto reperitur. Sapiens: « *Nemo stultus tacere potest.* » Specialiter etiam loquacitas in mensa cavenda est. Hugo de Sancto Victore: « *Lingua, quæ omni tempore prona ad peccatum labitur, periculosius, cum per erapulam inflammata fuerit, ad loquendum relaxatur.* » Propterea enim dives qui inter epulas loquacitati servivit, post in inferno positus vehementius in lingua ardebat.

## CAPUT XXII.

### *Quæ attendat disciplina circa sumptionem cibi et potus.*

Circa sumptionem cibi et potus notandum, quod disciplina in mensa multum est commendabilis. In membro enim illo servat munditiam, in quo immunditia maxime est indecens, scilicet in ore; et in loco immunditiam cavet, in quo ipsa hominibus multum displicet, scilicet ad mensam. Per eam Dei offensam cavemus, quando eam multum cavere debemus, scilicet quando bonis ejus utimur. Magna perversitas est Deum offendere, cum in mensa ejus sumus. Cavent latrones aliquot diebus ne eis noceant cum quibus comedunt. Per eam fit ut cum pascitur homo, pascatur et Deus: puritatem enim servat qua Deus delectatur, Cant. i: *Qui pascitur inter lilia.* Disciplina mensæ attendit cibi, et potus, qui sumendus est, quantitatem, qualitatem, tempus sumendi et modum.



## CAPUT XXIII.

*De quantitate eorum quæ sumuntur.*

Circa quantitatem eorum quæ sumuntur, cavendum est ne nimis sumatur, et ne ferculorum multitudo ametur, paretur vel quærat, et ne frequenter homo reficiatur. Multum noxia est animæ et corpori sumptio nimii cibi et potus. Eccl. xxxvii: *Propter crapulam multi obierunt*; Luc. xxi: *Attendite ne graventur corda vestra crapula et ebrietate*. Crapula est cruda epula, cruditas ista frequenter accidit in his qui nimis sumunt. Seneca: « Ede citra cruditatem, bibe citra ebrietatem. » Multum utilis est moderata sumptio et animæ et corpori. Chrysostomus: « Nihil sic salutem, nihil sic sensuum acumen operatur, nihil sic ægritudinem fugat, sicut moderata refectio. » Multitudo ferculorum frequenter est occasio quod nimis sumatur de cibo, unde nociva est et animæ et corpori. Seneca: « Fastidientis stomachi est multa degustare, quæ ubi varia sunt, inquinant, non alunt; » Eccl. xxxvii: *In multis escis erit infirmitas*; Seneca de antiquis loquens: « Simplex erat, et ex esca simplici valetudo; multos morbos multa fercula fecerunt. » Circa frequentiam perfectionis notandum, quod homini, qui habet intendere studio sapientiæ, vel orationi, vel alii operi spirituali, expediret, si aliud necessitas non requireret, quod semel in die reficeretur, et tunc ita temperate, quod illa refectio non impediretur a spirituali opere. Seneca: « Vir magnus et prudens animum deducit a corpore, et multum cum meliori ac divina parte versatur, cum hac querula et fragili, quantum necesse est; » Phythagoras: « Docto homini vivere est cogitare. »

## CAPUT XXIV.

*De qualitate eorum quæ sumuntur.*

Circa qualitatem cavendum est ne amentur, vel quærantur pretiosa, vel delicata, vel curiose parata. Ad primum debet movere pietas, quam homo debet habere ad pauperes, Dei filios et fratres, inter quos multi sunt qui etiam panem non possunt habere. Qualis est fraterni-

tas quod alii non habeant necessaria, alii habeant superflua? Magna perversitas quod servus pretiosa quærat, cum Dominum suum in pauperibus egere sciat. Non videtur vere membrum esse illius corporis, cujus Christus est caput, qui indigentia membrorum ejus non compatitur. I Cor. xii: *Si quidem compatitur unum membrum, compatiuntur omnia membra*; Eccl. xxii: *Fidem posside cum amico tuo in paupertate illius, ut in bonis ejus læteris*; Bernardus: « Noli putare gratuitum quod impendis proximo: velis nolis, debitor es. » Secundo, periculum quod est in acquirendo. Frequenter enim sumptus, quibus pretiosa habentur, acquiruntur vel cum periculo ejus qui eis utitur, vel illius a quo datur. Noluit David bibere aquam, quam sibi attulerant tres fortes, sed libavit eam Domino dicens: *Propitius sit mihi Dominus, ne faciam hanc rem, non sanguinem hominum istorum, qui profecti sunt, et animarum periculum bibam*, II Reg. xxiii. Melius est sine periculo tantum panem et aquam sumere, quam cum periculo pretiosa habere. II Mach. v: *Judas secesserat in desertum locum, ibique inter feras cum suis vitam in montibus agebat, et fœni cibo vescentes demorabantur, ne participes fierent coinquinationis*. Tertio, conditio corporis. Cum enim corpus vas sit ubi corrumpitur quod infunditur fatuum videtur esse ibi pretiosa ponere. Joel. i: *Ululate qui bibitis vinum in dulcedine: periit enim ex ore vestro*. Non sic est in aliis sensibus: non enim corrumpitur res pulchra cum semel visa fuerit, nec res odorifera cum semel odorem ejus aliquis perceperit. Non videtur quod Deus voluerit hominem quærere pretiosos cibos, qui eandem escam assignavit ei cum jumentis. Gen. i: *Ecce dedi vobis herbam afferentem semen super terram, et universa ligna quæ habent in semetipsis sementem sui generis, ut sint vobis in escam, et cunctis animantibus terræ*. Quod cibi pretiosi quærantur, frequenter accidit vel ex delectationis amore, vel ex ambitione: et ex utrobique est magna fatuitas. Fatuum enim est sumptus magnos facere pro brevi delectatione, quæ tantum durat, quantum transitus cibi per guttur solum durat. Item valde fatuum est et perversum pascere oculos mundi de hoc quod subtrahitur in pauperibus famelico ori Dei. Seneca: « Hanc sanam et salubrem formam



vitæ tene, ut corpori tantum indulgeas, quantum bonæ valetudini satis est. Durius etiam tractandum est ne animus male pereat, cibus famem sedet, potio sitim extinguat, vestis arceat frigus, domus munimentum sit adversus infesta corpori : hanc utrum sepes erexerit an varius lapis gentis alienæ nihil interest. Scitote homines tam culmo bene quam auro tegi, contemnite omnia quæ supervacuum labor velut ornamentum ac decus ponit; cogitate præter animum nihil esse mirabile, cui magno nihil est magnum. » Multis de causis fatuum est corpori suo delicias procurare. Primo, quia qui delicatis utitur, infirmitati corporis sui medium adhibet unde infirmitas aggravatur. Secundum Augustinum sumenda sunt alimenta sicut medicamenta. Sed, sicut dicit Gregorius, ipsum medicamentum in vulnus vertitur, quia exquisito remedio paulo diutius inhærentes, ex eo gravius defecimus quod provide ad refectionem paramus. Secundo, quia cum aliquis delicatis utitur, hosti ejus consuetudo mala super eum acquiritur, quæ vix excutitur. Seneca : « Voluptatibus se immergunt quibus in consuetudinem adductis carere non possunt, et ob hoc miserrimi sunt, quod eo pervenerunt, quod illis, quæ sunt supervacua, facta sunt necessaria. » Consuetudo mala pertinens ad vitium gulæ vix deponitur. Corvus non legitur reversus ad arcam Gen. viii. Actus, unde gravatur hoc vitium et augetur, multum frequentatur; ideo hoc vitium vix dediscitur : glutinum est valde forte et quasi indissolubile. Luc. xiv : *Uxorem duxi, et ideo non possum venire.* Ad matrimonium pertinet indissolubilitas : uxor ista est voluptas carnis : in hoc matrimonio, in quo diabolus conjungit, solus Deus separat. Tertio, quia qui delicata corpori suo parat, adjutoria suo hosti procurat. In lib. *De vita sol. de condm.* : « Sufficit ut comestibiles fiant cibi nostri, non etiam concupiscibiles, vel delectabiles. Sufficit enim concupiscentiæ mala sua, quæ cum vix aut nullo modo pertransire possit ad finem explendo necessitatis nisi per viam quantæcumque delectationis, si coeperit accipere irritamenta ab eis qui perpetuum susceperunt bellum adversus ejus oblectamenta, fiunt duo circa unum, et periclitatur conscientia. » Quarto, quia usum deliciarum frequenter excessus comitatur : unde infirmitas

corporis et sæpe mors sequitur. Seneca : « Potest nostra providentia huic corpusculo moram prorogare longiorem, si voluptates, quibus major pars corporum perit, poterimus regere et coercere; » Idem : « Ipsæ voluptates in tormenta vertuntur; » Idem : « Qui hostis in quemquam tam contumeliosus fuit, sicut in quosdam voluptates suæ sunt? Sufficit alicui si hostem suum excæcat, sed voluptates non solum excæcant voluptuosos, sed etiam impotentes reddunt et contractos et læsos, et aliis infirmitatibus affligunt eos, et tandem interficiunt. » Chrysostomus : « His qui in luxuriis et delitiis vitam ducunt, resoluta corpora et omni cera molliora circumferunt, atque infirmitatibus repleta, quibus ad cumulum malorum podagræ tremor et immatura senectus accedit, etc., semper vita in medicis et medicamentis; sensus autem tardi, graves et obtusi, et quodammodo sepulti. » Seneca : « Victus tibi sit ex re facili, nec ad voluptatem, sed ad cibum accede, palatum tuum fames excitet, non sapor, cum os non solum sibi cibum sumat sed toto corpori, nec quod sumit sibi retineat, sed ad membra transmittat. » Non est habendus respectus in sumptione cibi ad os tantum, sed ad corpus. Aliquando enim quod nimis est corpori, parum est gulæ, et quæ gulæ sunt delectabilia, corpori sunt noxia. Unde si ille, qui habet multitudinem ciborum delicatorum, tantum inde vult sumere, quod gula sit satiata, potest inde incurrere infirmitatem, vel etiam mortem : similiter potest accidere in illo qui in cibis non attendit, nisi quod gulæ sint delectabiles : quod enim gulæ delectabile est, potest esse corpori mortiferum. Non congruunt delitiæ tempori in quo sumus. Bernardus : « Universum tempus pœnitentiæ vigilia quædam est solemnitatis magnæ et aterni sabbati quod præstolamur. Delitiæ solemnitati congruunt non vigiliæ. » Non congruunt etiam delitiæ loco in quo sumus : locus enim exilii, vallis miseriarum, non locus deliciarum. Non eiecit hominem Deus de loco deliciarum ut sibi delicias procuraret. Item non congruunt delitiæ statui corruptionis, in quo nunc est humana natura. Quæ facile corrumpuntur, melius servantur in aqua salsa quam in aqua dulci. Homo, etiam in statu naturæ bene institutæ positus, delitiis corruptionem incurrit, quæ tribulatio, quasi aqua

salsa, etiam in statu naturæ destitutæ custodit. Non congruunt etiam delitiæ servili conditioni corporis. Servo malevolo tortura et compedes congruunt, non delitiæ. Prov. xix : *Qui delicate a pueritia nutrit servum suum, postea sentiet eum contumacem.* Item, non congruunt delitiæ stultitiæ corporis, ad cuius correptionem virga necessaria est. Prov. x : *Virga in dorso ejus qui indiget corde*; Ibid. xix : *Non decent stultum delitiæ. Per stultum cibo satiatum movetur terra*, Prov. xxx; stultus cibo satiatum est homo carnalibus delitiis repletus. Non congruunt etiam delitiæ statui christiano. Bernardus : « Christus, qui non fallitur, elegit quod carni molestius est. Id ergo melius, id utilius, id magis eligendum. » Exemplo ergo ipsius Christi non carni delectabilia, sed molesta debet christianus eligere; Galat. v : *Qui Christi sunt, carnem suam crucifixerunt cum vitiis et concupiscentiis*; Matth. xi : *Qui non accipit crucem et sequitur me, non est me dignus.* Christianus debet potius eligere habere cum populo Dei carnis afflictionem, quam inordinatam cum servis diaboli consolationem, sicut de Moyse legitur Heb. xi : *Magis eligens affigi cum populo Dei, quam temporalis peccati habere jucunditatem.* Specialiter cavendum est ne pueri delicate nutriantur. Quintilianus : « Utinam liberorum nostrorum mores non ipsi perderemus : infantiam enim statim delitiis solvimus : nam illa, quam indulgentiam vocamus, educatio mollis nervos omnes frangit mentis. » Seneca : « Educatio et disciplina mores facit, et id sapit quisque quod didicit. » Non congruunt etiam delitiæ homini qui studet sapientiæ. Job xxviii : *Non invenitur in terra suaviter viventium.* Hieronymus : « Pulehre dicitur apud Græcos : Pinguis venter non gignit sensum tenuem. » Seneca : « Copia ciborum subtilitas impeditur : abstinentia a delitiis valet ad intelligentiam. » Pueri qui cibos regios contempserunt, eibis grossis contenti, intelligentiores ceteris inventi sunt, Dan. i. De curiositate præparandi notandum, quod qui studiose et laute cibos præparari facit, gladium hostis sui acuit. Bernardus loquens de hac curiositate : « Tanta, inquit, acuratione et arte coquorum cuncta apparantur, ut quatuor vel quinque ferculis devoratis, prima non impediunt novissima, nec satietas

minuat appetitum. Venter quidem, dum nescit, oneratur, sed varietas tollit fastidium. Quia enim puras, ut eas natura creavit, epulas fastidimus, dum alia aliis multifarie permiscetur, et spretis naturalibus, quos Deus indidit rebus, quibusdam adulterinis gula provocatur saporibus, transitur nimirum meta necessitatis, sed necdum delectatio superatur. »

## CAPUT XXV.

*De tempore et modo sumendi cibum.*

Attendendum est ne tempus comedendi præveniatur. Qui enim prævenit, non expectat donec salsa parata sit, scilicet fames, unde cibum insipidum comedit. Seneca : « Solus panis bonus tibi fiet, cum tenerum et similaginem fames reddet : ideo non est ante edendum quam illa imponat; expectabo ergo, nec ante edam quam aut bonum panem habere potero, aut malum fastidire desiero; » Bernardus : « Prudenter sobrieque conversanti satis est ad omne condimentum sal cum fame. » Sapiens : « Desideriis omnia condiuntur. « Ad modum sumendi cibum pertinet munditia et temperantia. Secundum sæculum valde verecundum est si homo adultus nesciat se pascere quin se maculet corporaliter, et secundum Deum valde verecundum est si homo nesciat se pascere quin animam suam maculet. Utraque ergo immunditia cavenda est in mensa, et corporalis et spiritualis. Temperantia etiam ibi servanda est, ut non comedatur cum festinatione nimia, et appetitus cibi vel potus refrænetur, et effusio super escam vitetur. Eccl. xxxviii : *Noli esse avidus in omni epulatione, nec te effundas super omnem escam.* Augustinus : « Fieri potest ut sine omni vitio cupiditatis vel voracitatis pretiosissimo cibo sapiens utatur, insipiens autem fœdissimæ gulæ flamma in vilissimum cibum ardescat, et sanctus quisque, Domini more, maluerit piscibus vesci quam lenticula more Esau. Non propter hoc continentiores sunt nobis pleræque bestię, quia villioribus eibis aluntur. » Effusio vultus interioris super escam est, quando ad cibum sic ardore animus trahitur, ut aliud cogitare non sinatur. Comitari solet fœdam aviditatem inordinate scindendo panem, et sumendo

cibum : valet contra hanc aviditatem psalmi interpositio cum aliqua oratione.

### CAPUT XXVI.

*Quod in ætate adolescentiæ monendi sunt qui non possunt continere ad matrimonium.*

Cum in ætate adolescentiæ maxime sæviat ardor concupiscentiæ, admonendi sunt juvenes qui non possunt, nec volunt continere, ut concupiscentiam refrænent conjugii lege. Sic monebat Salomon Prover. v : *Lætare cum muliere adolescentiæ tuæ* : et subditur : *Quare seducaris, fili mi, ab aliena, et foveris in sinu alterius?* Ad id monet Apostolus I Corinth. vii : *Propter fornicationem, unusquisque uxorem habeat* (fornicationem, inquit, vitandam); et subditur : *Melius est nubere quam uri*; Item Hebr. ult. : *Honorabile conubiium in omnibus*, supple : *sit : et torus immaculatus. Fornicatores enim et adulteros judicabit Deus*, idest damnabit. Admonitio ista fit non valentibus continere, et non illis qui valent, et volunt continere : illud enim melius est : unde I Cor. vii : *Qui matrimonio jungit virginem suam, bene facit : et qui non jungit, melius facit*; in eodem : *Volo omnes homines esse sicut me*, scilicet continentes. Commendandum est conjugium ut ametur, et ad doctrinam sanae regulæ dirigendum ut modo debito contrahatur, et contractum custodiatur. Ad commendationem ipsius quatuor faciunt : primo, honor ei a Deo exhibitus : secundo, pretiosus ejus fructus : tertio, hoc quod sacramentum est : quarto, magna ejus efficacia. Circa primum notandum, quod Deus honoravit conjugium illud instituendo, et in diluvio conjuges salvando : honoravit etiam illud in incarnatione, et in nuptiis, et adhuc honorat in Ecclesiæ benedictione. Quantum ad ejus institutionem quatuor pertinent ad ejus honorem. Primo, instituentis auctoritas, cum alios ordines instituerit aliquis sanctus, ut Augustinus vel Benedictus, ordinem matrimonii instituit ipse Deus qui errare non potest : unde si culpabilis est qui ordinem Benedicti transgreditur, constat valde culpabilem esse qui transgreditur ordinem matrimonii a Deo institutum. Secundo, locus in quo institutum

est, scilicet Paradisus : institutum enim est immisso sopore in Adam, Gen. ii : *Et raptus est Adam in spiritu*, et interfuit curiæ cœlesti, ubi agnovit virtutem matrimonii et ejus rei esse sacramentum, et erat Adam tunc corpore in paradiso terrestri, mente verò in paradiso cœlesti. Tertio est antiquitas : non enim de novo institutus est ordo iste, immo antiquitate excedit omnem ordinem in terris institutum. Quarto, status innocentiae in quo est institutum : institutum enim est illo felici tempore, in quo homo nondum peccaverat.

### CAPUT XXVII.

*Commendatio matrimonii.*

Tempore diluvii solos conjuges salvavit : in arca enim salvati sunt Noe et uxor ejus, et tres filii ejus et eorum uxores : si qui erant concubinari, si quæ meretrices, omnes diluvio perierunt. Hunc ordinem beata Virgo intrare voluit, licet proposuisset servare virginitatem, quod non parum fuit ad honorem matrimonii : noluit Deus Filius carnem ex ea sumere, nisi donec esset in matrimonio. Matrimonium est pallium, quo beata Virgo usa est quo occultaret cœlestem conceptum : sub hoc pallio celatum est Diabolo mysterium redemptionis nostræ. Infelices et maledictæ sunt illæ quæ potius eligunt esse in confusione diaboli, quam in ordine beatæ Virginis. Confusio diaboli est status meretricum, quæ quandoque peccant cum patre, post cum filio, quandoque cum duobus fratribus vel cognatis, quandoque cum solutis, quandoque cum conjugatis, quandoque cum Sacerdotibus, quandoque cum Religiosis, quandoque cum leprosis. Infelices etiam sunt adulteræ conjugio non deferentes, nec timentes pallium beatæ virginis inquinare. Honoravit etiam conjugium in hoc quod voluit interesse nuptiis cum matre sua et discipulis suis, ubi voluit facere primum miraculum aperte, quod fecit coram discipulis, mutando aquam in vinum. Honorat etiam conjugium in excellenti benedictione quam Ecclesia facit conjugibus juxta altare ad Missam in præsentia Dominici corporis. Qui potius vult esse concubinarus quam in conjugio, potius vult habere maledictionem, quam benedictio-

nem : quamdiu est enim in peccato, maledictum est quidquid agat. Psal. *Noluit benedictionem, et elongabitur ab eo.* Concubinarij habebunt maledictionem, audient enim illud Matth. *Discedite a me maledicti in ignem æternum.* Qui autem bene se habent in matrimonio, audient illud : *Venite, benedicti Patris mei.* Ad commendationem matrimonii facit pretiosus fructus qui a matrimonio sequitur : generantur inde filii hujus sæculi, qui post per adoptionem sunt filii Dei. Si quis haberet vineam quæ annuatim ferret mille modios vini, valde amaret eam. Quantum ergo amandum est matrimonium, unde pueri procreantur, cum puer unus prævaleat toti vino quod in mundo est? Ex matrimonio generantur virgines : unde si virginitas multum est amanda, et matrimonium multum est amandum. Hieronymus : « Laudo conjugium, quia virgines generat : lego de spinis rosam, de concha margaritam. » Item, ad commendationem matrimonii facit quod est unum de sacramentis Ecclesiæ; unde Apostolus loquens de ipso dicit, Eph. v : *Sacramentum hoc magnum est, ego autem dico in Christo et in Ecclesia.* Ad commendationem ipsius facit magna ejus efficacia, quæ potest ostendi multipliciter. Primo per hoc quod opus carnale, quod sine eo esset mortale, cum eo est veniale, vel omnino sine peccato. Secundo per hoc quod remedium est contra mala, quæ ex meretricio sequuntur, quæ sunt sterilitas, prolis interfectio, incestus. Tertio per hoc quod adeo efficax est ad concordiam faciendam, quæ multum placet Deo, sicut discordia multum ei displicet, ut tota patria una uno matrimonio quandoque ad concordiam reducitur. Prov. vi : *Sex sunt quæ odit Dominus, et septimum detestatur anima ejus : septimum quod detestatur est Qui seminat inter fratres discordias.* Quarto per hoc quod defendit hominem ex ea parte qua diabolus eum fortius impugnat. Job xl : *Fortitudo ejus in lumbis ejus.* Ad statum conjugalem pertinet ut vir debito modo se habeat ad uxorem, et prolem, et domus et familiæ gubernationem. Ad uxorem vero eam ducendo, et post cohabitando. Ducendo vero attendere debet qualis ducatur, et qua intentione. Qualis ducatur, attendendum est : quia, ut ait Philosophus : *Rara avis est in terris bona uxor;* Eccl. : vii : *Virum unum de mille reperi; mulie-*

*rem ex omnibus non inveni.* Ideo in eligenda uxore adhibenda est diligentia, ne contingat errare errore quem homo non possit emendare. Sapiens : « Nulla est uxoris jam conjunctæ probatio, sed qualiscumque obvenerit, est habenda, et et jugiter retinenda etiam si iracunda, si fatua, si deformis, si superba, si fœtida; » Fulgentius : « Uxor aut perpetuale refugium, aut perenne tormentum. » Uxor bona virum iratum mitigat (unde mulier dicitur quasi molliens virum) et ad Deum convertit. I Cor. vii : *Sanctificatus est enim vir infidelis per mulierem fidelem.* De hoc exemplum habetur in beata Cæcilia, quæ desponsata mox sponsum convertit ad Christum. Prov. xii : *Mulier diligens corona est viro suo.* Propter hoc, et his similia dicuntur Eccl. xxv : *Mulieris bonæ beatus vir;* et post : *Pars bona, mulier bona.* Periculosum est habitare cum muliere mala : unde Eccl. xxv : *Leoni et draconi placebit magis commorari quam habitare cum muliere nequam.* Tria dicuntur hominem expellere de domo; scilicet : fumus, stillicidium, et mala uxor.

## CAPUT XXVIII.

*Quomodo ducendo uxorem se debeat habere.*

Eligenda est pro uxore mulier bona : adjutorium enim debet esse salutis, secundum illud Gen. ii : *Faciamus ei adjutorium.* Si bona sit, magnum est adjutorium salutis, cum sit familiarissima; si vero sit mala, magnum impedimentum salutis. Sed quia nullus potest habere uxorem bonam, nisi a Deo detur, volens inire conjugium, orando et orare faciendo et eleemosynas dando, debet eam a Deo querere. Proverb. xxx : *Domus et divitiæ dantur a parentibus, a Domino vero proprie uxor prudens;* Eccl. xxvi : *Pars bona, mulier bona, in parte timendum Deum dabitur viro pro factis bonis.* Attendendum est etiam quod sit de bona progenie. Timendum est ducere etiam filiam usurarii vel raptoris. Hæc fuit una de causis diluvii : *Videntes enim filii Dei filias hominum quod essent pulchræ, acceperunt sibi uxores ex omnibus quas elegerant,* Gen. vi. Filii Dei vocantur qui erant de stirpe Seth, filii ho-



minum, qui erant de stirpe Cain. Debet eligere uxorem sibi similem, scilicet nobilem, si est nobilis, ignobilem, si sit ignobilis. Genes. ii : *Faciamus ei adiutorium simile sibi.* De costa viri formavit Deus mulierem ne posset unus contra alterum gloriari se esse de nobiliori genere. Non formavit Deus mulierem de capite, ne crederetur formata ad dominationem : nec de pede, ne crederetur subjienda in servitutem, sed de medio, ut haberetur tamquam socia. Poeta :

Si qua voles apte nubere, nube pari.

Paritas illa non solum attendenda est quantum ad nobilitatem, sed etiam quantum ad juventutem et pulchritudinem : quando enim juvenis et pulchra nubit seni et deformi, habet eum exosum, et adultera efficitur. Paritas ista bene in annulo ostenditur, qui si strictior sit, digito non congruit ; si vero latior, decedit ; sic se habet inter conjuges, si sint dispares, quia simul manentes non sunt concordēs, vel unus ab altero discedit. Volens inire conjugium debet habere intentionem rectam : non enim debet eam ducere causa luxuriæ ; sed causa prolis procreandæ, et fornicationis vitandæ, et ut habeat heredem Dei cultorem. Desiderium debet habere generandi filios secundum carnem, qui post fiant filii Dei per adoptionem. Tob. vi, dixit Angelus Tobie minori : *Hi qui conjugium ita suscipiunt, ut Deum a se et sua mente excludant, et suæ libidini ita vacent sicut equus et mulus, quibus non est intellectus, habet super eos dæmon potestatem* ; in eodem : *Accipies virginem cum timore Domini, amore filiorum magis quam libidine ductus* ; Ibid. viii : *Dixit Tobias minor : Nunc, Domine, tu scis, quoniam non luxuriæ causa accipio uxorem meam, sed sola posteritatis dilectione, in qua benedicatur nomen tuum in sæcula sæculorum.*

### CAPUT XXIX.

*Quomodo se debeat habere cum uxore sua.*

Postquam vero uxorem duxerit, debito modo ad eam se debet habere, discrete et temperate eam amando, eam honorando, temperate ea utendo, benigne eam tractando. Sapiens : « Adulter est in uxorem propriam amator ardentior. »

Hieronymus *Advers. Jovinianum*, loquens de quodam nimis amante uxorem suam : « Origo, inquit, amoris honesta erit, magnitudo deformis : nihil autem interest ex qua honesta causa quis insaniat. » Sapiens ergo iudicio debet amare uxorem, non affectu : nihil est fœdus quam uxorem amare quasi adulteram. Honorare debet eam tamquam sociam, I Petr. iii : *Quasi infirmiori vasculo muliebri, impartientes honorem.* Temperate debet ea uti ut nec loco, nec tempore, nec modo indebito ei commisceatur. Tob. vi : *Dixit Angelus : tu, cum acceperis eam, per tres dies continens esto.* Benigne debet eam tractare, cum matrem et patrem et alios sibi attinentes propter ipsum reliquerit. Coloss. iii : *Viri, diligite uxores vestras, et nolite esse amari ad illas.* Ad prolem sic debet se habere sicut docet Augustinus, ut scilicet « amanter suscipiatur, benigne nutriatur, religiose educetur. » De amore uxoris et prolis dicitur. Prov. v : *Cerva carissima et gratissimus hinnulus.* Valde cara debet esse uxor, quæ sic fornicatores, sicut cerva serpentes, persequitur : et filius valde debet esse gratus qui ad modum hinnuli ad bona est agilis, visu fidei perspicax, virtutum varietate distinctus. Ad gubernationem domus pertinet ut dominus ejus bonis moribus et actibus eam ornet. Seneca : « Non velis dominum esse notum a domo, sed domum a domino. » Idem : « Qui domum intraverit, nos potius miretur, quam supellectilem nostram. » E contra dicit Tullius Sallustio : « Non est quicquam turpius domi tuæ, quam tu ipse. » Diogenes cum illi domum suam homo turpis ostenderet, omnibus in ea locis lapidibus, et auro nitentibus, in faciem domini expuit, dixitque, nihil aliud vilius in illa domo respexisse. Quantum ad personas domus suæ sic debet se habere, ut domesticos diligat, contineat et promoveat. I Tim. v : *Si quis suorum, et maxime domesticorum, curam non habet, fidem negavit, et est infideli deterior.* Non debet esse nimis austerus familiæ suæ. Eccli. iv : *Noli esse quasi leo in domo tua evertens domesticos tuos.* Extraneos hilariter et curialiter accipere. Rom. xii : *Hospitalitatem sectantes.* Heb. xiii : *Caritas fraternitatis maneat in vobis : per hanc enim placuerunt quidam, Angelis hospitio receptis.* Cicero : « Ampla domus domino fit dedecori, si est in ea solitudo, et maxime si



sub alio domino solita est frequentari; » Item Cicero : « Decorum est valde domos illustrium virorum illustribus hominibus patere. » Et intelligas viros illustres non solum illos qui sunt præditi potentia et honore istius sæculi, sed magis justitia et bonitate conspicui, etiam si pauperes sint et abjecti. Luc. xiv : *Cum facis prandium, aut cœnam, noli vocare amicos tuos, nec vicinos divites, ne forte hi reinvitent te, et fiat tibi retributio; sed cum facis convivium, voca pauperes et debiles et cæcos et claudos, et beatus eris, quia non habent unde retribuunt tibi: retribuetur enim tibi in retributione justorum.* Circa rei familiaris administrationem instruenda est, ut temporalia bona solerter et fideliter multiplicet, caute servet, et prudenter dispenset.

## CAPUT XXX.

*Quod volens continere non sit prohibendus.*

Si aliquis adolescentium, Dei inspiratione, voluerit continere, vel etiam Religionem intrare, non est a parentibus prohibendus, secundum illud Prov. iii : *Noli prohibere benefacere eum qui potest, sed si vales, et ipse benefac.* Timendum est in talibus Spiritum sanctum contristare vel extinguere, vel prohibere : peccatum enim in Spiritum sanctum videtur esse. Ephes. iv : *Nolite contristare Spiritum sanctum;* Ibid. : *Spiritum nolite extinguere;* Act. xi, ait Petrus : *Ego quis eram qui possem prohibere Dominum?* Spiritus malignus, non spiritus bonus eum ducit, qui Spiritui sancto resistit. Dicitur, Sap. iii, de Spiritu sancto, quod amat bonum actum, et nihil vetat benefacere; non est ergo a Spiritu sancto quod aliquis prohibet propositum bonum impleri. Quando aliquis intrat Religionem, præsumendum est quod Spiritus sanctus eum ducat. Cum Maria concepisset, et incertus esset Joseph an res bona, vel mala esset, Angelus in meliorem partem hoc determinavit. Interpretatio in meliorem partem est angelica, interpretatio vero in deteriore est diabolica, Genes. iii, fecit diabolus talem interpretationem Evæ dubitanti. Cum per Spiritum concipit aliquis salubre propositum, magna crudelitas est extinguere conceptum ipsius. Hero-

diana malitia est, et babylonica crudelitas, parvulos natos extinguere : herodianam vero et babylonicam malitiam videntur excedere qui, ante nativitatem, spiritualem conceptum in hominibus suffocant. In hoc videntur esse pejores dracone infernali. *Qui stetit ante mulierem, quæ erat paritura, ut cum peperisset, filium ejus devoraret.* Apoc. xii, et Corin. vii : *Bonum est homini mulierem non tangere.* In eodem dicitur de viduis et virginibus : *Bonum est illis si sic permanserint, propter duo. Bonum est eis si sic permanserint, propter prærogativam virginitatis, et incommoda vitæ conjugalis. Prærogativa virginitatis inferius ostendetur; incommoda vero vitæ conjugalis ostendit Hieronymus in lib. Adver. Jovinianum, in his verbis : « Fertur aureolus Theophrasti liber de nuptiis, in quo quærit an vir sapiens ducat uxorem. Et cum definisset, si pulchra esset, si bene morigerata, si honestis parentibus, si ipse sanus ac dives, sic sapientem aliquando inire matrimonium, statim intulit : Hæc autem raro in nuptiis universa concordant. Non est ergo uxor ducenda sapienti. Primum enim impediri studia philosophiæ, nec posse quemquam libris et uxori pariter inservire. Multa esse quæ matronarum usibus necessaria sint, pretiosæ vestes, aurum, gemmæ, sumptus, ancillæ, suppellex varia, lecticæ, et esseda deaurata. Deinde per noctes totas garrulæ conquestiones. Si totam ei domum regendam commiseris, serviendum est; si aliquid tuo arbitrio reservaveris, fidem sibi habere non putabit, sed in odium vertetur ac jurgia, et, nisi cito consulueris, parabit venena. Anus si intromiseris et aruspices, periculum pudicitiae est : si prohibueris, suspicionis injuria. Verum quid prodest etiam diligens custodia, cum uxor servari impudica non possit, pudica non debeat? Infida enim custos est castitatis necessitas, et illa vere pudica dicenda est, cui licuit peccare, si voluit. Pulchra cito adamatur, fœda facile concupiscit. Difficile custoditur, quod plures amant. Molestum est possidere, quod nemo habere dignetur; minori tamen miseria deformis habetur, quam formosa servetur. Nihil tutum est, in quo totius populi vota suspirant. Alius forma, alius ingenio, alius facetiis, aut liberalitate sollicitat : aliquo modo, vel aliquando expugnatur quod undique incessitur. Quod si propter dispensationem domus, et lan-*

guoris solatia, et fugam solitudinis ducuntur uxores, multo melius servus fidelis dispensat, obediens auctoritati domini, et dispensationi ejus obtemperans, quam uxor; quæ in eo se aestimat dominam, si adversum viri faciat voluntatem, idest quod placet, non quod jubetur. Assidere autem ægrotanti magis possunt amici et vernulæ beneficiis obligati, quam illa quæ nobis imputat lacrymas suas. Sapiens autem nunquam solus potest esse: habet secum omnes qui sunt, quique unquam boni fuerunt, et animum liberum quocumque vult, transfert. Quod corpore non potest, cogitatione complectitur: et si hominum inopia fuerit, loquitur cum Deo; nunquam minus solus erit, quam cum solus fuerit. Porro liberorum causa uxorem ducere, ut vel nomen nostrum non intereat, vel habeamus senectutis præsidia, et certis utamur heredibus, stolidissimum est. Quid enim ad nos pertinet recedentes e mundo, si nomine nostro alius nominetur, et filius non statim patris vocabulum referat, et innumerales sint, qui eodem vocantur nomine? Aut quæ sunt senectutis auxilia, emutrire domi, qui aut prior te forte moriatur, aut perversissimis moribus sit, aut certe cum ad maturam ætatem venerit, tarde ei videaris mori? Heredes autem meliores et certiores sunt amici et propinqui, quos iudicio deligas, quam quos velis nolis, habere cogaris. »

### CAPUT XXXI.

#### *Quod nobilibus multum sit necessaria humilitas.*

Monendi sunt adolescentes nobiles ad humilitatem. Conveniens ornatus nobilium est humilitas. Bernardus: « Nescio quo pacto vis humilitatis major in majoribus, et clarior in clarioribus comprobatur. » Item, idem loquens de humilitate Salvatoris petentis a Joanne baptizari: « Sic plane, sic decet, ut vincat humilitate, qui sublimitate vincebat. » Adolescenti multum est necessaria humilitas, quæ non solum est gratia, sed etiam vas et receptaculum aliarum gratiarum: *Deus enim humilibus dat gratiam*, Jac. iii, et I Petr. v. Non patitur natura vacuum quin illud impleat, nec gratia humilitatem, quin illi se infundat. Humilitas hau-

rit gratiam ut vas inclinatum. Eccl. xiii *Humiliare Deo, et expecta manus ejus*, manum scilicet condonantem mala, et donantem verba bona. Humilitas fundamentum est ædificii spiritualis, ideo necessaria est adolecenti tamquam vitam bonam inchoanti. Augustinus: « Construere vis fabricam magnæ celsitudinis? de fundamento cogita profundæ humilitatis; » Hieronymus: « Prima virtus Christianorum est humilitas; » Gregorius: « Origo virtutis est humilitas: illa in nobis virtus veraciter pullulat, quæ in radice propria, idest in humilitate, perdurat; » Augustinus: « Arborem attendite: figit radicem in humili, ut vertice tendat ad cælum. » Idem, loquens ei qui sine humilitate vult proficere: « Sine radice arbor perit, ruina est non crementum. » Humilitas reddit adolescentem Deo et hominibus amabilem, sicut superbia facit eum odiri. Eceles. x: *Odibilis est Deo et hominibus superbia*. Multum valet humilitas adolecenti ad hoc ut studio sapientiæ proficiat. Prov. xi: *Ubi humilitas, ibi sapientia*; Matth. xi: *Revelasti ea parvulis*. Propter defectum humilitatis dixit Didymus Philosophus Alexandro: « Deus præsto est largiri tibi sapientiam, sed non habes ubi eam recipias. » Ptolomæus in *Almagesto*: « Inter sapientes sapientior comprobatur qui humilior existit. » Beda: « Humilitas est clavis scientiæ. » Ipsa humilitas videtur esse pars sapientiæ. Gregorius: « Prima stultitia est elatio cordis. Vera sapientia efficitur hominis humilitas suæ aestimationis. » Augustinus in lib. *De verbis Domini*: « Quanto humiliter sedebat Maria, tanto amplius capiebat: confluit enim aqua ad humilitatem vallis de supercilio montis. » Multum etiam valet adolecenti humilitas ad hoc ut in bonis moribus valeat informari, nam sine illa non informatur. Hugo de Sancto Victore: « Sciendum quod sicut cera nisi prius emollita fuerit, formam non recipit, sic et homo per manum actionis alienæ ad formam actionis non flectitur, nisi prius per humilitatem ab omni actionis rigore molliatur: nec enim per exemplum alterius poterit in melius reformari, qui adhuc per elationis vitium bona aliena oppugnat, et mala sua defendit. » Valet ad humilitatem adolescentis quod non detur ei potestas festina in bonis paternis. Eccl. xxx dicitur de puero: *Ne des illi potestatem*. Damnosum fuit filio prodigo quod a patre data est ei por-

tio substantiæ, quæ eum contingebat. Luc. xvi. Prov. xix : *Substantia festinata minuetur* ; Gregorius : « Nummum puero subtrahimus, cui tamen totam hereditatem reservamus ; » Gal. iii : *Quanto tempore heres est parvulus, nihil differt a servo*, quantum ad subjectionem et disciplinam, de qua Eccl. xxvi : *Cibaria et virga et onus asino, panis et disciplina et opus servo*.

## CAPUT XXXII.

*De radice a qua paterna disciplina procedit.*

Ad suscipiendam disciplinam libenter, vel saltem patienter, primo movere debet radix unde procedit, vel pietas, vel caritas paterna ; secundo utilitas disciplinæ ; tertio bonum patriæ. Primum ostendit Salvator Petro volenti impedire tribulationem passionis suæ dicens, Joan. xviii : *Calicem, quem dedit mihi Pater, non vis ut bibam illum?* Gregorius : « Ille solus de flagello murmurat qui animum percussoris ignorat ; » Apoc. iv : *Ego, quos amo, arguo et castigo* ; Augustinus : « Non omnis qui pareit, amicus est, nec omnis qui verberat, inimicus : melius est cum severitate diligere quam animi lenitate decipere ; » Idem : « Et qui phreneticum ligat, et qui letargieum excitat, ambobus molestus ambos amat. » Prov. xxvii : *Meliora sunt vulnera diligentis, quam fraudulenta oscula odientis*. Amari et cara debent haberi quæ a patre amantissimo dantur, nihil sinistrum suspicari debemus in eo quod ab eo recipimus.

## CAPUT XXXIII.

*De utilitate quæ in præsentibus ex disciplina provenit et periculo quod projiciens eam incurrit.*

Circa secundum notandum, quod virga disciplinæ non est fugienda, sed apprehendenda. Psal. ii : *Apprehendite disciplinam* ; *Glossa* : etiam si fugiat. Prov. iii : *Tene disciplinam, et ne dimittas eam*. Amanda est, non timeunda, virga aurea, nam ferrea signum est dementiæ, ut virga Assueri, et debet eam osculari ille cui ostenditur. Non est virga conterens,

sed virga fructum salubrem ferens : sicut virga Aaronis virga est dilectionis filios Dei dirigens in via regni cœlestis. Virga ista non est projicienda : projecta enim vertitur in colubrum qui occidit. Exod. iv : *Qui tribulationem sustinere non vult, mortem æternam incurret*. Percussio istius virgæ lenis est et brevis, et liberat a culpa æternæ damnationis. Prov. xxiii : *Si percusseris eum virga, non morietur. Tu virga percuties eum, et animam ejus de inferno liberabis*. Virga disciplinæ, sicut virga Moysis, de petra aquam producit : habentes enim corda lapidea eum infirmitate vel aliter a Deo percutiuntur ut in lacrymas resolvantur, Deo devoti efficiantur. Virga disciplinæ stultitiam fugat, et sapientiam inducit. Prov. xxii : *Stultitia colligata est in corde pueri, sed virga disciplinæ fugabit eam*. Ib. xxix : *Virga atque correctio tribuit sapientiam* : Eccl. xxii : *Flagella et doctrina omni tempore sapientia*, idest causa sapientiæ. Si sapientia habeatur, amittitur si disciplina abjiciatur, ut patet in Salomone, de quo Gregorius in *Pastor*. « Cor Salomonis idcirco sapientia funditus deseruit, quoniam ipsam nulla disciplina exterius eustodivit ; ideo dicitur Sap. iii : *Sapientiam et disciplinam qui abjicit, infelix est*. Disciplina vitia extinguit, virtutes perficit. Gregorius dicit de beato Benedicto, qui propter tentationem carnis projecit se in spinis, quod « vulnere corporis sanavit vulnus mentis ; » Idem : « Quis nesciat quod multo melius est ardere flammis febrium, quam igne vitiorum ? » Idem : « Durum non æstimes esse quod pateris, dum exteris cruciatibus ab interna passione liberaris ; » II Cor. xii : *Virtus in infirmitate perficitur*. Tribulatio, velut ignis, aurum virtutum purgat, vitia annihilando hostem debilitat, scilicet corpus ut a spiritu possit superari, occasionem dat ut Deus gratiam augeat, I Cor. x : *Fidelis est Deus, qui non permittet vos tentari supra id quod potestis, sed faciet cum tentatione proventum, idest gratiæ augmentum ut possitis sustinere*. Item virtutem ad viriliter agendum provocat. Seneca : « Multum addit sibi virtus lacesita. » Gregorius : « Ignis flatu exprimitur ut crescat, his modis tribulatio virtutem perficit. » Non est timenda disciplina, qua Pater cœlestis filios suos corripit, sed gladius quo hostes occidit. Heb. xii : *Si extra disciplinam estis, cujus omnes participes facti sunt, ergo adulteri estis,*

*et non filii*; Augustinus: « Si exceptus es a passione flagellorum, exceptus es a numero filiorum; » Idem: « Noli esse iniquo sensu et puerili, ut dicas: plus amat pater meus fratrem meum, cui permittit facere quicquid vult, quam me: quia si me movero contra ejus jussionem, flagella invenio. Potius gaude in flagellis, quia tibi servatur hereditas; illis ad tempus parcat, quos in æternum damnabit; » Idem: « Quid mirum si flagellat custodiens parvulos Dominus, quos grandes quærit heredes? » Idem: « Non timeas flagellari, sed exheredari; » Gregorius: « Electi feriri paterna correptione desiderant, et dolorem vulneris salutis medicamina putant. » Habet disciplina amaritudinem propter quam aliquam projiciunt, sicut simia projicit nucem propter corticis amaritudinem, et ideo pervenit non ad nuclei dulcedinem; vir autem sapiens eam non projicit, sed ad modum disciplinæ eam involvit quasi sub quadam nebula præsentis utilitatis, vel admiscet zucorum æternæ dulcedinis. Hebr. xii: *Omnis disciplina in præsentibus videtur non esse gaudii, sed mœroris, postea autem fructum pacatissimum exercitatus per eam reddet justitiæ.* Disciplinam sequitur consolatio et in præsentibus et in futuro. Deut. viii: *Affixi te penuria, et dedi tibi manna;* Matth. v: *Beati qui lugent, quoniam ipsi consolabuntur;* Joan. xx: *Vos contristabimini, sed tristitia vestra vertetur in gaudium;* Baruch iv: *Qui inducit nobis mala, ipse rursus adducet nobis sempiternam jucunditatem cum salute nostra.* Mutatio ista tribulationis significata est, Joan. ii, in mutatione aquæ in vinum. Præeligenda est aqua tribulationis in vinum gaudii mutanda, vino gaudii temporalis mutando in aquam tribulationis æternæ. Exemplum hujus mutationis habes, Luc. xvi. in divites et Lazaro. *Dicit Abraham diviti, Fidi recepisti bona in vita tua, et Lazarus similiter mala; nunc autem hic consolatur, tu vero cruciaris.* Apes nutriuntur etsi pungant, quia mellificant: punctura toleratur, quia jucunditas sequitur. « Eccl. i: *Usque ad tempus sustinebit patiens, et postea reditio jucunditatis;* Gregorius: « Si illic dulcia appetimus, necesse est ut hic prius amara toleremus. » Pueri innocentes sunt sicut novi palmites Christo adhærentes, Joan. xi: *Ego sum vitis, et vos palmites;* Psal. xxiv: *Innocentes et recti adhæserunt mihi.* Qui palmites putat, partem eorum amputando, eis vide-

tur nocere, et ipsi palmites lacrymantur, et tamen, secundum veritatem, est ad palmitum utilitatem, purgantur enim, ut postea melius fructificent: sic est in pueris qui patienter disciplinam suscipiunt, Joan. xv. *Omnem palmitem in me non ferentem fructum, purgabit eum, ut fructum plus afferat.* Lacrymas bonorum puerorum Deus absterget. Apoc. xxi: *Absterget Deus omnem lacrymam ab oculis Sanctorum;* Bernardus: « Felices lacrymæ, quas pia manus Conditoris absterget. »

## CAPUT XXXIV.

### *De bono patientiæ.*

Circa tertium notandum quod ad suscipiendum patienter disciplinam, movere nos debet bonum sapientiæ, quæ compatiendo acquiritur et perficitur, quod bonum est valde magnum. De bono patientiæ edidit quemdam libellum beatus Cyprianus martyr, in quo patientiam commendat his verbis: « Patientia est virtus nobis cum Deo communis. Quæ autem gloria Deo similem fieri? Quanta felicitas habere in virtutibus quod divinis posset æquari laudibus? Ille summe innocens et justus inter facinorosos deputatur, et falsis testimoniis premitur, judicaturus judicatur, et Dei sermo ad victimam tacens subditur. Et cum ad crucem confundantur sidera, contremiscat terra, turbentur elementa, ille nec loquitur, nec movetur, nec Majestatem suam profitetur, ut in eo plena et perfecta patientia consummetur. Porro sudatur hic, vivitur et laboratur, nec sudantibus et laborantibus possunt magis alia quam patientiæ subvenire solatia. » Nec aliud magis justos et injustos discernit, quam quod in adversis per impatientiam blasphematur injustus et queritur, et patientia justus probatur. Secundum Platonem: « Patientia est robor totius philosophiæ; » Prov. xiv: *Qui patiens est, multa gubernatur sapientiâ; qui autem impatiens est, exaltat stultitiam suam.* Cum ira furor sit, secundum illud *Ira furor brevis est,* impatiens quasi furiosus stultitiam exaltat, magnam stultitiam agens. In eodem: *Impatiens operabitur stultitiam,* inimicissimo se subdit, iræ scilicet et furori, ut se vindicet de illo qui sibi mederetur, si ipse sustineat patienter. Bernardus:



« Mira perversitas, irascitur medicanti, et non irascitur sagittanti. » Prov. xix: *Doctrina viri, (Christi scilicet et hominis) multum per patientiam noscitur.* Gregorius: « Tanto quis ostenditur minus doctus, quanto quis minus patiens convincitur: » Psal. xci. *Bene patientes erunt ut amuntient* etc. Cum Deus, qui est sapientissimus, sit patientissimus, in fine mundi suas injurias est vindicaturus. Qui est magis patiens, magis est sapiens. Multum est necessaria nobis patientia in hoc loco exilii pleno malis. Hebr.: *Patientia vobis necessaria est*: Apoc. xiii: *Hæc est patientia, et fides Sanctorum.* In cælo non est ita necessaria patientia, ubi mala non sunt; nec in inferno, quia mala quæ ibi sunt, patientiam excedunt; sed in hac valle miseræ multum est necessaria. Qui patientiam hanc non habet, etiam seipsum non habet; immo ira vel furor ei dominatur. Luc. xxi: *In patientia vestra possidebitis animas vestras.* Hoc dominium in hoc attenditur, quia cohibet hominem interiorem ab illicito appetitu vindictæ: exteriorem etiam cohibet, linguam a contumelia, manum a violentia. Unde sicut dicitur de garrulo, quod non potest tenere linguam suam, de homine vero in verbis modesto dicitur contrarium: sic homo patiens potens est cohibere se interius et exterius ab his quæ pertinent ad vindictam. Impatiens si quid habet, cito emittit illud: ignis enim iræ omnia bona spiritualia ei aufert: unde dicitur: Prov. xix. *Qui impatiens est, sustinebit damnum,* et Eccl. vii, de his qui perdidit sustinentiam: *Qui non habet patientiam, est in magno periculo: sicut homo inermis qui est in medio hostium suorum.* Cum militia sit vita hominis super terram, et continue sit homo in bello periculoso, multum indiget patientiæ scuto. Patientia possessori suo mala convertit in bona. Si patiens mortiferum quid biberit, non ei nocebit: sermo enim venenatus, qui alium interficeret, ei non nocet. Ipsa in igne tribulationis hominem illæsum custodit, sicut pueros servavit illæsos in fornace Babylonis, Dan. iii, Isa. xliii: *Cum ambulaveris in igne, non combureris.* Patientiam habens in igne tribulationis positus, est aurum, in quo impatiens est palea. Augustinus in lib. *De civ. Dei*: « Sicut sub uno igne aurum rutilat, et palea fumat, et ubi paleæ comminuuntur, frumenta purgantur: ita una eademque vis irruens bonos probat, pu-

rificat, eliquat, malos damnat, vastat, exterminat. Unde in eadem afflictione mali Deum detestantur et blasphemant, boni Deum deprecantur et laudant. » Patientiam habens ad ignem tribulationis emit tit odorem Deo et hominibus gratum: impatiens vero foetorem Deo et hominibus exosum. Gregorius in *Moral.*: « Sicut aromata odorem suum cum incenduntur, expandunt, ita viri sancti omne quod de virtutibus redolet, in tribulationibus innolescent; » Augustinus in lib. *De civ. Dei*: « Non qualia, sed qualis quis patitur, interest: nam pari motu exagitatum et exhalat horribiliter canum, et suaviter fragat unguentum. » Patientia hominem invincibilem facit. Seneca: « Facilius est gentem unam quam virum unum vincere. » Idem, loquens de quodam qui patientia sua vicit ignem et duos reges: « Ego, inquit, non dubito quin magis laudem truncam illam manum Mutii, quam cujuslibet fortissimi salvam: stetit hostium flammaramque contemptor, et manum in hostili foculo distillantem spectavit, donec jussum est ut invito ignis eriperetur. Hoc tanto majoris fortitudinis putem, quanto rarius est manu amissa hostem vicisse, quam armata. Fecit bellum inermis et mancus, et illa manus trunca duos reges vicit. » Hoc Ethnicus:

Maxima virtutum patientia, pugnat inermis,  
Armatusque solet vincere sæpe viros.

Exemplum habemus de hoc in beato Vincentio, qui patientia sua vicit Dathanum. Legitur quod Socrates positus in carcere, cum esset qui permetteret eum fugere, noluit exire, ut duarum rerum gravissimarum hominibus metum auferret, mortis scilicet et carceris. Patientia gloriose triumphat, ita ut ejus triumphus triumpho fortitudinis præferatur. Prov. xvi: *Melior est vir patiens viro forti, et qui dominatur animo suo expugnatore urbium.* Rarior est hæc victoria, et vincenti utilior. Seneca: « Innumerabiles sunt qui populos, qui urbes habuerunt in sua potestate, paucissimi qui se: patiens vincit hostem qui jam est secum in arce. Difficilius est hosti resistere cum jam intravit in castrum et jam in arce est, quam quando est extra. Præterea, qui fortior est fortiori, fortior est minus forti. Cum aliquis multas urbes expugnavit, si postea se ipsum superaverit, nobilior est iste triumphus præcedentibus, quo urbium



victor est devictus. Hoc genus vincendi solius creaturæ rationalis est, cum vincere alium sit etiam brutorum. » Patientia malis omnibus dominatur, omnia serviunt ei, etiam mors. Illa servit tenebrorum carcerem corporis confringendo, et amicos Dei de manu persecutorum liberando.

### CAPUT XXXV.

*Quod ad suscipiendam libenter disciplinam exempla multorum possunt movere.*

Ad suscipiendam libenter disciplinam etiam multorum possunt movere exempla, sicut exemplum Tobiae et Job; Tob. II. Hanc tentationem permisit Deus evenire illi, ut posteris daretur exemplum patientiæ ejus, sicut et sancti Job. Jac. V: *Sufferentiam Job audistis, et finem Domini vidistis*: Gregorius: « Facta præcedentium patrum consideremus, et non erunt gravia quæ toleramus. » Item, exemplum præcipuum est exemplum Christi. Bernardus *Super Cant.*: « Utrumque es mihi, Domine Jesu, et speculum patiendi, et præmium patienti. » Utrumque fortiter provocat, ac vehementer accendit. Gregorius: « Si ipse hinc sine flagello non exiit, qui sine peccato venit, quomodo flagellis digni non erunt, qui hinc cum peccato venerunt? » Idem: « Si passio Domini ad memoriam revocetur, nihil adeo durum quod non aequo animo toleretur. » Quod memoria passionis Christi aquas tribulationis dulcoret, significatum est Exod. XV, ubi lignum ostensum est Moysi a Domino, unde aquæ dulcoratæ sunt. De disciplina Christi Isaias multum loquitur, Isa. I: *Corpus meum dedi percutientibus, et genas meas vellentibus: faciem meam non averti ab increpantibus et conspuentibus in me.* Littera secundum Hebraicum sic habet: « Dorsum meum posui ad flagella, et genas meas ad alapas; Ib. LIV: *Disciplina pacis nostræ super eum, et livore ejus sanati sumus*; et Thren. III: *Dabit percutienti se maxillam.* Hæc Christus passus est, non quia correctione indigeret, sed ut exemplum patiendi nobis daret. I Petr. II: *Christus passus est pro nobis, vobis relinquens exemplum ut sequamini vestigia ejus, qui peccatum non fecit etc.*

### CAPUT XXXVI.

*De his quæ ad obedientiam monent, quæ sunt: sacra doctrina, Sanctorum exempla, omnis creatura.*

Monendi sunt pueri ad obedientiam filialem. Ad obedientiam multum monet sacra doctrina. Sanctorum exempla, et universa creatura. Item, obedientia multum Deo placet, homini multum prodest. Inobedientia enim multum Deo displicet, homini multum nocet. De admonitione sacræ doctrinæ pauca ponere sufficiat. Deuter. XI: *Propono vobis benedictionem, si obedieritis præceptis Domini*; Ibid. XVII: *Facies quæcumque dixerint qui præsumunt loco quem elegit Dominus*; Eccles. ult.: *Time Deum, et mandata ejus observa*; Matth. XIX: *Si vis ad vitam ingredi, serva mandata*; Rom. XIII: *Omnis anima potestatibus sublimioribus subdita sit*; Heb. XIII: *Obedite præpositis vestris, et subjacete eis.* Inter exempla specialiter admonet exemplum Abrahæ, et exemplum Christi. Cum homo recessisset a Deo per inobedientiam, Deus volens formare populum sibi acceptum, secundum illud Isa. XLII: *Populum istum formavi mihi, laudem meam narrabit*; Abraham, ex quo populum sibi formaturus erat in obedientia voluit probare, et per eam ei placuit. Triplici vero præcepto probavit ejus obedientiam. Primum fuit de patriæ desertione. Genes. XII: *Egredere de terra etc.* Secundum fuit de circumcisione, ibid. XVII. Tertium de filii immolatione, ibid. XXVII. Primo præcepto voluit Dominus separare Abraham ab his, a quibus ipse ortum duxerat. Tertio vero ab eo qui duxerat originem ab eo. Medio vero præcepto voluit eum separare a seipso, quantum ad carnalia desideria. Circumcisio enim facta in carne monebat ad resecationem superfluum carnalium, ideo fiebat in membro illo in quo maxima concupiscentia sæviebat. Circa præceptum vero tertium, quod fuit de filii immolatione, duodecim possumus attendere pertinentia ad difficultatem illius operis, in quo Abraham Deo præcipienti voluit obedire. Primum est quod amicissimum voluit occidi. Secundum est quod voluit eum occidi coram se, et etiam a se ipso propriis manibus. Aliquis enim sustineret quod filius ejus occide-

tur, tamen non posset hoc aspicere, vel propria manu facere. Tertium est quod filius ille erat unigenitus : non enim habebat alium filium ex libera uxore. Quartum est quod habuerat eum miraculose, quia de uxore vetula et sterili, cum ipse jam esset senex. Quintum quod magna promissio facta erat Abrahamæ de ipso. Sextum quod ipse solatium erat matri suæ : unde dicebatur Isaæ quod interpretatur risus. Dixit enim mater ipso doto : *Risum fecit mihi Deus ; quicumque audierit, corridebit mihi.* Gen. XXI. Quid dixisset mater pueri si Abraham revertens de filii immolatione dixisset ei : Immolavi filium tuum ? Septimum quod non solum voluit eum occidi, verum etiam incendi : unde dictum est ei : *Offer eum in holocaustum*, quod interpretatur totum incensum. Noluit ei parcere nec vivo, nec mortuo. Octavum quod voluit eum Deus duei per triduum ad locum immolationis, ut longitudine temporis tentatio augetur, et curis crescentibus paterna viscera cruciarentur. Nonum quod non apparebat aliqua præcepti utilitas. Quæ enim utilitas innocentem occidere ? damnum vero erat manifestum. Decimum est quod non excusasset eum auctoritas præcipientis, cum nullus testis affuisset : nec crederetur ei si diceret Dominum hoc sibi præcepisse. Undecimum est quod erat rationi contrarium, nec præcesserat hujus obedientiæ exemplum. Duodecimum est quod omnium, ad quorum notitiam pervenisset, imminebat scandalum. Abraham vero accepto hoc præcepto tam diffiili, nec se excusavit, nec causam præcepti quæsivit, sicut quidam faciunt imitatores diaboli, qui ait : *Cur præcepit vobis Deus ut non comederetis* etc. Genes. II. Item non distulit mandatum exequi, nulli consilium communicavit : si aliquod istorum fecisset, forsitan meritum amisisset, quia Dominus dixisset ei : *Nolebam quod faceres hoc, sed ad probandum te hoc dixi.* Item, attendendum est quantum utile sit promptum esse ad obediendum. Abraham filium non immolavit, et tamen tanti meriti ejus obedientia fuit. Genes. XXI : *Quia non pepercisti filio tuo unigenito propter me, benedicam tibi, et multiplicabo semen tuum ;* in eod. : *In semine tuo benedicentur omnes gentes, quia obedisti voci meæ.* Homo qui promptam habet voluntatem ad obedientiam, Deo in omnibus placet, etiam pro infinitis rebus quas nunquam facturus est. Gre-

gorius : « Non est manus vacua a munere, si arca cordis plena sit bona voluntate. » Item voluit Deus ipsum probare per obedientiam, in quo volebat sibi formare populum novum. Christus non terram, sicut Abraham, sed cælum reliquit. Ipse matrem suam dilectissimam reliquit, quando gladius erat transiturus animam ejus. Luc. II. Ipse domum reliquit, quia nullam habere voluit. Matth. VIII : *Vulpes foveas habent, et volucres cæli nidos ; filius autem hominis non habet ubi caput suum reclinet.* Ipse formam spiritualis circumcisionis dedit, quando voluntati suæ voluntatem patris præposuit, Matth. XXV : *Non sicut ego volo, sed sicut tu.* Ipse mandato Patris in holocaustum seipsum obtulit. Joan. XIV : *Sicut mandatum dedit mihi Pater, sic facio.* Christus obedientiæ vitam tenuit et in mundum veniens, et in mundo manens, et de mundo transiens. Primum ostendit Joan. VI, dicens : *Descendi de cælo non ut faciam voluntatem meam, sed voluntatem ejus qui misit me.* Ipse per obedientiam veniens in mundum intravit Virginis uterum, quia statim in utero ejus se recepit, cum illa verbo ejus per Angelum misso obedivit, dicens : *Ecce ancilla Domini* etc. Secundum ostendit in III, dicens : *Meus cibus est ut faciam voluntatem ejus qui misit me.* Tertium ostendit ibid. XIV : *Ut cognoscat mundus quia diligo Patrem, et sicut mandatum dedit mihi Pater, sic facio.* *Surgite, camus hinc*, scilicet ad locum passionis. Bernardus : « Mementote fratres ; Christus, ne perderet obedientiam, perdidit vitam. » In signum hujus filialis obedientiæ *inclinato capite emisit spiritum*, Joan. XIX. Ad obedientiam monet nos omnis creatura : etiam creatura insensibilis universaliter obedit suo creatori. De creatura cælesti dicitur Psal. CXLVIII : *Præceptum posuit, et non præteribit.* De mari et ventis dicitur Matth. VIII : *Venti et mare obediunt ei.* De terra dicitur Psalm. CIII : *Ascendunt montes, et descendunt campi in locum quem posuisti eis : terminum posuisti quem non transgredientur.* Soli dæmones et mali homines Deo non obediunt. Ambrosius : « Non mediocris pudor est, imperio Dei insensibilia elementa parere, et homines non obedire, quibus spiritus tributus est ab auctore. » Obedientia in homine multum Deo placet ; nec mirum : ipsa enim vere eum honorat, vere diligit, et propter

eam Deus hominem fecit. Vere Deum honorat : vere enim Deum habet pro Domino. Inobediens Deum pro Domino vere non habet, etsi ore Dominum vocet. Luc. vi : *Qui vocatis me Domine Domine, et non facitis quæ dico etc.* Inobedientes ostendet Deus non fuisse servos suos, cum janua regni cœlestis eis claudet. Matth. viii : *Non omnis qui dicit mihi Domine Domine, intrabit in regnum cœlorum ; sed qui facit voluntatem Patris mei qui in cœlis est, ipse intrabit.* Cum obediens verè honoret Deum, merito a Deo honorabitur, secundum illud Isa. lvm : *Si glorificaveris Deum dum facis vias tuas etc., extollam te super altitudinem terræ ;* I Reg. ii : *Quicumque honorificaverit me, glorificabo eum etc. ;* Eccl. x : *Semen hominum honorabitur hoc quod timet Deum ; semen autem hoc exhonorabitur quod præterit mandatum Domini.* Obedientia vere Deum diligit. Joan. xiv : *Si quis diligit me, sermonem meum servabit ;* in eod. : *Qui habet mandata mea et servat ea, ille est qui diligit me ;* I Joan. v : *Hæc est caritas ut mandata ejus custodiamus.* Item I Joan. ii : *Hæc est caritas Dei ut ambulemus secundum ejus mandata.* Propter obedientiam Deus hominem fecit, secundum illud Ecclesiast. ult. : *Time Deum et mandata ejus observa, hoc est omnis homo.* Unde si hoc non faciat ad quod factus est, justo Dei judicio destruendus est. Justissima ergo fuit sententia illa : *Quicumque die comederis ex eo, morte morieris.* Ad nihilum etiam in valore, licet non in substantia, reductus fuit præceptum Dei transgrediendo, secundum illud verbum Bernardi loquentis de illo : « Hoc est omnis homo. Si hoc est omnis homo, sine hoc nihil est homo : nihil, inquam, in virtute et valore, non in substantia. Sicut inobedientia est imago veteris hominis, qui Deo displicuit ; sic obedientia est imago et similitudo novi hominis, in quo Deus sibi complacuit. » Unde obediens multum placet Deo, sicut similis ejus filio carissimo. I Corinth. xv : *Sicut portavimus imaginem terreni, ita et portemus imaginem cœlestis.* Ad hanc similitudinem induendam monet nos Apostolus, Ephes. iv, dicens : *Induite novum hominem, idest similitudinem novi hominis, qui secundum Deum creatus est, idest opere divino conceptus, non humano.* Tantum placet Deo obedientia quod ipse diligit obedientem quasi omni genere atten-

tiæ. Matth. xii : *Quicumque fecerit voluntatem Patris mei qui in cœlis est, ipse meus frater et soror et mater est : immo diligit eum quasi seipsum.* Eccl. xxxiii : *Si est tibi servus fidelis, sit quasi anima tua, quasi fratrem sic tracta eum.* Obedientia tantum Deo placuit quod pro ea addiscenda et docenda Filius Dei in mundum venit, et plusquam triginta annis hic mansit, et mortem ignominiosam sustinuit. Obedientiæ et discipulus et Doctor esse voluit : multum eam dilexit, qui tam care emere ipsam voluit. Hebr. v : *Et quidem cum esset Filius Dei, didicit ex his quæ passus est obedientiam : didicit, inquam, per experientiam, vel in membris suis ex his quæ passus est propter aliorum inobedientiam.* Exemplo ipsius ex his malis quæ propter inobedientiam priorum parentum continue patimur, obedientiam discere debemus.

#### CAPUT XXXVII.

*Quod obedientia homini multum prodest.*

Obedientia homini multum prodest. Per eam homo bene se habet ad eum a quo est et sub quo est. Item ad eum qui juxta eum est, et ad id quod sub ipso est. Homo inobediens Deo, et illi qui loco Dei est, est illi a quo est, ingratus : et ideo ejus beneficiis indignus. Bernardus : « Ingratitudo est ventus urens, siccans sibi fontem pietatis. » Item ei sub quo est, est inutilis servus : et ideo ira ipsius dignus, secundum illud Proverb. xiv : *Iracundiam ejus inutilis sustinebit.* Quantum ad eum qui juxta ipsum est, servus est nequam, conservum non diligens, nec ei parcens quantum ad id quod sub ipso. Servus est infidelis in eo in quo solum habet dispensationem vel ministerium, usurpans sibi dominium. Perfecte vero obediens in his omnibus bene se habet, voluntatem Dei mandato ejus ostensam, non suam voluntatem in his implendo. Et cum ad Deum non solum ut bonus servus, sed ut bonus filius se habeat, necesse est ut Deum non solum bonum Dominum, sed etiam bonum patrem sentiat. Ille cum impleat patris mandatum, sperare potest regnum promissum, secundum illud I Pet. i : *Sperate in eam quæ vobis offertur gratiam revelatione Jesu Christi, quasi filii obedientiæ.* Filiis inobedientibus parata est pœna,

non gloria, secundum illud Deuteron. xvii : *Qui superbierit nolens obedire sacerdotis imperio, morietur*; Ibid. xxi : *Si genuerit homo filium contumacem, qui non audiat patris aut matris imperium, et coercitus obedire contempserit, lapidibus obruet eum populus*. Cum Dei bonitas hominem sine ejus meritis tantum honoraverit ad imaginem et similitudinem ejus creando, et super tot creaturas eum constituendo, verisimile est quod eum multum honorare debeat, si ad eum modo debito se habeat. Obedientia est mater virtutum, noverca vitiorum, ad meritum potens, ad salutem efficax : de hoste triumphat quod vult a Deo impetrat, hominem reddit benedictum, et efficit beatum. Secundum Gregorium : « Obedientia non tam est virtus quam mater virtutum : ipsa etiam est quæ ceteras virtutes menti inserit insertasque custodit, » sicut idem Gregorius dicit : « Sicut in arbore sylvestri fit ramorum abscissio, et rami arboris nobilis inseruntur, et sic arbor nobilis efficitur fructum pretiosum producens ; sic a mente sensus proprius et voluntas propria per obedientiam abscinduntur, et sensus divinus et divina voluntas assumuntur, et efficitur mens velut arbor nobilis producens fructum, quo Deus et Angeli et homines sancti lætificantur. » Obedientia est noverca vitiorum : libidinem enim, sive improbam voluptatem quæ radix est omnium vitiorum, multum destruit. I Petr. i : *Castificantes animas vestras in obedientia caritatis*. Cum aliquis Dei amore pure facit quod jubetur a Deo, vel eo qui est loco Dei, non habet ibi locum libido. Libido multum obest ad meritum ; unde Augustinus *Super Gen.* : « Oportebat ut homo sub Domino positus, ab aliquo prohiberetur ut esset ei virtus merendi obedientia. » Dum intendit aliquis propriam voluntatem facere, non videtur in hoc mereri nisi apud semetipsum ; ab illo enim merces expectatur, cujus voluntas fit. Non videtur ergo apud alium mereri nisi qui vult facere voluntatem alienam quod est obedientiæ. Gregorius : « Sola est obedientia, quæ meritum fidei possidet. Fides sine obedientia videtur esse ad cumulum damnationis. » Bernardus : « Ad cumulum damnationis videtur nobis relicta fides futuræ promissionis. » Fides cum sit cognitio domini Christi, aggravat culpam, et per consequens pœnam, sicut ignorantia attenuat. Major est con-

temptus in eo qui agnoscit dominium et negat obsequium, quam in illo qui non agnoscit dominium : si agnosceret, libenter redderet. Obedientia multum efficax est ad salutem : sacrificium est sine quo salus non est, et cum quo non est damnatio, secundum illud Eccl. xxv : *Salutare sacrificium est attendere mandatis*. Obedientia de hoste triumphat. Prov. xxi : *Vir obediens loquitur victoriam*. Populus judaicus cum legem transgrediebatur, vincebatur. Josue vii : *Anathema in medio tui Israel : non poteris stare coram hostibus tuis*. Similiter Adam factus inobediens suo superiori, inobediens habuit suum inferius. Gen. iii : *Comedit, et aperti sunt oculi ejus* ; Glossa Augustini : « Anima rationalis motus bestiales in carne sua erubuit ; » et subdit : « Motus iste de transgressione veniebat ; » et III Reg. xi, legitur de Salomone : *Fecit Salomon quod non placuerat coram Domino* ; subdit : *Et suscitavit Dominus adversarium Salomoni*. Vir obediens potest loqui victoriam, quia habet nobilissimum genus triumphi, sicut antiqui patres habita victoria solent cantare canticum laudis et gratiarum actionis. Nobilissimum genus triumphi est vincere seipsum quod facit vir obediens ; unde super illud, *Melior est obedientia* etc., dicit Glossa Gregorii : « Vir obediens loquitur victorias. Dum enim alienæ voci humiliter subdimur, nosmetipsos in corde superamus ; » Proverb. xvii : *Melior est qui dominatur animo suo, expugnatore urbium*. Multi urbes et regna sibi subjugaverunt qui tamen ad hunc nobilem triumphum non pervererunt. Hic triumphus proprium est hominis. Vincit leo cetera animalia, sed seipsum vincere non potest. Obedientia quod vult, a Deo impetrat. Gregorius : « Si obedientes fuerimus præpositis nostris, obedit Deus orationibus nostris. » Augustinus in lib. *De opere monachorum* : « Citius exauditur una oratio obediens quam decem millia contemptoris : » I Joan. iii : *Si cor nostrum non reprehendit nos, fiduciam habemus quod quicquid petierimus, accipiemus, quia mandata ejus custodimus*. Obedienti obediunt et creator et etiam creaturæ. De creatore habetur Josue x : *Non fuit postea tam longa dies, obediente Deo voci hominis*. Obedientia hominem benedictum reddit : dignus enim est qui Deo obedit ut Deus ei abundanter bona temporalia et spiritualia largiatur. Deuteron. xi : *Propono vobis*



*benedictionem, si obedieritis mandatis Domini*; Ibid. xxviii: *Venient super te omnes benedictiones istæ, et apprehendent te, si tamen præcepta ejus audieris, benedictus tu in civitate*, etc. Ad ostendendum hoc Salvator in cœlum ascensurus, in Bethania discipulis suis benedixit quod domum obedienciæ sonat. Obediencia beatum efficit in præsentis certa spe, in futuro in re. Proverb. xxix: *Qui custodit legem, beatus est*, et Simon beatificatur. Matth. xvi: *Beatus es Simon* etc. In signum hujus de Bethania Dominus in cœlum ascendit Luc. ult.: *Obediencia clavem paradisi invenit*, quam inobediencia amisit. Matth. xviii: *Si vis ad vitam ingredi, serva mandata*.

### CAPUT XXXVIII.

*Quod inobediencia Deo multum displicet, et homini multum nocet.*

Inobediencia in homine multum Deo displicet. Nec mirum: hominem enim Deo aufert. Gregorius in *Moral.* de inobediencia: « quasi jugum dominationis a se excutit, cum per inobedienciam subesse contemnit. » Hanc displicenciam multum ostendit pœna de inobediencia primorum parentum humano generi inflata. Idem ostendunt flagella quæ populo Judæorum intulit, cum ei inobediens fuit. Inobediencia homini multum nocet: Deum enim et ejus beneficia ei aufert. Merito Deum amittit inobediens, qui de se ei injuriam facit; nec dignus est recipere ejus beneficia, cujus non vult implere mandata. Gregorius: « Dignum est ut ab ejus beneficiis sit quilibet extraneus, qui ejus jussionibus non vult esse subjectus. » Inobediencia lignum mortis est, sicut obediencia est lignum vitæ. Bernardus: « Inobedienciam causam mortis omnes experimur, omnes morimur propter illam. »

### CAPUT XXXIX.

*De septem laudabilibus conditionibus quæ ad perfectam obedienciam pertinent.*

Et notandum quod septem sunt laudabiles conditiones ad perfectam obedienciam pertinentes. Prima est obedire libenter: secunda obedire simpliciter: tertia obedire hilariter: quarta obedire

velociter: quinta obedire viriliter: sexta obedire humiliter septima obedire perseveranter. Multum valet voluntatis intentio ad hoc quod obediencia sit grata, et obediencia fructuosa. *Spirituum ponderator est Dominus*, Prov. xvi; Ibid. xxi: *Appendit corda Dominus*; I Reg. xvi: *Deus intuetur cor*; Gregorius: « Cor, et non substantiam Deus pensat; nec perpendit quid in ejus sacrificio, sed ex quanto proferatur; » Hieronymus: « Quæ offeruntur, non sui pondere, sed offerentium voluntate pensantur. » Seneca: « Non quantum refert, aut quid fiat, sed quæ mente: regum æquavit opes, qui exiguum tribuit, sed libenter. » Parum placet sacrificium divinæ majestati, nisi placeat et offerens: nec mirum, cum bonorum nostrorum non egeat, et utilitas ad nos pertineat. Coacta sacrificia ei non placent: unde Exod. xxxv, ait Moyses: *Iste est sermo quem præcepit Dominus. Omnis voluntarius et pronus animo offerat primitias Domino*. David Psal. xxxiii: *Voluntarie sacrificabo tibi*; II Cor. vii: *Si voluntas prompta est secundum id quod habet, accepta est*. Utilius cum homine agitur cum donum ejus a Deo suscipitur, quam cum ei datur. Bernardus: « Quis mihi tribuat ut oblationem meam dignetur tanta majestas suscipere? Duo minuta habeo, Domine, corpus et animam: utinam hæc perfecte tibi possem in sacrificium laudis offerre. Bonum mihi longaque gloriosius est atque utilius ut tibi offeram, quam deseram mihi ipsi; » I Paralip. ult.: *Quod de manu tua accepimus, dedimus tibi*. Simplicitas obedienciæ Deo imperanti vel per se vel per eum qui est loco sui, multum est gloriosa; et ideo valde ei accepta, cum scilicet aliquid eo quod a Deo dicitur, creditur verum: eo quod ab ipso jubetur, creditur bonum. Gloriosum est principi si simplici verbo ejus credatur absque cautione pignoris, vel juramenti, vel fidejussoris: contrarium vero est ei ignominiosum. Hippocrates et Pythagoras indixerunt hanc legem discipulis suis, ut non essent ausi in sententiis suis interrogare propter quod, sed esset eis pro ratione dicentis auctoritas. Multum placuit in Abraham Deo obedienciæ simplicitas. De hac commendat Salvator primitivam Ecclesiam, dicens: « *In auditu aurium obedivit mihi*. » Bernardus in libro *De consid.*: « Omnibus nobis in initio conversionis nulla virtus magis est necessaria quam



simplicitas humilis, et gravitas verecunda. » Augustinus : « Obedientia nisi humilium esse non potest. » Ad hanc simplicitatem pertinet illud Psalm. LXXVI : *Deduxisti sicut oves populum tuum.* Diabolica quæstio est, Cur præcepit nobis Deus? Genes. III; et Luc. X : *Qui vos audit, me audit;* Bernardus : « Non te moveat magister imperitus, indiscreta potestas; sed memento quia non est potestas nisi a Deo, et qui potestati resistit, Dei ordinationi resistit; » Idem : « Quicquid vice Dei præcipit homo quod tamen non sit certum displicere Deo, non aliter omnino accipiendum est quam si præcipiat Deus. Quid enim interest utrum per se, aut per suos ministros sive homines sive Angelos, innotescat suum placitum Deus? » Hilaritas etiam obedientis multum est grata imperanti. II Cor. IX : *Hilarem datorem diligit Deus;* Bernardus : « Serenitas in vultu, dulcedo in sermone multum colorant obedientiam obsequentis. » Cum operibus obedientiæ pascatur Deus, quasi fel in escam Dei ponit, qui cum tristitia obedit Psalm. LXVIII : *Dederunt in escam meam fel.* Item grata est imperanti obedientiæ velocitas. Seneca : « Omnis benignitas properat, et proprium est libenter facientis cito facere : unde placet principibus cum præcepta eorum velociter implentur. » Prover. XXII : *Vidisti hominem velocem in opere suo? coram regibus stabit.* Necessaria est virilitas ad perfectionem obedientiæ. Bernardus loquens obedienti : « Manum tuam misisti ad fortia, agendum est instanter, et constanter obediendum, nec inter asperitatem verborum tam regalis est semita relinquenda. » Semitam obedientiæ etiam pro ignominiosa morte noluit Christus relinquere. Phil. II : *Factus est obediens usque ad mortem.* Item, necessaria est humilitas obedienti, quæ obedientiam custodiat ne evanescat, et in vitium transeat. Bernardus : « Magna est virtus humilitas, sine cujus obtentu virtus fortitudinis non solum virtus non fit, sed etiam in superbiam erumpit. » Luc. XVIII cap. : *Cum feceritis omnia quæ præcepta sunt, dicite, Servi inutiles sumus; quod facere debuimus, fecimus.* Sicut ramus arboris tanto magis inclinatur, quanto magis fructu est oneratus; sic humilior esse debet qui plura bona opera habet, cum omnia sint Dei dona. I Cor. III : *Quid habes quod non accepisti? Si autem accepisti, cur gloriaris quasi non acceperis?* Laudabilis est valde

perseverantia in obedientia, quæ summi regis singularis est filia, hæc sola est regni cœlestis hæres. Bernardus : « Quid currere prodest, et ante metam cursus deficere? sic eurrite ut comprehendatis. » Specialiter puerorum voluntas, cum sit volatilis et vaga, obedientia regi debet sub voluntate aliena. Sicut virga multum flexibilis paxillo stabili alligatur, ne vento agitata destruat: sic puer si a parentibus voluntati suæ dimittatur, parentes inde confunduntur. Proverb. XXIX : *Puer qui dimittitur voluntati suæ, confundit matrem suam.* Et specialius pueri regales necesse habent obedientiam addiscere, qui aliquando debent aliis imperare, sicut legitur de Filio Dei Hebr. V : *Et quidem cum esset Filius Dei, didicit ex his quæ passus est obedientiam;* Tullius : « Qui bene imperat, necesse est aliquando quod paruerit : et qui modeste paret, videtur aliquando quod imperare dignus sit. » Filialis obedientia et lege universali est debita, et Deo multum grata est. Ephes. VI : *Filii, obedite parentibus vestris in Domino, hoc enim justum est.* Unde invenitur hæc obedientia etiam in brutis. Coloss. III : *Filii obedite parentibus vestris : hoc enim beneplacitum est Domino.*

## CAPUT XL.

*Quod pueri nobilium malam societatem debent cavere.*

Monendi sunt pueri nobilium, ut malam societatem caveant, bonam diligant, sociis suis societatem bonam exhibeant. Dirigendi sunt in societatis electione et custodia. Multum est noxia malorum societas. Peccatum est morbus contagiosus, ut lepra. Non est tutum sanis habitare cum leprosis, nec bonis est tutum habitare cum malis. Eccl. X : *Qui tetigerit picem, inquinabitur ab ea : et qui communicaverit superbo, induet superbiam.* Seneca : « Malignus comes quamvis candido et simplici rubiginem suam affricuit. » Prov. XIII : *Amicus stultorum similis illis efficietur.* I Cor. XIII : *Corrumpunt bonos mores colloquia prava;* et amplius opera prava : « efficacior » enim « est vox operis, quam vox sermonis, » ut dicit Bernardus. Non est tutum agnis habitare cum lupis. Eccl. XIII : *Si communicabit lupo cum agno aliquando, sic peccator justo.* Qui vult ire ad sanctum

Jacobum, non ponit se in societate eorum qui vadunt Romam : societas enim non ducit nisi quo vadit : sic qui vult ire in paradysum, declinare debet societatem eorum qui vadunt in infernum. E contrario societas bonorum valde est utilis homini. Prov. xiii : *Qui cum sapientibus graditur, sapiens erit* : Seneca : « Cum his conversare qui te meliorem facturi sunt. » Carbo mortuus cum vivis positus vivificatur ; sic malus inter bonos bonus efficitur. Psal. xvii : *Cum sancto sanctus eris*. Qui est in societate bonorum, exemplis eorum ad bonum provocatur, quasi ad manum in paradysum trahitur, sicut de Paulo legitur Act. ix : *Ad manus autem trahentes introduxerunt Damascum*. Sicut apes floribus se pascunt, sic qui in bona societate est, exemplis bonis sociorum reficitur. Quintilianus : « Prudentis est quod in quocumque optimum est, si possit, suum facere. » Ad societatem incitat natura. Tullius in libro *De amicit.* : « Natura nihil solitarium amat, nec aliquid appetentius est sui similium quam natura. » Societas vera non est nisi inter bonos, et habet multum jucunditatis et commodi. Seneca : « Nullius rei possessio jucunda est sine socio. » Eunti in paradysum socius bonus est quasi vehiculum. Macrobius : « Comes facundus in via pro vehiculo est. » Tullius in libro *De officiis* : « In quibus eadem studia voluntatesque sunt eadem, in his sit ut alter altero æque delectetur ut se ipso, sicque fiat unus ex pluribus. » De commodo societatis dicitur Eccles. xiv : *Melius est duos esse simul quam unum, habent enim emolumentum societatis suæ*.

## CAPUT XLI.

*Quod filii nobilium societatem bonam sociis suis debent exhibere.*

Multum monendi sunt filii nobilium, ut sociis suis societatem bonam exhibeant, amare et amari ab eis studeant, blandos et affabiles se eis exhibeant, et infirmitates eorum tam morum quam corporum supportent patienter. Ad hoc quod aliquis amet proximum, primo incitat natura : secundo Scriptura : tertio gratia : quarto ad id valere possunt exempla : quinto potest ad hoc valere si ostendatur dilectionis utilitas magna : sexto si ostendantur oditi damna. Natura ad

hoc incitat, cum naturaliter præcepta juris naturalis scripta sint in corde hominis : quorum primum habetur Tob. iv : *Quod ab alio tibi odis fieri, vide ne aliquando alteri facias*. Secundum habetur Matth. vii : *Quæcumque vultis ut faciant vobis homines, et vos eadem facite illis*. Amor est debitum naturale : etiam creaturæ irrationales amorem habent ad individua suæ speciei. Eccl. xiii : *Omne animal diligit simile sibi, et omnis caro ad sibi similem conjungetur* ; Ibid. xxvii : *Volatilia ad sibi similia conveniunt*. Scriptura ad idem incitat. Joan. xiv : *In hoc cognoscent omnes quod discipuli mei estis, si dilectionem habueritis ad invicem* ; Ibid. xv : *Hoc est præceptum meum ut diligatis invicem*. Gratia hominem ad idem incitat, quæ ostendit hominem esse factum ad imaginem Dei. Licet aliquis amet omnes filios amici sui, tamen specialem amorem habet ad eum qui amico suo est similior ; sic licet ad opera Dei communiter amorem habere debeamus, tamen specialiter ad hominem ad ejus imaginem et similitudinem factum, Gen. i. Gratia ostendit proximum membrum esse illius corporis ejus Christus est caput. I Cor. 12 : *Vos estis corpus Christi*. Non amat caput, qui non amat membra. Item gratia ostendit homini proximum esse Dei filium, Christi fratrem et cohæredem, et æternæ gloriæ secum participem futurum. Si amandi sunt fratres qui dividendo hereditatem, portionem uniuscujusque minorem faciunt, quantum amandi sunt illi fratres qui portionem uniuscujusque augment? Quanto enim plures erunt electi, tanto amplius gaudebit unus electorum de gloria animæ alterius, quam de gloria proprii corporis. Ad amandum proximum possunt incitare etiam exempla ; et primo exemplum Christi. Non est despiciendus quem Christus ita carum habuit, quod pro ejus redemptione mori voluit. Appendere debemus proximum hoc pretio, ne nobis vilescat. Apocal. i : *Qui dilexit nos, et lavit nos a peccatis nostris in sanguine suo* ; Timoth. ii : *Qui dedit semetipsum pro nobis*. Secundo exemplum Angeli, qui adeo amat hominem, ut custodiat eum in omnibus viis suis. Non est despiciendus homo ab homine, qui adeo carus est Angelo. Matth. xviii : *Videte ne contemnatis unum ex illis pusillis. Dico enim vobis, quia Angeli eorum semper vident faciem Patris mei qui in cælis est*. Tertio exemplum

sanctorum. Legitur in vita beati Joannis Evangelistæ, quod cum ipse devenisset ad ultimam senectutem, et vix inter discipulorum manus ad Ecclesiam deferretur, nec posset plura docere, verba hæc ad quamlibet pausam dicebat : *Filioli, diligite alterutrum*. Tandem discipuli et fratres qui aderant, audientes quod eadem verba semper diceret, dixerunt : « Magister quare semper hoc loqueris? Qui respondit : quia præceptum Domini est, et si solum fiat sufficit. » Incitare etiam potest ad idem magna dilectionis utilitas. Dilectio membra in illo nobilissimo corpore, cujus Christus est caput, unit, et per virtutem membrorum unitam adversario resistit, et ad perfectionem perducit. De primo habetur Col. iii : *Super omnia caritatem habentes, quod est vinculum perfectionis*. De alio dicit Tullius : « Virtutum amicitia adiutrix a natura data est, non vitiorum comes; ut quia solitaria non posset virtus ad ea quæ summa sunt pervenire, conjuncta et consociata eum altero perveniret. » Damna etiam quæ odium facit, ad idem incitare possunt. Hoc facit odium fraternum in corpore mystico, quod facit divisio continuitatis in corpore humano, ex qua sequitur dolor magnus, et quandoque mors.

## CAPUT XLII.

*De his quæ valent ad hoc quod aliquis a proximo ametur.*

Sunt autem quinque quæ valere possunt ad hoc ut aliquis a proximo ametur. Primum est discretio : unde sapientia dicitur esse *mater pulchræ dilectionis*, Eccl. xxiv. Fatuitas nescit acquirere vel conservare amicitiam. Eccl. xx : *Fatuus non eris amicus*. Secundum est modestia in sermone. Eccl. xx : *Sapiens in verbis amabilem se facit, gratia autem fatuorum effundetur*. Tertium est similitudo. Eccl. xxvii : *Volatilia ad sibi similia conveniunt*; Ambrosius : « Est insitum bonis, ut unusquisque virtutes suas in aliis amet. » E contrario dissimilitudo facit ad odium. Oderunt hilarem tristes, tristemque jocosus. Quartum est virtus. Tullius : « Nihil est virtute amabilius, vel quod magis alliciat ad diligendum; quippe cum propter virtutem et probitatem etiam eos quos nunquam vidimus, quodammodo

diligamus. » Idem : « Tanta est vis probitatis, ut eam vel in eis quos nunquam vidimus, vel quod majus est, in hoste diligamus. » Specialiter valet ad hoc virtus mansuetudinis. Eccl. iii : *Fili, in mansuetudine opera tua perfice, et super gloriam hominum diligereis*. Mansuetudo ad modum adamantis vim habet attractivam. Ezech. iii : *Ut adamantem et silicem dedisti faciem tuam*. Item specialiter valet ad hoc virtus humilitatis. Sicut odibilis est Deo et hominibus superbia, sic amabilis est Deo et hominibus humilitas. Superbia dum se exaltat, alios deprimit; ideo non est mirum si ab aliis odiatur; humilitas vero dum se demittit, alios exaltat et honorat, ideo merito ab eis amatur. Maxime inter omnia valet ad hoc quod aliquis ametur, si ipse primo amaverit. Augustinus : « Nulla est major ad amorem invitatio, quam prævenire amando : vel nimis durus est animus qui dilectionem si noluit impendere, nolit rependere. » Seneca in *Epistolis* : « Quæris quomodo amicum facturum sis cito? Ego monstrabo tibi amatorium sine medicamento, sine herba, sine ullius veneficæ carmine. Si vis amari, ama. » Quintum est obsequium, vel beneficium. Terentius : « Hoc tempore obsequium amicos, veritas odium parit. Ignis amoris lignis beneficiorum nutriendus est, alioquin deficit. » Beneficia etiam feras ad amorem incitant, et inimicos efficiunt amicos. Rom. xii : *Si esurierit inimicus tuus, ciba illum : si sitit, potum da illi; hoc enim faciens carbonem congeres super caput ejus, id est cor ejus accendes ad te amandum*. Et notandum quod beneficium non parat amicitiam nisi discrete detur : unde dicitur de fatuo, Eccl. xx : *Quod non erit gratia bonis illius. Qui enim edunt panem illius, si falsæ linguæ sunt, quoties et quanti irridebunt eum?* Seneca : « Nullum habet majus malum locuples homo ex bonis suis obsessus, quam quos amicos sibi putat, quibus ipse non est quod beneficia sua efficacia judicat ad conciliandum amicos, cum quidam quo plus debent, magis oderint. Quid ergo? beneficia non parant amicitias? parant, si accepturos licuit eligere; si collocata, non sparsa sunt. » Idem : « Hoc consilio sapientum utere, ut magis existimes pertinere ad rem quis, quam quid acceperit. » Tullius : « Apud bonos melius quam apud fortunatos beneficium collocatum est. »

## CAPUT XLIII.

*De his ad quæ habendus est respectus in socii electione.*

Eligendo socium habendus est respectus ad fidelitatem, morum habilitatem, et similitudinem. Ad fidelitatem pertinet ut mentiendo socium non fallat, arcanum ei commissum non revelet, in rebus eum non damnificet, in adversis eum non deserat. Odiosa est mendacitas homini prudenti. Eccl. XXI : *Potior est fur, quam assiduitas viri mendacis.* Fidelis non est qui arcanum revelat. Prov. XI : *Qui ambulat fraudulentè, revelat arcana : qui autem fidelis est, celat amici commissum ;* Eccl. XXVII : *Qui enudat arcana amici, fidem perdit.* Non est fidelis qui in rebus socium damnificat. Tullius in lib. *De officiis* : « Societatis arcissimum vinculum est, arbitrari magis contra naturam esse, hominem aliquid homini detrudere commodi sui causa, quam omnia subire incommoda. » Non est fidelis qui socium deserit in adversis. Bernardus : « Discipulus prudens aliquo consorte gaudeat, cui propriam conscientiam detegere valeat, qui nubila fortuna diligenter subveniat. » De fidei societate ponit exemplum laudabile Valerius Maximus IV lib. dicens : « Duo discipuli pythagorici tam fidelem inter se junxerunt amicitiam, ut cum alterum ex his Dionysius Syracusanus tyrannus interficere vellet, et is tempus ab eo quod priusquam periret, domum profecturus ut ordinaret res suas, impetrasset, alter vadem se pro ejus reditu tyranno dare non dubitavit. Appropinquante autem præfinita die, nec illo redeunte, unusquisque stultitiæ temerarium sponsorem damnabat : at is nihil se de amici constantia metuere prædicabat. Eodem itaque momento et hora a Dionysio constituta occidendus supervenit ; et admiratus tyrannus amborum animum, supplicium fidei remisit, eosque insuper ut ipsum in societatem amicitiae tertium reciperent, rogavit. Habilitas morum respicienda est eligendo socium, Prov. XVIII : *Vir amabilis ad societatem magis amicus erit quam frater.* Ad amicabilitatem tria pertinent : scilicet ut sit benignus, prudens, et constans : benignus ut non faciat molestas amicitias nimis amicum onerando, vel aspere corripiendo, sed potius se oneret

negotiis : prudens, ut sciat discernere quid, quando et quomodo amico imponendum sit : constans, ut non de facili moveatur ad amicum odiendum vel minus diligendum, ut faciunt quidam qui irascuntur, nisi fiat quod desiderant, dicentes : Nisi hoc feceritis, amittetis amorem meum : quorum amor tenui filo dependet. Similitudo etiam morum respicienda est ; Tullius in lib. I *De officiis* : « Nihil est amabilius nec copulativius quam morum similitudo honorum. » Societas inita firme custodienda est sicut domus. Sodales vetustos nunquam pro sequentium novitate fastidias : aliter videberis sic amicis uti quasi floribus : flores enim sunt grati dum sunt recentes. Eccl. IX : *Ne derelinquas amicum tuum antiquum : novus enim non erit similis illi. Vinum novum amicus novus ; veterascet, et cum suavitate bibes illud.* Legitur de Augusto Cæsare quod amicitias non facile admisit, sed constantissime retinuit. Ad societatem servandam multum valet humilitas, qua homo minus sentit de se quam de aliis : unde sensum aliorum meliorem quam suum reputans, facile sensum suum pro sensu aliorum dimittit, et aliis credit. Cato :

Vincere cum possis, interdum cede sodali ;

Gregorius : Sæpe dum quosdam major scientia erigit, a ceterorum societate disjungit, et quasi quo plus sapiunt, eo a virtute concordiae desipiunt. Valet ad idem patientia. Prov. XV : *Vir iracundus suscitatur rixas ; qui autem patiens est, mitigatur suscitatas.* Valet ad idem taciturnitas. Cato :

Consilium arcanum tacito committe sodali etc.

## CAPUT XLIV.

*Quod in adolescentia specialiter monendi sunt filii nobilium ad amorem disciplinæ.*

Postquam filii nobilium ad ætatem adolescentiæ pervenerint, specialiter admonendi sunt ad amorem disciplinæ, et quia tunc plenius habent usum rationis, et quia illa ætas prona est ad malum, et ideo magis indigent disciplina qua refrænentur. Gen. VIII : *Sensus et cogitatio humani cordis in malum prona sunt ab*



*adolescentia sua.* Ambrosius loquens de illo verbo Job. viii : *Consumere me vis peccatis adolescentiæ meæ* : « Pulchre, inquit, principium ætatis ad querelam arripuit, quia magis ad vitium esse lubricam consuevit; » Job, xx : *Ossa ejus implebuntur vitiis adolescentiæ suæ*; Augustinus in lib. *Confess.* loquens de se : « Exarsi, inquit, Domine aliquando satiari inferius in adolescentia, et sylvescere umbrosis amoribus ausus sum. »

## CAPUT XLV.

*De malis, ad quæ prona est adolescentia.*

Ad tria mala prona est specialiter adolescentia : ad superbam impetuositatem, luxuriam et lasciviam. De primo dicit Seneca; « Juvenile est vitium non posse regere impetum. » De secundo dicitur Prov. vii : *Considerando vecordem juvenem, qui transit per plateas, et ecce mulier occurrit illi ornatu meretricio præparata*; et subditur : *Statim eam sequitur quasi bos ductus ad victimam.* De tertio dicit Seneca : « Torpent ingenia desidiosæ juventutis, nec ullius honestæ rei labore vigilant, sed cantandi potius saltandique obscœna studia effeminatos tenent; » Idem : « Cum feminis stare et immundis se munditiis extollere nostrorum adolescentum specimen est, » idest documentum. Istorum est illud Sapien. ii : *Non prætereât nos flos temporis. Coronemus nos rosis antequam marcescant.* Adolescentibus necessaria est majorum exhortatio, sicut Joannes Evangelista exhortabatur dicens : *Scribo vobis adolescentes, quoniam vicistis malignum.* Item, *Scribo vobis juvenes, quoniam fortes estis, et Verbum Dei manet in vobis, et vicistis malignum.* Joan. ii. Proponenda sunt etiam eis exempla fortium adolescentium, ut est illud II Mach. ii, septem fratrum, quorum unus sic ait : *Parati sumus mori magis quam patrias Dei leges prævaricari.* Horum unus linguam postulatus ad cruciatum, cito protulit, et manus constanter extendit, et cum fiducia ait : *A cœlo ista possideo, sed propter Dei leges hæc ipsa despicio.* Item muniendi sunt armis spiritualibus. Ephes. vi : *Induite vos armaturam Dei.* Orationi etiam insistere debent, ut Dei gratiam recipiant, quæ a dictis malis eos custodiat. Sap. viii : *Ut scivi, quoniam aliter non possum esse*

*continens nisi Deus det*; et hoc ipsum erat sapientia, scire cujus hoc esset donum, « *adii Dominum, et deprecatus sum illud.* » Si vero contingat adolescentem cadere, ad pœnitentiam debet recurrere exemplo illius adolescentis, de quo legitur Luc. xv, quem pater cum gaudio suscepit; et ibid. vii, dictum est adolescenti filio viduæ mortuo : *Adolescens tibi dico, surge.* Vix senes malis consueti resurgunt. Prov. xxii : *Proverbium est, Adolescens juxta viam suam; etiam cum senuerit, non recedet ab ea.* Incerta est vita adolescentium. Prov. xxx : *Tria sunt mihi difficilia, et quartum penitus ignoro : viam aquilæ in cœlo, viam colubri super terram, et viam viri in adolescentia.* Secundum Tullium in lib. I *De offic.* : « Prima adolescentis commendatio proficiscitur a modestia, deinde a pietate in parentes, et in suos benevolentia. » Cognoscitur etiam ejus bonitas si ad viros sapientes et claros ac bene consulentes reipublicæ se contulerit, et cum eis assiduus sit. Huic consonat illud Eccl. vi : « *In multitudine presbyterorum prudentium sta, et sapientiæ eorum ex corde conjungere, ut omnem narrationem Dei possis audire.* » Multum est necessarius sermonis Dei auditus. Psal. cxviii : *In quo corriget adolescentior viam? in custodiendo sermones tuos.* Ad hæc momentur adolescentem exemplo Salvatoris, qui cum esset duodecim annorum, sedit in medio Doctorum non quidem docens, sed audiens, et interrogans, Luc. ii, de quo sic Bernardus loquitur : « O humilitas virtutis Christi quantum confundis superbiam nostræ vanitatis! Parum aliquid scio, vel potius scire mihi videor, et silere non possum impudenter et imprudenter me ingerens et ostentans, promptulus ad loquendum, velox ad docendum, tardus ad audiendum. Christus cum tanto tempore silebat, cum seipsum abscondebatur, numquid inanem gloriam timebat? utique, sed nobis, non sibi. » Contra tria mala prædicta informandi sunt adolescentem tribus virtutibus : contra superbam impetuositatem, humilitate : contra luxuriam, castitate : contra lasciviam, maturitate. Monendi sunt ut humiliter se habeant, et sapientes consulendo, et majoribus obediendo. De primo dicit Sydonius : « Plurimum laudis juvenes suis moribus acquirunt, quoties de negotiorum meritis ambigentes ad peritorum consilia recurrunt. » Propter defectum



hujus humilitatis Roboam filius Salomonis partem regni sui amisit : derelicto enim consilio senum, acquiescens consilio juvenum, volens populi aggravare jugum, decem tribus amisit, III Reg. xii. Unde dicitur Eccl. xlvi, quod Salomon dereliquit post se gentis stultitiam Roboam imminutum a prudentia qui avertit gentem consilio suo. Ad secundum momentum juvenes I Petr. ii : *Adolescentes, subditi estote senioribus.* Cyprianus martyr : « Sicut in sensibus sobrietas et morum perfectio reperitur, sic ab adolescentibus obsequium et subjectio rite debetur. » Bernardus : « Eligat homo fidelis subjectus esse magistro, sub quo voluntas ejus frangatur, et obedientiæ fræno concupiscentia reprimatur. » Idem : « Non est dedignandum servo quod præcessit in domino : siquidem non est servus major domino suo. Ipse namque cum jam ætate et sapientia apud Deum et homines crevisset, cum jam duodenis in Jerusalem remansisset, a beata Virgine et Joseph in medio Doctorum audiens illos et interrogans, inventus, descendit cum illis, et erat subditus illis. » Contra luxuriam monendi sunt adolescentes ad verecundiam et sobrietatem. Ipsi enim ardore luxuriæ astuantessolent esse præcaces ad rogandum vel etiam ad rapiendum mulieres, a quibus verecundia cohibet; de qua dicit Seneca : « Verecundia in adolescente bonum est signum. » Sobrietas etiam multum valet ad castitatem : quia secundum Bernardum : « Periclitatur castitas in delitiis, sicut pietas in negotiis. » Hieronymus : « Quidquid seminarium est voluptatis, etiam venenum puta : » Tit. ii : *Juvenes hortare ut sobrii sint.* Contra lasciviam monendi sunt ad maturitatem et taciturnitatem : habet enim lascivia inordinationem gestuum, et levitatem verborum. Contra primum est necessaria gravitas, quæ multum placet Deo in servis suis. David Psal. xxxiv : *In populo gravi laudabo te.* Tullius in lib. *De senect.* : « Adolescentem probe in quo est aliquid senile. » Hæc gravitas dat auctoritatem : unde Apostolus scribens Timotheo dicit : *Nemo adolescentiam tuam contemnat* : idest taliter te exhibeas ut propter ætatem non contemnaris. Hieronymus *Ad Heliodorum Nepotianum* de hac gravitate commendat dicens : « Nepotianus juvenis curam habuit, ut nullam in se daret fabulam rumoris obsceni; ut qui mor-

debant ad ejus ætatem, stuperent ad continentiam : hilaritatem frontis temperabat gravitate morum. « Taciturnitas adolescentibus est necessaria contra garrititatem. Eccles. xxii : *Adolescens, loquere in causa tua vix cum necesse fuerit. Si bis interrogatus fueris, habeat caput responsum tuum. In multis esto quasi inscius, et audi tacens simul et quærens, et loqui in medio magnatorum non præsumas, et ubi sunt senes, non multa loquaris.*

#### CAPUT XLVI.

*Quod adolescentes non differant induere bonos mores.*

Hoc multum debet adolescentes incitare, ut non differant bonos mores induere, qui vix in senectute induuntur. Eccl. xxv : *Quæ in juventute tua non congregasti, quomodo invenies in senectute tua?* Ad idem incitare debet horæ mortis incertitudo. Anselmus : « Nihil morte certius, sed nihil incertius hora mortis. » Ambrosius : « Mors est juvenibus in insidiis, quæ in senibus est in januis. » Tullius in lib. *De senect.* : « Frustra sperat adolescens vel promittit se diu victurum. Quid enim stultius quam incerta pro certis habere? Quid etiam? quod illa ætas habet multas mortis causas : facilius enim in morbos adolescentes incidunt, gravius ægrotant. » Mors etiam adolescentium gravior est : ratio est, quia mors contingit adolescentibus adversante et repugnante natura, et ideo gravius; senibus vero venit quasi sponte, nulla vi habita, et ideo levis. Sicut ergo poma ex arboribus si cruda sint, vi avelluntur, sed matura et cocta decidunt, sic vis adolescentibus vitam aufert, senibus maturitas.

#### CAPUT XLVII.

*Quod monendi sunt filii nobilium, cum ad ætatem virilem pervenerint, puerilia evacuare.*

Monendi sunt filii nobilium, cum ad virilem ætatem pervenerint, ut puerilibus se evacuent, exemplo Apostoli dicentis I Corinth. xv : *Cum essem parvulus, loquebar ut parvulus, cogitabam ut parvu-*

*lus, sapiebam ut parvulus; quando autem factus sum vir, evacuavi quæ erant parvuli.* Monstruosum est hominem in senectute vel virili ætate puerilia retinere: sicut monstruosum esset si aliqua arbor flores haberet, quando habere debet fructus maturos: et etiam erubescibile esset alicui homini barbato ad mamillam matris pendere, immo quasi insania videretur, juxta illud:

Ludere par impar, equitare in arundine longa,  
Si quem delectat barbatum, insania vexat.

Odibile est etiam Deo et hominibus: unde Eccles. xxv: *Senex fatuus enumeratus est inter tres species hominum qui odiuntur.* Maledictus est et morte dignus senex puerilis, juxta illud Isa. lv: *Puer centum annorum maledictus erit.* Sicut vinea quod viginti annis sine fructu debito fuisset extirparetur; sic qui ad senilem ætatem pervenit, et non facit debitum fructum, a Deo occideretur, nisi misericordia Dei eum sustentaret. Et ut breviter dicam, sicut pejus est esse bestialem quam esse bestiam, eo quod esse bestiam est a natura, esse vero bestialem est ex vitiis; sic esse puerilem pejus est quam esse puerum. Seneca: « Plurimumque est, quod non pueritia, sed quod gravius est, puerilitas remanet. »

#### CAPUT XLVIII.

*Quod octo puerilia ab eis sunt evacuanda.*

Notandum quod octo sunt puerilia quæ ab eis evacuanda sunt: quorum tria primo tangit Apostolus. Primum est loqui pueriliter, idest sine præmeditatione. Loquuntur parvuli quidquid eis in os venerit; e contrario autem vir non loquitur sine præmeditatione: unde de viro justo dicitur Psalm. xxxvi: *Lingua ejus loquitur judicium,* idest examinatam sententiam. Seneca: « Tardiloquum te esse jubeo, et prope erit tibi Deus. » Triplici ratione debemus examinare verba nostra. Primo ut possint transire per illud districtum judicium, quo debent examinari. Matth. xii: *De omni verbo otioso quod locuti fuerunt homines, reddent rationem de eo in die judicii.* Secundo, quia multum verbum potest nocere, nisi homo sibi caveat. Bernardus: « Sermo levis est, sed graviter vulnerat, aptissimum evacuan-

dis cordibus instrumentum. » Tertio, quia verbum prolatum de proximo est testimonium vel pro eo vel contra eum, ideo quasi testimonium cum deliberatione proferendum est. Seneca: « Loquens de proximo tuo, scito te pro eo vel contra eum testimonium proferre. » Secundo evacuandum est sapere pueriliter, idest sapientem esse circa modica, ut sunt nuces, moneta plumbea, et similia. Hanc sapientiam habent illi qui circa temporalia bona quæ modica sunt, sapientes sunt; circa spiritualia vero vel æterna insipientes. Prætulit Esau lenticulam hereditati suæ. Hanc puerilitatem dissuadet nobis Apostolus dicens: *Nolite pueri effici sensibus,* I Cor. xiv. Tertio evacuanda est cogitatio puerilis, quæ est de solis præsentibus, ut non solum præsentis vitæ, sed etiam futuræ prævideamus; ad quod monemur Prov. vi, ubi sic legitur: *Vade piger ad formicam, et considera vias ejus, quæ cum non habeat ducem nec præceptorem, nec principem, parat æstate cibum sibi, et congregat in messe quod comedat.* Quarto evacuanda est a nobis immunditia puerilis. Solent pueri residere in luto, et deturpare ornamenta sua, si qua habent. Similis puerilitas in multis est qui sunt jam senes vel in virili ætate, et tamen non erubescunt morari in immunditia peccatorum suorum. Jer. xlviii: *Fertilis fuit Moab ab adolescentia, et requievit in fæcibus suis.* Ad Tim. I: *Infidelibus nihil est mundum, sed coinquinatæ sunt mens eorum et conscientia.* Nesciunt pueri se pascere, quin se maculent. Infiniti sunt barbati, in quibus invenitur hæc puerilitas. Multi etiam dignitates quas habent, male vivendo deturpant: unde sapiens dicit de Nerone, quod cum quosdam vellet ornare, non ipsos ornavit, sed ornamenta deturpavit. Quinto evacuanda est a nobis puerilis mutabilitas, qualis est in illis qui una die aggrediuntur viam paradisi et alia die redeunt ad viam inferni: una die ædificant, alia die destruunt. Eccles. xxxiv: *Unus ædificans et alius destruens, quid prodest illis nisi labor?* Mutabilitas est signum stultitiæ. Prov. xv: *Cor stultorum dissimile erit;* Eccl. xxvii: *Homo sanctus in sapientia manet sicut sol: nam stultus sicut luna mutatur.* Vir justus debet in præsentis quodammodo æternitatem inchoare per constantiam et per perseverantiam. Bernardus: « Quid tantæ levitati et æternitati? » Sexto evacuandus est timor pue-

rilis. Solent enim pueri timere falsa, ut socios suos larvatos : levia etiam magis timent quam gravia pericula, ut virgam matris magis timent quam gladium hostis. Talis puerilitas in multis senibus est qui divites sunt ; qui velut homines larvati adeo timent, ut non audeant eis in aliquo contradicere. Seneca : « Pueri quos amant, cum quibus ludere assueverunt, si personatos videant, expavescent ; » Idem : « Omnium istorum, quos supra capita hominum supraque turbam delicatos lectica suspendit, personata felicitas est : contemnes, si spoliaveris. » Periculosum est valde timere hominem : unde Prov. xxix : *Qui timet hominem, cito corruet*; I Mach. II : *A verbis viri peccatoris ne timueritis, quia gloria ejus stercus et vermis* : saccus est stercorum, et materia vermium. Multi etiam sunt qui præsentia mala quæ levia sunt, et quasi umbræ futurorum malorum, valde timent : qui sunt velut « equi umbratici qui trepidant ubi non est timor. » Seneca : « Auctoritatem habemus sensum, et vitia puerorum ; nec puerorum tantum, sed etiam infantium : illi levia, hi falsa formidant, nos utraque. » Timor puerilis est eorum qui timent contemptum contemnendorum, et irrisiones irridendorum ; qui non audent benefacere ne a malis irrideantur. Cum male agentes irrideant bene operantes, tale est ac si cæcus irrideret videntem, et claudus recte incedentem ; eorum irrisio irridenda est Seneca : « Æquo animo audienda sunt imperitorum convitia, et ad honesta vadenti contemnendus est ipse contemptus. » Idem : « Nondum felix es, si nondum turba te deridet ; » Prov. xiv : *Ambulans recto itinere, et timens Deum, despicitur ab eo qui infami graditur via*; Ibid. : xxix : *Abominantur impii qui in recta via sunt*. Septimo est evacuandus a nobis amor puerilis. Solent pueri concupiscere quæcumque pulchra quæ vident, licet sint sibi nociva : unde quandoque arripiunt manu vel carbonem vel gladium propter pulchritudinem quam ibi vident. Exemplum habemus de hoc in Moyse, de quo narrat Josephus, quod cum Moyses puer allatus fuisset coram Pharaone, videns Pharaon elegantiam pueri et pulchritudinem, posuit diadema suum super caput ejus : puer autem videns imaginem idoli in corona, projecit eam ad pedes suos et conculcavit : quod videntes magi Pharaoni dixerunt hoc esse signum, quod per pue-

rum illum destrueretur regnum Ægypti. Alii volentes eripere puerum, dixerunt quod ex pueritia hoc fecerat ; et fecerunt ei afferre carbonem vivum, quem posuit puer ad os suum, et linguam suam combussit, ex qua causa factus est impeditioris linguæ. Similis puerilitas est in multis, qui quam cito vident pulchritudinem alicujus mulieris, concupiscunt eam, non attendentes quod dicit Hieronymus quod gladius igneus species mulieris. Pueri etiam lusum amant : unde Job. xxi : *Infantes eorum exultant lusibus*. Modica ex magnis quandoque præeligunt, ut pomum quandoque pro castro : plus dolent quandoque de amissione pomi, quam de amissione regni. Hæc puerilitas dissuadet nobis Prov. I, ubi dicitur : *Usquequo parvuli diligitis infantiam, et stulti ea quæ sibi sunt noxia, cupient?* Octavo evacuanda est a nobis inverecundia puerilis. Solent enim pueri mamillas inverecunde a matre suscipere, qualis puerilitas est in eis, qui lac adulationis vel illicitæ consolationis sibi oblatum inverecunde suscipiunt, contra illud Prov. I : *Fili mi, si te lactaverint peccatores, ne acquiescas eis*. Valde timenda est puerilitas filiis nobilium, qui dominaturi sunt populo. Valde enim nocivum est populo, et ex magna Dei ira est quod tales dominos dat, sicut comminatur Isa. II : *Dabo pauperes principes eorum, et effeminati dominabuntur eis et corruet populus*.

## CAPUT XLIX.

*Quod filix ab evagatione sunt cohibendæ.*

Dictum est de custodia et eruditione filiorum ; nunc dicendum est de custodia et de eruditione filiarum, ad quam parentes monentur. Eccles. vii : *Filiæ tibi sunt, serva corpus earum, et non ostendas hilarem faciem ad illas*. Ideo magna diligentia adhibenda est circa filiarum custodiam : quia ut dicit Hieronymus, « Tænera res impudicitæ fama, quasi flos ad levem marcescit auram. » Cohibendæ sunt filix ab evagatione et discursu, ne accidat eis sicut Dinæ, quæ egressa est ut videret mulieres regionis illius, et occasione ista a Sichem corrupta est, Genes xxxiv. Reprehensibile est in muliere quod garrula sit et vaga, quietis impatiens, non valens in domo sua consistere pedibus suis ; Proverb. vii : et I Tim. v, dicit Apostolus

de quibusdam : *Otiose discunt circuire domos*, non solum autem otiose, sed et verbose. Exemplum absconsionis habent in beata Virgine, de qua legitur Isa. vii : *Ecce Virgo concipiet*. Secundum Hieronymum, « pro virgine habetur in hebræo, Alma, quæ græce dicitur apocrypha, latine virgo abscondita, videlicet quæ nunquam aspectibus viri apparuit, sed magna parentum diligentia custodita sit. » Mariam, sicut idem Hieronymus ait, « Angelus in penetralibus invenit. » Bernardus : « Susplicandum non est quod apertum invenerit Angelus ostiolum Virginis, cui nimirum in proposito erat hominum fugere frequentias, vitare colloquia, ne vel orantis perturbaretur silentium, vel continentis castitas tentaretur. Maria verebatur etiam Angeli salutationem. Dicit Ambrosius de ipsa, quod « mansit apud Elisabeth tribus mensibus, non quia domus aliena eam delectaret, sed quia in publico frequenter videri discipliceret. » Bernardus : « Solent virgines esse pavidae, ut caveant timenda, et etiam tuta pertimescant. » Ad vitandam evagationem monet Hieronymus Eustochium virginem his verbis : « Rarus in publicum sit egressus, martyres tibi quærantur in cubiculo : nunquam deerit causa prodeundi, si semper quando necesse est processura sis. » Timeat virgo exire in publicum, si vult mundum servare cor suum. Exemplum hujus habetur Tob. iii, in Sara virgine dicente : *Mundam servavi animam meam ab omni concupiscentia* : et subditur modus vivendi quem habuit, quo hoc facere voluit : *Nunquam cum ludentibus miscui me, nec cum his quæ in levitate ambulant participem me præbui*. Maxime custodiendæ sunt filiae nobilium, quarum parentes magis debent timere et cavere opprobrium quod frequenter ex negligentia circa custodiam filiarum incurritur. De patre discreto legitur Eccl. xlii : *Filia patris abscondita, est vigilia, et sollicitudo ejus aufert somnum, ne forte in adolescentia sua efficiatur adultera* : in eodem : *Supra filiam luxuriosam, scilicet ad luxuriam pronam in adolescentia, confirma custodiam, ne quando faciat te in opprobrium venire inimicis* ; Ibid. xxi : *In filia non avertente se firma custodiam, ne inventa occasione abutatur se*. Filia quæ ab occasionibus peccandi se voluntarie non avertit, nisi ab alio custodiatur, facile in peccatum ruit.

## CAPUT L.

*Quod valde utile est filias nobilium, dum sunt in custodia, litteris imbui, et semper aliquo opere occupari.*

Dum filiae nobilium sunt sub diligenti custodia, valde est utile ut litteris imbuantur. Valde enim est necessarium eis sapientiæ studium, et ad vitandum otii periculum, et vanarum occupationum dispendium, et ad habendum honestum solatium, sicut ostensum est supra cap. i hujus libri. De filiis nobilium, Chrysostomus *Super Matth.* : « Mulier in quiete sedens inclusa, facile in peccatum carnis labitur, maxime quia vitium hoc e vacatione et otio facile nascitur. » Ideo dicit Hieronymus *Ad Lætam* de instructione filiae : « Filia tua Paula mundicantica ignoret, turpia non intelligat, et hæc tenera lingua Psalmis dulcibus imbuatur, procul sit ætas lasciva puerorum : fiant ei litteræ eburneæ, et ludat in eis, ut et ludus ejus eruditio sit : habeat et in discendo socias quibus invidet, dolens ab illis in bono superari. » Idem *Ad Eustochium* : « Crebrius, lege, quam plurima disce, tenente te codicem somnus obrepat, et cadentem faciem pagina sancta suscipiat. » Idem Hieronymus, Marcellam commendans de Scripturarum amore ac studio, dicit : « Certe cum Romæ essem, nunquam tam festina me vidit, ut non de Scripturis aliquid interrogaret. » Ne autem subrepente fastidio interrumpatur lectio, jungenda sunt lectioni oratio et operatio. De oratione dicit Hieronymus *Ad Sabinam de morte Nebridii* : « Semper in manibus tuis divina sit lectio, et tam crebræ orationes, ut omnes tentationum sagittæ, quibus adolescentia percuti solet, hujus clypeo repellantur. » De operatione dicit idem *Ad Demetriadem virginem* : « In desideriis, ut legimus, est omnis otiosus. Nec ideo tibi ab opere cessandum est, quia Deo propitio nulla re indiges : sed ideo cum omnibus laborandum est, ut per occupationem operis, nihil aliud cogites nisi quod ad Dei pertinet servitum : et si omnem censum in pauperem distribuas, nihil apud Christum erit pretiosius quam cum manibus tuis ipsa confeceris, vel in usus proprios, vel in exemplum virginum ceterarum. » Idem *Ad Rusticum monachum* quod tam femi-



nis quam viris est necessarium. Aliquid operis fac, ut semper te diabolus inveniat occupatum; si quidem et Ægyptiorum monasteria tenent hunc morem, ut nullum absque opere et labore recipiant, non tam propter victus necessaria, quam propter animæ salutem. Legitur in libro de duodecim Cæsaribus quod Cæsar Augustus filiam et neptes ita instituit, ut et lanificio assuescerent. De his tribus, in quibus consistit puellarum honesta occupatio, dicit Hieronymus *Ad Lætam* de filia instruenda: « Mane hymnos decantet, orationi vero lectio, ac lectioni succedat oratio: discat et tenere colum, rotare fustum, stamina pollice ducere. » Sicut dictum est prius de filiis nobilium quod in tenera ætate instruendi sunt in bonis moribus, sic intelligendum est et de puellis nobilibus: et specialiter debent informari in castitate, humilitate, pietate, mansuetudine et taciturnitate. Hæ gratia: multum decent puellas nobiles. Ad has primo incitandæ sunt exemplo nobilissimæ Virginis Mariæ, in qua multum splenduerunt. Ipsa propter castitatem thronus eburneus dicitur III Reg. x. Ipsa castitatem elegit edocta a Deo, non indueta humano exemplo, vel scriptura aliqua, vel exteriori verbo. Bernardus in expositis. *Super Missus est*: « O virgo prudens, Virgo devota, quæ justitia, quæ pagina veteris testamenti vel præcipit vel consulit vel hortatur in carne non carnaliter vivere, et in terris angelicam ducere vitam? nec præceptum, nec consilium, nec exemplum habuisti. Uinctio docebat te de omnibus, et sermo Dei vivus et efficax ante tibi factus est magister quam Filius: prius instruxit mentem, quam induit carnem. » Humilitas in Maria multum splenduit, in qua tanta materia superbiendi fuit. Bernardus: « Non est magnum in abiectione esse humilem. Magna prorsus et rara virtus humilitas honorata. » Humilitatem ejus in terra existentis Filius Dei sensit in cælis, secundum illud Cant. 1: *Dum esset rex in accubitu suo, nardus mea dedit suavitatem odoris.* Nardus humilis herba calidæ naturæ designat humilitatem ex Dei amore procedentem, qualis fuit in beata Virgine. In aliquibus est humilitas ex cognitione multorum defectuum quos habent. Non talis fuit humilitas beatæ Virginis, quam Filius Dei in sinu Patris descendens sensit: ut Deo placeret ejus virginitas, fecit humilitas. Bernardus: « Sine humilitate audeo dicere, nec virginitas Mariæ Deo

placuisset. » Humilitatem Deus in ea respexit, ut ipsa ait in Cantic. : *Magnificat anima mea Dominum* etc.; postea sequitur: *Quia respexit humilitatem ancillæ suæ* etc. De pietate et mansuetudine dicit Bernardus: « Quid ad Mariam trepidat humana fragilitas? nihil in ea austerum, nihil terribile: tota suavis est, plena pietatis et gratiæ, plena mansuetudinis et misericordiæ: affectu compatiendi, et subveniendi abundat effectu; invocantibus subvenit universis. » Idem: « Sileat misericordiam tuam, Virgo beata, si quis est qui eam invocatam in necessitatibus suis sibi meminit defuisse. » Item de ejus mansuetudine dicit idem Bernardus: « Revolve totam seriem Evangelii; et si quid durum, si quid asperum inveneris in Maria, demum eam suspectam habeas, et ad eam accedere verearis. » Gratia discretæ taciturnitatis multum in ea splenduit. Ipsa enim fuit lignum vitæ, quæ illum qui vita est, nobis peperit: cujus ligni folium non defluxit. Verba ejus quæ in Evangelio inveniuntur, sunt pauca, brevia, et utilia: pauca, quia septem solum: brevia, quia nullum prolongavit, excepto solo illo quod ad Dei laudem protulit, scilicet *Magnificat* etc. Tria prima pertinent ad propriam utilitatem, quæ Angelo dixit: tria ultima ad utilitatem proximi, medium ad laudem Dei. Primum verbum quod dixit Angelo, fuit verbum discretæ interrogationis, scilicet: *Quomodo fiet istud?* Secundum humilis responsionis, scilicet: *Ecce ancilla Domini.* Tertium fidelis orationis: *Fiat mihi secundum verbum tuum*, Luc. 1. Inter verba pertinentia ad utilitatem proximi primum fuit verbum mansuetæ correctionis: *Fili, quid fecisti nobis sic?* Luc. 11. Secundum verbum suffragii, scilicet, *Vinum non habent*, Joan. 11. Tertium verbum consilii, scilicet, *Quodcumque dixerit facite*, Ibid.

## CAPUT LI.

*Quod fornicatio ponit in statu vili, castitas in statu nobili.*

Puellæ nobiles specialiter possunt induci ad amorem castitatis ostensione vilis status in quo contrarium castitatis, scilicet fornicatio, ponit, et ostensione nobilis status in quo castitas ponit. Requirit hæc nobilitas carnis ut vilitatem



timeant et caveant, et nobilitatem spiritualem diligant. Vilissimum esse statum fornicantis ostendit Scriptura sacra in multis locis. Propter hanc vilitatem Salomon Proverb. xi, comparat pulchram et fatuam mulierem circulo aureo in naribus suis, qui omni immunditiæ exponitur, dicens : *Circulus aureus in naribus suis mulier pulchra et fatua*; et Ecl. ix dicitur : *Omnis mulier quæ est fornicaria, quasi stercus in via conculcabitur*; et Psal. lxxxii, dicitur de luxuriosis : *Facti sunt ut stercus terræ*; et Joel i : *Computruerunt jumenta in stercore suo*. Gregorius : « Jumenta in stercore suo computrescere, est homines in fœtore luxuriæ suam vitam finire. » De hac vilitate dicit Hieronymus : « Nihil vilius quam vinci a carne : qui ab ea vincitur, vilium membrorum servus efficitur; » Seneca : « In voluptate nihil est magnificum, nihil quod naturam Deo proximam deceat, turpium membrorum ministerio veniens, exitu fœda. » Dicunt magistri, aliquos esse dæmones, qui memores suæ antiquæ nobilitatis non dignantur de peccato luxuriæ tentare. Signum hujus est, Lucifer tentans Dominum in deserto, non tentavit eum de hoc peccato. Castitas in statu valde nobili ponit : ipsa filiabus regis domos eburneas facit, in quibus regem gloriæ delectant, juxta verbum Psaimistæ : ipsa Angelis assimilat. Origenes : « Castitas est status qualitatis angelicæ. In carne præter carnem vivere, non terrena vita est, sed cœlestis. » Multum decet puellas nobiles decor castitatis, qui valde magnus est. Sap. iv : *O quam pulchra est casta generatio!* Bernardus : « Castitas non mediocris est decoris, qui divinos quoque delectare possit aspectus. Quid magis decorum castitate, quæ mundum de immundo conceptum semine, et Angelum de homine facit? Differunt inter se homo pudicus et Angelus, sed felicitate, non virtute : illius felicior, istius autem fortior castitas esse cognoscitur. Sola est castitas quæ in hoc mortalitatis loco et tempore statum immortalis gloriæ repræsentat. » Castitas est thesaurus niveus. Job. xxxviii : *Numquid ingressus es thesauros nivis?* Thesaurus est propter pretiositatem. Eccle. xxv : *Non est digna ponderatio continentis animæ* : niveus propter puritatem. Castitas est principium pulchritudinis spiritualis, quæ in candore et rubore consistit, secundum illud Cant. v : *Dilectus meus candidus et rubi-*

*cundus*. Ipsa in ornatu sponsæ Dei byssus est. Proverb. ult. : *Byssus et purpura indumentum ejus* : byssus, inquam, castitatis, et purpura charitatis. Bernardus : « Optabilis valde ornatus, qui et Angelis possit esse invidiosus. » Hoc dicitur propter hoc quod castitas hominis quodammodo est gloriosior quam Angeli quantum ad hoc quod est fortior, ut prius dictum est. Sicut in picturis corporum albus color substernitur, et alii colores superponuntur : sic castitas quasi substramentum est, super quod Deus alias gratias ponit. Ecl. xxv : *Gratia super gratiam mulier sancta et pudorata*. Castitas Dei amicum et familiarem facit. Sap. vi : *Incorruptio facit esse proximum Deo*. Puritas magna, quæ fuit in Joanne Evangelista, amicitiae et familiaritatis ejus cum Christo occasio fuit.

## CAPUT LII.

*Quod puellæ monendæ sunt ab his quæ inimicantur castitati, abstinere.*

Ut puellæ nobiles castitatem possint servare, admonendæ sunt ab his quæ castitati sunt inimica, abstinere : et ea quæ ad castitatem juvant, amare. Multum inimicatur castitati superfluous cibus et potus, vinum forte, et salsæ acutæ, et alia corpus inflammantia. Jer. v : *Saturavi eos, et mœchati sunt*; Prov. xx : *Luxuriosa res est vinum*; Eph. vi : *Nolite inebriari vino, in quo est luxuria*; Hieronymus *Ad Eustochium* : *Virgo Christi vinum fugiat ut venenum*; » Idem : « Quidquid seminarium est voluptatis, venenum puta; » Idem *Ad Furiam* : « Si Apostolus castigavit corpus suum, et in servitutem redegit, ne cum aliis prædicasset, reprobis efficeretur; quomodo tu juvencula adhuc in fervore juventutis posita, dapibus et vino plena, de castitate eris secunda? » Item idem Hieronymus : « Difficile inter epulas servatur pudicitia; » Bernardus : « Periclitatur castitas in delitiis, e contrario abstinencia multum juvat ad castitatem. » Hieronymus *Ad Demetriadem virginem* : « Cœlesti rore et jejuniarum frigore calor puellaris extinguatur, et humano corpori Angelorum conversatio imperatur. » Idem : « Quamdiu Eva in Paradiso abstinent, virgo fuit : quam cito præceptum abstinentiæ violavit, corruptionem sensit. »

Item : « Inimicatur castitati otium. »  
 Item ea quæ fuerunt causa iniquitatis  
 Sodomæ enumerantur Ezech. xxvi. Ovi-  
 dius :

Quæritur Ægistus quare sit factus adulter?

In promptu causa est : desidiosus erat.  
 Otia si tollas, periire cupidinis arcus.

Otiosus erat David, cum in peccatum  
 adulterii cecidit. II Reg. ii. Inimicatur  
 etiam castitati somnus intemperatus.  
 Cat.:

Plus vigila semper, nec somno deditus esto.  
 Nam diuturna quies vitiis alimenta ministrat.

Cavendum est etiam a balneis non ne-  
 cessariis volenti servare castitatem. Hiero-  
 nymus : « Si virgo jejuniis ac vigiliis  
 corpus suum macerat et in servitutem  
 redigit, cur e contrario sopitum ignem  
 suscitatur balneorum fomentis? » Inimica-  
 tur etiam castitati impudica societas,  
 quæ lædit dupliciter : scilicet exemplo et  
 suggestione : ideo scribit Hieronymus  
*Ad Lætam* de instructione filia: « Trade,  
 inquit, ei comitem societatis, ejus ser-  
 mo et incessus et habitus doctrina vir-  
 tutum sit : nunquam absque te in publi-  
 cum procedat, nullus ei juvenis cinctus  
 arrideat. Nolo etiam ut de ancillis  
 suis aliquam plus diligat, cujus « crebro  
 auribus insurret : sed quicquid uni  
 loquetur, hoc sciant omnes : placeat ei  
 comes nequaquam compta atque formosa  
 quæ liquido guttore carmen dulce mo-  
 duletur, sed gravis, pallens, tristis. »  
 Idem *Ad Demetriadem virginem* : « Gra-  
 ves feminae, maximumque virgines et  
 viduæ tibi comites eligantur, quarum  
 conversatio sit probata, sermo moderatus,  
 verecundia sancta : fuge autem las-  
 civiam puellarum. »

### CAPUT LIII.

*Quod puellæ nobiles plus bonitatem quam  
 corporalem pulchritudinem debent dili-  
 gere.*

Admonendæ sunt puellæ nobiles, ut  
 amplius bonitatem quam corporalem  
 pulchritudinem diligant, ornatum spiri-  
 tualem corporali præponant, et Deo, non  
 mundo placere studeant. Abominari de-  
 bent quæ meretrices facere solent, ut  
 capillorum tinctionem, faciei depictio-

nem, rugas vestimentorum, et similia.  
 Ab amore corporalis pulchritudinis qua-  
 tuor debent eas compescere : scilicet  
 quod hæc pulchritudo est vana et fre-  
 quenter deformitatis spiritualis causa,  
 multum nociva et maledicta. Vana est,  
 secundum illud Proverb. ult.: *Fallax  
 gratia et vana pulchritudo*. Vana est cito  
 vadens in nihilum, propter quod flori  
 comparatur, Isa. xl : *Omnis caro fenum,  
 et omnis gloria ejus quasi flos agri*. Licet  
 flos sit magnæ pulchritudinis, tamen satis  
 parum amatur ipsius pulchritudo, quia  
 cito pertransit : sic parum amanda est  
 pulchritudo corporis, quia cito amittitur,  
 aufert eam modica febris, ad minus in  
 morte amittitur : tunc deficit quando  
 magis esset necessaria, quando eundem  
 est ad curiam cœlestis regis, quando de-  
 bent præsentari Deo et Angelis ejus.  
 Frequenter est pulchritudo causa defor-  
 mitatis spiritualis : et frequenter corpore  
 pulchriores sunt spiritu deformiores, et  
 quæ immunditiam plus abhorrere debue-  
 rant, peccando se amplius inquinant ; et  
 quas Deus plus honoravit pulchras fa-  
 ciendo, plus eum inhonorant peccata  
 committendo. Immunditia spiritualis abo-  
 minabilem reddit in eis decorem corpo-  
 ris, juxta illud Ezech. xvi : *Abominabi-  
 lem fecisti decorem tuum*. Frequenter  
 quæ pulchra est corporaliter, exposita  
 est immunditiæ peccati, secundum illud  
 Prov. xi : *Circulus aureus in naribus suis  
 mulier pulchra et fatua*. Si circulum au-  
 reum in naribus haberet, immundissimis  
 rebus illum inficeret : non enim plus par-  
 cit nari vel ori quam pedi : sic nec mu-  
 lier parcat decori faciei, immo præ ceteris  
 membris illam operit iniquitate et impie-  
 tate sua. Multum est nociva pulchritudo  
 corporis. Est enim pulchritudo exurens,  
 qualis est pulchritudo vulnerans, qualis  
 est pulchritudo splendentis gladii. Unde  
 Hieronymus : « Gladius mulieris species. »  
 Pulchritudo corporis bonitati adversatur,  
 non enim de facili bonitas habetur cum  
 ea ; unde Poeta :

Lis est cum forma magna pudicitia.

Timenda potius est pulchritudo cor-  
 poris quam desideranda, cum rem me-  
 liorem auferat quam ipsa sit. In magno  
 periculo est pulchritudo mulieris quæ  
 non absconditur : est enim velut thesau-  
 rus qui portatur in publico. Gregorius :  
 « Deprædari desiderat, qui thesaurum in

via publice portat. » Fatuæ sunt quæ neglecta bonitate pulchritudinem quærunt : similes sunt pueris qui pira vel poma vermes habentia ceteris præeligunt quia pulchriora sunt. Præcipue fatuæ sunt illæ quæ naturaliter deformes sunt, et tamen laborant ad hoc quod pulchræ fiant, cum hoc nullo modo obtinere possint. Ad hoc autem quod sint bonæ laborare nolunt, quod tamen melius est, et ab eis obtineri potest. Mulier quæ ad hoc laborat ut sit pulchra, et non ad hoc quod sit bona, videtur plus amare utilitatem alterius quam suam : quia si pulchra fuerit, alii pulchra erit, cujus oculos pascet ejus pulchritudo ; si autem bona fuerit, sibi met bona erit, secundum illum Prover. ix : *Si sapiens fueris, tibimetipsi eris.* Sapiens est qui vadit ad regnum ; stultus vero qui sciens et volens vadit ad infernale suspendium. Hæc est differentia vera inter stultum et sapientem, juxta illud Eccl. vi : *Quid habet amplius stulto sapiens, nisi quod pergit ubi est vita?* Pulchritudo corporis est pulchritudo maledicta, secundum illud Job. v : *Maledixi pulchritudini ejus* : statim loquitur de stulto. Sapiens attendens quod pulchritudinem stulti concomitatur culpa quam sequitur pœna, statim pulchritudini ejus maledicit, judicans quod eam habeat ad malum suum : stultus vero talia non attendens, eam laudibus extollit. Ad malum suum fuerunt pulchræ, quæ propter pulchritudinem suam damnabuntur : vere est maledicta pulchritudo talis. Multis potius expedivisset quod fuissent leprosæ, vel naso vel auribus mutilatæ, quam quod fuissent pulchræ.

## CAPUT LIV.

*Quod spiritualem ornatum debent corporali præponere.*

Debent puellæ nobiles spiritualem ornatum præponere corporali. Habere debent indumenta ad necessitatem, quam necessitatem determinat Bernardus : de quo require supra eod. lib. cap. xvi. De disciplina in habitu : « Non debent appetere talia indumenta unde vanam gloriam habeant, vel quibus alicui male placeant, vel quorum suavitate caro, quæ ad malum prona est, delectetur. » Ornatus decet animam dominam, non carnem ancillam. Bernardus : « Magna abusio

et nimis magna, dominam ancillari, et ancillam dominari. » Ornatum pretiosum dissuadet Scriptura per exempla, et quæveniunt ex eo mala. Dissuadet illum Paulus I Tim. ii, 6, dicens : *Volo mulieres orare in habitu ornato, idest honesto, cum sobrietate et verecundia ornantes se, non tortis crinibus, aut auro et margaritis, vel veste pretiosa.* Idem dissuadetur I Petr. iii, ubi dicitur : *Mulieres subditæ sint viris suis* ; et subditur : *Quarum non sit exterius capillatura, aut circumdatio auri etc.* Idem dissuadetur multis exemplis. Dissuadet hoc Creator in plasmatione hominis, qui pretiosum spiritum sub vili sacco carnis abscondit. Non est verisimile quod voluerit vile corpus pretiosum tegumentum habere, qui pretioso spiritui vile tegumentum voluit dare. Idem dissuadet natura, quæ sub terræ vilitate aurum et alia pretiosa abscondit, et sub vilitate corticis nuclei dulcedinem. Sæpe etiam sub palliolo sordido latet sapientia, sicut dicit sapiens. Mercatores etiam trosellis cooperturam faciunt de vili panno. Quis fatuum non judicaret illum qui vili trosello pretiosam cooperturam faceret?

## CAPUT LV.

*Quod multa mala ex superbo et pretioso ornatu proveniunt.*

Ex superbo et pretioso ornatu multa mala proveniunt. Primo spiritualem ornatum impedit. Cyprianus : « Serico et purpura indutæ Christum induere non possunt : auro et margaritis et monilibus adornatæ ornamenta cordis et pectoris perdidierunt. » Secundo famam lædit : unde super illud I Timoth. ii : « *Non in tortis crinibus,* » dicit Glossa Ambrosii : « Superbus habitus non recta facit de se credi. » Tertio ad ignominiam et verecundiam hominis facit. Primo quia, sequela et signum est peccati primorum parentum. Sicut rosæ color naturalis ad decorem sufficit, et soli claritas propria, nec alio ornatu indiget ; sic primis parentibus ante peccatum ad decorem sufficiebat proprius color naturalis ; sed per peccatum senserunt in se unde erubescerent, propter quod vestis operimento indiguerunt. Bernardus : « Qui gloriatur de veste, similis est furi glorianti de cauterio : quia propter peccatum Adæ

usus vestium introductus est. » Secundo, quia remedium est turpitudinis et erubescentiæ. Sicut ergo ad gloriam loripedis non cedit pes ligneus, licet sit depictus, sic nec ad gloriam hominis cedit vestium ornatus. Tertio quod qui se superbe ornat, a creaturis se vilioribus pulchritudinem suam mendicat, quod ignominiosum est excellentiæ humanæ naturæ. Guido Carthusiensis : « Quomodo enim gloriabitur de pulchritudine, qui gloriatur de turpitudine? vestes te ornant, pulchritudo etiam si eas ornare. » Quarto superbus ornatus Deo contumeliam facit, cum pulchritudo animæ ad imaginem et similitudinem Dei factæ despicitur et inquinatur. De pulchritudine vero corporis, in quo jumentis similis factus est, magna cura habetur : de qua perversitate Deus multum offenditur, cum scilicet pulchritudo corporis, quæ adeo parva est, quod pellibus murium et stercoribus vermium adjuvari indiget, pulchritudini animæ, quæ similis est divinæ, præponitur. Quinto superbus habitus diaboli subjectionem ostendit. *Ipse enim est rex super omnes filios superbiæ*, Job xli. Gregorius : « Evidentissimum signum reproborum est superbia, humilitas vero electorum. Cum ergo quam quisque habeat cognoscitur, sub quo rege militet invenitur. » Ideo puellæ nobiles superbium ornatum abominari debent, sicut regina Esther quæ dicebat Domino : *Tu seis quod abominor signum superbiæ et gloriæ, quod est super caput meum in die ostensionis meæ*. Sicut aliqua persona nobilis indignaretur, si signo servitutis super caput ejus posito per civitatem duceretur ; sic puellæ cor nobile habentes superbium ornatum abominari debent. Signo crucis signati debent esse Christiani : sic signatus erat Paulus qui dicebat : *Stigmata Domini Jesu in corpore meo porto*, Gal. ult. Glossa Augustini : « Stigmata appellavit quasi notas pœnarum de persecutionibus quas patiebatur : » stigma enim dicitur punctum vel nota aliquo ferro facta. Præcipue in capite debent apparere signa humilitatis pœnitentiæ : ideo his qui baptizantur vel confirmantur, imprimitur signum crucis in fronte : et in capite jejunii capita fidelium asperguntur cinere. Sed hoc signo amoto multo aliter signantur, quibus gladius Dei non parcat secundum illud quod legitur de non habentibus Tau. Ezech. ix : *Non parcat oculus vester, neque misere-*

*mini*. Tau figura fuit crucis. Crux enim tantum tria brachia habuit ad modum T litteræ : sed post addita est tabula quædam a parte superiori ad scribendum titulum. Sexto Dei filios occidit. Chrysostomus super illud Matth. vi : *Qui viderit mulierem adconcupiscendam eam* etc. « Mulier, inquit, si se decoraverit, et oculos hominum ad se vocaverit, etsi plagam non intulerit, extremam vindictam dabit : venenum enim intulit, etsi nullus qui bibat, inventus sit. » Septimo, exemplo malo corrumpit : aliis enim mulieribus occasio est ruinæ vel per invidiam, vel per discordiam ad maritos, similes ornatus eis nisi procurent, vel per adulterium, ut habeant ornatum ab extraneis, quæ non possunt habere a maritis. Octavo, fructum orationis eis aufert : unde super illud I Tim. ii : *Non in tortis crinibus*, dicit Glossa Ambrosii : « Qui vult audiri, inclinare se debet amota a se pompa, ut misericordiam Dei provocet. » Habitus enim superbus non impetrat. Quomodo a Deo impetrabit, quæ superbiam quam Deus summe odit, secum adducit? Causa hujus odii est hæc. Superbia enim primam contumeliam intulit Eccles. x : *Initium omnis peccati superbia*; « *Oratio humiliantis se nubes penetrabit*, » Eccl. xxxv. Non sic oratio superbientis. Ps. ci : *Respexit in orationem humilium et non sprexit preces eorum*; Judith x : *Humilium et mansuetorum semper placuit tibi deprecatio*. Non parum damnificatur quæ pauper est spiritualiter, quando fructum orationum suarum amittit, in quibus magna pars bonorum quæ agit, consistit.

## CAPUT LVI.

*Quod studere debent puellæ nobiles, ut Filio Dei nobilissimo placeant.*

Studere debent puellæ nobiles, ut ei qui vere nobilis est, placeant, scilicet filio Altissimi. Hic nobilis in regionem longinquam abiit, Luc. xix. Ejus nobilitas in fine mundi apparebit, cum mundum judicaturus in majestate seu gloria sua veniet. Proverb. ult. : *Nobilis in portis vir ejus, quando sederit cum senatoribus terræ*. Ut autem ei perfecte placere valeant, necessarium est eis ut gratiam et amicitiam mundi despiciant. Amicitia mundi inimica est Deo : et qui voluerit amicus esse



mundi, inimicus Dei constituitur, juxta verbum Jac. iv. In Psal. lii : *Confusi sunt qui hominibus placent, quoniam Deus sprevit eos.* Augustinus II lib. *Confess.* : « Computrui coram oculis tuis placens mihi, et placere cupiens oculis hominum. » Gal. i : *Si hominibus placerem, Christi servus non essem.* Bernardus in *Epist.* : Volens placere hominibus, Deo non placet. » Deo potius placent puellæ nobiles ornatum corporis despiciendo, quam de ipso curam magnam habendo. Ambrosius *De virgin.* : « Dejecta decoris cura plus placet, et hoc ipsum quod nos non ornat, plus est. » Secundum nobilitatem Dei debet esse in puellis nobilibus studium placendi et ea quæ ei placent inquirendi. Tanto majori studio placere Deo opus est, quanto major est cui placendum est. Impossibile est quemquam Deo posse placere, qui quid ei placeat ignorat : fieri potest ut obsequendi voto offendat, si quo modo obsequi debeat ante non didicit. Indignari debent puellæ nobiles obsequi mundo : indignus est enim earum obsequio. Senex est fatuus et insensatus, contemptibilis est, et per indigna gratia ejus acquiritur. Quæ gratia care emitur, parum vel nihil, immo minus quam nihil valet : quia *melior est ira ejus risu*, Eccl. vii, et cito amittitur. Puellæ nobiles quæ sic abominantur meretricium statum, abominari debent meretricium ornatum. Exhibere etiam debent reverentiam Conditori suo, et cavere ne immutando faciem ab eò conditam, eum offendant et confundant. Naturalis amor est opifici ad opus suum, et temeraria ejus corruptione offenditur, confusionem suam hoc reputans. Eccl. iv : *Non assumas faciem contra faciem tuam.* De immutante faciem a Deo sibi datam, dicit Hieronymus in *Epistolis* : « Qua fiducia erigit ad cœlos vultus, quos Conditor non agnoscit? » Crinibus propriis contentæ esse debent, nec est earum capillum nigrum, album vel flavum facere. Cum nolint venales esse, signa venalitatis non debent in eis apparere.

## CAPUT LVII.

*Quod monendæ sunt ad amorem pietatis.*

Item monendæ sunt puellæ nobiles ad amorem pietatis. Pietas enim eas Deo amabiles reddet, juxta illud Augustini :

« Nihil est quod ita Domino amabilem faciat ut pietas. » Pietas etiam eas de hoste triumphare facit : unde super illud Psalm. cxlvi, *misericordia mea et refugium meum* habetur, quod « de nullo sic vincitur inimicus diabolus, ut de misericordia. » Item gratiam custodit, juxta quod legitur de eleemosyna Eccles. xix : *Gratiam ejus quasi pupillam conservabit.* Pietas seu misericordia loco in quo sumus, multum congruit, qui est vallis lacrymarum vel miseriarum. Populo misero multum placet, juxta illud Bernardi : « Misericordia miseris dulcius sapit. » Habenti eam multum utilis est, juxta illud I Tim. iv : *Pietas ad omnia utilis est, promissionem habens vitæ quæ nunc est, et futuræ.* Non solum enim in futuro remuneratur, sed etiam in præsentia. Pietas a Deo quod vult impetrat. Eccl. xix : *Conclude eleemosynam in sinu pauperis, et ipsa exorabit pro te.* Isa. lviii : *Frange esurienti panem tuum etc.* et subditur : *Tunc invocabis, et Dominus exaudiet : clamabis, et dicet : Ecce adsum, quia misericors sum Dominus Deus tuus.* Misericors de Dei misericordia sperare potest, juxta illud Psalm. li : *Ego sicut oliva fructifera in domo Dei speravi in misericordia Dei.* Cum omne animal diligat omne simile sibi, Eccl. xiii, verisimile est quod Dei misericordia misericordiam diligat in homine. Non potest esse quod misericordia nostra fluente debito modo ad proximum, fons divinæ misericordiæ nobis siccetur. Augustinus : « Fluit rivus, et fons siccabitur? » Misericordia loca in regno cœlorum assignat, juxta illud Eccl. xvi : *Omnis misericordia faciet unicuique secundum intellectum peregrinationis illius, et secundum meritum operum illius.* Puella nobilis cum nupserit, pauperum refugium esse debet. Habent naturaliter mulieres corda tenera, cum viri habeant corda dura ; earum est emollire viros : et cum ipsæ in domibus suis stabiles, viri autem earum frequenter sint absentes, quando viri cum hostibus suis pugnant armis, uxores debent cum eis pugnare eleemosynis. Eccl. xxix, dicitur de eleemosyna : *Super scutum et super lanceam adversus inimicum tuum pro te pugnabit.* Si mulier in domo non fuerit, pauper ad domum veniens refrigerium non invenit, juxta illud Eccl. xxxix : *Ubi non est mulier, ingemiscit egens.* Debent puellæ nobiles, quæ habent nobilitatem carnis, habere magnum desiderium veri honoris, qui pietate acquiritur,



juxta illud Matth. xxv : *Accipite regnum quod vobis est paratum ab origine mundi. Esurivi enim et dedistis mihi manducare etc.*

## CAPUT LVIII.

*Quod puellæ monendæ sunt ad mansuetudinem.*

Item monendæ sunt ad mansuetudinem puellæ nobiles, ad quam natura eas incitat, cum juxta verbum sapientis, homo sit animal mansuetum : nam habentes nobilitatem carnis, decet habere nobilitatem mentis. Vera autem nobilitas mentis est mansuetudo, quæ in rege nostro splenduit, et quam suos habere voluit. Hæc est nobilitas, quam nulla superat rusticitas. Super Matth. v, habetur : *Mansuetudo est dulcedo animi, quam non vincit amaritudo.* Inter amatores mundi aliqui habent imperfectam nobilitatem, quia nulli primo rusticitatem faciunt ; sed si aliquis eis rusticitatem fecerit, eam reddunt qui sine rusticitate non sunt. Cum enim de sacco exire non possit nisi quod in eo est, rusticitas in illis est. Servi vero Dei perfectam habent nobilitatem insuperabilem a rusticitate : quidquid enim eis dicatur vel fiat, nobilitatem suam retinent. Mansuetudo multum facit diligere, juxta illud Eccl. iii : *Fili, in mansuetudine opera tua perfice, et super gloriam hominum diligeris.* Mansuetudo habet virtutem adamantinam. Adamas ad se ferrum tradit ; mansuetudo vero corda dura et quasi ferrea ad sui amorem attrahit. Mansuetudo locum parat, ubi anima cum Deo quiescat. Immansuetos et impatientes spiritus malus exagitat, ut patet in Saule I Reg. xvi. Puellis nobilibus si contingat eas nubere, multum necessaria est mansuetudo, qua virorum crudelitas refrænetur. Mansuetudo ad impetrandum a Deo quod nobis necessarium est, multum juvat, juxta illud Judith ix : *Humilium et mansuetorum semper tibi placuit deprecatio.* Et Dominus ait beato Dionysio in carcere posito : « Benignitas et dilectio quam semper habuisti, facient ut quidquid petieris aliquibus, impetres. » Mansuetudo virtus regia est : unde Dominus primum principem populi sui Moysen constituit, qui erat mitissimus super omnes homines qui morabantur in terra, Num. xii : et III Reg. xx, legi-

tur : *Audivimus quod reges domus Israel clementes sint.* Cum hac nobili conditione petit Isa. xvi, regem mundo promissum dicens : *Emitte agnum, Domine, dominatorem terræ.*

## CAPUT LIX.

*Quod monendæ sunt ad taciturnitatem.*

Item monendæ sunt puellæ nobiles ad taciturnitatem. Communiter adolescentes parum debent loqui, juxta illud Eccl. xxxii : *Adolescens, loquere in tua causa vix cum necesse fuerit. Si bis interrogatus fueris, habeat caput responsum tuum.* Cum in adolescentibus parum sit discretionis, parum debet esse in eis locutionis. Cum discretionem enim loqui oportet, eo quod indiscrete loqui valde sit periculosum : mors enim et vita est in manibus linguæ. Prov. xviii : *Verba etiam nostra examinanda sunt in districto Dei judicio,* juxta illud Matth. xii : *De omni verbo otioso quod loquuti fuerint homines, reddent rationem de eo in die judicii.* Taciturnitas via est ad modestam et disciplinatum loquelam. Si adolescens raro loquatur, ad hoc pervenire poterit ut loquatur modeste, juxta doctrinam sapientis. Qui vult addiscere artem scribendi, non debet in principio intendere ad hoc quod multum scribat, sed ad hoc ut bene scribat. Si hoc solum intendat ut multum scribat, nunquam ad hoc perveniet ut scribat bene. Cito scribendo non fit ut bene scribatur : bene scribendo fit ut cito, per usum. Similiter se habet de loquela : multum enim tacendo potest addiscere adolescens loqui modeste. Eccles. iii : *Tempus tacendi, et tempus loquendi ;* Gregorius : « Prius tacendi præmittit tempora, et postmodum subdit loquendi : quia non loquendo tacere, sed tacendo debemus loqui discere ; » Idem : « Recte per excrecentem gratiam sermonem accipit, qui ordinata antea per humilitatem tacet. » Valet ad hoc taciturnitas, ne innoxia lingua labatur. Gregorius. : « Valde difficile est ut qui multa loquitur, non etiam mentiatur. » Idem : « Qui verba sua metiri nesciunt, proculdubio ad otiosa verba dilabuntur : in quibus se minime reprehendunt, statim ad noxia et contumeliosa verba prosiliunt. Isti quippe sunt casus culpæ crescentis, ut lingua cum non restringitur, nequaquam

ubi ceciderit jaceat, sed semper ad deteriora descendat. » Idem : « Dum otiosa verba cavere negligimus, ad noxia pervenimus ; ut prius loqui aliena libeat, et postmodum detractionibus eorum vitam de quibus loquitur, lingua mordeat. » Sapiens : « Qui nescit tacere, nescit loqui. » Proximus ille Deo est, qui scit ratione tacere. Specialiter puellas nobiles decet taciturnitas, in quibus debet abundare verecundia, quæ est fuga rei indecentis, et timor in turpi facto. Valde enim indecens est si de nobili puella possit dici illud Jer: v : *Frons mulieris meretricis facta est tibi, quia nolisti erubescere.* Ambrosius in libro *De virgin.*: « Malo sermonem virgini deesse, quam superesse. Nam si mulieres etiam de rebus divinis jubentur in Ecclesia tacere, domi viros suos interrogare ; de virginibus quid putamus, in quibus pudor ornat ætatem, taciturnitas commendat pudorem? » Fatua mulier a Salomone ostenditur esse garrula ; Prover. v. Decet omnes virgines abhorrere omnem immunditiam et cavere, et specialiter in membris illis ubi ipsæ magis solent displicere, scilicet in ore et lingua. Ad cavendam vero hanc immunditiam multum valet taciturnitas. Sapiens i : *A detractione parcite linguæ.* Nobilitas hujus membri debet sufficere ad hoc, quod detractione vel aliis verbis inhonestis non maculetur. Debent nobiles mulieres multum intendere orationi, cum operibus servilibus non intendant : ideo linguam a Dei offensa multum debent custodire : quia secundum Gregorium : « Cum is qui displicet ad intercedendum mittitur, irati animus ad deteriora provocatur. »

## CAPUT LX.

*Quod puellæ nobilis nupturæ consensus est requirendus, et faciendæ sunt ei admonitiones quæ factæ sunt Saræ, quæ habentur Tob. x cap.*

Si puella nobilis nuptui tradenda fuerit, requirendus est ejus consensus, cum sine consensu nullum sit matrimonium, et cum invitæ nuptiæ soleant habere malum eventum. Eliezer nuntius Abrahæ jam alias obtinuerat consensum Laban, et matris Rebeccæ, ut Rebeccam duceret Isaac in uxorem. Ipso autem volente recedere, dixerunt mater ejus et pater :

*Vocemus puellam, et quæramus voluntatem ejus,* Genes. xxiii. Et licet melius sit continere quam nubere, tamen quia continentia de facili perditur, sine culpa viro nuptui traditur. Eccl. vii : *Filiæ tibi sunt, serva corpus illarum.* In eod. : *Trade filiam (scilicet nuptui) et grande opus feceris : et homini sensato da illam.* Puellæ nobili nubenti faciendæ sunt admonitiones illæ quæ factæ sunt Saræ, quæ habentur Tob. ix : *Apprehendentes filiam suam parentes, osculati sunt eam, et dimiserunt ire cum viro, monentes illam honorare sanctos, diligere maritum, regere familiam, gubernare domum, et seipsam irreprehensibilem exhibere.* Prima admonitio pertinet ad humilitatem et patientiam: nam sicut scripsit Terentius, et recitat Hieronymus : « Omnes socrus uno animo oderunt nurus : » ideo dicitur Eccl. lvii : *Noli consiliarium socero tuo.* Secunda admonitio est maritum diligere : unde Tit. ii : *Adolescentulas hortare ut viros suos ament.* Hujus autem amoris quatuor signa viris debent ostendere. Primum est, ut voluntarie eis se subdant ; unde Gen. iii : *Sub viri potestate eris, et ipse dominabitur tui.* Tripliciter debet esse subjecta uxor viro. Primo debitum ei reddendo : deinde eum timendo, et ipsi serviendo. I Cor. vii : *Uxori vir debitum reddat, et uxor viro ; Eph. v : Uxor timeat virum suum.* Augustinus : « Subditas et pene famulas lex esse voluit uxores : unde Sara obediebat Abrahæ dominum eum vocans, » I Petr. iii. Sollicita debet esse uxor ut viro placeat, ut sic ab eo diligatur, et ipse ab adulterio retrahatur. Patienter debet viri defectus sustinere : unde refert Hieronymus quod Duilius, qui prius Romæ navali certamine triumphavit, Iliam virginem uxorem duxit, quæ tantæ prudentiæ erat, ut illo quoque sæculo pro exemplo fuerit, quo impudicitia non vitium, sed monstrum erat. Is ergo jam senex ac trementi corpore in quodam jurgio sibi os fœtidum exprobrari audivit, et tristis se domum contulit. Cumque apud uxorem conquestus esset, cur se nunquam ut huic vitio mederetur, admonisset : Hoc, inquit dixissem, nisi os omnibus viris olere putassem : et addit Hieronymus : « Laudanda est in utroque pudica et nobilis femina, et si viri sui vitium ignoravit, et si patienter tulit, et quod maritus infelicitatem corporis sui non uxoris fastidio, sed inimici maledictis sensit. » Debet uxor viro suo corpus suum castum custodire. Tit. ii :

*Hortare adolescentulas esse castas.* Debent autem esse castæ non castitate coacta, sed voluntaria. Amor uxoris in virum debet esse pudicus : ad quam pudicitiam tria pertinent : scilicet ut eum quasi sponsum, non quasi adulterum diligat : ut zelotypiam abjiciat, nec aliquid indecens faciat ut pulchritudine ei placeat, non se pingendo, vel modo indebito ornando. Multum timenda est zelotypia : si enim maritus merito habet suspicionem de uxore, vel uxor de viro, vix habent pacem. De muliere zelotypa potest intelligi illud Eccles. vii : *Iuveni amariorum morte mulierem*; Eccl. xxvi : *Dolor cordis et luctus mulier zelotypa* (idest causa doloris). In eod. : *In muliere zelotypa flagellum linguæ omnibus communicans*, nulli scilicet parcens a contumelia vel detractio. Tertia admonitio est familiam regere, ut scilicet filios et filias, famulos et ancillas secundum Deum diligat et erudiat, nihil indisciplinatum vel impudicum in eis sustinens. Quarta admonitio est, gubernare domum, juxta illud quod legitur Tit. ii : *Admone illas esse prudentes, curam domus habentes.* Quinta admonitio est irreprehensibilem se exhibere, ut scilicet gratiosa sit apud omnes. Eccl. xxiv : *Gratia super gratiam mulier sancta et pudorata.* Sancta apud Deum per sanctum timorem, pudorata apud homines per honestam conversationem. Multum cavendum est puellæ nobili et garrulitas et litigiositas. Garrulitas proprietas est fatuæ mulieris. Prover. vii : *Tecta perstillantia in die frigoris et mulier litigiosa comparantur.* Sicut sub lecto perstillante in frigore non potest homo quiescere, sic nec cum litigiosa muliere. Si contingat adolescentem viro mortuo viduam remanere, attendat illud I Cor. vii : *Mulier alligata est viro quanto tempore vir vivit : quod si dormierit vir ejus, liberata est ; cui vult nubat, tantum in Domino.* Hieronymus : « Non damno bigamos, immo nec trigamos, sed si dici potest nec octogamos. » Ambrosius loquens de illo verbo Apostoli I Cor. vii, *Beatior erit si sic permanserit secundum meum consilium* (scilicet in nupta). Primæ, inquit, nuptiæ sub benedictione Dei subluniter celebrantur : secundæ autem etiam in præsentem carent gloria, sed propter incontinentiam conceduntur. Gloriam vocat propter ipsam benedictionem solemnem, qua sponsus et sponsa in primis nuptiis benedicuntur, sed non in secundis, ubi rectus ordo servatur, licet

in quibusdam Ecclesiis fiat contrarium. Augustinus in lib. *De bono conj.* : « Bonum quidem Susannæ in conjugali castitate laudamus ; sed tamen ei bonum Annæ viduæ, sed multo magis Virginis Mariæ anteponimus. » Sed quid esset si omnes continere vellent? si in caritate essent, multo citius civitas Dei impleretur. Sed non est hoc timendum quod omnes contineant, nam paucorum est continentia : unde dictum est a Domino Matth. xxix : *Qui potest capere, capiat.*

## CAPUT LXI.

*Quod quatuor requirebantur ad hoc quod aliqua vidua de bonis Ecclesiæ sustentaretur.*

Et notandum quod in primitiva Ecclesia de viduis cura specialis adeo fuit, ut quædam earum de bonis Ecclesiasticis sustentarentur. Sed ad hoc quatuor oportebat concurrere : scilicet ut esset ætatis protractæ, monogamæ, probatæ vitæ, mundi solatio destitutæ. De primo habetur I Tim. v : *Vidua eligatur non minus sexaginta annorum* : de secundo ib. : *Quod fuerit unius viri uxor* : de tertio ib. : *In operibus bonis bonum testimonium habens, si filios educavit, si hospitio recepit, si sanctorum pedes lavit, si tribulationem patientibus ministravit, si omne bonum opus subsequuta est.* Ibid. : *Viduas honora, quæ vere viduæ sunt.* In eodem : *Si qua vidua filios aut nepotes habet, discat primo domum suam regere, et mutuam vicem reddere parentibus : hoc enim acceptum est coram Deo.* In eodem dicitur : *Si quis fidelis viduus habet, ministrat illis, ut non gravetur Ecclesia.*

## CAPUT LXII.

*Quod virginitas matrimonio sit præponenda.*

Ultimo in hoc libro agendum est de excellentia virginali, quæ nobilibus puellis multum congruit, quæ matrimonio præponenda est, nisi timor de incontinentia aliud suaserit. I Corinth. vii : *Qui matrimonio jungit virginem suam, bene facit : et qui non jungit, melius facit.* In eodem : *Mulier innupta et virgo cogitat quæ Domini sunt, ut sit sancta corpore et*

*spiritu : quæ autem nupta est, cogitat quæ sunt mundi, quomodo placeat viro. Porro hoc ad utilitatem vestram dico; non ut laqueum vobis injiciam; sed ad id quod honestum est, et quod facultatem præbeat sine impedimento Dominum obsecrandi.* In eodem : *Dico non nuptis et viduis, bonum est illis si sic permanserint sicut ego : quod si se non continent, nubant : melius est enim nubere quam uri.* Et notandum quod virginitas corporis parum valet cum corruptione mentis. Hieronymus : « Nihil prodest carnem habere virginem si mente quis nupserit. » Augustinus in lib. *De virg.* : « Felicior mihi videtur mulier nupta, quam nuptura virgo : habet enim illa quod ista cupit, præsertim si nondum sponsa cuiquam sit. Illa uni studet placere cui data est, hæc multis, quia incerta cui danda est. Hæc uno pudicitiam cogitatione defendit a turba quod non adulterum, sed maritum quærit in turba. »

## CAPUT LXIII.

*De virginitatis speciositate.*

Ad commendationem virginitatis tria specialiter faciunt : scilicet ejus speciositas, virtuositas, gloriæ ejus specialitas. Propter speciositatem thesaurus dicitur Matth. xiii : *Simile est regnum cælorum thesauro abscondito in agro, quem qui invenit homo abscondit.* In agro corporis nostri absconditus est thesaurus virginitatis, quem qui invenit pretiositatem agnoscendo, abscondit. Sæculo enim renuntians, monasterium sibi eligit, ubi in abscondito faciei Dei vivit. Bernardus : « Necessarie habemus abscondere si quod habemus boni, quoniam thesaurum regni cælestis qui invenit abscondit : propter quod in claustro et sylvis abscondimur, nec hoc infructuose. Credo enim nullum esse hic, qui si quartam partem quæ facit, actitaret in sæculo, qui non sicut sanctus adoraretur, reputaretur ut Angelus ; nunc autem quotidie tamquam negligens increpatur. » Ad hanc pretiositatem pertinet illud Eccl. xxvi : *Non est digna ponderatio continentis animæ.* Thesaurus iste regno cælorum similis est : vita enim virginum cælesti vitæ multum assimilatur. Matth. xxv : *Simile est regnum cælorum decem virginibus. In resurrectione non nubent, nec nubentur.* Ibid. xxi. Virginitas in hoc mortalitatis loco et tem-

pore quemdam statum immortalis gloriæ repræsentat. Cyprianus : « Imaginem ejus qui de cælo est, portat virginitas. » Hieronymus : « In carne præter carnem vivere non terrena vita est, sed cælestis. » Virgines etiam regno cælorum similes sunt Dei inhabitatione. Deus enim habitat in eis. Luc. xii : *Regnum Dei intra vos est.* Vita virginum, regina est. Cum ipsæ sponsæ sint regis cælestis ; et ideo reginæ ipsæ, et regnant in regno corporis sui. Virginitas thesaurus niveus est Job. xxxviii : *Numquid ingressus es thesauros nivis?* Thesaurus est propter pretiositatem, niveus propter speciositatem.

## CAPUT LXIV.

*De ejus speciositate secundum quod lilio comparatur.*

Propter puritatem seu speciositatem lilio comparatur. Cant. ii : *Sicut liliū inter spinas, sic amica mea inter filias.* Ibid. dicitur de sponso qui pascitur inter lilia, puritate enim virginali delectatur. Virginitas flos est, qui si debito modo servetur, non decedit : quem ventus temporalis prosperitatis non dejicit, nec hyems adversitatis lædit. Hunc Joannes Evangelista fere centum annis servavit. Hic est flos qui fructum terrenum excidit, cum et fructui conjugali præponatur. Hac occasione beatus Matthæus occisus est, quia noluit consentire quod Ephigenia, quæ virginitatem voverat, cuidam regi nuberet. Flori virginitatis Deus pro fructu succedit. Sap. iii : *Felix sterilis et incoinquinata quæ nescivit torum in delicto; habebit fructum in receptione animarum sanctarum.* Super hunc florem Spiritus sanctus quiescit. Isa. xi : *Flos de radice ejus ascendet, et requiescet super eum Spiritus Domini.* Non est virgo arbor sterilis et maledicta, sed terreno fructui præponit cælestem et carnali spiritualem. Hieronymus : « Nuptiæ terram replent, virginitas autem paradisum. » Et notandum quod liliū habet sex folia candida, et aliqua grana aurea ; velut sex folia in virgine sunt sex quæ valent ad conservationem incorruptionis. Primum est sobrietas quod folium lacerat excessus in cibo et potu, quasi quædam spina, quæ est via ad luxuriam. Lot inebriatus perpetravit incestum, Genes. xix, Prov. xx : *Luxuriosa res est vinum.* Se-



cundum est labor, et quasi spina lacerans, est quies ignaviæ, vel otiositas quæ est via ad luxuriam. Ezech. xvi : *Hæc fuit iniquitas sororis tuæ Sodomæ, superbia, saturitas panis, et abundantia, et otium.* Poeta: « Quæritur Ægistus quare sit factus adulter? in promptu causa est; desidiosus erat. » Tertium est habitus asper et humilis. Bernardus in *Epist.* : « Non ætatem teneram ordinis asperitas terreat, sed memento quod asperitas cardui pannum facit leniorem, et conversationem conscientia. » Velut spina lacerans est superbus habitus, vel mollis, quia via est ad luxuriam : et filii Israel fornicati sunt cum mulieribus Moabitærum quæ se ornaverant. I Tit. ii : *Non in tortis crinibus vel auro etc.* Quartum est custodia sensuum, præcipue illorum qui nobis remota ostendunt, ut est visus, vel auditus. Quasi spina lacerans est curiositas videndi vana, vel audiendi nova, quæ via est ad luxuriam, ut patet in Dina; quæ egressa est ut videret mulieres regionis illius, et corrupta est a Sichem filio Emor, Genes. xxiv. Quintum est modestia sermonis. Velut spina lacerans est loquacitas vel turpitudine sermonis. Seneca : « A verbis turpibus abstineto, quia licentia eorum impudentiam nutrit. » Prov. vii : *Ecce mulier occurrat illi ornatu meretricio præparata ad capiendas animas, garrula.* I Cor. xv : *Corrumpunt bonos mores colloquia prava.* Sextum est fuga occasionum peccandi. Velut spina lacerans est nimia domesticitas. Virgo debet esse aliquantulum sylvestris. Sylvestria animalia solent habere pulchriorem pellem quam domestica. Opportunitas peccandi via est ad luxuriam, ut patet in Thamar corrupta ab Amnon fratre suo, quia solus cum sola fuit. II Reg. xiii. Gen. xix : *Nec stes in omni circa regione.* Solent virgines quæ veræ virgines sunt, esse pavida, et nunquam securæ esse, et ut caveant etiam timenda et tuta pertimescere. Quasi grana aurea sunt tres modi diligendi Deum, quos Bernardus distinguit dicens : « Disce amare dulciter, amare prudenter, amare fortiter. Dulciter ne illecti, prudenter ne decepti, fortiter ne oppressi ab amore Domini avertamur. » Grana aurea etiam possunt intelligi motus divini amoris ex diversis causis procedentes. Amandus est enim Deus, quia creator, quia salvator quia remunerator. Virginitas est principium spiritua-

lis pulchritudinis. Pulchritudo sponsæ Christi sicut et sponsi, consistit in candore et rubore, juxta illud Cant. v : *Dilectus meus candidus et rubicundus.* Dignior species candoris spiritualis est virginitas, et est quasi campus totius picturæ spiritualis : super eam ponit Deus picturam aliarum gratiarum. Eccl. xxv : *Gratia super gratiam mulier sancta et pudorata.*

## CAPUT LXV.

*Quod sex sunt timenda virginibus.*

Et notandum quod sex sunt multum timenda virginibus. Primum est superbia; Augustinus in lib. *De virg.* : « Non solum est prædicanda virginitas ut ametur, sed et monenda ne infletur. » Idem : « Superbia amplius amplioribus insidiatur; non ego talibus magnam curam humilitatis ingero, in quibus superbia ipsa confunditur : quo magis est alicui unde sibi placeat, eo magis vereor ne sibi placendo illi displiceat qui superbis resistit, humilibus autem dat gratiam. » Bernardus : « Pulchra permixtio virginitatis et humilitatis. Non mediocriter placet Deo illa anima, in qua virginitas exornat humilitatem, et humilitas commendat virginitatem. Potest placere humilitas quæ virginitatem deplorat amissam. Sine humilitate, audeo dicere, nec virginitas Mariæ Deo placuisset. » Secundum est fatuitas. Hanc fatuitatem intelligo defectum caritatis. Si dilectio Dei est honorabilis sapientia, ut habetur Eccl. i, defectus divinæ dilectionis est fatuitas detestabilis. Magna fatuitas est non cavere defectum illius rei sine qua cetera non prosunt, scilicet caritatis. Fatuæ virgines non sumpserunt oleum secum cum lampadibus, Matth. xxv. Bernardus in *Epist.* : « Castitas sine caritate lampas sine oleo est : subtrahe oleum, lampas non lucet : tolle caritatem, castitas non placet. » Tertium est tepiditas, quæ solet accidere in virginibus ex hoc quod considerant se parum peccasse : contra quod dicit Augustinus in lib. *De virg.* : « Quoniam Veritas dixit quod ille cui modicum dimittitur, modicum diligit, vos ut ardentissime diligatis, cui diligendo a conjugiorum nexibus liberæ vacatis, deputate vobis tanquam omnino dimissum quidquid a vobis non est illo regente com-



missum. Multo attentius debes diligere illum, qui flagitiosis ad se conversis quæcumque dimisit, in ea te cadere non permisit. Quid habes quod non accepisti, aut qua perversitate minus diligis a quo plus accepisti? Noli modicum diligere quasi a quo modicum tibi dimissum est : sed potius dilige multum, a quo multum tibi tributum est. » Contra hanc tepiditatem valet virginibus, si habeant frequenter vinum sacræ Scripturæ quod est vinum germinans virgines, Zach. ix, idest virginales affectiones. Ad idem valeat meditatio Dominicæ passionis. Thren. i : *Torcular calcavit Dominus virgini filix Juda*. Istud torcular fuit pressura crucis, unde virginibus stillat vinum fervoris. Quartum est macula peccati, quæ in virgine est macula in gloria. Macula est turpior in veste alba : virginitas est quasi vestis alba, quæ byssus vocatur. Prov. ult. : *Byssus et purpura indumentum ejus* : unde macula peccati valde indecens est in virgine. Hieronymus : « Præclara est virginitas et pudicitix virtus, si non aliis macularum lapsibus infirmetur. » Ut sponsa Christi valeat cavere maculam peccati, frequenter debet inspicere in speculo sacræ Scripturæ. Gregorius : « Specula sunt Dei præcepta, in quibus animæ sanctæ semper aspiciunt, et si quæ in eis sunt fœditates, deprehendunt. » Cant. v : *Oculi ejus sicut columbæ super rivulos aquarum, quæ lacte sunt lotæ, et resident super fluentia plenissima*. Columba lacte lota est sponsa Christi cum puritate virginali, quæ super fluentia Scripturæ est, ut umbram accipitris infernalis ibi videat, et eum caveat. Quintum est divisio cordis. Augustinus loquens virginibus : « Toto vobis figatur in corde, qui pro vobis fixus est in cruce : totum teneat in animo nostro, quidquid nolulistis occupari connubio. » *Væ duplici corde*, Ecele. ii. Duplici corde est virgo, quæ vult placere Deo et mundo. Bernardus in *Epist.* : « Volens placere hominibus, Deo non placet. » Signum quod virgo habeat cor divisum et velit mundo placere, est exterior ornatus. In Psal. xlv : *Omnis gloria filix regis ab intus*. Ambrosius *De virg.* : « Dejecta decoris cura plus placet, et hoc ipsum quod vos non ornatis, ornatus est. » Bernardus in *Epist.* : « Filix Babylonis quarum vera filia in confusione

est, induuntur purpura et bysso, et sub his conscientia pannosa jacet; fulgent mouilibus, et sordent moribus : e contra tu foris pannosa, intus sponsa resplendens, sed divinis aspectibus, non humanis. » Sexto timendum est ne desit perseverantia. Augustinus in lib. *De virg.* : « Sequimini Agnum, tenendo perseveranter quod vovistis ardentem : facite cum poteritis, ne bonum virginitatis a vobis pereat, cui facere nihil potestis ut redeat. » Virginitas amissa non recuperatur, sicut lampas fracta non reintegratur. Bernardus in *Epist.* : « Studete perseverantiæ, quæ sola coronatur. » Idem : « Scias diabolus soli semper perseverantiæ insidiari, quam solam novit coronari. »

## CAPUT LXVI.

*De virtuositate virginitatis.*

Sequitur de virginitatis virtuositate : quæ primo apparet ex hoc quod membra illa refrænata, in quibus concupiscentia maxime sævit; et secundum Hieronymum, interius libido virginibus majorem parit famem. Dulcius enim æstimatur quod nescitur. Virtuositas etiam ejus apparet ex hoc quod dicit Ambrosius : « Major, inquit, est victoria virginum, quam Angelorum. » Angeli enim sine carne vivunt; homines vero virgines in carne triumphant. Bernardus in *Epist.* : « Angelus habet virginitatem, sed non carnem, sane felicior quam fortior in hac parte. Optimus et optabilis valde ornatus ille, qui et Angelis possit esse invidiosus. » Ad virtuositatem etiam ipsius pertinet quod Dei amicum et familiarem facit et proximum esse Deo. Sapien. vi : *Incorruptio facit proximum esse Deo*. Joannes virgo vocatur discipulus quem diligebat Jesus. Ipse tamquam familiaris recubuisse dicitur super pectus Domini, Joan. xiii. Beda *Sup. Luc.* : « Sicut Christus in summa pace natus est, ut se pacem diligere ostenderet : ita de virgine natus est, ut se virgineum decus diligere monstraret. » Christus virgo fuit, virginem matrem habere voluit, et virginem præcursorem. Joseph creditur etiam fuisse virgo, et Joannes ejus familiaris virgo fuit.

## CAPUT LXVII.

*De specialitate gloriæ ejus.*

Sequitur de specialitate gloriæ virginitatis. Virginitas in præsentī est gloriosa, juxta illud Cypriani : « Virginitas est portio illustrior gregis Christi. » Augustinus : « Nunc nobis ad virgines sermo est, quarum quo gloria sublimior, major et cura. » In futuro vero non solum virgines habebunt communem gloriam, de qua in Psal. cXLIX : *Gloria hæc est omnibus sanctis ejus*; sed etiam habebunt aureolam, sicut martyres et prædicatores. De aureola illa quæ debetur virginitati, habetur super Exod. xxv. Ad hanc coronam pertinet canticum novum quod virgines tantum coram Agno concinunt : Et super illud Apoc. xiv : *Cantabunt quasi canticum novum ante sedem Dei*, idest « de integritate animæ et corporis exultabunt. » Multum gaudebunt de hæc speciali similitudine, quam cum Christo habuerunt. Merito in futuro virginibus cumulabitur gloria, quæ gloriam filiorum in præsentī amore Dei contempserunt. Item merito specialiter a Christo glorificabuntur, quæ specialiter in præsentī in corporibus suis illum glorificant, juxta illam sententiam Augustini in serm. *De virg.* : « Quanto, inquit, fragilior est sexus, quanto infirmius vasculum quod deportat ab hoste triumphum, tanto diabolus majori opprobrio confusionis induitur, tantoque mirabilius Deus in sanctis suis agnoscitur. Magna gloria Dei quod virgo castrum debile corporis sui sibi data a Christo tenet aliquando sexaginta annis vel amplius, contra illum de quo legitur Job xli : *Non est potestas in terra, quæ ei valeat comparari.*

## LIBER SEXTUS.

## PROŒMIUM.

In præcedenti libro ostensum est quomodo princeps se habere debeat ad eos qui sunt ab ipso, scilicet ad filios et filias; in hoc sexto lib. ostenditur quomodo habere se debeat ad eos qui sunt sub ipso, scilicet ad subditos.

## CAPUT I.

*De doctrina Joannis data militibus.*

Ad cognoscendum hoc, animo attendendum est ad doctrinam a Joanne Baptista militibus datam Luc. II, dicente eis : *Neminem concutiatis, nec calumniam faciatis, et estote contenti stipendiis vestris.* Debet princeps ad subditos habere mansuetudinem, veritatem, justitiæ rectitudinem : unde summo principi dicitur Psalm. XLIV : *Regna, propter veritatem, et mansuetudinem et justitiam.* Neminem concutiatis comminatione pœnæ eum terrendo : nec calumniam faciatis, culpam falsam imponendo ei : et estote contenti stipendiis vestris ; quæ erant statuta pro defensione reipublicæ. Mansuetudo in principe vim irascibilem debet refrænare, ne inordinate ab eo exeat ignis iræ. Ne princeps sit rhamnus ad impetum venti superbiæ, ignem scilicet iræ ex se producens : sed sit oliva, vitis, vel ficus. Veritas vim rationalem ejus dirigere debet, ne falsitatem circa subditos inveniat, vel inventam ab aliis admittat, ut bona eorum valeat extorquere : rectitudo vero justitiæ vim concupiscibilem debet frænare, ut cum Deo voluntatem unam habeat, et bona subditorum inordinate non appetat. Duo conjungunt hominem Deo : scilicet innocentia et rectitudo, juxta illud Psal. xxiv : *Innocentes et recti adhæserunt mihi.* Unitate voluntatis maxime adhæret quis Deo, voluntatem unam habens cum eo. Unam cum Deo habemus, si irascibilis sine curvitate. Primum facit innocentia, secundum rectitudo. Innocentia adversatur malignitati, quæ est appetitus alieni mali; rectitudo curvitati, quæ est appetitus inordinatus transitorii boni. Hæc duæ gratiæ reddunt hominem conformem Deo, et sic faciunt eum ipsi adhærere. Psal. xxiv : *Rectus Dominus Deus noster, et non est iniquitas in eo.*

## CAPUT II.

*De magnitudine malitiæ impiorum principum in subditos.*

Magnitudinem malitiæ impiorum principum in subditos suos multum ostendit

Spiritus sanctus in Scriptura sacra, dicens eos excoriare pauperes, atterere, commolire, pascere, comedere, devorare Mich. III, habetur de primo : *Odio habetis bonum et diligitis malum, qui violenter tollitis pelles eorum desuper eos, et carnem eorum desuper ossibus eorum.* De secundo et tertio Isa. III : *Rapina pauperis in domo vestra. Quare atteritis populum meum, et facies pauperum commolitis?* De quarto Eccles. XIII : *Venatio leonis est onager in eremo, sic pascua divitum sunt pauperes.* De quinto Prov. XXX : *Generatio quæ pro dentibus gladios habet, et commandit molaribus suis ut comedat inopes de terra, et pauperes ex hominibus.* De sexto Ezech. XIX : *Factus est leo, et didicit prædam capere, et homines devorare.* Sed qualiter Spiritus sanctus, qui hoc dicentibus inspiravit, ea intellexit? Respondeo. Raptores hoc pauperibus dicuntur facere quando ea faciunt rebus quæ vitæ eorum sunt necessariae. Cum raptor excoriat unum bovem, quem habet pauper homo, tale est pauperi ac si eum excoriat : unde David II Reg. XII, cum proposuisset ei Nathan parabolam de divite habente oves et boves plurimos valde, qui abstulerat pauperi homini unicam ovem quam nutrierat ut filiam, et valde caram habebat, parcens suis, et parans ex ea convivium cuidam peregrino qui ad illum divitem venerat, respondit raptorem illum esse morte dignum, quasi homicidium commisisset : *Vivit, inquit, Dominus, quoniam filius mortis est vir qui hoc fecit.* Secundum hunc modum raptor molit pauperem cum frumentum pauperi necessarium molit. Aliter raptor pauperem excoriat, cum illa ei aufert, quæ per amorem ita adhærent pauperis cordi, sicut pellis adhæret corpori, immo plus adhærere videntur. Cum enim pauper ad mortem infirmatur, potius permittit animam separari a corpore, quam id quod habet det medicis ut sanetur. Ex hac adhæsiōne potest patere qualis sit dolor pauperum in illorum bonorum ablatione. Carnem et sanguinem auferunt raptores pauperibus, cum auferunt eis illa quæ ipsi acquisierunt labore et sudore, et proprii corporis consumptione, quæ etiam proprio corpori subtraxerunt, ut in carnem converterentur et sanguinem. Plus raptor facit pauperi quam si eum excoriat : tunc enim suam pellem ei auferret, sed nunc pauperi aufert quod non suum est sed quod ei accommodatum est ab usurariis, et

quod jam comedit et bibit : expendit enim pauper multoties frumentum et vinum antequam illa colligat. Pauper a raptore commolitur, quia inter spem evasionis et metum deprædationis quasi inter duas molas affligitur. Item facies pauperum commolitur : ad tantum enim maciem faciunt eos devenire præ nimia paupertate quod videntur genæ eorum depressæ fuisse inter duas molas. Ad ostensionem magnæ malitiæ impiorum principum Spiritus sanctus diversis bestiis crudelibus eos comparat, ut leoni et urso. Prov. XXVIII : *Leo rugiens et ursus esuriens princeps impius super populum pauperum.* Lupo etiam comparatur princeps impius. Boetius in lib. *Consol.* dicit de tali : « Avaritia fervet, alienarum opum violentum ereptorem, lupi similem dixeris. » Malitiæ magnitudinem quæ in talibus est, ostendit Salomon Prov. XXX, dicens : *Generatio quæ pro dentibus gladios habet, et commandit molaribus suis etc.* Velut dentes præcisivi sunt taxatores emendarum : quasi molares sunt mali collaterales : quasi ungues sunt præpositi. Dentes sunt, quia pauperes comedunt et devorant : gladii vero sunt, quia eos occidunt, dum vitam eorum eis auferunt, juxta illud Eccl. XXXIV : *Qui aufert in sudore panem, quasi qui occidit proximum suum.*

### CAPUT III.

#### *De impietate injustarum talliarum.*

Circa principes qui in subditos suos sunt crudeles, specialiter attendenda est impietas injustarum talliarum. Et primo ostendetur circa hoc magnitudo culpæ. Secundo magnitudo pœnæ. Tertio quam miserabilis sit status aliquorum principum, qui dicunt se a talibus talliis non posse cessare, cum tamen sciant quod facere eas ipsis sit damnabile. Ad culpæ magnitudinem quatuor pertinent : scilicet infidelitas, Dei ingratitude, contemptus Dei, et contemptus Angelorum ejus. Cum eadem fidem debeat dominus subditis quam subditi ei, et dominus fidem velit sibi servari a subditis, magna infidelitas est cum ipse eis fidem non servat. Si subditus caperet dominum suum, vel alio modo malum ei faceret, proditor esset : sic dominus proditor est, si subditum capit nisi ille culpam commiserit quæ

hoc requirat. Nec minus indecens est si dominus absque culpa subditi eum capit, quam si subditus dominum caperet. Dicunt aliqui milites et aliqui principes: Si aliquis mihi subditus non esset, et ei facerem malum, tunc bene scio quod peccarem; sed si subdito meo malum facio, non credo peccare, vel tantum peccare. Quibus potest dici, quod secundum hoc dominatio eorum diabolica est. Diabolus enim talis dominus est, quod sibi subditis loco retributionis afflictionem reddit; et illis qui melius ei serviunt, plura mala facit. Præterea quis sanæ mentis dubitet minus licitum hostem esse in suos quam in extraneos? Quis nesciat causam prodicionis esse cum amicis inimicitias exercere? Subditi, secundum verbum Sapientis, sunt humiles amici, cum constet quod princeps vel miles fidem debeat pauperi homini antequam faceret ei homagium tamquam fratri suo christiano, nec pauper eum a fide illa absolveret, cum ei homagium fecit, sed ex homagio recepto magis est ei obligatus; sic quomodo a crimine prodicionis immunis est cum subdito malum facit, nisi ei prius significet quod non vult ei fidem illam servare, et quod non vult eum de cetero tamquam subditum, sed tamquam hostem habere?

#### CAPUT IV.

##### *De fidelitate domini ad subditum, et subditi ad dominum.*

De fidelitate domini ad subditum, et subditi ad dominum sic legitur in *Deer.* xxii causa, qu. v: Qui domino suo fidelitatem jurat, ista sex in memoria semper debet habere: Incolume, tutum, honestum, utile, facile, possibile. Incolume, videlicet ne sit in damnum domino de corpore suo. Tutum, ne sit ei in damnum de secreto suo vel demuntionibus suis per quas tutus esse potest: honestum, ne sit ei in damnum de sua justitia, vel de aliis causis quæ ad honestatem pertinere videntur. Cavere debet ne cum ejus uxore adulteretur, vel cum nepte vel cum filia ejus fornicetur. Utile, ne sit ei in damnum de suis possessionibus: facile vel possibile, ne id bonum quod Dominus suis leviter facere poterat, faciat ei difficile: vel ne id quod possibile erat, reddat ei impossibile, ut fidelis hoc caveat justum

est. Sed quia non sufficit abstinere a malo, nisi hoc faciat quod bonum est; restat ut in sex prædictis domino suo fidelis consilium et auxilium præstet, si beneficiis dignus videri vult, et salvus esse de fidelitate quam juravit. Dominus quoque fidei suo his omnibus vicem reddere debet: quod si non fecerit, merito censebitur maleficus: sicut ille qui in domini prævaricatione vel faciendo vel consentiendo deprehensus fuerit, perfidus et perjurus est.

#### CAPUT V.

##### *De peccato ingratitude et contemptu Dei et Angelorum in principibus impiis.*

Peccatum ingratitude divinæ ibi est. Deus enim honoravit eum aliis hominibus ipsum præficiendo: ipse vero ex hoc inhonorat Deum in pauperibus eos opprimendo. In hoc similis est militibus qui Dominum crucifixerunt, qui arundine de manu Domini accepta caput ejus percutiebant. In arundine signatur terrena potestas, quam milites a Deo accipiunt, et postea ex ea in pauperibus eum percutiunt. Contemptus etiam Dei et Angelorum est ibi. Licet enim Deus tradiderit pauperes custodientes potentibus hujus sæculi, tamen ipse noluit eos esse absque custodibus cælestibus: immo unusquisque homo habet Angelum bonum sibi ad custodiam deputatum, quem ille contemnit qui pauperem hominem opprimit; et cum Angelo Deum contemnit, cujus ministerium non reveretur.

#### CAPUT VI.

##### *De pœna principum impiorum.*

Prima pœna principum qui in subditos suos crudeles sunt, est paupertas. Dominus enim videns eos iniquos in paucis bonis temporalibus eis commissis, non vult eis amplius dare; sciens quod qui in modico iniquus est, et in majori iniquus est, ut habetur Luc. xvi: unde frequenter videmus milites qui tallias faciunt, pauperes; illos autem qui non faciunt, divites. Secundum est principatus diminutio vel amissio: subditi enim eorum fugiunt eos. Justo enim judicio fit, ut qui plus volebant habere quam deberent, non ha-



beant etiam quod deberent habere : unde legitur in lib. Reg. XII, quod Roboam filius Salomonis volens aggravare jugum filiorum Israel, dominium decem tribuum amisit. Tertia est a majori et fortiori oppressio. Vult enim Deus opprimi ab aliquo potentiori, sicut ipsi minus potentes opprimunt, juxta illud Psal. LVII : *Deus conteret dentes eorum in ore ipsorum : molas leonum confringet Dominus.* Per dentes et molas leonum intelligitur potestas devorandi pauperes et conterendi, quam interdum Dominus eis aufert. Quarta est cruciatus magni in futuro : durum enim judicium apud Deum merentur. Ea enim mensura qua mensi fuerint hi quibus præsunt, remetietur eis ab eo qui præest illis. Unde non credant Deum misericorditer acturum cum eis, cum ipsi non agant misericorditer, immo nec juste, cum subditis suis. Ad hæc pertinet quod legitur Sap. VI : *Cito apparebit vobis regibus, quoniam judicium durissimum his qui præsunt, fiet. Exiguo enim concedetur misericordia, potentes potenter tormenta patientur. Non enim subtrahet personam cujusquam Dominus, qui est omnium dominator, nec verebitur magnitudinem cujusquam. Pusillum et magnum ipse facit, et æqualiter illi cura est de omnibus : fortioribus autem fortior instat cruciatio.* Quinta est cœlestis regni amissio : sic enim Dominus dicturus est illi qui fidelis est in temporalibus istis : *Euge serve bone et fidelis, quia in pauca fuisti fidelis, supra multa te constituam :* et ita dicturus est illi qui se habuit infideliter : quia super pauca fuisti infidelis, supra nulla te constituam, intra in carcerem Domini tui, qui paratus est diabolo et Angelis ejus. Mira insania potentum hujus mundi, qui cum receperint aliquid terrenum a Deo, non curant de eo ac si nihil aliud haberet quod dare posset : et qui plus tenent de terra ab eo, minus curant de eo ; et quia plus habent de terra quam alii, de cœlo non curant. Status talium valde miserabilis est Deo et hominibus exosus, multum est ignominiosus. Dicunt se a talibus tallis non posse cessare, cum tamen eas facere sciant esse damnabile. Sicut lupus odio habetur ab hominibus et a ceteris animalibus, quia non vivit nisi ex eis quæ rapit ; sic tales odio habentur. In hoc tamen est differentia : quia lupi non exercent rapinam contra lupos, sed contra animalia alterius speciei ; sed raptores homines exercent

rapinam contra homines qui sunt ejusdem speciei cum eis. Ignominiosus est status talium : sicut gloriosum est dare, sic vile est quærere : et tanto vilius est genus quærendi, quanto vilior est persona a qua quæritur, et nobilior est persona quæ quærit. Vilitas ista quæ est in quærendo, multum debet reprimere principes et milites, ne ultra vires expenderent : plus enim est ignominia in quærendo, si ipsi scirent hoc intelligere, quam sit honoris expendendo prodige. Tales sunt in tali statu in quali esset aliquis positus in carcere, cui non apponerentur nisi toxicata, et sic cogitaret : Non possum vivere nisi comedam ; et si comedo, comedo mortem meam. In magno dolore animi debent esse tales, et totam vitam suam contemnere. Ridicula est excusatio talium, ut patet ex verbis Augustini in lib. *De verbis Domini* dicentis : « Sunt nonnulli qui aut militiae cingulo detinentur, aut in actu sunt publico constituti. Cum peccant graviter, assolent se prima voce a peccatis suis excusare quod militant, et ne bene aliquando faciant, occupatos se malis actibus conqueruntur. Indubitanter inexcusabilis est qui sciens et volens malam viam tenet, cum agnoscat viam bonam, et possit incedere per eam.

## CAPUT VII.

*De pertinentibus ad bonum principem.*

Princeps qui locum Dei tenet, et eum imitari debet, magis appetere debet a subditis amari quam timeri : frequenter cogitare debet quod in illo extremo et districtissimo judicio oportebit de subditis Deo rationem reddi. Bona sua, si necesse fuerit, debet eis liberaliter communicare. Multum decet principem liberalitas. Hæc est leonina nobilitas, juxta verbum Aristotelis in fin. *Prior.* De labore quem habet pro subditis pauperibus, et de beneficiis eis impensis debet retributionem a Deo, non ab homine expectare. Debet eos a malis protegere, nec sustinere debet majores minores opprimere. Ministros pauperibus subditis misericordes debet habere. Princeps subditos suos majores opprimentes minores, fortiter debet reprimere, sicut ostendit Valerius Maximus in lib. *De disciplina militari*, dicens : « Aspero castigationis genere militaris disciplina indiget : quia vires armis cons-



tant : quæ ubi a recto tenore desciverint, oppressuræ sunt nisi opprimantur. » Cum Seraphim Deo familiarissimi et propinquissimi sint, qui habent nomen ab excellentia dilectionis, et post illos Cherubin, qui nomen habent ab excellentia cognitionis, terreni principes exemplo summi Principis habere debent familiarissimos et propinquissimos homines Dei amore incensos, et post illos, homines scientia præcellentes. Princeps qui in hoc mundo vices Dei habet agere, totis viribus ad hoc conari debet, ut principem hujus mundi, scilicet diabolum, qui hujus dominium usurpat, possit ejicere. Item cum sciat principes districtissime seu durissime judicandos, judicium divinum ante oculos mentis quasi continue debet habere, et judicio proprio illud prævenire. Scriptum enim est I Cor. vi : *Si nosmetipsos dijudicavimus, non utique judicemur.* Bernardus : « Bonum judicium quod me illi districto subducit judicio et abscondit. Volo vultui iræ judicatus apparere, non judicandus. » Idem : « Judicemus interim, fratres, et terribilem illam expectationem studeamus præsentem declinare judicio. » Idem : « Qui judicari dissimulant judicio quo princeps mundi hujus ejicitur foras, judicem expectent, vel magis timeant, a quo cum ipso principe suo foras ejicientur et ipsi. » Debet princeps sic se habere, ut in eo possint alii exemplum bonum accipere. Isidorus : « Qui recte utitur regni potestate, formam justitiæ factis magis quam verbis instituit. Ille nulla prosperitate erigitur, nulla adversitate turbatur, non innititur propriis viribus, nec a Domino recedit cor ejus ; fastigio humili præsidet animo, non eum delectat iniquitas, non inflamat cupiditas : sine defraudatione alicujus pauperes divites facit, et quod justa potestate a populis extorquere poterat, sæpe miserendi clementia donat. » Multum nocet exemplum principis mali. Bernardus in *Epistola* : « Principis error multos involvit, et tantis obest, quantis præest ipse. » Exemplum vero bonum principis et Deo multum placet, et hominibus multum prodest. Bernardus in *Epist.* « Minime quidem Deus est acceptor personarum : nescio tamen quo pacto virtus plus in nobili placet : an forte quia plus caret ? Siquidem ignobilis cum caret gloria, non facile liquet utrum careat quia nolit, aut quia non possit habere. Laudo actam de necessitate virtutem ; sed plus

illam quam elegit libertas, non induxit necessitas. » Princeps de bonis quæ habet, Deo gratias agere debet. Augustinus : « Ex his quæ habes, age gratias tamquam fonti bonitatis unde habes, » atque « in omnibus bonis actibus tuis da illi claritatem. » Multum debet princeps cavere ne potestatem quam a Deo habet, indignis communicet, qui ea abutantur : mala enim ab eis facta ei imputarentur : sicut patet ex verbis Domini, Joan. xix, cum dixisset Pilatus, *potestatem habeo crucifigere te, et potestatem dimittere te.* Respondit ei Dominus : *Non haberes potestatem adversus me ullam, nisi tibi esset datum de super.* Propterea qui tradidit me tibi, *major peccatum habet.* Laudabiles mores debet princeps habere : unde Augustinus loquens principi vel militi : « Ornet mores tuos pudicitia conjugalis, ornet sobrietas et frugalitas. Valde enim turpe est ut quem non vincit homo, vincat libido, et obruatur vino qui non vincitur ferro. »

## CAPUT VIII.

### *Quod cavendum sit superbia principi.*

Necessarium est principi a superbia cavere, si vult ab aliis vitiis abstinere. Vitium superbiæ quasi rex est vitiorum ; coronam habet, sed maledictam, juxta illud Isa. xxviii : *Væ coronæ superbiæ.* Quando hoc vitium venit ad aliquem, non venit solum, sed adducit magnam societatem ad modum regis, juxta illud Eccle. xx : *Initium omnis peccati superbia ; qui tenet eam, adimplebitur maledictis* id est vitiis. Super quem locum sic habetur : « De superbia nascuntur hæreses, schismata, detractiones, invidia, verbositas, jactantia, contentiones, et hujusmodi. » Hoc vitium ad modum regis magnas expensas requirit, ita quod superbis hominibus non sufficiant episcopatus, ducatus vel regna : unde dicitur Eccle. xxi : *Domus quæ nimis locuples est, annullabitur superbia.* Et cum superbia majores expensas requirat quam cetera vitia, tamen minus utilitatis habere videtur. Ex vitiis enim pertinentibus ad concupiscentiam oculorum, videtur consequi aliqua utilitas, saltem corporalis ; superbia vero animæ nocet, corpori vero non videtur prodesse : unde Sap. vi, dicunt damnati qui sunt in inferno : *Quid nobis profuit superbia ? et divitiarum jactantia quid*

*contulit nobis?* Vitium superbiæ ex quo habet dominium in aliquo, non de facile amittit: sicut reges non de facile amittunt castrum quod semel possident, quia potenter illud defendunt. Multum timendum est vitium superbiæ. Infirmetas enim est quæ vix sanatur, juxta illud Eccle. iii: *Synagogæ superbiorum non erit sanitas.* Si in tanto timore sunt infirmi cum eis dicitur quod infirmitatem habent incurabilem, in quanto timorè debent esse qui laborant vitio superbiæ, cum Spiritus sanctus ostendat eis infirmitatem insanabilem habere? Vitium superbiæ caput est antiqui serpentis, cujus capitis contritioni maxime esset insistendum: unde Genes. iii, dictum est serpenti de muliere quæ tenet figuram Ecclesiæ: *Ipsa conteret caput tuum.* Serpens modica percussione capitis occiditur: si capiti parcatur, frustra cetera membra ipsius percutiuntur; amputata enim cauda nihilominus vivit; sic frustra alia vitia a se amputare nititur, qui superbiam non relinquit. Hieronymus: « Lubricus est antiquus serpens; et nisi capite teneatur, totus statim illabatur. » Eccle. xxi: *Quasi a facie colubri fuge peccata.* Sicut in colubro caput specialiter fugimus, sic superbia fugienda est quæ caput est vitiorum. Eccle. xxv: *Non est caput nequius super caput colubri.* Contrito hoc capite, facile cetera vitia destruuntur. Chrysostomus: « Tolle vitium hoc, ut non velint homines hominibus parere; et sine labore omnia alia vitia resecantur. » Vitium superbiæ primogenitus Pharaonis infernalis, in cujus morte filii Israel liberantur. Goliath in capite percussus a Davide cecidit in faciem suam, et sic David prævaluit adversus eum; sic qui superbiam quæ caput diaboli est, in se viriliter percusserit, adversus diabolum prævalebit aliis vitiis in fugam conversis. Superbia in campo remanet non cessans ab impugnatione hominis, dum homo vivit, et juxta illud:

Cum bene pugnaris, cum cuncta subacta putaris,  
Quæ post infestat, vincenda superbia restat.

Superbia altitudo est quasi quædam turris alia vitia defendens, et ea expugnari non permittens: ut patet in usurariis et raptoribus, qui ab usuris et rapinis cessare nolunt, quia videtur eis quod si ab eis cessarent, inter vicinos suos honorifice vivere non possent. Si vult princeps a malis abstinere, necesse

habet excessum refrænare, qui superbiam sequi solet, et in se, et in uxore et filiis et filiabus, in familia et in ministris, in ornatu corporis, in equis, in multitudine familiæ, in conviviis, aut in vasis aureis et argenteis, et ædificiis, et multis aliis. Laus Domini est ubi munda est possessio, et innocens familiæ disciplina. Multum cavendum est principi ne subditorum negligendo correptionem, habeat crudelem miserationem. Augustinus in *Epistola*: Modestus est medicus furenti phrænetico, et pater indisciplinato filio; ille ligando, ille cædendo, sed ambo diligendo. Si autem illos negligant, et perire permittant, ista potius falsa mansuetudo crudelis est. Bernardus super illud Psalm. xc, *Qui habitat*: « Quantum ergo compatiar, et si quid solatii possem impendere, quam libenter id facerem, novit ille quem nil latet: verumtamen si de pœnarum diminutione solatium præbere voluero, crudelis et immisericors ero. Quantum enim subtraham de pœna, tantum de corona furabor: tantum defraudabo fructus, quantum de semente subtraxero. Modica subtractio seminis non modicum est messis detrimentum. »

## LIBER SEPTIMUS.

### PROŒMIUM.

Ultimo in hoc opere eruditionis principum ostentendum est, quomodo principes se habere debeant ad eos qui sunt contra ipsos, scilicet ad hostes. Et primo agemus de militum officio, quibus principes in hoc negotio plurimum indigent. Dei ordinatione milites circumdant Ecclesiam protegentes eam. Zach. ix: *Circumdabo domum meam ex his qui militant mihi.* Deo militant qui Dei gloriam, non propriam quærunt.

### CAPUT I.

*Quod officium militiæ sit laboriosum,  
honorabile et periculosum.*

Notandum quod magni principes habent in servitio diversa genera hominum: aliqui enim serviunt eis in his quæ pertinent ad victum: aliqui in his quæ pertinent ad vestitum: aliqui in custodia

equorum : aliqui vero serviunt in officio militari, quod officium est grave et laboriosum, honorabile seu gloriosum, et periculosum. Quia grave est et laboriosum, oportet quod milites sint fortes non solum corpore, sed et animo. Fortitudo animi nobilior est quam corporis : hæc hominem invincibilem reddit. Tob. v : *Fortis animo esto, ait Angelus Tobiaë*. Seneca : « Facilius est gentem unam quam virum unum vincere. » Matth. ult., dicit Christus discipulis : *Confidite, ego vici mundum*. Mundus vincitur, cum nec bona ejus amantur, nec mala timentur. Officium istud ostendit Apostolus laboriosum esse I Tim. ii, dicens : *Labora sicut bonus miles Christi*. Honorabile est officium : milites enim nobiles reputantur, et nobiliter vivunt opera vilia declinando, inter quæ vilissimum est peccatum, quod specialiter a militibus est cavendum, si vere nobiles esse volunt, Tullius : « Is liber æstimandus est, qui nulli turpitudini servit. » Nobilitas carnis, si sola sit, res est contemptibilis. Sap. : « Non est quo aliquis sibi de nobilitate generis blandiatur, si ex meliore parte famulus sit. » Multo indignius est mente servire quam corpore. De vero nobilitate naturali dicit Seneca : « Quia est generosus a natura bene ad virtutem compositus. » Nobilitas gratuita est cum aliquis Dei gratiam habet, quia Dei filius est. » Sap. « De illa nobilitate glorieris, quæ filios Dei et coheredes facit. » Ad honorem officii militaris pertinet quod milites principi familiares sunt, et in equis vadunt. Item quod sæcularibus negotiis se non implicant, reputantes hoc non decere nobilitatem sui officii. Periculosum est hoc officium : ideo cum aliquis fit miles, gladius ei trahitur, et in collo percussus. Alii officiales principum non habent adversarios, sed nec oportet eos armari cum faciunt officium suum : milites vero oportet armari, ita quod soli eorum oculi appareant, ubi etiam aliquando vulnerantur : nec sufficiunt eis arma corporalia, immo etiam necessaria est eis sapientiæ armatura, quæ nobilior est, juxta illud Eccl. ix : *Melior est sapientia quam arma bellica*. Vere nobilior est quæ partem nobiliorem militis protegit, scilicet animam.

## CAPUT II.

*Quod patientia valde sit necessaria principi et militibus.*

Princeps Ecclesiæ Christus potius triumphavit de hoste, patiando, quam percutiendo. Exemplo ergo ejus milites christiani patientiam debent amplecti tamquam multum eis necessariam, juxta illud Hebr. x : *Patientia vobis necessaria est, ut voluntatem Dei facientes, reportetis promissionem*. Portant servi Dei ad judicem meritum, et reportant præmium. Cum mundus sit plenus malis, mala illa multos faciunt deviare a via bona patientiam non habentes. Sine ipsa inter tot mala nullus sapienter se regit. Prov. xiv : *Qui patiens est, multa gubernatur sapientia : qui autem impatiens est, exaltat stultitiam suam. Qui impatiens est, ad ducatum cæci ambulat, et ad consilium insani operatur. Ira enim cui obedit excæcat eum, quæ etiam brevis furor est*. Homo qui non habet patientiam, est velut homo inermis inter inimicos suos, unde in magno periculo est : vix pertransit dies quo iratus non sit ; et aliquando tanta est ira quod in se manus injicit, dum per odium malitiæ consentit, juxta illud Sapient. xvii : *Homo per malitiam occidit animam suam*. Aliquando fratrem suum vel verbis vel verberibus aggreditur, immo quod plus est, ipsum Deum aggreditur blasphemando : ipse igitur iræ domum suam et bona sua incendit : unde verissimum est illud Proverb. xix : *Qui impatiens est, sustinebit damnum* ; Eccl. ii : *Væ his qui perdidērunt sustentiam*. Ad hoc quod aliquis tribulationes patienter sustineat, quatuor multum possunt valere. Primum est, si tribulationes quas Dominus ejus sustinuit, attendat. Augustinus : « Magna consolatio membris ex capite ; » Bernar. : « Videntes augustias Domini nostri, levius vestras portabitis. » Joan. xv : *Mementote sermonis mei, quem dixi vobis : Non est servus major Domino suo*. Dominus proposito gaudio sustinuit crucem : Hebr. xii. Melius est esse cum Filio Dei in fornace Babylonis, quam cum Pharaone in delitiis. Heb. xi : *Fide Moyses grandis factus, negavit se esse filium Pharaonis, magis eligens affligi cum populo Dei, quam temporalis peccati habere ju-*

*cunditatem; majores divitias æstimans thesauro Ægyptiorum improperium Christi : aspiciebat enim in remunerationem.* Secundum est quod attendant a Deo tribulationes dari amicissimis ejus et filiis. Potius debemus velle quod Deus faciat nobis ut amicis et filiis, quam ut inimicis et adulteris. Item quod faciat nobis sicut ægris de quorum salute speramus, quam sicut ægris desperatis, quibus omnia concedantur. Tertium est ut attendatur utilitas quæ in præsentem ex tribulatione provenit, sicut consolatus est Dominus beatum Paulum petentem stimulum carnis a se removeri : *Sufficit, inquit, tibi gratia mea : nam virtus in infirmitate perficitur*; quo audito Paulus consolatus respondit : *Libenter gloriabor in infirmitatibus meis, ut inhabitet in me virtus Christi.* Quartum est, ut attendatur utilitas tribulationum futurarum, quæ duplex est : scilicet absolutio a debito pœnæ futuræ, et remuneratio gloriæ. Sancti pœnam temporalem lucrum putant, quia pro illa magnitudinem pœnæ se evasuros æstimant. In hac vero absolute talis esset misericordia, qualis esset si aliquis debens marcas, absolveretur pro fabis quibus computatum est. Plus enim est pœna futura comparatione præsentis, quam marca respectu fabæ. De magnitudine vero gloriæ habetur Roman. viii : *Non sunt condignæ passionibus hujus temporis ad futuram gloriam quæ revelabitur in nobis.* Spiritualibus armis specialiter oportet Christi militem esse armatum, tamquam illum qui custodia cordis plus intendit quam corporis, secundum illud Proverb. iv : *Omni custodia serva cor tuum.* Tripliciter armatus esse debet : scilicet Dei verbo Proverb. xxx : *Omnis sermo Dei clypeus ignitus est sperantibus in se*; clypeus, quia a malo protegit; ignitus vero, quia ad amorem Dei et bonorum operum accendit. Exemplis bonis, et specialiter exemplo Christi I Petr. iv : *Christo in carne passo, et vos eadem cogitatione armamini*; Thren. iii : *Dabit eis scutum cordis laborem tuum.* Labor Christi consideratus quasi quoddam scutum est Christi militibus. Item operatione bona quæ multum valet ad custodiam. Augustinus : « Non facile capitur a tentatore qui bono vacat exercitio. »

## CAPUT III.

*Quomodo princeps vel miles se debeat habere armando, ad pugnam exeundo, et civitatem obsidendo.*

Sicut infirmi qui credunt se proximos morti, paratissimi volunt esse ad moriendum; sic milites pugnaturi parati debent esse mori, cum sint morti propinqui. Multum debent cavere offensam Dei, tamquam illi qui multum indigent gratia divini adjutorii. Deut. xxiv : *Quando egressus fueris adversus hostes tuos in pugnam, custodies te ab omni re mala.* Cum pugnaturus in duello devotus sit Deo et sanctis ejus, quantum devotus debet esse qui cum multitudine est pugnaturus? Miles cum armatur ad pugnam, cogitare debet a quo habet fortitudinem, ut pugnando ipsius gloriam quærat. Augustinus in *Epist.*: « Primum hoc cogita quando armaris ad pugnam, quia virtus tua etiam ipsa corporalis donum Dei est : si enim sic cogitabis, de dono Dei non facies contra Deum. » Spem et fiduciam debet habere miles in Deo, non pusillanimitate acturus, sed fortiter vivere vel mori paratus, exemplo illorum militum strenuissimorum, de quibus legitur I Mach. iv : *Videns Lysias suorum fugam, et Judæorum audaciam, et quod parati essent aut vivere aut mori fortiter, abiit Antiochiam.* Juxta verbum Senecæ, « Perniciosior est hostis fugientibus. » Multum iratus fuit Josue irridens populum Domini fugientem. *Domine Deus, inquit, quid dicam videns Jerusalem hostibus suis terga vertentem?* Aristoteles in lib. *De nat. anim.* ostendit duo membra valde nobilia esse in corpore humano, scilicet cerebrum et manum. De cerebro dicit quod est organum divinum, cujus operatio est intellectus et sensus; de manu vero dicit quod est organum organorum : « Convenit, inquit, potentiæ potentiæ organum organorum manus. » In corpore Ecclesiæ quasi cerebrum est clerus, quasi manus est militum cœtus. Clerus intellectus et sensu præcellit; cœtus vero militum clerum protegit, et si totam Ecclesiam debeat defendere, maxime tamen clerus : ab eo habet directionem, et debet ei protectionem. Hanc Dei ordinationem qua Deus vult inter clerus et mili-



tes magnam esse dilectionem, multum innititur inimicus humani generis impedire, sciens concordiam et amorem eorum valde utilem esse Dei Ecclesiae, discordiam vero valde noxiam. Debet princeps et cœtus militum bellando pacem intendere, juxta illud Augustini in *Epist.*: « Esto in bellando pacificus, ut eos quos expugnas, ad pacis utilitatem vincendo perducas : beati enim pacifici, quoniam filii Dei vocabuntur. » Idem : Pugnantem hostem necessitas perimat, non voluntas : sicut bellanti et resistenti violentia redditur, jam victo vel capto misericordia habetur, maxime in quo pacis perturbatio non timetur. » Idem XIX lib. *De civ. Dei* : « Constat pacem belli esse optabilem finem. » Deut. xx : *Si quando accesseris ad expugnandam civitatem, offeres ei primum pacem : in eod. : Quando obsideris civitatem multo tempore, et munitionibus circumdederis ut expugnes eam, non succides arbores de quibus vesci potes, nec per circuitum securibus debes vastare regionem, quoniam lignum est et non homo, nec potest bellantium contra te augere numerum. Si qua autem ligna non sunt pomifera, sed agrestia, et in alios usus apta, succides, et instrues machinas, donec capias civitatem quæ contra te dimicat.*

#### CAPUT IV.

*Quod vana gloria sit timenda principi et militibus.*

Princeps et milites multum debent cavere et timere gloriam vanam. Gregorius : « Stultum est inde transitoria quærere, unde possumus æterna habere. » Peccatum vanæ gloriæ Deo est multum injuriosum, amatoribus suis infructuosum, damnosum et periculosum. Amator vanæ gloriæ, cui Deus bona sua quæ totaliter erant ipsius, tali conditione dedit, ut Deus haberet gloriam, homo vero utilitatem : Deo partem suam, scilicet gloriam, subripit ; et ideo partem suam, scilicet utilitatem a Deo sibi concessam merito perdit. Ipse judicium vilius personarum, scilicet adulatorum et hystriorum Dei judicio præponit, laudem eorum appetens, de laude Dei non curans, dominio eorum se submittens dum judicium eorum timet quod non timeret nisi aliquo modo eis subjectus esset. I Cor. iv :

*Qui me judicat, Dominus est.* Ipse servus est adulatorum et histrionum redimens se erga eos vestes veteres eis dando. Beatus Martinus medietatem pallii sui dedit pauperi, ut in paupere indueret Christum. Princeps et milites vanæ gloriæ amatores inservis diaboli integro pallio et aliis vestibus induunt diabolum : adultores et histriones eos nunc magnificent, et nunc annihilant. Bernardus : « Qui conscientias suas in alienis linguis posuerunt, modo parvi, modo magni, modo nulli sibi videntur, prout linguis hominum eos laudare vel vituperare placuerit : ascendunt usque ad abyssos. » Fatuum est de judicio talium vel gloriari vel offendi, cum ipsi quasi cæci sint quantum ad bonitatem nostram quæ primo cordis est, et cum a Deo judicari debeamus. Bernardus : « Ut quid alieno vel mei ipsius testimonio sum contemptus, cujus nec vituperio reprobis nec laude dignus inveniar? Si ad tribunal vestrum judicandus adstarem, merito de laude vestra gloriarer ; nunc autem cum solius Christi judicio sim præsentandus, quantæ insaniam est mei vel alterius judicio gloriari? » Idem : « Fidelis non suimet custos, non tutum arbitraretur labiis hominum committere gloriam suam arcæ sine clave et sine sera. » Multum damnosum est peccatum vanæ gloriæ amatoribus suis : bona temporalia eis aufert, quæ pro gloria humana prodige expendunt. Aufert etiam spiritualia bona, quæ etiam inutilia sunt eis, quia corrupta intentione fiunt. Via convenientior ad gloriæ acquisitionem eis esset contemptus gloriæ : quia secundum verbum Sapientis, hoc solum habet humana gloria gloriosum quod appetentes se fugit, et fugientes appetit. Periculosus est valde amor vanæ gloriæ in principibus et militibus : facit enim eos periculis exponere, et labores et dolores multos sustinere, ut quasi fratres diaboli sint, mortem pro humana gloria sustinendo. Vana gloria est flos qui a pueris, vel potius puerilibus hujus mundi colligitur. Isa. xl : *Omnis caro fenum, et omnis gloria ejus sicut flos agri.* Cito arecit flos iste, juxta illud Isa. xxviii : *Erit flos decidens gloria exultationis.* Fideliter se debent habere et principes et milites, gloriam quam Dominus vult ei reddendo : unde cum offertur eis, debet offerre ei regi gloriæ ejus est, dicentes : *Non nobis, Domine, non nobis, sed nomini tuo da gloriam.* Si



apud eos Deus fuerit rex gloriæ, ipse erit eis Dominus virtutum, dando virtutem et fortitudinem. Hujus fidelitatis exemplum habemus in Joab principe militiæ David, quoniam non sibi, sed Domino suo volebat gloriam : unde II Reg. XII, scripsit David in hunc modum : *Dimicavi adversus Rabath, et capienda est urbs aquarum : nunc congrega reliquam partem populi, et obside civitatem, et cape eam; ne cum a me vastata fuerit urbs, nomini meo adscribatur victoria.* Bernardus : « Fidelis revera famulus es, si ne multa gloria Domini tui, etsi non existente ex te, tamen transeunte per te, nihil manibus tuis hæere contingat. »

## CAPUT V.

*Quod ira principi valde sit periculosa.*

Cum multum periculosa sit ira in principe, valde cavendum est ei ne secum habeat homines iracundos a quibus exuratur, et ne ab ipsa ira superetur, et ne ira in sinu cordis sui diu moretur. Cum ira ignis sit, non est tutum esse propinquum et familiarem homini iracundo. Prov. XXII : *Noli esse amicus homini iracundo* ; Ibid. XV : *Vir iracundus provocat rixas ; qui autem patiens est, mitigat suscitatas* ; Ibid. XXVI : *Sicut carbones ad prunam et ligna ad ignem, sic homo iracundus, incendit litem.* Caveat princeps ne pro consilarii habeat homines præcipites et iracundos, secundum illud Sapientis : *Duo sunt maxime contraria consilio ; scilicet festinantia, et ira.* Quod ira principis sit refrænanda, ostendit Seneca, exemplum ponens de rege apum : « Iracundissimæ, inquit, ac pro captu corporis pugnacissimæ sunt apes, aculeum in vulnere relinquunt : rex ipse sine aculeo est : noluit ipsum natura nec sævum esse, nec ultionem in agone constitutum petere, telumque detraxit, et iram ejus inermem reliquit, exemplum hoc omnibus regibus ingerens. « Pudeat ab exiguis animalibus non trahere mores. Tanto moderatior animus esse debet, quando vehementius nocet. Intolerabilis est princeps, si sit iracundus. Prov. XVIII : *Spiritum ad irascendum facilem quis poterit sustinere?* Multum cavendum est principi ne ab ira superetur. Job. XXXVI : *Non te superet ira, ut aliquem opprimas.* Debet princeps iram

hostem valde nocivum reputare, et amplius timere superari ab ira quam superari ab homine. Zelus justitiæ, qui est quasi ignis, ardere debet in oleo misericordiæ. Ignis absque oleo lampadem destruit : sic zelus justitiæ, si desit oleum misericordiæ, nocet homini. Salvator destructionem Jerusalem, quam ex justitia facturus erat, prius flevit, Luc. XIX. Super illud Matth. V : *Beati qui esuriunt et sitiunt justitiam*, sic habetur : « Justitiæ lumen est misericordia : justitia sine misericordia cæcus furor est. » Princeps qui locum Dei tenet, Deum judicando imitari debet, qui sine perturbatione iræ judicat, secundum illud Sap. XII : *Tu dominator virtutum cum tranquillitate judicas.* Diogenes, cum servus suus eum, offendisset, ait illi : « Nisi iratus essem, jam te verberibus enecassem. » Sine mora ira a sinu cordis est auferenda. Eccles. VII : *Ira in sinu stulti requiescit* ; Job. V : *Virum stultum interficit iracundia.* Cum ira ignis sit infernalis, vere stultus est qui a sinu cordis sui eam sine dilatione non excutit. Ipsa ad modum trabis cordis oculum a cognitione veritatis impedit, juxta illud Sapientis : *Impedit ira animum, ne possit cernere verum.* Cum festucam de oculo corporis quam citius possumus auferamus, mirum est quomodo de oculo cordis trabem auferre non festinamus. Ephes. IV : *Sol non occidat super iracundiam vestram.* Item mirum est quomodo trabem habens in oculo iræ vel odii, alios præsumit judicare et corrigere. Matth. VII : *Hypocrita, ejice primo trabem de oculo tuo, et tunc videbis ejicere festucam de oculo fratris tui.*

## CAPUT VI.

*Quod guerra multum sit timenda et cavenda principi.*

Princeps guerram multum debet timere et cavere. Attendere debet Deum, qui sapientissimum, et vindicaturum injurias suas in fine mundi. Bene debet sufficere uni vermiculo quod ita cito vindicetur de inimicis suis sicut Deus. Augustinus : « Summæ religionis est imitari quem colis. » Sic se habet homo ad sapientiam, sicut ad patientiam. Prov. XIV : *Qui patiens est, multa gubernatur sapientia* ; Ib. XIX : *Doctrina viri per patientiam noscitur.* Gregorius : « Tanto quis minus

doctus ostenditur, quanto minus patiens convincitur. » Magis patiens, Deo magis assimilatur sapientissimo et patientissimo. Prov. iv : *Vir patiens operatur justitiam*. Non debet principem movere ad vindicandum se quod ignominiam sibi reputat si se non vindicet : hoc enim honor est, non ignominia in multis casibus : ut quando ille qui injuriatur, insanus est, vel est vilis persona, ut leprosus vel loripes : tunc enim homines magni cordis dedignatur vindicare se de illis, nolentes maculare ibi manus suas. Seneca : Quibusdam libenter parcas, a quibus te vindicare fastidias : ab his non aliter quam ab animalibus parvis et inquinantibus reducenda est manus. » Quando aliquis ergo non potest vindicare se absque speciali iniquatione manuum, et quando ille qui infert injuriam in hoc insanus est, non est ignominia, sed honor, si aliquis nolit se vindicare. Seneca : « Magni animi est injurias in summa patientia pati. » Prov. xx : *Honor est homini qui separat se a contentionibus*. Omnes autem stulti miscentur contumeliis, nec possunt ab illis separari : mixtio enim est inseparabilis unio. Sicut honor est separare se a contentionibus, sic ignominia est in contentione os sum alicujus convitio maculare. Seneca : « Si magnanimus fueris, nunquam dices tibi contumeliam fieri. De inimico dices : non nocuit mihi, sed animum nocendi habuit ; et cum in potestate tua videris eum vindictam putabis vindicare potuisse. Scito honestum, et melius genus vindicandi esse ignoscere. » Multum debet principem a guerra refranare guerra periculosa quam habet cum invisibili hoste, de qua dictum est ad serpentem. Genes. iii : *Inimicitias ponam inter te et mulierem, et semen tuum et semen illius* : et Job. vii : *Militia est vita hominis super terram*. Solent principes cum guerram habere debent cum potente, alias guerras si quas habent, pacificare, ut sic in guerra illa periculosa possint triumphare. Periculosa est guerra quam habemus cum hoste invisibili propter ejus potentiam, astutiam et malitiam, et pugnae continuatam. Ipsa enim assidua tentatione nos pulsatur, ut saltem tadio nos vincat. Astutiam magnam habet et propter subtilitatem naturae, et diurnitatem experientiae. Malitia ejus sanguinem nostrum incessanter sitit, ideo sanguisuga vocatur Prov. xxx. In hoc bello magnum est

damnum si quis vincatur : regnum enim æternum amittit, et supplicio æterno condemnatur. Si vero vincat, multum lucratur : regno æterno remuneratur. Et ut breviter dicatur, sicut diabolus peior est homine, sic guerra quæ habetur cum dæmonibus, periculosior est illa quæ habetur cum hominibus : ideo princeps multum debet laborare ad ejus pacificationem. Quia principes habent guerras diversas, ideo de facili vincuntur : non enim sufficiunt diversis hostibus resistere. Unde dicitur de diabolo, Habac. i : *Ipsa de regibus triumphabit, et tyranni ridiculi ejus erunt*.

## CAPUT VII.

### *Quod peccatum multum debet odiri.*

Non debet homo odire hominem, maxime christianus christianum suum fratrem : sed peccatum odire debet, quod et Deus odit, et omnium malorum quæ in presenti ex illo patimur, nobis causa existit : ad ejus odium David monet dicens, Psalm. xcvi : *Qui diligitis Dominum, odite malum*. Si aliquis interfecisset alicui patrem suum, multum eum odiret, si sine Dei offensa hoc facere posset. Quantum ergo debet odire peccatum, quod omnes amicos nostros mortuos occidit, et nos et amicos qui nobis remanserunt, interficit ? Nullus enim moreretur, si non esset peccatum. Rom. vi : *Stipendia peccati mors*.

## CAPUT VIII.

### *De malis quæ ex guerris sequuntur.*

Multum debet movere principem ad hoc quod guerram timeat, et quantum potest, caveat, hoc quod scit quod multa mala ex guerris sequuntur, et multa bona impediuntur, et parvus vel nullus fructus frequenter inde habetur. Item hoc quod scit pacem tantum a Christo et sapientibus diligi. Ex guerra sequuntur odia : propter guerram unam innumerabiles sunt aliquando in peccato odii, et sic sunt homicida, juxta illud I Joan. iii : *Omnis qui odit fratrem suum, homicida est*. Et frequenter qui in bello moriuntur, morte aeterna moriuntur quod est irremediabile malum. Sequuntur inde incen-

dia, rapinæ et furta : filii agricolarum fures efficiuntur, filiæ prostituuntur, elemosynæ et alia bona impediuntur, et specialiter mala inferuntur pauperibus, qui non meruerunt. Isa. lx : *Qui recessit a malis, prædæ patuit.* Horatius :

Quicquid delirant reges, plectuntur Achivi.

In Ps. lx : *Dum superbit impius, incenditur pauper.* Qui pauperi aufert modicum quod habet, multum eum gravat. In amissione unius gallinæ plus gravatur, quam unus multum dives gravaretur in mille marchis : sicut patet ex iudicio Domini. Luc. xix, de paupercula vidua mittente duo æra minuta in gazophilacium, quam iudicavit plus posuisse quam omnes alios. Quantum damnificasset eam qui ea ipsi abstulisset? Vix est quin male accidat his qui guerras faciunt : aut enim malum infertur eis, et sic male eis accidit : aut ipsi inferunt malum aliis, et tunc deterius accidit eis. Melius est enim humiliari cum mitibus, quam dividere spolia cum superbis : Prov. xvi. Ad talem statum deveniunt qui guerris intersunt quod difficile est eis consulere, et in viam salutis eos ponere. Cum enim unus natus sit juvare alium, et fortiores sint ex eo quod sunt simul, unusquisque videtur occasio malorum quæ fiunt ibi, secundum quod legitur Job xli, de corpore diaboli. Corpus enim quasi scuta fusilia, et compactum squamis sese prementibus. Parvus vel nullus fructus videtur ex guerra sequi. Cum aliquis guerram facit ut sua recuperet, plus valet quod in guerra expendit, quam quod ibi acquirit. Quando vero guerram facit ut attinentem sibi occisum vindicet, hoc non est utile occiso : utilius esset ei quod occisor pro eo, vel ultra mare iret vel mitteret, vel suffragia aliqua ei procuraret. Inhumanum valde est christianum cum christiano guerram facere. Seneca : « Ferina est rabies ista, sanguine et vulneribus lætari : hoc est abjecto homine in sylvestre animal transire. » Naturales inimicitiae videntur esse inter hominem et serpentem : sed serpens alii serpenti non nocet. Seneca : « Immitissimus est homo homini : leo leoni non nocet, lupus lupum non lædit. Canes videntur esse homines cum aliis hominibus bellum facere desiderantes.

## CAPUT IX.

*De amore Christi et sapientum ad pacem.*

Christus pacem multum dilexit, quem amorem ostendit in mundo veniendo, nascendo, prædicando, prædicatores mittendo, in die cœnæ pacem discipulis relinquendo, in passione pacem nostram carissime emendo, et post resurrectionem discipulos ad pacem monendo. Noluit nasci in mundo isto, donec per totum mundum pax fuit. Ipso nato, multitudo Angelorum pacem hominibus commendavit, dicens : *In terra pax hominibus bonæ voluntatis,* Luc. ii. Prædicans vero ait : *Beati pacifici, quoniam filii Dei vocabuntur,* Matth. v. E contrario maledicti sunt, qui guerram facere cupiunt, quoniam filii diaboli vocabuntur. Mittens vero prædicatores voluit ut ad pacem moneant. Matth. xix : *Intrantes domum salutate eam, dicentes : Pax huic domui.* In die cœnæ relicturus eos, pacem tamquam hereditatem eis reliquit, Joan. xiv : *Pacem relinquo vobis, pacem meam de vobis.* Apparens discipulis post resurrectionem, ad pacem eos monuit Joan. xx. Pacem nostram carissime emit : mori enim voluit ut reconciliaret nos Deo. Adhuc et pacem peccatoris care paratus est emere. Quicumque enim peccaverit, si pœniteat, Deus paratus est remittere omnem offensam, et emere pacem ejus regno æterno. Honorabilis est pax ista peccatori : si haberet Deum in carcere suo, non deberet honorabiliorem pacem requirere ab eo. Homines sapientes multum guerram fugiunt. Salomon qui sapientissimus fuit, in pace summa regnum suum tenuit quasi quadraginta annis. Licet tantum bonum sit pax quod suo contrario quærat, tamen cum pax et guerra sint contraria, et maxime a se distent, longa via est per guerram ad pacem pervenire : ideo alia via incedendum est. Citius pervenit homo ad pacem patiando, quam bellum faciendo : et citius acquirit largiendo quam auferendo. Item monere debet principem ad hoc ut guerram timeat, et caveat varius eventus belli. Aliquando enim ei qui fortiosem se credit, deterius in bello accidit. II Reg. xi : *Varius est eventus belli, et nunc hunc nunc illum consumit gladius.* Qui fortis est, invenit æque fortem, juxta illud Hieronymi xlvi : *Fortis inpegit in*

*fortem, et ambo pariter corruerunt.* Si quis malus est, vix erit quin inveniatur æque malum, juxta illud Prov. vii : *Semper jurgia quærit malus.* Angelus autem crudelis mittetur contra eum vel post hanc vitam ut eum deferat in infernum, vel in præsentem mittetur ei aliquis homo malus ad refrenandum malitiam ejus.

### CAPUT X.

*Quod peccatum incendiariorum exosum debet esse principi.*

Specialiter debet esse exosum principi peccatum incendiariorum. Incendiarius vero dicitur, qui propria auctoritate incendit civitatem vel villam, vel domum aliquam, vel segetem, vel rem similem, malo studio, ut pro vindicta. Si autem hoc faceret auctoritate illius qui habet potestatem indicendi justum bellum, non judicaretur incendiarius ex quo guerra esset justa. Hoc peccatum multum est Deo exosum tamquam bono hospitalitatis contrarium, quæ multum placet Deo, secundum illud Hebr. ult. : *Hospitalitatis nolite oblivisci : per hanc enim quidam placuerunt Angelis hospitio receptis.* Origenes : « Domos hospitales ingressi sunt Angeli, domum vero hospitibus clausam ignis et sulphur succendit. » Domus quas Angeli ingressi sunt, fuerunt domus Abrahamæ et domus Lot ; domus vero succensæ fuerunt domus Sodomorum et Gomorrhæorum. Hospitalitas tantum placet Deo quod Deus in propria persona legitur ad hospitales homines declinasse. Refert Gregorius in quadam homil. quod quidam paterfamilias multum fuit hospitalis : et quadam die cum peregrinos susciperet, et aquam daret manibus ex humilitate, unus fuit inter eos, in cujus manibus aquam debuit fundere ; et cum reversus urceum accepisset, non invenit eum in cujus manibus aquam debuit fundere ; cumque hoc factum apud se miraretur, eadem nocte Dominus ei per visionem dixit : Ceteris diebus me in membris meis, hesterno autem die me in memetipso recepisti. Peccatum hoc est diabolicum, peccatum in Spiritum sanctum, auctori suo, et ei cujus bona incenduntur, valde damnosum, salutis multum impeditivum : in præsentem punitur graviter, sed in futuro gravius est punien-

dum. Diabolicum est hoc peccatum. Diabolus igne impugnat homines in inferno, incendiarius vero in hoc mundo. Unde cum sit similis diabolo in hoc facto, merito erit ei similis in tormento. Peccatum in Spiritum sanctum est, cum sit peccatum malitiæ puræ sine aliqua utilitate : valde damnosum est suo actori, cum ad emendam rei incensæ teneatur, damnosum valde illi cujus bona incenduntur. Cum enim aliquis domum suam amisit, oportet eum ire mendicando per domos aliorum, et uxorem et familiam ; quod valde grave est homini non consueto talibus. Eccl. xii : *Vita nequam hospitandi de domo in domum.* Et interdum accidit quod nunquam redit ad statum, in quo erat ante incendium, et filii ejus fures efficiuntur, filiæ prostituuntur, et omnium istorum reus est qui domum ejus incendit. Hoc peccatum multum impeditivum est salutis, et propter restitutionem rei incensæ ad quam incendiarius tenetur, et propter maledictiones quæ fiunt ei. Quando enim pauper sustinet aliquem defectum occasione illius incendii, vel videt filios suos lugentes in alieno hospicio, maledicit ei ; quæ maledictio incendiario ignis infernalis erit occasio. Eccl. iv : *Maledicentis tibi in amaritudine animæ tuæ exaudietur deprecatio : exaudiet autem eum qui fecit illum :* Ibid. xxxiv : *Deprecationem læsi Dominus exaudiet, nec despiciet preces pupilli, nec viduam si effundat loquelam gemitus.* Incendiarius secundum leges humanas in præsentem punitur vel capitis amputatione, vel ignis crematione. Hoc enim æquum est ut qui dolo ignem apposuit, igne cremetur : nec debet absolvi nisi damno resarcito, et præstito juramento quod ignem ulterius non apponat : et frequenter accidit quod tales morte mala moriuntur. Legitur II Reg. xiv, de Absalon quod fecit succendi messem Joab : qui post suspensus, occisus est tribus lanceis missis in cor ejus. Legitur et XIII Judic., quod Samson succendit segetes Philistinorum, qui postea captus est a Philistæis, et exoculatus, et semetipsum interfecit. Hospitalitatis amator multum puniet in futuro eos, quibus non solum dicere poterit, *Hospes eram, et non collegistis me,* Matth. xxv, sed poterit eis dicere : Domum ubi colligi debebam in membris meis, in qua nihil juris habebatis, incendendo mihi hospicio abstulistis.



## CAPUT XI.

*Quod peccatum homicidii timendum et cavendum sit principi.*

Sicut peccatum incendii timendum est et cavendum principi, sic et peccatum homicidii, quantum fieri potest salva utilitate reipublicæ. Inexcusabilis est homo qui mortem hominis desiderat, cum natura etiam bruta animalia incitet ad hoc quod animalia quæ sunt ejusdem speciei cum ipsis diligant. Eccl. XIII : *Omne animal diligit simile sibi : etiam lupus unus alterum diligit.* Præterea peccatum hoc multum est contra illam partem juris naturalis, vel scripti in corde hominis, quæ dictat quod non est faciendum homini quod odit aliquis fieri sibi. Tob. IV. Unde cum mortem multum odio habeat, cavere debet ne eam alteri inferat. Hoc peccatum est diabolicum, et diabolo multum assimilatur : de quo habetur Joan. VIII : *Ille homicida erat ab initio.* Ipse fuit primo homicida sui, præterea primorum parentum. Sicut primum homicidium fuit fratricidium, secundum quod Dominus dixit Cain, *Vox sanguinis fratris tui clamat ad me de terra;* sic et alia homicidia. Omnes enim eosdem parentes habuimus quos Cain et Abel. Unde Augustinus : « Adam et Evam intendamus, et omnes fratres sumus. » Hoc peccatum multum voluit Dominus puniri. Genes. IX : *Quicumque fuderit sanguinem hominis, fundetur sanguis illius :* et Matth. XXVI : *Omnis qui acceperit gladium, gladio peribit.* Apoc. XIII : *Qui in gladio occiderit, oportet eum in gladio occidi.*

## CAPUT XII.

*De peccatis quæ dicuntur clamare ad Deum.*

Tria peccata dicuntur clamare ad Deum sicut homicidium : scilicet oppressio innocentum : Exod. I : *Ascendit clamor filiorum Israel ad Deum :* Peccatum contra naturam. Genes. XVIII : *Clamor Sodomorum et Gomorrhæorum multiplicatus est :* Et detentio mercedis mercenariorum. Jac.

ult. : *Ecce merces operariorum vestrorum, quæ fraudata est a vobis, clamat, et clamor eorum in aures Domini Sabaoth introivit.* Illa tria clamare dicuntur sicut homicidium, quia homicidio assimilantur. In peccato contra naturam effunditur quod corporis humani potuit esse materia; in oppressione vero innocentum et detentione mercedis aufertur pauperibus vita illorum : ideo a Deo quasi homicidium reputatur. Eccles. XXXIV : *Panis egentium vita pauperum : qui defraudat eum homo sanguinis est :* Ibid. : *Qui aufert in sudore panem, quasi qui occidit proximum suum.* Item ibid. : *Qui effundit sanguinem, et qui fraudem facit mercenario, fratres sunt.* Item ad hoc quod princeps peccatum homicidii refugiat, movere debet eum hoc quod fideles filii Dei sunt. I Joan. III : *Filii Dei sumus.* Item homo ad imaginem Dei creatus est. Quicumque fuderit sanguinem hominis, fundetur sanguis illius. Subditur causa hujus : *Ad imaginem Dei factus est homo.* Item hoc quod Deus ita care emit hominem : noluit destrui leviter quod ita carum habet. Si quis vero hæc vera esse credat de morte justorum et non injustorum : Respondeo quod mors injustorum quantum ad aliquid est periculosior. Mors enim peccatorum pessima, porta est, per quam est transitus ad mortem æternam : ideo refugienda est magis, nisi fiat imperio divino : quod est quando fit a necessitate legis divinæ : aliter non placet Deo. Ezech. XVIII : *Numquid voluntatis meæ est mors impij?* In eod. : *Nolo mortem morientis, sed ut convertatur et vivat.* Mirum est, quomodo postquam humana natura divinæ associata fuit in una persona, ausus fuerit quis occidere hominem nisi de imperio : cum Cruci tanta reverentia exhibeatur, eo quod corpori Dominico ad modicum tempus fuerit associata.

Explicit liber eruditionis principum editus per fratrem Thom. de ordine fratrum Prædicatorum.

DEO GRATIAS.

Ego Jacobus de Castello de Organiano Urgellensis diœcesis scripsi hunc librum Tolosæ ad opus mei, currente anno ab incarnatione Domini MCCCIII.

FINIS VOLUMINIS VIGESIMISEPTIMI.





# INDEX

## EORUM QUÆ IN HOC VOLUMINE

### CONTINENTUR.

---

#### OPUSCULUM I.

Quid sit auctoris intentio..... 1

#### TRACTATUS DE FIDE.

CAPUT	1. Ordo dicendorum.....	2
	2. Quod Deus sit.....	2
	3. Quod Deus est immobilis.....	2
	4. Quod Deus est æternus.....	3
	5. Quod Deum esse est necessarium.....	3
	6. Quod Deus semper est.....	3
	7. Quod in Deo non est aliqua successio.....	4
	8. Quod in Deo non est compositio.....	4
	9. Quod Deus est sua essentia....	4
	10. Quod Dei essentia et ejus esse sit idem.....	4
	11. Quod Deus non est in aliquo genere sicut species.....	5
	12. Quod Deus non est genus....	5
	13. Quod Deus non est sicut una species prædicta de multis individuis.....	5
	14. Quod sit unus Deus tantum...	5
	15. Quod Deus non est corpus....	6
	16. Quod Deus non est forma corporis, nec aliqua virtus in corpore.....	6
	17. Quod Deus est infinitus.....	6
	18. Quod Deus est infinita virtus.	7
	19. Quod infinitum in Deo non importat aliquam imperfectionem.....	7
	20. Quod omnes perfectiones quæ sunt in rebus originaliter et eminenter sunt in Deo.....	7

CAPUT	21. Quod in Deo omnes perfectiones sunt unum secundum rem....	8
	22. Quod nullum accidens est in Deo.....	8
	23. Quod ratio multitudinis nominum quæ dicuntur de Deo non repugnat simplicitati ejus....	8
	24. Quod prædicta nomina dicta de Deo non sunt synonyma.....	9
	25. Quod per definitiones ipsorum nominum non potest deliniri id quod est in Deo.....	9
	26. Qualiter dicta nomina de Deo dicantur.....	9
	27. Quod Deus est intelligens....	10
	28. Quod in Deo non est intellectio nec in potentia, nec in habitu, sed in actu.....	10
	29. Quod Deus non intelligit per aliam speciem quam per essentiam suam.....	10
	30. Quod Deus est suum intelligere.	10
	31. Quod Deus est volens.....	11
	32. Quod ipsam Dei voluntatem oportet nihil aliud esse quam ejus intellectum.....	11
	33. Quod voluntas Dei est ipsum ejus velle.....	11
	34. Quod omnia supradicta uno fidei articulo comprehenduntur.....	11
	35. Quod gentiles philosophi pertingere potuerunt ad considerationem dictorum de Deo....	12
	36. Qualiter in Deo ponatur verbum.....	12
	37. Quod verbum Dei dicatur conceptio intellectus divini.....	12
	38. Quomodo verbum Dei comparatur ad Deum cujus est verbum.	12
	39. Quod supra dicta fides catholica docet.....	13

CAPUT	40. Quod verbum Dei est ejusdem essentiæ et naturæ cum Patre, æquale.....	13	CAPUT	67. Quod Deus res produxit.....	22
	41. Quod catholica fides hæc docet.	13		68. Quod Deus produxit res ex nihilò.....	23
	42. Quod verbum non dicitur a Patre nec secundum tempus, nec secundum speciem, nec se- cundum naturam.....	13		69. Quod solius Dei est creare....	23
	43. Conclusio ex præmissis quod Filius est consubstantialis Patri.	14		70. Quod causa diversitatis rerum non est ex parte materiæ.....	23
	44. Quod Deus est in seipso sicut amatum in amante.....	14		71. Quæ fuit causa diversitatis....	24
	45. Quod amor qui est in Deo dici- tur spiritus.....	14		72. Quomodo diversitas in rebus constituitur etiam secundum et gradum nobilitatis.....	24
	46. Quod spiritus, qui est in Deo per modum amoris, est sanctus.	14		73. Quod ad perfectionem universi necesse est esse aliquas substan- tias immateriales et incorpora- les.....	24
	47. Quod Spiritus sanctus est con- substantialis Patri et Filio, et subsistens in natura divina....	15		74. Quod hujusmodi substantiæ sunt intellectuales.....	25
	48. Quod Spiritus sanctus a Patre Filioque procedit.....	15		75. Quod hujusmodi substantiæ sunt arbitrio liberæ.....	25
	49. Quod ternarius divinarum per- sonarum non repugnat unitati divinæ essentiæ.....	15		76. Invenitur gradus et ordo quan- tum ad perfectiones operis....	26
	50. Quomodo videtur esse repu- gnantia trinitatis personarum in divinis.....	15		77. Qualiter est in eis ordo et gra- dus in intelligendo.....	26
	51. Solutio rationis: et quod in di- vinis non est distinctio nisi se- cundum relationes.....	16		78. Quod substantia per quam homo intelligit, est infirma in genere substantiarum intellectualium.	26
	52. Quod relationes quibus Pater et Filius et Spiritus sanctus distinguuntur, sunt reales, et non rationis tantum.....	16		79. De differentia intellectus et modo intelligendi.....	27
	53. Quod hujusmodi relationes non sunt accidentaliter inhærentes.	17		80. Quod intellectus possibilis in homine accipit formas intelli- gibiles a rebus sensibilibus....	27
	54. Quod per predictas relationes in Deo personalis distinctio constituitur.....	17		81. Quod homo indiget potentiis sensitivis ad intelligendum....	27
	55. Quod impossibile est plures personas esse in divinis quam tres.....	18		82. Quod necesse est ponere intel- lectum agentem.....	28
	56. De numero proprietatum quæ conveniunt Patri, et quæ sunt.	18		83. Quod anima humana est incor- ruptibilis.....	28
	57. De proprietatibus Filii et Spi- ritus sancti, quæ et quot sunt.	18		84. Quod non est unus intellectus potentialis in omnibus.....	28
	58. Quod hujusmodi proprietates dicuntur et notiones, et quæ eorum proprietates dicuntur, et quæ etiam relationes.....	19		85. De intellectu agente; quod non est unus in omnibus.....	30
	59. Non oportet secundum nume- rum relationum esse numerum personarum in divinis.....	19		86. Quod intellectus possibilis et agens fundantur in essentia animæ.....	31
	60. Quod remotis per intellectum proprietatibus personalibus, non remanent hypostases.....	19		87. Qualiter istæ duæ potentiæ communicant in una essentia animæ.....	31
	61. Quod remotis per intellectum proprietatibus personalibus re- maneat essentia divina.....	20		88. Quod omnes potentiæ in essen- tia animæ radicanter.....	32
	62. Qualis sit ordo per intellectum actuum personalium ad prop- rietates personales, et etiam processionis activæ vel passivæ.	20		89. Quod unica est anima in uno corpore.....	32
	63. De diversitate dici ordinis se- cundum diversitatem genera- tionis.....	21		90. Rationes quæ videntur probare quod in homine sunt plures animæ.....	33
	64. De differentia actuum notiona- lium ad proprietates notionales.	21		91. Solutio rationum præmissa- rum.....	33
	65. Quod proprietates relativæ sunt ipsa divina essentia.....	21		92. De productione animæ rationa- lis quod non sit ex traductione.	34
	66. Quod proprietates divinæ non sunt in personis ut exterius af- fixæ, et ut accidentia.....	22		93. Quod anima rationalis non est de substantia Dei.....	35
				94. Quod illa quæ dicuntur inesse a virtute extrinseca, sunt im- mediate a Deo.....	35
				95. Quod Deus non agit naturali necessitate, sed a voluntate....	35
				96. Quod Deus in sua actione est immutabilis.....	36
				97. Ratio probans motum ab æ- terno fuisse, et solutio ejus....	36
				98. Rationes ostendentes quod est	

- necessarium materiam ab æterno creationem mundi præcessisse, et solutiones earum.. 37
- CAPUT 99. Quod Deus produxit res in esse propter finem..... 38
100. Quod ultimus finis omnium est divina bonitas..... 38
101. Quod divina assimilatio est causa diversitatis in rebus.... 39
102. Quod omnis actus et motus cujuslibet creaturæ in divinam bonitatem redit sicut in finem. 39
103. Quod diversimode creaturæ tendunt in similitudinem divinæ bonitatis..... 40
104. De duplici potentia, cui in rebus respondet duplex intellectus : et quis sit finis intellectualis creaturæ..... 41
105. Quomodo intellectus creatus divinam essentiam videre possit. 41
106. Quomodo naturale desiderium quiescit ex divina visione per essentiam in qua beatitudo consistit..... 42
107. Quod motus in Deum ad beatitudinem consequendam assimilatur motui naturali; et quod beatitudo est in actu intellectus..... 42
108. De errore ponentium felicitatem in creaturis..... 43
109. Quod solus Deus est bonus per essentiam, creaturæ vero per participationem..... 43
110. Quod Deus non potest suam bonitatem amittere..... 43
111. Quod creatura possit deficere a sua bonitate..... 43
112. Quomodo deficient a bonitate secundum suas operationes... 44
113. De duplici principio actionis, et quomodo aut in quibus potest defectus esse..... 44
114. Quid nomine boni vel mali intelligatur in rebus..... 44
115. Quod impossibile est esse aliquam naturam malum..... 45
116. Qualiter bonum et malum sunt differentię entis, et contraria, et genera contrariorum..... 45
117. Quod nihil potest esse essentialiter malum, vel summe; sed est corruptio alicujus boni.... 46
118. Quod malum fundatur in bono sicut in subjecto..... 46
119. De duplici genere mali..... 46
120. De triplici genere actionis, et de malo culpæ..... 47
121. Quod aliquod malum habet rationem pœnæ, et non culpæ.. 47
122. Quod non eodem modo omnis pœna contrariatur voluntati.. 47
123. Quod omnia reguntur divina providentia..... 47
124. Quod Deus per superiores creaturas regit inferiores..... 48
125. Quod inferiores substantię intellectuales reguntur per superiores..... 48
126. De gradu et ordine Angelorum. 49
- CAPUT 127. Quod inferiora corpora per superiora divinitus disponuntur. 50
128. Quod corpora cœlestia non imprimunt directe in intellectum vel voluntatem hominis..... 50
129. Quomodo intellectus humanus perficitur mediantibus potentiis sensitivis, et sic indirecte subditur corporibus cœlestibus. 50
130. Quod solus Deus movet voluntatem hominis, non res creata. 51
131. Quod Deus omnia gubernat, et quædam movet mediantibus causis secundis..... 52
132. Quod Deus omnia disponit immediate, nec diminuit suam sapientiam..... 52
133. Rationes quæ videntur ostendere quod Deus non habet providentiam de particularibus... 52
134. Solutio prædictarum rationum. 53
135. Quod Deus solus cognoscit singularia futura contingentia... 54
136. Quod Deus omnibus adest per potentiam, essentiam et præsentiam, et omnia immediate disponit..... 54
137. Quod soli Deo convenit miracula facere..... 54
138. Quod dicantur esse aliqua casualia et fortuita..... 55
139. Utrum fatum sit aliqua natura, et quid sit..... 55
140. Quod non omnia sunt ex necessitate..... 56
141. Quod divina providentia manente, multa sunt contingentia 56
142. Quod divinæ providentię certitudo non excludit mala a rebus. 56
143. Quod non derogat bonitati Dei quod mala permittat..... 57
144. Quod Deus specialiter homini providet per gratiam..... 57
145. Quod Deus per dona gratuita remittit peccata, quæ etiam gratiam interimunt..... 58
146. Quod peccata non sunt irremissibilia..... 58
147. Quod solus Deus potest remittere peccata..... 58
148. De quibusdam articulis fidei qui sumuntur penes effectus divinæ gubernationis..... 59
149. Quod omnia sunt facta propter hominem..... 59
150. Quis est ultimus finis hominis. 59
151. Quomodo homo ad æternitatem pervenit ut ad consummationem..... 60
152. Quomodo ad perfectam beatitudinem animæ rationalis oportet eam corpori reuniri..... 60
153. Quomodo separatio animæ a corpore sit secundum naturam, et quomodo contra naturam.. 60
154. Quod anima omnino idem corpus resumet, et non alterius naturæ..... 61
155. Resurrectio corporum futura non erit naturalis, sed miraculosa..... 61

CAPUT 156.	Quomodo poterit corpus idem numero reparari.....	61	quædam purgatoriæ pœnæ non æternæ, ad implendas pœnitentias de mortalibus non impletas in vita. ....	74	
157.	Quod non resurgemus ad eundem modum vivendi.....	63	CAPUT 186.	Quod sunt aliquæ pœnæ purgatoriæ etiam venialium. ....	74
158.	Quod post resurrectionem usus cibi et generationis cessabunt.	63	187.	Utrum æternam pœnam pati repugnet justitiæ divinæ, cum culpa fuerit temporalis. ....	74
159.	Quod tamen omnia membra resurgent.....	64	188.	Quod prædicta conveniunt etiam aliis spiritualibus substantiis, sicut animabus. ....	75
160.	Quod resurgent solum quæ sunt de veritate naturæ. ....	64	189.	Secundum quid gloria sanctorum vita æterna dicitur. ....	75
161.	Quod Deus omnia supplebit in corpore reformato, aut quicquid deficiet de materia. ....	64	190.	Secundus tractatus : de fide in quantum ad humanitatem Christi. ....	75
162.	Solutio ad quædam quæ objici possent. ....	65	191.	De præceptis datis primo homini, et ejus perfectione in primo statu. ....	76
163.	Quod resurrectio mortuorum in articulis fidei exprimitur. ....	65	192.	Quod ille perfectus status nominabatur originalis justitia; et de loco in quo homo positus est. .	76
164.	Qualis erit resurgentium operatio. ....	65	193.	De ligo scientiæ boni et mali, et primo hominis præcepto. .	77
165.	Quod Deus per essentiam videbitur, non per similitudinem. .	66	194.	De seductione diaboli ad Evam.	77
166.	Quod videre Deum est summa perfectio et delectatio. ....	66	195.	Quid fuit inductivum mulieri.	77
167.	Quod omnia videntia Deum confirmata sunt in bono. ....	66	196.	Quomodo pervenit peccatum ad virum. ....	77
168.	Quod corpora erunt omnino obedientia animæ. ....	67	197.	De effectu sequente culpam quantum ad rebellionem virium inferiorum rationi. ....	77
169.	De dotibus corporum glorificationum. ....	67	198.	Quomodo fuit pœna illata quantum ad necessitatem moriendi.	78
170.	Quod homo tunc innovabitur, et omnis creatura corporalis. .	68	199.	De aliis defectibus qui consequuntur in intellectu et voluntate. ....	78
171.	Quæ creaturæ innovabuntur, et quæ manebunt. ....	68	200.	Quomodo isti defectus derivati sunt ad posteros. ....	78
172.	Quod corpora cœlestia cessabunt a motu. ....	69	201.	Utrum defectus originalis justitiæ habeat rationem culpæ in posteris. ....	78
173.	De præmio hominis secundum ejus opera, vel miseria. ....	70	202.	Quod non omnia peccata traducuntur in posteros. ....	79
174.	Quod præmium hominis est post hanc vitam, et similiter miseria. ....	70	203.	Quod meritum singulare Adæ vel cujuscumque hominis non fuit sufficiens ad totam naturam reparandam. ....	79
175.	In quo consistat illa extrema miseria quantum ad pœnam damni. ....	70	204.	Quod non potuit primus homo redire ad pristinam innocentiam per gratiam. ....	79
176.	Quod illi qui sunt in illa extrema miseria non privantur cognitione naturali, nec dilectione. ....	71	205.	De reparatione humanæ naturæ per Christum. ....	80
177.	Quod iidem non carent libero arbitrio. ....	71	206.	Quod hominis reparatio per solum Deum fieri poterat. ....	80
178.	Quod peccata mortalia non dimittuntur post hanc vitam, sed bene venialia. ....	72	207.	Quod necessarium fuit Deum incarnari. ....	80
179.	Quod mali dolent se peccata commisisse quia perdidit quod elegerant, et tamen habent voluntatem obstinatam in malo. ....	72	208.	De aliis causis incarnationis Filii Dei. ....	80
180.	Quod corpora damnatorum erunt passibilia et tamen integra, et sine dotibus. ....	72	209.	De errore Photini circa incarnationem Filii Dei. ....	81
181.	Quod corpora damnatorum, licet passibilia, erunt tamen incorruptibilia. ....	72	210.	Error Nestorii circa incarnationem, et ejus improbatio. ....	81
182.	Quod pœna damnatorum est in malis ante resurrectionem. .	73	211.	De errore Arii circa incarnationem, et improbatio ejus. ....	82
183.	Quod pœna damnatorum est in malis tam spiritualibus, quam corporalibus. ....	73	212.	De errore Apollinaris circa incarnationem, et improbatio ejus. ....	82
184.	Utrum anima possit pati ab igne corporeo. ....	73	213.	De errore Eutychetis ponentis unionem in natura. ....	83
185.	Quod post hanc vitam sunt		214.	Contra errorem Manichæi di-	



	centis, Christum non habuisse verum corpus, sed phantasticum . . . . .	83
CAPUT 215.	Quod Christum verum corpus habuit, non de cœlo, contra Valentinum . . . . .	84
216.	Quæ sit sententia fidei circa incarnationem. . . . .	84
217.	Quod in ipso non sunt duo supposita . . . . .	85
218.	Quod in Christo est unum tantum suppositum et est una tantum persona et una hypostasis. . . . .	86
219.	Quod persona Filii Dei in Christo est persona filii hominis, et quod in Christo non est alia persona nisi æterna, et quod de Christo possunt dici quæ sunt dictæ naturæ et quæ sunt humanæ. . . . .	86
220.	De his quæ dicuntur in Christo unum vel multa. . . . .	87
221.	Quod oportuit Christum esse perfectum in gratia, et sapientia veritas . . . . .	89
222.	De plenitudine gratiæ Christi. . . . .	89
223.	De infinitate gratiæ Christi. . . . .	91
224.	De plenitudine sapientiæ Christi . . . . .	92
225.	De materia corporis Christi . . . . .	94
226.	De formatione corporis Christi, quod non est ex semine. . . . .	95
227.	De causa formationis corporis Christi . . . . .	95
228.	Expositio articuli in Symbolo positi de conceptione et nativitate Christi. . . . .	96
229.	Quod conveniens fuit Christum nasci ex virgine. . . . .	96
230.	Quod beata Virgo sit mater Christi . . . . .	97
231.	Quod Spiritus sanctus non sit pater Christi. . . . .	97
232.	De sanctificatione matris Christi . . . . .	97
233.	De perpetua virginitate matris Christi . . . . .	99
234.	De defectibus assumptis a Christo . . . . .	99
235.	Quare Christus mori voluit. . . . .	101
236.	De morte crucis. . . . .	102
237.	De morte Christi. . . . .	102
238.	Quod mors Christi fuit voluntaria . . . . .	102
239.	De passione Christi quantum ad corpus. . . . .	103
240.	De passibilitate animæ Christi. . . . .	104
241.	De oratione Christi. . . . .	105
242.	De sepultura Christi. . . . .	105
243.	De descensu Christi ad inferos. . . . .	106
244.	De resurrectione, et tempore resurrectionis Christi. . . . .	106
245.	De qualitate Christi resurgentis . . . . .	107
246.	Quomodo convenientibus argumentis Christi resurrectio demonstratur . . . . .	107
247.	De duplici vita reparata in homine per Christum. . . . .	108
248.	De duplici præmio humiliatiōnis, scilicet resurrectione et ascensione. . . . .	109

CAPUT 249.	Quod Christus secundum naturam humanam judicabit . . . . .	110
250.	Quod ipse omne iudicium dedit Filio suo, qui horam scit iudicii. . . . .	110
251.	Utrum omnes iudicabuntur, an non. . . . .	112
252.	Quod non erit examinatio in iudicio quia ignoret et de modo et loco. . . . .	113
253.	Quod sancti iudicabunt . . . . .	113
254.	Quomodo distinguuntur articuli de prædictis. . . . .	114

## PARS SECUNDA.

CAPUT 1.	. . . . .	115
2.	Quod hominibus convenienter indicitur oratio, per quam obtineant quæ a Deo sperant; et de diversitate orationis ad Deum et ad hominem. . . . .	115
3.	Quod conveniens fuit ad consummationem spei, ut nobis forma orandi traderetur a Christo. . . . .	116
4.	Causa quare quæ speramus debemus ab ipso Deo orando petere. . . . .	116
5.	Quod Deus, a quo orando sperata petimus, debet vocari ab orante. <i>Pater noster</i> , et non <i>meus</i> . . . . .	117
6.	Ubi ostenditur Dei patris nostri, quem oramus, potestas ad sperata concedendum, per hoc quod dicitur, <i>Qui es in cælis</i> . . . . .	118
7.	Qualia sint quæ sunt a Deo speranda; et de ratione spei. . . . .	119
8.	De prima petitione, in qua docemur desiderare quod cognitio Dei quæ est in nobis inchoata, perficiatur; et quod hoc si possibile. . . . .	119
9.	Secunda petitio, ut participes gloriæ nos faciat. . . . .	121
10.	Quod regnum obtineri est possibile. . . . .	126

## OPUSCULUM II.

CAPUT 1.	Quæ sit auctoris intentio . . . . .	128
2.	Qualiter sit disputandum contra infideles . . . . .	129
3.	Qualiter in divinis sit accipienda generatio. . . . .	129
4.	Qualiter in divinis sit accipienda processio Spiritus sancti a Patre et Filio. . . . .	130
5.	Quæ fuit causa incarnationis Filii Dei. . . . .	131
6.	Qualiter debet intelligi hoc quod dicitur: Deus factus est homo. . . . .	133
7.	Qualiter sit accipiendum quod dicitur verbum Dei passum et mortuum, et quod ex iis multum inconveniens sequitur. . . . .	136
8.	Qualiter sit accipiendum quod . . . . .	

	fideles sumunt corpus Christi; et quod ex hoc nullum inconveniens sequitur.....	138
CAPUT 9.	Quod est specialis locus ubi animæ purgantur antequam vadant ad Paradisum.....	139
10.	Quod divina prædestinatio humanis actibus necessitatem non imponat, et qualiter in hac quæstione procedendum sit...	142

## OPUSCULUM III.

CAPUT	1. Quod lex amoris fuit necessaria homini, ut daretur differens a lege timoris.....	144
	2. Quod lex charitatis debet esse regula omnium actionum.....	145
	3. Quæ bona facit charitas.....	145
	4. Quod laborandum est ad habendam caritatem, et quæ sunt etiam ad acquirendum necessaria.....	147
	5. Quæ requiruntur ad implendum præceptum de dilectione Dei.....	148
	6. Quis modus sit divinæ dilectionis, et quæ ei dare debemus..	149
	7. Quæ et quod ad dilectionem proximi nos inducunt.....	150
	8. De modo dilectionis proximi..	150
	9. Quod debemus etiam diligere inimicos.....	151
	10. Quæ ad attrahendum inimicum ad nos, non inducunt.....	152
	11. Quod antiqui diversimode errabant contra primum præceptum de adorando Deo.....	152
	12. Quæ inducunt nos ad adorandum Deum unum.....	153
	13. De secundo præcepto et quot modis dicitur vanum.....	154
	14. De tertio præcepto, et propter quæ datum fuit a Deo.....	156
	15. A quibus sabbato et die festa abstinere debemus.....	157
	16. In quibus sabbatum et festum debent occupari.....	158
	17. De quarto præcepto; propter quæ tenemur parentes diligere.	159
	18. Quæ bona acquirimus propter honorem parentum.....	160
	19. Quot modis dicitur aliquis Pater.....	160
	20. De quinto præcepto : quos prohibemur occidere et quot modis quis occidit.....	161
	21. Propter quæ prohibemur irasci et occidere.....	162
	22. De sexto præcepto : quæ mala committuntur adulterio.....	164
	23. Propter quæ vitanda sunt fornicatio et adulterium.....	164
	24. De septimo præcepto; quot modis committitur furtum.....	165
	25. Propter quæ vitandum est furtum.....	166
	26. De octavo præcepto; quot modis quis loquatur contra proximum.....	167

CAPUT 27.	Propter quæ debemus nolle mentiri.....	167
28.	De nono præcepto; propter quæ non debemus concupiscere aliena.....	168
29.	De decimo præcepto; quot modis regnat concupiscentia carnis, et per quæ vincitur.....	169

## OPUSCULUM IV.

TRACTATUS 1.	De articulis fidei.....	170
2.	De ecclesiæ sacramentis....	177

## OPUSCULUM V.

Petitio I et II.....	187
Petitio III.....	189
Petitio IV.....	191
Petitio V.....	193
Petitio VI.....	195
Petitio VII.....	196

## OPUSCULUM VI.

CAPUT	1. Quod B. Virgo excedit plenitudine gratiæ, familiaritate divina, et puritate, Angelos et archangelos secundum quid...	199
	2. Quot modis fructus ventris Virginis sit benedictus.....	201

## OPUSCULUM VII.

CAPUT	1. Fides quæ bona facit : quare tenemur credere quæ non videmus.....	203
	2. De primo articulo fidei : quod Deus unus provisor est omnium, et quot modis circa veritatem Dei antiqui erraverunt..	205
	3. De secundo articulo : quos errores circa creationem vitare debemus, et quæ bona consideratio creationis facit.....	206
	4. De tertio articulo : quibus modis circa Incarnationem erratum est, de natura verbi.....	209
	5. De articulo quarto : quot modis erratum est circa nativitatem Christi, et quæ bona ex ea nobis proveniunt.....	210
	6. De articulo quinto : quæ bona proveniunt nobis per mortem Christi.....	212
	7. De sexto articulo : propter quæ Christus voluit secundum animam ad inferos descendere, et quæ bona nobis inde proveniunt.....	215
	8. De septimo articulo : Qualiter resurrectio Christi differt a resurrectione aliorum et quomodo per eam iustramur....	216

CAPUT	9. De octavo articulo : Qualiter ascensio Christi sublimis, rationalis, et utilis.....	218
	10. De nono articulo : Quæ consideranda circa judicem, iudicium et iudicandos, et quæ remedia habent.....	219
	11. De Spiritu sancto.....	220
	12. De undecimo articulo : Quod Ecclesia est una, sancta, catholica, id est universalis, firma..	222
	13. De articulo duodecimo : Qualiter septem sacramenta sunt necessaria .....	224
	14. De articulo decimo tertio quantum ad resurrectionis utilitatem resurgentium omnium qualitatem .....	226
	15. De articulo quarto decimo : Quæ bona erunt in vita æterna....	227

OPUSCULUM VIII.

Quæstio 1.....	230
Quæstio 2, 3, 4.....	231
Quæstio 5, 6, 7, 8, 9, 10 .....	232
Quæstio 11, 12, 13, 14, 15.....	233
Quæstio 16, 17, 18, 19, 20, 21.....	234
Quæstio 22, 23, 24, 25.....	235
Quæstio 26, 27, 28, 29, 30, 31, 32, 33.....	236
Quæstio 34, 35, 36, 37, 38, 39, 40, 41, 42.	237
Quæstio 43, 44, 45, 46, 47, 48.....	238
Quæstio 49, 50, 51, 52, 53, 54 .....	239
Quæstio 55, 56, 57, 57, 59, 60.....	240
Quæstio 61, 62, 63, 64, 55, 66, 67, 68, 69.	241
Quæstio 70, 71, 72, 73, 74, 75, 76.....	242
Quæstio 77, 78, 79, 80, 81. ....	243
Quæstio 82, 83, 84, 85, 86.....	244
Quæstio 87, 88, 89, 90, 91, 92, 93, 94, 95.	245
Quæstio 96, 97, 98, 99, 100, 101, 102, 103.	246
Quæstio 104, 105, 106, 107, 108... ..	247

OPUSCULUM IX.

Page 248.

OPUSCULUM X.

Articulus 1, 2, 3.....	256
Articulus 4, 5, 6, 7, 8.....	257
Articulus 9, 10, 11, 12.....	258
Articulus 13, 14, 15, 16, 17, 18.....	259
Articulus 19, 20, 21, 22, 23.. ..	260
Articulus 24, 25, 26, 27.....	261
Articulus 28, 29, 30, 31, 32.....	262
Articulus 33, 34, 35, 36 .....	263

OPUSCULUM XI.

Quæstio 1, 2, 3, 4, 5.....	264
Quæstio 6.....	265

OPUSCULUM XII.

Pag. 266.

OPUSCULUM XIII.

CAPUT	1. Quid sit Verbum.....	268
	2.....	270

OPUSCULUM XIV.

CAPUT	1. De opinionibus antiquorum philosophorum.....	273
	2. Opinio Aristotelis et Avicennæ de numero substantiarum separatarum.....	275
	3. In quo conveniat et differat opinio Platonis et Aristotelis....	277
	4. De errore Avicennæ circa immaterialitatem Angelorum... ..	279
	5. De reprobatione erroris.....	280
	6. De solutione rationum Avicennæ .....	284
	7. De errore ponentium angelos non creatos, et ejus improbatione.....	287
	8. De errore ponentium angelos creatores, et eorum improbatione.....	290
	9. De opinione Platonis de ideis, et ejus improbatione.....	292
	10. De errore ponentium omnes substantias spirituales æquales, et ejus improbatio .....	293
	11. De errore dicentium Deum et angelos non habere singularium cognitionem .....	294
	12. Quomodo ostenditur Deum habere omnem cognitionem . . .	295
	13. Quomodo ostenditur Dei providentiam se extendere ad omnia. . . . .	298
	14. Solutio rationum prædictarum.	298
	15. Error Manichæorum circa prædicta, et ejus improbatio. . . .	300
	16. Quid secundum fidem catholicam sit tenendum de origine Angelorum.....	301
	17. Quid tenendum sit de conditione Angelorum .....	304
	18. Quid tenendum sit de distinctione Angelorum. ....	306

OPUSCULUM XV.

CAPUT	1. Quæ sit auctoris intentio. . . .	311
	2. Quod anima intellectiva sit actus et forma corporis, et quod aliquid animæ est intellectus .	311
	3. Rationes probantium intellectum nihil animæ esse, et earum solutiones .....	317

CAPUT	4. Quid circa hoc senserunt Peripatetici . . . . .	320
	5. In quo ostenditur per rationes quid tenendum . . . . .	323
	6. Ubi ostenditur quod intellectus possibilis non est unus omnibus . . . . .	327
	7. Rationes ponentium unitatem intellectus et earum solutiones.	330

## OPUSCULUM XVI.

## LIBER PRIMUS.

CAPUT	1. Quid significetur nomine regis . . . . .	336
	2. Quid plus expediat civitati vel provincia pluribus aut uno regi rectore . . . . .	338
	3. Quod regimen tyranni est pessimum . . . . .	339
	4. Quare subditis regia dignitas rectorum odiosa . . . . .	341
	5. Quod minus malum est ex monarchia in tyrannidem converti, et quod cum regno plurimum obtingat communius . . . . .	342
	6. Qualiter providendum est ne rex incidat in tyrannidem . . . . .	342
	7. Quod mundanus honor et gloria non sunt sufficiens præmium regis . . . . .	344
	8. Quod sufficiens præmium regis est a Deo expectandum . . . . .	346
	9. Quem gradum in beatitudine tenuerunt reges beati . . . . .	347
	10. Quæ bona perdant tyranni quæ regibus exhibentur . . . . .	349
	11. Quæ supplicia sustinebunt tyranni . . . . .	351
	12. Quid sit regis officium . . . . .	352
	13. Quid sit regi faciendum et quomodo . . . . .	352
	14. Quod ratio gubernationis mundi ex divina gubernatione sumenda est . . . . .	353
	15. Quod regnum ordinari debet ad beatitudinem consequendam principaliter . . . . .	355

## LIBER SECUNDUS.

CAPUT	1. Quod ad officium regis spectet in institutione . . . . .	356
	2. Quod locus habeat aerem salubrem . . . . .	357
	3. Quod habeat ubertatem propter motuum . . . . .	358
	4. Quid sit locus amœnus . . . . .	359
	5. Quod necessarium est regi et cuiuscumque domino abundare divitiis temporalibus, quæ naturales vocantur; et ponitur causa . . . . .	360
	6. Quod expedit regi habere alias divitias naturales, ut sunt armenta et greges, sine quibus domini bene regere terram non possunt . . . . .	361

CAPUT	7. Quod oportet regem abundare divitiis artificialibus, ut est aurum et argentum, et nummismata ex eis conflatum . . . . .	362
	8. Qualiter ad regimen regni et cuiuscumque domini, necessarii sunt ministri: ubi incidenter distinguitur de duplici dominio, politico et despotico; ostendens multis rationibus quod politicum oportet esse suave . . . . .	363
	9. De principatu despotico, quis est et qualiter ad regalem reducitur: ubi incidenter comparat politicum ad despoticum secundum diversas regiones et tempora . . . . .	364
	10. Habita distinctione domini, hic distinguitur de ministris secundum differentiam dominorum: et quædam genera ministrorum ostendit omnibus dominis communia: postea probat servitutem in quibusdam esse naturalem . . . . .	365
	11. Quod necessarium est regi et cuiilibet domino in sua jurisdictione munitiones habere fortissimas et rationes quare ibi multe ponuntur . . . . .	366
	12. Quod ad bonum regimen regni sive cuiuscumque domini pertinet stratas sive quascumque vias in regione vel provincia habere securas et liberas . . . . .	366
	13. Qualiter in quolibet regno et quocumque dominio necessarium est nummismata propria; et quot bona ex hoc sequuntur, et quæ incommoda, si non habeatur . . . . .	367
	14. Qualiter ad bonum regimen regni et cuiuscumque domini sive politice, pondera at mensuræ sunt necessariae, exemplis et rationibus persuadetur . . . . .	368
	15. Hic auctor declarat quod oportet regem et quemlibet dominum ad conservationem sui status adhibere sollicitudinem ut de aerario publico provideatur pauperibus: et hoc exemplis et rationibus probat . . . . .	368
	16. Hic auctor declarat qualiter oportet regem et quemcumque dominantem, ad cultum divinum intendere; et quis fructus ex hoc sequatur . . . . .	369

## LIBER TERTIUS.

CAPUT	1. Consideratur et probatur omnium dominium esse a Deo, considerata natura entis . . . . .	370
	2. Hoc idem probat ex consideratione motus cuiuslibet nature create . . . . .	371
	3. Hoc idem probat per considerationem finis . . . . .	372

- CAPUT 4. Hic auctor declarat, qualiter dominium Romanum fuit a Deo provisum propter zelum patriæ . . . . . 372
5. Qualiter Romani meruerunt dominium propter leges sanctissimas quas tradiderunt. . . . . 373
6. Quomodo concessum est eis dominium a Deo propter ipsorum civilem benevolentiam . . . . . 374
7. Hic auctor declarat, qualiter Deus permittit aliquod dominium ad punitionem malorum; et quod tale dominium est quasi instrumentum divinæ justitiæ contra peccatores . . . . . 375
8. Hic auctor declarat, quod interdum tale dominium cedit in malum dominantium, quia propter ipsorum ingratitude in superbiam elati graviter deprimuntur . . . . . 376
9. Hic auctor declarat, quod homo naturaliter dominatur animalibus silvestribus et aliis rebus irrationalibus, et quomodo : quod probatur multis rationibus. . . . . 377
10. Hic auctor declarat de dominio hominis secundum gradum et dignitatem; et primo de dominio Papæ qualiter præfertur omni dominio. . . . . 378
11. Hic auctor declarat de dominio regali, in quo consistit, et in quo differt a politico, et quomodo distinguitur diversimode secundum diversas rationes . . . . . 379
12. Hic sanctus Doctor declarat de dominio imperiali, unde istud nomen habuit originem, et de quibusdam aliis nominibus : ubi incidenter distinguuntur monarchiæ et quantum duraverunt. . . . . 381
13. Hic sanctus Doctor declarat de monarchia Christi, quomodo in tribus excellit, et Octaviano Augusto, quomodo gessit vices Christi . . . . . 382
14. Movetur quæstio de monarchia Christi; quo tempore incepit, et quomodo latuit, et quare : et duplex assignatur causa suæ occultationis, et primo ponitur una . . . . . 382
15. Secunda causa assignatur quare Dominus assumpsit vitam abjectam et occultam, licet esset verus Dominus mundi; et exponuntur verba Isaïæ Prophetæ de Christo . . . . . 383
16. Hic sanctus Doctor declarat quod isto modo aucta fuit respublica per exempla antiquorum Romanorum; et postea subdit de Constantino. . . . . 384
17. Qualiter imperatores Constantinopolitani sequentes a Constantino fuerunt obedientes et reverentes Ecclesiæ Romanæ : et hoc ostendit per quatuor Concilia, quibus dicti principes se subjecerunt. . . . . 385
- CAPUT 18. De duobus Conciliis sequentibus post alia quatuor, celebratis tempore Justiniani et Constantini junioris et quæ fuit ratio quare imperium translatum fuit a Græcis ad Germanos. . . . . 386
19. Qualiter diversificatus est modus imperii a Carolo Magno usque ad Ottonem tertium, et unde plenitudo potestatis summo Pontifici convenit. . . . . 386
20. Comparatio regalis domini inter imperiale et politicum qualiter convenit cum utrisque . . . . . 387
21. De dominio principum qui subsunt imperatoribus et regibus, et de diversis nominibus eorum quid importent . . . . . 388
22. De quibusdam nominibus dignitatum singularibus in quibusdam regionibus : et quale sit omnium istorum regimen . . . . . 389

## LIBER QUARTUS.

- CAPUT 1. De differentia inter principatum regni et principatum politicum, quem dividit in duos. . . . . 390
2. Hic ostendit necessitatem constituendi civitatem, propter communitatem necessariam humanæ vitæ, circa quam præcipue consistit principatus politicus. . . . . 391
3. Hic declarat hoc idem ex parte animæ, sive ex parte intellectus sive voluntatis, scilicet constitutionem civitatis esse necessariam . . . . . 391
4. De communitate civitatis, in quo consistat : ubi Aristoteles refert opinionem Socratis et Platonis, quam hic auctor declarat. . . . . 392
5. De opinione Socratis et Platonis circa mulieres, quomodo sint exponendæ rebus bellicis. . . . . 394
6. Assumit alteram partem quod non est conveniens mulieres exponi debere bellicis rebus; et respondet ad argumenta in contrarium facta . . . . . 394
7. Refert aliam opinionem dictorum Philosophorum quantum ad principatum, quem volebant esse perpetuum : circa quam disputat ad utramque partem. . . . . 395
8. Hic declarat melius esse in politia non perpetuare rectores; et respondet ad partem oppositam : ubi etiam dicit, nullum in Lombardia habere dominium nisi per viam tyrannicam, Duce Venetiarum excepto . . . . . 396
9. Hic disputat de communitate honorum quantum ad possessiones, quam quidam philosophus nomine Pheleas dicit debere adæquari in omnibus; et



	quod est falsum quod Lycurgus philosophus sensit . . . . .	397
CAPUT 10.	Agitur rursus de politia Platonis et Socratis quantum ad genera hominum qui requiruntur in ea; quæ sunt quinque; ubi multum disputatur de numero bellatorum. . . . .	398
11.	Hic declarat de politia Hypodami Philosophi, qui reprehenditur quantum ad genera hominum, quia ponit solum tria, et quantum ad numerum populi. . . . .	399
12.	Refert etiam opinionem ejusdem quantum ad possessiones, quas in tres partes dividit; et in quo salvatur sua positio. . .	399
13.	Ponit opinionem ejusdem circa judices et assessores politiae, ubi divisionem facit multiplicem et notabilem circa ea quæ sunt agenda per judices. . . . .	400
14.	De politia Lacedæmoniorum, quam reprehendit circa regimen servorum et mulierum, et circa bellatores. . . . .	401
15.	Reprehendit etiam dictam politiam quantum ad leges filiorum et judicium, movens quæstionem, utrum pauperes sint eligendi ad regimen politicum. . . . .	402
16.	Redit adhuc super politiam Lacedæmoniorum quantum ad ipsorum regem, reprobans modum quem tenebant circa ipsum, ostendens inconvenientia quæ sequebantur ex hoc . . . .	402
17.	Ex eadem causa ponit quædam in dicta politia Lacedæmoniae reprehensibilia; quæ erant materiae dissensionis in populo. .	403
18.	Hic declarat de politia Cretensi, et differentia ejus ad Lacedæmonicam; de auctoribus dictæ politiae, et de legibus Lycurgi. . . . .	404
19.	Hic declarat de politia Chalcedoniorum, qualiter famosa fuerit: et in quo conveniebant Lacedæmonii et Cretenses cum ipsis, et in quo differebant. . .	404
20.	Quomodo Aristoteles tradit in politia Chalcedoniorum documentum de electione principis, utrum dives vel pauper sit eligendus; et qualiter pauper virtuosus sustentari debeat; et utrum uni principi competant plura dominia . . . . .	405
21.	De politia Pythagoræ, quam didicit a prædictis Philosophis Minoe et Lycurgo: et quomodo totus suus conatus ad hoc fuit, assuefacere scilicet homines ad virtutes. . . . .	406
22.	De documentis pythagoricis sub figuris et ænigmatibus traditis, et de duobus pythagoricis fidelissimis amicis. . . . .	407
23.	In quo consistat perfecta politia, ex qua accipitur felicitas	

	politica; scilicet quando partes politiae sunt bene dispositæ, et sibi ad invicem correspondent. . . . .	407
CAPUT 24.	Dividit politiam tripliciter; et unamquamque partem prosequitur: et primo qualiter in partes distinguitur integrales secundum opinionem Socratis et Platonis. . . . .	408
25.	Hic ostendit sufficientiam partium integralium politiae quas Hypodamustradit et Romulus. . . . .	409
26.	Agit ulterius de aliis partibus politiae respectu regiminis, ubi verba exponuntur diversorum officialium. . . . .	409
27.	Hic declarat de partibus politiae quantum ad bellatores, quos distinguit secundum triplicem considerationem . . . . .	410
28.	Hic declarat de nominibus ducum et de numero cohortum, et quid significat unumquodque . . . . .	411

## OPUSCULUM XVII.

Pag. 413.

## OPUSCULUM XVIII.

CAPUT 1.	Quod temerarium est dicere quod hoc non sit forma absoluteionis, scilicet: ego te absolvo, etc. . . . .	417
2.	Rationes probare volentium dictam absoluteionis formam non debere teneri et earum solutiones. . . . .	418
3.	Quomodo adversarius nititur quamdam absoluteionem fingere. . . . .	421
4.	Quod impositio manus sacerdotis non est de necessitate hujus sacramenti. . . . .	422
5.	Objectiones contra prædicta, et earum solutiones. . . . .	423

## OPUSCULUM XIX.

CAPUT 1.	Quid sit fides, et de quibus sit. . . . .	424
2.	In quo agitur de personarum pluralitate, et essentiali unitate, et rerum creatione . . . . .	426
3.	De articulis ad Christum pertinentibus, et aliquibus Ecclesiae sacramentis . . . . .	430

## OPUSCULUM XX.

CAPUT 1.	In quo excluditur error, et asseritur veritas circa divinæ essentiali unitatem. . . . .	435
2.	In quo ostenditur personarum distinctionem in una individuali essentiali. . . . .	437

## OPUSCULUM XXI.

CAPUT	1. In quibus rebus fiat inquisitio per sortes . . . . .	439
	2. Ostenditur ad quem finem sortes ordinantur. . . . .	440
	3. In quo ostenditur quis sit modus inquirendi per sortes. . . .	441
	4. Unde sit sortium virtus. . . . .	442
	5. In quo ostenditur utrum sortibus liceat uti . . . . .	446

## OPUSCULUM XXII.

Pag. 449.

## OPUSCULUM XXIII.

Pag. 450.

## OPUSCULUM XXIV.

ART.	1. An fatum aliquid sit . . . . .	454
	2. Quid sit fatum. . . . .	456
	3. Utrum fatum necessitatem rebus imponat . . . . .	459
	4. An fatum sit scibile. . . . .	460
	5. In quo genere causæ fatum incidat. . . . .	462

## OPUSCULUM XXV.

CAPUT	1. De modo cognitionis sensitivæ. . . . .	465
	2. Quo ostenditur ubi separatur cognitio sensus et intellectus. . . . .	466
	3. Quo ostenditur quod est principium individuationis . . . . .	466

## OPUSCULUM XXVI.

CAPUT	1. Quid significetur communiter nomine entis et essentiæ. . . . .	468
	2. Quid sit essentia in substantiis compositis . . . . .	469
	3. Quomodo se habeat essentia ad rationem generis et differentię. . . . .	470
	4. Per quem modum sit essentia in substantiis separatis . . . . .	472
	5. Qualiter diversimode sit essentia in diversis . . . . .	474
	6. Quomodo sit essentia in accidentibus . . . . .	476
	7. Qualiter sit genus et differentia in accidentibus . . . . .	477

## OPUSCULUM XXVII.

Pag. 480.

## OPUSCULUM XXVIII.

CAPUT	1. In quo ostenditur per motus
-------	--------------------------------

	quæ sit natura materiæ, et qualiter non requiruntur dimensiones interminatæ, ut posuit Averroes, nec sunt formæ minus rei. . . . .	487
CAPUT	2. In quo ostenditur qualiter res constituitur ex materia et forma. . . . .	492
	3. In quo ostenditur qualiter possunt concedi dimensiones interminatæ. . . . .	494
	4. In quo ostenditur quomodo possibile sit ponere formam in homine sine esse . . . . .	496

## OPUSCULUM XXIX.

Pag. 502.

## OPUSCULUM XXX.

Pag. 504.

## OPUSCULUM XXXI.

Pag. 508.

## OPUSCULUM XXXII.

CAPUT	1. Quid sit tempus, et qualiter tempus in istis inferioribus participetur, et quæ Angelorum et eorum operationum mensura . . . . .	512
	2. Qualiter in toto tempore est iustans idem re, differens in ratione . . . . .	514
	3. Cujus sit mensura instans temporis et ævum. . . . .	515
	4. Quid mensurat operationes Angelorum . . . . .	517
	5. Quid sit subjectum ævi. . . . .	518

## OPUSCULUM XXXIII.

CAPUT	1. Quod contradictio est maxima oppositio, et quod eam immediate sequitur oppositio privativa . . . . .	520
	2. De oppositione contraria quod magis distat a contradictoria quam privativa . . . . .	522
	3. De oppositione relativa. . . . .	523
	4. Quomodo diversi modi transmutationum sequuntur oppositiones prædictas. . . . .	523
	5. Quomodo ex contrario fit contrarium. . . . .	526

## OPUSCULUM XXXIV.

Pag. 531.

## OPUSCULUM XXXV.

Pag. 533.

## OPUSCULUM XXXVI.

Pag. 549.

## OPUSCULUM XXXVII.

## LIBER PRIMUS.

CAPUT	1. Quod potestas terrena potius est timenda quam appetenda. . . .	552
	2. Quod habenti potestatem terrenam necessaria sit sapientia. . .	554
	3. Quod habenti potestatem et sapientiam multum necessaria sit bonitas. . . . .	556
	4. De erroribus qui sunt circa nobilitatem. . . . .	557
	5. De vera nobilitate. . . . .	559
	6. Quod principibus superbia sit cavenda et timenda, et humilitas amanda. . . . .	560
	7. Quod principi sit cavendum mendacium. . . . .	562
	8. Quod principi contemnenda sit vanitas. . . . .	564
	9. De vanitate divitiarum. . . . .	565
	10. De vanitate deliciarum. . . . .	565
	11. De vanitate gratiæ mundanæ. . . . .	567
	12. De vanitate mundanæ laudis et gloriæ. . . . .	568
	13. Quod veritas multum sit amanda principi. . . . .	570
	14. Quod clementia multum deceat principem. . . . .	571
	15. Quod pietas necessaria sit principi. . . . .	572

## LIBER SECUNDUS.

CAPUT	1. Quod fides sit necessaria cuilibet homini. . . . .	573
	2. Quod specialiter fides sit necessaria principi. . . . .	574
	3. Qualis debeat esse fides principis. . . . .	576
	4. Explanatio descriptionis spei. . . . .	576
	5. Quod spes sit necessaria cuilibet homini. . . . .	577
	6. Quod spes sit necessaria maxime principi. . . . .	577
	7. De his quæ adversantur spei. . . . .	578
	8. Quod timor Dei necessarius sit omni homini. . . . .	579
	9. Quod maxime sit timendum principi. . . . .	580
	10. De his quæ valent ad hoc quod princeps ametur a Deo. . . . .	581
	11. De signis quibus perpenditur quod Deus ametur a principe. . . . .	582
	12. De his quæ incitare debent principem ad amorem proximi. . . . .	583
	13. Quæ pertineant ad bonum principem, a diversis auctoribus collecta. . . . .	585

## LIBER TERTIUS.

CAPUT	1. Ne princeps se neglecto circa alios occupetur. . . . .	586
-------	---	-----

CAPUT	2. Ut princeps se perfecte scrutetur. . . . .	587
	3. Quod princeps subditis suis bona eorum non auferat. . . . .	587
	4. Quod princeps actionem consideratione præveniat. . . . .	588
	5. Quod princeps trina consideratione quod facturus est præveniat. . . . .	590
	6. Quod princeps frequenter cogitet de se quid sit, quis, qualis. . . . .	592
	7. Quod humilitas est astutissima. . . . .	593
	8. De incitantibus ad humilitatem. . . . .	594
	9. De mortis memoria. . . . .	596
	10. Ut princeps a servitute diaboli et vitiorum se custodiat. . . . .	597

## LIBER QUARTUS.

CAPUT	1. Quod duabus de causis cavendum est principi ne habeat juxta se malos. . . . .	597
	2. Quod necessarium sit principi ut ad consilia bene se habeat. . . . .	598
	3. Quod acceptio munerum multum sit cavenda et timenda principi. . . . .	599
	4. De quibusdam quæ sunt reprehensibilia in acceptatoribus munerum. . . . .	600
	5. Quod multum sit timenda rapina principi in se et collateralibus et ministris inferioribus. . . . .	600
	6. Quod in aliquibus raptores diabolo sunt deteriores. . . . .	601
	7. Quod Deus multum sit puniturus raptores. . . . .	601
	8. De pœnis quas Deus infert raptoribus in præsentia. . . . .	602
	9. De vitiis quæ in principibus et ministris eorum solent abundare. . . . .	603
	10. Quod princeps cum discretionem debeat eligere quem constituat super familiam suam. . . . .	603

## LIBER QUINTUS.

CAPUT	1. Quod parentes generaliter debent esse solliciti de eruditione proli. . . . .	604
	2. Quod negligentia parentum circa hanc eruditionem multum est reprehensibilis. . . . .	604
	3. Quod principes de hac eruditione debent esse solliciti. . . . .	606
	4. Quod puerilis ætas optima est eruditioni et morum informationi. . . . .	606
	5. Quod multa bona sequuntur ex hoc quod aliquis ab adolescentia portat jugum Domini. . . . .	607
	6. Quod multa mala sequuntur ex hoc quod aliquis ab adolescentia portat jugum diaboli. . . . .	607
	7. Quod negligens in adolescentia sua informationem in moribus valde est culpabilis. . . . .	608
	8. De repromissione nequissima quæ hujus negligentiae causa existit. . . . .	609



CAPUT	4. De fidelitate domini ad subditum, et subditi ad dominum . . . . .	662
	5. De peccato ingratitude et contemptu Dei et Angelorum in principibus impiis . . . . .	662
	6. De pœna principum impiorum . . . . .	662
	7. De pertinentibus ad bonum principem . . . . .	663
	8. Quod cavendum sit superbia principum . . . . .	664

## LIBER SEPTIMUS.

CAPUT	1. Quod officium militiæ sit laboriosum, honorabile et periculosum . . . . .	665
	2. Quod patientia valde sit necessaria principi et militibus . . . . .	666
	3. Quomodo princeps vel miles se debeat habere armando, ad pugnam exeundo, et civitatem obsidendo . . . . .	667

CAPUT	4. Quod vana gloria sit timenda principi et militibus . . . . .	668
	5. Quod ira principi valde sit periculosa . . . . .	669
	6. Quod guerra multum sit timenda et cavenda principi . . . . .	669
	7. Quod peccatum multum debet odiri . . . . .	670
	8. De malis quæ ex guerris sequuntur . . . . .	670
	9. De amore Christi et sapientum ad pacem . . . . .	671
	10. Quod peccatum incendiarium exosum debet esse principi . . . . .	672
	11. Quod peccatum homicidii timendum et cavendum sit principi . . . . .	673
	12. De peccatis quæ dicuntur clamare ad Deum . . . . .	673

FINIS

INDICIS VOLUMINIS VIGESIMISEPTIMI.







s - Opera Omnia  
d.) vol. 27 # 1527

PONTIFICAL INSTITUTE OF MEDIAEVAL STUDIES  
59 QUEEN'S PARK CRESCENT  
TORONTO—5, CANADA  
1527 •

